



Xela wezria cube nen salmo ca'

New Testament and Psalms in Zapotec, Tabaa

Contents

SALMO CA'	1
DIZRA' CHAWE' CA NACA CHEE JESUCRISTO DA BZUAJ SAN MATEO	112
DIZRA' CHAWE' CA NACA CHEE JESUCRISTO DA BZUAJ SAN MARCOS	167
DIZRA' CHAWE' CA NACA CHEE JESUCRISTO SDA BZUAJ SAN LUCAS	202
DIZRA' CHAWE' CA NACA CHEE JESUCRISTO DA BZUAJ SAN JUAN	258
DA CA' BELÚN BENNE' GUBÁZ CHEE CRISTO	299
DA BZUAJ SAN PABLO CHEE BI CHEE CRISTO ZAJ ZRABE' XEZRE ROMA	350
DIZRA' NEDXU DA BZUAJ SAN PABLO CHEE BI CHEE CRISTO ZAJ ZRE'E XEZRE CORINTO	373
DIZRA' GUDXUPE' DA BZUAJ SAN PABLO CHEE BI CHEE CRISTO ZAJ ZRE'E CORINTO	394
DIZRA' BZUAJ SAN PABLO CHEE BI CHEE CRISTO ZAJ ZRE'E XEZR LA XU GALACIA	408
DIZRA' BZUAJ SAN PABLO CHEE BI CHEE CRISTO ZAJ ZRE'E XEZRE ÉFESO	416
DIZRA' BZUAJ SAN PABLO CHEE BI CHEE CRISTO ZAJ ZRE'E XEZRE FILIPOS	423
DIZRA' BZUAJ SAN PABLO CHEE BI CHEE CRISTO ZAJ ZRE'E XEZRE COLOSAS	428
DIZRA' NEDXU BZUAJ SAN PABLO CHEE BI CHEE CRISTO ZAJ ZRE'E XEZRE TESALÓNICA	433
DIZRA' GUDXUPE' BZUAJ SAN PABLO CHEE BI CHEE CRISTO ZAJ ZRE'E XEZRE TESALÓNICA	438
DIZRA' NEDXU BZUAJ SAN PABLO CHEE TIMOTEO	441
DIZRA' GUDXUPE' DA BZUAJ SAN PABLO CHEE TIMOTEO	448
DIZRA' DA BZUAJ SAN PABLO CHEE TITO	453
DIZRA' BZUAJ SAN PABLO CHEE FILEMÓN	456
DIZRA' DA NAZÚAJ CHEE BENNE' HEBREO CA'	458
DIZRA' CHEE DIOS DA BZUAJ SANTIAGO	474
DÍZRA'DAU' NEDXU DA BZUAJ SAN PEDRO	480
DIZRA' GUDXUPE' DA BZUAJ SAN PEDRO	486
DIZRA' NÉDXUDAU' DA BZUAJ SAN JUAN	490
DIZRA'DAU' GUDXUPE' DA BZUAJ SAN JUAN	496
DIZRA'DAU' GUXUNNE' DA BZUAJ SAN JUAN	497
XTIZRA DIOS DA BZUAJ SAN JUDAS	498
DIZRA' DA BLE'E JESUCRISTO JUAN	500



Xela wezria cube nen salmo ca'

New Testament and Psalms in Zapotec, Tabaa

Language: Zapotec, Tabaa (Tabaa Zapotec)

Provided by: Wycliffe Bible Translators, Inc.

This print-on-demand edition of Scripture is produced and provided at cost by the Digital Bible Society in partnership with the Bible League of Canada, Open Doors International, and other missions and translation agencies. To order additional copies of this or other Bibles, please visit www.dbs.org (USA), www.bibleleague.ca (Canada), and www.opendoors.org (Europe).

Copyright and Permission to Copy

Copyright © 1981 Wycliffe Bible Translators, Inc.

This translation is made available to you under the terms of the Creative Commons Attribution-No Derivatives license 4.0. You may share and redistribute this Bible translation or excerpts from it in any format, provided that:

You include the above copyright information.

You do not make any derivative works that change any of the actual words or punctuation of the Scriptures.

Pictures included with Scriptures and other documents are licensed just for use with those Scriptures and documents. For other uses, please contact the respective copyright owners.

PDF, ePub, and MOBI Bible covers and design are copyrighted 2017 by the Digital Bible Society (www.dbs.org).

PDF generated on 2017-08-24 from source files dated 2017-08-24.

d132f93b-3037-5418-9c53-4341195fce75

ISBN: 978-1-5313-0746-2

SALMO CA'

1 Ba neza zrentę naca na cheę bėnnea' quebe dxezi'e da dxuluzėajni'i benne' węn da caleła ca' lę', ne quebe dxunę' tuze benne' dul-la ca', ne quebe dxunę' tu zren benne' ca' dxelún lę' cheę Dios.

² Zue' xel-la' dxebé lawe' da dxuzúe' dizra' da nadxixruj bea Xránadxu, ne ca naca da nadxixruj bea na, te zra ne chizrela dxelaba lazre' na.

³ Benne' nigá naque' ca tu xaga zua na dxu'a xegu nisa, da dxunna na da zixre cheę na lu beu' cheęqueze na, ne xrlegue na quebe dxase na. Ca naca da dxun benne' nigá, dxępe ban na.

⁴ Quegá caní zaj naca benne' węn da caleła ca'. Zaj naque' ca tu xizre laga' da dxua be' bdunu'.

⁵ Quebe xelexegá'ana chawe' benne' węn da caleła ca' gate guchi'a Dios cheę', ne quebe xelú'u benne' dul-la ca' naga zaj nazraga benne' xrlátaje ca'.

⁶ Dxezaca ba lazre' Dios ca da dxelún benne' xrlátaje ca'. Da dxelún benne' węn da caleła ca' che na lę' naga xelebía xi'e.

2 ¿Bizr cheę na' dxeledábaga benne' xęzr la xu ca' neda'?

¿Bizr cheę na' dxululaba lázrequeze bėnneache da guzúa na neda' chalá'ala?

² Dxeledábagaqueze benne' wenná bea ca', ne dxelún tuze dizra' benne' ca' dxelenná bea ca xelunę' cheę Xránadxu Dios, ne cheę Bėnnea' gucá'a Lę'.

³ Dxelennę': "Guselá cuínadxu lu xel-la' dxenná bea cheę', ne guzúadxu chalá'ala da zaj nadxixruj bė'ęnę' dxi'u."

⁴ Naga dxe' Xránadxu xabáa dxuzrizre'. Quebe dxezí' lenę' cheę da dxelegú'u lazre' xelunę'.

⁵ Lu xel-la' dxezrá'a cheę' dxedil-lę' lę', ne lu xel-la' snia cheę' dxuchebe' lę'.

⁶ Dxennę': "Lu xi'a lą'azxa chia', xi'a Sión ba nuzúa' benne' gaque' Wenná Bea waláz chia' neda'."

⁷ Dxenná Wenná Bea na': "Guzenda' le'e da guzre Xránadxu neda'."

Guzre' neda': "Lue' nacu' Zri'ina'. Ná'aqueze naca' Xrau'.

⁸ Gunabe neda', na' gunna' Lue' xúgute cue' xęzr la xu ca', na' gaca chiu' dute' ca naca xęzr la xu.

⁹ Guzízxenu' bėnneache xęzr la xu ca' nen vara xia, ne ca tu dx'e'e xu guzuzru' lę'."

¹⁰ Na'a, le'e, wenná bea, le xene da nigá dxuzėajni'ida' le'e.

Le gusede da nigá dxusízreda' le'e, benne' dxelenná bea lu xęzr la xu.

¹¹ Le gun zrin cheę Xránadxu Dios, dute' xel-la' dxezrebe cheęle.

Nen xel-la' dxezrize cheęle, le be lau Lę'.

¹² Le gapa ba lą'ana Zrí'ine' cheę quebe zre'e,

checa' cuía xile la neza cheęle, lawe' da la zra'atę Lę'.

Da ba neza zrentę naca na cheę xúgute benne' dxuluxrén lazre' Lę'.

3 Xrana' Dios, ba naxánle'e benne' dxeledábague' neda'.

Benne' zantę dxeledíl-lalęnę' neda'.

² Benne' zantę dxelennę' chia': "Quebe guselá Dios lę'."

³ Lue', Xrana' Dios, dxucú'uju' neda'.

Nacu' Benne' dxebélena', ne Benne' dxuzę' chawe' neda'.

⁴ Gudxezre xa'a, bláwizra' Xrana' Dios,

na' Le' bechebe' chia' naga zue' lu xi'a
lá'azxa chee'.

⁵ Guta', ne gusia',

na' bebana' lawe' da nuxru Xrana' neda'.

⁶ Quebe zreba' gaxúa gaxúa bénneache,
benne' zaj naxéchaje' neda'.

⁷ Guzé, Xrana' Dios.

Bselá neda', Dios chia'.

Ben we' xraga benne' ca' dxeledíl-lalene'
neda',

ne guzuzruij lazxa benne' xriwe' ca'.

⁸ Xel-la' weselá za' lu na'u, Xrana' Dios.

Ben da chawe' chee' bénneache chiu'.

4 Bechebe chia' gate dxuláwizra' Lue',
Dios.

Nacu' Benne' dxuchi'e ca da dxuna'.

Gate guzúa' lu da stebe, Lue' btipu' lazra'.
Bexache lazre' neda', ne bene ca da dx-
uchálajlena' Lue'.

² Le'e, bénneache, ¿ájatescha' gucá'ana
díjtjale neda'?

¿Ájatescha' zri'ile da quebe zaca, ne
chéajjele da wen lazre'?

³ Le xexúnbea ba gucá'a Xránadxu
nu benne' dxape' Le' ba lá'ana.

Xrana' Dios xenne' gate dxuláwizra' Le'.

⁴ Le zrebe lau Dios, ne quebe gunle dul-
la.

Le gulaba lazre' chee' naga dxásale, ne le
sua zrize.

⁵ Le gute lau Le' béadu ca' lu da naca du
lazre',

ne le guxrén lázre' Xránadxu Dios.

⁶ Benne' zante dxeleñé': "¿Nuzra gun
gá'anatu' chawe'?"

Dute xel-la' zri'i lazre' chiu' bxue netu',
Xran.

⁷ Lue' bzu' xel-la' dxebé lu xichaj
lázrdawa',

da naca na zrendxa ca da zaj napa benne'
zaj nápalé'e zrua',

ne xrise uva wal-la.

⁸ Dute xel-la' dxebeza zri lazre' gata', ne
gasia',

lawe' da dxunu' Lue', Xran, zua' zri'a
chawe'.

5 Bze naga dizra' chia', Xran.

Bde lazre' ca dxebezre lazra'.

² Bene ca guchálajlena' Lue', Wenná Bea
chia', ne Dios chia', q lawe' da
guláwizraja' Lue', Dios.

³ Xran, che zílala xennu' chi'a.

Che zílala xídaqueza' lau Lue', ne wabeza
lazra' Lue'.

⁴ Nacu' Dios quebe dxezaca ba lazru' da
calela.

Benne' wen da calela quebe súaqueze'
naga zu' Lue'.

⁵ Quebe dxu'u lataj xelezrín benne' wen
da calela lau'.

Dxecuídenu' xúgute benne' dxelune' da
zrinnaj.

⁶ Guzría xí'quezu' benne' ca' dxelezí xe'e.
Guzú' chalá'ala benne' wete benne', ne
benne' guzrí xe'.

⁷ Neda' waca chu'a lizru' lawe' da
nazrí'ile'enu' neda'.

Güe lá'ana' Lue' lu xudau' lá'azxa chiu'
dute xel-la' dxezrebe.

⁸ Bsi neda' chee' guna' da xrlátaje chiu',
Xran,

lawe' da zrále'e benne' dxeledábague'
neda'.

Gulú'u neda' neza chawe' chiu'.

⁹ Benne' caní quebe dxeleñé' da li.

Lu xichaj lázrdawe' xu'u da calela.

Xedxu lbé'e zaj naca na ca tu ba chee'
benne' gate da naxalaj na.

Zaj nupé'e dizra' chawe' chee' da zaj naca
na da wen lazre'.

¹⁰ Bde benne' ca' lu da ba xa', Xrana' Dios.
Ben cheajlecházíe' cáteze zaj naca
xrtízraqueze'.

Lawe' da naxánle'e da calela da dxelune'
ne lawe' da guledábague' Lue', bebáje'
chalá'ala.

¹¹ Welebéle'e benne' ca' dxuluxrén lazre'
Lue'.

Welebézre xá'aqueze' dute xel-la'
dxelebé

lawe' da dxucú'uju' le'.

Lau Lue' welebélē benne' ca' zaj nazrí'ine' Lue'.

¹² Gúnquezu' da chawe' chee benne' xrlátaje, Xran.

Gucu'uju' bēnnea' lawe' da dzezaca ba lázreḷenu' lē'.

6 Lue', Xran, quebe til-lu' neda' lu xel-la' snia chiu', ne quebe gudéu' neda' ba xa' lu xel-la' dxezrá'a chiu'.

² Bexache lazre' neda', Xran, lawe' da quebe chawe' zua'.

Bexún neda', Xran, lawe' da dxedéa' xel-la' zi'.

³ Stébele'ē zua xichaj lázrdawa'.

Xran, ¿bátala gácalenu' neda'?

⁴ Gudá, Xran, bselá bēnne'du xu'a.

Bselá neda' dutē xel-la' zri'i lazre' chiu'.

⁵ Naga zaj zra' benne' gate ca', quebe nu dxeajsá lazre' Lue'.

Lu lataj ba xa' ¿núzraqueze güe lá'ana Lue'?

⁶ Ba dxexedú lazra' lawe' da dxebezre lazra'.

Tu zre' tu zre' dxebísane ga dxásia' nisa da dxebezra'.

Dxusebisa' xrcugua' nisa da dxebezra'.

⁷ Ba dxane xiaj lawa' xel-la' dxebezre.

Ba bebízrqueze nisa xuzru xiaj lawa' lawe' da zrále'ē

benne' dxulusaca zi'ē neda'.

⁸ Le cuasa naga zua', xúgutele dxunle da zrinnaj

lawe' da ba ben Dios dxebézrele'a.

⁹ Xrana' Dios ba benne' da dxata' xueda' Lē'.

Ba guz' Xrana' Dios da dxuchálajlenu' Lē'.

¹⁰ Dxelexedué'e, ne zaj zua lu da sté-bele'ē xúgute

benne' dxeledábague' neda'.

Chadiṭe xelexebigue' naga zua', ne xelexedué'ene'.

7 Xrana' Dios, dxuxrén lazra' Lue'.

Gúcale neda' ne bselá neda' lu na' benne' ca' dxulusaca zi'ē

neda',

² chee quebe xelēl-lē' neda' ca dxun bezre xixre',

na' xuluzúruje' neda' naga quebe nu chilá' nu guselá neda'.

³ Xrana' Dios, che bēna' neda' caní:

Che bi da zrinnaj ben ni'a na'a.

⁴ Che bi da calela bēna' chee benne' zue' chawe' nen neda'.

(Bselá' bēnnea' dxedábague' neda' lácala quebe bi nuna' chee'.)

⁵ Che caní bēna',

bē lataj benne' dxedábague' neda' gau zi' ne xezrúnene' neda'.

Bē lataj bēnnea' guchuchu guléaje' neda' lu xu,

ne xusunitie' xel-la' ba lá'ana chia'.

⁶ Xran, dutē xel-la' dxezrá'a chiu', guzē.

Bexechaj benne' ca' dxulusaca zi'ē neda' lu xel-la' dxelezrá'a chee'.

Gusel-la da gácale na neda' gate guchi'u da dxaca chia'

ca da gunná be'u.

⁷ Xúgute benne' zaj zre'ē xezr la xu xelezrague' lau'.

Gunná be'e benne' ca' dutē xel-la' szren chiu'.

⁸ Lue', Xran, guchi'u chee benne' xúgute xezre.

Bchí'a ca da nuna' lu da naca xrlátaje, ne lu da naca du lazre' chia'.

⁹ Ben cheajsé naze da zrinnaj da dxelún benne' wēn da calela ca',

san bzua chawe' benne' xrlátaje,

lawe' da nacu' xrlátaje, Dios, ne dxenná'u da xu'u

xichaj lázrdau bēnneache.

¹⁰ Díósqueze dxucu'uje' neda'.

Dxuselé' benne' zaj naque' du lazre'.

¹¹ Xlátaje dxuchi'a Dios chee da dxelún bēnneache.

Tu dxezrá'azqueze Dios da dxelún benne' wēn da zrinnaj ca'.

¹² Che quebe xelexíaje lazre' Dios gulé' xia chee'.

Ba nuzúa cuásate' xaga nalá xéche'ze chee'.

¹³ Ba naxrúa cuásate' xia chee' ca' chee wedil-la.

Ba nuzúa cuásate' xaga nalá xéche'ze da dxelala.

¹⁴ Benne' wen da zrinnaj dxugú'u lazre' ca da calela gune'.

Xu'u lázrdawe' da zrinnaj da gune', na' dxebéajé' da wen lazre'.

¹⁵ Ba gudene' tu xedxu situj naga cheajlechaze bénneache, na' lézqueze' xeajcházie' lu xedxu na'.

¹⁶ Da zrinnaj da bene' dxebugue na léqueze',

na' da bsaque' bénneache xezrizre na xíchaje'.

¹⁷ Güe lá'anaqueza' Xrana' Dios ca da xrlátaje da dxune',

ne gúl-laqueza' chee La Xrana' Dios, Bénnea' naque' szrenté.

8 Lue' Dios, Xránantu', zrente naca Lau' du gabí'i xezr la xu.

Zrendxa naca xel-la' szren chiu' ca xabáa.

² Bidu ca', ne bidu dxe'ene ca' dxelúl-labe' ca naca na.

Zúaquezu' lataj chawe' naga quebe xelezrín benne' ca'

dxeledábage' lue'.

Dxuzúa zriu' benne' dxeledábage' lue', ne benne' dxelecuídene' Lue'.

³ Gate dxenná'a xabáa da nunu' Lue', ne beu', ne belaj ca', da ca' nuzú' cha chee na,

⁴ na' dxucheba': "¿Ájazra naca bénneache, dxulaba lazru' chee le'?"

¿Ájazra naca bénneache, dxe'u gunne xue le'?"

⁵ Benu' le' látezdxa szren ca nacu' Lué'queze,

ne bzu' chee' xel-la' szren, ne xel-la' ba lá'ana.

⁶ Benu' dxenná bé'ene' xúgute da ca' nunu'.

Xúgute na bdeu' lu ne'e,

⁷ zrila' ca', ne bezre ca',

ne xúgute be xixre' ca',

⁸ be zaj zua xrila, ne bela ca',

ne xúgute da zaj zua na lu nísadau'.

⁹ Xránantu', Dios,

szrenté naca Lau' du gabí'i xezr la xu.

9 Xran, dute lázrdawa' güe lá'ana' Lue'.

Guzenda' bénneache ca zaj naca da zrente da benu'.

² Wabéquezda', ne gúl-laqueza' ca naca chiu'.

Gul-la' chee lau' Lue', nacu' Dios zrente.

³ Buluzrinnuj benne' dxeledábage' neda'.

Xeajlechazie', ne belexenitie' lau Lue'

⁴ lawe' da nucá'ana chawu' da xrlátaje da dxuna'.

Dxe'u lataj blau chiu', ne lu da xrlátaje dxuchi'u.

⁵ Gudil-lu' benne' xezr la xu ca',

ne bzria xi'u benne' wen da calela ca'.

Bsulu' la benne' ca' chadía chacanna.

⁶ Ba gulebía xi' benne' dxeledábage' neda'.

Chadía chacanna zaj nazrinnaj lataj chee benne' ca',

ne xezre chee' ca', da ca' bchínnuju' Lue'.

Netú benne' cheajsá lazre' benne' ca'.

⁷ Xránadxu Dios súatequeze' chadía chacanna.

Ba nucueze' lataj blau chee' naga guchi'e chee bénneache.

⁸ Lu da xrlátaje guchi'e chee bénneache dute xezr la xu,

ne chee benne' xúgute xezre ca' lu da naca li lazre'.

⁹ Xránadxu Dios gaque' ca tu lataj ga xelezrá chawe' benne' xache',

naga xelezré'e chawe' gate zrin zra chee da zi' da xa'.

¹⁰ Benne' ca' zaj núnbe'e Lue', Xran, xuluxrén lazre' Lue',

lawe' da quebe bsan lazru' benne' ca' belexilaje' Lue'.

¹¹ Le gul-la chee Xránadxu, Bénnea' zue' xezre Sión.

Le guzén benne' xezre ca' ca zaj naca da
ca' nune',

¹²lawe' da dxeajsá lazre' chee benne' ca',
ne dxexebéaj lazre' chee benne' wete
benne'.

Quebe gul-la lazre' ca da dxululáwizra
benne' ba xache' ca' Le'.

¹³Bexache lazre' neda', Xran.

Gunná' da dzezaca' lu ni'a na' benne' ca'
dxelecuídene' neda'.

Dxeca'u neda' lu na' xel-la' gute,

¹⁴chee guzenda' bénneache da dxue
lá'ana' Lue',

naga dxu'untu' xezre Sión,

ne chee beda' lawe' da bseláu' neda'.

¹⁵Xeajlechaze benne' xezr la xu ca' lu
xedxu da gulene'.

Xeajlechu'e lu xralaj da bulucueze'.

¹⁶Xránadxu Dios blé'ene' ca da zaj
naque' ne chee

da zi' da xa' da gudichaj be'e chee benne'
ca' dxelune' da calela.

Xeajchaze benne' wen da calela na' lu da
nun ni'a ná'queze'.

¹⁷Benne' wen da calela ca' xeledéqueze'
lu lataj ba xa'.

Xúgute benne' ca' dxelal-la lazre' Xrán-
nadxu Dios.

¹⁸Quegá chadía chacanna gal-la lazre'
Dios benne' xache' ca',

ne quegá tu chí'ize xenite da dxelebeza
lazre' le'.

¹⁹Guxasa, Xrana' Dios.

Quebe gu'u lataj xelexegá'ana szrén-
queze bénneache.

Xelalá' lau' benne' xezr la xu ca' chee
guchi'u chee'.

²⁰Xran, ben xelezrebe benne' ca' Lue'.

Ben xelexúnbea benne' xezr la xu ca' zaj
naque' bénneacheze.

10 ¿Bizr chee na' zu' zitu', Xran?

¿Bizr chee na' dxucache cuinu'
gate dxeledé xel-la' zi'

bénneache chiu'?

²Benne' wen da calela dxenáu zi' xuzre'
benne' xache'

lu xel-la' dxucá'ana szren cuine',

na' xeajchaze benne' xache' na' lu da ba
nucuéza bénnea'.

³Dxucá'ana szren cuine' ca naca da dx-
ezá lazre'.

Nupé'e dizra' da dxenné' chee benne'
dxucude',

na' dxucá'ana dí'taje' Xránadxu Dios.

⁴Benne' wen da calela na' lu xel-la' dx-
ucá'ana szren cuine'

quebe dxape' Dios ba lá'ana,

ne quebe dxéque' che zua Dios.

⁵Tu dxúnzqueze' da calela,

ne quebe dxéque' guchi'u Lue' ca da
dxune'.

Dxuzié' chalá'ala xúgute benne' dx-
eledábague' le'.

⁶Lu xichaj lázrdawe' dxenné': "Quebe bi
seque' guzaga na neda'.

Cabata' bi gaca chia' da calela."

⁷Tu dxennézqueze' dizra' schanni',

ne da wen lazre', ne ca naca da calela da
gune'.

Dxeledxúaj dxu'e dizra' calela, ne dizra'
xálaze.

⁸Dxu'a xezre ca' dxucache cuine' chee
quele' bénneache.

Bagácheze dxutie' benne' dxeledeze' na'.

Bagácheze dxenné'e chee bi gune' chee
benne' xache' ca'.

⁹Bagácheze dxebeze' ca dxun bezre
xixre'.

Dxebeze' ga séquene' quel-le' benne'
xache' ca'.

Dxel-le' benne' xache' lu xralaj chee', ne
dxexu'e le'.

¹⁰Dxine' xu bénnea' gudel-le'.

Dxusaca zie' benne' zan nen ne'e wal-la.

¹¹Lu xichaj lázrdawe' dxenné': "Nal-la
lazre' Dios benne' caní.

Nucache lawe', ne quebe lé'ene' da
dxuna'."

¹²Guxasa, Xrana' Dios, ne bze' na'u.

Quebe gal-la lazru'u benne' xache' ca'.

¹³¿Ajazra chen' benne' ca' dxelune' da
calela

dxuluzúe' Dios chalá'ala?

Lu xichaj lázrdawe' dxelenné': "Quebe xebéaj lazre' Dios."

¹⁴ Dios, Lue' blé'eqeznu' da nigá, lawe' da dxenná'u benne' wen da calela, ne da ca' dxune' quebe naca na xrlátaje, na' xebéaj lázrequezu' bënnea'.

Dxuluzúa cuina benne' xache' ca' lu na'u. Lue' dxácalequezu' bi wezébedu ca'.

¹⁵ Dxugú' xel-la' wal-la chee benne' wen da calela.

Guleaj láwela da calela da nune', da na' bené' lu da bagache'.

¹⁶ Chadía chacanna naca Xránadxu Wenná Bea chegdxu.

Lu xezr la xu chee' ba gulebía xi' benne' dxelecuídene' Le'.

¹⁷ Bnézruju' ca da bululáwizra benne' dxexruj lázre'du ca' Lue', Xran.

Lue' dxupa'u lázxdau bënne'du ca' chee xuluzé nague' xrtizru',

¹⁸ chee guchi'u chee bi wezébedu ca', ne chee benne' dxeledé' xel-la' zi', chee québedxa bi da calela xelún benne' ca'

dxelune' da calela chee bënne'du caní.

11 Dxuxrén lazra' Xrana' Dios. Ájazra chen' dxi'u bënne'du xu'a: "Bzrunnuj, guxiáj lu xí'ala ca tu bxinne?"

² Le na' xque, dxulucuéza benne' ca' dxelune' da calela

xaga nalá xéche'ze.

Ba zaj naxrúe' xaga nalá xéche'ze chee' lu du chee na,

chee xelútié' bagácheze benne' xrlátaje ca'.

³ Chete ca' xellexinnaj da dxulusé chuchu da xrlátaje,

¿ájazra xelún benne' xrlátaje ca'?

⁴ Xránadxu Dios zúaqueze' lataj l'ázza chee'.

Xabáaqueze zua lataj blau naga dxe' Dios.

Dxelenná' xanne xiaj lawe'.

Dxel'éne' ca da dxelún bënneache.

⁵ Xránadxu Dios dxudé' chawe' benne' xrlátaje ca' lu da stébe.

Dxelecuídene' benne' ca' dxelune' da calela,

ne benne' dxelune' da zrinnaj.

⁶ Gudé' benne' ca' dxelune' da calela lu da zi' da xa',

da zaj naca na xi', ne da dxuzézrele'e da dxala na ca xedxe,

ne tu be' lálé'e, da ca' sel-le' lawe' benne' ca'.

⁷ Caní guné' lawe' da naca xrlátaje Xránadxu Dios,

ne nazrí'ine' da naca na xrlátaje.

Benne' li lazre' ca' xelelé'ene' lawe'.

12 Xrana' Dios, bselá bënneache chiu' lawe' da québedxa

dxape' benne' xezica Lue' ba l'ána.

Quebe nu chilá' benne' li lazre' ládujla bënneache ca'.

² Xúgute bënneache ca' dxelezí xé'e le sa' ljwezre'.

Lu da wen lazre' ba zaj nupé'e dizra' chee xelezí xé'e le'.

³ Xránadxu Dios guzría xi'e xúgute benne'

quebe dxuluchálaje' du lazre', ne benne' ca' dxuluchálaje' da dxucá'ana szren cuine'.

⁴ Benne' ca' gulenné': "Ne chee dizra' cheentu'

zrué'entu' da chawe'.

Ca dxezá lázrentu' guchálajntu', ¿nuzra nna be'e netu', xca'?"

⁵ Dxenná Xránadxu Dios: "Na'a xídaqueza' lawe' da

dxulusaca zi'e benne' xache' ca',

na' dxelebezre lazre' benne' baxache' ca'. Guselá' benne' ca' dxelánene' da guna'."

⁶ Xrtizra' Xránadxu Dios zaj naca na du lazre'.

Zaj naca na ca xiaj plata da ba gudé na lu xi',

da ba gudé na lu xi' gazre lasa.

⁷ Xran, guxúequezu' Lue' bënneache chiu' ca'.

Chadía chacanna gucu'uju' le' lu na'
benne' zaj zre'e
lu zra na'a zra.

⁸ Gáteteze na' dxaca da caleļa
gate dxulucá'ana szren bėnneache da
naca sban.

13 ¿Ájatequeze gal-la lazru' neda',
Xran?

¿Gal-la lázrtequezu' neda'?

¿Ájatequeze quebe le'enu' da dxaca
chia'?

² ¿Ájatequeze gun na ba xen guchaga
lawa' da dxezaca'?

¿Ájatequeze gaca wi'ine lazra' te zra, ne
chizrela'?

¿Ájatequeze nna be'e benne'
dxdédabague' Lue' neda'?

³ Gunná' da dxaca chia', Xran, ne
bechebe chia'.

Btipa lazra' chee quebe gatia',

⁴ ne chee quebe nna benne' dxdédabague'
neda':

“Ba betia' ni'a ne'e.”

Benne' ca' dxeledábague' neda' xelebene'
che cheajházia' lu da caleļa.

⁵ Neda' dxuxrén lazra' Lue' xexache lazru'
neda'.

Dute lázrdawa' dxebeda' lawe' da
dxuseláu' neda'.

⁶ Gúl-laqueza' chee Xrana' Dios
lawe' da ba nune' chia' da xrlátaje.

14 Benne' lázxdau zide' dxezá' lazre',
dxenné': “Quebe zua Dios.”

Benne' caní zaj nazrinnaj xichaj
lázrdawe'.

Dxelune' da sban ca'.

Quebe nu chilá' benne' dxune' da
xrlátaje.

² Xránadxu Dios zue' xabáa dxenné'e
bėnneache

chee lé'ene' che zua nu benne'
dxéajni'ine',

bėnnea' dxape' ba lá'ana Dios.

³ Xúgute' zaj xu'e neza xuca'.

Xúgute' zaj nazrinnaj xichaj lázrdawe'.

Quebe nu chilá' benne' dxune' da xrlá-
taje, netúgue'.

⁴ ¿Quebe dxeleájni'i benne' ca' dxelune'
da sban?

Dxulusunítie' bėnneache chia' ca dx-
uzuzruj tu benne'

xeta da dxawe',

ne quebe dxelequebe'ene' zua Xrane'
Dios.

⁵ Dute xel-la' dxelezrebe dxelezrize
benne' ca'

lawe' da dxácale Dios benne' xrlátaje ca'.

⁶ Belún le' chee da gulenná benne' xache'
ca',

san benne' caní xelebeza lazre' Xránadxu
Dios.

⁷ Xídatega Bėnnea' guselé' benne' Israel
ca'.

Gate gun Xránadxu xelexezrín benne'
chee' ca',

benne' ca' zaj nada'u zítu'la,

na' welebé zri'ine zre sua Jacob,

ne welebéle'eqezne' benne' Israel ca'.

15 Xran, ¿núzraqueze benne' sue'
naga zu' Lue'?

¿Núzraqueze benne' sue' naga naca
lá'azxa chiu'?

² Waca bėnnea' naque' du lazre', ne dx-
une' da xrlátaje,

bėnnea' zua da líqueze lu xichaj
lázrdawe',

³ bėnnea' quebe dxenné' chee le sa'
ljwezre',

ne quebe bi da caleļa dxune' chee le sa'
ljwezre',

ne quebe dxu'e lataj nu benne' si tizre' le
sa' ljwezre'.

⁴ Waca bėnnea' quebe dxape' ba lá'ana
nu benne' dxune' da sban.

Dxape' ba lá'ana benne' ca' dxelape' ba
lá'ana Xránadxu Dios,

bėnnea' quebe dxuché'e dizra' da ba gun-
né' lácala bi da' gunítie'.

⁵ Waca bėnnea' dxusané' dumí chee' ne
quebe dxenabe' xíchajen,

ne quebe dxezí' lu ne'e dumí chee nnie'
chee

nu benne' quebe bi zria nabague'.

Nu benne' dxuné' caní cabata' cheajc-
hazie' lu da calela.

16 Bxue neda', Dios, lawe' da dx-
uxrén lazra' Lue'.

² Lu xichaj lázrdawa' gucha' Xrana' Dios:
"Lue' nacu' Xrana'.

Quebe bi xetú da xrlátaje de chia' da
quebe naca na chiu'."

³ Tuze benne' ca' zaj naque' chee Dios lu
xezr la xu,

ne benne' ca' zaj naque' du lazre' dxezaca
ba lázrelena'.

⁴ Waxánqueze da dxelezaca benne' ca'
dxelape' ba lá'ana

tu dios quebe bi zaca.

Quebe guna' le' tu zren gate dxuluzríe'
zren lau dios na',

ne quebe guchíneda' la dios na'.

⁵ Xránadxu Dios dxugawe' neda', ne
naque' da ba neza chia'.

Lue', Dios, nuxru' ca da naca chia'.

⁶ Ca da nuzú' chia' zaj naca na da dxezi'a
ba neza,

ne xrtante zaj naca da nunnu' chia'.

⁷ Tu gucá'ana szrénzqueza' Xránadxu
Dios,

Bénnea' dxusédene' neda'.

Chizrela gate ne dxasia' dxuzéajni'ine'
neda' lu xichaj lázrdawa'.

⁸ Xránadxu Dios nuxrén lazra' gusi'e
neda'.

Lawe' da zue' cuita', quebe bi seque'
guchebe na neda'.

⁹ Chee le' na' gubé lázrdawa', ne
gubéle'quezda',

na' zra gacha' lu xedxu ba cueza lazra'

¹⁰ lawe' da quebe gucá'anu' bénne'du
xu'a lu lataj ba xa',

ne quebe gu'u lataj guzru nu benne' ná-
caqueze' chiu'.

¹¹ Gulé'enu' neda' da guna' chee gata'
chia' xel-la' nabán.

Naga zu' Lue' wabéle'quezda',

na' cuitu' Lue' súatequeze da ba neza
chia'.

17 Bze naga chi'a, Xran.

Ben xanne' da dxuláwizra' Lue'.

Guzí' da dxenaba' Lue', naca' du lazra'.

² Benná lataj xelá'a lau' chee guchi'u
chia',

lawe' da dxelé'enu' xúgute cáteze zaj
naca na.

³ Lue' dxenná' xánniu' xichaj lázrdawa'
ne dxelé'enu' neda' chizrela.

Gunná' xánniu' da dxuna', na' quebe bi
da calela blé'enu'.

Ba nuna' quebe bi dizra' calela nnia'.

⁴ Dxuzú'a' dizra' ca naca da dxennáu',

na' quebe dxuna' ca da dxelún benne'
wen da zrinnaj ca'.

⁵ Bxue neda' lu neza chawe' chiu',
chee quebe cheajcházia' lu da calela.

⁶ Dxuláwizra' Lue', Dios, lawe' da
dxennu' chí'a.

Bze naga chi'a, na' bene da dxennía'.

⁷ Ble'e ca dxexache lázrele'u bénneache.

Bselá benne' ca' dxuluxrén lazre' Lue' lu
na' benne'

dxeledábague' le'.

⁸ Bxue neda' ca dxun benne' dxuxúe' xiaj
lawe'.

Gudezre neda' ca dxun bedxuj dxézreba'
zrí'ineba' zran xrlá'aba'

⁹ chee quebe bi xelún chia' benne' ca' dx-
elune' da calela,

benne' dxeledábague' neda', ne dxelaca
lazre' xelúti'e' neda'.

¹⁰ Quebe dxelexache lazre' le sa' ljwezre',
na' duté xel-la' dxulucá'ana szren cuine'
dxuluchálaje'.

¹¹ Gáteteze dxedá' dxelé'chaje' neda'.

Dxelaca lazre' xeline' neda' xu.

¹² Zaj naque' ca tu bezre xixre'dau' dxaca
lázreba' bi gáguba'.

Zaj naque' ca tu bezre xixre',

ba nucache cuínaba' chee quél-laba'
béadu ca'.

¹³ Gudá, Xran, gudábaga' benne' ca' dx-
elune' da calela,

na' bchiche' lu xu.

Bselá neda' lu na' benne' ca' dxelunę' da caleła,
guchínenu' xia chiu'.

¹⁴ Bselá neda' lu na' benne' ca' nen ni'a náquezu', Xran.

Bselá neda' lu na' bėnneache, benne' ca' zaj dxe'e gunne xue chee xęzr la xu nigaze, benne' ca' dxeláguqueze' da zácale'e chiu'.

Da nigáqueze dxulugawe' zrí'ine' ca', ne dxexegá'anaqueze da dxelágu zrí'ine zre sue'.

¹⁵ Le'eda' neda' lau Lue' lawe' da naca' xrlátaje.

Xezaca ba lazra' gaca' ca nácaquezu' Lue' gate xebana'.

18 Nazrí'ida' Lue', Xran.
Lue' dxuzé chuchu' neda'.

² Lue', Xran, nacu' ca tu xiaj naga zę chúchua',

ne ca tu xu'u zren naga xu'u chawa', na' nacu' weselá chia'.

Dios chia', Lue' dxuzé chuchu' neda', na' guxrén lazra' Lue'.

Dxucu'uju' neda', ne dxuseláu' neda', ne dxucache chawu' neda'.

³ Wannéqueza' Xránadxu Dios, Bėnnea' naca chee' güe lánadxu Le'. Le' guselé' neda' lu na' benne' ca' dxeledábague' neda'.

⁴ Guzúa' lu da stębe chee xel-la' gute, na' guca da caleła ca tu xęgu nisa da bchebe na neda'.

⁵ Guzúa' lu da stębe chu'a lataj ba xa' lawe' da zua' lu da stębe chee xel-la' gute.

⁶ Lu da zi' da xa' bláwizra' Xrana' Dios, ne gunnéqueza' Dios chia'.

Le' benne' chi'a naga zue' lataj lánzxa chee',

ne bęe nague' da bchálaja' lawe'.

⁷ Nadxa guzrú' lu xęzr la xu nigá. Gulezrize lane xi'a ca'.

Gulezrízele'e na lawe' da bzra'a Le'.

⁸ Bdxuaj zren chee xi' lu zrine',

ne bdxuaj xi' lu dxu'e da bzezxe na da de lawe',

na' xi' na' gudel-la na bau ca'.

⁹ Bzėxruje' da zria zran xabáa, na' bėtaje', na' guzúa da chul-la zran ni'e.

¹⁰ Gudėe' lu be' zrie' tu da nazí le na querubín.

Chadí gudėe' lu be' bđunu'.

¹¹ Gúcu'e' da chul-la, da bcache na Le', da na' naca na beuj bza da xuzru na nisa.

¹² Lu da dxácatite legala chee' da xu'u lu beuj bza,

na' beledxúaj bau dxelala, ne xiaj bezxe'.

¹³ Zran xabáa gunné guziu' chee chi'i Xránadxu,

na' ben chi'i Dios szrentę ládujla bau dxelala ca',

ne xiaj bezxe' na'.

¹⁴ Bsanę' xaga nalá xėche'ze chee' ca', na' bęse dínnaje' benne' ca' dxeledábague' neda'.

Bsanę' xesa guziu' ca', ne bzria xi'e benne' ca'.

¹⁵ Nadxa belelá' da zaj de lu situj chee nísadau',

ne ble'e lau lane xęzr la xu da zua na zran nísadau',

gate na' gudil-lu' benne' ca' dxeledábague' neda', Xran,

ne lu xel-la' dxezrá'a chiu' bzagu' benne' ca'.

¹⁶ Bėtaje' lu da sibe, ne bequėe' neda'.

Bebėjaje' neda' lu da naca ca tu nisa zila.

¹⁷ Bselé' neda' lu na' benne' wal-la dxeledábague' neda',

ne lu na' benne' ca' dxelecuídene' neda', benne' zaj nácadxe' wál-la ca neda'.

¹⁸ Buluzague' neda' gate na' zua' lu da stębele'e,

san Xrana' Dios gúcalęe' neda'.

¹⁹ Bebėjaje' neda' naga xu'a, ne bzue' neda' tu lataj zren.

Bselé' neda' lawe' da bezaca ba lazre' chia'.

²⁰ Xránadxu Dios bexunne' chia' cáteze naca

da xrlátaje da nuna'.

Cáteze naca da xrlátaje da nuna' bexun-
ne' chia'

²¹lawe' da dxuna' ca da dxusede Xrana'
neda',

ne quebe guleaj xíchaja' Dios chia'.

²²Dxuna' ca naca da dxenná bé'ene'
neda',

ne quebe bsana' da ca' nadxíxruj be'e.

²³Guca' li lazre' lau Le',

ne bxue cuina' chee quebe guna' da
calela.

²⁴Chee le na' bexunna Xránadxu Dios
chia'

cáteze naca da xrlátaje da bena',

cáteze naca da xrlátaje da nuna' lau Le'.

²⁵Dxexache lazru' chee benne' dxexache
lazre' le sa' ljwezre',

ne nacu' li lazre' nen benne' naque' li
lazre'.

²⁶Dxunu' da naca chawe' chee benne'
naque' chawe',

na' gacu' snia nen benne' wen da calela.

²⁷Guseláu' benne' zaj zue' lu da zi' da xa',
san guzéxruju' benne' dxulucá'ana szren
cuine'.

²⁸Lué'queze guzalju' xi' chia'.

Xrana' Dios, guzani'u chia' naga zua' lu
da chul-la.

²⁹Nen xel-la' waca chiu' guzría xi'a
benne' zante

dxeledíl-lalene' neda'.

Che Lue', Dios, súalenu' neda'

waca guchínnaja' ze'e da zaj naxechaj
xezre ca'.

³⁰Li lazre' zaj naca da dxun Dios, na' du
lazre' naca xrtizre'.

Dxucu'uje' xúgute benne' ca' dxelebeza
lazre' Le'.

³¹Tuze Xránadxu naque' Dios.

Tuze Dios cheedxu naque' Benne' dx-
ucu'uje' dxi'u.

³²Dios naque' Bénnea' dxune' neda'
benne' wal-la,

ne Benne' dxune' li lazre' da dxuna' neda'.

³³Dxune' ni'a ca zaj naca ni'a bzrina'
xixre'

ne dxuzúa chúchue' neda' lu xi'a Sión
chee'.

³⁴Dxusédene' neda' chee gaca cha'a lu
wedil-la,

ne chee gaca guchíneda' xaga nalá
xéche'ze

da naca na xia gache'.

³⁵Lu xel-la' weselá chiu' bcu'uju' neda',

ne nen na'u xabēla gúcalenu' neda'.

Xel-la' zri'i lazre' chiu' ba nucá'ana szren
na neda'.

³⁶Ben chawu' neza naga tea',

chee quebe cuila' lu neza na'.

³⁷Blaga' benne' dxeledábague' neda', na'
xeajzrena' le',

na' quebe bebi'a cadxa bétetea' benne'
ca'.

³⁸Bena' benne' ca' we', na' quebe guca
xelexase'.

Xeajlecházie' zran ni'a.

³⁹Btipu' lazra' chee cha'a lu wedil-la.

Bzéxruju' benne' dxeledábague' neda'
zran ni'a.

⁴⁰Benú' buluzrunnuj benne'
dxeledábague' neda' lawa',

chee bzria xi'a benne' ca' dxelecuídene'
neda'.

⁴¹Gulenné' nu benne' gácalene' le' san
quebe nu chilá'.

Gulenné' Xránadxu Dios, san quebe ben-
ne' chee'.

⁴²Bzúzruja' benne' ca' ca bxrte xu da
dxua be'.

Bléaja' le' ca dxuléaja' guna' la neza ca'.

⁴³Bseláu' neda' lu na' benne' ca'
dxeledábague',

na' benú' neda' benne' xíchaje xezr la xu
ca',

na' benne' ca' quebe núnbe'a dxelune'
zrin chia'.

⁴⁴Gate belenne' chia', na' buluzúe'
xrtizra'.

Benne' zaj zra' xezr la xu ca' belune' ca
gunná be'eda'.

⁴⁵ Benne' zitu' ca' gulate ni'a ne'e,
na' beledxúaję' dxelezrízije' lu xęzre
zrentau' cheę' ca'.

⁴⁶ Gaca ba lá'azxa Xránadxu Dios.

Gaca ba Bénnea' dxucu'uję' neda'.

Xegá'ana szręnqueze Dios, Bénnea'
dxuselę' neda'.

⁴⁷ Naca Dios Bénnea' dxebéaj lazre'
benne' dxeledábague' neda',
ne dxuzię' benne' ca' zran ni'a.

⁴⁸ Naque' Bénnea' dxuselę' neda' lu na'
benne' ca'

dxeledábague' neda'.

Dxunę' dxenná be'eda' benne' ca'
guledábague' neda'.

Bselę' neda' lu na' benne' xichaj zra'a ca'.

⁴⁹ Cheę le' na' xecheba' chiu', Xran, lau
benne' xęzr la xu ca',

na' gúl-laqueza' cheę Lau' Lue'.

⁵⁰ Dxun Dios dxenná bea bénnea' waláz
cheę',

ne dxexache lazre' bénnea' guquę'e, bén-
nea' naque' David,

ne zri'ine zre suę' chadía chacanna.

19 Dxulę'e lau zran xabáa ca naca
xel-la' szren cheę Dios.

Dxuchálajqueze na ca zaj naca da nunę'.

² Tu zra tu zra dxuzén na zra xula da
nigá,

na' tu zre' tu zre' dxę na zre' xula da
ná'queze.

³ Quebe dxuluchine na xrtizra'
bénneache,

ne quebe nu dxen chi'i na,

⁴ san dxezriluj da dxelenná na du gabí'i
xęzr la xu,

ne dxelezrín xrtizra' na dapa saca cheę
xęzr la xu.

Dios beņę' xabáa ca tu xu'u naga zua
gubizra.

⁵ Che zílala dxalaj na ca tu benne'
wechaga na'.

Dxebé na ca tu benne' dxezá chęgüę' lu
wiťja.

⁶ Dxedxuaj na chalála naga dxalaj na,
na' dxezrín na chalála naga dxebía na.

Dxuchá'a na xúgute da zaj de.

⁷ Du lazre' naca da nadxixruj bea
Xránadxu,

ne dxuzę' chacha na bénne'du xú'udxu.

Li lazre' naca da dxexechębe Xránadxu,

ne dxunezruj na xel-la' sina cheę benne'
ca'

quebe zaj nape' na.

⁸ Da líqueze zaj naca da nadxixruj bea
Xránadxu,

na' dxelebęle'e benne' ca' dxelunę' ca zaj
naca na.

Du lazre' zaj naca da dxuzęajni'i Xrá-
nadxu dxi'u,

da dxuluzúa na dxi'u lu xel-la' naxani'.

⁹ Cháwedau' naca zrębedxu Xránadxu,

da gun na súadxu chadía chacanna.

Da líqueze zaj naca da dxuchi'a Xrá-
nadxu cheędxu,

ne zaj naca na chawe'.

¹⁰ Zaj naca na da dxezá lázredxadxu ca
oro,

ne ca oro zrentę da zácaleę'e na.

Zaj naca na zízredxa ca bzrína'dau', da
nácaleę'e na zixre.

¹¹ Dxulusizre na neda', węn zrin chiu'.

Lawe' da dxuna' ca zaj naca na, da zrentę
dxezi'a.

¹² Netú benne' quebe gaca lé'ene' da
caleļa da dxunę'.

Bselá neda', Xran, lu da caleļa da quebe
dxęquebe'eda' dxuna'.

¹³ Bucache chawe' neda', węn zrin chiu',
cheę quebe bi dul-la guna' du lazra'.

Quebe gu'u lataj nna be'e dul-la neda'.

Nadxa gaca' du lazra', ne quebe бага'
zria cheę dul-la na'.

¹⁴ Gaca da dxuchálaja', ne da dxulaba
lazra'

da dxezaca ba lazru' Lue', Xran

Nacu' Benne' dxuxię' neda', ne Benne'
dxexá'ue' neda'.

20 Dxenaba' Xránadxu xenne' chi'u
lu zra zu' lu da stębe,

ne gucu'uj La Dios cheę Jacob lue'.

²Dxenaba' Lē' naga zuē' lataj lá'azxa
cheē' sel-lē'
da gácale na lue',
ne cheē' xi'a Sión xide' guxrē' lue'.

³Dxenaba' Lē' cheajsá lazre' ca naca
xúgute guna' bzu' cheē',
ne si' lu ne'e béadu ca' dxuzez xu' lawe'.

⁴Dxenaba' Lē' gunne' lue' ca naca da dx-
ezá lazru',
ne gunē' xúgute da dxéquenu' xrlátaje.

⁵Béle'entu' gate guselé' lue',
na' chí santu' tu da gul'é lawe na La Dios
cheēdxu.

Dxenaba' Xránadxu gunne' lue' xúgute
da dxenabu' lau Lē'.

⁶Na'a nezda' dxuselá Xránadxu bēnea'
ba gucá'aqueze'.

Naga zuē' xabáa lá'azxa chee' xenne' chi'i
bēnea'.

Xel-la' waca zrente chee' guselé' bēnea'.

⁷Bal-la benne' dxuluxrén lazre' carro ca'
chee wedil-la,

na' xezícaxē' dxuluxrén lázre' bzrina'
ca'.

Dxi'u dxuxrén lázredxu La Xránadxu
Dios.

⁸Benne' ca' gulate ni'a ne'e, ne
xeajlechazie'.

Dxi'u bexásadxu, na' zēdxu.

⁹Bselá netu', Xran, nacu' Wenná Bea
cheentu'.

Ben chí'intu' gate dxuláwizrantu' Lue'.

21 Benne' dxenná bea dxebéle'ene'
nen xel-la' waca chiu', Xran,
na' ca naca xel-la' weselá chiu'
dxebéle'ene'.

²Bnézruju' lē' da guzá lazre',
ne quebe bzagu' da gunabē' Lue'.

³Guzí' lu na'u lē', ne benu' dxaca chawe'
chee'.

Nuzriu' xíchaje' tu da naca na oro.

⁴Gunabē' Lue' gunnu' lē' xel-la' nabán,
na' bnézruju' na lē' chee' súaqueze' zane'
iza.

⁵Zrente naca xabáa chee' lawe' da
bseláu' lē'.

Bennu' lē' xel-la' ba lá'ana, ne xel-la'
szren.

⁶Lawe' da nunu' gaca chawe' chee'
chadía chacanna
dxunu' dxebéle'ene' lau Lue'.

⁷Lawe' da dxuxrén lazre' wenná bea na'
Xránadxu,

xexache lazre' Dios szrente lē',
na' quebe suē' lu da stebe.

⁸Xulétaju' xúgute benne' dxeledábague'
lue'.

Xel-la' waca chiu' xulétaju' benne' ca' dx-
elecúidene' lue'.

⁹Lu zra na' zra'u lē' gaca chee' benne' ca'
ca guzú' lē' lu xi' ga dxulúzrie' bla'dau'.

Xránadxu guzúzruje' benne' ca' lu xel-la'
dxezrá'a chee',

na' xi' na' guzezxe na lē'.

¹⁰Xúgute da belune' lu xēzr la xu nigá
guzria xi'u,

ne xegú' zri'ine zre suē' ládujla
bēneache,

¹¹lawe' da gulaca lazre' xelune' da calea
chiu' Lue'.

Gulilaj lazre' ca da xelune', san quebe bi
xelezéquene',

¹²lawe' da gulagu' benne' ca'.

Nucuezu' xaga nalá xéche'ze chiu' chee'
lē'.

¹³Begá'ana szrénqueze Lue', Xran, lu xel-
la' wal-la chiu'.

Tu gúl-lazquezdxu, ne tu güe
lá'anazquezdxu Lue'

ca naca xel-la' waca chiu'.

22 Dios chia', Dios chia', ¿bizr chee'
na' nusán lazru' neda'?

¿Bizr chee' na' quebe dxennu' da dxenaba'
Lue'

chee' guseláu' neda'?

²Dios chia', dxuláwizra' Lue' te zra, ne
quebe dxexechēbu' chia'.

Dxuláwizra' Lue' chizrela, ne quebe dx-
ezí'i lazra'.

³Lá'azxa nacu' Lue'.

Nacu' Benne' dxebeze' naga dxelúe lá'ana
benne' Israel Lue'.

⁴ Xra xrtáuntu' gulebeza lazre' Lue'.

Gulebeza lazre', na' bseláu' le'.

⁵ Bululáwizre' Lue', na' belelé'.

Buluxrén lazre' Lue', na' quebe
belexedué'ene'.

⁶ Neda' naca' ca tu bela' gúna'dau', ne
quegá bèneache.

Dxelucuide bèneache neda', ne dxu-
luzúe' neda' chalá'ala.

⁷ Xúgute benne' dxelelé'e neda' dxelún le'
chia'.

Lu da dxelún le' chia' dxelexrá dxu'e,
ne dxulutá xíchaje', dxeleenné':

⁸ "Bzua cuine' lu na' Xránadxu chee
guselé' le'.

Guselé' le' che dzezaca ba lázreleñe' le'."

⁹ Lue' nacu' Bénnea' bexru' neda' gate
gúlaja'.

Benú' bxren lazra' Lue' gate na' ne
dxázreteá'.

¹⁰ Guxu'a lu na'u gate quebe ne gálajtea'.

Gate ne xu'a lu le'e xrna'a, báchequeze
nacu' Dios chia'.

¹¹ Quebe xebigu' naga zua' lawe' da zua
gágute

da gusaca zi na neda',

ne quebe nu chilá' benne' gácalene'
neda'.

¹² Zaj naxechaj benne' dxeledábague'
neda' ca bezre ca'.

Zaj naxechaj benne' neda' zaj naque' ca
bezre wal-la ca'

chee Basán.

¹³ Gulaca lazre' xuluzría xi'e neda'

ca tu bezre xixre' dxedunba', ne dxebezre
xa'aba'.

¹⁴ Bebizre lazra' ca nisa da nalalaj na lu
xu,

na' ca naca zrita xu'a bulusán ljwezre na.
Lázdawa' guca na ca xina' da bxuna na
lu le'a ca nisa.

¹⁵ Bexaca xel-la' wal-la chia' ca tu xé'ena
xu la'a,

na' luzra' bedá' na chichja'.

Nuzú' neda' lu xu xrte chee xel-la' gute.

¹⁶ Zaj naxéchaje' neda' ca becu' ca'.

Zaj naxechaj benne' wen da zrinnaj ca'
neda'.

Gulídue' ni'a na'a.

¹⁷ Waca gulaba' ca naca zrita xu'a,
na' benne' ca' dxeleenné'e neda', ne dxe-
lenná xánnie' neda'.

¹⁸ Belexelé'e zra lana' late' weaj,
na' lawe' zra lana' gulebeje' da gaca bea
na.

¹⁹ Quebe xebigu' naga zua', Xran.

Nacu' xel-la' wal-la chia'.

Gudázega gácalenu' neda', Xran.

²⁰ Bselá bène'du xu'a lu na' benne' gu'e
neda' xia.

Bénnea' guzría xi'e neda' guné' ca dxun
becu'.

²¹ Bselá neda' lu dxu'a bezre xixre'.

Bselá neda' lu luzu bezre wal-la ca'.

²² Guzenda' bi bícha'dau' ca' lau' Lue'.

Güe lá'anaqueza' Lue' ladaj benne' zaj
nazrague' lau'.

²³ Le'e, dxezrébele Xránadxu, le güe
lá'ana Le'.

Le gucá'ana szrene', le'e, zri'ine zre sua
Jacob.

Le zrebe Le', le'e, zri'ine zre sua Israel.

²⁴ Quebe bzua Dios chalá'ala, ne quebe
gucuídene'

da zi' da xa' da guledé benne' xache' ca',
ne quebe bcache lawe' lau benne' ca'
san gate bululáwizre' Le', benne' chi'e.

²⁵ Güe lá'anaqueza' Lue' laduj benne' zan
zaj nazrague' lau'.

Ca da guchébe lazra' gúnqueza' lau
benne' ca' dxelezrebe' Lue'.

²⁶ Xelagu benne' dxexruj lazre', ne
welélajquezne'.

Benne' ca' dxelebigue' lau Xránadxu
xelúe lá'anaqueze' Le'.

Tu gácazqueze da ba neza chee benne'
ca'.

²⁷ Cheajlesá lazre' benne' duté xezr la xu
Xránadxu,

na' xelxebí'e lau Le'.

Xúgute cue' benne' chee xúgute cue' xezr
la xu

xelúe lá'anaqueze' Le',
²⁸lawe' da xu'u lu na' Xránadxu xel-la'
 dxenná bea,
 na' nna bé'ene' xúgute benne' xezr la xu
 ca'.

²⁹Xeláguqueze xúgute benne' zren ca'
 chee xezr la xu nigá,
 ne xelúe lá'anaqueze' Dios.

Xuluzú zribe lau Le' xúgute benne' ca'
 xelate,
 benne' ca' quebe xelezéquene' xelegú'u
 chawe'

bénne'du zaj xu'e chee quebe xelatię'.

³⁰Zri'ine zre sua benne' ca' xelunbe' zrin
 chee Xránadxu.

Xuluzenne' zri'ine' ca' ca naca chee
 Xránadxu

cadxa cheajsete chee bénneache.

³¹Xelezrine', ne xuluzenne' bénneache
 ca naca

da xrlátaje da dxun Dios.

Xuluzenne' benne' quebe ne xelálaje' ben
 Dios da caní.

23 Xránadxu Dios dxuxúe' neda' ca
 tu benne' dxuxúe' zrila' chee'.

Quebe bi dxexázejeda'.

²Ca dxelezzúa zríla'du ca' ba guláguba'
 xixre' xá'adau',

caní dxune' chia' chee xezí' lazra'.

Gune' chia' ca dxaca chee zrila' ca'
 dxeché'e-ba' dxu'a xegu nisa da de zrize.

³Dxuxuzúa chúchue' neda' lu xichaj
 lázrdawa'.

Dxusi'e neda' lu da xrlátaje chee gaca li
 da guchebe lazre'.

⁴Láqueze tea' naga sua' lu da stebe chee
 xel-la' gute,

quebe bi da calęla guchebe na neda',
 lawe' da zúalęnu' Lue' neda', Xran,
 na' dxelácalę zrize', ne blazru chiu' neda'.

⁵Dxucuezu' da xi'aj gawa' lálala benne'
 dxeledábague' neda' zaj naxechaj neda'.

Dxugú'da za xichja' da dxapa na neda'
 ba lálana,

ne dxusezráteu' zriga' chia'.

⁶Da xrlátaje, ne xel-la' dxexache lazre'
 chiu'

da lítegage xelezúale na neda' xúgute zra
 naca bana',

na' lizru', Dios, gaca na lizra' chadía
 chacanna.

24 Chee Dios naca xezr la xu nigá ne
 xúgute da zaj de lawe na.

Naca chee' xezr la xu, ne xúgute bén-
 neache zaj zre'e ga na'.

²Bzue' na lawe' nísadau',
 ne bzale' lane na sítujla zran nísadau'.

³¿Nu seque' cuen xi'a chee Xránadxu?

¿Nu seque' chu'u xudau' lálazxa chee'?

⁴Waca benne' ca' zaj naque' du lazre' ca
 naca da dxelune',

ne ca naca da dxulaba lazre'.

Benne' ca' quebe ne xelechisa ne'e lau
 bedáu' xiaj xaga ca',

ne quebe bi ne xelechebe lazre' da naca
 wen lazre'.

⁵Xránadxu gune' da chawe' chee benne'
 caní.

Dios guchi'e chee benne' caní, ne guselé'
 le'.

⁶Caní zaj naca bénneache dxelebigue'
 lau Le',

benne' ca' dxelexu'e naga zua Dios chee
 Jacob.

⁷Le salaj dxa xu'u chee xudau'.

Le salaj dxa xu'u chawe' ca',

na' chu'u Wenná Bea szrente.

⁸¿Nuzra na' Wenná Bea szrente nigá?

Naque' Xránadxu, Benne' wal-la,

Bénnea' nape' dute xel-la' waca.

Naque' Xránadxu, Bénnea' dxedxúaje'
 chawe' lu wedil-la.

⁹Le salaj dxa xu'u chee xudau'.

Le salaj dxa xu'u chawe' ca',

na' chu'u Wenná Bea szrente.

¹⁰¿Nuzra na' Wenná Bea szrente nigá?

Naque' Xránadxu, Benne' dxenná bé'ene'
 xúgute da zaj zua.

Le' naque' Wenná Bea szrente na'.

25 Xran, dxennía' Lue' dute
 lázrdawa'.

2 Dxuxrén lazra' Lue', Dios chia'.
 Quebe gu'u lataj xedué'eda'.
 Quebe gu'u lataj benne' dxeledábague'
 neda' xuluzétaje' neda'.
 3 Da líqueze, benne' ca' dxelebeza lazre'
 Lue'
 quebe xeleque zréajene'.
 Xeledué'e benne' ca' dxeledábague'
 xrtizru'.
 4 Xran, ble'e neda' da dxaca lazru' guna'.
 Ble'e neda' da dxezaca ba lazru' guna'.
 5 Bsede neda' guna' ca naca da li chiu'
 lawe' da nacu' Dios dxuseláu' neda'.
 Tu dxebeza lázrezqueza' Lue'.
 6 Bsa lazre', Xran, gacu' zri'i lazre',
 ne xexache lazru' chia' cáteze da
 dxúntequezu'.
 7 Quebe chajsá lazru' dul-la da bena' gate
 ne naca'
 benne' cuide', ne ca gudábaga' xrtizru'.
 Nen dutę xel-la' dxexache lazre' chiu',
 bsa lazre' neda',
 ne nen dutę xel-la' zri'i lazre' chiu', Xran.
 8 Xrlátaje, ne li lazre' naca Xránadxu
 Dios.
 Cheę le' na' gusédene' benne' dul-la ca' da
 dxal-la' xelune'.
 9 Gulé'ene' benne' dxexruj lazre' ca' da xr-
 látaje da xelune',
 ne gusédene' benne' zren lazre' ca' da
 xelune'.
 10 Lu xel-la' dxexache lazre',
 ne lu da li dxeché Xránadxu benne' ca'
 dxelune'
 ca naca xel-la' wezría cheę', ne ca da
 dxusede Le'.
 11 Lawe' da dxunu' ca da ba gunnú',
 Xran,
 gunite lau' ca naca dul-la nuna', da naca
 na zren.
 12 ¿Nu benne' dxezrebe' Xránadxu Dios?
 Le' gusédene' benne' nigá da dxal-la'
 gunę'.
 13 Gaca cheę' tu da ba neza zrente,
 na' zri'ine zre suę' gaca cheębe' xezr la
 xu.

14 Xránadxu Dios naque' tuze nen benne'
 ca' dxelezrebe' Le',
 na' gunę' xelúnbe'e xel-la' wezría cheę'.
 15 Tu dxennázqueza' Xránadxu Dios
 lawe' da guselé' neda' lu na' benne' ca'
 dxelaca lazre' xelej-le' neda'.
 16 Gunná' neda', ne bexache lazre' neda'
 lawe' da zua' tuza', ne dxezaca zi'a.
 17 Naxánle'e da stebe da zaj zua
 lázrdawa'.
 Bselá neda' lu da stebe zua'.
 18 Gunná' ca dxezaca zi'a, ne ca dxunle'a
 zrin,
 na' bnite lau xúgute dul-la da nabaga'.
 19 Gunná' benne' ca' dxeledábague' neda'
 ca naxánle'ene',
 ne ca dxelecuídele'ene' neda'.
 20 Bxue bénne'du xu'a, ne bselá neda'.
 Quebe gu'u lataj xedué'eda' lawe' da dx-
 uxrén lazra' Lue'.
 21 Zaj nuxru da xrlátaje, ne xel-la' li lazre'
 neda'
 lawe' da dxebeza lazra' Lue'.
 22 Dios, bselá benne' Israel ca'
 lu xúgute da dxelezaca zi'e.
26 Bchi'a chia', Xran, lawe' da nuna'
 da xrlátaje.
 Bxren lazra' Lue', Xrana' Dios, ne quebe
 ben chupa lazra'.
 2 Gunná' xanne' lázrdawa', Xran, ne bxue
 ca da nuna'.
 Gunná' xanne' da xu'u lu xichaj lázrdawa'
 3 lawe' da dxeque be'eda' dxexache lazru'
 neda',
 ne dxuna' ca naca da li chiu'.
 4 Quebe ne guna' tu zren benne' ca' dx-
 elune' da xrlátaje cúzreze,
 ne quebe ne guna' tuze benne' ca' dxul-
 ulé'e cuine' xrlátaje.
 5 Dxequídeda' da dxelún benne' ca' dx-
 elune' da calela
 naga dxelezrague',
 ne quebe ne chu'a tu zren benne' ca' dx-
 uluzúe' Dios chalá'ala.
 6 Dxelé'enu' quebe bi zria nabaga',
 na' waca biga' lu cugu chiu', Xran,

⁷ chee cuezre xa'a, xapa' Lue': "Xcalenu",
ne chee guzenda' bënneache ca naca da
zren ca' da nunu'.

⁸ Xran, nazrí'ida' lizru' naga zu',
ne lataj lá'azxa naga zua da xabáa chiu'.

⁹ Quebe guzría xi'u neda' tu zren nen
benne' dul-la ca',
ne quebe gutiu' neda' tu zren nen benne'
ca' dxelútie' benneáche,

¹⁰ benne' ca' dxelune' da calela,
ne tu dxulunézrujzqueze' dumí chee
xelelé' lu da zaj nune'.

¹¹ Neda' tu gúnzqueza' da naca li lazre'.
Bselá neda', ne bexache lazre' neda'.

¹² Tu núnzqueza' da xrlátaje, na' güe
lá'anaqueza'

Xránadxu Dios

lau benne' ca' zaj nazrague' chee'.

27 Xránadxu Dios naque' xel-la' nax-
aní' chia',

ne Benne' dxuselé' neda'.

¿Nu benne' gaca guchebe' neda'?

Xránadxu Dios naque' Benne' dxucu'uje'
neda'.

¿Nu benne' gaca guzúe' neda' lu da
stébele'e'?

² Gate guléchaj benne' ca' dxelune' da
calela chia',

nen benne' ca' dxulusaca zi'e neda',
ne benne' ca' dxeledábague' neda' chee
xuluzría xi'e neda',

na' gulechégüe', ne xeajlecházie'.

³ Láqueze xeléchaj tu cue' benne' dx-
jaque' wedil-la neda',
benne' ca' dxeledábague' neda', quebe
zrébequeza'.

Láqueze xuluzúe' neda' lu wedil-la, neda'
guxrén lázrequeza' Dios.

⁴ Tu da gunábeda' Xránadxu Dios.

Da nigáze sa lazra', da naca na chee sua'
lizre Xránadxu

xúgute' zra gaca bana',

chee gulaba lazra' ca naca da xrtante
chee Xránadxu,

ne chee guchálajlëna' Le' lu xudau'
lá'azxa chee'.

⁵ Le' gucache chawe' neda' lu lataj lá'azxa
chee'

lu zra dxaca da calela.

Gucache chawe' neda' lu lataj cheéqueze'
naga zúaqueze'.

Guzúe' neda' tu naga se cháweda'.

⁶ Nadxa gune' guzétaja' benne'
dxeledábague' neda',

ne zaj naxéchaj' neda',

na' nen dute' xel-la' dxebe' gutia' béadu ca'
guzúa'-ba'

lu cugu chee'.

Gúl-laqueza', ne tu güe lá'anazqueza'
Xránadxu.

⁷ Xran, ben chi'a gate ne dxuláwizra'
Lue'.

Bexache lazre' neda', ne bechebe chia'.

⁸ Lu xichaj lázrdawa' benda' chi'u, gun-
nú'u: "Bexilaj chia'."

Xexílaja' chiu', Xran.

⁹ Quebe gucache lau' chia' neda'.

Lu xel-la' dxezrá'a chiu' quebe xebigu'
naga zua' neda',

wën zrin chiu'.

Nacu' Benne' dxácalene' neda'.

Quebe gusanu' neda', ne quebe cueaj xi-
chju' neda',

Dios, weselá chia'.

¹⁰ Lácala xulusán xra xrna'a neda',

tu xecá'azqueze Xránadxu Dios neda'.

¹¹ Bse'de neda' da dxaca lazru' guna',
Xran,

ne ble'e neda' da li lazre' da dxal-la'
guna',

lawe' da zaj naxán benne' dxeledábague'
neda'.

¹² Quebe gu'u lataj benne' dxeledábague'
neda'

xelune' chia' da dxelaca lazre'

lawe' da zaj naxechaj benne' wën lazre'
neda'

nen benne' dxelaca lazre' xulusaca zi'e
neda'.

¹³ Xránadxu Dios guchebe lazre' le'eda'
da xrlátaje chee'
naga gaca bana'.

La quebe guxéajl̥e'a da nigá, na' gute ni'a na'a.

¹⁴Le cueza xelá' Xránadxu.

Le gutipa lázrele, na' Le' guzé' chúchue' le'e.

Awe', le cueza xelá' Xránadxu.

28 Xran, dxuláwizra' Lue'.

Nacu' Benne' dxucú'uju' neda'.

Bz̥e naga chi'a lawe' da che quebe xennu' neda'

gaca' ca tu benne' dxu'e lataj ba xa'.

²Ben chi'a dxuláwizra' Lue',

ne dxechisa na'a lau' naga zu' lataj lá'azxa chiu'.

³Quebe guzrí'a xi'u neda' tu zren nen benne' wen da cal̥la ca',

ne cá'anqueze nen benne' ca' dxelun̥e' da zrinnaj,

benne' ca' dxelenné' dizra' cháwedau' lau le sa' ljwezre',

san xu'u lázrdaw̥e' da cal̥la gun̥e' chee'.

⁴Bde benne' ca' lu da ba xa' cáteze naca chee' da belun̥e',

cáteze naca da cal̥la da zaj nun̥e'.

Bunezruj chee' benne' ca' cáteze da belun̥e', da na' dxal-la' xezezí'e.

⁵Lawe' da quebe gulap̥e' ba lá'ana da ben Xránadxu,

ne quegá da ben̥e' lu ni'a ná'queze',

guxrín̥naje' benne' ca', ne gudé̥e' le' lu da ba xa'.

⁶¡Gaca ba Xránadxu Dios, Bénnea' ben̥e' chi'a

gate bláwizra' Le'!

⁷Xránadxu naque' Bénnea' dxuzé' chúchue' neda',

ne dxucu'uj̥e' neda'.

Bxren lazra' Le', na' gúcal̥ene' neda',

na' chee' le' na' gubéle'eda', na' gul-laqueza',

ne güe lá'anaqueza' Le'.

⁸Xránadxu naque' Bénnea' dxuzé' chúchue' benne' chee' ca',

ne naque' Benne' dxucu'uj̥e', ne dxuselé' bénnea' guqué'e.

⁹Bselá benne' chiu' ca', ne ben̥e' gaca chawe' chee' da naca chee'.

Bxue benne' ca', ne bexru le' chadía chacanna.

29 Le güe lá'ana Xránadxu, le'e, zrale xabáa.

Le güe lá'ana xel-la' szren chee', ne xel-la' waca chee'.

²¡Da xabáa naca La Xránadxu!

¡Le güe lá'ana na!

Le guzú' zríbele lau Xránadxu lá'azxa gate xel̥e'e.

³Chi'i Xránadxu dxen na lawe' nísadau'. Dxen chi'i Dios xabáa ca guziu' da dxen-né na.

Dxedá chi'e lawe' nísadau'.

⁴Dxen chi'i Xránadxu ca naca xel-la' wal-la chee' na.

Dxen chi'i Xránadxu dut̥e' xel-la' szren chee' na.

⁵Chi'i Xránadxu dxichaj na xaga cedro ca'.

Dxichaj na xaga cedro ca' zaj z̥e na xi'a Líbano.

⁶Dxuxrite na xi'a Líbano ca' ca dxexrite bézredu ca',

na' dxuxrite xi'a Hermón ca tu bézredau'.

⁷Chi'i Xránadxu dxun na chaze xesa.

⁸Chi'i Xránadxu dxuxrize na le'e xixre' lawe' lataj.

Dxuxrize na le'e xixre' chee' x̥ezr la xu Cades.

⁹Chi'i Xránadxu dxuxrize na xaga wal-la ca'.

Dxuchibe na xrlegue xaga ca', na' lu xudau' chee' dxelenná xúgute bénneache:

“¡Gaca ba Dios!”

¹⁰Dxenná be'e Xránadxu nísadau' ca'.

Chadía chacanna dxenná be'e ca Wenná Bea.

¹¹Xránadxu Dios dxuzé' chache' benne' chee' ca'.

Dxuzú̥e' le' lu da ba neza chee' xel-la' dxebesa zri lazre'.

30 Gucá'ana szrena' Lue', Xran, lawe'
da bechisu' neda',
ne quebe bnézuju' lataj benne' ca' dx-
eledábage' neda'
xelún le' chia'.

² Xrana' Dios, bláwizra' Lue', na' bexunu'
neda'.

³ Xran, bseláu' neda' lu lataj ba xa'.

Bexunu' neda' chee quebe chu'a xedxu
ba.

⁴ Le gul-la chee Xránadxu, le'e nácale
benne' cheéqueze'.

Le xe Le': "Xcalenu'", ne dxajsá lázrele
naque' lá'azxa,

⁵ lawe' da tu chí'idauze dxezré'e
san chadía chacanna zua xel-la' zri'i
lazre' chee'.

Wabézredxu tu zreze, san che zílala
wabéle'edxu.

⁶ Gate guzúa chawa' gunnía': Quebe nu
seque' gutá neda',

⁷ lawe' da bze chuchu' neda', Xran, ca tu
xi'a zren,
ne blé'enu' neda' cháwedau'.

Gate bcache lau', na' guzúa' stębe.

⁸ Xran, guláwizra' Lue', ne gata' xueda'
Lue'.

⁹ ¿Bizra da ba neza gaca na chiu' che
gatia',

ne chu'a xedxu ba?

¿Güe lá'ana' Lue' gate ba naca' xu xrte?

¿Waca nu guzenda' da li chiu'?

¹⁰ Bze naga neda', Xran, ne bexache
lazre' neda'.

Xran, gúcale neda'.

¹¹ Benu' bexaca xel-la' dxebezre chia' xel-
la' wexá'a.

Bcuasu' xel-la' dxewí'ine lazre' chia', ne
bzu' chia' xel-la' dxebé.

¹² Chee le' na' tu gúl-lazqueza' chiu', lawe'
da nacu'

da ba neza chia', ne quebe sua zríqueza'.
Xrana' Dios, tu güe lá'anazqueza' Lue'
chadía chacanna.

31 Dxuxrén lazra' Lue', Xrana' Dios.
Quebe gu'u lataj xedué'eda'.

Lu da xrlátaje chiu' bselá neda'.

² Bze naga chí'a, ne bselá neda'.

Bze chuchu neda', ne bucú'uj neda' chee
la'.

³ Nacu' Benne' dxuzé chuchu' neda', ne
dxucú'uju' neda'.

lawe' da nacu' li lazre' gulé'enu' neda'
neza,

ne gusi'u neda' neza na'.

⁴ Bebéaj neda' lu xralaj da ba zaj nu-
cuezé', chee xelex-le' neda'.

Lue' nacu' Benne' dxuxúe' neda'.

⁵ Lu na'u dxuzúa' bénne'du xu'a, Xran.

Lue' bexá'awenu' neda', Dios li lazre'.

⁶ Dxecuídeda' benne' ca' dxelebeza lazre'
dios ca'
quebe bi zaj zaca.

Neda' dxebeza lazra' Xrana' Dios.

⁷ Béle'eda', ne sua' lu da ba neza lawe' da
dxexache lazru' neda'.

Caní dxunu' lawe' da dxelé'equenzu' ca
da dzezaca z'a.

Nézenu' ca dxedéa' lu da ba xa'.

⁸ Quebe bdeu' neda' lu na' benne' ca' dx-
eledábage' neda'.

Bze chuchu' neda' tu lataj chawe'.

⁹ Bexache lazre' neda', Xrana' Dios, lawe'
da zua' lu da ba xa'.

Ba bebizre nisa xuzru xiaj lawa' lawe' da
dxewí'ine lazra'

dute bénne'du xu'a, ne dute bela' dxen
chia'

¹⁰ lawe' da dxedé xel-la' nabán chia' lu da
ba xa',

ne dxedéa' iza chia' ca' dxebezre lazra'.

Dxedú lazra' lawe' da nabaga' zria, na'
dxelelá zrita xu'a.

¹¹ Xúgute benne' ca' dxeledábage' neda'
dxelecuídenę' neda',

na' benne' walíZR chia' dxuluzúe' neda'
chelá'ala,

na' benne' zaj núnbe'e neda' dxelecuase'
neda'.

Benne' ca' dxelelé'engę' neda' la neza dxu-
luzrúnnuęe' naga zua'.

¹² Benne' caní ba gulal-la lazre' neda' ca
dxelal-la lazre'
tu benne' gate.

Naca' neda' ca tu xé'ena xu da nalá'a.

¹³ Dxenda' dizra' schanni' da dxelenná
benne' zante' chia',
na' gáteteze zua da dxuchebe na neda'.
Dxácatē na' dxelune' tuze dizra' bi
xelune' chia',

ne zaj nune' xelútiē' neda'.

¹⁴ Neda' dxuxrén lazra' Lue', Xran.

Dxenníá' nacu' Lue' Dios chia'.

¹⁵ Lu na'u Lue' zaj xu'u zra chia' ca'.

Bselá neda' lu na' benne' ca'
dxeledábage' neda',
ne lu na' benne' ca' zaj nau zi' xuzre'
neda'.

¹⁶ Lu xel-la' szren chiu' bxue neda', wen
zrin chiu'.

Lu xel-la' dxexache lazre' chiu' bselá
neda'.

¹⁷ Quebe gu'u lataj xedué'eda', Xran,
lawe' da dxuláwizra' Lue'.

Ben xelexedué'e benne' ca' dxelebéaj
xíchaje' Lue'.

Ben xelezúa zriē' lu lataj ba xa'.

¹⁸ Ben quebe gaca xelenné' benne' ca' dx-
elezi xē'e,

benne' ca' dxelenné' da calela chee
benne' xrlátaje ca',

da dxelenné' lu xel-la' dxulucá'ana szren
cuina,

ne lu xel-la' dxulucá'ana ditaj benne'
caní.

¹⁹ Da zrente naca xel-la' zri'i lazre' chiu'
da napu'

chee bi gunu' chee benne' ca' dxelape'
Lue' ba lá'ana,

da na' dxunu' lau xúgute' bēnneache
ne chee benne' ca' dxelebeza lazre' Lue'.

²⁰ Lu da bagácheze naga zu' Lue' dxu-
cachu' benne' ca'

chee quebe bi xelún bēnneache chee'.

Dxuzú' benne' ca' tu lu xu'u nagache

chee quebe bi gun chee' xel-la' wetil-la
dizra' chee' bēnneache.

²¹ ¡Gaca ba Xránadxu Dios!

Lu xel-la' dxexache lazre' chee' bēne' da
zrente

chee' gúcalene' neda' tu lu xēzre naga
guca wedil-la.

²² Gate na' guzúa da dxuchebe neda'
gunnía':

Zua' naga québedxa le'e Xrana' neda'.

Lue' bennu' chi'a da guta' xueda' Lue' gate
na' bláwizra' Lue'.

²³ ¡Le zri'i Xránadxu, xúgutele le'e nácale
benne' chee' Lēqueze'!

Xránadxu dxuxúē' benne' ca' quebe dxu-
lusane' Le',

na' dxuxunézrujle'e chee' benne' ca' dxu-
lucá'ana szrene' Le'.

²⁴ Le gutipa lázrele, xúgutele le'e dxe-
beza lázrele Xránadxu Dios,

na' Le' guzé chúchue' le'e.

32 ¡Ba neza zrente naca na chee'
bēnnea'

Dios ba bnite lawe' dul-la da gubáguē',
ne ba gudúē' zria da guzúa chee'!

² ¡Ba neza zrente naca na chee' bēnnea'
Dios quebe dxusebage' le' zria,

bēnnea' quebe dxezí xē'e!

³ Gate quebe guxrúalepa' dul-la gubaga',
bedú lazra' lawe' da gudxezra' bedú zra.

⁴ Te zra ne chizrela bdeu' neda' xel-la' zi',
Xran.

Bedú lazra' ca dxebizre beaj nisa beu' la.

⁵ Nadxa guxrúalepa' dul-la gubaga',

ne quebe bcacha' zria da guzúa chia'.

Bechugu lazra' guxrúalepa' na lau Lue',
Xran,

na' Lue' bnite lau' chee' dul-la gubaga'.

⁶ Xúgute' bēnneache chiu' dxal-la' xu-
luchálajlene' Lue'

gate de' lataj xelexezrelne' Lue', na' gate
zrin da zi' da xa'

da xezezaque',

da gaca na ca tu xēgu nisa zren da dxedx-
uaj na,

na' quebe bi gune na benne' ca'.

⁷ Lue' nacu' ca tu lataj naga gaca gucache
cuina',

na' gucache chawu' neda' chee quebe bi da saca'.

Tu gul-lazqueza' zizraj ca bseláu' neda' lawe' da dxuxú' neda'.

⁸ Dxenná Xránadxu: "Gulé'eda' lue' neza naga dxal-la' tau'.

Gusédeda' lue', ne guzėjajni'ida' lue' ca dxal-la' gunu'.

⁹ Quebe gacu' ca tu bzrina' u tu bea, be quebe bi dxelėjajni'iba',

bea ca' dxun na ba xen nna be'enu'-ba', na' cu'u xia dxú'aba',

chee gunu' xelunba' ca dxaca lazru'."

¹⁰ Benne' wen da calela ca' dxun na ba xen

xeledée' lu da zi' da xa'.

Benne' ca' dxuluxrén lazre' Xránadxu, tu dxuxúezqueze' le' nen dutę xel-la' zri'i lazre' chee'.

¹¹ Le'e, benne' xrlátaje, le be, ne le sua lu da ba neza,

ne chee da ben Xránadxu, gúcalęne' le'e. Nen dutę xel-la' dxebé le gul-la, le'e, nácale li lazre' lau Le'.

33 Le be le'e, benne' xrlátaje, lau Xránadxu Dios.

Xrtante naca lau Dios da dxelúe lá'ana benne' xrlátaje ca' Le'.

² Le gucá'ana szren Dios nen da zríadi'i na du da dxínnele.

Le gúl-laqueze chee' nen da dxúl-lalęnle, ne nen tu da nua na chi du.

³ Le gul-la chee Le' tu da cube.

Le gul-la cháwedau', quínnele dutę xel-la' dxebé.

⁴ Li lazre' naca xrtizra' Xránadxu Dios, na' nune' dutę lu xel-la' li lazre' chee'.

⁵ Le' nazrí'ine' da naca xrlátaje, ne da naca du lazre'.

Zaj núnbea bėnneache xel-la' dxexache lazre' chee Xránadxu

du gabí'i xęzr la xu.

⁶ Ne chee xrtizra' Xránadxu Dios, bęne' xabáa,

na' xúgute belaj da zaj nalá' zran xabáa bęne'

nen be' dxedxuaj dxu'ę.

⁷ Le' dxuxutubę nísadau', ne dxexune' na ca tu xi'a nisa.

Dxegá'a chawę' nisa lu da situj ca' naga nucueze' chee na.

⁸ Le zrebe Xránadxu Dios, xúgutele zrale xęzr la xu nigá.

Le zrebe lau Le', xúgutele le'e zrale lu xęzr la xu

⁹ lawe' da gunneze', na' guca xęzr la xu. Gunná be'ene' na, na' zúaqueze na.

¹⁰ Xránadxu Dios dxune' dxexaca dácheze dizra' zaj nun

bėnneache xęzr la xu ca', ne dxune' dxelaca níteze da ca' zaj nune' xelune'.

¹¹ Dizra' ba nun Xránadxu Dios tu súazqueze

na chadía chacanna.

Da dxegú'u be'ę lu lázrdawe' tu wadíazqueze na

lau xúgute bėnneache.

¹² Ba neza zrentę naca na chee benne' xęzr la xu ca'

Xránadxu naque' Dios chee le', benne' xęzr la xu ca' gucá'a Dios chee xelaque' benne' chee'.

¹³ Naga zue' xabáa chee' dxenná' Xránadxu Dios,

na' dxelé'ene' xúgute cuen bėnneache.

¹⁴ Naga zue' lataj lá'azxa chee' dxenné'ę, na' dxelé'ene' ca zaj zra' bėnneache lu xęzr la xu.

¹⁵ Le' bęne' xichaj lázxdau xúgute benne' ca',

na' dxenné'ę xúgute da dxelune'.

¹⁶ Quebe la benne' wenná bea ne chee benne'

dxjaque' wedil-la zante chee',

ne quebe la benne' wal-la ne chee xel-la' wal-la da nape'.

¹⁷ Quebe nu benne' le' ne chee bzrina', ne quebe nu la ne chee xel-la' wal-la zren chee'.

¹⁸ Le na' xque, dxuxúe Xránadxu Dios benne' ca' dxelezrebe' Le'.

Dxuxúe' benne' ca' dxelebeza lazre' Le'
xexache lazre' le'

¹⁹ chee guselé' le' lu xel-la' gute,

ne chee gugawe' le' gate dxaca gubina'.

²⁰ Dxebeza lázredxu Xránadxu Dios.

Le' naque' Bénnea' dxácalene' dxi'u, ne
dxucu'uje' dxi'u.

²¹ Chee le' na' du lázredxu béle'equezdXu
lau Le',

lawe' da tu dxuxrén lázrezquezdXu La
lá'azxa chee'.

²² Bexache lazre' netu', Xránantu',

lawe' da dxebeza lázrentu' Lue'.

34 Tu güe lá'anazqueza' Xránadxu
Dios te zra chizrela.

Tu gúl-lazqueza' da güe lá'ana na Le'.

² Xezaca ba lázrelena' Xránadxu Dios.

Xelén benne' dxexrui lazre' da caní, na'
welebélé'ene'.

³ Le gucá'ana szren Xránadxu Dios tu
zren nen neda',

na' tu zren gucá'ana szrendxu La lá'azxa
chie'.

⁴ Bláwizra' Xránadxu Dios, na' Le' benne'
chia',

ne bselé' neda' lu xúgute da buluchebe
na neda'.

⁵ Benne' ca' gulebeza lazre' Le' belelé'ene'
da xabáa chee',

ne quebe belexedué'ene'.

⁶ Neda', benne' xache', bláwizra',

na' ben Xránadxu Dios chia',

ne bselé' neda' lu xúgute da dxezaca zi'a.

⁷ Gubáz chee Xránadxu zue' cuita benne'
ca' dxelezrebe' Le',

na' dxucu'uje' benne' ca'.

⁸ Le guxúe xque, na' lé'ele naca xrlátaje
Xránadxu Dios.

Ba neza zrente naca na chee bénnea' dx-
uxrén lazre' Le'.

⁹ Le zrebe Xránadxu Dios, le'e, nácale
benne' chee Léqueze',

lawe' da quee bi dxelexazrje benne' ca'
dxelezrebe' Le'.

¹⁰ Bezre xíxre'du ca' dxelexázrjeba', ne
dxeledunba'.

Benne' ca' dxelebeza lazre' Xránadxu
Dios

quebe bi da chawe' xelexázrjene'.

¹¹ Le da, bidau', ne le xen chia'.

Gusédeda' le'e chee zrébele Xránadxu
Dios.

¹² Nu benne' ládujla le'e dxaca lazre'
xegá'ane'

lu xel-la' nabán,

bénnea' dxaca lazre' sue' zane' iza chee
lé'ene' da chawe'?

¹³ Bxue xanne' ca dxuchálaju' chee quebe
nneu' da calela,

ne chee quebe guchálaju' da wen lazre'.

¹⁴ Bsan da calela da dxunu', na' ben da
xrlátaje.

Ben ba xuzre gapu' xel-la' dxebeza zri
lazre',

ne ben ca naca chee na.

¹⁵ Dxuxúe Xránadxu Dios benne' ca' zaj
naque' xrlátaje,

ne dxuzé' nague' da dxululáwizre' Le'.

¹⁶ Dxezrá'a Xránadxu Dios benne' ca' dx-
elune' da calela,

chee quebe sua nu benne' chajsá lazre'

benne' wen da calela ca'.

¹⁷ Benne' xrlátaje ca' dxululáwizre' Xrá-
nadxu Dios,

na' Le' dxenne' chee',

ne dxuselé' benne' ca' lu xúgute da dx-
elezaca zi'e.

¹⁸ Gágute zua Xránadxu Dios naga zaj
zra' benne' ca'

dxelexewi'ine lazre',

ne dxuselé' benne' ca' dxelexewi'ine
lazre'.

¹⁹ Da zante da dxezaca zi' benne'
xrlátaje.

Dxuselá Xránadxu Dios bénnea' lu
xúgute da ca'.

²⁰ Le' dxuxúequeze' xúgute zrita xu'e,

na' netú zrita chee' quebe gachaj na.

²¹ Dul-la da dxun benne' wen da calela
gute na le',

na' xelebía xi' benne' ca' dxelecuídene'
benne' xrlátaje.

22 Xránadxu Dios dxexá'awē' bēnne'du
xu'u

benne' wēn zrin cheē' ca',
na' xúgute' benne' ca' dxuluxrén lazrē' Lē'
québequeze xelebía xi'e.

35 Xran, bsizre benne' ca' dxelenné'
chia'.

Gudíl-lalē' benne' ca' dxeledíl-lalēne'
neda'.

2 Gudá gucu'uju' neda' lu wedil-la,
ne gúcale' neda'.

3 Gudēl-la xia cheē' wedil-la cheē' guzagu'
benne' ca'

dxululaguē' neda'.

Guzre neda' nacu' Benne' dxuselé' neda'.

4 Bēn xelxedué'e, ne xeleque zrēaje
benne' ca'

dxelaca lazrē' xelútie' neda'.

Bēn xuluzrunnuj, ne xelxedué'e benne'
ca' dxelaca lazrē'

xelunē' chia' da calela.

5 Bēn xelaque' ca tu xizre bēbe da dxua
be',

ne gusel-la gubáz cheē' xabáa chiu' cheē'
gulaguē' benne' ca'.

6 Bēn chul-la neza naga xeledéē', na' gaca
na naga xelebile',

ne gusel-la gubáz cheē' xabáa chiu' cheē'
gulaguē' benne' ca'.

7 Bulucachē' tu xralaj cheē' quēla na
neda',

ne quegá bi nuna' cheē'.

Gulēne' tu xēdxu naga cheajcházia'
neda',

ne quegá bi dē da dxagu na zria chia'.

8 Gusel-la da guzría xi na benne' ca', ne
quebe xeleque be'ene'.

Ben quēla xralaj cheē' na' léqueze',

ne cheajlecházie' naga xelebía xi'e.

9 Nadxa bélē'ēqueza' ca naca da nun
Xránadxu Dios.

Sua' lu da ba neza lawe' da bselé' neda'.

10 Xúgute' zrita xu'a xelenná na: Xran,
¿núzraqueze naca

ca nacu' Lue'?

Dxuseláu' benne' xache' lu na' benne'
wál-ladxa ca lē',

ne benne' dxexazrje lu na' benne' dxe-
banē' da du dē cheē'.

11 Belasa benne' dxelexechebē' da wēn
lazre'.

Gulawē' zria neda' cheē' tu da quebe dx-
aca be'eda'.

12 Belexebi'e neda' da calela cheē' tu da
xrlátaje da bēna',

cheē' xuluzúe' neda' lu da ba xa'.

13 Neda', gate quebe chawe' gulezúe',
bewi'ine lazra'.

Bēna' gubasa da bsaca zi na neda',

ne du lazra' bláwizra' Dios cheē' xexunē'
benne' ca'.

14 Bewi'ine lazra' cheē' benne' ca' ca dx-
una' cheē'

le sa' ljwezra', u cheē' bi bíchequeza'.

Guzúa' lu da baxache' ca dxun benne'
cheē' xrne'e gate dxatie'.

15 Gulebé benne' ca' gate zua' lu da ba xa',
ne belezraguē'.

Belezraga benne' dxeledábague' neda',
benne' wēn da calela, na' chadite' gulē-
lē' neda'.

Tu beléuzqueze' neda', ne quebe gulezúa'
zrie'.

16 Bulusaca zi'e neda', ne belún lē' chia',
ne gulagu lazxe' lu xel-la' dxelezzá'a cheē'
neda'.

17 Xran, ¿ájate' scha' gu'u latja da
dxelunē'?

Bselá neda' lu na' benne' caní dxuluzría
xi'e neda',

benne' zaj naque' ca bezre xixre' ca'.

18 Xapa' Lue': Xcalenu', lávela benne' zan
ca' zaj

nadupe' chiu' Lue'.

Tu güe lánazqueza' Lue' ládujla benne'
zan ca'.

19 Quebe gu'u lataj xelebé benne' ca' dx-
eledábague' neda',

ne quebe bi nuna' cheē'.

Quebe gu'u lataj xelún la benne' ca' chia',
benne' dxelecuídenē' neda',

ne quebe bi de da dxagu na zria chia'.
²⁰ Benne' caní quebe dxelaca lazre'
 xelezúe' lu
 xel-la' dxebeza zri lazre',
 na' lu xel-la' dxelezí xē chee' dxelenné'
 chee' benne' ca'
 dxelebeza zri lazre' lu xēzr la xu nigá.
²¹ Belún le' chia'.
 Gulenné': "¡E! ¡E! ¡Ba blé'entu' da nune'!"
²² ¡Xran, ba blé'equznu' da dxelune'!
 ¡Quebe sua zriu'!
 ¡Xran, quebe gusanu' neda'!
²³ ¡Guxasa, guzúa guchi'u chia'!
 ¡Gudá, Xrana' Dios, chee' gácalenu' neda'!
²⁴ ¡Bchi'a chia' lu da xrlátaje chiu', Xrana'
 Dios!
 ¡Quebe gu'u benne' ca' lataj xuluzrizre'
 chia'!
²⁵ ¡Quebe gu'u lataj xelenné': "Ba guca da
 dxezá lázredxu!"
 ¡Quebe xelenné': "Ba bendxu chie'!"
²⁶ Ben xelxedué'e, ne xeleque zrájaje
 xúgute benne' ca'
 dxelebeñe' gate bi dxaca chia'.
 Bsi'e xel-la' stu', ne ben xelaca xala
 benne' ca'
 dxeledábague' neda'.
²⁷ Ben xelúl-la, ne xelebé benne' ca' zaj
 de'e neda',
 chee' xelennáqueze': "Tu xegá'ana
 szrénzqueze Xránadxu,
 Bénnea' dxezá lazre' sua lu xel-la' dxe-
 beza zri lazre'
 benne' wen zrin chee'!"
²⁸ Tu guchálajzqueza' chee' da xrlátaje
 chiu',
 ne chee' da dxue lánaqueze na Lue' te
 zra chizrela.

36 Da zrinnañ da dxun benne' dx-
 uzúa chalá'ala Dios
 dxuchálajle na le' lu xichaj lázrdawe'.
 Quebe dxezá lázrequeze' gape' Dios ba
 lá'ana.
² Chee' le' na' dxulé'e cuine' ca' tu benne'
 zrente.

Dxéquene' quebe dxelé'e Dios da zrinnañ
 da dxune',
 ne quebe dxeçuide Dios le'.
³ Da tu dxuchálajzqueze' naca na da zrin-
 nañ, ne da wen lazre'.
 Québedxa dxéajni'ine', ne québedxa dx-
 une' da xrlátaje.
⁴ Dxulaba lazre' ca naca da calela gune'
 gate de' naga dxate'.
 Xu'e neza da quebe naca neza chawe'.
 Quebe dxeçuídene' da calela.
⁵ Xrana' Dios, zrente naca xel-la' dxex-
 ache lazre' chiu'
 da dxezrinte na xabáa,
 na' dxezrinte lu beuj xel-la' li lazre' chiu'.
⁶ Da xrlátaje chiu' naca na ca tu xi'a zren
 chiu',
 na' ca dxuchi'u naca na ca tu nísadau'
 sítuñte.
 Xrana' Dios, tu dxuxúezquezu' bén-
 neache, ne be xixre' ca'.
⁷ Xrdante naca xel-la' dxexache lazre'
 chiu', Dios.
 Chee' le' na' dxuluxrén lazre' bénneache
 Lue' ca dxelún
 bedxuj dxéenedu ca' dxelexezraba' zran
 xrila bedxuj.
⁸ Welélajquezne' chee' da de'e lizru',
 na' Lue' gunézruju' xel'éaje' da naca ca tu
 xegu da
 naca na da dxezaca ba lazru' Lue'.
⁹ Naga zu' Lue' zua beaj naga dxalaj nisa
 da dxunna na
 xel-la' nabán.
 Lu xel-la' naxani' chiu' walé'entu' da naca
 lení'.
¹⁰ Bexache lazre' benne' ca' zaj núnbe'e
 Lue',
 ne bzua chee' benne' li lazre' ca' da xrlá-
 taje chiu'.
¹¹ Quebe gu'u lataj tábaga benne' dx-
 ucá'ana szren cuina neda',
 ne quebe gutá benne' dxun da calela
 neda'.
¹² Xeajlechaze benne' ca' dxelune' da
 zrinnañ.

Lue' benu' xeaǵlechaze benne' ca', na' quebe gaca xelexase'.

37 Quebe su' stebe ne chee da dxelunē' da calela,

ne quebe se lazru' da zaj nápałe'e benne' dxelunē' da zrinnaj,

²lawe' da xeledē chee benne' ca' ca dxaca chee xixre' du ca',

na' gaca chee benne' ca' ca dxaca chee xixre' da nadxugu,

dxebizre na.

³Bxren lazre' Xránadxu Dios, ne ben da xrlátaje,

na' súaquezu' lu xezr la xu, ne sí'quezu' ba neza da li.

⁴Bezaca ba lazre' nen Xránadxu,

na' Le' gúnnaqueze' chiu' da dxezá lazru'.

⁵Bzua cuinu' lu na' Xránadxu, ne bxren lazre' Le', na' Le' gunē' ca da dxenabu'.

⁶Gulé'ene' da xrlátaje chiu' ca tu xel-la' naxaní',

ne da li lazre' chiu' ca lawe' zra.

⁷Guzúa zrize lau Xránadxu, ne guleza lazre Le'.

Quebe su' stebe ne chee benne' dxezi'e ba neza,

bénnea' dxúnqueze' da calela.

⁸Bsan xel-la' xichaj zra'a, ne quebe cuídenu'.

Quebe sa lazru' bi xusactu' benne' ca' dxelunē' da calela,

⁹lawe' da guzría xi' Dios benne' ca' dxelunē' da calela.

Benne' ca' dxelebeza lazre' Xránadxu, gaca chee' xezr la xu.

¹⁰Chadite te chee benne' ca' dxelunē' da calela.

Le'enu' lizre lataj benne' ca', san québedxa zaj zre'e na'.

¹¹Benne' dxexruj lazre' ca' gaca chee' xezr la xu,

na' xelexezaca ba lazre' lu xel-la' dxebeza zri lazre' zrente.

¹²Benne' dxelún da calela dxelilaj lazre' bi xelunē'

chee benne' xrlátaje,

ne lu xel-la' dxelezzrá'a chee' xelagu lazxa benne' ca'.

¹³Xránadxu Dios guzrízrequeze' chee benne' ca' dxelunē'

da calela

lawe' da nézene' ba za zra cheajsé chee benne' ca'.

¹⁴Benne' dxelunē' da zrinnaj dxelebéaje' xia chee',

ne dxuluzé' xaga nalá xéche'ze chee',

chee xuluzría xi'e benne' xache' ca', ne benne' dxelexazrje',

chee xelútiē' benne' ca' dxelunē' da li lazre'.

¹⁵Xia nalá chee benne' ca' chaze na lu lazrdáuqueze',

na' gáchajqueze xaga nalá xéche'ze chee'.

¹⁶Cháwedxa naca da du da de chee benne' xrlátaje

ca da gunní'a da zaj napa zánete benne' dul-la ca',

¹⁷lawe' da welátequeze ni'a na' benne' dxelunē' da zrinnaj.

Xránadxu ná'queze dxuxúe' benne' xrlátaje ca'.

¹⁸Nunbea Xránadxu ca zaj naca zra xelezúa benne'

du lazre' ca',

na' da zaj napa benne' ca' xelezúa na chadía chacanna.

¹⁹Quebe xelexedué'ene' gate quebe dxaca chawe' chee

bénneache,

na' lu zra chee gubina' gata' da xelawe'.

²⁰Xelebía xi' benne' dxelunē' da zrinnaj, na' benne' ca' dxeledábaga' Xránadxu,

ca dxaca chee xiaj xixre' ca'.

Xeledé chee', ne xelexenitiē' ca zren chee xi'.

²¹Benne' ca' dxelún da calela tu da dxelenabe' tu chí'idauze,

ne quebe dxuluxunézruje' na,

na' benne' xrlátaje dxexache lazre' le', ne dxunézruje' chee'.

²² Benne' ca' dxel'é Xránadxu le' chawe', gaca chee

benne' ca' xezr la xu,

na' benne' ca' quebe dxel'é'ene' chawe', xelebía xí'queze'.

²³ Da dxelún benne' xrlátaje ca' zaj naca na da ble'e

Xránadxu le', na' dxel'é'ene' cháwedau' ca da dxelune'.

²⁴ Gate dxelejchaze benne' xrlátaje ca' quebe cheajlechaze'

tu chi'ize lawe' da nuxru Xránadxu na' benne' ca'.

²⁵ Benne' cuide' guca', ne na'a ba gúxrua', ne cabata' ble'eda' tu benne' xrlátaje

gusán Dios le',

na' quebe xeledá zri'ine zre sue' xelebéa-je' guna'.

²⁶ Benne' xrlátaje nigá tu dxexache lázrezqueze',

ne dxunézruje' bi dxexazrje nu benne',

na' zri'ine zre sue' zaj naque' da ba neza chee bénneache.

²⁷ Québedxa gunu' da calela, san ben da xrlátaje,

na' gaca bánquezu' chadía chacanna,

²⁸ lawe' da nazrí'i Xránadxu da naca li lazre',

ne quebe dxusané' benne' zaj de'e Le'.

Chadía chacanna tu guxúezqueze' benne' ca',

san guzría xi'e xrtia ljwezre benne' ca' dx-elune' da calela.

²⁹ Benne' xrlátaje ca' gaca chee' xezr la xu nigá,

na' xelezrá'queze' chadía chacanna lu xezr la xu.

³⁰ Benne' xrlátaje dxuchálajqueze' da naca sina,

na' ca dxuchi'e naca na xrlátaje.

³¹ Da nadxixruj bea Dios tu xú'uzqueze na xichaj lázrdawe'.

Chee le' na' quebe cheajchaze bénnea'.

³² Benne' wen da zrinnaj dxenné'e benne' xrlátaje,

ne dxune' ba xuzre gutie' le'.

³³ Quebe gusán Xránadxu le' lu na' benne' wen da calela na',

ne quebe guzría xi'e le' gate dxuchi'e chee'.

³⁴ Guleza lazre' Xránadxu, ne ben ca da ba gunné',

na' Le' chísaqueze' Lue' chee' gaca chiu' xezr la xu nigá.

Gate xelebía xi' benne' dul-la ca', na' lé'enu' na.

³⁵ Ble'eda' tu benne' wen da zrinnaj, nagá'ané' szrente,

na' guxánle'e da de' chee' ca dxegula tu xaga zrente.

³⁶ Na' gudé' chee', na' québedxa zue' na'a. Bexílaja' le', san quebe nu bezrelda'.

³⁷ Blaba lazre' ca naca chee' benne' li lazre',

ne gunná' benne' xrlátaje

lawe' da naga cheajsé' gaca tu da ba neza chee' benne'

dxebeze' zri lazre'.

³⁸ Benne' dxelune' da calela xelebía xí'queze'.

Quebe nu cha' xrtia ljwezre benne' dx-elune' da zrinnaj.

³⁹ Xránadxu Dios guseláqueze' benne' xrlátaje ca',

na' Le' gutipe' lazre' benne' ca' lu zra chee da stebe.

⁴⁰ Xránadxu Dios gácalene' le', ne guselé' le'.

Guselé' le' lu na' benne' ca' dxelune' da calela,

na' guné' gaca chawe' chee' lawe' da bu-luxrén lazre' Le'.

38 Xrana' Dios, quebe til-lu' neda' lu xel-la' dxezrá'a chiu'.

Quebe gudéu' neda' da ba xa' lu xel-la' snia chiu',

² lawe' da belúe xaga nalá xéche'ze chiu' neda',

na' be' na'u neda'.

³Quebe bi chawe' zua belá' dxen chia' lawe' da dxezra'u neda',
ne quebe zaj zua zrita xu'a cháwedau' lawe' da nuna' dul-la.

⁴Ca naca da zrinnaj da nuna' ba zria cháqueze na xíchaja'.

Zaj naca na chia' ca tu xua' z'íle'e.

⁵We' da zaj zria bel-la' dxen chia' ba dx-elelá na,

ne ba dxeluzru na,
da na' dxaca chia' lawe' da bena' da calela.

⁶Nucache lawa', ne dxexedu'éle'eda',
ne dxebezre xacha' te zra chizrela,

⁷lawe' da ca naca bel-la' dxen chia' dxelá na,

ne quebe bi chawe' zua belá' dxen chia'.

⁸Nate ni'a na'a, ne dxéqueda' ba naxúzrujne zrita xu'a.

Dxebezre lazra' lawe' da zua stębe lázrdawa'.

⁹Xran, ca naca da dxezá lazra' zaj zua na nen Lue',

na' da dxebezre lazra' dxel'équeznu' Lue'.

¹⁰Dxate lázrdawa', ne ba bedú lazra',
ne québedxa dxel'éda' cháwedau'.

¹¹Dxelexebiga ljwezra', ne le sa' ljwezra' ca' zítu'la

ne chee xízrawe' chia',

na' benne' walíZR chia' ba belexecuase' zítu'la.

¹²Benne' ca' dxelaca lazre' xelútię' neda' dxuluzale' xralaj,

na' benne' ca' dxelúe lazre' bi gaca chia' dxelennę' chia'

wabía xi'a, ne tu zaj zúaze' bi xulusaque' neda'.

¹³Neda' quebe dxenda' ca dxaca chee tu benne' cuezru,

ne naca' ca tu benne' quebe dxaca nne',
benne' quebe dxexrá dxu'e.

¹⁴Naca' ca tu benne' quebe dxenne',
bénnea' quebe dxexechebe',

¹⁵lawe' da dxebeza lazra' Lue', Xrana' Dios.

Lue' xechębu' waláz chia', Xrana' Dios.

¹⁶Gunnia': Quebe gu'u lataj xelebenę' ne chee da dxaca chia'.

Gate dxeajchazia', quebe gu'u le' lataj xulucá'ana szren cuine'

lawe' da zua' lu da baxache'.

¹⁷Ba zua' cheajcházia',

ne tu dxelázqueze dutę bel-la' dxen chia'.

¹⁸Chee le' na' xrúalepequeza' da calela da bena',

ne xewine lazra' ca naca dul-la da nabaga'.

¹⁹Benne' ca' dxeledábague' neda' zaj zúaqueze' chawe',

ne zaj naque' benne' wal-la.

Zaj naxánle'e benne' ca' dxelecuídene' neda',

ne quebe bi de da dxagu na zria chia' lau le'.

²⁰Benne' ca' dxelune' da calela chee benne' ca'

dxelune' da xrlátaje

zaj naque' benne' dxeledábague' neda' lawe' da

tu dxúnzqueza' da xrlátaje.

²¹Quebe gusanu' neda', Xrana' Dios.

Dios chia', quebe su' zitu' naga zua'.

²²Ben ba xuzre gácalęnu' neda', Xran.

Nacu' Benne' dxuselę' neda'.

39 Neda' gunnía': Guxúe xanne' cuína' chee quebe guna' dul-la lu da guchálaja'.

Tu guxúe xánnezqueza' ca da guchálaja' dxácate' na'

zua benne' wen da calela naga zua'.

²Guzúa' zrize ca tu benne' quebe dxaca nnie',

ne québequeze bchálaja' da xrlátaje,

na' bzáladxa xel-la' dxudía chia'.

³Guca lázrdawa' ca tu da dxala,

na' lu da dxulaba lazra' guca na ca tu xi'.

Na' gunaba' lau Xránadxu, gunnía':

⁴Xran, ble'e neda' da gaca chia',

ne ájate zra gaca bana'.

Bzéajni'i neda' chadite nazruzre gatia'.

⁵Nunu' chia' sua' bábaze zra,

na' iza chia' québequeze bi naca na lau Lue'.

¡Da líqueze quebe bi zaj naca zra chee xúgute bēnneache!

⁶ ¡Da líqueze zaj naca bēnneache ca tu zrúl-laze!

¡Da líqueze dácheze naca zaj dxe' bēnneache gunne xue

chee xel-la' nabán chee'!

¡Dxulucúdię' xel-la' gunn'á, ne quebe zaj nézene'

nu chee gaca na!

⁷ Na'a, Xran, ¿bízraqueze cueza lazra'?

Tuzu' Lue' dxal-la' cueza lazra'.

⁸ Bselá neda' lu xúgute da zrinnaj da bēna'.

Quebe gu'u lataj benne' xala ca' xelún le' chia'.

⁹ Guzúa' zrize, ne quebe bi bchálaja'

lawe' da Lué'queze benu' guca caní chia'.

¹⁰ Becá'a xízrawę' da bzu' lu bēla' dxen chia'.

Bache gatia' lu da dxusacu' neda'.

¹¹ Dxudéu' ba xa' tu benne' ba nun dul-la chee dxuzéajni'inu' le',

ne ca dxun béadu dxuteba' ladxe' dxuzría xi'u

da nazrí'idxe bēnnea'.

¡Da líqueze quebe bi zaj naca zra chee xúgute bēnneache!

¹² Bene da dxenaba' lau Lue', Xran,

ne bze naga ca da dxuláwizra' Lue'.

Quebe su' zrize gate zua' dxebezra' lau'

lawe' da naca' lau Lue' ca tu benne' dxedaze', ne quebe de lizre',

ne naca' ca tu benne' quebe de xezr la xu chee'

ca gulaca xra xrtawa' ca'.

¹³ Bsan neda' chee gata' lataj xezí' le dipa' nédxula ca xexá'a xenitia'.

40 Nen dutę xel-la' zren lazre' chia' guleza lazra' Xrana' Dios,

na' bze nague' chia', ne benne' da gunábeda' Lę'.

² Bebéaje' neda' ca tu lu xędxu situj, ne lu da naca

ca guna' guzra'.

Bzue' ni'a ca tu lu xiaj xre, ne begu'e neda' neza li.

³ Bene' dxul-la' tu da cube da naca na da dxue lá'ana'

Xránadxu.

Benne' zante xelelé'ene' da nigá dxune', na' xelezrebe' Lę',

ne xuluxrén lazre' Xránadxu Dios.

⁴ Ba neza zrentę naca na chee bēnnea' dxuxrén lazre'

Xránadxu Dios,

ne quebe dxune' ca dxelún benne' ca' dxulucá'ana szrene'

bedáu' xiaj xaga ca',

ne quegá ca dxelún benne' ca' dxelún lazre'.

⁵ Da zante benu', Xrana' Dios, da dxebánentu',

ne ca zaj naca da dxezá lazru' gunu' cheętu'

quebe gaca guláabantu' lau Lue'.

Chela nu guzenda' ca zaj naca na,

ne che guchálaja' chee na, quebe baben tu na.

⁶ Quebe dxezaca ba lazru' béadu ca' gutia' lau',

u da gunna' Lue',

ne quebe gunabu' béadu ca' guzézxea' lau', u dxen chee

béadu ca' da guzúa' lau' ne chee dula nabaga',

san gusalaju' naga' chee xenda' chi'u.

⁷ Nadxa gunnía': Guná' xque, za'a neda'. Lu xiche lá'azxa naxúaj na ca naca chia'.

⁸ Dxezaca ba lazra' guna' ca da dxaca lazru' Lue', Dios chia',

na' da nadxixruj be'u zua na lu xichaj lázrdawa'.

⁹ Ca naca da xrlátaje chiu' ba bzenda' bēnneache

naga zaj nazraga chiu' bēnneache zante.

Gunná' xque, quebe guzúa' zria',

ca nézqueznu' Lue', Xrana' Dios.

¹⁰ Quebe bcácheza' ca da xrlátaje chiu' lu lázrdawa'.

Ba bchálajqueza' ca naca xel-la' li lazre' chiu',

ne ca dxuseláu' bénneache.

Quebe guzúa' zri ca naca xel-la' dxexache lazre' chiu',

ne ca naca da li chiu' ládujla benne' zante zaj nazrague' chiu'.

¹¹ Xran, quebe chenu' xexache lazru' neda'.

Xel-la' dxexache lazre' chiu', ne da li chiu' tu dxelácalezqueze na neda'.

¹² Lawe' da ba guléchajle'e da calela ca' neda',

da calela ca' da ba nuna' zaj zria na neda', na' quebe gaca nna'a naga zu'.

Zaj naxánda na ca zaj naca xicha xíchaja', na' dxedú lazra'.

¹³ Dxenaba' lau', Xran, guseláu' neda'.

Xran, ben ba xuzre gácalenu' neda'.

¹⁴ Ben xelexedué'e, ne xeleque zréaje xúgute benne' ca' dxelaca lazre' xelútie' neda'.

Ben xeajxaca bzébela, ne xelexedué'e benne' ca' dxelezá lazre' xelune' chia' da calela.

¹⁵ Ben xeleque zréaje' lawe' da belún zréaje' neda'

benne' ca' gulé'e neda': "E, e."

¹⁶ Ben xelebé, ne xelezúe lu da ba neza xúgute benne' ca'

dxelebeze' Lue',

ne ben xelennáqueze benne' ca' zaj nazrí'ine' Lue',

weselá chee'.

Xelenné': "Xegá'ana szrénqueze Xránadxu."

¹⁷ Láqueze sua' neda' lu da ba xa', ne lu da baxache',

guxúequeze Xrana' Dios ájala guné' chia'.

Nacu' Benne' dxácalene' neda', ne Benne' weselá chia'.

Dios chia', quebe chenu' gácalenu' neda'.

41 Ba neza zrente naca na chee' bénnea' dx'e'e gunne xue chee' benne' xache'.

Lu zra gate zu'e lu da stebe, guselá Xránadxu bénnea'.

² Xránadxu guxúequeze' le', ne gunézruje' le' xel-la' nabán.

Gaca na tu da ba neza zrente chee' bénnea' lu xezr la xu nigá,

na' quebe gudé Xránadxu le' lu na' benne' ca' dxeledábague' Le'.

³ Xránadxu Dios gúxruqueze' le' gate zúe' lu xel-la' dxudía.

Gun chawe' dute' da naque' gate na' quebe chawe' zu'e'.

⁴ Gunnía': Xrana' Dios, bexache lazre' neda'.

Bexún bénne'du xu'a lawe' da bēna' dul-la gate gudábaga' Lue'.

⁵ Benne' ca' dxeledábague' neda' dxelenné' chia' da calela.

Dxelenné': "¿Bátala gate benne' nigá, ne xenite le'?"

⁶ Che xedajlenné'e neda', dxelún lazre'.

Dxelebáje' neda' dizra' chee' bi da calela gaca xelenné' chia',

na' gate dxelexedxúaje', na' dxelexrúe' dizra' na'.

⁷ Gate dxelezraga benne' dxelecuídene' neda',

na' tu dxelennézqueze' chia'.

Tu dxuluchálajlezeze' ljwezre' chia' neda' da naca

da calela, dxelenné':

⁸ "Ba guxú'e tu xízrawe' da gute na le', ne québedxa xexásaqueze' ga na' de'."

⁹ Cá'anqueze bénnea' guleza zri lazre' nen neda',

bénnea' bxren lazra', na' gudágulequeze' neda',

benne' nigá dxedábagazegue' neda'.

¹⁰ Lue', Xrana' Dios, bexache lazre' neda', ne ben xexasa' neda',

na' xunézruja' benne' ca' ca da dxal-la' xelezí'e.

¹¹ Caníqueze nezda' ba bēna' da dxezaca ba lazru' Lue',

chee' quebe bi xelebé'e benne' ca' dxeledábague' neda'.

¹² Ca naca chia' neda', ba béxruquezu'
neda' lawe' da
naca' du lazre',
ne ba bzu' neda' lau Lue' chadía
chacanna.

¹³ ¿Gaca ba Xránadxu, Dios chee benne'
Israel ca'
gaxuane iza, ne chadía chacanna!
¿Ca'an naca na, ne ca'an gaca na!

42 Ca dxun bzrina' xixre' dxebezre
xa'aba' lawe' da
dxebíleba' nisa,
ca' dxuláwizra bénne'du xu'a da naca
chiu', Dios.

² Dxebile bénne'du xu'a da naca chiu',
Dios ban.
¿Bata gaca xida' chee guzúa cuina' lau
Dios?

³ Nisa xuzru xiaj lawa' guca na ca xeta
dxawa'
te zra chizrela,
dxácatē na' gulé'ē neda' xúgutē zra: “¿Ga
na' Dios chiu'?”

⁴ Dxajsá lazra' chee da caní, ne dxebezre
lazra'.
Dxajsá lazra' ca guxá'alēna' benne' zan
ca',
ne nuzúa' lawe' le' lizre Dios.

Tu dxúl-lazquezdxu lu xel-la' dxebé,
ne dxue lá'anaquezdxu Dios lu laní.

⁵ ¿Bizr chee na' dxate ni'a na'u, bénne'du
xu'a?
¿Bizr chee na' zu' stēbe lu xichaj
lázdawa'?

Guleza lazre' Dios lawe' da güe
lá'anaqueza' Le' da xula.
Naque' Benne' dxuselé' neda', ne Dios
chia'.

⁶ Dios chia', ba nate ni'a na' bénne'du xu'a
lu xichaj lázdawa'.
Chee le' na' dxajsá lazra' chiu' nigá zua'
lu xēzr la xu
xechalá'a xegu Jordán,
ne lu xēzr la xu chee benne' Hermón
naga zua xi'a Mizar.

⁷ Ca schaga da dxun nísadau', ne da dxun
tu bdua nisa
zren chiu', Dios,
ca' dxeque bénne'du xu'a lawe' da
dxusaca zi' na'u neda'.

⁸ Te zra xexache lazre' Xránadxu neda',
na' chizrela tu gúl-lazqueza' da güe
lá'ana' Le',
ne tu guchálajlezqueza' Dios,
Bénnea' dxunne' xel-la' nabán chia'.

⁹ Xapa' Dios: Lu'équeze dxucu'uju' neda'.
¿Bizr chee na' nal-la lazru' neda'?
¿Bizr chee na' dxewí'ine lazra' lawe' da
dxusaca zi'
benne' dxdábague' neda'?

¹⁰ Ca tu benne' dxelé'ē zrita xu'a, ca' dx-
elún benne' ca'
chia', dxelún le' chia'.

Tu zra tu zra dxelenné' chia': “¿Ga na'
Dios chiu'?”

¹¹ ¿Bizr chee na' dxate ni'a na'u,
bénne'du xu'a?
¿Bizr chee na' zu' stēbe lu xichaj
lázdawa'?

Guleza lazre' Dios lawe' da güe
lá'anaqueza' Le' da xula.
Naque' Benne' dxuselé' neda', ne Dios
chia'.

43 Bchi'a chia', Dios, ne ble'e lau
naca' xrlátaje.

Bselá neda' lu na' benne' ca' dxuluzúe'
Lue' chalá'ala,
ne lu na' benne' ca' dxelezí xē'e, ne dx-
elune' da zrinnaj.

² Nacu' Lue' Dios chia', ne dxuzé' chuchu'
neda'.

¿Bizr chee na' nusán lazru' neda'?
¿Bizr chee na' dxewí'ine lazra' lawe' da
dxusaca zi' neda'
benne' ca' dxeledábague' neda'?

³ Gusel-la chia' xel-la' naxaní' chiu', ne da
li chiu'.

Da caní xulusí na neda' neza.
Xelexé na neda' lu xi'a lá'azxa chiu', ne
naga zúaquezu' Lue'.

⁴ Chu'a naga zua lucugu chee Dios.

Chu'a lau Dios, Bénnea' dxuné' dxebeda',
na' zua' lu da ba neza.

Güe lá'ana' Lue' nen da zríadi'i na du,
Dios chia'.

⁵ ¿Bizr cheé na' dxate ni'a na'u, bénne'du
xu'a?

¿Bizr cheé na' zu' stébe lu xichaj
lázrdawa'?

Guleza lazre' Dios lawe' da güe
lá'anaqueza' Lē' da xula.

Naque' Benne' dxuselé' neda', ne Dios
chia'.

44 Dios, bache bénentu' lawe' da bu-
luzén Xra xrtáuntu' netu'
ca naca da benu' lu zra cheé', da naca na
iza ba guledé na.

² Bzria xi'u bénneache xęzr la xu xezí-
cadxa ca' lau
xra xrtáuntu' ca', na' bzu' lę' xlataj benne'
ca'.

Bsaca zi'u benne' xęzr la xu ca', san bzua
chachu'

bénneache chiu' lu xęzr la xu nigá.

³ Xra xrtáuntu' ca' quebe gulezi'e xęzr la
xu nigá

nen xia nalá cheéqueze',
Ne quebe buluselá cuine' nen xel-la' wal-
la da zaj nape'.

Lue' bseláunquezu' lę' nen xel-la' waca
chiu',

ne nen xel-la' wal-la chiu',
ne nen xel-la' naxan' chiu', lawe' da
bezaca ba lazru' nen lę'.

⁴ Dios, nacu' wenna' bea chia'.

Bselá zri'ine zre sua Jacob.

⁵ Nen xel-la' waca chiu' xebéajntu' benne'
ca'

dxeledábage' netu'.

Lu Lau' Lue' guchuchuj guléajntu' benne'
ca'

dxeledábage' netu'.

⁶ Quebe guxrén lazra' xaga nalá xéche'ze
chia',

ne quebe guselá xia chia' neda'.

⁷ Lue' bcu'uju' netu' lau benne' ca' dx-
eledábage' netu',

ne benu' belexedué'e benne' ca' belecuí-
dene' netu'.

⁸ Ne cheé Dios tu súazquezentu' lu da ba
neza,

na' chadía chacanna güe lá'anantu' Lau'
Lue'.

⁹ Nusán lazru' netu', ne nunu'
dxexedué'entu',

ne quebe dxéajlenu' benne' cheentu' ca'
dxjaque' wedil-la.

¹⁰ Benu' buzrúnujntu' lau benne' ca' dx-
eledábage' netu',

na' benne' ca' dxelecuídene' netu'
gulegüe' ca naca

da nápantu'.

¹¹ Bdeu' netu' ca zrila' ca' lu na' benne'
xelútie' netu',

ne ba bęse dínnaju' netu' ládujla benne'
xęzr la xu ca'.

¹² Bdéu' netu', benne' chiu' ca' cá'aze, ne
quebe bi guzi'u.

¹³ Dxunu' dxelún la benne' walízre
cheentu'.

Benne' zaj naxéchaje' netu' dxelún lę', ne
dxuluzrizre' cheentu'.

¹⁴ Nuzú' netu' ca tu da dxelenná benne'
xęzr la xu ca'

naca na da baxáchele'e.

Xúgute' benne' dxelelé'ene' netu' dxulutá
xíchaje',

ne dxelexebánene' ca da baxache'
nácantu'.

¹⁵ Tu zra tu zra tu dxexedué'ezqueza',

ne tu zúazqueza' lu da stébele'e

¹⁶ lawe' da dxelenné' schanni' chia', ne
dxuluzúe'

neda' chalá'ala,

ne dxulutíl-lalę neda' benne' ca' dx-
eledábage' neda',

nen benne' ca' dxelexebeaj lazre' neda'.

¹⁷ Xúgute' da caní dxaca cheentu', ne
quebe ne

gal-la lazrentu' Lue',

ne quebe ne guzúiantu' chalá'ala xel-la'
wezría chiu'.

¹⁸ Quebe ne gusan' lázrentu' Lue',

ne quebe ne xecuásantu' lu da gunná
be'enu' netu'.

¹⁹ ¿Bizr chee na' nuzú' netu' chalá'ala tu
lataj chee be snia ca',

ne nuzú' netu' naga xelaze gátentu'?

²⁰ La gul-la lázrentu' La Dios cheedxu,
ne bca'ana szrentu' tu dios da quebe bi
zaca,

²¹ ¿quebe dxal-la' zra'a Dios netu' ne chee
da nigá?

Lē' nézquezne' da zaj zua lu xichaj lázx-
dau bēneache.

²² Lawe' da nácantu' chiu', tu zra tu zra
ba

zaj zúatequeze' xelútie' netu'.

Zaj nunē' netu' ca zrila' ca' ba zua
xelútie'-ba'.

²³ ¡Bebán, Xran!

¿Bizr chee na' dxasiu'?

¡Bebán!

¡Quebe su' zitu' tu chí'ize!

²⁴ ¿Bizr chee na' nucache cuinu',

ne quebe dxeque be'enu' ca dzezaca
zí'intu',

ne ca dxuluchine benne' ca' netu'?

²⁵ Ba nate ni'a na' bēne'du xú'untu', ne
dxeajcházetentu' lu xu,

na' ba dé'tentu' sudxú'ala lu xezr la xu.

²⁶ ¡Guxasa, gúcale netu',

ne dutē xel-la' dxexache lazre' chiu',
bselá netu'!

45 Xu'u lázrdawa' tu dizra' xrtante,
na' gúl-laqueza' tu da naca chee
Wenná Bea.

Gúl-laqueza' tu da bzuaj tu benne' dx-
uchálajlē'e cháwedau'.

² Nacu' xrtánlē'edxa ca xúgute
bēneache.

Dxezílē'entu' ba neza chee dizra'
dxuchálaju',

lawe' da nucá'anaqueze Dios Lue'
cháwedau' tu chí'izqueze.

³ Bda' xia chiu' dxu'a lē'u, Lue', benne'
wal-la,

lu dutē xel-la' szren chiu', ne xel-la'
dxenná bea chiu'.

⁴ Lu xel-la' szren chiu' chepe bánquezu'.
Bchine dizra' li, ne xel-la' dxexruj lazre',
ne da xrlátaje,

na' guzéajni'i Cuinu' da zri'a ca'.

⁵ Zaj nalálē'e xaga nalá xéche'ze chiu' ca',
da xelute na benne' xezr la xu ca' lau
Lue',

ne cheajlechaze na lu lázrdau benne' ca'
dxeledábage' Lue'.

⁶ Lataj blau naga dxe'u, Dios, naca na da
chadía chacanna,
ne súdequeze na.

¡Xrlátaje naca ca dxenná be'u!

⁷ Nazri'inu' da naca xrlátaje, ne dxecu-
denu' da calela.

Chee lē na' ba nuzúa Dios chiu' Lue'
xlátaju',

naga dxebélē'edxenu' ca le sa' ljwezru'
ca'.

⁸ Dxelá zixre zra lanu' nen xala da naca
na nizre xaga,

ne xiaj, da ca' dxelelá na zixre.

Lu xu'u lizru' da zácale'e na dxuluzúe'
Lue' lu da ba neza.

⁹ Bi nu'ula chee wenná bea ca' zaj zúabe'
ládujla nu'ula

chiu' ca' zaj naque' blaudxa.

Chalá'a xabēla chiu' dxe' nu'ula gácabe'
zru'ulu' nácube' oro

da za na xezre Ofir.

¹⁰ Bene, nú'uladau', ne gunná' xque, ne
bzē naga da nmia':

Bzala lazru' lazriu' ne lizre xrau',

¹¹ na' benne' wenná bea sa lazre' xel-la'
xrtan chiu'.

Bzexruj lazru' lau lē' lawe' da naca lē'
xranu'.

¹² Xelelá' nu'ula xezre Tiro lau lue', zaj
nu'ē da xelunne' chiu',

na' xelenaba benne' gunn'á ca' gunu' tu
culuén chee'.

¹³ Xrtanlē'e naca bi nu'ula chee wenná
bea lu xu'u naga zue'.

Zra lánabe' nazí' lechítaje na oro.

¹⁴ Xeleché'e-be' lau wenná bea, nácube'
zra lánabe'

da núalē'ē lechítajē na.

Nu'ula wégū'du ca' chjácabe' cuzru lēbe'.
Nu'ula caní, nu'ula lĵwézrebe' xuluzúabe'
lawe' lue'.

¹⁵ Lu dutē xel-la' dxebé, ne lu da ba neza
xelechē'ē-be',

na' xelú'ube' lu xu'u lizru', wenná bea.

¹⁶ Waláz cheē xra xrna'u xelexezúa
zri'inu',

bi ca' gunu' xelenná beabe' du gabí'i xēzr
la xu.

¹⁷ Guna' cheajlesá lazre' xúgute bēn-
neache lau' lue'.

Cheē lē na' xelúe lánana bēnneache lue'
chadía chacanna,

ne gaxuane iza.

46 Dios naque' Benne' dxuxúe' dxi'u,
ne dxunē' dxi'u
benne' wal-la.

Zúatequeze' gácalēne' dxi'u gate dxed-
edxu xel-la' zi'.

² Cheē lē na', quebe zrēbedxu lácala xru'
xēzr la xu nigá

na' cheajlechaze xi'a ca' lu nísadau',

³ ne lácala xeajxruza zren cheē nísadau'
xuluninne na,

ne dxelúnle'ē na schaga,

na' welezrízequeze xi'a ca' ne cheē da
dxezrí'.

⁴ Dē tu xegu da dxunna na xel-la' dxebé
lu xēzre cheē Dios,

ne lu xu'u lánaxa cheē Dios, Benne' nape'
dute xel-la' szren.

⁵ Dios zue' xēzre na', ne cabata' cuía xi
na.

Dxaní'sise' xide' gácalēne' bēnneache zaj
zre'ē xēzre na'.

⁶ Dxelezrébele'ē benne' xēzr la xu ca',
na' dxelezrize benne' cheē wenná bea ca'.
Dxenné Dios ca dxenné guziu', na' dxex-
una xēzr la xu.

⁷ Dios, Bēnnea' nape' dute xel-la' waca,
zúalēne' dxi'u.

Dios na' cheē Jacob dxucache chawe'
dxi'u.

⁸ Le da lé'ele da ca' nun Xránadxu.

Le nna' ca naca da dxebánedxu da nune'
lu xēzr la xu.

⁹ Dxebeque zrie' wedil-la da dxelaca du
gabí'i xēzr la xu.

Dxuzúzruje' da dxuzala na xaga nalá
xéche'ze ca',

ne dxíchujē' xaga tuche' ca' cheē wedil-
la,

na' dxuzezxe' da ca' zaj nache' benne'
wedil-la ca'.

¹⁰ Dxenná Dios: "Le sua zrize, ne le xún-
bea naca' Dios.

Naca' szrendxa ca zaj naca xúgute cue'
xēzr la xu.

Naca' szrendxa ca dutē xēzr la xu."

¹¹ Dios, Bēnnea' nape' dute xel-la' waca,
zúalēne' dxi'u.

Dios na' cheē Jacob dxucache chawe'
dxi'u.

47 ¡Le capa na'le, le'e, xúgute
bēnneache!

¡Le güe lánana Dios nen dutē xel-la'
dxebé!

² Dخال-la' zrēbedxu Xránadxu, nape' dute
xel-la' szren.

Naque' Wenná Bea zren dxenná bé'ene'
dute xēzr la xu.

³ Bzue' benne' xēzr ca' zran ní'adxu.

Bzue' dxi'u cheē nna be'edxu zánete cue'
xēzr la xu ca'.

⁴ Bequē'ē tu xēzr la xu da gaca na
cheedxu,

Da naca tu xēzr la xu xrtante cheē zri'ine
zre sua Jacob,

benne' ca' nazrí'ine'.

⁵ Dxeгүйэн Dios naga dxe'ē dxenná be'ē.

Dxelebezre luzu da dxulucueze' gate dx-
egүйэн Xránadxu ga na'.

⁶ ¡Le gul-la da gaca ba Dios!

¡Le gul-la!

¡Le gul-la da gaca ba Wenná Bea
cheedxu!

¡Le gul-la!

⁷ ¡Dios naque' Wenná Bea dutē lu xēzr la
xu nigá!

¡Le gul-la chee' nen dutę xel-la' dxéajni'i chee!e!

⁸ Dxe' Dios naga dxenná be'e, lu lataj na' naca na lál'azxa.

Dxenná bé'ene' xúgute cue' xęzr la xu ca'.

⁹ Dxelezraga benne' dxelenná bé'ene' xúgute cue' xęzr la xu

tu zren nen bénneache chee Dios chee Abraham.

¹⁰ Benne' ca' dxelenná be'e du gabí'i xęzr la xu

buludé'ę xel-la' dxenná bea chee' lu na' Dios.

Le' dxenná bé'ene' xúgute benne' wenná bea ca'.

48 ¡Zrente naca Xránadxu!
 ¡Naca chee' güe lál'analé'dxu Le'
 ga naca lu xęzre chee Dios cheedxu,
 da dxe' na lu xi'a lál'azxa chee'!

² Sión, da naca na xi'a chee Dios, naca na sibe, ne xrtante.

Naca na xęzre chee Wenná Bea zrente,
 da dxunna na xel-la' dxebe' dutę xęzr la xu nigá.

³ Dios ba blé'ene' dxucache chawe' dxi'u, lu xu'u zaca ca' chee xęzre chee' na'.

⁴ Belezraga benne' wenná bea ca', na' belelé'ę chee xeledíl-lalene' xęzre nigá,

⁵ na' gate belelé'ene' na, na' belexebánene'.

Belexrébe', na' buluzrúnnuje'.

⁶ Gulezrę'ę lu da stebe,
 ne gulezú'ę xel-la' dxudía ca dxaca chee tu nu'ula

ba zua sanę' bidau'.

⁷ Gulaque' ca da ca' dxeledá lawe' nísadau' dxexrite na

gate dxácale'e be' bduun' lu nísadau'.

⁸ Bendxu ca da ben Dios, na' na'a ba ble'edxu na,

ga naca lu xęzre chee Xránadxu, nape' dutę xel-la' waca,

da naca na xęzre chee Xránadxu Dios.

Le' guzúa chawe' xęzre nigá chadía chacanna.

⁹ Ga naca lu xudau' chiu' Lue', Dios dxajsá lázredxu ca naca xel-la' zri'i lazre' zren chiu'.

¹⁰ Gáteteze na' dxelúe lál'ana bénneache Lue',

na' ca naca xel-la' szren chiu' dxezrín na du gabí'i xęzr la xu.

Ca naca da xrlátaje dxenná be'u.

¹¹ Xelebéle'ę bénneache zaj zre'ę Sión.

Xelebéle'ę bénneache zaj zre'ę xęzre ca' chee Judá

ne chee da dxuchi'u chee'.

¹² Le'e, bénneache chee Dios, le chechaj dxu'a xęzre na',

ne le gulaba ca zaj naca xu'u sibe ca',

da dxuluzę chacha na xęzre na'.

¹³ Le nna' xque ca naca ze'e zren naxechaj na xęzre na'.

Le nna' xanne' ca zaj naca xu'u wal-la chee na,

chee guzenle bi chee ca naca xęzre na'.

¹⁴ Dios nigá nácaqueze' Dios cheedxu chadía chacanna.

Le' tu gulé'ezquezne' dxi'u neza.

49 Le xen da nigá, le'e, benne' xúgute cue' xęzr la xu.

Le guzę nágale, le'e, benne' dutę xęzr la xu,

² le'e, benne' blau, ne le'e, benne' xezícadxa,

le'e, benne' gunní'a, ne le'e, benne' xache'.

³ Guchálajqueza' xel-la' sina,
 ne guzéajni'ida' le'e da xu'u lázrdawa'.

⁴ Guzę naga' tu dizra' sina.

Gúl-laqueza' chee tu da nagache,

ne quinnia' da zríadi'i na du chen.

⁵ ¿Bizr chee na' dxun na ba xen zreba' lu zra chee da stebe,

gate naxechaj da calęla neda' da dxelún benne'

dxeledábague' neda'?

⁶ Benne' ca' dxuluxrén lazre' da zaj de chee',

ne dxulucá'ana szren cuine' lawe' da zaj nápalę'e.

⁷ Quebe xelexéquene' xelexá'awe' le sa' ljwezre',
 ne quebe gaca xulunézruje' Dios da guselá na le'
⁸⁻⁹ chee tu xelaca bánzqueze',
 ne chee cabata' xeluzru bel-la' dxen chee' lawe' da zrente naca da dxexa'u na xel-la' nabán chee' benneache,
 ne cabata' seque' nu benne' quízruje' na.
¹⁰ Xelelé'ene' dxelátequeze benne' sina ca',
 ne xelúzruje' cáteze dxaca chee' benne' xala ca',
 ne chee' benne' lázrdau zide' ca',
 na' dxulucá'ane' xel-la' gunní'a chee' lu na' benne' xula ca'.
¹¹ Dxeléquene' wazráqueze zri'ine zre sue' chadía chacanna,
 na' xelexegá'ana lizre' chee' xelaca na chee' xúgute' cuen xrtia ljwezre',
 na' dxelule' la xezr la xu chee' ca' ca' zaj nazí láqueze'.
¹² Quebe xelexegá'anatequeze benneache lu da ba lá'ana.
 Zaj naque' ca be xixre' ca', be dxeláteba'.
¹³ Ca da dxelune' naca na da xálaze,
 na' dxelenezaca ba lazre' xrtia ljwezre' ca' nen da dxelennaze'.
¹⁴ Zaj naque' ca tu cue' zri'la' zjácaba' lataj ba xa',
 naga guxúe xel-la' gute leba'.
 Benne' xrlátaje ca' xelenná bé'ene' benne' gunní'a ca'
 gate za' chaní',
 na' xelebía xi' da ca' guta' chee',
 na' lataj ba xa' gaca na naga tu xelexúzazqueze'.
¹⁵ Dios xexá'awe' xel-la' nabán chia' lu lataj ba xa'
 lawe' da xeché'e neda' naga zúaqueze' Le'.
¹⁶ Quebe su' štebe gate nu benne' dxezrué'ene' xel-la' gunní'a,
 ne gate dxune' lizre' da zácale'edxa,
¹⁷ lawe' da gate gatié' quebe bi xexu'e,

ne quebe chéajle xel-la' gunní'a chee' le'.
¹⁸ Lácala dxácaté naca bane' dxé cuine' zue'
 lu da ba neza zrente,
 na' dxelúe lá'ana benneache le' gate dx-
 epe bane',
¹⁹ san chu'e naga zaj zra xra xrtawe' ca',
 ne cabátadxa lé'ene' xel-la' naxaní'.
²⁰ Bénnea' dxelapa benneache le' ba lá'ana san quebe
 bi dxéajni'ine'
 naque' ca be xixre' ca', be dxeláteba'.

50 Ba gunné Xránadxu Dios, ne ba nutubé' benneache
 chee' duté xezr la xu,
 benne' zaj zre'e naga dxalaj gubizra,
 ne benne' zaj zre'e naga dxebía na.
² Lu xi'a Sión, da naca na xrtánle'e ba bzaní' Dios.
³ Xelá' Dios cheedxu, ne quebe sua zrie'.
 Gálajqueze xi' lau Le',
 ne gácale'e be' bdunu' da chechaj na Le'.
⁴ Xutúbequeze' benne' zaj zre'e xabáa na'ala,
 ne benne' zaj zre'e xezr la xu,
 chee' guchi'e chee' benneache chee'.
⁵ Dxenné': "Le xutube benne' chia' ca',
 benne' ca' belune' tu xel-la' wezría nen neda'
 da buluzúa chúchue' nen dxen chee' béadu ca'."
⁶ Da zua xabáala gulé'e lau na naque' xrlátaje,
 lawe' da naca Dios Benne' guchi'e chee' benneache.
⁷ Dxenné': "Le xen, benneache chia', na' guchálaja'.
 Le guzé nágale, benne' Israel, na' nnia' da gagu na zria cheele.
 Neda', Dios, naca' Dios cheele.
⁸ Quebe til-la' le'e ca naca béadu ca' bétele lawa',
 ne ca naca béadu ca' bzézele,
 da zaj zúaqueze na lawa' neda'.
⁹ Quebe ca'a lu na'ale među ca',
 ne chivo biu ca', be nápaquezle

¹⁰lawe' da zaj naca chia' xúgute bē xixre' ca',
ne zane gaxúa bē xixre' zaj zra'ba' lu xí'adu ca'.

¹¹Xu'u lu na'a xúgute bē zua xrila,
ne naca chia' xúgute bē zaj naca banba'.

¹²Chela neda' dxeduna', quebe xapa' le'e ca'

lawe' da naca chia' xēzr la xu, ne xúgute da dē lawe na.

¹³¿Dxun na ba xen gawa' bēla' bēzre ca'?
¿Xí'aja' dxen chee chivo biu ca'?

¹⁴Le guzúa lau Dios da güe lá'ana le'
ne le gunezruj ca da guchēbe lázrele lau Dios szrentē.

¹⁵Bláwizra neda' lu zra zu' lu da zi' da xa',

na' guselá' lue', na' lue' gapu' neda' ba lá'ana."

¹⁶Dios guzre' benne' wen da calela:
"¿Bi dxéquenu' lue', dxuchálaju' ca nadxixruj bi'a,
ne dxenníu' ca naca chee xel-la' wezrí'a chia'?

¹⁷Lue' dxecuídenu' neda' che dxusízreda' lue',

ne dxuzú' chalá'ala dizra' chia'.

¹⁸Gate dxelé'enu' gubán, na' dxunu' le' tu zren,

ne nacu' tu zren benne' ca' dxeledálēne' nu'ula

quebe zaj naca zru'ule'.

¹⁹Dxuchálajquezu' da calela,
ne tu dxúnzquezu' da wen lazre'.

²⁰Tu dxennézquezu' da calela chee bi bíchequezu',

Ne dxagu' zria chee bi chee xrná'aquezu'.

²¹Da caní' benu', na' neda' guzúa' zrize.
Gúquenu' naca' tu benne' ca nacu' lue'.
Na'a wadíl-laqueza' lue', ne gulé'eda' lue' ca ba benu'."

²²Le chéajni'i da nigá na'a, le'e dxal-la lázrele Dios.

Ga gaze guzuzruj Dios le'e, ne québedxa sua nu guselá le'e.

²³Bénnea' guzúe' lawa' da güe lá'ane' neda' gape'

neda' ba lá'ana,
na' bénnea' dxuxuchá cuine' chee gune' da xrlátaje,

gulé'eda' le' ca guselá' le', naca' Dios chee'.

51 Gúcale neda', Dios, lu dute xel-la' dxexache lazre' chiu'.

Dute xel-la' dxexache lazre' chiu' bsula zria da nabaga'.

²Gudibe neda' ca naca da calela da nuna',

ne bca'ana chawe' neda' chee dul-la da bēna',

³lawe' da dxexúnbe'a ca bēna' gudábaga' Lue',

ne ca naca dul-la chia' tu dxáguze na zria neda'.

⁴Lau' Lue' bēna' dul-la.

Awe', lau' Lué'queze, ne ba bēna' da calela lau' Lue'.

Caní dxaca na chia' chee gaca bea nacu' xrlátaje lu da dxenníu',

ne nacu' du lazre' ca da dxuchi'u chee bēnneache.

⁵Gunná' xque, báchequeze nabaga' dul-la gate gúlajtea',

ne lu dul-la zúaqueza' gate guzrán xrna'a neda'.

⁶Lue' dxezá lazru' sua da li lu xichaj lázrdawa',

ne lu xichaj lázrdawa' ba bzéajni'inu' neda' da naca sina.

⁷Bca'ana chawe' neda' nen da na' dxuchínenu',

na' xegá'ana' xrlátaje.

Gudibe neda', na' gaca' chíchedxa ca tu bezxe'.

⁸Bēn xenda' xel-la' dxebé, ne da ba neza, na' xelexezí' le dipa zrita xu'a, da ba gudíchaju'.

⁹Quebe gusá lazru' ca naca dul-la da bēna',

na' bsula xúgute da calela da nuna'.

¹⁰Dios, bzua neda' tu lázrdawa' xrlátaje,

ne bzua tu be' li lazre' lu xichaj
lázdawa'.

¹¹ Quebe gucuasu' neda' lau' Lue',
ne quebe xeca'u lu xichaj lázdawa' be'
lá'axza chiu'.

¹² Bexunna neda' xel-la' dxebé chee xel-
la' weselá chiu',
ne bzua chuchu be' chawe' da xu'a.

¹³ Nadxa gusédeda' benne' ca' dxelune'
da zrinnaj
ca dxaca lazru' xelune',
na' benne' dul-la ca' xelexexaque' chiu'
Lue'.

¹⁴ Bselá neda' lu zria da nabaga', betia'
benne'.

Lue' Dios, nacu' Dios dxuseláu' neda',
na' gúl-laqueza' chee da xrlátaje nacu'
Lue'.

¹⁵ Xran, gusalaj dxu'a,
na' guzenda' bénneache da dxue lá'ana'
Lue'.

¹⁶ Quebe dxaca lazru' béadu ca' gutia'-ba'
lau',
ne quebe dxaca lazru' béadu ca'
guzéxzea' lau'.

¹⁷ Da guzúadxu lau Dios da dxaca lazre'
naca na
tu lázxdau dxexruj lazre'.
Tu lázxdau dxexruj lazre', ne da dxexíaje
lazre'

quebe guzú' chalá'ala, Dios.

¹⁸ Dute xel-la' zri'i lazre' chiu', ben gaca
chawe' chee
xexre Sión.

Bsegula ze'e da nzechaj na xexre
Jerusalén.

¹⁹ Nadxa xezaca ba lazru' nen béadu ca'
gútentu' lau'

dute da naca xrlátaje cheentu',
ne béadu ca', ne da du ca' guzéxzentu'
lau'.

Nadxa xelútié' béadu ca' lu cugu chiu'.

52 ¿Bizr chee na' dxucá'ana szren
cuinu' chee da calela
da nuu', lue', benne' wal-la?

Tu zúazqueze xel-la' dxexache lazre'
chee Dios.

² Tu dxuchálajzquezu' chee da calela da
gunu' chee le sa' ljwezru'.

Da dxenníu' naca na ca tu xia da nalále'e,
dxezí xe'u ljwezru'.

³ Nazrí'idxenu' da calela quézcala da
xrlátaje,
ne dxedánnedxenu' da wen lazre' quéz-
cala da li.

⁴ Nazrí'ínu' xúgute dizra' da dxulucá'ana
ditaj na bénneache,
lue', benne' dxezí xe'u.

⁵ Chee le na' guzría xi' Dios lue' tu
chí'izqueze.

Waxele' lue', ne xequé'e lue' naga
zúaquezu',
ne gucuase' lue' naga zaj zra' benne' ban
ca'.

⁶ Xelelé'e benne' xrlátaje ca' da nigá, na'
xelegrébequeze'.

Xuluzrízrqueze' chiu' lue', xelenné':

⁷ "Le na' xque, benne' nigá quebe bxren
lazre' Dios
chee gucu'uje' le'.

Bxren lázrequeze' ca naca xel-la' gunn'a
zrenté chee',
ne guzúaqueze' lu da calela da dxune'."

⁸ Neda' naca' ca tu xaga olivo xa'a lu xu'u
lizre Dios.

Tu dxuxrén lázrequeza' xel-la' dxexache
lazre' chee
Dios chadía chacanna.

⁹ Güe lá'anaqueza' Lue' chadía chacanna
lawe' da bentu' da caní,
ne cueza lazra' lau Lue' lawe' da naca na
xrlátaje lau xúgute
benne' chiu' Lue'.

53 Benne' xala ca' dxelenná lu lázr-
dawe': Quebe zua Dios.

Xúgute' zaj naque' sban, ne zaj nuné' da
calela.

Quebe nu chilá' benne' dxune' da
xrlátaje.

² Dios zue' xabáa dxenné'e bénneache
chee lé'ene' che zua tu benne' sina,

bénnea' dxape' Dios ba lá'ana.

³Xúgute benne' zaj nabéaj xíchaje' Dios.
Xúgute' zaj naque' sban.

Quebe nu chilá' benne' dxune' da xrlá-
taje, netú gue'.

⁴Dxenná Dios: “¿Quebe dxeléajni'i
benne' caní
dxelune' da calela?

Dxele'aj dxelawe' da dxelebane' chee
bénneache chia',
ne quebe dxelexflaje' neda'.”

⁵Za zrin zra selexruse' ca da quebe ne
xelezaque',

lawe' da gusedinnaj Dios zrita ca' chee
benne'

guledábage' bénneache chee'.

Dios na' nuzúe' chalá'ala benne' ca',
na' bénneache chee' xuluzría xi'e benne'
ca'.

⁶Dxenaba' Dios guné' dxuaj Sión da gá-
cale na

benne' Israel ca'.

Gate ba nun Dios xelezrín bénneache
chee' lu xezr la xu

cheéqueze',

xelebé zri'ine zre sua Jacob,

ne xelezúa lu da ba neza benne' Israel ca'.

54 Bselá neda', Dios, nen xel-la'
waca chiu'.

Gúcale neda', Dios, nen xel-la' wal-la
chiu'.

²Bene da dxenaba' lau', Dios, ne bechebe
chia'.

Bze naga da guchálajlena' Lue'.

³Za'aca benne' snia ca' xeledíl-lalene'
neda'.

Benne' xichaj zra'a ca' dxelaca lazre'
xelútie' neda',

benne' ca' quebe dxelape' ba lá'ana Lue',
Dios.

⁴Dios naque' Benne' dxácalene' neda'.

Xránadxu Dios zúalene' benne' ca' dxu-
luxúe' neda'.

⁵Ca naca da calela dxelún benne' dx-
eledábage' neda',

xuzrí'i Dios na chee' benne' ca'.

Guzría xi'e benne' ca' lawe' da naque' li
lazre'.

⁶Du lazra' cu'a da gudéa' lau Lue', Xran.
Güe lá'anaqueza' Lau' lawe' da nácale'e
na xrlátaje.

⁷Bseláu' neda' lu xúgute' da stebe guzúa'.
Ble'eda' gulebía xi' benne' ca'
dxeledábage' neda'.

55 Bze naga, Xran, ca da dxuchála-
jlena' Lue',
ne quebe guzú' chalá'ala ca da dxenaba'
lau'.

²Guzúa' ban lazre', ne bechebe chia'.

Dxuláwizra' Lue' lu da dxuchálaja', ne
zua' stebe,

³lawe' da benne' dxeledábage' neda' dx-
elenné' chia',

ne lawe' da dxelún la benne' wen da
calela neda'.

Bulusebage' neda' da zrinnaaj,
ne duté xel-la' dxelezrá'a zaj nau zi'
xuzre' neda'.

⁴Dxe' gunne xue lázrdawa' lu be'la' dxen
chia',

ne dxuchebe xel-la' gute neda'.

⁵Zua' lu xel-la' dxezrebe, ne
dxezríztequeza',

na' zúale neda' da dxuchebe na neda'.

⁶Na' gunnía': ¿Nuzra gunna neda' xrila'
ca xrila tu bsia

chee' cha'a lu be'la naga xezí' lazra'?

⁷Da líqueze guzrúnnuja' zítu'la,

na' súaqueza' le'e xixre' lawe' lataj.

⁸Guna' ba xuzre la' lu be' bdunu', ne lu
be' wal-la.

⁹Bzria xi' benne' ca' dxelune' da calela,
Xran.

Bzaga naze da dxelune',

lawe' da ble'eda' da zrinnaaj, ne da calela
da dxelune'

lu xezre.

¹⁰Te zra chizrela dxeledé' lawe' ze'e da
naxechaj na xezre,

ne dxelune' da zrinnaaj, ne da calela lu
xezre nigá.

¹¹ Nazrate xezre nigá da calela da dxelunę',
ne tu dxelúnzqueze' da wen lazre', ne xel-
la' dxezí xe
lu neza cheę na.

¹² La guca tu benne' bénnea' dxedábague'
neda',

bénnea' ben le' chia',
na' bchaga lawa' da na'.

La guca tu benne' dxecuídene' neda' bén-
nea' gudábague' neda',
na' bcache cuina' lau le'.

¹³ Lue', bénnea', gucu' ca tu le sa'
ljwezra'.

Bsi'u neda', ne gucu' tuze neda'.

¹⁴ Tu zren bchálajdxu du lázredxu,
ne lu xel-la' zri'i lazre' gudadxu lu xu'u
lizre Dios.

¹⁵ Dios, ben queła xel-la' gute benne' ca'
dxelunę'
da calela chadite.

Ben xelexú'e lu lataj ba xa' zaj naca banę',
lawe' da nazrate xu'u lizre' da calela da
dxelunę'.

¹⁶ Ca naca chia' neda', bláwizra' Dios,
na' Xrana' Dios bselę' neda'.

¹⁷ Che zílala, ne wagubizra, ne ca dxebía
gubizra
guchálajlequeza' Dios, ne guláwizra' Le',
na' Le' xenne' chia'.

¹⁸ Xexá'awe' bénne'du xu'a lu wedil-la da
dxaca chia' neda',

ne gunę' cueza' zri lazra',
lácala zaj zra' zánete benne'
dxeledábague' neda'.

¹⁹ Wene Dios, na' guzría xí'queze' benne'
ca'.

Naque' Bénnea' zúatequeze' dxenná be'e
nédxute.

Caní gunę' cheę benne' ca' lawe' da quebe
dxuluchę'e

ca dxelunę', ne quebe dxelezrebe' Dios.

²⁰ Guchisa na' benne' wen da zrinna
cheę gu'e benne' ca'

dxelebeza zri lazre' nen le'.

Gudíchaje' xrba cheę xel-la' wezría da
benę' nen benne' ca'.

²¹ Dizra' bchálaje' zaj naca na dizra' zren
lazre',

san xu'u lázrdawe' xel-la' dxezrá'a.

Dxunę' xrtante dizra' dxuchálaje',
san zaj naca na ca xia da zaj nalále'e.

²² Bda xua chiu' cuzru Xránadxu, na' Le'
gutipe' lazru'.

Québequeze gu'e lataj cheajchaze benne'
chawe' tu chi'ize.

²³ Lue', Dios, gunu' xelexú'u benne' ca'
dxelunę'

da calela lataj ba xa',
benne' dxelute benne', ne benne' dxelezi
xe'e,

gate quebe ne xelezrine' gachaj catite
dxal-la' xelaca banę',
san neda' guxrén lazra' Lue'.

56 Bexache lazre' neda', Dios, cheę
quebe xuluzrí xi'
bénneache neda'.

Tu zra tu zra dxulusaca zi' bénneache
neda', benne' ca'
dxeledíl-lalene' neda'.

² Te zra chizrela benne' ca'
dxeledábague' neda'

dxulucá'ana dítaje' neda',
lawe' da zaj zra' benne' zante, benne'
dxeledíl-lalene' neda'

lu xel-la' dxulucá'ana szren cuine'.

³ Lu zra dxezreba', dxuxrén lazra' Lue'.

⁴ ¡Dxuxrén lazra' Dios, na' güe lá'ana'
xrtizre'!

¡Dxuxrén lazra' Dios, na' québedxa
zreba'!

¿Bízraqueze gaca gun bénneache chia'
neda'?

⁵ Xúgute zra dxuluchuque' xrtizra'.

Ca naca da dxelegí'u be'e zaj naca na
cheę xelunę' chia'

da calela.

⁶ Dxelezrague', ne dxulucache cuine'.

Dxelenná' xánnie' ca da dxuna'.

Dxelilaj lazre' ca xelunę' xelútie' neda'.

⁷ Dios, bxue ca da dxelunę',

na' dutę xel-la' dxezrá'a chiu' bzria xi'
benne' ca'.

⁸Nézqueznu' Lue' ca dxuzrúnnuja' lau
benne' ca'.

Bsa lazre' nisa da ba gudxezra'.

¿Quebe zaj naxúaj na lu xiche chiu'?

⁹Gate dxuláwizra' Dios, lu zra ná'queze
xuluxuzrunnuj

benne' ca' dxeledábage' neda'.

Nézquezda' zúale Dios neda'.

¹⁰¡Dxuxrén lazra' Dios, na' güe lá'ana'
xrtizre'!

¡Dxuxrén lazra' Xránadxu, na' güe lá'ana'
xrtizre'!

¹¹¡Dxuxrén lazra' Dios, na' québedxa
zreba'!

¿Bízraqueze gaca gun bénneache chia'
neda'?

¹²Nabaga' ca da nachębe lazra' chiu',
Dios.

Gúl-laqueza' da güe lá'ana' Lue'.

¹³Ba bseláu' bénne'du xu'a lu xel-la' gute,
ne bebéaju' ni'a naga zaj zua cheajlec-
haze na,

cheę gaca chu'a lau Dios lu xel-la' naxaní'
da dxunne'

cheę benne' ca' zaj naca banę'.

57 Bexache lazre' neda', Dios.

Bexache lazre' neda', lawe' da dx-
uxrén lazra' Lue'

dutę lázrdawa'.

Quezru' neda' ca dxun bedxuj dxęzreba'
zrí'ineba'

zran xrlába', cadxa te cheę da stębe caní'.

²Guláwizra' Dios, Benne' zrente'.

Guláwizra' Dios cheę gácalenę' neda'.

³Naga zúate' xabáa cheę' sel-le' nu
guselá neda' lu na'

bénnea' dxáca lazre' guzría xi'e neda'.

Gusel-la Dios xel-la' dxexache lazre', ne
da li cheę'.

⁴Zua' lu da stębe ca tu benne' zuę' ládujla
bęzre xixre' ca'.

Xu'a ládujla bénneache zaj naque' ca
bęzre xixre' ca'

dxeláguba' bénneache.

Dizra' da dxelennę' chia' zaj naca na ca
tu xia natuche',

ne xaga nalá xęche'ze ca',

na' xrtizre' zaj naca na ca tu xia da
nalále'e.

⁵Xega'ana szrénquezu' lu xabáa, Dios.

Xel-la' szren chiu' sua na lawe' dutę xęzr
la xu.

⁶Ba zaj nabeche' xralaj cheę xełeł-le'
neda'.

Ba dxedú lazra' lu da dxaca chia'.

Ba zaj naxęne' tu xędxu cheę chea-
jcházia' lu'ule na.

Lu'ule da na' ba xeajlecházqueze le'.

⁷Ba zúatequeze lázrdawa', Dios.

Ba zúatequeze lázrdawa' cheę
gúl-laqueza' da güe lá'ana' Lue'.

⁸Bebán lazre', bénne'du xu'a, ne le xebán
lázrele,

le'e dxínnele da dxúl-lalenle, ne da
zríadi'i na du.

Che zílala chásaqueza'.

⁹Güe lá'anaqueza' Lue' ládujla bén-
neache chiu', Xran.

Gúl-laqueza' chiu' lau benne' xúgutę cue'
xęzr la xu,

¹⁰lawe' da naca xel-la' dxexache lazre'
chiu' zrendxa ca xabáa,

na' da li chiu' naca na zrendxa ca beuj
bza ca'.

¹¹Xegá'ana szrénquezu' lu xabáa, Dios.

Xel-la' szren chiu' sua na lawe' dutę xęzr
la xu.

58 Le'e dxenná beale ¿da li dx-
uchálajle da naca xrlátaje?

¿Dxuchí'ale ca naca da li cheę bénneache
chia'?

²¡Cabíze'!

¡Lu lázrdaule dxugú'u beale da zrinnaj!

¡Stębele'e dxuzúale bénneache lu xęzr la
xu chia'!

³Zaj nazrinnaj lázxdau benne' ca' zaj
nabéaj xíchaję' neda'

gate gulálajte'.

Belexase dínnaję' dxelún lazre' gate
gulezante xrnę'e le'.

⁴ Dizra' da dxelenné' zaj naca na da dxe-
lute bénneache
ca da zria zran lazxa beła'.

Zaj naca na ca beła' snia, be nácaba' be
cuezru.

⁵ Quebe dxenba' chi'i benne' dxunné'
leba'

lácala dxennéle'e xrtandau'.

⁶ Dios, gudichaj lazxa benne' ca'.

Gudichaj, Xran, lazxa benne' ca' zaj
naque' ca bezre xixre' ca'.

⁷ Ben xelexenítie' ca nisa da dxelalaj na
lu xu.

Gate dxulusanē' xaga nalá xéche'ze chee',
ben xeledé na chalá'ala.

⁸ Ben xeledé chee' ca dxaca chee be zaga
dxelexexúnaba'.

Ben québedxa xeledé'ene' gubizra ca tu
bidau' dxálajbe'
ba nátebe'.

⁹ Nédxula gate quebe ne la xesu' lu xi'
xecá'a Dios benne' ca' tu lu be' bduu',
benne' zaj naca banē', ne benne' ca' zaj
zua xelatie'.

¹⁰ Wabé benne' xrlátaje gate lé'ene' xe-
béaj lazre' Dios

benne' ca' dxelunē' da calela.

Guchuchu guléajē' dxen chee benne' zaj
nabéaj xíchajē' Dios.

¹¹ Nadxa mnē bénnea': "Da líqueze de
lazruj chee

benne' xrlátaje.

Da líqueze zua Dios, Bénnea' dxuchi'e
chee bénneache

zaj zre'e lu xezr la xu."

59 Bselá neda' lu na' benne' ca' dx-
eledábague' neda', Dios chia'.

Bselá neda' lu na' benne' ca' dxelunē'
chia' da calela.

² Bselá neda' lu na' benne' ca' dxelunē' da
zrinnaj.

Bselá neda' lu na' benne' ca' dxelutie'
benne',

³ lawe' da dxelilaj lazre' xelútie' neda'.

Zaj nazraga benne' wal-la ca' chee
xeledíl-lalēne' neda',

quegá lawe' da bi zria nabaga', ne quegá
ne chee

dul-la nuna' neda', Xran.

⁴ Lácala quebe bi bena' chee benne' ca',
zá'aca chégüē', ne dxulucueze' bi xelunē'
chia'.

Bebán chee xidu' naga zua', na' le'enu' da
dxelunē'.

⁵ Lue', Xran, Dios chee benne' zan dx-
jaque' wedil-la,

ne Dios chee benne' Israel ca',

bebán chee gudéu' ba xa' benne' xúgute
cue' xezr la xu.

Quebe xexache lazru' xúgute benne' ca'
dxeledábague' Lue',

ne dxelunē' da zrinnaj.

⁶ Xelelé'e gate cuía gubizra, ne xelebezre
xe'e

ca dxelún becu', na' xeléchajē' xezre.

⁷ Gunná' xque, da dxuluchálajē' naca na
ca da dxelexexēbe'.

Dizra' dxelenné' zaj naca na ca xia zaj
nalá na,

lawe' da dxelenné': "¿Nuzra xene?"

⁸ Lue', Xran, guzrizru' chee benne' ca'.

Gun lau' chee benne' xúgute cue' xezr la
xu ca'.

⁹ Zaj naca wal-la benne' ca'
dxeledábague' neda'.

Cueza lazra' Lue' lawe' da dxucu'uju'
neda', Dios.

¹⁰ Dios, Bénnea' dxexache lazre' neda',
cuía lawē' lawa' neda'.

Dios gunē' le'eda' gaca chee benne' ca'
dxeledábague' neda'

ca da dxezá lazra'.

¹¹ Quebe gutiu' benne' ca', chee quebe
xelal-la lazre'

bénneache chia' ca da gunu'.

Beše dinnaj benne' ca' nen xel-la' waca
chiu'.

Lue', Xran, Benne' dxucu'uj netu', ben
cheajlecházie'.

¹² Ben xeledulé' lu xel-la' dxulucá'ana
szren cuine',

ne chee dul-la dxelunę' lu da
dxuluchálaję',
ne ne chee dizra' schanni', ne da wen
lazre' da dxelennę'.

¹³ Bzria xi'e lu xel-la' dxezrá'a chiu'.

Bzria xi'e chee québedxa xelezúe'.

Dios, ben xeleque be'ene' dxenná be'enu'
zri'ine zre sua Jacob.

Dxenná be'u du ca naca xęzr la xu.

¹⁴ Dxelelé'e gate dxebía gubizra, ne dx-
elebezre xę'e

ca dxelún becu', ne dxeléchaję' xęzre.

¹⁵ Dxeledé' ca benne' dxeledaze', dxelíla-
ję' da xelawe',

na' che quebe dxeléljanę', na' du xela dx-
elawe' zria tuę' xetúe'.

¹⁶ Neda' gúl-laqueza' chee xel-la' waca
chiu',

na' che zílala güe lá'ana' xel-la' dxexache
lazre' chiu',

lawe' da gúcalęnu' Lué'queze neda',

ne bcu'uju' neda' gate guzúa' lu da
stébele'e.

¹⁷ Lue' dxutipu' lazra', na' gúl-laqueza'
chiu',

lawe' da nacu' Lue', Dios, Bénnea' dx-
ucu'uję' neda',

ne Dios, dxexache lazru' neda'.

60 Dios, Lue' ba bzu' netu' chalá'ala,
ne benu' xeajcházentu'.

Bzrá'ale'enu' netu'.

Na'a bedá gácalęnu' netu'.

² Benu' guzrú' xęzr la xu, ne benu' bxfalaj
na.

Bexún na naga bxfalaj na lawe' da dxebía
xi na.

³ Benu' blé'entu' netu', benne' chiu', da
naca stébele'e.

Benu' guca cheentu' ca güé'entu' tu da
ben na xeajcházentu'.

⁴ Bnézruju' tu da dxul'é lau chee benne'
dxelezrebe' Lue',

Da xeluxre' chee gul'é lau da naca li.

⁵ Chee xeelá benne' ca' nazrí'iqueznu'
Lue',

bsel-la lę' dutę xel-la' waca chiu', ne bene
chia'.

⁶ Dios gunné' lu lataj lá'azxa chee':
“Wabéquezda' neda'.

Gunna' late weaj chee le xęzr la xu chee
benne' Siquem,

ne gudxixra' chee le xęzr la xu de cuita
xegu Sucot.

⁷ Chia' naca xęzr la xu Galaad, ne chia'
naca xęzr la xu

chee zri'ine zre sua Manasés.

Xęzr la xu chee zri'ine zre sua Efraín naca
na ca

tu da napa chi'i na xíchaja'.

Xęzr la xu chee zri'ine zre sua Judá naca
na naga dxenná be'a.

⁸ Xęzr la xu chee benne' Moab naca na ca
tu

zriga' da xuzru nisa guná'a,

na' xęzr la xu chee benne' Edom
guchichan' nen zrela'.

Si'a ba neza xęzr la xu chee benne'
Filistea.”

⁹ ¿Nuzra che' neda' chee guzétaja' xęzre
da naxechaj na

ze'e sibe?

¿Nuzra che' neda' chee guzétaja' benne'
Edom ca'?

¹⁰ ¿Quegá Lue' na' che'u neda', Dios,
nacu' Bénnea'

bzue' netu' chalá'ala,

ne quebe guxeájłęnu' benne' cheentu' ca',
benne' dxjaque'

wedil-la?

¹¹ Gúcalę netu' chee séquentu' tíl-lalęntu'
benne' ca'

dxeledíl-lalęnę' netu',

lawe' da naca dácheze xelácalę bén-
neache netu'.

¹² Tu zren nen Dios gundxu tu da zrente,
na' Lę' gulague' benne' ca' dxeledíl-lalęnę'
dxi'u.

61 Bene, Dios, da dxuláwizra' Lue'.

Bze naga da dxuchálajłęna' Lue'.

² Zitu' naga zua lazria' dxuláwizra' Lue',
lawe' da dxedú lazra'.

Guché' neda' naga zua Bénnea' naque' ca
tu xi'a xiaj,

Bénnea' nácadxé' szren ca neda',

³Nacu' Lue' Benne' nuxrué' neda',

ne nacu' ca tu ze'e xiaj da dxucu'uj na
neda' lau benne' ca'

dxeledábague' neda'.

⁴Tu súazqueza' lu xu'u lá'azxa chiu'.

Sua chawa'a cuitu' Lue' ca zaj zua chawe'

bedxuj dxé'enedu ca'

zran xrila bedxuj.

⁵Lawe' da bennu' Lue', Dios, ca da
guchebe lazra' chiu',

benu' napa' ca da dxelapa benne' ca' dx-
elezrebe' Lue'.

⁶Gunu' gaca bana' neda', wenná bea,
zánete zra.

Iza chia' xelaca na ca da zaj naca chee
chupa cuen bénneache.

⁷Tu súazqueza' lau', Dios.

Bcueza xel-la' dxexache lazre' chiu', ne
da li

chee xulucá'ana chawe' na neda', wenná
bea.

⁸Caníqueze gúl-laqueza' chee lau' tu
chí'izqueze,

ne gúnqueza' tu zra tu zra ca da guchebe
lazra'.

62 Tuze nen Dios dxebeza zri lazre'
bénne'du xu'a.

Léqueze' dxuselé' neda'.

²Tuze Le' dxucu'uje' neda', ne dxuselé'
neda'.

Naque' Bénnea' dxuxre' neda', na' quebe
negue lazra'.

³¿Ajatezcha' gucuézale da gunle chee tu
benne',

na' dxunle ba xen xúgutele guzrí'a xile le',
ca dxun tu benne' dxuchínnaje' tu ze'e da

ba de chalá'ala,

u tu le'aj da ba guzru'?

⁴Dxunle tuze dizra' ájazra xebéajle neda'
lu xel-la' szren chia'.

Nazrí'ile da wen lazre'.

Nen dxú'ale dxennele da xrlátaje, san
xu'u lázrdaule da caléla.

⁵Lue', bénne'du xu'a, guleza lazre' tuze
Dios,

lawe' da naca Le' Bénnea' dxebeza lazra'.

⁶Tuze Le' dxucu'uje' neda', ne dxuselé'
neda'.

Naque' Bénnea' dxuxre' neda', na' quebe
negue lazra'.

⁷Naca Dios Bénnea' dxuselé' neda', ne
naque' da ba neza chia'.

Naca Dios Bénnea' dxucu'uje' neda', ne
Benne' dxuxre' neda'.

⁸Le cueza lazre' Le' tu chí'izqueze, le'e,
bénneache.

Le xe'e ca da dxezá lázrele.

Naca Dios Bénnea' dxuxre' dxi'u.

⁹Da líqueze, da dácheze zaj naca
bénneache,

ne ca tu da wen lazre' benne' zren ca'.

Quebe bi dxelé'e tu lu zrgú'unsu.

Zaj nácadxé' zraze ca tu be' da dxecá'a
lázredxu.

¹⁰Quebe guxrén lázrele da sile gate
dxexúbele,

ne quebe gucá'ana szren cuínale chee da
ca' dxebanle.

Che dxegula xel-la' gunn'a cheele, quebe
xezaca ba lázrele

chee da na'.

¹¹Tu lásaze gunná Dios:

na' chupa lasa benda' da nigá:

Chee Dios naca xel-la' waca.

¹²Chiu' Lue', Xran, naca xel-la' dxexache
lazre'

lawe' da dxunézruju' lazruj chee tu tu
bénneache

cáteze da zaj nune'.

63 ¹⁻²Dios, Lue' nacu' Dios chia'.

Dxebile bénne'du xu'a da naca
chiu',

na' belá' dxen chia' dxezá lazre' na da
naca chiu'.

Naca chia' ca zúaqueza' tu xezr la xu
bizre naga

quebe bi nisa de.

Dxaní'siseze xida' lau Lue' chee le'eda'
xel-la' waca chiu',

ne xel-la' szren chiu',
cáteze ba ble'eda' da naca chiu' lu lataj
lá'azxa chiu'.

³ Cháwedxa naca xel-la' dxexache lazre'
chiu'

ca xel-la' nabánqueze.

Cheę le na' güe lá'anaqueza' Lue'.

⁴ Caníqueze nni'a' chiu' da xrlátaje dxá-
cate naca bana'.

Cheę gucá'ana szrena' Lau' chísaqueza'
na'a.

⁵ Xélaje bėnne'du xu'a da naca na ca beše
zrita,

ne bela' da dxánnele'e,

na' dutę xel-la' dxebé güe lá'anaqueza'
Lue'

⁶ gate dxajsá lazra' chiu', ne dea' ga
dxata',

ne gate dxulaba lazra' ca naca chiu' gate
dxennaza' chizrela.

⁷ Lawe' da dxácalenu' neda', béle'ęda'
cuitu'

ca dxelún bedxuj dxé'enedu ca' zran xrila
bedzuj.

⁸ Naca bėnne'du xu'a Lue' tuze.

Nen na'u wal-la nuxru' neda'.

⁹ Benne' ca' gulezá lazre' xuluzría xi'e
neda'

cheajlecházie' lataj ba xa'.

¹⁰ Xelebía xi'e lu xia nalá.

Xelaque' da xelagu becu' xixre' ca'.

¹¹ Neda', wenná bea, beda' lu da naca
cheę Dios.

Xegá'ana ba lá'ana nóteteze benne' dxu-
luchínene' la',

lawe' da xelexuj dxu'a benne' ca' dxelen-
né' da wen lazre'.

64 Dios, bze naga chi'a lawe' da zua'
stebe dxuláwizra' Lue'.

Bxue xel-la' nabán chia' lawe' da dx-
ezreba' bi xelún benne' ca'

dxeledábague' neda'.

² Bcache chawe' neda' cheę quebe xelún
benne' wen

da calela chia' ca da dxelezá lazre',

ne cheę quebe xelún benne' dxelún da
zrinnaj chia'

ca da zaj nune' xelune' chia'.

³ Dizra' dxuluchálaje' zaj naca na ca xia
zaj nalále'e na,

ne dxelenné' schanni' ca dxun tu benne'
dxusane'

xaga nalá xéche'ze cheę'.

⁴ Caní dxelenné' bagácheze cheę xelune'
cheajlechaze

benne' zaj naque' li lazre'.

Chadite dxelune' na, ne quebe bi
dxelezrebe'.

⁵ Dxelune' ba xuzre xelune' da zrinnaj da
zaj nune' xelune',

na' dxuluzúe' xralaj ca' cheę xelee'
bėnneache,

dxelenné': "¿Nuzra le'e da dxundxu?"

⁶ Dxelílaje' ca zaj naca da zrinnaj xelune',
ne dxelenná' xánnie' ca zaj naca na.

Ca da zaj xu'u xichaj lázrdawe' zaj naca
na stébele'e

ca zaj naca lázrdauqueze'.

⁷ Dios gunę benne' ca' we' nen tu xaga
nalá xéche'ze cheę'.

Chadite xelu'e xízrawe' zren ca'.

⁸ Dizra' buluchalaj benne' ca' xelún na
cheajlecházie',

na' xelezrebe xúgute bėnneache gate
xelelé'ene' benne' ca'.

⁹ Nadxa xelezrebe xúgute bėnneache, ne
xuluzenne'

ca da nun Dios,

na' xuluxúnbe'e ca zaj naca da bene' Le'.

¹⁰ Béqueze benne' xrlátaje lau Xránadxu,
ne guxrén lazre' Le',

na' xelezúa lu da ba neza xúgute benne'
zaj naque' li lazre'.

65 Naca chiu' Lue', Dios, güe
lá'anantu' Lue' lu xęzre Sión,

na' guntu' da guchebe lázrentu' chiu'.

² Lue' dxénqueznu' da dxuchálajlentu'
Lue',

na' xelelá' lau Lue' xúgute bėnneache.

³ Nabágal'e da zrinnaj da bėna',

san Lue' dxunite lau' ca da gudábaganu'
Lue'.

⁴Ba neza zrente naca na chee bénnea'
dxeca'u Lue',
ne dxenníu' le' gaque' chiu', chee súaque-
ze' lataj lá'azxa chiu'.

Xélajquezentu' da xrlátaje da de lizru', da
ca' da zaj de
xudau' lá'azxa chiu'.

⁵Lu da xrlátaje chiu' gunu' da zaj naca
zrente gate gunu'
ca da dxenábantu' Lue', Dios, Benne'
dxuselé' netu'.

Xúgute bénneache zaj zra' duté xezr la
xu dxelebeza lazre' Lue',
ne cá'aqueze dxelebeza lazre' benne'
dxeledé'

zítu'la lawe' nísadau'.

⁶Lué'queze dxuzúa chuchu' xi'a zren ca'
nen xel-la' waca chiu'.

Nácaquezu' Benne' wal-la.

⁷Dxebeche zriu' nísadau' gate dxelucu
na,
ne schaga da dxelún xeajxruza chee na.
Dxebeche zriu' benne' xezr la xu gate dx-
eledábague' Lue'.

⁸Chee le' na' benne' zaj zre'e duté xezr la
xu

xelezrebe' ca naca da zrente da dxunu'.
Dxuzú' lu da ba neza bénneache zaj zra'
du gab'i xezr la xu.

⁹Dxenna'u xezr la xu, ne dxesel-lu' nisa
xiuj.

Dxunu' dxúnnale'e na lina chee na.
Nuzúaquezu' lu xezr la xu xegu ca' da zaj
dele'e na nisa.

Dxucuezu' zrua' za da xelagu bénneache,
ca ba núnquezu' gaca na.

¹⁰Dxesel-lu' nisa xiuj naga ba zaj nune'
na'.

Dxunu' dxexaca na xu xa'a.
Dxuculu na nen nisa xiuj na'.

Dxunu' dxelegula chawe' da du ca' ba zaj
naxaza na.

¹¹Dxunu' dxelexezí' bénneache ba neza
tu iza tu iza

ne chee da dxunézruju',
na' ca zaj naca beuj bza chiu' dxelunna
na xiuj
da dxun na dxelegula chawe' da zaj naza
bénneache.

¹²Dxelunna na xiuj naga dxeledá be
xíxre'du ca' da dxeláguba',
na' dxelebe bénneache dxelelé'ene' ca
bane zaj zua xí'adu ca'.

¹³Lache' ca' zaj zra' zri-la' ca',
na' dxu'a xégudu ca' zaj naxaza zrua'
xtila,
na' dxelebezre xa'a bénneache chiu' duté
xel-la' dxelebé,
ne dxelúl-laqueze' chiu'.

66 Le gucá'ana szren Dios duté xel-
la' dxebé,

le'e zrale duté xezr la xu.

²Le gul-la ca naca xel-la' szren chee le'.
Le gucá'ana szrene' gate dxue lá'anale
Le'.

³Le xe Dios: "Dxebánele'equezentu' ca
zaj naca da nunu'."

Ne chee xel-la' szren chee xel-la' waca
chiu' xuluzúa
xrtizru' benne' ca' dxeledábague' lue'.

⁴Xúgute bénneache zaj zra' duté xezr la
xu xelúe

lá'anaqueze' Lue', ne xelúl-laqueze' chiu'.
Tu xelúl-lazqueze' chee Láquezu'.

⁵Le da, lé'ele ca zaj naca da nun Dios.
Da zrédexu zaj naca da bene' chee
benne' ca'

belune' da calela.

⁶Bene' bexaca nísadau' xu bizre.
Guledé bénneache chee' ní'aze' naga
nedxu de tu xegu situj.

Dxu'a nísadau' na' gubéle'edxu lau Dios.

⁷Duté xel-la' waca chee' nna be'e chadía
chacanna.

Dxuxéqueze' ca da dxelún bénneache
duté xezr la xu.

Benne' dxeledábague' Le' quebe
xelezrué'eequezne' xel-la' szren.

⁸Le'e, bénneache, le gucá'ana szren Dios
cheedxu,

ne le guzén bénneache ca da dxue
lá'anale Le'.

⁹ Léqueze' bxue' dxi'u chee naca bandxu,
ne quebe be'e lataj cheajcházedxu.

¹⁰ Lué'queze bxu' netu' ca da bentu', Dios.
Bdeu' netu' xel-la' zi' ca dxelún bén-
neache dxuludé'

xia plata lu xi' chee xegá'ana chawe na.

¹¹ Benu' xejchú'untu' tu lu xralaj.

Bda'u cúzruntu' tu xua z'ile'e.

¹² Benu' guledé xíchajntu' benne' zaj zrie'
bzrina' chee' ca'.

Gudentu' tu lu xi', ne tu lu nisa situj,
na' bebéaju' netu', ne bzu' netu' tu lataj
naga zúantu'

lu da ba neza.

¹³ Chú'queza' lu xu'u lizru' chee
guzézza' béadu ca',
ne gunna' chiu' ca da guchebe lazra'
guna',

¹⁴ da na' guchebe lazra' ca da gunnía'
gate guzúa' lu da stébele'e.

¹⁵ Guzézza' béadu ca', be dxelanne lau'
Lue',

ne guna' cuen zren chee zríla'du ca' lau',
ne gutia' bezza' ca', ne chivo biu' ca' lau'.

¹⁶ Le da, xénele, xúgutele dxezrébele
Dios,

na' guzenda' le'e ca da bene' gúcalene'
neda'.

¹⁷ Du lazra' bláwizra' Le',
ne bca'ana szrénqueza' Le'.

¹⁸ La guzé lazra' tu da caléla,
quebe ben Xránadxu chia'.

¹⁹ Da líqueze bene Dios chi'a.

Bze nague' ca da gunábeda' Le'.

²⁰ ¡Gaca báqueze Dios!

¡Quebe bzué' chalá'ala da bchálajlena'
Le',

san bexache lazre' neda'!

67 Dios, bexache lazre' netu', ne ben
da chawe' cheentu'.

Dute xel-la' zri'i lazre' chiu' guzúale
netu',

² chee xelúnbea bénneache du gab'i xezr
la xu

ca naca da dxaca lazru',
ne chee xeleneze bénneache dute xezr la
xu

ca dxuseláu' bénneache.

³ Xúgute bénneache dxelúe lá'ane' Lue',
Dios.

Dxelúe lá'ana xúgute bénneache Lue'.

⁴ Le be, ne le sua lu da ba neza, le'e, bén-
neache dute xezr la xu,

lawe' da guchi'a Dios cheele ca naca da
xrlátaje,

ne guxúequeze' xúgute bénneache.

⁵ Xúgute bénneache dxelúe lá'ane' Lue',
Dios.

Dxelúe lá'ana xúgute bénneache Lue'.

⁶ Xezr la xu nigá ba zria na lina chee na,
lawe' da ben Dios cheedxu da chawe'
cheedxu.

⁷ Dios ba bene' chawe' cheedxu,
na' gáteteze dxal-la' xelapa bénneache
Le' ba lá'ana.

68 Guzé, Dios, ne bese dinnaj benne'
ca' dxeledábague' Lue',
ne ben xuluzrannuj benne' ca' dxelecuí-
dene' Lue'.

² Ca dxun tu be', dxulaga na zren chee
xi',

ca' gulagu' benne' ca'.

Ca dxuna xina' lu xi', ca' xelexenite
benne' ca' lau Dios,

benne' ca' dxelune' da zrinnaj.

³ Xelebé benne' xrlátaje ca', ne xelezúe'
lu da ba neza lau Dios,
ne xelexritequeze' lu xel-la' dxelebé
chee'.

⁴ ¡Le gul-la chee Dios!

¡Le gul-la da du ca' chee Láqueze'!

¡Le gucá'ana szren Bénnea' dxe'e xabáa,
nazí le' Jah!

¡Le be lau Le'!

⁵ Ca xra bi dxé'enedu ca', ne ca benne'
dxuxúe

nu'ula ca' zaj zue' tuze,

naca Dios lu lataj lá'azxa naga zúaqueze'.

⁶ Dxun Dios xelezúa xrtia ljwezre bén-
neache quebe nu

xrtia ljwezre' zaj zra'.
 Dxebéaje' benne' zaj xu'e lu na' benne'
 zitu' ca'
 chee xelezúe' lu da ba neza.
 Benne' ca' dxeledábaga Dios zaj zu'e tu
 lu xezr la xu bizre.
⁷ Dios, gate bdxúaju' lau bèneache
 chiu',
 ne gudáu' lu xezr la xu bizre na',
⁸ na' guzru' xezr la xu na'.
 Cá'aqueze gúcale'e xiuj lau Dios.
 Xi'a Sinaí guzrize na lau Dios,
 Dios chee benne' Israel ca'.
⁹ Gusel-lu' tu nisa xiuj zílale'e, Dios.
 Gate belexedú lazre' bèneache chiu',
 Lue' btipu' lazre'.
¹⁰ Bèneache zaj naca chiu' zaj zúaqueze'
 lu xezr la xu chiu'.
 Dute da chawe' chiu', Dios, dxuxú' benne'
 xache' ca'.
¹¹ Xránadxu Dios gusel-le' tu dizra'
 chawe',
 na' gulezrá' benne' zante, benne' bu-
 luzenne' bèneache
 ca naca dizra' chawe' na'.
¹² ¡Buluzrúnnuje'!
 ¡Buluzrunnuj wenná bea ca' nen
 ca naca benne' chee dxjaque' wedil-la,
 na' benne' ca' zaj nagá'ana lu xu'u lizre'
 belexequé'e
 da bulucá'ana benne' ca' buluzrúnnuje'.
¹³ Lácala bcache cuñale naga dxuxúele
 zrila' ca',
 gacu zra lánale da naca na ca xrila
 bgúgudu ca' da
 zaj nazí lechítaje na plata,
 na' dube' chee xrlaba' ca' zaj nazí lechí-
 taje na oro.
¹⁴ Gate bese dinnaj Dios zrente wenná
 bea ca' lataj na',
 na' bexruj bezxe' da bgacu na xi'a
 Salmón.
¹⁵ Tu xi'a zrente naca xi'a Basán.
 Tu xi'a zri'a naca xi'a Basán na'.
¹⁶ ¡Bizr chee na' dxenna'le, le'e, xi'a zri'a
 ca',

xi'a na' naga dxaca lazre' Dios súaqueze'?
 Da líqueze súaqueze Xránadxu lu xi'a na'
 chadía chacanna.
¹⁷ Da zaj naché' benne' ca' lu wedil-la da
 napa Dios
 zánete cue' gaxúa zaj naca na.
 Xránadxu Dios zezé'e xi'a Sinaí chee sue'
 lataj lá'azxa chee'.
¹⁸ Begüénu' xabáa, zeche'u benne' ca'
 bebéaju'
 lu na' xel-la' gute,
 na' guzi'u da chawe' ca' da belunna
 bèneache,
 ne cá'aqueze guzúa da bennu' chee
 benne' ca'
 guledábague' Lue',
 chee súaquezu' ládujla bèneache, Dios,
 leu' Jah.
¹⁹ ¡Gaca ba Xránadxu!
 ¡Tu zra tu zra dxusezrate' dxi'u da chawe'
 chee'!
 ¡Naque' Dios, dxuselé' dxi'u!
²⁰ Dios, Bènea' naque' Dios cheedxu
 guselé' dxi'u.
 Léqueze Xránadxu Dios guselé' dxi'u lu
 na' xel-la' gute.
²¹ Da líqueze Dios gune' we' xichaj
 benne' ca'
 dxeledábague' Le'.
 Gune' we' xichaj benne' quebe dxulusane'
 ca zaj naca
 dul-la da dxelune'.
²² Gunná Xránadxu: "Guna' xezrinle
 lázrele,
 xeza'ale lu xi'a Basán.
 Guna' xeza'ale lu da situj chee nísadau',
 xezrinle lázrele,
²³ lawe' da guna' guchuchu guléajle dxen
 chee benne' ca'
 dxeledábague' le'e,
 na' xelelé'e becu' chee dxen chee benne'
 ca'."
²⁴ Belelé'e bèneache ca guledá bèn-
 neache chiu' belúe
 lá'ane' Lue', Dios.

Dute_ę xel-la' dxelebé gulu_ę lataj lá'azxa
chiu', Dios,
Wená Bea chia'.

²⁵ Benne' ca' dxelul-la zeajzrie' láwe'la,
na' benne' zaj nu'ę da dxulucuezre'
zja'aque' bzébela.

Ládujla zjaca nu'ula cuđe'du ca' zaj
núxrube'
da du ca' dxulusézxebe'.

²⁶ Le güe lá'ana Dios naga zaj nazraga
bénneache chee'.

Le güe lá'ana Xránadxu, le'e nácale
zri'ine zre sua Israel.

²⁷ Zaj zra' zri'ine zre sua Benjamín na',
guque' benne'
cuídedxa, na' dxeleńna be'ę.

Zaj nazraga benne' xíchaje_ę chee_ę zri'ine
zre sua Judá na',
ne benne' xíchaje_ę chee_ę zri'ine zre sua
Zabulón,
ne benne' xíchaje_ę chee_ę zri'ine zre sua
Neftalí.

²⁸ Dios, ble'e lau xel-la' wal-la chiu'.
Bzua chacha, Dios, da na' benu' cheentu'.

²⁹ Ne chee_ę xel-la' szren chee_ę xudau' chiu'
da zua na
xezre Jerusalén,
xelegú'u benne' wená bea ca' da xelun-
ne' lau'.

³⁰ Gudil-la benne' dxjaque' wedil-la chee_ę
dute_ę xezr la xu
zaj nazrague' chee_ę xeledíl-lalene' Lue',
benne' ca' zaj naque' ca bezre zan ca' nen
biadu cheeba' ca',
cadxa xuluzúa xúgute' dizra' chiu',
na' xelunne' ca naca xia plata da zaj
napę'.

Bese dinnaj benne' dute_ę xezr la xu dx-
elexezaca ba lazre'
xelezúę' lu wedil-la.

³¹ Xelelá' benne' xíchaje_ę chee_ę xezr la xu
Egipto.

Benne' xezr la xu Etiopía xelunę' ba xen
xulucá'ana szrene' Dios.

³² Le gul-la chee_ę Dios, le'e zrale du gabíi
xezr la xu!

Le gul-la chee_ę Xránadxu!

³³ Le gul-la chee_ę Bénnea' dxe'ę xabáa
na'ala,

da zua na nédxute'!

Le nna' xque, wanné', ne zízrajle'ę nne'!

³⁴ Le nne_ę nápałe'ę Dios xel-la' waca!

Le Lu xel-la' szren chee' dxuxúequeze'
benne' Israel ca',

na' zran xabáa nalá' xel-la' waca chee'!

³⁵ Benne' zrébentu' nacu' Lue', Dios,
naga zu' lataj lá'azxa chiu'.

Dios chee_ę benne' Israel ca', Léqueze' dxu-
tipe' lazre'

bénneache chee'.

Le Gaca ba Dios!

69 Bselá neda', Dios.

Naca' ca tu benne' dxpe' lu nisa.

² Naca' ca tu benne' xu'ę lu guzra' situj,
ne quebe dxaca se'ę.

Naca' ca tu benne' xu'ę lu nisa sítuje'ę,
na' nisa na' ba dxacu na xíchaje'.

³ Ba dxajxréqueda' lawe' da ba gunnéle'a,
ne ba da lba'a.

Ba dxelátete_ę lawa' dxenná'a gácale_ę Dios
neda'.

⁴ Ba naxándxa benne' dxelecuídene'
neda' ca naxán

xicha xíchaja', ne quebe bi de_ę bi nuna'.

Zaj naca benne' wál-lale'ę benne' dx-
eledábage' neda',

benne' ca' dxuluzría xi'ę neda', ne quebe
bi de_ę bizr chee_ę na'.

Le Dxal-la' quízruja' da quebe gulana'?

⁵ Dios, nézqueznu' Lue' naca da xálaze da
nuna',

ne dxelé'equeznu' dul-la da bęna'.

⁶ Quebe gu'u lataj xelexedué'e ne chia'
neda' benne' ca'

dxuluxrén lazre' Lue', Xrana' Dios
szrente_ę.

Quebe gu'u lataj xeleque zréaje ne chia'
neda' benne' ca'

dxelebeza lazre' Lue', Dios chee_ę benne'
Israel ca'.

⁷ Lawe' da nazrí'ida' Lue'
bulucháchalene' neda',

na' lu xel-la' stu' zúaqueza'.

⁸ Ca tu benne' zitu' naca' lau bi bícha'dau' ca',

ne quebe zaj núnbea bi chee xrna'a neda'.

⁹ Lawe' da dxéle'a gunne xue chee lizru' dxal-la na

lu lázrdawa'.

Gate dxelenné' benne' ca' schanni' chiu' Lue', Dios,

naca ca dxelenné' schanni' chia' neda'.

¹⁰ Gudxezra', ne bena' gubasa, na' bde cuina' xel-la' zi',

na' chee le na' bulucháchalene' neda'.

¹¹ Cá'unqueze bgacu cuina' zra lana' tuzruj.

Buluzúe' neda' ca tu da dxulé'e na da baxache' zrente'.

¹² Gulenné' chia' benne' ca' zaj xu'e xu'u lawe',

na' benne' ca' dxelezuzre' belún le' chia' lu da belul-le'.

¹³ Neda' bláwizra' Lue', Xrana' Dios, lu zra

dxezaca ba lazru' Lue'.

Dios, lu xel-la' dxexache lazre' zren chiu', ne lawe' da

líqueze nacu' weselá cheentu', bene chia'.

¹⁴ Bebéaj neda' lu da stebe zua', naca' ca tu benne'

xu'e lu guzra' situj, ne quebe gu'u lataj cházedxa'.

Bselá neda' lu na' benne' ca' dxelecuí-dene' neda'.

Naca' ca tu benne' xu'e lu nisa situj.

¹⁵ Quebe gu'u lataj gatia' ca tu benne' xegache' lu nisa situj,

ne quebe gaca' ca tu benne' chu'e lu da situj,

ne quebe gaca' ca tu benne' cheajchazie' tu lu xedxu situj.

¹⁶ Bechebe chia', Xrana' Dios, lawe' da chawe' naca

xel-la' dxexache lazre' chiu'.

Gudá, gúcalé neda', lawe' da zrente' naca xel-la'

dxexache lazre' chiu'.

¹⁷ Gunná' xque ca da dxaca chia' neda', wen zrin chiu'.

lawe' da zua' lu da stébele'e, ben ba xuzre xennu' chia'.

¹⁸ Gudá naga zua', ne bselá neda'.

Bselá neda' lawe' da zaj naxánle'e benne' ca'

dxeledábague' neda'.

¹⁹ Lue' nézqueznu' ca dxulucháchalene' neda', ne ca zua'

lu da stébele'e, ne ca dxulucá'ana dítajé' neda'.

Dxelé'equeznu' xúgute benne' ca' dxelecuí-dene' neda'.

²⁰ Lawe' da dxelún le' chia' dxedú lazra', ne zua' lu da stebe.

Guleza' nu benne' xexache lazre' neda', san quebe nu chilá'.

Guleza' nu benne' xelexúe zrene' neda', san quebe nu chilá'.

²¹ Bulugawe' neda' da sla', na' gate gubíleda', buluxí'aje' neda' da zichaj.

²² Ca naca laní chee benne' ca' ben gaca na ca tu

xralaj naga cheajlecházie',

ne ben xexaca da ba neza chee' tu da gun na cheajlecházie'.

²³ Ben xelechul-la xiaj lawe' chee québedxa xeelé'ene',

ne ben tu xelexrízrezqueze benne' ca'.

²⁴ Dute' xel-la' dxezrá'a chiu' ble'e benne' ca',

ne dute' xel-la' xichaj zra'a chiu' be' benne' ca'.

²⁵ Ben quebe nu chilá' lu xu'u lizre benne' ca',

ne quebe nu sua lu xezr la xu chee',

²⁶ lawe' da guláu zi' xuzre' bénnea' benu' Lue' we',

ne dxuluzrizre' ca naca xel-la' zi' dxedé bénnea' be'u Lue'.

²⁷ Ble'e dul-la da zaj nabaga benne' ca',

ne quebe gu'u le' lataj xelaque' tuze benne' xrlátaje chiu'.

²⁸ Busula la benne' ca' lu xiche chee benne' ca'

zaj nape' xel-la' nabán,
ne quebe guzúaju' le' naga zaj naxúaj la benne' xrlátaje ca'.

²⁹ Neda' zua' lu da ba xa', ne lu da stébele'e.

Bselá neda', Dios, ne bechisa neda'.

³⁰ Gúl-laqueza' da güe lá'ana' La Dios chia'.

Gucá'ana szrena' Le' nen da dxue lá'ana' Le'.

³¹ Da nigá xezaca ba lázredxa Dios ca tu bezre, be gutia' lawe',

u ca tu me', béadu zaj zua lúzuba', ne xrúguba'.

³² Xelelé'eqeze benne' baxache' ca' da nigá, na' xelebené'.

Le biga lau Dios, na' gaca bánquezle,

³³ lawe' da dxene Xránadxu benne' ca' dxelexáxrjene',

ne quebe dxuzúe' chalá'ala benne' chee' ca', benne'

zaj xu'e lizre xia.

³⁴ Le güe lá'ana Le', le'e zrale xabáa, ne le'e, zrale lu xezr la xu,

ne le'e zrale lawe' nísadau', ne cá'anqueze xúgute

da zaj naca ban xúgute lataj caní.

³⁵ Dios guselé' benne' zaj zre'e xezre Sión,

ne xexune' xezre ca' zaj zra na lu xezr la xu chee

benne' Judá ca',

na' tu xelexúazqueze' na', ne gata' chee' xezr la xu na'.

³⁶ Zri'ine zre sua benne' wen zrin chiu' ca', gaca

chee' xezr la xu na',

na' benne' ca' zaj nazrí'ine' Lau' Lue' xelexúe' na'.

70 Bselá neda', Dios.

² Gúcaleche neda', Xran.

² Ben xelexedué'e, ne xelexúa lu da stébe benne' ca'

dxelaca lazre' xelúti'e neda'.

Ben xelexebigue', ne xelexala benne' ca' dxelebené'

lawe' da zua' lu da stébe.

³ Ben xelexegá'ana xala benne' ca' dxelún le' chia'.

⁴ Benne' ca' zá'aque' lau Lue' xelebené', ne xelexúe' lu da ba neza.

Benne' ca' dxelé'e Lue': "Xcalenu'" lawe' da bseláu' le',

tu dxelennázqueze': "¡Zrente naca Dios!"

⁵ Zua' lu da stébe, ne nate ni'a na'a.

Gudázega gácalenu' neda', Dios.

Nacu' Weselá chia', ne Xrana'.

Quebe chenu', Xran.

71 Za'a lau' Lue', Xran, chee guxru' neda'.

Ben québedxa xedué'eda'.

² Gúcale neda', ne bselá neda' nen dute da naca xrlátaje chiu'.

Bze naga chi'a, ne bselá neda'.

³ Nacu' ca tu xiaj xre naga sua' chawe', na' waca xida'

naga zu' te zra chizrela.

Gunná be'enu' nu guselá neda', lawe' da nacu' Lue'

ca tu xiaj xre naga dxaca dipa lazra'.

⁴ Dios chia', bselá neda' lu na' benne' ca' zaj nabéaj xíchaje' Lue',

ne lu na' benne' ca' dxelune' da calela ne zaj naque' xichaj zra'a,

⁵ lawe' da dxebeza lazra' Lue', Xrana' Dios.

Nacu' Bénnea' dxuxúe' neda' gate ná-catea' bídaute'.

⁶ Lue' núxruquezu' neda' gate gúlajtea'.

Lue' benu' bdxuaja' lu le'e xrna'a.

¡Tu güe lá'anazqueza' Lue'!

⁷ Belexebane benne' zante ca naca chia', ne ca naca chiu', dxuxúe xánniu' neda'.

⁸ Ben tu gul-lazqueza' da güe lá'ana' Lue', ne gucá'ana szrena' Lue' du zra.

⁹ Quebe guzú' neda' chalá'ala gate ba guxrúa'.

Gate ba bedú lazra', quebe gusanu' neda'.

¹⁰ Benne' dxeledábage' neda' dxelenné' chia',

na' benne' ca' dxelezá lazre' xelúti'e neda'
belun'e tuze dizra',

¹¹ dxelenné': "Ba bsan Dios le'.

Chéajdxu cheajtéladxu le' lawe' da
québedxa nu zua
nu guselá le'."

¹² ¡Dios, quebe su' zitu' naga zua'!

¡Dios chia', gudázega gácalenu' neda'!

¹³ ¡Ben xeleduedé'ene'!

"Ben xelxenite benne' ca' dxeledábague'
neda'."

"Ben xelezúa xel-la' stu', ne xeleque
zréaje benne' ca'

dxelezá lazre' xelun'e chia' da calela."

¹⁴ Neda' tu cueza lázrezqueza' Lue',

ne tu güe lá'anazqueza' Lue'.

¹⁵ Guzenda' bènneache nacu' xrlátaje,

ne tu guzénzquezda' le' ca da benu'
bseláu' neda',

láqueze quebe nezda' bal-la lasa bseláu'
neda'.

¹⁶ Tu guchálajzqueza' chee da zrente da
benu' Lue',

Xrana' Dios,

ne gusá'a lazre' bènneache chee da xrlá-
taje cheéquezu'.

¹⁷ Dios, Lue' bsédenu' neda' gate nácatea'
bidau'te.

Dxul'éda' bènneache ca naca da zrente
da benu'.

¹⁸ Dios, quebe gusán lazru' neda' gate
bache guxrúa',

ne ba bgucha'.

Be' neda' lataj guzenda' zri'ine zre sua' ca
naca

xel-la' waca chiu',

ne guzenda' bi za xelalaj ca naca xel-la'
wal-la chiu',

¹⁹ ne ca naca da xrlátaje chiu', da naca
na da zrente, Dios.

Lue' ba benu' da zaj nácalé'e na zrente.

Dios, ¿Núzraqueze ca Lue'?

²⁰ Lue' benu' gudéa' lu da stebe zante, ne
lu da calela ca',

na' gunu' xexaca bana', na' da xula
xechisu' neda' lu xedxu ba.

²¹ ¡Gucá'ana szrendxu' neda',
ne xue zrénquezu' neda'!

²² ¡Cá'anqueze güe lá'anaqueza' Lue',
quínnia' da gul-laleña'!

¡Dios chia', gúl-laqueza' chee da li chiu',
quínnia'

da du' zriadi'i na du!

¡Nacu' Benne' Lá'azxa chee benne' Israel
ca'!

²³ ¡Sua' lu da ba neza gate gúl-laqueza'
chiu' Lue',

ne béqueze bènne'du xu'a, bènne'du'
bexa'u!

²⁴ ¡Tu guchálajzqueza' chee da xrlátaje
chiu' te zra chizrela,

lawe' da benu' belexedué'e, ne guleque
zréaje

benne' ca' belun'e ba xuzre xelun'e chia'
da calela!

72 ¡Dios, ben guchi'a wenná bea da
dxaca cheentu'

ca dxuchí'aquezu' Lue',

ne ben xelaca xrlátaje zri'ine wenná bea
na'!

² Nadxa le' guchi'a chee bènneache chiu'
ca naca

da naca xrlátaje,

ne ca naca da li guchi'e chee benne' chiu'
ca' zaj zue'

lu da ba xa'.

³ Lu xi'a ca' xelebeza zri lazre' bènneache
chiu',

ne lu xí'adu ca' xelezúe' lu da naca
chawe'.

⁴ Guchi'e chee benne' ca' zaj zue' lu da ba
xa'

lu xezre cheentu',

ne guselé' bidu ca' chee benne' ca'
dxelexázrjene',

ne guzría xi'e benne' ca' dxulusaca zi'e
bènneache.

⁵ Xelezrebe' Lue' dxácaté ne zua gubizra,
ne beu' lawe' tu cuen tu cuen bènneache.

⁶ Gaca wenná bea na' ca nisa xiuj da dx-
aca naga ba nadín,

ne ca xrlé'ela da dxaca dxela lu xezr la xu.

⁷Lu zra chee wenná bea na' gaca da xrlátaje,

ne xebeza zri lazre' bénneache dxácate ne zua beu'.

⁸Nna be'e duté xezr la xu,

ne dxu'a xegu Eufrates, ga zrinte dxu'a nísadau'.

⁹Lau le' xuluzú zribe benne' ca' zaj zré'e xezr la xu,

na' guzéxruje' lazre' benne' guledábague' Le'.

¹⁰Benne' wenná bea chee xezr la xu Tarsis,

ne wenná bea ca' chee tu tu cue' xezr la xu zitu' ca'

xelelé'e zaj nu'e da xulunézruje' chee',

na' benne' wenná bea chee xezr la xu Sabá,

ne wenná bea chee Seba xulunézruje' chee' da gunní'a.

¹¹Xúgute benne' wenná bea ca' xuluzú zribe' lau le',

na' benne' xúgute cue' xezr la xu xelune' zrin chee'.

¹²Le' guselé' benne' ca' dxelexázejene',

benne' dxululáwizre' le',

ne guselé' benne' ca' zaj zue' lu da ba xa',

ne quebe sua nu benne' gácalene' le'.

¹³Xexache lazre' benne' xache' ca', ne benne' ca'

dxelexázejene',

na' guselé' benne' xache' ca' chee xelaca bané'.

¹⁴Xexá'awe' benne' xache' ca' lu na' benne' wen lazre' ca',

ne benne' snia ca'.

Gune' ba xuzre guselé' benne' ca' lu na' benne' ca'

dxelutie' benne'.

¹⁵Gaca ban wenná bea nigá,

na' xulunézruje' chee' oro chee xezr la xu Sabá,

na' tu xelenábazqueze bénneache Dios gácalene' le',

ne te zra chizrela xelenabe' Dios gune' gaca chawe'

chee wenná bea na'.

¹⁶Tu zrígadauze zrúa' xtila xelaze' lu xezr la xu,

ne lu xí'adu ca',

da cuále'e na ca da dxebía lu xi'a Líbano,

na' benne' zaj zré'e lu xezre ca' xelane' ca xixre' ze lu xezr la xu.

¹⁷Tu súazqueze la benne' wenná bea na'.

Tu xuluchálajzqueze' chee la le' dxácate ne zua gubizra.

Ne chee le' gaca da ba neza chee bénneache xúgute

cue' xezr la xu,

na' xelenné' chee' naca chee' da ba neza zrente.

¹⁸Xrlátaje naca Xránadxu Dios, Dios chee benne' Israel ca',

na' tuze Le' dxune' da dxexebánedxu.

¹⁹Xrlátaje naca La Le' da naca na da xabáa chadía chacanna,

na' duté xezr la xu nigá xelelé'ene' da xabáa chee'.

¡Ca'an naca na, ne ca'an gaca na!

²⁰Nigá dxexuzre xrtizra' David, da dxuchálajlene' Dios.

David nigá naque' zri'ine Isái.

73 Da líqueze ba ben Dios da chawe' chee benne' Israel ca',

benne' ca' zaj naque' du lazre' lau Dios.

²Neda' ba guzúa cheajcházia' lu dul-la.

Ba guzúa guna' tu da zrinnaj,

³lawe' da guca' zre'e lazre' ne chee benne' gunní'a ca',

gate ble'eda' ca dxelepe ban benne' ca' zaj nabéaj xíchaje' Dios.

⁴Benne' caní quebe zaj zue' stebe chee xel-la' gute,

lawe' da zaj zúale'e chawe'.

⁵Quebe dxeledé'e lu da ba xa' ca da dxeledé xúgute benne' ca',

ne quebe dxelezaca zi'e ca da dxaca chee xezícadxa bénneache.

⁶Chee le' na' dxulucá'ana szren cuine'.

Tu dxelexúbezqueznē' dxelunē' da calela.

⁷ Dxelánniē' lawe' da dxelagu cháwele'e. Dxelezíle'e ca naca da dxelezá lazre'.

⁸ Dxelún le' chee Dios, ne dxeleenné' calela ca da zrinnaj da xelunē'.

Dute xel-la' dxulucá'ana szren cuina dxuluchálaje' da zrente.

⁹ Dxeleenné' chee da ca' zaj zua xabáa, ne dxuluchálaje' ca benne' zaj nape' dute xezr la xu.

¹⁰ Chee le' na' xúgute bénneache dxelunē' le' tu zren, ne dxelezi'e ca da dxeleenná benne' gunni'a ca'.

¹¹ Dxeleenná benne' ca' dxelunē' da calela:

“¿Ájazra gaca neze Dios?

¿Dxelé'equese Bénnea' zue' na'ala?”

¹² Benne' caní zaj naque' benne' zaj nabéaj xíchaje' Dios, na' dxelepe banē' lu xezr la xu, ne dxe-laque' gunni'a.

¹³ Da líqueze, dácheze naca guca' du lazre', ne quebe bi da calela nuna'.

¹⁴ Gudéa' lu da ba xa' tu zra tu zra, ne gudéa' xel-la' zi' xúgute zra.

¹⁵ La nnia' neda': Guchálaja' ca dxuluchalaj benne' ca',

na' si xē'a bénneachedu ca' chiu', Dios.

¹⁶ Gate blaba lazra' chee chéajni'ida' da nigá,

guca na stébele'e chia' neda'.

¹⁷ Gate guxu'a lu lataj lá'azxa chee Dios, na' guque be'eda' da gaca chee benne' ca' gate cheajsé'.

¹⁸ Da líqueze nunu' chee benne' ca' cheajlecházie', ne gunu' xelebía xí'queze'.

¹⁹ Chadite gulebía xí'queze'.

Belexenite' lu xel-la' gulezrébele'e.

²⁰ Zaj naque' ca tu da ble'edxu lu xēla da dxexenite na gate dxexebandxu.

Ca'an gaca, Xran, gate chasu', guzú' chalá'ala ca da

gulaca benne' ca'.

²¹ Gate guca' zre'e lazre' chee benne' ca', guzúa lázrdawa' lu da stébe.

²² Lawe' da guca' xichaj zide', na' quebe guxéajni'ida'

guca' ca tu be xixre' lau Lue'.

²³ Tu guzúazqueza' nen Lue', na' guca' u na'a xabela.

²⁴ Bsi'u neda' chee guna' da dxulé'enu' neda',

na' te nigá xezí' lu na' u neda' lu xabáa chiu'.

²⁵ Quebe nu xetú zua chia' xabáa san tuzu' Lue',

ne quebe nu xetú dxezá lazra' lu xezr la xu, san tuzu' Lue'.

²⁶ Dxelexedú lazre' belá' dxen chia', ne lázrdawa'.

Dios naque' Benne' dxutipe' lazra',

ne naque' da ba neza chia' chadía chacanna.

²⁷ Benne' ca' dxelexecuase' naga zu' xelexenítie'.

Guzría xi'u xúgute benne' ca' xelexebeaj xíchaje' Lue'.

²⁸ Ca naca chia' neda', dxaca chawe' chia' lawe' da gubiga'

lau Dios.

Tu dxebeza lázrezqueza' Xránadxu Dios, chee guchálajqueza' ca naca da zrente da nune'.

74 Dios, ¿tu chí'izqueze nuzú' netu' chalá'ala?

¿Dxezra' u netu', nácantu' ca zrila' chiu' ca'?

² Bsá lazre' bénneache chiu', benne' ca' guzi' u nédxudaute.

Benne' ca' bexa' u chee gunu' xelaque' benne' cheéquezu',

benne' ca' zaj zre'e lu xi'a Sión nigá, naga zúaquezu' Lue'.

³ Gudá xedajnná' u ca nabía xi' xezre nigá,

ne ca naca da calela da belún benne' ca'

dxeledábage' netu', lu lataj lá'azxa chiu'.

⁴ Dxelebezre xa'a benne' ca' dxeledábage' Lue'

laduj naga zaj nazraga bënneache chiu'. Zaj nuzúe' nigá da dxululé'e na xu'untu' lu na' benne' ca'.

⁵ Buluzría xi'e xezre nigá, ca dxun tu benne' dxine' ca naca xaga zaj ze tu xi'a.

⁶ Na'a nen xa waga chee' ca', ne nen xaga chee' ca', ba buluzría xi'e ca naca lechítaje chee xudau' chiu'.

⁷ Ba buluzéxzie' lataj lá'azxa chiu'.

Bulucá'ana dítaje' xu'u lizru'.

Buluchínnaje' na.

⁸ Lu lázrdawe' gulenné': "Guzría xítegadxu na tu chi'ize."

Ba buluzéxzie' xúgute xu'u naga bezrá-gantu' chiu'

lu xezr la xu chiu'.

⁹ Québedxa dxelé'entu' da la'axza ca' da dxululé'e na

da guchísantu' lu xezr la xu cheentu'.

Québedxa nu chilá' benne' guchálaje' waláz chiu',

ne quebe nu zua ládujla netu', benne' nézene' bátaqueze lantu'.

¹⁰ Dios, ¿Báta cueza na xulucháchale benne' ca' netu',

benne' ca' dxulusaca zi'e netu'?

¿Chadía chacanna welenné' benne' dxeledábage' lue'

schanni' chee Lau'?

¹¹ ¿Bizr chee na' quebe dxebéaj lazru' benne' ca'?

¿Bizr chee na' quebe dxuzría xi'u benne' ca' dxelune' da caléla?

¹² Lue', Dios, nacu' Wenná Bea chia' nédxudaute'.

Lué'queze dxuseláu' bënneache duté xezr la xu.

¹³ Xel-la' waca chiu' benu' nísadau' chupa la'a.

Gula'u xichaj be schanni' ca' lu nísadau'.

¹⁴ Bzúzruju' xichaj be schanni' lēba' leviatán,

Na' benu' gulagu be xixre' lēba', bea ca' zaj zra'ba' lu xu bizre.

¹⁵ Benu' gulaj nisa beaj, ne nisa xegu ca'. Bsebizru' xegu zri'a ca'.

¹⁶ Chiu' Lue' naca te zra, ne cá'anqueze chiu' naca dxēla.

Lue' bzu' beu', ne gubizra naga dxeledé na.

¹⁷ Lue' bzu' tu chi'ize ca naca da zaj de xezr la xu nigá.

Lue' benu' beu' la ca', ne beu' zaga ca'.

¹⁸ Bsa lazre' da nigá: Benne' ca' dxeledábage' lue'

ba zaj nun le' chiu' Lue', Xran.

Benne' xala ca' ba gulenné' schanni' chee Lau'.

¹⁹ Quebe gusanu' lu na' benne' zaj naque' ca be snia ca'

benne' ca' nazrí'iquezu',

ne quebe gal-la lazru' tu chi'ize bënneache chiu' zaj

zue' lu da ba xa'.

²⁰ Gunná' ca naca xel-la' wezría da benu', lawe' da gáteteze naca chul-la lu xezr la xu,

na' zaj zra' benne' ca' dxelune' da zrinnaj.

²¹ Quebe gu'u lataj xelegá'ana lu xel-la' stu' benne'

ca' zaj zue' lu da baxache'.

Benne' dxelezaca zi'e, ne benne' dxelexázejene'

xelúe lá'ane' Lau'.

²² ¿Guzé, Dios!

¿Ben ca ba gunnáu'!

¿Bsa lazre' ca dxelún benne' xala ca', dxelún le' chiu'

te zra te zra!

²³ Quebe gal-la lazru' ca da gulenná benne' ca'

dxeledábage' lue'.

Da schaga dxelún benne' ca' dxeledábage' Lue'

tu dxénzqueze na.

75 “Xcalenu’”, dxentu’ Lue’, Dios:
“Xcalenu’.”

Dxuzentu’ bēnneache zúalenu’ netu’, ne
ba nunu’ da ca’
dxexebánequezentu’.

²Dxenná Dios: “Ba nuzúa’ zra guchi’a
chee bēnneache.

Guchi’a ca naca da xrlátaje.

³Lácala xru’ dutē xezr la xu, ne xelezrize
xúgute

da zaj naca ban na,

neda’ gúxruqueza’ ca naca lane xezr la xu
na’.

⁴Dxapa’ benne’ xala ca’: Quebe gáwele.

Dxapa’ benne’ ca’ dxelune’ da calela:

Quebe gucá’ana szren cuínale.

⁵Quebe guxrén lázrele xel-la’ wal-la
chee.

Quebe gácale benne’ lázxdau zide.’”

⁶Quebe za xel-la’ szren naga dxalaj
gubizra,

ne naga dxebía na,

ne quebe za na le’e xixre’ lawe’ lataj.

⁷Dios naque’ Bēnnea’ guchi’e chee
bēnneache.

Dxucá’ane’ cá’aze tu benne’, ne dx-
ucá’ane’ szren xetú benne’.

⁸Dios nuxre’ tu zriga’, da nazrate na xrise
uva wal-la,

da zeaje na xel-la’ dxezrá’a chee’.

Dxulálaje’ na chee xele’aj benne’ ca’ dx-
elune’ da calela.

Xelé’aje’ na xebizrte na.

⁹Neda’ guzénquezda’ bēnneache,

ne gul-la’ da güe lá’ana’ Dios chee Jacob.

¹⁰Le’ guchínajqueze’ xel-la’ waca chee
benne’

wen da calela ca’.

Gusezrendxe’ xel-la’ waca chee benne’ xr-
látaje ca’.

76 Zaj núnbea benne’ Judá ca’ Dios,
na’ ládujla benne’ Israel zrente
nácaqueze La Le’.

²Lu xezre Salem zua lataj lá’azxa chee’.

Lu xezre Sión zua naga zúaqueze’.

³Lataj na’ gudíchaje’ xaga nalá xéche’ze
ca’,

ne xia da dxucu’uj na benne’ lu wedil-la,
ne ca naca da dxuluchínene’ lu wedil-la.

⁴Benne’ xabáa nacu’ Lue’,

ne Benne’ wál-ladx ca xi’a zri’a ca’.

⁵Xeajlechaze benne’ wal-la ca’, ne guláse
dínnaje’.

Netú benne’ wal-la ca’ quebe belexechisa
ne’e chee

xelune’ wedil-la.

⁶Dios chee benne’ Israel ca’, gate gudil-
lu’ benne’ ca’,

guláse dinnaj bzrina’ ca’, ne benne’
gulebíe’-ba’.

⁷Nacu’ Lue’ Benne’ zrébedxu.

¿Nu benne’ gaca se’ lau Lue’ gate
dxezra’u?

⁸Xabáate gunná’u, na’ guchi’u chee
bēnneache.

Dxelezrebe bēnneache lu xezr la xu, na’
dxelebeze’

⁹zra seu’ Lue’, Dios, chee guchi’u chee
bēnneache,

ne chee guseláu’ xúgute benne’ dxexruj
lazre’ zaj

zre’e lu xezr la xu.

¹⁰Da líqueze xel-la’ dxelezrá’a chee
bēnneache

gaca na tu da gucá’ana szren na Lue’.

Guzúa zriiu’ xel-la’ dxelezrá’a chee bēn-
neache zaj nagá’ane’.

¹¹Le chebe lázrele da gunle chee Dios,

na’ le gun da na’ chee Xránadxu, Dios
chee.

Xúgute benne’ zaj zre’e du gabi’ila
xelelé’e,

na’ xulunézruje’ da zaj nu’e chee Dios,

Bēnnea’ dxezrébedxu.

¹²Guzague’ da xu’u lu xichaj lázxdau
benne’ blau ca’.

Le’ dxuchebe’ benne’ wenná bea ca’ zaj
zre’e lu xezr la xu.

77 Nen chi’a bláwizra’ Dios.

Bláwizra’ Dios, na’ Le’ buzé
nague’ chi’a.

²Guxu'a lau Xránadxu lu zra guzúa' lu da ba xa'.

Chizrela guchisa na'a lau Le', ne quebe guzúa zria'.

Quebe be'a lataj nu benne' xue zrene' neda'.

³Bsa lazra' chee Dios, ne guzúa' štebe. Gudawa' zria lawe', ne bedú lazra'.

⁴Begúe' bchigala chia'.

Guzúa' stébele'e, ne quebe guca guchálaja'.

⁵Blaba lazra' ca naca zra nédxute.

Ca naca iza zan ca' da ba guledé chee na.

⁶Bsa lazra' ca naca da bil-la' chizrélala, ne blaba lázrequeza' ca zaj naca na, na' gunaba be' xu'a:

⁷¿Guzúa Xránadxu dxi'u chalá'ala tu chi'ize

ne québedxa gácalene' dxi'u?

⁸¿Cabátadxu xexache lazre' dxi'u?

¿Cabátadxu guné' ca da guchébe lazre'?

⁹¿Gul-la lázrequeze Dios xexache lazre' dxi'u?

¿Dxezré'e dxi'u, na' québedxa xexache lazre' dxi'u?

¹⁰Nadxa gunnía': Caní dxuna' lawe' da quebe chawe' zua'.

Chee le' na' cheajsá lazra' chee xúgute da zrente

da ben Dios zrente lu iza ba guledé chee na.

¹¹Cheajsá lazra' chee da zrente ca' da ben Jah.

Awe', cheajsá lazra' chee da benu' nédx-udaute da ca' dxexebámentu'.

¹²Gulaba lazra' ca naca xúgute da ba benu',

ne guchálaja' ca zaj naca da nunu'.

¹³Dios, lá'axza naca da dxusédenu' netu' ca guntu'.

¿Zua xetú Dios naque' benne' zren ca naca Dios cheentu'?

¹⁴Lue' nacu' Dios, dxunu' da ca' dxexebámentu'.

Blé'enu' xúgute bénneache lu xezr la xu ca zrente

naca xel-la' waca chiu'.

¹⁵Nen xel-la' waca chiu' bexa'u bénneache chiu',

zri'ine zre sua Jacob, ne zri'ine zre sua José.

¹⁶Xegu nisa ca' belelé'en Lue', Dios.

Belelé'e xegu nisa ca' Lue', na' belezré-bele'e na.

Cá'anqueze gulezúa štebe nísadau' situj ca'.

¹⁷Nisa xiuj zila bdxuaj na lu beuj bza ca', ne gulennéle'e guziu', ne gulépele'e xesa.

¹⁸Lu be' bduu' ben guziu' chiu' da gunnéle'e na.

Bulusaní' xesa guziu' ca naca xezr la xu. Guzúa štebe, ne guzrize xezr la xu.

¹⁹Lawe' nísadau' guza'u, ne lawe' nisa zila ca' gudéquezu', ne quebe naca bea naga bléaju'.

²⁰Guche'u bénneache chiu' ca zrila' ca' lu na' Moisés, ne lu na' Aarón.

78 Le xen, le'e, bénneache chia', ca da dxusédeda'.

Le xen xanne' ca da dxuchálaja'.

²Guchíneda' dizra' ca da dxuluchalaj benne' sina ca',

na' guzéajni'ida' le'e da ca' gulezúa na bagácheze gate nate,

³da ca' bendxu, ne bénbeadxu na,

da ca' belixru be'e xra xrtáudxu ca' dxi'u.

⁴Quebe gucáchedxu na lau zrí'inedxu ca'.

Guzénquezdxu zrí'inedxu ca' ca naca xel-la' szren

chee Xránadxu,

ne ca naca xel-la' waca chee', ne ca zaj naca da zren ca'

da bēne'.

⁵Bzue' tu da nadxixruj bea na da xelún benne' Israel ca',

ne da bdxixruj be'ene' ca' da xelún zri'ine zre sua Jacob.

Gunná bé'ene' xra xrtáudxu ca' xuluzenne' bi chee' ca'

ca naca da gunná bé'ene',
 6 chee xelúnbea zrí'ine' bidu ca' za xelála-
 jbe' ca naca na,
 na' bi caní xuluzenbe' zrí'inebe' da na',
 7 chee xuluxrén lázrebe' Dios,
 ne quebe xelal-la lázrebe' da ca' ben Dios,
 ne chee xuluzúabe' dizra' da ca' gunná
 be'e.
 8 Quebe xelácabe' ca gulaca xra xrtáube'
 ca'.
 Benne' ca' quebe buluzúe' dizra' chee', ne
 guledábague' Le',
 ne quebe buluzúa chúchue' ca buluxrén
 lazre' Dios,
 ne quebe gulaque' li lazre' lu da naca
 chee Dios lu
 be' zaj nácaqueze'.

9 Benne' zrí'ine zre sua Efraín, benne' zaj
 nu'e
 da dxuluchínene' lu wedil-la
 buluzrúnnuje' naga dxaca wedil-la.

10 Quebe belune' ca naca xel-la' wezría
 da ben Dios,
 ne quebe buluzúe' dizra' da gunná
 bé'ene'.

11 Gulal-la lazre' da ca' ben Dios,
 ne xel-la' waca ca' blé'ene' Le'.

12 Lau xra xrtawe' ca' bene' xel-la' waca
 ca'
 lu xezr la xu Egipto, ne lu xezr la xu
 Zoán.

13 Gusalje' neza lu nísadau' naga guledé
 benne' ca'.
 Bene' nísadau' na' ca xi'a ca' chalá'a weaj.

14 Te zra blé'ene' benne' ca' neza nen tu
 beuj bza da xjácálene',
 ne chizrela nen beuj bza da naca na ca
 tu xi'.

15 Gulé'e xiaj ca' naga naca xu bizre,
 na' bx'áje' benne' ca' nisa da gulaj na le'e
 xiaj ca'
 ca tu xegu nisa.

16 Bene' gulaj tu xegu nisa le'e xiaj na',
 na' bzriluj na ca tu xegu zren.

17 Lácala bene' caní belúndxaqueze' dul-
 la lau Dios

le'e xixre' lawe' lataj,
 ne guledábague' Dios nape' dutę xel-la'
 szren.

18 Gulegú'u lazre' xulu'zúa zrie' Dios.
 Gulenabe' xelawe' ca da dxelezá lazre' le'.

19 Gulenné' chee Dios, gulenné':
 ¿Wazeque Dios na' gunne' da gágudxu
 le'e xixre' nigá?

20 Da líqueze gulé'e xiaj na', na' gulaj nisa
 na',
 na' bzriluj na ca tu xegu zren.
 ¿Wazéquequezne' gunne' dxi'u xeta, ne
 gunne' bela'
 da gágudxu?

21 Chee le' na' bzra'a Xránadxu gate ben-
 ne' da na',
 ne gusel-le' xi' da bzezxe na bal-la bén-
 neache chee',
 na' bsdexí'ule'e xel-la' dxezrá'a chee' nen
 benne' Israel ca',

22 lawe' da quebe guléajle'e chee Dios,
 ne quebe buluxrén lazre' Le' guselé' le'.

23 Gunná bé'ene' beuj zran xabáa,
 ne gusalaje' dxa xu'u chee xabáa,

24 na' bene' bxinnaj xeta maná ca dxinnaj
 xiuj chee
 gulagu benne' chee' na.
 Bnézruje' le' da naca ca zrua' chee xabáa.

25 Gulawe' da dxelagu gubáz chee xabáa
 ca'.
 Gusél-lale'e da gulawe', na'
 guléajtequezene'.

26 Bene' guca be' da za' chalá'ala naga dx-
 alaj gubizra,
 ne xel-la' waca chee' bene' guca be' za'
 chalá'ala
 naga dxedé gubizra beu' zaga,

27 na' gusel-le' chee benne' ca' bela' ca ze
 bxrte xu,
 béadu zaj zua xrila naxanba' ca xuzre' da
 dxe' dxu'a
 tu xegu zren.

28 Bene' guléxrujba' chale'aj chee benne'
 ca'.
 Guléxrujba' dútequeze naga zaj zua xu'u
 xide chee'.

29 Gulawē'-ba', ne gulélajquezenē'.
Dios bnéruzjē' chie' ca naca da gulaca
lazrē'.

30 Gate quebe ne xelélajenē', ne ne
dxelawē'-ba',

31 bzra'a Dios benne' ca',
na' betiē' benne' zaj nácadxē' benne' wal-
la,
ne benne' Israel ca' zaj nácadxē' benne'
waca.

32 Láqueze bene' caní, na' belúndxaque-
zē' dul-la,
ne láqueze belelé'ene' xel-la' waca ca' da
bene',
quebe buluxrén lazrē' Lē'.

33 Cheē lē na' guchugue' zra cheē benne'
ca' ca
tu be' dxecá'adxu,
ne ca zaj naca iza da gulezúē', bdeē' lē'
lu da zi' da xa'.

34 Gate betiē' bal-la benne' ca', na'
xezícadxē'
belexaque' cheē Dios.
Belexebí'i lazrē', ne du lazrē' buluchála-
jlēne' Lē'.

35 Xeajlesá lazrē' naca Dios Benne' dx-
uxúē' lē',
ne Dios na' nape' dutē xel-la' szren naque'
Bénnea'
bxá'awenē' lē',

36 san quebe guca li lazre' da gulenné'
lawe' da belún lazrē' lau Dios.

37 Quebe gulaque' li lazre' nen Lē',
ne quebe belunē' du lazre' ca naca xel-la'
wezría cheē'.

38 Dios bexache lazrē' cheē benne' ca',
ne bnite lawe' dul-la belunē', ne quebe
bzria xi'e lē'.

Zane' lásatē bzuē' chalá'ala xel-la' dx-
ezrá'a cheē',
ne quebe bzrē'e lē' dutē ca da dxéquenē'.

39 Xeajsá lazre' Dios zaj naque' belá'
dxen.

Zaj naque' ca tu be' da dxedé na, ne
quebe xezrín na.

40 Zane' lasa guledábage' Lē' lē'e xixre'
lawe' lataj na',
ne zane' lasa buluzúē' Lē' baxache'.

41 Zane' lasa buluzúē' Dios chalá'ala,
ne buluché'e Dios lá'azxa cheē benne' Is-
rael ca'.

42 Gulal-la lazrē' ca naca xel-la' waca
zren cheē',
ne ca bene' lu zra na' bxá'awenē' lē' lu da
zi' da xa',

43 gate bene' xel-la' waca ca' lu xezr la xu
Egipto,
ne blé'ene' da ca' da dxebánedxu lu xezr
la xu Zoán.

44 Bexunē' xegu chee' ca' dxen,
na' québedxa guca da xele'aj benne'
Egipto ca'.

45 Gusel-lē' be'a ládujla benne' ca', be bu-
ludeba' lē' xel-la' zi'.
Gusel-lē' bluzru ca' buluzría xiba' xezr la
xu cheē'.

46 Gusel-lē' biche zu ca' guláguba' lina
cheē',
ne buluzría xiba' da zaj zua lu xezr la xu
cheē'.

47 Gusel-lē' xiaj bezxe' zri'a da bzria xi na
lba uva chee' ca',
ne gusel-lē' da zaga da bsebizre na xaga
higo chee' ca'.

48 Gusel-lē' xiaj bezxe' zri'a da bēte na be
xixre' chee' ca',
ne gusel-lē' xesa da bēte na zrila' chee'
ca'.

49 Bdeē' benne' Egipto ca' lu xel-la' zi'
zren,
lawe' da bzrá'ale'e benne' ca',
na' guca da ca' ca zánete' gubáz ca' chee'
xel-la' gute.

50 Quebe bzague' xel-la' dxezrá'a chee',
ne quebe bnite lawe' chee' chee' quebe
xelátie',
san betiē' lē' nen tu xízrawē' wal-la.

51 Betiē' bi biu nedxu chee' benne' ca',
bi biu nedxu ca' chee' benne' Egipto ca'.

52 Nadxa beche'e benne' chee' ca' ca tu
benne'

dxeche'e zřila' ca',
 ne bsi'e le' le'e xixre' lawe' lataj.
 53 Bsi'e le' zri'a chawe', ne quebe bi
 belezrebe',
 san gulate benne' guledábage' Le' lu
 nísadau'.
 54 Beche'e le' lu xezr la xu lá'azxa chee',
 naga zua xi'a nigá da guca cheéqueze'.
 55 Bebéaje' benne' zaj zře'e lu xezr la xu
 na' lau
 benne' chie' ca',
 na' gulé'e xezr la xu chee' cha chee' benne'
 Israel ca',
 ne bzře'e le' lizre benne' ca' bebéaje'.
 56 Da xula buluzúe' Dios chalá'ala, ne
 buluché'e
 Dios, nape' dute xel-la' szren.
 Quebe buluzúe' dizra' da ca' gunná
 be'ene' le'.
 57 Da xula guledábage' Dios ca belún
 xra xrtawe' ca'.
 Gulaque' ca tu bdxequé' xala chee' xaga
 nalá xéche'ze.
 58 Buluché'e Le' ne chee' lataj ca' naga
 bulucá'ana
 szrene' bedáu' xiaj xaga ca',
 ne ne chee' bedáu' xiaj xaga chee' ca'
 bzrá'ale'e Dios.
 59 Bzra'a Dios gate blé'ene' na,
 na' gucuídele'ene' benne' chee' ca', benne'
 Israel.
 60 Guleaj xíchaje' xu'u xide lá'azxa chee'
 zua na xezre Silo,
 xu'u xide na' guzuáqueze' ládujla benne'
 ca'.
 61 Be'e lataj belecá'a benne' ca' dx-
 eledábage' dxi'u
 xi'ina lá'azxa chee',
 da na' dxulé'e na xel-la' waca, ne xel-la'
 szren chee'.
 62 Bzře'e benne' chee' ca',
 na' bdee' le' lu na' benne' ca' belúti'e le'.
 63 Benne' wal-la ca' guláti'e lu wedil-la.
 Quebe nu zra' benne' wegú', benne'
 xelezúalene'
 nu'ula wegú' ca'.

64 Cá'anqueze gulate bxruze ca' lu wedil-
 la,
 na' nu'ula chee' bxruze ca' quebe gule-
 bezre xache'
 chee' bxruze ca'.
 65 Nadxa guca Xránadxu ca tu benne' dx-
 exebane' lu bchigala.
 Guque' ca tu benne' wal-la dxebezre xe'e
 gate ba né'aje'
 xrise uva wal-la.
 66 Na' blague' benne' guledábage' Le',
 ne bca'ane' le' cá'aze chadía chacanna.
 67 Bzue' chalá'ala zri'ine zre sua José,
 ne quebe bequé'e zri'ine zre sua Efraín,
 68 san bequé'e zri'ine zre sua Judá,
 ne xi'a Sión, da na' nazrí'ile'ene'.
 69 Lu xi'a na' bene' xudau' lá'azxa chee',
 da guca na ca naca da zua na xabáa.
 Bzua chúchue' na chadía chacanna,
 ca nácaqueze xezr la xu nigá.
 70 Bequé'e David, benne' wen zrin chee'.
 Bebéaje' le' naga zaj zra' zřila' ca'.
 71 Beche'e le' naga zue' dxuxúe' zřila' ca'
 zaj naché'eba' bedau',
 chee' gaque' wenná bea, benne' guxúe'
 bénneache chee',
 zri'ine zre sua Jacob, benne' zaj naque'
 benne' Israel ca'.
 72 Dute xel-la' du lazre' chee' bxue' benne'
 ca'.
 Bxue' le' dute xel-la' waca zren chee'.

79 Dios, ba gulú'u benne' xezr la xu
 zitu' ca' lu xezr la xu
 chee' bénneache chiu'.
 Bulucá'ana dítajé' xudau' lá'azxa chiu'.
 Buluzría xi'e xezre Jerusalén.
 2 Bulucá'ane' bela' dxen chee' wen zrin
 chiu' ca' naga
 gulagu be' zua xřila le'.
 Be' xixre' ca' guláguba' bela' dxen chee'
 benne' ca'
 zaj naque' chiu'.
 3 Ca nisa bululálaje' dxen chee' benne' ca'
 xúgute lu neza
 chee' xezre Jerusalén,

ne quebe nu chilá' benne' gucache'
benne' ca'.

⁴ Benne' xezr la xu walizre' cheentu' ca'
dxulucháchalene' netu'.

Benne' zaj zre'e xezre walírz ca' dxu-
lucá'ana dítajé' netu',
ne dxelún le' cheentu'.

⁵ ¿Bata cuézaqueze gaca caní cheentu',
Xran?

¿Tu chí'izqueze dxezra'u netu'?

¿Tu chí'izqueze gaca xel-la' dxezrá'a
chiu' ca tu xi'?

⁶ Bzra'a benne' xezr la xu ca' quebe zaj
númbe'e Lue',

na' benne' xezr la xu ca' quebe dxul-
uláwizre' Lue',

⁷ lawe' da ba buluzría xi'e zri'ine zre sua
Jacob,

ne bulucá'ana dítajé' xu'u lizre benne' ca'.

⁸ Quebe gusebagu' netu' ca naca da zrin-
naj da belún

xra xrtauntu' ca'.

Gudázega xexache lazru' netu', lawe' da
dxezraga láule'entu'.

⁹ Gúcale netu', Dios, nacu' Bénnea'
dxuselé' netu',

chee gaca ba Lau'.

Bselá netu', ne bnite lau dul-la nuntu'
chee xegá'ana szren Lau',

¹⁰ lawe' da xelenná bénneache: “¿Ga na
Dios chee benne' ca'?”

Bebéaj lazre' benne' ca' belútié' wen zrin
chiu' ca'.

¹¹ Caní ben chee xeledé'e xúgute' benne'
chiu' ca' zaj xu'e

lu na' benne' ca' dxeledábage' netu'.

Dute' xel-la' waca zren chiu' bselá benne'
ca' ba zaj nachuge'

chee' xelatie'.

¹² Bunezruj chee benne' xezr la xu wal-
izre' cheentu'

ca' xegazre cue'

ca da calela da belune', bulucá'ana dítajé'
Lue', Xran.

¹³ Netu', bénneache chiu', nácantu' ca
zrila' chiu' ca',

güe lá'anaquezentu' Lue' chadía
chacanna.

Tu cuen tu cuen zri'ine zre suantu' gúl-
laquezentu' da

güe lá'anantu' Lue'.

80 Bene cheentu', Lue' dxuxú' benne'
Israel ca',

Lue' na', dxuxú' zri'ine zre sua José ca
zríla'du ca',

ne dx'e'u lataj blau chiu' da zua na láwela
querubín ca'.

² Ble'e xel-la' szren chiu' lau zri'ine zre
sua Efraín,

ne Benjamín, ne Manasés.

Ble'e xel-la' waca chiu', ne gudá guseláu'
netu'.

³ Beché' netu', Dios.

Bexache lazre' netu', na' lantu'.

⁴ Xránantu' Dios, napu' dute' xel-la' waca,
¿bata chajsequeze zra'u netu',

ne quebe xennu' ca da nábantu' Lue'?

⁵ Bzúale'u netu' lu xel-la' dxewí'ine lazre',
ne bzílale'u nisa dxebézrentu'.

⁶ Be'u lataj xezr la xu walizre ca' bu-
lucá'ana dítajé' netu',

na' benne' ca' dxeledábage' netu' belún
le' cheentu'.

⁷ Beché' netu', Dios, napu' dute' xel-la'
waca.

Bexache lazre' netu', na' lantu'.

⁸ Bebéaju' tu zrigu' lba uva lu xezr la xu
Egipto da naca na

bénneache chiu'.

Blagu' benne' xezr la xu gulezré'e nigá,
na' guzu' nigá

zrigu' lba uva na'.

⁹ Gú'unu' lba uva na' chee gula na.

Bdéle'e lue zrigu' lba uva na', na' gucu na
xezr la xu na'.

¹⁰ Gulú'u na zrul-la xúgute' xi'a ca',

na' zruze na ca' gulegú'u na zrul-la xaga
cedro zren ca'.

¹¹ Gulechiluj zruze na, belezrinte na
dxu'a nísadau',

ne belezrinte na dxu'a xegu Eufrates.

12 ¿Bizr chee na' gucá'u le'aj da naxechaj na le na?

Na'a xúgute benne' dxeledé na' dxelebane' da zixre chee na.

13 Dxuluchuchu dxululéaj cuche xixre' ca' lba uva na',

na' be xixre' ca' dxeláguba' na.

14 Bedá cheentu', Dios, napu' dute xel-la' waca.

Gunná' netu' ga na' zu' xabáa, ne gudá xedajnná'u lba uva chiu'.

15 Gudá, guseláu' lba uva nigá, da gúzaquezu'.

Bechuj chee lba uva na', ba bzua chuchu' gaca na chiu'.

16 Benne' ca' dxeledábague' netu' ba gulechúgue' lba na',

ne ba guládue' na xi'.

Gunná' benne' ca' lu xel-la' dxezrá'a chiu', ne bzria xi' benne' ca'.

17 Bzua chuchu, ne bxue benne' ca' ba guca'u,

benne' xezr la xu na' ba nuzúa chuchu'.

18 Cabátadxa cueaj xíchajntu' Lue' xecha lasa.

Bcache chawe' netu', naca bantu', na' güe lá'anantu' Lau'.

19 Xránantu' Dios, napu' dute xel-la' waca, beché' netu'.

Bexache lazre' netu', na' lantu'.

81 Lu dute xel-la' dxebé le gul-la chee Dios, Bénnea' dxutipe' lázredxu.

Lu da ba neza chee le cuezre xa'a lau Dios chee

zri'ine zre sua Jacob.

2 Le gul-la, ne le capa xídedau'.

Le quinne xrtan da con zríadi'i na du, ne da dxúl-lalēle.

3 Le gucuezre luzu da dxulucuezre' gate naca beu' dxe'ene,

da naca na zra nuzúadxu gundxu laní lá'azxa.

4 Naca na tu da dxun na ba xen xelún benne' Israel ca',

da bdxixruj bea Dios xelún zri'ine zre sua Jacob.

5 Bzue' na ca tu da gulé'e lau na zri'ine zre sua José

gate beledxúaje' lu xezr la xu Egipto, naga benda' tu xrtizra' bēnneache da quebe guxéajni'ida'.

6 Gunná Dios: "Bégúa' xua' da buludé'e' benne' chia' ca'.

Bsezrá'a benne' chia' ca' da zi'i."

7 Lu da ba xa' da guzúale, bláwizrale neda', na' bselá' le'e.

Bechéba' cheele naga nagacha' lu beuj bza gate na'

gunnéle'e guziu',

na' bxua' ájala gunle naga zaj de beaj nisa zaj nazí le Meriba.

8 Le xene, bēnneache chia', na' gusízreda' le'e.

Le'e, benne' Israel, che dxaca lázrele sile da dxennía',

9 quebe gápale tu dios chee benne' xula, ne quebe guzú zríbele lau tu dios chee benne' zitu'.

10 Neda', Xránale, naca' Dios chee le.

Bebéaja' le'e lu xezr la xu Egipto.

Le salaj dxú'ale, na' gunna' da gágule.

11 Bēnneache chia' quebe belúe lazre' da gunnía'.

Benne' Israel ca' quebe gulaca lazre' xelezí' lu ne'e neda'.

12 Chee le na' bsana' benne' ca' lawe' da gulaque'

lázxdau zide'.

Belune' ca da guléquene' xrlátaje.

13 Che la gulebé' gunne xue bēnneache chia' chee da gunnía',

ne che la belún benne' Israel ca da ble'eda' le',

14 na' chadite' bzria xi'a benne' guledábague' le',

ne gudíl-lalēna' benne' guledíl-lalēne' le'.

15 Che la belún benne' Israel caní, na' benne' ca' dxelecuídene' Xránadxu buluzúe' xrtizre',

(san chadía chacanna zaj nabague' zria),

16 na' Dios gunę' xelawe' zrua' xtila cháwedau',
ne gunę' xelélajquezne' nen bzrina'dau'.

82 Zua Dios naga zaj nazraga benne'
dxuluchi'e cheę bėnneache cheę'.
Dios dxuchi'e cheę benne' ca' dxuluchi'e
cheę bėnneache.

2 Dxenná Dios: “¿Bátadxa guchí'ale cheę
bėnneache chia' da quebe naca xrlátaje,
ne gápale ba lá'ana benne' ca' zaj nabéaj
xíchaję' Dios?”

3 Le gácale benne' xache' ca', ne bidau'
wezębe ca'.

Le gun da xrlátaje cheę benne' baxache'
ca'
ne cheę benne' ca' dxelexázejne'.

4 Le guselá benne' ca' dxeledé' lu da ba
xa',

ne benne' ca' quebe bi zaj nape'.
Le guselá benne' ca' lu na' benne' ca' zaj
nabéaj xíchaję' Dios.

5 Quebe bi zaj nézene', ne quebe
dxeléajni'ine',
na' dxeledé' lu da chul-la.

Dxuluzrizre' ca naca da zaj de lu xęzr la
xu.

6 Neda' gunnía': Le'e nácaquezle ca dios
ca',

ne nácale xúgutele ca zrí'inequeze Dios
szrente,

7 Wátele ca dxelate xezícadxa
bėnneache,

na' cheajcházele ca cheajchaze núteteze
benne' dxenná be'e.

8 ¡Guxasa, Dios!

¡Bchi'a cheę bėnneache zaj zra' lu xęzr la
xu,

lawe' da naca dutę xęzr la xu chiu' Lue'!

83 ¡Dios, quebe sua zriu'!
Quebe su' zrize, Dios, ne quebe
gusezxuj dxu'u,

2 lawe' da dxelebezre xa'a benne' ca' dx-
eledábage' Lue',

ne dxulucá'ana szren cuina benne' ca' dx-
elecuídenę' Lue'.

3 Bagácheze ba zaj nune' tuze dizra' bi
xelune' cheę bėnneache chiu',
ne ba zaj nune' bi xelune' cheę benne' ca'
dxuxúquezu' Lue'.

4 Gulenné': “Le chu'u, guzría xidxu
benne' ca'

cheę québedxa xelaque' tu cue' xęzr la
xu,

ne québedxa nu sua benne' cheajsá lazre'
la Israel.”

5 Ba belune' tuze dizra'.

Zaj nune' tuze dizra' xeledábage' Lue'

6 benne' Edom ca', ne benne' Ismael ca',
ne benne' Moab ca', ne benne' zri'ine zre
sua ca' Agar,

7 ne benne' Gebal ca', ne benne' Amón
ca', ne benne' Amalec ca',

ne benne' Filistea ca', ne benne' zaj zre'e
xęzre Tiro.

8 Cá'anqueze benne' Asiria ca' zaj nune'
le' tuze.

Xúgute' benne' caní dxelune' zrin cheę
zri'ine zre sua Lot.

9 Ben cheę benne' caní ca benu' cheę
benne' Madián ca',

ne ca benu' cheę Sísara, ne ca benu' cheę
Jabín dxu'a xęgu Cisón,

10 benne' ca' gulátie' lu xęzr la xu Endor,
na' belexaque' ca xrche'e beze da gun na
bebe lu xęzr la xu.

11 Ben gaca cheę benne' blau ca' cheę
benne' caní

ca guca cheę Oreb, ne cheę Zeeb,

ne ben gaca cheę benne' dxelenná bé'ene'
benne' caní

ca guca cheę Zeba, ne cheę Zalmuna,

12 lawe' da gulenná benne' caní: “Gaca
cheędxu xęzr la xu

naga zaj zra' bėnneache cheę Dios.”

13 Dios chia', ben xelaque' ca xizre bebe
da dxua be' gate dxedube na.

Ben xelaque' ca xrlácue xia xéladu ca' da
dxua be' bdunu'.

14 Ca dxun tu xi' da dxuzezxe na tu xi'a
zren,

ne ca dxun xi' da dxuzezxe na tu din zren,

¹⁵ ca'an gudáu zi' xuzre benne' caní tu lu
be' bdunu',

ne bchebe le' nen tu be' bdunu' chiu'.

¹⁶ Ben xelexedu'ele'ene',

ne ben xelape' Lue' ba lá'ana, Xran.

¹⁷ Ben xeleque zréajene' ne xelezúa sté-
bele'e tu chí'izqueze.

Ben xelexegá'ana dí'taje', ne xelexení'tie'.

¹⁸ Ben xelexúnbe'e nacu' Lue' Xránantu'
Dios.

Tuzu' Lue' nacu' Dios zrente' lawe' dute
xezr la xu.

84 Nazrí'ile'eda' xudau' chiu' Lue',
Dios, napu' dute' xel-la' waca.

² Dxaca lázrele'eda' sua' ga na',

ne dxezá lazra' sua' lu xudau' chiu', Xran.

Dute' da naca', ne dute' lázrdawa' dxul-la'
chiu' Lue', Dios ban.

³ Ba belún chjegu ca' xrú'uneba',

na' buchuj ca' zaj de' lataj naga dxu-
luzríaba' biadu cheeba' ca'

naga zua lu cugu chiu' Lue', Dios, napu'
dute' xel-la' waca.

Nacu' Lue' Wenná Bea chia', ne Dios
chia'.

⁴ Ba neza zrente' naca na chee' benne' ca'
zaj zre'e' xudau' chiu'.

Chadía chacanna xelúe' lá'anaqueze' Lue'.

⁵ Ba neza zrente' naca na chee' benne' ca',
Lue' dxuzúa chuchu' le',

benne' ca' dxelezá lazre' chjaque' xi'a
lá'azxa chiu', xi'a Sión.

⁶ Gate dxeledé' lache' bizre nazí le na

Lache' Nisa Dxebézredxu,

dxexaca na lataj naga dxalaj nisa,

na' gusezrá nisa xiuj ca' zaj naca beaj ca'.

⁷ Dxelácadxe' benne' wal-la dxácaté' ne
zaj xu'e' neza

lawe' da xelexé'ene' Dios lu xi'a lá'azxa
chee', xi'a Sión.

⁸ Bene, Xran, ca naca da dxenaba' Lue',
Dios, napu' dute' xel-la' waca.

Bene, Dios, nacu' Dios chee' Jacob.

⁹ Ben da xrlátaje chee' benne' wenná bea
cheentu', Dios,

benne' wenná bea na' guca'u Lue'.

¹⁰ Cháwedxa naca sua' tu zraze lu xudau'
chiu'

quézcala sua' chi gaxúa iza naga xula.

Dxaca lazredxa' sua' dxa xu'a xudau' chee'
Dios chia'

ca tu benne' nada'u,

quézcala súaqueza' tu lizra' zaca naga
quebe zua Dios.

¹¹ Xránadxu Dios naque' Benne' dxuxúe'
dxi'u,

ne Benne' Wenná Bea xabáa cheedxu.

Dxune' dxi'u da chawe' dute' xel-la' zri'i
lazre' chee',

ne dxune' dxelapa bénneache dxi'u ba
lá'ana.

Quebe xezúene' zi' gune' da chawe' chee'
benne' ca' zaj naque' du lazre'.

¹² ¡Dios, napu' dute' xel-la' waca!

¡Ba neza zrente' naca na chee' benne' ca'
dxuluxrén lazre' Lue'!

85 Benu' da xrlátaje chee' bénneache
chiu', Xrana' Dios.

Benu' belexelá zri'ine zre sua Jacob,

benne' ca' gulu'e lu na' benne' zitu' ca'.

² Bnite lau' da zrinnaj da belún bén-
neache chiu'.

Bdeu' chalá'ala ca' zaj naca dul-la chee'
benne' ca'.

³ Bzua zriu' xel-la dxezrá'a chiu',

ne bsanu' xel-la' xichaj zra'a chiu'.

⁴ Ben xezúantu' lu da ba neza chee' xel-la'
weselá chiu', Dios,

ne québedxa zra'u netu'.

⁵ ¿Tu chí'izqueze zra'u netu'?

¿Wazrá'aquezu' tu cuen tu cuen zri'ine
zre suantu'?

⁶ ¿Québedxa gunu' xexaca bantu',

chee' súantu' lu da ba neza lau Lue'?

⁷ ¡Xran, bexache lazre' netu', ne bselá
netu'!

⁸ Guzé naga' da nne' Xrana' Dios.

Nne' da guzúa na bénneache chee'

lu xel-la' dxebeza zri lazre',

chee' québedxa xelún benne' lá'azxa chee'
da xálaze.

⁹Da líqueze Le' zúatequeze' guselé' benne' ca' dxelezrebe' Le',
chee' sua da xabáa chee' lu xezr la xu
cheedxu.

¹⁰Zaj nazraga xel-la dxexache lazre', ne
da li chee' Dios.

Zaj naca tuze da xrlátaje, ne xel-la' dxe-
beza zri lazre'.

¹¹Da li chee' gusezrá na xezr la xu nigá,
na' sel-le' da xrlátaje chee' da za xabáa.

¹²Xránadxu gúnnaqueze' dxi'u da
cháwedau',
na' gúnna'e xezr la xu cheedxu.

¹³Nu benne' naque' xrlátaje waca
xezrine' lau Dios,

na' gune' gundxu ca da ba blé'ene'
gundxu.

86 Bze naga, Xran, ne bene chia',
lawe' da zua' lu da ba xa', ne
dxexáxrjeda'.

²Bxue neda' lawe' da naca' chiu'.

Bselá neda', Dios chia', naca' wen zrin
chiu',
ne dxuxrén lazra' Lue'.

³Bexache lazre' neda', Xrana' Dios,
lawe' da dxuláwizra' Lue' te zra chizrela.

⁴Ben béle'eda' neda', wen zrin chiu',

lawe' da dxuzúa cuina' lau Lue', Xran,

⁵na' Lue', Xran, nacu' xrlátaje, ne dxu-
nite lau' cheentu'.

Zúatequezu' xexache lazru' benne' ca' dx-
ululáwizre' Lue'.

⁶Xrana' Dios, bene da dxuchálajlena'
Lue',

ne bze naga ca da dxenaba' lau'.

⁷Lu zra sua' lu da stébele'e wannéqueza'
Lue',

lawe' da dxexechébequezu' Lue' chia'.

⁸Xran, quebe nu chilá' Dios ca Lue',

ne quebe nu dxun ca da dxunu' Lue'.

⁹Xelexá' bénneache duté xezr la xu da
benu' Lue',

na' xelúe lá'anaqueze' Lue', Xran,
ne xulucá'ana szrene' Lau' Lue',

¹⁰lawe' da nacu' Lue' szren, ne dxunu' da
dxexebámentu'.

Tuzu' Lue' nacu' Dios.

¹¹Bsede neda' da dxaca lazru' guna',
Xrana' Dios,

na' guna' ca naca da li chiu'.

Gunná be'e lázrdawa' chee' zreba' La
cuinu'.

¹²Duté lázrdawa' güe lá'anaqueza' Lue',
Xrana' Dios,

ne gucá'ana szrénqueza' Lau' chadía
chacanna,

¹³lawe' da zúatequezu' xexache lazru'
neda',

ne bselá'ú' bénne'du xu'a lu lataj ba xa'.

¹⁴Dios, belasa benne' dxulucá'ana szren
cuine',

ne dxeledábague' neda',

na' benne' xichaj zra'a ca' belune' tuze
dizra' xelúti'e neda',

ne quebe dxelezrebe benne' ca' Lue'.

¹⁵Lue', Xrana', nacu' Dios dxexache
lazru' netu',

ne nacu' zren lazre',

ne quebe dxezrá'azeu', san zúatequezu'
xexache lazru' netu',

ne nacu' li lazre'.

¹⁶Gunná' ca naca chia', ne bexache lazre'
neda'.

Benna chia' neda', wen zrin chiu', xel-la'
waca chiu',

na' bxue neda', zri'ine nu'ula wen zrin
chiu'.

¹⁷Ble'e neda' tu da gaca bea na gaca
chawe' chia',

ne ben xelexé'e benne' ca' dxelecuídene'
neda' da na',

ne ben xelexedué'ene',

lawe' da nacu' Lue', Xrana' Dios, Bénnea'
gúcalene' neda',

ne bexúe zrene' neda'.

87 Lane xezre Sión zria na lu xi'a
lá'azxa.

²Nazrí'idxa Xránadxu Dios lataj naga dx-
uluchi'a benne' zaj zre'e xezre Sión,
ca nazrí'ine' xúgute' xu'u lizre zri'ine zre
sua Jacob.

³ Da xrtante ca' dxelenná bénneache ca naca xezre chee Dios.

⁴ Cheajsá lazra' lu xezr la xu Egipto, ne lu xezr la xu Babilonia ga na' zaj zra' bénneache zaj núnbe'e neda'.

Le nna' xque, lu xezr la xu Filistea, ne lu xezre Tiro, ne lu xezr la xu Etiopía gulalaj benne' caní zaj naque' chia'.

⁵ Ca naca chee xezre Sión nnia': Benne' nigá, ne bénnea' gulálaje' ga na', na' neda',

Dios zrente, guzúa chúchua' xezre na'.

⁶ Gate gulaba Xránadxu Dios benne' ca' zaj naque' chee',

nne': "Benne' nigá gúlaje' lu xezre na'."

⁷ Benne' ca' dxelul-le', ne benne' ca' dxe-line' xide xelenné':

Ca naca da ba neza zúantu' lu xezre na'.

88 Xran, nacu' Dios dxuseláu' neda'.

Te zra, ne chizrela dxuláwizra' Lue'.

² Bene da dxuchálajlena' Lue', ne bze naga da dxuláwizra' Lue'.

³ Dxedú lazra' lu da calęla ca' da dxaca na chia',

ne ba zua' gatia'.

⁴ Dxeleque bénneache neda' ca tu benne' gate,

lawe' da dxátele'e ni'a na'a.

⁵ Nagá'ana' cá'aze ládujla benne' gate.

Naca' ca benne' gulátie' lu wedil-la, ne zaj de' xedxu ba ca',

benne' ca' québedxa dxajsá lazru', Dios, ne québedxa zaj xu'e lu na'u Lue'.

⁶ Dxaca chia' cáteze ba nuzú' neda' tu xedxu zren

naga naca chul-la, ne nácale'e situj.

⁷ Dxéqueda' dxezrá'le'u neda'.

Da dxaca chia' naca na ca dxazia' zran xeajxruza zri'a

chee nísadau'.

⁸ Benu' belexebiga bi ljwezra' ca' naga zua'.

Benu' neda' ca tu da dxusegute na benne' ca'.

Naca' ca tu benne' xu'e lizre xia ne quebe gaca xedxúaje'.

⁹ Dxelechul-la xiaj lawa' ne chee da dxezí dzezaca'.

Xúgute zra dxuláwizra' Lue', Xrana' Dios. Dxechisa na'a lau Lue'.

¹⁰ ¿Dxúnquezu' xel-la' waca chee xabáa dxácalenu'?

benne' gate ca'?

¿Dxelexasa benne' gate ca' dxelúe lá'ane' Lue'?

¹¹ ¿Dxuluchalaj benne' zaj nagache' lu xedxu ba chee

xel-la zri'i lazre' chiu',

na' dxuluchalaj chee da li lazre' chiu' benne' zaj xu'e

lataj chul-la chee benne' gate ca'?

¹² ¿Welexúnbea benne' zaj xu'e lataj chul-la na' ca

naca da zrente da dxunu',

na' welexúnbea benne' zaj xu'e naga quebe nu dxajsá lazre' le'

ca nacu' xrlátaje'?

¹³ Neda' dxuláwizra' Lue', Xrana' Dios.

Xúgute zila dxezrín lau' da dxenaba' Lue'.

¹⁴ ¿Bizr chee na' dxebéaj xíchaju' neda', Xran?

¿Bizr chee na' quebe dxenná'u neda' chee gácalenu' neda'?

¹⁵ Dxezí dzezaca', ne ba zua' gatia'.

Nácatea' bi cúde'te dxedéa' xel-la' zi' da dxudeu' neda',

na' dxedú lazra'.

¹⁶ Dxéqueda' dxezrá'le'u neda'.

Da dxuchebu' neda' ba bsdú na lazra'.

¹⁷ Zaj naxechaj da caní neda' du zra.

Dxulusaca zi na neda' gáteteze na'.

¹⁸ Benu' belexebiga bi ljwezra' ca' naga zua',

na' tuze da naca chul-la dxedále na neda'.

89 Tu gúl-lazqueza' chee xel-la' zri'i lazre' chiu', Xran.

Guzenda' tu cuen tu cuen zri'ine zre súantu' nacu' li lazre'.

²Nezda' tu súazqueze xel-la zri'i lazre' chiu',
ne chadía chacanna zua xel-la li lazre' chiu',
cáteze zúaqueze xabáa.

³Lue' gunnáu': "Bena' xel-la wezría nen bēnea' ba gucá'a.

Guchebe lazra' chee David, wen zrin chia',

⁴gunniá': Guna' tu cháazqueze zri'ine zre su'.

Guna' xelenná be'e tu chí'izqueze lu waláz chiu'."

⁵Benne' zaj zra' xabáa dxelúe lá'ane' Lue',
ne chee da zrentę ca' da dxunu', Xran,
ne ne chee xel-la' li lazre' chiu', naga zaj nazrague'.

⁶Quebe nu zua xabáa, benne' naque' ca Lue', Xran.

Quebe nu zua benne' szrentę, benne' naque' ca Lue'.

⁷Benne' zaj zra' xabáa dxelape' Dios ba lá'ana,
na' xúgute benne' ca' zaj nazraga chee' dxelezrebe' Le'.

⁸Xran, nacu' Dios chee benne' zante,
benne' zaj zra' xabáa.

Quebe nu zua, benne' naque' ca Lue', Xran.

Nacu' Benne' wál-late, ne tu nácazquezu' li lazre'.

⁹Xu'u lu na'u xeajxruza zren chee nísadau'.

Gate dxelasa xeajxruza ca' Lue' dxebeque zriu' na.

¹⁰Bchúchuju' benne' Egipto ca', na' belexegá'ane'

ca tu da gate.

Bese dínnaju' benne' ca' dxeledábague' lue' nen na'u wál-late.

¹¹Chiu' Lue' naca xabáa, ne chiu' Lué'queze naca xęzr la xu.

Benu' xęzr la xu nigá, ne da ca' zaj nnita lawe na.

¹²Benu' da de chalá'a naga za' be' zaga,

ne da de chalá'a naga dxedé gubizra beu' zaga ca'.

Xel-la dxelebé dxelul-la chiu' xi'a Tabor, ne xi'a Hermón.

¹³Benne' wál-late nacu' Lue'.

Da zrentę naca xel-la waca chiu', ne nagá'ana szren na.

¹⁴Lu da xrlátaje, ne lu da li lazre' dxenná be'u.

Lu xel-la zri'i lazre', ne lu da li lazre' zaj zua ca da dxunu'.

¹⁵Ba neza zrentę naca na chee benne' ca' dxelul-le'

da dxue lá'ana na Lue',
ne zaj zue' lu xel-la naxani' chiu', Xran.

¹⁶Ne chiu' Lue' dxelebéle'ene' du zra,
ne dxulucá'ana szrene' Lue' ca naca da xrlátaje chiu'.

¹⁷Lué'queze nacu' xel-la wal-la chee benne' ca',

ne xel-la xrtan chee'.

Dxúnnadxu' netu' xel-la' waca lawe' da ca' dxéquenu' xrlátaje.

¹⁸Xránadxu Dios dxucu'uje' dxi'u,
na' Dios lá'azxa chee benne' Israel ca' naque'

Wenná Bea cheedxu.

¹⁹Nédxudaute bchálaju' lu da blé'enu' benne'

wen zrin chiu' ca', benne' zaj naque' li lazre', gunnáu':

Ba gucá'a tu benne' wal-la ládujla bēneache chia',

ne ba bzua' le' gaque' wenná bea, ne dxá-calena' le'.

²⁰Ba gucá'a David, wen zrin chia'.

Bzúaqueza' le' gaque' wenná bea.

²¹Neda' tu gácalezqueza' le'.

Xel-la waca chia' gutípaqueza' lazre'.

²²Benne' ca' guledábague' Le' quebe xelezéquene'

bi xelune' chee',

na' benne' ca' dxelune' da calęla quebe xelezéquene'

xuluchúchuję le'.

23 Guchúchujqueza' benne'
dxeledábage' Lē', ne gucuasa'
benne' ca' lau lē'.

Guna' wē' benne' ca' dxelecuídenē' lē'.

24 Tu zrí'izqueza' lē', ne gaca' li lazre' nen
lē',

na' nē chia' neda' gápadxe' xel-la' wal-la.

25 Guna' nna be'e dutē dxu'a nísadau'
zren,

ne dutē dxu'a xegu Eufates.

26 Lē' xē'e neda': "Lue' nacu' Xra'.

Nacu' Dios chia', dxucu'uju' neda', ne
dxuseláu' neda'."

27 Neda' guzúa' lē' ca zri'ina' blau,

na' nna bé'ene' xúgute' benne' wenná bea
zaj zre'e

lu xezr la xu.

28 Tu chí'izqueze nuzúa' chee' xel-la' zri'i
lazre' chia',

na' ca naca xel-la' wezría chia' gaca
líqueze na nen lē'.

29 Guna' tu cházqueze zri'ine zre sue',

na' xelenná be'e lu waláz chee' dxácatē
ne zua xabáa.

30 Che xulusán zri'ine zre sua David da
nadxixruj be'a,

ne che quebe xelunē' ca da nuchi'a chee',

31 ne che xelecuae' lu da dxenná be'a,

ne che quebe xelunē' ca da dxapa' lē',

32 na' gu'a lē' zrise lawe' da
dxeledábage' neda',

ne quina' lē' xide lawe' da dxelunē' da
calēla.

33 Quebe gusana' ca nazrí'ida' David,

ne quebe gusana' gaca' li lazre' nen lē',

34 ne quebe gal-la lazra' xel-la' wezría da
nuna',

ne quebe guchá'a ca da ba gunnía'.

35 Tu lásaze bzetaj cuina' guchebe lazra',
na' cabata' gun lazra' chee' David,

36 gunnía': Tu cházqueze zri'ine zre sue',
na' xelenná be'e lu waláz chee' lawa'
neda'

dxácatē ne zua gubizra.

37 Xel-la' dxenná bea chee' tu sua
chúchuzqueze na

ca zua beu' zran xabáa.

Tu sua chúchuzqueze na dxácatē ne zua
xabáa.

38 Lue', Dios, guleaj xíchaju', ne bzu'
chalá'ala bēneea' guca'u,

ne dxezrá'le'u lē'.

39 Nuzú' chalá'ala xel-la' wezría bēnlenu'
David,

wēn zrin chiu',

ne nucá'ana dítajú' xel-la' dxenná bea
chee'.

40 Nuxrínajú' ze'e da naxechaj na xezre
zréntau' chee',

ne nuzría xi'u ca naca lataj wal-la chee'
chee' wedil-la.

41 Xúgute' bēneache, benne' dxeledaze
ga na' dxelebane'

chee' da zaj dē chee',

na' benne' xezre walíZR chee' dxelún lē'
chee'.

42 Ba bēnu' bedxúaj chawe' benne'
guledábage' Lē',

na' dxelebélé'ēne'.

43 Bēn dítajú' da ca' dxuchínene' lu wedil-
la,

ne quebe gúcalēnu' lē' lu wedil-la na'.

44 Ba gudú' ca naca da xrtantē chee',

ne nucá'ana dítajú' xel-la' dxenná bea
chee'.

45 Bēnu' naque' ca tu benne' gula gate ne
zue' iza cuide' chee',

ne bsi'u lē' xel-la' stu'.

46 Xrana' Dios, ¿bátaqueze quebe xennu'
cheentu'?

¿Tu chí'izqueze dxezrá'aquezu' netu'?

47 Bsa lazre' látega sua' lu xezr la xu.

Látega nunu' xel-la' nabán chee' xúgute'
bēneache.

48 Quebe zua nu benne' gaca bane' tu
chí'izqueze.

Xúgute' xelatīē'.

Quebe zua nu benne' lē' lu na' xel-la'
gute.

49 Xran, ¿ba bsanu' David, ne québedxa
nazrí'inu' lē',

ca bzetaj cuinu' guchębe lazru'
zríiquezenu' le'?

⁵⁰ Gunná' xque, Xran, ca dxelún le' chia'
neda',

wen zrin chiu',

ne ca dxuchaga lawa' da dxelún lala
benne' xúgute xęzr la xu
chia' neda'.

⁵¹ Benne' ca' dxeledábague' lue' dxu-
lucá'ana dítaje'

bénnea' guca'u Lue', Xran.

Dxulucá'ana dítaje' le' gáteteze zéaje'.

⁵² Ba neza zrentę gaca Xránadxu Dios
chadía chacanna.

Ca' naca na, ne ca' gaca na.

90 Xránantu' Dios, ba cua ba cua,
Lue' nacu' ca tu xu'u naga zra
cháwentu'.

² Nédxudaute ca za gunu' xi'a zri'a ca',
ne ca za sua xęzr la xu, ne bénneache,
na' nédxudaute, ne lu da za za' ná-
caquezu' Lue' Dios.

³ Dxu'u bénneache xelexaque' da
gulaque',
dxelexaque' xu xrte.

⁴ Chiu' Lue' chi gaxúa iza zaj naca na ca
neaje, da ba gudé na,
ne ca tu chí'idau'ze chizrela.

⁵ Dxegú' bénneache ca dxun guba'u,
da dxua na xúgute xizre laga ca'.
Zaj naque' ca tu bchigala da dxexenite na
gate dxexebandxu.

⁶ Zaj naque' ca tu xixre' da dxegula na
che zílala.

Dxegula na, ne dxelá'tę na xiaj,
na' xelate' zua gubizra dxelechugę' na,
na' dxebizre na.

⁷ Dxebía xi'ntu' lawe' da dxezra'u netu'.
Stębele'ę zúantu' lawe' da dxezrá'le'u
netu'.

⁸ Dxenna'u ca da calela da nuntu'.
Dxulé'enu' lówela zria da nabágantu'.

⁹ Dxuzá'chiu' iza cheęntu' lawe' da dx-
ezra'u netu'.

Dxelexedú iza cheęntu' ca tu be' da
dxecá'antu'.

¹⁰ Ca zaj naca zra naca bantu', zaj naca
na ga xun chi iza,

na' che nácantu' benne' wal-la, waca
bantu' du tápalalaj iza,

san ca zaj naca iza ca', dxedentu' xel-la'
zi',

ne dxéquentu' zęde.

Chadí dxeledé iza ca', na' xenítentu'.

¹¹ ¿Nuzra núnbea xanne' ca naca xel-la'
dxezrá'a chiu'?

¿Nuzra núnbea ca naca xel-la' xichaj
zra'a chiu'?

¹² Ble'e netu' ca láteze zaj naca zra
cheęntu'

cheę gácantu' benne' dxelėjni'ine'.

¹³ Xran, bexaca netu' tuze.

¿Bátadxu chenu'?

Bexache lazre' netu', wen zrin chiu'.

¹⁴ Tu tu zila bzua xichaj lázrdauntu' xel-
la' zri'i lazre' chiu',

na' dutę xel-la' dxebé tu gul-lazquezentu'
chiu'

xúgute zra naca bantu'.

¹⁵ Benna netu' zane' iza cheę bentu' ca zaj
naca iza

bsaca zi'u netu',

ne ca zaj naca iza guzúantu' lu da stębe.

¹⁶ Bę lataj netu', wen zrin chiu', le'entu'
da zrentę da dxunu',

ne xeledé'e zri'ine zre suantu' da xabáa
chiu'.

¹⁷ Xránantu' Dios, ben gaca cheęntu' da
chawe' chiu'.

Ben chepe ban ca naca zrin dxuntu'.

Awe', Xran, ben chepe ban ca naca zrin
dxuntu'.

91 Bénnea' dxuxrén lazre' Xránadxu
Dios cheę guxúe' le',

ne dxuzúe' Dios, Bénnea' nape' dutę xel-
la' waca,

cheę gácalęne' le',

² waca xę'ę Dios: Nacu' Bénnea' dxebeza
lazra',

ne Bénnea' dxucache chawe' neda'.

Nacu' Dios chia', na' dxuxrén lazra' Lue'.

³ Dios gucache chawē' lue' lu xúgute da stēbe da quebe zaj nalá',
ne lu xúgute xízrawe' da dxelute na bēneache.

⁴ Gucache chawē' lue' ca dxun tu bedxuj dxézreba' biadu cheēba' zran xríłaba', na' chu'u chawu' lu na' Le'.
Xel-la' li lazre' cheē' gácale na lue', ne gucache chawe na lue'.

⁵ Quebe bi guchebe lue' chizrela, ne quebe bi da stēbe te zra,

⁶ ne quebe bi xízrawe' cheē da chul-la, ne quebe bi da caleła ca' da dxelute na bēneache te zra.

⁷ Welate chi gaxúa bēneache cuitu' lue', ne gaxúa gaxúa bēneache gáguze naga zu',

san quebe bi sacu' lue'.

⁸ Wanna'u, na' walé'enu'

ca ba xa' xeledé benne' ca' dxelune' da caleła.

⁹ Nuzú' Xránadxu Dios ca Benne' dxebeza lazru', ne Dios,

Bēnea' nape' dute xel-la' waca, cheē gucache chawē' lue'.

¹⁰ Cheē le na' quebe bi da caleła gaca na chiu',

ne quebe bi xízrawe' chu'u na lizru'.

¹¹ Dios gusebage' gubáz cheē xabáa cheē' ca' cheē xelácalene' lue',

na' xuluxúe' lue' gáteteze chéaju'.

¹² Xeluxre' lue' lu ne'e cheē quebe ga'a xiaj ni'u.

¹³ Guléajquezu' bezre xixre' ca', ne belá' ca',

bezre xixre' schanní' ca', ne bē snia ca'.

¹⁴ Dxenná Dios: "Guselá' xúgute benne' ca' zaj

nazrí'ine' neda',

ne gucache chawa' benne' ca' dxelexechebe' naca' Xranē'.

¹⁵ Gate xelenné' neda', na' xechēba' cheē'.

Gate zaj xu'e lu da stēbe, súalequeza' le'.
Guselá' le', ne guna' le' ba lá'ana.

¹⁶ Guna' xelaca banē' zánete iza, ne guselá' le'."

92 Chawē' naca dxue lá'anantu' Lue',
Xrana' Dios,
ne gúl-lantu' da dxucá'ana szren na Lue',
Dios szrente.

² Chawē' naca dxuzéentu' bēneache tu zra tu zra

ca dxexache lazru' netu',

na' dxela dxulé'entu' nacu' li lazre'.

³ Dxúl-lantu' da caní, dxínnentu' da dxúl-lalēntu'

da zē chi du cheē na,

ne dxínnentu' da con zríadi'i na du da dxennéle'e xrtandau'.

⁴ Xrana' Dios, ne cheē da dxunu' Lue', dxunu' dxebéle'eda'.

Ca zaj naca da nun na'u zua' lu da ba neza.

⁵ Da zrente zaj naca da nunu', Xrana' Dios.

Da zrénele'e zaj naca da dxugú'u lazru' gunu'.

⁶ Québequeze neze benne' lázxdau zide', ne quebe dxéajni'i benne' xala ca naca da nigá.

⁷ Gate dxelegula benne' dxelebéaj xíchajje' Dios

ca dxegula xixre',

ne dxepe ban da dxelún benne' wen da zrinna,

naca na cheē xelebía xi'e tu chí'izqueze.

⁸ Lue', Xrana' Dios, tu nácazquezu' Dios szrente.

⁹ Dxunna bea na ca gaca cheē benne' dxedábage' Lue',

Xrana' Dios.

Dxunna bea na xelebía xi' benne' ca' dxeledábage' Lue'.

Xelase dinnaj xúgute benne' ca' dxelune' da zrinna.

¹⁰ Lue' dxunu' dxezrendxa xel-la' wal-la chia' ca naca

xel-la' wal-la cheē bezre.

Dxugú'u da za xíchaja' da dxutipa na lazra'.

¹¹ Dxal-la' le'eda' xelezrá' zran ni'a benne' dxeledábage' neda',

na' xenda' xelebezre xache' benne' ca'
guledíl-lalene' neda',
benne' ca' dxelune' da calela.

¹²Welexán benne' xrlátaje ca' ca dxun
xaga zina'.

Xelegule' ca dxun xaga cedro lu xi'a
Líbano.

¹³Zaj naque' ca tu xaga ze na lu xudau'
chee Xránadxu Dios,
da dxeğúlale'e na lu chale'aj chee xu'u
lizre Dios cheedxu.

¹⁴Zaj naque' ca xaga ca' dxelebía da
zixre chee na gate
ba zaj nagula na, ne zaj naca na xaga xa'a
wal-la.

¹⁵Benne' caní xuluzenne' bénneache
naca li lazre'

Xrana' Dios, Bénnea' dxuzé chúchue'
neda',
ne quebe bi zúale Le' da quebe naca
xrlátaje.

93 Xránadxu Dios naque' Wenná
Bea,
ne nacue' zra lane' da zácalle'e.

Nácue' zra lane', ne da nagú'u le'e naca
na xel-la' waca zren.

Nuzúa chúchue' xezr la xu nigá, na'
quebe nu seque' gutá na.

²Lataj naga dxe'u dxenná be'u, Xran,
zua chuchu na nédxudaute,
na' Lue' zúaquezu' chadía chacanna.

³Dxelebezre xa'a xegu ca', Xran.

Dxelebezre xa'a na, ne dxelenné na
zizraj.

⁴Xránadxu, Bénnea' zue' xabáa nápadxe'
xel-la' waca

ca da zaj napa xegu ca' dxelebezre xa'a
na,

ne ca da zaj napa xeajxruza chee
nísadau'.

⁵Chúchule'e zaj naca da nadxixru be'u,
Xran.

Lá'azxa nácaqueze xudau' chiu' chadía
chacánnaqueze.

94 Xrana' Dios, dxebéaj lazru'
bénneache.

Lue', Bénnea' dxebéaj lazre' bénneache,
ble'e cuinu'.

²Dxuchi'u Lue' chee da dxelún xúgute
bénneache.

Guxasa, bexizruj da dxal-la' xelezí'
benne'

dxulucá'ana szren cuine'.

³Xrana' Dios, ¿Bátadxaqueze xelún
benne' wen da calela caní?

¿Bátadxaqueze xelebé' benne' ca' dxele-
béaj xíchaje' Dios?

⁴¿Bátadxaqueze xulucá'ana szren cuine',
ne xelenné' dizra' zi'?

¿Bátadxaqueze xulucá'ana szren cuina
benne' ca'

dxelebéaj xíchaje' Dios?

⁵Benne' caní dxuluxrínajje' bénneache
chiu' Lue', Xran,

ne dxulusaca zi'e bénneache guca'u Lue'.

⁶Dxelúti'e nu'ula tuze ca', ne benne' zitu'
ca',

ne dxelune' xelátebe' bidau' wezebe ca'.

⁷Dxelenné: "Quebe bi dxelé'e Dios,
Xrana benne' ca'.

Dios chee benne' Israel ca' quebe dxue
lazre' chee da na'."

⁸Le chéajni'i, le'e, benne' lázxdau zide'.

Le'e, benne' xala, ¿bátadxaqueze quebe
chéajni'ile?

⁹Dios bene' nágadxu.

¿Québequeze dxénne' da dxennale?

Dios bene' xiaj laudxu.

¿Québequeze dxelé'ene' da dxunle?

¹⁰Diósqueze dxuzúe' lu da ba xa' benne'
xezr la xu ca'.

¿Québequeze til-le' le'e?

Diósqueze dxune' dxeléajni'i bénneache.

¿Québequeze gueque be'ene' da xu'u xi-
chaj lázrdaule?

¹¹Xránadxu Dios nézquezne' da xu'u xi-
chaj lázxdau

xúgute bénneache.

Nézene' zaj naca na da dácheze.

¹²Ba neza zrenté naca na chee bénnea'
dxuzéajni'inu', Xran,

ne dxusédenú' le' ca naca da nadxixruj
be'u,

¹³ chee cueza zri lazre' gate za zra dxaca
da calela,
ca zrin zra xelexú'u xedxu ba benne' dx-
elune' da zrinnaj.

¹⁴ Québequeze cueaj xichaj Xránadxu
Dios bèneache chee',
ne quebe gusán lazre' benne' ca' ba
gucá'a Le'.

¹⁵ Naca xrlátaje ca xuluchi'e chee
bèneache,
na' xelúnqueze da xrlátaje xúgute benne'
zaj naque' li lazre'.

¹⁶ ¿Núzraqueze gácale neda' tíl-laledxu
benne'
wen da calela ca'?

¿Núzraqueze súale neda' tíl-laledxu
benne'
dxelune' da zrinnaj?

¹⁷ Chela ca gúcale Xránadxu neda',
báchelja xu'a xedxu ba.

¹⁸ Gate gunnía': Xran, ba zua
cheajházia',
na' Lue', duté xel-la' zri'i lazre' chiu' gú-
calenu' neda'.

¹⁹ Gate dxe'a gunne xue, ne zua' lu da
stebe,
Lué'queze dxexúe zrenu' neda', na'
dxebéle'eda'.

²⁰ Québequeze nacu' tuze benne' ca' dx-
uluchi'e chee
bèneache da quebe naca xrlátaje,
benne' ca' dxulucá'ane' ca xrlátaje da
quebe naca na xrlátaje.

²¹ Benne' caní dxelune' tuze dizra' da
xelune' chee
benne' xrlátaje,
na' dxelechugue' chee gate bènea'
quebe bi zria nabaque'.

²² Xránadxu Dios naque' ca tu xu'u naga
zua chawa'.
Dios chia' naque' ca tu xiaj xre da dxuzé
chacha na neda'.

²³ Le' xexízruje' benne' ca' dxelune' da
calela cáteze naca

da zrinnaj da belune'.

Guzría xi'e benne' ca' lu da calela da
dxelune'.

Xránadxu Dios guzría xi'e benne' ca' dx-
elune' da calela.

95 Le da, güe lá'anadxu Xránadxu
Dios duté xel-la' dxebé.

Duté xel-la' dxebé gúl-ladxu chee Bén-
nea' nuzúa chúchue'
dxi'u naga ladxu.

² Cheajdxu lau Le', ne xedxu Le':
Xcalenu'.

Duté xel-la' dxebé gúl-ladxu da güe
lá'anadxu Le'.

³ Naca Xránadxu tu Dios szrente,
ne naque' Wenná Bea szrente lawe' dios
ca' chee bèneache.

⁴ Dxenná bé'ene' du gab'i xezr la xu,
naga naca situj, ne naga naca sibe chee
xi'a ca'.

⁵ Dxenná bé'ene' nísadau' da núnqueze
Le',
ne cá'anqueze xezr la xu da bene'.

⁶ Le da, gucá'ana szrendxu Le', gátadxu
sudxú'ala.

Guzú zríbedxu lau Xránadxu, Bènea'
nuné' dxi'u.

⁷ Le' naque' Dios cheedxu.
Nácadxu benne' ca' dxuxúequeze', ne ná-
cadxu ca zríla' du ca'
cheé'queze'.

⁸ Che dxenle chi'e na'a zra, quebe gun
zide' lázrdaule
ca belún xra xrtáule ca' naga nazí le na
Meriba,

ne ca belune' lu zra na' le'e xixre' lawe'
lataj naga
nazí le na Masah,

⁹ naga buluchá'a xra xrtáule neda', ne
belune' neda' da stebe
lácala belelé'eng' xúgute da bena'.

¹⁰ Lawe' chua iza beditaj lazra' chee
benne' ca',
na' gunnía': Zaj naque' benne' dxelebéaj
xíchaje' neda',

ne quebe dxelune' ca da dxulé'eda' le'.

¹¹ Chee le na', dutę xel-la' dxezrá'a chia' bzetaj cuina' gunnía':

Quebe xelexú'queze' naga xelexezi' lazre' nen neda'.

96 Le gul-la chee Xránadxu tu da cube.

Le gul-la chee Xránadxu, le'e zrale du gabí'i xezr la xu.

² Le gul-la chee Xránadxu, ne le güe lá'ana La lá'azxa chie'.

Tu zra tu zra le guzén ca naca xel-la' wselá da dxunne'.

³ Le guzén benne' xezr la xu ca' ca naca xel-la' szren chee',

Ne benne' xúgute xezre ca zaj naca xel-la' waca zren nune'.

⁴ Szrentę naca Xránadxu, ne naca chee' güe lá'anale'edxu Le'.

Naca chee' gápadxę' xel-la' ba lá'ana ca dios ca'

chee' bėnneache,

⁵ lawe' da zaj naca xúgute dios ca' bedáu' xiaj xaga ca'.

Xránadxu Dios bene' xabáa na'.

⁶ Zúale Le' da xabáa, ne xel-la' szren.

Nazratę xudau' chee' xel-la' waca, ne da xrtante'.

⁷ Le güe lá'ana Xránadxu, le'e zrale du gabí'i xezr la xu.

Le güe lá'ana xel-la' szren chee', ne xel-la' waca chee'.

⁸ Le gapa ba lá'ana Xránadxu ca da naca chee' si'e.

Le gua da gunézrujle, ne le da chale'aj chee' xudau' chee'.

⁹ Le gucá'ana szren Xránadxu lu xel-la' xrtante chee'

da naca lá'azxa chee'.

Le zrebe lau Le', le'e zrale du gabí'i xezr la xu.

¹⁰ Le xę bėnneache xezr la xu: Naca Xránadxu Wenná Bea.

Nuzúa chúchuę' xezr la xu nigá, na' quebe nu seque' gutá na.

Guchi'e chee' bėnneache ca naca da xrlátaje.

¹¹ Le be, le'e, xabáa, ne xezr la xu.

Le cuezre xa'a, le'e, nísadau', ne bea ca' zrale na'.

¹² Le be, le'e, le'e xixre', ne bea ca' zrale na'.

Xaga ca' zaj dxe' xi'a ca' welunna schaga lu xel-la' dxebé

¹³ Iau Xránadxu gate xide'.

Xide' guchi'e chee' bėnneache zaj zre'e xezr la xu.

Nna bėene' bėnneache du gabí'i xezr la xu.

Nna be'e Le' ca naca da xrlátaje, ne ca naca da li.

97 Naca Xránadxu Benne' Wenná Bea.

Le be, le'e zrale xezr la xu.

Le be, le'e zrale dxu'a nísadu ca'.

² Zaj naxechaj beuj, ne da chul-la Le'.

Ca naca da li, ne da xrlátaje dxenná be'e.

³ Cuía lau xi' lau Le',

ne guzezxe na benne' guledábage' Le'.

⁴ Ca naca xesa ca' chee' bulusení na xezr la xu.

Dxel'é xezr la xu na, ne dxezrize na.

⁵ Dxelexuna xi'a ca' ca da zixre chee' bėzudau' lau Xránadxu,

lau Xrana bėnneache zaj zre'e du gabí'i xezr la xu.

⁶ Dxul'é xabáa ca naca da xrlátaje chee', na' dxelelé'e bėnneache dutę xezr la xu

ca naca

xel-la' szren chee'.

⁷ Dxal-la' xelexedué'e xúgute benne' ca' dxulucá'ana szrene'

bedáu' xiaj xaga ca',

benne' ca' dxulucá'ana szren cuine' ca zaj naca bedáu' xiaj xaga ca'.

Xúgute dios chee' bėnneache ca' dxal-la' xuluzú zribe na

lau Xránadxu Dios.

⁸ Belén benne' zaj zre'e Sión, na' gulebene'.

Gulebé benne' zaj zre'e Judá, ne chee' da guchi'u Lue', Xran.

⁹Szrentę nacu' Lue', Xran, lawe' dute
xezr la xu.

Szrendxa nacu' Lue' ca xúgute dios chee
bénneache.

¹⁰Le'e, núlale nazrí'ile Xránadxu, le
cuide da calela.

Le' dxuxúe' bénne'du zaj xu'e bénneache
chee'.

Dxuselé' le' lu na' benne' dxelebéaj xícha-
je' Dios.

¹¹Zuale da dxusení na benne' xrlátaje
ca',
na' xel-la' dxebé zúale na benne' li lazre'
ca'.

¹²Le be, le'e, benne' xrlátaje, lau
Xránadxu.

Le gusá lázrele ca da nun Dios lá'azxa, ne
le güe lá'ana Le'.

98 Le gul-la chee Xránadxu tu da
cube lawe' da nune' da ca'
da dxebánedxu.

Ne chee xel-la' wal-la chee', ne xel-la'
waca lá'azxa chee'
ba bđinne'.

²Ba nuzén Xránadxu ca dxune' dxuselé'
bénneache.

Ba bzenne' bénneache xezr la xu ca' ca
naca da xrlátaje chee'.

³Ba nune' ca da guchebe lazre' chee
benne' Israel ca'

ca naca xel-la' li lazre' chee', ne xel-la'
nazrí'i zren chee'.

Bénneache du gabí'i xezr la xu ba
belelé'ene' ca naca da ben

Dios cheedxu.

⁴Le gul-la lu xel-la' dxebé lau Xránadxu,
le'e zrale du gabí'i
xezr la xu.

Le güe lá'ana Le' nen da gúl-lale, ne lu
xel-la' dxebé chee

le cuezre xa'a.

⁵Le gul-la da güe lá'anale Xránadxu.

Le gul-la nen da con zríadi'i na du ca' da
quínnele.

⁶Le gucuezre luzu da ca' dxulucuezre',
ne da dxutíl-lale ca',

ne le cuezre xa'a lu xel-la' dxebé lau
Xránadxu,

Wenná Bea cheedxu.

⁷Le gun schaga nísadau', ne bea ca' zrale
na'.

Le gul-la, le'e, xezr la xu, ne le'e zrale na'.

⁸Le capa na'le, le'e xegu ca'.

Le gul-la lu xel-la' dxebé, le'e, xi'a ca', lau
Xránadxu

⁹lawe' da xide' xedajnná bé'ene' xezr la
xu nigá.

Nna bé'ene' benne' zaj zre'e du gabí'i xezr
la xu lu da xrlátaje,
ne bénneache dute xezr la xu lu da naca
li lazre'.

99 Naca Xránadxu Dios Benne'
Wenná Bea,
na' dxelezrize xúgute bénneache lau Le'.
Dxe'e lataj blau chee' da zua na lówela
querubín ca',
na' dxezrí' lu xezr la xu.

²Szrentę naca Xránadxu lu xi'a Sión.
Naque' szren lawe' xúgute cue' xezr la xu
ca'.

³Le güe lá'ana La Xránadxu da naca na
szren,
ne da dxal-la' zrébedxu.

¡Lá'azxa naca Le'!

⁴Lue', Wenná Bea szrentę, nazrí'inu' da
naca xrlátaje.

Nuzúa chachu' da naca li lazre'.

Ba nunu' da naca xrlátaje, ne da naca li
lazre'

ládujla zri'ine zre sua Jacob.

⁵Le gucá'ana szren Xránadxu Dios.

Le guzú zríbele lau Le' naga dxe'e.

¡Lá'azxa naca Le'!

⁶Moisés, ne Aarón gulaque' bxruze chee'
ca'.

Samuel guque' tu benne' bchálajlene' Le'.
Gulenné' Xránadxu Dios, na' Le'
bechebe'.

⁷Tu lu beuj bza bchálajlene' benne' ca'.

Buluzúe' dizra' da gunná bé'ene',

ne da ca' bdxixruj be'ene' le'.

⁸Xránantu' Dios, bechebu' lau benne' ca'.

Blé'enu' lē' nacu' Dios, dxunite lau' chee
bēneache,
lácala dxudéu' lē' xel-la' zi' ne chee dul-la
da zaj nabague'.

⁹Le gucá'ana szren Xránadxu Dios.

Le guzú zríbele lau Lē' lu xi'a lázxa
chee',

lawe' da lázxa naca Xránadxu Dios.

100 ¡Le gul-la lau Xránadxu Dios,
le'e zrale du gabí'i xēzr la xu!

²¡Le gucá'ana szren Lē' dutē xel-la'
dxebé!

¡Le da lau Lē', dxúl-lale dutē xel-la'
dxebé!

³Cabata' gal-la lázrele naca Xránadxu
Diósqueze.

Lē' bene' dxi'u, na' nácadxu chee Lē'.

Nácadxu xēzre chee', ne zríla'du chee'.

⁴Le chu'u lataj naga zua xudau' chee',
xēle Lē': Xcalenu',

ne chale'aj chee na, güe lánale Lē'.

Le xē Lē': Xcalenu', ne le güe lánana Lē'.

⁵Chawe' naca Xránadxu, na' chadía cha-
canna zua

xel-la' zrí'i lazre' chee'.

Xel-la' li lazre' chee' tu súazqueze na
chadía chacanna.

101 Tu gúl-lazqueza' ca naca xel-
la' zrí'i lazre',

ne xel-la' li lazre' chiu'.

Tu gúl-lazqueza' chiu' Lue', Xrana' Dios.

²Dxaca lazra' guna' da naca li lazre'.

¿Bátala xidu' gácalenu' neda'?

Guna' da naca du lazre', ne cá'anqueze
guna' caní

lu xu'u lizra'.

³Québequeze cu'u lazra' guna' tu da
zrinnaj.

Dxecuídada' da dxelún benne' ca' dxele-
béaj xíchajē' Dios.

Québequeze gu'a lataj xelegue' naga
zua' neda'.

⁴Gucuasa' lu xichaj lázrdawa' da calēla,
ne quebe cu'u lazra' chee da calela.

⁵Guzúa' chalá'ala benne' dxelenné'
bagácheze

chee benne' xula.

Quebe gu'a lataj súalē neda' tu benne' dx-
ucá'ana szren cuine',

u naque' benne' wenná be'e.

⁶Le'eda' chawe' benne' ca' zaj naque' li
lazre' lau Dios,

chee xelezrē'e lawa' neda'.

Tuze benne' ca' zaj naque' du lazre'
xelunē' zrin chia'.

⁷Quebe gu'a lataj benne' wecache lan
chu'e lizra'.

Quebe gu'a lataj tu benne' wen lazre'
xegá'ane' naga zua'.

⁸Tu zra tu zra guzría xi'a benne' ca' dx-
elunē' da calela,

benne' ca' zaj zre'e lu xēzr la xu chia'.

Gucuasa' xúgute benne' ca' dxelunē' da
zrinnaj lu xēzre chee

Xránadxu Dios.

102 Xrana' Dios, bene da dxenaba'
lau',

ne bze naga da dxuláwizra' Lue'.

²Quebe gucache lau' lawa' neda', lawe'
da lu da stebe zua'.

Bze naga neda', ne bechébeche chia' gate
dxuláwizra' Lue'.

³Naca xel-la' nabán chia' ca zren chee xi'
da dxexenítete'.

Xu'u da la lu zrita chia' ca tu xi' da
dxálale'e na.

⁴Dxedú lazra', ne naca lázrdawa' ca tu
xixre' da dxecuade,

na' québedxa dxenná na gudagu xeta.

⁵Lawe' da dxebezre wé'le'a ba
nazrítale'a.

⁶Naca' ca tu situgún dxedaba' tu lu xēzr
la xu bizre,

ne ca tu bzriu zríaba' lawe' tu xu'u ze la'a.

⁷Dxíchaja' bchigala, ne naca' ca tu bx-
inne zríaba' túzeba'

xrgu'u sibe.

⁸Tu zra tu zra tu dxuluchácalezqueze
benne'

dxeledábague' neda'.

Benne' ca' dxelecuídene' neda' dxu-
luchínene' la' neda'

gate nu benne' dxelegú'ē de'.

⁹ Lu waláz chee xeta dxawa' de,
na' nisa dxebezra' dxechixre na da
dxé'aja'.

¹⁰ Caní dxaca chia' lawe' da dxezra'u
neda',
ne dxecuídenu' neda'.

Guca'u neda', na' gudxú'unu' neda'.

¹¹ Naca xel-la' nabán chia' ca tu zrul-la
da dxedeze,
na' naca' ca tu xixre' da ba nabizre.

¹² Lue', Xrana' Dios, tu chí'izqueze zu',
na' cheajlesá lazre' xúgute cuen bēn-
neache Lau'.

¹³ Chasu', ne xexache lazru' benne' zaj
zre'e xezre Sión,
lawe' da ba bzrin zra xexache lazru'
benne' ca'.

¹⁴ Netu', wen zrin chiu', nazrí'intu' xiaj
ca' chee xezre na'.

Dxéquentu' zi' lawe' da ba nabía xi na.

¹⁵ Nadxa benne' xezr la xu ca' xelezrebe'
lau Lue', Xran.

Xelezrebe xúgute benne' wenná bea chee
xezr la xu nigá
da xabáa chiu',

¹⁶ gate ba bechisu' xezre Sión, Xran,
ne xeledé'equene' ca naca da xabáa chee
na,

¹⁷ gate na' guzé nagu' da dxelenaba
benne' ca' guleaj xíchaju',
ne québedxa guzú' chalá'ala da dxelata'
xuene' Lue'.

¹⁸ Xuaj da nigá chee xululaba benne' ca'
za zá'aca,
na' benne' ca' za xelalaj xelúe lá'ane' Xrá-
nadxu Dios.

¹⁹ Naga zua Xránadxu xabáa gunné'e.
Naga zue' xabáa blé'ene' lu xezr la xu
nigá.

²⁰ Dxelé'ene' benne' dxelebezre xache',
benne' zaj xu'e

lizre xia,

na' gusanē' benne' ca' ba zaj nachugue'
chee' xelatiē'.

²¹ Xuluzenne' benne' zaj zre'e xezre Sión
ca szren naca

La Xránadxu Dios,
chee xelúe lá'ane' Le' lu xezre Jerusalén,
²² gate xelezraga bēneache chee xúgute
xezre, ne xúgute cue'

xezr la xu

chee xulucá'ana szrene' Xránadxu Dios.

²³ Xránadxu Dios bēne' gute ni'a na'a
gate ne naca' cuide'.

Xeláteze ca betiē' neda'.

²⁴ Nadxa gunnía': Dios chia', quebe gutiu'
neda',

gate quebe ne guéxrua'.

Lue' tu chí'izqueze zu'.

²⁵ Nédxudautē Lue' bzu' xezr la xu nigá,
na' nen na'u

benu' xabáa.

²⁶ Xelebía xi' da ca', san tu zúazquezu'
Lue'.

Welexru xúgute da ca' ca tu ladxe'.

Ca dxuchadxu zra lánadxu tuzruj, ca'
gucha'u da ca',
na' xucúbeu' na.

²⁷ Túzqueze ca nacu' Lue',
ne québequeze te chiu' Lue'.

²⁸ Zrí'inentu' netu', wen zrin chiu',
xelezrabe' chawe',
na' guzé chúchuquezu' zri'ine zre súantu'
lau Lue'.

103 Be lá'ana Xránadxu Dios, lue',
bēne'du xu'a.

Be lá'ana Le' lá'azxa, dutē da naca'.

² Be lá'ana Xránadxu, lue', bēne'du xu'a,
ne quebe gal-la lazru' ca da chawe' da
nune' chiu'.

³ Dxunite lawē' chee xúgute dul-la
nabaga'a.

Dxexunē' neda' ca naca xúgute xízrawe'
da xu'a.

⁴ Dxuxúē' neda' chee quebe gatia'.

Lu xel-la' zri'i lazre' chee', ne xel-la' dx-
exache lazre' chee'

dxunē' chawe' chia'.

⁵ Dxuzánle'e da chawe' da dxaca chia'
chee xegá'ana'

benne' cuide',
 ne benne' wal-la ca dxaca chee tu bsia.
 6 Xránadxu Dios dxuchi'e chee da dxaca
 chee benne'
 dxeledé'e da ba xa',
 ne dxucá'ana chawé' da dxaca chee'.
 7 Blé'ene' Moisés da ca' gulú'u lazre'
 gune',
 ne be'e lataj benne' Israel ca' belelé'ene'
 da ca' bene'.
 8 Naca Xránadxu Benne' dxexache lazre',
 ne Benne' zri'i lazre'.
 Quebe dxezrá'azie', san zrente naca xel-
 la' zri'i lazre' chee'.
 9 Quebe nníaqueze', ne quebe
 zrá'aqueze'.
 10 Quebe dxudé'e dxi'u lu da ba xa' ca
 naca zria
 da nabágadxu,
 ne quebe ne guzría xi'e dxi'u ne chee dul-
 la da nabágadxu.
 11 Ca sibe naca xabáa lawe' xezr la xu,
 caníqueze naca xel-la' zri'i lazre' zren
 chee' nen benne' ca'
 dxelape' Le' ba lá'ana.
 12 Ca zitu' naca naga dxalaj gubizra, ne
 naga dxebía na,
 caníqueze dxucuase' zitu' dul-la da
 nabágadxu.
 13 Ca zri'i lazre' naca xra bidu ca' nen
 zrí'inequeze',
 caníqueze naca zri'i lazre' Xránadxu nen
 benne' ca'
 dxelape' Le' ba lá'ana.
 14 Le' nézene' ca nácadxu lu bela' dxen
 cheedxu.
 Dxajsá lazre' nácadxu xu xrte.
 15 Ca naca xel-la' nabán cheedxu, ná-
 cadxu ca tu xixre'.
 Dxejúladxu ca tu xiaj xixre',
 16 na' dxedé be' dxua na le na, na' dxex-
 enite na,
 na' québedxa nu dxelé'eeze le na.
 17 Ca naca chee benne' ca' dxelape' ba
 lá'ana Xránadxu,

zúale xel-la' zri'i lazre' chee' benne' ca'
 chadía chacanna,
 na' xel-la' xrlátaje chee' zúalequeze na
 xúgute zri'ine zre sua
 benne' ca',
 18 benne' ca' dxelúnqueze' ca naca xel-la'
 wezría nune',
 ne benne' ca' dxelune' ca zaj naca da
 nadxixruj be'e.
 19 Nuzúa Xránadxu lataj chee' xabáa
 naga dxe'e dxenná be'e.
 Nácaqueze' Wenná Bea lawe' xúgute da
 zaj zua.
 20 Le güe lá'ana Xránadxu, le'e, gubáz
 chee xabáa ca',
 Nácale benne' wal-la, ne benne'
 chúchule'e,
 na' dxunle ca dxenná Le', ne dxuzé ná-
 gale ca dxé'e le'e.
 21 Le güe lá'ana Xránadxu, le'e, dxenná
 beale xabáa.
 Nácale wen zrin chee', ne dxunle ca dx-
 aca lazre' Le'.
 22 Le güe lá'ana Xránadxu, xúgutele le'e
 ba nun Dios le'e,
 zrале xúgute lataj naga dxenná bea Le'.
 jBe lá'ana Xránadxu, lue', bénne'du xu'a!
104 Be lá'ana Xránadxu Dios, lue',
 bénne'du xu'a.
 jXrana' Dios, szrente nacu' Lue'!
 Nacu' zra lanu' da xabáa, ne da xrtante.
 2 Dxugacu cuinu' xel-la' naxan' ca zra
 lanu'.
 Dxechilju' xabáa ca tu xu'u ladxe' chiu'.
 3 Nunu' lizru' lawe' nisa da ze ná'ala.
 Dxuchínenu' beuj ca' ca tu da dxudé xua
 naga dxe'u Lue',
 da dxedá na lu be'.
 4 Dxuchínenu' be' ca' ca gubáz chiu' ca',
 ne xesa ca' ca wen zrin chiu' ca'.
 5 Bzua chuchu' xezr la xu nigá lu lane na,
 na' quebe nu gaca gutá le na.
 6 Bgacu' xezr la xu nigá nen nísadau' ca
 dxun tu benne'
 dxacue' zra lane',
 na' nisa na' bgacu na xi'a ca'.

⁷ Gate gudil-lu' nisa na', na' bzrunnuj na.
Bebiga na gate ben na chi'u zizraj.

⁸ Nisa na' bgacu na xi'a ca' xajxedxé na
dxu'a xegu ca',

lataj ca' ba nunu' chee nisa na'.

⁹ Bzu' naga ze lau cheajsé na, naga
québedxa gaca te na,
chee québedxa gacu na xezr la xu bizre
na'.

¹⁰ Dxunu' beaj ca' dxelalaj na dxu'a
xégudu ca',

ne xegu ca' dxeledé na ládujla xi'a ca'.

¹¹ Lu xegu ca' dxel'éaj be xixre' ca' nisa,
na' dxegúa na xel-la' dxelebile chee burro
xixre' ca'.

¹² Lu xaga zaj nnita dxu'a xegu ca' zaj zra'
béadu ca'

zaj zua xrila.

Dxelúl-laba' ládujla zruze na ca'.

¹³ Zran xabáa dxesel-lu' xiuj da dxaca na
lu xi'a ca',

na' dxezrate xezr la xu na' ca naca da xr-
látaje da dxunu'.

¹⁴ Dxusegulu' xixre' da dxelagu bezre ca',
ne xixre'du ca' da dxelagu bèneache,
ne da ca' dxuluchine bèneache dxelune'
xel-la' wagu,

¹⁵ ne uva ca' da dxelune' xrise uva wal-la
da dxuzúa na

bèneache ca' xel-la' dxelebé,
ne olivo ca' da dxelune' da za da dx-
elegú'e xíchaje',

ne zrua' da dxelune' xeta chee xelaca
bane'.

¹⁶ Xaga cedro ca' da zaj zua na xi'a
Líbano dxelezíle'e na nisa xiuj.

Zaj naca na xaga chee Xránadxu Dios, da
ca' guza Le'.

¹⁷ Lu xaga ca' dxuluzría bxínnedu ca'
xrú'neba',

na' lu zruze na ca' zaj zua lizre bxuze' ca'.

¹⁸ Zaj zua chivo xi'a ca' lu xi'a zri'a ca',
na' lu bluaj ca' chee xi'a ca' zaj zua
bzrizru' ca'.

¹⁹ Benu' beu' da dxulé'e na tu beu' tu beu'
chee iza,

na' gubizra núnbea na gate dxal-la' cuía
na.

²⁰ Benu' dxela, na' gate bache nachul-la,
na' dxeledxúaj be dxela ca'.

²¹ Dxelebezre xa'a bezre xixre' ca', zaj
nauba' be xeláguba'.

Dxelíljaba' da nun Dios xeláguba'.

²² Gate dxalaj gubizra, na' dxelexezrinba'
lu bluaj cheeba',

naga dxeléseba' te zra.

²³ Nadxa dxeledxúaj bèneache dxelune'
zrin,

na' dxelúnqueze' zrin ca dxebía gubizra.

²⁴ Xran, da zante zaj naca da benu'.

Dute xel-la' sina chiu' benu' da ca'.

Nazrate xezr la xu nigá da ca' benu'.

²⁵ Na' zua nísadau', da zri'a, ne da laga,
naga zaj xu'u zánete bea ca', béadu ca',
ne be zri'a ca'.

²⁶ Lu nísadau' na' zaj zra' da dxeledá
lawe' nísadau' ca'.

Zua be zri'a na' benu' Lue', nazi' laba'
leviatán.

²⁷ Xúgute bea ca' dxuluxrén lázreba' Lue',
chee gunézruju' da xeláguba' ca zrin chee
na.

²⁸ Dxunézruju' leba', na' dxelecá'aba' na.
Dxunézruju' da dxeláguba', na'
dxeléljeba'.

²⁹ Gate quebe dxenná'u-ba', na'
dxelezzébeba'.

Gate dxucuasú' be' dxelecá'aba', na'
dxeláteba',
ne dxelexácaba' xu xrte.

³⁰ Gate dxesel-lu' be' chiu', na' xelexaca
banba'.

Dxunézruju' xel-la' nabán cube chee da
ca' zaj zua

xezr la xu nigá.

³¹ ¡Chadía chacanna gaca ba Xránadxu
Dios!

Dxezaca ba lazre' Xránadxu chee da ca'
ba núnqueze'.

³² Dxenné'e xezr la xu nigá, na' dxezrú'
na.

Dxuté' xi'a ca', na' dxeledxúaj na zren.

33 Gúl-laqueza' chee Xránadxu dxácate
na' naca bana'.

Xúgute zra zúaqueza' neda' gul-la' da güe
lá'ana' Dios chia'.

34 Chawe' naca chia' da ca' dxulaba lazra'
ca naca chee',

na' dxebéle'eda' ne chee Xrana' Dios.

35 Welebía xi' benne' dul-la ca' zaj zre'e
lu xezr la xu nigá,

Na' québedxa cha benne' ca' dxelebéaj
xíchaje' Dios.

¡Be lá'ana Xránadxu Dios, lue', bénne'du
xu'a!

¡Le güe lá'ana Xránadxu!

105 ¡Le güe lá'ana Xránadxu Dios!
¡Le gucá'ana szren La Le'!

¡Le guzén bénneache dute xezr la xu ca
naca da nune'!

2 ¡Le gul-la chee'!

¡Le gul-la da güe lá'anale Le'!

¡Le guchalaj chee da zrente ca' da nune'!

3 ¡Le be lu da naca chee'!

Xúgute benne' ca' dxelapa ba lá'ana Xrá-
nadxu dxal-la'

xelebéle'ene'.

4 Le naba Xránadxu gácalene' le'e.

Tu zra tu zra le guxrén lazre' Xránadxu
Dios.

5-6 Le'e, zri'ine zre sua Abraham, wen
zrin chee Xránadxu.

Le'e, zri'ine zre sua Jacob, bénnea'
guqué'e,

Le gusá lazre' xel-la' waca ca', ne da
zrente ca' da bene',

ne ca naca da bchi'e cheele.

7 Le' naque' Xránadxu, ne Dios cheedxu.

Le' dxenná bé'ene' bénneache zaj zre'e
dute xezr la xu.

8 Lácala te chee chi gaxúa cuen
bénneache,

québequeze gal-la lazre' da guchebe
lazre'

lu xel-la' wezría chee',

9 xel-la' wezría na' bénlene' Abraham,
da na' bzetaj cuine' guchebe lazre' chee
Isaac,

10 na' bzua chúchue' na ca tu da nadx-
ixruj bea na,

da gun Jacob,

da gaca na tu xel-la' wezría da zeajlí
canna nen

benne' Israel ca',

11 da bene' gate na' gunné': "Chiu' lue'
gunna' xezr la xu chee

benne' Canaán ca',

da gaca na tu da xudele lu na' zri'ine zre
súale."

12 Gate na' bábaze zaj naque'

gulezré'e lu xezr la xu nigá ca benne' zitu'
ca',

13 ne guledée' tu xezr la xu xetú xezr la
xu, ne tu xezre

xetú xezre.

14 Quebe be' Dios lataj nu benne' bi gune'
chee

bénneache chee',

na' ne chee benne' ca' gudil-le' benne'
wenná bea ca'.

15 Guzre' le': "Quebe bi gunle chee benne'
ca' gucá'a,

ne quebe gunle da calēla chee benne' ca'
dxuluchalaje'

waláz chia'."

16 Bene' guta' tu gubina' lu xezr la xu na',
na' gudúe' ca naca xeta xelawe'.

17 Gusel-le' tu benne' cuía lawe' lau
benne' chie' ca',

bénnea' naque' José, bi na' belutie'-be'
chee gácabe'

wen zrin chee benne' zitu'.

18 Buluzré'e ní'abe' lu xedxu chee cuaga
da bexru na ní'abe',

gate na' gulu'e-be' lizre xia lu xezr la xu
Egipto,

19 ca bzrin zra guca li ca da gunná José
dxal-la' gaca.

Caní guca, ble'e xrtizra' Xránadxu
cúnnabe' da li.

20 Nadxa benne' wenná bea chee Egipto
gusel-le'

nu gusán José na'.

Bénnea' dxenná bé'ene' zánete cue' xezr
la xu bsañe'-be'.

²¹ Bzue'-be' gácabe' xrana benne' zaj zre'e
lizre',

ne chee nna be'ebe' ca naca da xu'u lu
ne'e,

²² chee tíl-labe' benne' szren ca' chee
wenná bea cáteze

dxaca lázrebe',

ne chee guzéajni'ibe' benne' gula chee
xezr la xu Egipto

chee xelaque' benne' sina.

²³ Gudé na' gulu'e benne' Israel ca' lu xezr
la xu Egipto,

na' guzúa Jacob lu xezr la xu chee zri'ine
zre sua Cam.

²⁴ Gulánle'e bénneache chee Xránadxu lu
xezr la xu na',

na' bene' gulaque' wál-ladxa ca benne'
guledábague' Le'.

²⁵ Bcha Dios lázxdau benne' Egipto ca'
chee xelexuídene'

bénneache chee',

chee xelegú'u lazre' xelune' da calela
chee wen zrin chee' ca'.

²⁶ Nadxa gusel-le' Moisés, wen zrin chee',
lau bénneache

chee' ca', ne Aarón, bénnea' guqué'e.

²⁷ Benne' caní be'e Dios lataj belune' xel-
la' waca ca'

chee xabáa,

ne xel-la' waca zrente ca' lu xezr la xu
chee zri'ine zre sua Cam.

²⁸ Gusel-la Dios tu da chul-la da bgacu
na duté xezr la xu na',

san benne' Egipto ca' quebe buluzúe'
dizra' da gunná be'ene' le'.

²⁹ Nadxa bene' bexaca nisa xegu chee
benne' ca' dxen,

ne betie' xúgute' bela zaj zraba' xegu ca'.

³⁰ Busezrate' xezr la xu chee' bluzru ca'
ga bzrinte' gulezraba'

xu'u lizre benne' wenná bea chee benne'
Egipto ca'.

³¹ Gunnaze Dios, na' belelá' zánete be'a
chee bezre,

ne be'a lase ca' duté lu xezr la xu chee
benne' ca'.

³² Waláz chee nisa xiuj gusel-le' xiaj
bezxe' lu xezr la xu

chee benne' ca',

ne xi' da bzezxe na ca naca xezr la xu
chee'.

³³ Bzria xi'e ca zaj naca lba uva chee', ne
ca zaj naca xaga higo chee',

na' bzúxuje' ca zaj naca xaga zaj ze lu
xezr la xu chee'.

³⁴ Gunnaze', na' belelá' biche zu ca',
da quebe nu seque' gulaba leba',

³⁵ na' guláguba' duté xixre' xa'a lu xezr la
xu chee',

ne guláguba' duté lina da dxunna xezr la
xu na'.

³⁶ Nadxa betie' xúgute' bi biu nedxu chee
benne' Egipto ca',

bi zaj nácabe' bi blau chee'.

³⁷ Bebéaje' bénneache chee' na' zaj nu'e
dumí plata,

ne dumí oro,

na' quebe nu chilá' benne' ládujla le',
benne' quebe

chawe' zue'.

³⁸ Gulebé benne' Egipto ca' gate
beledxúaj benne' ca' ga na',

lawe' da belezrébele'e le'.

³⁹ Bzala' Dios tu beuj da gulú'u na benne'
ca' zrul-la,

ne tu xi' da bsa' na chee' chizrela.

⁴⁰ Gulenabe' Dios, na' gusel-le' chee' btau
ca',

ne bene' gulélajene' xeta da bdxuaj na
xabáa.

⁴¹ Gule'e tu xiaj xre, na' gulaj nisa
da gudé na lu xezr la xu bizre na' ca tu
xegu nisa.

⁴² Caní ben Dios lawe' da bsa lazre' xr-
tizre' lá'azxa

da guchebe lazre' gune' chee Abraham,
wen zrin chee'.

⁴³ Bebéaje' bénneache chee' lu xezr la xu
Egipto, dxelene'.

Lu da ba neza gulezrá' benne' ca' guqué'e.

⁴⁴ Bnézruje' benne' ca' xezr la xu chee
benne' xezica ca',
na' da belún benne' xezr la xu ca' bexaca
na chee benne'

chee' ca',

⁴⁵ chee xulupá'ane' ca naca xrba chee'
ca',

ne xeluné' ca naca da gunná bé'ene' ca'.

¡Gaca ba lá'azxa Xránadxu Dios!

106 ¡Gaca ba lá'azxa Xránadxu
Dios!

¡Le xe Xránadxu Dios: "Xcalenu!"

Caní dxal-la' gunle lawe' da naque'
xrlátaje,

ne lawe' da tu chí'izqueze dxexache
lazre' dxi'u.

² ¿Núzraqueze seque' gulé'ene' ca naca
xel-la' waca zrente' ca'

da nune' Xránadxu?

¿Núzraqueze seque' güe lá'ane' Lē' ca
dxal-la' gundxu?

³ Ba neza zrente' naca na chee benne' ca'
dxeluné' da xrlátaje,

benne' ca' tu dxelúnzqueze' da naca
xrlátaje.

⁴ Bsa lazre' chia', Xrana' Dios, gate dxunu'
da chawe'

chee bēnneache chiu'.

⁵ Gudá bselá neda' chee gaca le'eda' da
chawe' gunu'

chee benne' ca' ba guca'u Lue',

ne chee beda' gate xelezrá' bēnneache
chiu' lu da ba neza,

ne chee béleña' bēnneache chiu'.

⁶ Ba bentu' dul-la cáqueze belún xra
xrtáuntu' ca'.

Bentu' da calela, ne bentu' da zrinnaj.

⁷ Gate gulezrá' xra xrtáuntu' lu xezr la xu
Egipto,

quebe bululaba lazre' ca naca xel-la'
waca ca' chee xabáa

da bēnu'.

Quebe xeajlesá lazre' ca bexache
lázrele'u lē'.

Guledábague' Lue' dxu'a nísadau' da nazí
le na Xrna.

⁸ Lē' bselé' benne' ca' chee gaca ba lá'ana
La Lē',

ne chee gulé'e lau ca naca xel-la' waca
chee'.

⁹ Gudil-lē' nísadau' Xrna na', na' bebizre
na,

na' guledé bēnneache chee' laduj
nísadau' na' lu xu bizre.

¹⁰ Bselé' benne' ca' lu na' benne'
guledábague' Lē',

ne bebéaje' lē' lu na' benne' ca' bulusaca
zi'e lē'.

¹¹ Nadxa nísadau' na' bgacu na benne' ca'
guledábague' lē'.

Netú benne' ca' quebe nu begá'ana.

¹² Nadxa benne' chee' ca' guléajle'e dizra'
chee',

ne belul-lē' da belúe lá'ane' Lē'.

¹³ Chadí gulal-la lazre' ca da bēne'.

Quebe gulebeze' ca la dizra' chee Dios.

¹⁴ Gulezá lazre' tu da calela lē'e xixre'
lawe' lataj na',

na' buluché'e Dios lē'e xixre' na'.

¹⁵ Gudé na' bnezruj Dios ca da gulenabē',
san gusel-lē' ládujla lē' tu da gute na bal-

la benne' ca'.

¹⁶ Gulaque' xa lazre' chee Moisés naga
zaj zre'e,

ne chee Aarón, Bēnnea' gucá'a Xránadxu
Dios.

¹⁷ Nadxa bzra xezr la xu na', ne gudebe
na Datán,

ne bgacu na benne' ca' zaj de'e Abiram.

¹⁸ Nadxa guxalaj xi' naga zaj nazraga
benne' ca',

na' bzezxe na benne' ca' dxeluné' da
calela.

¹⁹ Beluné' tu bedáu' bezre da naca na oro
lu xi'a Horeb,

na' buluzú zribē' lau bedáu' oro na'.

²⁰ Caní bulucá'ane' Dios, Benne' xabáa,
chee xulucá'ana szrene' tu bedáu' bezre,

da naca na ca tu bezre dxáguba' xixre'.

²¹ Gulal-la lazre' Dios, Bēnnea' bselé' lē',
Bēnnea' bēne' xel-la' waca zrente' ca' lu

xezr la xu Egipto,

22 ne bene' xel-la' waca ca' chee xabáa lu
 xeꝛ la xu
 chee zri'ine zre sua Cam,
 ne da ca' buluchebe na dxi'u dxu'a
 Nísadau' Xrna.
 23 Nadxa guca lazre' Dios guzría xi'e bén-
 neache chee',
 san Moisés, bènea' gucá'a Dios, bzua
 cuine' lau Dios
 chee guzúa zrie' xel-la' dxezrá'a chee
 Dios,
 na' bene' quebe guzría xi' Dios benne' ca'.
 24 Buluzúe' chalá'ala xeꝛ la xu xrtante da
 guneꝛruj Dios le',
 ne quebe guléajle'e dízra' chee'.
 25 Tu gulennéꝛqueze' chee Dios lu xu'u
 xide chee' ca',
 ne quebe buluzé nague' da gunná Xrá-
 nadxu Dios.
 26 Chee le na' bzetaj cuine' gunné' ca da
 gune' chee benne' ca'.
 Gunné' gune' xelate benne' ca' le'e xixre'
 lawe' lataj na',
 27 ne gusi'e bèneache chee' lu xel-la' stu'
 lau benne'
 xeꝛ la xu ca',
 ne guse dínnaje' le' ládujla benne' xeꝛ la
 xu ca'.
 28 Nadxa belune' tuze benne' ca' dxu-
 lucá'ana szrene'
 bedáu' xia nazí le na Baal-peor,
 ne gulawe' béadu ca' belúti'e lau dios
 gate ca'.
 29 Buluche'e Dios ne chee da belune',
 na' guxalaj tu xízrawe' zren da bete na
 benne' zan benne' ca'.
 30 Nadxa guxasa Finees, ne betie' bènea'
 bene' dul-la,
 na' guleza xízrawe' zren na'.
 31 Da na' ben Finees guzi' Dios ca tu da
 dxucá'ana xrlátaje na
 bènea',
 da gulé'e lawe na lau xúgute cuen bén-
 neache ca'.
 32 Cá'anqueze buluché'e Dios dxu'a beaj
 nisa nazí le na

Meriba,
 na' guca da calela chee Moisés ne chee
 benne' ca',
 33 lawe' da ne chee da belune' guca
 Moisés xichaj zra'a,
 na' bexúbeté Moisés da gunné'.
 34 Gate gulu'e lu xeꝛ la xu nigá quebe
 buluzría xi'e
 bèneache zaj nite' ga na'.
 Caní guca, quebe belune' ca da guzre
 Dios le' xelune'.
 35 Gulaque' tuze benne' xeꝛ la xu ca',
 ne bulusédi'e benne' Israel ca' xelune' ca
 dxelún benne' ca',
 36 na' bulucá'ana szrene' bedáu' xia xaga
 ca' chee benne' ca',
 da na' ben na bxinnaj Dios bèneache
 chee'.
 37 Belúti'e zr'ine' bi biu, ne bi nu'ula
 chee'
 lau bedáu' chee da xriwe' ca',
 38 ne bululálaje' dxen chee bi dxé'enedu
 ca',
 bi quebe zaj nunbe' dul-la,
 da naca na dxen chee zr'ine' bi biu, ne
 bi nu'ula,
 bi ca' belúti'e lau bedáu' xia xaga ca' chee
 bèneache Canaán,
 na' guca sban xeꝛ la xu na' ne chee dxen
 chee bidu ca'.
 39 Da ca' belune' ben na le' sban,
 na' gulebéaj xichaje' Dios lu da belune'.
 40 Chee le na' bzrá'alé'e Dios bèneache
 chee',
 na' gucuídene' benne' ca' zaj naca chee'.
 41 Nadxa bdee' benne' ca' lu na' benne'
 xeꝛ la xu ca',
 na' benne' ca' dxelecuide bèneache chee
 Dios
 gulenná bé'ene' le'.
 42 Benne' ca' guledábage' le' bulusaca
 zi'e bèneache
 chee Dios,
 ne buluxrinnaje' le' lu xel-la' dxenná bea
 chee'.

⁴³ Zánete lasa Dios bselé' bèneache
chee' ca',
san guledábage' ca da bsízrene' le',
na' gulape' xel-la' stu' lawe' da belune' da
calea.

⁴⁴ Lácala caní belune', gate gulezré'e lu
da stebe,

Dios gunné'e ca da dxelezaque',
ne benne' ca da bululáwizre' Le',

⁴⁵ na' xeajsa lazre' xel-la' wezria da bēn-
lene' benne' ca',

na' bejáje lazre' chee' xel-la' dxezra'a
chee'

lawe' da nácale'e benne' dxexache lazre'.

⁴⁶ Cá'aqueze bene' belexache lazre'
benne' ca'

benne' ca' guleché'e le' ca benne' zaj
nada'u.

⁴⁷ ¡Bselá netu', Xránantu', nacu' Dios
cheentu'!

¡Becá'a netu' ládujla benne' xezr la xu ca',
chee' güe lá'anantu' Lau' lá'azxa,

ne chee' béle'entu' lu da dxúl-lantu' chiu'!

⁴⁸ Cháwedau' naca Xránadxu, Bēnea'
naque' Dios chee'

benne' Israel ca' nédxudaute, ne chadía
chacanna.

Xúgute bēneache dxal-la' xelenné':
¡Ca'an gaca na!

¡Gaca ba lá'azxa Xránadxu Dios!

107 ¡Le güe lá'ana Xránadxu,
Benne' xrlátaje!

¡Chadía chacanna naque' Benne' zri'i
lazre'!

² Da nigá dxal-la' xelenná benne' ca' ba
naxá'awe Xránadxu le',

benne' ca' bselé' lu na' benne'
guledábage' Le'.

³ Beché'e le' naga gulezra' benne' xezr la
xu zitu' ca',

da zaj zua naga dxalaj gubizra, ne naga
dxebia na,

ne naga za' be' zaga, ne naga dxedé gu-
bizra beu' zaga ca'.

⁴ Bal-la benne' ca' guledé' le'e xixre' naga
quebe bi neza zua,

ne quebe belezrelne' xezre naga xelezúe'.

⁵ Guledune', ne gulebílene',
ne québedxa bi gulebeza lazre'.

⁶ Nadxa lu da dxelezaque' gulenné'
Xránadxu,

na' bselé' benne' ca' lu da dxelezaque'.

⁷ Na' buzre'e le' tu neza li,

chee' chjaque' tu xezre naga xelezúe'.

⁸ Dخال-la' xelúe lá'ane' Xránadxu lawe' da
bexache lazre'

Xránadxu le',

ne lawe' da bene' chee' da ca' da
dxebánedxu.

⁹ Dxuxí'aje' benne' ca' dxeleBILE lazre',

ne dxugawe' benne' ca' dxeledún nen da
chawe' chee'.

¹⁰ Bal-la benne' caní gulezúe' lu da chul-
la, ne lu da stebe

chee' xel-la' gute.

Gulaque' ca benne' zaj xu'e lizre xia,

ne zaj nadxéaj du xia, ne dxeledé'e ba
xa',

¹¹ lawe' da guledábage' xrtizra'
Xránadxu,

ne buluzúe' chalá'ala da bzéajni'i Dios
zrente le'.

¹² Belexedú lazre' lu zrin zí'ite da
dxelune'.

Xeleajcházie' zran xua da zaj nu'e,

ne quebe nu chilá' gácalene' le'.

¹³ Nadxa lu da dxelezaque' gulenné'
Xránadxu,

na' bselé' benne' ca' lu da dxelezaque'.

¹⁴ Nadxa bebéaje' benne' ca' lu da chul-la
ne lu da stebe chee' xel-la' gute,

ne bzúzruje' du xia ca' da zaj nadxéaje'.

¹⁵ Dخال-la' xelúe lá'ane' Xránadxu lawe'
da bexache lazre' le',

ne lawe' da bene' chee' da ca' da
dxebánedxu.

¹⁶ Bchínnaje' dxa xu'u ca' zaj naca na xia
gache,

ne bzúzruje' xia ca' da zaj naxechaj na
benne' ca'.

¹⁷ Bal-la benne' ca' gulaque' benne' xala,

ne guledéé' xel-la' zi' ne chee dul-la da
zaj nabague',
ne ne chee da zrinnaj ca' da beluné'.

¹⁸ Belexegútené' da dxelé'aj dxelawé',
na' xáteze ca gulátie'.

¹⁹ Nadxa lu da dxelezaque' gulenné'
Xránadxu,
na' bselé' benne' ca' lu da dxelezaque'.

²⁰ Gusel-le' dizra' chee' chee benne' ca',
na' bexuné' le', ne bselé' le' lu xel-la' gute.

²¹ Dخال-la' xelúe láné' Xránadxu lawe'
da bexache lazre' le',
ne lawe' da bene' chee' da ca' da
dxebánedxu.

²² Dخال-la' xelé'e Le': Xcalenu'.
Dخال-la' xelú'e da xulunézruje' Le',
na' lu xel-la' dxelebé chee' dxال-la' xelúl-
le',
ne xuluzenne' bénneache ca zaj naca da
nuné'.

²³ Bal-la benne' ca' guledéé' lu nísadau'
lu da zren ca' da dxedá lawe' nísadau'.
Belezi'e dumí zren lu zrin dxeluné' lu
nísadau'.

²⁴ Belelé'ene' ca naca da ca' dxun
Xránadxu,
da ca' dxuné' lu nísadau' da zaj naca na
da dxebánedxu.

²⁵ Gunnéze', na' guzú lau dxaca be'
bdunu',
na' gulasa xeajxruza zren lu nísadau'.

²⁶ Belegüén da dxedá lawe' nísadau' ca'
ca lu xi'a zri'a
da naca na nísadau',
na' belexetaj na lu da situj lawe'
nísadau' na'.

²⁷ Gulechégüé', ne xeajleté' ni xeajleté'
na' ca
benne' dxelezuzre,
na' guca dácheze ca da zaj nusé'die'.

²⁸ Nadxa lu da dxelezaque' gulenné'
Xránadxu,
na' bselé' benne' ca' lu da dxelezaque'.

²⁹ Bzua zrie' be' bdunu' na' da dxaca na,
ne gulezúa zri xeajxruza chee nísadau'
na'.

³⁰ Gulebé'ene' lawe' da zaj zua zri xea-
jxruza ca',
na' guché'e Dios le' cháwedau' naga
zjaque'.

³¹ Dخال-la' xelúe láné' Xránadxu lawe'
da bexache lazre' le',
ne lawe' da bene' chee' da ca' da
dxebánedxu.

³² Dخال-la' xuluzenne' ca naca xel-la'
szren chee' naga
zaj nazraga bénneache chee',
ne xelúe láné' Le' naga zaj nazraga
benne' gula ca', benne'
dxeleenná be'e.

³³ Ben Xránadxu gulebizre xegu nisa ca',
ne busú'aje' beaj nisa ca'.

³⁴ Xu xa'a bexuné' na xu bizre,
ne chee da calela da belún benne' ca' zaj
zre'e na'.

³⁵ Naga naca xu bizre bexuné' na xu nisa,
na' xu xiaj bexuné' na naga dxalaj nisa.

³⁶ Bzre'e ga na' benne' ca' benne'
dxeledún,
na' beluné' tu xezre naga xelezúe'.

³⁷ Gulaze' xezr la xu na', na' belexaze' lba
uva ca',
na' belexezi'le'e lina chee na.

³⁸ Bene' da chawe' chee benne' ca', na'
gulánle'e
bidu chee' ca',
ne quebe be'e lataj xelexe ca zaj naca
be xixre' chee' ca'.

³⁹ Gate buludé' benne' dxeleenná bea
benne' ca' lu xel-la' zi',
ne bulusaca zi'e le',
ne gulenná bé'edxene' le', ne beluné' le'
da calela,

ne buludéé' le' lu da ba xa',
⁴⁰ bca'ana ditaj Dios benne' xíchaje' ca',
ne bene' guledéé' le'e xixre' lawe' lataj
naga quebe bi neza de.

⁴¹ Bselé' benne' xache' ca' lu da zi' da xa'
da dxeledéé',
ne bzánle'e zri'ine benne' ca' ca dxelán
zrila' ca'.

⁴² Gate dxelelé'e benne' xrlátaje ca' da caní, na' dxelebéle'engé', na' benne' ca' dxeluné' da calela quebe bi gaca xelenné'.

⁴³ Benne' ca' zaj naque' sina dxal-la' xulaba lazre' ca zaj naca da caní, ne dxal-la' xelxúnbe'e ca naca xel-la' zri'i lazre' chee Xránadxu.

108 Ba zúatequeze lázrdawa', Dios, chee gúl-laqueza' da güe lá'ana' Lue'.

Da nigá dxugú'u na neda' lu da ba neza.

² Bebán lazre', bénne'du xu'a, na' le xebán lázrele, le'e dxínnele da dxúl-lalenle, ne da con zríadi'i na du.

Che zílala cheajsá'queza'.

³ Güe lá'anaqueza' Lue' ládujla bèneache chiu', Xran.

Gúl-laqueza' chiu' lau benne' duté xezr la xu,

⁴ lawe' da naca xel-la' dxexache lazre' chiu' zrendxa ca xabáa,

na' da li chiu' naca na zrendxa ca beuj bza ca'.

⁵ Xegá'ana szrénquezu' xabáa, Dios.

Xel-la' szren chiu' sua na lawe' duté xezr la xu.

⁶ Chee xeelá benne' ca' nazrí'iqueznu' Lue', bselá le' duté xel-la' waca chiu', ne bene chia'.

⁷ Lu lataj lá'azxa chee' gunná Dios: "Wabéquezda' neda'.

Gunna' late weaj chee'le xezr la xu chee benne' Siquem ca', ne gudixra' chee'le xezr la xu de cuite xegu Sucot.

⁸ Chia' naca xezr la xu Galaad, ne chia' naca xezr la xu chee zri'ine zre sua Manasés.

Xezr la xu chee zri'ine zre sua Efraín naca na ca tu da napa chí'i na xíchaja'.

Xezr la xu chee zri'ine zre sua Judá naca na naga dxenná be'a.

⁹ Xezr la xu chee benne' Moab naca na ca tu zriga'

da xuzru nisa guná'a,

na' lu xezr la xu chee benne' Edom chu'una' zrela' gula.

Si'a ba neza xezr la xu chee benne' Filistea."

¹⁰ ¿Nuzra che' neda' chee chu'a xezre da naxechaj ze'e sibe?

¿Nuzra che' neda' chee guzétaja' benne' Edom ca'?

¹¹ ¿Quegá Lue' na' che'u neda', Dios.

Nacu' Bénnea' bzua netu' chalá'ala, ne quebe guxéajlenu' benne' cheentu' ca', benne' dxjaque'

wedil-la, Dios?

¹² Gúcale netu' chee séquentu' tíl-lalentu' benne' ca'

dxeledíl-lalene' netu',

lawe' da naca dácheze xelácale bèneache netu'.

¹³ Tu zren nen Dios gundxu tu da zrente, na' Le' gulague' benne' ca' dxeledil-lalene' dxi'u.

109 ¿Dios, dxue lá'ana' Lue'!

Quebe xegá'anu' zriize

² lawe' da dxelenná benne' ca' dxeluné' da calela,

ne benne' wen lazre' ca' chia' neda'.

Dxelenné' chia' da naca da wen lazre'.

³ Lu xel-la' dxelecuide chee' zaj naxécha-je' neda',

ne dxelenné' chia'.

Dxeledíl-lalene' neda', ne quebe bi nuna' chee benne' ca'.

⁴ Lácala bzri'ida' benne' ca', na'a dxeledábague' neda',

san neda' dxenaba' gaca da chawe' chee benne' ca'.

⁵ Lácala bēna' neda' da chawe' chee benne' ca', dxeluné' chia'

da calela,

ne lácala bzri'ida' le', dxelecuídene' neda'.

⁶Bzua tu benne' wen da zrinna_j chee
guchi'e chee
benne' wen da cale_la ca',
ne ben sua tu benne' nnie' chee benne'
ca',
benne' guzúe' ca naca da cale_la belún
benne' ca'.

⁷Gate na' zri'a chee', ben gaca bea na zaj
nabague' zria.

Ble'e da xelenabe' lau' ca tu dul-la da
dxelune'.

⁸Bzache zra xelaca ban benne' ca',
ne ben xelú'u xezica' benne' waláz chee'.

⁹Bca'ana zrí'ine' ca' bidau' wezebe,
ne xelaca zru'ule' nu'ula tuze ca'.

¹⁰Ben xelaca zrí'ine' bi dxeledaze chee
xelenábabe' guna',
ne ben xelexrélebe' xeta xelágube' zitu'
naga zaj zua lízrebe'
da zaj naxinnaj.

¹¹Ben xelú'u da ca' zaj nape' lu na' bénne'
ca'

bulusané' le' dumí.

Ben xelexúa benne' zitu' ca' da ca' zaj
nuné'.

¹²Ben quebe nu zrel-la benne' xexache
lazre' le',
ne quebe nu benne' zrel-la xexache lazre'
bidau' wezebe
chee' ca'.

¹³Ben xelebía xi' zri'ine zre sua benne'
ca',

ne québedxa nu cha' zri'ine zre sue',
si' le' ca zaj nazi'i la benne' ca'.

¹⁴Bsa lazre' ca da cale_la da belún xra
xrtawe', Xran,
ne quebe xusulu' dul-la da gulún xrne'e
ca'.

¹⁵Tu chí'izqueze bsa lazre' ca da cale_la
da zaj nuné'.

Québedxa cheajsá lazru' benne' ca'

¹⁶lawe' da quebe xelexsá lazre' xelex-
ache lazre' le sa' ljwezre' ca',
san bulusaca zi'e benne' baxache' ca',
benne' dxelexázejene',

ne benne' dxexrui lazre' ca', na' belútie'
bénne'du ca'.

¹⁷Beledánene' da dxugú'u na de', na' da
caníze guca na chee'.

Quebe gulaca lazre' xelenabe' gaca
chawe' chee' bénneache,
na' da chawe' bebiga na naga zaj zue'.

¹⁸De' da gulegú'e bénneache guca na ca
tu da gulacu cuine',

na' guxú'u na le'e ca nisa gulé'aje',
ne guxú'u na zrita chee' ca da za.

¹⁹Tu chí'izqueze ben gaca na chee' ca xi-
cha da dxelácu'e',

ne gaca na ca tu xpádxue' dxuluchela
le'e.

²⁰Gaca da nigá da quizruj Xránadxu
Dios benne' ca'

dxelenné' cale_la chia',
ne da quízruje' benne' ca' dxelune' da
cale_la,

ne dxelenné' cale_la chee' bénne'du xu'a.

²¹Xrana' Dios, ben culuén chia' chee'
xegá'ana'

xrlátaje lau'.

Bselá neda' lawe' da dxexache lázrele'u
bénneache,

²²ne lawe' da dxezaca zi'a, ne
dxexázejeda',

ne dxeque zi' lázrdawa'.

²³Dxedé chia' ca dxedé chee' tu zrul-la
gate dxebía gubizra.

Dxaca chia' ca dxaca chee' biche xuaj
gate dxua be' leba'.

²⁴Dxelate zriba' lawe' da dxuna' gubasa,
ne nazrítale'a lawe' da quebe bi dxawa'.

²⁵Naca' ca tu da dxulucá'ana dítajé'.

Dxelenné'e neda', ne dxelún le' chia', dx-
ulutá xíchajé'.

²⁶Gúcale neda', Xrana' Dios.

Bselá neda' lawe' da dxexache lazru'
bénneache.

²⁷Ben xelexe be'ene' Lué'queze dxá-
calenu' neda'.

Lué'queze, Xrana' Dios, ba nunu' da nigá.

²⁸Dxelegue' neda' de', san ben Lue' gaca
chawe' chia'.

Guxasa, ben xelexedué'e benne' ca' dx-
eledábage' neda',
san ben beda' neda'.

²⁹ Ben xelezrá' lu xel-la' stu' benne' ca'
dxelenné'
da calela chia'.

Ben xeleque zréajene' tu chí'izqueze.

³⁰ Du lazra' gúl-laqueza' da güe lá'ana'le'a
Xránadxu Dios.

Ládujla benne' zan ca' güe lá'ana' Le'.

³¹ Le' zue' cuita xabēla chee benne' xache'
ca'

chee guselé' bēne'du zaj xu'e lu na'
benne' ca'

dxuluchi'e chee'.

110 Xránadxu Dios guzre' Xrana':
“Gudxé'e chalá'a xabēla chia'
cadxa zrin zra guna' ga benne' ca' dx-
eledábage' lue'
xuluzúa zribe' lau'.”

² Naga zu' Sión, gun Xránadxu zriluj xel-
la' dxenná bea chiu'.

Dxenné': “Gunná be'e benne' ca' dx-
eledábage' lue'.

³ Lu zra gate tíl-lalenu' benne' ca' dx-
eledábage' lue',

du lázrequeze benne' chiu' ca' chjaque'
wedil-la.

Ca dxun xrlé'ela chee bálala, dxacu na
xi'a lá'azxa,

caníqueze xelaca benne' cuide' chiu' ca',
xelelé'e naga zu' xelácalene' lue'.”

⁴ Guchebe lazre' Xránadxu, ne quebe
gunítie' xrtizre',

gunné': “Chadía chacanna nacu' bxruze
ca guca bxruze

Melquisedec.”

⁵ Zua Xránadxu chalá'a xabēla chiu'.

Gate zre'e, na' guzría xi'e benne' wenná
bea ca'.

⁶ Guchi'e chee benne' dute xezr la xu, na'
gutie' zánete

benne' xezr la xu ca'.

Guzría xi'e benne' dxelenná be'e dute
xezr la xu.

⁷ Xi'aj benne' wenná bea nigá nisa
xégudu zua na dxu'a neza,
na' xexape' xel-la' wal-la chee'.

111 Dute lázrdawa' güe lá'ana'
Xránadxu Dios tu zren nen
benne' xrlátaje ca', benne' zaj nazrague'
lau Le'.

² Da zrente zaj naca da ca' nun Xránadxu
Dios,

na' xúgute benne' ca' dxelezaca ba
lázrele' da nune',

ne dxelaca lazre' xeledé'ene' na.

³ Da xabáa, ne da xrtante zaj naca da dx-
une' Le',

ne tu chí'izqueze zua da xrlátaje chee'.

⁴ Dxune' dxeajsá lázredxu ca naca xel-la'
waca zrente

da dxune'.

Xránadxu Dios naque' zren lazre', ne dx-
exache lazre'

bēneache.

⁵ Dxugawe' benne' ca' dxelezrebe' Le'.

Tu chí'izqueze dxeajsá lazre' xel-la'
wezría da nune'.

⁶ Blé'ene' bēneache chee' ca' ca naca
xel-la' waca chee'

da ca' bene'.

Dxunézruje' benne' chee' ca' da zaj napa
benne' xezica

xezr la xu ca'.

⁷ Li lazre', ne xrlátaje zaj naca da ca'
dxune'.

Li lazre' zaj naca xúgute da bdxixruj be'e.

⁸ Tu chí'izqueze, ne chadía chacanna zaj
zua da ca' bdxixruje'.

Lu da li, ne lu da li lazre' nune' ca' zaj
naca na.

⁹ Gusel-le' tu benne' weselá chee guselé'
bēneache chee'.

Tu chí'izqueze nadxixruj be'e xel-la'
wezría chee'.

Lá'azxa, ne tu da zrébedxu naca La Le'.

¹⁰ Chee su laudxu gácadxu sina, dxun na
ba xen zrébedxu

Xránadxu Dios.

Dxeléajni'i xanne' xúgute benne' ca' dx-
elune' ca zaj naca
da nadxíxruje'.

Tu chí'izqueze dxal-la' güe lá'anadxu Lē'.

112 Ba neza zrente naca na chee
bénnea' dxezrebe'

Xránadxu Dios,
ne ca zaj naca da bdxixruj be'e dxezaca
ba lázrele'ene'.

²Zri'ine zre sua bénnea' xelape' xel-la'
dxenná bea

lu xezr la xu,
na' gaca chawe' chee benne' xrlátaje ca'.

³Da zan da de, ne xel-la' gunní'a zaj zra
na xu'u lizre',

ne tu chí'izqueze zua da xrlátaje da dxun
bénnea'.

⁴Dxusaní' tu xi' lu da chul-la naga zaj zra'
benne' li lazre' ca',

benne' ca' zaj naque' zren lazre', ne
xrlátaje,

ne dxelexache lazre' bénneache.

⁵Tu benne' xrlátaje dxexache lazre'
bénneache,

ne dxusané' le' dumí.

Lu da xrlátaje dxenná bé'ene' da zaj xu'u
lu ne'e.

⁶Chee le' na' quebe bi gutá na le' lu lataj
naga zue',

na' tu chí'izqueze xeajlesá lazre' bén-
neache ca'.

⁷Quebe zrebe' gate xenne' dxaca da
calela chee

da xu'u lu ne'e.

Zē chacha lázrdawe' lawe' da dxuxrén
lazre' Xránadxu Dios.

⁸Zua chawe' lázrdawe', ne quebe bi
dxezrebe',

ca zrindxa zra lé'ene' gaca chee benne'
ca' guledábague' le'

ca da dxezá lazre'.

⁹Dxisié' da de chee', ne dxunézruje' da
gácale

benne' xache' ca',

ne tu chí'izqueze zua da xrlátaje da
dxune'.

Lu da xabáa xegá'ana szren xel-la'
dxenná bea chee'.

¹⁰Walé'e benne' wen da calela da nigá,
na' gueque zréajene'.

Gágu xa'ate lazre', ne cue'e gunne xue.

Xelenite da ca' dxelezá lazre' benne' ca'
dxelune' da calela.

113 ¡Le'e, wen zrin chee Xránadxu
Dios, le güe lá'ana Lē'!

¡Le güe lá'ana La Xránadxu Dios!

²¡Gaca ba lá'azxa La Xránadxu Dios,

na'a zra, ne chadía chacanna!

³¡Naga dxalaj gubizra ca zrinte naga
dxebía na

gaca ba lá'azxa La Xránadxu Dios!

⁴¡Szrente nagá'ana Xránadxu Dios lawe'
dute xezr la xu,

na' lówela xabáa dxe' da xabáa chee'!

⁵¿Núzraqueze naca ca naca Xránadxu
Dios,

Bénnea' dxe'e xabáa na'la?

⁶Dios dxun cuine' dxexruj lazre' chee'
lé'ene'

da de zran xabáa, ne lu xezr la xu.

⁷Dios dxechise' benne' xache' lu xu xrte,
ne dxebéaje' benne' baxache' lu da dx-
ezaca zi'e,

⁸na' dxune' dxelebé' benne' caní ládujla
benne'

dxelenná be'e,

ládujla benne' ca' dxelenná bé'ene' bén-
neache chee'.

⁹Dxune' zua nu'ula zue' tuze ládujla
zrí'inequeze' ca',

na' dxebé nu'ula nigá lawe' da naque'
xrna bi cheéqueze'.

¡Gaca ba lá'azxa Xránadxu Dios!

114 Gate beledxúaj benne' Israel
ca' lu xezr la xu Egipto,

beledxúaj zri'ine zre sua Jacob lu xezr la
xu chee

benne' zitu' ca',

²na' gulaca zri'ine zre sua Judá ca tu xu'u
lizre Dios,

gulaca benne' Israel ca' naga dxenná
be'e.

³ Ble'e Nísadau' Xrna da nigá, na' bzzrun-
nuj na,
na' gugá xegu Jordán.

⁴ Gulexrite xi'a zri'a ca' ca dxelexrite
chivo ca',
na' gulexrite xi'adu ca' ca dxelexrite
chíbudu ca'.

⁵ ¿Bizra guca chiu', nísadau', lawe' da
ben na bzzrúnuju'?

¿Bizra guca chiu', xegu Jordán, lawe' da
ben na gugú'?

⁶ Le'e, xi'a zri'a ca', ¿Bizr chee na'
guxrítele ca dxelexrite
chivo ca'?

Le'e, xi'adu ca', ¿Bizr chee na' guxrítele
ca dxelexrite
chíbudu ca'?

⁷ Dxezrize xezr la xu lau Xránadxu Dios,
lau Dios chee Jacob.

⁸ Dios nigá bene' bexaca xiaj xre' tu beaj
nisa,

na' bexaca xiaj tu ga dxalaj nisa.

115 Quegá netu', Xran.
Quegá cuintu', san Lué'queze
dxal-la' xucá'ana szrentu'
ne chee xel-la' zri'i lazre' chiu', ne xel-la'
li lazre' chiu'.

² ¿Bizr chee na' dxun na ba xen xu-
luchebe bèneache netu':

“Gazra zua Dios chee?”

³ Dios cheedxu zue' xabáa.

Dxune' ca da dxaca lázrequeze'.

⁴ Dios ca' chee benne' ca' zaj naca na
bedáu' plata,

ne bedáu' oro, da nun ni'a na' bèneache.

⁵ Zaj zua dxu'a na, san quebe dxelenné
na.

Zaj zua xiaj lau na, san quebe dxelelé'e
na.

⁶ Zaj zua naga na, san quebe dxelén na.
Zaj zua zrina na, san quebe dxelelé'e na.

⁷ Zaj zua na' na, san quebe bi dxelecá'a
na.

Zaj zua ni'a na, san quebe dxeledá na.

Quebe dxedxuj chi'i na lba na.

⁸ Ca zaj naca na, zaj naca benne' ca' zaj
nune' na,

ne benne' ca' dxuluxrén lazre' na.

⁹ Le guxrén lazre' Xránadxu, le'e, benne'
Israel ca'.

Le' dxácalene' le'e, ne dxuxúe' le'e.

¹⁰ Le guxrén lazre' Xránadxu, le'e, bxruze
chee Dios,

nácale zri'ine zre sua Aarón.

Le' dxácalene' le'e, ne dxuxúe' le'e.

¹¹ Le guxrén lazre' Xránadxu, le'e dx-
ucá'ana szrenle Le'.

Le' dxácalene' le'e, ne dxuxúe' le'e.

¹² Xránadxu dxajsá lazre' dxi'u, na' guné'
dxi'u da chawe'.

Guné' da chawe' chee benne' Israel ca'.

Guné' da chawe' chee bxruze chee',
zri'ine zre sua Aarón.

¹³ Guné' da chawe' chee xúgute' benne'
dxelape' Le' ba lá'ana,

benne' blau ca', ne benne' quebe zaj
naque' blau.

¹⁴ Gun Xránadxu chan zri'inu' ca',
ne chan zri'ine bi biu chiu' ca'.

¹⁵ Gun Xránadxu da chawe' chiu'.

Naque' Bénnea' ben xabáa, ne xezr la xu.

¹⁶ Chee tuze Xránadxu naca xabáa,
san bnézruje' bèneache xezr la xu.

¹⁷ Benne' zaj nate quebe gaca xelúe
lá'ane' Xránadxu,

ne quebe gaca benne' ca' zaj zue' lu
xedxu ba.

¹⁸ Dxi'u, benne' ban, güe lá'anadxu
Xránadxu,

na'a zra, ne chadía chacanna.

¿Le güe lá'ana Xránadxu!

116 ¿Nazrí'ida' Xránadxu Dios
lawe' da benne' chi'a, ne da
gunaba' lawe',

² ne lawe' da bzē nague' chia!

Chee le' na' guláwizra' Le' dxácate' naca
bana'.

³ Guzúa' lu da stēbe chee xel-la' gute,

ne bzreba' ba zua' chu'a lataj ba xa'.

Guzúa' lu da stēbe, ne guzaca zi'a.

⁴Nadxa bláwizra' Xránadxu Dios, gunnía':

Xrana' Dios, bselá bénne'du xu'a.

⁵Cháwe'le'e naca Xránadxu Dios, ne xr-látaje naque'.

Awe', dxexache lazre' Dios cheędxu dxi'u.

⁶Dxuxúe Xránadxu benne' dxexruj lazre' ca'.

Gate na' guzúa' lu da štebe bselé' neda'.

⁷Ben dipa lazre', bénne'du xu'a,

lawe' da nun Xránadxu da chawe' chiu'.

⁸Lue', Xran, bseláu' bénne'du xu'a lu na' xel-la' gute,

cheę québedxa cuezre we'a, ne cheę quebe cheajcházia'.

⁹Ta' lau Xránadxu Dios

naga zaj zra' benne' ca' zaj naca bané'.

¹⁰Guxéajle'a cheę', na' cheę le na' bchálaja', lácala guzaca zí'le'a.

¹¹Lu xel-la' dxezrebe chia', gunnía':

Zaj naca xúgute bénneache benne' wen lazre' ca'.

¹²¿Bizra quízrujqueza' Xránadxu Dios cheę xúgute da chawe' da bene' chia'?

¹³Si'a lu ne'e xel-la' weselá,

ne guláwizra' Xránadxu Dios.

¹⁴Na'a guna' da ca' guchebe lazra' lau Xránadxu.

Guna' na lau xúgute bénneache cheę'.

¹⁵Xránadxu Dios dxexę gunne xue

cheę bénneache cheę' gate dxelátie'.

¹⁶Xrana' Dios, da li naca' wen zrin chiu'.

Naca' wen zrin chiu', ne zri'ine nu'ula wen zrin chiu'.

Lue' bzúruju' da zaj nadxéaj na neda'.

¹⁷Da güe lá'ana' Lue' gaca na ca tu béadau' gutia' lau',

ne gucá'ana szrena' Lau', Xrana' Dios.

¹⁸Lau Xránadxu Dios guna' da ca' guchebe lazra' cheę',

da guna' lau xúgute bénneache cheę'.

¹⁹Guna' na chale'aj xu'u lizre Xránadxu Dios,

da dxex' na lu'ule xezre Jerusalén.

¿Gaca ba lá'azxa Xránadxu Dios!

117 ¿Le güe lá'ana Xránadxu Dios, le'e, benne' dutę xezr la xu!

¿Le güe lá'ana Le', le'e, xúgute bénneache,

²lawe' da zrente naca xel-la' zri'i lazre' cheę' ca nazrí'ine' dxi'u,

ne chadía chacanna naca xel-la' li lazre' cheę'!

¿Le güe lá'ana Xránadxu!

118 ¿Le güe lá'ana Xránadxu Dios lawe' da naque' xrlátaje,

ne lawe' da chadía chacanna dxexache lazre' dxi'u!

²Dxal-la' xelenná benne' Israel ca':

¿Chadía chacanna dxexache lazre' dxi'u!

³Dxal-la' xelenná zri'ine zre sua Aarón:

¿Chadía chacanna dxexache lazre' dxi'u!

⁴Dxal-la' xelenná benne' ca' dxelezrebe' Xránadxu Dios:

¿Chadía chacanna dxexache lazre' dxi'u!

⁵Gate na' guzúa' lu da štebe bláwizra' Xránadxu Dios,

na' bechebe Xránadxu, ne bselé' neda' lu da na'

bexru na neda'.

⁶Zuale' Xránadxu neda', na' québequeze zreba'

bi xelún bénneache chia' neda'.

⁷Zúale' Xránadxu neda' ládujla benne' ca' dxelácalęne' neda'.

Cheę le na' le'eda' cheajlechaze benne' ca' dxelecuídene' neda'.

⁸Cháwe'dxa naca guxrén lázredxu Xránadxu Dios

quézcala guxrén lázredxu bénneache.

⁹Cháwe'dxa naca guxrén lázredxu Xránadxu Dios

quézcala guxrén lázredxu benne' dxelenná be'e.

¹⁰Gulechaj benne' xúgute cue' xezr la xu neda',

na' lu La Xránadxu Dios guzría xi'a benne' ca'.

¹¹Guléchaję' neda', ne buluchídie' neda', na' lu La Xránadxu Dios guzría xi'a benne' ca'.

12 Guléchaje' neda' ca dxelún
 bescutuche',
 na' guca xel-la' dxelezá'a chee' ca tu xi'
 da dxuzexxe na
 xixre' xeche' bizre,
 na' lu La Xránadxu Dios guzría xi'a
 benne' ca'.
 13 Buluzrigue' neda' chee' cheajcházia'
 na' gúcale Xránadxu Dios neda'.
 14 Naca Xránadxu Dios ca tu xu'u naga
 zua chawa',
 na' tu gúl-lazqueza' chee' lawe' da
 Léqueze' dxuselé' neda'.
 15 Xel-la' dxelebé dxelul-la benne' xrlá-
 taje ca'
 lawe' da dxuselá Xránadxu le'.
 Dute xel-la' waca chee' dxun Xránadxu
 Dios da zrente' ca'.
 16 Szrente' nagá'ana xel-la' waca zren
 chee' Xránadxu Dios.
 Da zrente' ca' dxun xel-la' waca zren chee'
 Xránadxu.
 17 Québequeze gatia', san gaca bana',
 na' guzenda' bènneache ca zaj naca da
 nun Xránadxu.
 18 Bde Xránadxu neda' lu da ba xa',
 san quebe bde' neda' lu na' xel-la' gute.
 19 Gusalaj dxa xu'u chee' chu'a naga
 guchi'u chia', Xran,
 na' chu'a na', ne güe lá'ana' Lue', Xrana'
 Dios.
 20 Dxa xu'u nigá naca na chee' Xránadxu
 Dios.
 Dxa xu'u nigá dxelú'u benne' xrlátaje ca'.
 21 Güe lá'ana' Lue', Xran, lawe' da bennu'
 chia',
 ne bseláu' neda' lu da guca chia'.
 22 Xij na' da buluzúa benne' wen xu'u ca'
 chalá'ala,
 le' na' naca na xij blau.
 23 Da nigá ben Xránadxu,
 na' naca na tu da dxexebánedxu.
 24 Zra nigá naca na zra da ben Xránadxu.
 Béle'edxu, ne súadxu lu da ba neza lu zra
 nigá.

25 Xrana' Dios, dxata' xueda' Lue' guseláu'
 netu' na'a.
 Dxata' xueda' Lue', Xrana', gunu' chepe
 ban na'a da dxuntu'.
 26 Ba neza zrente' naca na chee' bènnea'
 ze'e waláz chee'
 Xránadxu Dios.
 Lu xu'u lizre Xránadxu Dios nigá
 dxenábantu'
 gaca chawe' chiu'.
 27 Xránadxu naque' Dios, ne ba benne'
 dxi'u tu da dxusaní na.
 Le guchéaj béadu ca' gútele lawe' lu luzu
 cugu chee'.
 28 Nacu' Lue' Dios chia', na' güe lá'ana'
 Lue'.
 Dios chia', gucá'ana szrena' Lue'.
 29 ¡Le güe lá'ana Xránadxu Dios lawe' da
 naque' xrlátaje,
 ne lawe' da chadía chacanna dxexache
 lazre' dxi'u!

Da dxun da bdxixruj be'e Dios dxi'u

119 Ba neza zrente' naca na chee'
 benne' ca' tu dxelúnzqueze'
 da naca du lazre',
 benne' ca' tu dxelúnzqueze' ca dxenná da
 bdxixruj bea
 Xránadxu Dios.
 2 Ba neza zrente' naca na chee' benne' ca'
 tu dxelúnzqueze'
 ca dxusede dizra' chee' dxi'u,
 na' dute xichaj lázrdawe' dxuluzúe' dizra'
 chee'.
 3 Benne' caní québequeze dxelune' da
 zrinnaj,
 benne' ca' tu dxelúnzqueze' ca dxenná
 Dios dxal-la' xelune'.
 4 Lue', Xran, bsízrenu' netu' chee' gun
 xánnetu'
 ca zaj naca da bdxixruj be'u Lue'.
 5 Dxaca lázrele'a tu gúnzqueza'
 ca zaj naca xrba chiu'.
 6 Nadxa québequeze xedué'eda',
 na' cue'a gunne xue guna' xígute da bdx-
 ixruj be'u.

⁷ Dute xel-la' li lazre' chia' güe lá'ana' Lue' gate ba nusédia' da ca' nuchi'u cheentu', da zaj naca na xrlátaje.

⁸ Tu gúnzqueza' ca da dxenná be'u. Québequeze cueaj xíchaju' neda'.

Dxal-la' gundxu da gunnáqueze Dios

⁹ ¿Ájala gun benne' cuide' gunbe' da naca na xrlátaje?

Dxal-la' tu gúnzquezebe' ca dxenná xrtizru'.

¹⁰ Dute xichaj lázrdawa' dxuna' ba xuzre guna' da dxennáu' Lue'.

Quebe gu'u lataj guzúa' chalá'ala ca da bdxixruj be'u.

¹¹ Lu xichaj lázrdawa' tu dxúnzqueza' ca da dxennáu' Lue'

chee quebe guna' dul-la tábaga' Lue'.

¹² Ba lá'azxa nacu' Lue', Xrana' Dios.

Bséde neda' da ca' dxenná be'u.

¹³ Nen dxú'aqueza' ba bzenda' bénneache

ca zaj naca da ca' nuchi'u cheentu'.

¹⁴ Dxebéle'edxada' tu dxúnzqueza' ca dxusede dizra' chiu' netu',

quez ca dxelebé benne' ca' délē'e xel-la' gunná' chee'.

¹⁵ Gulaba lazra' ca zaj naca da bdxixruj be'u Lue',

ne nna' xánnia' ca dxennáu' dxal-la' guntu'.

¹⁶ Bélé'eda' guna' ca da dxenná be'u, ne quebe gal-la lazra' ca zaj naca xrtizru'.

Dxebéle'edxu dxundxu da dxennáqueze Dios

¹⁷ Ben gaca chawe' chia' neda', wen zrin chiu',

na' gaca bana', ne tu gúnzqueza' ca naca xrtizru'.

¹⁸ Gusalaj xiaj lawa' chee nna'a da zrente ca' da zaj zua na lu da bdxixruj be'u.

¹⁹ Naca' ca tu benne' dxedaze' lu xezr la xu nigá.

Ben chéajni'ida' da dxenná da bdxixruj be'u.

²⁰ Dxedú lazra' lawe' da tu chí'izqueze dxezá lazra' guna' da ca' nuchi'u cheentu'.

²¹ Gudil-lu' benne' ca' dxulucá'ana szren cuine',

benne' wen da calela ca', benne' ca' dxuluzúe' chalá'ala da bdxixruj be'u.

²² Quebe gu'u lataj nu benne' nne' schanni' chia',

na' quegá gucá'ana dítaje' neda' lawe' da tu dxúnzqueza' ca dxusédenu' netu'.

²³ Cá'anqueze benne' dxeleenná bea ca' gulenné' chia'.

Neda', wen zrin chiu', blaba lazra' ca zaj naca xrba chiu'.

²⁴ Dxezaca ba lázreleña' da dxusede dizra' chiu' netu'.

Dxuluzéajni'i na neda'.

Dute lázrdaudxu gundxu da dxennáqueze Dios

²⁵ Zua bénne'du xu'a lu da stebe chee xel-la' gute.

Ben dipa xichaj lázrdawa' nen xrtizru'.

²⁶ Ble'eda' Lue' ca zaj naca da dxuna', na' bezi'u neda'.

Bséde neda' ca zaj naca xrba chiu'.

²⁷ Ben chéajni'ida' ca gaca guna' ca bdxixruj be'u

chee gulaba lazra' ca zaj naca da zrente ca' da benu'.

²⁸ Dxedú lazra' lawe' da dxewí'ine lázrele'a.

Bexru chacha neda' ne chee xrtizru'.

²⁹ Quebe gu'u lataj guna' da naca na wen lazre'.

Lu xel-la' dxexache lazre' chiu' bséde neda' da bdxixruj be'u.

³⁰ Bechugu lazra' guna' da naca li lazre',

na' dxe'a gunne xue guna' da ca' nuchi'u
cheentu'.

³¹ Tu dxúnzqueza' ca dxusede dizra' chiu'
netu'.

Xran, quebe guzú' neda' lu xel-la' stu'.

³² Tu gúnzqueza' ca bdxixruj be'u,
gate guzéajni'idxenu' neda'.

Dxaca lázredxu chéajni'idxu xrtizra' Dios

³³ Xran, bsede neda' chee guna' ca naca
xrba chiu',

na' tu gúnzqueza' ca naca na ca zrindxa
zra cheajsé chia'.

³⁴ Bzéajni'i neda', na' tu gúnzqueza' da
bdxixruj be'u,

na' duté lázrdawa' guna' ca naca na.

³⁵ Ble'e neda' chee guna' da bdxixruj
be'u,

lawe' da dxaca lázrequeza' guna' ca
dxenná na.

³⁶ Ben sa lazra' guna' ca dxusede dizra'
chiu' netu',

chee quebe gaca' benne' wecude.

³⁷ Quebe gu'u lataj gucá'ana szrena'
bedáu' xia xaga ca'.

Ben dipa xichaj lázrdawa' chee guna' ca
dxenná xrtizru'.

³⁸ Ben ca dxenná xrtizru' da guchebe
lazru' chia' neda',

wen zrin chiu', chee zreba' Lue'.

³⁹ Bde chalá'ala dizra' schanni' da dxe-
lenné' chia',

da na' dxezreba', lawe' da xrlátaje zaj
naca xrba chiu'.

⁴⁰ Dxezá lazra' guna' da bdxixruj be'u.

Ben dipa xichaj lázrdawa' nen da xrlátaje
chiu'.

Dxuxrén lázredxu xrtizra' Dios

⁴¹ Gudá xexache lazru' neda', Xrana'
Dios.

Gudá guseláu' neda', ca ba guchebe lazru'
gunu'.

⁴² Becheba' lau bénnea' dxusi'e neda' xel-
la' stu', gunnía':

Dxuxrén lazra' xrtizra' Xrana' Dios.

⁴³ Ben tu séquezda' guchálaja' dizra' li
lazre' chiu',

lawe' da dxebeza lazra' da ca' dxuchi'u
cheentu'.

⁴⁴ Tu gúnzqueza' ca dxenná da bdxixruj
be'u.

Guna' na tu chí'izqueze, ne chadía
chacanna.

⁴⁵ Láqueza' neda'

lawe' da dxe'a gunne xue guna' ca bdx-
ixruj be'u.

⁴⁶ Guchálajqueza' ca dxusede dizra' chiu'
netu'

lau benne' wenná bea ca', na' québe-
queze xedu'éeda'.

⁴⁷ Wabéle'equeza' guna' ca bdxixruj
be'u,

da ca' nazrí'ile'eda'.

⁴⁸ Dxechebe lazra' guna' ca bdxixruj be'u,
da nazrí'ida', na' gulaba lazra' ca naca
xrba chiu'.

Tu zúazqueze xrtizra' Dios

⁴⁹ Bsa lazre' da guchebe lazru' chia'
neda',

wen zrin chiu', da na' benu' dxebeza
lazra'.

⁵⁰ Gate na' guzaca zi'a, guzúa' tu da bexúe
zren na neda'

lawe' da ben dipa xrtizru' xichaj
lázrdawa'.

⁵¹ Benne' dxulucá'ana szren cuine' belún
lalé' chia' neda',

san québequeze gusana' da dxenná da
bdxixruj be'u.

⁵² Xeajsá lazra' da bchi'u cheentu' nédx-
udaute, Xran,

na' bexaca zrena'.

⁵³ Nen duté xel-la' dxezrá'a guzúa' lu da
stebe

ne chee benne' ca' dxelune' da zrinna,
benne' ca' dxuluzúe' chalá'ala da bdx-
ixruj be'u.

⁵⁴ Xrba chiu' ca' gulaca na chia' ca tu da
dxul-la'

gate na' zua' tu xęzr la xu zitu'.

⁵⁵ Chizrela xeajsá lazra' lau' Lue', Xrana' Dios,
na' tu bęnzqueza' ca dxenná da bdxixruj
be'u.

⁵⁶ Lu da ba neza caní guzúa'
lawe' da tu bęnzqueza' ca zaj naca da
bdxixruj be'u.

Dxebedxu dxulábadxu xrtizra' Dios

⁵⁷ Da dxezá lazra' nácaquezu' Lue',
Xrana' Dios.

Ba gunnía' tu gúnzqueza' ca naca xrtizru'.

⁵⁸ Dute lázrdawa' dxenaba' Lue' xidu' gá-
calęnu' neda'.

Bexache lazre' neda' ca ba gunnáu' gunu'.

⁵⁹ Gunná' xannia' ca zaj naca da dxuna',
na' xecha lasa dxuna' ca dxusede dizra'
chiu' netu'.

⁶⁰ Bena' ba xuzre, ne quebe guzreda'
cheę tu gúnzqueza' ca bdxixruj be'u.

⁶¹ Xralaj cheę benne' ca' dxelunę' da
calela zaj nuchele na
neda',

san quebe ne gal-la lazra' ca dxenná da
bdxixruj be'u.

⁶² Dxęla dxasa' cheę güe lá'ana' Lue'
lawe' da xrlátaje zaj naca da ca' dxuchi'u
cheęntu'.

⁶³ Naca' tuze nen xúgute benne' ca' dx-
elezrebe' Lue',
benne' ca' tu dxelúnzqueze' da bdxixruj
be'u.

⁶⁴ Xrana' Dios, dxezrín dute xęzr la xu
xel-la' dxexache lazre' chiu'.
Bsede neda' cheę guna' ca dxenná xrba
chiu'.

Zácale'e da wnnáqueze Dios

⁶⁵ Ba bęnu' guca chawe' chia' neda', węn
zrin chiu'.

Xran, bęnu' na cáteze dxenná xrtizru'.

⁶⁶ Bsede neda' cheę gueque be'eda' da
naca xrlátaje,
ne cheę chęajni'ida' lawe' da dxęajle'a da
bdxixruj be'u.

⁶⁷ Nédxula ca bzęxruju' neda' gudéa'
chalá'ala,
na' na'a tu dxúnzqueza' ca dxenná
xrtizru'.

⁶⁸ Nacu' xrlátaje, ne dxunu' gaca chawe'
cheęntu'.

Bsede neda' guna' ca naca xrba chiu'.

⁶⁹ Benne' dxulucá'ana szren cuine' gulen-
nę' chia'

da węn lazre'
san dute lázrdawa' tu gúnzqueza' ca bdx-
ixruj be'u.

⁷⁰ Quebe xu'u xel-la' dxęajni'i lázrdau
benne' ca'.

Neda' dxezaca ba lázrelęna' da dxenná
da bdxixruj be'u.

⁷¹ Chawe' naca bzęxruju' neda'
cheę gusédia' guna' ca naca xrba chiu'.

⁷² Cháwedxa naca da bdxixruj be'u chia'
neda'
quez ca gaxúa gaxúane dumí oro, ne
plata.

Cháwle'e naca da wnnáqueze Dios

⁷³ Nen ná'quezu' bęnu' neda' cáteze
naca'.

Bzęajni'i neda' cheę gusédia' guna' ca
bdxixruj be'u.

⁷⁴ Benne' dxelezrebe' Lue' xelexé'ene'
neda'.

Xelebene' lawe' da dxebeza lazra' gaca ca
dxenná xrtizru'.

⁷⁵ Xran, ba nézquezda' xrlátaje naca da
dxuchi'u cheęntu',
na' lu dute xel-la' li lazre' chiu' bsaca zi'u
neda'.

⁷⁶ Lu dute xel-la' dxexache lazre' chiu'
bexúe zren neda'

cáteze dxenná da guchębe lazru' chia'
neda', węn zrin chiu'.

⁷⁷ Bexache lazre' neda' cheę gaca bana'
lawe' da dxezaca ba lázrelęna' da bdx-
ixruj be'u.

⁷⁸ Ben xelexedué'e benne' ca'
dxulucá'ana szren cuina

lawe' da gulenné' schanni' chia', ne
quebe bi bena' chee'.

Neda' gulaba lazra' ca da bdxixruj be'u.

⁷⁹ Ben xelexelá' benne' ca' dxelezrebe'
Lue',

chee xelenne' chia',

na' xulusédie' da dxusede dizra' chiu'
netu'.

⁸⁰ Ben gaca' du lazre' ca naca xrba chiu'
chee québequeze xedué'eda'.

Gun Dios ca dxenná xrtizre'

⁸¹ Zua bénne'du xu'a lu da stebe

lawe' da dxebeza' xidu' guseláu' neda',
na' dxebeza lazra' gaca ca dxenná
xrtizru'.

⁸² Dxezé bxinne xiaj lawa' lawe' da dx-
ezá lazra' xrtizru',

dxennia': ¿Bátaqueze xexúe zrenu'
neda'?

⁸³ Dxebizra' ca tu buzude xide ze na lu
zren,

san quebe dxal-la lazra' guna' ca dxenná
xrba chiu'.

⁸⁴ ¿Bal-la zra gaca bana' neda', wen zrin
chiu'?

¿Bátaqueze gudéu' lu da ba xa' benne' ca'
dxeláu zi' xuzre' neda'?

⁸⁵ Benne' dxulucá'ana szren cuine'
gulene' tu xedxu

naga cheajcházia'.

Québequeze dxelune' ca dxenná da bdx-
ixruj be'u.

⁸⁶ Da líqueze zaj naca xúgute da bdxixruj
be'u.

Gúcale neda' lawe' da dxeláu zi' xuzre'
neda',

ne quebe bi nuna' chee'.

⁸⁷ Xeláteze la belutié' neda',

san quebe ne gusana' guna' ca bdxixruj
be'u.

⁸⁸ Lu xel-la' dxexache lazre' chiu' ben
dipa xichaj lázrdawa',

chee tu gúnzqueza' ca dxusede dizra'
chiu' netu'.

Dxéajle'dxu xrtizra' Dios

⁸⁹ Xrana' Dios, tu chí'izqueze

zua xrtizru' xabáa na'la.

⁹⁰ Xel-la' li lazre' chiu' sua na chee xúgute
bénneache.

Lue' bzua chúchuquezu' xezr la xu, na'
zúaqueze na.

⁹¹ Ne chee da gunnáquezu' zaj nnita
xúgute da de,

na' xúgute da ca' dxelún na zrin chiu'.

⁹² La quebe bezaca ba lázrelena' da bdx-
ixruj be'u

bache benítia' lu da guzaca zi'a.

⁹³ Cabátaqueze gal-la lazra' da bdxixruj
be'u

lawe' da ne chee da ca' ba btipu' lazra'.

⁹⁴ Chiu' Lue' naca' neda'.

Bselá neda', lawe' da dxuna' ba xuzre
guna' ca bdxixruj be'u.

⁹⁵ Benne' dxelebéaj xichaj Dios gulenné'e
neda' chee

xuluzría xi'e neda',

san neda' dxulaba lazra' ca dxusede
dizra' chiu'.

⁹⁶ Dxel'équezda' dxeajsé chee xúgute da
de lu xezr la xu,

san da bdxixruj be'u Lue' québequeze
cheajsé chee na.

Dxaca lázredxu

gúnbeadxu xrtizra' Dios

⁹⁷ Dios, nazrí'ile'eda' da bdxixruj be'u.

Du zra dxulaba lazra' ca naca na.

⁹⁸ Ne chee da bdxixruj be'u nunu' ná-
cadxa' sina ca benne' ca'

dxeledábague' neda'

lawe' da tu zúalezqueze da bdxixruj be'u
neda'.

⁹⁹ Dxéajni'idxeda' ca benne' ca' dxulusé-
dene' neda'

lawe' da dxulaba lazra' ca dxusede dizra'
chiu' neda'.

¹⁰⁰ Ba guxéajni'idxeda' ca benne' gula ca'
lawe' da tu dxúnzqueza' ca dxenná da
bdxixruj be'u.

¹⁰¹ Bena' ba xuzre quebe bi da calela
guna'

chee tu gúnzqueza' ca dxenná xrtizru'.

¹⁰² Quebe bsana' dxuna' da ca' nuchi'u
cheentu'

lawe' da Luéqueze bsédenu' neda'.

¹⁰³ Xrtizru' naca na ca tu da zízrele'e lu
dxu'a.

Nácadxa na zixre ca bzrina'dau' lu dxu'a.

¹⁰⁴ Ne chee da bdxixruj be'u naca' benne'
sina.

Chee le na' dxecuída' xúgute da wen
lazre'.

Xrtizra' Dios dxuzéajni'i na dxi'u

¹⁰⁵ Ca tu xi' naca xrtizru' naga dxeda',
da dxusení na neza xu'a.

¹⁰⁶ Bzétaja' Dios, ne guchebe lazra'
tu gúnzqueza' ca nuchi'u cheentu' da
naca na xrlátaje.

¹⁰⁷ Dxezaca zíle'a.

Xrana' Dios, btipa lazra' cáteze guchebe
lazru' gunu'.

¹⁰⁸ Xrana' Dios, dxata' xueda' Lue' si'u da
dxue lá'ana' Lue',
ne gusédenu' neda' guna' ca nuchi'u
cheentu'.

¹⁰⁹ Tu zúazqueza' lu da stebe chee xel-la'
gute,
san québequeze ne gal-la lazra' guna' ca
bdxixruj be'u.

¹¹⁰ Benne' dxelebéaj xichaj Dios buluza-
le' xralaj

da queła na neda'
san neda' quebe bsana' dxuna' ca bdx-
ixruj be'u.

¹¹¹ Ba gucá'a da dxusede xrtizru' neda'
chee gaca na

da gápaqueza' chadía chacanna
lawe' da zaj naca xrtizru' da dxezaca ba
lázrele'a.

¹¹² Zúatequeze lázrdawa' guna' ca zaj
naca xrba chiu'

tu chí'izqueze, ca zrindxa zra cheajsé
chia'.

Bexácadxu chawe' ne chee xrtizra' Xránadxu

¹¹³ Dxecuída' benne' ca' dxelune'
láweze da xrlátaje,

san nazrí'ida' da dxenná da bdxixruj be'u.

¹¹⁴ Nacu' Lue' ca tu xu'u naga zua chawa',
ne ca tu

da dxucu'uj na neda',

lawe' da dxebeza lazra' gaca na ca
dxenná xrtizru'.

¹¹⁵ Le gucuasa naga zua', le'e, benne' wen
da calela,

lawe' da tu gúnzqueza' ca bdxixruj bea
Dios chia'.

¹¹⁶ Bze chacha neda' cáteze dxenná xr-
tizru', na' gaca bana',
ne quebe xedué'eda' chee da na' dxebeza
lazra'.

¹¹⁷ Bze chacha neda', na' la',
ne tu xezaca ba lázrezqueza' ca naca xrba
chiu'.

¹¹⁸ Bchuchu bléaju' xúgute benne' ca' bu-
lusane' ca naca
xrba chiu'

lawe' da wen lazre' naca xel-la' sina chee
benne' ca'.

¹¹⁹ Ca bebe bzria xi'u xúgute benne' ca'
dxelebéaj xíchaje'

Lue' lu xezr la xu nigá.

Chee le na' nazrí'ida' da dxusede dizra'
chiu' netu'.

¹²⁰ Dxezrize beła' dxen chia' lawe' da dx-
ezreba' Lue',

ne dxezreba' da dxuchi'u cheentu' da
naca na xrlátaje.

Dxal-la' gundxu ca dxenná xrtizra' Xránadxu

¹²¹ Ba bena' ca da nuchi'u cheentu', ne ca
naca da xrlátaje.

Quebe gudéu' neda' lu na' benne' ca' dx-
uluchínene' neda'.

¹²² Guchebe lazre' chia' gunu' gaca
chawe' chia'.

Quebe gu'u lataj benne' ca' dxulucá'ana
szren cuine'
xuluchínene' neda' xadía.

¹²³ Guzé bxxrinne xiaj lawa' lawe' da dxe-
beza' xidu'

guseláu' neda',
ne guchi'u cheentu' ca dxenná xrtizru'.

¹²⁴ Dute xel-la' dxexache lazre' chiu' ben
gaca chawe'

chia' neda', wen zrin chiu',
ne bşede neda' guna' ca naca xrba chiu'.

¹²⁵ Naca' wen zrin chiu'.

Bzėjni'i neda' cheę gúnbe'a da dxusede
dizra' chiu' netu'.

¹²⁶ Xrana' Dios, ba bzrin zra bi gunu',
lawe' da ba buluzúe' chalá'ala da bdx-
ixruj be'u.

¹²⁷ Cheę le na' neda' nazrí'idxeda' da bdx-
ixruj be'u Lue'

quézcala oro, ne quézcala galega oro.

¹²⁸ Cheę le na' dxéqueda' zaj nácadxa li
lazre'

da bdxixruj be'u ca xúgute da de,
na' dxecuída' xúgute da zaj naca na da
wen lazre'.

Dxaca lázredxu gundxu ca dxenná xrtizra' Dios

¹²⁹ Dxebánentu' ca dxusede dizra' chiu'
netu'.

Cheę le na' du lazra' tu dxúnzqueza' ca
dxenná na.

¹³⁰ Gate nu dxuzájla'a ca naca xrtizru',
dxusaní na.

Dxun na dxelėjni'i benne' dxexruj lazre'
ca'.

¹³¹ Guxá dxu'a, ne gucá'a lazra'
lawe' da dzezá lazra' gúnbe'a da bdxixruj
be'u.

¹³² Gunná' neda', ne bexache lazre' neda',
ca tu dxúnzquezu' cheę benne' ca' zaj
nazrí'ine' Lue'.

¹³³ Ben tu gúnzqueza' ca dxenná xrtizru',
ne quebe gu'u lataj da zrinnaj nna be'e
na neda'.

¹³⁴ Bselá neda' lu na' benne' xichaj zra'a
ca',
na' tu gúnzqueza' ca dxenná da bdxixruj
be'u.

¹³⁵ Ben gaca chawe' chia' neda', wen zrin
chiu',

ne bşede neda' guna' ca zaj naca xrba
chiu' ca'.

¹³⁶ Nisa gudxezra' guca na ca tu xegu
nisa

lawe' da quebe dxelún bėnneache ca
bdxixruj be'u.

Da li naca da dxenná Xránadxu

¹³⁷ Xrana' Dios, xrlátaje nacu' Lue',
ne li lazre' naca ca dxuchi'u cheentu'.

¹³⁸ Da dxusede dizra' chiu' netu', da na'
bzu' lu na'ntu',

naca na da li, ne da li lazre'.

¹³⁹ Dxedú lazra' lawe' da dxéle'a gunne
xue

lawe' da gulal-la lazre' benne' ca' dx-
eledábage' neda'

ca zaj naca xrtizru'.

¹⁴⁰ Du lázrele'e naca xrtizru',

na' nazrí'ida' neda' na, naca' wen zrin
chiu'.

¹⁴¹ Ddexruj lazre' naca', na' dxuluzúe'
neda' chalá'ala,

na' quebe ne gal-la lazra' da bdxixruj
be'u.

¹⁴² Tu chí'izqueze zua da dxuchi'u
cheentu',

na' da li naca da bdxixruj be'u.

¹⁴³ Da dzezaca zi'a, ne da stebe zua' zaj
nuchuchuj na neda',

san dzezaca ba lázrele'na' da bdxixruj
be'u.

¹⁴⁴ Tu chí'izqueze naca li lazre' da
dxusede dizra' chiu'.

Bzėjni'i neda', na' gaca bana'.

Dxal-la' gulaba lázredxu da gunná Dios

¹⁴⁵ Dute lázrdawa' dxuláwizra' Lue',
Xrana' Dios.

Ben gaca chawe' chia', na' tu gúnzqueza'
ca dxenná xrba chiu'.

¹⁴⁶ Dxuláwizra' Lue'.

Bselá neda', na' tu gúnzqueza' ca dxusede
dizra' chiu' netu'.

¹⁴⁷ Bálala dxasa', na' dxuláwizra' Lue'.

Dxebeza lazra' gaca ca dxenná xrtizru'.

¹⁴⁸ Dxenná'aza' bedú xela,

cheę gulaba lazra' da bdxixruj be'u.

¹⁴⁹ Dute xel-la' dxexache lazre' chiu' bene
chi'a.

Xrana' Dios, da bchi'u cheentu' btipa
lazra'.

¹⁵⁰ Benne' dxeláu zi' xuzre' neda' ba zaj
zre'e xelune' chia'

da calela.

Zaj nusane' da dxenná da bdxixruj be'u.

¹⁵¹ Xrana' Dios, zu' Lue' gagu naga zua',
ne da li zaj naca xúgute da bdxixruj be'u.

¹⁵² Gate nate ba núnbe'a da dxusede
dizra' chiu' netu',

da na' nuzú' cheentu' tu chí'izqueze.

Da gunná Dios dxuzéajni'i dxi'u

¹⁵³ Gunná' xque ca dxezaca zi'a, ne bselá
neda'

lawe' da quebe ne gal-la lazra' da dxenná
da bdxixruj be'u.

¹⁵⁴ Bechebe waláz chia', ne bexa'u neda'.

Btipa lazra' nen xrtizru'.

¹⁵⁵ Stébele'e naca xeledá benne' ca' dxele-
béaj xíchaje'

Lue', Dios,

lawe' da quebe dxelebé'e gunne xue
xelune' ca naca xrba chiu'.

¹⁵⁶ Xrana' Dios, dxexache lázrele'u bén-
neache chiu'.

Btipa lazra' cáteze dxenná xrtizru' gunu'.

¹⁵⁷ Zánete zaj naca benne' ca' zaj nau zi'
xuzre' neda',

ne benne' ca' dxeledábage' neda',

san quebe ne gusana' dxuna' ca dxusede
dizra' chiu' netu'.

¹⁵⁸ Ble'eda' benne' ca' dxelún lazre', na'
dxegúteda' benne' ca'

lawe' da quebe dxelune' ca dxenná
xrtizru'.

¹⁵⁹ Gunná'xque, Xran, ca nazrí'ida' da
bdxixruj be'u.

Dute xel-la' dxexache lazre' chiu', btipa
lazra'.

¹⁶⁰ Da líqueze zaj naca xúgute xrtizru',
ne tu chí'izqueze zaj naca da dxuchi'u

cheentu' lu

da xrlátaje chiu'.

Da gunná Dios dxutipá lázredxu

¹⁶¹ Benne' ca' dxelenná be'e dxeláu zi'
xuzre' neda'

na' quebe bi nuna' chee'.

Dute lázrdawa' dxezreba' ca zaj naca
xrtizru'.

¹⁶² Dxebéle'eda' lu da dxenná xrtizru'
ca dxebé bénnea' dxezrel-lene' tu xel-la'
gunná'a zrente'.

¹⁶³ Dxecuédeda', ne dxegúteda' da wen
lazre'.

Nazrí'ida' da dxenná da bdxixruj be'u.

¹⁶⁴ Gazre lasa tu zra dxue lá'ana' Lue'

lawe' da xrlátaje naca ca dxuchi'u
cheentu'.

¹⁶⁵ Dxelebeza zri lázrele'e benne' ca' zaj
nazrí'ine'

da bdxixruj be'u,

na' quebe bi de da gun na cheajlecházie'.

¹⁶⁶ Xrana' Dios, dxebeza' Lue' xidu'
guseláu' neda',

ne tu dxúnzqueza' ca naca da bdxixruj
be'u.

¹⁶⁷ Dute lázrdawa' tu dxúnzqueza' da
dxusede dizra' chiu' netu',

ne nazrí'ile'eda' ca naca na.

¹⁶⁸ Tu dxúnzqueza' ca naca da bdxixruj
be'u,

ne ca dxusede dizra' chiu' netu'

lawe' da dxelé'equeznu' xúgute da
dxuna'.

Dxebéle'edxu xrtizra' Dios

¹⁶⁹ Xrana' Dios, bene da dxuláwizra' Lue'.
Bzéajni'i neda' ca dxenná xrtizru' gunu'.

¹⁷⁰ Bene da dxenaba' lau Lue'.

Bselá neda' ca dxenná xrtizru' gunu'.

¹⁷¹ Tu güe lá'anazqueza' Lue', Xran, gate ba nusédenu' neda' guna' ca naca xrba chiu'.

¹⁷² Tu guchálajzqueza' ca naca xrtizru' lawe' da xrlátaje naca ca dxenná be'enu' netu'.

¹⁷³ Guzúatequeze gácalenu' neda' lawe' da dxuna' ba xuzre guna' ca bdxixruj be'u.

¹⁷⁴ Dxezá lazra' guseláu' neda', Xrana' Dios.

Dxexaca ba lázrelena' da bdxixruj be'u.

¹⁷⁵ Ben gaca bana', na' güe lá'ana' Lue', na' da dxuchi'u chia' xelácale na neda'.

¹⁷⁶ Gudéa' chalá'ala ca dxedá tu zrila' naníteba'.

Bexilaj neda', wen zrin chiu', lawe' da quebe ne gal-la lazra' da bdxixruj be'u.

120 Gate guzúa' lu da stębe bláwizra' Xránadxu Dios, na' Le' gúcalene' neda'.

² Bselá neda', Xrana' Dios, lu na' benne' wen lazre' ca', ne lu na' benne' dxelezí xę'e ca'.

³ ¿Bizra gunna Dios le'e, benne' dxelezí xę'e?

¿Bizra da ba neza gaca na cheęle gate gudęe' le'e

lu da zi' da xa'?

⁴ Gudęe' le'e lu na' benne' ca' xuludęe' le'e xaga nalá xęche'ze,

ne xuluzríe' le'e xi' galaj.

⁵ Edxugúa neda'.

Dxaca chia' ca zúaqueza' ládujla benne' Mesec,

ne ca zua' tu lu xu'u xide cheę benne' Cedar.

⁶ Da zrente' ba guzúa' ládujla benne' caní dxuluzię' chalá'ala xel-la' dxebeza zri lazre'.

⁷ Neda' dxezá lazra' gata' xel-la' dxebeza zri lazre'.

Gate dxuchálaja' cheęn, dxeledíl-lale benne' ca' neda'.

121 Chisa xíchaja' nna'a da dxelún bénneache lu xi'a ca'.

¿Gazra za' da gácale na neda'?

² Da gácale na neda' za' lu na' Xránadxu Dios,

Bénnea' beņe' xabáa, ne xęzr la xu.

³ Quebe gu'e lataj cheajcházıu'.

Quebe gase Bénnea' dxuxúequeze' lue'.

⁴ Gunná' xque, quebe te bchigala chee Bénnea'.

Québequeze gase Bénnea' dxuxúequeze' benne' Israel ca.

⁵ Xránadxu Dios dxucú'uje' lue'.

Xránadxu Dios zuę' cuitu' xabela dxęgu'e lue' zrul-la.

⁶ Quebe guzezxe gubızra lue' te zra, ne quebe bi gune beu' lue' chızrela.

⁷ Xranu' Dios guxúequeze' lue' cheę quebe bi da caleła

gaca na chiu'.

Guxúequeze' bénne'du xu'u.

⁸ Xránadxu Dios guxúequeze' lue' gate dxdedxúaju,

ne gate dxexú'u, na'a zra, ne chadıa chacanna.

122 Gubélena' benne' ca' gulęe' neda':

“Chéajdxu xu'u lızre Xránadxu Dios.”

² Na'a zúadxu nigá, zęntu' dxa xu'u ze'e da naxechaj lue', xęzre Jerusalén.

³ Jerusalén naca na tu xęzre da belexunę',

na' naca na xrtante, ne dxęle'e na cháwedeau'.

⁴ Lu xęzre na' zjaca xúgute' cuen bénneache zaj de'e

Xránadxu Dios.

Dxelunę' ca dxenná dizra' da guzre Dios benne' Israel ca',

cheę xelúe lá'ane' La Xránadxu Dios.

⁵ Lu xęzre na' zaj dxe' benne' ca' dxuluchi'e cheę

benne' Israel ca',

naga zaj dxe' benne' xrtia David, benne' ca' dxelenná be'e.

⁶Le naba lau Dios gata' xel-la' dxebeza zri lazre'

lu xezre Jerusalén,

chee xelepe ban da dxelún benne' ca' zaj nazrí'ine' xezre na'.

⁷Dxenábantu' Dios sua xel-la' dxebeza zri lazre'

lu'ule ze'e da naxechaj na lue', Jerusalén, ne chee xelezrá' chawe' benne' zaj xu'e xu'u zren chiu'.

⁸Nazrí'ida' le sa' ljwezra', ne bi ljwezra' ca', na' dxennía':

Gata' xel-la' dxebeza zri lazre' chiu', xezre Jerusalén.

⁹Lawe' da nazrí'ida' xu'u lizre Xránadxu Dios

dxuna' ba xuzre gaca chawe' chiu'.

123 Chisa xíchaja' nna'a naga zu', Xran,

naga zu' Lue', zu' xabáa na'la.

²Ca dxun tu bi wen zrin dxenná'abe' bi nna xránabe',

ne ca dxun nu'ula wen zrin dxenná'abe' bi nna

nu'ula xránabe',

caní dxenná'adxu bi nna Xránadxu Dios

ca zrindxa zra xexache lazre' cheedxu.

³Bexache lazre' cheentu', Xránantu' Dios.

Bexache lazre' cheentu', lawe' da dxedú lázrentu'

lawe' da dxulucá'ana ditaj bénneache netu'.

⁴Dxedú lázrentu' lawe' da dxelún lala benne' gunn'a ca'

cheentu',

ne dxulucá'ana ditaj netu', benne' ca' dxulucá'ana szren

cuine'.

124 Chela ca gúcale Xránadxu Dios dxi'u.

Caní dxal-la' xeenná benne' Israel ca' na'a.

²Chela ca gúcale Xránadxu Dios dxi'u

gate guledíl-lale benne' ca' dxi'u,

³na' buluzría xi'te' dxi'u

lu duté xel-la' dxelezrá'a zrente chee',

⁴ne guca cheedxu ca dxaca chee benne' dxugacu nísadau' le', da na' gute na le'.

⁵Chela guca caní cheedxu, na' bétete da na' dxi'u.

⁶Dxal-la' xedxu Xránadxu Dios; Xcalenu',

lawe' da quebe be'e lataj benne' ca' xuluzría xi'e dxi'u.

⁷Beladxu ca dxelá tu bxinne lu xixruj chee benne' wezén bxinne.

Bzria xi' Xránadxu xel-la' dxenná bea chee benne' ca', na' beladxu.

⁸Naca Xránadxu Dios Bénnea' dxá-calene' dxi'u,

Bénnea' bénqueze' xabáa, ne xezr la xu.

125 Benne' ca' dxuluxrén lazre' Xránadxu Dios zaj naque' ca xi'a Sión,

da quebe nu seque' gutá, san tu chí'izqueze zua chacha na.

²Ca zaj zua xi'a ca' da zaj naxechaj na Jerusalén,

zua Xránadxu Dios, dxuxúequeze' bénneache chee' na'a zra,

ne chadía chacanna.

³Quegá tu chí'izqueze xeenná bea benne' ca' dxelune'

da calela lu xezr la xu chee benne' xrlátaje ca',

chee quebe xelaca benne' xrlátaje ca' tuze nen benne'

wen da zrinnaj ca'.

⁴Xrana' Dios, ben gaca chawe' chee benne' xrlátaje ca',

ne chee benne' ca' zaj naque' li lazre'.

⁵Benne' ca' dxelebéaj xichaj Dios chee xelune' da calela,

xucuasa Xránadxu Dios benne' ca' tu zren nen benne' ca'

dxelune' da zrinnaj.

Dxenaba' gata' xel-la' dxebeza zri lazre' chee benne' Israel ca'.

126 Gate Xránadxu Dios bselé' dxi'u lu na' benne' zitu' ca', ne begu'e dxi'u lu xezre Sión, gúquedxu dxennedxu xela.

²Nadxa bzirédxu, ne be lá'anadxu Xránadxu Dios.

Nadxa gulenná benne' xezr la xu ca':

“Da zrenté ca' ben Dios, Xrana benne' ca', chee'.”

³Da zrenté ca' ben Xránadxu Dios cheedxu dxi'u,

na' zúadxu lu da ba neza zrenté.

⁴Bselá Xránadxu dxi'u lu na' benne' zitu' ca',

na' bezrindxu lu xezr la xu cheedxu ca dxezrín nisa guba'u lu xegu bizre ca'.

⁵Benne' ca' dxelebezre' tie' dxelaze', nen xel-la' dxelebé xelxezi'e lina.

⁶Dxebezre tie' zéaje' nu'e binne cháwe'du ca',

na' duté xel-la' dxebé dxezrine' zejajnu'e lina chee'.

127 Chela ca zúale Xránadxu Dios benne' ca' dxeluné' tu xu'u dácheze naca xeluné' zrin na'.

Chela ca dxuxúe Xránadxu Dios tu xezre, dácheze naca dxuluxúe benne' ca' le na.

²Dácheze naca dxásazele che zílala, ne dxunle zrin cáteze dxalaj gubizra ca dxebíadxu na,

ne duté xel-la' dxudía dxezile da gágule, lawe' da dxunna Dios da xelagu benne' ca' nazrí'ine'

dxácate na' dxelásie'.

³Le nna' xque, zaj naca zrí'inedxu bi ca' benna Xránadxu dxi'u.

Zaj naca be' tu da gunní'a zrenté.

⁴Zrí'inedxu dxelálajbe' cheedxu gate ne nácadxu cuide'

zaj nácabe' ca xaga nalá xéche'ze ca' da nuxru benne'

zeje' wedil-la.

⁵Ba neza zrenté naca na chee' bénnea' nuxrué' zánete

xaga nalá xéche'ze caní.

Québequeze xedué'ene' gate zri'a chee'

tu zren nen benne' ca' dxeledíl-lalene' le'.

128 Ba neza zrenté naca na chee' benne' ca' dxelezrebe' Xránadxu Dios,

benne' ca' tu dxelúnzqueze' ca nadxixruj be'e Dios.

²Gate dxagu' da dxezi'u chee' zrin da nunu'

gaca chiu' tu da ba neza, ne gaca chawe' chiu'.

³Gaca zru'ulu' ca tu lba uva da dxebía da zixre

cuíta xu'u lizru',

na' zri'inu' ca' xelácabe' ca xaga olivo ca' zaj zé

dxu'a ga dxagu'.

⁴Caní gun Xránadxu gaca chawe' chee' bénnea' dxezrebe' Le'.

⁵Dxenaba' gun Xránadxu, zué' xi'a Sión, gaca chawe' chiu',

chee' le'enu' gaca chawe' chee' xezre Jerusalén xúgute' zra naca banu',

⁶ne chee' le'enu' zri'ine' zre su'.

Dxenaba' gata' xel-la' dxebeza zri lazre' chee' benne' Israel ca'.

129 Zúadxu lu da stébele'e gate nácatedxu cuide',

waca xelenná benne' Israel ca'.

²Zúadxu lu da stébele'e gate nácatedxu cuide'

san quebe buluzria xi'e dxi'u.

³Beluné' we' cúzrudxu gate beline' dxi'u xide,

na' gulaca cúzrudxu ca xezr la xu naga dxedé xia chee' bezre.

⁴Xlátaje naca Xránadxu Dios.

Bselé' dxi'u lu na' benne' ca' buluchínene' dxi'u xadíaze.

⁵Ben cheajlechaze, ne xelebígagueze

xúgute' benne' ca' dxelecuídené' benne' Sión ca'.

⁶Ben xelaque' ca xixre'du ca' dxelebía na xrgu'u

da dxelebizre na gate ne zaj nadxé'ene na,

⁷da na' quebe nu benne' dxexequé'e na,

ne quebe seque' nu benne' gunę' na tu cheaj weaj.

⁸ Quebe xelenná benne' dxeledéę' naga zaj zria na:

Dxenábantu' gun Xránantu' Dios gaca chawe' cheęle.

Lu La Xránantu' Dios dxenábantu' gaca chawe' cheęle.

130 Ga ni zua' lu da stébele'e dxuláwizra' Lue', Xrana' Dios.

² Xran, bene chi'a!

įBzę naga da dxenaba' lau'!

³ Xrana' Dios, chela nna' xánniu' ca naca dul-la nabágantu'

įnúzraqueze xegá'ana xrlátaje lau Lue'?

⁴ Lué'quezu' dxunité lau' cheęntu'

cheę gápantu' Lue' ba lá'ana.

⁵ Dute lázrdawa' dxebeza lazra' Xránadxu Dios,

ne dxuxrén lazra' xrtizre'.

⁶ Dxebeza lazredxa' Xránadxu Dios

cáqueze dxelún benne' ca' dxuluxúę' xęzre ca',

dxelebeze' chaní',

ne cáqueze dxelún benne' ca' dxelicha bchigala,

dxelebeze' chaní'.

⁷ Benne' Israel ca' dxal-la' xelebeza lazre' Xránadxu Dios

lawe' da dxexache lazre' Xránadxu bėnneache cheę',

ne dxexá'awe' benne' ca' lu na' benne' guledábague' Le'.

⁸ Dios xexá'awe' benne' Israel ca' lu na' xúgute dul-la da zaj nabague'.

131 Xrana' Dios, ba bsana' xel-la' dxucá'ana szren cuina',

ne ba bcuasa' xel-la' dxeque xrlátaje cuina'.

Quebe dxulapa napa' lu da zaj naca szren,

da ca' quebe naca chia' gulapa' na'a.

² Quebe bi gunnía', ne guzúa' zrize ca tu bi dxe'ene

za bexuzrte gúzrebe'.

Naca bėnne'du xu'a ca tu bi dxe'ene za bexuzrte gúzrebe'.

³ Le cueza lazre' Xránadxu Dios, le'e, benne' Israel

na'a zra, ne chadía chacanna.

132 Bsa lazre', Xrana' Dios, ca guca cheę David,

ne ca guzaca zi'e,

² ne ca da guchębe lazre' gunę' chiu',

da guchębe lazre' lau', Dios wal-la cheę Jacob.

³ Gunné': "Québequeze chu'a xu'u lizra',

ne québequeze gáta'a ga dxasia'

⁴ ne québequeze guchúdia' xiaj lawa'

ne québequeze gasia'

⁵ ca zrindxa zra ba bėna' tu xu'u lizre Xrana' Dios

naga súaqueze Dios wal-la cheę Jacob."

⁶ Bėnedxu zua xí'ina lá'azxa naga xu'u xel-la' wezría

lu xęzr la xu Efrata,

na' bezréledxu na lu xęzr la xu cheę bėnne'a le' Jaar.

⁷ Gunnantu': Chéajntu' naga zua Dios cheęntu'.

Guzú zrībentu' zran ni'a Le'.

⁸ Guxasa, Xránantu' Dios, nen xí'ina naga xu'u

xel-la' wezría chiu',

ne gudá lu xi'a naga súaquezu' Lue'.

⁹ Bėn xelún bxruze chiu' ca' da naca xrlátaje,

ne xelebezre xa'a xúgute bėnneache chiu', lu dute

xel-la' dxelebé cheę'.

¹⁰ Lawe' da nazrín'u' David, wen zrin chiu',

quebe guzú' chalá'ala wenná bea na' ba guca'u Lue'.

¹¹ Da líqueze bzetaj cuina Xránadxu Dios,

guchębe lazre' cheę David quebe gucuase' ca da gunné'.

Gunné': "Guna' xelenná bea zri'ine zre su' naga

dxenná béaquezu' Lue'.

¹² Che zri'inu' ca' tu xelúnzqueze' ca naca
xel-la' wezría chia',
ne ca naca xrtizra' da gusededa' le',
zri'inu' ca' tu xelenná béazqueze' naga
dxenná be'u lue'."

¹³ Lawe' da gucá'a Xránadxu Dios xezre
Sión,
guca lazre' sua xu'u lízrequeze' ga na'.

¹⁴ Gunné': "Tu gácazqueze lataj nigá
naga súaqueza' neda'.

Tu súazqueza' nigá lawe' da caní dxezaca
ba lazra' guna'.

¹⁵ Guna' gáta'le'e lina chee benne' ca',
ne guna' xelejaj benne' xache' ca' xeta.

¹⁶ Guna' xelún bxruze chia' ca' da naca
chawe',
na' xelebezre xa'a xúgute bénneache
chia' lu dute
xel-la' dxelebé chee'.

¹⁷ Lataj na' guna' xexaca xel-la' dxenná
bea chee David.

Guna' xelezúa na' zri'ine zre sua wenná
bea na'
ba gucá'a neda'.

¹⁸ Guna' xeleque zréaje benne'
guledábague' Le',
na' guna' chepe ban xel-la' dxenná bea
chee David na'."

133 Le nna' xque, xrtante naca, ne
cháwe'le'e naca
gate zaj nazraga bénneache chee Dios,
zaj naque' tuze.

² Naca na ca tu da za da dxuluzúa
xíchaje',
da dxedínnete na dxu'a lawe',
ca na' dxedínnete na lu luzru Aarón,
ne dxedínnete na ga zria zre'.

³ Dxedínnete na ca xrlé'ela da dxexruj lu
xi'a Hermón,
ne dxexruj na lu xi'a Sión lawe' da gun
Xránadxu Dios
gaca chawe' chee bénneache zaj zre'e na',
ne gunne' benne' ca' xel-la' nabán da zea-
jlí canna.

134 Le na' xque, le güe lá'ana Xrá-
nadxu Dios,

le'e, nácale wen zrin chee Xránadxu,
zrale xu'u lizre Xránadxu chizrela.

² Le chisa na'le lau lataj lá'azxa,
ne le güe lá'ana Xránadxu Dios.

³ Dxenaba' lau Xránadxu zue' Sión guné'
gaca chawe' chiu',
naque' Bénénea' bene' xabáa, ne xezr la
xu.

135 ¡Le güe lá'ana La Xránadxu
Dios!

¡Le güe lá'ana Le', le'e, wen zrin chee
Xránadxu,

² le'e zrale xu'u lizre Xránadxu Dios,
lu chale'aj chee xu'u naga zúaqueze Dios!

³ ¡Le güe lá'ana Xránadxu lawe' da naque'
xrlátaje!

¡Le gul-la da güe lá'anale La Le', lawe' da
naque' zri'i lazre'!

⁴ Xránadxu Dios ba guqué'e zri'ine zre
sua Jacob.

Guqué'e zri'ine zre sua Israel chee xe-
laque' bénneache chee'.

⁵ Nézquezdxu szrente naca Xránadxu
Dios.

Xránadxu naque' szrendxa ca xúgute
dios chee benne' zitu' ca'.

⁶ Xúgute da dxaca lazre' Xránadxu guné',
dxune' na zran xabáa, ne lu xezr la xu,
ne lu nísadau', ne lu da situj chee
nísadau' ca'.

⁷ Dxune' zá'aca beuj dapa saca chee xezr
la xu.

Dxune' dxelepe xesa guziu' gate dxaca
xiuj.

Dxune' dxaca be' gáteteze.

⁸ Bene' gulate bi biu nedxu chee benne'
Egipto ca'.

Gulate bi biu nedxu chee bénneache,
ne béadu ca' chee be xixre' chee' ca'.

⁹ Bene' xel-la' waca ca' da za xabáa, ne da
zrente ca'

da bene' lu xezr la xu chee benne' Egipto
ca',

da ca' ben Dios da guca chee Faraón,
ne chee xúgute wen zrin chee Faraón na'.

¹⁰ Bzria xi'ë bénneache zánete cue' xezr
 la xu ca',
 ne betië' benne' wenná bea ca',
 benne' zaj nápaletë' xel-la' dxelenná bea.
¹¹ Betië' Sehón, wenná bea cheë benne'
 amorreo ca',
 ne Og, wenná bea cheë benne' Basán ca',
 ne xúgute benne' wenná bea cheë benne'
 Canaán ca'.
¹² Bequë'ë xezr la xu nigá lu na' benne'
 wenná bea ca',
 na' bnézruje' na lu na' bénneache cheë',
 benne' Israel ca'.
¹³ Xrana' Dios, chadía chacanna zua lau'
 Lue'.
 Tu cheajlesá lázrezqueze bénneache
 Lue'.
¹⁴ Xránadxu Dios guchi'ë cheë bén-
 neache cheë',
 ne xexache lazre' cheëdxu dxi'u, wen zrin
 cheë'.
¹⁵ Bedau' xia xaga ca' cheë benne' xezr la
 xu ca'
 zaj naca na oro, ne plata.
 Zaj naca na da belún bénneache.
¹⁶ Zaj zua dxu'a na san quebe dxelenné
 na.
 Zaj zua lau na san quebe dxelelé'e na.
¹⁷ Zaj zua naga na san quebe dxelén na,
 ne quebe
 dxeleca'a na be'.
¹⁸ Benne' ca' dxelune' na zaj nácaqueze'
 ca léqueze na,
 ne caní zaj naca xúgute benne' dxuluxrén
 lazre' na.
¹⁹ Le'e, benne' xrtía Israel, le güe lá'ana
 Xránadxu Dios.
 Le'e, benne' xrtia Aarón, le güe lá'ana
 Xránadxu Dios.
²⁰ Le'e, benne' xrtia Leví, le güe lá'ana
 Xránadxu Dios.
 Le'e, núlale dxezrébele Xránadxu Dios, le
 güe lá'ana
 Xránadxu Dios.
²¹ Le'e, zrale xezre Sión, le güe lá'ana
 Xránadxu Dios,

Bénnea' zúaqueze' xezre Jerusalén.

¡Gaca ba lá'azxa Xránadxu Dios!

136 ¡Le güe lá'ana Xránadxu Dios,
 Benne' xrlátaje!

¡Chadía chacanna dxexache lazre' dxi'u!

² ¡Le güe lá'ana Dios, naque' szrëntëdxa
 ca zaj naca dios

cheë xezr la xu ca'!

¡Chadía chacanna dxexache lazre' dxi'u!

³ ¡Le güe lá'ana Xránadxu, naque' szrën-
 tëdxa ca zaj naca

xrana xezr la xu ca'!

¡Chadía chacanna dxexache lazre' dxi'u!

⁴ ¡Le güe lá'ana Dios na', dxunë' xel-la'
 waca zri'a ca'!

¡Chadía chacanna dxexache lazre' dxi'u!

⁵ ¡Le güe lá'ana Dios na', bene' xabáa
 dutë xel-la' sina cheë'!

¡Chadía chacanna dxexache lazre' dxi'u!

⁶ ¡Le güe lá'ana Dios na', bzue' xezr la xu
 lawe' nísadau'!

¡Chadía chacanna dxexache lazre' dxi'u!

⁷ ¡Le güe lá'ana Dios na', bene' gubizra ne
 beu'!

¡Chadía chacanna dxexache lazre' dxi'u!

⁸ ¡Bene' gubizra cheë gusení na te zra!

¡Chadía chacanna dxexache lazre' dxi'u!

⁹ ¡Bene' beu' ne belaj ca' cheë xulusení na
 chizrela!

¡Chadía chacanna dxexache lazre' dxi'u!

¹⁰ ¡Le güe lá'ana Dios na', betië' bi biu
 nedxu cheë

benne' Egipto ca'!

¡Chadía chacanna dxexache lazre' dxi'u!

¹¹ ¡Le güe lá'ana Dios na', bebéaje' benne'
 Israel ca'

lu xezr la xu Egipto na'!

¡Chadía chacanna dxexache lazre' dxi'u!

¹² ¡Beche'ë le' dutë xel-la' waca zren
 cheë'!

¡Chadía chacanna dxexache lazre' dxi'u!

¹³ ¡Le güe lá'ana Dios na', bene' chupa
 la'a nísadau'

da nazí le na Xrna!

¡Chadía chacanna dxexache lazre' dxi'u!

¹⁴ ¡Bdee' benne' Israel ca' laduj nísadau' na'!

¡Chadía chacanna dxexache lazre' dxi'u!

¹⁵ ¡Bgacue' nísadau' na' Faraón, benne' wenná bea chee Egipto,

ne benne' zeje' wedil-la chee' ca'!

¡Chadía chacanna dxexache lazre' dxi'u!

¹⁶ ¡Le güe lá'ana Dios na', beche'e benne' chee' ca'

le'e xixre' lawe' lataj!

¡Chadía chacanna dxexache lazre' dxi'u!

¹⁷ ¡Le güe lá'ana Dios na', betie' wenná bea blau ca'!

¡Chadía chacanna dxexache lazre' dxi'u!

¹⁸ ¡Betie' wenná bea wal-la ca'!

¡Chadía chacanna dxexache lazre' dxi'u!

¹⁹ ¡Betie' Sehón, wenná bea chee benne' amorreo ca'!

¡Chadía chacanna dxexache lazre' dxi'u!

²⁰ ¡Betie' Og, wenná bea chee xezr la xu Basán!

¡Chadía chacanna dxexache lazre' dxi'u!

²¹ ¡Bnézruje' xezr la xu chee benne' ca' chee gaca na

chee benne' chee' ca'!

¡Chadía chacanna dxexache lazre' dxi'u!

²² ¡Benne' na chee benne' Israel ca', benne' wen zrin chee' ca'!

¡Chadía chacanna dxexache lazre' dxi'u!

²³ ¡Naque' Dios na', quebe gul-la lazre' dxi'u

gate buluzetja benne' ca' dxi'u!

¡Chadía chacanna dxexache lazre' dxi'u!

²⁴ ¡Le' bselé' dxi'u lu na' benne' ca' guledíl-lalene' dxi'u!

¡Chadía chacanna dxexache lazre' dxi'u!

²⁵ ¡Naque' Dios na', dxugawe' xúgute da zaj naca ban!

¡Chadía chacanna dxexache lazre' dxi'u!

²⁶ ¡Le güe lá'ana Dios chee xabáa!

¡Chadía chacanna dxexache lazre' dxi'u!

137 Dxu'a xegu chee xezr la xu Babilonia gudxé'edxu, ne gudxézredxu gate xeajsá lázredxu chee xezre Sión.

² Lu zruze xaga labada' dxu'a xegu na'

buquéladxu da cun zríadi'i na du cheedxu ca'.

³ Benne' ca' guleché'e dxi'u ca benne' zaj nada'u

gulenábene' dxi'u gúl-ladxu.

Benne' ca' buluzría xi' xezre cheedxu gul'e dxi'u

súadxu lu xel-la' dxebé, gulenné':

Le gul-la cheentu' da ca' bíl-lale lu xezre Sión.

⁴ ¡Ájazra gúl-ladxu da güe lá'anadxu Xránadxu Dios

naga zúantu' lu xezr la xu chee benne' zitu' ca'?

⁵ Chela gal-la lazra' lue', xezre Jerusalén, gun Dios gunite na'a xabela xel-la' waca chee na.

⁶ Ben xedá' luzra' chíchajla' che quebe cheajsá lazra' chiu', ne che quebe gucá'ana szrena' lue', Jerusalén,

nacu' da dxezaca ba lázreleda'.

⁷ Xrana' Dios, bsa lazre' da calęla da belún benne' Edom

lu zra na' guzría xi' xezre Jerusalén,

gate na' gulenné': "Le guchinnaj na. Le guchinnaj na, ca zrinte lu lane chee na."

⁸ Le'e, benne' Babilonia, cuía xile.

Ba neza zrentę gaca na chee bėnnea' gunę' cheęle

ca da bęne le'e cheętu' netu'.

⁹ Ba neza zrentę gaca na chee bėnnea' que'e bidu cheęle ca',

ne quine'-be' lu xiaj xre na'.

138 Xrana' Dios, dute lázrdawa' güe lá'ana' Lue'.

Tu dxúl-lazqueza' da dxue lá'ana' Lue' lau dios ca' chee

benne' zitu' ca'.

² Dxuzú zriba' lau xudau' lá'azxa chiu',

ne dxue lá'ana' Lau' lawe' da nacu' li lazre',

ne dxexache lazru' bėnneache chiu',

ne lawe' da blė'enu' nacu' Benne' szrentę, na' szrentę naca xrtizru'.

³ Gate bláwizra' Lue', na' gúcalenu' neda'.
Nen dutę xel-la' waca chiu' btipu' lazra'.

⁴ Xúgute benne' wenná bea du gabí'i xęzr
la xu

xelúe lá'ane' Lue', Xrana' Dios.

Caní xelune' lawe' da ba belenne' ca naca
xrtizru'.

⁵ Xelúl-le' cheę da ba nune' Xránadxu
Dios,

lawe' da zrente naca xel-la' ba cheę
Xránadxu.

⁶ Szrente naca Xránadxu Dios, ne
dxácalene'

benne' baxache' ca',

na' quebe dxu'e lataj benne' dxucá'ana
szren cuine'

zrine' lau Lę'.

⁷ Lácala zua' lu da ba xa', Lue' dxutipu'
lazra'.

Dxedábagu' benne' ca' dxeledábague'
neda',

ne dutę xel-la' waca chiu' dxuseláu'
neda'.

⁸ Gun Xránadxu Dios da guchebe lazre'
chia'.

Xrana' Dios, tu dxexache lázrezquezu'
bénneache chiu'.

Quebe gusanu' dxunu' zrin da guzú lau'
dxunu'.

139 Xrana' Dios, ba gunná' xánniu'
neda'

ne núnbea xánniu' neda'.

² Nézqueznu' gate dxe'a, ne gate dxasa'.

Zítu'la nézqueznu' da zaj xu'u xichaj
lázdawa'.

³ Ba gunná' xánniu' ca dxuna', ne ca dx-
exezí' lazra'.

Nézqueznu' xúgute da dxuna'.

⁴ Gate quebe ne guchálaja' ba nézqueznu'
Lue', Xran,

xúgute da nnia'.

⁵ Gátetęzla cuita' neda' zúaquezu' Lue',
Xran,

ne nuzę na'u neda'.

⁶ Ca szrente naca da nézenu' Lue' naca na
da dxebáneda'.

Nácale'e na sina da quebe gaca
chéajni'ida'.

⁷ ¿Gala cha'a zitu' naga quebe zúaqueze
Be' chiu'?

¿Gala guzrúnnuja' naga quebe zúaquezu'
Lue'?

⁸ Che cuena' sibe zran xabáa, na'
zúaquezu' Lue',

ne che xétaja' lu da situj cheę xęzr la xu,
na' zu' Lue'.

⁹ La séqueda' tea' lu be', ne cha'a zitu'
naga dxalaj gubizra,

u tea' xechalá'a nísadau' naga dxebía
gubizra,

¹⁰ cá'unqueze na' súalenu' neda',

ne guxru na'u xabela neda'.

¹¹ Chela gaca guna' gacu da chul-la
neda',

u guna' xexaca lení' da naxechaj neda',
cheę

xaca na da chul-la,

¹² da chul-la na' quebe gaca gucache na
neda' lau Lue',

na' chizrela xaca na ca te zra lau'.

Túzqueze ca zaj naca da chul-la, ne xel-
la' naxaní' lau Lue'.

¹³ Lue' bęnu' da zaj xu'u lu bęla' dxen
chia'.

Lue' bzalju' neda' lu lę'e xrna'a.

¹⁴ Güe lá'anaqueza' Lue' lawe' da szrente
zaj naca da dxunu',

ne dxebáneda' ca zaj naca na.

Dutę lázrdawa' nézquezda' caní naca na.

¹⁵ Blé'equeznu' neda' gate gulá' gubinna
zrita xu'a,

gate na' belezraga na lu lę'e xrna'a,

gate na' bgula' lu da bagácheze na'.

¹⁶ Ble'enu' bęla' dxen chia' gate gulá' gu-
binna na.

Xúgute da caní ba naxúaj na lu xiche
chiu',

na' ca gudé na' gulá' gubinna na,

na' xúgute na gulaca na cáteze zaj naxúaj
na.

¹⁷ Dios, szrente zaj naca da dxuwía lazru'
gunu'.

Da zantę ca zaj naca na.

¹⁸ Chela gaca lazra' gulaba' ca zaj naca na,
zaj naca na ca xuzre' dxe' dxu'a tu xęgu zren.

Gate dxexebana', ne zúalequeza' Lue'.

¹⁹ Dios, da líqueze gutiu' benne' ca' dxelune' da caleła.

Cheę lę na', le gucuasa naga zua', le'e, wete benne'.

²⁰ Chiu' Lue', Dios, dxelenné' dizra' schanni'.

Benne' ca' dxeledábague' lue' dxuluzéta-je' Lau' lu da xálaze.

²¹ Xrana' Dios, dxecuídada' benne' ca' dxuluzúe' Lue'

chalá'ala,

ne dxezrá'li'a benne' ca' dxeledábague' Lue'.

²² Dute lázrdawa' dxecuídada' benne' ca'. Dxéqueda' benne' ca' ca benne' ca' dxeledábague' nédaqueza'.

²³ Gunná' xanne' neda', Dios, ne gunná' da xu'u na lázrdawa'.

Bxue neda' cheę nézenu' da xu'u lu xichaj lázrdawa'.

²⁴ Gunná' che zúale tu da caleła neda', na' bsi neda' lu neza chawe' chiu' da zealjí canna.

140 Xrana' Dios, bselá neda' lu na' benne' ca' dxelune' da caleła.

Bxue neda' cheę quebe bi xelún benne' xichaj zra'a ca'

chia' neda'.

² Benne' caní dxuluwía lazre' da caleła ca' da xelune'.

Tu zra tu zra dxulutíl-lalęne' bėnneache.

³ Da dxelenné' naca na ca lazxa bęla' da zaj nalále'e.

Xrtizra' benne' ca' zaj naca na ca nisa snia cheę bęla'.

⁴ Xrana' Dios, bxue neda' cheę quebe bi xelún benne' ca'

dxelune' da caleła chia' neda'.

Bselá neda' lu na' benne' xichaj zra'a ca', benne' ca' dxelune' ba xuzre cheajcházia'.

⁵ Benne' ca' dxulucá'ana szren cuine' zaj nabeque'

tu da queł-la na neda'.

Ba zaj nuzalę' xralaj dxu'a neza.

Ba zaj nabeque' da ca' xełęł-la na neda'.

⁶ Gucha' Xrana' Dios: Lue' nacu' Dios chia'.

Xrana' Dios, bene chi'a dxuláwizra' Lue'.

⁷ Xrana' Dios, nacu' weselá chia'.

Lue' bcu'uju' xíchaja' lu zra guca wedilla.

⁸ Xran, quebe gu'u lataj gaca ca da dx-elezá lazre' benne' ca'

dxelune' da caleła.

Quebe gu'u lataj chepe ban da dxuluwía lazre' xelune',

cheę quebe xulucá'ana szren cuine'.

⁹ Zaj naxechaj benne' ca' dxelune' da caleła neda'.

Ben gaca cheę benne' ca' ca de' da dx-elaca lazre' gaca

cheę benne' xula.

¹⁰ Ben xexruj xi' lawe' benne' ca'.

Bzra benne' ca' lu xi'.

Bzra benne' ca' lu da sítuje'e naga cabátadxa xelxedxúaje'.

¹¹ Quebe gu'u lataj xegá'ana lu xęzr la xu bėnnea' dxenné'

da caleła.

Ben gaca da caleła cheę benne' xichaj zra'a, da guzría xi na lę'.

¹² Nezda' xechębe Xránadxu Dios waláz cheę benne' baxache',

ne guzę chache' da zaj xu'u lu na' benne' xache' ca'.

¹³ Da líqueze benne' xrlátaje ca' xelúe lá'anę' Lau' Lue',

na' benne' li lazre' ca' xeluzúe' naga zu Lue'.

141 Xrana' Dios, dxuláwizra' Lue'. Gudázega gácalęnu' neda'.

Bene chi'a gate nnia' Lue'.

² Ben la' da dxenaba' lau Lue' ca zren xala.

Ble'e na'a da dxechisa' lau' ca tu bėadau' dxútia'-ba' lau'.

³ Xrana' Dios, bxue dxu'a nigá,
ne bxue xide dxu'a chee quebe nnia' tu
da calela.

⁴ Quebe gu'u lataj gaca lazra' guna' tu da
calela,
ne chee quebe guna' tu da calela tu zren
nen benne' ca'
dxelune' da zrinnaj,
ne chee quebe gáguleña' benne' ca' dx-
elune' da calela
lu laní chee'.

⁵ Che gudé benne' xrlátaje neda' lu da ba
xa', gaca na chia'
tu da chawe',
na' che til-le' neda', gaca na chia' ca tu da
dxelále'e zixre
da dxegu'e xíchaja'.
Tu nábazqueza' Dios guzague' da calela
da dxelún benne' ca'
dxelune' da calela.

⁶ Gate xeledxú'üne' benne' xíchaje ca'
chee benne'
wen da calela ca' zran xi'a xiaj ca',
na' xeleque be'e bénneache naca li ca da
gunnía'.

⁷ Xelase dinnaj zrita chee benne' ca' dxu'a
xedxu ba chee' ca'.
Xelaca na ca bhecu xu, da dxelase din-
naj na naga
dxa'ana bezre.

⁸ Chee le na' dxenná'a naga zu' Lue',
Xrana' Dios.
Dxuxrén lazra' Lue', quebe gusan lazru'
neda'.

⁹ Bxue neda' chee quebe xelel-la xralaj
ca' chee benne' ca'
dxelune' da calela neda',
ne chee quebe cheajcházia' lu da zaj
nabeque' benne'
wen da calela ca'.

¹⁰ Ben cheajlechaze benne' ca' dxelune'
da calela lu xralaj
da zaj nabéchequeze'
dxácate na' tea' neda' ga na' zri'a chawe'.

142 Zizraj dxuláwizra' Xránadxu
Dios.

Du lazra' dxenaba' Xránadxu xexache
lazre' neda'.

² Lau Le' dxawa' zría ca da dxaca chia'.
Lau Le' dxulé'eda' ca da stébe zua' neda'.
³ Gate zua lárzdawa' lu da stébe, Lue',

Xran, nézenu'
da dxaca chia'.
La neza naga dxedá' gulebeque' xralaj da
quel-la na neda'.

⁴ Dxenná'a cuita' xabéla, san quebe nu
chilá' gácale neda'.
Quebe nu chilá', benne' guxúequeze'
neda'.

Quebe nu chilá', benne' dxe' gunna xue'
chia' neda'.

⁵ Dxuláwizra' Lue', Xrana' Dios, dxennia':
Dxebeza lazra' tuzu' Lue'.

Tuzu' Lue' dxezá lazra' lu xezr la xu nigá.
⁶ Bene da dxuláwizra' Lue', lawe' da dx-
ezaca zí'le'a.

Bselá neda' lu na' benne' ca' dxeláu zi'
xuzre' neda',
lawe' da zaj naque' wál-ladxa ca neda'.

⁷ Bebéaj neda' lu da dxaca chia', chee
gaca güe lá'ana' Lue'.

Benne' xrlátaje ca' xeléchaje' neda' lawe'
da gunu' gaca chawe' chia'.

143 Xrana' Dios, bene da dx-
uchálaja' lau Lue'.

Bze naga da dxenaba' lau'.
Gudá gácalenu' neda' lawe' da nacu' li
lazre', ne xrlátaje.

² Quebe guchi'u chia' neda', wen zrin
chiu',
ca naca da nabaga',
lawe' da lau' Lue' quebe nu chilá' benne'
naque' du lazre'.

³ Gúcale neda' lawe' da dxeláu zi' xuzre'
neda'.
Xeláteze bache xelútie' neda'.
Ba belune' naca' ca tu benne' dxedé' lu da
chul-la

ca naca chee benne' gate ca'.
⁴ Zua lárzdawa' lu da stébelé'e, ne dx-
ewí'ine lázrele'a.

⁵ Dxeajsá lazra' ca guca nédxudaute'.

Dxulaba lazra' ca naca xúgute da benu'.
Dxeajsá lazra' ca naca da zrente ca' da
benu'.

⁶ Dxechisa na'a lau Lue'.

Naca' ca tu xezr la xu bizre, dxebíleda'
Lué'queze.

⁷ Gudázega gácalenu' neda', Xran, lawe'
da dxedú lazra'.

Quebe chenu' gácalenu' neda', chee
quebe gaca' ca tu benne'
ba xu'e xedxu ba.

⁸ Che zílala ben cheajsá lazra' dxexache
lazru' bénneache
chiu' ca'

lawe' da dxuxrén lázrequeza' Lue'.

Bzéajni'i neda' ca dxal-la' guna'

lawe' da dxezá lazra' guna' da dxaca
lazru' Lue'.

⁹ Xrana' Dios, bselá neda' lu na' benne' ca'
dxeledábague'
neda'

lawe' da dxuzúa cuina' lu na'u chee
guxúequezu' neda'.

¹⁰ Bsede neda' chee guna' da dxaca lazru'
Lue',

lawe' da nacu' Lue' Dios chia'.

Gusel-la Be' xrlátaje chiu' chee che'e
neda' la neza chawe' chiu'.

¹¹ Chee gaca bea na nacu' xrlátaje, Xran,
gutipu' lazra'.

Lawe' da nacu' xrlátaje, guseláu' neda' lu
da dxaca chia'.

¹² Lawe' da nacu' li lazre', guzría xi'u
benne' ca'

dxeledábague' neda',

ne guzría xi'u xúgute benne' ca' dxelaca
lazre'

xuluzría xi'e neda',

lawe' da naca' neda' wen zrin chiu'.

144

¡Gaca ba lázaxa Xránadxu
Dios,

Bénnea' dxuzé chache' neda'!

Naque' Bénnea' dxuzázraje' na'a chee
cha'a lu wedil-la,

ne dxuzázraje' zrube na'a chee séqueda'
tíl-laləna' benne' ca'

dxelune' da caləla.

² Naque' Benne' dxexache lazre' neda',
ne naque' ca tu xu'u naga ze chawa'.

Dxuzúa chache' neda', ne dxuselé' neda'.

Dxucu'uje' neda', na' dxuxrén lazra' Lē'.

Dxune' dxuluzúa bénneache chia' dizra'
chia'.

³ Xrana' Dios, ¿ájazra naca nu benne', dx-
eajsá lazru' lē'?

¿Ájazra naca nu benne' dxe'u gunne xue
chee'?

⁴ Naca benne' ca tu da níteze.

Zaj naca zra chee' ca tu zrul-la da
dxedeze.

⁵ Xrana' Dios, gusalaj zran xabáa, ne be-
taj gácalenu' neda'.

Bta xi'a ca', na' dxuaj zren chee xi'.

⁶ Bzalaj xesa guziu', ne blaga benne' ca'
dxelune' da caləla.

Bzalaj xaga nalá xéche'ze chiu', ne bzria
xi' lē'.

⁷ Naga zu' na'la, bze na'u, ne bselá neda'
lu da stébele'e zua'.

Bselá neda' lu na' benne' zitu' ca',

⁸ benne' ca' tu dxelennézqueze' da wen
lazre',

ne dxuluzétaje' Dios gate dxelezí xē'e.

⁹ Dios, gúl-laqueza' chiu' da cube, quín-
nia' da dxúl-laləna'.

Nen tu da dxínnia' da nua chi du chee na
gúl-laqueza' chiu'.

¹⁰ Nacu' Lue' Bénnea' dxune' dxeledxúaj
chawe'

benne' wenná bea ca'.

Dxuseláu' David, wen zrin chiu', lu xia
nalá chee

benne' wen da caləla ca'.

¹¹ Bexa'u neda', ne bselá neda' lu na'
benne' zitu' ca',

benne' ca' tu dxelennézqueze' da wen
lazre',

na' dxuluzétaje' Dios gate dxelezí xē'e.

¹² Ben xelegula bi biu cheentu' ca tu xaga
da dxegula chawe',

ne zaj nácabe' bi cuide'.

Ben xelaca bi nu'ula cheentu' ca bdu'a
xij xrtante ca'

da zaj nnta tu lu xu'u zren.

¹³ Ben chatē lízrentu' xúgute cuen lina
cheentu'.

Ben xelánle'e be xixre' cheentu', chee
xelácaba'

gaxúa gaxúane be xixre'du ca' lu xezr la
xu cheentu'.

¹⁴ Ben xelaca bezre cheentu' be wal-la
chee xelunba' zrin.

Ben quebe xelezanba' gate quebe ne zrin
cha beu' cheeba' ca'.

Ben quebe nu cha' cuezre xache' la neza
cheentu'.

¹⁵ Ba neza zrente naca na chee bēn-
neache ca' dxaca caní chee'.

Ba neza zrente naca na chee bēnneache
ca'

naca Xránadxu Dios chee'.

145 ¡Gucá'ana szrena' Lue', Dios
chia', ne Wenná Bea chia'!

¡Tu güe lánazqueza' Lau' Lue' chadía
chacanna!

² ¡Tu zra tu zra güe lánana' Lue'!

¡Tu güe lánazqueza' Lau' Lue' chadía
chacanna!

³ ¡Szrente naca Xránadxu Dios, ne naca
chee'

tu güe lánazquezdXu Le'!

¡Québequeze séquedxu gúnbeadxu ca
szrente naque'!

⁴ Xúgute cuen bēnneache chiu' xelúe
lánane' da bēnu' Lue',

ne xuluzenne' benne' xezr la xu ca' ca
naca da zrente da bēnu'.

⁵ Gulaba lazra' ca naca da xrtante chee
da xabáa chee

xel-la' szren chiu', ne ca naca da zrente
da nunu'.

⁶ Xúgute bēnneache xuluchálaje' ca naca
xel-la' waca chee

da zrente da nunu',

na' neda' guzenda' le' ca naca xel-la' szren
chiu'.

⁷ Xuluzenne' le sa' ljwezre' ca naca xel-la'
zri'i lazre' zren

chiu',

ne tu xelúl-lazqueze' chee da xrlátaje da
nacu' Lue'.

⁸ Xránadxu Dios naque' zri'i lazre', ne dx-
exache lazre'

bēnneache chee'.

Dxezrene', ne quebe dxezrá'aze', na' dx-
exache lázrele'e dxi'u.

⁹ Dxun Xránadxu Dios da chawe' chee
xúgute bēnneache,

ne dxexache lazre' xúgute da zaj naca
ban da nunu'.

¹⁰ Xúgute da ca' nunu' xelúe lánana na
Lue', Xran,

na' bēnneache chiu' xulucá'ana szrene'
Lue'.

¹¹ Dxeleonné' ca szrente naca xel-la'
dxenná bea chiu'.

Dxuluchálaje' ca naca xel-la' waca zrente
chiu',

¹² chee xuluzenne' xúgute bēnneache ca
naca da zrente ca'

da nunu',

ne ca naca da xabáa chee xel-la' szren
chee xel-la' dxenná bea

chiu'.

¹³ Xel-la' dxenná bea chiu' tu súazqueze
na,

ne nna be'enu' xúgute cuen bēnneache.

¹⁴ Nuxru Xránadxu Dios xúgute benne'
ca' dxeajlecházie',

ne dxechise' xúgute benne' ca' zaj nada'u
lu zrin wal-la.

¹⁵ Xúgute bēnneache dxeleonné'e Lue'
chee gácalenu' le',

na' Lue' gunézruju' da xelawe' ca zrin zra
chee na.

¹⁶ Dxuzé na'u, ne dxunézruju' ca naca da
chawe'

da dxelexázrje xúgute da zaj naca ban.

¹⁷ Xlátaje naca Xránadxu Dios lu xúgute
da dxunge',

ne dxexache lazre' xúgute da zaj naca
ban da nun Le'.

¹⁸ Xránadxu Dios zúatequeze' gácalene' xúgute benne' ca' dxululáwizre' Le', xúgute benne' ca' du lazre' dxululáwizre' Le'.

¹⁹ Gune' ca dxelezá lazre' benne' ca' dxelezrebe' Le'.

Cá'anqueze xenne' chee' gate xululáwizre' Le', ne guselé' benne' ca'.

²⁰ Xránadxu Dios dxuxúequeze' xúgute benne' ca' zaj nazrí'ine' Le',

san guzría xi'e xúgute benne' ca' dxelebéaj xíchajé' Le'.

²¹ Du lazra' güe lá'ana' Xránadxu Dios. Xúgute benne' dxal-la' tu xelúe lá'anazqueze' Le' lá'azxa chadía chacanna.

146 ¡Gaca ba lá'azxa Xránadxu Dios!

¡Du lazra' güe lá'ana' Xránadxu Dios!

² ¡Dxácate naca bana' güe lá'ana' Xránadxu Dios!

¡Tu gúl-lazqueza' da güe lá'ana' Xránadxu Dios dxácate

naca bana'!

³ Quebe guxrén lázrele benne' dxelenná bea,

ne quegá bénneache lawe' da quebe xelezéquene'

xuluselé' le'e.

⁴ Dxeledxúaj be' zaj xu'e, na' xelexequé' xu xrte.

Lu zra ná'queze xelenite da dxuluwía lazre' xelune'.

⁵ Ba neza zrente naca na chee bénnea', dxácale Dios chee

Jacob le',

bénnea' dxebeza lazre' Xránadxu Dios.

⁶ Dios na' bene' xabáa, ne xezr la xu, ne nísadau',

ne xúgute da zaj zra' lataj ca'.

Naque' Bénnea' tu dxúnzqueze' da li lazre'.

⁷ Dxuchi'e chee benne' baxache' ca',

ne dxugawe' benne' ca' dxeledune'.

Xránadxu Dios dxuselé' benne' ca' zaj nada'u lu na'

benne' ca'.

⁸ Xránadxu Dios dxexune' xiaj lau benne' la chul-la ca'.

Xránadxu Dios dxechise' benne' ca' dxeajlecházie'.

Xránadxu Dios nazrí'ine' benne' xrlátaje ca'.

⁹ Xránadxu Dios dxuxúe' benne' zitu' ca'. Nuxre' bidau' wezebe ca', ne nu'ula tuze ca',

na' dxuchínnaje' da dxelún benne' ca' dxelune' da calela.

¹⁰ Tu nna béazqueze Xránadxu Dios.

Le'e, benne' xezre Sión, nna be'e Dios cheele

ne xúgute cuen zri'ine zre súale.

¡Gaca ba lá'azxa Xránadxu Dios!

147 ¡Le güe lá'ana Xránadxu Dios lawe' da naca chawe'

gúl-ladxu da güe lá'anadxu Dios cheedxu,

lawe' da xrtante naca güe lá'anadxu Le'!

² Xránadxu Dios xexune' xezre Jerusalén. Xequé'e benne' Israel ca' zaj zué' xezr la xu zitu' ca'.

³ Dxexune' benne' ca' dxelexewí'ine lázrele'e,

ne dxudé'e ladxe' naga zaj naca we' chee benne' ca'.

⁴ ¡Nézquezne' ca zaj naxán belaj ca'!

¡Tu tu belaj ca' dxu'e la na'!

⁵ ¡Szrente naca Xránadxu Dios, ne nape' duté xel-la' waca!

¡Quebe bi de da quebe dxéajni'ine'!

⁶ Xránadxu Dios dxácalene' benne' dxexruj lazre' ca',

na' dxuzéxruje' benne' ca' dxelune' da calela.

⁷ ¡Le gul-la da güe lá'anale Xránadxu Dios!

¡Le gul-la, ne le quinne da cun zrádi'i na du lau Dios cheedxu!

⁸ ¡Le' dxudé'e beuj ca' zran xabáa!

¡Le' dxesel-le' nisa xiuj lu xezr la xu!
 ¡Le' dxune' dxelezi'á xixre'du ca' lu xi'a ca'!
 9 ¡Le' dxunézruje' da dxelagu be' xixre' ca'!
 ¡Dxunézruje' da dxelagu béchajdu ca', be' dxelebezre xa'aba!
 10 Da dxezaca ba lázrele' quebe naca na xel-la' wal-la
 chee' bzrina' ca',
 ne quegá xel-la' wal-la chee' bénneache.
 11 Dxezaca ba lázrele' benne' ca' dxelezebe' Le',
 ne benne' ca' dxelebeza lazre' Le' chee' xexache lazre' le'.
 12 ¡Le güe lá'ana Xránadxu Dios, le'e zrale xezre Jerusalén!
 ¡Le güe lá'ana Dios cheele, le'e zrale xezre Sión!
 13 ¡Le' dxuzúa chúchue' dxa xu'u chee' xezre cheele!
 ¡Dxune' dxaca chawe' chee' benne' ca' zaj zre'e xezre cheele!
 14 ¡Dxebeque' xel-la' dxebeza zri lazre' lu xezr la xu cheele!
 ¡Gúnnale'e cheele zrúa' chawe'!
 15 ¡Dxusel-le' xrtizre' chee' benne' ca' zaj zre'e duté xezr la xu,
 na' chadí dxaca ca da dxenné!
 16 ¡Dxugacue' xezr la xu bezxe' da naca na ca zrila'!
 ¡Dxuzéxruje' xrlé'la dxéla ca de!
 17 ¡Dxune' dxelexruj xiaj bezxe' ca weaj xiajdu ca'!
 ¿Nu benne' gaca guchaga lawe' da zaga chee' na?
 18 ¡Dxenná be'e, na' dxexuna na!
 ¡Dxune' dxaca be', na' dxexaca bezxe' na' nisa guba'u!
 19 ¡Bzéajni'ing' Jacob ca naca xrtizre', ne bde'e' xrba chee',
 ne da ca' gunná be'e lu na' benne' Israel ca'!
 20 Quebe ne gune' caní chee' xezr la xu kezícadxa ca',

na' benne' xezr la xu ca' quebe dxelexúnbe'e' xrba chee'.

¡Gaca ba lázaxa Xránadxu Dios!

148 ¡Le güe lá'ana Xránadxu Dios!
 ¡Le güe lá'ana Xránadxu, le'e, zrale xabáa!
 ¡Le güe lá'ana Le', le'e, zrale dxala!
 2 ¡Le güe lá'ana Le', le'e, gubáz chee' xabáa chee' ca'!
 ¡Le güe lá'ana Le', le'e, benne' zante chee'!
 3 ¡Le güe lá'ana Le', le'e, gubizra, ne beu'!
 ¡Le güe lá'ana Le', le'e, belaj dxusenile!
 4 ¡Le güe lá'ana Le', le'e, xabáa ca', ne le'e, nisa zrale lówela xabáa!
 5 ¡Le güe lá'ana La Xránadxu, lawe' da gunná bé'ene', na' guzúale!
 6 ¡Bene' súale tu chi'ize, ne chadía chacanna!
 ¡Bzue' cheele tu da bdxixruj be'e da quebe te chee' na!
 7 ¡Le güe lá'ana Xránadxu lu xezr la xu, le'e, bea zri'a zrale lu nísadau', ne xúgute nisa situj,
 8 ne le'e, xesa guziu', ne xiaj xiuj, ne bezxe', ne beuj ca',
 ne le'e, be' bduunu' ca', dxunle ca' gunná be'e!
 9 ¡Le güe lá'ana Le', le'e, xí'adu ca', ne xi'a zri'a ca',
 ne le'e, xaga zixre ca', ne xaga cedro ca',
 10 ne le'e, be' xixre' ca', ne bea ca' dxuluxúe bénneache,
 ne le'e, be' snia ca', ne be' zaj zua xrila!
 11 ¡Le güe lá'ana Le', le'e, benne' wenná bea ca', ne xúgute bénneache,
 ne le'e, benne' dxeleenná be'e, ne benne' dxuluchi'e,
 12 ne le'e, benne' wegu' ca', ne nú'uladu ca',
 ne le'e, benne' gula ca', ne bidu ca'!
 13 ¡Le güe lá'ana La Xránadxu!
 ¡Szréntedxa naca La Le' ca' xúgute la bénneache!

¡Da xabáa chee' dxulé'e lau na lu xęzr la
xu, ne xabáa!

¹⁴ ¡Le' nune' xęzr chee' xęzre wal-la!

¡Le güe lá'ana Le', le'e, bėnneache chee',
nácale zrí'ine zre sua Israel!

¡Nácale benne' nazrí'i Le'!

¡Le güe lá'ana Xránadxu!

149 ¡Le güe lá'ana Xránadxu Dios!
¡Le gul-la chee Xránadxu tu
da cube!

¡Le güe lá'ana Le' naga zaj nazraga bėn-
neache chee'!

² ¡Le be, le'e, benne' Israel, lau Bėnnea'
bene' le'e!

¡Le sua xel-la' dxebé, le'e, zrale Sion, lau
Bėnnea' naque'

Wenná Bea cheele!

³ ¡Le güe lá'ana La Xránadxu, ne
guxa'ale!

¡Le guchunchu xide ca', ne le quinne
da cun zríadi'i na du ca', dxue lá'anale
Le'!

⁴ ¡Xránadxu Dios dxezaca ba lázrelene'
bėnneache chee'!

¡Dxape' ba lá'ana benne' dxexruj lazre'
ca', ne dxuselé' le'!

⁵ Dخال-la' xelebéqueze bėnneache chee'
lu da xabáa chee',

ne xelúl-le' dutę xel-la' dxelebé du xela.

⁶ Dخال-la' xelebezre xę'e, xelúe lá'ane'
Dios,

zaj nu'e xia da zaj nalá dxupa la'ate,

⁷ chee xelexebéaj lazre' benne' xęzr la xu
ca',

ne xuludée' xel-la' zi' benne' xęzre ca',

⁸ ne xuluchéaję' benne' wenná bea chee'
ca' du xia,

ne benne' dxelenná be'e nen du xia,

⁹ ne xuluzría xi'e benne' ca' ca ba nun
Dios gaca chee'.

Da nigá gaca na da xabáa chee bėn-
neache chee Dios.

¡Le güe lá'ana Xránadxu!

150 ¡Le güe lá'ana Xránadxu Dios!
¡Le güe lá'ana Xránadxu lu xu-
dau' chee'!

¡Le güe lá'ana xel-la' waca chee' lu xabáa
chee'!

² ¡Le güe lá'ana Le' ca zaj naca da zren da
nune'!

¡Le güe lá'ana Le' ca naca xel-la' szren
chee'!

³ ¡Le güe lá'ana Le', gucuézrele luzu ca'
da dxulucuezre'!

¡Le güe lá'ana Le', quínnele da cun
zríadi'i na du,

ne da ca' dxínnele!

⁴ ¡Le güe lá'ana Le', guchúnehule xide, ne
guxa'ale!

¡Le güe lá'ana Le', quínnele da cun
zríadi'i na du,

ne gucuézrele bchiuj!

⁵ ¡Le güe lá'ana Le', gutíl-lale xíadu ca'!

¡Le güe lá'ana Le', gutíl-lale xia zren ca'!

⁶ ¡Le güe lá'ana Xránadxu, xúgutęle naca
banle!

¡Le güe lá'ana Xránadxu Dios!

**DIZRA' CHAWE' CA NACA
CHEE JESUCRISTO DA
BZUAJ SAN MATEO**

**La benne' ca' gulaque'
xra gula chee Cristo**

(Lc. 3.23-38)

1 Da caní zaj naca na la chee benne'
zaj naque' xra wdé chee Jesucristo.
Jesús nigá nababe' zri'ine zre sua David,
ne zri'ine zre sua Abraham.

² Abraham nigá guque' xra Isaac.

Isaac nigá guque' xra Jacob.

Jacob nigá guque' xra Judá, ne benne'
biche' ca'.

³ Judá nigá guque' xra Fares, ne Zara,
na' Tamar guque' xrna Fares, ne Zara
caní.

Fares nigá guque' xra Esrom.

Esrom nigá guque' xra Aram.

⁴ Aram nigá guque' xra Aminadab.

Aminadab nigá guque' xra Naasón.

Naasón nigá guque' xra Salmón.

⁵ Salmón nigá guque' xra Booz, na' Rahab
guque' xrna Booz nigá.

Booz nigá guque' xra Obed, na' Rut
guque' xrna Obed nigá.

Obed nigá guque' xra Isaí.

⁶ Isaí nigá guque' xra David, benne'
wenná bea.

Wenná bea David nigá, ne nu'ula na'
nédxute guque' zru'ula Urías gu-
laque' xra xrna Salomón.

⁷ Salomón nigá guque' xra Roboam.

Roboam nigá guque' xra Abías.

Abías nigá guque' xra Asa.

⁸ Asa nigá guque' xra Josafat.

Josafat nigá guque' xra Joram.

Joram nigá guque' xra Uzías.

⁹ Uzías nigá guque' xra Jotam.

Jotam nigá guque' xra Acáz.

Acáz nigá guque' xra Ezequías.

¹⁰ Ezequías nigá guque' xra Manasés.

Manasés nigá guque' xra Amón

Amón nigá guque' xra Josías.

¹¹ Josías nigá guque' xra Jeconías ne
benne' biche' ca' ca lu zra ca' gate
benne' Babilonia guleché'e benne' Is-
rael ca' lu xezr la xu Babilonia.

¹² Jeconías nigá guque' xra Salatiel.

Salatiel nigá guque' xra Zorobabel.

¹³ Zorobabel nigá guque' xra Abiud.

Abiud nigá guque' xra Eliaquim.

Eliaquim nigá guque' xra Azor.

¹⁴ Azor nigá guque' xra Sadoc.

Sadoc nigá guque' xra Aquim.

Aquim nigá guque' xra Eliud.

¹⁵ Eliud nigá guque' xra Eleazar.

Eleazar nigá guque' xra Matán.

Matán nigá guque' xra xetú benne' le'
Jacob.

¹⁶ Jacob nigá guque' xra José, benne'
chee María, xrna Jesús, Bénnea'
naque' Cristo.

¹⁷ Caní naca, gulaca chidá' cue' bén-
neache gate guzú lau zua Abraham,
ca bzrinte zra zua David, na' gulaca
xechidá' cue' bénneache ca' gate guzú lau
zua David, ca bzrinte zra gate na' benne'
Babilonia ca' guleché'e benne' Israel ca'
lu xezr la xu chee', na' gulaca xechidá'
cue' bénneache ca' gate guzú lau zra na',
ca bzrinte zra gulaj Cristo.

Ca guca gate gulaj Cristo

(Lc. 2.1-7)

¹⁸ Caní guca gate na' gulaj Jesucristo.
María, xrna Jesús ba nachébebe' gácabe'
zru'ula José. Nédxula ca za xelenite',
nu'ula nigá ba zue' zi'i ne chee xel-la'
waca chee Be' Lá'azxa chee Dios. ¹⁹ José,
benne' chee María nigá, naque' benne'
xrlátaje. Quebe guca lazre' gulé'ene' ca
ba naca chee María lau benne' xezre ca'.
Guca lazre' gusané' le' bagácheze. ²⁰ Dxá-
cate dxudé lazre' da nigá, ble'e lau tu
gubáz chee xabáa, gubáz chee Xránadxu,
ga zua José na' lu bchigala, na' guzre' le':

—José, zri'ine zre sua David, quebe
zrebu' si' lu na'u María chee gácabe'

zru'ulu', lawe' da bidu biu na' sanbe' zabe' ne chee Be' Lá'azxa chee Dios. ²¹Zrú'ulu' gúxrube' tu bidu biu cheebe', na' lue' gu'u labe' Jesús. Caní gu'u labe' lawe' da guselabe' bènneache lu dul-la da zaj nabague'.

²²Xúgute da caní gulaca ca' chee guca ca da gunná Xránadxu lu dxu'a benne' ca' buluchálaje' waláz chee'. ²³Caní gunné': Tu nú'uladau' gúadaube' sanbe' tu bidu biu cheebe',

na' xelu'e labe' Emanuel.

Emanuel zéaje na: Dios zúalene' dxi'u.

²⁴Ca bebán José, na' bene' cáteze gunná gubáz chee Xránadxu, na' guzí' lu ne'e María chee gácabe' zru'ule'.

²⁵Quebe gulaque' tuze ca gusandxa María bidu biu nedxu cheebe', na' buluzúe' labe' Jesús.

Dxeleznín benne' sina ca' lu xezre Jerusalén

2 Bidau' Jesús gúlajbe' lu xezre Belén da nababa xezr la xu Judea gate dxenná bea benne' le' Herodes ga na'. Nadxa beleznín benne' ca' lu xezre Jerusalén, benne' zá'aque' chalá'a naga dxalaj gubizra, zaj naque' benne' sina gula. ²Na' gulenabe':

—¿Ga zua bidu na' ba gúlajbe' chee gácabe' benne' nna bé'ene' benne' judfo ca'? Gate zuantu' chalá'a naga dxalaj gubizra blé'entu' belaj cheebe', na' bla'ntu' nigá chee gúe lá'ana gúe szrentu'-be'.

³Ca guneze Herodes, benne' wenná bea, da nigá, na' guzúe' stebe, ne cá'anqueze guca chee xúgute benne' zaj zre'e Jerusalén. ⁴Nadxa Herodes, wenná bea na', btupe' xúgute benne' xíchaje chee bxruze ca', ne benne' dxuluxúzajle'e da nadxixruj bea Dios, na' gunábene' benne' ca':

—¿Gazra na' galaj Cristo?

⁵Benne' caní gulé'e le':

—Lu xezre Belén da nababa xezr la xu Judea, lawe' da bzuaj caní tu

benne' bchálaje' waláz chee Dios, gate na' gunné':

⁶Lue', Belén chee xezre ca' zaj nababa na Judá,

nacu' lue' xezre da quebe naca na da bzébedxa

ládujla benne' ca' dxelezná be'ene' xezr la xu Judá nigá,

lawe' da ládujla bènneache chiu' dxuaj tu benne' nna be'e,

na' guxúequeze' bènneache chia', benne' Israel.

⁷Nadxa Herodes, wenná bea na', bláwizre' bagácheze benne' sina gula ca', na' gunábene' le' bátala ble'e lau belaj na' belelé'ene'. ⁸Nadxa gusel-le' benne' ca' chjaque' xezre Belén, ne guzre' le':

—Le chjaca na', ne le naba xanne' chee bidu na', na' ca cheajxrácale-be', na' le guzén neda' chee cha'a neda' gúe lá'ana gúe szrena'-be'.

⁹Ca bexuzre belén benne' sina gula ca da gunná Herodes, wenná bea, nadxa besiá'que', na' belaj da belelé'ene' gate zaj zre'e chalá'a naga dxalaj gubizra zeaj na lau le', na' bzrinte na, ne guzúa na naga zua bidu na'. ¹⁰Gate benne' sina gula ca' belelé'ene' belaj na', nadxa gulebéle'ene'. ¹¹Ca gulu'e lu xu'u, belelé'ene' bidu na', ne xrnabe' María. Nadxa buluzú zribe' dxelúe lá'ana dxelúe szrene' bidu na'. Nadxa gulesálaje' xua chee' ca', ne bulunézruje'-be' oro, ne xalaj zixre, ne mirra da naca na zichaj. ¹²Ca gudé na', Dios guzre' benne' ca' lu bchigala québedxa xelexedée' naga zua Herodes. Chee le na belexequé'e neza xula, belexezrine' lazrie'.

Ca guca beleché'e Jesús lu xezr la xu Egipto

¹³Ca gudé besí'aca benne' sina gula ca', nadxa tu gubáz chee xabáa, gubáz chee Xránadxu ble'e lawe' José lu bchigala, na' guzre' le':

—Guxasa. Becá'a bidu na', ne xrnabe', na' le hjaca lu xezr la xu Egipto, na' xegá'anu' ga na' ca zrindxa zra xapa' lue' xetú. Caní dxal-la' gunu' lawe' da wexilaj Herodes bidu nigá chee gutië'-be'.

¹⁴Nadxa José guxase', na' chizrélala beche'e bidu na', ne xrnabe', na' bexu'e-be' lu xezr la xu Egipto. ¹⁵Gulezré'e na' ca bzirindxa zra gute Herodes. Caní guca ca naca da gunná Xránadxu lu dxu'a benne' bchálaje' waláz chee', gunné': "Xuláwizra' bi biu chia' chee' xedxúajbe' lu xezr la xu Egipto."

Dxenná be'e Herodes benne' ca' xelútië' bidu biu ca'

¹⁶Gate gúquebe'e Herodes gulezí xé benne' sina ca' le', na' bzrá'ale'e, ne gunná bé'ene' benne' ca' xelútië' xúgute bi biu dxé'enedau', ca zrintë bidu ca' ba zaj zua chup iza, bidu ca' zaj zrabe' xezre Belén, ne bidu ca' zaj zrabe' lu xézredu ca' zaj naxechaj na xezre Belén na'. Caní ben Herodes cáteze buluzén benne' sina gula ca' le' ca naca zra na' belelé'ene' belaj na'. ¹⁷Ca'an guca ca da bzuaj Jeremías, bénnea' bchálaje' waláz chee' Dios ba guca zan' iza, gunné':

¹⁸Guca tu schaga lu xezre Ramá.

Guca webezre, ne gulebezre xache'. Raquel na' dxebézrele'e chee' bi chee' ca'. Québequeze dxaca lazre' xexaca zrene' lawe' da ba gulate bi chee' ca'.

¹⁹Ca gudé gute Herodes, na' tu gubáz chee' xabáa, gubáz chee' Xránadxu ble'e lawe' José lu bchigala naga zue' Egipto, na' guzre' le':

²⁰—Guxásache. Beche'e bidu chiu' nigá, ne xrnabe'. Bexíaj lu xezr la xu Israel, lawe' da ba gulate benne' ca' gulaca lazre' xelútië' bidu nigá.

²¹Nadxa guxasa José, na' beche'e bidu na', ne xrnabe', na' belexezrine' lu xezr la xu Israel. ²²Ca guneze José dxenná bea Arquelao naga nababa Judea waláz chee' xre', Herodes na', na' bzrebe José xexía-

je' ga na'. Nadxa bexíaje' naga nababa Galilea ca da ba guzre gubáz chee' xabáa le' lu bchigala. ²³Ca bezrine' na', na' bexíaje' cheajxezúe' lu xezre Nazaret. Caní guca ca da gulenná benne' ca' buluchálaje' waláz chee' Dios, gulenné' Jesús nigá si le' benne' Nazaret.

Juan dxegu'e lban le'e xixre' lawe' lataj

(Mr. 1.1-8; Lc. 3.1-9, 15-17; Jn. 1.19-28)

3 Ca lu zra ca' bla' Juan, bénnea' bchue' bénneache nisa, dxegu'e lban le'e xixre' lawe' lataj naga nababa Judea. ²Dxenné':

—Le xebí'i lazre' lawe' da ba zua gáguze zra nna bea Dios lu xezr la xu nigá.

³Juan nigá naque' bénnea' bchalaj Isaías chee'. Isaías bchálaje' waláz chee' Dios gate bzuaje' caní:

Dxene chi'i benne' dxebezre xé'e le'e xixre' lawe' lataj, dxenné':

Le gucá'ana chawe' neza naga te Xránadxu.

Le xulí neza lase ca' lau Le' naga té'e.

⁴Zra lana Juan nigá nune na xicha zra camello, ne bazxu dxu'a le'e chee' naca na xide, na' dxawe' biche xuaj, ne bzrína'dau' chee' bézudau'. ⁵Belezzín benne' belenne' ca da dxuchalaj Juan, benne' zá'aque' xezre Jerusalén, ne benne' chee' xúgute xezre ca' zaj nababa Judea, ne benne' zá'aque' xézredu ca' zaj nnita gáguze xegu Jordán. ⁶Ca gulexráulape' dul-la chee', Juan nigá bchue' benne' ca' nisa lu xegu Jordán.

⁷Gate ble'e Juan benne' zan benne' xudau' fariseo, ne benne' xudau' saduceo zá'aque' chee' xelixedxúe' nisa, na' guzre' benne' ca':

—Le'e, be snia. ¿Zua nu guzre le'e guzrúnnajle da ba xa' da za'? ⁸Le gun da xrlátaje da xelunna bea na ba bebí'i lázrele. ⁹Quebe guéquele lale, dxennale le'eze: "Nalatu' lawe' da nácantu' xrtia

Abraham.” Neda' dxapa' le'e: Dios waca xexune' xiaj caní zri'ine xrtia Abraham. ¹⁰Le'e nácale ca xaga ca'. Xia waga bache nalá na chee chugu na xaga ca', na' xúgute xaga ca' quebe dxelebía na da zixre chawe' welechugue na, na' xelexze na lu xi'. ¹¹Da li neda' dxuchúa' le'e nisa, da dxunna bea na ba bebí'i lázrele, san Bénnea' ze'e ca te chia' neda', Le' gune' ca da zéaje xel-la' dxedxúa nisa, guzúe' le'e Dios Be' Lá'azxa, ne xi' chee'. Benne' nigá nácadxe' blau ca neda', na' quebe zaca' cuéajza' zrele' xu'u ni'e. ¹²Cá'anqueze nácale ca zrua' xtila. Benne' nigá ba nu'e da dxun be', cuéaje' xrte zrua' xtila na', na' xebéaje' chalá'ala xizre chee na, na' xuzrá chawe' zrua' xtila na' lu da'a chee na, san guzezxe' xizre na' lu xi' da quebe xexula na.

Da guca gate gudxúa Jesús nisa

(Mr. 1.9-11; Lc. 3.21-22)

¹³Nadxa Jesús bezé'e naga nababa Galilea, na' bezrine' dxu'a xegu Jordán naga zua Juan chee guchúe' Le' nisa. ¹⁴Nédxute Juan quebe guca lazre', na' dxé'e Jesús:

—Lue' dxal-la' guchú'u neda' nisa. Quebe zaca' neda' guchúa' Lue' nisa.

¹⁵Jesús guzre' le':

—Be' lataj gaca caní na'a. Dxun na ba xen gundxu xúgute da xrlátaje lau Dios.

Nadxa Juan bene' ca'. ¹⁶Gate bexuzre gudxúa Jesús nisa, na' la bxálajte xabáa, na' ble'e Juan Be' Lá'azxa chee Dios dxétaje' ca tu gugu chíchidau', zeajsiaba' lawe Jesús. ¹⁷Nadxa ben tu chi'i lu be', gunné':

—Benne' nigá naque' Zrí'inequeza' nazrí'ite lazra'. Dxezaca ba lázrelena' Le'.

Dxaca lazre' da xriwe' gun na бага Jesús zria

(Mr. 1.12-13; Lc. 4.1-13)

4 Nadxa Be' Lá'azxa chee Dios la guché'te' Jesús le'e xixre' lawe' lataj

naga gúe lazre' da xriwe' gun zréaje na Le'. ²Quebe bi gudagu Jesús chua zra chua xela, na' ca gudé na' gudune'. ³Nadxa da xriwe' bzrin na naga zua Jesús chee gun zréaje na Le', na' dxé na Le':

—Che Lue' nacu' Zri'ine Dios, gunná be'e xiaj caní xelexaca na xeta xtila.

⁴Jesús bechebe':

—Lu xiche chee Dios dxenné': “Quebe gaca ban nu benne' gawe' xétaze, san nen xúgute dizra' chee Dios gaca bane'.”

⁵Nadxa da xriwe' guché na Jesús lu xezre lá'azxa Jerusalén, na' bzua na Le' xíchajte xudau', ⁶na' guzre na Le':

—Che Lue' nacu' Zri'ine Dios, guxrite' nigá, lawe' da dxenná lu xiche chee Dios: Dios nna bé'ene' gubáz chee xabáa chee ca'

chee xelácalene' Lue'.

Welexechise' Lue' nen ne'e chee quebe gunu' zi' ni'u lu xiaj ca'.

⁷Na' gunná Jesús:

—Cá'anqueze dxenná lu xiche chee Dios, dxé'e bénneache: “Quebe guchí-nenu' Xranu' Dios cáteze dxaca lazru'.”

⁸Nadxa da xriwe' guché na Le' tu lu xi'a sibe, na' ble'e na Le' ca naca xúgute cue' xezr la xu zaj nnita lu xezr la xu, ne ca naca xel-la' guni'a chee na. ⁹Na' gunná da xriwe', dxé na Le':

—Xúgute da caní gunna' chiu' che guzú zribu' gucá'ana szrenu' neda'.

¹⁰Nadxa Jesús guzre' na:

—Bexíaj, da xriwe', lawe' da dxenná Dios lu xiche chee', dxé'e bénneache: “Bca'ana szren Xranu' Dios, ne be lá'ana tuze Le'.”

¹¹Nadxa da xriwe' becuasa na lau Jesús, na' belezrín gubáz chee xabáa chee Dios, ne bulunézruje' da dxechine Jesús.

**Dxuzú lau Jesús dxuchálaje' xrtizra'
Dios naga nababa Galilea**

(Mr. 1.14-15; Lc. 4.14-15)

¹² Gate ben Jesús xu'u Juan lizre xia, na' bezé'e zexíaje' naga nababa Galilea.

¹³ Quebe bga'ana Jesús xezre Nazaret. Xeajsúe' lu xezre Capernaum da zua na dxu'a nísadau' naga zaj zra' xrtia Zabulón, ne xrtia Neftalí. ¹⁴ Caní guca ca da bzua' Isaiás, benne' bchálaje' waláz chee Dios, gunné':

¹⁵ Lu xezr la xu chee Zabulón, ne chee Neftalí,

naga zrua neza da zeaj na dxu'a nísadau', chalá'a naga dxalaj gubizra xechalá'a xegu Jordán.

Naga nababa Galilea, naga zaj zra' benne' quebe zaj naque' judío.

¹⁶ Bénneache zaj zra' lu da chul-la belelé'ene' tu da dxusaníle'e na, na' benne' zaj zra' naga xu'u zrul-la chee xel-la' gute

ba bsaní' tu xi' naga zaj zre'e.

¹⁷ Ca lu zra na' guzú lau Jesús dxegu'e lban, dxenné':

—Le xebí'i lázrele, lawe' da ba zua gáguze zra nna bea Dios lu xezr la xu nigá.

**Jesús dxuláwizre' tapa
benne' wezén bela**

(Mr. 1.16-20; Lc. 5.1-11)

¹⁸ Gate na' zeaj Jesús dxu'a nísadau' ga nababa Galilea, na' blé'ene' chupa benne'. Tué' le' Simón, ne zua xetú le' Pedro, na' xetú le' Andrés, biche Simón na'. Benne' caní zaj naque' benne' wezén bela, na' dxuluzalé' xixruj bela chee' lu nisa. ¹⁹ Nadxa Jesús dxé'e benne' caní:

—Le gun neda' tuze, na' guna' le'e benne' gutúpale chia' bénneache ca dx-unle dxezenle bela.

²⁰ La bulucá'anate' xixruj chee' ca', na' zjácálene' Jesús.

²¹ Xelátedauze gusá'aque', na' ble'e Jesús xechupa benne'. Tué' le' Jacobo, ne xetú le' Juan, biche Jacobo nigá. Zaj naque' zri'ine Zebedeo, ne zaj xu'e tu lu da dxedá lawe' nísadau' nen xre', dx-elexún chawe' xixruj chee'. Jesús bláwizre' le', ²² na' la bulucá'anate' da dxedá lawe' nísadau' na', ne xre', na' zjácálene' Jesús.

**Jesús dxusédené' bénneache
naga nababa Galilea**

(Lc. 6.17-19)

²³ Zeaj Jesús xúgute xezre zaj nababa Galilea, na' tu tu xezre ca' dxuzéajni'ine' bénneache lu xu'u ca' naga dxulucá'ana szren benne' judío ca' Dios. Na' dx-egu'e lban ca nna bea Dios, ne dxexune' xúgute benne' ca' ca zaj naca xízrawe' cha chee'. ²⁴ Ca'an guca, xúgute benne' chee xezr la xu Siria belenne' ca da dxun Jesús, na' belezrine' lau Jesús, zaj naché'e benne' we' ca', benne' zaj xu'e xízrawe', ne benne' zaj zue' lu xel-la' dx-udía, ne benne' zaj xu'e be' xriwe', ne benne' zaj xu'e chuna', ne benne' zaj naxrú'unié' bine, na' bexún Jesús xúgute benne' caní. ²⁵ Zjácále benne' zan Le', benne' zaj nababe' xezre ca' zaj nababa Galilea, ne benne' zá'aque' xezre Decápolis ca', ne benne' Jerusalén, ne benne' zaj nababe' xezre ca' zaj nababa Judea, ne benne' zá'aque' xechalá'ala xegu Jordán naga dxalaj gubizra.

Lban da bchalaj Jesús tu lu xi'a

5 Gate ble'e Jesús xúgute benne' zan ca' zá'aque' naga zue', nadxa gu-luéné' tu lu xi'a, ne gudxé'e na'. Nadxa benne' ca' dxuséde Jesús beledubé' cuité'. ² Nadxa guzú lau Jesús dxusédené' benne' ca'.

Nu benne' naca chee' tu da ba neza

(Lc. 6.20-23)

³ Gunná Jesús:

—Da ba neza zrentę naca na cheę benne' ca' dxexúnbe'e ca naca xel-la' dxexazrje cheę' lau Dios. Benne' caní zaj naca cheę' xelexú'e naga dxenná bea Dios xabáa.

⁴Da ba neza zrentę naca na cheę benne' ca' dxelelé'elę' zaj zue' lu da baxache' lawe' da zaj nabague' dul-la. Dios dxexúe zrene' benne' caní.

⁵Da ba neza zrentę naca na cheę benne' zaj naque' zren lazre'. Benne' caní xelezí'e cheę' xęzr la xu da nachębe lazre' Dios gunézruje' benne' caní.

⁶Da ba neza zrentę naca na cheę benne' du lazre' dxelaca lazre' xelunę' da naca xrlátaje lau Dios. Dios gácalene' benne' caní.

⁷Da ba neza zrentę naca na cheę benne' dxexexache lazre' benne' xula. Dios wexache lazre' benne' caní.

⁸Da ba neza zrentę naca na cheę benne' ca' zaj xu'u xichaj lázrdawe' da xrlátaje. Benne' caní welelé'ene' Dios.

⁹Da ba neza zrentę naca na cheę benne' dxelebeza zri lazre' nen bėneache. Dios guzúe' le' ca bi cheéqueze'.

¹⁰Da ba neza zrentę naca na cheę benne' dxeledé'e xel-la' zi' lu na' benne' ca' dxelunę' cheę' da calela cate' dxelunę' da xrlátaje. Benne' caní zaj naca cheę' xelexú'e naga dxenná bea Dios xabáa.

¹¹Da ba neza zrentę naca na cheęle le'e che benne' dxelennę' schanni' cheęle, ne dxelunę' cheęle da calela, ne dxelennę' cheęle xúgute' dizra' wen lazre' lawe' da nácale chia' neda'. ¹²Le be, ne le xezaca ba lázrele lawe' da wazile tu da zrentę da gunna Dios le'e xabáa. Caní gaca na lawe' da cá'aqueze caní guláu zi' xuzre' benne' ca' buluchálaje' waláz cheę Dios, benne' ca' gulezre' nédxudxa ca le'e.

Nácale ca zede', ne ca tu xi' lu xęzr la xu

(Mr. 9.50; Lc. 14.34-35)

¹³Na' gunná Jesús:

—Le'e nácale ca zede' cheę bėneache lu xęzrla xu nigá. Che zede' nigá xente xel-la' sna'a cheę na, ¿ájazra gácalele bėneache ca'? Québedxa gaca guchínedxu zede' caní. ¡Chú'unadxu na, na' xululęaj bėneache le' na!

¹⁴'Le'e nácale ca tu xi' cheę bėneache zaj zre'e xęzr la xu. Tu xęzre da zua na tu lu xi'a, quebe gáchequeze na. ¹⁵Gate guzálajdxu tu xi', quebe gudúsedxu na. Guzúadxu na sibe naga gusení na cheę xeledé'e xúgute' benne' zaj zre'e lu xu'u.

¹⁶Cá'aqueze le gun le'e. Le güe lataj gusení xi' da nácale lau bėneache ca' cheę xeledé'ene' ca da xrlátaje da dxunle. Nadxa xelúe lá'ane' Xrale Dios zue' xabáa.

Da bchalaj Jesús ca naca cheę da nadxiruj bea Dios

¹⁷Gunná Jesús:

—Quebe dxal-la' guéquele le'e za'a neda' cheę cua' ca naca da bdxiruj be'e Moisés, ne ca naca dizra' da buluchalaj benne' ca' buluchálaje' waláz cheę Dios. Quebe za'a cheę cua' na. Za'a cheę gulé'eda' cáteze zéaje na. ¹⁸Da li dxapa' le'e. Dxácate zaj zua xabáa, ne xęzr la xu nigá, quebe dúaqueze tu dizra', ne tu da da' lu da nadxiruj bea na nigá ca zrindxa zra gaca xúgute' ca da dxal-la' gaca na. ¹⁹Cheę le' na', che tu benne' guzúe' chalá'ala bítetezla da nigá da bdxiruj bea Dios, láqueze naca na tu da dauze, ne che guzėanjni'ine' bėneache cheę xelúnqueze' ca', benne' nigá xegá'ane' cáaze naga dxenná bea Dios xabáa. Bėneea' guzúe' dizra' da nadxiruj bea nigá, ne gulé'ene' bėneache cheę xelúnqueze' ca', benne' nigá wegá'aqueze' ba lá'ana naga dxenná

bea Dios xabáa. ²⁰ Dxapa' le'e, che quebe gunle da nácadxa xrlátaje ca da dxelún benne' ca' dxuluxuzájle'e da nadxixruj bea Dios, ne ca da dxelún benne' xudau' fariseo ca', cabata' xexú'ule le'e naga dxenná bea Dios xabáa.

Da bchalaj Jesús ca naca chee xel-la' dxezrá'a

(Lc. 12.57-59)

²¹ Na' gunná Jesús:

—Le'e ba bénele ca gulenná xrtíale gula ca': "Quebe gútele benne'," na' "Núteteze benne' gutie' benne' waxíaje' chee cúia xi'e." ²² Neda' dxapa' le'e, núteteze benne' dxezré'e le sa' ljwezre' waxíaje' chee cúia xi'e. Na' bénnea' dxenné' schanni' chee le sa' ljwezre' waxíaje' lau benne' chee xu'u lawe' blau, na' xuludé'e le' chee cúia xi'e. Bénnea' dxenné' chee le sa' ljwezre' tu dizra' sban, benne' nigá nácaqueze chee' chéaje' lu lataj ba xa'.

²³ Che gu'u lu xudau' tu da gunézruju' lau Dios, ne na' cheajsá lazru' chee tu da nunu' chee le sa' ljwezru', ²⁴ bca'ana da na' gunézruju' na', teca xexíaju' xegá'anu' chawe' nen le sa' ljwezru'. Nadxa waca xexíaju' lu xudau' chee bi gunézruju' lau Dios.

²⁵ Che zua nu benne' dxebagu' chee', na' che'e lue' lau benne' guchi'e chiu', bexaca chawe' nen le' la neza na', chee quebe gudé'e lue' lau bénnea' dxuchi'e da dxaca. Che quebe gunu' caní, nadxa benne' dxuchi'e da dxaca na' gudé'e lue' lu na' benne' dxusézxujé' bénnea' ca' lizre xia, na' xelegú'e lue' lizre xia na'. ²⁶ Da li dxapa' lue'. Quebe xedxúaju' na' che quebe quízruju' xúguté da dxebagu' chee benne' na'.

Da bchalaj Jesús ca naca chee benne' dxíchaje' xrba chee xel-la' nuchaga na'

²⁷ Na' gunná Jesús:

—Le'e bache bénquezle ca gulenné' nédxute: "Quebe gunu' dul-la da dxichaj na xrba chee xel-la' nuchaga na'." ²⁸ Neda' dxapa' le'e, núteteze benne' ne'e tu nu'ula, ne sa lazre' le', báchequeze bene' dul-la nen nu'ula na' lu xichaj lázrdawe'.

²⁹ Che xiaj lau' da zua xabéla dxuzúa na lue' lu dul-la, guleaj na, ne gudxú'una na zítu'la. Nácadxa chawe' nite late' da naca na chee bel-la' dxen chiu' quézcala chu'u lataj ba xa' duté bel-la' dxen chiu'. ³⁰ Che na'u da zua xabéla chiu' dxuzúa na lue' lu dul-la, guchugu na, ne gudxú'una na zitu'. Nácadxa chawe' nite late' da naca na chee bel-la' dxen chiu', quézcala chu'u lataj ba xa' duté bel-la' dxen chiu'.

Jesús dxusédene' ca naca chee benne' dxexel'é'e nen zru'ule'

(Mt. 19.9; Mr. 10.11-12; Lc. 16.18)

³¹ Na' gunná Jesús:

—Cá'anqueze gulenné' nédxute: "Núteteze benne' dxexel'é'e nen zru'ule', dxal-la' gunézruje' nu'ula na' tu xiche da dxulé'e na belexel'é'e." ³² Neda' dxapa' le'e, che tu benne' dxexel'é'e nen zru'ule', na' nu'ula nigá quebe guzúalene' benne' xula, benne' chee nu'ula nigá dxuzú'e le' lu dul-la chee da dxichaj na xrba chee xel-la' nuchaga na' che tu benne' biu xula guchaga ne'e nen nu'ula na' bsan benne' chee le'. Cá'anqueze le' dxune' dul-la nen nu'ula na'.

Jesús dxusédene' ca naca chee benne' dxucá'ana lie' xrtizre'

³³ Na' gunná Jesús:

—Cá'anqueze ba bénele ca gulenná benne' gula ca', gulenné': "Quebe gucá'anu' cá'aze ca da nachebe lazru' nen dizra' bca'ana liu' lau Xránadxu Dios." ³⁴ Neda' dxapa' le'e: Quebe dxal-la' guzétjale xabáa chee guca'ana lile dizra' chee, lawe' da naca na naga dxe' Dios, ³⁵ ne quebe guzétjale xezr la

xu nigá lawe' da naca na naga nuzúa Dios ni'e, ne quebe guzétjale Jerusalén lawe' da naca na xezre chee Benne' Blau naque' Wenná Bea. ³⁶ Quebe guzétjale xíchajle chee guca'ana lile dizra' chee lawe' da quebe séquele gunle da chiche, ne da gasaj netú xicha xíchajle. ³⁷ Le nnaze: "Awe'," u le nnaze: "Cabí," lawe' da gate tu benne' dxudadxé' chee' chee da nigá, naca na chee da xriwe'.

**Dxul'é Jesús ca naca chee
nu benne' dxexebáj lazre'**

(Lc. 6.29-30)

³⁸ Na' gunná Jesús:

—Le'e ba bénele ca da gulenné' nédxute: "Che tu benne' cuéaje' xiaj lau', cá'anqueze gunu' chee', ne che cuéaje' lazxu', cá'anqueze gunu' chee'." ³⁹ Neda' dxapa' le'e, quebe tíl-laléle nu benne', san che tu benne' gu'e chala'a xragu', be' lataj gu'e xechalá'a xragu'. ⁴⁰ Che tu benne' gaca xúzre'lené' lue', ne dxaca lazre' cue' zrau', be' lataj xúate' xicha chiu'. ⁴¹ Che dxulusebágué' lue' gu'u xua chee' tu cuéndau', bia na chupa cuenla. ⁴² Che núteteze benne' bi dxenabe' chiu', bnézruje' na, ne quebe guzagu' ca gunézruju' chee nu benne' bi dxenabe' chite.

**Jesús dxusédené' ca dxal-la' zri'idxu
benne' ca' dxeledábague' dxi'u**

(Lc. 6.27-28, 32-36)

⁴³ Na' gunná Jesús:

—Cá'anqueze ba bénele ca da gulenné' nédxute: "Bzri'i le sa' ljwezru', ne gucuide benne' dxedábague' lue'." ⁴⁴ Neda' dxapa' le'e, le zri'i benne' ca' dxeledábague' le'e. Le naba gaca chawe' chee benne' dxelenné' chee. Le gun da chawe' chee benne' dxelecuídené' le'e. Le naba lau Dios gaca chawe' chee benne' dxelenné' schanni' chee ne dxeluné' chee da calela. ⁴⁵ Che gunle caní gácale bi cheéqueze Xrale zué' xabáa, lawe'

da dxun Le' dxusaní' gubizra naga zaj zra' benne' wen da calela ne naga zaj zra' benne' xrlátaje ca', ne dxusel-la' nisa xiuj lu xezr la xu chee benne' chawe' ca', ne lu xezr la xu chee benne' ca' dxeluné' da calela. ⁴⁶ Che nazrí'ile tuze benne' zaj nazrí'ine' le'e, ¿ájazra na' dxezá lázrele quizruj Dios le'e? Cá'anqueze dxelún benne' wechizruj ca', zaj nazrí'ine' le sa' ljwezre'. ⁴⁷ Che le'e dxugápale diuzre tuze le sa' ljwézrele, ¿bizra da xrlátaje dxunle? Cá'anqueze dxelún benne' quebe zaj núnbe'e Dios. ⁴⁸ Le gaca benne' xrlátaje cáteze naca Xrale zué' xabáa, naque' xrlátaje.

**Dxul'é Jesús ca naca da
xrlátaje da dxelún bènneache**

6 Caní gunná Jesús:

—Le guxúe xanne' cuínale chee quebe gunle da naca chee xel-la' benne' xudau' chee lau bènneache chee xelélé'engé' na. Che ca'an dxunle, na' Xrale Dios zué' xabáa québequeze bi gunné' le'e. ² Chee le na', gate lue' dxácalenu' benne' dxelexáizrjene', quebe guzennu' xúgute bènneache ca da dxunu', ca dxelún benne' ca' dxeluné' xrlátaje cúzreze la neza, ne lu xu'u naga dxulucá'ana szren benne' judío ca' Dios. Dxeluné' da caní chee xelenné' bènneache xrlátaje chee'. Da li dxapa' le'e, ba déqueze lazruj chee'. ³ Gate lue' gunézruju' late' chee benne' dxelexáizrjene', ben na luéze chee quebe neze le sa' ljwezru'. ⁴ Ben da caní bagácheze, na' Xrau' Dios, Bénnea' dxel'é'engé' ca da dxunu' bagácheze, Le' gunné' lazruj chiu'.

**Jesús dxusédené' ca dxal-la'
gundxu xel-la' dxuláwizra Dios**

(Lc. 11.2-4)

⁵ Na' gunná Jesús:

—Gate le'e gunle xel-la' dxuláwizra Dios, quebe gunle ca dxelún benne' ca'

dxelunę' xrlátaje cúzreze. Dxeledánene' dxelunę' xel-la' dxuláwizra Dios zaj zeze' lu xu'u naga dxulucá'ana szren benne' judío ca' Dios, ne la neza, cheę xelexé'e bėnneache da dxelunę'. Da li dxapa' le'e, ba déqueze lazruj cheę'. ⁶Gate lue' dxuláwizru' Dios, guxú'u lu xu'u chiu'. Bsezxuj dxa xu'u chiu', na' bláwizra Dios guchálajlenu' Xrau' Dios zúalęne' lue' naga zu' tuzu'. Nadxa Xrau' Dios, Bėnnea' dxelé'ene' ca da dxunu' bagácheze, Le' xuzri'e chiu'.

⁷Gate dxuláwizru' Dios dxuchálajlenu' Le', quebe tuz ca da nneu' záneteę lasa ca dxelún benne' ca' quebe zaj núnbe'e Dios. Dxeléquene' wen Dios cheę' lawe' da dxelenné'le'e. ⁸Quebe gunle ca dxelún benne' ca', lawe' da Xrale Dios ba nézquezne' ca da dxechínnele le'e nédxula ca za nábałe na. ⁹Cheę le' na', le guláwizra Dios nnałe caní:

Xrantu' Dios, zu' xabáa,
gaca l'azxaqueze Lau'.

¹⁰Gudá nna be'u lu xęzr la xu nigá.

Gaca lu xęzr la xu nigá ca dxaca lazru'
Lue',

cáteze dxaca xabáa.

¹¹Benna netu' da gáguntu' na'a.

¹²Bnite lau cheęntu' ca naca da caleła da
bęntu',

ca netu' ba bnite launtu' cheę benne'
belunę' cheęntu'

da caleła.

¹³Quebe gu'u lataj nu gun zréaje netu',
2 san bselá netu' lu na' da xriwe'.

Naca chiu' gápaquezu' xel-la' dxenná
bea,

ne xel-la' waca,

ne da xabáa chadía chacanna. ¡Ca'an
gaca na!

¹⁴Che le'e gunite laule cheę benne'
belunę' cheęle da caleła, na' Xrale Dios
zue' xabáa gunite lawę' cheęle le'e.

¹⁵Che le'e quebe gunite laule cheę
benne' ca', na' Xrale Dios quebe gunite

láuqueze' cheęle le'e ca naca dul-la da
nabágale.

Jesús dxusédenę' ca dxal-la' gundxu gubasa

¹⁶Na' gunná Jesús:

—Gate le'e dxunle gubasa, quebe
guzúale baxache' laule ca dxelún benne'
dxelunę' xrlátaje cúzreze. Benne' caní
dxelunę' ca' cheę xelexé'e bėnneache le'
dxelunę' gubasa. Da li dxapa' le'e, ba
déqueze lazruj cheę benne' ca'. ¹⁷Lue',
gate dxunu' gubasa, bza xíchaju' chawe',
ne gudibe lau', ¹⁸cheę quebe xeléquebe'e
bėnneache dxunu' gubasa. Tuze Xrau'
Dios na', Bėnnea' zúalęne' lue' naga zu'
tuzu', Le' dxennátequeze', na' gunne' da
naca na chiu'.

Jesús dxusédenę' cheę da gunní'a cheę xabáa

(Lc. 12.33-34)

¹⁹Na' gunná Jesús:

—Quebe gutúpale da gunní'a lu xęzr la
xu nigá, naga guteba' na, ne da ca' dxele-
bía xi na, na' xelú'u gubán ne xelexane'
na. ²⁰Le'e, le gun da xrlátaje, da gaca
na ca guzrá cháwele da gunní'a xabáa,
naga quebe guteba' na, ne da ca' quebe bi
xeleque na, na' québequeze xelú'u gubán
cheę xelexé'e na. ²¹Naga nuzrale da
gunní'a cheęle, na' zúaqueze lázrdaule.

Jesús dxusédenę' cheę tu xi' da xú'udxu

(Lc. 11.34-36)

²²Na' gunná Jesús:

—Xiaj laule zaj naca na ca tu xi' cheę
bęl-la' dxen cheęle. Che xiaj laule zaj
naca na chawe', dutę ca naca býl-la' dxen
cheęle naxaní'. ²³Che xiaj laule quebe
zaj naca na chawe', dutę ca naca býl-
la' dxen cheęle nachul-la na. Cá'anqueze
che xi' da xu'ule xexaca na tu da chul-la,
chúl-lalę'dxa súaquezle.

**Jesús dxusédene' chee Dios,
ne chee da gunní'a**

(Lc. 16.13)

²⁴ Na' gunná Jesús:

—Netú benne' quebe séquene' guzúa cuine' lu na' chupa xrane', lawe' da wazré'e tu xrane' ne wazrí'ine' xetúe', u wéquene' ba lá'ana tu xrane' na' xetúe' guzúe' chalá'ala. Quebe séquele guzúa cuinle lu na' Dios, ne lu na' da gunní'a.

**Jesús dxusédene' ca dxun Dios,
dxuxúe' xúgute' bi chee' ca'**

(Lc. 12.22-31)

²⁵ Na' gunná Jesús:

—Chee le na' dxapa' le'e, quebe cue'le gunne xue ga sa' da gágule da xí'ajle chee gaca banle, ne ga sa' zra lánale da gácule. Zácadxa xel-la' nabán chee ca da dxágule, ne zácadxa bel-la' dxen chee ca zra lánale. ²⁶ Le nna'xque bxínnedu ca' dxeledaba' lu be'. Quebe dxelázaba'. Quebe dxelélápaba'. Quebe ga dxuluxuzrá cháweba' na. Xrale Dios zue' xabáa dxunézruje' da dxeláguba'. Zácadxale le'e ca bxínnedu ca'. ²⁷ ¿Nuzra benne' ládujla le'e gaca gusetunna cuine' xate' lawe' da dxe'e gunne xue?

²⁸ ¿Bizr chee na' dxe'le le'e gunne xue chee zra lánale? Le nna'xque ca dxeleg-ula xiaj ca' zaj ze le'e xixre'. Quebe dxelún na zrin, ne quebe dxelache na du. ²⁹ Dxapa' le'e, Salomón benne' wenná bea na' quebe gucue' ca da xrtan chee xiaj caní, na' le' gúta'le'e chee' da gunní'a. ³⁰ Che Dios dxudxene' xrtánle'e xiaj caní da ca' zaj zua na na'a le'e xixre', na' wxre xelezze na lu xi', quegá gundxe' da chawe' chee le'e, benne' québete ca dxeajlí lazre'. ³¹ Chee le na', quebe cué'tecale gunne xue, nnaile: “¿Ga sa' da gágudxu? ¿Ga sa' da xí'ajdxu? ¿Ga sa' da gácudxu?” ³² Chee da caní zaj dxe' gunne xue benne' quebe zaj núnbe'e Dios, san le'e, zua tu Xrale xabáa ba nézquezne'

ca naca xúgute' da dxechínnele. ³³ Zria laudxa cuele gunne xue chee nna bea Dios lu xichaj lázrdaule, ne chee gunle da xrlátaje da xezaca ba lazre' Dios, na' sile xúgute' da ca' dxechínnele. ³⁴ Quebe cuele gunne xue na'a da naca na chee wxre, lawe' da wxre ca'an gáta'queze da cuele gunne xue. Tu zra tu zra déqueze da guchaga laudxu.

**Jesús dxusédene' chee benne'
dxuchi'e da dxun le sa' ljwezre'**

(Lc. 6.37-38, 41-42)

7 Na' gunná Jesús:

—Quebe guchí'ale da dxelún le sa' ljwézrele chee quebe guchi'a Dios caní cheele le'e. ² Le' guchi'e cheele le'e cáteze dxunle le'e chee le sa' ljwézrele, ne cáteze dxunle le'e chee le sa' ljwézrele, ca'an gun Dios nen le'e. ³ ¿Bizr chee na' dxená'u bébedau' da xu'u xiaj lau le sa' ljwezru', ne quebe dxená'u da zrente da xu'u na xiaj láuquezu' lue'? ⁴ ¿Ájazra gunu' xu'u le sa' ljwezru': “Benna lataj xebéaja' bébedau' da xu'u xiaj lau”, che da zrendxa xu'u xiaj láuquezu' lue'? ⁵ Lue', benne' dxun xrlátaje cúzreze. Bebéaj nedxu da zrente da xu'u xiaj láuquezu', na' gaca le'enu' cháwedau' xebéaju' bébedau' da xu'u xiaj lau le sa' ljwezru'.

⁶ Quebe gunézrujle da naca lá'azxa chee benne' dxelune' ca dxelún becu' snia, checa xelexéchaje', ne xuluzúzru'e le'e. Quebe guzúale da zaca chee lau benne' dxelune' ca dxelún cuche, dxuluchuchuj dxululéajba' da dxugáguleba'.

**Dxuchalaj Jesús ca dxal-la'
nábaxu, ne xexíajdxu, ne
nne'dxu dxu'a dxa xu'u**

(Lc. 11.9-13; 6.31)

⁷ Na' gunná Jesús:

—Le naba, na' Dios gunne' na chee. Le xilaj na, na' xezrélele na. Le nne' dxu'a dxa xu'u, na' sáluje' chee. ⁸ Le gun caní

lawe' da benne' bi dxenabe', dxezi'e na. Benne' bi dxexíaję', dxeajxraque' na, na' benne' dxenné' dxu'a dxa xu'u, zua nu benne' sáluje' chee'.

⁹Netule le'e quebe gunézrujle zr'ínele tu xiaj che lebe' dxenábabe' le'e tu xeta. ¹⁰Quebe gunézrujle zr'ínele tu bela' snia che lebe' dxenábabe' le'e tu bela. ¹¹Che le'e, benne' wen da calela, nézele gunézrujle zr'ínele da naca na chawe', da cháwedxa gunna Xrale Dios zua xabáa, gunne' da chawe' chee' benne' bi dxenábene' Lę'.

¹²'Le gun chee' le sa' ljawézrele ca dxaca lázrele le'e xelún lebe' chee'le. Da nigá naca da nadxixruj bea na Moisés, ne da dxenná na lu xiche naga naxúaj da gu-lenná benne' ca' buluchálaje' waláz chee' Dios.

**Jesús dxusédene' chee'
dxa xu'u lechide'**

(Lc. 13.24)

¹³Na' gunná Jesús:

—Le chu'u lu dxa xu'u lechide'. Dxa xu'u laga, ne neza xu zaj naca naga zjaca benne' xelebía xi'e, na' benne' zante zjaque' na'. ¹⁴Dxa xu'u lechide', ne neza lase zaj naca naga zjaca benne' xelex'e xel-la' nabán da zeajl' canna, na' bábaze benne' dxelexezrelne' na.

**Naca bea tu xaga ne
chee' da zixre dxebía na**

(Lc. 6.43-44)

¹⁵Na' gunná Jesús:

—Le guxúe cuínale chee' benne' wen lazre' ca', benne' dxelenné' zaj naque' benne' dxuluchálaje' waláz chee' Dios. Benne' caní zá'aque' naga zr'ale le'e, zaj nun cuine' ca tu benne' dxexruj lazre' ca naca tu zr'ila'dau', san lu xichaj lázrdawe' zaj naque' snia ca tu becu' xi'a. ¹⁶Le'e xúnbeale le' ne chee' da dxelune'. Da zixre da dxebía lba uva quebe xuchíbedxu na lu xaga xeche',

na' da zixre da dxebía xaga higo quebe xuchíbedxu na lu xeche' ga'. ¹⁷Ca'an naca, xúgute' xaga chawe' dxelebía na da zixre chawe', na' xaga da quebe naca na chawe', quebe dxebía na da zixre chawe'. ¹⁸Xaga chawe' ca' quebe dxelebía na da zrinnaj, na' xaga zrinnaj na' quebe dxebía na da chawe'. ¹⁹Xúgute' xaga zrinnaj welechugue na, na' xelexze na lu xi'. ²⁰Ca'an naca, le'e xúnbeale benne' ca' ne chee' da ca' dxelune'.

**Quegá xúgute' benne' xelu'e
naga dxenná bea Dios xabáa**

(Lc. 13.25-27)

²¹Na' gunná Jesús:

—Quebe xelu'e naga dxenná bea Dios xabáa xugute' benne' ca' dxel'e neda': "Xrana, Xrana." Welú'u tuze benne' ca' dxelune' ca da dxaca lazre' Dios zue' xabáa. ²²Ca zrin zra na', benne' zante xel'e neda': "Xránantu', Xránantu', netu' bchálajntu' ne chee' Lau' Lue', ne bchí-mentu' Lau' bebéajntu' be' xriwe' ca', ne nen Lau' Lue' bēnlę'entu' xel-la' waca ca' chee' xabáa." ²³Nadxa neda' xápaqueza' benne' ca': "Quebe núnbe'a le'e. Le cuasa cuíta' neda', le'e, ba be'le da calela."

**Jesús dxusédene' chee'
chupa lane xu'u**

(Lc. 6.47-49; Mr. 1.22)

²⁴Na' gunná Jesús:

—Bénnea' dxenne' chia', ne dxune' ca da dxennía', naque' ca tu benne' naxéajni'iqueze', benne' bene' tu lizre' lu xiaj xre. ²⁵Guca xiuj, na' bdxuaj guba'u, ne guxasa be' bdunu' chee' xuluzría xi na xu'u na', san quebe guzré'e na lawe' da xu'u lane na lu xiaj xre. ²⁶Bénnea' quebe dxuzé nague' chia', ne quebe dxune' ca da dxennía', naque' ca tu benne' xala, benne' bene' tu lizre' lu xu dxeze. ²⁷Guca xiuj, na' bdxuaj guba'u ne guxasa be' bdunu' chee' xuluzría xi na xu'u na', na' chadite guzré'e na, ne guzría xite' na.

²⁸Ca bexuzre bchalaj Jesús, na' belexebanne benne' ca' ca naca da bsédene', ²⁹lawe' da dxusédene' benne' ca' ca tu benne' napé' xel-la' dxenná' bea, ne quegá ca dxelún benne' ca' dxuluxuzájle' da nadxixruj bea Dios.

**Dxexún Jesús tu benne'
dxuzru lu xpele'**

(Mr. 1.40-45; Lc. 5.12-16)

8 Gate bexetaj Jesús lu xi'a na', benne' zante zjácálene' Le'. ²Na' bzin tu benne' we' dxuzru lu xpele', ne bzu zribe' lau Jesús. Dxe'e Le':

—Xran, che dxaca lazru', waca xexunu' neda'.

³Nadxa Jesús guxrúa ne'e bénnea'. Dxe'e le':

—Dxaca lazra'. Na'a dxexuna' lue'.

Ca gunné' caní, benne' we' na' bexá-cate' ca naca xízrawe' chee'. ⁴Na' Jesús guzre' le':

—Gunná' xque. Quebe nu xu'u ca'. Bexíajze na'a xeajxelé'e cuinu' lau bxruze, ne xeajnezruj guna' ca da dxenná' bea lu da bdxixruj be'e Moisés, chee' xelelé'e benne' ca' ba bexacu' na'a.

**Dxexún Jesús bi wen zrin chee tu
benne' dxenná' be'e lu wedil-la**

(Lc. 7.1-10)

⁵Ca bexú'u Jesús lu xezre Capernaum, na' bzin lawe' tu benne' Roma, benne' dxenná' be'ene' benne' ca' dxjaque' wedil-la, na' guta' xuene' Le', ⁶dxe'e Le':

—Xran, bi wen zrin chia' debe' lizra'. Naxrú'unebe' bine, ne dxezácale'be'.

⁷Jesús dxe'e le':

—Wazá'a xexuna'-be'.

⁸Benne' dxenná' be'e na' gunné':

—Xran, quebe naca chia' chu'u lizra'. Cun gunneze, na' xexaca bi wen zrin chia'. ⁹Caní waca gunu' lawe' da zua benne' dxenná' bé'ene' neda', ne cá'anqueze neda' dxenná' be'eda' benne'

ca' dxjaque' wedil-la. Gate dxapa' tube': “Guxíaj”, na' dxéajbe'. Na' gate dxapa' bi xula: “Gudá”, na' dxídabe'. Na' gate dxuchíneda' bi wen zrin chia' chee' bi da gunbe', na' dxunbe' na.

¹⁰Gate bene Jesús da nigá, bebánene', na' guzre' benne' ca' zjácálene' Le':

—Da li dxapa' le'e, ládujla benne' Israel quebe nu ne xezrelda', benne' dxéajle'e chia' ca dxun benne' nigá. ¹¹Neda' dxapa' le'e, zá'aca benne' zante chala'a naga dxalaj gubizra, ne xechalá'ala naga dxebía' gubizra, na' xelebé'e tu zren xelawe' nen Abraham, ne Isaac, ne Jacob naga dxenná' bea Dios xabáa. ¹²Benne' ca' gucá'a zga'ale Dios chee' xelu'e naga dxenná' bea Le', guzale' benne' ca' lataj chul-la naga xelebezre', ne xeláguxa'ate' lazxe'.

¹³Nadxa Jesús guzre' benne' dxenná' be'e na':

—Bexíaj lizru'. Waca ca da ba guxéajle'u.

Ca lu zra ná'queze bexácate' bi wen zrin chee'.

Dxexún Jesús xrna zru'ule Pedro

(Mr. 1.29-31; Lc. 4.38-39)

¹⁴Guxíaj Jesús lizre Pedro, na' blé'ene' xrna zru'ule' de' lu da'a, xu'e da la.

¹⁵Xeajté' ne'e, na' bedxúaj da la da xu'e. Nadxa nu'ula na' guxase', ne guzú' lawe' dxusení'e da xelagu benne' ca'.

Dxexún Jesús benne' zante benne' we'

(Mr. 1.32-34; Lc. 4.40-41)

¹⁶Ca guzría gubizra, na' belezrín benne' zante lau Jesús, zaj naché'e benne' zaj xu'e be' xriwe' ca'. Nen dízra'ze da gunná' Jesús, bebéaje' be' xriwe' ca', ne bexune' xúgute' benne' we' ca'. ¹⁷Da nigá guca na ca da gunná' Isaías, benne' bchálaje' waláz chee' Dios, gunné': “Le' bequé'e xízrawe' ca' da nápadxu, ne gubague' ca da dxezácadxu.”

**Dxelaca lazre' benne'
chjácalenē' Jesús**

(Lc. 9.57-62)

¹⁸ Gate na' ble'e Jesús benne' zante zaj naxéchajē' Lē', na' guzre' benne' ca' dxusédene' gulelague' xechalá'a nísadau' tu lu da dxedá lawe' nisa. ¹⁹ Na' bzrin lau Jesús tu benne' dxuxuzájle'e da bdxixruj be'e Dios, na' dxē'e Lē':

—Benne' Wesede, dxaca lazra' sálēna' Lue' gáteteze chéaju'.

²⁰ Na' Jesús guzre' le':

—Beza' zaj zua bluaj cheēba', na' bxinne zaj zria xrú'neba', san neda', Benne' Gulje' Bénneache, ne naga xrua xíchaja' quebe ga zua.

²¹ Bzrin xetú benne' naque' benne' ba bsédequee Jesús, na' guzre' Lē':

—Xran, benna neda' lataj xexá'a nedxu cheē cheajxecacha' xra'.

²² Nadxa Jesús guzre' le':

—Gudálen neda'. Bē' lataj benne' gate ca' xulucache ljwezre'.

**Dxebeque zri Jesús be' bdunu',
ne xejxruza cheē nísadau'**

(Mr. 4.35-41; Lc. 8.22-25)

²³ Nadxa guxú'u Jesús lu da dxedá lawe' nísadau', na' benne' ca' dxusédene' belunē' Lē' tu zren. ²⁴ Na' guzú' lau dxaca tu be' bdunu' lawe' nísadau', na' xejxruza cheē nísadau' guxú'u na lu da dxedá lawe' nísadau' na', dxácatē dxase Jesús. ²⁵ Nadxa benne' ca' dxusédene' bulusebanē' Lē', na' dxel'é'e Lē':

—Xránantu'. Bselá netu'. Ba dxázentu' lu nisa.

²⁶ Jesús guzre' le':

—¿Bizr cheē na' dxezrébele'e? Nácale benne' látēga dxeleajlí lázre' Dios.

Nadxa guxasa Jesús. Gudil-le' be' bdunu', ne nísadau', na' la belebé zrite na. ²⁷ Benne' ca' belexebánenē', gulenné':

—¿Núzraquee benne' nigá? Dxuluzúa be', ne nísadau' dizra' cheē'.

Benne' Gadara zaj xu'e be' xriwe'

(Mr. 5.1-20; Lc. 8.26-39)

²⁸ Gate bezrín Jesús xechalá'a nísadau' na' lu xēzr la xu cheē benne' Gadara, na' chupa benne' biu belexedxúaje' lu bluaj cheē benne' gate, na' belezrine' lau Jesús. Dxúpatē benne' ca' zaj xu'e be' xriwe', ne zaj naque' benne' sníale'e, na' netú benne' quebe dxexázrene' xedé'e la neza na'. ²⁹ Na' gulezú lawe' dxelebézrexe'e. Dxelenné':

—¿Bizr cheē na' za'u naga zúantu', Jesús, Zri'ine Dios? ¿Za'u nigá cheē gusaca zi'u netu', ne quebe ne zrin zra?

³⁰ Tu chi na' zra tu cue' cuche dxeláguba'. ³¹ Be' xriwe' ca' gulata' xue na Jesús, gulenná na:

—Che Lue' xebéaju' netu' nigá, benna lataj cheajchú'untu' lu cuche ca'.

³² Nadxa Jesús guzre' na:

—Le chjaca xca'.

Nadxa be' xriwe' ca' belexedxúaj na lu benne' ca', na' belexú'u na lu cuche ca'. Nadxa xúgute' cuche ca' belelázruba' tu dxu'a xi'a zren, na' xejlecházeba' lu nísadau' naga gulázeba' nisa, na' guláteba'.

³³ Benne' ca' buluxúe'-ba' belezrebe', na' besá'aca chégüē', ne belexezrine' lu xēzre. Buluchálaje' ca guca xúgute' da caní, ne ca guca cheē benne' ca', belexedxúaj be' xriwe' zaj xu'e. ³⁴ Nadxa xúgute' benne' zaj zre'e lu xēzre na' beledxúaje', ne belezrine' naga zua Jesús. Na' ca belelé'ene' Lē', gulata' xuene' Lē' xez'é'e lu xēzr la xu cheē'.

**Ddexún Jesús tu benne'
zaj zua zri ni'a ne'e**

(Mr. 2.1-12; Lc. 5.17-26)

9 Nadxa Jesús guxú'e tu lu da dxedá lawe' nísadau', na' gulague' xechalá'a nísadau', na' bezrine' lázrequeze'. ² Na' bedajlegu'e tu benne' biu lau Lē', zaj zua zri ni'a ne'e, zaj naxrúe' benne' na' tu lu

ta'a blaga'. Gate ble'e Jesús ca dxeléajle'e chee', na' gunné', dxé'e benne' wé':

—Ben dipa lazru', zrí'ina'dau'. Dul-la chiu' dxunite lawa'.

³Nadxa bal-la benne' dxuluxuzájle'e da nadxixruj bea Dios gulenné' lu xichaj lázrdawe': "Benne' nigá dxucá'ana dítajé' Dios nen xrtizre'." ⁴Lawe' da neze Jesús ca gulenné' lu xichaj lázrdawe', na' dxé'e benne' ca', gunné':

—¿Bizr chee' na' dxennale caní lu xichaj lázrdawe'? ⁵¿Bízrala da quebe ná-cadxa stebe guna'? ¿Nnia': "Dul-la chiu' ba bnite lawa'", u che nnia': "Bexasa, guzá?" ⁶Chee le na' gulé'eda' le'e neda', Benne' Gulje' Bénneache, napa' xel-la' dxenná bea lu xezr la xu nigá gunite lawa' dul-la.

Nadxa dxé'e benne' zaj zua zri ni'a ne'e, gunné':

—Bexasa. Becá'a ta'a chiu'. Bexíaj lizru'.

⁷Bénnea' zaj zua zri ni'a ne'e bexase', na' zexíajte' lizre'. ⁸Gate belelé'e bénneache da nigá, na' belezrebe', ne belúe lá'ane' Dios lawe' ba bnézruje' xel-la' waca caní chee' bénneache.

Jesús dxuláwizre' Mateo

(Mr. 2.13-17; Lc. 5.27-32)

⁹Ca bezá Jesús na', na' blé'ene' tu benne' biu le' Mateo, dxé'e lataj naga dxuchízruje' waláz chee' xezre Roma, na' dxé'e le', gunné':

6 —Ben neda' tuze.

Nadxa Mateo nigá guxase' zéajlene' Jesús.

¹⁰Gate na' dxe' Jesús dxawe' xeta lizre Mateo nigá, benne' zante wechizruj, ne benne' dul-la belezrine', ne gulebé'queze' dxelawe' cuita Jesús, ne benne' ca' dxusé-dene'. ¹¹Benne' xudau' fariseo ca', gate belelé'ene' da nigá, dxelé'e benne' ca' dxuséde Jesús, gulenné':

—¿Bizr chee' na' Benne' dxusédene' le'e dxágulene' benne' wechizruj ca', ne benne' wen da zrinnaj ca'?

¹²Jesús benne' da nigá, na' dxé'e benne' ca', gunné':

—Quebe dxelechine benne' chawe' nu benne' dxexune' bénneache. Benne' wé' dxelechínene' le'. ¹³Le chjaca, le cheajséde ca da dxenná da naxúaj na lu xiche chee' Dios, dxenné': "Neda' dxaca lazra' xexache lázrele le sa' l'jwézrele, quegá gútele be' xixre'du ca' lu cugu chia'." Bla' neda', quegá chee' guláwizra' benne' xrlátaje. Dxuláwizra' benne' dul-la chee' xelxebí'i lazre'.

Jesús dxusédene' ca naca chee' gubasa

(Mr. 2.18-22; Lc. 5.33-39)

¹⁴Nadxa belezrín lau Jesús benne' ca' dxeledálene' Juan, bénnea' dxuchúe' bénneache nisa, na' gulenábene' le':

—¿Bizr chee' na' quebe dxelún gubasa benne' dxusédenue' Lue', ca dxuntu' netu', ne ca dxelún benne' xudau' fariseo ca'? Tu dxúnzquezentu' gubasa.

¹⁵Na' Jesús dxé'e benne' ca', gunné':

—¿Ájala chee' na' xelezúa ba xácheze benne' zaj zue' laní chee' wechaga na' dxácaté zua benne' wechaga na' nen le'? Wazrín zra gate dua benne' wechaga na'. Nadxa xelúnqueze' gubasa.

¹⁶Quegá nu dxudá tu ladxe' cube le'e tu zra lánadxu gula, lawe' da gate cheajxedxé' da cube na', ne xrube xu na da gula na', na' dxézadxa da gula na'. ¹⁷Cá'anqueze quebe nu benne' que'e xrise uva wal-la cube lu bzude xide gula lawe' da che ca'an guné', gate cue' chi'i xrise uva wal-la, na' dxeza bzude xide na', na' xelebía xi' xrise uva wal-la na', ne bzude xide na'. Chee le na' dxal-la' ca'adxu xrise uva wal-la cube lu bzude xide cube. Che ca'an gundxu, xelegá'ana chawe' dxúpaté na.

Bchalaj Jesús da caní ca naca chee' benne' ca' dxelezí' lu ne'e xrtizre'.

**Dxexún Jesús bi nu'ula chee Jairo,
ne nu'ula', xeajté'e zra lana Jesús**

(Mr. 5.21-43; Lc. 8.40-56)

¹⁸ Dxácaté na' dxuchalaj Jesús da nigá, na' bzin tu benne' xíchajé chee benne' judío ca', na' bzu zribe' lau Jesús, dxenné':

—Bi nu'ula chia' za gútetēbe'. Che Lue' xidu' ne guzé na'u lēbe', wexaca banbe'.

¹⁹ Na' guxasa Jesús, guxíajlēnē' le' nen benne' ca' dxusédenē'. ²⁰ Nadxa bzin tu nu'ula wē' cúzruła Jesús, ba naca chazrinnu iza dxé'ene' tu wē' dxaque dxen, na' xeajté'e zra lana Jesús. ²¹ Dxen-né' lu xichaj lázrdawē': “Che cheajtaza' zra lanē', na' xexaca.”

²² Jesús guxéchajē', guné'e nu'ula', na' dxē'e lē':

—Ben dipa lazru', zr'ina'dau'. Bache bexacu' lawe' da dxéajle'u chia'.

La bexácaté nu'ula na'.

²³ Gate na' bzin Jesús lizre benne' xíchajé chee benne' judío ca', na' blé'ene' zaj zra' benne' wil-la xulucachē' bi nu'ula na', ne benne' zaj zre'e dxelunē' zralaj.

²⁴ Gunná Jesús, dxē'e benne' ca':

—Le xedxúaj nigá. Quegá nate bi nú'uladau' nigá. Dxásezebe'.

Na' buluzrízre' chee'. ²⁵ Gudé bebéaje' benne' ca', na' guxú'u Jesús, ne bēxrue' na' bi nu'ula na', na' guxásabe'. ²⁶ Du ca naca xezre ca' bzriluj dizra' chee da ben Jesús.

Dxexún Jesús chupa benne' la chul-la

²⁷ Ca bedxúaj Jesús na', na' chupa benne' xjaque' cuzru Le', dxelenné' zizraj:

—Bexache lazre' netu', Lue', Zri'ine David.

²⁸ Ca guxú'u Jesús lu xu'u naga zúaqueze', na' benne' la chul-la caní gulebiguē' lau Lē', na' Jesús guzre' benne' ca':

—¿Dxéajlele wazéqueda' xexuna' le'e?

Na' gulé'e Lē':

—Awe', Xran.

²⁹ Nadxa Jesús gudane' xiaj lau benne' ca', dxenné':

—Gaca chee le ca dxéajlele.

³⁰ Belexaca xiaj lawē'. Nadxa Jesús gunné' xuene' benne' ca', gunné':

—Le guxúe xanne' chee quebe nu neze da nigá.

³¹ Gate beledxúaje', na' buluchálaje' du ca naca xezre ca' ca da ben Jesús chee'.

**Dxexún Jesús tu
benne' quebe dxaca nniē'**

³² Ca bezá' Jesús nen benne' ca', na' belezrín bal-la benne' zaj naché'e tu benne' biu quebe dxaca nniē', benne' xu'e be' xriwē'. ³³ Cáteze bebéaj Jesús be' xriwē' nigá, na' benne' quebe dxaca nniē' bezú lawē' dxuchálaje'. Na' benne' ca' belexebánele'e, dxelenné':

—Cabata' ne lé'edxu gaca caní ládujla benne' Israel ca'.

³⁴ Benne' xudau' fariseo ca' gulenné':

—Benne' nigá dxebéaje' be' xriwē', dxuchínene' xel-la' waca chee da xriwē', da na' dxenná be'e na be' xriwē' ca'.

Dxexache lazre' Jesús bēnneache ca'

³⁵ Gudé Jesús tu tu xezre zren, ne tu tu xézredau', dxusédenē' benne' ca' lu xu'u ca' naga dxulucá'ana szrene' Dios tu tu lataj ca'. Gulu'e lban chee dizra' chawe' ca nna bea Dios, ne bexunte' bēnneache zaj nape' tu tu cue' xízrawē' ca da dx-elezaque'. ³⁶ Gate ble'e Jesús bēnneache ca', na' bexache lazre' lē' lawe' da zaj zre'e xácheze', ne dxelecuán lazre'. Zaj naque' ca zrila' ca' quebe zua benne' guxúe'-ba'.

³⁷ Nadxa guzre' benne' ca' dxusédenē':

—Da li, da zrentē de da lápadxu, na' bábaze benne' wēn zrin zaj zre'e. ³⁸ Chee lē na' le naba lau Xrana lina nigá, sel-le' benne' wēn zrin xeledape' lina chee'.

**Dxecá'a Jesús chazrinnu benne'
relaque' gubáz chee'**

(Mr. 3.13-19; Lc. 6.12-16)

10 Nadxa Jesús bláwizre' chazrinnu benne' ca' dxusédené', na' bnézruje' le' xel-la' dxenná bea chee' xelxebéaje' be' xriwe' ca', ne chee' xellexuné' bèneache zay xu'ē tu tu cue' xízrawe' ca' da dxelaque'.

² Caní zay le' chazrinnu benne' gubáz ca' chee' Jesús:

Benne' nedxu le' Simón, ne léqueze' Pedro.

Xetúe' naque' benne' biche Pedro, le' Andrés.

Xechupe' zay le' Jacobo, ne Juan, benne' zay naque' zri'ine Zebedeo.

³ Xezícala benne' ca' zay le' Felipe, ne Bartolomé, ne Tomás.

Xetue' le' Mateo, benne' wechizruj chee' xezre.

Xetue' le' Jacobo, zri'ine Alfeo.

Xetue' le' Lebeo, benne' léqueze' Tadeo.

⁴ Xetúe' le' Simón, benne' dxe'e' gunne xue chee' xezr la xu Israel.

Xetúe' le' Judas Iscariote, bènea' gudée' Jesús lu na' benne' dxeledábage' Le'.

**Dxesel-la Jesús benne' gubáz chee'
ca' cheajlezenne' bèneache xrtizre'e**

(Mr. 6.7-13; Lc. 9.1-6)

⁵ Nadxa gusel-la Jesús benne' chazrinnu caní. Guzre' le':

—Quebe cheajle naga zay zra' benne' quebe zay naque' judío, ne quebe chu'ule xezre ca' zay nababa Samaria. ⁶ Le chjaca naga zay zra' benne' Israel zay naque' ca zri-la' zay naníteba'. ⁷ Le chjaca cu'ule lban, xe'le bèneache ba bzin gáguze zra nna bea Dios lu xezr la xu nigá.

⁸ Le xexún benne' zay xu'ē we' guzru', ne benne' bila xízrawe' dxelé'ene'. Le gusebán benne' gate. Le xebéaj be' xriwe' da zay xu'u bèneache. Cá'aze guzile xel-la'

dxenná bea nigá, na' cá'aze le guchine na, quebe bi sile.

⁹ Quebe gúale dumí oro, ne dumí plata, ne dumí lase. ¹⁰ Quebe gúale xixruj xeta da gágule la neza. Quebe gúale xetú cue' zra lánale, ne zré'ale, ne xaga da gúxrule. Benne' wen zrin wazrúequeze' da gawe'.

¹¹ 'Gate na' zrinle le'e tu xezre zren u tu xézredau', le quilaj na' tu benne' du lazre', na' le xegá'ana lizre' ca zrindxa zra xeza'ale na'. ¹² Gate na' chu'ule lu xu'u na', le xē bènea' naca lizre' na': "Xela dxebeza zri lazre' suale na le'e." ¹³ Che benne' ca' zay naca chee' xelezí'e xel-la' ba lá'ana caní, le gucá'ana cá'aze na. Che quebe zay naca chee' xelezí'e da nigá, na' quebe gata' chee'. ¹⁴ Che quebe lataj dxeluné' le'e, ne quebe dxelenne' chee'le, le xedxúaj lu xu'u na' u lu xezre na', na' le xebibe bxrtedu na' zria ní'ale. ¹⁵ Da li dxapa' le'e, ca zrin zra guchi'a Dios, Dios gundxe' da ba xa' chee' benne' xezre na' quez ca da guné' chee' benne' Sodoma, ne benne' Gomorra, xezre ca' guzría xi'e.

Xelebé nawe' bi ca' chee' Jesús

¹⁶ Na' gunná Jesús:

—Le na' xque nigá. Neda' dxesel-la' le'e, gácale ca zri-la' zay zraba' ládujla becu' xi'a ca'. Chee' le' na', le gaca sina ca zay naca bēla', san le gaca dxexruj lazre' ca zay naca bgúgudu ca'. ¹⁷ Le guxúe cú'nale. Zay zra' benne' xuludé'e' le'e lu na' benne' xu'u lawe', ne xuluzálajé' le'e lu xu'u naga dxulucá'ana szrené' Dios. ¹⁸ Cá'anqueze weleché'e' le'e lau benne' xu'u lawe' ca', ne lau benne' dxelenná bea lawe' da nácale chia' neda'. Ca'an gaca guchálajle ca naca chia' neda' lau benne' ca', ne lau benne' quebe zay naque' judío. ¹⁹ Gate na' xuludé'e' le'e lu na' benne' dxuchi'a da dxaca, quebe gunne xue cue'le ca da nna'le u ájala guchálajle, lawe' da gate zrin zra guchálajle, Dios gunne' ca da guchálajle. ²⁰ Quegá le'eze guchálajle,

lawe' da Be' Lá'azxa chee Dios guchálajē' lu dxú'ale.

²¹ 'Xuludé bēnneache benne' bíchequeze' lu na' benne' xelútiē' lē'. Cá'anqueze xra xrna xuludéē' zr'ine', na' zr'ine' ca' xeledábagabe' xra xrnáquezebe' chee xelátiē'. ²² Xúgute bēnneache xelezré'ē le'e lawe' da nácale chia' neda', san bēnnea' guxru chache' dizra' chee Dios ca zrin zra cheajsé chee', la bēnnea'. ²³ Gate xelebé nawe' le'e tu xezre, le xuzrunnuj xetú xezre. Da li neda', Benne' Gulje' Bēnneache, dxapa' le'e, xida' nédxula ca quebe ne tache tale xúgute xezre chee benne' Israel.

²⁴ 'Netú benne' quebe naque' szrendxa ca benne' dxusédenē' lē'. Cá'anqueze netú benne' wēn zrin quebe naque' szrendxa ca xranē'. ²⁵ Tu benne' dxuséde dxal-la' gun zi' lazre' gaque' ca naca benne' dxusédenē' lē', na' benne' wēn zrin dxal-la' gun zi' lazre' gaque' ca naca xranē'. Che benne' naque' xrane xu'u dx-el'é' lē' Beelzebú, da xriwē', chezradxa xelenné' chee bi chee' ca'.

¿Núzraqueze dxal-la' zrēbedxu?

(Lc. 12.2-9)

²⁶ Na' gunná Jesús:

—Chee lē na', quebe zrēbele bēnneache. Xúgute da bagácheze gaca béaqueze na, na' xúgute da dxelaca ga nagache gulé'e láuqueze na. ²⁷ Da nigá dxapa' le'e lu da chul-la, le guchalaj na te zra. Da dxapa' le'e bagácheze, le nne zizraj chee xelén xúgute benne'. ²⁸ Quebe zrēbele benne' xelútiē' bēl-la' dxen chee. Quebe xelezéquene' xelútiē' bēnne'du xu'ule. Le zrebe Dios. Lē' dx-ezéquene' guzrí xi'e bēl-la' dxen chee, ne bēnne'du xu'ule lu lataj ba xa'.

²⁹ 'Dxelútiē' chupa bxínne'du ca' nen tu dumída'u. Netuba' quebe gáteba' chee quebe ne güe lataj Xrale. ³⁰ Cá'anqueze xicha xíchajle, xúgute na zaj nababa na.

³¹ Chee lē na', quebe zrēbele. Zácadxale le'e quézcala bē zan bxínne'du ca'.

Dxal-la' xechébedxu nácaxu chee Jesucristo

(Lc. 12.8-9)

³² Na' gunná Jesús:

—Xúgute benne' ca' dxelexechebe' zaj naque' chia' neda' lau bēnneache, cá'anqueze neda' wechébequeza' zaj naque' chia' neda' lau Xra' zue' xabáa. ³³ Benne' ca' quebe dxelexechebe' zaj naque' chia' lau bēnneache, néda'queza' québequeze xecheba' zaj naque' chia' lau Xra' zue' xabáa.

Da naca Jesús naca na tu da dxun na chupa la'a bēnneache

(Lc. 12.51-53; 14.26-27)

³⁴ Na' gunná Jesús:

—Quebe guéquele bla'a neda' chee guzúa' xel-la' dxebeza zri lazre' ládujla bēnneache. Bla'a neda', quegá chee guzúa' xel-la' dxebeza zri lazre', san chee guzúa' wedil-la. ³⁵ Bla'a neda' chee guna' tábaga' tu benne' xre', ne chee guna' tábaga' tu bi nu'ula xrnabe', ne chee guna' tábaga' tu zru'a lizre' tau zr'ine'. ³⁶ Ca'an gaca, tu tu benne' tíl-lalē xrtía ljwezre' lē'.

³⁷ 'Che tu benne' nazrí'idxene' xra xrne'ē quezca neda', quebe naca chee' gaque' chia', na' che nazrí'idxene' bi chee' ca' quezca neda', quebe naca chee' gaque' chia'. ³⁸ Che tu benne' quebe gun cuine' ca tu benne' zéajte'ē lē'e xaga béguaj, ne gunē' neda' tuze, quebe naca chee' gaque' chia'. ³⁹ Benne' dxaca lazre' gapa chi'e xel-la' nabán chee' gunitiē' na. Bēnnea' zúatequeze gudé' xel-la' nabán chee' ne chia' neda', guselé' xel-la' nabán chee'.

Da gunna Dios dxi'u

(Mr. 9.41)

⁴⁰ Na' gunná Jesús:

—Che tu benne' gape' le'e ba lá'ana, néda'queze gape' ba lá'ana, na' bènnea' dxape' neda' ba lá'ana, dxápaqueze' ba lá'ana Dios, Bénnea' gusel-le' neda'.⁴¹ Che tu benne' gape' ba lá'ana tu benne' dxuchalaje' waláz chee Dios lawe' da ze'e waláz chee Dios, benne' nigá wazí'queze' tuze ca da si' bènnea' dxuchálaje' waláz chee Dios. Na' che tu benne' gape' ba lá'ana tu benne' xrlátaje lawe' da naque' benne' xrlátaje, benne' nigá wazí'queze' tuze ca da si' benne' xrlátaje na'.⁴² Núteteze benne' gunézruje' tu zriga' nisa zaga da xi'aj tu bidu caní lawe' da naque' chia' neda', da líqueze wazi'e da gunezruj Dios le'.

**Dxeleznín benne' ca'
gusel-la Juan lau Jesús**

(Lc. 7.18-35)

11 Gate bexuzre Jesús bchálajlene' bènneache, na' bchálajlene' chazrinnu benne' ca' dxusédene'. Bezé'e na' chee cheajsédene', ne cheajchálaje' lban xúgute xezre ca' lu xezr la xu na'.

² Juan, bènnea' bchue' bènneache nisa, xu'e lizre xia, na' benne' ca naca da dxun Cristo. Nadxa gusel-le' chupa benne' ca' dxeledálene' le' lau Jesús.³ Benne' chupe' caní buluchebe' Jesús:

—¿Nacu' Lue' Cristo, Bénnea' dxal-la' xide', u che dxal-la' cuézantu' xelá' xetu' benne'?

⁴ Na' bechebe Jesús:

—Le chjaca cheajézrele Juan da caní dxel'éle, ne da dxenle.⁵ Le xe'e ca dxaca, dxelexel'é benne' gulaque' la chulla. Dxelexedá benne' gulezúa zri ni'a ne'e. Belexexaca benne' gulezaque' we' guzru', ne belexexaca ban benne' ca' gualatie'. Benne' xache' ca' dxelenne' dizra' chawe' chee Dios.⁶ Ba neza zrente naca na chee bènnea' quebe xucuán lazre' sálene' neda'.

⁷ Ca besí'aca benne' chupa ca', na' guzú lau Jesús dxuchálajlene' benne' zaj zre'e na' ca naca chee Juan. Dxenné':

—¿Bizra xeajinna'le le'e le'e xixre' na'? ¿Xeajinna'le tu xia da dxuxrize be'?⁸ Che cabí, ¿bizra xeajinna'le na'? ¿Xeajinna'le tu benne' nacue' zra lane' da zaca? Nézquezle benne' ca' zaj nácu'e' ladxe' zaca, lizre benne' dxeleenná be'e zaj zra' benne' caní.⁹ ¿Bizraqueze xeajinna'le? ¿Xeajinna'le tu benne' dxuchálaje' waláz chee Dios? Awe'. Ca'an guca. Bénnea' ble'ele na' nácadxé' blau ca tu benne' dxuchálaje' waláz chee Dios.¹⁰ Lu xiche chee Dios naxúaj na ca naca chee Juan na'. Dxenná na: Neda' dxesel-la' benne' gubáz chia' nédxula ca Lue', chee gucuezé' neza naga teu'.¹¹ Da li dxapa' le'e, ládujla xúgute bènneache quebe nu chilá' benne' nácadxé' blau ca naca Juan, bènnea' bchue' bènneache nisa. Naga dxenná bea Dios, bènnea' nácadxé' benne' dxexruj lazre' nácadxé' blau ca naca Juan na'.

¹² Ca lu zra bla' Juan, bènnea' bchue' bènneache nisa, bzrinte na'a zra, zaj zra' benne' dxelune' zi' lazre' xelu'e naga dxenná bea Dios xabáa, na' benne' dxelune' zi' lazre' dxeleznúé'ene' na'.¹³ Ca da bzuaj Moisés lu xiche chee da nadxi'ruj bea na, ne ca gulenná xúgute benne' buluchálaje' waláz chee Dios, dxuchalaj na ca naca chee xel-la' dxenná bea chee Dios, bzrinte ca bla' Juan na'.¹⁴ Che le'e dxaca lázrele chéajlele da nigá, Juan na' naque' Elías, bènnea' bchálaje' waláz chee Dios gate nate, na' dxal-la' xel'é chee guchálaje' waláz chee Dios.¹⁵ Che zua nágale, le xen da nigá.

¹⁶ ¿Ájazra zaj naca benne' zaj zre'e na'a zra? Zaj naque' ca bidu ca' dxeleb'ébe' dxelítajbe' lawe' xi'a, ne dxelennebe' zizraj, dxelé' ljwézrebe' ca':¹⁷ “Bcuézrentu' bchiuj san quebe bxá'ale le'e. Bil-la xáchentú' san quebe gudxézrele.”¹⁸ Caní zaj naque' lawe'

da bla' Juan, quebe dxawé', ne quebe dxí'aje' da zaca, na' le'e dxennale xu'e be' xriwe'. ¹⁹Nadxa bla' neda', Benne' Gulje' Bénneache, dxawa', ne dxí'aja', na' dxennale naca' neda' benne' wagu xrata, ne benne' dxi'aj, ne ljwezre benne' dul-la, ne benne' wechizruj chee Roma. Naca bea nu benne' nape' xel-la' sina chee Dios ne chee da dxun bénnea'.

Ca gaca chee bénneache quebe dxuluzúe' xrtizra' Dios

(Lc. 10.13-15)

²⁰Nadxa guzú' lau Jesús dxedil-le' bénneache chee xezre ca' naga bene' xel-la' waca ca' chee xabáa, lawe' da quebe belexebí' lazre' benne' zaj zre'e na'. Na' gunné':

²¹—Baxache' nácale le'e zrале xezre Corazín. Baxache' nácale le'e zrале xezre Betsaida. Caní nácale lawe' da checa' la ba guca lu xezre Tiro, ne lu xezre Sidón ca naca xel-la' waca ca' chee xabáa ca da gulaca ládujla le'e, da zrente ba zeaj gulácue' zra lane' tuzruj, ne gulegú'e de xíchaje' da zaj naca bea na belexebí' lazre'. ²²Neda' dxapa' le'e, lu zra guchi'a Dios, gundxe' da ba xa' chee quez ca da ba xa' gune' chee benne' Tiro, ne benne' Sidón. ²³Le'e zrале xezre Capernaum, ¿dxéquele Dios wechise' le'e xabáa? Dios gudee' le'e lataj ba xa'. Caní gaca na lawe' da checa' la ba guca lu xezre Sodoma ca naca xel-la' waca ca' chee xabáa ca da gulaca ládujla le'e, nagá'anatequeze xezre na' lu zra na'a zra. ²⁴Neda' dxapa' le'e, lu zra guchi'a Dios, gundxe' da ba xa' chee quez ca gune' da ba xa' chee benne' Sodoma ca'.

Dxenná Jesús: “Le da naga zua' xezí' lázrele”

(Lc. 10.21-22)

²⁵Ca lu zra na' gunná Jesús:

—Dxue lá'ana' Lue', Xrae, nacu' Xrana xabáa, ne Xrana xezr la xu nigá. Dxue

lá'ana' Lue' lawe' da bcácheu' da caní lau benne' sina ca', ne lau benne' dxeléa-jni'ine', san blé'enu' na bidu caní. ²⁶Ca'an naca, Xrae, lawe' da naca na ca dxaca lazru' Lue'.

²⁷'Xra' ba bdee' lu na'a xúgute' da caní. Quegá nu benne' núnbe'e neda', Zri'ine Dios, san Xra' Dios núnbe'e neda'. Quegá nu benne' núnbe'e Xra', san neda', Zri'ine Dios, núnbe'a Le', ne zaj núnbea benne' ca' Le', benne' ca' dxaca lazra' gul'éda' le' ca naca Xra'. ²⁸Le da naga zua', xúgutele le'e dxeajxréquele lu zrin dxunle chee xudau', ne ca naca xua da núale, na' neda' guna' xezí' lázrele. ²⁹Le gunna lataj xrúa' le'e ca nu benne' xru'e' bezre xugu' cheeba', ne le gusede chia' lawe' da naca dxexruj lazre', ne dxe'ene lazre', na' wazru'é'ele xezí' lázrele lu benne'du xu'ule. ³⁰Da na' naca na ca xugu' chee bezre da xrúa' le'e québete' ca naca na stébe chee gúale na, na' xua da xrúa' le'e naca na zraze.

Bi ca' dxusede Jesús dxeleque'e dau zrúa' xtila gate naca zra dxulupá'ana judío

(Mr. 2.23-28; Lc. 6.1-5)

12 Ca lu zra na' xu'u Jesús neza zéa-je' ládujla naga de xel-la' zrúa' xtila, ne naca zra dxulupá'ana benne' judío. Dxeledún benne' ca' dxusede Jesús, na' gulezú' lawe' dxelálaje' dau naga zria zrúa' xtila, ne dxelawe' na. ²Gate belelé'e benne' xudau' fariseo ca' da caní, na' gul'é'e Jesús:

—Guná' xque ca dxelún benne' ca' dxusédenu', dxelune' zrin da quebe naca chee' xelune' lu zra dxupá'anadxu.

³Jesús guzre' benne' ca':

—¿Quebe ne gulábale le'e ca ben David gate na' le', ne benne' ljwezre' ca' guledune'? ⁴Guxú'e lu xu'u chee Dios, ne gulawe' xeta xtila lá'azxa, da quebe zaj naca chee' xelawe', le', ne benne' ljwezre' ca', san tuze bxruze ca' zaj naca

chee' xelawe' na. ⁵¿Quebe ne gulábale da naxúaj na lu da bdxixruj be'e Moisés ca dxelún bxruze ca' lu xudau', dxelune' zrin chee' xudau' lu zra dxupá'anadxu, ne quebe zaj nabague' zria? ⁶Neda' dxapa' le'e, de tu da naca blaudxa ca xudau' nigá. ⁷¿Quebe ne chéajni'ile ca zéaje da naxúaj na lu xiche chee' Dios? Dxenná na: Neda' dxaca lazra' xexache lázrele le sa' ljwézrele, ne quegá gútele be' xíxre'du ca' lu cugu chia'. La ba guxéajni'ile da nigá, quebe ne guzríá xile bèneache quebe zaj nabague' dul-la. ⁸Chee le na', neda', Benne' Gulje' Bèneache, napa' xel-la' dxenná bea dxuna' zrin chia' lu zra dxupá'anadxu.

Dxexún Jesús tu benne' zua zri ne'e

(Mr. 3.1-6; Lc. 6.6-11)

⁹Nadxa Jesús bezé'e na', na' guxú'e tu lu xu'u naga dxelúe lán'e' Dios. ¹⁰Zua tu benne' zua zri ne'e ga na'. Benne' judío ca' gulaca lazre' xelezrele' ájala xelune' chee' gaca xelagu zrie' chee' Jesús. Chee le na' gulenábene' Le':

—¿Dxunna Dios lataj xexundxu benne' we' lu zra dxupá'anadxu?

¹¹Jesús guzre' benne' ca':

—Núteteze benne' zue' ládujla le'e, che zua tu zri-la' chee', ne che bíxreba' tu xedxu situj lu zra dxupá'anadxu, ¿quebe chéaje' cheajxeláje'-ba' xca'?

¹²Da zrendxa zaca tu benne' quez ca tu zri-la'. Ca'an naca dxunna Dios lataj gundxu tu da xrlátaje lu zra dxupá'anadxu.

¹³Nadxa Jesús guzre' benne' we' na':

—Bli na'u.

Ca blí ne'e, na' bexaca na ca ne'e xetú. ¹⁴Nadxa beledxúaj benne' xudau' fariseo ca', ne gulezú lawe' dxelílaje' ájala xelune' xelútie' Jesús.

Da gunná tu benne' bchálaje' waláz chee' Dios ca dxal-la' gaca chee' Jesús

¹⁵Gate gúquebe'e Jesús da nigá, na' bezé'e na', na' benne' zante' zjácálene' Le'. Bexún Jesús xúgute' benne' we' zaj zre'e ládujla benne' ca'. ¹⁶Jesús gunné xúene' benne' ca' quebe nu xululé'ene' nu naca Le'. ¹⁷Caní guca ca da gunná Isaías, benne' bchálaje' waláz chee' Dios, gunné': ¹⁸Benne' nigá naque' wen zrin chia', benne' ba gucá'a.

Benne' nigá nazrí'ida', ne dxezaca ba lázrele'na' Le'.

Guzúaqueza' xichaj lázrdawe' Be' Lá'azxa chia'.

Guzenne' bèneache xúgute' xezr la xu ca dxuchi'a da dxaca.

¹⁹Quebe tíl-lalequeze' bèneache, ne quebe cuézrexe'e.

Netú benne' quebe xenne' chi'e la neza.

²⁰Quebe quichje' tu xia da ba nachaj, ne quebe xusul-le' xi' da ba dxaca wexul-la na,

ca zrindxa zra xuzúe' xel-la' dxenná bea chawe' chee'.

²¹Bèneache xúgute' xezr la xu xuluxrén lázrequeze' Le'.

Dxelenné' napa Jesús xel-la' dxenná bea chee' da xriwe'

(Mr. 3.19-30; Lc. 11.14-23; 12.10)

²²Nadxa guleché'e lau Jesús tu benne' la chul-la, benne' quebe dxaca nnie', lawe' da xu'e be' xriwe'. Jesús bexune' benne' nigá, na' bel'é'ene', ne ben-nié'. ²³Xúgute' benne' ca' belexebánene', gulenné':

—¿Naca benne' nigá Zri'ine David zra?

²⁴Gate belén benne' xudau' fariseo da nigá, na' gulenné':

—Benne' nigá dxebéaje' be' xriwe', dxuchínene' xel-la' dxenná bea chee' Beelzebú, xrane be' xriwe' ca'.

²⁵Dxeque be'e Jesús ca da dxelenné', dxelé'e ljwezre', na' guzre' le':

—Lu xu'u lawe' chee gáteteze xezre, che xelaca chupa la'a benne' xu'u lawe' ca', ne bal-le' xeledíl-lalene' xezícadxe', na' wexul-la wenite xel-la' dxenná bea chee benne' ca'. Cá'anqueze che tu xezre benne', u tu cue' xrtía ljwezre xelaque' chupa la'a, ne xeledíl-lalene' le sa' ljwezre', wenítequeze xezre na', u xrtía ljwezre ca'. ²⁶ Cá'anqueze, che Satanás, da xriwe', dxebéaje na ljwezre da xriwe', leze na dxexún na chupa la'a cuina na. ¿Ájazra gácaqueze nna bea na? ²⁷ Le'e dxennale chia' dxebéaja' be' xriwe' ca', dxuchíneda' xel-la' dxenná bea chee Beelzebú da xriwe'. Che naca na ca', ¿Nuzra dxúnnaqueze xel-la' dxenná bea chee benne' ca' zaj naca le'e tuze chee xebebéaje' be' xriwe' ca'? Chee le na' léqueze' dxulul'éteñe' nanéguele le'e. ²⁸ Che neda' dxebéaja' be' xriwe' ca' dxuchíneda' xel-la' waca chee Be' Lá'azxa chee Dios, da nigá dxunna bea na ba bla' xel-la' dxenná bea chee Dios ládujla le'e.

²⁹ ¿Ájazra gun tu benne' chu'e lizre tu benne' wal-la chee que'e da de chee' che nédxula quebe guchéaje' ni'a na' bènea'? Che gun'e caní, na' wazéquene' que'e da de chee bènea'.

³⁰ Nu benne' quebe dxácalene' neda', dxedábage' neda', na' benne' quebe dxexízgalene' neda', dxexúsie' na.

³¹ Chee le na' dxapa' le'e, gunité lau Dios chee bèneache xúgute' dul-la zaj nabague', ne xúgute' da calela da dxelené', san che xelenné' schanni' chee Be' Lá'azxa, cabata' gunité lau Dios chee'.

³² Núteteze benne', che bi nnie' schanni' chia' neda', Benne' Gulje' Bénneache, Dios gunité lawe' chee', san che tu benne' nnie' schanni' chee Be' Lá'azxa, québequeze gunité lau Dios chee' lu xezr la xu nigá ne cá'anqueze lu xezr la xu da za za'.

Da dxun tu benne' dxule'e na ca naque'

(Lc. 6.43-45)

³³ Na' gunná Jesús:

—Che naca chawe' tu xaga, dxebía na da zixre chawe', na' che naca tu xaga bize, dxebía na da zixre bize. Ca'an naca, tu xaga naca bea na ne chee da zixre da dxebía na. ³⁴ Le'e, be snia ca'. ¿Ájazra gunle le'e nnele da xrlátaje che le'e nácaquezele benne' wen da calela xca'? Ca da dxedxuaj dxú'adxu na ca da zua na lu xichaj lázrdaudxu. ³⁵ Benne' xrlátaje dxenné' da naca xrlátaje lawe' da zua da xrlátaje lu xichaj lázrdawe', na' benne' wen da calela dxenné' da calela lawe' da zua da calela lu xichaj lázrdawe'. ³⁶ Neda' dxapa' le'e, lu zra guchi'a Dios, xúgute' bèneache xuludé' ca da gulenné', tu tu dizra' xala da gulenné'. ³⁷ Ca naca dizra' da ba gunnú', Dios guchi'e chiu', na' Le' nnáqueze' che xedxúaju' xrlátaje, u che webagu' zria.

Bénneache wen da calela ca' dxelenábene' Jesús gun'e tu xel-la' waca chee xabáa

(Mr. 8.12; Lc. 11.29-32)

³⁸ Nadxa bal-la benne' xudau' fariseo, ne benne' dxuluxuzájle'e da nadxixruj bea Dios gulé'e Jesús:

—Benne' Wesede, dxaca lázrentu' le'entu' chiu' gunu' tu xel-la' waca da za xabáa.

³⁹ Na' guzre Jesús benne' ca':

—Bénneache wen da calela, benne' zaj naque' chupa lazre', dxelenábene' neda' guna' tu xel-la' waca da za xabáa. Quebe xeledé'equenze' tu xel-la' waca, san tuze ca da dxunna bea na ca da guca chee Jonás, benne' bchálaje' waláz chee Dios. ⁴⁰ Ca guca chee Jonás, guxú'e lu le'e bela zren chunna zra chunna xela, cá'anqueze gaca chia' neda', Benne' Gulje' Bénneache, waxú'ukeza' lu xedxu

ba chunna zra chunna xēla. ⁴¹ Benne' gulezrē'e xēzre Nínive welexásaqueze' lu zra guchi'a Dios gate guchi'e chee bēneache zaj zrē'e na'a, na' benne' Nínive ca' xululé'ene' zaj nabaga zria benne' caní lawe' da belexebí'i lazre' benne' Nínive gate na' bchalaj Jonás dizra' chee Dios lau benne' ca', na' blaudxa ca Jonás na' naca Benne' zue' nigá. ⁴² Cá'anqueze nu'ula na' gunná be'e chalá'a naga dxedá gubizra beu' zaga ca' wexásaqueze' lu zra guchi'a Dios gate guchi'e chee bēneache zaj zrē'e na'a, na' nu'ula na' gulé'ene' zaj nabaga zria benne' caní lawe' da bezé'e naga naca zítu'te chee xēzr la xu nigá chee xenne' dizra' sina da bchalaj Salomón, na' blaudxa ca Salomón na' naca Benne' zue' nigá.

Ca naca chee be' xriwe' da bexú'u na tu benne'

(Lc. 11.24-26)

⁴³ Na' gunná Jesús:

—Gate tu be' xriwe' dxedxuaj na tu benne', na' dxedá na lataj naga nabizre, dxexilaj na naga xezí' lazre' na, na' che quebe xezrele na, na' dxenná na lu xichaj lázrdau na: ⁴⁴ “Webi'a xexá'a lizra' naga bedxúaja'.” Ca xezrín na, le'e na benne' na', naque' ca tu xu'u da naxíajlbe lu'ule na, ne nalúa na, ne nagá'ana chawe na. ⁴⁵ Nadxa cheaj na cheajxerí na xegazre be' xriwe' da zaj naca na xríwēdxca ca le na, na' xúgute na dxelú'u na lu bēneea', na' naca chee benne' na' da calēladxa ca guca chee nedxu. Cá'anqueze gaca chee bēneache wen da calela caní.

Benne' zaj naque' ca xrna Jesús, ne ca benne' biche' ca'

(Mr. 3.31-35; Lc. 8.19-21)

⁴⁶ Jesús ne zue' dxuchálajlene' benne' caní gate belezrín xrne'e ne benne' biche' ca' ga na'. Gulezrē'e chalé'ajla,

ne dxelaca lazre' xuluchálajlene' Jesús.

⁴⁷ Nadxa tu benne' guzre' Jesús:

—Xrna'u, ne bi bichu' ca' zaj zrē'e chalé'ajla. Dxelaca lazre' xuluchálajlene' Lue'.

⁴⁸ Jesús guzre' benne' nigá:

—¿Núnbeale nuzra na' xrna'a, ne bi bícha'dau' ca'?

⁴⁹ Nadxa ble'e Jesús benne' ca' dxusēdene', dxenné':

—Benne' caní zaj naque' xrna'a, ne bi bícha'dau' ca'. ⁵⁰ Caní naca na lawe' da núteteze benne' dxune' ca da dxaca lazre' Xra' zue' xabáa, benne' nigá naque' benne' bicha', ne benne' zana', ne xrna'a.

Da bsēde Jesús ca da ben benne' dxaza

(Mr. 4.1-9; Lc. 8.4-8)

13 Lu zra na' bdxuaj Jesús xu'u, na' xejdxé'e dxu'a nísadau'. ² Na' lawe' da belezraga benne' zante naga zua Jesús, guxú'e tu lu da dxedá lawe' nísadau', ne gudxé'e na'. Xúgute benne' ca' belexegá'ane' dxu'a nísadau' na'. ³ Nadxa bsēde Jesús benne' ca' da zante da bchálaje', dxenné':

—Tu benne' dxaza guzē'e zíaje' guza.

⁴ Dxácatē dxaze', bal-la binnedu ca' xejlechaze na dxu'a neza. Na' belelá' bxinnedu ca', guláguba' binnedu ca'.

⁵ Bal-la binnedu ca' xejlechaze na lu xiaj naga quebe dxé'teca xu. Binnedu caní chadí gulezría na lawe' da quebe dxé'teca xu.

⁶ Gate bla' gubizra, na' gulecuade na. Lawe' da quebe dxé'teca xu, na' gulebizre na.

⁷ Bal-la binnedu ca' xejlechaze na naga bezríale'e lba xeche', na' lba xeche' ca' belegula na, ne blule na da du ca' naze'.

⁸ Bal-la binnedu ca' xejlechaze na lu xu bēbe, na' belúnna'e na. Bal-la xágadu ca' belunna na tu gaxúa tu tu na, na' xebal-la na belunna na ga xun tu tu na, na' xebal-la na belunna na chi dxua tu tu na.

⁹ Che zua nágate, le xene.

**Dxenná Jesús bizr chee na'
dxuchálaje' da dxululé'e na'**

(Mr. 4.10-12; Lc. 8.9-10)

¹⁰Nadxa benne' ca' dxusede Jesús gulebigue' naga zue' Le', ne buluchebe' Le':

—¿Bizr chee na' dxuchálajlenu' benne' ca' da dxululé'e na'?

¹¹Bechebe Jesús, dxenné':

—Dios dxunne' lataj nézele le'e da nagache ca dxenná bea Le' xabáa, san benne' caní quebe dxu'e lataj. ¹²Benne' nape' late', Dios gunézrujdxé' le', na' gá-palé'e, san benne' quebe bi nape', Dios wequé'e ca da du nape'. ¹³Chee le' na' dxuchálajlena' benne' caní da dxululé'e na, lawe' da cate' dxelenné'e quebe dx-elelé'ene'. Cate' dxelenne' quebe dxeléajni'ine'. ¹⁴Ca naca da dxaca chee benne' caní dxaca na ca gunná Isaías, bénnea' bchálaje' waláz chee Dios, gunné':

Da li wenle. Cate' dxenle quebe dxéajni'ile.

Da li wanná'le. Cate' dxenna'le quebe dxelé'ele.

¹⁵Caní naca na lawe' da zaj naca lázrdau zide' benne' caní.

Quebe dxelaca lazre' xelenne'.

Dxulugácue' xiaj lawe' chee quebe xeledé'ene'.

Quebe dxelenne', na' quebe dxeléajni'ine'.

Quebe dxelxíflaje' neda' chee xexuna' le'.

¹⁶'Ba neza zrenté naca na chee le' le' lawe' da dxelé'ele nen xiaj laule, ne dx-enle nen nágale. ¹⁷Da li dxapa' le'e, benne' zanté, benne' ca' buluchálaje' waláz chee Dios, ne benne' xrlátaje ca' gulaca lazre' xeledé'ene' da caní dxelé'ele le'e. Quebe belelé'ene' na. Gulaca lazre' xelenne' da caní dxénnele le'e. Quebe belenne' na.

**Jesús dxuzéajni'ine' benne' ca'
ca naca chee benne' dxaza**

(Mr. 4.13-20; Lc. 8.11-15)

¹⁸Na' gunná Jesús:

—Le xenne ca zéaje da naca chee benne' dxaza nigá. ¹⁹Benne' dxelenne' ca naca chee Bénnea' dxenná be'e xabáa, ne quebe dxeléajni'ine' zaj naque' ca bínnedu ca' xeaajlechaze na dxu'a neza. Za da xriwe' ne dxugía na ca naca dizra' da ba gulezí'e lu xichaj lázrdawe'. ²⁰Ca naca chee bínnedu ca' xeaajlechaze na lu xiaj, da caní dxululé'e na ca naca chee benne' ca' dxelezi'e dizra' na' du lazre'. ²¹Ca na' guca chee bínnedu ca', quebe guca xuludé lue na, ne quebe guzí bea na, ca'an dxaca chee benne' caní, gate na' bi da dxelezaque', u che nu zeajnáu zi' xuzre' le' lawe' da zaj nazi'e dizra' nigá, na' dxelexebigue'. ²²Bínnedu ca' xeaajlechaze na ládujla xeche' dxululé'e na ca naca chee benne' dxelenne' dizra' nigá, san dxelebé'le'e gunne xue da naca chee xezr la xu nigá, na' ca naca xel-la' gunní'a dxezí xe na benne' ca'. Xúgute' da caní dx-uluzaga na dizra' nigá, na' quebe dxun na da dxal-la' gun dizra' nigá lu xichaj lázrdawe'. ²³Ca naca chee bínnedu ca' da xeaajlechaze na lu xu bebe, da caní dxululé'e na ca naca chee benne' ca' dxelenne' dizra' nigá, ne dxeléajni'ine' na, na' zaj naque' ca bínnedu ca' belúnnale'e na. Bal-la benne' zaj naque' ca bínnedu ca' belunna na tu gaxúa tu tu na, na' xebal-le' zaj naque' ca bínnedu ca' belunna na ga xun tu tu na, na' xebal-le' zaj naque' ca bínnedu ca' belunna na chi dxua tu tu na.

**Da bchalaj Jesús ca naca chee xixre'
zrinnaj da dxenná'queze na ca
dxenná' xel-la' zrua' xtila**

²⁴Nadxa bchalaj Jesús xetú da dxululé'e na, dxenné':

—Ca dxaca ga ni dxenná bea Dios naca na ca da guca gate tu benne' guze' binne cháwe'dau' lu xezr la xu chee'. ²⁵ Gate dxelase xúgute', na' bzrin tu benne' dxezré'e le', ne xeajaze' binne xixre' zrinnaj lávela zrua' xtila, na' bezé'e. ²⁶ Gate na' bgula xel-la' zrua' xtila, ne bla' dau chee na, cá'aqueze bla' xixre' zrinnaj ca'. ²⁷ Nadxa benne' wen zrin ca' xeajleguezre' xrane na, dx-elé'e le': "Xran, guzu' binne cháwe'dau' lu xezr la xu chiu'. ¿Gazra guzá xixre' zrinnaj caní?" ²⁸ Gunná xránabe': "Tu benne' dxezré'e neda' bene' da nigá." Nadxa benne' wen zrin ca' buluchebe' le': "¿Dxaca lazru' chéajntu' cheajlépentu' xixre' zrinnaj ca'?" ²⁹ Le' guzre' wen zrin ca': "Quebe gaca na. Gate na' lázrutele xel-la' zrua' xtila. ³⁰ Xelegúladxa na cháwe'la tu zren ca xecá'adxadxu zrua' xtila. Nadxa nna be'eda' benne' wen zrin ca' xele-qué'e nedxu xixre' zrinnaj ca', na' xuluchéaje' xelune' tu xrúnujdu weaj chee guzézxedxu na. Nadxa xelelape' zrua' xtila na', ne xezrá chawe' na lizra'."

Da bchalaj Jesús ca naca chee binne mostaza

(Mr. 4.30-32; Lc. 13.18-19)

³¹ Nadxa bchalaj Jesús xetú da dxulé'e na, dxenné':

—Da dxaca chee benne' dxelezí' lu ne'e nna be'e Dios le' naca na ca da guca gate tu benne' guze' binne mostaza lu xezr la xu chee'. ³² Da li binne mostaza nigá naca na da bízrujdxu lawe' xúgute' binne ca'. Gate ba nagula na naca na tu xaga zrendxa lawe' xúgute' xixre' cuan. Dxaca na ca tu xaga zren naga dxelezeque' cheajlezrí'a bxínnedu ca' xrú'neba' lu zruze na.

Da bchalaj Jesús ca naca chee cua zichaj chee xeta xtila

(Lc. 13.20-21)

³³ Nadxa bchalaj Jesús xetú da dxulé'e na, dxenné':

—Da dxaca chee benne' dxelezí' lu ne'e nna be'e Dios le' naca na ca da guca gate tu nu'ula bchixre cua zichaj chee xeta xtila lawe' chunna xaga cua zrua' xtila, na' duté na guxasa na bliche.

Ca bchine Jesús da dxulé'e na caní

(Mr. 4.33-34)

³⁴ Xúgute' da caní bchálajle Jesús benne' ca', dxuchálaje' da dxululé'e na, na' quebe bchálajlene' benne' ca' che quebe bchálaje' da dxululé'e na. ³⁵ Caní guca ca da gunná benne' bchálaje' waláz chee Dios, gunné':

Guchálaja' ca naca da dxulé'e na da guchálaja'.

Gulé'eda' ca naca da nagache gate guzrete' xezr la xu.

Jesús dxuzéajni'iné' ca naca chee da dxulé'e na chee xixre' zrinnaj da dxenná'queze na ca dxenná' xel-la' zrua' xtila

³⁶ Nadxa Jesús bze' benne' ca' dizra', na' guxú'e lu xu'u. Benne' ca' dxusede Jesús gulebigue' lau le', na' gulé'e le':

—Bzéajni'i netu' da dxulé'e na ca naca chee xixre' zrinnaj da dxenná'queze na ca dxenná' xel-la' zrua' xtila.

³⁷ Nadxa Jesús guzre' benne' ca':

—Bénnea' dxaze' binne cháwe'dau' nigá naque' Benne' Gulje' Bénneache. ³⁸ Naga dxaze' binne nigá naca na lu xichaj lázrdau bénneache. Binne cháwe'du ca' zaj naca benne' ca' dxenná be'e Dios, na' xixre' zrinnaj ca' zaj naca na benne' ca' zaj naque' chee da xriwe'. ³⁹ Bénnea' dxezré'e xrane xezr la xu na', ne xeajaze' xixre' zrinnaj naque' da xriwe' ná'queze. Zra xelelape' naca na zra bzebe chee xezr

la xu nigá, na' benne' ca' xelexape' zrúa' xtila na' zaj naque' gubáz chee xabáa chee Dios. ⁴⁰ Ca belexequé'e xixre' zrin-naj ca', ne buluzré'e na lu xi' chee xelexze na, ca'an gácaqueze lu zra bzebe na'. ⁴¹ Neda', Benne' Gulje' Bénneache, sela' gubáz chee xabáa chia' ca' chee xulucuae' naga nna be'a xúgute benne' ca' dxuluxrínna'je' benne' xula, ne benne' ca' dxelune' da calela. ⁴² Nadxa gubáz chee xabáa ca' xuluzré'e benne' ca' dxelune' da calela lu xi' gabila naga xebebre', ne xeláguxa'ate lazxe'. ⁴³ Nadxa benne' ca' dxelune' da xrlátaje ca da dxenná be'e Dios xelácaqueze' ca gubizra naga dxenná bea Dios, Xra benne' ca'. Che le'e zua nágale, le xene.

Da dxulé'e na ca naca chee tu xel-la' gunní'a da nagache

⁴⁴ Na' gunná Jesús:

—Naga dxenná bea Dios naca na ca tu xel-la' gunní'a da nagache na tu lu xezr la xu. Tu benne' bezrélene' xel-la' gunní'a nigá, na' bucache' na. Ne zúale'e xel-la' dxebe' zexíaje' xeajxétie' xúgute da nape', na' bezi'e xezr la xu na'.

Da dxulé'e na ca naca tu bga da zácale'e na

⁴⁵ Na' gunná Jesús:

—Naga dxenná bea Dios naca na ca tu da dxexilaj tu benne' wete, dxexílaje' bga ca' da zaj zaca na. ⁴⁶ Gate dxezrélene' tu da zácale'e, na' zexíaje' zeajxétie' xúgute da nape', na' si'e bga na'.

Da dxulé'e na ca naca tu xixruj bela

⁴⁷ Na' gunná Jesús:

—Ca naca chee benne' ca' xelexú'e naga dxenná bea Dios, naca na ca tu xixruj bela, da dxuluzale' lu nísadau', na' dxelezené' zane' cue' bela. ⁴⁸ Gate dxezrá xixruj na', na' benne' ca' dxelezené' bela dxelexequé'e na dxu'a nísadau', na' dxelébé'e dxelexebé'e' bela ca'. Bela chawe'

ca' dxuluxuzré'e-ba' lu xcuite, na' bela xala ca' dxeledxú'üne'-ba'. ⁴⁹ Ca'an gaca lu zra bzebe na'. Xeledxúaj gubáz chee xabáa ca', xelexebéaje' benne' ca' dxelune' da calela ládujla benne' xrlátaje ca'. ⁵⁰ Xuluzré'e benne' ca' dxelune' da calela lu xi' gabila, naga xebebre', ne xeláguxa'ate lazxe'.

Da zaca ca da zaj naca na da cube, ne da zaj naca na da gula

⁵¹ Nadxa bchebe Jesús benne' ca', dxenné':

—¿Dxéajni'ile le'e xúgute da caní?

Benne' ca' gulenné':

—Awe', Xran.

⁵² Nadxa guzre' benne' ca':

—Gate tu benne' dxusédené' da nad-xixruj bea Dios, ne nazédené' ca dxenná bea Dios, naque' ca tu benne' xrane xu'u nézené' cuéaje' da zaj naca na da cube, ne da zaj naca na da gula ládujla da nuzrá chawe'.

Jesús dxexezrine' Nazaret

(Mr. 6.1-6; Lc. 4.16-30)

⁵³ Gate bexuzre bchalaj Jesús da dxulé'e na caní, na' bezé'e na'. ⁵⁴ Bezrine' naga naca lazrie'. Na' guzú lawe' dxusédené' benne' ca' zaj zre'e lu xudau' chee xezre na', na' belexebanne benne' ca', gulenné':

—¿Gazra bsede benne' nigá xel-la' sina nigá? ¿Ájazra dxune' xel-la' waca caní? ⁵⁵ Benne' nigá naque' zri'ine gubizre xaga, na' naca xrné'e María. Naque' bi biche Jacobo, ne José, ne Simón, ne Judas. ⁵⁶ Bi zane' zaj zue' nigá nen dxi'u. ¿Ájazra na' dxaca dxune' da caní?

⁵⁷ Chee le' na' buluzú'e Jesús chalá'ala. Jesús guzre' benne' ca':

—Xúgute benne' xula dxelape' ba lá'ana tu benne' dxuchálaje' waláz chee Dios. Benne' lazrie', ne xrtia ljwezre' quebe dxelúne' ca'.

⁵⁸ Jesús quebe bēnteque' na' xel-la' waca ca' lawe' da quebe gulájajl'e chee'.

Ca gute Juan, bēnea' bchue' bēneache nisa

(Mr. 6.14-29; Lc. 9.7-9)

14 Lu zra na' Herodes, benne' dxenná be'e xezre ca' zaj nababa na Galilea, benne' ca' naca da dxun Jesús. ² Na' guzre' bi wen zrin chee' ca':

—Benne' nigá naque' Juan, bēnea' bchue' bēneache nisa. Ba bebanē lądujla benne' gate. Chee' lē na' nape' xel-la' waca zren nigá.

³ Caní gunné' lawe' da gudela Herodes nigá Juan na', ne bchéajj'e lē' du xia, ne gulu'e lē' lizre xia. Bene' caní ne chee' Herodías, zru'ula Felipe, biche Herodes na'. ⁴ Caní bene' lawe' da guzre Juan lē':

—Quebe naca chiu' súalenu' nu'ula nigá.

⁵ Herodes guca lazre' gutiē' lē', san dxezrebe' da xelún bēneache ca' lawe' da dxeléquene' naca Juan benne' dxuchá-laje' waláz chee' Dios. ⁶ Gate bzrin zra dxezría iza Herodes, na' belune' laní chee', na' bxa'a bi nu'ula chee' Herodías na', na' bezaca ba lazre' Herodes na' da dxunbe'. ⁷ Chee' lē na' Herodes guchēbe lazre' lau benne' ca' gunézruje' ca' da naba bi nú'uladu na'. ⁸ Lawe' da ba guzre xrnabe' lēbe', na' gunabe':

—Bēna nigá xichaj Juan, bēnea' bchue' bēneache nisa. Gulú'u na tu lu xé'ena.

⁹ Nadxa guzúa stebe Herodes, bēnea' dxenná be'e, san lawe' da ba guchēbe lazre', na' benne' zaj zre'e dxágulēne' lē' belenne' ca', chee' lē na' guzre' tu benne' wen zrin chee' gunézruje' na lēbe'. ¹⁰ Gunná bé'ene' nu benne' guchugue' xichaj Juan naga xu'e lizre xia. ¹¹ Nadxa xejlexrí'e xíchajē' tu lu xé'ena, ne bulunézruje' na bi nú'uladu na', na' lēbe' bnézrujbe' na xrnabe'.

¹² Nadxa belezrín benne' ca' bsede Juan, na' belexú'e lē', ne xejlecachē' lē'. Nadxa xjaque' xejleguezre' Jesús.

Dxugagu Jesús chi xun gaxúa benne' biu

(Mr. 6.30-44; Lc. 9.10-17; Jn. 6.1-14)

¹³ Gate ben Jesús da na', na' bezé'e na', bexu'e tu lu da dxedá lawe' nísadau', na' bzrinē' tu naga quebe nu zra' benne'. Gate belén bēneache, na' gusiá'que' ni'e, na' belezrinē' naga zua Jesús. ¹⁴ Gate bedxúaj Jesús lu da dxedá lawe' nísadau', na' blé'ene' benne' zante, ne bexache lazre' lē', na' bexunē' benne' ca' quebe chawe' zaj zue'. ¹⁵ Gate ba za xrinne, benne' ca' dxusede Jesús gulebigue' lau Lē', dxelenné':

—Lataj nigá quebe bi de, ne ba dxedé zra. Bze benne' caní dizra' chee' chjaque' xézredu ca', ne xelexí'e da xelawe'.

¹⁶ Jesús guzre' lē':

—Quebe dxun na ba xen chjaque'. Le gunezruj le'e da xelawe'.

¹⁷ Benne' ca' gul'é' Lē':

—Gázxuze xeta xtila de cheedxu nigá, ne chúpaze bela.

¹⁸ Jesús guzre' benne' ca':

—Le gunna na nigá.

¹⁹ Nadxa gunná bé'ene' gulebé' benne' zan ca' lawe' zriē. Guqu'é' xeta xtila, ne bela ca', na' gunné'e xabaala, ne guzre' Dios: "Xcalenu'." Nadxa bzúzruje' xeta xtila, ne bnézruje' na benne' ca' dxusédene', na' benne' ca' gulísie' na lówela benne' zan ca'. ²⁰ Xúgutē' gulawe', ne gulélajene'. Ca' gudé na' bulusuzré'e chazrinnu ga' da bízrujdu ca' zaj nagá'ana. ²¹ Benne' gulawe' na zaj naque' chi xun gaxúa benne' biu, ne quebe nu blaba nu'ula, ne bidu ca'.

Jesús dxedé' lawe' nisa

(Mr. 6.45-52; Jn. 6.16-21)

²² Nadxa gunná be'e Jesús benne' ca' dxusédene' xelu'e lu da dxedá lawe'

nísadau' chee xelague' nísadau' nédx-udxa ca Le' chee xelexezrine' xéchala'a nísadau' na', dxácate Le' dxuzé benne' zan ca' dizra'. ²³Ca gudé bze' dizra' benne' zan ca', na' guluéne' tu lu xi'a xeajchálajlene' Dios naga zue' tuzé'. Gate guxrinne' zua Jesús tuze' na'. ²⁴Dxácate na' ba zeaj da na' dxedá lawe' nísadau' gachaj láwe'te nísadau' na'. Nadxa guxasa xeajxruza chee nísadau' na', da dxutá na da dxedá lawe' nísadau' na', lawe' da dxácale'e be', ne quebe dxue na lataj sa na. ²⁵Gate gudé dxela gubiga Jesús naga zaj zre'e, zéaje' lawe' nisa. ²⁶Gate belelé'e benne' ca' dxedá Jesús lawe' nisa, na' belezrebe', na' lu xel-la' dxelezrebe gulebézrexe'e, gulenné':

—Da dxedá dxela na'.

²⁷Jesús guzre' benne' ca':

—Le gun dipa lázrele. Neda' nigá. Quebe zrébele.

²⁸Na' gunná Pedro, dxé'e Jesús:

—Xran, che Lue' na', gunná be'e xida' lawe' nisa naga zu' na'te.

²⁹Jesús guzre' le':

—Gudá xca'.

Nadxa Pedro bdxúaje' lu da dxedá lawe' nísadau', ne guzú lawe' dxezé'e lawe' nisa chee zrine' naga zua Jesús.

³⁰Gate dxeque be'ene' ca dxun be' na', na' bzrebe', ne guzú lau dxazie' lu nísadau' na'. Ca'an guca gudxezre xe'e, gunné':

—Xran, beca'a neda'.

³¹Nadxa beca'a Jesús ne'e, ne guzre' le':

—Látega dxeajlí lazru' neda'. ¿Bizr chee na' ben chupa lazru'?

³²Gate belexegüene' lu da dxedá lawe' nísadau', na' bebé' zri be' na'. ³³Nadxa benne' ca' zaj zre'e lu da dxedá lawe' nísadau' na' buluzú zribe' lau Jesús, dxelé'e Le':

—Da li nacu' Zri'ine Dios.

Jesús dxexune' benne' we' ca', benne' zaj zre'e lu xezre Genesaret

(Mr. 6.53-56)

³⁴Guledé' xecha la'a nísadau', na' belezrine' lu xezr la xu chee benne' Genesaret ca'. ³⁵Gate benne' ca' zaj zre'e xezre na' belexexúnbe'e Jesús, na' buludé' dizra' xezícala xézredu ca', na' guleché'e xúgute benne' we' naga zua Jesús. ³⁶Gulata' xuene' Jesús gu'e lataj xulutá benne' ca' zra lane' naze. Xúgute benne' buluté' zra lane' belexexaque'.

Da dxuxrinnaj na bénneache

(Mr. 7.1-23)

15 Nadxa benne' fariseo ca', ne benne' dxuluxuzájle'e da bdxixruj be'e Moisés, benne' ca' beledxuaje' lu xezre Jerusalén, gulebigue' lau Jesús, na' buluchebe' Le', dxeleonné':

²—¿Bizr chee na' benne' ca' dxusé-denu' quebe dxuluzúe' dizra' ca naca da gulún xra xrtaudxu? Quebe dxelíbe-queze ne'e ca naca da zéajlentu' gate dxelawe'.

³Jesús bchebe' benne' ca', gunné':

—¿Bizr chee na' le'e quebe dxuzuale dizra' da dxenná be'e Dios? Dxunle ca naca da zéajlele. ⁴Dios gunné': “Gudapa ba lá'ana xra xrna'u.” Cá'anqueze gunné': “Benne' nne' schanni' chee xra xrne'e, le gute bénnea'.” ⁵Le'e dxennale waca xe tu benne' xra xrne'e: “Quebe séqueda' bi gunna' le'e lawe' da ba guchebe lazra' gunézruja' Dios xúgute da de chia'.” ⁶Dxennale che tu benne' dxune' caní québedxa dxun na ba xen gácalene' xra xrne'e. Caní dxunle le'e, dxuzuale chala'ala da bdxixruj be'e Dios, chee gunle ca naca da zéajlele. ⁷Le'e, láweze dxunle da xrlátaje. Da li naca da gunná Isaías, bénnea' bchálaje' waláz chee Dios, ca naca chee le'e, gunné':

⁸Benne' caní dxelape' neda' ba lá'ana nen dxú'aze'.

Quebe dxelape' neda' ba lá'ana dute
lázrdawe'.

⁹ Dácheze naca dxelúe lá'ane' neda'.

Da gulenná be'ene' bénneache naca na
da ca' dxulusédene'.

¹⁰ Nadxa Jesús gunné' benne' ca',
dxenné':

—Le xene, ne le chéajni'i. ¹¹ Da dxu'u
na dxu'a bénneache quegá le na guxrin-
naj na bénneache. Da dxedxuaj na dxu'a
bénneache naca na da dxurrinnaj na
bénneache.

¹² Nadxa benne' ca' dxusede Jesús
gulebigue' lau Le'. Dxelé'e Le':

—¿Nézenu' gulaca tula benne' xudau'
fariseo ca' gate belenne' da gunnáu'?

¹³ Jesús guzre' benne' ca':

—Bíteteze xágadau' da quebe guza
Xra' zue' xabáa, welépeda'. ¹⁴ Le gusan
benne' ca'. La chul-la zaj naque', ne dx-
ulusi'e neza le sa' ljwezre' la chul-la ca'.
Che tu la chul-la che'e le sa' ljwezre' la
chul-la, dxúpaté' xelebixre' tu lu xedxu.

¹⁵ Nadxa Pedro guzre' Jesús:

—Bzéajni'i netu' ca naca chee da dx-
ulé'e nigá.

¹⁶ Gunná Jesús:

—¿Cá'anqueze le'e quebe dxéajni'ile?

¹⁷ ¿Quebe nézele xúgute da dxu'u na
dxú'adxu zeaj na le'edxu, na' te na' xedx-
uaj na? ¹⁸ Da dxedxuaj na dxú'adxu naca
na da za' lu xichaj lázrdaudxu. Da nigá
naca na da dxurrinnaj na bénneache.

¹⁹ Lu xichaj lázrdau bénneache dxeledx-
uaj da dxezá lazre' da calela, ca naca xel-
la' we'te benne', ne ca naca xel-la' zuale
zru'ula benne' xula, ne ca naca da sban
da dxelún bénneache, ne ca naca xel-la'
gubán, ne xel-la' wen lazre', ne xel-la' we-
tupa dizra' bizruj. ²⁰ Da caní dxuluxrin-
naj na bénneache. Che tu benne' quebe
dxexibe ne'e ca da zéajlele gate dxawe'
xeta, da nigá quebe dxurrinnaj na le'.

Tu nu'ula zitu' dxéajle'e chee Jesús

(Mr. 7.24-30)

²¹ Nadxa bedxuaj Jesús na', zexiáje'
chala'a naga zaj nababa xezre Tiro, ne
xezre Sidón. ²² Tu nu'ula Canaán zue' na'
ze'e dxebezre xe'e cúzrela Jesús, dxenné':

—Xran, Zri'ine David, bexache lazre'
neda'. Xu'ube' be' xriwe' zri'ina' nu'ula, ne
cátitega dxezácabe'.

²³ Quebe bi bechebe Jesús. Nadxa
belezrín benne' ca' dxusedene', ne gulata'
xuene' Le', gulé'e Le':

—Bsel-la nu'ula nigá lawe' da ze'e dxe-
bezre xe'e cúzrudxu.

²⁴ Nadxa gunná Jesús:

—Dios gusel-le' neda' gácaleza' benne'
Israel ca' zaj naque' ca zríla'du ca' zaj
naníteba'.

²⁵ Gubiga nu'ula na' naga zua Jesús, ne
bzu zribe' lau Le', ne dxé'e Le':

—Xran, gúcale neda'.

²⁶ Jesús guzre' le':

—Quebe naca xrlátaje cá'adxu da dx-
elagu zríinedxu, chee gunézrujdxu na
bécudu ca'.

²⁷ Nadxa nu'ula na' guzre' Jesús:

—Awe', Xran, san bécudu ca' dx-
eláguquezeba' da bízrujdu ca' dxelexruj
zran naga dxelagu xránaba'.

²⁸ Nadxa Jesús guzre' le':

—Nú'uladu, da zrenté naca xel-la' dx-
eajlí lazre' chiu'. Gaca ca dxaca lazru'.

Lu zra ná'queze bexaca zrí'ine'
nú'uladu na'.

Jesús dxexune' benne' zanté benne' we'

²⁹ Jesús guzé'e na', gudée' dxu'a
nísadau' chee Galilea. Guluéne' tu
lu xi'a, ne gudxé'e na'. ³⁰ Benne' zan
belezrine' naga zua Jesús, zaj naché'e
benne' zrinnaj ca', ne benne' la chul-la
ca', ne benne' quebe dxaca xelenné',
ne benne' zan zaj nadxugu ni'a na',
ne zánedxa benne' we'. Buluzré'e

benne' ca' lau Jesús, na' Le' bexuné' le'.
³¹ Ca'an guca belexebane benne' ca' gate
 belelé'ene' dxelenné' benne' ca' quebe
 guca xelenné' nédxula, ne belexexaca
 benne' ca' gulaque' benne' ni'a na'
 dxugu, ne dxeledá benne' ca' gulaque'
 benne' zrinnaj, ne dxelelé'e benne' ca'
 gulaque' benne' la chul-la. Gulezú lawe'
 dxelúe lá'ane' Dios chee benne' Israel
 ca'.

**Jesús dxugawe' tapa cue'
 tu gaxúa benne' biu**

(Mr. 8.1-10)

³² Nadxa Jesús gunné' benne' ca'
 dxusédené'. Dxe'e le':

—Dxexache lazra' chee benne' caní
 lawe' da ba zeaj chunna zra zraléne'
 neda' nigá, ne quebe bi de da xelawe'.
 Quebe dxaca lazra' xesel-la' le' chee
 cheajxaque' lizre' quebe ne xelawe' chee
 quebe xelate ni'a ne'e la neza.

³³ Nadxa benne' ca' dxuséde Jesús
 gulé'e Le':

—¿Ájazra guntu' zrélentu' da xelagu
 cátité benne' zan caní? Lataj nigá quebe
 nu chilá' benne' zua lizre' nigá.

³⁴ Jesús bchebe' benne' ca', dxenné':

—¿Bal-la xeta xtila nápane?

Benne' ca' belexechebe':

—Gazre na, ne xetú chupa béladau'.

³⁵ Nadxa Jesús gunná bé'ene' benne'
 zan ca' xelebé'e lu xu. ³⁶ Guqué'e da
 gazre xeta xtila, ne béladu ca', na' guzre'
 Dios: “Xcalenu'.” Nadxa bzúzruje' na, ne
 bnézruje' na benne' ca' dxusédené', na'
 benne' ca' gulísie' na chee benne' zan ca'.
³⁷ Xúgute' gulawe', ne belélajtene'. Gudé
 na' bulusuzrate' gazre ga' da bízrujdu ca'
 zaj nagá'ana. ³⁸ Benne' gulagu zaj naque'
 tapa cue' chi gaxúa benne' biu, ne quebe
 nu blaba nu'ula, ne bidu ca'. ³⁹ Gudé na'
 Jesús bze' benne' zan ca' dizra', na' bexu'e
 lu da dxedá lawe' nísadau' zexíaje' naga
 nababa xezre Magdala.

**Dxelenabe' Jesús guné' tu
 xel-la' waca chee xabáa**

(Mr. 8.11-13; Lc. 12.54-56)

16 Benne' xudau' fariseo ca', ne
 benne' xudau' saduceo ca' xjaque'
 naga zua Jesús chee xuluxunéguene' Le'.
 Chee le' na' gulenabe' Jesús guné' tu
 xel-la' waca zrente' da za xabáa. ² Jesús
 bechebe' benne' ca':

—Xelate' zua gubizra dxennale le':
 “Gun chawe' wxre lawe' da da' beuj
 xrna zran xabáa.” ³ Che zílala dxen-
 nale: “Quebe chawe' gun na'a zra lawe'
 da dá'le'e beuj xrna zran xabáa.” Le'e
 dxul'é'e cuínale da quebe nácale. Dxá-
 caqueze dxennale ca' naca da gun
 zran xabáa. Quebe dxaca xuzájla'ale ca'
 sa'yeaj da dxaca na'a zra. ⁴ Benne' wen
 da caléla caní, benne' zaj nabéaj xícha-
 je' Dios, dxelenabe' guna' tu xel-la' waca
 zrente'. Quebe xelelé'ene' xetú xel-la'
 waca. Welelé'ene' tuze da gaca na ca da
 guca chee Jonás.

Nadxa bulucá'ana Jesús benne' ca',
 zjá'aque'.

**Da dxelún benne' xudau' ca' da naca
 na ca' cua zichaj chee xeta xtila**

(Mr. 8.14-21)

⁵ Gate benne' ca' dxuséde Jesús gu-
 ladé'e xechalá'a nísadau', na' gulal-la
 lazre' xelu'e chizre'. ⁶ Jesús guzre' le':

—Le nna'xque. Le guxúe cuínale ca'
 naca chee cua zichaj chee xeta xtila chee
 benne' fariseo ca', ne chee benne' sa-
 duceo ca'.

⁷ Benne' ca' dxuséde Jesús gulezú lawe'
 dxelé' ljwezre':

—Caní dxenné' lawe' da quebe núadxu
 xeta xtila.

⁸ Jesús dxequé be'ene', na' guzre' le':

—¿Bizr chee na' dxennale naca na
 lawe' da quebe núale xeta xtila? Láteze
 dxéajlele chia'. ⁹ ¿Quebe ne chéajni'ile,
 ne quebe dxéajsa' lázrele chee da gazxu'

xeta xtila da bgawa' gazxu' cue' chi gaxúa benne' biu, ne bal-la ga' becá'ale?
¹⁰ ¿Quebe dxeajsá lázrele chee da gazre xeta xtila da bgawa' tapa cue' chi gaxúa benne' biu ca', ne bal-la ga' becá'ale?
¹¹ ¿Ájazra na' quebe dxeque be'ele quegá bchálaja' chee xeta xtila gate gunnía' le guxúe cuínale ca naca chee cua zichaj chee xeta xtila chee benne' fariseo ca', ne chee benne' saduceo ca'?

¹² Nadxa guleque bé'ene' quegá guzre Jesús le' xuluxúe cuine' chee da naca cua zichaj chee xeta xtila, san ca naca da dxuluse benne' fariseo ca', ne benne' saduceo ca'.

Pedro dxenné' Jesús naque' Cristo

(Mr. 8.27-30; Lc. 9.18-21)

¹³ Gate bzin Jesús naga nababa xezre Cesarea da ben Filipo, na' bchebe' benne' ca' dxusédene':

—¿Nuzra na' dxelenná bèneache naca' neda', Benne' Gulje' Bèneache?

¹⁴ Na' benne' ca' gulenné':

—Bal-la benne' dxelenné' nacu' Juan, bènea' bchue' bèneache nisa. Xebal-le' dxelenné' nacu' Elías, na' xebal-le' dxelennáqueze' nacu' Jeremías, u xetú benne' bchálaje' waláz chee Dios.

¹⁵ Nadxa guzre Jesús benne' ca':

—¿Gazra le'e? ¿Nuzra na' dxennale naca'?

¹⁶ Gunná Simón Pedro:

—Lue' nacu' Cristo, Zri'ine Dios ban.

¹⁷ Bechebe Jesús:

—Ba neza zren naca na chiu' Simón, zri'ine Jonás. Netú benne' quebe ne gulé'ene' lue' da nigá, san Xra' zua xabáa, Le' blé'ene' lue'.¹⁸ Neda' dxapa' lue', nacu' Pedro, da zéaje na tu xiaj, na' lawe' xiaj xre nigá guzúa' benne' xeleajlí lazre' neda', na' xel-la' dxenná bea chee da xri-we' quebe seque na gucu'uj na benne' ca'.¹⁹ Neda' gunna' lue' da naca na zren xia chee xel-la' dxenná bea chee xabáa, na' da guchéaju' lue' lu xezr la xu nigá gaca

na da ba nadxéajqueze na xabáa, na' da xesezru' lue' lu xezr la xu nigá gaca na da ba naxézrequeze na xabáa.

²⁰ Nadxa Jesús gunná bé'ene' benne' ca' dxusédene' chee quebe nu xel'é naca Le' Cristo.

Jesús dxuchálaje' ca gaca gate gatié'

(Mr. 8.31—9.1; Lc. 9.22-27)

²¹ Lu zra ná'queze guzú lau Jesús dxuzéajni'ine' benne' ca' dxusédene' dxalla' xexíaje' xezre Jerusalén, na' benne' gula ca', ne benne' xíchaje' ca' chee bxruze ca', ne benne' dxuluxúzajle'e da nadxiruj bea Dios wulusaca zi'e Le'. Na' guzre' benne' ca' dxusédene' welute benne' Jerusalén ca' Le'. Nadxa gate gaca chunna zra xeban'e.

²² Nadxa Pedro guléaje' Jesús chalá'ala, ne guzú lawe' dxedil-le' Le', dxenné':

—Dios quebe gu'e lataj, Xran. Cabata' gaca chiu' da caní.

²³ Jesús bexéchaje', na' guzre' Pedro:

—Gucuasa cuita' neda', lue', da xri-we', lawe' da nacu' tu da dxusunegue na neda'. Quebe dxulaba lazru' ca dxun Dios. Ca dxun bèneache dxulaba lazru'.

²⁴ Nadxa Jesús guzre' benne' ca' dxusédene':

—Che nu benne' dxaca lazre' gaque' neda' tuze, dxal-la' guzúe' chalá'ala da naca chee', ne guzúa cuine' chee gatié', na' nadxa gaca xidalene' neda'.²⁵ Bènea' dxaca lazre' gapa chi'e xel-la' nabán chee' gunitié' na. Bènea' gunitié' xel-la' nabán chee' lawe' da dxun'e zrin chia', benne' nigá zrué'ene' xel-la' nabán du lazre'.²⁶ ¿Bízraqueze ba neza naca na chee tu benne' che gata' chee' xúgute xel-la' gunnía' da de lu xezr la xu nigá, na' cuía xi'e lau Dios? Quebe bi gaca quizruj tu benne' chee la bène'du xu'e lau Dios.²⁷ Neda', Benne' Gulje' Bèneache wida' xecha lasa nen xel-la' szren chee Xra', ne nen gubáz chee xabáa ca'.

Nadxa xuzría chee tu tu benne' ca naca da zaj nun tu tue'. ²⁸ Da li dxapa' le'e, bal-la benne' zaj zre'e nigá quebe xelatie' cadxa xeledé'ene' neda', Benne' Gulje' Bénneache, xida' xedajnná be'a.

Dios dxuché'e ca dxenná' lau Jesús

(Mr. 9.2-13; Lc. 9.28-36)

17 Ca gudé guca xrupa zra, na' Jesús guché'e Pedro, ne Jacobo, ne Juan, bi biche Jacobo, na' bi cá'aze xjál-calene' Le' tu lau xi'a sibe. ² Na' Dios bche'e ca dxenná' lau Jesús lálwela benne' ca'. Lawe' guca tite na ca gubizra, na' zra lane' guca na da chiche ca xel-la' nax-aní'. ³ Na' benne' caní belelé'ene' Moisés, ne Elías, benne' gulezrá' gate nate, dxuluchálajlene' Jesús. ⁴ Nadxa Pedro guzre' Jesús:

—Xran, cháwe'le'e zúadxu nigá. Che dxaca lazru', guntu' chunna xu'u lágadau', tu chiu', ne tu chee Moisés, ne tu chee Elías.

⁵ Dxácate dxenné' Pedro, bla' tu beuj da dxaca tite na, da gucu na benne' ca', na' lu beuj na' belenne' chi'i Dios, dxenné':

—Benne' nigá naque' Zri'ina' nazrí'ite lazra', ne chee Le' dxezaca ba lazra'. Chee Le' le xene.

⁶ Gate belenne' da nigá, na' gulate' sudxú'ala lu xu. Dxelezebe'le'e. ⁷ Nadxa Jesús gubigue' naga zaj zre'e, na' bte' benne' ca', ne guzre' le':

—Le chasa. Quebe zrébele.

⁸ Gate na' belenné'e, québedxa nu belelé'ene'. Tuze Jesús zue'.

⁹ Nadxa gate dxelexetáj'e lu xi'a na', Jesús gunná bé'ene' benne' ca', dxenné':

—Quebe nu guchálajlele ca da ble'ele ca zrindxa zra neda', Benne' Gulje' Bénneache, xebana' ládujla benne' gate.

¹⁰ Nadxa benne' ca' dxusede Jesús buluchebe' Le':

—¿Bizr chee na' dxeleenná benne' ca' dxuluxuzájle'e da nadxiruj bea Dios

dxun na ba xen xelá' Elías nédxudxa ca xelá' Cristo?

¹¹ Jesús guzre' benne' ca':

—Da li xelá' Elías nédxudxa, ne gucá'ana chawe' ca naca da dxal-la' gaca. ¹² Neda' dxapa' le'e, ba bla' Elías, na' benne' ca' quebe belexúnbe'e le'. Bulusaque' le' cáteze da gulaca lazre'. Cá'anqueze xulusaque' neda', Benne' Gulje' Bénneache.

¹³ Nadxa benne' ca' dxusede Jesús guléque be'ene' dxuchalaj Jesús ca naca chee Juan, bénnea' bchue' bénneache nisa.

Jesús dxexuné' tu bi biu dxe'ebe' chuna'

(Mr. 9.14-29; Lc. 9.37-43)

¹⁴ Gate belezrine' naga zaj zra' benne' zante, na' tu benne' gubigue' naga zua Jesús, ne bzu zribe' lau Le', dxenné':

¹⁵—Xran, bexache lazre' zri'ina', dxe'ebe' chuna', ne da zrente' da dxezácabe'. Zánete lasa ba xeajházebe' lu xi', ne lu nisa. ¹⁶ Ba bedajgu'a-be' lau benne' caní dxusedenu', na' quebe guca xelexuné'-be'.

¹⁷ Jesús bechebe':

—Le'e, benne' wen chupa lazre', ne benne' lázrdau zide'. ¿Bátate zúalena' le'e? ¿Bátate naca' zren lazre' nen le'e? Le cheajxrí' bi cuide' na' nigá.

¹⁸ Nadxa Jesús gudil-le' be' xriwe' na', na' bebéaje' na lu bel-la' dxen chee bi cuide' na', na' zra ná'queze bexácatebe'.

¹⁹ Gudé na' benne' ca' dxusede Jesús gulenné' Le' chalá'ala, na' buluchebe' Le':

—¿Bizr chee na' quebe guca netu' xe-béajntu' be' xriwe' na'?

²⁰ Jesús guzre' benne' ca':

—Lawe' da naca láteze ca dxéajlele chia'. Da li dxapa' le'e, che la ná'pale xel-la' dxeajlí lazre', lácala naca na láteze ca naca tu binnedau' chee mostaza, waca xe'le xi'a nigá: “Gucuasa nigá cháaju' xetú lataj”, na' xi'a na' wacuasa na. Quebe bi

de da quebe gaca gunle che nápaie xel-la' dxeajlí lazre'. ²¹ Ca naca be' xriwe' caní, dxun na ba xen guchálajlele Dios, ne gunle gubasa chee séquele xebéajle be' xriwe' caní.

**Jesús dxuchálaje' xecha
lasa ca gaca gate gatie'**

(Mr. 9.30-32; Lc. 9.43-45)

²² Dxácate na' dxeledé' naga nababa Galilea, Jesús guzre' benne' ca':

—Neda', Benne' Gulje' Bénneache wadéa' lu na' bénneache. ²³ Xelútie' neda', na' gate gaca chunna zra, xebana'.

Gate belenne' dizra' nigá, na' bewi'ine lázrele'ene'.

**Da dxuluchízruje'
bénneache chee xudau'**

²⁴ Gate Jesús ne benne' ca' dxusé-dene' belezrine' lu xezre Capernaum, na' benne' dxuluchízruje' chee xudau' belezrine' lau Pedro, na' buluchebe' le':

—¿Quebe dxizruj benne' dxusé-dene' le'e chee xudau'?

²⁵ Pedro bechebe':

—Awe'. Dxízruje' na.

Nadxa, gate na' guxú'u Pedro lu xu'u, guzre Jesús le':

—¿Aja dxéquenu', Simón? ¿Nuzra na' dxuluchizruj lazruj chee xezr la xu benne' ca' dxelenná bea lu xezr la xu nigá? ¿Dxuluchízruje' benne' waláwr chee', u benne' zitu' ca'?

²⁶ Bechebe Pedro:

—Benne' zitu' dxuluchízruje'.

Jesús guzre' le':

—Na' benne' waláwr chee' quebe xelízruje'. ²⁷ Na'a, chee quebe nu guchá'adxu, guxíaj lu nísadau' na', ne guchize da na' dxeláleu' bela lu nisa na', na' bebéaj bela nedxu que'u'-ba'. Dxú'aba' na' xezrelnu' tu dumí da quízruju' chiu' lue', ne chia' neda'. Bia na, ne xejtizruj na lau benne' ca'.

Nu benne' nácadxa blau xabáa

(Mr. 9.33-37; Lc. 9.46-48)

18 Tu lasa gulebiga benne' ca' dxusede Jesús naga zue', na' buluchebe' Le':

—¿Nuzra benne' nácadxe' blau naga dxenná bea Dios?

² Nadxa Jesús gunné' tu bidau', na' bze'-be' lau benne' ca' dxusé-dene'.

³ Dxenné':

—Da li dxapa' le'e, che quebe xexácale ca bidu nigá, québequeze chu'ule naga dxenná bea Dios xabáa. ⁴ Ca'an naca, benne' nácadxe' blau naga dxenná bea Dios xabáa, naca benne' gaque' dxexruj lazre', ne xexaque' ca bidu nigá. ⁵ Benne' gape' ba lá'ana tu bidau' caní lu La' neda', néda'queza' gape' ba lá'ana.

Ca naca da dxun na gundxu dul-la

(Mr. 9.42-48; Lc. 17.1-2)

⁶ Na' gunná Jesús:

—Núteteze benne' gune' gun tu bidu caní dul-la, bi dxeajlí lázrebe' neda', cháwela guchéajladxu lbe'e tu xiaj zi'i da dxutu, na' cheajchú'unadxu le' situj lu nísadau'. ⁷ Edxugúa bénneache lawe' da déle'e da dxun na xelún bénneache dul-la. Tu gátazqueze da caní, na' edxugúa bénneache dxelune' xelún bénneache dul-la. ⁸ Chee le' na', che na'u u ni'u dxun na gunu' dul-la, guchugu na, ne gudxú'una na zitu'. Cháwedxa xexú'u lu xel-la' nabán li lazre' nadxugu ni'u u na'u, quézcala xelegú'e lue' lataj ba xa', zua dxúpaté na'u, ne dxúpaté ni'u. ⁹ Che xiaj lau' dxun na gunu' dul-la, guleaj na, ne gudxú'una na zitu'. Wenla chu'u lu xel-la' nabán li lazre' nen tuze xiaj lau', quézcala xelegú'e lue' lu xi' gabila, zua dxúpaté xiaj lau'.

**Da dxulé'e na ca naca
chee zrila' naníteba'**

(Lc. 15.3-7)

¹⁰ Na' gunná Jesús:

—Gutu guzú' chalá'ala netú bidu caní. Neda' dxapa' le'e, zaj zra' gubáz chee xabáa chee bidu caní lau Xra' xabáa. ¹¹ Neda', Benne' Gulje' Bénneache, bla'a bedajselá' benne' zaj nanítie'.

¹² ¿Ájzra dxéquele le'e? Che tu benne' nape' tu gaxúa zrila', na' nite tuba', ¿quebe gucá'ang' be tápalalaj chennu na' le'e xixre', na' cheajdilje' zrila' na' naníteba'? ¹³ Gate ba bezrelne'-ba', wabéle'edxene' chee be tu na' quézcala chee be tápalalaj chennu ca' quebe guleníteba'. ¹⁴ Cá'anqueze Xrale le'e, zue' xabáa, quebe dxaca lazre' nite netú bidu caní.

**Ca dxal-la' gunite laudxu
chee le sa' ljwézredxu**

(Lc. 17.3)

¹⁵ Na' gunná Jesús:

—Che bi bichu' dxunbe' chiu' da calela, bchálajle tuze lebe', chee xúnbeabe' da calela da benbe'. Che xenbe' da dxu'u-be', na' ba bexacu' tuze bi bichu'. ¹⁶ Che quebe xenbe' da dxu'u-be', guché' tu chupa benne' chee gaca chupa u chunna benne' xelexechebe' ca naca da dxu'u-be'. ¹⁷ Che quebe xenbe' chee benne' ca', guzre ca naca benne' dxelezraga lu xudau'. Che quebe xenbe' chee benne' ca', le guzúa-be' ca tu benne' quebe dxéajle'e chee Dios, u ca tu benne' dxuchízruje' waláz chee benne' zitu' ca'.

¹⁸ 'Da li dxapa' le'e, da guchéajle lu xezr la xu nigá, naca na da ba nadxéajqueze na xabáa, ne da xesézrele lu xezr la xu nigá naca na da ba nazézrequeze na xabáa.

¹⁹ 'Cá'anqueze dxapa' le'e, che chúpale le'e gácale tuze ca da návale Dios, na' Xra' zua xabáa gunne' na. ²⁰ Naga zaj zra'

chúpabe', u chúnname' zaj nazrágabe' lu La' neda', na' zúaqueza' neda' laduj lebe'.

²¹ Nadxa Pedro bchebe' Jesús:

—Xran, che bi bícha'dau' gunbe' chia' da calela, ¿bal-la lasa dxun na ba xen gunite lawa' cheebe'? ¿Gazre lasa?

²² Bechebe Jesús:

—Dxapa' lue', quegá gazre lasa, san ga xun chi da gazre lasa.

**Benne' wen zrin quebe guca lazre'
gunite lawe' chee le sa' ljwezre'**

²³ Na' gunná Jesús:

—Da gaca naga dxenná bea Dios xabáa naca na ca da guca gate tu benne' dxenná bea guca lazre' gucá'ana chawe' da dxelal-la benne' wen zrin chee'. ²⁴ Gate guzú' lawe' dxucá'ana chawe' na, na' guleché'e lau le' tu benne' dxebague' chee' zane' cue' chi gaxúa dumí. ²⁵ Lawe' da quebe de chee benne' wen zrin na' da quízruje' xrané', na' gunná be'e xrané' ta'u benne' wen zrin na', ne zru'ule', ne zrí'ine' ca', ne ca nácaqueze da nape', chee gazruj da na' dxebague'. ²⁶ Nadxa bzu zribe benne' wen zrin na' lau xrané', na' guta' xuene' le', dxenné': "Xran, ben zren lazre' neda', na' quízrujqueza' ca naca na." ²⁷ Na' xrané' bexache lazre' le', ne bnite lawe' da na' dxebague' chee', ne bsane' le'. ²⁸ Gate benne' wen zrin na' bedxúaje', na' bezrague' xetú benne' wen zrin ljwezre', benne' dxebague' chee' látedau'. Na' gudéle' lba bénnea', ne guzú' lawe' dxuséxuje' chi'i bénnea', dxe'e le': "Gudizruj neda' da dxal-lu' chia'." ²⁹ Nadxa benne' wen zrin ljwezre' na' bzu zribe' lau le', ne guta' xuene' le', dxenné': "Ben zren lazre' neda', na' quízrujqueza' ca naca na." ³⁰ Bénnea' quebe guca lazre', na' guxíaje' xeajlu'e wen zrin ljwezre' na' lizre xia dxácaté quízruje' da na' dxebague'. ³¹ Gate benne' wen zrin ca' xezícala guleque bé'ene' da nigá, na' belewí'ine lázrele'ene', na' xjaque' xeajleguezre' xrané' xúguté da ba guca.

³²Nadxa xranē' na' gunná bé'ene' xea-jlenné' benne' wen zrin na', na' guzrē' lē': "Bi wen zrin calela. Neda' bnite lawa' chiu' ca naca da na' dxebagu' chia' lawe' da guta' xúenu' neda'." ³³Cá'anqueze lue' dxal-la' xexache lazru' le sa' ljwezru' na' ca bēna' neda' bexache lazra' lue'." ³⁴Xranē' na' bzrá'ale'ē bēnnea', na' bdee' lē' xel-la' zi' dxácatē' na' quízruje' ca naca da na' dxal-le' chee'.

³⁵Nadxa gunná Jesús:

—Cá'anqueze gun Xra' zua xabáa chee'le le'e che quebe gunita laule dute lázraule chee' le sa' ljwézrele.

Da bchalaj Jesús ca naca chee' benne' dxulusán ljwezre'

(Mr. 10.1-12; Lc. 16.18)

19 Ca gudé bchalaj Jesús da caní, na' bezé'ē xezre ca' zaj nababa Galilea, na' bezrine' chalá'ala naga nababa Judea, da zua chalá'ala xegu Jordán naga dxalaj gubizra. ²Benne' zan zjácálenē' Lē', na' bexunē' benne' zante, benne' wē'.

³Nadxa bal-la benne' xudau' fariseo gulebiguē' naga zua Jesús chee' xelebéa-je' Lē' dizra' chee' gaca xelagu zrie' Jesús, na' buluchebe' Lē':

—¿Waca nu benne' gusanē' zru'ule' ne chee' bíteteze da gune'?

⁴Bechebe Jesús:

—¿Quebe ne gulábale le'e lu xiche lá'azxa da na' dxenná na: "Bennea' bēne' benne' ca' nédxudautē bēne' lē' benne' biu, ne nu'ula'?" ⁵Cá'anqueze gunné': "Chee' lē' na' benne' biu gusanē' xra xrne'ē chee' gaque' tuze nen zru'ule', na' dxupe' xelaque' ca tuze benne'." ⁶Caní naca na, québedxa zaj naque' chupe', san tuze benne' zaj naque'. Chee' lē' na' quebe dxal-la' xelá'a bēnneache da na' ba nuchaga Dios.

⁷Nadxa buluchebe' Jesús:

—¿Bizr chee' na' gunná be'e Moisés nu benne' gunézruje' zru'ule' tu xiche da dxul'é na belexel'é, na' gusanē' lē'?

⁸Jesús guzrē' benne' ca':

—Caní bēne' lawe' da gulaca lazrau zizraj xra xrtaule. Moisés bēne' lataj gusanle zru'ulale, san nédxudautē quebe guca na ca'. ⁹Neda' dxapa' le'e, che tu benne' gusanē' zru'ule', ne quebe dxedálenē' benne' biu xula, na' che xezúalenē' nu'ula xula, benne' nigá gunē' dul-la súalenē' nu'ula quebe naque' zru'ule', na' che nu benne' biu xequé'ē tu nu'ula nusán benne' chee', cá'anqueze gun dul-la bēnnea' súalenē' nu'ula quebe naque' zru'ule'.

¹⁰Nadxa benne' ca' dxusede Jesús gulé'ē Lē':

—Che ca' dxaca chee' benne' zúalenē' nu'ula, quebe dxal-la' súalēntu' nu'ula.

¹¹Jesús guzrē' benne' ca':

—Quegá xúgutē benne' gaca xelez'ē dizra' nigá, san tuze benne' ca' ba nun Dios chee' xelez'ē na. ¹²Zaj zra' benne' quebe dxelezúalenē' nu'ula lawe' da quebe zaj naca xánnie' benne' biu. Na' zaj zra' benne' québedxa zaj naca xánnie' benne' biu lawe' da zaj nun bēnneache naca caní. Na' zaj zra' benne' dxelexegá'ane' cá'aze, quebe nu dxelezúalenē' chee' gaca xelune' zrin chee' Dios, Bēnnea' dxenná be'ē xabáa. Benne' gaca si'ē dizra' nigá dxal-la' si'ē na.

Jesús dxenabē' gaca chawe' chee' bidu ca'

(Mr. 10.13-16; Lc. 18.15-17)

¹³Nadxa belezrín benne' lau Jesús zaj naché'ē bal-la bidau' chee' guzē' ne'e bidu ca', ne nabe' Dios gaca chawe' chee'be', san benne' ca' dxusede Jesús gulezú lawe' dxeledil-lē' benne' ca' zaj naché'ē bidu ca'. ¹⁴Jesús guzrē' lē':

—Le güe bidu ca' lataj xelela'be' naga zua'. Quebe guzrúnnale-be', lawe' da

benne' zaj naque' ca bidu caní xelu'e naga dxenná bea Dios xabáa.

¹⁵ Nadxa bze Jesús ne'e lawe' bidu ca', na' gudé na' bezé'e lataj na'.

Tu benne' cuide' nape' xel-la' gunní'a

(Mr. 10.17-31; Lc. 18.18-30)

¹⁶ Tu benne' cuide' guxíaje' naga zua Jesús, na' bchebe' Le':

—Benne' Wesede chawe'. ¿Bi da xrlátaje dxal-la' guna' chee gapa' xel-la' nabán zeajlí canna?

¹⁷ Jesús guzre' le':

—¿Bizr chee na' dxu'u neda', benne' wesede chawe'? Quebe nu chilá' benne' naque' chawe', san tuze Dios. Che dxaca lazru' zru'énu' xel-la' nabán li lazre', bzua dizra' ca bdxixruj be'e Dios.

¹⁸ Benne' cuide' na' gunné':

—¿Bila na'?

Jesús guzre' le':

—Quebe gutiu' benne'. Quebe súalenu' zru'ula benne' xula. Quebe cuanu'. Quebe nneu' da wen lazre' chee benne'. ¹⁹ Gudapa ba lá'ana xra xrna'u. Bzri'i le sa' ljwezru' ca nazrí'i cuinu'.

²⁰ Benne' cuide' na' gunné':

—Xúgute da caní dxuna' nácatea' bí-dau'te. ¿Bízdaxa quebe ne guna'?

²¹ Na' guzre Jesús le':

—Che dxaca lazru' gacu' benne' li lazre', bexíaj, xeajete ca naca da napu', ne bnezruj na benne' xache' ca'. Nadxa gapu' xel-la' gunní'a xabáa. Na' gudátega nen neda'.

²² Gate benne' cuide' na' benne' da nigá, bezé'e dxexíaje lazre' lawe' da ná-pale'e xel-la' gunní'a.

²³ Nadxa gunná Jesús, dxé'e benne' ca' dxusédene':

—Da li dxapa' le'e, stébele'e naca chu'u tu benne' gunní'a naga dxenná bea Dios xabáa. ²⁴ Da xula dxapa' le'e, chadidxa gaca te tu bea', be dxebía bénneache lu negue' tu xeché' zriche, quézcala chu'u tu benne' gunní'a naga dxenná bea Dios.

²⁵ Gate belenne' benne' ca' dxusede Jesús da nigá, na' belexebánele'ene', na' buluchebe ljwezre':

—¿Nuzra la xca'?

²⁶ Jesús guné'e benne' ca', ne guzre' le':

—Da nigá quebe gaca xelún bénneache, san Dios waca gune' ca naca.

²⁷ Nadxa gunná Pedro:

—Xran, netu' ba bcá'anantu' ca naca da nápantu', ne zéajlentu' Lue'. ¿Bizra gápantu' xca'?

²⁸ Bechebe Jesús:

—Da li dxapa' le'e, ca lu zra na' gate na' xúgute xelaxaca na cube, gate neda', Benne' Gulje' Bénneache, cue'a lataj chawe' chia' naga nna be'a, le'e na' ba gudálele neda' cué'quezle lu chazrinnu lataj naga nna beale, chee guchí'ale chee chazrinnu cue' benne' Israel, benne' judío ca'. ²⁹ Xúgute benne' ca' ba bulucá'ane' lizre', u benne' biche', u nu'ula zane', u xre', u xrne'e, u zru'ule', u zrí'ine', u xezr la xu chee', chee xelune' zrin chia', xelexí'queze' tu gaxúala na, ne xelexí'queze' xel-la' nabán zeajlí canna.

³⁰ Benne' zante zaj naca blau na'a xelaque' benne' bzebe, na' benne' zante zaj naca benne' bzebe na'a xelaque' benne' blau.

Da dxulé'e na ca naca chee benne' wen zrin ca'

20 Na' gunná Jesús:

—Da gaca naga dxenná bea Dios xabáa naca na ca da guca gate tu xrane zánete cue' xezr la xu guzé'e lizre' che zílala, zéaje' zeajtlaje' benne' wen zrin ca' chee cheajlechibe' uva chee'. ² Bca'ana cháwelené' benne' wen zrin ca' quízruje' tu dumí lazruj chee tu zra, na' gusel-le' benne' ca' zeajleguene' zrin lu xezr la xu chee'. ³ Ca gudé na' guzé'e lizre' ca dxedá na, na' blé'ene' benne' zaj zre'e lawe' xi'a zaj nalátajze'. ⁴ Na' guzre' benne' ca': “Cá'aqueze le'e, le ch-jaca wen zrin lu xezr la xu chia', na'

gunna' le'e da naca chawe'." Na' benne' ca' xjaque'. ⁵ Xrane na' guzé'e da xula wa gubizra, ne cá'aqueze dxexedá' chunna, ne tuze ca bene'. ⁶ Xetú du dxedá' gazxu' guxíajé' lawe' xi'a, na' blé'ene' zaj zra' na' benne' zaj nalátajzqueze', ne guzre' le': "¿Bizr chee na' zrale le'e nigá bedú zra quebe bi zrin dxunle?"

⁷ Gulenné': "Quebe nu ne xe netu' guntu' zrin chee'."

'Na' guzre' benne' ca': "Cá'aqueze le'e, le cheajén zrin lu lina chia', na' gunna' le'e da naca chawe'." ⁸ Gate gulla' chizrela, xrane na' guzre' benne' xu'u lu ne'e zrin na': "Gunné' benne' wen zrin ca', ne gudíruje', su lau' quízruju' benne' ca' belelá' bzébedxa, na' bzébeté quízruju' benne' ca' belelá' nédxute'." ⁹ Nadxa belezrín benne' ca' belú'e lu zrin na' gate dxexedadxa gazxu', na' tu tu benne' ca' belezi'e lazruj chee' du naxá' lazruj tu zra wen zrin. ¹⁰ Gudé na' gate belezrín benne' ca' gulu'e nédxute' lu zrin na', guléquene' xezezi'e da zrendxa, san cá'aqueze gulezi' tu tu benne' ca' lazruj tu zra wen zrin weaj.

¹¹ Gate gulezi'e na, na' gulezú lawe' dxelawe' zria lau xrane zrin na', ¹² dxe-lenné': "Benne' caní belelá' bzébedxa, tu chí'ida'u'ze ga belune' zrin, na' gudírujquezu' benne' caní ca' gudíruju' netu', na' netu' bedú zra bentu' zrin, ne ca naca da la chee' zra nigá bhaga launtu'."

¹³ Bechebe xrane na', dxe'e tu benne' ca': "Ljwézra'dau', quebe bi dxuna' chiu' da quebe naca na chawe'. ¿Quebe bca'ana cháwelená' lue' quízruja' lue' lazruj tu zra wen zrin? ¹⁴ Guzi' lazruj chiu', ne bexíaj. Neda' dxaca lazra' gunézruja' chee' benne' ca' belú'e bzébedxa ca da gudírujqueza' lue'. ¹⁵ ¿Quebe gaca guna' ca da dxaca lazra' nen dumí chia'? ¿Dxacu' xa lazre' lawe' da naca' neda' benne' xrlátaje?"

¹⁶ Na' gunná Jesús:

—Ca'an naca, benne' ca' zaj naca benne' bzebe xelaque' benne' blau, na' benne' blau ca' xelaque' benne' bzebe lawe' da ba gunnía' benne' zan, san bábaze benne' ca' xelaque' blau.

Xecha lasa dxuchalaj Jesús ca gaca gate gatie'

(Mr. 10.32-34; Lc. 18.31-34)

¹⁷ Gate xu'u Jesús neza, zexíajé' Jerusalén, guléajé' cheeze benne' chazrinnu ca' dxusédené', ne guzre' le':

¹⁸—Dxelé'ele le'e ba zexíajdxu Jerusalén naga neda', Benne' Gulje' Bénneache, xuludé benne' ca' neda' lau benne' xíchajé' ca' chee' bxruze ca', ne lau benne' ca' dxuluxuzájlé'e da bdxixruj be'e Dios, na' xelechugue' chia' gatia'. ¹⁹ Xuludé' neda' lu na' benne' zitu' ca' chee' xelún le' chia', na' xelu'e neda', ne xuludé'e neda' xaga béguaj, san zra guxunne zra xebana'.

Da gunaba xrna Jacobo ne Juan

(Mr. 10.35-45)

²⁰ Nadxa gubiga xrna Jacobo, ne Juan lau Jesús, bi ca' zaj naca be' zri'ine Zebedeo, naché'e bi ca', na' bzu zribe' lau Jesús, dxenabe' culué'n. ²¹ Jesús bchebe' nu'ula na':

—¿Bi na' dxenabu'?

Nu'ula na' guzre' Jesús:

—Gate zrin zra nna be'u, na' gudxixruj be'e cue' tu zri'ina' caní chalá'a xabéla chiu', ne xetube' xéglala.

²² Jesús bechebe', guzre' bi ca':

—Quebe nézele le'e bi na' dxenábale. ¿Waca xí'ajle le'e ca da xí'aja' neda', da na' naca na ca xel-la' zi' da tea' neda', ne waca si'le da naca na ca xel-la' dxedxúa nisa ca da si'a neda' gate chu'a lu xel-la' gute?

Na' gulenabe':

—Wácantu'.

²³ Nadxa Jesús guzre' bi ca':

—Da li xí'ajle ca da xí'aja' neda', ne si'le da naca ca xel-la' dxedxúa nisa na' da si'a neda', san da cue'le chalá'a xabela chia', ne chalá'a xéglala chia' quebe naca na chia' gunna' na le'e. Xra' gunézruje' na chee bi ca' ca da ba nucueze'.

²⁴ Gate xechí benne' ca' dxusede Jesús belenne' ca', na' belezré'e dxupa bi chee nu'ula na'. ²⁵ Jesús gunné' benne' ca', ne guzre' le':

—Ba nézele le'e ca dxelún benne' xí'chaje chee xezr la xu ca', dxelenná bé'ene' benne' ca', na' benne' nácadxe' blau ládujla benne' ca' dxelenná be'e, dxuchínene' xel-la' dxenná bea chee'. ²⁶ Le'e quebe dxal-la' gunle ca'. Benne' dxaca lazre' gaque' blau ládujla le'e dxal-la' guné' zrin chee xezícadxale le'e, ²⁷ na' bènea' dxaca lazre' gaque' xí'chaje chee, dxal-la' gaque' wen zrin chee xúgutele le'e. ²⁸ Dخال-la' guné' ca bēna' neda', Benne' Gulje' Bēneache, quebe bida' chee nu gun zrin chia' neda', san bla'a chee guna' zrin chee bēneache, ne chee guzúa' xel-la' nabán chia' ca da quízruja' chee guselá' benne' zante.

Jesús dxexune' chupa benne' la chul-la

(Mr. 10.46-52; Lc. 18.35-43)

²⁹ Gate dxelexedxúaje' xezre Jericó, na' benne' zante zjácálene' Jesús. ³⁰ Naga dxeledé'e zaj dxe' chupa benne' la chul-la dxu'a neza, na' gate belenne' dxedé Jesús na' gulebezre xé'e, dxelenné':

—Xran, Zri'ine David, bexache lazre' netu'.

³¹ Benne' zan ca' guledil-le' dxúpate' na' chee xelezúe' zrize, san le' gulebezre xé'e zízrajdxá, dxelenné':

—Xran, Zri'ine David, bexache lazre' netu'.

³² Nadxa Jesús guleze', na' gunné' benne' la chul-la ca', na' bchebe' le':

—¿Bi dxaca lázrele guna' chee?

³³ Belexechebe benne' ca':

—Xran, dxaca lázrentu' xelé'entu'.

³⁴ Jesús bexache lazre' benne' ca', ne bte' xiaj lawé'. Na' belexelé'ete' benne' la chul-la ca', na' xjácálene' Jesús.

Ca da guca gate bexú'u Jesús Jerusalén

(Mr. 11.1-11; Lc. 19.28-40; Jn. 12.12-19)

21 Gate belezrín Jesús, ne benne' ca' dxusédené' gagu naga zua xezre Jerusalén, ne ba belezrine' xezre Betfagé, da zua na gagu naga zua xi'a naga zaj da' xaga olivo, na' Jesús gusel-le' chupa benne' ca' dxusédené' chee tu da xelune'. ² Dxe'e le':

—Le chjaca xézredu na' da zua le nna' nigá. Na' lé'ele tu burro bzrise' da'ba' xaga, na' tu búrrodau' zúáleba' leba'. Le sezre-ba', ne le che'e dxúpateba' nigá. ³ Che nu benne' bi xé'e le'e, le xé'e: “Xránadxu nachinne' leba', na' la xesél-la'tequeze'-ba'.”

⁴ Da nigá guca na chee guxá ca da gunná benne' bchálaje' waláz chee Dios, gunné':

⁵ Le xé benne' zaj zra' xezre Sión:

“Le nna', Benne' nna bé'ene' le'e ze'e naga zúale.

Dute' xel-la' dxexruj lazre' zri'e' tu burro bzrise'.

Zri'e' tu búrrodau', zri'ine tu be dxua xua.”

⁶ Nadxa dxupa benne' ca' dxusede Jesús besia'que', ne belune' ca da ba gunná be'e Jesús le'. ⁷ Xeajlexrí'e burro bzrise', ne zrí'ineba', na' belezríe' zra lané' cúzruba', na' guzría Jesús leba'. ⁸ Benne' zan ca' gulechílaje' zra lané' la neza na', na' xebal-le' buluchibe' zina' da buluzalé' la neza. ⁹ Benne' zjaque' lówela, ne benne' zá'aque' bzebe gulezú lawé' dx-elebezre xé'e, dxelenné':

—¿Gaca ba lázaxa Zri'ine wenná bea David! ¿Ba neza zrente naca na chee bēne'a' ze'e waláz chee Xránadxu Dios! ¿Gaca ba lázaxa Dios!

¹⁰Gate guxú'u Jesús xezre Jerusalén, ca naca bēnneache zaj zre'e na' beledxé'ena zrague', na' buluchebe ljwezre':

—¿Nuzra benne' nigá?

¹¹Bal-la benne' ca' gulenné':

—Benne' nigá naque' Jesús, benne' dx-uchálaje' waláz chee Dios, ze'e xezre Nazaret da nababa Galilea.

Jesús dxuchi'e lu xudau'

(Mr. 11.15-19; Lc. 19.45-48; Jn. 2.13-22)

¹²Ca gudé na' guxú'u Jesús dxale'aj xudau' chee Dios, na' bebéaje' xúgute benne' wete, ne benne' dxelá'awe' na'. Bdxixre' blag ca' chee benne' ca' dx-uluché'e dumí, ne bdxixre' da ca' zaj dxe' benne' ca' dxelútie' bgúgudu ca'.

¹³Nadxa guzre' benne' ca':

—Lu xiche lá'azxa naxúaj da dxenná Dios: “Lizra' nigá naca na xu'u naga xelenaba bēnneache lawa' neda'”, san le'e ba nunle na ca tu lizre gubán.

¹⁴Lu dxale'aj xudau' na' gulebiga lau Jesús bal-la benne' la chul-la, ne benne' zrinnaj ca', na' Le' bexuné' benne' ca'.

¹⁵Belezrá' benne' xíchaje' ca' chee bxruze ca', ne benne' ca' dxuluxuzájle'e da nadx-ixruj bea Dios, gate na' belenne' ca dx-elebezre xa'a bidu ca' lu xudau', dxelennabe': “¿Gaca ba lá'azxa zri'ine wenná bea David!” ¹⁶Gulé'e Jesús:

—¿Dxennu' ca dxelenná benne' caní?

Bechebe Jesús:

—Dxenda' na. ¿Quebe ne gulábale le'e lu xiche lá'azxa naga naxúaj na chee da dxaca nigá? Dxenná na caní:

Ba benu' xelúl-la bidu ca', ne bidu dxe'ene ca'.

Da dxelúe lá'anabe' Dios naca na da li.

¹⁷Nadxa bca'ana Jesús benne' ca'. Bezé'e xezre na', na' bezrine' xezre Beta-nia, naga bejgá'ane' xela na'.

Jesús dxugu'e de' xaga higo

(Mr. 11.12-14, 20-26)

¹⁸Che zílala ca zexíaj Jesús xezre na', na' gudune'. ¹⁹Zítu'la blé'ene' tu xaga higo dxu'a neza, na' gate bzrine' naga zua na, quebe bi da zixre chee na blé'ene'. Lágaze zria na. Nadxa Jesús guzre' xaga higo na':

—Cabata' cuíaquezu' da zixre.

Gubízrete xaga higo na'. ²⁰Ca belelé'e benne' ca' dxusede Jesús da nigá, na' belexebánene', ne buluchebe' Jesús:

—¿Ájazra na' chadite gubizre xaga higo nigá?

²¹Bechebe Jesús:

—Da li dxapa' le'e, che nápaie xel-la' dxeajlí lazre', ne quebe gun chupa lázrele, quegaze da nigá gaca gunle ca da bēna' neda' chee xaga higo nigá, san waca xe'e xi'a nigá: Gucuasa nigá, xea-jsúa lu nísadau', na' gaca na. ²²Che dx-eajlí lázrele, na' xezi'le bíteteze da nábale Dios.

Xel-la' dxenná bea da xu'u lu na' Jesús

(Mr. 11.27-33; Lc. 20.1-8)

²³Nadxa guxú'u Jesús lu chila xudau', na' dxácaté na' dxusédene' benne' zaj zre'e na', gulebiga naga zua Jesús benne' xíchaje' ca' chee bxruze ca', ne benne' gula chee judío ca', na' buluchebe' Le':

—¿Bi xel-la' dxenná bea napu' dxunu' da caní? ¿Núzraqueze bēna lue' xel-la' dxenná bea nigá?

²⁴Bechebe Jesús:

—Cá'anqueze neda' guche'ba' le'e tu. Che xechébele da nigá, na' neda' xapa' le'e bi xel-la' dxenná bea napa' dxuna' da caní. ²⁵¿Nu benne' gusel-le' Juan dxuchúe' bēnneache nisa? ¿Dios, che bēnneacheze?

Gulezú lawe' dxuluchálajle ljwezre', dxelenné':

—Che mna dxu Dios gusel-le' le', na' xe'e dxi'u: “¿Bizr chee na' quebe guxéa-

jlēle chee?" ²⁶ Che nnadxu bēneache gusel-le' le', dxal-la' zrēbedxu bi xelún benne' zan ca' cheedxu dxi'u, lawe' da dx-eleque xúgute bēneache bchalaĵ Juan na' waláz chee Dios.

²⁷ Chee le' na' gulé'e Jesús:

—Quebe nézentu'.

Nadxa Jesús guzre' benne' ca':

—Cá'anqueze neda' quebe xapa' le'e bi xel-la' dxenná bea napa' dxuna' da caní.

Da dxulé'e na ca naca chee chupa bi biu chee tu benne'

²⁸ Na' guzre Jesús benne' ca':

—¿Aja dxéquele le'e chee da nigá? Tu benne' zaj zra' chupa zrf'ine' bi biu, na' guzre' tube': "Zri'ina', guxíaj xején zrin lu lina chee uva chia'." ²⁹ Zrf'ine' na' bechébebe': "Quebe dxaca lazra'." Ca gude' na' bexíaje lázrebe', na' guxíajbe' xejénquezbe' zrin. ³⁰ Cá'anqueze xrabe' na' guxíajbe' xejné'e xetube', ne guzre'-be', na' bi nigá bechébebe': "Waca, xrae. Na'a cha'a." Quebe guxíajbe'. ³¹ ¿Núlabe' bi chupa caní benne' ca da guca lazre' xrabe'?

Gulenná benne' ca':

—Bi nedxu.

Na' gunná Jesús, dxé'e benne' ca':

—Da li dxapa' le'e, benne' wechizruj ca', ne nu'ula dxeledále benne' biu zante xelxú'e naga dxenná bea Dios nédx-udxa ca le'e ³² lawe' da bla' Juan, be-dajlé'ene' le'e da naca xrlátaje, na' le'e quebe guxéajle chee'. Benne' wechizruj ca', ne nu'ula ca' dxeledále benne' biu zante guléajle'e chee'. Le'e, gate ble'ele da nigá, quebe bexíaje lázrele chee' chéa-jlēle chee'.

Da dxulé'e na ca naca chee benne' wen zrin calela ca'

(Mr. 12.1-12; Lc. 20.9-19)

³³ Nadxa gunná Jesús:

—Le xene ca naca da nadxizruj bea nigá. Tu benne' xrane tu xezr la xu

guzé' lba uva ca', ne bene' le'aj chee na. Bene' tu xedxu naga xelésie' uva ca', ne guchise' tu xu'u sibe chee gaca nu guxúe ca naca na. Na' bca'ane' na lu na' benne' wen zrin ca', ne guzé'e zéaje' zitu'. ³⁴ Gate bzrin zra xuluchibe' uva ca', na' gusel-le' tu chupa bi wen zrin chee' zeajlexezri'be' da dxal-la' xezí' xrane na'. ³⁵ Benne' wen zrin ca' guzre' xezí' na' wen zrin chee' ca'. Belúle'e tube', ne belutie' xetube', na' xetube' buluzríe'-be' xiaj. ³⁶ Nadxa xrane na' gusel-ladxé' bi wen zrin chee' bi zandxa ca nedxu. Benne' wen zrin ca' tuz ca bulusaque' bi ca'. ³⁷ Naga xejché'tequeze na gusel-le' zrf'inequeze' lawe' da dxéque'ne': Welape' ba lá'ana zri'ina'. ³⁸ Gate belelé'ene' zrf'ine', na' benne' wen zrin ca' gulé' ljwezre': "Bi nigá xezí' lu na'be' ca naca da caní. Du gute-be' chee' xegá'ana cheedxu da caní." ³⁹ Chee le' na' guléle'-be', ne belexebéaje'-be' lu xezr la xu na', na' belutie'-be'.

⁴⁰ Nadxa Jesús bchebe' benne' ca':

—Gate xida xrane xezr la xu na', ¿ájazra gune' chee' benne' wen zrin ca'?

⁴¹ Gulé'e Le':

—Gutie' benne' ca' dxelune' da calela ne quebe xexache lazre' le'. Nadxa gucá'analene' xezr la xu na' benne' wen zrin xula, benne' xuluxunézruje' da dxal-la' xezí' le' gate zrin zra chee na.

⁴² Nadxa Jesús guzre' benne' ca':

—¿Quebe ne gulábale le'e xiche lá'azxa? Caní dxenná na: Xiaj na' da buluzúa benne' wen xu'u ca' chalá'ala,

le' na' naca na xiaj blau na'a.

Da nigá naca na da ben Xránadxu, ne naca na tu da dxexebánedxu.

⁴³ Chee le' na' dxapa' le'e, Dios wequé'e da naca chee le'e naga dxenná be'e, na' gunézruje' na benne' xelune' da naca chee xel-la' dxenná bea chee Dios. ⁴⁴ Che tu benne' cheajchazie' lawe' xiaj nigá waxúzruje', na' che xezruj na lawe' tu benne', na' guzuzruj na le'.

⁴⁵ Gate benne' xíchaję ca' cheę bxruze ca', ne benne' xudau' fariseo ca' belenęę da bchalaj Jesús, guleque bé'ene' cheę léqueze' bchalaj Jesús da caní. ⁴⁶ Gate gulaca lazre' xełełę' Le', belezrebe' benne' xęzre ca' lawe' da dxelęajle benne' ca' naca Jesús benne' dxuchálaję waláz cheę Dios.

**Da dxulę'e na ca naca
cheę laní wechaga na'**

22 Guzú lau Jesús dxuchálajlene' benne' ca' xecha lasa tu da dxulę'e na, dxę'e le':

²—Ca da gaca xabáa naga dxenná bea Dios naca na ca da guca gate tu benne' wenná bea bene' tu laní wechaga na' cheę bi biu cheę'. ³ Gusel-lę' benne' węn zrin cheę' ca' cheajletupe' benne' ca'an gunnę' lizre', san benne' ca' quebe gulaca lazre' xędajgaque'. ⁴ Nadxa gusél-ladxę' benne' węn zrin cheę' ca', benne' xula. Dxę'e le': "Le xę benne' ca' gunná', ba nucueza' xel-la' wagu. Ba gunná be'eda' xelútię' bežre ca', ne be dxelanne, na' ca naca na bache de. Dخال-la' xełełę' nigá naga zra' wechaga na'." ⁵ Benne' ca' gunnę' quebe gulaca lazre' xędajgaque'. Tu benne' ca' guxiąje' lu xęzr la xu cheę', ne xetú benne' guxiąje' wete. ⁶ Xeballa benne' ca' gulęle' bi węn zrin ca' cheę wenná bea na', na' bulucháchalęne'-be', ne belútete'-be'. ⁷ Nadxa wenná bea na' bžrá'ale'e, na' gusel-lę' benne' cheę' ca', benne' zjaca wedil-la xęajleguętie' benne' wete benne' ca', ne xęajlezęze'te' lazre' benne' ca'. ⁸ Nadxa guzre' bi węn zrin cheę' ca': "Bal-la bi de ba de cheę wechaga na', na' benne' ca' gunná' quebe zaj naca cheę' xełełę'. ⁹ Le chjaca neza zri'a ca', ne le nne xúgute benne' lé'ele, cheę xełełę' laní cheę wechaga na'." ¹⁰ Benne' węn zrin ca' xjaque' la neza ca', na' xęajletupe' xúgute bęnneache, benne' belelé'ene' zaj naque' benne' caleła, ne benne' xrlátaje. Ca'an guca guzrate xu'u

na' bęnneache. ¹¹ Nadxa wenná bea na' guxú'e xęajnę'e benne' ca' gunnę', na' blé'ene' tu benne' dxę'e na', quebe nazi'e zra lanę' cheę laní cheę wechaga na'. ¹² Guzre' le': "Lue', benne', ¿ájazra guca guxú'u nigá, ne quebe nazi'u zra lanu' cheę laní wechaga na'?" Bęnnea' gudxę'e zriže. ¹³ Nadxa wenná bea na' guzre' bi zaj zúabe' ga na', "Le guchéaj ni'a ne'e, ne le guzale' chalé'ajla naga naca chulla, naga cuezre', ne xáguxa'atę lazre'." ¹⁴ Benne' zante' gunná', na' bábaze' zaj naca cheę' xelu'e nigá.

Ca naca cheę dumí da dxuluchízruje'

(Mr. 12.13-17; Lc. 20.20-26)

¹⁵ Nadxa benne' fariseo ca' besiá'que', ne belunę' tuze dizra' xełebeaje' Jesús dizra' cheę xełezęquene' xelawe' zría cheę'. ¹⁶ Nadxa gulesel-lę' bal-la benne' ca' zaj naque' fariseo ca' tuze, ne bal-la benne' ca' zaj de'e Herodes, cheę zęajleguęze' Jesús:

—Benne' wesęde, nézentu' dxenníu' da li, ne dxusędenu' da li da zaj naca cheę Dios, ne quebe dxezrebu' bi xełenná bęnneache, ne quebe dxenná'u ca da zaj napa bęnneache. ¹⁷ Gunná xque. ¿Aja dxęquenu' lue'? ¿Dxun na ba xen quízrujdxu da dxuluchizruj benne' ca' nasel-la César, benne' zitu', che cabí?

¹⁸ Jesús ba nézene' ca da dxelaca lazre' xelunę' cheę', na' guzre' benne' ca':

—Le'e, láweze dxunle da xrlátaje. ¿Bizr cheę na' dxuzúale da guzría xi na neda'? ¹⁹ Le gulę'e neda' dumí na' da dxízruje cheę wechizruj.

Nadxa bulunęzruje' Le' tu dumí cheę xęzre Roma. ²⁰ Gate blé'ene' na, na' Jesús bchebe' benne' ca':

—¿Nuzra lau ni, ne le' da naxúaj na nigá?

²¹ Belexechebe':

—Cheę César na'.

Na' guzre Jesús benne' ca':

—Le gunezruj chee César da naca chee César, ne le gunezruj chee Dios da naca chee'.

²² Gate belenne' da nigá, na' belexebané', ne besia'que' naga zua Jesús.

Da buluchebe' Jesús chee benne' selexebane' ládujla benne' gate

(Mr. 12.18-27; Lc. 20.27-40)

²³ Zra ná'queze belezrín bal-la benne' saduceo ca' naga zua Jesús. Benne' saduceo ca' dxelenné' quebe selexebán benne' gate. Gul'é'e Jesús:

²⁴ —Benne' wesede, Moisés gunné' che tu benne' nuchaga ne'e gatié', ne quebe nu bidu chee' chilá', na' bi biche' dxalla' guchaga na'abe' nen nu'ula gute benne' biu chee' na' chee' sua tu bi chee' benne' ba gutié'. ²⁵ Naga zúantu' gulezrá' gazre benne' gulácabe' zri'ine tuze benne'. Bi nedxu bchaga na'abe', na' gútebe'. Bi gudxupe' bchaga na'abe' nen nu'ula na' gute benne' biu chee' lawe' da quebe nu zri'ine bi nedxu na' gúlajbe'. ²⁶ Cá'anqueze gúcaqueze na chee' bi gudxupe', na' gudé na' chee' bi guxunne', na' cá'anqueze guca chee' xúgute bi gazre ca'. ²⁷ Ca gudé na', na' gute nu'ula na'. ²⁸ Gate selexebán benne' gate, ¿nula bi gazre caní gácabe' benne' chee' nu'ula na' lawe' da tu tu bi gazre ca' bchaga na'abe' nen nu'ula na'?

²⁹ Jesús bechebe':

—Le'e dxeque zrējajele lawe' da quebe núnbeale da naxúaj na lu xiche lá'azxa, ne ca naca xel-la' waca chee' Dios. ³⁰ Gate zrin zra selexebán benne' gate, québedxa xuluchaga na' bénneache, ne québedxa xelútie' bi nu'ula chee' xuluchaga na'abe'. Xelaque' ca zaj naca gubáz chee' xabáa chee' Dios. ³¹ Ca naca na che dxalla' selexebán benne' gate, ¿quebe ne gulábale le'e ca gunná Dios? Gunné': ³² “Neda' naca' Dios chee' Abraham, ne Dios chee' Isaac, ne Dios chee' Jacob.” Dios quebe naque' Dios chee' benne' gate,

san naque' Dios chee' benne' ban, benne' ca' ba gulatié' lu xezr la xu nigá.

³³ Gate belenne' da nigá, na' belexebane benne' ca' ca naca da dxusede Jesús.

Da gunná be'e Dios da naca blau

(Mr. 12.28-34)

³⁴ Gate benne' fariseo ca' guleque bé'ene' ba bzua zri Jesús benne' saduceo ca', na' belezrague'. ³⁵ Tu benne' ca', benne' naque' benne' dxuxuzájle'e da nadxiruj bea na, guca lazre' guxúe' ájala nne Jesús. Bchebe' Le':

³⁶ —Benne' wesede, ¿bizrla da gunná be'e Dios naca blau?

³⁷ Bechebe Jesús:

—Dxal-la' zri'inu' Xranu' Dios duté xi-chaj lárzda'u, ne duté bénne'du xu'u, ne duté xel-la' dxéajni' chiu'. ³⁸ Da nigá naca da nadxiruj bea da blaudxa, ne da dxundxa na ba xen. ³⁹ Da nadxiruj bea da gudxupe' nácaqueze na ca', da dxenná na: Bzri'i le sa' ljwezru' ca nazrí'i cuinu'. ⁴⁰ Che tu benne' dxune' ca zaj naca chupa da nadxiruj bea caní, dxune' ca naca xúgute da nadxiruj bea da bzuaaj Moisés, ne ca naca xúgute da bulusede benne' ca' buluchálaje' waláz chee' Dios.

¿Nuzra zri'ine naca Cristo?

(Mr. 12.35-37; Lc. 20.41-44)

⁴¹ Dxácate ne zaj nazraga benne' fariseo ca' na', ⁴² Jesús bchebe' le':

—¿Ájala dxéquele le'e chee' Cristo? ¿Nuzra zri'ine naque'?

Benne' ca' gul'é'e Le':

—Zri'ine David na'.

⁴³ Nadxa guzre Jesús benne' ca':

—¿Ájazra na' David gate bchálaje' chee' Cristo dxé'e Le': Xran? Gate gunná David da nigá bchálaje' da ble'e Be' Lá'azxa le'. Caní naca da na' gunná David:

⁴⁴ Xrana' Dios guzre' Xrana':

“Gudxé'e chalá'a xabêla chia'
cadxa guzúa' zran ni'u benne' ca' quebe
chawe' dxelelé'ene' Lue'.”

⁴⁵ ¿Ájazra naca na naca Cristo zri'ine
David, che David ná'queze dxe'e Lē:
“Xrana”?

⁴⁶ Quebe nu benne' guca xechébe-
queze' chee', na' ze lau zra na' netú
quebedxa nu bexazre bi guchébedxa Lē'.

Jesús dxedil-lē' benne' xudau' ca'

(Mr. 12.38-40; Lc. 11.37-54; 20.45-47)

23 Nadxa Jesús guzre' benne' ca' zaj
zre'e na', ne benne' ca' dxusé-
dene', ² dxenné':

—Benne' ca' dxuluxuzájle'e da nadx-
ixruj bea Moisés, ne benne' xudau'
fariseo ca' zaj nape' xel-la' dxenná bea
xuluxuzájle'e da nadxixruj bea Moisés.
³ Chee le na' le guzúa dizra' chee benne'
caní, ne le gun xúgute da xeenné'.
Quebe gunle ca da dxelún benne' ca',
lawe' da dxelenné' da ca' dxal-la' gunle,
na' quebe dxelúnqueze' na. ⁴ Dxelune'
xua zí'ile'e da quebe dxelezeque xelexúe
bénneache, ne dxelenná bé'ene' bén-
neache chee xelu'e na. Benne' ca' ne
quebe dxuluzúe' na netú zrube ne'e
chee da dxuluzúe benne' xubla. ⁵ Xúgute
da dxelún benne' ca' naca na chee
xelelé'e bénneache. Dxeledánnene' dx-
elu'e luzxgue', ne ne'e ladxe' laga naga
naxúaj dizra' chee Dios, ne dxelácuē' zra
lane' da zeajzé luzre na tunna. ⁶ Dxelaca
lazre' xelebé'e naga ze láweze naga dx-
elawe', ne naga naca blau lu xu'u ca'
naga dxeledube'. ⁷ Dxelaca lazre' xelapa
bénneache le' ba lá'ana la neza ca', ne
xelé'e le': “Benne' wesede.” ⁸ Na'a le'e,
quebe güele lataj nu xē le'e, “Benne'
wesede”, lawe' da xúgutele nácale bi
bíchele tule xetule, ne tuze Benne' dxusé-
dene' le'e, neda', Cristo. ⁹ Quebe nu xe
le'e: Xrae, lu xēzr la xu nigá, lawe' da
zua tuze Xrale, Dios na' zue' xabáa.
¹⁰ Quebe güele lataj nu xē le'e: Xran,

lawe' da zua tuze Xránale, neda', Cristo.
¹¹ Bénnea' dxune' zrin chee xezícadxale
le'e nácadxe' blau ládujla le'e. ¹² Bénnea'
dxucá'ana szren cuine' wexéxrujla bén-
nea', na' bénnea' dxaque' dxexruj lazre'
wegá'ane' szren.

¹³ 'Edxugua le'e, benne' dxusédele da
nadxixruj bea na, ne le'e, benne' fariseo
ca'. Láweze dxunle da xrlátaje. Dxsézx-
ujle neza chee xabáa chee quebe nu
chu'u na. Lé'eequeze quebe dxú'ule, ne
quebe dxuele lataj benne' dxelaca lazre'
xelu'e.

¹⁴ 'Edxugua le'e, benne' dxusédele da
nadxixruj bea na, ne le'e, benne' fariseo
ca'. Láweze dxunle da xrlátaje. Dxejúale
lizre nu'ula ca' ba gulate benne' biu chee',
na' chee xulé'ele xrlátaje cuínale, dx-
uwízrale Dios xcha lu xudau'. chee le na'
da zrente da guzría xi na le'e.

¹⁵ 'Edxugua le'e, benne' dxusédele da
nadxixruj bea na, ne le'e, benne' fariseo
ca'. Láweze dxunle da xrlátaje. Le'e
dxedale du ca naca xēzr la xu nigá ne ca
naca nísadau' chee si' tu benne' ca naca
da zéajlele chee Dios, na' gate bache dx-
unle na, na' dxugápadxale bénnea' dul-la
ca da nabágale le'e chee cuía xi'e lu lataj
ba xa'.

¹⁶ 'Edxugua le'e. La chul-la nácale, ne
dxaca lázrele cu'ule benne' neza. Dxen-
nale che tu benne' dxuzétaje' xudau',
quebe dxun na le' ba xen, na' che dx-
uzétaje' oro chee xudau', da na' dxun na
le' ba xen. ¹⁷ Nácale benne' xala, ne la
chul-la. ¿Nula da naca na blaudxa, oro,
che xudau' na' da dxucá'ana na lá'azxa
oro na'? ¹⁸ Cá'anqueze dxennale le'e che
nu dxuzetaj cugu lá'azxa, quebe dxun na
le' ba xen, san che dxuzétaje' guna' da
zria na lawe' cugu lá'azxa, da na' dxun
na le' ba xen. ¹⁹ Nácale benne' xala ne
la chul-la. ¿Nula da naca na blaudxa,
guna' na', u cugu lá'azxa na' da dxucá'ana
na lá'azxa guna' na'? ²⁰ Che nu benne'
dxuzétaje' cugu lá'azxa, quegaze cugu

lá'azxa dxuzétaję', san cá'anqueze dxuzétaję' ca naca da zria lawe na. ²¹ Bénnea' dxuzétaję' xudau', quegaze xudau' na' dxuzétaję'. Cá'anqueze dxuzétaję' Dios zue' lataj na'. ²² Cá'anqueze benne' dxuzétaję' xabáa, dxuzétaję' lataj naga zria Dios, ne Diósqueze, Bénnea' zrie' lataj na' dxuzétaję'.

²³ 'Edxugua le'e, benne' dxusédele da nadxixruj bea na, ne le'e, benne' fariseo ca'. Láweze dxunle da xrlátaje. Dxunézrujle cheę xudau' tu cue' cheę da chi cue' cheę xixruj weaj, ne cheę bínneđu ca' cheę anís, ne cheę cumín. Quebe dxunle da zaj naca na blaudxa da zaj zua na lu da nadxixruj bea na, ca naca cheę gácale xrlátaje, ne cheę xexache lázrele le sa' ljwézrele, ne cheę chéajlele cheę Dios. Da caní zaj naca na da dxun na ba xen gunle, ne quebe gusanle da ca' ba dxunle. ²⁴ La chul-la nácale, ne dxaca lázrele cu'ule benne' neza. Dxecá'ale da naca ca tu bé'adau', bę zrua lawe' da dxí'ajle, na' quebe dxequę be'ele dxí'ajle da naca ca tu camello, bę dxelaga benneache.

²⁵ 'Edxugua le'e, benne' dxusédele da nadxixruj bea na, ne le'e, benne' fariseo ca'. Láweze dxunle da xrlátaje. Nácale ca zaj naca zriga', ne xé'ena da dxíbele cúzreze na. Lu'ule na quebe dxíbele. Caní nácale lawe' da lu lázrdaule nácale ca gubán, ne benne' dxucude. ²⁶ Benne' fariseo la chul-la. Nedxu le quibe lu'ule zriga', ne xé'ena, na' cá'anqueze xegá'ana chawe' cúzrela.

²⁷ 'Edxugua le'e, benne' dxusédele da nadxixruj bea na, ne le'e, benne' fariseo ca'. Láweze dxunle da xrlátaje. Nácale ca tu ba chiche da nalá na xrtantę cúzrela, na' lu'ule na nazratę na zrita cheę benne' gate', ne xúgutę da sgute. ²⁸ Ca'an nácale le'e. Cúzrela nala'le ca benne' xlátaję, na' lu lázrdaule nazratę na da wen lazre', ne da calela da dxunle.

²⁹ 'Edxugua le'e, benne' dxusédele da nadxixruj bea na, ne le'e, benne' fariseo ca'. Láweze dxunle da xrlátaje. Dxecá'ale cháwedau' ba ca' naga zaj naga che benne' ca' buluchálaję' waláz cheę Dios, ne dxuele lechítaję lu'a cheę benne' xrlátaje ca'. ³⁰ Dxennale: "Chela netu' ba zúantu' gate na' gulezrá' xra xrtantu' ca', quebe gúcalentu' benne' ca' belutię' benne' ca' buluchálaję' waláz cheę Dios." ³¹ Gate dxennale ca', le'e dxexúnbeaquezle nácale zri'ine zre sua benne' ca' belutię' benne' ca' buluchálaję' waláz cheę Dios. ³² Dxusexúzrele dxunle ca da gulezú lau belún xra xrtáule ca'.

³³ 'Bę snia nácale, ne xrtia bę snia. ĆÁjazra gunle cheę gáchele lu da zi' da xa' cheę lataj ba xa'? ³⁴ Cheę lę na' neda' sel-la' cheęle benne' ca' xuluchálaję' waláz cheę Dios, ne benne' sina ca', ne benne' ca' xulusédenę' le'e. Lé'equę gútele, ne gudá'le xaga bęguaj bal-la benne' ca', na' xebal-lę' gunle lę' zi' lu xudau' ca', na' gau zi' xúzrele lę' tu xęzre xetú xęzre. ³⁵ Ca'an gaca, le'e bágale zria cheę xel-la' gute cheę xúgutę benne' xrlátaje ca' belute xra xrtáule ca', gate guzú lau na nu bęte Abel, benne' xrlátaje, ne naga bzrintę bętele Zacarías ládujla naga zua lataj lá'azxa cheę xudau' ne lataj naga dxuluzezxe' bę xíxre'đu ca', bę dxelegú'ę lu cugu cheę Dios. ³⁶ Da li dxapa' le'e, bénneache zaj zre'ę na'a xelegue' zria cheę xúgutę da caní.

Jesús dxebezre' cheę xęzre Jerusalén

(Lc. 13.34-35)

³⁷ Nadxa gunná Jesús:

—Jerusalén, Jerusalén, le'e na' dxútele benne' ca' dxuluchálaję' waláz cheę Dios, ne dxuzríale xiaj benne' gubáz ca' dxesel-la Dios naga zúale. Zane' lásatę guca lazra' gutupa' zrí'inele chia' ca dxun bedxuj, dxutúpaba' be dxé'enedau' zran xrílaba', san quebe guca lázrele. ³⁸ Le nna'xque na'a, lízrele xelegá'ana

na dácheze, ³⁹lawe' da dxapa' le'e, québedxa lé'ele neda' cadxa zrin zra nnale: La'azxa naca bénnea' zé'e waláz chee Xránadxu.

Jesús dxenné' wabía xi' xudau'

(Mr. 13.1-2; Lc. 21.5-6)

24 Nadxa bedxúaj Jesús xudau', na' dxácate dxexedxúaje' na', gulebiga benne' ca' dxusédene' lau Jesús, ne gulezú lawe' dxuluchálajlene' Le' ca naca chee xudau' na'. ²Bechebe Jesús:

—¿Dxel'éle xúgute da caní? Da li dxapa' le'e, netú xiaj caní quebe xegá'ana zeajzría cuzru ljwezre na. Ca naca na cuía xi na.

Ca naca da xelunna bea na ba za zra bzebe

(Mr. 13.3-23; Lc. 21.7-24; 17.22-24)

³Nadxa xjaque' lu xi'a naga zaj zé xaga olivo, na' gate dxe' Jesús na', benne' ca' dxusédene' belezrine' lau Le', ne bagácheze buluchebe' Le':

—Gunná netu'. ¿Bata gaca da na'? ¿Bi gunna bea na gate zrin zra xela'u, ne gate cheajsé chee xezr la xu nigá?

⁴Nadxa Jesús guzre' benne' ca':

—Le guxúe cuínale chee quebe nu si xé le'e. ⁵Benne' zan xeledé'e. Xelún lazre' xelenné' zaj naque' Cristo, na' xelezí xé'e benne' zan. ⁶Wenle le'e dxaca wedil-la, ne waca wedil-la gáteteze na'. Quebe zr'ébele, lawe' da dxal-la' xelaca da caní. Da caní quebe zaj naca na chee zra bzebe. ⁷Tu cue' xezr la xu tíl-lalé na xetú cue' xezr la xu, ne tu xezre tíl-lalé na xetú xezre. Wata' gubina', ne welata' xízrawe' ca', ne wazrú' gáteteze na'. ⁸Xúgute da caní zaj naca na naga dxezú lau ca da xelezaca bénneache.

⁹Nadxa xuludé'e le'e naga si sácale, na' bál-lale welútequeze'. Ca naca bénneache xeledéne' le'e lawe' da dxunle da naca chia'. ¹⁰Lu zra na' benne' zan québedxa xeléajle'e chia', na' xe-

ledéne' le sa' ljwezre', ne xuludé'e le sa' ljwezre' lu na' benne' guledábage' le'.

¹¹Weledá' benne' zan benne' wen lazre'. Xelenné' dxuluchálaje' waláz chee Dios, na' xelezí xé'e benne' zante'. ¹²Lawe' da gáta'le'e da caléla, benne' zan québedxa xelezrí'ine' le sa' ljwezre'. ¹³Bénnea' zua chache' ca zrinte' zra bzebe, la bénnea'. ¹⁴Ca naca dizra' chawe' nigá ca nna bea Dios, zralaj na du gab'íi xezr la xu chee xelén ca naca benne' chee xúgute cue' xezr la xu, na' te na' cheajsé chee xezr la xu nigá.

¹⁵'Benne' gulabe' da nigá dxal-la' chéajni'ine'. Daniel, benne' bchálaje' waláz chee Dios, bzuaje' ca naca chee tu da dxezrá'a Dios, da dxuxrinnaj na. Gate lé'ele da nigá zua na lataj lá'azxa chee xudau', ¹⁶nadxa benne' zaj zre'e xezre ca' zaj nababa Judea dxal-la' xuluzrúnnuje', ne chjaque' lu xi'a zren. ¹⁷Che tu benne' zé' chju'u chee', quebe dxal-la' xexétaje' bi cheajxeléaje' lu xu'u. Dخال-la' guzrúnnujje'. ¹⁸Benne' zue' le'e xixre' quebe dxal-la' xezrine' lizre' cheajxezri'e xicha chee' da gácu'e'. ¹⁹Edxugúa nu'ula ca' zaj zre'e lu zra na' zaj zue' zi'i, ne nu'ula ca' zaj nu'e bidau', ne dxelázrebe'. ²⁰Le naba Dios quebe gun na ba xen guzrúnnujle beu' zaga, ne quegá lu zra dxupá'anale, ²¹lawe' da che ca' gaca na, na' da zrén-tédxa da xelezí saca bénneache ca da quebe ne xelezaque' ca guzú laute zua xezr la xu nigá, ne québedxa bi xelezaque' caní ca te chee da nigá. ²²Che Dios quebe guzáchie' zra ca', na' netú quebe nu la. Guzáchie' na chee gácalene' benne' ca' bache nabéaje' chee'.

²³Chee le na', quebe chéajlele che nu xé le'e: "Le nna'xque, nigá zua Cristo", u che nu xé le'e: "Le nna' xque, na'la zue'." ²⁴Caní dxapa' le'e lawe' da xeledá' benne' zan, benne' guzrí xé'e, na' xelenné' zaj naque' Cristo, u zaj naque' benne' dxuluchálaje' waláz chee Dios, na' da zrente xululéne', ne xelune'

xel-la' waca zren ca' chee xelexí xē'e benne' ca' ba nabéaj Dios. Caní xelune' che xelexéque'ne'. ²⁵ Ba bchálajlena' le'e caníqueze na'a quebe ne gaca na. ²⁶ Chee le na', che nu xē le'e: "Le nna'xque, na' zue' le'e xixre'", quebe chéajle na', u che nu xē le'e: "Le nna'xque, lu xu'u nigá zue'", quebe chéajlele. ²⁷ Ca dxun tu xesa guziu', dxepé na naga dxalaj gubizra, na' dxelé'edxu na naga dxebía gubizra, ca'an gaca gate xida' neda', Benne' Gulje' Bénneache. ²⁸ Gáteteze de tu da nate, na' dx-elexezraga laba ca'.

**Ca da gaca gate ba zua xelá'
Benne' Gulje' Bénneache**

(Mr. 13.24-37; Lc. 21.25-33;
17.26-30, 34-36)

²⁹ Na' gunná Jesús:

—Gate bache guca zra na' gate xelezaca zi' bénneache, nadxa gubizra chul-la na naga zua na, na' beu' quebe gusení na, na' belaj xelexruj na, na' xelexrízequeze ca naca da zaj naca na szren da dxeledá' lu be'. ³⁰ Nadxa lé'ele zran xabáa da gulé'e na ba zua xelá'a neda', Benne' Gulje' Bénneache, na' ca naca bénneache zaj zre'e xezr la xu xelexé'zrequeze'. Nadxa xelexé'ene' neda', Benne' Gulje' Bénneache, zezá'a lu beuj zran xabáa, zúale neda' dute xel-la' dxenná bea, ne da xabáa. ³¹ Nadxa sél-laqueza' gubáz chee xabáa chia' ca', na' xulucúezre' zizraj lúzuba' chee xuluxutu-pe' benne' ca' ba nabéaja' chia' dapa saca chee xezr la xu nigá, ne du ca naca xezr la xu nigá.

³² 'Le gusede ca naca da dxulé'e xaga higo. Gate dxelexedxe'ene zruze na, ne dxezría na laga' dxé'ene, ba nézele ba za xaca beu' la. ³³ Cá'anqueze gate lé'ele dxelaca xúgute da caní, dxal-la' nézele gágute ba zua cheajsé chee xezr la xu, ne ba zua gaca na. ³⁴ Da li dxapa' le'e, xúgute da caní xelaca na nédxula gate quebe ne xelate bénneache zaj zre'e lu

zra na'. ³⁵ Xabáa ne xezr la xu weledé chee na. Dizra' chia' quebe te chee na.

³⁶ 'Gate za zra na', ne bila zra na', quebe nu neze, quegá gubáz chee xabáa zaj zre'e xabáa, ne neda', Zri'ine Dios. Tuze Xradxu Dios nézene' gate zrin zra na'.

³⁷ 'Ca guca lu zra ca' gate zua Noé, cá'anqueze gaca na gate xelá'a neda', Benne' Gulje' Bénneache. ³⁸ Ca lu zra ca' gate quebe ne gun Dios nisa xiuj da guzría xi na bénneache, gulezrá' bénneache ca' dxelé'aj dxelawe', ne dxuluchaga ne'e, ne dxulunézruje' zri'ine' ca' chee xuluchaga na'be', cadxa bzrin zra guxú'u Noé lu da zren na' dxedá lawe' nísadau' da nazí le na arca. ³⁹ Quebe guleque bé'ene' ca da dxal-la' gaca na, cadxa bzrin zra guca xiuj na', ne be'te na ca naca benne' ca'. Cá'anqueze gaca gate xelá'a neda', Benne' Gulje' Bénneache. ⁴⁰ Ca lu zra ca' xelexrá' chupa benne' biu le'e xixre'. Tue' xeché'e, na' xetúe' xegá'ane'. ⁴¹ Xelexrá' chupa nu'ula dx-elútue'. Tue' xeché'e, na' xetúe' xegá'ane'. ⁴² 'Le sua le'e ban lazre' lawe' da quebe nézele bi zra xelá'a neda', Xránale. ⁴³ Da nigá dxal-la' nézele: Che tu xrane xu'u nézene' bi zra chizrela zrin gubán, waxíchaje' bchigala, ne quebe gu'e lataj xusalaj benne' gubán lizre' chee cuane'. ⁴⁴ Chee le na', le sua le'e ban lazre' lawe' da xelá'a neda', Benne' Gulje' Bénneache, gate québela dxé'quele ca'.

**Benne' wen zrin li lazre', ne benne'
wen zrin quebe naque' li lazre'**

(Lc. 12.41-48)

⁴⁵ Na' gunná Jesús:

—¿Nuzra na' benne' wen zrin li lazre' ne dxéajni'ine', bénnea' xrane' dx-ucá'analene' le' benne' zaj zre'e lizre' chee gunézruje' da xelawe' gate zrin zra chee na? ⁴⁶ Ba neza naca na chee benne' wen zrin na', gate xezrín xrane', lé'ene' le' dx-une' ca naca da nabague'. ⁴⁷ Da li dxapa'

le'e, xrane' gucá'analene' le' ca naca da nape'. ⁴⁸Che benne' wen zrin na' gaque' benne' wen da calēla, ne guéquene' quebe xelá' ze xrane', ⁴⁹ne che su lawe' gusaca zi'e xezícala benne' wen zrin ca', ne xi'aj gágulene' benne' dxelezuzre', ⁵⁰nadxa xrane' xezrine' zra gate québela dxebeze'. Gaca na zra quebe nézene', ⁵¹na' gusaca zí'le'e le'. Chugue' chee' gaque' tuze benne' ca' dxelune' láweze da xrlátaje. Cuezre', ne xáguxa'ate lazxe'.

Da dxulé'e na ca naca chee chi nu'ula cuide'

25 Gunná Jesús: —Ca gaca chee benne' xelu'e naga dxenná bea Dios xabáa naca na ca da guca chee chi nu'ula cuide' caní. Gulequ'é xi' chee' ca', chee chjaque' laní chee wechaga na', dxelebeze' bátala xelá' benne' wechaga na'. ²Gazxu' nu'ula caní gulaque' gat lazre', na' xegazxu' nu'ula caní zaj naque' ban lazre'. ³Nu'ula ca' quebe zaj naque' ban lazre' belú'e xi' chee' ca', san quebe belú'e da za zzezxe na da xelegué'e lu xi' chee' ca'. ⁴Nu'ula ban lazre' ca' belú'e xi' chee' ca', ne da za zzezxe na da xelegué'e na. ⁵Lawe' da guzré benne' wechaga na', na' gulaca wase ca zaj naque', na' xúgute' gulasie'. ⁶Dxēla ben tu chí'i benne' dxebezre xē'e, dxenné': "Ba za' wechaga na'. Le dxuaj si' lu na'le le'." ⁷Xúgute' nu'ula cuide' caní gulase', na' gulezú lawe' bulugale' xi' chee' ca'. ⁸Nadxa gazxu' nu'ula ca' quebe zaj naque' ban lazre' gulé'e gazxu' nu'ula ban lazre' ca': "Le gunna late' da za zzezxe na cheentu', lawe' da ba dxelaxula xi' cheentu'." ⁹Nu'ula ban lazre' ca' belexechebe': "Quebe gaca, lawe' da che gúnnantu' late' chee'e, quebe gaca na da dxechínnentu' netu', ne da dxechínnele le'e. Le chjácala naga dxuti'e na, ne le cheajxri' chee'e." ¹⁰Dxá-cate zjaca nu'ula ca' quebe zaj naque' ban lazre', na' bezrín wechaga na'. Nu'ula

ban lazre' ca' gulu'e nen le' lu laní chee wechaga na', na' bsezxuj dxa xu'u na'. ¹¹Gudé na' belexezrín xegazxu' nu'ula ca', na' gulenné': "Xran, Xran, gusalaj chú'untu'." ¹²Le' bechebe': "Cabata'. Da líqueze quebe núnbe'a le'e."

¹³Nadxa Jesús guzre' benne' ca':

—Le sua le'e ban lazre', lawe' da quebe nézele bi zra, u bi xel-la' xelá'a neda', Benne' Gulje' Bénneache.

Da dxulé'e na ca naca chee benne' gulezí'e dumí

¹⁴Na' gunná Jesús:

—Ca gaca chee benne' xelu'e naga dxenná bea Dios xabáa, naca na ca da guca gate tu benne' zue' chee se'e chéaje' zitu', na' gunné' bi wen zrin chee' ca', ne bcá'analene' bi wen zrin ca' dumí chee'.

¹⁵Tu bi ca' bnéruzje' gazxu' cue' dumí, na' xetube' bnéruzje' chupa cue' dumí, na' xetube' bnéruzje' tu cue' dumí. Bnéruzje' chee tu tube' ca da xelezéquebe' xuluchínebe' na. Nadxa guz'é'e zéaje' zitu'. ¹⁶Bi wen zrin na' guzi'be' gazxu' cue' dumí bchínebe' dumí na', na' bezi'be' xegazxu' cue' dumí. ¹⁷Cá'anqueze bi wen zrin na' guzi'be' chupa cue' dumí, bezi'be' xechupa cue' dumí. ¹⁸Bi wen zrin na' guzi'be' tu cue' dumí na' guxíajbe', ne bcáchebe' dumí chee xránabe' tu lu xēdxu da benbe' lu xu.

¹⁹Zane' iza ba guca gate bezrín xrane bi wen zrin ca', na' guzú lawe' dxezi'e da bde'e lu na' bi wen zrin ca'. ²⁰Nedxu bzrin bi wen zrin na' guzi'be' gazxu' cue' dumí, na' bnéruzje' xránabe' xegazxu' cue' dumí, na' gúzrebe' le': "Xran, bennu' neda' gazxu' cue' dumí. Nigá de' xegazxu' cue' da bezi'a nen dumí chiu'." ²¹Na' xránabe' guzre' lebe': "Da chawe' benu'. Nacu' tu bi wen zrin xrlátaje, ne li lazre'. Gucu' li lazre' lu late' da benna' lue', na' gúnnaqueza' lue' da zréndxaqueze. Guxú'u naga zua' neda', ne gubélé'e." ²²Gudé na' bzrin bi wen

zrin na' guzi'be' chupa cue' dumí, na' gunabe': "Xran, bennu' neda' chupa cue' dumí. Nigá de xechupa cue' da bezi'a nen dumí chiu'." ²³ Na' xránabe' guzre' lebe': "Da chawe' benu'. Nacu' tu bi wen zrin xrlátaje, ne li lazre'. Gucu' li lazre' lu late' da benna' lue', na' gúnnaqueza' lue' da zrédxaqueze. Guxú'u naga zua' neda', ne gubéle'e." ²⁴ Gate bzrin bi wen zrin na' guzi'be' tu cue' dumí, na' gúzrebe' xránabe': "Xran, nezda' nacu' benne' dxenné xue, ne dxezi'u da quebe guzu', ne dxexeca'u da quebe besiu'. ²⁵ Chee le na' bzreba', na' guxá'a xea-jcáchia' dumí chiu' lu xu. Nigá de da naca chiu'." ²⁶ Na' xránabe' guzre' lebe': "Nacu' bi wen zrin calela, ne zrawede. Ba nézqueznu' dxezi'a da quebe guza', ne dxexecá'a da quebe besia'. ²⁷ Chee le na' la xju'u dumí chia' na' lu na' benne' dx-elízruje' chee dumí da dxuluchínene', na' gate za' neda', na' xezi'a da naca chia' nen da belezí'e." ²⁸ Nadxa guzre' benne' ca' zaj zre'e na': "Le xecá'a dumí na' da núxrube', ne le gunezruj na bénnea' nape' chi cue' dumí. ²⁹ Benne' nape' wazidxe' da zrendxa, na' benne' quebe nape', ca late' da du na' nape' wecá'a na. ³⁰ Ca naca bi wen zrin nigá, bi wedegún, le xebéaj-be' chalé'ajla naga naca chul-la, naga cuézrebe', ne xáguxa'ate' lázxabe'."

Ca gun Dios gate guchi'e chee bénneache zaj zre'e xezr la xu

³¹ Na' gunná Jesús:

—Gate xelá'a neda', Benne' Gulje' Bénneache, ne Benne' Wenná Bea, nen ca naca gubáz chee xabáa chia', na' cué'queza' lataj naga nna be'a, da naca na da xabáa. ³² Na' bénneache chee xúgute cue' xezr la xu xelexezrague' lawa' neda', na' xebéaja' cha chee' ca dxun benne' dxuxú'e' zrila'. xebéaje' chíbudu ca' ládujla zrila' ca'. ³³ Guzrá'a benne' ca' zaj naca zrila' chia' chalá'a xabéla chia', na' benne' ca' zaj naca ca chíbudu ca' guzrá'a

le' chalá'a xéglala chia'. ³⁴ Nadxa xapa' benne' ca' zaj zra' chalá'a xabéla chia': "Le da le'e, nácale xrlátaje lau Xra'. Le chu'u naga dxenná bea Xra', lataj na' bcueze' cheele gate na' bene' xezr la xu nigá. ³⁵ Caní dxaca lawe' da guduna', na' bgágule neda'. Gubíleda', na' bennale da gu'a. Gudá' ca tu benne' xu'e neza, na' gulu'ule neda' lízrele. ³⁶ Bxázzrjeda' zra lana' gácu'a, na' bgácule neda'. Quebe chawe' guzúa', na' bedajnábele neda'. Guxu'a lizre xia, na' bedajnábele neda'." ³⁷ Nadxa benne' xrlátaje caní xelenné': "Xran, ¿bata blé'entu' Lue' dxe-dunu', na' bgáguntu' Lue'? ¿Bata blé'entu' Lue' dxebilenu', na' bennantu' da gu'u? ³⁸ ¿Bata blé'entu' Lue' ca tu benne' xu'e neza, na' gulu'untu' Lue' lízrentu'? ¿Bata blé'entu' Lue' dxexázzrjenu' zra lanu', na' bgácuntu' Lue'? ³⁹ ¿Bata bémentu' quebe chawe' zu', u xu'u lizre xia, na' bedajnábant'u' Lue'?" ⁴⁰ Neda' xechéba': Da li dxapa' le'e, ca da benle chee bennedu caní, benne' zaj naca dxexruj lazre', chee néda'queza' benle ca'.

⁴¹ Nadxa neda', Benne' Wenná Bea, xapa' benne' ca' zaj zra' chalá'a xéglala chia': Le cuasa cuita' neda', le'e, nácale wen da calela lau Xra'. Le chjaca lu xi' chee lataj ba xa' da nabeza na chee da xriwe', ne chee gubáz chee na ca'. ⁴² Caní dxaca lawe' da guduna', na' le'e quebe bennale da gawa'. Gubíleda', na' quebe bennale da xí'aja'. ⁴³ Gudá' ca tu benne' xu'e neza, na' quebe gulu'ule neda' lízrele. Bxázzrjeda' zra lana' gacua', na' quebe bgácule neda'. Quebe chawe' guzúa' ne guxu'a lizre xia, na' quebe bedajnábele neda'. ⁴⁴ Nadxa benne' ca' xelé'queze' neda': "Xran, ¿bata blé'entu' Lue' dxedunu', u dxebilenu', u xu'u neza, u dxexázzrjenu' zra lanu', u quebe chawe' zu', u xu'u lizre xia, na' quebe gúcalentu' Lue'?" ⁴⁵ Neda', benne' wenná bea, xechéba': Da li dxapa' le'e, lawe' da quebe bi benle chee bennedu caní,

benne' zaj naca dxexruj lazre', quebe bi benle chee neda'queza'. ⁴⁶Benne' caní chjácaqueze' lataj ba xa', na' benne' xrlátaje ca' chjaque' lu xel-la' nabán da zeajlí canna.

Dxelíajə' ájala xelele' Jesús

(Mr. 14.1-2; Lc. 22.1-2; Jn. 11.45-53)

26 Gate bexuzre bchalaj Jesús caní, na' guzre' benne' ca' dxusédene':

²—Ca ba nézquezele, xechupa zraze na'a súadxu Laní Pascua, da naca na zra dxuluxucube benne' judío ca guca gate Dios bebéajə' bənneache chee' lu xezr la xu Egipto, na' neda', Benne' Gulje' Bənneache, xuludée' neda' lu na' benne' xuludé'e neda' xaga béguaj.

³Ca lu zra na' benne' xíchajə' ca' chee bxruze ca', ne benne' dxuluxuzájle'e da bdxixruj Moisés, ne benne' gula sina ca' chee judío ca', belezrague' chale'aj chee xu'u zaca chee Caifás, bxruze blau. ⁴Na' belíajə' ájala xelele' Jesús lu da wen lazre' chee xelútiə' Le'. ⁵Gulenné':

—Quebe gundxu na lu zra laní nigá, chee quebe xeledábaga benne' ca' dxi'u.

Tu nu'ula dxegu'e Jesús da dxelá zixre

(Mr. 14.3-9; Jn. 12.1-8)

⁶Zua Jesús xezre Betania lizre Simón, bənnea' güé'ene' we' guzru'. ⁷Bzrin tu nu'ula naga zua Jesús, nu'e tu zruágadau' da naca na xiaj alabastro, ne nazrate na da dxelá zixre da zácalə'e na. Gate na' dxe' Jesús ga dxelawé', na' nu'ula nigá gulu'e na xichaj Jesús. ⁸Gate belelé'e benne' ca' dxuséde Jesús da nigá, na' belezré'e, ne gulezú lawe' dxelenné':

—¿Bizr chee na' guzría xi' da nigá?

⁹Da nigá waca la gudá'u na sí'adxu da zrente, chee gácalədxu benne' xache' ca'.

¹⁰Jesús benne' da nigá, na' guzre' benne' ca':

—¿Bizr chee na' dxunle nu'ula nigá zede? Da nigá bene' naca na tu da xrlátaje. ¹¹Benne' xache' ca' tu zrázqueze'

ládujla le'e, na' neda' quegá tu súaleza' le'e. ¹²Ca naca da ben nu'ula nigá, gulu'e da zixre na' bel-la' dxen chia', naca na da xucá'ana chawe na neda' chee zra gachia' lu xədxu ba. ¹³Da li dxapa' le'e, gáteteze xuluchálajə' dizra' chawe' chia' nigá du gabí'i xezr la xu, na' zrlájqueze ca da ben nu'ula nigá, chee cheajlesá lazre' bənneache le'.

Judas dxexəbe lazre' gudé'e Jesús

(Mr. 14.10-11; Lc. 22.3-6)

¹⁴Nadxa tu benne' chazrinu ca' dxuséde Jesús, bənnea' le' Judas Iscariote, guxíajə' xeajchálajle' benne' xíchajə' ca' chee bxruze ca'. ¹⁵Guzre' le':

—¿Ájate gúnnale neda' che ca' gudé'a Jesús lu na'le?

Nadxa benne' ca' gulízrujə' le' chi dxua dumí plata. ¹⁶Ca lu zra na' guzú lau Judas dxexíajə' ájala gunə' gudé'e Jesús lu na' benne' ca'.

Da dxágudxu chee xucúbedxu ca guca gate gute Xránadxu

(Mr. 14.12-25; Lc. 22.7-23; Jn. 13.21-30; 1 Co. 11.23-26)

¹⁷Zra nedxu chee laní na' gate na' dxelawə' xeta xtila da quebe nachixre cua zichaj chee na, benne' ca' dxuséde Jesús belezrine' lau Le', na' buluchebe' Le':

—¿Gazra dxaca lazru' gucuézentu' da gágudxu chee laní pascua chee benne' judío?

¹⁸Jesús guzre' le':

—Le chjaca lu xezre na', naga zua lizre tu benne', na' le xə'e: "Bənnea' dxusédene' dxi'u dxenné': Zra chia' gattia' ba zua gágute, na' lizru' lue' gawa' chee Laní Pascua tu zren nen benne' ca' dxusédeda'."

¹⁹Benne' ca' dxuséde Jesús belunə' ca da gunná bé'ene' le', na' bulucueze' da xelawə' chee Laní Pascua.

²⁰Gate gula chizrela, na' gudxé' Jesús ga gawə' tu zren nen benne' ca' dxusé-

denē'. ²¹ Dxácate na' dxelawē', guzre Jesús benne' ca':

—Da li dxapa' le'e, tule le'e naca bénnea' gudéē' neda' lu na' benne' ca' dxelunē' da calēla.

²² Nadxa benne' ca' belexewí'ineleē', na' gulezú lawē' tu tuē' dxuluchebe' Jesús:

—Xran, ¿quebe naca neda'?

²³ Na' bechebe Jesús:

—Bénnea' dxudé neē' lu xé'ena tu zren nen neda', benne' na' gudéē' neda'.

²⁴ Neda', Benne' Gulje' Bénneache, waxá'a naga dxal-la' gatia' ca' naxúaj na lu xiche cheē Dios, san edxugúa bénnea' gudéē' neda'. Cháwedxa naca la quebe gulaj bénnea'.

²⁵ Nadxa gunná Judas, bénnea' gudéē' Jesús, dxenné':

—Benne' dxusēde, ¿quebe naca neda'? Na' bechebe Jesús, gunné':

—Awe', lue' na'.

²⁶ Dxácate dxelawē', Jesús guquē'ē xeta xtila, na' guzre' Dios: "Xcalenu'." Gudé na' bzúzruje' na, na' bnézruje' na benne' ca' dxusédene', dxenné':

—Le gagu. Da nigá naca na bel-la' dxen chia'.

²⁷ Gudé na' guquē'ē tu zriga', na' guzre' Dios: "Xcalenu'", na' bnézruje' na benne' ca', dxenné':

—Le xi'aj xúgutele da xuzru lu zriga' nigá. ²⁸ Da nigá naca na dxen chia' da guzúa chacha na xel-la' wezría cube da dxun Dios. Dxen nigá lalaj na ne cheē benne' zante cheē gunite lau Dios dulla zaj nabaga benne' ca'. ²⁹ Dxapa' le'e, québedxa xí'aja' ca' naca xrise uva nigá ca' zrindxa zra xí'aja' da cube tu zren nen le'e naga dxenná bea Xra'.

Jesús dxenné' nna Pedro quebe núnbe'e Le'

(Mr. 14.26-31; Lc.

22.31-34; Jn. 13.36-38)

³⁰ Ca' gudé belul-le' cheē Dios, na' gusiá'que' zjaque' lu Xi'a Xaga Olivo Ca'.

³¹ Nadxa Jesús guzre' benne' ca':

—Xúgutele le'e gusán lázrele neda' na'a zre', lawe' da naxúaj na lu xiche cheē Dios, dxenné': "Gutia' benne' dxuxúē' zrila', na' zrila' ca' xelase dín-najba'." ³² Gate te xebana' neda', cha'a neda' ga nababa Galilea nédxudxa ca' le'e.

³³ Nadxa bechebe Pedro:

—Lácala xúgute benne' caní xulusán lazre' Lue', quebe guna' neda' ca'.

³⁴ Nadxa Jesús guzre' le':

—Da li dxapa' lue', lu zre' na'a zre' nédxudxa gate cuezre xjeaj, lue' wannáu' chunna lasa quebe núnbe'u neda'.

³⁵ Pedro guzre' Jesús:

—Lácala gatia' neda' tu zren nen Lue', québequeze nnia' quebe núnbe'a Lue'.

Cá'anqueze gulenná xúgute benne' ca' dxusēde Jesús.

Jesús dxuchálajlene' Dios naga zaj zxe' xaga olivo ca' nazí le na Getsemaní

(Mr. 14.32-42; Lc. 22.39-46)

³⁶ Nadxa bzin Jesús nen benne' ca' dxusédene' tu lataj nazí le na Getsemaní, na' guzre' le':

—Le cue'e nigá dxácate cha'a neda', guchálajlena' Dios.

³⁷ Jesús guché' Pedro, ne dxúpatē zri'ine Zebedeo, na' guzú lawē' bewí'inele'ēne' ne guzúale'ē stēbe.

³⁸ Nadxa guzre' benne' ca':

—Dxewí'ine lázrele'a dxunte na gute na neda'. Le xegá'ana le'e nigá, ne le sua ban lazre' tu zren nen neda'.

³⁹Nadxa Jesús guzé'e zéaje' xelate' caníladxa, na' gute' sudxú'ala lu xu, ne bchálajlene' Dios, dxenné':

—Xrae, chela gaca, bde na chalá'ala quebe gaca chia' ca naca xel-la' gute caní da naca na ca tu da sla' da xí'aja'. Quebe gaca na ca dxaca lazra' neda'. Gaca na ca dxaca lazru' Lue'.

⁴⁰Nadxa bezrín Jesús naga zaj zra' benne' ca' dxusédené', na' blé'ene' benne' ca' dxelásie', na' guzre' Pedro:

—¿Quebe gúcale le'e quíchale bchigala nen neda' tu chí'dau'ze? ⁴¹Le nnaze, ne le guchálajle Dios chee quebe gun zréaje da xriwe' le'e. Da li bénne'du xu'ule dxaca lázre'le'e na, san lu bela' dxen cheele dxate ni'a na'le.

⁴²Da gudxupe' lasa guxíaj Jesús bchálajlene' Dios caní:

—Xrae, che quebe gaca te chalá'ala ca naca da dxal-la' saca', gaca na ca dxaca lazru' Lue'.

⁴³Ca gudé na' bezrine', ne belé'ene' benne' ca' dxusédené', dxelásie' lawe' da ba dxelezrude' lawe' dxelaca wásele'e. ⁴⁴Bca'ane' benne' ca', guzé'e zéaje' bchálajlene' Dios da guxunne' lasa, na' gunnáqueze' ca da ba gunné' ca'an bache. ⁴⁵Nadxa bezrine' naga zaj zra' benne' ca' dxusédené', na' guzre' le':

—Le gase na'a, ne le xezi' lazre'. Ba bzin zra gate neda', Benne' Gulje' Bénneache, tea' lu na' benne' dul-la ca'. ⁴⁶Le chasa, ne le chu'u. Ba za bénnea' dxudé' neda'.

Dxelech'é Jesús ca tu benne' wen da zrinnaj

(Mr. 14.43-50; Lc. 22.47-53; Jn. 18.2-11)

⁴⁷Ne dxuchálajte Jesús na' gate bzin Judas. Naque' tu benne' chazrinna ca', na' zá'acale benne' zante le', benne' zaj nu'e xia ca' ne xaga ca'. Benne' caní zaj naque' benne' gulesel-la benne' xíchaje ca' chee bxruze ca', ne benne' gula sina ca' chee judío ca'. ⁴⁸Judas, bénnea' dx-

udé' Jesús, ba blé'ene' benne' ca' ca tu da guné' da gul'é na nu na' naca Jesús. Gunné':

—Bénnea' gunupa' neda', Le' na'. Le che'e ca tu benne' wen da zrinnaj.

⁴⁹Nadxa bzin Judas lau Jesús, dxenné':

—Diuzre, Benne' dxusede.

Na' bnupe' Jesús.

⁵⁰Bechebe Jesús:

—Ljwezra', ¿bi chee za'u?

Nadxa gulebiga benne' ca', gulele' Jesús, na' beleché'e Le' ca tu benne' wen da zrinnaj.

⁵¹Tu benne' ca' dxusede Jesús guléaje' xia chee', ne guchugue' chalá'a naga bi wen zrin chee bxruze blau. ⁵²Nadxa Jesús guzre' le':

—Begú'u xia chiu' lu zre na, lawe' da xúgute benne' dxelute benne' nen xia nalá, cá'anqueze gate le'. ⁵³¿Quebe nézenu' wazéqueda' neda' naba' Xra', na' Le' sél-late' na'a naga zua' da zandxa ca chazrinna cue' gubáz chee xabáa, zaj naque' zánete tu tu cue'? ⁵⁴Na'a che ca'an guna', ¿ájazra gaca gaca na ca da naxúaj na lu xiche chee Dios, da dxenná na caní dxal-la' gaca na?

⁵⁵Nadxa guzre Jesús benne' ca':

—Le'e bdxuajle nen xia nalá ca', ne nen xaga ca' chee quélale neda', dxunle neda' ca tu benne' gubán. Xúgute zra gudxe'a neda' lu xudau' dxusededa' le'e, ne quebe gudélale neda'. ⁵⁶Xúgute da caní dxaca na chee gaca na ca da gulenná benne' ca' buluchálaje' waláz chee Dios, da na' naxúaj na lu xiche chee Dios.

Nadxa xúgute benne' ca' dxusede Jesús bulucá'ane' Le' tuze', buluxuzrínnuje'.

Dxezrín Jesús lau benne' ca' chee xu'u lawe' blau chee judío ca'

(Mr. 14.53-65; Lc. 22.54-55,
63-71; Jn. 18.12-14, 19-24)

⁵⁷Benne' ca' gulele' Jesús guleché'e Le' lau Caifás, bxruze blau, ga na' zaj

nazraga benne' ca' dxuluxuzájle'e da bdixruj be'e Moisés, nen benne' gula sina ca'.⁵⁸ Pedro zéaje nawe' Jesús zítu'la, na' bzrine' chale'aj chee lizre bxruze blau, na' guxú'e, ne gudxé'e tu zren nen bi xa'aga chee lé'ene' ájala xexuzre da dxaca na'.

⁵⁹ Benne' xíchaję ca' chee bxruze ca', ne benne' gula sina ca', ne xúgute benne' ca' chee xu'u lawe' blau chee judío ca' belílaje' ájala xuluzría xi'e Jesús, lácala naca na da wen lazre', chee xelezéquene' xuludée' Le' gatię'.⁶⁰ Quebe bi belezrelne', lácala belezrín benne' zan benne' gulenné' da wen lazre' chee Jesús. Naga xeajsetę na belezrín chupa benne' wen lazre'.⁶¹ Dxelenné':

—Benne' nigá gunné': “Wazéqueda' neda' guchínnaja' xudau' chee Dios, na' xexuna' na lawe' chunna zraze.”

⁶² Nadxa guxasa bxruze blau, na' guzre' Jesús:

—¿Quebe bi dxexechębu'? ¿Bizra da dxeleonné' chiu' lue'?

⁶³ Jesús guzú'e zrize. Nadxa bxruze blau na' guzre' Le':

—Lu La Dios ban dxenná be'eda' lue' nneu' da li. Gunná che nactu' lue' Cristo, Zri'ine Dios.

⁶⁴ Jesús guzre' le':

—Nácaqueza' ca dxennáu' lue'. Cá'anqueze dxapa' le'e, walé'ele neda', Benne' Gulje' Bénneache, cue'a chalá'a xabęla chee Dios nen xel-la' szren chee', na' xelá'a lu beuj bza chee xabáa.

⁶⁵ Nadxa bxruze blau gucheze' zra lanę chee blé'ene' quebe nabague' zria, na' gunné':

—Benne' nigá dxenné' schanni' chee Dios. ¿Nachínnedxadxu benne' xechębe'? Ba bęnquezle le'e ca dizra' schanni' dxenné'.⁶⁶ ¿Bi dxennale le'e?

Benne' ca' gulenné':

—Nabague' zria, ne dxal-la' gatię'.

⁶⁷ Nadxa buluzré'e zrene' lau Jesús, ne belú'e Le', na' xebal-le' belegape' dxu'a lawe'.⁶⁸ Na' gulé'e Le':

—¿Nácaquezu' Lue' Cristo? Gunné xa'a nu be Lue'.

Dxenná Pedro quebe núnbe'e Jesús

(Mr. 14.66-72; Lc. 22.56-62;

Jn. 18.15-18, 25-27)

⁶⁹ Dxácatę na' dxe' Pedro chalé'ajla, na' tu nu'ula wen zrin bzrine' lau Pedro ne guzre' le':

—Cá'anqueze lue' nacu' Jesús, benne' Galilea na', tuze.

⁷⁰ Pedro ben chúchuę' xrtizre' lávela xúgute benne' ca', gunné':

—Quebe nezda' nu chee na' dxennú'.

⁷¹ Nadxa Pedro zexíaje' chee xedxúaje' chale'aj na', na' ble'e xetú nu'ula ca' le', ne guzre' benne' ca' zaj zre'e na':

—Cá'anqueze benne' nigá dxedálęne' Jesús, benne' Nazaret na'.

⁷² Xecha lasa ben chúchuę' Pedro xrtizre', na' bzétaje' Dios, gunné':

—Quebe núnbe'a benne' na'.

⁷³ Xetú chí'ida' guca belezrín benne' zaj zre'e na' lau Pedro, na' gulé'e le':

—Da li, tuze nácaquezu' nen bęnnea' lawe' da xel-la' dxenné' chiu' dxunna bea na lue'.

⁷⁴ Nadxa guzú' lau Pedro dxuzría xi' cuínazqueze', ne dxuzétaje' Dios, dxenné':

—Quebe núnbeaqueza' benne' na'.

Dxácatę na' gudxezre xjeaj. ⁷⁵ Nadxa xeajsa' lazre' Pedro ca da guzre Jesús le': Nédxudxa ca cuezre xjeaj, lue' wannáu' chunna lasa quebe núnbe'u neda'. Bedxúaj Pedro na', na' gudxézrele'e.

Dxeleché'e Jesús lau Pilato

(Mr. 15.1; Lc. 23.1-2; Jn. 18.28-32)

27 Gate guxaní', xúgute benne' xíchaję ca' chee bxruze ca', ne benne' gula sina ca' chee benne' judío ca' belune' tuze dizra' ájala xelune' chee

xelútié' Jesús. ²Nadxa beleché'e Le' nadxáje'e, ne xeajlegu'e Le' lau Poncio Pilato, benne' dxenná be'e waláz chee xezr la xu Roma.

Ca guca gate gute Judas

³Nadxa Judas, bénnea' bdee' Jesús, gate guque bé'ene' ba buluzría xi'e Jesús, bexíajele'ene', na' bunézruje' da chi dxua dumí plata lau benne' xíchaje' ca' chee bxruze ca', ne benne' gula sina ca'. ⁴Dxe'e le':

—Neda' bena' dul-la lawe' da bdea' tu benne' naque' du lazre' chee gatié'.

Belexechebe benne' xíchaje' ca':

—¿Bizra naca cheentu' da nigá? Chiu' lue' naca da na'.

⁵Nadxa Judas buzale' dumí na' lu xu-dau', ne bezé'e, na' xeajxelú'u du lbé'e.

⁶Benne' xíchaje' ca' chee bxruze ca' bu-luxutupe' dumí na', dxelenné':

—Quebe gaca cú'udxu dumí nigá naga xu'u dumí chee xudau', lawe' da naca na lazruj chee benne' dxute benne'.

⁷Nadxa belune' tuze dizra' xelá'awe' tu xezr la xu nen dumí na' da nazí le na xezr la xu chee wen xesu' zruaga, chee gaca na tu lataj naga xelegache benne' zitu'.

⁸Chee le na' nazí le xezr la xu na' Xezr La Xu Chee Dxen ca lu zra na'a zra. ⁹Caní guca na chee gaca ca da gunná Jeremías, benne' bchálaje' waláz chee Dios, gunné': "Gulequ'é'e chi dxua dumí plata da naca na da zaca Le' da buluzía benne' Israel.

¹⁰Nen dumí na' belá'awe' xezr la xu chee benne' wen xesu' zruaga, cáteze gunná be'e Xrana' neda'."

Dxezrín Jesús lau Pilato

(Mr. 15.2-5; Lc. 23.3-5; Jn. 18.33-38)

¹¹Guleché'e Jesús lau bénnea' dxenná be'e waláz chee xezr la xu Roma, na' le' bchebe' Jesús:

—¿Nacu' Lue' Wenná Bea chee judío ca'?

Jesús gunné':

—Ca' naca na, ca dxennáu' lue'.

¹²Gate benne' xíchaje' ca' chee bxruze ca', ne benne' gula sina ca' gulawe' zria chee Jesús, na' Le' quebe bi bechebe'.

¹³Nadxa gunná Pilato, dxe'e Jesús:

—¿Quebe dxennu' ca da dxelenná benne' caní chiu'?

¹⁴Jesús quebe bi bechebe'. Ca'an guca bebanne' bénnea', ne quebe bezrela lazre' ájala mne'.

Dxelechugue' chee Jesús gatié'

(Mr. 15.6-20; Lc. 23.13-25;

Jn. 18.38—19.16)

¹⁵Gate dxu'u laní na', bénnea' dxenná be'e na' xu'u lawe' dxusané' tu benne' wen da zrinnaj, núteteze benne' dxelaca lazre' benne' ca'. ¹⁶Ca lu zra na' xu'u tu benne' lizre xia, benne' wénle'e da zrinnaj, nazí le' Barrabás. ¹⁷Ca zaj nazraga benne' ca' na', Pilato bchebe' le':

—¿Nuzra dxaca lázrele gusana' neda'? ¿Gusana' Barrabás, che Jesús, bénnea' le' Cristo?

¹⁸Caní gunné' lawe' da ba nézene' bu-ludé'e Jesús lawe' le' lawe' da dxelaque' xa lazre' chee Jesús.

¹⁹Dxácate' na' dxe' Pilato naga dx-uchi'e chee bènneache, na' zru'ulé' guselle' tu benne' xeajezre' Pilato: "Quebe guchixre chiu' da naca chee benne' xrlátaje na', lawe' da guneda' xela ba dxele, da bzúale'e na neda' stebe ne chee Le'."

²⁰Benne' xíchaje' ca' chee bxruze ca', ne benne' gula sina ca' belegú'u xele' benne' ca' chee xelenabe' la Barrabás, ne gate Jesús. ²¹Bénnea' dxenná be'e bchálajlene' benne' ca' xecha lasa. Buchebe' le':

—¿Nula benne' chupa caní dxaca lázrele le'e gusana'?

Benne' zan ca' gulenné':

—Barrabás.

²²Pilato bchebe' benne' ca':

—¿Bizra guna' chee Jesús, benne' le' Cristo?

Xúgute' belexechebe':

—Bde'e xaga béguaj.

²³ Nadxa gunná Pilato, dx'e benne' ca':

—¿Bizra da calela nune'?

Benne' ca' gulezú lawe' dxelebezre x'e'e, gulenné':

—Bde'e xaga béguaj. Bde'e xaga béguaj.

²⁴ Gate Pilato guque bé'ene' quebe bi séquene', na' benne' zan ca' dx-eledábague' le', na' gunná bé'ene' bla'nisa, na' gudibe ne'e lávela benne' ca', dxenné':

—Quebe bi dul-la nabaga' chee xel-la' gute chee benne' xrlátaje nigá. Naca na chee le'e.

²⁵ Xúgute benne' ca' belexechebe':

—Netu', ne zrí'inentu' nabá'antu' ca naca chee xel-la' gute chee'.

²⁶ Nadxa Pilato bsané' Barrabás, ne gunná bé'ene' belech'é'e Jesús chee xelu'e Le', na' bde'e Le' chee te'e xaga béguaj.

²⁷ Nadxa benne' dxjaque' wedil-la chee bé'nea' dxenná be'e guleché'e Jesús, ne gulegú'e Le' lu xu'u lawe'. Belexezraga ca naca benne' dxjaque' wedil-la naga ze Jesús. ²⁸ Belequ'é'e zra lane', ne bulugácu'e Le' tu ladxe' bzawe. ²⁹ Buluzú'e xíchaj'e tu da naca na zruze xaga xeché', ne buluguxre' Le' tu xaga ne'e xabêla. Nadxa buluzú zribe' lau Jesús, ne belún le' chee', dxelenné':

—Gaca xabáa chiu', Wenná Bea chee judío ca'.

³⁰ Cá'anqueze buluzré'e Le' zrene', na' gulequ'é'e xaga da nuxru Jesús, ne gu-line' na xíchaj'e'. ³¹ Ca gudé belún le' chee Jesús, na' belexegü'e ladxe' bzawe, na' buluxugácu'e Le' zra lánaqueze'. Nadxa belech'é'e Le' chee te'e xaga béguaj.

Dxuludé'e Jesús xaga béguaj

(Mr. 15.21-32; Lc.

23.26-43; Jn. 19.17-27)

³² Ca gusiá'que' na', belexezrage' tu benne' xezre Cirene, le' Simón, na' gulenná bé'ene' le' bi'e xaga béguaj chee Jesús.

³³ Ca'an guca belezrine' tu lataj nazí le na Gólgota, da dxennadxu, Lataj Chee Zrita Xíchaj Benne' Gate. ³⁴ Na' bulunézruje' da xi'aj Jesús xrise uva walla da nachixre na da sla', san gate bxue Jesús ca naca na, quebe gu'e na.

³⁵ Ca bexuzre benne' dxjaca wedil-la buludé'e Le' xaga béguaj, na' gulebéa-je' da gaca bea na chee xelexelé'e ca naca zra lana Jesús. Ca'an guca guxá ca da gunná benne' bchálaje' waláz chee Dios, gunné': "Belexelé'e zra lana' leze'. Gulebéaje' da gaca bea na." ³⁶ Nadxa gulebé'e dxuluzuzre' Jesús. ³⁷ Buluzrí'e xíchaj Jesús na' tu xiche da naxúaj na da nabague', da dxenná na: Jesús, wenná bea chee judío ca'.

³⁸ Cá'anqueze buludé'e chupa benne' gubán tu zren nen Jesús le'e xaga béguaj ca', tue' chalá'a xabêla, ne xetú'e chalá'a xéglala ga da' xaga béguaj chee Jesús. ³⁹ Benne' dxeledé'e na' dxelún le' chee Jesús. Dxulutá xíchaj'e', ⁴⁰ ne dxelenné':

—¿Dxuchínnaju' xudau', na' lawe' chunna zraze xexunu' na? Bselá cuinu'. Che nactu' Zri'ine Dios, bexetaj le'e xaga béguaj na'.

⁴¹ Cá'anqueze belún la chee' benne' xíchaj'e ca' chee bxruze ca', ne benne' dxuluzúzajle'e da bdxixruj be'e Moisés, ne benne' xudau' fariseo ca', ne benne' gula sina ca'. Dxelé ljwezre':

⁴² —Bselé' benne' xula, san quebe dxezéquene' guselá cuine'. Che naque' Wenná Bea Chee Xezre Israel, dxal-la' xexétaje' le'e xaga béguaj, na' chéajledxu chee'. ⁴³ Le' bxren lazre' Dios. Na'a guselá

Dios Le' che da li dxaca lazre', lawe' da gunná Le' naque' Zri'ine Dios.

⁴⁴ Cá'aqueze gubán ca' zaj da' xaga béguaj ca' nen Jesús gulenné' schanni' chee Jesús.

Ca guca gate gute Jesús

(Mr. 15.33-41; Lc.

23.44-49; Jn. 19.28-30)

⁴⁵ Nadxa ca naca xezr la xu na' guchul-la na. Guzú lau na wagubizra ca bzrinte na ca dxedá chunna. ⁴⁶ La ná'queze Jesús gudxezre xe'e, dxenné':

—Elí, Elí, ¿lama sabactani?

(Da nigá zéaje na: Dios chia', Dios chia', ¿bizr chee na' nusán lazru' neda?)

⁴⁷ Bal-la benne' zaj zre'e na' belenne' ca da gunná Jesús, na' gulenné':

—Benne' nigá dxenné' Elías, benne' bchálaje' waláz chee Dios.

⁴⁸ Dxácaté na' guzá' chegu tu benne' ca', xeajxrí'e tu da dxezrupe nisa, na' ca bsebise' na nen nupe zichaj, na' bzue' na lawe' tu xaga, ne bzrigue' na dxu'a Jesús chee xrupe' na. ⁴⁹ Benne' xezica ca' gulenné':

—Le guxúe xca'. Quebe gunu' ca'. Nná'xquedxu che wida Elías guselé' Le'.

⁵⁰ Xecha lasa gudxezre xa'a Jesús, na' guti'e. ⁵¹ Lu zra ná'queze ladxe' da ze lu xudau' bdxuaj na chúpala, guzú lau na xíchaje, bedxúajte na dxe'ela. Guzrú' xezr la xu, na' xiaj xre ca' gulúzruqueze na. ⁵² Gulexalaj ba, na' belexebán benne' gate ca', benne' guléajle'e da naca chee Dios. ⁵³ Ca gudé bebán Jesús, na' benne' caní belexedxúaje' lu xedxu ba, ne belex-exú'e lu xezre lá'azxa Jerusalén, naga benne' zan belelé'ene' benne' ca'.

⁵⁴ Nadxa benne' dxenná be'e lu wedil-la, ne benne' dxjaque' wedil-la, benne' ca' dxuluzuzre' Jesús, gate belelé'ene' guzrú', ne xezícadxa da ca'an gulaca, na' belezrébele'e, dxelenné':

—Da lítegage benne' nigá guque' Zri'ine Dios.

⁵⁵ Nu'ula zan zaj zre'e na' dxelenné'e zítu'la, nu'ula ca' xjácalene' Jesús gate bezé'e ga nababa Galilea, ne gulá-cálequeze' Le'. ⁵⁶ Ládujla nu'ula ca' xu'u María Magdalena, ne María xrna Jacobo ne José, ne xrna zri'ine Zebedeo ca'.

Dxulucaché' Jesús lu xedxu ba

(Mr. 15.42-47; Lc.

23.50-56; Jn. 19.38-42)

⁵⁷ Ca guzú lau dxaca waxrinne, na' bla' tu benne' gunná le' José, benne' xezre Arimatea, benne' dxéajlequeze' chee Jesús. ⁵⁸ Benne' nigá guxíaje' xea-jchálajlene' Pilato, na' benabe' bel-la' dxen chee Jesús. Pilato gunná bé'ene' xulunézruje' le' bel-la' dxen na'. ⁵⁹ Nadxa José bequé'e bel-la' dxen na', na' bchele' na tu ladxe' da naxadxe. ⁶⁰ Nadxa gulu'e Le' lu ba da naca na cheéqueze José na', da bene' tu lu xiaj. Gulexrué' tu xiaj blaga zren dxu'a ba chee Jesús, na' bezé'e ga na'. ⁶¹ Gulezrá' María Magdalena, ne xetú María, zaj dxe'e le nna' dxu'a ba na'.

Dxulubia dxuluxue' ba chee Jesús

⁶² Zeaj zra xula, da naca na zra ca gudé zra bulucueze', na' benne' xíchaje ca' chee bxruze ca', ne benne' xudau' fariseo ca' belezrine' lau Pilato. ⁶³ Dxelé'e le':

—Xran, dxeajsá lázrentu' ca naca da gunná benne' wen lazre' na' gate na' zue'. Gunné' gate gaca chunna zra, na' xebane' ládujla benne' gate. ⁶⁴ Chee le' na', bdixruj be'ene' benne' ca' xulubia xuluxue' ba chee' na' cadxa gaca chunna zra, chee quebe xeelé' benne' ca' bsédene' xedajlexebéaje' bel-la' dxen na' chizrela, na' te na' xuluzenne' bénneache ba bebane' ládujla benne' gate. Che ca'an gaca, na' dizra' wen lazre' bzebe nigá gun na da zrinnaj zrendxa ca da nedxu.

⁶⁵ Pilato guzre' benne' ca':

—Na' zaj zra' benne' dxjaque' wedil-la xuluzuzre' na. Le chjaca le'e, ne le guxúe xanne' ba na' ca se lau séquele.

⁶⁶Nadxa xjaque', xeajlexúe' ba na'. Buluchiche' tu da gunna bea na che xalaj ba na', na' bulucá'ane' benne' dxjaca wedil-la ga na'.

Ca guca gate bebán Jesús

(Mr. 16.1-8; Lc. 24.1-12; Jn. 20.1-10)

28 Ca gudé chee zra dxulupá'ana judío ca', ca za dxaní' zra nedxu, na' María Magdalena, ne xetú María na' xjaque' xeajlenné'e ba chee Jesús. ²Chadite guzrú'le'e na lawe' da betaj tu gubáz chee xabáa chee Xránadxu, na' bzrine' dxu'a ba na', ne bequé'e xíajta'a zren na' da zrua na dxu'a ba na', na' gudxé'e lawe na. ³Gubáz na' dxácatite legalé', ne naca chiche zra lané' ca bezxe'. ⁴Gate belelé'e benne' dxjaque' wedil-la gubáz chee xabáa na', na' belezrízene' xel-la' dx-elezrebe, ne belexegá'ane' ca benne' gate ca'. ⁵Nadxa gunná gubáz chee xabáa na', dxé'e nu'ula ca':

—Quebe zrēbele. Nezda' dxexílajle Jesús, bēneea' gudé'e xaga bēguaj. ⁶Quebe zué' nigá lawe' da ba bebane', cáteze na' gunné'. Le da nna'le lu ba naga gulegú'e Le'. ⁷Le cheajxáquezega, le cheajezre benne' ca' bsédene' ba bebane' ládújla benne' gate, na' chéajé' ga nababa Galilea nédxudxa ca le'e. Na' lé'ele Le'. Da nigá naca na da nabaga'a xapa' le'e.

⁸Nadxa nu'ula ca' besía'que' dxu'a ba na', zeajxaca chégüe'. Dxelezrebe', ne dx-elebene'. Zjaque' zeajleguezre' benne' ca' bsēde Jesús. ⁹Dxácaté na' Jesús bchague' nu'ula ca', ne bgape' le' diuzre. Belezrine' lau Jesús, dxelúe láné' Le', ne bulunide' ni'a Jesús. ¹⁰Le' guzre' nu'ula ca':

—Quebe zrēbele. Le chjaca, le cheajezre bi bícha'dau' ca' dxal-la' chjaque' naga nababa Galilea. Na' xelexelé'ene' neda'.

Ca da gulenná benne' dxjaque' wedil-la

¹¹Dxácaté zjaca nu'ula ca', na' benne' ca' dxjaca wedil-la gulu'e xezre, ne buluchálajlene' benne' xíchajé ca' chee bxruze ca' ca da guca. ¹²Benne' xíchajé ca' buluchálajlene' benne' gula sina ca' chee xeluné' tuze dizra'. Nadxa bulunézruje' benne' dxjaque' wedil-la dumí zrente. ¹³Dxelenné':

—Le nna le'e belelá' benne' ca' bsēde Jesús na' chizrela, dxácaté dxásele le'e, na' belexexú'e bēl-la' dxen chee'. ¹⁴Che benne' dxenná bē'e na' xenne' da nigá, netu' guchálajlentu' le', ne gucá'ana cháwentu' chee quebe bi gaca chee le'e.

¹⁵Nadxa benne' dxjaque' wedil-la gulez' lu ne'e dumí na', na' besía'que' beluné' ca bache zaj nézene'. Da nigá naca na ca dxelenná judío ca' zéajté lu zra na'a zra.

Jesús dxesel-le' benne' gubáz chee' ca'

(Mr. 16.14-18; Lc.

24.36-49; Jn. 20.19-23)

¹⁶Nadxa xjaca benne' chinéaj ca' bsēde Jesús, na' belezrine' lu xi'a naga ba guzre Jesús le'. ¹⁷Gate belelé'ene' Jesús, na' bulucá'ana szrene' Le'. Bal-le' gulaca chupa lazre'. ¹⁸Nadxa Jesús gubigue' naga zaj zra' benne' ca', na' guzre' le':

—Neda' ba nazí' lu na'a ca naca xel-la' dxenná bea xabáa, ne lu xezr la xu nigá. ¹⁹Chee le' na' le chjaca, le cheajchálajle benne' zaj zre'e du ca naca xezr la xu nigá, ne le cheajsédene' ca naca da bsédeda' le'e. Le guchúe' le' nisa lu La Xra', ne lu La Zrí'ine', ne lu La Be' Lá'azxa. ²⁰Le guséde-ne' xelaque' wezúia dizra' ca naca da ba gunná be'eda' le'e, na' neda' tu súalezqueza' le'e xúgute' zra cadxa cheajse' chee xezr la xu nigá. ¡Ca' na gaca na!

**DIZRA' CHAWE' CA NACA
CHEE JESUCRISTO DA
BZUAJ SAN MARCOS**

**Da bchalaj Juan, benne'
bchue' bénneache nisa**

*(Mt. 3.1-12; Lc. 3.1-9,
15-17; Jn. 1.19-28)*

1 Caní guzú lau dizra' chawe' ca naca chee Jesucristo, Zri'ine Dios.

²Bzrin lazre' da bzuaj Isaías, benne' bchálajē waláz chee Dios, ca da gunná Dios:

¡Le nna'xque nigá!

Neda' dxešel-la' benne' gubáz chia', benne' cuía lawe' lau Lue'.

Bénnea' gupé'e neza naga teu' chee ilúnbe'e bénneache Lue'.

³Welénqueze chi'i benne' dxebezre xē'e le'e xixre' lawe' lataj.

Dxenné': "Le gupá'a neza naga te Xrá-nadxu lu xichaj lázrdaule.

Le xebéaj li neza lase chee' ca'."

⁴Caní guca lawe' da bla' Juan le'e xixre' lawe' lataj, na' bchálajē dizra' chee Dios, ne gunné' dxal-la' xeledxúa bénneache nisa, na' bchue' le' nisa, benne' ca' belexebí'i lazre' chee gunitē lau Dios dul-la da zaj nabague'.

⁵Ca'an guca, guledxúaj bénneache zan lu xezre Jerusalén, ne xúgute xezre ca' zaj nababa Judea, na' xjaque' naga zua Juan, na' Juan nigá bchue' benne' ca' nisa lu xegu Jordán, benne' ca' gulexrúalepe' dul-la da zaj nabague'.

⁶Caní guca zra lana Juan. Gucue' zra lanē ladxe' xicha zra camello, bia dxelebía bénneache, ne tu xpádxue' xide bchela le'e. Dxawe' biche xuaj, ne dxé'ajē bzrína'dau' chee bēzudau'. ⁷Ca dxuchálajē dizra' chee Dios, dxenné':

—Gate te chia' neda', na' xida xetú benne', bénnea' nápadxē' xel-la dxenná

bea ca neda'. Quebe naca chia' xáchua' chee lechja' zrelē'. ⁸Da lítega, neda' bchua' le'e nisa. Le' gune' da zéajē xel-la dxedxúa nisa nigá, guzúe' Be' Lá'azxa lu xichaj lázrdaule.

Ca da guca gate gudxúa Jesús nisa

(Mt. 3.13-17; Lc. 3.21-22)

⁹Ca da guca lu zra ca', guzá' Jesús lu xezre Nazaret chee ga nababa Galilea, na' bzrinē' lau Juan. Juan nigá bchue' Jesús nisa lu xegu Jordán. ¹⁰Gate bdxuaj Jesús lu nisa, la blé'etene' naxalaj xabáa, ne blé'ene' betaj Be' Lá'azxa. Dxul'é lawe' ca tu bgúgudu chiche, na' bzrinē' ca li xichaj Jesús. ¹¹Ben tu chi'i da za xabáa, da dxenná na:

—Lue' nacu' Zri'ina'. Nazrí'ida' Lue', ne dxezaca ba lázreleda' Lue'.

**Dxaca lazre' Satanás da xriwe'
gun ga baga Jesús dul-la**

(Mt. 4.1-11; Lc. 4.1-13)

¹²Nadxa Be' Lá'azxa guché'e Jesús le'e xixre' lawe' lataj. ¹³Guzúa Jesús le'e xixre' lawe' lataj chua zra chua xēla. Na' bzrin Satanás da xriwe', ne guca lazre' na gun na baga Jesús dul-la. Guzúa Jesús naga zaj zra' bē xixre' bē snia, na' gubáz chee xabáa chee Dios gulácalēne' Jesús.

**Jesús dxezú lawe'
dxusédenē' bénneache**

(Mt. 4.12-17; Lc. 4.14-15)

¹⁴Ca gudé guxú'u Juan lizre xia, na' bzrin Jesús lu xezre ca' zaj nababa Galilea, ne dxuchálajlēne' bénneache dizra' chawe' ca dxenná bea Dios.

¹⁵Gunná Jesús:

—Ba bzrin zra. Ba zua báguze gate nna bea Dios xezr la xu nigá. Chee le' na', le xebí'i lazre', ne le cheajlí lazre' dizra' chawe' nigá.

**Dxenné Jesús tapa benne' wezén
bela chee xelaque Le' tuze**

(Mt. 4.18-22; Lc. 5.1-11)

¹⁶ Gate gudá Jesús dxu'a nísadau' chee Galilea, na' blé'ene' Simón, ne Andrés, biche Simón na'. Benne' caní dxuluzale' xixruj bela chee' lu nísadau' lawe' da zaj naque' wezén bela. ¹⁷ Na' gunná Jesús:

—Le gun neda' tuze, na' guzúa' le'e gácale wen zrin chia'. Cheajxrile bēneache ca dxunle dxezenle bela.

¹⁸ La bulucá'anate' xixruj chee' ca', na' zjácálene' Jesús.

¹⁹ Nadxa gudé Jesús xelate' ca na'la, na' blé'ene' Jacobo, ne Juan, benne' ca' zaj naque' zri'ine Zebedeo. Zaj zre'e lu da dxedá lawe' nísadau', dxelexexune' xixruj bela chee' ca'. ²⁰ Ca gunné Jesús Jacobo, ne Juan, na' la bulucá'anate' xre' Zebedeo ne wen zrin chie' ca' zaj zre'e lu da dxedá lawe' nísadau', na' zjácálene' Jesús.

Tu benne' xu'e be' xriwe'

(Lc. 4.31-37)

²¹ Gate gul-la na gulu'e lu xezre Capernaum, na' gate bzrin zra dxulupá'ana benne' judío ca', guxú'u Jesús lu xu'u naga dxelúe lá'ana judío ca' Dios, ne bsé'dene' benne' ca' zaj zre'e na'. ²² Belexebánene' ca naca da dxusede Jesús le' lawe' da dxuchálaje' nen dutē xel-la dxenná bea, ne quegá ca dxuluchalaj benne' ca' dxuluxuzájle'e da nadxixruj bea Dios. ²³ Nadxa bla' tu benne' xu'e be' xriwe' lu xu'u na', na' gudxezre xa'a na lu dxu'a bēnea'. ²⁴ Gunná na:

—¿Bizra nápantu' chiu', Jesús, benne' Nazaret? ¿Za'u guzría xi'u netu'? Ba nézquezda' nu nacu'. Benne' Lá'azxa chee Dios nacu'.

²⁵ Jesús gudil-le' na, gunné':

—Zrize guzúa. Bedxúaj lu bel-la' dxen chee benne' nigá.

²⁶ Nadxa be' xriwe' na' bxrízele'e na bēnea', ne gudxezre xá'ale'e na, na' bedxúaj na. ²⁷ Belexebánele'e xúgute benne' zaj zre'e na', dxelé ljwezre':

—¿Bizra dizra' cube da nigá? Dute xel-la dxenná bea chee' dxenná be'ene' be' xriwe' ca', na' dxuluzúa na dizra' chee'.

²⁸ La bzrílujte dizra' chee xel-la waca chee Jesús du ca naca xezre ca' zaj nababa Galilea.

Jesús dxexuné' xrna' zru'ula Pedro

(Mt. 8.14-15; Lc. 4.38-39)

²⁹ Ca belexedxúaje' lu xu'u na' chee judío ca', na' belezrine' lizre Simón, ne Andrés. Jacobo ne Juan dxelune' Jesús tu zren. ³⁰ Lu xu'u na' de xrna' zru'ula Simón, xu'e da la. La buluchálajlete' Jesús ca dxaca chee nu'ula nigá. ³¹ Le' la béxru'te' ne'e, bechise' le'. La bedxúajte da la da xu'e, na' bseni'e da gulawe'.

Jesús dxexuné' bēneache zan

(Mt. 8.16-17; Lc. 4.40-41)

³² Ca gula guzré zra na', ca guzría gu-bizra, na' guleché'e xúgute benne' we' lau Jesús, ne benne' ca' zaj xu'e be' xriwe'. ³³ Ca naca benne' xezre gulebigue' dxa xu'u naga zua Jesús. ³⁴ Jesús bexuné' zánete benne' we' ca zaj naca xízrawe' da xu'u tu tue', ne bebéaje' zane' be' xriwe' zaj xu'u bēneache ca'. Quebe be'e lataj be' xriwe' ca' xelenné na lawe' da zaj nún-bea na Le'.

**Dxuchalaj Jesús lau
bēneache zaj zre'e Galilea**

(Lc. 4.42-44)

³⁵ Ca bebán Jesús bál-lala, ne nachúllate, bedxúaje' guzé'e zéaje' tu lataj naga nadache' bēneache, na' bchá-lajlene' Dios. ³⁶ Simón Pedro, ne benne' ca' zaj zrálene' le' belexexílaje' Jesús. ³⁷ Ca xeajlexraque' Jesús, na' gulé'e Le':

—Xúgute bēneache dxelexexílaje' Lue'.

³⁸ Na' gunná Jesús:

—Chéajdxu xexre walizre ca' chee guchálajlëna' benne' ca' xrtizra Dios. Chee le na' belja'.

³⁹ Lu xu'u ca' naga dxelúe lá'ana judío ca' Dios, da ca' zaj zua tu tu xezre ca' chee ga nababa Galilea, bchalaj Jesús dizra' chee Dios, ne bebéaje' xízrawe' xriwe' ca' da zaj xu'u benne' we' ca'.

**Jesús dxexunë' tu benne'
dxé'ene' xízrawe' guzru'**

(Mt. 8.1-4; Lc. 5.12-16)

⁴⁰ Nadxa bzin lau Jesús tu benne' dxé'ene' xízrawe' guzru', na' bzu zribe', ne guta' xuene' Le', dxenné':

—Che Lue' dxaca lazru', waca xexunu' neda'.

⁴¹ Jesús bexache lazre' le', na' bli ne'e, gudane' le'. Dxenné':

—Dxaca lazra'. Na'a dxexacu'.

⁴² Ca gunné' caní, la becuásate xízrawe' na', na' begá'ane' chawe'.

⁴³ Nadxa Jesús bsízrene' le', na' besel-le' le'. ⁴⁴ Caní gunné':

—Quebe nu xu'u ca da guca chiu'. Guxíaj lau bxruze xeajlé'e cuinu', ne bnezruj ca naca da gunná be'e Moisés xelún benne' ca' xelexequé'. Caní gunu' chee xelélé'ene' ba bexacu' na'a.

⁴⁵ Nadxa benne' nigá, ca bezé'e, guzú lawe' dxuchálajlëne' tu tu benne' ca guca chee' bexaque'. Ca'an guca, québedxa guca chu'u Jesús zaca bal-la lau lu xezre. Begá'ane' le'e xixre' lawe' lataj. Bénneache chee xúgute xezre ca' belezrine' lau Jesús naga zue'.

**Jesús dxexunë' tu benne'
quebe gaca se'e**

(Mt. 9.1-8; Lc. 5.17-26)

2 Ca gudé chupa chunna zra, na' guxú'u Jesús xecha lasa lu xezre Capernaum. Belénne bénneache zua Jesús tu lu xu'u. ² La belezragate benne' zan-

te naga zua Jesús. Ca'an guca, québedxa guque lu xu'u, ne dxa xu'u. Bchalaj Jesús xrtizra Dios. ³ Na' belezrín tapa benne' lu xu'u naga zua Jesús, zaj nu'e tu benne' quebe gaca se'e. ⁴ Lawe' da quebe gulezéquene' xelezrine' lau Jesús, lawe' da zaj zra' bénneache zante ga na', na' gulesáluje' chju'u chee xu'u naga zua Jesús. Na' bululétaje' da'a da zrua benne' na' quebe gaca se'e. ⁵ Lawe' da dxeque be'e Jesús ca dxeleajlí lazre' benne' ca' Le', na' gunné', dxe'e bénnea' quebe gaca se'e:

—Zrí'ina'dau', ba nanite lau dul-la da nabagu'.

⁶ Zaj dxe'e bal-la benne' ga na', benne' dxuluxuzájle'e da nadxixruj bea Dios, na' gulenné lanze': ⁷ —¿Bizr chee na' dxuchalaj caní benne' nigá? Dxucá'ana dí-taje' Xránadxu Dios. ¿Núzraqueze gaca gunite lau dul-la da zaj nabaga bénneache? Tuze Dios na'. ⁸ Dxeque be'e Jesús lu lázrdawe' ca dxelenné lané' chee', na' gunné':

—¿Bizr chee na' dxéquele caní?

⁹ ¿Bizra dizra' quebe naca na sté'bela xapa' benne' nigá quebe gaca se'e? ¿Naca na sté'be xapa' le', ba nanite lau dul-la nabagu'? Cabí. ¿U che sté'be xapa' le', bexasa, becá'a da denu', ne bexíaj? ¹⁰ Na'a, chee nézele le'e neda', Benne' Gulje' Bénneache, napa' xel-la dxenná bea lu xezr la xu gunite lawa' dul-la da zaj nabaga bénneache.

Na' gunná Jesús, dxe'e bénnea'.

¹¹ —Lue' dxapa', bexasa, becá'a da'a chiu', ne bexíaj lízru'.

¹² Ca'an guca, la bexásate', na' bequé'e da'a chee', ne bedxúaje' lau xúgute bénneache. Ca'an guca, xúgute benne' ca' belexebánene', na' belúe lá'ane' Xránadxu Dios. Dxelenné':

—Cabata' ne lé'edxu gaca na ca guca da nigá.

Dxenné Jesús benne' lē' Leví

(Mt. 9.9-13; Lc. 5.27-32)

¹³Ca gudé na' bedxúaj Jesús zéajé' dxu'a nísadau', na' xúgute bénneache lu xezre ca' belezrine' lau lē'. Nadxa bsé-dene' benne' ca' xrtizra Dios. ¹⁴Ca gudé Jesús na', ble'ene' Leví, zri'ine Alfeo, dxē'e lataj chee wechizruj. Na' gunná Jesús, dxē'e lē':

—Ben neda' tuze.

La guxásate Leví, guxíajlene' Jesús.

¹⁵Ca' guca, gate gudxé' Jesús dxawe' lizre Leví, na' zánete benne' wechizruj, ne benne' dul-la ca' gulebé'e dxelágulene' tu zren nen Jesús, ne benne' ca' dxusé-dene'. Caní naca lawe' da zjácate benne' zante Jesús. ¹⁶Nadxa benne' ca' dxulux-uzájle'e da nadxizruj bea Dios, ne benne' fariseo ca', gate belelé'ene' ca da dxun Jesús, dxágulene' benne' wechizruj ca', ne benne' dul-la ca', na' gulenné', dxelé'e benne' ca' dxusede Jesús:

—¿Bizra da nigá? Dxagu dxé'ajlene' benne' wechizruj ca', ne benne' dul-la ca'.

¹⁷Ca ben Jesús da nigá, gunné':

—Benne' chawe' ca' quebe dxelechínene' benne' dxexún bénneache. Benne' wē' ca' dxelechínene' bēnea'. Quegá bla'a dxennéa' benne' xrlátaje ca'. Benne' dul-la ca' dxennéa'.

Ca dxal-la' xelún bénneache gate dxelune' gubasa

(Mt. 9.14-17; Lc. 5.33-39)

¹⁸Ca guca lu zra na', belún gubasa benne' ca' dxusede Juan, ne benne' ca' dxulusede benne' fariseo ca'. Na' belezrin benne' ca', bedajleguezre' Jesús:

—¿Bizr chee na' dxelún gubasa benne' ca' dxusede Juan, ne benne' ca' dxulusede benne' fariseo ca', na' benne' ca' dxusédenu' Lue' quebe dxelune' gubasa? ¿Bizr chee na'?

¹⁹Na' Jesús guzre' benne' ca':

—¿Waca xelún gubasa benne' zaj zre'e laní chee wechaga na' dxácate na' zua benne' wechaga na' nen lē'? Dxácate na' zua wechaga na' nen lē' quebe gaca xelune' gubasa. ²⁰Wazrín tu zra gate dua benne' wechaga na'. Lu zra na' xelune' gubasa.

²¹'Quegá nu benne' xudé'e tu ladxe' cube lē'e zradxu gula. Che ca'an guné', ladxe' cube da xudé'e wazrube xu na da gula, na' wachézdaxa na. ²²Cá'anqueze, quegá nu benne' que'e xrise uva wal-la cube lu bzude xide gula. Che ca'an guné', na' xrise uva wal-la cube na' wacheza na bzude xide gula, na' walalaj xrise uva wal-la, ne cuía xi bzude xide na'. Xrise uva wal-la cube lu bzude xide cube dxal-la' chuzruj na.

Benne' ca' dxusede Jesús dxelíchaje' dau chee zrua' xtila zra dxulupá'ana judío ca'

(Mt. 12.1-8; Lc. 6.1-5)

²³Gate gudé Jesús naga ze zrua' xtila zra dxulupá'ana benne' judío ca', náate na' benne' ca' dxusede Jesús, ca zaj xu'e neza, gulezú lawe' dxelíchaje' dau naga zria zrua' xtila. ²⁴Nadxa benne' fariseo ca' gulé'e Jesús:

—Gunná'xque. ¿Bizr chee na' dxelune' zrin da quebe dxal-la' xelune' zra dxupá'anadxu?

²⁵Jesús guzre' benne' ca':

—¿Cabata' ne gulábale ca da ben David gate gudune', ne bxáizrjene' da gagu lē', ne da gugawe' benne' ca' zaj zralene' lē'? ²⁶Guxú'e lu xu'u chee Dios gate naca Abiatar bxruze blau, na' David gudawe' xeta xtila da dxelu'e lau Dios, da quebe dxal-la' gagu benne' xula, san tuze bxruze ca' zaj naca chee' xelawe' na. Na' bnéruzjtē David da gulagu benne' ca' zralene' lē' chee xeta xtila na'.

²⁷Cá'anqueze gunná Jesús, dxē'e benne' ca':

—Dios gudíxruje' zra dxupá'anadxu chee' gaca ba neza chee' bènneache, quegá bene' bènneache chee' xelune' zrin chee' zra dxupá'anadxu. ²⁸Chee' le' na', neda', Benne' Gulje' Bènneache, naca' xrane zra dxupá'anadxu.

Ca guca chee' tu benne' nazrinnaj ne'e
(Mt. 12.9-14; Lc. 6.6-11)

3 Gate guxú'u Jesús da xula lu xu'u naga dxelúe' lá'ana judío ca' Dios, ze' tu benne' biu nazrinnaj ne'e ga na'. ²Judío ca' buluzuzre' Jesús che xexune' benne' we' nigá lu zra dxulupá'ane', chee' xezezéquene' xelagu zria Jesús. ³Nadxa gunná Jesús, dxé'e' benne' biu na' nazrinnaj ne'e:

—Guxasa. Guzé laduj benne' caní.

⁴Nadxa gunaba Jesús lau judío ca', dxé'e' le':

—¿Naca chee' zra dxupá'anadxu gundxu da xrlátaje, u che gundxu da calela? ¿Waca gupá'adxu xel-la nabán chee' nu benne', u che guzría xidxu xel-la nabán chee'?

Na' gulezúa zrize judío ca'. ⁵Nadxa Jesús gunná zi'e' benne' ca'. Bewí'inene' ca naca xel-la lázrdau zide' chee'. Nadxa guzre' benne' nazrinnaj ne'e:

—Guchiluj na'u.

Guchiluj ne'e, na' bexaca na. ⁶Ca'an guca, belexedxúaj benne' fariseo ca', na' belune' xel-la wezría nen benne' ca' zaj de'e' Herodes ájala xelútie' Jesús.

Bènneache zan dxelezrague'
dxu'a nísadau'

⁷Nadxa gucuasa Jesús laduj benne' ca', na' guxíaje' dxu'a nísadau' nen benne' ca' dxusédené'. Zjácale' benne' zan ca' Jesús, benne' chee' xezre ca' zaj nababa Galilea. ⁸Gate belén bènneache ca naca da zren ca' da dxun Jesús, belezrín benne' zan lau Le', benne' chee' xezre ca' zaj nababa Judea, ne benne' xezre Jerusalén, ne

benne' chee' xezre ca' zaj nababa Idumea, ne benne' gusá'aque' xechalá'a xegu Jordán, ne benne' gusá'aque' xezre ca' zaj naxechaj na xezre Tiro, ne xezre Sidón. ⁹Chee' le' na' gunná be'e Jesús benne' ca' dxusédené' xulucueze' tu da dxedá lawe' nísadau' checa xuluchide' bènneache zan Le'. ¹⁰Caní guca lawe' da bexún Jesús benne' zante, na' benne' we' ca' gulebigue' lau le' chee' cheajleté' Le'. ¹¹Gate be' xriwe' ca' zaj xu'u bènneache belelé'e na Jesús, na' buluzú zribe na lau Le', ne gulebezre xa'a na. Dxelenná na:

—Lue' nactu' Zri'ine Dios.

¹²Jesús gudil-le' be' xriwe' ca' chee' quebe xululé'e na da naca Le'.

Jesús dxenné' chazrinnu gubáz chee'
(Mt. 10.1-4; Lc. 6.12-16)

¹³Ca gudé na' guluén Jesús tu lu xi'a, na' gunné' benne' ca' guca lazre'. Na' gulebigue' lau Le'. ¹⁴Bchague' chazrinnu benne' xelune' Le' tuze, benne' sel-le' cheajlechálaje' xrtizra Dios. ¹⁵Bzue' lu na' benne' caní xel-la dxenná bea chee' xelexexune' benne' we' ca', ne chee' xelexebéaje' be' xriwe' ca' lu bel-la' dxen chee' bènneache ca'. ¹⁶Benne' chazrinnu caní zaj le':

Simón, bènnea' bzua Jesús xetú le' Pedro,

¹⁷ne Jacobo ne Juan, biche Jacobo, benne' ca' zaj naque' zri'ine Zebedeo. (Benne' chupa caní bzua Jesús le' Boanerges, da zéaje na benne' wal-la ca guziu'.)

¹⁸Bchague' Andrés ne Felipe, ne Bartolomé, ne Mateo, ne Tomás, ne Jacobo zri'ine Alfeo, ne Tadeo, ne Simón, benne' dxue lázrele'e chee' lazrié',

¹⁹ne Judas Iscariote, bènnea' xudéé' Jesús lu na' benne' ca' dxeledábague' Le'.

**Nu benne' dxenné' schanni'
chee Be' Lá'azxa**

(Mt. 12.22-32; Lc. 11.14-23; 12.10)

Ca gudé na' bzrin Jesús tu lu xu'u nen benne' ca' dxusédene'. ²⁰Xecha lasa gulebiga bénneache zan naga zua Jesús, na' québedxa dxaca lataj xelawe'. ²¹Gate belene benne' xrtia Jesús ca da dxun Le', na' belezrine' chee xelexeché'e le'. Dxelenné':

—Quebe zua xrlátaje xichaj lázrdawe'.

²²Cá'anqueze benne' ca' dxuluxu-zájl'e da nadxixruj bea Dios, benne' gusá'aque' Jerusalén, dxelenné':

—Benne' nigá zrague' Beelzebú, xrane be' xriwe' ca', na' ne' chee xrane be' xriwe' ca' dxebéaje' be' xriwe' ca'.

²³Nadxa gunné' Jesús benne' ca', na' bchájlajl'e le' tu da dxulé'e na. Dxenéné':

—¿Wazeque Satanás da xriwe' xebéaj cuine na? ²⁴Che benne' dxelenná bea xelexaque' chupa la'a, quebe díaqueze xel-la dxenná bea chee'. ²⁵Cá'anqueze che benne' zaj zré'e tu lu xu'u xelaque' chupa la'a, quebe xeledíaqueze benne' zaj zré'e lu xu'u na'. ²⁶Cá'anqueze, che Satanás tábaga cuínaqueze na, ne xexaca na chupa la'a, quebe díaqueze na. Wadéqueze chee na.

²⁷'Quebe nu seque chu'u lizre benne' wal-la chee cuane' da de chee' che quebe guchéaje' le' nédxula. Nadxa seque' cuane' da de lizre benne' wal-la na'.

²⁸'Da li dxennía', dxapa' le'e: Xúgute dul-la da dxelún bénneache, ne dízra' schanni' da dxelenné', ájateze zaj naca na, gunite láuqueze Dios chee'. ²⁹Na'a, ca naca núteteze benne' nne' schanni' chee Be' Lá'azxa, cabata' gunite lau Dios chee' bénnea'. Webía xí'queze'.

³⁰Caní gunná Jesús lawe' da dxelenné':

—Zraga Jesús da xriwe'.

Nu naca ca xrna Jesús, ne bi biche' ca'

(Mt. 12.46-50; Lc. 8.19-21)

³¹Ca gudé na' bzrin xrna Jesús nen bi biche' ca'. Gulebeze' chalé'ajla, na' gulesel-le' tu benne' nne' Jesús. ³²Benne' ca' zaj zré'e cuita Jesús gulé'e le':

—Xrna'u ne bi bichu' ca' zaj ze' chalé'ajla, dxelenné' Lue'.

³³Gunná Jesús, dxé'e benne' ca':

—¿Nézele nuzra na' xrna'a, ne bi bicha' ca'?

³⁴Nadxa gunná' Jesús benne' ca' zaj zré'e cuita Le', na' gunné':

—Benne' caní zaj zrálene' neda' nigá zaj naque' ca' xrnáqueza', ne bi bicha' ca'.

³⁵Caní naca na lawe' da xúgute benne' dxelune' ca da dxaca lazre' Dios, benne' caní zaj naque' bi bicha' ca', ne bi zana' ca', ne xrna'a.

**Da dxulé'e na ca naca chee
benne' dxaza dxa'ana**

(Mt. 13.1-23; Lc. 8.4-15)

4Xetú lasa guzú lau Jesús dxusédene' benne' ca' dxu'a nísadau', na' belezraga bénneache zante naga zué'. Naxánle'e benne', na' ben na ba xen guxú'u Jesús tu lu da dxedá lawe' nísadau' da dxe na', na' gudxé'e lu'ule da dxedá lawe' nísadau', na' bénneache zan ca' gulezré'e dxu'a nísadau'. ²Nadxa bchalaj Jesús da dxulul'é na, na' bsédene' benne' ca' da zante. Ca dxusédene' benne' ca', na' bchájlaj'e caní:

³—Le xene da nigá. Tu benne' dxaza dxa'ana zéaje' guza. ⁴Ca zéaje' dxaze', na' xeajlechaze bal-la bínnedu ca' dxu'a neza. Na' belezrín bxinne, ne guláguba' bínnedu caní. ⁵Xezícadxa bínnedu ca' xeajlechaze na lu xiaj naga quebe déteca xu. Bínnedu caní belezría na lawe' da quebe déteca xu. ⁶Ca bdxuaj gubizra, na' bzezxe na le' na, na' lawe' da quebe zaj nun lue na lu da situj, gulebizre na. ⁷Xezícadxa bínnedu

ca' xeajlechaze na naga dxelezría xixre' xeche'. Xixre' xeche' caní gulegúladx na ca le na, na' bululule na le na, na' quebe gulebía na da gágudxu. ⁸ Xezícadxa bínneu ca' xeajlechaze na lu xu bebe. Belezría na cháwedau', na' belegula na, ne gulezríale'e na da gágudxu. Bal-la na gulebía na chi dxua tu tu na. Xebal-la na gulebía na ga xun tu tu na. Xebal-la na gulebía na tu gaxúa tu tu na.

⁹ Gunnadxa Jesús, dxē'e benne' ca':

—Che nu benne' zua naguē', dxal-la' xenne' da nigá.

¹⁰ Ca gudé na', ca gucuasa Jesús cuita benne' zan ca', na' gulenaba benne' ca' zrálene' benne' ca' dxusēde Jesús bi zéajē ca naca da dxulé'e nigá. ¹¹ Na' gunná Jesús, dxē'e benne' ca':

—Dios dxunne' le'e lataj nézele ca naca cheē da nagache cheē da dxenná bea Lē'. Na'a, ca naca cheē benne' ca' zaj zré'e cúzrela, dxuchálajlena' le' dízra'ze da dxulé'e na. ¹² Caní dxuna' lawe' da dxelenne'e, na' quebe dxelaca lazre' xelélé'ene'. Dxeleñe', na' quebe dxelaca lazre' xeléajni'ine', cheē quebe xelxebí'i lazre', na' chu'u xel-la wenite lau cheē dul-la da za nabague'.

¹³ Na' gunnadxa Jesús:

—¿Quebe dxéajni'ile ca naca da dxulé'e nigá? ¿Ájalaqueze chéajni'ile xezícadxa dizra' ca' da dxululé'e na? ¹⁴ Benne' dxaza dxá'ane' naque' benne' dxuchálaje' xrtizra Dios. ¹⁵ Bal-la bēneache zaj naque' ca bínneu ca' xeajlechaze na dxu'a neza. Dxeleñe' xrtizra Dios, na' ca dxdé na', dxezrín Satanás, na' dxucuasa na dizra' nigá da zua na xichaj lázrdau benne' ca'. ¹⁶ Benne' xula ca' zaj naque' ca bínneu ca' xeajlechaze na lu xiaj. Ca dxeleñe' xrtizra Dios, na' dxelebéle'ene' dxelezi'e na. ¹⁷ Tu chí'idauze dxelune' caní. Gate dxeledé'e xel-la zi', ne zua da dxdábaga le' ne cheē xrtizra Dios, na' dxelexeuase' lawe' da quebe guxaze

xrtizra Dios lú'ulete xichaj lázrdawe' ca guca cheē bínneu ca' quebe belún lue na lu xu situj. ¹⁸ Benne' xula ca' zaj naque' ca bínneu ca' xeajlechaze na ládujla xixre' xeche' ca'. Dxeleñe' xrtizra Dios. ¹⁹ Lawe' da dxelebe'dxe' gunne xue da naca cheē xezr la xu nigá dxezí xē xel-la gunní'a le', na' dxelezá lazre' da zante da dxelelé'ene'. Xúgute da caní dxelú'u na xichaj lázrdau benne' caní, na' xuluxunite na dizra' da guxú'u xichaj lázrdawe', na' quebe gaca gun na ca da dxal-la' gun dizra' nigá. ²⁰ Zaj zra' benne' dxeleñe' xrtizra Dios, ne dxelezí' lu ne'e na. Bal-le' zaj naque' ca bínneu ca' gulebía na chi dxua tu tu na. Benne' xula zaj naque' ca bínneu ca' gulebía na ga xun tu tu na. Benne' xula zaj naque' ca bínneu ca' gulebía na tu gaxúa tu tu na.

Xúgute da nagache gulé'e lawe na

(Lc. 8.16-18)

²¹ Cá'anqueze gunná Jesús, dxē'e benne' ca':

—¿Gúadxu xi', ne guzúadxu na zran xi'ina u che zran ga dxásedxu? Quebe gundxu ca', san guzúadxu na sibe cheē gusení na. ²² Xúgute da nagache gulé'e lawe na, na' xúgute da xu'u xichaj lázrdaudxu wénqueze na. ²³ Che nu benne' zua naguē', dxal-la' xenne' da nigá.

²⁴ Cá'anqueze gunná Jesús:

—¡Le xene xanne' ca da dxénele! Ca da dxudxíxrele, nen le na' gudxíxrequeze Dios cheēle, na' gúnadxe' le'e dxénele. ²⁵ Caní gaca na, benne' nape' da naca cheē xrtizre'e, gunézrujdxē' chee', na' benne' quebe bi nape', ca da dauze da nape' xecá'ate' na.

Da dxulé'e na ca naca chee binne da dxegula na

²⁶ Na' gunnáqueze Jesús:

—Da dxenná bea Dios naca na ca da dxaca gate tu benne' dxaze' bínneu ca'

lu xu. ²⁷ Dxásiē' chizrela, dxasē' te zra, na' bínneđu caní dxelezría na, ne dxeleg-ula na, ne quegá nézene' ájala. ²⁸ Dxacaca na caní lawe' da nácaqueze ca da dxun xezr la xu. Nedxu dxebía na xr-lege na, nadxa za dau, na' bzébetē dxe-bía na bínneđu ca' lu dau. ²⁹ Gate ba gulegula xíxređu caní, na' dxechugue' na lawe' da ba bzin zra xeque'e na.

**Da dxulé'e na ca naca
chee binne mostaza**

(Mt. 13.31-32; Lc. 13.18-19)

³⁰ Cá'anqueze gunná Jesús:

—¿Ájala gutil-la lébedxu da dxenná bea Dios, u che bila dizra' da dxulé'e na cá'adxu da gutil-la lébedxu le na?

³¹ Naca na ca tu binne mostaza da dxázadxu lu xu. Bínneđu nigá nácadxa cuide' ca da zaj nnita lu xezr la xu.

³² Gate ba gúzadxu na dxegula na, na' dxaca na da zrendxa ca xixre' ca' da zaj naca na ba dagu, na' dxebía zruze na zren, na' dxácatē dxelebía bxínneđu ca' zran zrula chee na.

Ca bgune Jesús da dxulé'e na caní

(Mt. 13.34-35)

³³ Caní bseđu Jesús benne' ca' xrtizra Dios, na' bchálaje' záneteđu da dxululé'e na caní, caditeđu guléajni'ine'. ³⁴ Quebe bchálaje' da xula. Tuzē dizra' da dxulé'e na bchálajlene' benne' ca'. Bzájla'adxē ca' naca na benne' ca' dxusédene'.

Jesús dxebeche zriē' be' bdunu'

(Mt. 8.23-27; Lc. 8.22-25)

³⁵ Lu zra ná'queze, ca gul-la chizrela, na' gunná Jesús, dxē'e benne' ca' dxusédene':

—Chéajdxu xecha la'a nísadau'.

³⁶ Besá'aque' naga zaj zra' benne' zan ca', na' guleché'e Jesús lu da dxedá lawe' nísadau' naga ba dxé'queze', na' gu-lennita xezícadxa da ca' dxeledá lawe' nísadau' ca' naga zaj zra' benne', na' xjá-

calene' Le'. ³⁷ Nadxa guzú lau dxaca tu be' bdunu' lu nísadau' na', na' dxu'ute nisa lu da dxedá lawe' nísadau'. Caní guca guzú lau dxezrá nisa lu da dxedá lawe' nísadau'. ³⁸ Jesús de' dxasiē' lu xcúgüe' naga nácadxa sibe lu da dxedá lawe' nísadau'. Na' bulusebane' Jesús, dx-elé'e Le':

—Benne' wesēđu, ¿quebe dxe'u gunne xue wátedxu nate ca na'a?

³⁹ Nadxa guxasa Jesús, na' bchálajlene' be' bdunu', ne nísadau'. Dxenné':

—¿Gudxé zri'! ¿Zrize guzúa!

Gudxé zri' be' bdunu', na' nísadau' guzúa zri na. ⁴⁰ Nadxa gunná Jesús, dxē'e benne' ca' dxusédene':

—¿Bizr chee na' dxezrébele'e le'e? ¿Quebe dxeajlí lázrele Dios?

⁴¹ Belezrébele'edxe', ne dxelé ljwezre':

—¿Núzraqueze benne' nigá? Dxuluzúa dizra' be' bdunu', ne nísadau' chee'.

**Tu benne' xezre Gadara,
benne' xu'e be' xriwe'**

(Mt. 8.28-34; Lc. 8.26-39)

5 Bezrín Jesús, tu zren nen benne' ca' dxusédene' xecha la'a nísadau' lu xezr la xu chee benne' Gadara ca'. ² Ca bedxúaj Jesús lu da dxedá lawe' nísadau', na' bzin tu benne' xu'e be' xriwe' naga zua Jesús. Bedxúaje' lu bluaj naga zaj nagache benne' gate ca'. ³ Benne' biu nigá zúaqueze' lu bluaj na'. Quebe nu dxezúe guchéaj lebe' chalásaze, lácala nu guchéaj lebe' nen du xia. ⁴ Zane' lasa buluchéaje' lebe' nen du xia na'abe', ne ní'abe'. Bzúzrujbe' du xia ca', na' quegá nu guzeque nna bé'ene' lebe'. ⁵ Dxedáquezebe' te zra chizrela lu xi'a ca', ne lu bluaj ca' naga zaj nagache benne' gate. Dxebezre xa'abe', ne dxeajcházebe' lu xiaj ca', dxun we' cuínabe'. ⁶ Gate ble'ebe' zítu'la ba za Jesús, na' guzá chégube', xeajzú zríbebe' lau Le'. ⁷ Gunné zizraj be' xriwe' xu'ube', dxē na Jesús:

—¿Bizra dxaca chiu' nen neda', Jesús, Zri'ine Dios szrenté? Lu La Xránadxu Dios, dxata' xueda' Lue', quebe gudéu' neda' xel-la zi'.

⁸ Caní gunná na lawe' da gunná Jesús, dxé'e na:

—Lue', da xriwe', bedxúaj lu bel-la' dxen chee benne' nigá.

⁹ Nadxa gunaba Jesús, dxé'e na:

—¿Bi leu'?

Na' bechebe na:

—Da Zan lea', lawe' da naxantu'.

¹⁰ Guta' xue na Jesús chee quebe xeselle' na, ne quebe gucuase' na zitu' lu xezre la xu na'. ¹¹ Zaj zra' gagu lu xi'a na' tu cue' cuche zaj zraba' dxeláguba'. ¹² Gulata' xue be' xriwe' ca' Jesús, gulenná na:

—Besel-la netu' lu cuche ca'. Benna lataj chú'untu' leba'.

¹³ Nadxa Jesús be'e na lataj. Na' be' xriwe' ca' beledxúaj na lu bénnea', na' gulú'u na cuche ca'. Zaj nácaba' ca galaj gaxúa cuche ca', na' buludxixre cuínaba' tu chejéa. Xeajlechásteba' lu nísadau', ne guláteteba' lu nisa na'.

¹⁴ Benne' ca' dxuluxúe' cuche ca' buluxuzrúnnuje', na' xeajlezenne' benne' zaj zré'e lu xezre, ne benne' zaj zré'e le'e xixre'. Na' belezrín benne' ca' naga zua Jesús, benne' ca' belenne' ca da ba guca.

¹⁵ Gate belezrín benne' ca' naga zua Jesús, na' belelé'ene' bénnea' guxú'ube' be' xriwe' ca', dxé'ebe' ga zua Jesús, nácube' tu ladze', ne ba bezúa xrlátaje lu xichaj lázrdaube', na' gulezrebe'.

¹⁶ Benne' ca' belelé'e ca naca da guca chee benne' guxú'ube' be' xriwe' ca', ne ca guca chee cuche ca' buluchálaje' chee da ba guca. ¹⁷ Nadxa benne' xezre ca' gulata' xuene' Jesús xedxúaje' lu xezr la xu chee'.

¹⁸ Ca bexú'u Jesús lu da dxedá lawe' nísadau', na' bénnea' guxú'ube' be' xriwe' ca' guta' xuebe' Jesús gu'e lataj chéajlebe' Le'. ¹⁹ Quebe be' Jesús lebe' lataj, san dxé'e lebe', gunné':

—Bexiaj lizru', ne xeajchálaje' xrtiu' ca' ca naca da zren ca' da ben Xranu' nen lue', ne ca bexache lazre' lue'.

²⁰ Nadxa bezá'abe' zexíajbe', ne guzú laube' dxuchálaje' lu xezre ca' zaj nababa Decápolis ca naca da zren da ben Jesús nen lebe'. Belexebánele'e xúgute benne' zaj zré'e xezre ca'.

Bi nu'ula chee Jairo, ne nu'ula na' xeajté' zra lana Jesús

(Mt. 9.18-26; Lc. 8.40-56)

²¹ Begüén Jesús lu da dxedá lawe' nísadau', na' bezrine' xecha la'a nísadau'. Belezrín benne' zan naga ze', na' Le' begá'ane' dxu'a nísadau'. ²² Ca'an guca bzrin tu benne' xíchaje chee xu'u naga dxelúe lánana judío ca' Dios, benne' le' Jairo. Gate blé'ene' Jesús, na' bzu zribe' zran ni'e. ²³ Guta' xuene' Jesús, dxé'e Le':

—¿Bi nu'ula chia' ba dxátebe'! ¡Gudá, bzé na'u lebe' chee xexácabe', ne xaca banbe'!

²⁴ Nadxa guxíajle Jesús bénnea', na' bénneache zan xjácálene' Le', ne dxuluchíte'e Le'. ²⁵ Ládujla bénneache ca' za tu nu'ula quebe chawe' zue', ba zeaj chazrinnu iza nape' we' dxen. ²⁶ Da zren da bulusaca benne' dxelexún bénneache ca' nu'ula nigá, na' bache ben dítajé' xúgute da nape'. Quegá bi gúcale na le', san bzáladxa we' chee'. ²⁷ Gate ben nú'ula' dxuluchalaj bénneache ca naca chee Jesús, na' bzrine' cúzrua Jesús ládujla bénneache, na' xeajté' zra lana Jesús. ²⁸ Caní bene' lawe' da gunné' lu xichaj lázrdawe': Cun cheajtaza' zra lana Jesús, na' xexácatea'. ²⁹ La gulézate xel-la we' chie', ne la guque bé'etene' ba bexaca bel-la' dxen chee' chee' xízrawe' na'. ³⁰ Gúquebe'e Jesús ben zrin xel-la waca chee'. Chee le' na' bexéchaje', dxenné'e bénneache ca', na' gunábene' le':

—¿Nuzra bedajtá zra lana'?

³¹ Nadxa benne' ca' dxusede Jesús gulé'e Le':

—Dxelé'equeznu' bēneache zan dx-
uluchíe' Lue'. ¿Bizr chee na' dxenabu':
“Nuzra bedajtá neda'?”

³² Jesús guzúe' dxenné'e cuité' chee
lé'ene' nua' bedajtá Le'.

³³ Nadxa guxíaj nu'ula nigá, dxezrízie'
dxezrebe' lawe' da nézene' ca da ba guca
chee', na' bzu zribe' lau Jesús, na' gun-
né' ca naca da li. ³⁴ Nadxa gunná Jesús,
dxe'e nu'ula':

—Bi nú'uladau', ba bexacu' lawe' da
guxeajlí lazru' neda'. Bexíaj, cútudxa
zrebu'. Ba bexácatequezu' chee xízrawe'
da guzxacu'.

³⁵ Ne dxuchálajte Jesús gate belezrín
benne' gusá'aca lizre benne' xíchaje chee
xu'u naga dxelúe lánana judío ca' Dios, na'
gulé'e xra nú'uladau' na':

—Bi nú'uladau' chiu' ba gútebe'. ¿Bizr
chee na' dxunu' zédedxa benne' dxusede
nigá?

³⁶ Gate Jesús benne' ca da gulenná
benne' caní, dxe'e benne' xíchaje chee
xu'u na', gunné':

—Quebe zrebu'. Guxeajlí lazre' neda'.

³⁷ Quebe be'e lataj hjácalē bēneache
zan ca' Le'. Tuze be'e lataj gusá'acale Pe-
dro, ne Jacobo, ne Juan, biche Jacobo
nigá, nen Le'. ³⁸ Ca belezriné' lizre benne'
xíchaje na', na' ble'e Jesús bēneache dx-
elún schaga. Dxelebezre benne', ne dx-
elebezre xa'ate'. ³⁹ Nadxa guxú'u Jesús lu
xu'u, na' dxe'e benne' ca', gunné':

—¿Bizr chee na' dxunle schaga? ¿Bizr
chee na' dxebézrele? Quegá nate bidau'
nu'ula. Dxásezebe'.

⁴⁰ Belún lala benne' ca' chee'. Nadxa
Jesús bebéaje' xúgute benne' ca', na'
guché'e xrabe', ne xrna bidau' nigá, ne
benne' ca' zjácálenē Le', na' guxú'e naga
de nú'uladu na'. ⁴¹ Béxrue' na'be', ne
guzre' lebe':

—Bi nú'uladau', lue' dxapa': ¡Guxasa!

⁴² La bexásate nú'uladu na', na'
guzátēbe' lawe' da ba zéajbe' chazrinnu
iza. Na' benne' ca' zaj zre'e lu xu'u na'

belezrébele'e. ⁴³ Jesús gunná bé'ene'
benne' ca' chee quebe nu xelé'e ca da
bene'. Nadxa guzré' benne' ca' xulugawe'
nú'uladu na'.

Dxezrín Jesús lazrie' da nacan xezre Nazaret

(Mt. 13.53-58; Lc. 4.16-30)

6 Jesús bezé'e naga zue', ne bezrine'
lazrie', na' benne' ca' dxusédene' xjá-
calenē' Le'. ² Ca gula zra dxulupána
judío ca', na' bezú lau Jesús dxusédene'
benne' ca' zaj zre'e lu xu'u naga dx-
elúe lánana judío ca' Dios. Bēneache
zan belenne' chee', ne belexebánene',
dxelenné':

—¿Gazra bsede benne' nigá ca nácate?
¿Bizra xel-la sina da nunezruj Le', ne xel-
la waca zren caní da dxune'? ³ ¿Quegá
benne' nigá gubizre xaga, zri'ine María,
na' benne' biche' ca' zaj naque' Jacobo,
ne José, ne Judas, ne Simón, na' nu'ula
zane' ca' cá'aqueze zaj zrálenē' dxi'u?

Chee le' na' quebe guléajle'e chee
Jesús. ⁴ Na' gunná Jesús, dxe'e benne' ca':

—Xúgute benne' dxelape' ba lánana tu
benne' dxuchálajte' waláz chee Dios, san
benne' waláZR chee' ca', ne benne' xrtie'
ca', ne benne' zaj zre'e xu'u lizre' quebe
dxelape' le' ba lánana.

⁵ Chee le' na' quebe ben Jesús lazrie' na'
netú xel-la waca zren. Tuze bexune' bál-
laze benne' we' gate na' guxrúa ne'e xi-
chaj benne' ca'. ⁶ Bebane Jesús lawe' da
quebe guléajle'e chee'.

Jesús dxusel-le' benne' ca' dxusédene' cheajlechálaje' xrtizra Dios

(Mt. 10.5-15; Lc. 9.1-6)

Ca gudé na' bedé Jesús xecha lasa
xézredu ca' zaj nnita gáguze, na' bsédene'
benne' zaj zre'e ga na'. ⁷ Gunné' benne'
chazrinnu dxusédene', ne guzú lawe'
dxesel-le' le' chupa weaje', ne bnézruje'
le' xel-la waca xulucuae' be' xriwe' ca' lu
be'l-la' dxen chee bēneache ca'. ⁸ Gunná

bé'ene' le' quebe bi xelu'e chee la neza, con tuze xaga da xuluchiche'. Quebe xelu'e xixruj xeta, ne xeta, ne dumí. ⁹Waca xululéaje' zrel'e, ne xelácu'e tu cueze zra lane'. ¹⁰Gunnadxa Jesús, dx'e' benne' ca':

—Gate na' chu'ule le'e tu lu xu'u chee benne', waca xegá'atetele lizre bënnea' ca zrindxa zra xezá'ale lu xezre na'. ¹¹Che zrinle tu lu xezre naga quebe xuluxé lawe' le'e, ne quebe xelénene' chee'le, waca xezá'ale, na' cu'fbetele bxrte xu da dxedá' n'ale. Da nigá gaca na tu da dxulé'e na zaj nabaga benne' xezre na' zria, benne' dxeledábaga' le'e. Da li dxennéa', lu zra guchi'a Dios chee bënneache, waxache' gácadxa da ba xa' da xeledé benne' xezre Sodoma, ne benne' xezre Gomorra quézcala da xeledé benne' xezre ca' naga quebe buluzé nague' chee'le.

¹²Nadxa gusá'aca benne' ca' dxusede Jesús, na' buluchálajlene' bënneache chee xelexebí'i lazre'. ¹³Cá'anqueze belexebéaje' zánete be' xriwe' ca' lu bel-la' dxen chee bënneache ca', na' gulegiü'e da za zane' benne' we', na' belexexaque'.

**Ca gute Juan, benne'
bchue' bënneache nisa**

(Mt. 14.1-12; Lc. 9.7-9)

¹⁴Na' ben wenná bea Herodes ca naca da zren ca' da dxun Jesús lawe' da guzé dizra' chee'. Bal-la benne' dxelenné':

—Juan, benne' bchue' bënneache nisa, bache bebane' ládujla benne' gate, na' chee le na' nap'e' xel-la waca zren nigá.

¹⁵Benne' xula dxelenné':

—Elías, bënnea' bchálaje' waláz chee Dios benne' nigá.

Benne' xula dxelenné':

—Nácalje' bënnea' dxal-la' xelá' guchálaje' waláz chee Dios, che nácalje' benne' gulasa, benne' bchálaje' waláz chee Dios.

¹⁶Ca ben Herodes da caní, na' gunné':

—Benne' nigá naque' Juan, bënnea' gunná be'eda' neda' gulechugue' xíchaje'. Benne' nigá ba bebane' ládujla benne' gate.

¹⁷Caní gunná Herodes lawe' da gunná be'e le' buluzúe' Juan na' lizre xia, ne buluchéaje' le' du xia, da na' bēne' lawe' da dxezrá'a Herodías le'. Herodías nigá guque' zru'ula Felipe, benne' biche Herodes. Herodes nigá bequ'e' nu'ula chee guque' zru'ule'. ¹⁸Gunná Juan, dx'e' Herodes:

—Quebe dxal-la' súa'le'u' zru'ula bi bichu'.

¹⁹Chee le' na' Herodías guzré'e Juan, ne guca lazre' gútete' le'. Quebe guca chee' ²⁰lawe' da neze Herodes naca Juan nigá tu benne' xrlátaje, ne benne' naque' tuze nen Dios, na' bezrebe' le'. Chee le' na' quebe be'e lataj Herodías na' gútete' Juan nigá, na' lácala quebe guxéajni'ine' ca naca xúgute' da bchálaj Juan, Herodes nigá bze nague' chee' du lazre'. ²¹Herodías na' bzrélene' ájala gune' ca da dxaca lazre' gate na' guxú'u laní ca gula la Herodes. Gulé'aj gulagu benne' xíchaje ca', ne benne' dxelenná be'e lu wedil-la, ne benne' zaj naque' blau lu xezre ca' zaj nababa Galilea. ²²Nadxa guxú'u bi nu'ula chee Herodías na' lu xu'u naga dxelé'aj dxelawe', ne bxá'abe' lau benne' ca'. Bezaca ba lazre' Herodes ca bxá'abe', ne tuze ca belún benne' ca' zaj zra' dxelawe' tu zren nen le'. Gunná wenná bea Herodes, dx'e' nu'ula cuide' nigá:

—Gunaba neda' ca da dxedánenu', na' gunna' na chiu'.

²³Guchebe lazre' Herodes, ne bzétaje' Dios gunézruje' bíteteze da nábabe', lácala nábabe' gáchajte naga dxenná be'e le'.

²⁴Nadxa nu'ula cuide' nigá bdxúajbe', xeajchálajlebe' xrnabe', gunabe':

—¿Bizra naba'?

Gunná xrnabe':

—Gunaba xichaj Juan, bënnea' bchue' bënneache nisa.

²⁵ La guxu'ute nu'ula cuide' nigá naga zua wenná bea, na' gunabe', dxē'ebe' lē':

—Dxaca lazra' gunnu' neda' na'a tu lu xé'ena xichaj Juan, bënnea' bchue' bënneache nisa.

²⁶ Nadxa wenná bea nigá bewí'inele'e, ne lawe' da ba bzétaje' Dios, na' belénete benne' ca' da gunné', quebe guca lazre' guzrunē' ca da gunaba bi nu'ula nigá.

²⁷ Cheē lē na' gusel-la wenná bea tu benne' dxēje' wedil-la, ne gunná bé'ene' lē' cheajxrí'e xichaj Juan na'. ²⁸ Guxíaj benne' nigá lu xu'u lizre xia, na' bdxixre' xichaj Juan na', ne bexu'e na tu lu xé'ena. Bnézrujte' na bi nu'ula na', na' lēbe' bnézrujbe' na xrnabe'.

²⁹ Gate gulénneze benne' ca' da nigá, benne' ca' bsēde Juan, na' xējlexexrí'e bēl-la' dxen chee', na' xējlecáchetē' na.

Jesús dxugawē' chi xun gaxúa benne' biu

(Mt. 14.13-21; Lc. 9.10-17; Jn. 6.1-14)

³⁰ Ca gudé na' belexezrín benne' gubáz ca' cheē Jesús naga zua Le', ne buluzenne' Le' xúgute' ca da belunē', ne ca da bulusédene' benne' ca' naga xjaque'.

³¹ Nadxa gunná Jesús, dxē'e benne' ca':

—Le chu'u. Chéajdxu xezí' lázredxu chadite' naga xu'u lataj.

Gunnē' caní lawe' da dxesá'aca benne' dxesá'aca, ne dxelexezrín benne' dxelexezrín, na' quebe dxelu'e lataj xelawē'.

³² Nadxa Jesús ne benne' gubáz chee' ca' belexexú'e lēze' tu lu da dxedá lawe' nísadau', na' belezrine' tu lataj naga quebe nu chilá' benne'. ³³ Benne' zan ca' belelé'ene' ca zjaque', ne belexexúnbe'e Jesús, na' gusá'aca chégüe' xjá'aque' na'. Benne' xúgute' xezre ca' belezrine' lataj na' nédxudxa ca Jesús. ³⁴ Gate bedxúaj Jesús lu da dxedá lawe' nísadau', na' blé'ene' benne' zante, ne bexache lazre'

lē' lawe' da zaj zre'e ca zrila' ca' quebe zua benne' dxuxú'e lēba'. Na' guzú lawe' dxusédene' benne' ca' da zante. ³⁵ Ca gula guzré', belezrín benne' ca' dxusēde Jesús lau Le', na' gulé'e Le':

—Ba dxaca waxrinne, na' quegá nu lizre benne' zua lataj nigá. ³⁶ Besella benne' caní cheē cheajxaque' xezre ca' zaj nnita gálaze cheē xezlí'e xeta xelawē' lawe' da quebe bi de nigá da xelawē'.

³⁷ Na' gunná Jesús, dxē'e lē':

—Le gunezruj le'e da xelawē'.

Na' gulennē', dxelē'e Jesús:

—¿Waca chéajntu' cheajgá'untu' xeta xtila, quízrujntu' lazruj cheē chupa gaxúa zra cheē gugágudxu benne' zan caní?

³⁸ Na' gunná Jesús, dxē'e lē':

—¿Bal-la xeta xtila nápa? Le cheajnná'.

Ca gulénézene', na' gulennē', dxelē'e Jesús:

—Gazxu' xeta xtila, ne chupa bēladau'.

³⁹ Nadxa gunná be'e Jesús gulebé'e xúgute' bënneache ca' tu cue' weaj lu xrugué xa'a. ⁴⁰ Na' gulebé'e tu cue' weaj, du tu gaxú'e, du chi xunē'. ⁴¹ Nadxa Jesús bēxrue' gazxu' xeta xtila ca', ne da chupa bēladau'. Na' guchisa lawe' xabaala, gunabē' lau Dios gun la'azxe' na, na' bzúzruje' xeta xtila ca', ne bnézruje' na benne' ca' dxusédene' cheē gulísie' na chee' benne' ca'. Cá'anqueze gudísie' da chupa bēladau' chee' xúgute' benne' ca'. ⁴² Na' gulagu xúgute' ne gulélajte'. ⁴³ Nadxa buluxutube' ca da begá'ana chee' xeta xtila, ne chee' bēladu ca', na' guca chazrinnu xcuite xca'a. ⁴⁴ Benne' ca' gulawē' xeta xtila ca' zaj naque' chi xun gaxúa benne' biu.

Dxezá Jesús lawe' nísadau'

(Mt. 14.22-27; Jn. 6.16-21)

⁴⁵ La gunná bé'ete Jesús benne' ca' dxusédene' gulu'e lu da dxedá lawe'

nísadau' chee gulelague' nísadau' na' nédxudxa ca Le', chee xelexezrine' lu xezre Betsaida dxácate Le' dxuzé' dizra' benne' ca'. ⁴⁶ Ca gudé bze' dizra' benne' ca', na' guzé'e zéaje' lu xi'a zeajhála-jlene' Dios. ⁴⁷ Gate gula guxrínnequeze, ba zeaj da dxedá lawe' nísadau' na' gachaj lawe' nísadau', na' begá'ana Jesús tuze' lu xu dxu'a nísadau'. ⁴⁸ Gate blé'ene' ca dxelezragu lawe' dxulusé'e da dxedá lawe' nísadau' lawe' da za be' na', dxuzrí' na da dxedá lawe' nísadau' na', na' gula balá' gubiga Jesús naga zaj zré'e, dxezé'e lawe' nísadau' na', ne guca lazre' té'e lau da dxedá lawe' nísadau' na'. ⁴⁹ Gate belelé'ene' Le' zé'e lawe' nísadau' na', guléquene' da dxedá dxela, na' gulebezre xé'e. ⁵⁰ Belelé'e xúgute' ca dxezé'e lawe' nísadau', na' belezrébele'e. Na' gunná Jesús, dxé'e benne' ca' dxusédené':

—Ga zrébele. Neda' nigá. Le gun chuchu lázrele.

⁵¹ Nadxa guluén Jesús lu da dxedá lawe' nísadau' naga zaj zré'e, na' guleza be' na'. Na' guleque zréajene', ne belexebánelé'ene', ⁵² lawe' da quebe ne xeléajni'ine' ca naca xel-la waca zren da bene' chee xeta xtila ca', lawe' da ne dxun zide' xichaj lázrdawe'.

Dxexún Jesús benne' we' ca' lu xezre Genesaret

(Mt. 14.34-36)

⁵³ Gate na' gulelague' nísadau', belezrine' lu xezr la xu chee benne' xezre Genesaret, na' buluchéaje' xaga da dxedá lawe' nísadau' dxu'a nísadau' na'. ⁵⁴ Ca beledxúaje' lu da dxedá lawe' nísadau', la belexéunbeate benneache ca' Jesús. ⁵⁵ La gusá'aca chégu'te' zjaque' lu xezre ca' xeajlexrí'e benne' we' ca' tu tu lu ta'a, na' zeajlegüé'e le' naga zaj nézene' xedé Jesús. ⁵⁶ Gáteteze xézredu ca', ne xezre ca', ne le'e xixre' naga dxedé Jesús, na' buluzú'e benne' we' ca' du la neza, ne gulata' xuené' Jesús

gunézruje' lataj cheajletaze' zra lané', na' xúgute benne' ca' xeajleté' zra lané' belexexácate'.

Da dxucá'ana sban benneache

(Mt. 15.1-20)

7 Benne' fariseo ca' nen bal-la benne' dxuluxuzájle'e da bdxixruj be'e Moisés, benne' gusá'aque' Jerusalén, belezrine' lau Jesús. ² Benne' caní belelé'ene' ca dxelún bal-la benne' dxuséde Jesús, dxelawe' xeta ne quebe zaj naxibe ne'e ca dxelenná bea benne' xudau' ca'. Chee le na' gulenná benne' Jerusalén ca':

—Zaj naca sban na' benne' ca' dxuséde Jesús.

Nadxa gulezí tizre' le'.

³ Caní gulenná benne' ca' lawe' da zjácale benne' xudau' fariseo ca', ne xúgute benne' judío ca' ca naca da belún xra xtau benne' ca', quebe dxelawe' xeta che quebe zaj naxibe ne'e zane' lasa. ⁴ Gate zjaque' lawe' xi'a wa'u, ca dxelexezrine' quebe dxelawe' xeta che quebe xelibe ne'e ca zaj nadxixruj bea benne' xudau' ca'. Cá'anqueze dedxa da zanté da zjácaléne', ca xexadxé zriga' da dxel'é'aje', ne zruaga, ne zriga xé'ena, ne da naga dxelási'e. ⁵ Nadxa benne' fariseo ca', ne benne' ca' dxuluxuzájle'e da bdxixruj be'e Moisés gulenná benne' Jesús:

—¿Bizr chee na' quebe zjácale benne' ca' dxusédenu' ca naca da gulún benne' gula? Dxelawe' xeta, zaj naca sban ne'e.

⁶ Na' bechebe Jesús:

—Láweze dxunle da xrlátaje. Lu lázrdaule xu'ule da calela. Cháwedau' bchálajqueze Isaías ca nácale le'e gate na' bzuaje' caní:

Bénneache caní dxelúe lá'ane' neda' nen dxú'aze'.

Xichaj lázrdawe' ca' zaj nacuasa na neda'.

⁷ Níteze naca xel-la ba lá'ana da dxelu'e neda',

lawe' da dxulusédene' da zaj nadxixruj
bea bénneacheze.

⁸Caní naca xca', le'e dxuzúale chalá'ala
ca da nadxixruj bea Dios, na' zéajlele ca
naca da gulún bénneache ca dxíbele zru-
aga, ne zriga' chee'e, ne zánete da caní
da dxunle.

⁹Na' gunnadxe', dxé'e benne' ca':

—Chala'ala dxuzúale ca da nadxixruj
bea Dios chee zéajlele ca naca da
tu dxúnzquezle. ¹⁰Caní gunná Moisés
na': "Gudapa ba lá'ana xra xrna'u."
Cá'anqueze gunné: "Che tu benne' nne'
schanni' chee xre', che xrne'e, con gáte-
queze bénnea'." ¹¹Le'e dxennale, "Che
tu benne' xe'e xra xrne'e: Corbán," da
zéaje na, quebe gaca gácalena' le'e lawe'
da bache bnézruja' chee Dios ca naca
da de chia'. ¹²Che ca'an dxenné', nadxa
le'e québedxa dxu'ule le' lataj gácalene'
xra xrne'e. ¹³Gate dxunle caní dxuzúale
chalá'ala xrtizra Dios, chee gunle ca da
zéajlele. Na' zéajquezle dxunle zánete da
zaj naca na caní.

¹⁴Xecha lasa gunné Jesús bénneache
ca', na' gunné', dxé'e le':

—Le guzé nágale xúgutele, ne le chéa-
jni'i. ¹⁵Netú da dxe'aj dxagu benne'
quebe seque gucá'ana na le' sban. Da
dxedxuaj na lu xichaj lázrdau bén-
neache, le na' dxucá'ana na le' sban.
¹⁶Le'e zua nágale, le xene.

¹⁷Gate gucuasa Jesús naga zaj zra'
benne' ca', na' guxú'e lu xu'u. Nadxa
benne' ca' dxusédene' gulenábene' Le'
ca naca chee da dxul'é nígá. ¹⁸Nadxa
gunná Jesús, dxé'e le':

—¿Cá'anqueze le'e quebe dxéajni'ile?
¿Quebe dxéajni'ile xúgute da dxe'aj dx-
agu bénneache quebe seque gucá'ana na
le' sban ¹⁹lawe' da quebe dxu'u na lu
xichaj lázrdawe'. Dxu'u na lu le'e, na'
dxedxuaj na?

Gate gunná Jesús caní blé'ene' zaj naca
chawe' xúgute da dxe'aj dxágudxu. ²⁰Na'
gunnadxe':

—Ca naca da dxedxuaj na lu xichaj
lázrdau bénneache, le na' dxucá'ana na
le' sban ²¹lawe' da lu xichaj lázrdau bén-
nea' dxeledxúaj ca da calela da dxuwía
lazre', ne dul-la da dxucá'ana ditaj xel-la
wechaga na', ne dul-la chee da sban, ne
wete benne', ²²ne xel-la gubán, ne da dx-
ezá lazre' gapa da naca chee benne' xula,
ne da calela ca', ne xel-la wezrí xe', ne da
dxezá lazre' da sban, ne xel-la zre'e lazre',
ne xel-la wechalaj dizra' bizruj, ne xel-
la dxun szren cuina, ne xel-la dxucha-
laj bigaze. ²³Xúgute da calela caní dx-
eledxúaj na lu xichaj lázrdau bénneache,
ne dxuluxrinnaj na le'.

Tu nu'ula quebe naca judío dxeajlí lazre' Jesús

(Mt. 15.21-28)

²⁴Na' bezá'a Jesús naga zue', guxíaje'
lu xezre ca' zaj nababa xezre Tiro, ne
xezre Sidón. Guxú'u Jesús tu lu xu'u, ne
quegá guca lazre' nu xene. Quebe guca
gache'. ²⁵La gunézeté tu nu'ula zua Jesús
na'. Nu'ula nígá zua tu zrí'ine' nu'ula,
xu'ube' be' xriwe'. Bla' nu'ula' naga zua
Jesús, ne bzu zribe' lawe'. ²⁶Nu'ula nígá
quebe naque' nu'ula judío. Naque' nu'ula
chee tu xezre nababa xezr la xu Sirofeni-
cia. Bzrine' lau Jesús, na' gunabe' Le' xe-
béaje' be' xriwe' da xu'u zrí'ine' nu'ula.
²⁷Gunná Jesús, dxé'e nu'ula':

—Be' lataj xelagu nedxu zrí'ine benne'
lu xu'u, lawe' da quebe naca chawe'
cúadxu xeta xtila chee bidu ca', ne
gunézrujdxu na chee bécudu ca'.

²⁸Na' gunná nu'ula':

—Awe', Xran, san bécudu ca' zaj zra'
zran ga dxelágube' dxeláguquezba' xeta
bizruj da dxuluzexruj bidu ca'.

²⁹Nadxa gunná Jesús:

—Ne chee dizra' da ba gunnéu', bexíaj
na'a. Bache bedxúaj be' xriwe' lu bel-la'
dxen chee zrí'inu' nu'ula.

³⁰Gate bezrín nu'ula' lizre', na' blé'ene'
zrí'ine' nu'ula debe' lu da naga dxásebe',

na' be' xriwē' ba bedxúaj na lu bēl-la' dxen cheḗbe'.

**Dxexún Jesús tu benne' nacuézruē',
ne quebe dxaca nnie'**

³¹Nadxa bedxúaj Jesús, bezé'e naga nababa xezre Tiro, na' gudétie' naga nababa xezre Sidón, ne xezre ca' zaj nababa Decápolis, na' bezrine' dxu'a nísadau' cheḗ xezr la xu Galilea.

³²Nadxa bedajleguá' benne' ca' tu benne' nacuézruē', ne quebe dxaca nnie', na' gulenábē' Jesús xrúa ne'e benne' nigá. ³³Guché Jesús benne' nigá chalá'ala naga zaj zra' benne' ca', na' bdie' zrube ne'e lu naga bēneea', na' bzre'e zrene', ne bte' lawe' luzre bēneea'.

³⁴Nadxa la gunná'te' xabáa, ne gucá'a lazre', gunné':

—Efata.

Dizxa' nigá zéaje na: Bxalaj.

³⁵Ca gunné' caní, na' bxalaj naga benne' cuesru nigá, ne bexaca luzre'. Nadxa guca bchálaje'. ³⁶Na' gunná Jesús, dxē'e benne' ca' quebe nu xelé'e ca da bene'. Lácala gunná be'ene' le' caní, buluchílujdxē' dizra' ca da bene'. ³⁷Benne' ca' zaj zra' na' belexe-bánele'ene', dxelenné':

—Xúgute dxune' cháwedau'. Dxexune' benne' cuesru ca', na' dxeléntene', ne dxexune' benne' ca' quebe dxaca nnie', na' dxelennétie'.

Dxugagu Jesús chua gaxúa benne' biu

(Mt. 15.32-39)

8 Ca lu zra ca' zaj nazraga benne' zan, na' quebe bi de da xelawe'. Ca'an guca gunné Jesús benne' ca' dxusédene', na' guzre' le':

²—Neda' dxexache lazra' benne' caní lawe' da bache guca chunna zra zaj zre'e nigá nen neda', ne quebe bi de da xelawe'. ³Che ca' xesel-la' le' lizre' quebe xelawe', na' xelate ni'a ne'e la neza lawe' da zá'aca bal-le' zitu'.

⁴Na' belexechebe benne' ca' dxusēde Jesús, dxelē'e Le':

—¿Ájazra gundxu gunézrujdxu da xelawe' nigá, ga quebe nu chilá' benne'?

⁵Jesús bchebe' le':

—¿Bal-la xeta xtila nápa'e le'e?

Benne' ca' gulenné':

—Gazre na.

⁶Nadxa gunná be'e Jesús xebebé xúgute bēneache ca' lu xu. Nadxa guqu'é'e xeta xtila, ne guzre' Dios:

—Xcalenu'.

Nadxa bzúzruje' na, ne bnézruje' na benne' ca' dxusédene', na' benne' caní gulísie' na lávela xúgute bēneache ca'.

⁷Zaj nápaqueze' tu chupa bēladau'. Na' Jesús gunabē' Dios gunē' na chawe'. Nadxa gunná be'ene' gulise benne' ca' le' na. ⁸Gulagu xúgute bēneache ca', ne belezúale'e chawe'. Ca gudé na' bulusuzré'e gazre xcuite xca'a nen xeta bizruj da belegá'ana. ⁹Benne' ca' gulawe' zaj naque' ca chua gaxúa benne' biu. Nadxa Jesús bze' benne' ca' dizra'. ¹⁰Nadxa guxú'e lu da dxedá lawe' nísadau' nen benne' ca' dxusédene'. Xjaque' lu xezr la xu cheḗ benne' xezre Dalmanuta.

Dxelenabe' Jesús gunē' tu xel-la waca

(Mt. 16.1-4; Lc. 12.54-56)

¹¹Nadxa belezrín benne' xudau' fariseo ca' ga na', ne gulezú lawe' dxulutil-le' dizra' nen Jesús. Gulenabē' Jesús gunē' tu xel-la waca da za xabáa, cheḗ xelenézene' bi xel-la waca nape'.

¹²Nadxa Jesús gucá'a dxgua lazre', gunné':

—¿Bizr cheḗ na' dxelenaba benne' caní guna' tu xel-la' waca da za xabáa? Da li dxapa' le'e, québequeze bi xel-la waca guna' lau le'e.

¹³Nadxa Jesús bca'ane' benne' ca', na' bexu'e lu da dxedá lawe' nísadau', dxexíaje' xechelá'a cheḗ nísadau'.

Da naca ca cua zichaj chee xeta xtila*(Mt. 16.5-12)*

¹⁴ Gulal-la lazre' benne' ca' dxusede Jesús xelu'e da xelawe', na' zaj nu'e tuze xeta xtila lu da dxedá lawe' nísadau'.

¹⁵ Nadxa Jesús gunná bé'ene', dxē'e benne' ca':

—iLe nna'xque nigá! Le guxúe cuínale da naca cua zichaj chee xeta xtila chee benne' xudau' fariseo ca', ne ca naca cua zichaj chee xeta xtila chee Herodes.

¹⁶ Nadxa benne' ca' dxusede Jesús gulé ljwezre':

—Le' dxenné' caní lawe' da quebe de xeta xtila gágudxu.

¹⁷ Dxeque be'e Jesús da dxelenné', na' guzre' le':

—¿Bizr chee na' dxennale quebe de xeta xtila gágudxu? ¿Quebe ne chéajni'ile ne quebe dxeque be'ele? ¿Nácale'e zide' lázrdaule? ¹⁸ ¿Quebe dxelé'ele nen xiaj laule, ne quebe dxenle nen ná-gale? ¿Quebe dxejásá lázrele? ¹⁹ Gate na' bgawa' chi xun gaxúa benne' biu nen gazxu' xeta xtila, ¿bal-la xcuite xca'a xeta bizruj da becá'ale?

Benne' ca' gulenné':

—Chazrinna na.

²⁰ Na' gunná Jesús:

—Na' gate na' bgawa' chua gaxúa benne' biu nen gazre xeta xtila, ¿bal-la xcuite xca'a da zaj zratē becá'ale?

Le' gulenné':

—Gazre na.

²¹ Nadxa Jesús guzre' benne' ca':

—¿Ne la gázqueze quebe dxéajni'ile?

Jesús dxexuné' tu benne' la chul-la

²² Ca gudé na' Jesús, ne benne' ca' dxusédene' belexezrine' lu xezre Betsaida, na' benne' Betsaida guleché'e tu benne' la chul-la lau Jesús, na' gulata' xuene' Le' guté' le'. ²³ Jesús gudele' na' benne' la chul-la, ne bebéajē' le' dxu'a xezre. Na' btupe' zrene' lu xiaj lawe', ne

guxrúa ne'e le'. Na' bchebe' le' chete dxelé'ene'. ²⁴ Benne' la chul-la gunné'e, na' gunné':

—Dxelé'eda' benne' ca', zaj naque' ca weaj xaga, na' dxes'aque'.

²⁵ Nadxa Jesús guxrúa ne'e xiaj lawe' da xula, na' benne' na' gunná' dxgüe'. Na' bexaque', ne xúgute bache dxelé'ene' cháwedau'. ²⁶ Nadxa Jesús besel-le' le' lizre', dxē'e le':

—Quebe chu'u lu xezre nigá, ne quebe nu xu'u caní.

Pedro dxenné' naca Jesús benne' nasel-la Dios*(Mt. 16.13-20; Lc. 9.18-21)*

²⁷ Ca gudé na' Jesús, ne benne' ca' dxusédene' xjaque' lu xézredu ca' zaj nababa xezre Cesarea naga dxenná bea Filipino. Dxácatē zaj xu'e neza bchebe Jesús benne' ca':

—¿Nuzra na' dxelenná benne' naca' neda'?

²⁸ Belexechebe':

—Bal-la benne' dxelenné' nacu' Juan, bēnnea' bchue' bēnneache nisa. Benne' xula dxelenné' nacu' Elías, bēnnea' bchálajē' waláz chee Dios. Benne' xula dxelenné' nacu' tu benne' xula bchálajē' waláz chee Dios.

²⁹ Nadxa Jesús bchebe' le':

—¿Gazra le'e? ¿Nuzra dxennale le'e naca' neda'?

Pedro gunné':

—Lue' nacu' Cristo, benne' nasel-la Dios.

³⁰ Nadxa gunná be'e Jesús benne' ca'. Gunné':

—Quebe nu xele ca'.

Dxuchalaj Jesús ca dxal-la' gatiē'*(Mt. 16.21-28; Lc. 9.22-27)*

³¹ Nadxa guzú lau Jesús dxulé'ene' benne' ca' ca dxal-la' sáca'le'e Le', Benne' Gulje' Bēnneache, ne ca xelún benne' gula chee judío ca', ne benne' xíchaje

ca' chee bxruze ca', ne benne' dxuluxu-zájle'e da nadxixruj bea Dios, xuluzúe' Lē' chalá'ala. Nadxa guzre' le' welútie' Lē', san xebane' zra guxunne zra. ³²Da nigá guzre' le' caníqueze. Nadxa Pedro guché'e Jesús chalá'ala, ne guzú lawe' dxedil-le' Lē'. ³³Jesús bexéchaje', ne gunné'e benne' ca' dxusédenē', na' gudil-le' Pedro, dxe'e le':

—Gucuasa cuita' nigá, lue', da xriwe'. Quebe dxéquentu' da nigá ca dxun Dios. Ca dxun bēneache dxunu'.

³⁴Nadxa Jesús gunné' benne' ca' dxusédenē', ne xúgute bēneache ca', na' guzre' le':

—Che núlale dxaca lázrele gunle neda' tuze, dxal-la' guzúale chalá'ala xúgute da dxezá lázrele le'e, ne gácale ca tu benne' zéaje' chee te'e xaga béguaj, na' gunle neda' tu zren. ³⁵Che tu benne' dxaca lazre' guselé' xel-la nabán chee', benne' nigá gunitie' xel-la nabán chee'. Bēnea' gunitie' xel-la nabán chee' ne chia' neda', ne ne chee dizra' chawe' chia', benne' nigá guselé' xel-la nabán chee'. ³⁶Che tu benne' gape' xúgute da naca chee xezr la xu nigá, na' gunitie' bēne'du xu'e, ¿bízraqueze da ba neza gaca na chee bēnea'? ³⁷Quebe bi gaca gunezruj tu benne' chee guselé' bēne'du xu'e. ³⁸Che tu benne' gapa stu'e chia' neda', ne chee dizra' chawe' chia' lau bēne' caní, benne' dxulucá'ana Dios, ne dxelún dul-la, la gaze neda', Benne' Gulje' Bēneache, gapa stú'queza' chee bēnea' gate xida' nen xel-la szren chee Xra', ne nen gubáz chee xabáa lá'azxa ca'.

9 Cá'anqueze guzre Jesús benne' ca':

—Da li dxapa' le'e, zaj zra' nigá benne' quebe xelatie' nédxula ca xeelé'ene' xida xel-la dxenná bea chee Dios nen xel-la waca chee'.

Ca guca gate bcha ca gunná' Jesús

(Mt. 17.1-13; Lc. 9.28-36)

²Ca gudé xrupa zra, guché Jesús Pedro, ne Jacobo, ne Juan, na' guxiájlēne' benne' canize tu lu xi'a sibe. Na' bcha ca gunná' Jesús lau benne' ca'. ³Zra lana Jesús bexaca na chiche ca bezze' da dxáguṭe na laudxu. Quegá nu chilá' benne' lu xezr la xu gaca quibe' zra lane' chee xegá'ana na chiche ca guca zra lana Jesús. ⁴Na' benne' ca' dxuséde Jesús belelé'ene' Elías, ne Moisés, benne' gulate nédxudaṭe, dxuluchálajlēne' Jesús. ⁵Pedro guzre' Jesús:

—Benne' wesede, cháwele'e naca zradxu nigá. Guntu' chunna xu'u lágadau', tu chiu', ne tu chee Moisés, ne tu chee Elías.

⁶Caní gunná Pedro lawe' da dx-elezrebe benne' ca' dxuséde Jesús, na' Pedro quebe nézene' ca da dxenné'. ⁷Nadxa betaj tu beuj naga zaj zre'e, da bcache na le', na' lu beuj na' belenne' tu chi'i benne', gunné':

—Benne' nigá naque' Zri'ina' nazrí'te lazra'. Le xen da dxenné'.

⁸Gate gulenné'e, québedxa nu nalá' nen le', san tuze Jesús.

⁹Dxácate dxelexétaje' lu xi'a na', gunná be'e Jesús benne' ca' quebe nu xuluchálajlēne' ca naca da belelé'ene' gate te na' xebán Benne' Gulje' Bēneache ládujla benne' gate. ¹⁰Chee le' na' gulezúe' zrize ca naca da ba guca. Buluchebe ljwezre':

—¿Bizra zéaje da na', xebane' ládujla benne' gate?

¹¹Nadxa buluchebe' Jesús:

—¿Bizr chee na' dxelenná benne' ca' dxuluxuzájle'e da nadxixruj bea Dios dxal-la' xelá' Elías nédxula ca Cristo?

¹²Bechebe Jesús, na' guzre' le':

—Da li xelá' Elías nedxu, ne gucá'ana chawe' xúgute. ¿Bizra dxenná da naxúaj na lu xiche chee Dios ca gaca chia' neda',

Benne' Gulje' Bénneache? Dxenná na da zan da saca', na' xuluzúa bénneache neda' chalá'ala. ¹³Neda' dxapa' le'e, ba bla' Elías, na' belune' chee' ca naca xúgute da gulaca lazre' ca da dxenná na lu xiche chee Dios ca da dxal-la' gaca chee'.

**Dxexún Jesús tu benne'
cuide' xu'ube' be' xriwe'**

(Mt. 17.14-21; Lc. 9.37-43)

¹⁴Ca gudé na' belexezrine' naga zaj zra' xezícadxa benne' ca' dxusede Jesús, na' belelé'ene' benne' zan zaj naxécha-je' le', ne zaj zráqueze na' benne' dxuluxuzájle'e da nadxixruj bea Dios, na' dxulutíl-lalene' le' dizra'. ¹⁵Gate belelé'ene' Jesús, na' xúgute' belexebánene', na' gusí'aca chégüe' naga zua Jesús, ne bulugape' Le' diuzre. ¹⁶Ca'an guca, Jesús bchebe' benne' ca':

—¿Bizra na' dxedíl-lalele benne' ca'?

¹⁷Nadxa tu benne' ze' ga na' bechebe':

—Benne' wesede, nache'a zri'ina' nigá chee xexunu'-be' lawe' da xu'ube' be' xriwe' da ba nun na lebe' bi quebe dxaca nnebe'. ¹⁸Gáteteze na' dxu'ube' da xriwe', na' dxel-la na lebe', ne dxin na lebe' lu xu. Dxezría bzrina' xú'abe', ne dxagu lázxabe'. Chee le na' ba dxéxrujle'be'. Ba gunaba' benne' ca' dxusédenu' xelxebéa-je' be' xriwe' na', san quebe gulezéquene'.

¹⁹Bechebe Jesús:

—Le'e, benne' quebe dxéajlele chia'. ¿Ájate dxal-la' súa'lena' le'e? ¿Ájate dxal-la' gaca' benne' zren lazre' nen le'e? Le cheajxrí' bi cuide' na' nigá.

²⁰Na' xeajlexrí'e-be'. Gate be' xriwe' na' ble'e na Jesús, na' ben na gudel-la chuna' bi cuide' na', ne gudinna lebe' xu, na' dxe'bixre dxetúl-labe' lu xu, ne guzría bzrina' dxú'abe'. ²¹Nadxa bchebe Jesús xrabe':

—¿Bátate dxezácabe' caní?

Gunná xrabe':

—Gate nácatebe' bidau'. ²²Zane' lasa be' xriwe' na' dxugú'u na lebe' lu xi', ne lu nisa chee gute na lebe'. Che wazéquenu' bi gunu' cheebe', bexache lazre' netu', ne gúcale netu'.

²³Na' guzre Jesús le':

—Che wazéquenu' lue' chéajle'u chia', xúgute wazeque chee benne' dxéajle'e chia'.

²⁴Nadxa xra bi cuide' nigá gunné' zizraj:

—Dxéajle'a chiu'. Gúcale neda' chee chéajledxa'.

²⁵Gate ble'e Jesús dxelezraga benne' zan, na' gudil-le' be' xriwe' na', dxenné':

—Lue', be' xriwe', dxunu' benne' quebe dxaca nnié', ne cuezru, neda' dxenná be'eda' lue' xedxúaju'. ¡Bsan bi cuide' nigá! ¡Québedxa xexú'u lu bel-la' dxen cheebe'!

²⁶Na' be' xriwe' na' gudxezre xa'a na, ne ben na gudel-la chuna' bi cuide' na', na' bedxúaj na. Na' begá'anabe' ca tu benne' gate. Ca'an guca, gulenná benne' zan ca':

—Ba gútebe'.

²⁷Nadxa gucá'a Jesús na'be', bechise'-be'. Na' benne' cuide' na' bezebe'.

²⁸Nadxa guxú'u Jesús tu lu xu'u, na' benne' ca' dxusédene' buluchebe' Le' naga zue' tuze':

—¿Bizr chee na' quebe guzéquentu' netu' xebéajntu' be' xriwe' na'?

²⁹Nadxa Jesús guzre' benne' ca':

—Ca naca be' xriwe' caní séquele xebéajle na che nábale lau Dios, ne gunle gubasa.

**Jesús dxuchálaje' da
xula ca gaca gate gatie'**

(Mt. 17.22-23; Lc. 9.43-45)

³⁰Gate besí'aque' naga zaj zre'e, na' belexedé' naga nababa Galilea. Jesús quebe guca lazre' nu neze ga zue', ³¹lawe' da dxuzéajni'ine' benne' ca' dxusédene', na' guzre' le':

—Zua tu benne' gudéé' neda', Benne' Gulje' Bénneache, lu na' benne' ca' dx-
eledábague' neda', na' xelútié' neda', san
gate gaca chunna zra natia', na' xebana'.

³² Benne' ca' quebe guléajni'ine' ca da
dxéé' le', ne belezrebe' xuluchebe' Le'.

Nu benne' naque' blau

(Mt. 18.1-5; Lc. 9.46-48)

³³ Nadxa belezrine' lu xezre Caper-
naum, na' gate zaj zréé' lu xu'u na',
bchebe Jesús benne' ca' dxusédene':

—¿Bizra dizra' dxutíl-lalele ljwézrele
za'le la neza?

³⁴ Gulezréé' zrize lawe' da bulutil-le'
dizra' la neza na' che nule' nácadxe'
benne' blau. ³⁵ Nadxa Jesús gudxéé',
na' gunné' benne' chazrinnu, benne' ca'
dxusédene', na' guzre' le':

—Che núlale dxaca lázrele gácale
benne' blau, dxal-la' gácale ca benne'
bzebe, ne gunle zrin chee xúgute
bénneache.

³⁶ Nadxa guquéé' tu bidau', na' bzue'
lebe' gachaj lawe' benne' ca'. Na' bnide'-
be', ne guzre' benne' ca':

³⁷ —Benne' na' gape' ba lá'ana tu bidau'
ca bidu nigá lawe' da nazrí'ine' neda',
bénnea' gape' ba lá'ana neda', na' bén-
nea' gape' ba lá'ana neda', quegá tuza'
neda' gape' ba lá'ana, cá'anqueze gape'
ba lá'ana Xra' nasele-le' neda'.

Benne' quebe dxedábague' dxi'u, dxácalene' dxi'u

(Lc. 9.49-50; Mt. 10.42)

³⁸ Nadxa Juan guzre' Jesús:

—Benne' Wesede, blé'entu' tu benne'
dxebájé' be' xriwe' da xu'u bénneache,
dxuchínene' Lau' Lue', san bénnea' quebe
dxune' dxi'u tu zren. Chee le' na'
gúzrentu' le' québedxa guné' ca'.

³⁹ Jesús guzre' benne' ca' dxusédene':

—Quebe bi xele le'. Che nu benne'
guné' tu xel-la waca, guchínene' La'
neda', benne' nigá quebe gaca nne'

schanni' chia'. ⁴⁰ Caní naca na lawe' da
benne' quebe dxedábague' dxi'u, dxá-
calene' dxi'u. ⁴¹ Núteteze benne' gunné'
le'e tu zriga' nisa ne chee La' neda' lawe'
da nácale chia' neda', Cristo, da líqueze
dxennía', wazí'queze' da dxal-la' si'e.

Ca naca da dxun na dxi'u benne' dul-la

(Mt. 18.6-9; Lc. 17.1-2)

⁴² Gunnadxa Jesús:

—Núteteze benne' gulé'ene' tu bidau'
chee gunbe' dul-la, bidu na' dxéajlebe'
chia', cháwedxa guchéajdxu tu xiaj zi'i
lba bénnea', ne cheajchú'unadxu le' lu da
situd chee nísadau'. ⁴³ Che na'u dxun na
gunu' dul-la, wendxa guchugu na'u na'.
Cháwedxa xexú'u xabáa naga gaca banu'
nen tuze na'u quézcala xexíaju' lataj ba
xa' nen dxúpaté' na'u, naga quebe xexula
xi' da xezacu'. ⁴⁴ Lataj ba xa' na' quebe
xelate bzuga', be dxeláguba' benne' ca'
dxelune' da calela, na' xi' na' cabata'
xexúl-laqueze na. ⁴⁵ Na' che ni'u dxun na
gunu' dul-la, guchugu ni'u na'. Cháwedxa
xexú'u xabáa naga gaca banu' nen tu ni'u,
quézcala xexíaju' lataj ba xa' nen dxú-
paté' ni'u, naga quebe xexula xi'. ⁴⁶ Lataj
ba xa' na' quebe xelate bzuga', be dx-
eláguba' benne' ca' dxelune' da calela, na'
xi' na' cabata' xexúl-laqueze na. ⁴⁷ Che
xiaj lau' dxun na gunu' dul-la, guleaj xiaj
lau' na'. Cháwedxa xexú'u naga dxenná
bea Dios nen tuze xiaj lau', quézcala
xexíaju' lataj ba xa' nen dxúpaté' xiaj lau'.
⁴⁸ Lataj ba xa' na' quebe xelate bzuga', be
dxeláguba' benne' ca' dxelune' da calela,
na' xi' na' cabata' xexúl-laqueze na.

⁴⁹ 'Ca dxundxu gate dxugú'udxu zede'
bela' da guzáladxu lu xi' chee xegá'ana
chawe' na, ca'an gaca chee xúgute
benne'. Cá'anqueze dxugú'udxu zede' da
dxuzézxedxu lau Dios. ⁵⁰ Zede' na' naca
na da chawe', san che xenite xel-la sna'a
chee na, ¿ájala gundxu chee guchínedxu
zede' na'? Le gaca le'e ca zede' chawe'

na', ne le sua lu xel-la zri lázre' tule nen xetule.

**Ca naca chee benne'
dxexel'ée nen zru'ule'**

(Mt. 19.1-12; Lc. 16.18)

10 Nadxa bedxúaj Jesús xezre Capernaum, na' guxiáje' naga nababa Judea xechalá'a xegu Jordán naga dxalaj gubizra. Na' belezraga bènneache zan naga zua Jesús, na' xecha lasa na' bsédene' le' cáqueze dxuné'. ²Nadxa bal-la benne' xudau' fariseo ca' belezrine' lau Jesús, na' buluchebe' Le' chee da gun nne' Le' tu da quebe dxal-la' nne'. Buluchebe' Le':

—¿Waca tu benne' xel'ée nen zru'ule'?

³Nadxa bechebe Jesús:

—¿Bizra gunná be'e Moisés le'e?

⁴Na' belexechebe benne' ca':

—Benna Moisés lataj gunézrujdxu zru'uladxu tu xiche da dxenná na dxelá'adxu, na' gusandxu le'.

⁵Nadxa Jesús guzre' le':

—Caní gunná be'e Moisés lawe' da zaj naca zizraj lázrdaule le'e. ⁶Gate nédxudau' gate ben Dios xúgute da dxel'édxu, na' bené' bènneache benne' biu, ne nu'ula, na' gunné': ⁷“Chee le na' benne' biu na' gusané' xruze xrne'e chee gaque' tuze nen zru'ule', ⁸na' dxupe' xelaque' ca tuze benne'.” Ca' naca na, québedxa zaj naca chupe', san tuze benne' zaj naque'. ⁹Chee le na' netú benne' quebe dxal-la' xel'ée da nuchaga Dios.

¹⁰Gate zaj zra' lu xu'u benne' ca' dxusede Jesús buluchebe' Le' xetú lasa ca naca chee da nigá. ¹¹Na' Jesús guzre' benne' ca':

—Che tu benne' xel'ée nen zru'ule', ne xezúalene' nu'ula xula, dxíchuje' xrba chee wechaga na' lawe' da dxusebague' zru'ule' nedxu na' dul-la. ¹²Cá'anqueze che tu nu'ula gusané' benne' chee', ne xezúalene' benne' xula, la gázqueze

dxíchuje' xrba chee wechaga na' da dxusebague' benne' chee' dul-la.

**Jesús dxenabe' Dios
gun chawe'e bidu ca'**

(Mt. 19.13-15; Lc. 18.15-17)

¹³Nadxa bènneache ca' guleché'e bidu chee' ca' lau Jesús chee' xrua ne'e lebe', na' benne' ca' dxusede Jesús gulezú lawe' dxeledil-le' benne' ca' zaj naché'e bidu ca'. ¹⁴Gate ble'e Jesús da dxelune', na' bzre'e, ne guzre' le':

—Le güe bidu ca' lataj xeledá'abe' naga zua. Quebe guzágale-be' lawe' da benne' zaj naque' ca bidu caní xelu'e naga dxenná bea Dios. ¹⁵Da li dxapa' le'e, che tu benne' quebe gape' ba lá'ana da dxenná bea Dios ca dxelún bidu caní, cabata' chu'u bènnea' naga dxenná bea Le'.

¹⁶Nadxa gucá'a Jesús bidu ca', ne bnide'-be'. Guxrúa ne'e lebe', na' gunabe' Dios gun chawe'e-be'.

**Benne' cuide' nape' da gunní'a
dxuchálajlene' Jesús**

(Mt. 19.16-30; Lc. 18.18-30)

¹⁷Gate bexú'u Jesús neza, na' guzáz chegu tu benne' biu, na' bzu zribe' lau Jesús, ne bchebe' Le':

—Benne' xrlátaje, bi dxal-la' guna chee gapa' xel-la nabán zeajlí canna?

¹⁸Jesús guzre' le':

—¿Bizr chee na' dxu'u neda' xrlátaje? Québedxa nu chilá' naca xrlátaje. Tuze Dios naque' xrlátaje. ¹⁹Núnbeaquezu' ca da bdxixruj bea Dios gate na' gunné': Quebe quichju' xrba chee wechaga na'.

Quebe gutiu' benne'.

Quebe cuanu' chee benne'.

Quebe nneu' chee nu benne' da quebe naca na.

Quebe gagu lanu'.

Gudapa ba lá'ana xra xrna'u.

²⁰Nadxa bènnea' bechebe':

—Benne' wesede, xúgute da caní dxuna' nácatea' bidau'.

²¹ Na' Jesús gunné'e le' xrtandau', ne guzre' le':

—Tu da dxexázejnu'. Guxíaj xeajete xúgute da napu', na' bnezruj benne' xache' ca' dumí chee na. Nadxa gapu' da gunní'a xabáa. Na' gudá, gacu' ca tu benne' zéajé' chee te'e xaga béguaj, ne ben neda' tuze.

²² Gate bene' da nigá, na' benne' cuide' na' bewí'ine lázrele'e, na' bexíajé' dxewí'ine' lawe' da nácale'e benne' gunní'a.

²³ Nadxa Jesús gunné'e ni naze, na' guzre' benne' ca' dxusédene':

—Stébeté naca chu'u benne' gunní'a naga dxenná bea Dios.

²⁴ Belexebánele'e benne' ca' dxusede Jesús ca naca dizra' gunná Jesús, na' Le' guzre' le' xetu' lasa:

—Zrí'ina'dau', stébeté naca xelú'u naga dxenná bea Dios benne' dxuluxrén lazre' xel-la gunní'a. ²⁵ Chadixda te tu bea zren lu negue xeche' quézcala chu'u tu benne' gunní'a naga dxenná bea Dios.

²⁶ Gate belén benne' ca' dizra' nigá, na' belexebánele'ene', na' buluchebe ljwezre':

—¿Núzraqueze la xca'?

²⁷ Jesús gunné'e benne' ca', ne guzre' le':

—Quebe seque' nu bénne' gune' da nigá, san Dios wazéquene'. Quebe bi de da quebe gaca gun Dios.

²⁸ Nadxa Pedro guzre' Jesús:

—Xránantu', netu' ba bcá'anantu' xúgute da nápantu', ne zéajlentu' Lue'.

²⁹ Na' bechebe Jesús:

—Da li dxapa' le'e, núteteze benne' gusané' lizre', u benne' biche', u nu'ula zane', u xre', u xrne'e, u zru'ule', u zrí'ine', u xezr la xu chee' ne chia' neda', u ne chee' dizra' chawe' chia', ³⁰ benne' nigá si'e na'a lu xezr la xu nigá tu gaxúa cue' ca' da si'e, xu'u ca', ne benne' biche' ca', ne nu'ula zane' ca', ne xrne'e ca', ne xezr la xu chee' ca', na' weláu zi' xúzre-queze bénneache le'. Lu xezr la xu da za

za' wazí'queze' xel-la nabán zeajlí canna.

³¹ Zánete benne' zaj naca na'a benne' blau xelaque' ca benne' bzebe, na' zánete benne' zaj naca na'a ca benne' bzebe xelaque' benne' blau.

Dxuchalaj Jesús xetu' lasa ca gaca gate gatié'

(Mt. 20.17-19; Lc. 18.31-34)

³² Gate zaj xu'e neza dxelegüene' zjaque' Jerusalén, na' Jesús zria lawe' lau benne' ca' dxusédene'. Dxelezrebe benne' ca', ne lu xel-la dxelezrebe zjácálene' Le'. Na' da xula gucá'a Jesús benne' chazrinnu ca' dxusédene', na' guzú lawe' dx'e'e le' ca naca da dxal-la' gaca chee'.

³³ Na' guzre' le':

—¡Le na' xque nigá! Dxeüendxu zéajdxu Jerusalén naga tu benne' gudéé' neda', Benne' Gulje' Bénneache, lu na' benne' xíchajé ca' chee bxruze ca', ne lu na' benne' dxuluxuzájle'e da nadxixruj bea Dios, na' xelechugue' chia' chee gatiá', na' wuludee' neda' lu na' benne' zitu' ca'. ³⁴ Nadxa xelún le' chia' neda', ne xelu'e neda', ne xuluzré'e neda' zrene', na' xelutie' neda'. Gate gaca chunna zra xebana' ládujla benne' gate.

Jacobo ne Juan dxelenabe' Jesús bi gune' chee'

(Mt. 20.20-28)

³⁵ Nadxa Jacobo ne Juan, zri'ine Zebedeo, belezrine' lau Jesús, na' gul'é'e Le':

—Benne' Wesede, dxaca lázrentu' gunu' cheentu' da nábantú' Lue'.

³⁶ Nadxa bchebe Jesús le':

—¿Bi dxaca lázrele guna'?

³⁷ Na' belexechebe' Le':

—Benna netu' lataj cué'entu', tuntu' chalá'a xabela chiu', ne xetuntu' chalá'a xéglala chiu' naga nna be'u xabáa chiu'.

³⁸ Na' guzre Jesús le':

—Le'e quebe nézele da dxenábale. ¿Waca xí'ajle le'e da na' xi'aj neda', da zéajé na ca naca da sácaxu? ¿Waca

chuale nisa ca chua' neda' nisa lu xel-la gute?

³⁹ Le' belexechebe':

—Wácantu'.

Na' Jesús guzre' le':

—Da li wé'ajle ca naca da na' xi'aj neda', ne chuale nisa ca chua' neda' nisa. ⁴⁰ Chee cué'ele chalá'a xabela chia' u chalá'a xéglala chia', quegá neda' gunna' na. Gaca chee benne' ca' ba nucueza Dios chee'.

⁴¹ Gate xechí benne' ca' dxusede Jesús belemné' na, na' belezre'e nen Jacobo ne Juan. ⁴² Jesús gunné' benne' ca', na' guzre' le':

—Ba nézquezle ca dxelún benne' dxe-lenná be'e benne' xezr la xu ca'. Dxelún cuine' xrane benne' xezr la xu ca'. Benne' blau ládujla le' dxezi'e ba neza xel-la dxenná bea chee'. ⁴³ Quebe gaca caní ládujla le'e. Che nu benne' dxaca lazre' gaque' benne' blau ládujla le'e, benne' nigá dxal-la' guné' zrin chee ljwezre', ⁴⁴ na' che nu benne' ládujla le'e dxaca lazre' gaque' benne' xíchaje, benne' nigá dxal-la' gaque' ca tu benne' nada'u chee guné' zrin chee xúgute ljwezre'. ⁴⁵ Caní gaca na lawe' da cá'anqueze neda', Benne' Gulje' Bénneache, bla'a, quegá chee xelún bénneache zrin chia' neda'. Bla'a chee guna' zrin chee bénneache, ne chee guzúa' xel-la nabán chia' chee guselá' benne' zan.

Dxexún Jesús tu benne' la chul-la le' Bartimeo

(Mt. 20.29-34; Lc. 18.35-43)

⁴⁶ Nadxa belezrine' xezre Jericó. Gate na' bedxúaj Jesús xezre nigá nen benne' ca' dxusédené', ne nen benne' zante, na' zua tu benne' la chul-la le' Bartimeo, zri'ine Timeo, dxe'e dxu'a neza dxenabe' guna'. ⁴⁷ Na' ca bénne' dxedé Jesús, benne' Nazaret, ga na', na' benne' la chul-la nigá guzú lawe' dxenné' zizraj:

—Jesús, Zri'ine David, bexache lazre' neda'!

⁴⁸ Benne' zan ca' guledil-le' le' chee sue' zrize, na' le' zízrajdxa gunné':

—JZri'ine David, bexache lazre' neda'!

⁴⁹ Nadxa gugá Jesús, na' gunné':

—Le nne le'.

Na' gulenné' benne' la chul-la na', gulé'e le':

—Bdipa lazru'. Guxasa lawe' da dxenné' lue'.

⁵⁰ Nadxa bzale' lazxe' naxrúa cuzre' chalá'ala, na' guxritie' chee zrine' lau Jesús. ⁵¹ Nadxa Jesús gunábene' le':

—¿Bizra dxaca lazru' guna' chiu'?

Na' gunná benne' la chul-la:

—Benne' Wesede, dxaca lazra' xexunu' xiaj lawa'.

⁵² Na' Jesús guzre' le':

—Waca xexíaju'. Bache bexacu' lawe' da guxéajle'u chia'.

La ble'ete' benne' la chul-la na', na' guxíajlene' Jesús la neza.

Dxu'u Jesús xezre Jerusalén

(Mt. 21.1-11; Lc. 19.28-40; Jn. 12.12-19)

11 Gate belezrine' gáguze naga dxe' xezre Jerusalén, ne zaj xu'e la neza naga zaj dxe' xezre Betfagé, ne xezre Betania zran xi'a chee xaga olivo ca', na' Jesús gusel-le' chupa benne' ca' dxusédené', ² na' guzre' le':

—Le chjaca lu xézredau' da dxe' tu chi na', na' gate zrinle na', cheajxrácale tu burro da'ba' xaga, bea na' netú benne' quebe ne cuié' le'ba'. Le sezure-ba', ne le che'-ba' nigá. ³ Che nu benne' nabe' le'e bizr chee na' dxesézrele-ba', xégale le': “Xránadxu dxechine'-ba'”, na' la xesél-la'te' le'ba'.

⁴ Nadxa xjaque', ne xeajlexraque' burro na' da'ba' xaga dxu'a dxa xu'u cuita neza, na' gulesézre'-ba'.

⁵ Nadxa bal-la benne' zaj zre'e na' gulé'e le':

—¿Bizra' dxunle? ¿Bizr chee na' dx-esézrele búrrua'?

⁶Nadxa le' gul'é'e benne' ca' ca ba gun-náqueze Jesús, na' belúe' le' lataj. ⁷La belexeché'ete' búrrua' lau Jesús, na' bu-luzríe' zra lane' cúzruba', na' guzría Jesús le'ba'. ⁸Benne' zante' gulechíluje' xicha chee', ne xladxe' la neza, na' benne' xula gulechugue' zina' da gulíxru'e' la neza.

⁹Na' benne' ca' zaj zrie' lawe', ne benne' ca' zjaque' bzébe, gulezú lawe' dx-elenné' zizraj:

—¡Gaca ba! ¡Lá'azxa naca benne' ze'e, nasel-la Xránadxu Dios Le'! ¹⁰¡Lá'azxa naca xel-la dxenná bea da za', xel-la dxenná bea chee xradxu David! ¡Gaca ba Dios!

¹¹Ca'an guca gate na' guxú'u Jesús xezre Jerusalén, na' guxú'e' lu xudau'. Ca gudé gunné'e' xúgute' da zaj nnita du cuité', na' bezé'e' zexíaje' xezre Beta-nia nen benne' chazrinnu ca' dxusédené', lawe' da ba zeaj dxezré'.

Jesús dxugu'e' de' xaga higo

(Mt. 21.18-19)

¹²Gute xu zra xula gate na' gusá'aque' xezre Betania, gudún Jesús. ¹³Na' blé'ene' zítu'la dxe' tu xaga higo zria na laga', na' xeajnné'e' che zria da zixre lu xaga na', san quebe bi zria na. Lágaze zria na lawe' da quebe ne zrin zra cuía na da zixre. ¹⁴Nadxa Jesús guzre' xaga higo na':

—Cabátadxa nu gagu da zixre chiu'.

Benne' ca' dxuséde Jesús belénqueze' na.

Jesús dxexún lbe'e' lu xudau'

(Mt. 21.12-17; Lc. 19.45-48; Jn. 2.13-22)

¹⁵Ca gudé na' belexezrine' xezre Jerusalén. Ca guxú'u Jesús lu xudau', guzú lawe' dxulague' lu xudau' benne' zaj zre'e' wete, ne benne' zaj zre'e' wewa'u na'. Na' bdxixre' blaga chee benne'

weche'e' dumí chee benne' zitu', ne bdxixre' naga dxelebé' benne' wete bgúgudu ca'. ¹⁶Quebe be'e' lataj nu benne' xudé'e' xua ca' lu xudau'. ¹⁷Nadxa bsédené' bén-neache ca', dxenné':

—Lu xiche lá'azxa dxenná Dios: “Lizra' gaca na tu xu'u naga xuluchálajle' Dios benne' zá'aque' xúgute' xezre.” Le'e ba nunle lizra' ca tu lizre benne' gubán ca'.

¹⁸Na' benne' xíchaje' ca' chee bxruze ca', ne benne' dxuluxuzájle'e' ca da nad-xiruj bea Dios belenne', na' gulezú lawe' dxelexíluje' ájala gaca xelútete' Jesús lawe' da dxelezrebe' Le'. Ca'an guca lawe' da dxelexebane xúgute' bénneache ca naca da dxuséde Jesús le'. ¹⁹Ca gula chizrela, Jesús bezé'e' lu xezre.

Dxebizre xaga higo

(Mt. 21.20-22)

²⁰Ca gula zra xula che zílala, na' Jesús, ne benne' ca' dxusédené' belexedé'e' na', na' belelé'ene' xaga higo na', ba nabizre na duté lue na. ²¹Nadxa xeajsa lazre Pe-dro, na' guzre' Jesús:

—Benne' weséde, gunná'xque xaga higo nigá da gulú'u na de'. Bache gubizre na.

²²Jesús gunné':

—Le cheajlí lazre Dios. ²³Da li dxapa' le'e, che nútetezele mnale, xe le xi'a nigá: “Cuasa lue' nigá, xeajchú'u lu nísadau’”, ne che quebe dxun chupa lázrele, na' chéajlele waca da ba gunnale, na' gá-caqueze na. ²⁴Chee le' na' dxapa' le'e, xúgute' da ná bale Dios gate dxuchálajle Le', che chéajlele ba guzile na, ca'an gá-caqueze. ²⁵Gate na' dxuchálajlele Dios, che dxezrá'ale nu benne', le gunita lau chee bénnea' chee cá'anqueze Xrale zu'e' xabáa gunita lawe' dul-la da nabágale. ²⁶Che quebe gunita laule chee bénnea', Xrale zu'e' xabáa quebe gunita lawe' dul-la da nabágale.

**Ca naca xel-la dxenná
bea da napa Jesús**

(Mt. 21.23-27; Lc. 20.1-8)

²⁷ Nadxa belexezrine' xezre Jerusalén, na' ca dxedá Jesús le'aj xudau', na' gulebiga lau Le' benne' xíchajē ca' chee bxruze ca', ne benne' dxuluxuzájle'e da nadxixruj bea Dios, ne benne' gula ca'.
²⁸ Na' benne' caní gulenábene' Jesús:

—¿Bizra xel-la dxenná bea napu' dxunu' da caní? ¿Nuzra benna lue' xel-la dxenná bea nigá?

²⁹ Na' bechebe Jesús:

—Cá'anqueze neda' de tu da nábeda' le'e. Che xechébele chia', nadxa xapa' le'e ca naca xel-la dxenná bea da napa' dxuna' da caní. ³⁰ ¿Nuzra gusel-la Juan bchue' bēneache nisa? ¿Dios che bēneache? Le xechēbe na'a.

³¹ Nadxa gulezú lau benne' ca' dxuluchálaje' leze', dxelé ljwezre':

—Che xedxu Le', Dios gusel-le' le', na' nnáqueze': "¿Bizr chee na' quebe guxéajle chee'?" ³² Che nnadxu bēneache gulesel-le' le', dxal-la' zrēbedxu da xelún benne' xezre ca'.

Caní gulenné' lawe' da xúgute benne' xezre nigá dxeléajle'e guca Juan benne' bchálaje' waláz chee Dios. ³³ Ca'an guca, gulenná benne' ca', dxelé'e Jesús:

—Quebe nézentu'.

Nadxa gunná Jesús, dxe'e le':

—Cá'anqueze neda' quebe nnia' ca naca xel-la dxenná bea da napa' dxuna' da caní.

**Da dxulé'e na ca naca chee benne'
wen zrin quebe zaj naque' xrlátaje**

(Mt. 21.33-46; Lc. 20.9-19)

12 Nadxa guzú lau Jesús dxuchá-lajle' benne' ca' tu da dxulé'e na. Dxe'e le':

—Zua tu benne' bde'e lba uva ca' lu xezr la xu chee', na' bene' le'aj chee na. Bene' tu xiaj lutju naga guchuchuje' uva

ca', ne bene' tu bdupa' naga cue' benne' guxúe' da caní.

¹ Nadxa bdee' xezr la xu chee' na' lu na' benne' wen zrin ca' chee xelune' la'a lina chee na, na' guzé'e zéajē' xezre zitu'.
² Ca gula zra chee lina, na' gusel-le' tu bi wen zrin chee' cheajxezri'ibe' lu na' benne' wen zrin ca' ca naca lina da dxal-la' xezí' benne' xranbe'. ³ Na' benne' wen zrin ca' gulē-le'-be', ne buluzalje'-be', na' belexesel-le'-be' dáchezebe'. ⁴ Nadxa xránabe' gusel-le' bi wen zrin xula, na' bi nigá belú'e-be' xiaj, ne gulelé'e xíchajbe', ne bulucháchalē'-be'. ⁵ Na' xránabe' na' gusel-le' xetube', na' bi nigá belútete benne' ca' lebe'. Ca gudé na' xránabe' gusel-le' bi zandxa bi xula, na' cá'anqueze belú'e bál-labe', ne belútete' xebál-labe'.

⁶ Xránabe' zua tu zrí'ine' bi biu, bi nazrí'ile'ene', na' naga bzébetē gusel-le' zrí'ine' nigá, dxenné' lu xichaj lázrdawe': Dxal-la' xelape' ba lá'ana zri'ina'.
⁷ Benne' wen zrin ca' gulenné', dxelé ljwezre': "Bi nigá gueque chee'be' xezr la xu nigá. Gútetēdxu-be' na'a, na' dxi'u xegá'analēdxu da nigá." ⁸ Ca'an guca, gulē-le'-be', ne belútete'-be', na' gulebéajē' bel-la' dxen chee'be' lu xezr la xu na'.

⁹ Nadxa Jesús gunábene' benne' xudau' ca':

—¿Ájazra gun xrane xezr la xu nigá? Walé'e, na' gúte' benne' wen zrin ca', na' gudé' xezr la xu chee' lu na' benne' xula ca'. ¹⁰ Ba blábale da naxúaj na lu xiche chee Dios. Dxenná na:

Xiaj na' da quebe buluchine benne' wen xu'u,

xiaj na' naca na'a xiaj blau chee xu'u.

¹¹ Da nigá ben Xránadxu, na' dxexebánedxu chee na.

¹² Nadxa gulaca lazre' xelē-le' Jesús lawe' da zaj nézene' bchálaje' da dxulé'e nigá chee gulé'ene' ca zaj naca le'. Quebe bi gulune' lawe' da gulezrebe' bi xelún

benne' xezre ca'. Chee le na' bulusané' Jesús, bes'aque'.

Da bchalaj Jesús chee da dxuchizruj xu'u lawe'

(Mt. 22.15-22; Lc. 20.20-26)

¹³Ca gude na' gulesel-le' lau Jesús bal-la benne' xudau' fariseo, ne benne' zaj de'e Herodes chee gulebéaje' Le' dizra' chee xelezéquene' xelawe' Le' zria. ¹⁴Benne' caní belelé'e lau Jesús, na' gulé'e Le':

—Benne' wesede, ba nézentu' ca dxenná'u da li, ne quebe dxezi'u ca da dxelennaze bénneache, lawe' da quebe dxenná'u Lue' ca zaj naca cúzreze bénneache. Da li naca ca dxusédenu' bénneache da naca chee Dios. ¿Dxunna da nadxixruj bea Dios lataj quízrujdxu da dxuchizruj benne' dxenná bea Roma dxi'u, che cabí? ¿Dxal-la' quízrujdxu, che quebe quízrujdxu?

¹⁵Jesús dxéquebe'ene' quegá du lazre' dxelenábené' Le' da nigá, na' guzre' le':

—¿Bizr chee na' dxebéajle neda' dizra'? Le dajguá nigá tu dumí da dxízrujle chee le'eda' na.

¹⁶Na' bedajlegüé'e na, na' ca ble'e Jesús le na, na' gunábené' le':

—¿Nu lau da' dumí nigá, ne nu la naxúaj na nigá?

Na' gulé'e Le':

—Chee benne' dxenná bea Roma.

¹⁷Nadxa Jesús guzre' benne' ca':

—Le gunezruj chee benne' dxenná bea Roma da naca chee', na' le gunezruj chee Dios da naca chee Dios.

Na' belexebánene' ca naca da bchalaj Jesús.

Da bchalaj Jesús ca xelexebán benne' gate

(Mt. 22.23-33; Lc. 20.27-40)

¹⁸Nadxa belezrín lau Jesús bal-la benne' xudau' saduceo. Benne' caní dx-

elenné' quebe xelexebán benne' gate. Ca'an guca, gulenábené' Jesús caní:

¹⁹—Benne' wesede, Moisés bzuaje' cheedxu da nadxixruj bea nigá: “Che tu benne' biu gatié', ne xegá'ana zru'ule', na' quebe nu zua bi chee bénnea', na' benne' biche' dxal-la' xequé'e nu'ula na' gute benne' chee' chee sua zri'ine bénnea' gutié'.” ²⁰Gulezrá' gazre benne' biche'. Benne' nedxu bchaga na'abe', na' gútebe' quebe nu zri'inebe' zua. ²¹Na' benne' gudxupe' bequé'e nu'ula na', na' cá'anqueze gutié' quebe nu zri'ine' zúaqueze. Cá'anqueze guca chee benne' guxunne'. ²²Ca'an guca, benne' gazre caní gulezúalene' nu'ula na', na' netue' quebe nu zri'ine' guzúa. Naga xeaajsete na gútete nu'ula'. ²³Na'a xca', gate na' xelexebán benne' gate, ¿nula benne' biu caní gaque' benne' chee nu'ula na', lawe' da gulezúale benne' gazre ca' le'?

²⁴Nadxa Jesús guzre' benne' ca':

—Nanítele le'e lawe' da quebe núnbeale da naxúaj na lu xiche chee Dios, ne quebe nézele ca naca xel-la waca chee Dios. ²⁵Gate na' xelexebán benne' gate, québedxa xuluchaga ne'e, ne québedxa xuluchaga na' bi nu'ula ca'. Xelaque' ca zaj naca gubáz chee xabáa. ²⁶Na'a, ca naca chee benne' gate che xelexebané', ¿quebe ne gulábale ca da naxúaj na lu xiche chee Moisés ca gunná Dios gate na' bchálajlene' Moisés tu lu xágadau' da dxala xi'? Gunná Dios caní: “Neda' naca Dios chee Abraham, ne chee Isaac, ne chee Jacob.” ²⁷Dios naque' Dios, quegá chee benne' gate ca'. Naque' Dios chee benne' ban ca'. Ca'an naca, álega nanítele le'e.

Da nadxixruj bea Dios da naca blau

(Mt. 22.34-40)

²⁸Na' zéqueze tu benne' dxuxuzájle'e da nadxixruj bea Dios, na' benne' da dxuchalaj Jesús, ne nézene' bzri'e dizra' chawe', na' gunábené' Le':

—¿Bizra da nadxixruj be'e Dios naca na da blaudxa?

²⁹ Na' Jesús guzre' le':

—Da bdxixruj be'e da naca na da blaudxa ca xúgute dxenná na caní: Le xene benne' Israel. Xránadxu Dios tuze naque'. ³⁰ Bzri'i Xranu' Dios du lazru', ne nen duté bénne'du xu'u, ne nen duté xichaj lázrda'u, ne nen duté xel-la wal-la da napu'. Da nigá naca da nadxixruj bea da blaudxa, ³¹ na' da nadxixruj bea gudxupe' nácaqueze na ca le' na, da dxenná na caní: Bzri'i benne' xula ca nazrí'i cuinu'. Quebe zua xetú da nadxixruj bea da naca blaudxa ca da chupa caní.

³² Nadxa gunná bénnea' dxuxuzájle'e da nadxixruj bea Dios, dx'e'e Jesús:

—Ca'an xanne naca ca bechebu', Benne' dxuséde. Da li naca ca dxennáu'. Zua tuze Dios, ne quebe nu zua xetú ca le', ³³ na' che zri'idxu Dios du lázredxu, ne nen duté xichaj lázrdaudxu, ne nen duté bénne'du xú'udxu, ne nen duté xel-la wal-la da nápadxu, ne che zri'idxu benne' xula ca nazrí'i cuínadxu, da caní zaj zácadxa na ca xúgute be' xixre' ca' dxútedxu-ba' lau Dios, ne ca xúgute da dxuzéxedxu lu cugu chee' Dios.

³⁴ Nadxa Jesús, ca benne' bchálaje' chawe', na' guzre' le':

—Xeláteze ne de' na chee' nna bea Dios xichaj lázrda'u.

Na' québedxa nu bexazre nábene' Le' dizra' ca'.

¿Nu zrí'ine' naca Cristo?

(Mt. 22.41-46; Lc. 20.41-44)

³⁵ Jesús dxusédenē' benne' ca' lu xudau', na' gunné':

—¿Bizr chee' na' dxelenná benne' dxuluxuzájle'e da nadxixruj bea Dios naca Cristo zrí'ine David? ³⁶ David ná'queze ca bzéajni'i Be' Lá'azxa le', gunné': Xránadxu Dios guzre' Xrana': “Gudxé'e chalá'a xabela chia',

ca zrin zra ba nuzúa' benne' dxeledábague' lue', chee' na be'enu' le'.”

³⁷ Che David ná'queze dxenné': “Xrana”, ¿ájala chee' na' naque' zrí'ine'?

Benne' zan ca' du lazre' buluzé' nague' chee'.

Jesús dxulé'ene' zaj nachixre benne' ca' dxuluxuzájle'e da nadxixruj bea Dios

(Mt. 23.1-36; Lc. 11.37-54; 20.45-47)

³⁸ Ca dxuséde Jesús benne' ca', na' gunné':

—Le gapa chi'i cuínale chee' benne' ca'an dxuluxuzájle'e da nadxixruj bea Dios. Benne' caní dxeledánene' dxelácie' zra lané' tunna, ne dxeledánene' xulugapa bénneache le' diuzre nen dizra' ba lá'ana lau bénneache ca'. ³⁹ Benne' caní dxeledánene' dxelebé'e lataj blau lu xu'u naga dxelezraga benne' dxelúe lá'ané' Dios, ne dxeledánene' dxelebé'e lataj blau naga dxelawé' xrche'. ⁴⁰ Benne' caní dxelegü'e lizre xrlataj nu'ula ca' ba gulate benne' chee', na' chee' xululé'e cuine' ca benne' xrlátaje, dxeluné' xel-la dxuluwizraj Dios tunna. Le' zaj nabá-gadxe' zria.

Dumí da gulú'u nu'ula xache' ba gute benne' chie'

(Lc. 21.1-4)

⁴¹ Tu lasa gate na' dxe' Jesús lu xudau' cuíta naga dxelegü'e dumí, na' dxenné'e ca dxelún benne' ca' dxelegü'e dumí, ne ca dxelún benne' gunní'a ca', dxelegü'e dumí zren. ⁴² Ca'an guca, bzrin tu nu'ula xache' ba gute benne' chie', na' gulu'e chupa dumí lásedau' da quebe zaj zácate can. ⁴³ Nadxa gunné' Jesús benne' ca'an dxusédenē', na' guzre' le':

—Da li dxapa' le'e, nu'ula xache' nigá bnézrujdxé' ca xúgute benne' ca'an gulegü'e dumí. ⁴⁴ Xúgute benne' ca' gulegü'e da québedxa dxelechínne'.

Nu'ula xache' nigá gulu'e ca naca da nape', da nunte gawe'.

**Dxuchalaj Jesús ca
gaca gate xrinnaj xudau'**

(Mt. 24.1-2; Lc. 21.5-6)

13 Gate bedxúaj Jesús lu xudau', na' tu benne' dxusédene' guzre' Le':
—Benne' Wesede, gunná'xque ca zren naca xudau', ne xiaj xrtante caní.

²Bechebe Jesús:

—¿Dxelé'enu' na'a ca zren naca xudau' nigá? Québedxa xegá'ana tu xiaj cuzru ljwezre nigá. Ca naca xudau' nigá wabía xí'queze na.

**Da xelunna bea na gate cheajsé
chee xezr la xu nigá**

(Mt. 24.3-28; Lc. 21.7-24; 17.22-24)

³Nadxa xjaque' lu xi'a chee xaga olivo ca', da zua na chalá'a ca li dxa xu'u xudau'. Gate dxe' Jesús ga na', na' Pedro, ne Jacobo, ne Juan, ne Andrés gulé'e Jesús leze':

⁴—Dxaca lázrentu' gulé'enu' netu' bata gaca caní. ¿Bizra da ca' xelunna bea na gaca xúgute da caní?

⁵Na' bechebe Jesús:

—Le gapa chi'i cuñale chee quebe nu si xe le'e, ⁶lawe' da xeledá' benne' zante xelún lu'a neda', welenné' zaj naque' Cristo, na' welezí xe'e benne' zante.

⁷Le'e, gate xénele gaca wedil-la, ne ba dxaca wedil-la, quebe zrébele. Cá'queze dxal-la' gaca na, san quegá ne zrin zra cheajsé chee na, ⁸lawe' da xeledíl-lale benne' tu xezr la xu benne' xetú xezr la xu, na' tu xezre benne' tíl-lale na xetú xezre. Wazrú' zánete xezre, ne wata' gubina', ne wadxé'e na zraga bèneache. Da caní zaj naca na naga su lauze ca naca da xelezaca zi' bèneache.

⁹Le guxúe cuñale lawe' da xuludé' le'e lu na' benne' xu'u lawe', na' xuluzalje' le'e lu xu'u naga dxulucá'ana szrene' Dios. Xuludé' le'e lau benne'

xu'u lawe' ca', ne lau benne' dxelenná be'e lawe' da nácale chia' neda'. Gate ca'an gaca, na' guchálajle chia' neda' lau benne' ca'. ¹⁰Nédxudxa ca zrin zra cheajsé chee na, dizra' chawe' chia' gaca lban chee na lau bèneache zaj zre'e xúgute xezr la xu. ¹¹Gate xeleché'e le'e chee xuludé' le'e lu na' benne' xu'u lawe' ca', quebe cue'le gunne xue bi nnae, ne quebe quilaj lázrele ájala guchálajle. Nnele ca da gunna Dios le'e zra na' lawe' da quegá le'eze nnele, san Be' Lá'azxa, Le' nne'. ¹²Ca xelún bèneache lu zra na', xuludé' bi biche' ca' lu na' benne' xelúti'e lebe'. Cá'anqueze xelún xruze xrna' ca', xuludé' zrí'inequeze'. Na' zrí'ine' ca' weledábagabe' xruze xrnabe', ne xelunbe' xelátie'. ¹³Xúgute bèneache xelezre'e le'e lawe' da nácale chia' neda'. Bénnea' ze tipe' ca zrindxa zra cheajsé chee na, la bénnea'.

¹⁴Daniel, bènea' bchálaje' waláz chee Dios bzuaje' ca naca chee da sban da guzría xi na. Gate lé'ele le'e zria da nigá lataj lá'azxa naga quebe dxal-la' cuía na, nadxa benne' zaj zre'e xezre ca' zaj nababa xezr la xu Judea dxal-la' xuluzrúnnuje', ne chjaque' lu xi'a zren. (Benne' dxulabe' da nigá dxal-la' cheajní'ine' da naca chee na.) ¹⁵Nu benne' zria chju'u lizre' lu zra na' quebe dxal-la' xexétaje' chee bi xebéaje' lu xu'u. ¹⁶Benne' ze le'e xixre' quebe dxal-la' xezrine' lizre' chee xequé'e zra lané'. Dخال-la' xuluzrúnnujte benne' caní. ¹⁷Baxache' xelaca nu'ula zaj zue' zi'i, ne nu'ula ca' zaj nuxre' bidu dxé'ene lu zra na'. ¹⁸Le naba lau Dios chee quebe gaca beu' zaga gate na' dxal-la' guzrúnnujle, ¹⁹lawe' da xelezaca zidxa bèneache lu zra ca'an ca da quebe ne xelezá-cate', gulala ben Xránadxu Dios xezr la xu nigá, ne québedxa xelezácadxe' ca'. ²⁰Che Xránadxu Dios quebe guzáchie' zra ca', québedxa nu láqueze', san ba

bzachie' zra ca'an lawe' da nazrí'ine' bi chee' ca', bi ca' ba gucá'a Lē'.

²¹ 'Lu zra na', che nu benne' dxē'e le'e: "Le na' xque, nigá zua Cristo", u che nne': "Le na' xque, na' zē'", quebe chéa-jlele chee'. ²² Welelá' benne' xelézí xē'e, benne' xelunē' lu'a Cristo, ne xelunē' lu'a xel-la waca chee xabáa chee xelézí xē'e bi ca' ba gucá'a Dios che xelézéquene'. ²³ Le sua le'e ban lazre'. Neda' ba gucha' le'e xúgute nédxute ca gaca na.

Ca gaca gate xida Benne' Gulje' Bénneache

(Mt. 24.29-35, 42-44; Lc. 21.25-36)

²⁴ Nadxa gunná Jesús:

—Lu zra ca', gate te zra chee xel-la zí' caní, na' chul-la gubizra, ne québedxa gusen' beu'. ²⁵ Belaj ca' xelexruj na zran xabáa, na' ca da zaj nalá' zaj zē tipa zran xabáa welezrízete na. ²⁶ Ca nadxa xelélé'ene' neda', Benne' Gulje' Bénneache, za'a lu beuj bza, napa' xel-la waca zren, ne da xabáa chia'. ²⁷ Na' la sél-latea' gubáz chee xabáa chia' ca' chee xuluchague' benne' ca' gunná', benne' zaj zre'e dapa saca chee xezr la xu nigá, benne' zitu' zá'aca nila, zá'aca na'la.

²⁸ 'Le gusede ca naca da dxulé'e na ca naca chee xaga higo. Gate na' dxelaxedxé'ene zruze na, ne zá'aca xr-legue na, na' ba nézele za beu' la. ²⁹ Cá'anqueze, gate na' lé'ele ba dxelaca da caní, nézele ba zua gáguze zra cheajsé na, ne gácate na. ³⁰ Da li dxapa' le'e, xúgute da caní gaca na nédxudxa ca xelate bénneache zaj zre'e lu zra na'. ³¹ Xabáa ne xezr la xu nigá wadé chee na. Xrtizra' nigá quebe te na ca'anze, san waca li na.

³² 'Ca naca chee zra na', ne chee beu' na' quegá nu neze bata gaca na. Quebe zaj neze gubáz chee xabáa, ne Zrí'inequeze Dios quebe nézene'. Tuze Xradxu Dios nézene'.

³³ 'Chee lē na', le sua le'e ban lazre'. Le guxúe, ne le guchálajle Dios lawe' da quebe nézele bátala zrin zra na'. ³⁴ Gaca na ca guca chee tu benne' biu, benne' guzé'e zéaje' zitu'. Gate na' za dxúaje' xu'u, na' dxudé'e da nape' lu na' bi wen zrin chee' ca', ne dxunézruje' tu tube' zrin da xelunbe', ne dxusebague' benne' zē dxa xu'u guxúe xánne'. ³⁵ Chee lē na', le sua le'e ban lazre' lawe' da quebe nézele le'e bátala xelá' xrane xu'u, che dxe xrí'neze, che dxela, che ca cuezre xjeaj, che che zílala, ³⁶ ga gaze xel'é chadí dute, na' cheajxraque' le'e dxásele. ³⁷ Ca da dxennía', dxapa' le'e, dxapa' xúgute benne': ¡Le sua ban lazre'!

Dxelexegá'ane' dizra' chee xelēl-lē' Jesús

(Mt. 26.1-5; Lc. 22.1-2; Jn. 11.45-53)

14 Xechupa zra za zrin chee xelunē' laní chee xulusá lazre' ca naca da ben Dios gate na' bebéaje' benne' Israel ca' lu xezr la xu Egipto, laní na' dxelawe' xeta xtila da quebe nachixre cua zichaj chee na. Na' benne' xíchaje' ca' chee bxruze ca', ne benne' dxuluxuzájle'e da nadxixruj bea Dios belilaj lazre' ájala xelunē' chee xelēl-lē' Jesús bagácheze chee xelútie' Lē'. ² Na' gulenné':

—Quegá gundxu na lu laní, chee quebe dxe'ena zraga bénneache.

Tu nu'ula dxegü'e da za xichaj Jesús

(Mt. 26.6-13; Jn. 12.1-8)

³ Zua Jesús lu xezre Betania, lu lizre tu benne' le' Simón, benne' guzrí'e wē' guzru'. Dxácate zaj dxe'e dxelawe' na', na' bzrin tu nu'ula nu'e tu da dau' da naca na xiaj xrtan da nazí le na alabastro, ne nazrate na da za da dxelá xixre chee xiaj nardo, da zácale'e na. Na' gul'é da dau' na', ne blálaje' da za na' xichaj Jesús. ⁴ Bal-la benne' ca', benne' zaj zre'e na', belezré'e, na' gulenné', dxelē ljwezre':

—¿Bizr chee na' ben ditaj nu'ula nigá da za na'? ⁵Waca ta'u da na' chee sídx-adxu ca lázrujdxu chee tu iza, chee gá-calēdxu benne' xache' ca'. Na' guledil-le' nu'ula'.

⁶Na' Jesús guzre' le':

—Quebe xe le nu'ula nigá ca'. ¿Bizr chee na' dxunle le' zede? Ca naca da ben nu'ula nigá chia' neda' naca na da cháwele'e. ⁷Benne' xache' ca' tu zrázqueze' ládujla le'e. Waca gunle benne' ca' chawe' gate dxaca lázrele, san neda' quegá tu sáaleza' le'e. ⁸Nu'ula nigá bene' ca da guzéqene', gulu'e da za bel-la' dxen chia' nédxula chee zra gate gachia' lu xēdxu ba. ⁹Da li dxapa' le'e, gáteteze na' gaca lban chee dizra' chawe' chia' lu xúgute xezre zaj nnita xezr la xu nigá, cá'anqueze zrálajqueze ca naca da ben nu'ula nigá, chee xulusá lazre' chee'.

Judas dxexegá'ane' dizra' gudée' Jesús lu na' benne' ca' dxeledábage' Le'

(Mt. 26.14-16; Lc. 22.3-6)

¹⁰Nadxa Judas Iscariote, tu benne' chazrinnu ca' dxusede Jesús, guxíaje' xeajchálajlene' benne' xíchaje' ca' chee bxruze ca' chee xelexegá'ane' dizra' ájala gune' gudée' Jesús lu na' benne' ca'. ¹¹Ca belén benne' ca' ca gunná Judas, gulebéle'ene', na' gulechebe lazre' xulunézruje' le' dumí. Nadxa Judas guzú lawe' dxexíaje' ájala gudée' Jesús lu na' benne' ca'.

Da dxágudxu chee gusá lázredxu ca gute Jesús

(Mt. 26.17-29; Lc. 22.7-23;

Jn. 13.21-30; 1 Co. 11.23-26)

¹²Zra nedxu chee laní gate dxelawe' xeta xtila da quebe nachixre cua zichaj chee na, ne dxelutie' zríla'dau' chee Laní Pascua, gate na' dxulusá lazre' ca guca gate bebéaj Dios benne' Israel ca' lu xezr la xu Egipto, na' benne' ca' dxusede Jesús buluchebe' Le':

—¿Gazra dxaca lazru' chéajntu' chea-jcuézentu' da gágudxu Laní Pascua?

¹³Nadxa Jesús gusel-le' chupa benne' ca' dxusédenē'. Dxe'e le':

—Le chjaca lu xezre Jerusalén, na' cheajxrácale tu benne' biu ze nu'e tu dxe'e nisa. Le chjácálene', ¹⁴na' naga xexu'e, xe le benne' xrane xu'u na': “Benne' Wesede cheedxu dxenné': ¿Gazra zua xu'u naga guna' Laní Pascua, chee gawa' tu zren nen benne' ca' dxusédēda'?” ¹⁵Nadxa gul'éene' le'e tu xu'u zren da naca na gudxupe' cuía sibe da bache nabeza na. Na' gucuézale da gágudxu.

¹⁶Nadxa benne' ca' dxusédenē' belexedxúaje' gusá'aque', na' belezrine' xezre Jerusalén. Na' guca xúgute ca da ba guzre Jesús le', na' bulucueze' da xelawe' lu Laní Pascua.

¹⁷Ca gula chizrela, na' bzin Jesús nen benne' chazrinnu ca' dxusédenē'. ¹⁸Na' ca zaj dxe'e dxelawe', na' gunná Jesús, dxe'e le':

—Da li dxapa' le'e, tu benne' ládujla le'e, benne' dxawe' tu zren nen neda', gudée' neda' lu na' benne' ca' dxeledábage' neda'.

¹⁹Nadxa benne' ca' gulezúa xácheze', ne gulezú lawe' dxuluchebe' Jesús tu tue':

—¿Neda' xca'?

Na' xetúe' cá'anqueze guzre' Le':

—¿Neda' xca'?

²⁰Nadxa bechebe Jesús, dxe'e le':

—Tu benne' ládujla le'e chazrinnule, benne' dxawe' tu zren nen neda' lu xé'ena nigá. ²¹Da li gatia' neda', Benne' Gulje' Bénneache, ca da naxúaj na chia' lu xiche chee Dios. Baxache' naca chee benne' na' gudée' neda' lu na' benne' ca' dxeledábage' neda'. Cháwedxa gaca chee bēnea' la ca gúlaje'.

²²Dxácate zaj zre'e dxelawe', na' gucá'a Jesús xeta xtila, ne guzre' Dios:

“Xcalenu’.” Ca gudé bzúzruje’ na, na’ bnézruje’ na chee benne’ ca’, ne guzre’ le’:

—Le gagu na. Da nigá dxulé’e na ca gaca chee bel-la’ dxen chia’.

²³Nadxa guqué’e tu da dxé’ajdxu, ne ca gudé guzre’ Dios: “Xcalenu’”, na’ bnézruje’ na benne’ ca’, na’ xúgute’ gulé’aje’ late’ weaj da na’. ²⁴Nadxa Jesús guzre’ le’:

—Da nigá zéaje na dxen chia’ da dxucá’ana chawe na xel-la wezría cube. Dxen chia’ nigá lalaj na ne chee benne’ zan. ²⁵Da li dxapa’ le’e, québedxa xí’aja’ xrise uva caní ca zrindxa zra gate na’ xí’aja’ da cube naga dxenná bea Dios xabáa.

Dxulé’e Jesús nna Pedro quebe núnbe’e Jesús

(Mt. 26.30-35; Lc.

22.31-34; Jn. 13.36-38)

²⁶Ca gudé belul-le’ da gaca ba Dios, na’ belegüene’ lu Xi’a Xaga Olivo Ca’.

²⁷Nadxa gunná Jesús, dxé’e le’:

—Xúgutele le’e gusán lázrele neda’ na’a xela lawe’ da naxúaj na lu xiche chee Dios, dxenné’: “Gutia’ benne’ dxuxúe’ zrila’ ca’, na’ zrila’ ca’ welase dín-najba’.” ²⁸Gate te xebana’ lu xedxu ba, waxá’a neda’ nédxula ca le’e naga nababa Galilea.

²⁹Nadxa Pedro guzre’ Jesús:

—Láqueze xúgute benne’ caní xulusán lazre’ Lue’, neda’ québequeze guna’ ca’.

³⁰Jesús guzre’ le’:

—Da li dxapa’ lue’, lu xela nigaze, nédxula ca za cuezre xjeaj chupa lasa, nnau’ chunna lasa quebe núnbe’u neda’.

³¹Na’ dxennáqueze Pedro na’, gunné’:

—Láqueze gatia’ tu zren nen Lue’, québequeze nnia’ quebe núnbe’a Lue’.

Cá’anqueze gulenná xúgute’.

Jesús dxuchálajlene’ Dios tu lataj nazí le na Getsemaní

(Mt. 26.36-46; Lc. 22.39-46)

³²Nadxa belezrine’ tu lataj naga nazí le na Getsemaní, na’ gunná Jesús, dxé’e benne’ ca’ dxusédené’:

—Le cueza nigá dxácatę cha’a chea-jchálajlene’ Dios.

³³Nadxa Jesús guché’e Pedro, ne Jacobo, ne Juan, na’ guzú lau dxezúa xáche’le’e. ³⁴Na’ dxé’e benne’ ca’, dxenné’:

—Ba dxunte na watia’ lawe’ da zua xáche’le’a. Le xegá’ana le’e nigá, ne le sua ban lazre’.

³⁵Nadxa Jesús guzre’ zéaje’ xelate’ ca na’la, na’ guzúe’ sudxú’ala, gunabe’ Dios che gaca, quebe té’e xel-la zi’ ca da dxalla’ saque’ lu zra na’. ³⁶Ca dxuchálajlene’ Dios na’, gunné’:

—Xrae, xúgute wazéquenu’ Lue’. Bselá neda’ chee quebe saca zi’a lu da caní. Quebe gaca ca dxaca lázreza’ neda’, san ca dxaca lazru’ Lue’ gaca na.

³⁷Nadxa bezrine’ naga zaj zra’ benne’ ca’an dxusédené’, ne xeaxraque’ le’ dxelásie’. Na’ Jesús guzre’ Pedro:

—Simón, ¿dxásequezu’ nigá? ¿Quebe guzéquenu’ gusebán lazru’ tu chí’idau’ze? ³⁸Le sua ban lazre’, ne le guchálajle Dios chee quebe gun zréaje da xriwe’ le’e. Da li, lu xichaj lázrdaule dxaca lázrele gunle da xrlátaje, san lu bela’ dxen chee dxate ni’a na’le.

³⁹Nadxa Jesús guxíaje’ da xula zea-jchálajlene’ Dios, na’ tuze ca dxenné’.

⁴⁰Nadxa ca bezrine’, xecha lasa xeaxraque’ benne’ ca’an dxusédené’, dxelásie’ lawe’ da xu’u bchigala xiaj lawe’. Benne’ caní quebe belexezrela lazre’ bi xelé’e le’. ⁴¹Na’ ca bezrín Jesús da guxunne’ lasa, na’ guzre’ benne’ ca’:

—¡Le gase na’a, ne le xezí’ lázre’! ¡Bache na! ¡Ba bzrin zra tea’ neda’, Benne’ Gulje’ Bénneache, lu na’ benne’

dul-la ca! ⁴²¡Le chasa! ¡Le chu'u na'a!
 ¡Ba za benne' gudéé' neda' lu na' benne'
 ca' dxeledábague' neda'!

Dxelēl-le' Jesús

(Mt. 26.47-56; Lc. 22.47-53; Jn. 18.2-11)

⁴³Dxácate dxuchalaj Jesús caní, na' bzin Judas, tu benne' nabábalēne' benne' chazrinnu ca' dxusēde Jesús, na' zjácale benne' zan le', zaj nu'e xia nalá, ne xaga ca'. Zaj naque' benne' gulesella benne' xíchaje' ca' chee' bxruze ca', ne benne' ca' dxuluxuzájle'e da nadxixruj bea Dios, ne benne' gula sina ca'. ⁴⁴Judas, benne' dxudéé' Jesús lu na' benne' ca' dxeledábague' Le', ba bl'éene' benne' ca' tu da gune' da gaca bea na nule' naca Jesús, gunné':

—Bénnea' gunupa', benne' na' quél-lale. Le xeché'e, ne le guxúe xanne' chee quebe xelé'.

⁴⁵Na' ca bzrine' na', gubiguē' lau Jesús, ne dxē'e Le':

—Benne' Wesēde.

Na' bnupe' Le'. ⁴⁶Nadxa benne' ca' gulel-le' Jesús, ne belexeché'e Le' ba nadxéaje'.

⁴⁷Tu benne' dxune' Jesús tu zren guléaje' xia nalá chee', na' guchugue' naga tu bi wēn zrin chee' bxruze blau.

⁴⁸Nadxa Jesús guzre' benne' ca':

—¿Bdxuajle le'e zale nen xia nalá, ne xaga ca' chee' quél-lale neda', dxugúnele neda' ca tu benne' gubán? ⁴⁹Xúgute' zra guzúa' neda' ládujla le'e dxusédeda' le'e lu xudau', na' cabata' gudél-lale neda'. Da nigá dxaca na chee' gaca li ca da naxúaj na lu xiche chee' Dios.

⁵⁰Nadxa xúgute' benne' ca' dxusēde Jesús bulusán lazre' Le'. Buluzrúnnuje'.

Dxuzrunnuj tu bi cuide'

⁵¹Tu bi cuide', bi zéajlebe' Jesús, ne nácube' tu ladxe' laga, gulēl-la benne' ca' lebe'. ⁵²Na' bsanbe' ladxe' laga da nácube', na' bzrúnnujbe' gala xídezebe'.

Dxezrín Jesús lau benne' ca' chee xu'u lawe' blau chee judío ca'

(Mt. 26.57-68; Lc. 22.54-55, 63-71; Jn. 18.12-14, 19-24)

⁵³Nadxa beleché'e Jesús lau bxruze blau, na' belezraga xúgute' benne' xíchaje' ca' chee' bxruze ca' ga na', ne benne' gula sina ca', ne benne' ca' dxuluxuzájle'e da nadxixruj bea Dios. ⁵⁴Pedro nawe' Jesús zítu'la, na' bzrine' chale'aj chee' lizre bxruze blau, naga begáane' tu zren nen zruza ni'a na' benne' xu'u lawe' ca', dxuluxuché'e dxu'a xi'.

⁵⁵Na' bxruze blau, ne xúgute' benne' chee' xu'u lawe' blau chee' judío ca' gulflajē' tu da gagu na zria Jesús chee' xelezéquene' xuluzría xi'e Le' chee' gatie', na' quebe bi belezrélene'. ⁵⁶Benne' zante' belún lazre' chee' Jesús. Quebe bedxúaj dizra' chee' tuze ca dxeleonné' tuē' ne xetúe'. ⁵⁷Bal-le' belase', na' gulagu zría Jesús da wēn lazre', dxeleonné':

⁵⁸—Netu' ba bēnnetu' chee', gunné': “Neda' guchínajja' xudau' nigá da belún bēneache, na' ca gaca chunna zra xechisa' xetú xudau' da quebe xelún bēneache.”

⁵⁹Cá'anqueze quebe butil-le ca da dxeleonné'.

⁶⁰Nadxa bxruze blau guxase' ládujla xúgute' benne' ca', na' bchebe' Jesús:

—¿Québequeze bi dizra' dxuxuzri'u Lue'? ¿Bizra da nigá dxeleonné' chiu' Lue'?

⁶¹Jesús guzúe' zrize, ne gútuqueze bi dizra' buzri'e. Na' bxruze blau bchebe' Le' xecha lasa, dxenné':

—¿Nacu' Lue' Cristo, Zri'ine Dios Lá'azxa?

⁶²Na' gunná Jesús, dxē'e le':

—Awe', ca' naca'. Wal'éele neda', Benne' Gulje' Bēneache, dxē'a chalá'a xabēla chee' Dios, nape' dutē xel-la waca. Wal'éele neda' zezá'a lu beuj bza.

⁶³Nadxa bxruze blau gucheze' zra lane', na' gunné':

—¿Núzradxa nachínedxu benne' xe-lagu zria Le'?' ⁶⁴ Le'e bache bénquezle ca dxenné' schanni' chee Dios. ¿Bi dxennale le'e xca'?

Xúgute benne' ca' gulenné':

—Nabía xi'e dخال-la gatie'.

⁶⁵ Nadxa bal-la benne' ca' gulezú lawe' dxuluzré'e Le' zrene', na' bulucache' lau Jesús, ne buluzálaje' Le'. Dxelenné':

—Gunné' xa'a nuzra dxue Lue'.

Na' benne' zruza ni'a na' benne' xu'u lawe' belú'e lau Jesús.

Dxenná Pedro quebe núnbe'e Jesús

(Mt. 26.69-75; Lc. 22.56-62;
Jn. 18.15-18, 25-27)

⁶⁶ Pedro guzú'e lu chale'aj zrila, na' bzrin tu nu'ula wen zrin chee bxruze blau, ⁶⁷ na' ca ble'ebe' Pedro dx'e'e dxu'a xi' dxuxuché'e, na' gunná'abe' le', ne gúzrebe' le':

—Lue' dxedálequezu' Jesús, benne' Nazaret na'.

⁶⁸ Na' bechebe Pedro, dxenné':

—Quebe núnbe'a bénnea', ne quebe nezda' nu chee na' dxuchálaju'.

Na' bedxúaj Pedro chale'aj naga dx-elu'e. Nadxa gudxezre xjeaj. ⁶⁹ Nadxa nu'ula wen zrin chee bxruze blau na' gunná'abe' Pedro xecha lasa, na' gunabe', dx'e'ebe' benne' ca' zaj zré'e na':

—Benne' nigá naque' tuze benne' ca'an.

⁷⁰ Pedro xecha lasa bzue' Jesús chal'áala. Xetú chí'idau' benne' ca' zaj zré'e na' gulé'e Pedro xecha lasa:

—Da líqueze lue' nacu' tuze benne' ca'an lawe' da nacu' benne' chee xezre ca' zaj nababa Galilea. Ca dxuchálaju' naca bea na da na'.

⁷¹ Nadxa Pedro guzú lawe' dxuzría xi' cuine', ne ben chúchue' xrtizre', gunné':

—Quebe núnbe'a bénnea' dxennale le'e ca'.

⁷² Ca'an guca, gudxezre xjeaj da gudxupe' lasa. Nadxa Pedro xeajsá lazre' ca

da guzre Jesús le', gunné': “Nédxudxa ca za cuezre xjeaj chupa lasa, lue' nnau' chunna lasa quebe núnbe'u neda'.” Na' ca xeajsá lazre' da nigá, gudxézrele'e.

Dxezrín Jesús lau Pilato

(Mt. 27.1-2, 11-14; Lc.
23.1-5; Jn. 18.28-38)

15 Ca guxaní' che zila, na' benne' xíchaje ca' chee bxruze ca' belexedupe' nen benne' gula sina ca', ne benne' ca' dxuluxuzájl'e da nadxixruj bea Dios, ne xúgute benne' chee xu'u lawe' blau chee judío ca'. Guleché'e Jesús nadxéaje', na' buludé'e Le' lu na' Pilato. ² Pilato gunábene' Jesús:

—¿Nacu' Lue' wenná bea chee judío ca'?

Na' bechebe Jesús:

—Ca' naca na, ca ba gunnáu' lue'.

³ Na' benne' xíchaje ca' chee bxruze ca' gulawe' zria Jesús da zante. ⁴ Nadxa Pilato gunábene' Jesús xecha lasa:

—¿Quebe bi dizra' dxuzri'u? Gunná'xque ca da zánete da dxelawe' zria Lue'.

⁵ Jesús quebe bi dizra' ca buzri'e. Ca' guca, bebánele'e Pilato.

Dxelichaj be'e gate Jesús

(Mt. 27.15-31; Lc. 23.13-25;
Jn. 18.38—19.16)

⁶ Pilato zua tu da dxúnqueze' tu iza tu iza gate dxaca Laní Pascua. Dxusané' tu benne' xu'e lizre xia, núteteze benne' xelenaba bénneache ca' le'. ⁷ Lu xu'u lizre xia na' xu'u tu benne' le' Barrabás, benne' nune' tu zren benne' ca' belutie' benne' ca', gate na' gudíl-lalene' benne' Roma ca'. ⁸ Na' belezrín lau Pilato benne' xezre ca', ne gulezú lawe' dxelenabe' lau Pilato guné' ca dxúnqueze'. ⁹ Na' bechebe Pilato:

—¿Dxaca lázrele le'e gusana' bénnea' naque' wenná bea chee judío ca'?

¹⁰ Caní gunná Pilato lawe' da dxeque be'ene' buludé'e benne' xíchajé ca' chee bxruze ca' Jesús lu ne'e lawe' da dxe-laque' zre'e lazre' Le'. ¹¹ Na' benne' xíchajé ca' chee bxruze ca' beleché'e benne' xezre ca', ne gulegú'u xel-le' le' chee xelexenabe' lau Pilato gusané' Barrabás. ¹² Nadxa Pilato gunábene' benne' ca':

—¿Bi dxaca lázrele le'e guna' chee bennea' naque' wenná bea chee judío ca'?

¹³ Nadxa belexechebe', gulenné' zizraj:

—Bde'e xaga béguaj.

¹⁴ Na' Pilato bchebe' benne' ca':

—¿Bizra da calela nun benne'?

Xecha lasa gulenné' zizraj:

—Bde'e xaga béguaj.

¹⁵ Nadxa Pilato bsane' Barrabás lawe' da dxaca lazre' xegá'ane' chawe' nen benne' xezre ca'. Na' ca' gudé na' bse-bague' benne' ca' xeline' Jesús tu xide, na' bde'e Le' lu na' benne' ca' chee xuludé'e Le' xaga béguaj.

¹⁶ Nadxa benne' dxjaque' wedil-la guleché'e Jesús lu chale'aj xu'u lawe', na' bulutupe' xúgute ljwezre' benne' dxjaque' wedil-la lataj na'. ¹⁷ Na' bulugácue' Jesús tu ladxe' bzawe, ne buluzríe' xíchajé' tu da zaj nune' nen zruze xaga xeché'. ¹⁸ Nadxa gulezú lawe' dxelenné' zizraj:

—¡Gaca ba wenná bea chee judío ca'!

¹⁹ Na' belú'e xíchaj Jesús nen tu xia xtila, ne buluzré'e Le' zrene'. Na' buluzú zribe' lawe', dxelape' Le' ba lá'ana. ²⁰ Ca' gudé bulucá'ana dítajé' Le' caní, na' belexegu'e ladxe' bzawe, na' buluxugácue' Le' zra lá'anaqueze'. Nadxa belexebáje' Le' chee chjaque' naga xuludé'e Le' xaga béguaj.

Dxuludé'e Jesús xaga béguaj

(Mt. 27.32-44; Lc.

23.26-43; Jn. 19.17-27)

²¹ Tu benne' chee xezre Cirene le' Simón, xra Alejandro, ne Rufo, zezé'e le'e

xixre', na' ca' bedé'e na', na' bulusebague' le' gu'e xaga béguaj chee Jesús.

²² Guleché'e Jesús tu lataj nazí le na Gólgota, da zéaje na "Lataj Chee Zrita Xíchaj Benne' Gate." ²³ Nadxa bulunézruje' Jesús xrise uva wal-la da nachixre da sla' chee mirra. Jesús quebe gu'e na. ²⁴ Nadxa buludé'e Le' xaga béguaj, na' benne' dxjaque' wedil-la gulebéaje' da gulé'e na nule' xelexale' zra lana Jesús, na' bila xelexúa tu tue'.

²⁵ Guca che zílala gate na' buludé'e Jesús xaga béguaj. ²⁶ Buludé'e da naxúaj xíchaj xaga béguaj chee Jesús da dxulé'e na da nabague', da naxúaj na caní: "Wenná Bea Chee Judío Ca'." ²⁷ Cuita Jesús buludé'e le'e xaga béguaj ca' chupa benne' gubán, tue' chalá'a xabela chee', ne xetúe' chalá'a xéglala chee'. ²⁸ Ca'an guca, guca li ca da naxúaj na lu xiche chee Dios naga dxenné' caní: "Buluzue' Le' tu zren nen benne' wen da zrinna' ca'."

²⁹ Na' benne' dxeledé'e na' gulenné' schanni' chee Jesús, ne buluté' xíchajé', dxelenné':

—Awe'. Guchínnaju' Lue' xudau' cheentu', na' gate gaca chunna zra, na' xechisu' na. ³⁰ Bselá cuinu' na'a, ne bexetaj le'e xaga béguaj na'.

³¹ Cá'anqueze belún benne' xíchajé ca' chee bxruze ca', ne benne' dxuluxuzájle'e da nadxixruj bea Dios. Belún le' chee Jesús, dxelé' ljwezre':

—Benne' xula bselá benne, san Le' québequeze dxezéquene' guselá cuine'. ³² Lue', Cristo, wenná bea chee benne' Israel, bexetaj le'e xaga béguaj na' chee le'entu', na' chéajlentu' chiu'.

Cá'anqueze belún benne' ca' zaj de'e le'e xaga béguaj ca' tu zren nen Jesús, gulenné' schanni' chee'.

Dxate Jesús

(Mt. 27.45-56; Lc.
23.44-49; Jn. 19.28-30)

³³Ca bzrin wagubizra, na' guchul-la dute lu xezr la xu nigá tu chí'i wal-la gula. ³⁴Ca gudé na', na' gunná Jesús zizraj:

—Eloi, Eloi, ¿lama sabactani?

Da nigá zéaje na: “Dios chia', Dios chia', ¿bizr chee na' nusanu' neda?”

³⁵Bal-la benne' ca' zaj zre'e na' belene' na, na' gulenné':

—Le xene. Dxenné' Elías, bénnea' bhálajé' waláz chee Dios.

³⁶Nadxa tu benne' guzá chégüe', na' xejlá'awaje' lu xrise uva zichaj tu da dxezrupe na nisa, na' bzué' na lawe' tu xia xtila da bcuene' dxu'a Jesús chee xi'aje', na' gunná benne' nigá:

—Cuézadxu. Guxúexquedxu che wida Elías chee xulétajé' Le'.

³⁷Nadxa Jesús gudxezre xe'e, na' gútete'. ³⁸Ca ná'queze gudxeza ladxe' da ze lu xudau', guca na chúpala. Gucá'a na dxa'la, bedxúajte na zri'la. ³⁹Na' benne' dxenná be'e lu wedil-la, benne' ze' lau Jesús, gate na' blé'ene' ca gudxezre xe'e, ne ca guca gútete', na' gunné':

—Da líqueze benne' nigá guque' Zri'ine Dios.

⁴⁰Cá'anqueze zaj ze na' bal-la nu'ula dxelenné'e zítu'la. Ládujla nu'ula caní zaj ze María Magdalena, ne Salomé, ne María, xrna Jacobo cuide' ne José. ⁴¹Nu'ula caní gusá'acalene' Jesús, ne gulácalene' Le' gate na' gudé' naga nababa Galilea. Cá'anqueze zaj ze na' zánedxa nu'ula xula, nu'ula ca' belezrine' Jerusalén tu zren nen Jesús.

Dxulucache' Jesús lu xedxu ba

(Mt. 27.57-61; Lc.
23.50-56; Jn. 19.38-42)

⁴²⁻⁴³Ca za chizrela bzrin José, benne' Arimatea ga na'. Benne' nigá naque'

benne' blau ládujla benne' ca' chee xu'u lawe' blau chee judío ca'. Cá'anqueze le' dxebeze' zra la' Dios chee nna be'e. Lawe' da naca zra dxulucueze', zra nedxu chee zra dxulupá'ane', du lazre' guxú'e lau Pilato, na' gunabe' si'e lataj xexu'e Jesús. ⁴⁴Bebánele'e Pilato ca bennene' ba gute Jesús, na' gunné' benne' dxenná be'e lu wedil-la na' chee gunabe' che ba guca ca'. ⁴⁵Gate bénnea' dxenná be'e lu wedil-la gunné' ca'an guca, nadxa Pilato bnézruje' José lataj bexu'e Jesús. ⁴⁶Nadxa José guzi'e tu ladxe' xtila laga, na' bulétajé' Jesús, ne bulazre' Le' ladxe' xtila na'. Na' gúxrué' Jesús tu lu ba da ba gudene' le'e xiaj xre, na' bsézxuje' ba na' nen tu xiaj zren. ⁴⁷María Magdalena, ne María, xrna José belelé'equezne' naga bulucache' Jesús.

Dxexebán Jesús ládujla benne' gate

(Mt. 28.1-10; Lc. 24.1-12; Jn. 20.1-10)

16 Ca gudé zra dxulupá'ane', na' María Magdalena, ne Salomé, ne María, xrna Jacobo, gulez'e da dxelá zixre chee cheajlelu'e Jesús. ²Na' bál-la'la zra nedxu chee da gazre zra belezrine' dxu'a ba gate na' za dxalaj gibizra. ³Na' gulenné', dxelé' ljwezre':

—¿Nuzra cua xiaj da naxezxuj ba?

⁴Ca gulenné'e, na' belelé'ene' xiaj zren na' da bulusézxuje' ba, ba nadúa na. ⁵Ca gulu'e lu ba, na' belelé'ene' tu benne' dxe'e chalá'a xabela, nácué' zra lane' tunna da chiche, na' belezrebe'. ⁶Na' gunná benne' nigá, dxé'e nu'ula ca':

—Quebe zrébele. Le'e dxexílajle Jesús, benne' Nazaret, bénnea' gudé'e le'e xaga béguaj. Bache bebán bénnea'. Québedxa xu'e nigá. Le nna' lataj naga gulexrué' Le'. ⁷Le chjaca na'a, le cheajezre benne' ca' bsédene', ne Pedro cuía lau Jesús chéaje' naga nababa Galilea ca le'e. Na' xelé'equezle Le' ca ba gunnáqueze'.

⁸Nadxa nu'ula ca' buluzrúnnuje', besí'aque' dxu'a ba lawe' da

belezrébele'e. Quebe nu guléqueze' ca da guca na lawe' da dxelezébele'e.

Jesús dxulé'e lau María Magdalena

(Jn. 20.11-18)

⁹Ca gudé bebán Jesús ládujla benne' gate ca guxaní' zra nedxu chee' da gazre zra, na' ble'e lawe' zate ca' María Magdalena, nu'ula na' bebéaj Jesús gazre be' xriwe' guxú'e. ¹⁰Nu'ula nigá guxíaje' xea-jezre' benne' ca' gulaque' Jesús tuze, zaj zre'e baxácheze, ne dxelebezre'. ¹¹Gate na' gulenne' nabán Jesús, na' ba ble'e nu'ula nigá Le', quebe guléajle'e.

Dxulé'e lau Jesús chupa benne' bsédene'

(Lc. 24.13-35)

¹²Ca gudé na' ble'e lau Jesús nazrala chupa benne' ca' bsédene' zaj xu'e neza le'e xixre'. ¹³Benne' caní belexebi'e, na' xeaajleguezre' benne' xezícala. Cá'anqueze benne' caní quebe guléajle'e.

Jesús dxusebague' benne' gubáz chee' ca' da dxal-la' xelune'

(Mt. 28.16-20; Lc.

24.36-49; Jn. 20.19-23)

¹⁴Ca gudédxa, na' ble'e lau Jesús chinéaj benne' ca' bsédene' ca zaj dxe'e dxelawe', na' gudil-le' le' lawe' da quebe

guléajle'e ba bebane', ne lawe' da zaj naque' lázrdau zide' lawe' da quebe guléajle'e chee' benne' ca' belexelé'ene' Le' ca gudé bebane'. ¹⁵Na' gunné', dxe'e benne' ca':

—Le chjaca du ca naca xezr la xu. Le cu'u lban chee' dizra' chawe' chia' chee' xelénqueze xúgute' bénneache. ¹⁶Benne' chéajle'e, ne chue' nisa, la bénnea', na' benne' quebe chéajle'e, wabía xi' bénnea'. ¹⁷Da dxelunna bea caní xululé'e benne' ca' xeléajle'e chia', xuluchínene' La neda' chee' xelxebéaje' be' xriwe'. Xuluchálaje' dizra' nazrala. ¹⁸Welúxrue' bela' ca', ne che xelé'aje' da gute benne', quebe bi xeléquene'. Cá'anqueze wuluxrúa ne'e benne' quebe chawe' zaj zue', na' xellexaque'.

Dxexepe Jesús xabáa

(Lc. 24.50-53)

¹⁹Ca gudé bchálaj Xránadxu Jesús nen benne' ca', na' Dios bechise' Le' xabáa, na' gudxé'e chalá'a xabéla chee' Dios. ²⁰Nadxa benne' ca' guledxúaje', xea-jlelu'e lban chee' dizra' chawe' nigá du ca naca xezr la xu nigá. Léqueze Xránadxu gúcalene' le', na' bdxixruj be'e dizra' chee' ne chee' xel-la waca ca' da za xabáa da belune'. ¡Ca'an gaca na!

**DIZRA' CHAWÉ' CA NACA
CHEE JESUCRISTO SDA
BZUJAJ SAN LUCAS**

**Dizra' dxuchalaj San
Lucas, dxé'e Teófilo**

1 Benne' zan ba beluné' ca da gulezéquene' buluzúaje' cáteze naca da guca ládujla dxi'u, ²cáteze na' gulé benne' ca', benne' belelé'ene' nédxudaute' ca naca da guca na, na' buluchálaje' dizra' chawé' na'. ³Cá'anqueze neda' ba bchi'a xánnia' xúgute' da ca' gulaca na nédxudaute, na' dxéqueda' chawé' guzúaja' da nigá chiu' cáteze guca, bi nazrí'ite lazra', lue', Teófilo. ⁴Dxuna' caní chee nézenu' naca na da li ca da ba bululé'ene' lue'.

**Gubáz chee xabáa dxuzenne' ca galaj
Juan, benne' guchúe' bénneache nisa**

⁵Gate na' naca Herodes wenná bea chee xezre ca' zaj nababa Judea, na' zua tu bxruze le' Zacarías, benne' nababe' cue' bxruze ca' gunná be'e Abías ca ní'te. Zru'ula Zacarías na' le' Elisabet, na' nácaqueze Zacarías na' zre sua benne' ca' gulebábale bxruze Aarón. ⁶Zacarías ne zru'ule' Elisabet gulaque' xrlátaje lau Dios, ne dxeluné' ca zaj naca da bdxixruj bea Xránadxu, ne ca da naxúaj na lu da gunné'. Ca'an guca, quebe nu guzeque gagu zria le' lau Dios. ⁷Quebe nu zr'ine' chilá', lawe' da naca Elisabet na' nu'ula wizre, na' dxúpaté' zaj bezúale'e gula.

⁸Tu zra, gate belexala bxruze ca' naga nababa Zacarías xeluné' zrin lu xel-la bxruze chee' lau Dios, ⁹cáteze naca da dxelún bxruze ca', na' bexala Zacarías chu'e lu lataj lá'azxa chee Xránadxu lu xudau' chee guzezxe' xala. ¹⁰Dxácate na' dxezxe xala na', ca naca benne' ca' zaj zra' chalé'ajla dxuluchálajlene' Dios. ¹¹Nadxa ble'e lau tu gubáz chee xabáa

chee Xránadxu, ze' chalá'a xabéla chee cugu naga zría xala dxezxe na. ¹²Ca ble'e Zacarías gubáz chee xabáa na', guzúe' stebe, ne bzrébele'e.

¹³Gubáz chee xabáa na' guzre' le':

—Zacarías, quebe zrebu', lawe' da ba ben Dios dizra' da dxuchálajlenu' Le', na' nu'ula chiu', Elisabet, walaj tu zri'ine', bi na' guzú' labe' Juan. ¹⁴Wabéle'enu', ne gaca chiu' tu da ba neza zrente, na' benne' zan xelebene' lawe' da ba gulaj bidu na'. ¹⁵Ca'an gaca lawe' da gaca zri'inu' szrente lau Dios. Quebe xí'ajbe' xrise uva wal-la, u da dxusuzre na bénneache, na' gate gálajtebe' tu súalezqueze Be' Lá'azxa nen lebe'. ¹⁶Ne chee lebe' benne' zan xelexaque' bi chee Xránadxu Dios. ¹⁷Juan nigá quia laube' lau Xránadxu, na' Be' na', ne xel-la waca da gulezúale' na Elías, bénnea' bchálaje' waláz chee Dios gate nate, xelezúale' na lebe', chee guzúabe' tuze benne' ca' zaj naque' xra xrna nen zr'ine', ne chee gulé'ebe' benne' dxeledábague' Dios chee xeluné' ca dxenná xrtizra' Dios. Ca'an gaca, gucá'ana cháwebe' bénneache chee xezezi' lu ne'e Xránadxu.

¹⁸Zacarías na' bchebe' gubáz chee xabáa:

—¿Ájazra gaca nezda' gaca caní? Neda' ba nagúlale'a, ne cá'anqueze naca nu'ula chia'.

¹⁹Na' bechebe' gubáz chee xabáa na':

—Neda' naca' Gabriel, ne naca' wen zrin chee Dios. Le' gusel-le' neda' chee guchálajlena' lue', ne guzenda' lue' dizra' chawé' nigá. ²⁰Na'a, lawe' da quebe guxéajle'u da gucha' lue', xegá'anu' quebe gaca nníu' cadxa galaj zri'inu'. Caní gaca na ca zrinte zra chee na.

²¹Dxácate na' zaj zra' benne' ca' chalé'ajla, dxelebeze' Zacarías, ne dxelexebánene' lawe' da dxezréle'ene', quebe dxedxúaje' lu lataj lá'azxa. ²²Gate bedxúaj Zacarías, québedxa dxaca nnie'. Nadxa guleque bé'ene' ba ble'e Zacarías

tu da ble'e Dios le' lu lataj lá'azxa na'. Na' le' bta ná'ase', lawe' da quebe dxaca nmie'.

²³ Ca xeajsé chee zra ca' dxal-la' gun Zacarías zrin chee xudau', na' bezé'e zexíajé' lizre'. ²⁴ Ca gude' na' zru'ule' Elisabet ba zue' zi'i, na' quebe bdxúajé' lataj bchina' chié' ca gazxu' beu', na' dxenné' lu lázrdawe': ²⁵ "Xrana' Dios ba bene' chia' da nigá chee québedxa xuluzúa bèneache neda' chalá'ala."

Gubáz chee xabáa dxuzenne' ca galaj Jesús

²⁶ Ca gude' xrupa beu' gate na' bhá-lajle gubáz chee xabáa na' Zacarías, na' Dios gusel-le' le' tu xezre nababa Galilea nazí le na Nazaret, ²⁷ chee cheajhá-lajlene' tu nu'ula cuíde'dau' lebe' María. Lebe' ba zua guchaga na'be' benne' biu na' le' José, benne' naque' zri'ine zre sua wenná bea David.

²⁸ Gubáz chee xabáa na' guxú'e naga zua María na', na' guzre'-be':

—Padiuzre. Dios dxuné' lue' tu culuén. Xránadxu zúalene' lue'. Dios ba bene' tu da cháwedxa chiu' quézcala chee xúgute nu'ula ca'.

²⁹ Gate María na' ble'ebe' gubáz chee xabáa na', bebánebe' ca naca dizra' na', na' gunabe' lu lázrdaube': ¿Bizr chee na' dxugape' neda' diuzre caní?

³⁰ Nadxa gunná gubáz chee xabáa na': —María, quebe zrebu' lawe' da ba bzu'éenu' tu culuén da dxun Dios chiu' lue'. ³¹ Na'a, zua da gunna Dios chiu', na' galaj tu bidu biu chiu', na' guzú' labe' Jesús. ³² Lebe' gácabe' szren, na' xelennáqueze' naque' Zri'ine Dios szrente, na' Xránadxu Dios guné' Le' wenná bea ca guca xra xrtawe' David, ³³ chee nna bé'etecaze' xezr la xu Israel, na' xel-la dxenná bea chee' quebe cheajséqueze chee na.

³⁴ Nadxa María bhébebe' gubáz chee xabáa:

—¿Ájazra gaca da nigá, lawe' da quebe nu benne' biu zúalena'?

³⁵ Gubáz chee xabáa na' gunné':

—Be' Lá'azxa chee Dios sue' xichaj lázrda'u, na' xel-la waca chee Dios szrente sua na nen lue'. Chee le' na' bidu na' gálajbe' gácaquezebe' chee Dios, na' sí'queze labe' Zri'ine Dios. ³⁶ Cá'anqueze bila ljwezru' Elisabet wálajqueze bidu chee' lácala ba naque' benne' gula. Ca'an naca, nu'ula na' gulenné' naque' wizre, ba zeaj xrupa beu' bnezruj Dios chee'. ³⁷ Quebe bi de' da quebe gaca gun Dios.

³⁸ Nadxa gunná María:

—Neda' nácaqueza' wen zrin chee Xránadxu. Gun Dios chia' ca da ba gunnú'.

Na' gubáz chee xabáa na' bezé'e naga zua María na'.

María zeajxúebe' Elisabet

³⁹ Ca lu zra na' María guzá'abe' zéajbe' tu xézredau' da zua na laduj xi'a ca' chee ga nababa Judea. ⁴⁰ Na' guxú'ube' lizre Zacarías, ne bgápabe' diuzre Elisabet. ⁴¹ Gate ben Elisabet dizra' da gunné' María, na' bidu na' xú'ube' le'e Elisabet guxrítebe', na' guzú'ale' Be' Lá'azxa le'.

⁴² Nadxa gunné' tu chí'e zizraj:

—Dios ba bene' tu da cháwedxa chiu' quézcala chee xúgute nu'ula ca', lawe' da ba zua da benna Dios chiu'.

⁴³ ¿Núzraqueze naca' neda', za xrna Xrana' ga zua' neda'? ⁴⁴ Cáteze benda' dizra' da gunnéu', na' guxrite bidu chia' lu le'a lu xel-la dxebe' chee'be'. ⁴⁵ Ba neza naca na chiu' guxéajle'u lawe' da gaca li ca da gunná Xránadxu.

⁴⁶ Nadxa gunná María:

Bénne'du xu'a dxue lá'ana na Xrana'.

⁴⁷ Lázdawa' dxebe' na ca dxun Dios, wese'lá chia'.

⁴⁸ Lawe' da gudxé' Dios gunne xue chia', nácaqueza' wen zrin chee'.

Na'a su lau na, xúgute benne' xelenné' nazi'a tu culuen zren chee Dios.

⁴⁹ Dios Szrentę ba benę' tu da zrentę chia' neda'.

Cheę le' na' lá'azxa naca La Le'.

⁵⁰ Le' xexache lázrqueze' xúgute' benne' ca' dxelezrebe' Le'.

⁵¹ Da zrentę ba ben Le'.

Bzue' zrila benne' ca' dxulucá'ana szren cuine'.

⁵² Bebéaje' benne' blau ca' lu lataj chee', ne bechise' benne' dxexruj lazre' ca'.

⁵³ Bnézrujle'ę da gulagu' benne' dxeledún,

na' benne' gunn'a ca' bca'anę' le' cáaze.

⁵⁴ Gúcalęne' benne' Israel, benne' wen zrin chee' ca'

lawe' da bezrí lázrqueze' le',

⁵⁵ ca da guchebe lazre' chee' xra xrtáudxu ca',

cheę Abraham, ne cheę benne' xrtie' ca' chadía chacanna.

⁵⁶ María begá'analebe' Elisabet ca chunna beu', na' ca gudé na' bezrinbe' lízrebe'.

Ca gulaj Juan, benne' bchue' bėnneache nisa

⁵⁷ Ca gudé na' guxá' beu' cheę Elisabet na' cheę galaj bidu chee', na' guzane' tu bi biu chee'. ⁵⁸ Benne' walíZR chee' ca', ne xrtia ljwezre' belezrine' dxelebene' nen le', gate belenne' Dios bezrí lázrele'ę le'. ⁵⁹ Gate guca xrunu' zra, belezrine' cheę xelechúgue' lu xpélabę' da gulé'e na naca be' bi cheę Dios, na' gulaca lazre' xuluzúe' labe' Zacarías ca le' xrabe'.

⁶⁰ Na' gunná xrnabe':

—Quebe gaca. Dخال-la' si' labe' Juan.

⁶¹ Na' gulé'e le':

—¿Bizr cheę na'? Quebe nu chilá' xrtia ljwézrele le' ca'.

⁶² Na' buluchębe' xra bidu na', bulutá ne'ę cheę xelenézene' ájazra guzúe' labe'.

⁶³ Na' xrabe' na' gunabe' tu blágadau', na' bzujaje' le'ę na: Juan si' labe'. Na' xúgute' benne' ca' belexebánene'. ⁶⁴ Ca' guca Zacarías benné', na' guzú lawe'

dxue lá'anę' Dios. ⁶⁵ Ca belelé'ene' da nigá, xúgute' benne' walíZR chee' belexebánene', na' ca naca xezre zaj nmita laduj xi'a ca ga nababa Judea, buluchálaje' ca da guca. ⁶⁶ Xúgute' benne' belenne' na, gulezú lawe' dxelenné' lu lázrdawe', ne buluchębe ljwezre' tue' xetúe':

—¿Ájazraqueze gun bi nigá?

Naca bea na Xránadxu zúalęne'-be'.

Ca da bil-la Zacarías

⁶⁷ Na' Be' Lá'azxa guzúalęne' Zacarías, xra bidu nigá, na' bchálaje' waláz cheę Dios, gunné':

⁶⁸ ¿Gaca ba Xránadxu, Dios cheę xezre Israel!

Ba ble'ę naga zúadxu, bėnneache chee', na' bselé' dxi'u.

⁶⁹ Ba gusel-le' tu benne' wál-lale'ę, we-selá cheędxu.

Bėnnea' gulaj ládujla xrtia David, benne' wen zrin chee'.

⁷⁰ Ca'an guchebe lazre' Dios lu dxu'a benne' ca' buluchálaje' waláz cheę nédxudaute'.

⁷¹ Guchebe lazre' guselé' dxi'u lu na' benne' dxelezre'ę dxi'u, ne lu na' benne' dxelecuídenę' dxi'u.

⁷² Xezrí lazre' xra xrtáudxu ca', ne quebe gal-la lazre' xel-la wezríá lá'azxa chee'.

⁷³ Da nigá naca na da guchebe lazre' Dios da bzua chachę' nen xra xrtáudxu Abraham,

da naca tu da gunne' cheędxu dxi'u.

⁷⁴ Guchebe lazre' guselé' dxi'u lu na' benne' dxelezre'ę dxi'u

cheę gaca gundxu zrin chee', ne quebe zrėbedxu,

⁷⁵ ne gácadxu xrlátaje lau Le', ne gácadxu bi cheęqueze' xúgute' zra naca bandxu.

⁷⁶ Lue', zrí'ina'dau', sí'queze lau' bi guchálajqueze waláz cheę Dios szrente,

lawe' da quia lau' lau Xránadxu, salju'
neza chee Xránadxu,

⁷⁷ Guzénenu' bénneache chee', Le' gunité
lawe' dul-la chee',

ne guselé' benne' ca'.

⁷⁸ Ca'an gaca lawe' da dxexezrí lazre'
Dios dxi'u.

Dxuné' na'a dxalaj tu xi' chee xabáa da
dxusení' cheedxu,

⁷⁹ na' gusení' na naga zaj zra' benne' zaj
zre'e lu na' xel-la gute,

chee cu'u na dxi'u lu neza xrtante lau
Dios.

⁸⁰ Bidu na' bgúlabe', ne bgula bénne'du
xu'ube' chawe' lu da naca chee Dios.
Guzúaquezbe' le'e xixre' lawe' lataj cadxa
bzrin zra ble'e laube' xezre Israel.

Ca guca gate gulaj Jesús

(Mt. 1.18-25)

2 Ca lu zra na' gate dxenná bea Au-
gusto, benne' xezre Roma, benne'
dxenná be'e xúgute cue' xezr la xu, le'
gunná bé'ene' xelú'u lu xiche xúgute
benne' zaj zre'e xezr la xu. ² Da nigá naca
da nédxudau' gulú'u bénneache lu xiche.

Guca caní gate naca Cirenio benne' zaj
xu'u lu ne'e xezre ca' zaj nababa Siria.

³ Xúgute bénneache dxun na ba xen ch-
jaque' lu xezre naga zaj nababe' chee
xelu'e lu xiche. ⁴ Chee le' na' José guzé'e
lu xezre Nazaret, da nababa Galilea,

chee bzrine' lu xezre Belén, da nababa
Judea, naga gulaj wenná bea David.

Bzrin José na' lawe' da naque' xrtia David
na'. ⁵ José guxíaje' Belén chee chu'e lu
xiche tu zren nen María. María nigá ba
nachébebe' guchaga ná'alebe' José, na'
ba bnezruj Dios cheebe'. ⁶ Dxácaté na'
zaj zre'e lu xezre Belén, na' bzrin zra
san María bidu chee'. ⁷ Lu xezre na' gulaj
bidu nedxu chee', na' bchele'-be' ládxe'du
ca', na' gúxrue'-be' xu'u naga dxelún chi'e
da dxelagu bea ca', lawe' da quebe ga
bzrela tu lataj lu xu'u naga che'e.

Dxuluchálajle gubáz chee xabáa benne' ca' dxuluxúe' zrila' ca'

⁸ Gagu cuita xezre Belén zaj zra' benne'
ca' dxuluxúe' zrila' ca', dxelexegá'ane' le'e
xixre' chizrela, dxuluxúe' zrila' chee' ca'.

⁹ Naga zaj zre'e ble'e lau tu gubáz chee
xabáa chee Xránadxu. Na' xel-la nax-
aní' chee Xránadxu Dios bsaní' na naga
zaj zre'e. Ca'an guca, belezrébele'e. ¹⁰ Na'
gubáz chee xabáa na' guzre' le':

—Quebe zrébele, lawe' da dxuzenla'
le'e tu dizra' chawe'. Ne chee dizra' nigá
xelebéle'e xúgute bénneache. ¹¹ Na'a, lu
xezre chee David, ba gulaj tu bidau'
gácabe' weselá cheele. Bi nigá naque'
Cristo, Xránadxu. ¹² Da nigá gaca na tu
da gunna bea na cheele. Cheajxrácale
bidu dxe'ene nigá, dxélabé' ládxe'du ca',
ne debe' tu xu'u naga dxelún chi'e da xe-
lagu bea ca'.

¹³ Chadí lau, cuita gubáz chee xabáa
na' bululé'e lau zandxa gubáz chee
xabáa, dxelúe láné' Dios, dxelenné':

¹⁴ Gaca ba Dios na'ala,
na' lu xezr la xu nigá sua xel-la dxebeza
zri lazre' chee bénneache,
benne' dxeluné' ca da dxaca lazre' Dios!

¹⁵ Gate besí'aca gubáz chee xabáa ca',
zeajxaque' xabáa, nadxa benne' ca' dxu-
luxúe' zrila' gulezú lawe' dxelé' ljwezre'
tue' xetúe':

—Chéajxquedxu lu xezre Belén chea-
jnnadxu da ba guca, ca da ba gunná Xrá-
nadxu Dios, guzre' dxi'u.

¹⁶ Ca'an guca, besí'aca zézxuje', na'
xeajlexraque' María ne José, ne bidu
dxe'ene na', debe' xu'u naga dxelún chi'e
da xelagu bea ca'. ¹⁷ Gate belelé'ene' bidu
na', na' buluchálajlene' benne' ca' ca da
gunná gubáz chee xabáa ca da naca chee
bidu na'. ¹⁸ Na' xúgute benne' ca' belenne'
da nigá belexebánele'ene' ca da gulenná
benne' caní. ¹⁹ María bcache' da nigá lu
xichaj lázrdawe', na' blaba lazre' ca naca
da nigá. ²⁰ Ca'an guca besí'aca benne' ca'

dxuluxúe zrila', dxulucá'ana szrene' Dios, ne dxelúe lá'ane' Le' ca naca xúgute da belenne', ne da belelé'ene', lawe' da guca xúgute ca da guzre gubáz chee xabáa na' le'.

Ca guca gate belú'e bidu Jesús lu xudau'

²¹ Ca guca xrunu' zra, na' gulechugue' tu lu xpela bidu na' ca da nadxixruj bea na chee Dios, na' belú'e La bidu na' Jesús, cáteze naca da gunná gubáz chee xabáa na', guzre' María nédxudxa ca za gu'e bidu na'.

²² Ca bzrin zra chee xelune' ca bdxixruj bea Moisés chee xellexaque' chawe' lau Dios, na' belú'e bidu na' lu xezre Jerusalén chee xuluzúe'-be' lu na' Xránadxu Dios. ²³ Belune' caní lawe' da ba naxúaj lu da nadxixruj bea Xránadxu Dios da dxenná na caní: Xúgute bi biu, bi nedxu gálajbe' dxal-la' guzúale-be' chee Xránadxu Dios. ²⁴ Na' xjaque' xeajlegu'e dxen chee be xíxre'du ca' lau Dios ca da dxenná da nadxixruj bea na chee Xránadxu Dios, da dxenná na: Chupa bgugu, che chupa bxínnedau'.

²⁵ Ca lu zra na' zua tu benne' biu gula lu xezre Jerusalén, le' Simeón. Naque' tu benne' chawe', na' dxue lá'anaqueze' Dios, ne dxebeze' benne' sel-la Dios chee guselé' bènneache Israel. Zúale Be' Lá'azxa chee Dios Simeón na'. ²⁶ Be' Lá'azxa ba guzre' Simeón na' quebe gatie' cadxa lé'ene' Cristo, benne' na' sel-la Xránadxu Dios. ²⁷ Simeón nigá guxíaje' lu xudau' lawe' da bsi' Be' Lá'azxa chee Dios le'. Na' gate xra xrna bidu Jesús zaj nu'e-be' lu xudau' chee xelune' chee'be' ca da bdxixruj be'e Moisés, ²⁸ na' Simeón na' guqu'e' bidu na'. Bnide'-be', ne be lá'ane' Dios, gunné':

²⁹ Xrana', na'a waca gunnu' lataj gatia' lu xel-la dxebeza zri lazre' lawe' da ba benu' ca da guchebe lazru' chia', naca' wen zrin chiu'.

³⁰ Nen xiaj láuqueza' ba ble'eda' Benne' Weselá,

³¹ Bénnea' ba bzu' chee gácalene' xúgute bènneache.

³² Le' naque' tu xi' da gusení na chee benne' quebe zaj nababe' Israel.

Ne chee Le' gaca tu da ba neza chee bènneache chiu', benne' Israel.

³³ José ne xrna Jesús belexebánele'ene' ca da gunná Simeón chee bidu Jesús.

³⁴ Nadxa Simeón gunabe' lau Dios guné' chee' da chawe', na' guzre' María, xrna Jesús:

—¡Gunná'xque nigá! Bidu nigá, Dios nuzúe' lebe' chee gunbe' chee benne' Israel ca', cheajlecházié' benne' zante lu na' da xriwe', na' benne' zante xellexase' lau Dios. Lebe' gácabe' tu da dxunna bea chee Dios, na' benne' zante xuluzúe' lebe' chalá'ala. ³⁵ Ne chee lebe' gulé'e lau ca da dxeajlesá lazre' tu tue'. Na' chiu' lue' da nigá gaca na ca tu xia nalá, da cheajsúa lu lázrda'u.

³⁶ Cá'anqueze zua na' tu nu'ula dxenne' waláz chee Dios, le' Ana. Nu'ula nigá naque' zri'ine Fanuel, ne xrtia Aser. Ba naque' nu'ula gúlale'e. Bchaga ne'e gate na' naque' nu'ula cuíde'te, na' guzúalene' benne' chee' gazre iza. ³⁷ Na' begá'ane' tuze', ne ba xu'e tapa lalaj tapa iza. Quebe becuase' xudau', na' dxune' zrin chee Xránadxu Dios te zra chizrela. Dxune' gubasa, ne dxuchálajlene' Dios. ³⁸ Ana na' bzrínqueze' na', na' ca gudé guzre' Dios: "Xcalenu'", na' guzú lawe' dxuchálaje' chee bidu Jesús nen xúgute benne' ca' dxelebeze' benne' na' sel-la Dios chee guselé' benne' Jerusalén ca'.

Ca guca gate belexezrine' xezre Nazaret

³⁹ Ca belune' xúgute ca da dxenná da nadxixruj bea Xránadxu, nadxa besí'aque' xjaque' naga nababa Galilea, na' belexezrine' xezre Nazaret da naca lazrie'. ⁴⁰ Na' bidu Jesús bgúlabe', ne

gúcadxabe' chuchu, ne gúcadxabe' bi naxéajni'i, na' Dios bca'ané' lēbe' chawe'.

**Ca guca gate bzrin
bidu Jesús lu xudau'**

⁴¹ Xra xrna' Jesús, tu tu iza dxjá'aque' xēzre Jerusalén gate dxu'u laní chee xulusá lazre' benne' judío ca da ben Dios, bebéaje' xra xrtawe' ca' lu xēzr la xu Egipto. ⁴² Ca guque Jesús chazrinnu iza, na' xjá'aque' xúgute' Jerusalén, ca dx-elúnqueze' ca dxaca laní. ⁴³ Ca gudé laní, na' besia'que', na' bidu Jesús begá'anabe' Jerusalén, ne quebe guleque be'e xrnabe', ne José. ⁴⁴ Dxeléquene' Jesús zezabe' ládujla benne' zan ca', na' besia'que' tu zra nez. Gate belexilje'-be' ládujla benne' xrtie' ca', ne benne' ca' zaj núnbe'e, ⁴⁵ quebe belexezréne'-be'. Ca'an guca belexebi'e zeajxá'aque' Jerusalén chee cheajlexedílje'-be' na'.

⁴⁶ Ca gudé guca chunna zra, nadxa belexezréne'-be' lu xudau', dx'e'ebe' ládujla benne' ca' dxuluxuzájle'e da nadxixruj bea Dios, na' dxenbe' ca dx-elenné', ne dxuchébebe' benne' ca'. ⁴⁷ Xúgute' benne' ca' dxelenne' dxelexebánene' chee'be' ca naca xel-la sina chee'be', ne ca naca da dxuchálajle'be' le'. ⁴⁸ Gate belelé'e xra xrnabe' lēbe', na' belexebánene'. Na' gunná xrnabe', dx'e'-be':

—Zri'ina', ¿bizr chee na' benu' caní nen netu'? Cadite stebe ba guzúantu' chiu' dxexílajntu' lue', xrau' ne neda'.

⁴⁹ Nadxa Jesús dx'e'ebe' le':

—¿Bizr chee na' dxexílajle neda'? ¿Quebe nézele le'e dxal-la' guna' neda' da naca chee Xra'?

⁵⁰ Xra xrnabe' quebe guléajni'iné' ca da gúzrebe' le'.

⁵¹ Nadxa bezálēbe' le' zeajxá'aque' Nazaret, na' gúcaquezebe' bi wezúa dizra' chee xra xrnabe'. Na' xrnabe' bcache chawe' xúgute' da nigá lu lázrdawe'. ⁵² Jesús zéajbe' dxegúlabe' lu bel-

la' dxen chee'be', ne lu xichaj lázrdaube', na' dxedxúajquezebe' chawe' lau Dios, ne lau bēneache.

**Juan, benne' dxuchúe'
bēneache nisa, dxuchálaje'
xrtizra' Dios le'e xixre'**

(Mt. 3.1-12; Mr. 1.1-8; Jn. 1.19-28)

3 Iza chinu' ca dxenná bea Tiberio, benne' dxenná be'e ca naca xēzr la xu, na' Poncio Pilato dxenná be'e naga nababa Judea, na' Herodes dxenná be'e naga nababa Galilea, na' Felipe, benne' biche Herodes, dxenná be'e naga nababa Iturea, ne Traconite, na' Lisantias dxenná be'e naga nababa Abilinia. ² Na' Anás, ne Caifás zaj naque' bxruze blau. Ca lu zra na' Dios bchálajlene' Juan, zri'ine Zacarías, naga zua Juan le'e xixre' lawe' lataj. ³ Juan na' gudé' ca naca xézredu ca' zaj nnitan' chalá'a weaj xegu Jordán, na' dx'e'e benne' ca' dxal-la' xelexebí'i lazre', ne xeledxúe' nisa chee gunite lau Dios chee xtul-le'. ⁴ Caní guca ca na' gunná Isaías, benne' bchálaje' waláz chee Dios, gunné':

Nen tu chí'i bēneache' dxenné' zizraj le'e xixre' lawe' lataj. Dxenné':

Le gucueza neza naga te Xránadxu.

Le xulí chawe' neza lase chee'.

⁵ Ca naca zrítudu ca' le xuzrá na.

Ca naca xi'a ca', ne xi'adu ca' xelexaca na tu li.

Neza xúca'du ca' xelexelí na.

Neza da quebe nalí xelexaca na tu li.

⁶ Ca naca bēneache xeledé'ene' Benne' Weselá sel-la Dios.

⁷ Gate benne' ca' belezrine' lau Juan chee xeledxúe' nisa, na' le' dx'e'e benne' ca':

—Xrtia bela snia. ¿Ble'e nu benne' le'e chee cuásale ca naca xel-la dxezrá'a chee Dios da ba za? ⁸ Le gun da gulé'e na ba bebí'i lázrele, ne quebe nnale lu lázrdaule: Nácantu' xrtia ljwezre Abraham. Neda' dxapa' le'e, Dios wazéquene' xex-

une' xiaj caní xrtia Abraham. ⁹Xa waga ba de cuásate na chee chugue' xaga ca', na' xúgute xaga da quebe dxalebía na da zixre chawe' welechugue na, na' xuluzré'e na lu xi'.

¹⁰Nadxa benne' ca' buluchebe' le':

—¿Bi dxal-la' guntu'?

¹¹Juan bechebe':

—Benne' de chupa zre' dxal-la' gunézruje' tu na benne' quebe de chee', na' benne' de da dxawe' dxal-la' gunézruje' da gagu bénnea' quebe bi de chee'.

¹²Cá'aqueze belelá' benne' wechizruj ca' chee' xeledxúe' nisa, na' buluchebe' Juan:

—Benne' wesede, ¿bi da dxal-la' guntu' netu'?

¹³Juan guzre' le':

—Quebe guchízrujle da zrendxa ca da nadxixruj bea na.

¹⁴Cá'aqueze bal-la benne' dxjaque' wedil-la buluchebe' le':

—¿Gazra netu'? ¿Bi da dxal-la' guntu'?

Juan bechebe':

—Quebe guchébele benne', ne quebe gágule le' zria lu da wen lazre' chee' cuale dumí chee', na' le be nen cadite názrujle.

¹⁵Benne' zaj zre'e na' zaj zue' stébe, na' dxuluchebe' lu lázrdawe' che Juan na' naque' Cristo, benne' nase-la Dios.

¹⁶Juan na' gunné':

—Neda', da li dxuchúa' le'e nisa nen nisa. Wida tu benne' gune' da dxulé'e xel-la dxedxúa nisa nigá, guzúe' le'e Be' Lá'azxa, ne xi' chee'. Benne' nigá nápadxe' xel-la dxenná bea ca neda', na' quebe naca chia' cuéaja' xel-la chee' da xu'u ni'e. ¹⁷Ba nuxre' da dxun be' chee', na' guchi'e naga dxine' zrua' xtila. Na' xutupe' zrua' xtila, guzrá' chawe' na lizre'. Guzezxe' xizre chee' na lu xi' da cabata' xul-la na.

¹⁸Ca naca dizra' nigá, ne kezicadxa dizra' zan bchálajlene' benne' ca' ca naca dizra' chawe' chee' Dios. ¹⁹Juan gudil-

le' Herodes, benne' dxenná be'e, lawe' da zúalene' Herodías, zru'ula Felipe, benne' biche Herodes na', ne lawe' da ba bene' da zante da calela. Nadxa Herodes ²⁰béndxaqueze' da calela, gulu'e Juan lizre xia.

Da guca gate gudxúa Jesús nisa

(Mt. 3.13-17; Mr. 1.9-11)

²¹Gate ne dxuchúa Juan na' bèneache nisa, cá'aqueze Jesús gudxúe' nisa, na' gate dxuchálajlene' Dios, na' bxalaj xabáa, ²²na' betaj Be' Lá'azxa lawe' Jesús. Ble'e lawe' ca tu bgugu chiche, na' ben tu chi'e xabáa, dxenné':

—Lue' nacu' zri'ina' nazrí'ite' lazra'. Dxezaca ba lázrelena' Lue'.

Ca naca xra xrtau Jesucristo

(Mt. 1.1-17)

²³Jesús nape' ca chi dxua iza gate guzú lawe' dxune' zrin chee'. Dxeleque benne' naque' zri'ine José. Naca Jesús zre sua Elí, xra María.

²⁴Elí na' guque' zri'ine Matat, Matat na' guque' zri'ine Leví, Leví na' guque' zri'ine Melqui, Melqui na' guque' zri'ine Jana, Jana na' guque' zri'ine xetú José.

²⁵José nigá guque' zri'ine Matatías, Matatías na' guque' zri'ine Amós, Amós na' guque' zri'ine Nahum, Nahum na' guque' zri'ine Esli, Esli na' guque' zri'ine Nagai.

²⁶Nagai na' guque' zri'ine Maat, Maat na' guque' zri'ine xetú Matatías, Matatías nigá guque' zri'ine Semei, Semei na' guque' zri'ine xetú José, José nigá guque' zri'ine Judá.

²⁷Judá na' guque' zri'ine Joana, Joana na' guque' zri'ine Resa, Resa na' guque' zri'ine Zorobabel, Zorobabel na' guque' zri'ine Salatiel, Salatiel na' guque' zri'ine Neri.

²⁸Neri na' guque' zri'ine xetú Melqui, Melqui nigá guque' zri'ine Adi,

Adi na' guque' zri'ine Cosam,
 Cosam na' guque' zri'ine Elmodam,
 Elmodam na' guque' zri'ine Er,
²⁹ Er na' guque' zri'ine Josué,
 Josué na' guque' zri'ine Eliezer,
 Eliezer na' guque' zri'ine Jorim,
 Jorim na' guque' zri'ine xetú Matat,
³⁰ Matat nigá guque' zri'ine xetú Leví,
 Leví nigá guque' zri'ine Simeón,
 Simeón na' guque' zri'ine xetú Judá,
 Judá nigá guque' zri'ine xetú José,
 José nigá guque' zri'ine Jonán,
 Jonán na' guque' zri'ine Eliaquim,
³¹ Eliaquim na' guque' zri'ine Melea,
 Melea na' guque' zri'ine Mainán,
 Mainán na' guque' zri'ine Matata,
 Matata na' guque' zri'ine Natán.
³² Natán na' guque' zri'ine David,
 David na' guque' zri'ine Isaí,
 Isaí na' guque' zri'ine Obed,
 Obed na' guque' zri'ine Booz,
 Booz na' guque' zri'ine Salmón,
 Salmón na' guque' zri'ine Naasón.
³³ Naasón na' guque' zri'ine Aminadab,
 Aminadab na' guque' zri'ine Aram,
 Aram na' guque' zri'ine Esrom,
 Esrom na' guque' zri'ine Fares,
 Fares na' guque' zri'ine xetú Judá,
³⁴ Judá nigá guque' zri'ine Jacob,
 Jacob na' guque' zri'ine Isaac,
 Isaac na' guque' zri'ine Abraham,
 Abraham na' guque' zri'ine Taré,
 Taré na' guque' zri'ine Nacor.
³⁵ Nacor na' guque' zri'ine Serug,
 Serug na' guque' zri'ine Ragau,
 Ragau na' guque' zri'ine Peleg,
 Peleg na' guque' zri'ine Heber,
 Heber na' guque' zri'ine Sala,
³⁶ Sala na' guque' zri'ine Cainán,
 Cainán na' guque' zri'ine Arfaxad,
 Arfaxad na' guque' zri'ine Sem,
 Sem na' guque' zri'ine Noé,
 Noé na' guque' zri'ine Lamec,
³⁷ Lamec na' guque' zri'ine Matusalén,
 Matusalén na' guque' zri'ine Enoc,
 Enoc na' guque' zri'ine Jared,

Jared na' guque' zri'ine Mahalaleel,
 Mahalaleel na' guque' zri'ine xetú
 Cainán.

³⁸ Cainán na' guque' zri'ine Enós,
 Enós na' guque' zri'ine Set,
 Set na' guque' zri'ine Adán,
 Adán na' guque' ca zri'inequeze Dios.

**Satanás da xriwe' dxilaj lazre' na
 ájala gusebaga na Jesús dul-la**

(Mt. 4.1-11; Mr. 1.12-13)

4 Jesús, zúale Be' Lá'azxa Le', bezé'e
 xegu Jordán, na' guché Be' Lá'azxa
 Le' le'e xixre' lawe' lataj. ²Na' guzúe'
 chua zra, na' Satanás da xriwe' gudilaj
 lazre' na ájala si xē na Le'. Quebe bi
 gudagu Jesús da chua zra ca', na' ca gudé
 na' guduné'. ³Nadxa gunná da xriwe',
 guzre na Le':

—Che da li nacu' Lue' Zri'ine Dios, ben
 xelexaca xiaj caní xeta xtila.

⁴Na' bechebe Jesús:

—Naxúajqueze na lu xiche chee Dios,
 dxenné': Quegá nen xeta xtilaze gaca ban
 bēneache, san cá'aqueze nen xrtizra'
 Dios gaca ban bēneache.

⁵Nadxa da xriwe' guché na Jesús tu
 xi'a sibe, na' chaditē ble'e na Le' xúgute
 cue' xezr la xu da zaj nnita lu xezr la xu
 nigá, ⁶na' guzre na Le':

—Neda' gunna' Lue' ca naca xel-la
 dxenná bea nigá, ne xel-la szren chee
 xúgute xezr la xu caní, lawe' da zaj xu'u
 da caní lu na'a neda', na' gunézruja' na
 nu dxaca lazra' gunézruja' na. ⁷Gunna'
 na chiu' che lue' guzú zribu' lawa', ne
 gucá'ana szrenu' neda'.

⁸Jesús bechebe':

—Gucuasa lue', Satanás, lawe' da
 dxenná xiche chee Dios, dxē'e bēn-
 neache: “Bca'ana szren Xranu' Dios, ne
 ben zrin chee tuze Le'.”

⁹Nadxa da xriwe' na' guché na Jesús lu
 xezre Jerusalén, na' bcuén na Le' xichaj
 ze'e xudau', na' guzre na Le':

—Che da li na' nacu' Zri'ine Dios, guxrite' nigá cheajxezu' lu xu, ¹⁰lawe' da lu xiche chee Dios dxenné':
Dios gusebague' gubáz chee xabáa chee' ca' xuluxue' Lue'.

¹¹Xelechísaqueze' Lue' nen ne'e, chee quebe gaca we' ni'u lawe' xiaj ca'.

¹²Jesús bechebe':

—Cá'anqueze naxúaj na lu xiche chee Dios, dxé'e bénneache: "Quebe guchí-nenu' ca dxaca lazru' Xranu' Dios."

¹³Gate da xriwe' québedxa bezrela lazre' na ájala gun zréaje na Jesús, na' becuasa na tu chí'i.

**Jesús dxuné' zrin chee'
naga nababa Galilea**

(Mt. 4.12-17; Mr. 1.14-15)

¹⁴Na' Jesús bezrine' Galilea, ba ná-palé'e xel-la waca chee Be' Lá'axxa, na' ca naca xézredu ca' zaj nababa na' buluchálaj bénneache ca naca xel-la waca chee'. ¹⁵Jesús bsédené' benne' ca' tu tu lu xudau' ca', na' xúgute' belúe lá'ane' Lē'.

Jesús dxexezrine' Nazaret

(Mt. 13.53-58; Mr. 6.1-6)

¹⁶Nadxa Jesús bezrine' Nazaret, xezre naga bgule'. Lu zra dxulupá'ana benne' judío ca' guxú'e lu xu'u ga na' dxelezraga benne' judío ca', ca xu'u lawe' dxuné', chee gulabe' da naxúaj na lu xiche chee Dios. ¹⁷Buludé'e Lu ne'e xiche naga naxúaj dizra' bzuaj Isaías, benne' bchálaje' waláz chee Dios, na' gate gusalaje' na, na' blabé' naga naxúaj da dxenná:

¹⁸Be' Lá'axxa chee Xránadxu zúalene' neda',

lawe' da guqué'e neda' chee guchálajlana' benne' baxache' ca' dizra' chawe' chee'.

Gusel-le' neda' chee xexuna' benne' ca' quebe chawe' zaj zué',

ne chee guzenda' benne' ba zaj nadxéaje' lu da zrinnaj, waca xeelé',

ne chee xexuna' lau benne' la chul-la ca',

ne chee guselá' benne' dxelezaca zi'e, ¹⁹ne chee guzenda' bénneache ba bzrin zra Xránadxu Dios gucá'ane' le' chawe'.

²⁰Nadxa Jesús butube' xiche na', na' bde'e na lu na' benne' dxuxúe' xu'u na', na' bebé'e. Xúgute' benne' zaj zré'e lu xu'u na' dxelenné'e Lē', ²¹na' Jesús guzú lawe' dxé'e benne' ca':

—Na'a zra guca ca da naxúaj na laule le'e.

²²Xúgute' gulenné' chawe' chee Jesús, ne belexebánene' ca naca dizra' chawe' da dxuchalaje'. Na' buluchébe ljwezre':

—¿Quegá benne' nigá zri'ine José?

²³Jesús guzre' le':

—Da líqueze le'e wele neda' dizra' nigá: Lue', benne' dxexúnu' benne' we' ca', bexún cuinu', ne xele neda': Ca da bénentu' benu' lu xezre Capernaum, cá'anqueze ben na lázriu' nigá na'a.

²⁴Nadxa gunná Jesús:

—Da li dxapa' le'e, tu benne' dxuchálaje' waláz chee Dios, quebe nu dxue le' ba lá'ana lazrie'. ²⁵Dxapa' le'e, gulezrá' nu'ula zan ba gulate benne' chee' lu xezr la xu Israel ca lu zra guzúa Elías, benne' bchálaje' waláz chee Dios, gate na' quebe guca xiuj chun iza xugachaj, ne gúcale'e gubina' ca naca xezr la xu na'. ²⁶Dios quebe gusel-le' Elías lau netú nu'ula, nate benne' chee', zué' xezr la xu Israel. Gusel-le' le' lau tu nu'ula, nate benne' chee', zué' lu xezre Sarepta, da zua na gagu naga dxé' xezre Sidón. ²⁷Cá'anqueze gulezrá' benne' zan benne' dxeledxé'ene' we' guzru' lu xezr la xu Israel ca lu zra guzúa Eliseo, benne' bchálaje' waláz chee Dios, na' netúe' quebe bexaque'. Tuze Naamán, benne' xezr la xu Siria bexaque'.

²⁸Gate belén benne' ca' zaj zré'e xu'u na' da nigá, na' belezrá'ale'e. ²⁹Na' gulate, ne belexebéaje' Jesús xezre na', na' beleché'e Lē' dxu'a chjéaj naga zria xezre na', chee xuludxixre' Lē' na'. ³⁰Na'

Jesús bedéꞤ ládujla benne' ca', na' bezéꞤ zexíajé'.

**Jesús dxexuné' tu
benne' xu'e be' xriwe'**

(Mr. 1.21-28)

³¹ Nadxa Jesús bexíajé' Capernaum, tu xezre nababa Galilea, na' guzú lawé' dxusédene' benne' ca' lu zra lá'azxa cheꞤ judío ca'. ³² Belexebánene' ca naca da dxusédene', lawe' da dxuchálaje' ca tu benne' nape' xel-la dxenná bea.

³³ Lu xu'u na' zua tu benne' xu'e be' xriwe', na' dxebezre xe'e, ³⁴ dxenné':

—Bsan netu'. ¿Bizr cheꞤ na' dxunu' netu' zede, Jesús, benne' Nazaret? ¿Za'u guzría xi'u netu'? Neda' núnbe'a Lue', ne nezda' nacu' benne' lá'azxa cheꞤ Dios.

³⁵ Jesús gudil-le' be' xriwe' na', dxenné':

—Zrize guzúa. Bsan benne' biu nigá.

Nadxa be' xriwe' na' gudín na bénnea' xu lau xúgute benne' ca', na' bedxúaj na lu xichaj lázrdau bénnea', ne quebe bi ben na cheꞤ. ³⁶ Xúgute' belexebánene', na' gulé' ljwezre':

—¿Bizra dizra' da caní? Benne' nigá dxenná bé'ene' be' xriwe' ca' nen dute xel-la dxenná bea cheꞤ, ne nen xel-la waca, na' be' xriwe' ca' dxeledxúaj na.

³⁷ Na' buluchálaje' ca naca cheꞤ Jesús xúgute lu xezre ca' zaj nababa na'.

Jesús dxexuné' xrna zru'ula Pedro

(Mt. 8.14-15; Mr. 1.29-31)

³⁸ Nadxa bedxúaj Jesús lu xu'u na', na' guxú'e lizre Simón. Xrna zru'ula Simón na' quebe chawe' zue', xú'ule'e da la, na' gulata' xuene' Jesús xexuné' le'. ³⁹ Jesús gubigu'e cuite', na' gudil-le' da la na', na' bedxúaj na. Ca ná'queze bexásate', na' guzú lawé' dxusení'e da xelawe'.

**Jesús dxexuné' benne' zan
quebe chawe' zaj zue'**

(Mt. 8.16-17; Mr. 1.32-34)

⁴⁰ Ca dxebía gubizra, benne' ca' zaj nmita' benne' quebe chawe' zaj zue' lizre' belú'e le' lau Jesús, na' Le' bze ne'e tu tu benne' ca', ne bexuné' le'. ⁴¹ Cá'anqueze zánete' be' xriwe' belexedxúaj na lu xichaj lázrdau benne' ca'. Dxeleenná na:

—Lue' nactu' Zri'ine Dios.

Jesús gudil-le' be' xriwe' ca'. Quebe be'e na lataj xelenné' na, lawe' da zaj neze na naca Le' Cristo.

**Jesús dxuchálaje'
naga nababa Galilea**

(Mr. 1.35-39)

⁴² Ca dxanísise', bdxuaj Jesús xezre na', guxíajé' naga xeajsúe' tuze'. Na' benne' ca' belexexílaje' Le', na' belezrine' xuluzague' Le' cheꞤ quebe zeze'e. ⁴³ Jesús gunné':

—Dxun na ba xen guzenda' bénneache xezícadxa xezrdu ca' ca dxenná bea Dios, lawe' da cheꞤ guna' caní gusel-le' neda'.

⁴⁴ Ca'an guca gudá Jesús ca naca xezre ca' zaj nababa Galilea, na' bchálaje' lu xu'u naga dxelezraga judío ca' lu xezre ca'.

Dxelezené' bela zan

(Mt. 4.18-22; Mr. 1.16-20)

5 Gate zua Jesús dxu'a nísadau' cheꞤ Genesaret, na' belezrín benne' zan, ne buluchídeté' Le', lawe' da dxelaca lazre' xelenne' xrtizra' Dios. ² Jesús blé'ene' chupa da dxedá lawe' nísadau' lu nísadau' na', zaj zra' gáguze lu xu bizre, lawe' da ba belexedxúaj benne' wezén bela ca' lu'ule da dxedá lawe' nísadau', na' zaj zre'e dxelexibe' xixruj cheꞤ ca'. ³ Nadxa guxú'u Jesús tu lu da dxedá lawe' nísadau', da naca na cheꞤ Simón, na' guzre' Simón guzrigue' na xelate' lu nísadau' na'. Jesús gudxé' lu da dxedá

lawe' nísadau' na', na' guzú lawe' dxusé-dene' benne' ca'. ⁴Ca bexuzre bchálaje', na' guzre' Simón:

—Bsa da dxedá lawe' nísadau' chiu' naga nácadxa situj nísadau', na' le guzalla xixruj chee' na' chee' senle bela.

⁵Simón bechebe':

—Benne' Wesede, bedú xela bentu' zrin, ne quebe bi bela ne sentu'. Lu dizra' chiu', na'a guzal-la' xixruj nigá.

⁶Ca belune' ca gunná Jesús, na' bela zante gulezene', na' gúcate wadxeza xixruj na'. ⁷Nadxa bulutá ne'e gulenne' benne' ljwezre' zaj zre'e xetú lu da dxedá lawe' nísadau' chee' xelácalene' le'. Benne' ca' belezrine', na' bulusezrate' dxúpate da dxedá lawe' nísadau' ca', na' gulácatē na' zi'i, ne dxácatē welaze na' lu nísadau'. ⁸Gate ble'e Simón Pedro da nigá, na' bzu zribe' lau Jesús, gunné':

—Gucuasa cuita' neda', Xran, lawe' da naca' neda' benne' dul-la.

⁹Caní gunná Simón lawe' da dxezrebele'e ne chee' da guca na, ne cá'aqueze dxezrebe benne' ljwezre' ca', gate belelé'ene' bela zan ca'. ¹⁰Cá'aqueze belezrebe Jacobo ne Juan, zri'ine Zebedeo, benne' zaj naque' ljwezre Simón na'. Jesús guzre' Simón:

—Quebe zrebu'. Ná'atēla su lau' senu' bēneache lu da naca chee' Dios.

¹¹Nadxa, ca belexebéaje' da dxedá lawe' nísadau' na' dxú'ela nísadau', na' bulucá'ane' ca naca da ca', na' zjácálene' Jesús.

**Jesús dxexuné' tu benne'
dxé'ene' we' guzru'**

(Mt. 8.1-4; Mr. 1.40-45)

¹²Gate Jesús zue' tu xezre, na' bzrin tu benne' dxé'ene' we' guzru', na' ca blé'ene' Jesús, bzu zribe', ne gudíxrujte lawe' lu xu, na' bca'ana szrene' Le', gunné':

—Xran, che dxaca lazru', waca xexunu' neda'.

¹³Nadxa Jesús bte'-be' nen ne'e, gunné':

—Dxaca lazra'. Bache bexacu'.

Ca gunné' ca', we' guzru' na' bedxúajte na. ¹⁴Jesús bsebage' bēne' quebe nu xe'e da nigá. Nadxa gunné':

—Guxíaj na'a, xeajlé'e cuinu' lau bxruze, ne gulú'u dumí chee' xexádxeu' lau Dios ca da gunná be'e Moisés chee' xeleneze benne' ba bexacu' ca naca xízrawe' chiu'.

¹⁵Ca naca xel-la waca chee' Jesús bzrlujdxa na, na' benne' zante belezrague' lau Jesús chee' xelenne' da dxuchálaje', ne chee' xexuné' le' ca naca xízrawe' chee'. ¹⁶Nadxa Jesús bezé'e na', na' bzrine' naga quebe nu chilá' benne', na' bchálajlene' Dios.

**Jesús dxexuné' tu benne'
naxrú'une ni'a ne'e**

(Mt. 9.1-8; Mr. 2.1-12)

¹⁷Tu zra zua Jesús dxusédene', na' balla benne' xudau' fariseo ca', ne benne' dxuluxuzájle'e da nadxixruj be'e Moisés, zaj dxe'e na', benne' zá'aque' ca naca xézredu ca' zaj nababa Galilea, ne xezre ca' zaj nababa Judea, ne chee' xezre Jerusalén, na' zúale xel-la waca chee' Xránadxu Dios Jesús, na' bexuné' benne' ca' quebe chawe' zaj zue'. ¹⁸Nadxa belezrín tapa benne' zaj nu'e tu benne' zua zri ni'a ne'e, dee' tu lu blaga', na' gulaca lazre' xelegú'e le' lu xu'u chee' xelíxru'e le' lau Jesús. ¹⁹Quebe guca xelezrine' lau Jesús lawe' da zrále'e benne' zan ga na'. Nadxa gulegúene' chju'ula, ne gulesaluje' chju'u, na' bululétaje' benne' na' de' lu blaga' ládujla benne' zan ca' lau Jesús. ²⁰Gate ble'e Jesús ca dxeléajle' benne' ca' chee', na' guzre' benne' quebe chawe' zue':

—Bēne'dau', ba bnite lawa' dul-la chiu'.

²¹Nadxa benne' ca' dxuluxuzájle'e da nadxixruj bea na, ne benne' xudau'

fariseo ca' gulezú lawe' dxelenné' lu xichaj lázrdawe': ¿Nuzra benne' nigá, dxenné' schanni' chee Dios? Quebe nu benne' séquene' gunité lawe' dul-la chee bèneache. Tuze Dios gaque'.

²² Jesús dxéquebe'ene' da dxelenné' lu xichaj lázrdawe', na' guzre' benne' ca':

—¿Bizr chee na' dxéquele le'e caní?

²³ ¿Bízrala na quebe naca na stebe guna', che xapa' benne' nigá: Ba bnite lawa' dul-la chiu', u che xapa' le': Guxasa bexíaj? ²⁴ Gulé'eda' le'e neda', Benne' Gulje' Bénneache, napa' xel-la dxenná bea lu xezr la xu nigá chee gunité lawa' dul-la chee bèneache.

Nadxa guzre' benne' na' na'xru' une ni'a ne'e:

—Lue' dxapa', bexasa, bexúa blaga' chiu', ne bexíaj.

²⁵ Ca gunné' ca', bexásate benne' na' lau xúgute benne' ca', na' bequé'e blaga' chee', ne bezé'e zexíaje' lizre' zeajxé lá'ané' Dios. ²⁶ Xúgute benne' ca' belexebánene', na' belúe lá'ané' Dios, ne nen xel-la dxelezrebe gulenné':

—Na'a ble'edxu da dxe'bánequezdxu.

Jesús dxenné' Leví

(Mt. 9.9-13; Mr. 2.13-17)

²⁷ Ca gudé na' bezá'a Jesús, na' blé'ene' tu benne' dxuchizruje' waláz chee xezre Roma, le' Leví. Dxe'e naga dxuchizruje', na' guzre' le':

—Ben neda' tuze.

²⁸ Na' guxasa Leví, bca'ane' ca naca chee' ca', na' guxíajlene' Jesús.

²⁹ Ca gudé na', Leví gulu'e tu xrche' zrenté lizre' chee bca'ana szrene' Jesús, na' zrálé'eqeaze na' xezícadxa wechizruj ca', ne xezícadxa benne' zaj dxe'e dxágulene' benne' ca'. ³⁰ Na' benne' xudau' fariseo ca', ne benne' ca' dxuluxuzájle'e da nadxixruj bea na gulezú lawe' dxelezí tizre' benne' ca' dxuséde Jesús, dxelé'e le':

—¿Bizr chee na' dxe'aj dxágulele benne' wechizruj caní, ne benne' dul-la ca'?

³¹ Jesús bechebe':

—Quebe zaj nachine benne' zaj zua chawe' nu benne' dxexúne' le'. Benne' quebe chawe' zaj zue' dxelechínene' le'.

³² Neda' quegá za'a dxennéa' benne' xrlátaje. Za'a dxennéa' benne' dul-la, chee xelxebí'i lazre'.

Dxuluchébe' Jesús ca naca chee gubasa

(Mt. 9.14-17; Mr. 2.18-22)

³³ Nadxa buluchebe' Jesús:

—¿Bizr chee na' dxelúnle'e gubasa, ne dxuluchálajle Dios benne' ca' zjácálene' Juan, ne benne' ca' zjácálene' benne' xudau' fariseo ca', san benne' ca' dxusédenu' tu dxelé'aj dxeláguzqueze'?

³⁴ Jesús bechebe':

—¿Wazéquele xele benne' zaj zra' laní chee wechaga na' xelune' gubasa dxácate na' zua benne' wechaga na' nen benne' ca'? ³⁵ Wazrín zra gate wechaga na' na' xecuase' nen benne' ca'. Ca lu zra na' xelune' gubasa.

³⁶ Nadxa bchálajlene' le' ca naca da dxul'é'e nigá:

—Quegá nu benne' cheze' tu zre' cube chee xudé'e na tu zre' gula. Che ca' gune', na' guzría xí'e ca naca zre' cube na', na' ládxe'du cube na' quebe gulé'e na cháwedau' nen ladxe' gula na'.

³⁷ Cá'anqueze quebe gaca cá'adxu xrise uva cube lu bzude xide gula, lawe' da che ca' gundxu, xrise uva cube na' gutín na bzude xide gula, na' gaca ditje xrise uva na', ne bzude xide na'. ³⁸ Chee le' na' dxalla' cá'adxu xrise uva cube lu bzude xide cube, na' dxúpaté na' xegá'ana chawe' na. ³⁹ Che tu benne' xí'aje' xrise uva wal-la gula, québedxa nna na chee' xí'aje' xrise uva cube, lawe' da dxenné': “Nétajdx da gula na'.”

**Benne' ca' dxusede Jesús
dxelálaje' dau zrua' xtila lu
zra lá'azxa chee judío ca'**

(Mt. 12.1-8; Mr. 2.23-28)

6 Tu lu zra lá'azxa chee judío ca', gudé Jesús naga naxaza zrua' xtila, na' benne' ca' dxusédene' zjaque' dxelálaje' dau zrua' xtila, na' dxelezrube na nen ne'e, ne dxelawe' zrua' xtila na'. ²Nadxa benne' xudau' fariseo ca' buluchébe' le':
—¿Bizr chee na' dxunle le'e tu zrin da quebe naca na gunle zra lá'azxa cheedxu?

³Jesús bechébe':

—¿Quebe ne gulábale le'e ca ben David ne benne' ljwezre' ca' gate guleduné'? ⁴Guxú'u David na' tu lu xudau' chee Dios, ne guqué'e xeta xtila da gulú'u bxruze lau Dios, na' gudawe' na, ne bnézrujte' chee benne' ca' zjácálene' le', ne quebe naca chee' xelawe' xeta xtila na'. Tuze bxruze ca' naca chee' xelawe' na.

⁵Cá'anqueze guzre Jesús benne' ca':

—Neda', Benne' Gulje' Bénneache, nápaqueza' xel-la dxenná bea ca naca chee zra lá'azxa.

Jesús dxexuné' benne' nazrinnaj ne'e

(Mt. 12.9-14; Mr. 3.1-6)

⁶Xetú lu zra lá'azxa chee judío ca', guxú'u Jesús tu lu xu'u, na' guzú lawe' dxusédene' benne' zaj nazrague' na'. Zua na' tu benne' nazrinnaj ne'e xabēla. ⁷Benne' ca' dxuluxuzájle'e da nadxixruj bea na, ne benne' xudau' fariseo ca' dxuluzuzre' Jesús chee xeledé'ene' che xexún Jesús bēneea' lu zra lá'azxa chee', chee xeledé'quene' xelawe' zria Jesús. ⁸Jesús ba nézene' ca da dxelegú'u lazre', na' guzre' bēneea' nazrinnaj ne'e:
—Guxasa, ne guzé laduj nigá.

—Guxasa, ne guzé laduj nigá.

Benne' na' guxase', na' guzé' na'.

⁹Nadxa gunná Jesús, guzre' benne' ca':

—Na'a guchéba' le'e tu: ¿Bízrala na' waca gundxu zra lá'azxa chee, da xrlátaje che da calēla? ¿Gucache cháwedxu xel-la nabán chee tu benne', che guzría xidxu na?

¹⁰Nadxa Jesús guné'e benne' ca' zaj naxechaj Le', na' guzre' benne' we' na':

—Bli na'u nigá.

Benne' na' bene' ca', na' bexácate ne'e na'. ¹¹Na' benne' ca' zaj zre'e na' belezrá'ale'e, na' gulezú lawe' dxuluchébe ljwezre' bi xeledé'quene' xelune' chee Jesús chee xuluzría xi'e Le'.

**Jesús dxequé'e benne' chazrinnu ca'
xelaque' gubáz chee'**

(Mt. 10.1-4; Mr. 3.13-19)

¹²Ca lu zra na' Jesús guxíaje' tu lu xi'a xejchálajlene' Dios, na' guzú'e bedú xela dxuchálajlene' Dios. ¹³Ca guxaní' gunné' benne' ca' dxusédene', ne guqué'e chazrinnu benne' ca', na' bzre'e benne' ca' xelaque' gubáz chee'. ¹⁴Benne' caní zaj naque':

Simón, (bēneea' bzue' le' Pedro),

Andrés, (benne' biche Simón na'),

Jacobo, Juan, Felipe, Bartolomé,

¹⁵Mateo, Tomás,

Jacobo, (zri'ine Alfeo),

Simón, (bēneea' dxedábage' benne' Roma ca')

¹⁶Judas, (benne' biche Jacobo), ne

Judas Iscariote, (bēneea' gudé' Jesús lu na' benne' ca' dxeledábage' Le'.)

Jesús dxusédene' benne' zante

(Mt. 4.23-25)

¹⁷Jesús bdinne' lu xi'a na' nen benne' ca' dxusédene', na' bzrine' tu lache' nen benne' ca'. Benne' zan zaj zre'e na' zaj nababé' xezre ca' zaj nababa Judea, ne Jerusalén, nen benne' zaj nababé' Tiro, ne Sidón. Benne' caní belelé'e chee xelenne' da dxuchalaj Jesús, ne chee xexún Jesús le' ca naca xízrawe' dxeledxé'ene'.
¹⁸Cá'anqueze benne' ca' zaj xu'e be' xri-

wę' belexaque'. ¹⁹ Xúgute benne' ca' gu-laca lazre' xuluté' Jesús lawe' da dxexún Le' xúgute' nen xel-la waca chee'.

**Benne' ca' naca da ba neza zren chee',
ne benne' ca' zaj naque' baxache'**

(Mt. 5.1-12)

²⁰ Nadxa Jesús gunné'e benne' ca' dxusédene', na' guzre' le':

—Ba neza zrentę naca na cheęle le'e, dxéquebe'ele nácale benne' xache', lawe' da waxú'ule le'e naga dxenná bea Dios.

²¹ 'Ba neza zrentę naca na cheęle le'e, dxedunle da dxunna Dios, lawe' da wélajquezle.

'Ba neza zrentę naca na cheęle le'e, dxebézrele ne cheę dula, lawe' da guzrízrequezle.

²² 'Ba neza zrentę naca na cheęle le'e, gate xelecuide bėnneache le'e, ne gate xelexebáję le'e chalé'ajla, ne gate xelen-né' schanni' cheęle, ne gate xulucá'ana ditję' lale ca tu da sban lawe' da nácale bi chia' neda', Benne' Gulję' Bėnneache.

²³ Le bélé'e, ne le sua lu da ba neza lu zra na' lawe' da zru'éle tu da zren lu xabáa cheę Dios. Cá'anqueze benne' xra xrtau benne' caní bulusaca zi'e benne' ca' buluchálajé' waláz cheę Dios.

²⁴ 'Baxache' nácale le'e, benne' gunní'a, lawe' da ba nápaie xel-la dxebé da naca cheę xęzr la xu nigá.

²⁵ 'Baxache' nácale le'e, nélajle na'a, lawe' da wadunle le'e.

'Baxache' nácale le'e dxuzrízrele na'a, lawe' da cuzre xáchele.

²⁶ 'Baxache' nácale le'e gate xúgute bėnneache dxelenné' da chawe' cheęle, lawe' da ca' belún xra xrtáule, gulenné' da chawe' cheę benne' węn lazre' ca', benne' gulenné': "Netu' dxuchálajntu' waláz cheę Dios."

**Dxal-la' zrí'idxu benne' ca'
dxelecuídene' dxi'u**

(Mt. 5.38-48; 7.12)

²⁷ Na' gunná Jesús:

—Dxapa' le'e dxénele chia', le zri'i benne' ca' dxelecuídene' le'e, ne le gun chawe' cheę benne' ca' dxelezcę le'e.

²⁸ Le nne chawe' cheę benne' ca' dxelenné' calela cheęle, ne le naba lau Dios gaca chawe' cheę benne' ca' dxelenné' schanni' cheęle. ²⁹ Che nu benne' cape' xragale, le guzęte xecha la'a, ne che nu benne' que'e xicha cheęle, le gię lataj ca'ate' zrale. ³⁰ Le gunezruj núteteze benne' bi nabe' le'e, ne che nu benne' que'e da naca cheęle, quebe xenábale na.

³¹ Le gun cheę bėnneache cáteze na' dxaca lázrele xelunę' cheęle.

³² 'Che le'e nazri'ile tuze benne' ca' zaj nazrí'ine' le'e, ¿bízraqueze da chawe' dxunle? Cá'anqueze dxelún benne' ca' dxelunę' da calela. ³³ Che dxunle chawe' cheę tuze benne' ca' dxelunę' le'e chawe', ¿bízraqueze da chawe' dxunle? Cá'anqueze dxelún benne' węn da zrinnaj ca'.

³⁴ Che bi dxusanle cheę tuze benne' ba nézele wexunne' na, ¿bízraqueze da chawe' dxunle? Cá'anqueze benne' węn da calela ca' dxulusane' da naca cheę cheę benne' ca' dxelunę' da calela, lawe' da zaj nézene' wulunézrujtę benne' ca' le na. ³⁵ Dxal-la' zri'ile le'e benne' ca' dxelezcę le'e, ne gunle da chawe' cheę, ne gusanle cheę benne' ca' da xelenabe' le'e, lácala quebe xelexexunne' na. Che gunle ca', da zrendxa da si' lu na'le, ne gácale bi ca' cheę Dios szrentę, lawe' da naca Le' zri'i lazre' nen benne' ca' quebe dxelexezaca ba lazre', ne benne' węn da calela ca'.

³⁶ Le xęzrí lazre' bėnneache ca dxun Dios, dxęzrí lazre' le'e.

**Quebe guzúale chalá'ala
le sa' ljawézele**

(Mt. 7.1-5)

³⁷ Na' gunná Jesús:

—Quebe guzúale chalá'ala le sa' ljawézele, na' Dios quebe guzúe' le'e chalá'ala. Quebe bi mnele chee le sa' ljawézele, na' Dios quebe guchi'e chee le'e. Le gunite lau chee le sa' ljawézele, na' Dios gunite lawe' chee le'e. ³⁸ Le gunezruj chee bèneache, na' Dios gunne' chee le'e. Dios cu'e lu xcuite chee tu xi'ina da nálate, ne da naxi'tequeze, ne guníbeté' na, ne sua díatequeze na. Dios gudxírequeze' chee ca da dxudxírele chee bèneache.

³⁹ Nadxa Jesús bchálaje' da dxulé'e nigá, gunné':

—¿Waca tu benne' la chul-la cu'e neza xetú la chul-la? Che ca' guné', dxúpaté' xelebixre' tu lu xedxu. ⁴⁰ Netú benne' dxuséde gácadxé' szren ca naca bènea' dxusédené' le', na' gate xuzre gusédie', gaque' ca naca bènea' bsédené' le'.

⁴¹ ¿Bizr chee na' dxenná'u bébedu na' xu'u na xiaj lau le sa' ljawezru', ne quebe dxéquebe'enu' ca naca da zren da xu'u na xiaj lau' lue'? ⁴² Che quebe dxéquebe'enu' ca naca da zren na' da xu'u na xiaj lau' lue', ¿ájazra dxunu' dxexázrenu' dxu'u le sa' ljawezru': “Benna lataj xebéaja' bébedu na' xu'u na xiaj lau'?” Lue', benne' dxun láweze xrlátaje, bebéaj zá'teca lue' ca naca da zren da xu'u na xiaj lau', na' nadxa le'enu' cháwedau' xebéaju' bébedu na' xu'u na xiaj lau le sa' ljawezru'.

Naca bea tu benne' ne chee da dxune'

(Mt. 7.17-20; 12.34-35)

Nadxa gunná Jesús: ⁴³ —Tu xaga xrlátaje quebe cuía na da zixre calela, na' xaga da quebe naca chawe' quebe gaca cuía na da zixre chawe'. ⁴⁴ Tu tu xaga naca bea na ne chee da zixre da dxe-

bía na. Quebe gaca guchíbedxu da zixre chee xaga higo tu lu xaga xeche', ne quebe guchíbedxu da zixre chee lba uva lu xeche' bisigá. ⁴⁵ Benne' xrlátaje, da xrlátaje dxenné' bènea' lawe' da naxaza da xrlátaje lu xichaj lázrdawe', na' benne' wen da calela, da calela dxenné' bènea' lawe' da xu'u da calela lu xichaj lázrdawe'. Dxu'e na' dxenné' na ca naca da xu'u lu xichaj lázrdawe'.

Dxuchalaj Jesús chee chupa lane xu'u

(Mt. 7.24-27)

Gunná Jesús: ⁴⁶ —¿Bizr chee na' dxele neda': “Xran, Xran”, ne quebe dxunle ca da dxapa' le'e? ⁴⁷ Xapa' le'e aja naca bènea' ze'e nen neda', ne dxenne' xrtizra'a, ne dxune' ca da dxapa' le'. ⁴⁸ Naque' ca tu benne' bene' tu xu'u. Da zren gudene', na' bzrie' lane na lawe' xiaj xre. Gate bdxuaj xegu, na' xejchú'ule'e na le'e xu'u na', quebe bi guzeque' gune na xu'u na' lawe' da zria lane na lawe' xiaj xre. ⁴⁹ Na' bènea' dxenne' xrtizra'a, ne quebe dxune' ca da dxapa' le', naque' ca tu benne' bene' xu'u chee' lawe' xu dxeze, ne quebe guza-le' lane na, na' gate bdxuaj xegu na', ne xejchú'ule'e na le'e xu'u na', na' guché na le na, na' tu chí'izqueze bzria xi na le na.

**Jesús dxexune' bi wen zrin
chee tu benne' Roma**

(Mt. 8.5-13)

7 Gate bexuzre bchálajle Jesús benne' ca', na' bezé'e zexíaje' Capernaum. ² Zua tu benne' Roma na', benne' dxenná' be'e lu wedil-la, na' zua tu bi wen zrin chee' nazrí'ile'ene'-be', na' bi na' quebe chawe' zúabe', ne dxaca wátebe'. ³ Gate ben benne' Roma na' ca da dxun Jesús, na' gusél-le' bal-la benne' gula sina chee judío ca', chee xejleguezre' Jesús xide' xexune' bi wen zrin chee'. ⁴ Benne' gula ca' belezrine' lau Jesús, na' gulezú lawe' dxelata' xuene' Le', dxelenné':

—Benne' Roma nigá naca chee' gá-calenu' le', ⁵lawe' da dxape' ba lá'ana xezre cheedxu, na' léqueze' bene' tu xu'u cheedxu ga dxezragadxu.

⁶Nadxa Jesús guxíajlene' benne' gula ca'. Gate belezrine' gagu naga zua lizre benne' Roma na', le' gusél-le' bal-la benne' ljwezre' xeajleguezre' Jesús:

—Xran, quebe senu' gunne xue, lawe' da quebe naca chia' chu'u lizra'. ⁷Chee le na' ne quebe bexazra'da' néda'queza' xedajdilja' Lue'. Cun gunnaze, na' xexaca bi wen zrin chia'. ⁸Néda'queza' zua benne' dxenná bé'ene' neda', na' neda' dxenná be'eda' benne' dxjaca wedil-la. Che xapa' tu bènea': Guxíaj, na' waxíajbe', ne che xapa' xetube': Gudá, na' wídabe', ne che nna be'eda' bi wen zrin chia' da gunbe', na' gunbe' na.

⁹Gate ben Jesús da nigá, na' bebánene', na' gunné'e benne' ca' zjácále Le', gunné':

—Da li, quebe ne cheajxraca' tu benne' xezre Israel dxeajlí lazre' neda' ca dxun benne' nigá.

¹⁰Gate belexezrín benne' ljwezre benne' Roma na' lizre', na' belelé'ene' ba bexaca bi wen zrin na'.

Jesús dxusebanē' bi biu chee' tu nu'ula ba gute benne' chie'

¹¹Ca gude' na' Jesús guzé'e zéaje' tu xezre da nazí le na Naín, na' xjácále Le' benne' ca' dxusé'dene', ne benne' zante.

¹²Gate bzrine' gáguze naga zua xezre na', blé'ene' benne' zaj nu'e tu bi gate zeajlecachē'-be', na' naca be' bi tulicha' chee' xrnabe', nu'ula na' ba gute benne' chie'. Benne' zan, benne' lazrie' zjácálene' le'. ¹³Gate Xránadxu blé'ene' nu'ula na', na' bexache lazre' le', ne guzre' le':

—Québedxa cuezru'.

¹⁴Nadxa gubiga Jesús dxu'a xi'ina xu'ube', na' bte' na. Na' benne' ca' zeajlexexu'e-be' gulague'. Na' Jesús guzre' bi gate na':

—Bidau', dxapa' lue', guxasa.

¹⁵Na' bi na' ba nate bexásabe' gudxe'be', na' bezú laube' dxuchálajbe'. Na' Jesús bunézruje'-be' lu na' xrnabe'.

¹⁶Gate belelé'e benne' ca' da nigá, na' belezrebe', ne gulezú lawe' dxelúe lá'ane' Dios, dxelenné':

—Tu benne' zrente, benne' dxenné' waláz chee' Dios, ba blé'e ládujla dxi'u.

Cá'anqueze dxelenné':

—Dios ba blé'e dxácalene' xezr chee'.

¹⁷Ca naca naga nababa Judea, ne xezre walíaz chee' na belén bèneache ca naca xel-la waca chee' Jesús.

Juan, bènea' bchue' bèneache nisa dxesel-le' gubáz chee' lau Jesús

(Mt. 11.2-19)

¹⁸Naga xu'u Juan lizre xia, bèneene' ca naca chee' da nigá lawe' da benne' ca' zjácálene' Juan buluzenne' le' da dxaca na. Juan gunné' chupa benne' ca', ¹⁹na' gusel-le' le' lau Jesús chee' cheajlechēbe' Le' che da li naque' Cristo, bènea' dxalla' xidē', u che dxal-la' xelebeze' benne' xula. ²⁰Nadxa benne' ca' gusel-la Juan belezrine' lau Jesús, na' gulé'e Le':

—Juan, bènea' bchue' bèneache nisa nasele' netu' zedajchébentu' Lue' che Lue' na' nactu' Cristo, bènea' dxalla' xidē', u che dxal-la' cuézantu' benne' xula.

²¹Ca lu zra na' Jesús bexune' benne' zante benne' we', ne benne' dxé'ene' xízrawe' da dxedá du zren, ne benne' ca' zaj xu'e be' xriwe', na' bexunē' benne' la chul-la ca'. ²²Nadxa Jesús guzre' benne' ca' nasele' la Juan:

—Le cheajxaca, ne le xē Juan ca naca da ba blé'ele, ne da bénele. Benne' la chul-la ca' dxelexelé'ene', na' benne' zrinnaj ca' dxelexedé', na' benne' dxeledxé'ene' we' guzru' ba belexaque', na' benne' xache' ca' dxelenne' dizra' chawe' chee' Dios. ²³Ba neza zren naca na chee' benne' quebe gusan lazre' neda'.

²⁴ Gate besí'aca benne' ca' gusel-la Juan, na' Jesús guzú lawe' dxuchálajlene' benne' zaj zre'e na' ca naca chee Juan na', dxenné':

—¿Bizra guxijale le'e xejinna'le le'e xixre' lawe' lataj? ¿Tu xia xtila da dx-utá be'? ²⁵ Che cabí, ¿bizra xejinna'le? ¿Tu benne' nacu zra lane' da zácále'e? Ba nézquezle le'e benne' ca' dxelacu zra lane' da zácále'e, ne dxelé'aj dx-elawe' da zácále'e zaj zre'e lizre benne' blau ca'. ²⁶ Che cabí, ¿bizra xejinna'le? ¿Tu benne' dxuchálaje' waláz chee Dios? Awe', ble'ele tu benne' nácadxé' szren ca tu benne' dxuchálaje' waláz chee Dios. ²⁷ Juan nigá naque' bènea' naxúaj na chee' lu xiche chee Dios, dxenné':

Dxesel-la' gubáz chia' lau Lue', chee' gucá'ana chawe' neza naga teu'.

²⁸ Dxapa' le'e, ládujla xúgute' benne' quebe nu chilá' benne' dxuchálaje' waláz chee Dios nácadxé' szren ca Juan nigá. Na'a benne' nácadxé' dxexruj lazre' naga dxenná bea Dios nácadxé' blau ca Juan nigá.

²⁹ Na' gunná Jesús:

—Gate na' benne' dxexruj lazre' ca', ne benne' wechizruj ca' belenne' da dxuchalaj Juan, guleque bé'ene' Dios naque' xr-látaje, na' beledxúe' nisa lu na' Juan. ³⁰ Benne' xudau' fariseo ca', ne benne' ca' dxuluxuzájle'e da nadxixruj bea na buluzúe' chalá'ala ca naca da dxaca lazre' Dios gune' chee', na' quebe beledxúe' nisa lu na' Juan.

³¹ Na' gunná Xránadxu:

—¿Ájazra gutil-la lēbeda' benne' zaj zre'e na'a zra? ¿Ájazra zaj naque'? ³² Zaj naque' ca bidu ca' dxelebe'be' dxelítajbe' lawe' xi'a, ne dxelebezre xa'abe', dxelebe' bidu ljwézrebe': “Bcuézrentu' bchiuj da bénele, san quebe bxá'ale. Bil-la xáchentú, san quebe gudxézrele.”

³³ Caní zaj naca benne' ca' lawe' da bla' Juan, bènea' bchue' bèneache nisa, ne quebe gudawe' xeta, ne quebe gu'e

xrise uva wal-la, na' gulenné' xu'e be' xri-we'. ³⁴ Nadxa bla'a neda', Benne' Gulje' Bèneache, dxe'aj dxawa', na' dxelenné' naca' wagu xrata, ne benne' dxé'ajle'e, ne dxelenné' naca' ljwezre benne' dul-la ca', ne benne' wechizruj ca'. ³⁵ Xel-la sina chee Dios naca bea na ne chee da dxelún benne' ca' zaj nape' xel-la sina chee Dios.

Da bchalaj Jesús lizre Simón, benne' xudau' fariseo

³⁶ Tu benne' xudau' fariseo gunné' Jesús cheajtawe' xeta lizre', na' Jesús guxijaje' lizre bènea', na' gudxé'e dx-awe'. ³⁷ Nadxa tu nu'ula dul-la chee xezre na', gate benne' bzrin Jesús dxawe' xeta lizre benne' fariseo na', na' bzrin nu'ula na' ga na', nu'e tu da' naca na xiaj zaca, da nazrátē na da dxelá zixre.

³⁸ Gate bzrin nu'ula na' naga zua Jesús, na' gudxé'e zran ni'e dxebezre', ne guzú lawe' dxibe' ni'a Jesús nen nisa dxebezre', ne bsebize' ni'e nen xicha xíchaje', ne bnupe' ni'a Jesús, na' gulu'e na da dx-elá zixre na'. ³⁹ Na' benne' xudau' fariseo, bènea' gunné' Jesús lizre', gate blé'ene' da nigá, gunné' lu lázrdawe': “Chela benne' nigá da li naque' benne' dxuchálaje' waláz chee Dios, guéquebe'equeze' aja naca chee nu'ula nigá dxuté' ni'e, lawe' da naque' nu'ula dul-la.” ⁴⁰ Nadxa Jesús guzre' benne' fariseo na':

—Simón, de tu da guchálajlena' lue'.

Na' bechebe benne' fariseo na':

—Gunná, Benne' Wesede.

⁴¹ Jesús gunné':

—Chupa benne' dxelal-le' dumí chee tu benne' tu dxusántezqueze' benne' dumí. Tue' dxal-le' chee' lazruj chee chupiza, na' xetúe' dxebague' lazruj chee chupa beu'. ⁴² Lawe' da quebe dxelezéquene' xelexexízruje' chee bènea', na' le' bnite lawe' chee dxúpatē benne' ca' ca naca da dxelebague' chee'. Na'a gunná, ¿nula benne' caní zrí'idxene' bènea'?

⁴³ Simón becheḅe':

—Dxéqueda' bēnnea' bnite lawe' chee' da zrendxa.

Na' Jesús guzre' le':

—Da li dxennáu'.

⁴⁴ Nadxa Jesús gunné'e nu'ula na', na' guzre' Simón:

—¿Dxelé'enu' nu'ula nigá? Neda' guxu'a lizru', ne quebe nu gunná be'enu' quibe ni'a, san nu'ula nigá gudibe' ni'a nen nisa dxebezre', ne bsebizre' na nen xicha xíchaje'. ⁴⁵ Quebe bnupu' neda', san nu'ula nigá, gate guxú'utea', quebe dxusané' dxunúpequeze' ni'a. ⁴⁶ Quebe gulú'u da za xíchaja', san nu'ula nigá gulu'e ni'a da dxelále'e zixre. ⁴⁷ Chee le na' dxapa' lue', lawe' da nazrí'ile'ene' neda', da nigá naca bea na ba bnite lawa' chee' ca naca dul-la zan chee', san bēnnea' naca bábaze dul-la chee' da bnite lawa', láteze zrí'ine' neda'.

⁴⁸ Nadxa Jesús guzre' nu'ula':

—Dul-la chiu' ba bnite lawa'.

⁴⁹ Na' benne' ca' zaj zre'e nen Le', ne zaj dxe'e na' gulezú lawe' dxelenné' lu lázrdawe': "¿Nuzra benne' nigá, dxunite láuqueze' dul-la?"

⁵⁰ Jesús guzre' nu'ula na':

—Ba naláu' lawe' da guxéajle'u chia'. Bexíaj duté xel-la dxebeza zri lazre'.

Nu'ula ca' belún zrin chee Jesús

8 Ca gudé da nigá, gudá Jesús zane' xezre, ne xézredu ca', dxusédené', ne dxuchálaje' ca dxenná bea Dios. Benne' chazrinnu gubáz ca' zjácalēne' Le'. ² Cá'anqueze zjácale Le' bal-la nu'ula ca', benne' ca' bexune' le' ca naca xízrawe' chee', ne bebéaje' be' xriwe' ca' da zaj xu'e. Ládujla nu'ula ca' ziaj María Magdalena, nu'ula na' belexedxúaj gazre be' xriwe' lu xichaj lázrdawe'. ³ Ládujla le' ziajqueze Juana, zru'ula Chuza, benne' na' xu'u lu ne'e da napa Herodes. Cá'anqueze ládujla le' ziaj Susana, na'

zjaca nu'ula zandxa na', nu'ula ca' dxelácalēne' Jesús nen da zaj nape'.

Da dxulé'e na ca naca chee benne' dxaze' zrua' xtila

(Mt. 13.1-9; Mr. 4.1-9)

⁴ Benne' zan beledxúaje' lu xezre ca' chee xelelé'ene' Jesús, na' gate belezraga benne' zan naga zue', na' bchálaje' tu da dxulé'e na, dxe'e le':

⁵—Tu benne' dxaze' guzé'e zjaze' zrua' xtila. Ca zéaje' dxaze' na, bal-la binnedu ca' xeañlechaze na dxu'a neza, na' benne' ca' bululéaje' na, na' belezrín bxínnedau' guláguba' na. ⁶ Xebal-la binnedu ca' xeañlechaze na lu xiaj ca', na' gate binnedu caní belezría na, chadite gulebizre na, lawe' da quebe gudxé' gupa'. ⁷ Xebal-la binnedu ca' xeañlechaze na naga zaj dxe' lue xeché', na' bululule xeché' ca' le na. ⁸ Xebal-la binnedu ca' xeañlechaze na lu xu bebe, na' gate belegula na, na' gulezríale'e na. Bal-la na gulezría na tu gaxúa weaj.

Gate bexuzre bchalaj Jesús da nigá, na' gunné' zizraj:

—¡Che le'e zua nágale, le xene!

Jesús dxenné' bizr chee na dxuchálaje' da dxulé'e na

(Mt. 13.10-17; Mr. 4.10-12)

⁹ Nadxa benne' ca' dxusede Jesús gulénábene' Le' bizra zéaje' da dxulé'e nigá.

¹⁰ Jesús guzre' le':

—Dios dxuzéajni'ine' le'e ca naca da nagache chee xel-la dxenná bea chee', san benne' xula, dxuchálajlena' le' da dxulé'e na caní, chee gate dxelelé'ene' xelaque' ca benne' quebe dxelelé'ene', ne gate dxelenné' quebe dxeléajni'ine'.

Jesús dxuxuzájle'e da dxulé'e na ca naca chee bēnnea' dxaze'

(Mt. 13.18-23; Mr. 4.13-20)

¹¹ Na' gunná Jesús:

—Da nigá naca ca zéaje da dxulé'e na': Bínnedu ca' zéaje na xrtizra' Dios. ¹²Bínnedu ca' xeajlechaze na dxu'a neza zéaje na benne' ca' dxelenne' xrtizra' Dios, san za' da xriwe', na' dxegúa na dizra' na' lu xichaj lázrdau benne' ca', chee quebe xeléajle'e, ne quebe xeelé'. ¹³Bínnedu ca' xeajlechaze na lu xiaj ca' zéaje na benne' ca' dxelenne' dizra' na', ne dxelezi'e na dute xel-la dxelebé, san quebe dxaze na lu xichaj lázrdawe'. Dxeléajle'e tu ch'í'dau'ze, na' gate dxeledé' lu da zi' da xa', na' dxulusán lazre' na. ¹⁴Bínnedu ca' xeajlechaze na naga zaj dxe' lue xeche' zéaje na benne' ca' dxelenne' dizra' na', na' dxeajxaque', na' lawe' da dxelezené' gunne xue da zante, ne dxelezé' lazre' xel-la gunní'a, ne da xele'aj xelawe' da zácalle'e, na' xúgutę da caní dxulusunite na dizra' na', na' quebe dxun na zrin lu xichaj lázrdawe'. ¹⁵Na' bínnedu ca' xeajlechaze na lu xu bebe zéaje na benne' ca' zua chawe', ne du lazre' lázrdawe', na' gate dxelenne' dizra' na', dxuluzúa chache' na, na' dxun zrin dizra' na' lu xichaj lázrdawe'.

**Da dxulé'e na ca naca
chee tu da dxegú'u lení'**

(Mr. 4.21-25)

¹⁶ Gunná Jesús:

—Netú benne' che gugalę' da dxegú'u lení', quebe gudúsię' na tu xi'ina, u zranle ga dxasię', san guzú' na sibe, chee cu'u lení' na chee benne' zaj zre'e lu xu'u na'. ¹⁷Quebe bi de da nagache' da quebe gulé'e lau na, ne quebe bi xu'u lu xichaj lázrdau bėnneache da quebe gaca bea na, ne látęequeze na.

¹⁸'Chee le na', le xene xanne'. Tu benne' nazi'e xrtizra' Dios, wazidxe', san benne' quebe dxezi'e na, wegá'a ca da du dxéquene' nape'.

**Dxeleznín lau Jesús xrne'e,
ne benne' biche' ca'**

(Mt. 12.46-50; Mr. 3.31-35)

¹⁹Nadxa xrna Jesús, ne benne' biche' ca' belezrine' naga zuę', san quebe gulezéquene' xelezrine' lau Le', lawe' da zrále'e benne' zan ga na'. ²⁰Tu benne' na' bzenne' Jesús, gunné':

—Xrna'u, ne bi bichu' ca' zaj zre'e chale'aj nigá, dxelaca lazre' xuluchála-jlene' Lue'.

²¹ Jesús guzre' le':

—Benne' ca' dxelenne' xrtizra' Dios, ne dxelune' ca dxenná na, benne' caní zaj naque' ca xrna'a, ne benne' bícha'dau' ca'.

**Jesús dxuzúa zrię' be' bdunu',
ne xeajxruga chee nísadau'**

(Mt. 8.23-27; Mr. 4.35-41)

²²Tu zra guxú'u Jesús tu lu da dxedá lawe' nísadau' nen benne' ca' dxusédenę', na' guzre' le':

—Cheajdxu xecha la'a nísadau'.

Na' gusiá'que', ²³ne dxácate zjaque' lu nísadau' na', guse Jesús. Na' guzú' lau dxácalle'e be' bdunu' lu nísadau', na' guzú' lau dxu'u nisa lu da dxedá lawe' nísadau' na', ne ba dxácate waxaze na lu nísadau'.

²⁴Nadxa bulusebane' Jesús, dxele'e Le':

—¡Benne' Wesęde! ¡Benne' Wesęde!
¡Ba dxázedxu lu nisa nigá!

Nadxa guxasa Jesús, na' gudil-le' be' bdunu' na', ne nisa na', na' ca naca da ca' belezúa zri na. ²⁵Nadxa Jesús guzre' benne' ca' dxusédenę':

—¿Quebe ne chéajle chee Dios?

Benne' ca' belezrebe', ne belexebánene', na' buluchebe ljwezre':

—¿Núzraqueze benne' nigá, dxenná bé'ene' be', ne nisa, na' dxuluzúa na dizra' chee'?

Tu benne' Gadara xu'e be' xriwe'*(Mt. 8.28-34; Mr. 5.1-20)*

²⁶Nadxa belezrine' xecha la'a nisa lu xezr la xu chee xezre Gadara, chalá'a ca'ala chee Galilea. ²⁷Gate bedxúaj Jesús lu da dxedá lawe' nísadau' na', na' bzin tu benne' xezre na' lau Le'. Zánete iza ba guca xu'u be' xriwe' ca' benne' nigá. Quebe gúcue' zra lané', ne quebe guzúe' netú lu xu'u, san xeajchu'e tu lu ba ca'. ²⁸Gate bl'éne' Jesús, na' xeajzú zribe' lau Le', na' gudxezre xe'e, dxenné':

—¿Bizr chee na' za'u naga zua', Jesús, Zri'ine Dios szrente? Dxata' xueda' Lue' quebe gusaca zi'u neda'.

²⁹Gunná na caní lawe' da ba gunná be'e Jesús be' xriwe' ca' xelexedxúaj na lu xichaj lázrdau benne' nigá. Zane' lasa be' xriwe' ca' ba gulela na benne' nigá. Benne' xezre na' gulele' benne' nigá, ne buluchéajé' le' ni'a ne'e nen du xia, san le' bzúxuje' du xia na', na' be' xriwe' ca' guleché na le' le'e xixre' lawe' lataj. ³⁰Jesús bchebe' be' xriwe' ca':

—¿Bi lele'?

Na' bechebe le na:

—Neda' lea': Da Zan.

Ca' gunná na lawe' da xu'u be' xriwe' zante benne' na'. ³¹Be' xriwe' ca' gulenaba na Jesús quebe sel-le' na lataj chul-la. ³²Lu xi'a naga zua Jesús, na' zrále'e cuche zan dxeláguba', na' be' xriwe' ca' gulata' xue na Jesús gu'e lataj da ca' cheajxezrá na lu cuche ca', na' bnezrui Jesús na lataj. ³³Nadxa be' xriwe' ca' belexedxúaj na lu xichaj lázrdau benne' na', na' gulú'u na lu cuche ca', na' xúgute cuche ca' buluzrúnnujba', ne gulebixreba' dxu'a chjéa, na' xeajlecházeba' lu nísadau', naga gulépeba', guláteba'.

³⁴Benne' ca' dxuluxúe' cuche ca', gate belelé'ene' ca da guca, na' buluzrúnnuje' lu xel-la dxelezrebe, na' gulé'e benne' zaj zre'e le'e xixre', ne benne' zaj zre'e lawe'

xezre ca da guca. ³⁵Nadxa benne' ca' belexdxúaje' xeajlenné'e ca da guca. Gate belezrine' naga zua Jesús, na' belelé'ene' bènea' belexedxúaj be' xriwe' ca' lu xichaj lázrdawe', dxe'e zran ni'a Jesús, ba nácue' ladxe', ne ba bezúa chawe' xichaj lázrdawe', na' benne' ca' belezrebe'. ³⁶Na' benne' belelé'e ca da guca buluchálajlene' benne' xula ca' ca guca gate bexaca bènea' guxú'e be' xriwe' ca'. ³⁷Gate belenne' caní, ca naca benne' zaj zre'e lu xezr la xu chee xezre Gadara gulezú lawe' dxelata' xúene' Jesús xezé'e lazrie', lawe' da dxelezrébele'e. Ca'an guca, guxú'u Jesús lu da dxedá lawe' nísadau', chee xezé'e xéaje'. ³⁸Bènea' belexedxúaj be' xriwe' ca' lu xichaj lázrdawe' gunabe' lau Jesús gunézruje' lataj chéajlene' Le', san Jesús busebague' le' xegá'ane' lázrie', na' guzre' le':

³⁹—Bexiaj lizru', na' bchalaj chee xúgute ca da ba ben Dios chiu'.

Na' benne' na' bezé'e zexíaje', na' bchálajlene' benne' xezre ca' ca da ben Jesús chee le'.

Jesús dxexune' bí nu'ula chee Jairo, ne tu nu'ula xeajté' zra lané'*(Mt. 9.18-26; Mr. 5.21-43)*

⁴⁰Gate bezrín Jesús xecha la'a dxu'a nísadau', benne' ca' zaj zre'e na' gulezú lu ne'e Le' nen duté xel-la dxelebé, lawe' da xúgute' dxelebeze' Le'. ⁴¹Nadxa bzin tu benne' le' Jairo, benne' blau chee xu'u naga dxelezraga judío ca', na' bzu zribe' lau Jesús, ne guta' xúene' Le' chéaje' lizre', ⁴²lawe' da zua tuze bí nu'ula chee'. Xu'ube' chazrinnu iza, na' ba dxaca wátebe'. Gate guzá' Jesús zéaje', benne' zante zjácálene' Le', ne buluchídeté ljwezre'.

⁴³Ládujla benne' ca' zeaj tu nu'ula quebe chawe' zue', na' chazrinnu iza ba zeaj dxé'ene' we' dxen da dxaca chee nu'ula ca'. Ba gudízruje' benne' dxelexún bèneache ca' xúgute ca da gudape',

na' quebe bi gulezéquene' xelune' chee xexaca nu'ula na'. ⁴⁴Nu'ula na' gubigue' cúzrula Jesús, na' xeajté' zran ni'a zré', na' la ná'queze bexágate dxen da dxaca nu'ula na'.

⁴⁵Nadxa Jesús bchebe':

—¿Nuzra bta neda'?

Xúgute' gulenné': "Quebe nu ne gutá Lue'", na' Pedro, ne benne' ljwezre' ca' gulenné':

—Benne' Wesede, benne' caní dxuluchídee' Lue', ne dxuluzrigue' Lue', na' dxuchébequezu', dxennáu': "¿Nuzra bta neda'?"

⁴⁶Jesús gunné':

—Tu benne' bte' neda' lawe' da gúquebe'eda' ben zrin xel-la waca chia' da bexún na tu benne'.

⁴⁷Gate gúquebe'e nu'ula na' ba neze Jesús da guca, nadxa gudéé' dxezrízete', na' bzu zribé' lau Jesús, ne guxrúalepe' lau xúgute' benne' ca' bizr chee na' bte' Jesús, ne ca guca bexácaté'. ⁴⁸Nadxa gunná Jesús, guzre' nu'ula na':

—Zrí'ina'dau', ba bexacu' lawe' da guxéajle'u chia'. Bexíaj na'a, duté xel-la dxebeza zri lazre'.

⁴⁹Ne dxuchálate Jesús, bzrin tu benne' naga ze Jesús, benne' guzé'ē lizre Jairo, benne' blau chee xu'u ga na' dx-elezraga judío ca', na' guzre' Jairo:

—Ba gute bi nu'ula chiu'. Québedxa guzúa xuzru' Benne' Wesede nigá.

⁵⁰Gate ben Jesús ca' gunné', na' guzre' Jairo:

—Quebe zrebu'. Con guxeajle. Bi nu'ula chiu' na' xexácabe'.

⁵¹Gate bzrin Jesús xu'u na', netú quebe be' lataj chú'ule Le', san tuze Pedro, ne Jacobo, ne Juan, ne xra xrna bi nu'ula na'. ⁵²Xúgute' benne' zaj zré'ē na' dxelebezre', ne dxelebezre xache' chee bi nu'ula na'. Jesús gunné':

—Quebe cuézrele. Bi nú'uladu nigá quebe nátebe'. Dxásezebe' na'.

⁵³Na' benne' ca' buluzrizre' chee', lawe' da zaj nézquezne' ba gútebe'. ⁵⁴Nadxa Jesús guqué'ē na' bi na', na' gunné' zizraj: —¿Bi nu'ula, bexasa!

⁵⁵Na' bebanbe', ne bexásatebe'. Na' Jesús busebague' le' xulunézruje' da gágube'. ⁵⁶Xra xrnabe' belexebánele'ēne'. Jesús busebague' le' quebe nu xelé'ē ca da guca.

Jesús dxesel-le' benne' chazrinnu ca' xelune' xrchine'

(Mt. 10.5-15; Mr. 6.7-13)

9 Jesús bhague' benne' chazrinnu ca' dxusédené', na' bnézruje' le' xel-la waca, ne xel-la dxenná bea chee xelexebéaje' xúgute' cue' be' xriwe' ca' da zaj xu'u bénneache, ne chee xelexexune' benne' ca' zaj xu'ē xízrawe'. ²Na' gusel-le' le' chee xuluzenne' bénneache ca dxenná bea Dios, ne chee xelexexune' benne' zaj xu'ē xízrawe' ca'. ³Na' guzre' le':

—Quebe bi gúale chee la neza. Quebe gúale xaga da guchíchele, na' xixruj chee, ne da gágule, ne dumí. Le gua' tu cue'ze zra lánale. ⁴Gáteteze xu'u naga chú'ule, le xegá'ana na' cadxa zrin zra xeza'ale lu xezre na'. ⁵Naga quebe xelezí'ē dizra' guchálate le', le xedxúaj xezre na', ne le cuibe bxrte xu da da' ní'ale, da gulé'e na zaj nabague' zria lau Dios.

⁶Nadxa beledxúaje', na' ca naca xézredu ca' xeajlechálaje' dizra' chawe' chee Dios, ne belexexune' benne' zaj xu'ē xízrawe' ca'.

Ca guca gate gute Juan, benne' bchue' bénneache nisa

(Mt. 14.1-12; Mr. 6.14-29)

⁷Herodes, benne' dxenná be'ēne' xezre la xu na', benne' ca naca xúgute' da dxun Jesús, na' guzúe' stebe lawe' da dxelenná bal-la benne' ba bebán Juan ládujla benne' gate. ⁸Xebal-le' dxelenné' Elías, bénnea' bchálaje' waláz chee Dios

ba belé'e, na' xebal-le' dxelenné' ba bebán tu benne' ca' buluchálaje' waláz chee Dios ca ni'te. ⁹Herodes gunné':

—Néda'queza' gunná be'eda' nu gudxugu xichaj Juan. ¿Nuzra benne' nigá xca' da zante dxenda' dxune'?

Nadxa Herodes bene' ba xuzre lé'ene' Jesús.

Jesús dxugawe' chi xun gaxúa benne'
(Mt. 14.13-21; Mr. 6.30-44; Jn. 6.1-14)

¹⁰Gate belexezrín benne' gubáz ca' chee Jesús lau Le', na' gul'é Le' ca da ba belune'. Na' Jesús beche'e benne' ca', na' besia'que' zeajxaque' tu lataj da nagá'ana zitu' naga zaj dxe' xezre ca', naga zua lu xezr la xu chee xezre Betsaida. ¹¹Gate benne' xezre na' belenne' zua Jesús na', na' gusiá'que' zjaque' naga zua Le'. Na' Jesús guzú' lu ne'e benne' ca', ne bchá-lajlene' le' ca dxenná bea Dios, ne bexune' benne' zaj xu'e xízrawe' ca'.

¹²Gate guzú' lau zeaj dxezré', na' gulebige benne' chazrinnu gubáz ca' chee Jesús lau Le', na' gul'é Le':

—Bze benne' caní dizra' chee chjaque' naga xelasie', ne xelílaje' da xelawe' xézredu ca' zaj nnita gagu, lawe' da ga zúadxu nigá quebe bi de.

¹³Jesús guzre' le':

—Le gunezruj le'e da xelawe'.

Nadxa benne' ca' belé'e Jesús:

—Quebe dedxa cheentu' ca gázxuga xeta xtíladau, ne chúpaga bela, u ¿wacheajxríquezentu' da xelagu catite benne' zan caní?

¹⁴Zaj zra ca chi xun gaxúa benne' biu ca' ga na'. Nadxa Jesús guzre' benne' ca' dxusédene':

—Le xe benne' ca' xelebé'e chi xun weaje' tu cue' tu cue'.

¹⁵Ca'an belune', na' gulebe'e xúgute'.

¹⁶Nadxa Jesús guqu'é da gazxu' xeta xtila ca', ne chupa bela ca'. Na' guchisa lawe' xabaala, ne guzre' Dios "Xcalenu'", na' ca bexuzre bzúzruje' na, na' bnézru-

je' na benne' ca' dxusédene' chee xelisie' na chee benne' zan ca'. ¹⁷Xúgute' gu-lawe', ne belélaje'. Ca gudé na' bulusuzré'e chazrinnu ga' da bízrujdu ca' belexegá'ana na.

Pedro dxenné' Jesús naque' Cristo

(Mt. 16.13-19; Mr. 8.27-29)

¹⁸Tu zra gate zua Jesús dxuchálajlene' Dios naga quebe zaj zra benne' zan ca', na' zrale' benne' ca' dxusédene' Le', na' Le' bchebe' benne' ca':

—¿Nuzra dxelenná benne' naca' neda'?

¹⁹Le' belexechebe':

—Bal-le' dxelenné' nacu' Juan, benna' bchue' benna' nisa, na' xebal-le' dxelenné' nacu' Elías, benna' bchá-laje' waláz chee Dios, na' xebal-le' dxelenné' nacu' tu benne' ca' buluchálaje' waláz chee Dios ca ni'ite, na' bebane'.

²⁰Nadxa Jesús bchebe':

—Na' le'e, ¿nuzra dxennale naca'?

Na' gunná Pedro:

—Nacu' Cristo chee Dios.

**Jesús dxuzenne' benne'
ca' ca gaca gate gatie'**

(Mt. 16.20-28; Mr. 8.30—9.1)

²¹Jesús bsebage' benne' ca' quebe nu xel'é ca'. ²²Na' guzre' le':

—Neda', Benne' Gulje' Benna'che, dxal-la' téle'a xel-la zi', na' benne' gula sina ca', ne benne' xíchaje' ca' chee bxruze, ne benne' ca' dxuluxuzájle'e da nadxixruj bea na xuluzié' neda' chálá'ala. Xelútie' neda', san gate gaca chunna zra, na' xebana'.

²³Ca gudé na' guzre' ca naca benne' zaj zre'e na':

—Che nu benne' dxaca lazre' gaque' neda' tuze, dxal-la' guzúe' chálá'ala xúgute' da naca chee', na' gune' neda' tuze xúgute' zra, lácala gate benne' na'. ²⁴Benne' dxaca lazre' gapa chi'e xel-la nabán chee', gunítie' na, san benne' gunítie' xel-la nabán chee' lawe' da

naque' chia', wazrué'ene' na. ²⁵ ¿Bizra da ba neza gaca na chee tu benne' che gape' ca naca da de lu xezr la xu nigá, san cuía xi' léqueze'? ²⁶ Che nu benne' xedué'ene' chia' neda', ne chee dizra' chia', cá'anqueze neda', Benne' Gulje' Bénneache, wedué'eda' chee bénnea' gate za'a neda' chee nna be'a nen xel-la szren chee Xra', ne chee gubáz lá'azxa chee xabáa ca'. ²⁷ Da li dxapa' le'e, bál-lale zrale nigá quebe gátele nédxudxa ca lé'ele zra nna bea Dios.

Gate bcha lu'a lesaca Jesús

(Mt. 17.1-8; Mr. 9.2-8)

²⁸ Ca guzre xi' gudé gunná Jesús da nigá, na' guluéne' tu lu xi'a chee guchá-lajlene' Dios, na' xjácate Pedro, ne Jacobo, ne Juan Le'. ²⁹ Dxácate dxuchá-lajlene' Dios, na' bcha lu'a lesaca Jesús, na' zra lané' bexaca na da chiche, ne guca tite na. ³⁰ Nadxa bululé'e lau chupa benne' dxuluchálajlene' Jesús. Zaj naque' Moisés ne Elías. ³¹ Naga zele Jesús benne' ca' gúcatite' legala, na' dxuluchálajlene' Jesús ca gaca gate gatie' Le' xezre Jerusalén. ³² Gulácale'e welase Pedro ne benne' ljwezre' ca', san bulusebán lazre', na' belelé'ene' ca naca xel-la szren chee Jesús, ne chupa benne' ca' zaj zé'lene' Jesús. ³³ Gate benne' ca' belexesiá'que' naga ze Jesús, na' Pedro gunné':

—Benne' Wesede, néquega zúadxu nigá. Benna netu' lataj guntu' chunna xu'u lága'dau', tu chiu', ne tu chee Moisés, ne tu chee Elías.

Pedro quebe dxéquebe'ene' ca da dxenné'. ³⁴ Dxácate dxenná Pedro caní, na' bla' tu beuj da gucu na naga zaj zre'e, na' belezrebe Pedro, ne benne' ljwezre' ca' gate gulezre'e lu beuj na'. ³⁵ Na' belenne' chi'i nu dxuchalaj lu beuj na', gunná:

—Bi nigá naque' Zri'ina', nazrí'te lazra'. Le xen da dxuchálajbe'.

³⁶ Ca gudé belenne' chi'i na', na' belelé'ene' Jesús ba ze tuze'. Na' benne'

caní gulezúe' zrize, na' quebe nu gulé'e ca da belelé'ene'.

Jesús dxexune' tu bi biu xu'ube' be' xriwe'

(Mt. 17.14-21; Mr. 9.14-29)

³⁷ Gute xu, gate belexetaje' lu xi'a na', na' benne' zan zjaque' zeajlexrígale' Jesús. ³⁸ Nadxa tu benne' ca' gunné' zizraj, guzre' Jesús:

—Benne' Wesede, dxata' xueda' Lue' dajxú' bi biu chia' lawe' da tu lícha'te bi chia' naca, ³⁹ na' tu be' xriwe' dxaze na lebe', ne dxucuezre xa'a na lebe', ne dxudixire dxutula na lebe', na' dxe-bía bzrina' dxú'abe'. Dxusaca zi na lebe', ne quebe dxaca lazre' na gusán na lebe'. ⁴⁰ Ba guta' xueda' benne' ca' dxusé-denu' chee xelexebéaje' na, san quebe gulezéquene'.

⁴¹ Jesús bechebe':

—Le'e, benne' wen chupa lazre', ne wen da calela. ¿Ájate dxal-la' súalena' le'e? ¿Ájate dxal-la' guchaga lawa' nen le'e? Xeajxri' zri'inu' na' nigá.

⁴² Gate bi cuide' na' ba zéajbe' gagu, na' be' xriwe' na' gudín na lebe' xu, ne bdxixre btula na lebe'. Na' Jesús gudille' be' xriwe' na', ne bexune' bi cuide' na', na' bdee'-be' lu na' xrabe'. ⁴³ Xúgute benne' ca' belexebánene' ca naca xel-la szren chee Dios.

Jesús dxuzenne' benne' ca' xecha lasa ca gaca gate gatie'

(Mt. 17.22-23; Mr. 9.30-32)

Dxácate na' xúgute benne' ca' dxelexebánene' ca da dxun Jesús, Le' guzre' benne' ca' dxusédené':

⁴⁴ —Le xen xanne' da nigá, ne quebe gal-la lázrele na. Neda', Benne' Gulje' Bénneache, wuludée' neda' lu na' bénneache.

⁴⁵ Benne' ca' dxusédené' quebe guléa-jni'ine' ca da dxenná Jesús lawe' da quebe ne gunézruj Dios lataj xeléa-

jni'ine', na' belezrebe' xelenabe' Jesús guzəjajni'ine' le' ca da na' gunné'.

¿Nuzra naca blau?

(Mt. 18.1-5; Mr. 9.33-37)

⁴⁶Nadxa benne' ca' dxusede Jesús gulezú lawe' dxuluchebe ljwezre' núzraqueze naca blau ládujla le'.

⁴⁷Jesús gúquebe'ene' ca da dxelenné'. Nadxa guqué'e tu bi biúda'u, ne bze'-be' cuité', ⁴⁸na' guzre' benne' ca':

—Benne' gape' ba lá'ana tu bidu caní lawe' da nazrí'ine' neda', néda'queza' dxape' ba lá'ana, na' benne' dxape' ba lá'ana neda', dxápaqueze' ba lá'ana Dios, Bénnea' nasel-le' neda'. Cá'anqueze bénnea' nácadxe' benne' dxexruj lazre' ládujla le'e, benne' nigá naque' benne' blau.

Benne' quebe dxedábague' dxi'u zué' gácaləne' dxi'u

(Mr. 9.38-40)

⁴⁹Nadxa Juan guzre' Jesús:

—Benne' Wesede, blé'entu' tu benne' dxuchínene' Lau', dxebéaje' be' xriwe' ca' lu xichaj lázrdau benne' ca', na' gúzrentu' le' quebe guné' ca' lawe' da quebe naque' dxi'u tuze.

⁵⁰Jesús guzre' le':

—Quebe guzágale ca da dxune' lawe' da benne' quebe dxedábague' dxi'u zué' gácaləne' dxi'u.

Jesús dxedil-le' Jacobo ne Juan

⁵¹Gate ba za zrin zra dxal-la' xexíaj Jesús xabáa, ben zi' lazre' chéaje' Jerusalén. ⁵²Na' gusél-le' gubáz chee' ca' xelebíá lawe', na' benne' ca' xjaque' tu xézredau' nababa Samaria chee' cheajlecuéze' naga sua Jesús. ⁵³Benne' Samaria ca' quebe gulaca lazre' xegá'ana Jesús na', lawe' da guleque bé'ene' zéaje' Jerusalén. ⁵⁴Gate Jacobo ne Juan, benne' ca' dxusede Jesús, belelé'ene' da nigá, na' gulé'e Jesús:

—Xran, ¿dxaca lazru' nna béantu' xetaj xi' da za xabáa chee' guzríá xi na benne' caní, ca ben Elías, bénnea' bchála-je' waláz chee' Dios?

⁵⁵Nadxa Jesús guné'e le', ne gudil-le' le', dxenné':

—Le'e quebe nézele nu be' zúale le'e. ⁵⁶Caní naca lawe' da bla' neda', Benne' Gulje' Bénneache, quegá chee' guzríá xi'a xel-la nabán chee' bénneache, san chee' gucache chawa' le' na.

Nadxa xjaque' xetú xézredau'.

Benne' dxelaca lazre' chjácaləne' Jesús

(Mt. 8.19-22)

⁵⁷Ca zjaque' lu neza na', tu benne' biu guzre' Jesús:

—Xran, dxaca lazra' sáləna' Lue' gáteteze chéaju'.

⁵⁸Jesús bechebe':

—Beza ca' zaj zua bluaj cheeba', na' bxinnedu ca' zaj zria xrú'uneba', san neda', Benne' Gulje' Bénneache, quebe bi de ga xrua xíchaja'.

⁵⁹Na' Jesús guzre' xetú benne':

—Ben neda' tuze.

Benne' nigá gunné':

—Xran, benna neda' lataj cheajcáchea' xra'.

⁶⁰Na' Jesús bechebe':

—Be lataj benne' ca' zaj naque' ca benne' gate xulucache' ljwezre', na' lue', guxíaj, xejchalaj ca dxenná bea Dios.

⁶¹Nadxa tu benne' xula guzre' Jesús:

—Xran, dxaca lazra' guna' Lue' tuze, san steca, benna neda' lataj xexá'a cheajzéa' dizra' benne' zaj zra' lizra'.

⁶²Jesús guzre' benne' na':

—Benne' dxugá'ane' bezre, na' nne'e cúzrule', quebe gaca chee' bénnea' guné' zrin chee' da dxenná bea Dios.

Jesús dxesel-le' benne' gaxún chi ca'

10 Ca gudé na', Xránadxu guqué'e xegaxún chi benne' ca', na' gusél-

le' chupa weaje' xelebía lawe' lau Le' xúgute xezre, ne xézredu ca' naga dxal-la' chéaje' Le'. ² Guzre' benne' ca':

—Da li dxennéa', lina da zren naca na, na' benne' wen zrin bábaze zaj naque'. Chee le' na' le naba lau Xrane zrin na' sel-le' benne' wen zrin ca' xelexequé'e lina na'. ³ ¡Le hjaca! Le nna'xque, neda' dxesel-la' le'e, gácale ca zríla'du ca' ládujla becu' xi'a ca'. ⁴ Quebe gúale xixruj, ne dumí, ne zrélale, ne quebe gagale la neza nu guchálajle. ⁵ Gate chu'ule tu lu xu'u, na' gugápale diuzre, nnale: “Xel-la dxebeza zri lazre' gaca chee benne' zaj zre'e lu xu'u nigá.” ⁶ Che zaj zra' na' benne' dxelebeza zri lazre', na' da gunábale gaca chee benne' ca', san che quebe nu chilá' naca caní, le naba quebe gaca da ba gunábale. ⁷ Le xegá'ana lu xu'u ná'queze, na' le xi'aj le gagu ca da xelunne' lawe' da benne' wen zrin quebe te le tuné'. Quebe cheajsúale tu xu'u xetú xu'u. ⁸ Gate zrinle tu xezre naga xelezi' lu ne'e le'e, le gagu ca da xelunne'. ⁹ Le xexún benne' zaj xu'e xízrawe' zaj zre'e na', na' le xe'e: “Xel-la dxenná bea chee Dios ba zua nen le'e.” ¹⁰ Che zrinle tu xezre naga quebe xelezi' lu ne'e le'e, le xedxúaj la neza chee xezre na', na' nnale: ¹¹ “Ca naca bxrtedu' da' ní'antu' dxexébíentu' na chee gaca tu da gulé'e na le'e nabágale zria lau Dios. Dخال-la' nézele ba bla' ládujla le'e xel-la dxenná bea chee Dios.” ¹² Dxapa' le'e, ca lu zra guchi'a Dios, da xelezaca benne' zaj zre'e lu xezre nigá gácadxa na xel-la zi' ca da xelezaca benne' xezre Sodoma, xezre na' bzria xi' Dios.

Da gaca chee xezre naga quebe beluné' ca dxenná xrtizra' Dios

(Mt. 11.20-24)

¹³ Na' gunná Jesús:

—¡Edxugúa le'e, benne' xezre Corazín! ¡Edxugúa le'e, benne' xezre Betsaida! Chela lu xezre Tiro, ne lu xezre Sidón belelé'ene' ca naca xel-la waca chee

xabáa da ba gulaca ládujla le'e, gate na'te ba belexebí'i lazre', belácue' zra lané' tuzruj, ne buluzrí'e de xíchaje'. ¹⁴ Lu zra guchi'a Dios da dxaca, na' sácadxale le'e xel-la zi' ca da xelezaca benne' Tiro, ne Sidón. ¹⁵ Na' le'e, benne' xezre Capernaum, ¿dxéquele waxásale zrínte le xabáa? ¡Lataj chúl-lala xétajle!

¹⁶ Nadxa guzre' benne' ca' dxusédené':

—Benne' xenne' cheele le'e, chia' neda' xenne', na' benne' guzúe' le'e chalá'ala, neda' na' gusaque' ca', na' benne' guzúe' neda' chalá'ala, Dios, Bénnea' gusel-le' neda', guzúe' chalá'ala.

Dxelexezrín benne' gaxún chi ca'

¹⁷ Benne' gaxún chi ca' belexezrine' lu xel-la dxelebé, dxelenné':

—Xran, be' xriwe' ca' dxuluzúaqueze na dizra' cheentu' gate dxuchínentu' Lau'.

¹⁸ Jesús guzre' benne' ca':

—Ca' naca, na' neda' ble'eda' da xriwe' bexruj na zran xabáa ca tu xesa da dxeajsúa na lu xu. ¹⁹ Neda' ba benna' le'e xel-la dxenná bea chee guléajle be snia ca', ne bexrujni, ne chee guchúchujle duté xel-la dxenná bea chee da xriwe', na' quebe bi seque gune na le'e. ²⁰ Quebe bele lawe' da dxelún be' xriwe' ca dxennale le'e, san le be lawe' da ba naxúaj lala xabáa na'la.

Jesús dxebene'

(Mt. 11.25-27; 13.16-17)

²¹ Lu zra ná'queze gubéle'e Jesús, zúale Be' Lá'azxa Le', na' gunné':

—Dxue lá'ana' Lue', Xrae, Xrane xabáa ne xezr la xu, lawe' da ba blé'enu' bénne'du caní da bcácheu' chee benne' sina ca', ne benne' dxeléajni'ine'. ¡Ca' naca, Xrae, lawe' da ca'an guca lazru' Lue'!

²² 'Xra' ba benne' neda' xúgute. Quegá nu neze nu na' naca Zrí'ine', san tuze Xrá'queza', ne quegá nu neze nu na' naca

Xra', san tuze Zrí'inequeze', ne nu benne' ca' dxaca lazre' Zrí'ine' guzéajni'ine' le' Nu na' naca Xre'.

²³ Nadxa guné'e benne' ca' dxusédené', na' guzre' benne' cá'anze:

—Ba neza naca na chee benne' ca' dx-elelé'ene' ca da dxelé'ele le'e, ²⁴ lawe' da dxapa' le'e, zánete benne' ca', benne' buluchálaje' waláz chee Dios, ne benne' wénna' bea ca' gulaca lazre' xeledé'ene' ca da dxelé'ele le'e, san quebe belelé'ene' na. Gulaca lazre' xelenne' ca da dxenle le'e, san quebe belenne' na.

Da dxulé'e na ca ben benne' Samaria, benne' naque' chawe'

²⁵ Nadxa tu benne' dxuxuzájle'e da nadxixruj bea Dios bdxúaje', ne guxíajje' xeajchálajlene' Jesús chee gaca guzúa zrie' Le', na' bchebe' Le':

—Benne' Wesede, ¿bizra dxal-la' guna' chee gata' chia' xel-la nabán da zeajlí canna?

²⁶ Jesús bechebe':

—¿Bizra da naxúaj na lu da nadxixruj bea Dios? ¿Aja dxéquenu' da dxulabu'?

²⁷ Bénnea' dxuxuzájle'e da nadxixruj bea Dios bechebe':

—Bzri'i Xranu' Dios duté lárzda'u, ne nen duté bénne'du xu'u, ne nen duté xel-la dxun zi' lazre' chiu', ne nen duté xel-la dxulaba lazre' chiu', na' bzri'i le sa' ljwezru' ca nazrí'i cuinu'.

²⁸ Nadxa gunná Jesús, guzre' le':

—Cháwe'le'e bechebu'. Che dxunu' caní, na' gapu' xel-la nabán na'.

²⁹ Bénnea' dxuxuzájle'e da nadxixruj bea Dios guca lazre' gucá'ana chawe' cuine', na' guzre' Jesús:

—¿Nuzra na' le sa' lwezra'?

³⁰ Bechebe Jesús:

—Tu benne' guzé'e Jerusalén, béta-je' zíaje' Jericó. Lu neza na' xu'e, na' gulela gubán le', ne gulebané' ca naca da nape', ne zra lané'. Na' buluzálaje' le', ne besía'que' zaj nucá'ane' le' ca benne'

gate. ³¹ Nadxa gudé tu bxruze neza na', na' gate blé'ene' le', gudé'e chala'ala.

³² Cá'anqueze gudé na' tu benne' xrtia Leví, benne' dxuné' zrin chee xudau', na' gate blé'ene' bénnea', gudé'e chala'ala.

³³ Nadxa tu benne' Samaria gudé'e neza na', na' gate blé'ene' le' bexache lazre' le'.

³⁴ Gubigue' cuita benne' na', ne btupe' tu da za lu we' chee', ne xrise uva wal-la, na' bchele' na ladxe'. Nadxa bcuene' le' cuzru bea chee', na' beche'e le' tu lu xu'u naga xegá'ane', ne bxue' le' na'. ³⁵ Zra xula, ca bezá' benne' Samaria na', na' guléaje' chupa dumí da bnézruje' xrane xu'u na', ne guzre' le': “Bxue benne' nigá, na' che ba gucá'adxá xelate' dumí chiu', neda' xexunna' na gate xelá'a.”

³⁶ Nadxa Jesús guzre' benne' dxuxuzájle'e da nadxixruj bea Dios:

—¿Nula benne' chunna caní guque' le sa' ljwezre bénnea' gulela gubán ca'?

³⁷ Na' gunná bénnea' dxuxuzájle'e da nadxixruj bea Dios:

—Bénnea' bexache lazre' le'.

Nadxa Jesús guzre' le':

—Bexíaj lue', na' gúnquezu' ca'.

Jesús dxezrine' lizre Marta ne María

³⁸ Jesús bexu'e neza, na' bezrine' tu xézredau', na' lu xezre na' zua tu nu'ula le' Marta, na' gulu'e Jesús lizre'. ³⁹ Marta na', zua tu bi bile' le' María, na' María na' gudxé'e zran ni'a Jesús chee xenne' da dxuchálaje'. ⁴⁰ Marta déle'e da dxuné', na' bzrine' lau Jesús, ne guzre' Le':

—Xran, ¿quebe dxexache lazru' neda' lawe' da dxucá'ana bi bila' neda' chee guna' tuza' zrin cheentu'? Guzre-be' gácalebe' neda'.

⁴¹ Jesús bechebe':

—Marta, Marta, dxezéle'enu' gunne xue, ne zu' stébe ca naca chee da ca' dx-unu', ⁴² san de tuze da dxun na ba xen nu gun. María ba bezrelne' da cháwedxa, na' netú benne' quebe seque' cue' na.

**Ca dxal-la' gundxu
guchálajlędxu Dios**

(Mt. 6.9-15; 7.7-11)

11 Tu zra Jesús bchálajlęne' Dios tu lataj, na' gate bexuzre bchálajlęne' Dios, na' tu benne' ca' dxusédene' guzre' Le':

—Xran, bsęde netu' guchálajlęntu' Dios, ca ben Juan, bsędene' benne' ca' zaj dę'e le'.

² Jesús gunné':

—Gate guchálajlele Dios, na' nnaile: Xrantu' Dios, zu' xabáa, gaca lá'azxa Lau' Lue'. Gudá nna be'u.

Gaca ca dxaca lazru' lu xęzr la xu, ca da dxaca xabáa.

³ Benna cheęntu' da gáguntu' na'a zra.

⁴ Bnite lau dul-la cheęntu' ca dxunite launtu' cheę benne' ca' dxelune' cheęntu' da calela.

Quebe gu'u lataj da xriwe' cu'u na netu' neza cheę na, na' bselá netu' lu na' da calela.

⁵ Nadxa Jesús guzre' benne' ca':

—Che tu benne' ládujla le'e zua tu ljwezre', na' che zrine' lizre benne' ljwezre' na' dxęla, ne xę'e le': "Bi ljwezra', guleaj neda' chunna xeta xtila ⁶lawe' da zua tu bi ljwezra' za belá'tębe' lizra', na' quebe bi dę chia' gugawa'-be'."

⁷ ¿Wechebe benne' ljwezre' na', benne' xu'u lu xu'u: "Quebe gunu' neda' zęde. Naxęzuj dxa xu'u chia', na' bi chia' zaj dębe' nigá. Quebe gaca chasa' bi gunna' chiu'?" ⁸Neda' dxapa' le'e, lácala quebe chase' bi gunęzruje' le' lawe' da naque' ljwezre', san chase' cheę quębedxa gune' le' zęde, na' gunęzruje' le' ca naca da nachínne'.

⁹ Caní dxapa' le'e:

Le naba, na' Dios gunnę' cheęle.

Le xexilaj, na' xęzręlele.

Le nņę dxu'a dxa xu'u, na' xalaj cheęle.

¹⁰ Ca' naca na, lawe' da benne' dxenabe', na' si'e, ne benne' dxexílaję', na'

xęzręlene', ne benne' dxennę' dxu'a dxa xu'u, na' xalaj cheę'.

¹¹ Che tu benne' ládujla le'e naque' xra xrna', ¿waca gunęzruje' zr'ine' tu xiaj che nábabe' tu xeta xtila? ¿Waca gunęzruje'-be' tu belá' che nábabe' tu belá'? ¹² ¿Waca gunęzruje'-be' tu bęxrujni che nábabe' tu zrita? ¹³ Che le'e nácale benne' wen da calela, na' nézele gunęzrujle da chawe' cheę zr'inele, ¿quebe nácadxa Xrale zua xabáa li lazre' cheę gunne' cheę nu benne' nabe' Be' Lá'azxa?

**Dxelennę' napa Jesús xel-la
dxenná bea cheę da xriwe'**

(Mt. 12.22-30; Mr. 3.19-27)

¹⁴ Tu zra Jesús bebéaje' be' xriwe' lu xichaj lázrdau tu benne', da nucá'ana na le' quebe dxaca nnię', na' gate bedxúaj be' xriwe' na', na' bennę' bęnnea'. Na' benne' ca' belexebánene' cheę da nigá.

¹⁵ Na' bal-lę' gulennę':

—Benne' nigá dxebéaje' be' xriwe' ca', dxuchínene' xel-la dxenná bea cheę Beelzebú, xrane be' xriwe' ca'.

¹⁶ Xebal-la benne' gulaca lazre' gul'ée Jesús xel-la waca cheę', na' gulenabe' Le' gunę' tu xel-la waca da za xabáa. ¹⁷ Le' nézene' ca da dxelaca lazre', na' guzre' benne' ca':

—Che benne' zaj zre'e tu xęzre xelaque' chupa la'a, ne xeledil-le', wabía xi' xęzre na', na' che benne' tu lu xu'u xelaque' chupa la'a, cá'anqueze welebía xi' benne' ca'. ¹⁸ Cá'anqueze, che da xriwe' ca' xelaca na chupa la'a, ¿ájazra xegá'ana xel-la dxenná bea cheę na? Da nigá dxapa' le'e lawe' da dxennęle dxebéaja' be' xriwe' ca', dxuchíneda' xel-la dxenná bea cheę Beelzebú da xriwe'. ¹⁹ Che caní naca na, ¿nuzra dxunęzruj xel-la dxenná bea benne' ca' dxusędele le'e cheę xelęxebéaje' be' xriwe' ca'? Cheę le' na', benne' caníqueze dxululé'ene' dxęque zréajele. ²⁰ Na'a che neda' dxebéaja' be' xriwe' ca', dxuchíneda' xel-la dxenná bea cheę Dios,

da li xel-la dxenná bea chee Dios ba bla' na ládujla le'e.

²¹ Che tu benne' wal-la nape' da guchínene' lu wedil-la, ne dxuxúequeze' lizre', na' da zra lizre' napa chí'e na.

²² Che za' xetú benne' nácadxe' wal-la ca le', ne dxucul-le' le', nadxa que'e ca naca da dxuchínene' lu wedil-la, da na' dxuxrén lazre', na' quisie' da gudapa bènea'.

²³ Benne' quebe zue' gácalene' neda', dxedábage' neda', na' benne' quebe dxexeque'e nen neda' dxúsela bènea'.

Be' xriwe' da dxexezrín na lizre na

(Mt. 12.43-45)

²⁴ Gunná Jesús:

—Gate tu be' xriwe' dxedxuaj na lu xichaj lázrdau tu benne', dxedá na lataj naga nabizre dxexilaj na naga sua na xezí' lazre' na, na' gate quebe dxezrele na, na' dxenná na: “Wexá'a lizra' naga bezá'a.” ²⁵ Gate xezrín na, na' le'e na bènea' naque' ca tu xu'u da nalúa lu'ule na, ne nabá'ate na. ²⁶ Nadxa zexíaj na, zexjexrí na xegazre be' xriwe' da zaj nácadxa na xriwe' ca le' na, na' ca naca da ca' xelú'u na xelexúa na lu xichaj lázrdau bènea', na' naga cheajsete chee benne' na' nácadxa da calela chee' ca da guca chee' nédxula.

Da ba neza chee bèneache da naca na li lazre'

²⁷ Dxácate Jesús dxenné' da caní, tu nu'ula ládujla benne' ca' gunné' zizraj:

—Ba neza zrente naca na chee nu'ula na' guzane' Lue', ne bsegule' Lue'.

²⁸ Na' gunná Jesús:

—Ba neza zrendxa naca na chee benne' ca' dxelenne' ca da dxenná Dios, ne dxune' ca dxenná dizra' na'.

Dxelenabe' Jesús guné' tu xel-la waca da za xabáa

(Mt. 12.38-42; Mr. 8.12)

²⁹ Benne' ca' ne zaj zre'e cuita Jesús, na' Le' guzú lawe' dxuchálajlene' le', gunné':

—Benne' zaj zre'e lu zra caní zaj naque' benne' wen da calela, na' dxelenabe' neda' guna' tu xel-la waca da za xabáa, na' québedxa bi xelexé'ene' ca da ble'e Jonás, bènea' bchálaje' waláz chee Dios. ³⁰ Ca guca chee Jonás, guque' tu da ble'e na benne' gulezré'e lu xezre Nínive, cá'anqueze neda', Benne' Gulje' Bèneache, gaca' tu da gul'e na benne' zaj zre'e lu zra na'a zra. ³¹ Lu zra guchi'a Dios, gate Dios guchi'e chee benne' zaj zre'e lu zra na'a zra, na' chasa nu'ula na' gunná bé'ene' xezr la xu da zua chalá'a naga dxedé gubizra beu' zaga ca', na' gulé'ene' zaj nabaga zria benne' caní, lawe' da nu'ula na' guz'é'e zítu'te chee xenne' ca naca xel-la sina chee Salomón, na' nigá zua tu Benne' nácadxe' blau ca Salomón na'. ³² Lu zra guchi'a Dios, gate Dios guchi'e chee benne' zaj zre'e lu zra na'a zra, na' xelase' benne' ca' gulezré'e xezre Nínive, na' xululé'ene' zaj nabaga zria benne' caní, lawe' da benne' ca' gulezré'e xezre Nínive belexeb'i lazre' gate Jonás bchálajlene' benne' ca' xrtizra' Dios, na' nigá zua tu Benne' nácadxe' blau ca Jonás na'.

Da dxusení' lu xichaj lázrdaudxu

(Mt. 5.15; 6.22-23)

³³ Gunná Jesús:

—Netú benne' che dxugale' xi' chee', quebe guzúe' na tu naga nagache, ne quebe gudusie' na tu xi'ina, san guzúe' na sibe chee xelexé'e benne' ca' xelu'e lu xu'u na'. ³⁴ Xiaj laudxu zaj naca na ca tu xi' da dxusení' na lu xichaj lázrdaudxu. Che xiaj lau' zaj naca na chawe', ca naca xichaj lázrda'u xu'u na lení', na' che xiaj

lau' quebe zaj naca na chawe', na' xu'u da chul-la lu xichaj lázrda'u. ³⁵Bxue xanne' ca naca xi' da napu' chee quebe xexaca na da chul-la. ³⁶Che ca naca xichaj lázrda'u xu'u na lení', na' quebe bi xu'u da chul-la, na' le'enu' chawe' xúgute ca dxaca gate tu xi' dxusení na lizru'.

Jesús dxedil-le' benne' xudau' ca'

(Mt. 23.1-36; Mr.
12.38-40; Lc. 20.45-47)

³⁷Gate bexuzre bchalaj Jesús, na' tu benne' xudau' fariseo gunné' Le' cheajtawe' xeta lizre'. Na' guxú'u Jesús, gudxé'e dxawe'. ³⁸Na' benne' fariseo na' bebáne'e gate blé'ene' Jesús quebe gudibe ne'e ca da zjácale benne' judío gate dxelawe' xeta. ³⁹Xránadxu guzre' le':

—Le'e, benne' fariseo, dxíbele cúzrela zriga', ne xé'ena, san lu'ule na, nazrátele ca naca da ba gulanle, ne da calēla da dxunle. ⁴⁰Le'e, benne' lázrdau zide', ¿quebe nézele Bénnea' bene' da zua cúzrela bēnqueze' da zua lu'ula? ⁴¹Le gunezruj benne' xache' ca' chee da nápane, na' ca nácale xegá'anele chawe'.

⁴²¡Edxugúa le'e, benne' fariseo ca'! Le'e dxunézrujle Dios tu cue' chee da chi cue' chee xixru weaj, ne chee binne chee ruda, ne chee xúgute xixre' cuan, san dxuzúale chalá'ala ca naca xel-la wen xrlátaje, ne xel-la zri'i lazre' chee Dios. Da caní dxal-la' gunle, ne quebe gusanle ca da da dxunle.

⁴³¡Edxugúa le'e, benne' fariseo ca'! Dxaca lázrele gápale lataj blau naga cue'le lu xu'u naga dxezrágale, ne dxaca lázrele xelapa benne' le'e ba lá'ana lawe' xi'a ca'.

⁴⁴¡Edxugúa le'e, benne' dxuluxuzájla'a da nadxixruj bea na, ne le'e, benne' fariseo ca', benne' dxelúne' láweze da xrlátaje! Nácale ca xedxu ba ca' da quebe zaj nalá', na' benne'

ca' dxeledé'e lówela na, ne quebe zaj nézene' da dxululéaje'.

⁴⁵Nadxa gunná tu benne' dxuxuzájle'e da nadxixruj bea na, guzre' Jesús:

—Benne' Wesede, gate dxennáu' da nigá, dxennéteu' ca' cheentu'.

⁴⁶Na' Jesús gunné':

—¡Edxugúa le'e, benne' dxuluxuzájle'e da nadxixruj bea na! Dxugúale bēneache xua da quebe xezeu'éne', na' le'e netú zrube názele quebe dxaca lázrele gutale na.

⁴⁷¡Edxugúa le'e! Dxunle lu'a chee ba ca' chee benne' ca' buluchálaje' waláz chee Dios, benne' ca' belute xra xrtáule. ⁴⁸Ca da dxunle dxulé'e na nácale tuzen da belún xra xrtáule ca'. Benne' ca' belutie' le', na' le'e dxunle lu'a chee ba chee' ca'.

⁴⁹'Chee le' na' gunná Dios lu xel-la sina chee', gunné': "Wasel-la' naga zaj zra' benne' ca' benne' xelenné' waláz chia', ne gubáz chia' ca', na' bal-le' xelútie', na' xebal-le' xeláu zi' xúzrequeze' le'." ⁵⁰Dios gusebague' benne' zaj zre'e lu zra na'a zra ca naca xel-la gute chee xúgute benne' ca' gulenné' waláz chee', benne' gultatie' lu na' benne' ca' zaj zre'e gate bente' xezr la xu, ⁵¹gate na' tu benne' betie' Abel, zri'ine Adán, ca bzrinte zra belutie' Zacarías gachaj lówela naga zua lucugu, ne naga zua lataj lá'azxa. Ca'an dxapa' le'e, Dios gusebague' benne' zaj zre'e lu zra na'a zra xel-la gute chee benne' ca'.

⁵²¡Edxugúa le'e, benne' dxuluxuzájla'a da nadxixruj bea na! Xu'u lu na'le ca naca zren xia chee dxa xu'u naga za xel-la sina, san le'e quebe dxu'ule, ne quebe dxuele lataj xelú'u benne' dxelaca lazre' xelu'e na'.

⁵³Gate Jesús guzre' benne' ca' da caní, na' benne' ca' dxuluxuzájle'e da nadxixruj bea na, ne benne' fariseo ca' belezrá'ale'e Le', na' gulezú lawe' dxelune' Le' zede, na' da zante da bu-

luchebe' Le', ⁵⁴ na' buluzuzre' che bi nna Jesús chee xezezéquene' xelagu zrie' Le'.

Jesús dxenné' ca naca chee da naca xrlátaje láweze

12 Ca lu zra na' belezraga zane gaxúa benne' ca', na' dxululéajte ljwezre'. Na' guzú lau Jesús dxé'e benne' ca' dxusédené':

—Le guxúe xanne' cuínale ca naca cua zichaj chee xeta xtila chee benne' xudau' fariseo ca', da naca na da dxulé'e na láweze da xrlátaje chee benne' ca'. ² Quebe bi de da dxundxu bagácheze da quebe gulé'e lawe', ne quebe bi de da naga che da quebe nu neze. ³ Chee le na', xúgute da gunle lu da chul-la, xululé'e lawe' te zra, na' da gunle bagácheze lu xu'u naga naxézxujte dxa xu'u, wénqueze na lau xúgute bèneache.

Nu dxal-la' zrédexu

(Mt. 10.28-31)

⁴ Na' gunná Jesús:

—Dxapa' le'e, bi ljwézra'du ca', quebe dxal-la' zrédexu benne' dxelute bela' dxen chee bèneache, san gate te na', quédexa xezezéquene' bi xelune'. ⁵ Na'a dxapa' le'e nu dxal-la' zrédexu. Le zrebe Bénéa' gate te xequé'e xel-la nabán chee bèneache, nape' xel-la dxenná bea gudé'e bèneache ca' lataj ba xa'. Awe', Le' le zrebe.

⁶ ¿Quebe ta'u gazxu' bxinnedau' lawe' chupa dumí lásedau'? Dios quebe dxal-la lazre' netú bxinnedu ca'. ⁷ Cá'anqueze xicha xíchajle le'e xúgute na zaj nababa na lau Dios. Chee le na' quebe zrédexu. Zácadxale le'e ca be zante bxinnedu ca'.

Benne' dxelexechebe' zaj naque' chee Jesús

(Mt. 10.32-33; 12.32; 10.19-20)

⁸ Na' gunná Jesús:

—Dxapa' le'e, xúgute benne' xelexechebe' zaj naque' chia' neda' lau bèn-

neache, cá'anqueze neda', Benne' Gulje' Bèneache, xechébequeza' chee benne' ca' lau gubáz chee xabáa ca' chee Dios, ⁹ san benne' ca' quebe xelexechebe' chia' lau bèneache, néda'queza' quebe xecheba' chee' lau gubáz chee xabáa ca' chee Dios.

¹⁰ Che nu benne' bi nnie' chia' neda', Benne' Gulje' Bèneache, gunité lau Dios chee', na' benne' nnie' chee Be' Lá'azxa, quebe gunité lau Dios chee bènea'.

¹¹ Gate xelexechebe' le'e lau benne' xíchajle chee xudau', u lau benne' dxuchi'e da dxaca, u lau benne' xu'u lawe', quebe cue'le gunne xue bi xechébele u bi nnale, ¹² lawe' da gate zrin zra dxal-la' nnele, Be' Lá'azxa gulé'ene' le'e da dxal-la' nnele.

Da stebe chee xel-la gunn'a

¹³ Tu benne' ládujla benne' ca' guzre' Jesús:

—Benne' Wesede, guzre bi bicha' gúnnabe' chia' da xexal-la' chee da guca chee xrantu'.

¹⁴ Jesús guzre'-be':

—Benne', ¿zua nu bzua neda' ca benne' dxuchi'e da dxaca u ca benne' le'e xezr la xu?

¹⁵ Nadxa guzre' benne' ca':

—¡Le na' xque! ¡Le guxúe xanne' cuínale chee quebe gúcúdele! Xel-la nabán chee nu benne' quebe zua na lu da nápalé'e.

¹⁶ Nadxa bchalaj Jesús da dxulé'e nigá, gunné':

—Guzúa tu benne' gunn'a, na' xezr la xu chee' bnézrujle'e na. ¹⁷ Na' benne' gunn'a na' guzú lawe' dxenné': ¿Bizra guna'? Québedxa de naga guzra' lina chia' nigá. ¹⁸ Nadxa dxenné': “¡Ba nezda' ca da guna! Guchínnaja' naga dxezra' lina chia', chee guna' da zrí'adxa, na' guzra' na' ca naca lina chia' nigá, ne ca naca da ba napa'. ¹⁹ Nadxa nníqueza' néda'queza': Ba déle'e chiu' da zante chee

zane' iza. Bezí' lazre'. Güe'e gudagu, ne gubé." ²⁰ Na' Dios guzre' bénnea': "Lue', benne' zide', lu zre' na'a zre' gatiu', na' da nuzrá' chawu', quebe nézenu' nu chee gaca na." ²¹ Ca'an dxaca chee benne' dx-utupe' xel-la gunn'á da gaca cheéqueze'. Naque' ca tu benne' xache' lau Dios.

Dios dxuxúe' bi chee' ca'

(Mt. 6.25-34)

²² Ca gudé na', Jesús guzre' benne' ca' dxusédene':

—Dxapa' le'e, quebe cue'le gunne xue ca naca da gágule chee gaca banle, ne ca naca zra lánale da gágule. ²³ Xel-la nabán chee'le zácadxa na ca da gágule, na' bel-la' dxen chee'le zácadxa na ca zra lánale. ²⁴ Le nna'xque ca dxaca chee bxínnedu ca'. Quebe dxelázaba', ne quebe dxelelá-paba', ne quebe zaj zua naga dxuluxu-zraba', na' Diósqueze' dxuxi'aj dxugawé'-ba'. Zácadxale le'e ca bxínnedu ca'. ²⁵ ¿Núlale le'e séquele gusetunna cuínale xetú ben lawe' da dxebe'le'ele gunne xue? ²⁶ Che quebe gaca gunle tu da naca da dauze, ¿bizr chee na' dxebe'le gunne xue chee da ca' xezícala?

²⁷ Le nna'xque ca dxelegula xiaj xrtandu ca'. Quebe dxelún na zrin, ne quebe dxelún na du ladxe', na' dxapa' le'e, wenná bea Salomón quebe gucue' da xrtandxa ca tu xiajdu caní. ²⁸ Che Dios dxugacue' caní xixre'du ca', da zaj zua na'a le'e xixre', na' wxre xelexe na, ¿quegá gundxe' chee'le le'e, benne' dxeléajle'e láteze chia'? ²⁹ Chee le na', quebe cue'le gunne xue ca naca da gágule, u ca naca da xí'ajle, ne quebe súale stébe. ³⁰ Ca' naca na, lawe' da ca naca benne' ca' zaj zre'e xezr la xu dx-eléxíajle' ca naca da caní, san le'e, zua Xrale xabáa ba nézene' nachínnele ca naca da caní. ³¹ Le cue' gunne xue nna bea Dios lu xichaj lázrdaule, na' sile ca naca da caní.

Da gunn'á da dxegú'u cháwedxu xabáa

(Mt. 6.19-21)

³² Na' gunná Jesús:

—Quebe zrébele, zríla'du chia', bábaze nácale le'e. Xrale Dios dxezaca ba lazre' gunne' chee'le lataj naga dxenná be'e. ³³ Le gute da nápale, na' le gunezruj benne' xache' ca'. Ca'an gaca, guzrale na naga quebe te chee na, na' gá-pale da gunn'á xabáa da quebe xedú, naga quebe gaca chu'u gubán, ne quebe gaca xelú'u béadu ca' xuluteba' na. ³⁴ Naga nuzúale xel-la gunn'á chee'le, na' súaqueze lázrdaule.

Dxal-la' gupá'a cuínadxu

³⁵ Na' gunná Jesús:

—Le gupá'a cuínale, ne le gugala xi' chee'le. ³⁶ Le gaca ca benne' wen zrin ca' dxelebeze' xrane' xezrine' lu laní chee wechaga na', na' nne' dxu'a dxa xu'u na'. ³⁷ Ba neza zrente naca na chee benne' wen zrin ca', benne' ca' xedajxraca xrane' le' dxelenaze' gate xezrine'. Da li dxapa' le'e, xrane' na' cueche' benne' ca' xelawe', na' guzúa cuine' chee que'e da xelagu benne' wen zrin ca'. ³⁸ Lácala xezrine' dx-ela u dxan'ísise', che xedajxraque' le' dx-elennaze', ba neza naca na chee benne' wen zrin ca'. ³⁹ Dxal-la' nézele da nigá, che xrane xu'u gunézene' bi zra zrin gubán, na' quebe gasie' chee quebe gu'e lataj quíduje' lize' chee cuane' da nape'. ⁴⁰ Cá'anqueze le'e, le sua ban lazre', lawe' da gate québela nézele, xelá'a neda', Benne' Gulje' Bénneache.

Benne' wen zrin li lazre', ne benne' wen zrin quebe naque' li lazre'

(Mt. 24.45-51)

⁴¹ Nadxa Pedro bchebe' Jesús:

—Xran, ¿bchálaju' da dxulé'e nigá chee nétu'ze, che chee xúgute' benne'?

⁴² Xránadxu gunné':

—¿Nuzra naca wən zrin li lazre', bēnnea' dxucá'ana xrané' lu ne'e benne' zaj zra' lizre' chee gunézruje' da xelagu benne' ca' gate zrin zra chee na? ⁴³ Ba neza naca na chee benne' wən zrin na', gate xezrín xrané', xedajxraque' le' dxuné' ca da nabague'. ⁴⁴ Da li dxapa' le'e, xrané' gucá'ane' lu ne'e xúgute da nape'. ⁴⁵ Che benne' wən zrin na' dxéquene' wazré xrané' xel'é'e, ne su lawé' gusaca zi'e benne' wən zrin xezica ca', ne nu'ula wən zrin ca', ne su lawé' xi'aj gawe', ne súzrene', ⁴⁶ nadxa xrané' xel'é'e lu zra quebe dxebeze' le', ne lu zra quebe nézene', na' gusaca zí'le'e le', ne chugue' chee' saque' ca xelezaca benne' ca' quebe zaj naque' chee Dios.

⁴⁷ Benne' wən zrin na' nézene' ca da dxaca lazre' xrané' san quebe nucueze', ne quebe dxuzúe' dizra', benne' nigá gudé' le' ba xa'. ⁴⁸ Benne' wən zrin na' quebe nézene' da na', ne dxuné' da dxusebaga na le' zria, benne' nigá té'e láteze xel-la zi'. Che tu benne' dxez'le'e da dxunezruj Dios le', Dios wanábalé'e le', na' bēnnea' Dios nuxrén lazre' le' da zrente, Dios wanné xúele'ene' le'.

Dxelaca benne' chupa la'a ne chee Jesús

(Mt. 10.34-36)

⁴⁹ Na' gunná Jesús:

—Neda' bla'a guzrena' xi' lu xezr la xu nigá, na' la guzreda' ba dxala xi' na'. ⁵⁰ Dخال-la' chu'a lu xel-la gute ca dxu'u tu benne' lu nisa gate dxedxúe' nisa, na' té'le'a xel-la zi' cadxa gácatequeze na. ⁵¹ ¿Dxéquele le'e za' neda' cu'a xel-la dxebeza zri lazre' lu xezr la xu nigá? Dxapa' le'e: Cabí. Za'a chee guna' benne' chupa la'a. ⁵² Na'a su lau, gazxu' benne' zaj zre'e tu xu'u xelaque' chupa la'a. Chunne' xeledábague' chupe', na' chupe' xeledábague' chunne'. ⁵³ Xra tu bi biu tábague' bi biu chee', na' bi biu na' tábagabe' xrabe'. Xrna tu bi nu'ula

tábague' bi nu'ula chee', na' bi nu'ula na' tábagabe' xrabe'. Tau zri'ine tu nu'ula tábague' zru'a lizre', na' zru'a lizre' na' tábague' tau zri'ine'.

Da dxululé'e na ca da gaca lu zra na'a zra

(Mt. 16.1-4; Mr. 8.11-13)

⁵⁴ Na' Jesús guzre' benne' ca':

—Gate le'e dxel'é'ele da' beuj naga dxe-bía gubizra, na' dxennale, waca xiuj, ne ca' dxaca. ⁵⁵ Gate dxaca be' za na chalá'a naga dxedé gubizra beu' zaga ca', na' dxennale waca da la, ne dxaca ca'. ⁵⁶ Le'e, benne' dxunle láweze da xrlátaje. Le'e nézele mnale ca da gaca zran xabáa, ne lu xezr la xu nigá, san quebe dx-ezéquele xuzájla'ale da dxululé'e na ca gaca chee'le lu zra na'a zra.

Dخال-la' xezúadxu lu xel-la dxebeza zri lazre' nen benne' dxedábague' dxi'u

(Mt. 5.25-26)

⁵⁷ Na' gunná Jesús:

—¿Bizr chee' na' quebe dxeque be'ele da naca xrlátaje? ⁵⁸ Che nu benne' dxaca lazre' guzúe' lue' lau benne' dxuchi'e, na' gate chéajlenu' le' chee' zrinle lau bēnnea', ben ba xen xezú' lu xel-la dxebeza zri lazre' nen bēnnea' dxácate xu'ule neza, chee' quebe che'e lue' lau bēnnea', na' bēnnea' gudé' lue' lu na' benne' gusézxuje' lue' lizre xia. ⁵⁹ Dxapa' lue' quebe xedxúaju' na' cadxa quízruju' ca da dxebagu'.

Dخال-la' xelxebí'i lazre' bēnneache

13 Ca lu zra na' belezrín bal-la benne' lau Jesús, na' buluzenne' Le' ca ben Pilato, bētie' bal-la benne' Galilea, na' bchague' dxen chee' benne' ca' nen dxen chee' be' xixre', bea ca' ba belutie' chee' xuluzríe' dxen chee' na lau Dios. ² Na' Jesús guzre' le':

—¿Dxéquele le'e caní gulezaca benne' ca' lawe' da zaj nácadxe' benne' dul-la ca

benne' ca' xezícala zaj zře'ę xęzre ca' zaj nababa Galilea? ³ Dxapa' le'e: Cabí, na' che quebe xebí'i lázrele le'e, xúgutele le'e cuía xile. ⁴ ¿Dxéquele le'e benne' chinu chunna ca' gulatię' gate guzría cha xu'u sibe le' da nazí le na Siloé zaj nabágadxę' dul-la ca xezícala benne' ca' zaj zře'ę xęzre Jerusalén? ⁵ Dxapa' le'e: Cabí, na' che le'e quebe xebí'i lázrele, cá'anqueze le'e wabía xile.

Xaga higo da quebe dxebía na da zixre

⁶ Nadxa Jesús bchálajlene' benne' ca' da dxulé'e nigá, dxenné':

—Tu benne' zua tu xaga higo cheę' zua na lu xęzr la xu cheę', na' xejné'ę na che zría na, na' quebe bi bezrélene'. ⁷ Nadxa guzre' benne' dxun zrin lu xęzr la xu cheę': “Gunná'xque, chun ízate ba bida' dxenná'a che zria xaga nigá, ne quebe bi bezréleda'. ¡Guchugu na! ¿Bizr cheę na' nulán na xęzr la xu nigá?” ⁸ Bénnea' dxun zrin cheę xęzr la xu na' bechebę': “Xran, bca'ana na xetú iza na'a. Guzúlu-jdxa' zran na, ne cua'a na bebe. ⁹ Nen da na', gúnnałja na, san che cabí, na' chugu' na.”

Jesús dxexunę' tu nu'ula nalegu cuzre'

¹⁰ Gate naca zra dxulupá'ana judío ca', na' zua Jesús tu lu xu'u naga dxelezraga judío ca' dxusédenę' benne' ca', ¹¹ na' zua na' tu nu'ula xu'ę wę' ba guca chinu chunna iza. Tu be' xriwe' nun na le' cuzru legu, na' quebe dxácaqueze' xelíę'. ¹² Gate ble'e Jesús le', na' gunné' le', ne guzre' le':

—Nu'ula, ba bexacu' cheę xízrawę' chiu'.

¹³ Nadxa guxrúa ne'ę nu'ula na', na' la ná'queze nu'ula na' belite', na' guzú lawę' dxue lá'angę' Dios. ¹⁴ Na' benne' xíchaję cheę xu'u na' bzře'ę lawę' da bexún Jesús nu'ula na' lu zra dxulupá'angę', na' guzre' benne' zaj zře'ę na':

—Xrupa zra dxal-la' gundxu zrin. Lu zra ca' waca xídale xexácale, quegá lu zra dxupá'anadxu.

¹⁵ Nadxa Xránadxu bechebę':

—Le'e, benne' dxelún láweze da xrlátaje, ¿quebe dxesézrele le'e bezre cheęle u burro cheęle lu zra dxupá'anadxu chjua'le-ba' xelé'ajba' nisa? ¹⁶ Nú'ula nigá naque' xrtia Abraham, na' da xriwe' nuchéaj na le' lu xízrawę' nigá ba zęaj chinu chunna iza, na' ¿quebe dxal-la' xebéaja' xízrawę' da nuchéaj na le' lu zra dxupá'anadxu?

¹⁷ Gate gunná Jesús da nigá, xúgute benne' dxeledábague' Lę' belexedué'ene', na' xúgute benne' xezícadxa gulebene' gate belelé'ene' ca naca da zrente da dxun Jesús.

Da dxulé'e na ca naca cheę binnedau' cheę mostaza

(Mt. 13.31-32; Mr. 4.30-32)

¹⁸ Nadxa gunná Jesús:

—¿Aja naca xel-la dxenná bea cheę Dios, ne bi gutil-le lé'beda' na? ¹⁹ Naca na ca tu binnedau' cheę mostaza, tu benne' dxaze' na lu xęzr la xu cheę', na' dxęgula na, ne dxácatę na ca tu xaga zren, na' bxínnedu ca' dxuluzríaba' xrú'uneba' lu zruze na ca'.

Da dxulé'e na ca naca cheę cua zichaj cheę xeta xtila

(Mt. 13.33)

²⁰ Cá'anqueze gunná Jesús:

—¿Bizra gutil-le lé'beda' xel-la dxenná bea cheę Dios? ²¹ Naca na ca cua zichaj cheę xeta xtila tu nu'ula dxuchague' na chunna xaga de xęzaj, na' dxuchazra na ca naca cua na'.

Dxa xu'u lechide'

(Mt. 7.13-14, 21-23)

²² Dxácatę xu'u Jesús neza zexíaję xęzre Jerusalén, dxusédenę' bénneache

lu xezre ca', ne xézredu ca' naga dxedéé'.

²³ Na' bchebe tu benne' Le':

—Xran, ¿bábaze benne' xeledá?

Bechebe Jesús:

²⁴ —Le gun ba xuzre chu'ule dxa xu'u lechide', lawe' da dxapa' le'e, benne' zan xelaca lazre' xelu'e na', na' quebe xeledéque'.

²⁵ Ca te na' chasa xrane xu'u, ne guséxuju'e dxa xu'u, na' le'e zrale chalé'ajla nnele dxu'a dxa xu'u na', nnale: “Xran, gusalaj chú'untu'.” Na' le' xechébe': “Quebe nezda' ga benne' le'e.”

²⁶ Nadxa su láuqueze le'e nnale: “Güe'e gudágulentu' lue', na' lue' bsédenu' lu neza cheentu' ca'.”

²⁷ Le' xechébe': “Dxapa' le'e, quebe nezda' ga benne' le'e. Le cuasa cuita' neda', xúgutele le'e dx-unle da calela.”

²⁸ Na' cuézrele, ne xagu xá'atē lázxale gate lé'ele Abraham, ne Isaac, ne Jacob, ne xúgute benne' ca' gulenné' waláz chee Dios, zaj zu'e naga dxenná bea Dios, na' le'e zrale chalé'ajla.

²⁹ Welelé' benne' zaj zre'e dapa saca chee xezr la xu nigá, na' xebeb'e xelawe' naga dxenná bea Dios.

³⁰ Nadxa bal-la benne' zaj naque' bzébedxa na'a xelaque' benne' blau, na' benne' zaj naque' blau na'a xelaque' bzébedxa.

Dxebezre Jesús chee xezre Jerusalén

(Mt. 23.37-39)

³¹ Lu zra ná'queze, belezrín lau Jesús bal-la benne' fariseo ca', na' gulé'e Le':

—Bezá' nigá, lawe' da dxaca lazre' Herodes gutie' Lue'.

³² Jesús bechébe':

—Le chjaca cheajguézrele benne' wilaj lazre' calela na': “Na'a, ne wxre xebéaja' be' xriwe' ca' lu xichaj lázrdau benne' ca', ne xexuna' benne' we' ca', na' wizraj sueda'.”

³³ Dxun na ba xen chéajlëna' neza chia' na'a, ne wxre, ne wizraj, lawe' da quebe gaca gate tu benne' dxenné' waláz chee Dios che quebe xelute benne' Jerusalén le'.

³⁴ “Jerusalén, Jerusalén, le'e na' dxútele benne' dxelenné' waláz chee Dios, ne dxuzríale xiaj benne' gubáz ca' dxesel-la Dios. Zane' lasa guca lazra' gutupa' bi chee'le ca' ca dxun bedxuj, dxutúpaba' bédxujdu ca' zran xrílabá', san quebe guca lázrele.”

³⁵ Le nna'xque, na'a! Lízrele le'e xegá'ana na cá'aze. Dxapa' le'e québedxa xelé'ele neda' ca zrindxa zra nnale: ¡Lá'azxa naca Bénnea' ze'e lu La Xránadxu!”

Jesús dxexuné' tu benne' de xi' ca naca bel-la' dxen chee'

14 Tu zra dxulupá'ana benne' judío ca' guxíaj Jesús zeajtawe' lizre tu benne' blau chee benne' fariseo ca', na' benne' fariseo ca' dxuluzuzre' Jesús bi guné'.² Zúaqueze lau Jesús tu benne' de xi' ca naca bel-la' dxen chee'.³ Nadxa Jesús bchébe' benne' ca' dxuluxuzájle'e da nadxixruj bea na, ne benne' fariseo ca', gunné':

—¿Waca nu benne' xexuné' benne' we' lu zra dxupá'anadxu, che cabí?

⁴ Benne' ca' gulezúe' zrize. Nadxa Jesús guqu'é' benne' we' na', ne bexuné' le', na' guzre' le' xexíaje'.⁵ Nadxa guzre' benne' fariseo ca':

—¿Núlale le'e, che bezre chee'le u bia chee'le bíxreba' tu lu xedxu, quebe xebéajle-ba' zra ná'queze lácala naca zra dxupá'anadxu?

⁶ Quebe bi guca xelexechébe'.

Benne' zaj zre'e laní chee wechaga na'

⁷ Gate ble'e Jesús ca dxelún benne' ca', dxeleb'é' lataj blaudxa ga dxelawe', na' bchálaje' da dxulé'e na, dxenné':

⁸ —Gate tu benne' dxenné' lue' laní chee wechaga na', quebe cue'u lataj blau, lawe' da che wazá tu benne' ná-cadxé' blau ca lue',⁹ na' bénnea' gunné' dxúpatele xide' xe'e lue': “Bnezruj lataj nigá benne' nigá.” Nadxa gun na ba xen xexíaju' lataj bzébedxa lu xel-

la stu'. ¹⁰Na'a, gate nu benne' nne' lue', gudxé'e lataj bzébedxa, chee gate za bène'nea' gunné' lue', wanné': "Bi ljwezra', gudé nigala naga nácadxa blau." Ca'an gaca, xegá'anu' szren lau benne' ca' zaj zre'e dxelágułene' lue'. ¹¹Benne' dxucá'ana szren cuine', wexéxrujla bène'nea', na' benne' dxucá'ana baxache' cuine' wegá'ana szrénqueze'.

¹²Nadxa Jesús guzre' benne' na' gunné' Le':

—Gate gunézruju' tu zrue u tu xrche' quebe nneu' bi ljwezru' ca', ne bi bichu' ca', ne xrtia ljwezru', ne benne' walí'zr chiu' ca' zaj nape' da gunní'a, lawe' da benne' caní welenné'queze' lue', na' zrué'equenzu' da xelexexunne' chiu'. ¹³Gate dxunu' tu laní, gunné' benne' xache' ca', ne benne' zaj nadxugu ni'a ne'e, ne benne' zrinnaj ca', ne benne' la chul-la ca'. ¹⁴Caní gaca tu da ba neza chiu', lawe' da benne' caní quebe gaca xelexexunne' ca' chiu', na' wazrué'enu' lazrju' gate xelexebán benne' xrlátaje ca'.

Da dxulé'e na ca naca chee tu xrche' zren

¹⁵Gate ben tu benne' dxágule Le' da na', na' guzre' Jesús:

—Ba neza zrenté naca na chee benne' gawe' xeta naga dxenná bea Dios.

¹⁶Jesús guzre' le':

—Tu benne' gulu'e tu xrche' zren, na' gunné' benne' zan. ¹⁷Ca bzrin zra xelawe' xrche' na', gusél-le' wen zrin chee' chee cheajezre' benne' ca' gunné': "Le da, lawe' da ba nuseni'a da gágudxu." ¹⁸Xúgute' gulezú lawe' dxelenabe' gu'e le' lataj quebe xelidé'. Benne' nedxu gunné': "Za bezíte'a tu cue' xezr la xu chia', na' dxal-la' cheajnná' na. Dxata' xueda' lue' si zrenu' chia'." ¹⁹Xetúe' gunné': "Za bezíte'a gazxu' cue' be'zr chia', na' guxúa' aja xelunba'. Dxata' xueda' lue' si zrenu' chia'." ²⁰Na' xetúe' gunné': "Za bchágate' na'a, na' quebe gaca

xida'." ²¹Gate bezrín benne' wen zrin na', guzre' xrané' ca naca da nigá. Nadxa bzra'a xrané' na', na' guzre' wen zrin na': "Guxíaj na'a la neza ca', ne neza chee xezre nigá, na' xejxri' xúgute' benne' xache' ca', ne benne' zaj nadxugu ni'a ne'e, ne benne' zrinnaj ca', ne benne' la chul-la ca'." ²²Ca gudé na' gunná benne' wen zrin na': "Xran, ba bena' ca gunnáu', na' ne dexda lataj." ²³Nadxa gunná xrané' na': "Guxíaj na'a la neza ca', ne neza lásedu ca', na' xején ba xen xelélé'e, chee cha' lizra' nigá. ²⁴Dxapa' le'e, netú benne' ca' gunné'a' nédxula quebe xelawe' xrche' chia'."

Xel-la zi' da te benne' chéajlene' Jesús

²⁵Benne' zan zjácálene' Jesús, na' Le' bexéchaje', na' guzre' benne' ca':

²⁶—Che nu benne' ze'e naga zua', ne quebe guzúe' chalá'ala xre', ne xrne'e, ne zru'ule', ne zrí'ine' ca', ne bi biche' ca', ne bi zane' ca', ne xel-la nabán chee', quebe gaca gaque' neda' tuze. ²⁷Benne' quebe sál'lene' neda' lácala dxal-la' te'e xaga béguaj, quebe gaca gaque' neda' tuze. ²⁸Che tu benne' ládujla le'e dxaca lazre' guné' tu xu'u sibe, ¿quebe cue'e nedxu guné' xrbaba chee' che wazúene' xuzrte' na? ²⁹Che quebe guné' caní, ne che cueche' lane na, na' ca te na' quebe suene' xuzre' na, na' xúgute' benne' xelélé'ene' na xelézú lawe' xelún le' chee' bène'a', ³⁰na' xelenné': "Benne' nigá guzú lawe' dxuné' tu xu'u. Quebe guque' guné' ca naca." ³¹Che tu benne' wenná bea dxal-la' cheajtíl-lalene' xetú benne' wenná bea, ¿quebe cue'e guné' xrbaba chee' che wazúene' nen tu gaxúa gaxúa benne' dxjaque' wedil-la cheajtíl-lalene' bène'a' za' nen chupa gaxúa gaxúa benne' dxjaque' wedil-la? ³²Che quebe séquene', gate benne' wenná bea na' xetú ne ze'e zitu', na' sel-le' gubáz chee' ca' xelenabe' gata' xel-la dxebeza zri lazre'. ³³Ca' naca na, núteteze benne' ládujla le'e, che

quebe gusané' ca naca da nape', quebe gaca gaque' neda' tuze.

Zede' da québedxa naca na sna'a

(Mt. 5.13; Mr. 9.50)

³⁴Na' gunná Jesús:

—Zede' naca na da chawe', san che québedxa naca na sna'a, ¿ájazra guchínedxu na? ³⁵Quebe gaca guchínedxu na, quegá chee gucá'ana cháwedxu xezr la xu, ne quegá chee guchíxredxu bebe, san dxal-la' chúnadxu na. Benne' ca' zaj zua nague', dxal-la' xelenne'.

Ca guca chee tu zrila' guníteba'

(Mt. 18.10-14)

15 Benne' zante benne' wechizruj waláz chee Roma, ne benne' dul-la ca' gulebigue' naga zua Jesús chee xelenne' da dxuchálaje'. ²Chee le' na' benne' fariseo ca', ne benne' dxuluxu-zájle'e da nadxirruj bea na gulezí tizre' Jesús, gulenné':

—Benne' nigá dxune' tu zren benne' dul-la ca', ne dxágulene' le'.

³Nadxa bchalaj Jesús da dxulé'e na, gunné':

⁴—Nu benne' ládujla le'e, che nape' tu gaxúa zrila', na' nite tuba', ¿quebe gucá'ane' xetápalalaj chennu zrila' ca', bea ca' zaj zraba' le'e xixre', na' se'e cheajdlájaje' bea na' guníteba' cadxa xezrelne'-ba'? ⁵Na' gate xezrelne'-ba', bene', na' xeque'e-ba' xexrúe'-ba' xe'a xene'. ⁶Na' ca xezrine' lizre', gutupe' ljwezre' ca', ne benne' walizre chee' ca'. Na' xe'e le': “Le be nen neda', lawe' da bezrelda' zrila' chia' guníteba'.”

⁷Na' gunná Jesús, dxé'e benne' ca':

—Cá'aqueze zúale'edxa xel-la dxebe' xabáa gate tu benne' dul-la dxexebí'i lazre', quézcala chee tápalalaj chennu benne' xrlátaje ca' dxeléquene' quebe dxun na ba xen xelexebí'i lazre'.

Ca guca chee tu dumí da gunite

⁸Nadxa Jesús bchálaje' xetú da dxulé'e na, dxé'e benne' ca':

—Tu nu'ula nape' chi dumí zaca, na' che nite tu na, nadxa guzúe' xi' chee' chee gusaní na lu xu'u chee'. Nadxa su lawe' gulúe' lu xu'u chee', xexílaje' bín-nalu ca xezrelne' dumí chee' da gunite na. ⁹Na' ca xezrelne' dumí na', gutupe' nu'ula ljwezre' ca', ne nu'ula walízr chee' ca', na' xe'e le': “Le be nen neda', lawe' da bache bezrelda' dumí chia' da gunite na.”

¹⁰Na' gunná Jesús, dxé'e benne' ca':

—Cá'aqueze dxelebe' gubáz chee xabáa ca' chee Dios gate tu benne' dul-la dxexebí'i lazre'.

Ca guca chee zri'ine tu benne' gunítebe'

¹¹Nadxa Jesús bchálaje' xetú da dxulé'e na, dxé'e le':

—Tu benne' zaj zra' chupa bi chee'.

¹²Na' bi cuide' chee' gúzrebe' xrabe: “Xrae, benna chia' da dxal-la' si'a chee da naca chiu'.” Nadxa xrabe' bene' gachaj da bnézruje' cha cheebe' tube', ne xetube'. ¹³Ca gudé tu chupa zra, bi cuide' chee' bénnea' btúpabe' xúgute da naca cheebe', na' guzabe' zitu', na' bzinbe' xetú xezr la xu. Na' ben dítajbe' dumí cheebe' lu da calela da benbe'. ¹⁴Na' ca gudache xúgute dumí cheebe', bzin tu gubina' lu xezr la xu na', na' lebe' gudunbe'. ¹⁵Nadxa guzabe' xeaajtíajbe' zrin gunbe' chee tu benne' lu xezr la xu na'. Benne' na' gusél-le'-be' le'e xixre' chee' chee' cheajxúebe' cuche chee' ca'.

¹⁶Guca lázrebe' gágube' da calela da dxelagu cuche ca'. Netú benne' quebe bi bnézruje' da gágube'. ¹⁷Nadxa xea- jsá lázrebe', dxennabe': “Benne' zante, benne' wen zrin zaj zre'e lizre xra', na' déle'e da dxelawe'. Neda' dxátequeza' xel-la dxedún. ¹⁸Webí'iza' xexá'a naga

zua xra', na' xapa' le': Xrae, bēna' dul-la lau Dios, ne lau lue'.¹⁹ Québedxa naca chia' gaca' zri'inu'. Bzua neda' ca tu benne' wēn zrin chiu'." ²⁰Nadxa begú'ube' neza, bezrinbe' lizre xrabe'.

"Tu chi na', ble'e xrabe' lebe' ba zez-abe', na' bexache lazre'-be'. Na' guzá chégü'e' xeajchague'-be', na' bnide'-be', ne bnúpete'-be'.²¹ Nadxa gunabe': "Xrae, bēna' dul-la lau Dios, ne lau lue'. Québedxa naca chia' gaca' zri'inu'." ²²Na' gunná xrabe', dxē'e' benne' wēn zrin chee' ca': "Le cueaj zra lana' da zaca, ne le gugacu-be'. Le cu'u tu da naca oro zrube nabe', ne le cu'u xel-la ní'abe'.²³ Le cheajzrí' tu bezre bē dxanne, na' gútele-ba'. Gágudxu, ne gundxu laní,²⁴ lawe' da bi chia' nigá guca cheebe' ca tu benne' ba gute, na' bebanbe'. Gunítebe', na' ba bezrágadxu-be'." Na' gulezú lawe' dxelunē' laní.

²⁵'Dxácate' na', zrí'ine' bi waca zúabe' le'e xixre' dxunbe' zrin. Na' chizrela' ca bezrinbe' gagu cuíta xu'u lizre xrabe', na' benbe' dxaca wil-la, ne dxaca wexá'a. ²⁶Nadxa gunnébe' tu bi wēn zrin na', dxē'ēbe' lebe': "¿Bi dxaca nigá?" ²⁷Bi wēn zrin nigá cúnnabe': "Ba belá' bi bichu', na' xrau' gunná bé'ene' nu gute tu bezre bē dxanne, lawe' da belabe' zúabe' zri'a chawe'." ²⁸Bzra'a bi waca na', na' quebe guca lázrebe' xexú'ube'. Nadxa bdxuaj xrabe', ne guta' xuene' lebe' xexú'ube'. ²⁹Na' cúnnabe', dxē'ēbe' xrabe': "Nézqueznu' zane' iza ba bēna' zrin chiu', ne cabata' bcha'a lue', na' ne tu lasa quebe ne gunnu' chia' tu chí'budau' chee' guna' tu laní nen ljwezra' ca'.³⁰ Na'a belá' bi chiu' nigá, bi ba bēn dí'tajbe' dumí chiu', guzúalebe' nu'ula dxeledá zraga ca', na' bēte lizu' bezre bē dxanne nē chee' lebe'." ³¹Nadxa gunná xrabe', dxē'ē-be': "Zri'ina', lue' tu zúalezquezu' nen neda', na' xúgute' da dē chia' naca na chiu'.³² Na'a dxun na ba xen gundxu laní, ne bedxu, lawe' da bi bichu' gú'cabe'

ca tu benne' ba gute, ne naca banbe'. Gunítebe', na' ba bezrágadxu-be'."

Benne' wēn zrin blau quebe naque' xrlátaje

16 Nadxa Jesús guzre' benne' ca' dxusé'dene':

—Guzú tu benne' gunní'a, na' zua tu benne' wēn zrin blau chee'. Na' bal-la benne' xeajleguezre' le' benne' wēn zrin blau na' dxun dí'tajē' da dē chee' xranē'.² Nadxa xranē' gunné' le', ne guzre' le': "¿Bizra da nigá dxelenné' chiu'? Blué'e neda' ca naca chee' zrin dxunu', lawe' da québedxa gaca gacu' wēn zrin blau chia'." ³Nadxa benne' wēn zrin blau na' guzú lawe' dxenné' lu xichaj lázr-dawe': "¿ájazra guna' na'a, lawe' da xebéaj xrana' neda' lu zrin chia'? Quebe sueda' guna' zrin le'e xixre', ne wedué'eda' naba' guna'.⁴ Na'a ba nezda' tu da guna' chee' xelezúa benne' xelezí' lu nē'e' neda' gate québedxa dē zrin chia'.⁵ Nadxa gunné' tu tu benne' dxelal-le' chee' xranē' na'. Na' bchebe' benne' nedxu: "¿ájate dxal-lu' chee' xrana'?" ⁶Benne' na' bechebe': "Dxal-la' chee' tu gaxúa zruaga da za." Nadxa benne' wēn zrin blau na' guzre' le': "Nigá dē xiche chiu'. Gudxé'e bexún xetú na, na' bzuaaj na dxebagu' chi xun zruaga ca'." ⁷Gudé na' bchebe' xetú benne' ca': "¿Gazra lue', ájate dxebagu'?" Na' benne' nigá guzre' le': "Dxebaga' tu gaxúa bzude' zrua' xtila." Nadxa benne' wēn zrin blau guzre' le': "Nigá dē xiche chiu'. Bēn xetú na, na' bzuaaj na dxebagu' tápalalajze." ⁸Xranē' gú'quebe'ene' nácale'e' sina benne' wēn zrin blau na' ca bēne' da ca'.

Nadxa gunná Jesús:

—Ca' naca na, benne' zaj zre'e' na'a zra zaj nácadxe' sina lu da dxelunē' nen le sa' ljwezre' ca', ca zaj naca benne' zaj naque' chee' Dios.

⁹Neda' dxapa' le'e, le guchine xel-la gunní'a chee' xezr la xu nigá chee' cha benne' ljwézrele, chee' gate te chee' xel-la

gunní'a na', na' sua nu si' lu na' le'e naga gaca banle chadía chacanna.

¹⁰Benne' dxuchínene' láteze lu dutē xel-la li lazre' chee', cá'aqueze guchínene' tu da zrendxa dutē xel-la li lazre' chee', na' benne' quebe naque' li lazre' ca dxuchínene' láteze, cá'aqueze quebe gaque' li lazre' ca guchínene' tu da zrendxa. ¹¹Ca' naca na, che quebe nácale li lazre' ca dxuchínele xel-la gunní'a chee' xezr la xu nigá, ¿nuzra guxrén lazre' le'e chee' guchínele xel-la gunní'a li? ¹²Che quebe nácale li lazre' ca dxuchínele da naca chee' benne' xula, ¿nuzra gunna le'e da gaca chee'queze?

¹³Quebe gaca tu benne' wēn zrin gunē' zrin chee' chupa xranē', lawe' da cuídenē' tue', na' xetúē' zrí'ine', u gaque' li lazre' nen tue', na' xetúē' guzúē' chalá'ala. Quebe gaca nu gun zrin chee' Dios, ne chee' da gunní'a da nape'.

¹⁴Benne' fariseo ca', benne' dxulucúdee' dumí, ne dxuluzé' nague' da dxenná Jesús, belún le' chee'. ¹⁵Nadxa gunná Jesús:

—Le'e dxulé'e cuínale xrlátaje lau bēnneache ca', san Dios núnbe'e lázrdaule. Da dxeleque bēnneache naca na xrlátaje, naca na da dxuzúa Dios chalá'ala.

Da nadxixruj bea na, ne xel-la dxenná bea chee' Dios

¹⁶Na' gunná Jesús:

—Ca bzrin zra zua Juan gulenná bea da nadxixruj bea na, ne da bululé'e benne' ca' buluchálaje' waláz chee' Dios. Na'a, ca na'te dxendxu dizra' chawe' ca gaca chú'udxu naga dxenná bea Dios, na' xígute benne' dxelune' ba xuzre xelu'e na'.

¹⁷Waca te chee' xabáa, ne chee' xezr la xu nigá, san quebe te chee' tu da naxúaj na lu da nadxixruj bea na.

Benne' biu dxulusáne' nu'ula chee'

(Mt. 19.1-12; Mr. 10.1-12)

¹⁸Na' gunná Jesús:

—Che tu benne' biu gusane' zru'ule', ne súalene' nu'ula xula, benne' biu nigá dxune' dul-la dxáchajne' xrba chee' xel-la wechaga na', na' benne' biu zúalene' tu nu'ula ba bsan benne' chee' le', benne' nigá cá'aqueze dxune' dul-la dxáchajne' xrba chee' xel-la wechaga na'.

Tu benne' gunní'a, ne tu benne' xache'

¹⁹Na' gunná Jesús:

—Guzúa tu benne' gunní'a, gúcue' zra lanē' da zaca, ne da zri'a xrtan, na' xígute zra bene' laní zren. ²⁰Cá'aqueze guzúa tu benne' xache' le' Lázaro, nazrate' wē' lu bel-la' dxen chee', na' dxeajché'e lu xu dxu'a lizre benne' gunní'a na'. ²¹Benne' xache' nigá guzá lazre' gawe' ca da dx-elexruj zranla ga dxelagu benne' gunní'a na', na' bécudu ca' dxelelé'eba' lu wē' ca' chee' Lázaro. ²²Bzrin zra gute benne' xache' na', na' belexeché' gubáz chee' xabáa ca' le' zeajxezúalene' Abraham lu lataj chawe' chee' Dios. Cá'aqueze gute benne' gunní'a na', na' bulucache' le'. ²³Gate benne' gunní'a na' dxezaca zi'e lataj chul-la chee' benne' gate, na' guchisa lawe', na' blé'ene' Abraham zue' zitu', ne Lázaro zúalene' le'. ²⁴Nadxa gudxezre xe'e, gunné': "¡Xrae, Abraham, bexache lazre' neda', ne gusel-la Lázaro, cheajsebise' tu zrube ne'e, na' xide' xucule' luzra' nigá! Dxezaca zi'a lu xi' nigá." ²⁵Na' Abraham gunné': "Bi chia', bsa lazre' gúcale'e chawe' chiu' lu xezr la xu, san Lázaro gúcale'e da zi' da xa' chee'. Na'a le' dxezi'e da ba neza nigá, na' lue' dxezaca zi'u na'. ²⁶Xetú da zua, zua tu chejéa zrente' laduj netu' ne le'e. Ca' naca na, che nu benne' zua nigá dxaca lazre' chéaje' naga zu', quebe gaca, ne quebe gaca benne' zua naga zu' xide' naga zúantu' netu'." ²⁷Nadxa gunná

benne' gunn'a na: "Dxata' xueda' lue', xrae Abraham, sel-lu' Lázaro lizre xra',²⁸ naga zaj zra' gazxu' bi bícha'dau', chee cheajchálajlene'-be', chee quebe xelélé' lebe' nigá xezezaca zi'be' ca dxaca chia'."²⁹ Abraham gunné: "Zaj nape' da buluzúaj Moisés, ne benne' ca' buluchá-laje' waláz chee Dios. Dخال-la' xelená' xán-nie' da na' naxúaj na."³⁰ Benne' gunn'a na' bechebe': "Awe', xrae Abraham, san che nu benne' ládujla benne' gate chéa-je' cheajchálajlene' le', welexebí' lazre'."³¹ Abraham gunné: "Che quebe xelenne' ca da gulenná Moisés, ne benne' ca' buluchá-laje' waláz chee Dios, québequeze xeléajle'e che tu benne' xebane' ládujla benne' gate."

Ca naca da dxun na ga nabágadxu dul-la

(Mt. 18.6-7, 21-22; Mr. 9.42)

17 Jesús guzre' benne' ca' dxusédené:

—Welezúaqueze da xelún na xelebaga béneache dul-la, na' edxugúa béneae' guné' da gun na xebaga benne' xula dul-la. ²Gácadxa chawe' chee béneae' che nu guchéaj xiaj xiche lbe', na' chu'e lu nísadau' naga gátete' quézcala guné' da gun na xebaga bidu caní dul-la. ³Le guxúe xanne' cuínale.

'Che le sa' ljwezru' guné' chiu' da calela, bzéajni'ine', na' che xebí' lazre', bnite lau chee'. ⁴Lácala guné' chiu' da calela gazre lasa tu zra, na' gazre lasa xide' xe'e lue': "Dxexebí' lazra'", dxal-la' gunite lau' chee'.

Xel-la waca chee xel-la dxeajlí lazre'

⁵Benne' gubáz ca' chee Xránadxu gulé'e Le':

—Ben ga cheajlí lázredxantu' Dios.

⁶Nadxa gunná Xránadxu:

—Che le'e zru'éle xel-la dxeajlí lazre', lácala naca na láteze ca tu bínnedu chee mostaza, waca xele xaga zrente' nigá:

"Gucuasa nigá, ne xeajsúa lu nísadau'," na' xaga na' guzúa na dizra' chee.

Da dxal-la' gun benne' wen zrin

⁷'Che tu benne' ládujla le'e zua tu benne' wen zrin chee', na' xel'é le'e xixre' gate te gudé'e bezre u guxúe' béadu ca', ¿we'e benne' wen zrin na: "Gudé nigala, gudx'é gagu'?" ⁸Cabí, san nne': "Bcueza da gawa', ne guf' chawe' le'u chee gaca ca'u chia' da xi'aj gawa'. Te na' waca xi'aj gagu' lue'."⁹ ¿We'e benne' wen zrin na: "Xcalenu'", lawe' da bene' da gunná be'e xrané' le'? Cabí. ¹⁰Cá'anqueze le'e, gate xuzre gunle xúgute' da gunná be'e Dios le'e, dxal-la' nnale: "Nácantu' benne' wen zrin quebe bi zaj zaca, lawe' da quebe bi ne guntu' da zréndxala ca naca da nabágantu'."

Jesús dxexuné' chi benne' zaj de'e we' guzru'

¹¹Ca zexíaj Jesús zéaje' Jerusalén, gudé'e lu xezr la xu chee xezre ca' zaj nababa Samaria, ne xezre ca' zaj nababa Galilea. ¹²Gate bzrine' tu xézredau', be-dajlechaga Le' chi benne' zaj de'e we' guzru', na' belezé' zítu'la, ¹³ne gulebezre xe'e, dxelenné':

—Jesús, Benne' Wesede, bexache lazre' netu'.

¹⁴Gate ble'e Jesús le', na' gunné':

—Le chjaca le cheajlué'e cuínale lau bxruze ca'.

Dxácate zjaque' na', na' belexexaque' chee xízrawe' chee'. ¹⁵Nadxa tu benne' ca', gate guque bé'ene' ba bexaque', na' bebi'e, dxue lá'ane' Dios du lazre'. ¹⁶Bzu zribe' lau Jesús, ne gudíxrujte' lawe' lu xu, dxé'e Le': "Xcalenu'." Benne' nigá naque' tu benne' Samaria. ¹⁷Nadxa gunná Jesús:

—¿Quegá chie' na' belexexaque' lu xízrawe' na'? ¿Gazra na' xegu'e'? ¹⁸¿Tuze benne' zitu' nigá belá' güe lá'ane' Dios?

¹⁹Nadxa Jesús guzre' benne' na' bexaque':

—Bexasa, bexíaj. Ba bexacu' lawe' da guxéajle'u chia'.

Ca la' xel-la dxenná bea chee Dios

(Mt. 24.23-28, 36-41)

²⁰Benne' fariseo ca' buluchebe' Jesús bátala la' xel-la dxenná bea chee Dios, na' bechebe Le':

—Ca la' xel-la dxenná bea chee Dios quebe naca na da lé'ele. ²¹Quegá nu nna: “Nigá zua na”, u “Na' zua na”, lawe' da ba zua lu'ule le'e xel-la dxenná bea chee Dios.

²²Nadxa guzre' benne' ca' dxusédenē':

—Wazrín zra gate le'e gaca lázrele lé'ele tu zra zua' neda', Benne' Gulje' Bénneache, na' quebe lé'ele na. ²³Che xelenná bénneache, xelé'e le'e: “Nigá zue'”, u: “Na' zue'”, quebe chéajle, ne quebe gaule benne' ca'. ²⁴Ca dxeajsúa xesa chalá'a zran xabáa, na' nalá'tequeze na xechalá'a zran xabáa, ca'an gaca gate xelá' neda', Benne' Gulje' Bénneache, lu zra xelá'a neda'. ²⁵Nédxula dxal-la' téle'a xel-la zi', na' benne' zaj zre'e lu zra na'a zra xuluzúe' neda' chalá'ala. ²⁶Ca guca lu zra gate zua Noé, cá'anqueze gaca lu zra gate xelá'a neda', Benne' Gulje' Bénneache. ²⁷Lu zra na' zua Noé gulé'aj gu-lawe', ne buluchaga ne'e, ne bulunézru-je' bi nu'ula chee' ca' lu xel-la wechaga na', cadxa bzrin zra guxú'u Noé lu da zren na' da dxedá lawe' nísadau, na' gú-calé'e xiuj, na' gulate xúgute benne' ca'. ²⁸Cá'anqueze guca lu zra zua Lot, gulé'aj gulawe', ne gulá'awe', ne belútie', na' gu-laze', ne belune' lizre', ²⁹na' gate Lot bedxúajle' lu xezre Sodoma, na' ca dxaca gate dxaca xiuj, ca'an guca bexruj xi', ne da gache da dxuzéxzele'e zran xabáa, ne bzria xi na ca naca benne' ca'. ³⁰Ca'an gaca lu zra xelá'a neda', Benne' Gulje' Bénneache.

³¹'Lu zra na', che nu benne' ze' chju'u chee', na' da de chee' zra na lu xu'u chee' na', quebe dxal-la' chu'e cuéajle' na, na' che nu benne' zue' le'e xixre', quebe dxal-la' xezrine' lizre'. ³²Le cheajsá lazre' ca guca chee' zru'ula Lot. ³³Benne' dxaca lazre' gapa chi'e xel-la nabán chee' gunitie' na, na' bénnea' wdee' na, wazrué'e bénnea' xel-la nabán.

³⁴'Dxapa' le'e, lu zre na', chupa benne' xelate' tu zren ga dxelase'. Tue' xeché'e, na' xetúe' xegá'ane'. ³⁵Chupa nu'ula xelezre'e dxelútue'. Tue' xeché'e, na' xetúe' xegá'ane'. ³⁶Chupa benne' xelezre'e le'e xixre'. Tue' xeché'e, na' xetúe' xegá'ane'.

³⁷Gate belén benne' ca' da nigá, na' buluchebe' Jesús:

—¿Gazra gaca ca', Xran?

Le' bechebe':

—Naga de tu da nate, na' xeledú-paqueze laba ca'.

Da dxulé'e na ca naca chee tu nu'ula ba gute benne' chee', ne benne' dxuchi'a da dxaca

18 Jesús bchálaje' da dxulé'e na ca naca chee' gusédenē' benne' ca' dxal-la' xuluwízrajtecaze' Dios, ne quebe xelexebigüe'. ²Na' guzre' benne' ca':

—Tu xezre guzúa tu benne' dxuchi'e da dxaca, na' quebe gudape' ba lá'ana Dios, ne cá'anqueze bénneache. ³Lu xezre ná'queze guzúa tu nu'ula ba gute benne' chee'. Guxíajle' xejnabe' lau benne' dxuchi'e da dxaca chee' guchi'e da dxaca chee' nen tu benne' dxune' chee' da caléla. ⁴Zane' lásate benne' dxuchi'e da dxaca quebe guca lazre' guchi'e chee' nu'ula na', san ca gudé na' gunné' lu xichaj lázrdawe': Lácala quebe dxapa' ba lá'ana Dios, ne cá'anqueze bénneache, ⁵san lawe' da nu'ula nigá dxune' neda' zede, guchi'a chaza' da dxaca chee' chee' québedxa xide' gúnle'e neda' zede.

⁶Na' gunná Xránadxu:

—Caní na' gunná benne' wen da calela na', benne' dxuchi'e da dxaca. ⁷ ¿Quebe guchi'a Dios da dxaca chee benne' ca' ba guqu'é, benne' ca' dxelenné' Le' te zra, ne chizrela? ¿Wazrené' xechebe' chee benne' ca'? ⁸ Dxapa' le'e, Le' guchi'e da dxaca chee', ne quebe chene'. Gate xelá'a neda', Benne' Gulje' Bénneache, ¿wazréldxeda' tu benne' lu xezr la xu nigá, benne' dxéajle'e chia'?

Da dxulé'e na ca naca chee tu benne' fariseo, ne tu benne' wechizruj

⁹ Jesús bchálaje' xetú da dxulé'e na, chee xelene benne' ca' dxeléquene' zaj naque' xrlátaje, san dxuluzúe' chalá'ala le sa' ljwezre'. ¹⁰ Gunné':

—Chupa benne' xjaque' xudau' chee xuluchálajlene' Dios. Tue' naque' benne' xudau' fariseo, na' xetúe' naque' wechizruj waláz chee xezre zitu'.

¹¹ Benne' xudau' na' guzé' dxuchálajlene' Dios, gunné': “Dios, xcalenu' quebe naca' ca benne' xula ca', zaj naque' gubán, ne benne' ca' dxelune' da calela, ne benne' dxelún dul-la dxeláchajne' xrba chee wechaga na', ne quegá ca benne' wechizruj nigá. ¹² Neda' dxuna' gubasa chupa lasa da gazre zra, ne dxunna' chiu' tu cue' chee da chi cue' da dxezi'a.” ¹³ Benne' wechizruj na' guzúe' dxu'a dxa xú'uze, ne quebe bexazrjne' chisa lawe' xabáa. Béle'e la chu'e, dxenné': “Dios, bexache lazre' neda', naca' benne' dul-la.” ¹⁴ Dxapa' le'e, benne' wechizruj na' bezé'e xexíaje' lizre', ne bexaque' xrlátaje lau Dios, san quegá caní guca chee benne' xudau' na'. Ca' guca lawe' da benne' dxucá'ana szren cuine' wexéxrujla bénnea', san benne' dxucá'ana baxache' cuine' wegá'ana szrénqueze bénnea'.

Jesús dxenabe' gaca chawe' chee bidu ca'

(Mt. 19.13-15; Mr. 10.13-16)

¹⁵ Belezrín benne' ca' zaj naché'e bidu ca' lau Jesús chee guzé ne'e lebe'. Gate belelé'e benne' ca' dxusede Jesús da nigá, na' gulezú lawe' dxeledil-le' benne' ca'. ¹⁶ Jesús gunné' benne' ca' dxusedene', na' dxé'e le':

—Le güe lataj xeelé'a bidu ca' naga zua', ne quebe guzágale-be', lawe' da benne' zaj naque' ca bidu caní welexu'e naga dxenná bea Dios. ¹⁷ Da li dxapa' le'e, benne' quebe si' lu ne'e nna bea Dios le' ca dxelún bidu caní, québequeze chu'e naga dxenná bea Dios.

Tu benne' cuide' naque' benne' gunní'a

(Mt. 19.16-30; Mr. 10.17-31)

¹⁸ Tu benne' xíchaje bchēbe' Jesús:

—Benne' Wesede xrlátaje, ¿bi da dxalla' guna' chee zrué'eda' xel-la nabán zea-jlí canna?

¹⁹ Jesús guzre' le':

—¿Bizr chee na' dxennáu' naca' xrlátaje? Netú benne' quebe naque' xrlátaje. Tuze Dios naque' xrlátaje. ²⁰ Lue' núnbe'u ca zaj naca xrba chee Dios: Quebe gunu' dul-la da dxachaj na xrba chee wechaga na'.

Quebe gutiu' benne'.

Quebe cuanu'.

Quebe nneu' chee le sa' ljwezru' da quebe naca na.

Gudapa ba lá'ana xra xrna'u.

²¹ Benne' na' guzre' Jesús:

—Xúgute da caní dxuna' ne nácatea' bídaute.

²² Gate ben Jesús da nigá, na' guzre'-be':

—Ne dxexázejnu' xetú da dxal-la' gunu'. Bete ca naca da de' chiu', na' bnezruj na chee benne' xache' ca'. Nadxa

gapu' xel-la gunní'a lu xabáa chee Dios. Na' gudá sálenu' neda'.

²³ Gate benne' cuide' na' benne' da nigá, bewí'inele'ene' lawe' da nápalé'e da gunní'a. ²⁴ Gate ble'e Jesús ca bewí'ine benne' na', gunné':

—Stébeté naca chee benne' gunní'a ca' xelexú'e naga dxenná bea Dios. ²⁵ Chadídxala te tu bea zren lu negue' tu xeche' zriche quegala chu'u tu benne' gunní'a naga dxenná bea Dios.

²⁶ Na' benne' ca' dxelenne' gulenné':

—Che ca' naca na, ¿núzraqueze la?

²⁷ Jesús guzre' benne' ca':

—Da quebe gaca xelún bénneache, waca Dios gúnqueze' na.

²⁸ Na' gunná Pedro, guzre' Jesús:

—Xran, ba bsantut' ca da gudápantut' chee zálentut' Lue'.

²⁹ Nadxa Jesús bechebe':

—Da li dxapa' le'e, núteteze benne' gusané' lizre', u xra xrne'e, u bi biche', bi zane' ca', u zru'ule', u zrí'ine' ca', chee guné' zrin chee xel-la dxenná bea chee Dios, ³⁰ benne' nigá wazi'e da zrendxa lu xezr la xu nigá, na' lu xezr la xu da za za wazi'e xel-la nabán da zeajlí canna.

Jesús dxuchálaje' xecha lasa ca gaca gate gatie'

(Mt. 20.17-19; Mr. 10.32-34)

³¹ Na' Jesús gunné' chalá'ala benne' hazrinnu ca' dxusédené', na' guzre' le':

—Na'a zexíajdxu Jerusalén, naga gaca li ca naca da buluzúaj benne' ca' buluchálaje' waláz chee Dios ca gaca chia' neda', Benne' Gulje' Bénneache. ³² Benne' zaj zre'e Jerusalén xuludé' neda' lu na' benne' zitu' ca', na' xelún le' chia', ne xelenné'queze' schanni' chia', ne wuluzrá'queze' neda' zrene'. ³³ Welúe'queze' neda', na' te na' xelútié' neda', na' zra guxunne' zra xebana' ládujla benne' gate.

³⁴ Benne' ca' quebe guléajni'ine' da nigá, ne quebe zaj nézene' bi chee na'

dxuchálajlene' le', lawe' da zaj naca da quebe guca xeléajni'iquezne'.

Tu benne' la chul-la, benne' zue' xezre Jericó

(Mt. 20.29-34; Mr. 10.46-52)

³⁵ Gate Jesús bzrine' gagu naga zua xezre Jericó, na' dxe' tu benne' la chul-la dxu'a neza dxenabe' guna'. ³⁶ Gate benne' dxeledé benne' zante, na' benne' la chul-la na' bchebe' benne' ca' bizra na' dxaca na. ³⁷ Na' gulé'e le':

—Jesús, benne' Nazaret dxedé' nigá.

³⁸ Nadxa gudxezre xa'a la chul-la na', gunné':

—¿Jesús, Zri'ine David, bexache lazre' neda'!

³⁹ Benne' ca' zaj zria lawe' lau Jesús guledil-le' benne' la chul-la na' chee sue' zrize, san gudxezre xá'adxa le', dxenné':

—¿Zri'ine David, bexache lazre' neda'!

⁴⁰ Nadxa gugá Jesús, na' gunná bé'ene' xeajlexrí'e le'. Gate ble'e lau Jesús, na' Jesús bchebe' le':

⁴¹ —¿Bi dxaca lazru' guna' chiu'?

Bechebe la chul-la na':

—Xran, dxaca lazra' xelé'eda'.

⁴² Jesús guzre' le':

—Gaca ca dxennáu'. Ba bexacu' lawe' da guxéajle'u chia'.

⁴³ Zra ná'queze belé'e benne' la chul-la na', na' guxíajlene' Jesús, dxue lá'ane' Dios. Xúgute' benne' ca' belelé'ene' da nigá cá'anqueze belúe lá'ane' Dios.

Jesús dxuchálajlene' Zaqueo

19 Nadxa Jesús guxú'e xezre Jericó, ne dxedé' xezre na'. ² Lu xezre na' zua tu benne' gunní'a le' Zaqueo. Naque' xíchaje' chee benne' wechizruj ca'. ³ Benne' nigá dxaca lazre' gúnbe'e Jesús, san quebe guca lé'ene' Le' lawe' da zaj zra' benne' zante' na', na' Zaqueo na' quebe naque' benne' tunna. ⁴ Nadxa guxíaj chégü'e guzría lawe', ne chee gaca lé'ene' guluéne' tu lu xaga zren da zua

gagu naga dxal-la' te Jesús. ⁵Gate gudé Jesús na', gunné'e lu xaga na', ne guzre' le':

—Zaqueo, bexétajche, lawe' da na'a dxun na ba xen xegá'ana' lizru'.

⁶Nadxa Zaqueo na' bexétajé' chadí, na' nen duté xel-la dxebé guz'í lu ne'e Jesús. ⁷Gate belelé'e benne' ca' da nigá, xúgute' gulezú lawe' dxelezí tizre' Jesús, dxelenné':

—Jesús bzrine' begá'ane' lizre tu benne' dul-la.

⁸Nadxa Zaqueo na' guz'é, na' guzre' Xránadxu:

—Gunná'xque, Xran, gunézruja' benne' xache' ca' gáchajte ca da de chia', na' che nu benne' bsaca zia' le', xunézruja' tapa cue'la chee'.

⁹Na' Jesús guzre' le':

—Na'a bla' xel-la weselá lu xu'u nigá, lawe' da nácaqueze benne' nigá xrtia Abraham. ¹⁰Ca' naca na lawe' da bla' neda', Benne' Gulje' Bénneache, chee' xexílaja', ne guselá' benne' ca' zaj nanítie'.

Da dxulé'e na ca naca chee' chi dumí zaca

¹¹Dxácaté na' dxuluzé naga benne' ca' dxenná Jesús da caní, na' bchálaje' tu da dxulé'e na lawe' da ba zue' gáguze xezre Jerusalén, na' benne' ca' dxeléquene' zra ná'queze nna bea Dios lu xezr la xu nigá.

¹²Nadxa guzre' benne' ca':

—Guzía tu benne' gunn'a xrlátaje, na' dxal-la' chéajé' zitu' chee' xuluzúe' le' gaque' wenná bea, na' te na' xezrine' lazrie'. ¹³Gate za se'e, gunné' chi benne' wen zrin chee', na' bnézruje' tu tu benne' ca' tuwéaj dumí zácalé'e, ne guzre' benne' ca': "Le guchine dumí nigá cadxa xelá'a." ¹⁴Benne' zaj zre'e lázrie' dxelecuídené' le', na' gulesel-le' bal-la benne' gubáz chee' naga zéa-je' chee' cheajleguezre' benne' zaj zre'e na': "Quebe dxaca lázrentu' gaca benne'

nigá wenná bea cheentu'." ¹⁵Buluzúe' le' gaque' wenná bea, na' bezrine' lázrie'. Gate bezrine' gunné' benne' wen zrin ca' bnézruje' dumí, chee' nézene' ájaté bezí' tu tu benne' ca'. ¹⁶Benne' nedxu bzrine' lawe', na' gunné': "Xran, dumí chiu' ba bezí na chi cue'la." ¹⁷Wenná bea na' bechebe': "Chawe' bentu'. Nacu' wen zrin xrlátaje. Lawe' da gucu' li lazre' lu late' da benna' lue', na'a guna' lue' benne' nna be'ene' chi xezre ca'." ¹⁸Na' bzrin xetúe' lawe', na' gunné': "Xran, dumí chiu' ba bezí na gazxu' cue'la." ¹⁹Cá'anqueze guzre' benne' nigá: "Lue' gacu' benne' nna be'ene' gazxu' xezre ca'." ²⁰Nadxa xetúe' bzrine', na' gunné': "Xran, nigá de dumí chiu'. Bcache chawa'a na tu lu bazxu, ²¹lawe' da bzreba' lue'. Nacu' tu benne' dxuzúa xuzre. Dxexeca'u da quebe guxru', ne dxexelapu' naga quebe guzu'." ²²Nadxa wenná bea na' guzre' le': "Wen zrin cale'la. Ca dizra' da gunnéu' chuga' ca gaca chiu'. Che nézquezenu' naca' benne' dxuzúa xuzre, ne xecá'a da quebe guxrúa', ne dxelapa' naga quebe guza', ²³¿bizr chee' na' quebe xju'u dumí chia' lu na' benne' xuluchínene' na, chee' xezí lu na'a neda' dumí chia' nen da gun xíchajé na, gate xezrina' neda' lizra'?" ²⁴Nadxa guzre' benne' ca' zaj zre'e na': "Le xecá'a dumí na' lu ne'e, na' le gunezruj na benne' nape' chi dumí ca'." ²⁵Benne' ca' gul'é le': "Xran, ba nape' chi dumí." ²⁶Na' bechebe' wenná bea na': "Dxapa' le'e, benne' nape' wazidxe' da zrendxa, na benne' quebe nape', wecá'a ca da du nape'. ²⁷Na'a, ca naca chee' benne' ca' quebe gulaca lazre' gaca' neda' wenná bea chee', le cheajxri'e nigá, ne le gutie' lawa' neda'."

Jesús dxexu'e Jerusalén

(Mt. 21.1-11; Mr. 11.1-11; Jn. 12.12-19)

²⁸Ca gudé gunné' da nigá, na' bexú'u Jesús neza zexíaje' Jerusalén. ²⁹Gate ba zua xezrine' xezre Betfagé, ne xezre

Betania, ne zue' gáguze naga zua Xi'a Xaga Olivo, na' gusel-le' chupa benne' ca' dxusédenē'. ³⁰ Guzre' le':

—Le chjaca xézredu na' zua gáguze, na' ca zrinle na' lé'ele tu burru da'ba' xaga, be' netú quebe nu ne cuía le'ba'. Le sezre-ba', na' le che'-ba' nigá. ³¹ Che nu naba le'e bizr chee na' dxesézrele-ba', le xe'e Xránadxu nachínene'-ba'.

³² Na' gusiá'ca benne' ca', na' belelé'ene' xúgute naca na ca ba guzre Jesús le'. ³³ Na' gate dxesezre' búrrua', na' xránaba' buluchebe' le':

—¿Bizr chee na' dxesézrele búrrua'?

³⁴ Benne' chupa ca' belexechebe':

—Lawe' da nachine Xránadxu le'ba'.

³⁵ Na' beleché'e-ba' lau Jesús, na' belexrúe' xicha chee' cúzruba', na' buluzrúe' Jesús cúzruba'. ³⁶ Ca zeaj Jesús, xu'e neza zrie' búrrudu na', na' dx-elechiluj benne' ca' xicha chee' la neza naga té'e'. ³⁷ Gate bzrine' gagu naga naca létajla chee Xi'a Xaga Olivo, xúgute benne' ca' zaj de'e Le' gulezú lawe' dx-elebezre xe'e lu xel-la dxelebe', ne dxelúe lá'ane' Dios ca naca xúgute xel-la waca chee xabáa da belelé'ene'. ³⁸ Gulenné':

—La'azxa naca wenná bea, benne' za' waláz chee Xránadxu Dios. Gaca xel-la dxebeza zri lazre' da za xabáa, ne gaca ba Dios.

³⁹ Nadxa bal-la benne' fariseo ca' zaj zra' ládujla benne' ca' gulé'e Jesús:

—Benne' Wesede, gudil-la benne' caní zaj de'e Lue'.

⁴⁰ Jesús bechebe':

—Dxapa' le'e, che benne' caní xelezúa zrie', xiaj caní xebezre xa'a na.

⁴¹ Gate bzrine' gagu xezre Jerusalén, ne ca blé'ene' na, na' gudxezre Jesús ca naca chee na. ⁴² Na' gunné':

—La chéajni'ile lu zra chee'le nigá da gaca gunna chee'le xel-la dxebeza zri lazre'. Na'a da na' nagache na, na' quebe gaca lé'ele na. ⁴³ Welezrín zra gaca chee'le da zrinnaj, gate benne'

dxelecuídenē' le'e xeléchaje' ze'e dxu'a xezre chee'le, ne xuluzague' le'e gáteteze na', ⁴⁴ na' xuluchínnaje' xezre chee'le. Na' xelútiē' ca naca benne' zaj zre'e nigá, na' quebe xuluxucá'ane' tu xiaj cuzru ljwezre na. Caní gaca chee'le lawe' da quebe gúquebe'ele zra bla' Dios chee' gácalene' le'e.

Jesús dxucá'ana chawe' chale'aj xudau'

(Mt. 21.12-17; Mr.
11.15-19; Jn. 2.13-22)

⁴⁵ Nadxa guxú'u Jesús chale'aj xudau', na' guzú lawe' dxebéaje' na' benne' ca' dxelutiē', ne dxelá'awe' na'. ⁴⁶ Na' guzre' benne' ca':

—Lu xiche chee' Dios dxenné': "Lizra' naca na xu'u naga guchálajlele neda'," na' le'e nunle na ca tu lizre gubán ca'.

⁴⁷ Tu zra tu zra Jesús dxusédenē' benne' ca' zaj zra' chale'aj xudau'. Benne' xíchaje' ca' chee' bxruze, ne benne' dx-uluxuzájle'e da nadxixruj bea na, ne benne' xu'u lawe' chee' xezre na' dxelíla-je' ájala xelune' xelútiē' Le'. ⁴⁸ Quebe belezrélene' ájala xelune', lawe' da dxuluzé naga xanne' xúgute benne' ca' Jesús, chee' xelenne' ca' da dxenné'.

Ca naca xel-la dxenná bea napa Jesús

(Mt. 21.23-27; Mr. 11.27-33)

20 Tu zra gate zua Jesús chale'aj xudau' dxusédenē' benne' ca', ne dxuchálajlene' le' ca naca dizra' chawe' chee' Dios, na' belezrín na' benne' xíchaje' ca' chee' bxruze ca', ne benne' ca' dxuluxuzájle'e da nadxixruj bea na, ne benne' gula sina ca', ² na' gulé'e Le':

—Gunná bi xel-la dxenná bea napu' dxunu' da caní. ¿Nuzra benna lue' xel-la dxenná bea nigá?

³ Na' gunná Jesús:

—Cá'anqueze neda' guche'ba' le'e tu. Le xechebe' chia'. ⁴ ¿Nuzra gusel-la Juan

guchúe' bèneache nisa? ¿Dios che bèneache?

⁵Na' gulezú lawe' dxelé ljwezre':

—¿Bizra nnadxu? Che nnadxu gusel-la Dios le', na' guchebe' dxi'u: "¿Bizr chee na' quebe guxéajlele chee'?" ⁶Che xedxu Le', bèneache gulesel-le' le', benne' zaj zre'e nigá wuluzríe' dxi'u xiaj, lawe' da zaj neze xánnie' bchalaj Juan waláz chee Dios.

⁷Nadxa belexechebe' quebe zaj nézene' nu gusel-la Juan bchue' bèneache nisa. ⁸Na' Jesús guzre' benne' ca':

—Cá'aqueze neda' quebe xapa' le'e bi xel-la dxenná bea napa' dxuna' da caní.

Da dxulé'e na ca naca chee benne' wen zrin calela ca'

(Mt. 21.33-44; Mr. 12.1-11)

⁹Na' guzú lau Jesús dxuchálajlene' benne' ca' zaj zre'e na', dxuchálaje' da dxulé'e na, dxenné':

—Guzúa tu benne' bde'e lba uva lu xezr la xu chee', na' ca gudé na' bca'ane' na lu na' benne' wen zrin ca', na' guzúe' na' zane' iza. ¹⁰Gate bzrin zra xuluchibe' uva ca', na' gusel-le' tu bi wen zrin chee' zeajxenábabe' tu cue' chee' lina na' da dxal-la' xezi'e, san benne' wen zrin ca' buluzálaje'-be', na' belexesel-le'-be' cá'aze. ¹¹Nadxa xrane lina na' gusél-le' xetú bi wen zrin chee', na' cá'aqueze bi nigá bulucháchalene'-be', ne buluzálaje'-be', na' belexesel-le'-be' cá'aze. ¹²Xrane na' gusél-le' xetú bi wen zrin chee', na' benne' wen zrin ca', cá'aqueze belune'-be' zi', na' belexebéaje'-be' lu lina na'.

¹³'Naga xejche'te na, xrane na' gunné': "¿ájazra guna'? Sel-la' zri'ina' nazríite' lazra'. Gate xelelé'ene'-be' nalja xelape'-be' ba lánana." ¹⁴Na' gate benne' wen zrin ca' belelé'ene'-be', na' gulé ljwezre': "Bi nigá xezí' lu na'be' da de chee' xranadxu. Gútedxu-be', chee' gácadxu xrane na dxí'aqueze." ¹⁵Nadxa

belexebéaje'-be' lu xezr la xu na', na' belutié'-be'.

Nadxa Jesús bchebe' benne' ca':

—¿Bizra gun xrane na' chee' benne' wen zrin ca'? ¹⁶Xelé'e, na' gutié' benne' wen zrin ca', na' gudé'e xezr la xu na' lu na' benne' xula ca'.

Gate belén benne' ca' ca gunná Jesús, na' gulenné':

—Dios quebe gu'e lataj gaca ca'.

¹⁷Na' Jesús gunné'e benne' ca', na' gunné':

—¿Bizra zéaje da naxúaj na lu xiche chee' Dios? Dxenné' caní:

Xiaj na' da buluzúa benne' wen xu'u ca' chalá'ala,

le' na' naca na xiaj blau.

¹⁸Núteteze benne' cheajchazie' lawe' xiaj na', na' chúzrujqueze bènea', na' che xiaj na' xexruj na lawe' nu benne', gútute na le'.

Ca naca chee da dxuchizruj xezre zi'tu'

(Mt. 21.45-46; 22.15-22; Mr. 12.13-17)

¹⁹Benne' xíchaje ca' chee' bxruze ca', ne benne' ca' dxuluxuzájle'e da nadixruj bea na gulaca lazre' xelele' Jesús zra ná'queze, lawe' da guleque bé'ene' bchalaj Jesús da dxulé'e na ca zaj naca le', san belezrebe' da xelún bèneache ca'.

²⁰Nadxa gulesel-le' benne' ca' xuluzuzre' Jesús, benne' xululé'e cuine' ca benne' xrlátaje ca'. Benne' caní dxelaca lazre' xelebéaje' Jesús dizra' chee' xelezéquene' xuludé'e Le' lu na' bènea' dxenná be'e. ²¹Chee' xelune' da nigá, buluchebe' Le':

—Benne' Wesede, nézentu' dxennáu', ne dxusédenu' da naca li lazre', ne quebe dxuchi'u chee' bèneache cáteze dxululé'e cuine', san lu da li dxusédenu' da naca chee' Dios. ²²Guzre netu', ¿naca na chawe' quízrujdxu da dxuchizruj César, bènea' dxenná bé'ene' dute xezr la xu, che cabí?

²³Dxeque be'e Jesús ca naca da dxelaca lazre' xelune' chee', na' guzre' benne' ca':

—¿Bizr chee' na' dxaca lázrele gun xálele neda'? ²⁴Le gulé'e neda' tu dumí. ¿Nuzra lu'a na' da na nigá, ne nu la naxúaj nigá?

Benne' ca' belexechebe':

—Chee' benne' dxenná bea na'.

²⁵Nadxa gunná Jesús:

—Le gunezruj bénnea' da naca chee', na' le gunezruj Dios da naca chee' Dios.

²⁶Quebe gulezéquene' xelún xálene' Jesús ca naca da bechebe' lau benne' ca'. Belexebáne' ca naca da bechebe', na' gulezúa zrie'.

Ca gaca gate xelexebán benne' gate

(Mt. 22.23-33; Mr. 12.18-27)

²⁷Ca gudé na' bal-la benne' xudau' saduceo ca' belezrine' lau Jesús. Benne' saduceo ca' dxeléquene' quebe xelexebán benne' gate, na' gulé'e Jesús:

²⁸—Benne' Wesede, Moisés bzúaje' cheentu' che tu benne' gatie', ne gucá'ane' zru'ule', ne che quebe nu chilá' zrí'ine', na' bi biche bénnea' dxal-la' guchaga na'abe' nen nu'ula na' gute benne' chee' chee' galaj tu bidau' gácabe' ca zri'ine' bénnea' ba gútee'.

²⁹Gulezrá' gazre benne' gulaque' zri'ine' tuze xre'. Bi nedxu bchaga na'abe' nen tu nu'ula, na' gútebe', quebe nu chilá' bi cheebe'. ³⁰Bi gudxupe' bchaga na'abe' nen nu'ula na', ne cá'anqueze gútebe' quebe nu chilá' bi cheebe'. ³¹Nadxa bi guxunne' bchaga na'abe' nen nu'ula na', na' cá'anqueze belún bi ca' xezica, na' bi gazre ca' gulátebe' quebe nu chilá' bi cheebe'. ³²Naga xeajche'te na, na' gute nu'ula na'. ³³Gate xelexebán benne' gate, ¿nula bi ca' gaca zru'ulabe' nu'ula na', lawe' da ca naca bi gazre ca' buluchaga na'abe' nen nu'ula na'?

³⁴Nadxa bechebe Jesús:

—Lu xezr la xu nigá dxuluchaga na' benne' biu ca' nen nu'ula ca'. ³⁵Na' benne' ca' naca chee' xelexexú'e xezr la xu da za za', ne chee' xelexebané' ládujla benne' gate, québedxa xuluchaga ne'e, ne québedxa xulunézruje' zrí'ine' lu xel-la wechaga na'. ³⁶Ca'an gaca lawe' da quebe nu gátedxa na'. Xelaque' ca zaj naca gubáz chee' xabáa ca', ne xelaque' bi chee' Dios lawe' da belexebané'. ³⁷Moisésqueze, gate bzuaje' ca guca chee' bisigá da guzúa na' xi', dxulé'ene' dxi'u dxal-la' xelexebán benne' gate. Naga naxúaj da nigá dxenná na ca naca chee' Dios, naque' Dios chee' Abraham, ne Dios chee' Isaac, ne Dios chee' Jacob. ³⁸Dios quebe naque' Dios chee' benne' gate ca'. Naque' Dios chee' benne' ban ca', lawe' da lau Le' zaj naca ban xúgute' bénneache.

³⁹Nadxa bal-la benne' ca', benne' dxuluxuzájle'e da nadxixruj bea na gulé'e Jesús:

—Cháwedau' dxennáu', Benne' Wesede.

⁴⁰Québedxa belexázejne' bi xuluchebe' Jesús.

¿Nu benne' naca Cristo zrí'ine'?

(Mt. 22.41-46; Mr. 12.35-37)

⁴¹Jesús guzre' le':

—¿Bizr chee' na' dxennale le'e naca Cristo zri'ine' David? ⁴²Davídqueze gunné' lu xiche naga zaj naxúaj salmo ca': Xránadxu Dios guzre' Xrana':

“Gudxé'e cuita' xabela chia',

⁴³Cadxa guzúa' benne' dxelecuídené' lue' ca' zran ni'u.”

⁴⁴¿ájazra chee' na' naca Cristo zri'ine' David, na' Davídqueze dxé'e Le': “Xran”?

**Jesús dxenné' chee benne' ca'
dxuluxuzájle'e da nadxixruj bea na**

(Mt. 23.1-36; Mr.
12.38-40; Lc. 11.37-54)

⁴⁵Ca naca benne' ca' zaj zra' na' dxuluzé nagu'e chee Jesús gate guzre' benne' ca' dxusédené':

⁴⁶—Le guxúe xanne' cuínale chee benne' ca' dxuluxuzájle'e da nadxixruj bea na, lawe' da dxeledánene' dxeledé' zaj nacue' zre' tunna, ne dxelaca lazre' xelapa bénneache le' ba lá'ana lawe' xi'a ca', ne dxeleb'é lu lataj blau ca' lu xu'u naga dxezragale, ne lataj blau ca' naga dxelawe' zrue. ⁴⁷Benne' caní dxelequ'é ca naca lizre nu'ula ca' ba gulate benne' chee', na' chee' xulucá'ana cuine' xrlátaje lau bénneache ca' dxululawízraje' Dios da tunna lu xu'u ca' naga dxezragale. Benne' caní xelezaca zídxaqueze'.

**Dumí da bnezruj tu nu'ula
xache' ba gute benne' chee'**

(Mr. 12.41-44)

21 Gate zua Jesús chale'aj xudau', blé'ene' benne' gunnía' ca' dxelegú'e dumí lu xí'ina chee' xudau'. ²Na' blé'ene' tu nu'ula naque' benne' xache', ne ba gute benne' chee', gulu'e chupa dumí'au'. ³Na' gunná Jesús:

—Da li dxapa' le'e, nu'ula xache' nigá gulú'udxe' da zrendxa ca benne' gunnía' caní, ⁴lawe' da dxelegú'u benne' ca' chee' da dxutínneze na, san nu'ula nigá, lu xella baxache' chee' bnézruje' ca naca da nape' da nunte gawe'.

**Jesús dxuchálaje' ca gaca
gate cuía xi' xudau'**

(Mt. 24.1-2; Mr. 13.1-2)

⁵Bal-la benne' dxuluchálaje' ca naca chee' xudau' na', ne chee' xiaj xrtante da zaj zrále'e na ze'e xudau' na', ne chee' da xrtan da bulunezruj benne' chee' xudau' na'. Nadxa gunná Jesús, dxé'e le':

⁶—Wazrín zra gate xelebía xi' xúgute da caní dxelé'ele, ne quebe xegá'ana netú xiaj cuzru ljwezre na.

**Da xululé'e na gate cheajsé
chee' xezr la xu nigá**

(Mt. 24.3-28; Mr. 13.3-23)

⁷Nadxa benne' ca' buluchébe' Jesús:

—Benne' Weséde, ¿bata gaca da na? ¿Bi gul'é na gate ba za xelaca da caní?

⁸Jesús gunné':

—Le guxúe xanne' cuínale, ne quebe güele lataj nu si xe le'e, lawe' da xelelá' benne' zante benne' xulusí' cuine' La neda', xelenné' zaj naque' Cristo, ne xelenné' ba bzrin zra. Quebe chéajlele benne' ca'. ⁹Gate xénele dxaca wedil-la, ne xeledábague' bénneache xu'u lawe', quebe zrébele, lawe' da dxal-la' gaca da caní nedxu, san quebe ne zrin zra cheajsé chee' xezr la xu nigá.

¹⁰Nadxa guzre' benne' ca':

—Bénneache tu xezr la xu xeledíl-lale bénneache xetú xezr la xu, na' benne' tu xezre xeledíl-lale benne' xetú xezre.

¹¹Wazrú'le'equeze, ne gácale'e gubina', ne gáta'le'e xízrawe' du ca nácaqueze, na' zran xabáa lé'ele da guchébequeze na le'e, ne xel-la waca zri'a ca'.

¹²'Nédxudxa gate quebe ne gaca da caní xelélaqueze' le'e, ne xeláu zi' xúzrequeze' le'e. Xeleché'e le'e lu xu'u ca' ga dxelezrague' chee' xelechugue' ca xelune' chee'e, na' xelegú'e le'e lizre xia, ne xeleché'e le'e lau benne' wenná bea ca', ne lau benne' xu'u lawe' ca' lawe' da nácale neda' tuze. ¹³Gate gaca da caní gata' lataj guchálajlele benne' ca' ca naca chia' neda'. ¹⁴Le guzúa chacha lázrdaule, quebe gucúzale nédxula da dxalla' nnele, ¹⁵lawe' da gunna' neda' le'e dizra', ne xel-la sina da quebe xezezeque benne' dxeledábague' le'e bi xelenné' chee' na. ¹⁶Wuludéqueze bénneache le'e lu na' benne' dxeledábague' le'e. Caní xelúnqueze xra xrnale, ne bi bíchele,

ne xrtia ljuézrele, ne bi ljuézrele ca'. Welútequeze' bál-lale le'e, ¹⁷ na' xúgute bèneache welecuídene' le'e lawe' da nácale neda' tuze, ¹⁸ san quebe nite tu xicha xíchajle lau Dios. ¹⁹ Che sua cháchale, na' gápale xel-la nabán.

²⁰ Gate lé'ele zaj naxechaj benne' dxjaque' wedil-la xezre Jerusalén, na' nézele ba za cuía xi' xezre nigá. ²¹ Lu zra na', benne' zaj zre'e xezre ca' zaj nababa Judea dxal-la' xuluzrúnnuje' chjaque' lu xi'a ca', na' benne' zaj zre'e xezre Jerusalén dxal-la' xeledxúaje' na', na' benne' zaj zre'e le'e xixre' quebe dxal-la' xelexezrine' xezre na'. ²² Lu zra ca' Dios gudé' benne' ca' lu da zi' da xa', na' gaca li ca naca da naxúaj na lu xiche chee Dios ca dxal-la' gaca chee benne' ca'. ²³ Edxugúa nu'ula zaj zu'e zi'i lu zra ca', ne nu'ula ca' zaj nuxre' bidu dxelázrebe', lawe' da gáta'le'e da xelezaca bèneache ca', na' gaca tu da ba xa' zrente chee benne' ca'. ²⁴ Bal-le' xelatie' lu wedil-la na', na' xebal-le' xelech'e le' zaj nadxéaje' tu tu xezr la xu ca', na' benne' zitu' ca' xululéaje' xezre Jerusalén cadxa cheajsé chee zra xelenná bea benne' zitu' ca'.

Ca gaca gate xelá' Benne' Gulje' Bénneache

(Mt. 24.29-35, 42-44; Mr. 13.24-37)

²⁵ Na' gunná Jesús:

—Lu zra na' xelata' da xulul'é na lau gubizra, ne lau beu', ne lau belaj ca', na' lu xezr la xu xelezúa stebe benne' ca', ne xelezrebe' ca naca schaga' da gun nísadau', ne xejxruza chee na. ²⁶ Benne' ca' xelate ni'a ne'e ne chee xel-la dx-elezrebe gate xulusá lazre' ca da dxal-la' gaca lu xezr la xu, ne ca naca da zaj zra' zran xabáa, da zaj napa xel-la waca xelexrízequeze na. ²⁷ Lu zra na' xeled'équezne' neda', Benne' Gulje' Bénneache, xelá'a tu lu beuj, nen duté xel-la waca zren, ne da xabáa chia'. ²⁸ Gate su lau gaca da caní, le gun dipa lázrele, ne

le chisa xíchajle, lawe' da ba za zrin zra lale lu da dxaca chee.

²⁹ Nadxa bchalaj Jesús tu da dxulé'e na, gunné':

—Le nna'xque xaga higo, u bíteteze xaga. ³⁰ Gate lé'ele ba dxezría na laga' dxé'ene, nézquezle le'e ba za xaca beu' la. ³¹ Cá'anqueze, gate lé'ele gaca da caní, dxal-la' nézele ba zua gagu zra nna bea Dios.

³² 'Da li dxapa' le'e, xúgute da caní xelaca na nédxudxa gate quebe ne xelate bèneache zaj zra' lu zra na'a zra. ³³ Xabáa, ne xezr la xu weledé chee na, san dizra' chia' quebe te chee na.

³⁴ Le guxúe xanne' cuínale, quebe güele lataj xelú'u lu xichaj lázrdaule da calela ca' ca naca xel-la dxagu xrata, ne xel-la dxezuzre, ne xel-la dxezá lazre' da naca chee xezr la xu nigá, chee quebe gácale ca tu benne' nachúl-lene' lu xichaj lázrdawe' gate zrin zra na', ³⁵ ne chee quebe gaca na ca tu da quele na le'e, lawe' da caní gaca chee xúgute benne' zaj zre'e lu xezr la xu nigá. ³⁶ Le sua le'e ban lazre', ne le naba lau Dios chee gaca lale lu da dxal-la' gaca lu xezr la xu nigá, ne chee gaca gul'é'e cuínale du lázrele lawa' neda', Benne' Gulje' Bénneache.

³⁷ Jesús bsédene' benne' ca' lu xudau' te zra, na' chizrela dxexíaje' lu Xi'a Xaga Olivo. ³⁸ Xúgute benne' ca' belezrine' lu xudau' na' xugu' zila chee xelenne' chee Jesús.

Dxelune' tuze dizra' xeléle' Jesús

(Mt. 26.1-5, 14-16; Mr. 14.1-2,
10-11; Jn. 11.45-53)

22 Ba zua gagu laní gate dxelawe' xeta xtila da quebe nachixre cua zichaj chee xeta xtila, da naca na Laní Pascua gate dxulusá lazre' ca da ben Dios gate bebéaje' bèneache chee lu xezr la xu Egipto. ² Lu zra ca' benne' xíchaje' ca' chee bxruze ca', ne benne' ca' dxuluxu-zájle'e da nadxixruj bea na belílaje' ájala

xelunə' xelútiə' Jesús bagácheze, lawe' da dxelezrebe' da xelún benne' zan ca'.

³Nadxa guxú'u Satanás da xriwe' lu lázrdau Judas, bénnea' cá'anqueze le' Iscariote. Naque' tu benne' chazrinnu gubáz ca' chee Jesús. ⁴Judas nigá guxíaje' xeajchálajlene' benne' xíchaje' ca' chee bxruze ca', ne benne' blau ca' chee xudau', na' bchálajlene' benne' ca' ájala gunə' gudée' Jesús lu na' benne' ca'. ⁵Benne' caní gulebene', na' gulechebe lazre' xulunézruje' le' dumí. ⁶Judas na' guzú' lu ne'e dumí na', na' guzú lawe' dxíljaje' ájala gunə' gudée' Jesús lu na' benne' ca' gate quebe nu chilá' benne'.

Da dxágudxu chee cheajsá lazrdxu ca gute Xránadxu

(Mt. 26.17-29; Mr. 14.12-25; Jn. 13.21-30; 1 Co. 11.23-26)

⁷Bzrin zra laní gate dxelawe' xeta xtila da quebe nachixre cua zichaj chee xeta xtila, gate dxal-la' xelútiə' zríla'dau' ca' chee Laní Pascua. ⁸Na' Jesús gusel-le' Pedro ne Juan, na' guzre'-be':

—Le chjaca, ne le gucuéza da gágudxu chee Laní Pascua.

⁹Benne' caní buluchebe' Le':

—¿Ga dxaca lazru' gucuézentu' na?

¹⁰Na' bechebe Jesusen':

—Gate chu'ule lu xezre, na' xezrágale tu benne' biu zenu'e tu dx'e'e nisa. Le chjácálene' xu'u naga xezrine', ¹¹na' le xe xrane xu'u na': "Benne' Wesede dx'e'e lue': ¿Ga zua xu'u naga gáguləna' benne' ca' dxusédea' zríla'dau' chee Laní Pascua?" ¹²Nadxa gul'éne' le'e tu xu'u zren da zua chupa cuia sibe, da bache nucá'ana chawe'. Le gucuéza da gágudxu na'.

¹³Benne' ca' xjaque', na' belezrélene' xúgute ca da ba guzre Jesús le', na' bulucueze' da xelawe' chee Laní Pascua.

¹⁴Gate bzrin zra, Jesús ne benne' ca' dxusédenə' gulezré'e ga xelawe' na.

¹⁵Nadxa gunná Jesús, dx'e'e benne' ca':

—Guzá lázrele'a gáguləna' le'e chee Laní Pascua nigá nédxudxa ca quebe ne gatia'. ¹⁶Dxapa' le'e québedxa gawa' da nigá cadxa gaca li na naga dxenná bea Dios.

¹⁷Nadxa guqué'e tu zruágadau', na' guzre' Dios: "Xcalenu'", na' gunné':

—Le xi'aj late' weaj tu tule le'e. ¹⁸Dxapa' le'e québedxa xí'aja' chee nisa uva caní cadxa xida xel-la dxenná bea chee Dios.

¹⁹Nadxa guqué'e xeta xtila, ne guzre' Dios: "Xcalenu'", na' bzúzruje' na, ne bnézruje' na benne' ca', dxenné':

—Da nigá naca na bel-la' dxen chia', da guzúa' waláz chee. Le gun da nigá chee cheajsá lázrele chia' neda'.

²⁰Cá'anqueze bene' nen zruágadau' na' ca gudé gulawe' xrche', na' gunné':

—Zruágadau' nigá zéaje' na xel-la wezría cube, da guzúa' chúchua' nen dxen chia', da gulálaja' waláz chee.

²¹'Na'a, zrua na' benne' biu na' tu zren nen na'a ga zua da dxágudxu, bénnea' gudée' neda' lu na' benne' dxeledábague' neda'. ²²Neda', Benne' Gulje' Bénneache, waxá'a lu neza da ble'e Dios neda' naga gatia', san edxugúa bénnea' gudée' neda' chee gatia'.

²³Nadxa benne' ca' dxuséde Jesús gulezú lawe' dxuluchebe ljwezre' nu na' gudé Jesús.

Dxuluchebe ljwezre' nule' gácadxe' blau

²⁴Cá'anqueze buluchebe ljwezre' nule' gácadxe' benne' blau. ²⁵Na' Jesús guzre' le':

—Benne' wenná bea chee xezr la xu ca' dxelenná bé'ene' bénneache ca xrane bénneache ca', na' benne' xíchaje chee benne' ca' dxelenné' zaj naque' benne' dxelunə' da chawe' chee benneáche ca'. ²⁶Le'e quebe dxal-la' gunle ca'. Benne' nácadxe' blau ládujla le'e dxal-la' gaque' ca benne' nácadxe' cuide', na' benne'

dxenná be'e dxal-la' gaque' ca benne' nada'u chee ljwezre' ca'.²⁷ ¿Nu nácadxa blau, benne' dxe'e dxawe', che benne' dxudé'e xel-la wagu? ¿Quebe naca bēnea' dxe'e dxawe'? Neda' zúalēna' le'e ca tu benne' dxunē' zrin chee.

²⁸ Le'e guziálequezle neda' gate neda' guz'í guzaca'.²⁹ Chee le na' dxunna' le'e lataj nna beale, ca ben Xra', benne' na neda',³⁰ chee xi'aj gágule ga naca chia' naga nna be'a neda', na' cue'le lataj blau ca' chee guch'ale chee chazrinna cue' xrtia Israel.

**Jesús dxenné' Pedro
nne' quebe núnbe'e Le'**

(Mt. 26.31-35; Mr.
14.27-31; Jn. 13.36-38)

³¹ Na' gunnáqueze Xránadxu:

—Simón, Simón, Satanás, da xriwe' ba gunaba na le'e chee seque gudé na le'e lu dul-la ca dxun tu benne' dxudxixre dxutul-le' xizre za.³² Neda' guta' xueda' Xra' gácalēne' lue' chee quebe guníteu' xel-la dxeajlí lazre chiu'. Na' lue', gate bache bexacu' dipa lazre', gúcale le sa' ljwezru' ca' chee xezezé chache'.

³³ Na' gunná Simón, guzre' Jesús:

—Xran, ba zúaqueza' sál'ēna' Lue' lizre xia, ne chee gátequeza' nen Lue'.

³⁴ Jesús guzre' le':

—Pedro, dxapa' lue', ná'atēla ne dédxela cuezre xjeaj, lue' wannáu' chunna lasa quebe núnbe'u neda'.

Ba zua gagu zra si saca Jesús

³⁵ Nadxa Jesús bchebe' benne' ca':

—Gate gusel-la' le'e quebe bíale xixruj, ne naga cu'ule dumí, ne zrélale, ¿bxázrjele bi da guchínnele?

Benne' ca' belexechebe':

—Gutu bi de.

³⁶ Nadxa guzre' benne' ca':

—Na'a, benne' nape' xixruj dxal-la' gu'e na, ne naga dxugu'e dumí. Bén-

nea' quebe nape' xia da dxuluchínene' lu wedil-la, dxal-la' xexutiē' xicha chee', na' si'e xia chee'.³⁷ Dxapa' le'e dxal-la' gaca chia' néda'queza' ca da naxúaj na lu xiche chee Dios, dxenné': "Gubabe' ca tu benne' wen da zrinna." Xúgute da naxúaj na chia' dxal-la' gaca li na.

³⁸ Nadxa benne' ca' gulenné':

—Xran, nigá de chupa xia.

Le' bechebe':

—Da naze.

**Jesús dxuchálajlene' Dios
naga nazí le na Getsemani**

(Mt. 26.36-46; Mr. 14.32-42)

³⁹ Nadxa bedxúaj Jesús xu'u na', na' ca dxúnqueze', guxiáje' lu Xi'a Xaga Olivo, na' benne' ca' dxusédene' xjácalēne' Le'.

⁴⁰ Gate belezrine' na', Jesús guzre' le':

—Le naba lau Dios chee quebe seque da xriwe' cu'u na le'e lu dul-la.

⁴¹ Nadxa Jesús guzre' ca tu legu'una xiaj naga zaj zra' benne' ca', na' bzu zribe' bchálajlene' Dios.⁴² Gunne':

—Xrae, che dxaca lazru', bcuasa neda' ca naca da dxal-la' saca', da naca na ca tu da sla' da dxal-la' xi'aja', quegá gaca na ca dxaca lazra' neda', san ca dxaca lazru' Lue'.

⁴³ Nadxa ble'e lau naga zua Jesús tu gubáz chee xabáa, na' btipe' lazre' Jesús.

⁴⁴ Gate ne dxezácale'e, du lazre' bchálajlene' Dios, na' xesa chee' guca na ca dxen dxelezrún na lu xu.

⁴⁵ Ca bexuzre bchálajlene' Dios, na' bexase', na' bezrine' naga zaj zra' benne' ca' dxusédene', na' blé'ene' dxelase benne' ca', lu xel-la dxelexewi'ine lazre' chee'.⁴⁶ Nadxa guzre' benne' ca':

—¿Dxáselale le'e na'a? Le chasa, ne le naba lau Dios chee quebe seque da xriwe' cu'u na le'e lu dul-la.

Dxeleḷe' Jesús

(Mt. 26.47-56; Mr.
14.43-50; Jn. 18.2-11)

⁴⁷ Ne dxuchálajte Jesús gate belelá' benne' zan ca'. Bénnea' le' Judas, tu benne' chazrinnu ca', ze'e zria lawe' lau benne' ca', na' gubigüe' cuita Jesús chee gunupe' Le'. ⁴⁸ Nadxa Jesús guzre' le':

—Judas, ¿dxunupu' neda', Benne' Gulje' Bénneache, chee gudéu' neda' lu na' benne' dxeledábague' neda'?

⁴⁹ Benne' ca' zrálene' Jesús, ca' belelé'ene' ca da dxaca, na' buluchebe' Jesús:

—Xran, ¿guchínentu' xia?

⁵⁰ Tu benne' ca' dxedále Jesús bene' zi' tu bi wen zrin chee bxruze blau, guchugue' nágabe' zua xabēla. ⁵¹ Jesús gunné':

—Québedxa gunle ca'. Cá'anze.

Nadxa Jesús bte' naga bi wen zrin na', na' bexune' na.

⁵² Na' guzre' benne' xíchaje ca' chee bxruze, ne benne' blau ca' chee xudau', ne benne' gula sina ca', benne' zá'aque' xeleché'e Jesús, gunné':

—¿Blale le'e nen xia, ne xaga chee quélale neda' ca dxélale tu gubán?

⁵³ Gate guzúa' neda' lu xudau' nen le'e tu zra tu zra, quebe bi benle le'e chia', san zra nigá naca na zra chee, gate dxenná bea da zua na lataj chul-la.

Pedro dxenné' quebe núnbe'e Jesús

(Mt. 26.57-58, 69-75; Mr. 14.53-54,
66-72; Jn. 18.12-18, 25-27)

⁵⁴ Nadxa gulele' Jesús, na' guleché'e Le' lizre bxruze blau, na' Pedro zíajé' nawe' Le' zítu'la. ⁵⁵ Na' gulebé'e guléxaje' xi' na', na' Pedro gudxé'e ládujla benne' ca'. ⁵⁶ Nadxa tu nu'ula wen zrin, gate blé'ene' Pedro dxé'e dxu'a xi' na', guzúe' dxenné'e le', na' gunné':

—Cá'anqueze benne' nigá guque' tuze len Jesús.

⁵⁷ Pedro gunné':

—Nu'ula, quebe núnbe'a bénnea'.

⁵⁸ Xetú chí'idau' guca, na' ble'e xetú benne' xula Pedro na', na' gunné':

—Cá'anqueze lue' nacu' tu zren benne' ca'.

Pedro gunné':

—Cabí. Quebe naca ca'.

⁵⁹ Xelate gudé na', xetú benne' ben chúchue' xrtizre', gunné':

—Da li, benne' nigá guque' tuze len Jesús, lawe' da naque' benne' Galilea.

⁶⁰ Nadxa gunná Pedro:

—Benne', quebe nezda' nu chee na' dxuchálaju'.

Dxácate na' ne dxuchálajte Pedro ca', na' gudxezre xjeaj. ⁶¹ Nadxa Xránadxu bzechaj xíchaje', gunné'e Pedro, na' Pedro xeajsá lazre' ca da guzre Xránadxu le', gunné': “Ná'atēla ne dédxela cuezre xjeaj, lue' wannáu' chunna lasa quebe núnbe'u neda'.” ⁶² Nadxa bedxúaj Pedro, na' gudxezre xáche'le'e.

Dxelún le' chee Jesús

(Mt. 26.67-68; Mr. 14.65)

⁶³ Na' benne' ca' zaj nuxre' Jesús belún le' chee', na' buluzaljé' Le'. ⁶⁴ Bulucache' lawe', na' belegape' xrague', dxel'é'e Le':

—Gunné' xa'a nu be Lue'.

⁶⁵ Da zan da gulenné', dxelenné' schanni' chee Jesús.

Jesús dxezriné' lau benne' ca' chee xu'u lawe' blau chee judío ca'

(Mt. 26.59-66; Mr.
14.55-64; Jn. 18.19-24)

⁶⁶ Gate naca te zra, na' belezraga benne' gula sina ca' chee judío ca', ne benne' xíchaje ca' chee bxruze ca', ne benne' ca' dxuluxuzájle'e da nadxixruj bea na, na' guleché'e Jesús lau benne' ca' chee xu'u lawe' blau chee judío ca'. Na' buluchebe' Le':

⁶⁷ —Gunná, ¿nacu' lue' Cristo?

Na' bechébe Jesús:

—Che xapa' le'e: Awe', quebe chéajlele, ⁶⁸na' che bi gucheba' le'e, quebe xechébele chia', ne quebe gusanle neda'. ⁶⁹Ná'atela neda', Benne' Gulje' Bénneache, cue'a chalá'a xabela chee Dios nape' dute' xel-la waca.

⁷⁰Nadxa xúgute' buluchebe' Le':

—¿Nacu' Lue' Zri'ine Dios?

Jesús bechebe':

—Naca', ca dxennáquezle le'e.

⁷¹Nadxa gulenna' benne' ca':

—¿Núzradxa chinnedxu bi nne' chee benne' nigá? Dxí'unqueze ba bédexu ca da gunnáquez'e'.

Jesús dxezrine' lau Pilato

(Mt. 27.1-2, 11-14; Mr. 15.1-5; Jn. 18.28-38)

23 Nadxa gulasa xúgute' benne' dxuluchi'e', na' guleché'e Jesús lau Pilato, benne' dxenná be'e waláz chee Roma. ²Na' gulezú lawe' dxelagu zrie' Jesús, dxelenné':

—Ble'entu' benne' nigá dxegú'u xel-le' bénneache chee xeledábague' xu'u lawe'. Dxenné' quebe dxal-la' quízrujntu' da dxuchizruj César, benne' Roma, na' cá'anqueze dxenné' naque' Cristo, Benne' Wenná Bea.

³Nadxa Pilato bchebe' Jesús:

—¿Nacu' Lue' Wenná Bea chee judío ca'?

Na' bechebe Jesús:

—Ca' naca na, ca ba gunná'u lue'.

⁴Nadxa gunná Pilato, guzre' benne' xíchaje ca' chee bxruze ca', ne bénneache ca':

—Quebe bi da zrinnaj dxezrelda' nun benne' nigá.

⁵Benne' ca' belún chúchue' dizra' chee', gulenné':

—Dxegu'u xel-le' xúgute' benne' zaj zre'e xezre ca' zaj nababa Judea chee xeledábague' xu'u lawe'. Guzú lawe' dxune' na naga nababa Galilea, na' na'a dxune' na nigá.

Jesús dxezrine' lau Herodes

⁶Gate ben Pilato da nigá, na' bchebe' che naca Jesús benne' Galilea. ⁷Gate gulé'e le' naca Jesús benne' Galilea, na' Pilato gusél-le' Le' lau Herodes, benne' dxenná be'e xezre ca' zaj nababa Galilea, na' lu zra na' zue' Jerusalén. ⁸Gate ble'e Herodes Jesús, gubéle'ene', lawe' da bātate dxaca lazre' lé'ene' Le', lawe' da ba benne' dxuluchalaj bénneache chee Jesús, na' guca lazre' lé'ene' gun Jesús tu xel-la waca da za xabáa. ⁹Da zante da bchebe' Jesús, na' Le' quebe bi bechebe'. ¹⁰Zráqueze benne' xíchaje ca' chee bxruze ca' na', nen benne' ca' dxuluxuzájle'e da nadxixruj bea na, na' belún chúchue' dizra' chee' da dxelagu zria Jesús. ¹¹Nadxa Herodes, ne benne' chee' ca' dxjaque' wedil-la buluzúe' Le' chalá'ala, na' chee xelún le' chee', bulugácu'e' Le' ladxe' bzawe ca naca zra tu benne' wenná bea. Nadxa Herodes besel-le' Le' lau Pilato. ¹²Lu zra na' Pilato, ne Herodes belexaque' tuze, lawe' da belezrá'a ljwezre' nédxute'.

Dxelechuge' chee Jesús gati'e'

(Mt. 27.15-26; Mr. 15.6-15; Jn. 18.39—19.16)

¹³Nadxa Pilato bchague' benne' xíchaje ca' chee bxruze ca', ne benne' xu'u lawe' ca', ¹⁴na' guzre' benne' ca':

—Le'e guchele benne' nigá za'le naga zua', dxennale dxegú'u xel-le' bénneache chee xeledábague' xu'u lawe'. Neda' ba bcheba' Le' laule le'e, na' quebe bi da zrinnaj dxezréleda' nune' ca naca da dxennale chee'. ¹⁵Cá'anqueze Herodes quebe bi da zrinnaj bzrélene' da nun Jesús, na' budée' Le' launtu'. Quebe bi ne gun'e chee chuga' chee' gati'e'. ¹⁶Gudéa' Le' xel-la zi', na' gusánqueza' Le'.

¹⁷Dxácate dxaca laní na', Pilato dxalla' gun'e tu da dxelezaca ba lazre' bénneache, gusan'e tu benne' xu'e lizre xia.

¹⁸ Xúgute benne' ca' gulezú lawe' dxelebezre xe'e, dxelenné':

—¡Gate benne' nigá! ¡Bsan Barrabás na'!

¹⁹ Barrabás nigá gulegúe le' lizre xia lawe' da gudábague' xu'u lawe', na' betie' tu benne'. ²⁰ Pilato guca lazre' gusane' Jesús, na' bchálajlene' benne' ca' xetú.

²¹ Na' benne' ca' gulebezre xe'e zízrajdxa, dxelenné':

—¡Bde'e xaga béguaj! ¡Bde'e xaga béguaj!

²² Da guxunne' lasa gunná Pilato:

—¿Bizra da zrinnaj nune'? Quebe bi dxezréleda' da gudé na Le' gatié'. Gudéa' Le' xel-la zi', na' te na' gusana' Le'.

²³ Na' benne' ca' belún chúchue' dizra' chee' chee' te'e xaga béguaj, ne gulebezre xá'atié', nen benne' xíchaje ca' chee' bxruze ca', cadxa guca ca da gulaca lazre'. ²⁴ Nadxa Pilato guchugue' chee' Jesús gaca chee' ca da dxelaca lazre' benne' ca'. ²⁵ Na' bsane' bènea' belenabe', xu'e lizre xia lawe' da gudábague' xu'u lawe', ne betie' tu benne', na' bdee' Jesús chee' gaca chee' ca dxelaca lazre' benne' ca'.

Dxuludé'e Jesús xaga béguaj

(Mt. 27.32-44; Mr.

15.21-32; Jn. 19.17-27)

²⁶ Gate zjaque' zaj naché'e Jesús chee' xuludé'e Le' xaga béguaj, na' gulele' tu benne' Cirene, le' Simón, zezé'e le'e xixre', na' bulugu'e le' xaga béguaj chee' Jesús, na' zéaje' cuzru Jesús na'.

²⁷ Na' xjácale' Le' benne' zante, ne nu'ula zan dxelebezre', na' dxelebezre xache' ne chee' da dxaca chee' Jesús. ²⁸ Nadxa Jesús gunné'e nu'ula ca', na' guzre' le':

—Le'e, nu'ula Jerusalén, quebe cuézrele chia' neda'. Le cuezre cheéquezle, ne chee' zr'inele, ²⁹ lawe' da zrin zra gate xelenné': “Ba neza zren naca na chee' nu'ula wizre, ne nu'ula

ca' cabata' gulezúe' zi'i, ne nu'ula ca' cabata' bulugazre' bidau'.” ³⁰ Lu zra na' xelezú lau bèneache xel'é'e xi'a ca': “Le gugacu netu' xu'.” Na' xel'é'e xí'adu ca': “Le gucache netu'.” ³¹ Che dxelune' da caní chia' neda', naca' ca tu xaga ban, ¿gázradxa xelune' chee' le'e, nácale ca xaga bizre ca'?

³² Cá'aqueze guleché'e chupa benne' wen da zrinnaj chee' xelútie' le' tu zren nen Jesús. ³³ Gate belezrine' lataj na' nazí le na, Calavera, da zéaje na, Xi'a Zrita Xíchajdxu, na' buludé'e Jesús xaga béguaj, ne cá'aqueze belune' chee' benne' wen da zrinnaj ca', tue' cuite' xabela, ne xetúe' cuite' xéglala. ³⁴ Ca dxuludé'e Le' xaga béguaj, na' gunná Jesús:

—Xrae, bnite lau chee' benne' caní lawe' da quebe zaj nézene' bi na' dxelune'.

Na' benne' dxjaque' wedil-la gulebeje' da dxunna bea' chee' xelezi'e late' weaj zra lana Jesús. ³⁵ Benne' ca' zaj zre'e na' dxelenné'e, ne benne' xu'u lawe' ca' belún le' chee', dxelenné':

—Bselé' benne' xula ca'. Na'a dxal-la' guselá cuine' che da li naque' Cristo, Bènea' Gucá'a Dios.

³⁶ Cá'aqueze benne' dxjaque' wedil-la belún le' chee', na' gulebigue' cuita Jesús, ne buluxí'aje' Le' nupe zichaj. ³⁷ Gulé'e Le':

—Che lue' nacu' Wenná Bea chee' judío ca', bselá cuinu'.

³⁸ Zua xichaj Jesús tu da naxúaj nen dizra' griego, ne dizra' latín, ne dizra' hebreo, da dxenná na:

—Wenná Bea chee' judío ca'.

³⁹ Tu benne' wen da zrinnaj, bènea' de'e xaga béguaj ben le' chee' Jesús, dxenné':

—Che Lue' nacu' Cristo, bselá cuinu', ne bselate' netu'.

⁴⁰ Na' xetú benne' wen da zrinnaj na' gudil-le' ljwezre'. Guzre' le':

—¿Quebe dxezrebu' Dios? Lue' dxezá-caquezu' ca da gulechugue' chee' Le'.⁴¹ Dxi'u dxezácadxu ca da dxál-la'queze sácadxu, lawe' da dxaca cheedxu da dxal-la' sidxu ca naca da zrinnaj da nundxu, san benne' nigá quebe bi da zrinnaj nune'.

⁴²Nadxa gunné':

—Jesús, xeajsá lazre' neda' gate su lau' nna be'u.

⁴³Na' bechebe Jesús:

—Da li dxapa' lue', ná'atela súalequezu' neda' lu lataj chawe' chee Dios.

Ca guca gate gute Jesús

(Mt. 27.45-56; Mr.

15.33-41; Jn. 19.28-30)

⁴⁴Guca ca wagubizra. Nadxa ca naca lu xezr la xu guchul-la na cadxa bzrinte na dxedá' chunna. ⁴⁵Gubizra guchul-la na, na' ladxe' ze lu xudau' bdxuaj na chúpala. ⁴⁶Nadxa gudxezre xa'a Jesús, dxenné':

—Xrae, lu na'u dxegu'a be' xu'a.

Ca gunné' ca', na' gutie'.

⁴⁷Gate benne' dxenná' bé'ene' benne' dxjaque' wedil-la blé'ene' ca da guca, na' be lá'ane' Dios, gunné':

—Da li, benne' nigá quebe bi da zrinaj bene'.

⁴⁸Xúgute benne' ca' zaj zre'e na', gate belelé'ene' ca da guca, na' besía'que' na', dxelu'e lachu'e. ⁴⁹Xúgute benne' ca' zaj núnbe'e Jesús, ne nu'ula ca' xjácálene' Jesús gate bezé'e Galilea, belexegá'ane' zítu'la dxelenné'e da caní.

Dxulucache' Jesús

(Mt. 27.57-61; Mr.

15.42-47; Jn. 19.38-42)

⁵⁰Zua tu benne' chawe' ne xrlátaje le' José, benne' xezre Arimatea chee xezre ca' zaj nababa Judea. Nababe' xu'u lawe' blau chee judío ca'. ⁵¹José nigá dxebeze' zra nna bea Dios, na' quebe

bene' tuze ca da belún benne' xu'u lawe' blau ca'. ⁵²Benne' nigá guxiáje' xea-jchálajlene' Pilato, na' gunabe' latja gucache' Jesús. ⁵³Ca bexuzre buluxulétaje' Le' xaga béguaj, na' buluxuchele' Le' tu ladxe', na' gulu'e Le' tu lu xedxu ba, da ba gudene' tu le'e xi'a xiaj, naga quebe nu ne gáchequeze. ⁵⁴Naca na zra dxulucueze' chee zra dxulupá'ane', da ba zua su lau na.

⁵⁵Nu'ula ca' xjácálene' Jesús gate bezé'e xezre ca' zaj nababa Galilea, xjaque' na', ne belelé'ene' ba na', ne belelé'e ájala zaj nagu'e Le' xedxu ba. ⁵⁶Gate belexezrine' xu'u naga zaj zre'e, na' bulucueze' da du ca' dxelalá'e zixre, ne da zaj naca na ca za dxelalá'e na zixre. Belexezi' lazre' zra dxulupá'ane' cáteze naca da gunná bea Dios.

Ca guca gate bebán Jesús

(Mt. 28.1-10; Mr. 16.1-8; Jn. 20.1-10)

24 Zra nedxu chee da gazre zra, nu'ula ca' belezrine' dxu'a ba na' dxan'ísise', zaj nu'e ca naca da ca' dxelalá zixre da bulucueze', na' xebal-la nu'ula xjácálene' le'. ²Gate belezrine' na', belelé'ene' xiaj da guduse dxu'a ba na', québedxa naduse na naga guduse na. ³Belú'e lu ba na', san quebe belexezrelne' Xránadxu Jesús na'. ⁴Na' belezrébele'e, ne quebe zaj nézene' ájala xelune', na' belelé'ene' chupa benne' zaj ze' cuité', zaj nacue' zra lane' dxácátite na. ⁵Nu'ula ca' belezú'e sudxú'ala lu xu, ne belezrébele'e. Na' benne' ca' gulé'e le':

—¿Bizr chee na' dxexilajle le'e tu benne' naca bané' lávela benne' gate? ⁶Quebe zue' nigá, lawe' da ba bebane'. Le gusá lázre' da bchálajlene' le'e gate ne zue' Galilea. ⁷Gunné': “Benne' Gulje' Bénneache dxal-la' xuludée' Le' lu na' benne' dul-la ca', na' xuludé'e Le' xaga béguaj, na' zra guxunne' zra xebane'.”

⁸Nadxa nu'ula ca' xeajlesá lazre' ca naca da gunná Jesús. ⁹Ca gude be-

siá'que' dxu'a ba na', na' belexzrine' lu xezre na', na' buluchálajlene' benne' chinéaj gubáz ca' chee Jesús, ne xúgute benne' ca' xezica, ca naca da guca na'.¹⁰ Nu'ula ca' xjaque' xeajlezene' gubáz ca', zaj naque' María Magdalena, ne Juana, ne María xrna Jacobo, ne xebal-la nu'ula ca'.¹¹ Benne' gubáz ca' guléquene' da xálaze dxelenná nu'ula caní, na' quebe guléajle'e chee'.

¹² Nadxa bdxuaj Pedro, zeaj chégüe' dxu'a ba na', na' gate gun'é'e lu ba na', blé'ene' ladxe' da bedxela Jesús xu'u na chálá'ala, na' bezé'e zexíaje' xu'u naga guzé'e, dxexebánene' ca naca da guca.

Da guca lu neza da zeaj xezre Emaús

(Mr. 16.12-13)

¹³ Lu zra ná'queze, zjaca chupa benne' ca' busede Jesús xezre Emaús, da naca na láte'ze zitu' naga zua Jerusalén.

¹⁴ Zjaque' dxuluchálaje' ca naca da guca lu zra ca'.¹⁵ Dxácaté na' dxuluchálaje' caní, na' Jesús ná'queze gubigue' cuita benne' ca', na' guzú lawe' zéajlene' le'.

¹⁶ Quebe belexúnbe'e Jesús, lawe' da guzúa tu da guxúa na xiaj lau benne' ca'.

¹⁷ Nadxa bchebe Jesús benne' ca':

—¿Bizra da na' dxuchálajle ljawézrele dxácaté xu'ule neza? ¿Bizr chee na' zale dxewí'ine lázrele?

¹⁸ Tu benne' ca' le' Cleofas bechebe':

—Xúgute benne' zaj nézene' ca da guca xezre Jerusalén lu zra caní. ¿Nactu' lue' benne' zitu' zu' Jerusalén, na' tuze lue' quebe nézenu' ca da guca na'?

¹⁹ Nadxa Le' guzre' benne' ca':

—¿Bizra guca na'?

Gulé'e Le':

—Da guca chee Jesús, benne' Nazaret. Guque' tu benne' bchálaje' waláz chee Dios, na' xel-la waca zren ca' bene', ne bchálaje' dizra' lau Dios, ne lau xúgute bénneache.²⁰ Na' benne' xícha-je' ca' chee bxruze ca', ne benne' xu'u lawe' cheentu' ca' buludé'e Le' chee

gulechugue' chee' gatie', na' buludé'e Le' xaga béguaj.²¹ Netu' guleza lázrentu' Le' naque' Benne' dxal-la' guselé' xezr la xu Israel. Na'a, ba zeaj chunna zra guca da ca'.²² Bal-la nu'ula ca' ládujla netu' buluzúaqueze' netu' lu da stébe, lawe' da xjaque' dxanfí'sise' dxu'a ba chee' na',²³ na' gate quebe belexzrele' Le', na' belexel'é'e naga zúantu', ne gulenné' belelé'ene' chupa gubáz chee xabáa ca' bululé'e lawe' nu'ula ca', na' gulé'e le' nabán Jesús.²⁴ Nadxa bal-la benne' ljawézrentu' ca' xjaque' dxu'a ba na', na' belelé'ene' cáteze na' gulenná nu'ula ca', san quebe belelé'ene' Jesús.

²⁵ Nadxa gunná Jesús:

—Le'e quebe dxéajni'ile, na' ne naca zide' lázrdaule chee quebe chéajlele xúgute da gulenná benne' ca' buluchálaje' waláz chee Dios.²⁶ ¿Quebe dxal-la' saca Cristo da caní néxdudxa ca xegá'ane' szren?

²⁷ Nadxa guzú lawe' dxuzéajni'ine' benne' ca' ca naca xúgute da naxúaj lu xiche chee Dios naga dxuchalaj na chee Le'. Guzú lawe' lu xiche ca' chee Moisés, na' ne zéajdxaqueze na lu xiche ca' chee benne' ca' buluchálaje' waláz chee Dios.

²⁸ Gate belezrine' lu xezre naga zjaque', Jesús bene' ca benne' zeajteze' xu'e neza.²⁹ Na' benne' ca' buluxucá'ane' Le' xadía, dxelenné':

—Begá'analé netu', lawe' da ba zeaj dx-ezré', ne ba dxé' xrínnequeze na'a.

Nadxa Jesús guxú'ulene' benne' ca'.³⁰ Gate na' dxé'lene' le' dxelawe', guqué'e xeta xtila, ne bzúzruje' na, na' guzre' Dios "Xcalenu'", ne bnéruje' na benne' ca'.

³¹ La' ná'queze becuasa ca naca da guxúa na xiaj lau benne' ca', na' belexúnbe'e Jesús, san la' ná'queze benite Le' lau benne' ca'.³² Na' gulé ljawezre':

—¿Quebe guzúa xel-la dxebé lu lázrdaudxu gate ze'e dxuchálajlene' dxi'u tu neza, ne bzéajni'ine' dxi'u ca naca da naxúaj lu xiche chee Dios?

³³Nadxa, ne québedxa gulezrenē', belexegu'e neza, zeajxaque' Jerusalén, naga belelé'ene' zaj nazraga benne' chinéaj gubáz ca', ne benne' ljwezre' ca'. ³⁴Benne' ca' zaj nazrague' na' gulé'e benne' chupa ca':

—Da li bebán Xránadxu, na' Simón ba blé'ene' Le'.

³⁵Nadxa benne' chupa ca' buluzenne' le' ca naca da guca la neza, ne ca belexúnbe'e Jesús gate bzúzruje' xeta xtila na'.

**Jesús dxul'é lawe'
benne' ca' xjácálene' Le'**

(Mt. 28.16-20; Mr.

16.14-18; Jn. 20.19-23)

³⁶Ne dxuluchálajte' caní gate ble'e lau Jesús gachaj lawe' benne' ca', na' bgape' le' diuzre, dxenné':

—Xela dxebeza zri lazre' súale na le'e.

³⁷Na' benne' ca' belexruse', ne belezré-bele'e. Guléquene' dxelelé'ene' bxinne dxela. ³⁸Na' Jesús guzre' benne' ca':

—¿Bizr chee na' dxezrébele? ¿Bizr chee na' dxaca chupa lázrele? ³⁹Le na' na'a caní, ne le na' ni'a. Néda'queza' na'. Le gutá neda', ne le guxúe xque neda'. Tu bxinne dxela quebe napa na belá' zrita, ca dxelé'ele le'e napa' neda'.

⁴⁰Ca dxe'e benne' ca' da nigá, na' blé'ene' le' ne'e, ne ni'e. ⁴¹Benne' ca' québequeze dxeléajle'e chee' lawe' da dx-elebéle'ene', ne dxelexebánele'ene', na' guzre Jesús le':

—¿De late' da gawa' nigá?

⁴²Nadxa bulunézruje' Le' late' belá' guzrúa xi', ne late' da zixre che bézudau',

⁴³na' gucá'a Jesús da ca', ne gudawe' na lau benne' ca'. ⁴⁴Nadxa guzre' benne' ca':

—Da ba guca chia' naca na ca da gucha' le'e gate ne zúalequeza' le'e, gunéa' dxal-la' gaca li ca naca xúgute da naxúaj lu da bdxixruj be'e Moisés, ne lu xiche naga zaj naxúaj salmo ca', ne lu xiche ca' chee benne' ca' buluchálaje' waláz chee Dios.

⁴⁵Nadxa bzéajni'ine' benne' ca' ca da naxúaj lu xiche chee Dios, ⁴⁶na' guzre' benne' ca':

—Caní naxúaj na dxal-la' gate Cristo, na' zra guxunne' zra dxal-la' xebane' lá-dujla benne' gate ca', ⁴⁷na' lu La Le' dxal-la' xuluchalaj bénneache lau xúgute xezr la xu ca'. Su lau gunle na lu xezre Jerusalén, xele bénneache dxal-la' xelexebí'i lazre' chee gunite lau Dios dul-la zaj nabaga benne' ca'. ⁴⁸Le'e nácale benne' xelexechebe' da caní. ⁴⁹¡Le nna'xque! Neda' sel-la' chee ca da guchebe lazre' Xra'. Le xegá'ana nigá lu xezre Jerusalén, cadxa si'le xel-la waca da za xabáa.

Jesús dxexegüéne' xabáa

(Mr. 16.19-20)

⁵⁰Nadxa Jesús beche'e benne' ca', belexedxúaje' Jerusalén, xeajxaque' xezre Betania, na' guchisa na' Jesús, ne gunabe' gaca chawe' chee benne' ca'. ⁵¹Ne dxúnte'e ca', na' bezé'e naga zaj zra' benne' ca', begüéne' zexíaje' xabáa. ⁵²Ca bexuzre belúe lá'ane' Le', besiá'que' zeajxaque' Jerusalén lu dute xel-la dxelebé, ⁵³na' gulezráqueze' chale'aj xudau' dxelúe lá'ane' Dios. Ca' naca na.

**DIZRA' CHAWE' CA NACA
CHEE JESUCRISTO DA
BZUAJ SAN JUAN**

**Bénnea' le' Xrtizra' Dios
dxaque' bénneache**

1 Gate guzú lau zua xúgute da de, ba zúaqueze Bénnea' le' Xrtizra' Dios, da zéaje na Benne' naque' dute da nácaqueze Dios, na' Bénnea' le' Xrtizra' Dios zúalene' Dios, ne nácaqueze' Dios.

²Nédxudaute Benne' nigá zúalene' Dios.

³Lu na' Benne' nigá ben Dios xúgute da de. Quebe bi de da quebe nun Le'.

⁴Nácaqueze Le' xel-la' nabán, na' xel-la' nabán nigá naca na da dxusení na lu xichaj lázrdau bénneache chee xelaca bané'. ⁵Xel-la' naxaní' nigá dxusení na lu da chul-la chee dul-la da zaj nabaga bénneache, na' da chul-la nigá quebe dxezeque na xusula na xel-la' naxaní' nigá.

⁶Guzúa tu benne' le' Juan, gusel-la Dios bennea'. ⁷Benne' nigá ble'e chee bchálaje' ca naca chee Bénnea' naque' xel-la' naxaní' nigá, chee xeléajle xúgute bénneache chee Bénnea' ne chee da dxenné'. ⁸Juan nigá quebe naque' xel-la' naxaní' na'. Ble'e chee bchálaje' ca naca chee Bénnea' naque' xel-la' naxaní' nigá. ⁹Xel-la' naxaní' li, da dxusení na lu xichaj lázrdau xúgute bénneache ba za' la' na lu xezr la xu nigá.

¹⁰Bénnea' naque' Xrtizra' Dios zue' lu xezr la xu nigá, na' lácala ben Dios xezr la xu lu na' Bénnea', bénneache zaj zre'e lu xezr la xu quebe belexexúnbe'e Le'. ¹¹Ble'e naga zua da naca chee', na' benne' lazri'e' ca' quebe gulezí' lu ne'e Le'. ¹²Benne' ca' gulezí' lu ne'e Le', ne guléajle'e chee', be'e benne' caní lataj xelaque' bi ca' chee Dios. ¹³Benne' caní québedxa zaj naque' ca zri'ine' bénneacheze, bi ca' dxelálajbe' ne chee bénneache, u ne chee

da dxezá lazre' tu benne'. Benne' caní zaj naque' bi ca' chee Dios ná'queze.

¹⁴Bénnea' naque' Xrtizra' Dios gúla-je' ca tu bénneache, na' guzúe' ládujla dxi'u, zaj zúale xel-la' zri'i lazre', ne da li Le'. Blé'entu' ca naca xel-la' szren chee', tu xel-la' szren da nunezruj Xradxu Dios chee Zrí'ine' tu licha'. ¹⁵Juan bchálaje' ca naca chee Bénnea', gunné':

—Benne' nigá naque' Bénnea' bchálaja' neda' chee' gate gunnéa' Bénnea' ze'e te chia' neda' naque' szrendxa ca neda' lawe' da zúaqueze' nédxute' ca neda'.

¹⁶Xúgute dxu ba guzidxu xel-la' zri'i lazre' chee' da dxúnnaqueze Le'. ¹⁷Bla' da nadxixruj bea Dios ládujla dxi'u lu na' Moisés, na' xel-la' zri'i lazre', ne da li belelá' na lu na' Jesucristo. ¹⁸Netú benne' quebe ne lé'ene' Dios. Zrí'ine' tu licha', bi nazrí'ite lazre', benne' nigá guque' tuz ca nácaqueze Xre'.

**Juan, benne' bchue' bénneache
nisa, dxexechebe' chee Jesús**

(Mt. 3.11-12; Mr. 1.7-8; Lc. 3.15-17)

¹⁹Benne' xíchaje' ca' chee judío ca', benne' zaj zre'e Jerusalén, gulesel-le' bxruze ca', ne xrtia Leví, benne' ca' dxelune' zrin chee xudau', na' belezrine' lau Juan chee xuluchebe xánnie' le' nu naque'. ²⁰Bechebe Juan du lazre', gunné':

—Quebe naca' neda' Cristo. (Dizra' nigá zéaje na Benne' guchebe lazre' Dios sel-le'.)

²¹Nadxa buluchebe' le':

—¿Nuzra nacu'? ¿Nacu' Elías, bénnea' bchálaje' waláz chee Dios?

Bechebe Juan:

—Cabí.

Na' buluchébequeze' le':

—¿Nacu' bénnea' dxal-la' le'e, ne guchalaje' waláz chee Dios, ca da gunná Moisés dxal-la' gaca na?

Le' bechebe':

—Cabí.

²² Nadxa buluchébedxaqueze' le':

—¿Nuzra nacu'? Dxun na ba xen gata' bi xechébentu' chee benne' gulesel-le' netu'. ¿Bi dxennáquezu' nu nacu'?

²³ Juan bechebe':

—Neda' naca' bènea' naxúaj na ca naca chee' lu xiche chee Dios, da dxenná: Wen chi'i tu benne' dxebezre xe'e le'e xixre' lawe' lataj, dxenné': "Le salaj tu neza li naga te Xránadxu." Naquen cáteze gunná Isaías, bènea' bchalaje' waláz chee Dios.

²⁴ Benne' xudau' fariseo ca' gulesel-le' benne' caní chee cheajlechálajlene' Juan.

²⁵ Le' buluchebe' le':

—Che lue' quebe nacu' Cristo, ne Elías, ne bènea' dxal-la' xedajchalaje' waláz chee Dios, ¿bi xel-la' dxenná bea napu' dxuchú' bèneache nisa?

²⁶ Juan guzre' benne' ca':

—Neda' dxuchúa' bèneache nisa lu nísaze. Zua tu benne' ládujla le'e quebe nézele ca szren naque'. ²⁷ Benne' nigá ze'e ca te chia' neda', na' zúaqueze' nédxudxa ca neda'. Quebe zaca' neda' cuéaja' zrelé' da xu'u ni'e.

²⁸ Xúgute' da caní guca na lu xezr la xu chee xezre Betábara, da zua na chalá'a xegu Jordán naga dxalaj gubizra, naga zua Juan dxuchúe' bèneache nisa.

Jesús naque' Zríla'dau' chee Dios, be dxelutié' lau Dios ne chee xtul-le'

²⁹ Zra xula ble'e Juan dxezrín Jesús naga zue', na' gunné':

—¡Le nna'xque! Benne' nigá naque' Zríla'dau' chee Dios, cue' dul-la zaj nabaga bèneache. ³⁰ Neda' bchálaja' ca naca chee' gate gunnéa': Te chia' neda' za tu benne' naque' szrendxa ca neda' lawe' da zúaqueze' nédxudauté ca neda'. ³¹ Néda'queza' quebe gunezda' nu naque'. Bla'a dxuchúa' bèneache nisa chee xeleneze xezre Israel nu Benne' naca Le'.

³² Cá'anqueze gunná Juan:

—Neda' ble'eda' Be' Lá'azxa bétaje' xabáa ca tu bgugu chíchedau', ne begá'analene' Benne' nigá. ³³ Neda' quebe ne nezda' nu naque'. Dios na' nasel-le' neda' chee guchúa' bèneache nisa, Le' guzre' neda': "Gate le'enu' Be' Lá'azxa xétaje' xegá'analene' tu benne', Benne' nigá gune' da zéaje xel-la' dxedxúa nisa, guzúe' Be' Lá'azxa lu xichaj lázrdaule." ³⁴ Na'a ba ble'eda' guca da nigá, ne dxexechéba' nácaqueze Benne' nigá Zrí'ine Dios.

Benne' nedxu ca' dxusede Jesús

³⁵ Zra xula zúaqueze na' Juan nen chupa benne' ca' dxusedene'. ³⁶ Gate blé'ene' dxedé na' Jesús, na' gunná Juan:

—¡Le nna'xque! ¡Benne' nigá naque' Zríla'dau' chee Dios, bia gáteba' ne chee dul-la nabágadxu!

³⁷ Dxúpaté benne' ca' dxusede Juan belenne' ca da gunné', na' xjácálene' Jesús. ³⁸ Nadxa bexechaj Jesús, gunné'e cúzrule', ne blé'ene' benne' ca' zá'aque' cúzrule', na' guzre' le':

—¿Bi dxexílajle?

Benne' caní gulé'e Jesús:

—Benne' Wesede, ¿gazra zu'?

³⁹ Jesús bechebe':

—Le da nna'le.

Nadxa xjácálene' Jesús, ne belelé'ene' naga zue', na' belexegá'analene' Le' zra na' lawe' da bache zeaj du dxedá' tapa.

⁴⁰ Tu benne' chupa ca', benne' belenne' ca da gunná Juan, ne xjácálene' Jesús, naque' Andrés, benne' biche Simón Pedro. ⁴¹ Andrés nigá la guxíajte' xejdíla-je' bi biche' Simón, na' guzre' le':

—Ba bezréntu' Mesías. (Dizra' nigá zéaje na Cristo, Bènea' guchebe lazre' Dios sel-le'.)

⁴² Nadxa Andrés guché'e Simón naga zua Jesús, na' gate ble'e Jesús Simón na', na' guzre' le':

—Lue' nacu' Simón, zri'ine Jonás. Si' lau' Cefas. (Dizra' hebreo nigá zéaje na: Pedro, da zeaje na: Xiaj.)

Jesús dxenné' Felipe ne Natanael

⁴³Zra xula guca lazre' Jesús chéaje' naga nababa Galilea, na' bezrague' Felipe, ne guzre' le':

—Ben neda' tuze.

⁴⁴Felipe nigá naque' benne' xezre Bet-saida, da naca na lazre Andrés, ne Pedro.

⁴⁵Felipe guxíaje' xeajdílaje' Natanael, na' guzre' le':

—Ba bezrélentu' Bénnea' bzuaj Moisés chee' lu xiche naga zaj naxúaj da nadx-ixruj bea na, ne cá'anqueze chee' Benne' nigá buluzúaj benne' ca' buluchálaje' waláz chee' Dios. Benne' nigá naque' Jesús, zri'ine José, tu benne' xezre Nazaret.

⁴⁶Na' gunná Natanael:

—¿Waca dxuaj tu da chawe' Nazaret?

Felipe bechebe':

—Gudá le'enu'.

⁴⁷Gate ble'e Jesús za Natanael naga zue', gunné':

—Nigá za' tu benne' naca xánnie' benne' Israel, benne' dxennéqueze' da dxéquene'.

⁴⁸Nadxa Natanael bchebe' Jesús:

—¿Ájazra naca núnbe'u neda'?

Jesús guzre' le':

—Ble'eda' lue' nédxudxa gate za nne Felipe lue', gate ze'u zran xaga higo.

⁴⁹Nadxa Natanael guzre' Jesús:

—Benne' Wesede, Lue' nacu' Zri'ine Dios. Lue' nacu' Wenná Bea cheentu', benne' Israel.

⁵⁰Bechebe Jesús:

—¿Dxéajle'u chia' lawe' da gucha' lue' ble'eda' lue' zran xaga higo? Walé'enu' da zaj naca na da szrendxa ca da nigá.

⁵¹Da li dxapa' le'e, walé'equezle le'e nax-alaj xabáa, na' gubáz chee' xabáa ca' chee' Dios dxelétaje', ne dxelexegüene' naga zua neda', Benne' Gulje' Bénneache.

Dxaca laní chee wechaga na' lu xezre Caná

2 Zra guxunne zra, na' guca laní chee wechaga na' lu xezre Caná da nababa Galilea. Xrna Jesús zue' na', ²na' zua nu gunné Jesús, ne benne' ca' dxusédene' lu laní na'. ³Bebizre xrise uva wal-la, na' xrna Jesús guzre' Le':

—Québedxa bi de xrise uva wal-la xel'éaje'.

⁴Jesús bechebe':

—Nú'uladau', ¿bizr chee' na' dxu'u neda' caní? Quebe ne zrin zra gul'ée lau da naca'.

⁵Xrne'e guzre' benne' wen zrin ca':

—Le gun ca naca da xe'e le'e.

⁶Zaj nnita xrupa xesu' xiaj na', da dx-uluchine judío ca' gate dxelibe ni'a ne'e ca naca da zjácálene'. Tu tu xesu' xiaj ca' dxeluzru na chupa u chunna dx'e'e nisa.

⁷Jesús guzre' benne' wen zrin ca':

—Le gusezrá nisa xesu' xiaj caní.

Gulegué'e nisa na, ne bulusuzrate' tu tu xesu' xiaj ca'. ⁸Nadxa Jesús guzre' benne' ca':

—Le ca'a na, na'a, ne le gua na lau benne' ze' dxu'a ga dxelawe'.

Ca'an belune'. ⁹Bénnea' zue' dxu'a ga dxelawe' bxue' nisa na' da bexaca na xrise uva wal-la, ne quebe nézene' ga za na. Benne' wen zrin ca' zaj nézene' ga za na lawe' da gulegué'e nisa na'. Nadxa bénnea' zue' dxu'a ga dxelawe' gunné' benne' wechaga na', ¹⁰na' guzre' le':

—Xúgute' benne' dxelebéaje' nedxu xrise uva wal-la nácadxa chawe', na' gate ba gul'éajle'e benne' ca' zaj zre'e laní, nadxa dxelebéaje' xrise uva wal-la quebe zúateca chawe'. Lue' bcuézaquezu' xrise uva wal-la chawe' na', ne guléaju' na na'a.

¹¹Da nigá da ben Jesús lu xezre Caná da nababa Galilea naca na tu xel-la' waca zrente da bene' nedxu, da ble'e na xel-

la' szren chee', na' benne' ca' dxusédene' guléajle'e chee'.

¹² Gudé na' Jesús bezé'e zexíaje' xezre Capernaum, zéajle xrne'e Le' nen benne' biche' ca', ne benne' ca' dxusédene'. Na' gulezúe' na' zane' zra.

**Jesús dxucá'ana
chawe' chale'aj xudau'**

(Mt. 21.12-13; Mr.
11.15-18; Lc. 19.45-46)

¹³ Na' Jesús guxíaje' xezre Jerusalén lawe' da ba za Laní Pascua gate benne' judío ca' dxulusá lazre' ca ben Dios, bebéaje' xra xrtawe' ca' lu xezr la xu Egipto.

¹⁴ Lu xezre Jerusalén blé'ene' lu chale'aj xudau' na' zaj zra' benne' dxelexutie' bezre ca', ne zrila' ca', ne bgúgudu ca', béadu ca' dxelutie' lau Dios. Cá'anqueze blé'ene' na' benne' dxuluxuché'e dumí chee' xezr zitu' ca'. ¹⁵ Gate ble'e Jesús da caní, na' bgu'e du ca' da güe'e benne' ca', na' bebéaje' ca' naca benne' ca' tu zrente nen bezre chee' ca', ne zrila' chee' ca'. Na' gudxú'üne' lu xula dumí chee' benne' ca' dxuluxuché'e dumí, ne bdxixre' blaga' ca' chee' benne' ca'. ¹⁶ Na' guzre' benne' ca' dxelexutie' bgúgudu ca':

—¡Le xebéaj da caní! Quebe gunle lizre Xra' ca' tu lawe' xi'a.

¹⁷ Nadxa benne' ca' dxuséde Jesús xea-jlesá lazre' da naxúaj na lu xiche chee' Dios, da dxenná na: Dxácaté zi' lázrdawa' lawe' da dxé'le'a gunne xue chee' lizru'.

¹⁸ Nadxa judío blau ca' buluchebe' Jesús:

—¿Bí xel-la' waca da za xabáa gulé'enu' netu' da gulé'e na napu' xel-la' dxenná bea dxunu' da caní?

¹⁹ Bechebe Jesús:

—Le guzríá xi' xudau' nigá, na' neda', te chunna zra xechisa' na.

²⁰ Nadxa judío ca' gulé'e Le':

—Xrupe xun iza ba zeaj dxelune' xudau' nigá, na' Lue', ¿xechisu' na chunna zraze?

²¹ Bchalaj Jesús chee' xudau' na' da naca na bel-la' dxen chee'. ²² Chee' le' na', gate bebán Jesús ládujla benne' gate, na' benne' ca' bsédene' xea-jlesá lazre' ca' da gunné', na' guléajle'e chee' da naxúaj na lu xiche chee' Dios ca' naca chee' Jesús, ne chee' da guzre Jesús le'.

Jesús núnbe'e xúgute bénneache

²³ Gate zua Jesús xezre Jerusalén lu Laní Pascua chee' judío ca', na' benne' zan guléajle'e chee' gate belelé'ene' ca' naca xel-la' waca zren ca' da dxune'. ²⁴ Jesús quebe bde cuine' lu na' benne' ca' lawe' da nézquezne' quegá xúgute benne' ca' dxeléajle'e chee'. ²⁵ Quebe guchínene' nu benne' xe'e Le' ca' zaj naca bénneache lawe' da nézquezne' ca' da zaj xu'u xichaj lázxdau bénneache.

Jesús dxuchálajle' Nicodemo

3 Zua tu benne' xudau' fariseo le' Nicodemo. Naque' benne' blau lówela benne' judío ca'. ² Benne' nigá guxíaje' xea-jnné' Jesús chizrela, na' guzre' Le':

—Benne' Weséde, nézentu' Dios nasel-le' Lue' chee' gusédenu' netu' lawe' da quebe nu benne' gaca guné' ca' zaj naca xel-la' waca zrente da dxunu' Lue' che quebe zúale Dios le'.

³ Nadxa Jesús guzre' le':

—Da li dxapa' lue', nu benne' quebe gálaje' xecha lasa quebe gaca gaque' tuze benne' ca' dxenná be'e Dios.

⁴ Nicodemo bchebe' Jesús:

—¿Ájazra gaca xexalaj tu benne' ba naque' gula? ¿Waca xexu'e le'e xrne'e chee' gálaje' xetú?

⁵ Jesús bechebe':

—Da li dxapa' lue', nu benne' quebe gálaje' ne chee' nisa chee' xrtizra' Dios, ne ne chee' Be' Lá'azxa, quebe gaca chu'e naga dxenná bea Dios. ⁶ Benne' nálaje' lu ni'a lu na' bénneache, naque' bénneacheze. Nu benne' nálaje' ne chee'

Be' Lá'azxa, naca ban b́ennea' ne chee Be' Lá'azxa. ⁷Quebe xeb́anenu' lawe' da dxapa' lue', dxun na ba xen ǵalaju' xecha lasa. ⁸Gáteteze dxaca be'. Dxennu' ca schaga da dxun na, na' quebe nézenu' gala za na, ne gala zeaj na. Cá'anqueze naca chee benne' zaj nálaje' ne chee Be' Lá'azxa. Gaca le'enu' da ba nun Be' na' lu xichaj lázxdau b́ennea', na' quebe dx-elé'entu' ájala dxun Be' na'.

⁹Nadxa Nicodemo b́chebe' Jesús:

—¿Ájazra gaca da caní?

¹⁰Bechebe Jesús:

—Lue' nacu' tu benne' weséde blau ládujla benne' Israel ca', na' ¿quebe nézenu' da caní? ¹¹Da li dxapa' lue', netu' dxuchálajntu' ca naca da nézentu', ne dxexechébentu' ca da blé'entu', na' le'e quebe dxéajlele da dxentu' le'e. ¹²Che quebe dxéajlele chia' gate dxuchálajlenu' le'e ca naca chee da dxaca lu xezr la xu nigá, ¿ájazra gaca chéajlele chia' che guchálajlenu' le'e chee da dxaca xabáa?

¹³Quebe ne cuen tu benne' xabáa chee lé'ene' ca dxaca na'. Tuze B́ennea' b́etaje' xabáa, B́ennea' naca' neda', Benne' Gulje' B́enneache, naca' B́ennea' zúaqueze' xabáa. ¹⁴Ca ben Moisés, bde'e tu b́ela' xia le'e xaga naga zua le'e xixre' lawe' lataj, cá'anqueze neda', Benne' Gulje' B́enneache, wuludá'queze' neda' tu le'e xaga, ¹⁵chee quebe xeleb́a xi' nu benne' xeléajle'e chia'. Zrué'e b́ennea' xel-la' nabán da zeajlí canna.

Dios dxezrí'i lazre' b́enneache

¹⁶Dios dxezrí'i lázrele'ene' b́enneache, na' chee le' na' bde'e' Zrí'ine' tu licha' chee quebe xeleb́a xi' nu benne' dxeléajle'e chee'. Zrué'e b́ennea' xel-la' nabán da zeajlí canna. ¹⁷Dios gusél-le' Zrí'ine' lu xezr la xu nigá, quegá chee guzrí'a xi'e b́enneache, san chee guselé' b́enneache.

¹⁸B́ennea' dxéajle'e chee Zrí'ine Dios quebe naca chee' cuía xi'e, san nu benne' quebe dxéajle'e chee' ba naca chee' cuía

xi'e lawe' da quebe dxéajle'e chee Zrí'ine Dios, bi tu licha' chee'. ¹⁹Benne' ca' quebe dxeléajle'e chee' ba zaj naca chee' cuía xi'e lawe' da gate bla' xel-la' naxaní' lu xezr la xu nigá, beledánedxene' da chul-la ca xel-la' naxaní', lawe' da dxelune' da calela. ²⁰Xúgute' benne' dx-elune' da calela dxelecuídene' xel-la' naxaní', ne quebe dxelebigue' lu xel-la' naxaní', chee quebe gaca bea da calela da dxelune'. ²¹Benne' ca' dxelune' ca naca da li dxelebigue' lu xel-la' naxaní' chee gaca bea naca na chee Dios da dxelune'.

Da gunná Juan, b́ennea' b́chue' b́enneache nisa

²²Gudé na' guxíaj Jesús naga nababa Judea nen benne' ca' dxusédene', na' guzúe' na' zane' zra nen benne' ca', dx-uluchúe' b́enneache nisa. ²³Cá'anqueze zua Juan lu xezr la xu chee xezre Enón da zua gáguze naga dxe' xezre Salím, dx-uchúe' b́enneache nisa lataj na' lawe' da déle'e na' nisa zila, na' belezrín benne' zan naga zua Juan, na' beledxúe' nisa. ²⁴Da nigá guca na nédxudxa gate quebe ne xelegúe' Juan lizre xia.

²⁵Nadxa bal-la benne' zaj de'e Juan gulezú lawe' dxulutil-le' judío ca' dizra' ca naca chee da dxucá'ana chawe na b́enneache lau Dios. ²⁶Nadxa xeajleguezre' Juan:

—Benne' weséde, b́ennea' ble'e naga zu' chalá'a xegu Jordán naga dxalaj gu-bizra, b́ennea' b́chálajlenu' netu' chee', na'a dxuchúe' b́enneache nisa, na' xúgute' b́enneache zjácálene' Le'.

²⁷Nadxa Juan guzre' benne' ca':

—Quegá nu benne' gaca bi gape' che quebe gunezruj Dios na chee'. ²⁸Le'e b́enquezele gunnía' neda' quebe ná-caqueza' neda' Cristo, B́ennea' guchebe lazre' Dios sel-le'. Naca' tu benne' nasella Dios chee quia lawa' lau Le'. ²⁹Lu laní chee wechaga na', b́ennea' si'e nu'ula wechaga na' naque' benne' wechaga

na', na' benne' ljwezre benne' wechaga na', bénnea' zué' na', ne dxenne' chee', dxebéle'ene' gate dxenne' da dxuchalaj benne' wechaga na'. Cá'anqueze neda' dxebéle'eda' lawe' da caní naca' ljwezre Cristo. ³⁰Le' dxal-la' gácadxe' szren, na' neda' dxal-la' gácadxa' cá'aze.

Ca naca chee Bénnea' za' xabáa

³¹Na' gunná Juan:

—Bénnea' za' xabáa nácadxé' blau ca xúgute bénneache. Benne' naque' chee xezr la xu nigá naque' bénneacheze, ne dxuchálajé' ca naca chee da dxaca lu xezr la xu nigáze. Bénnea' ze'e xabáa nácadxé' szren ca xúgute bénneache. ³²Le' dxuchálajé' ca naca chee da ba blé'ene', ne da ba benne' xabaala, na' quebe dxéajlé' nu benne' chee da dxenné'. ³³Che nu benne' dxéajlé'e chee', benne' nigá dxulé'ene' naca li ca da dxenná Dios. ³⁴Bénnea' nase-la Dios dxuchálajé' xrtizra' Dios lawe' da dxunna Dios Le' Be' Lá'azxa chee' duté ca naque'. ³⁵Xradxu Dios nazrí'ine' Zrí'inequeze', ne ba bdee' lu ne'e xúgute da de. ³⁶Nu benne' dxéajlé'e chee' Zrí'ine Dios nape' xel-la' nabán da zeajlí canna, na' benne' quebe dxuzúe' dizra' chee' Zrí'ine Dios quebe gape' xel-la' nabán caní. Wadéé' lu da ba xa' da gun Dios.

Dxuchálajlé Jesús tu nu'ula chee tu xezre nababa na Samaria

4 Benne' fariseo ca' belenne' zjácale benne' zandxa Jesús ca benne' zjácalene' Juan, na' dxuchúa Jesús benne' zandxa nisa ca benne' dxuchúa Juan nisa. ²Quebe dxuchúaqueze Jesús benneache nisa. Benne' ca' dxusédené' dxuluchúe' bénneache nisa. ³Gate guque be'e Jesús da nigá, na' bezé'e naga nababa Judea, xexíajé' naga nababa Galilea.

⁴Ca xu'u Jesús neza, ben na ba xen téé' naga nababa Samaria. ⁵Ca'an guca,

bzrine' tu xezre naga nababa Samaria nazí le na Sicar, da dxe' gáguze naga zua xezr la xu na' bnezruj Jacob chee' zrí'ine', bi lebe' José. ⁶Lu xezr la xu na' gudén Jacob, zre sua Abraham, tu beaj situj. Ba dxeajxreque Jesús xu'e neza, na' gudxé'e dxu'a beaj na'. Naca na zran wagubizra. ⁷⁻⁸Benne' ca' dxusede Jesús xjaque' lu xezre Sicar, xeajlegá'awe' da xelawe'. Dxácaté na' bzrin tu nu'ula Samaria dxu'a beaj na' zeajxri'e nisa, na' Jesús guzre' le':

—Benna nisa xí'aja'.

⁹Nadxa nu'ula na' bechebe':

—¿Ájazra naca, lue', benne' judío, dxenabu' neda' nisa, naca' nu'ula Samaria?

Caní gunné' lawe' da quebe zaj zra' chawe' benne' judío ca' nen benne' Samaria ca'. ¹⁰Nadxa bechebe Jesús:

—Chela nézenu' da dxunna Dios, ne nua' dxenabe' lue' nisa xí'aje', lue' nábenu' neda', na' neda' gunna' lue' nisa da gunna na lue' xel-la' nabán.

¹¹Na' nu'ula na' guzre' Le':

—Benne', quebe bi nuxru' cuéaju' nisa, na' beaj nigá nácale'e na situj. ¿Ájazra na' gunu' gunnu' neda' nisa chee' xel-la' nabán? ¹²Xra xrtáuntu', Jacob, benne' netu' beaj nigá, naga güé'equenze le' nisa, ne naga gulé'ajqueze zrí'ine', ne be xixre' chee'. ¿Nácadxu' szrendxa ca le'?

¹³Jesús bechebe':

—Xúgute benne' dxel'é'aje' nisa chee' beaj nigá welexebilequezne' nisa. ¹⁴Nu benne' xí'aje' nisa da guné'zruja' neda', québedxa bílene' na, lawe' da nisa na' dxuné'zruja' neda' galaj na lu xichaj lázrdawe' ca tu beaj nisa da gunna na le' xel-la' nabán da zeajlí canna.

¹⁵Nadxa nu'ula na' guzre' Le':

—Benne', benna neda' nisa na', chee' québedxa gun na ba xen xida' nigá xedajxrí'a nisa.

¹⁶Na' Jesús guzre' nu'ula na':

—Guxíaj xeajnné benne' chiu', na' xídale nigá.

¹⁷Na' bechebe nu'ula na':

—Quebe nu chilá' benne' chia'.

Nadxa Jesús guzre' le':

—Da li dxennáu' quebe nu chilá' benne' chiu', ¹⁸lawe' da ba guzúalenu' gazxu' benne', na' bènea' zúalenu' na'a quebe naque' benne' chiu'. Ca naca da nigá gunnáu' da li.

¹⁹Gate nu'ula' benne' da nigá, na' gunné':

—Xran, dxéqueda' nacu' lue' benne' dxuchalaje' waláz chee Dios. ²⁰Xra xrtáuntu' ca' bulucá'ana szrene' Dios lu xi'a nigá, na' le'e, benne' judío, dxennale dxun na ba xen gucá'ana szrendxu Dios xezre Jerusalén.

²¹Na' bechebe Jesús:

—Guxéajle chia', nu'ula. Ba za zra gate le'e gucá'ana szrenle Xradxu Dios, ne quebe gun na ba xen xídale lu xi'a nigá, ne quebe gun na ba xen chéajle Jerusalén. ²²Le'e, benne' Samaria, quebe núnbeale nua' dxucá'ana szrenle. Netu' núnbeantu' Nua' dxucá'ana szrentu', lawe' da za' benne' weselá ládujla benne' judío ca'. ²³Wazrín zra, ne ba dxezrín zra na', gate benne' ca' da li dxulucá'ana szrene' Xradxu Dios, xelune' na ne chee Be' Lá'azxa, ne ne chee da li, lawe' da dxaca lazre' Xradxu Dios xulucá'ana szren bèneache Le' caní. ²⁴Dios naque' Be', na' benne' dxulucá'ana szrene' Le', dxun na ba xen xulucá'ana szrene' Le' ne chee Be' Lá'azxa, ne ne chee da li.

²⁵Na' nu'ula na' guzre' Le':

—Neda' nezda' walá' benne' Mesías (da zéaje na Cristo), na' gate la' Le', na' guzéajni'ine' dxi'u ca naca xúgute.

²⁶Jesús guzre' le':

—Neda' naca' Bènea', dxuchálajlenu' lue'.

²⁷Ca gunné' ca', na' belexezrín benne' ca' dxuseđene', na' belexebánene' lawe' da dxuchálajle Jesús tu nu'ula Netúe' quebe bexázejene' guchebe' Le' bi da dxaca lazre', u bizra cheen dxuchálajlene'

nu'ula na'. ²⁸Nadxa nu'ula na' bca'ane' dx'e chee' dxu'a beaj na', na' bezé'e zexíaje' xezre na' naga xeajezre' benne' ca':

²⁹—Le da lé'ele tu benne' guzre' neda' xúgute da ba bena'. ¿Quegá benne' nigá Cristo, Bènea' sel-la Dios?

³⁰Nadxa beledxúaj benne' ca' xezre na', zjaque' naga zua Jesús. ³¹Dxácate na', benne' ca' dxuseđe Jesús gulata' xuene' Le', gulenné':

—Benne' Wesede, gudagu late'.

³²Jesús guzre' benne' ca':

—De da dxawa', da quebe núnbeale le'e.

³³Nadxa benne' ca' dxuseđe Jesús gulezú lawe' dxuluchebe ljwezre', dxelenné':

—¿Núteca bedajgú'e da gudawe'?

³⁴Jesús guzre' le':

—Xela wagu chia' naca na chee guna' da dxaca lazre' Xra', Bènea' nasel-le' neda', ne chee gusexuzra' guna' zrin chee'. ³⁵Le'e dxennale: “Xetapa beu' xelápadxu.” Neda' dxapa' le'e, le nna' bèneache zaj naque' ca tu lina, da bache naca na xelápadxu. ³⁶Benne' dxelape' dxezi'e lazruj chee', na' da dxelape' naca na chee xelapa bèneache xel-la' nabán da zeajlí canna, chee sua xel-la' dxebe' benne' dxaza tu zren nen benne' ca' dxelape'. ³⁷Da li naca ca da dxelenná bèneache: Tu benne' dxaze', na' xetúe' dxelape'. ³⁸Neda' gusel-la' le'e xelápale naga quebe gúzale. Ca' naca na, benne' xula belune' zrin gulaze', na' le'e dxezile ba neza zrin da belún benne' ca'.

³⁹Benne' zan, benne' xezre na' naga nababa Samaria, guléajle'e chee Jesús ne chee xrtizra' nu'ula na', gunné': “Guzre' neda' xúgute da ba bena'.” ⁴⁰Gate belelá' benne' Samaria ca' naga zua Jesús, na' gulata' xuene' Le' xegáne' nen le', na' begáne' na' chupa zra. ⁴¹Benne' zandxa guléajle'e chee Jesús gate belenne' ca da dxenná Le'. ⁴²Nadxa gulé'e nu'ula na':

—Na'a dxéajlentu' chee' quegá tuze ne chee' da guzru' lue' netu', na' cá'aqueze lawe' da bénquezentu' netu' chee', na' nézentu' da li naque' Cristo, Bénnea' guselé' ca naca bénneache.

Jesús dxexuné' zri'ine tu benne' wen zrin blau chee' xu'u lawe'

⁴³ Gudé chupa zra bezá' Jesús xezre ca' zaj nababa Samaria, na' guzé'e zéaje' naga nababa Galilea. ⁴⁴ Guxíaje' na' lawe' da gunnáqueze Jesús, gunné': "Tu benne' dxuchalaje' waláz chee' Dios, quebe dxelapa benne' lazrié' le' ba lá'ana." ⁴⁵ Gate bezrine' naga nababa Galilea, benne' zaj zré'e na' belez' lu ne'e Le' du lazre', lawe' da xjácaqueze le' Laní Pascua da guca na Jerusalén, na' belelé'ene' xígute da ben Jesús lu laní na'.

⁴⁶ Nadxa bezrín Jesús xezre Caná naga nababa Galilea naga bené' bexaca nisa xrise uva wal-la. Zua lu xezre Capernaum tu benne' wen zrin blau chee' xu'u lawe', zua tu zrí'ine' bi biu quebe chawe' zúabe'. ⁴⁷ Gate ben benne' wen zrin blau nigá ba bezá' Jesús naga nababa Judea, ne ba bezrine' naga nababa Galilea, na' guxíaje' xejnné'e Jesús, na' gutá' xuene' Le' chéaje' lizre' xexuné' bi biu chee', bi na' ba zua gátebe'. ⁴⁸ Nadxa Jesús guzre' le':

—Le'e quebe chéajlele chia' che quebe lé'ele xel-la' waca chee' xabáa da dxulé'eda'.

⁴⁹ Benne' wen zrin blau na' gunné':

—Xran, gudázega na'a quebe ne gate zri'ina'.

⁵⁰ Nadxa guzre Jesús le':

—Bexíaj lizru'. Naca ban bi chiu'.

Benne' wen zrin blau na' guxéajle'e chee' da guzre Jesús lé', na' bezé'e zexíaje'. ⁵¹ Gate ba zua xezrine' lizre', na' benne' wen zrin chee' xejlexezrígalé' le', na' gulé'e le':

—Naca ban zri'inu'.

⁵² Nadxa bchebe' benne' ca' bátala guzú lau bexácabe', na' gulé'e le':

—Ná'aqueze dxedé wagubizra bedxúaj da la da xu'ube'.

⁵³ Nadxa benne' wen zrin blau na' bexúnene' guca na la' ná'queze gate guzre Jesús le': "Naca ban zri'inu'." Ca'an guca, le', ne xígute benne' zaj zra' lizre' guléajle'e chee' Jesús.

⁵⁴ Da nigá naca na xel-la' waca zren da gudxupe' da ben Jesús gate bezrine' naga nababa Galilea.

Jesús dxexuné' tu benne' biu naga nazí le na Betesda

5 Ca gudé na' guxú'u tu laní chee' judío ca', na' bezrín Jesús xezre Jerusalén. ² Lu xezre na', gáguze naga zua dxa xu'u chee' xezre da nazí le na Dxa Xu'u Chee Zrila' Ca', dxe' tu cue'la nisa nazí le na Betesda lu dizra' hebreo, na' dxu'a nisa na' zaj nnita gazxu' lachila. ³ Lachila ca' zaj de benne' zan zaj xu'e we', benne' la chul-la ca', ne benne' zaj zua zri ni'a ne'e, ne benne' zrinna' ca'. Dxelebeze' ca bixre nisa na'. ⁴ Ca'an naca lawe' da dxetaj tu gubáz chee' xabáa bata gala, ne dxunibe' nisa na', na' benne' nedxu dxeajchu'e lu nisa na' ca dxedé dxunibe' na, dxexaque' chee' bíteteze xel-la' we' xu'e. ⁵ Zua tu benne' na' ba guca chinu chunne dxua iza xu'e we'. ⁶ Gate ble'e Jesús benne' nigá, ne dxeque bé'ene' ba guca zane' iza xu'e we' na', na' bchebe' le':

—¿Dxaca lazru' xexacu'?

⁷ Benne' we' na' bechebe':

—Benne', quebe nu chilá' benne' cu'e neda' lu nisa na' ca dxedé dxebixre na. Tu tu lasa gate dxaca lazra' chu'a, benne' xula dxu'e nédxudxa.

⁸ Jesús guzre' le':

—¿Guxasa! Becá'a da'a chiu', ne bexíaj.

⁹ La' ná'queze bexaca benne' we' na', na' bequé'e da'a chee', ne guzú lawe' dxedé'. Zra na' naca zra dxulupá'ana

judío ca', ¹⁰ na' benne' judío ca' gulé'e benne' bexaque':

—Na'a naca na zra dxupá'anadxu. Quebe naca na gu'u da'a chiu'.

¹¹ Na' benne' na' bechebe':

—Bénnea' bexune' neda' guzre' neda': “Becá'a da'a chiu', ne bexíaj'.”

¹² Nadxa buluchebe' le':

—¿Nuzra na' guzre' lue': Becá'a da'a chiu', ne bexíaj'?

¹³ Benne' na' quebe nézene' nu bennea' bexune' le' lawe' da ba zexíaj Jesús lálwela benne' zan ca' zaj zre'e na'. ¹⁴ Ca gude' na' Jesús bezrague' bénnea', dxedé' chale'aj xudau', na' guzre' le':

—¿Gunná'xque! Ba bexacu' na'a. Québedxa gunu' dul-la, chee quebe bi sacu' xetú da wál-ladxa.

¹⁵ Nadxa benne' na' bezé'e zexíaje', na' bzenne' judío ca' bexún Jesús le'. ¹⁶ Chee le' na' benne' judío ca' guláu zi' xuzre' Jesús, ne gulaca lazre' xelúti'e Le' lawe' da dxune' da caní lu zra dxulupáne'. ¹⁷ Jesús guzre' benne' ca':

—Dios, Xra', tu dxúnzqueze' zrin, na' neda' dxuna' zrin.

¹⁸ Chee le' na' benne' judío ca' gulaca lázredxe' xelúti'e Jesús lawe' da quegá tuze dxuzúe' chalá'ala da nadxixruj bea na chee zra dxulupáne', na' cá'anqueze dxun cuine' ca Dios gate gunné' Dios ná-queze' Xre'.

Xel-la' dxenná bea da napa Zri'ine Dios

¹⁹ Nadxa Jesús guzre' benne' judío ca':

—Da li dxapa' le'e, neda', Zri'ine Dios, quebe gaca bi guna' cheézqueza'. Tuze dxuna' da dxelé'eda' dxun Xra'. Xúgute da dxun Xra', cá'anqueze dxuna' neda', Zri'ine'. ²⁰ Dios, Xra', nazrí'ine' neda', Zri'ine', ne dxulé'ene' neda' xúgute da dxúnqueze' Le', na' gulé'ene' neda' da zaj nácadxa szren ca da ca' dxuna', na' xebánequezle le'e ca xelaca na. ²¹ Ca dxun Xradxu Dios, dxusebane' benne' gate,

ne dxuxunézruje' xel-la' nabán chee', cá'anqueze neda', Zri'ine', dxuxunézruja' xel-la' nabán chee benne' ca' dxaca lazra' xunézruja' na. ²² Xradxu Dios quebe dxuchi'e nu benne', san ba benne' neda', Zri'ine', xel-la' dxenná bea guchi'a da dxelún tu tu benneache, ²³ chee xelapa xúgute benne' neda', Zri'ine', ba lá'ana, cáteze na' dxelape' ba lá'ana Dios, Xra'. Nu benne' quebe dxape' ba lá'ana neda', Zri'ine', cá'anqueze quebe dxape' ba lá'ana Xradxu Dios nasele' neda'.

²⁴ Da li dxapa' le'e, benne' dxenne' da dxenná' neda', ne dxéajle'e chee Dios nasele' neda', benne' nigá nape' xel-la' nabán da zeajlí canna, na' quebe cuía xi'e lawe' da ba bedxúaje' lu na' xel-la' gute, ne ba zue' lu xel-la' nabán. ²⁵ Da li dxapa' le'e, wazrín zra, ne ba dxezrín zra na' gate benne' gate ca' xelenne' chi'a neda', Zri'ine Dios, na' benne' xuluzúa xrtizra' welaca bánqueze'. ²⁶ Xráqueza' nape' xel-la' dxenná bea xunézruje' xel-la' nabán da naca na li lazre' chee benneache, ne cá'anqueze ba benne' neda', Zri'ine', xel-la' dxenná bea xunézruja' benneache xel-la' nabán caní, ²⁷ ne ba benne' neda' xel-la' dxenná bea guchi'a chee benneache lawe' da naca' Benne' Gulje' Bénneache. ²⁸ Quebe xebánele chee da nigá lawe' da zrin zra gate xúgute benne' gate xelenne' chi'a ²⁹ xelaxedxúaje' lu xedxu ba. Benne' ca' belune' da xrlátaje xelxebane' chee xelape' xel-la' nabán da zeajlí canna. Benne' ca' belune' da calela xelxebane' chee xelébía xi'e.

Da dxelunna bea na napa Jesús xel-la' dxenná bea

³⁰ Na' gunná Jesús:

—Neda' quebe bi gaca guna' cheézqueza'. Neda' dxuchi'a chee benneache ca gunná bea Dios, Xra', neda', na' ca dxuchi'a naca na xrlátaje lawe' da quebe dxuna' ca da dxaca lázrequeza' neda'. Dxuna' ca da dxaca

lazre' Xra', nasele-le' neda'. ³¹ Che neda' dxexecheba' da nacaze cheéqueza', da dxennéa' quebe naca na da dxunna bea na. ³² Zua tu benne' xula dxexechebe' da nácaqueze chia', na' da dxenné' naca na da dxunna bea na. ³³ Le'e gusel-lale benne' xejalechebe' Juan, na' ca da bechebe' naca na da li. ³⁴ Da dxunna bea na da dxuxrén lazra' neda' quebe naca na chee bennacheze. Dxapa' le'e da nigá chee lale le'e. ³⁵ Juan na' guque' ca tu xi' da gula na, ne bsení na, na' le'e bezaca ba lázrele lu xi' na' tu chí'ida'. ³⁶ Zua tu da dxunna bea na chia' neda', da nácadxa szren ca da bchalaj Juan. Da ca' dxuna' neda', da bsebagá Xra' neda' dxuna'. Da caní dxelunna bea na da li Dios, Xra', gusel-le' neda'. ³⁷ Cá'anqueze Xra' nasele-le' neda' dxexechebe' chia'. Lácala ba bchalaj Le', le'e quebe ne xénele chí'e, ne quebe ne lé'ele Le', ³⁸ ne quebe nuzúale dizra' chee' xichaj lázrdaule lawe' da quebe dxéajlele chia' neda', nasele-la Xra' neda'. ³⁹ Le'e dxusédele du lázrele da naxúaj na lu xiche chee Dios lawe' da dxéquele xezrélele xel-la' nabán da zeajlí canna lu xiche na', na' da naxúaj na lu xiche chee Dios dxuchalaj na ca naca chia' neda'. ⁴⁰ Le'e quebe dxaca lázrele xídale naga zua' neda' chee gápale xel-la' nabán na'. ⁴¹ 'Neda' quebe dxezi'a xel-la' ba lá'ana ca da dxelunna bennache, da quebe naca na li lazre'. ⁴² Neda' núnbe'a le'e, ne nezda' quebe nazrí'ile Dios. ⁴³ Bla'a neda' waláz chee Dios, Xra', na' le'e quebe dx-ezí' lu na'le neda'. Che za' tu benne' lu da naca cheéqueze', benne' na' wazí' lu na'le. ⁴⁴ ¿Ájazra gaca chéajlele le'e chia' che dxunle zrin chee xelapa ljwézrele le'e ba lá'ana, ne quebe dxue lázrele sile xel-la' ba lá'ana da dxunna Dios tu licha'? ⁴⁵ Quebe guéquele néda'queza' gusebaga' le'e zria lau Dios, Xra'. Da gusebaga le'e zria naca na da ba gunná Moisésqueze, da na' dxuxrén lázrele guselá na le'e.

⁴⁶ Che da li guxéajlele le'e chee da gunná Moisés, cá'anqueze chéajlele chia' neda' lawe' da bzuaj Moisés ca naca chia' neda'. ⁴⁷ Na'a, che quebe dxéajlele chee da bzuaj le', ¿ájazra gaca chéajlele chee da dxapa' le'e?

**Jesús dxugawé' chi
xun gaxúa benne' biu**

(Mt. 14.13-21; Mr. 6.30-44; Lc. 9.10-17)

6 Ca gudé na' guxíaj Jesús xecha la'a dxu'a nísadau' chee Galilea, da nazíqueze le na nísadau' chee Tiberias. ² Benne' zante zjácálene' Jesús lawe' da ba belelé'ene' xel-la' waca zren ca' da dxun Le', dxexune' benne' we' ca'. ³ Nadxa Jesús guluéne' tu lu xi'a, na' gudxé'e na' nen benne' ca' dxusédené'. ⁴ Ba zua gagu Laní Pascua chee judío ca'. ⁵ Gate ble'e Jesús benne' zan ca' zá'aque' zeaj nawé' Le', na' guzre' Felipe:
—¿Gazra cheajxridxu da xelagu benne' zan caní?

⁶ Gunná caní Jesús chee la' bi nna Felipe, lawe' da ba neze Jesús ca da gungé'. ⁷ Nadxa bechebe Felipe:

—Che sidxu xeta xtila lazruj da sidxu chee chupa gaxúa zra, quebe gueque na xelezí' benne' caní late' weaj.

⁸ Nadxa Andrés, xetú benne' ca' dxuséde Jesús, ne naque' bi biche Simón Pedro, guzre' Jesús:

⁹—Ze tu bi cuide' nigá nápabe' gazxu' xeta xtila zrua' cebada, ne chupa bela. ¿Ájazra gun da nigá gueque na chee xúgute' benne' caní?

¹⁰ Nadxa gunná Jesús:

—Le xe xúgute' xelebé'e.

Naca lu daca lataj na', na' gulebé' ca du chi xun gaxúa benne' biu. ¹¹ Nadxa gucá'a Jesús xeta xtila ca', na' ca gudé guzre' Dios "Xcalenu'", bnézruje' na benne' ca' dxusédené', na' benne' caní gulísie' na láwele benne' zan ca' zaj dxe'e na'. Cá'anqueze ben Jesús chee bela ca', na' bnézruje' ca da gulaca lazre' benne'

ca'. ¹²Gate gulélaje benne' ca', na' Jesús guzre' benne' ca' dxusédene':

—Le xutupa da bízrujdu ca' da dxelexegá'ana na, chee quebe bi gaca dítaje.

¹³Belexequé'e na, na' buluzré'e chazrinnu xcuite da bizruj ca' zaj nagá'ana na chee da gazxu' xeta xtila zrua' cebada ca'. ¹⁴Nadxa benne' zan ca', gate belelé'ene' xel-la' waca zren nigá da ben Jesús, gulenné':

—Da li benne' nigá naque' bènea' guchálaje' waláz chee Dios, bènea' dxal-la' le'e.

¹⁵Guque bé'ene' Jesús dxelaca lazre' xelexé'e Le' xadía chee xuluzú'e Le' ca benne' wenná bea, na' bezé'e na', ne begüéne' lu xi'a sibe na' chee sue' leze'.

Jesús dxedé' lawe' nísadau'

(Mt. 14.22-27; Mr. 6.45-52)

¹⁶Gate ba za xrinne, benne' ca' dxusede Jesús belétaje' dxu'a nísadau', ¹⁷na' gulu'e lu da dxedá lawe' nísadau', ne gulezú lawe' zjaque' xeledé'e xechalá'a nísadau' chee xelezrine' xezre Capernaum. Ca guxrinne, quebe ne xezrín Jesús na'. ¹⁸Nadxa guzú lau dxaca tu be' bdunu' lawe' nísadau' na', na' xeajxruza chee nísadau' na' guxásale'e na. ¹⁹Gate ba guledé'e lu nísadau' na' catite sadxu tu chi'i zren, na' belelé'ene' Jesús ba dxezrine' naga ziaj da dxedá lawe' nísadau', dxezé'e lawe' nísadau', na' belezrebe'. ²⁰Nadxa Jesús guzre' benne' ca':

—Neda' na'. Quebe zrébele.

²¹Nadxa lu duté xel-la' dxelebé gulezú' lu ne'e Le' lu da dxedá lawe' nísadau' na', na' chadite belezrine' lu xezr la xu naga zjaque'.

Benne' zan ca' dxelexílaje' Jesús

²²Zra xula benne' zan ca', benne' belexegá'ana xecha la'a nísadau', guleque bé'ene' ba zeajxaca benne' ca' dxusede Jesús lu da dxedá lawe'

nísadau' tu licha' da dxe' chalá'a na', na' Jesús quebe guxíajlene' benne' ca'.

²³Dxácate na' xezícala da dxeledá lawe' nísadau', da ca' beledxúaj na xezre Tiberias, belezrín na tu lataj da zua gáguze naga gulawe' xeta xtila na' ca gudé guzre Xránadxu Dios: "Xcalenu'."

²⁴Chee le na' gate benne' zan ca' guleque bé'ene' québedxa zua Jesús na', ne cá'anqueze benne' ca' dxusédene', na' gulu'e lu da dxeledá lawe' nísadau', ne xjaque' xezre Capernaum zeajlexedílaje' Jesús.

Jesús naque' xeta xtila da dxunna na xel-la' nabán li lazre'

²⁵Gate benne' zan ca' belezrine' xecha la'a dxu'a nísadau', na' belexezrague' Jesús, ne buluchebe' Le':

—Benne' Wesede, ¿bata bla'u nigá?

²⁶Jesús guzre' benne' ca':

—Da li dxapa' le'e, dxexílajle le'e neda' lawe' da gudágule, ne béljele, ne quegá lawe' da ble'ele xel-la' waca ca' da ble'eda' le'e. ²⁷Quebe cue'le gunne xue sile da gágule da te chee na. Le cue' gunne xue sile da gágule da zeajlí canna, da na' gunna na le'e xel-la' nabán da zeajlí canna. Da nigá naca na xel-la' wagu da gunna' neda', Benne' Gulje' Bèneache, le'e, lawe' da bzua Xra' Dios nen neda' da dxunna bea na naca' Zrí'ine'.

²⁸Nadxa buluchebe' Le':

—¿Bi dxal-la' guntu' chee gaca ca da dxaca lazre' Dios guntu'?

²⁹Jesús bechebe':

—Da dxaca lazre' Dios gunle naca na chéajlele chia' neda', naca' Bènea' gusel-la Dios.

³⁰Nadxa buluchebe' Le':

—¿Bizra xel-la' waca gunu' chee le'entu' na, na' chéajlentu' chiu'? ¿Bizra dxunu'? ³¹Xra xrtauntu' ca' gulawe' xeta maná le'e xixre' lawe' lataj, ca naxúaj na lu xiche chee Dios, dxenná na: Dios bgawe' benne' ca' xeta xtila da za xabáa.

³² Bechebe Jesús:

—Da li dxapa' le'e, quegá Moisés na' bnézruje' benne' ca' xeta xtila da za xabáa. Dios, Xra', dxunne' le'e xeta xtila da za xabáa da naca na li lazre'. ³³ Xeta xtila na' da dxunna Dios le'e naca na Bénnea' bétaje' xabáa, ne dxunézruje' chee bèneache xel-la' nabán li lazre'.

³⁴ Nadxa benne' ca' gulé'e Le':

—Xran, tu bènnaqueze cheentu' xeta xtila caní.

³⁵ Jesús guzre' benne' ca':

—Neda' naca' xeta xtila da dxunna na xel-la' nabán li lazre'. Benne' xide' naga zua' neda' cabátadxa tune', na' benne' chéajle'e chia' cabátadxa bílene'. ³⁶ Naca na ca ba gucha' le'e. Le'e na' quebe dxéajlele chia', lácala ba ble'ele neda'. ³⁷ Xúgute benne' ca' dxunna Xra' neda', xeledé'e lawa', na' benne' ca' xeledé'e naga zua', quebe guzúa' benne' ca' chalá'ala. ³⁸ Neda' guzá'a xabáa, quegá chee guna' ca dxaca lázrequeza' neda'. Bla'a chee guna' ca da dxaca lazre' Xra', gusel-le' neda'. ³⁹ Da dxaca lazre' Xra', nasel-le' neda', naca na chee quebe gunitia' netú benne' ca' ba benne' chia'. Nacan chee gusebana' benne' ca' lu zra bzebe. ⁴⁰ Da dxaca lazre' Xra', nasel-le' neda', naca na chee xelapa bèneache xel-la' nabán da zeajlí canna, xúgute benne' ca' xelenné'e neda', Zri'ine Dios, ne xeléajle'e chia' neda', na' chee gusebana' neda' benne' ca' lu zra bzebe na'.

⁴¹ Gate belenne' da nigá, na' judío ca' gulezú lawe' dxelezí tizre' Jesús lawe' da gunné': "Neda' naca' xeta xtila da betaj xabáa." ⁴² Nadxa gulenné':

—¿Quegá benne' nigá zri'ine José? Dxi'u núnbeadxu xra xrne'e. ¿Bizr chee na' dxenné' bétaje' xabáa?

⁴³ Nadxa Jesús guzre' benne' ca':

—Québedxa si tízrale. ⁴⁴ Quebe nu benne' gaca xide' naga zua' neda', che quebe xedajgúa Xra' nasel-le' neda' bènea', na' neda' gusebana' bènea' lu zra

bzebe na'. ⁴⁵ Lu xiche ca' naga naxúaj da gulenná benne' ca' buluchalaje' waláz chee Dios, dxenná na: Dios gusédené' xúgute bèneache. Ca' gaca na, xúgute benne' ca' dxuluzé' nague' ca da dxusede Xra', dxeledé'e naga zua'.

⁴⁶ Quebe ne le'e nu benne' Xra'. Benne' tu licha', bènea' blé'ene' Le', naca bènea' guzé'e naga zua Dios. ⁴⁷ Da li dxapa' le'e, nu benne' dxéajle'e chia' neda' nape' xel-la' nabán da zeajlí canna. ⁴⁸ Neda' naca' xeta xtila da dxunna na xel-la' nabán li lazre'. ⁴⁹ Xra xrtáule ca' gulawe' xeta maná le'e xixre' lawe' lataj, na' gudé na' xúgute benne' ca' gultatie'. ⁵⁰ Xeta xtila nigá naca na da za xabáa, na' che nu benne' gawe' na, quebe gatie' tu chi'ize. ⁵¹ Néda'queza' naca' xeta xtila da dxunna na xel-la' nabán da za xabáa. Benne' gawe' xeta xtila nigá waca bânqueze' chadía chacanna. Xeta xtila na' da dxunna' neda' naca na bela' dxen cheézqueza', da gunna' chee xelaca bânqueze bèneache.

⁵² Nadxa benne' judío ca' gulezú lawe' dxuluchebe ljwezre', dxeleenné':

—¿Ájazra gun benne' nigá, gunné' dxi'u bela' dxen cheézqueze' chee gágudxu na?

⁵³ Jesús guzre' benne' ca':

—Da li dxapa' le'e, che le'e quebe gágule bela' dxen chia' neda', Benne' Gulje' Bèneache, ne che quebe xí'ajle dxen chia', quebe gápale xel-la' nabán li lazre'. ⁵⁴ Benne' dxawe' bela' dxen chia', ne dxí'aje' dxen chia' nape' xel-la' nabán da zeajlí canna, na' neda' gusebana' bènea' lu zra bzebe na'. ⁵⁵ Bela' dxen chia' naca na xel-la' wagu li lazre' chee bène'du xu'ule, na' dxen chia' naca na da xele'aj bèneache da naca na li lazre'. ⁵⁶ Benne' dxawe' bela' dxen chia', ne dxí'aje' dxen chia', naque' neda' tuze, na' néda'queza' naca' bènea' tuze. ⁵⁷ Xra' nasel-le' neda' xu'u lu ne'e xel-la' nabán li lazre', na' neda' naca bana' ne chee Le'. Cá'anqueze

bénnea' dxawé' da naca chia' neda' gaca bánqueze' ne chia' neda'. ⁵⁸ Da nigá naca na xeta xtila da za xabáa. Xeta xtila nigá quebe naca na ca xeta maná da gulgugu xra xrtáule ca', na' gudé na' gulate xúgute'. Benne' dxawé' xeta xtila nigá waca bánqueze' chadía chacanna.

⁵⁹ Bsede Jesús ca naca da caní naga zaj zra' benne' zan ca' lu xu'u naga dxelezraga bénneache chee xezre Capernaum.

Ca naca dizra' na' da dxunna na xel-la' nabán da zeajlí canna

⁶⁰ Gate belén benne' zan ca' da nigá dxusede Jesús, na' benne' ca' zjácalle Jesús gulenné':

—Dizra' caní dxenná Jesús zaj nácale' e na stebe sidxu. ¿Nuzra gaca gun caní?

⁶¹ Guque bé'ene' Jesús dxelenné' chee xrtizre', na' bchebe' benne' ca':

—¿Dxuzúa dizra' nigá le'e stebe? ⁶² ¿Ájazra gunle checa' lé'ele neda', Benne' Gulje' Bénneache, xegüéna' xabáa naga zua' nédxute? ⁶³ Be' naca na da dxunna xel-la' nabán li lazre'. Da naca na be'la' dxen quebe bi zaca na. Dizra' ca' da ba gucha' le'e zaj naca na chee Be', ne zaj naca na da dxelunna na xel-la' nabán li lazre'. ⁶⁴ Bál-lale le'e quebe dxéajlele chia'.

Caní gunná Jesús lawe' da nézene' nédxudauté nu benne' ca' quebe dxeléajle' chee', ne nua' gudé Le' lu na' benne' guledábage' Le'. ⁶⁵ Nadxa gunná Jesús:

—Chee le' na' gucha' le'e, quebe nu benne' gaca xidé' naga zua' neda' che quebe xedajgúa Xra' bénnea'.

⁶⁶ Lu zra ná'queze benne' zan ca', benne' xjácale' Jesús, québedxa xjácale' Le'. ⁶⁷ Nadxa Jesús bchebe' benne' chazrinnu ca' dxusédené', gunné':

—¿Cá'aqueze le'e dxaca lázrele xexíajle'?

⁶⁸ Bechebe Simón Pedro:

—Xran, ¿nuzra chéajlentu'? Dizra' chiu' naca na da dxunna na xel-la' nabán da zeajlí canna. ⁶⁹ Netu' dxéajlentu' chiu', ne nézentu' nacu' Cristo, Zri'ine Dios ban.

⁷⁰ Jesús bechebe':

—Neda' gucá'a le'e, benne' chazrinnu, na' tu benne' ládujla le'e xu'e da xriwe'.

⁷¹ Da nigá gunná Jesús, bchálaje' ca naca chee Judas Iscariote, zri'ine tu benne' le' Simón, lawe' da gudé Judas nigá Jesús lu na' benne' guledábage' Le'. Naque' tu benne' chazrinnu ca' dxusede Jesús.

Benne' biche Jesús quebe dxeléajle' chee'

7 Gudé na' gudé Jesús naga nababa Galilea. Quebe guca lazre' tee' naga nababa Judea lawe' da dxelaca lazre' judío blau zaj zre'e na' xelútié' Le'. ² Ba za laní gate judío ca' dxelezúe' lu xu'u laga' ca'. ³ Chee le' na' bi biche Jesús gulé' Le':

—Quebe xegá'anu' nigáze. Bexíaj Judea, chee cá'aqueze benne' ca' dxeléajle' chiu' zaj zre'e na' gaca xe'le'le'ene' ca da dxunu'. ⁴ Che nu benne' dxaca lazre' xelúnbe'e bénneache le', quebe dxuné' da ca' bagácheze. Lawe' da dxunu' Lue' da caní, ben na lau xúgute' bénneache.

⁵ Caní gulenné' lawe' da quebe dxeléajle' benne' biche' ca' chee Jesús. ⁶ Nadxa Jesús guzre' benne' ca':

—Quebe ne zrin zra cha'a na'. Chee le'e bíteteze zra waca chéajle. ⁷ Benne' ca' zaj naca chee xezr la xu nigá quebe gaca xe'lecuídené' le'e. Dxe'lecuídené' neda' lawe' da dxulé'eda' neda' naca da cale'la da dxelún benne' ca'. ⁸ Le chjaca le'e laní na'. Quebe sa'a neda' na' lawe' da quebe ne zrin zra cha'a.

⁹ Ca gudé guzre Jesús benne' ca' da nigá, na' begá'ane' naga nababa Galilea na'.

**Jesús dxezrine' laní gate judío
ca' dxelezúe' xu'u laga' ca'**

¹⁰Ca gudé besí'aca benne' biche Jesús, na' cá'anqueze Le' guxíaje' laní na'. Bagácheze guxíaje' chee quebe nu le'e Le'. ¹¹Benne' xíchaje' chee judío ca' belexílaje' Jesús lu laní na'. Dxelenné':

—¿Gazra zua bénnea'?

¹²Ládujla benne' zan ca', benne' zan buluchálaje' ca naca chee Jesús. Bal-le' gulenné': “Naque' benne' xrlátaje.” Xebal-le' gulenné': “Quebe naque' xrlátaje lawe' da dxezí xe'e bénneache.”

¹³Quebe nu benne' bchálaje' caníqueze ca naca chee' lawe' da dxelezrebe' da xelún benne' xíchaje' ca' chee judío ca'.

¹⁴Ba zeaj gachaj laní na' gate guxú'u Jesús lu chale'aj xudau', na' guzú lawe' dxusédené' benne' zaj zre'e na'. ¹⁵Belexebane benne' judío ca', dxelenné':

—¿Ájazra na' benne' nigá da zante nézené', ne quebe bsédie' chee xudau'?

¹⁶Bechebe Jesús:

—Da dxusédeda' neda' le'e quebe naca na cheézqueza'. Naca na chee Xra' nasel-le' neda'. ¹⁷Che nu benne' dxaca lazre' guné' ca da dxaca lazre' Dios, na' wanézené' che da dxusédeda' naca na chee Dios, u che dxennéa' ca da naca cheézqueza'. ¹⁸Benne' dxuchálaje' da naca cheézqueze' dxuné' na chee xelapa bénneache le' ba lá'ana. Bénnea' dxue lazre' xelapa bénneache ba lá'ana bénnea' gusel-le' le', benne' nigá dxenné' da li, ne quebe bi dxenné' da naca na da wen lazre'.

¹⁹Moisésqueze benne' le'e da nadxixruj bea na, na' netule le'e quebe dxuzúale dizra' chee da nadxixruj bea na na'. ¿Bizr chee na' dxaca lázrele gútele neda'?

²⁰Belexechébe benne' zan ca':

—Xu'u lue' be' xriwe'. ¿Núzraqueze dxaca lazre' gutié' lue'?

²¹Jesús guzre' benne' ca':

—Tu xel-la' waca bēna' lu zra dxupá'anale, na' xúgutele le'e dxebénele. ²²Moisés benne' da zéajlele, dxechúgule late' weaj belá' chee bel-la' dxen chee zrí'inele bi biudu ca' chee xelexegá'anabe' xrlátaje lau Dios. Da nigá da dxunle quebe guzú lau na gate na' zua Moisés. Guzú lau na gate zaj zra' xra xrtau Moisés cá'ante. Chee le' na' le'e dxechúgule late' belá' chee bel-la' dxen chee tu bi biúda' chee xegá'anabe' xrlátaje lau Dios lácala naca zra dxupá'anale. ²³Che caní dxunle lu zra dxupá'anale chee quebe gusanle ca naca da bdxixruj be'e Moisés, ¿bizr chee na' dxezrá'ale neda' lawe' da bexuna' duté bel-la' dxen chee tu benne' gate naca zra dxupá'anale? ²⁴Quebe guchí'ale le'e chee tu da dxun benne' ca naca da dxel'ézele. Gate bi da guchí'ale, le gun na lu da naca xrlátaje.

Jesús dxuchálaje' chee naga ze'e

²⁵Nadxa bal-la benne' ca' zaj zre'e Jerusalén gulezú lawe' dxuluchébe ljwezre':

—¿Quegá benne' nigá bénnea' dxelxílaje' chee xelútie' le'? ²⁶Nigá zue' dxuchálaje' lówela bénneache, na' quebe nu bi dxé Le'. ¿Zaj neze benne' xíchaje' ca' da li naca benne' nigá Cristo, Bénnea' nasel-la Dios? ²⁷Netu' nézentu' ga za' benne' nigá. Gate xida Cristo, quegá nu neze ga ze'e.

²⁸Jesús zue' dxusédené' benne' ca' chale'aj xudau', na' gate benne' da nigá, na' gunné' zizraj:

—Dxennale núnbeale neda', ne dxennale nézele ga za'a. Bla'a nigá, quegá cheézqueza'. Bénnea' nasel-le' neda' naque' li lazre', na' Bénnea' quebe núnbeale le'e. ²⁹Neda' núnbe'a Le' lawe' da za'a naga zua Le', na' Le' gusél-le' neda'.

³⁰ Nadxa gulaca lazre' xelex-le' Jesús. Quebe nu gudela Le' lawe' da quebe ne zrin zra chee xelútie' Le'. ³¹ Benne' zan guléajle'e chee Jesús, na' gulenné':

—Gate xida Cristo, ¿gúnljadxé' xel-la' waca zrenté ca da dxun benne' nigá?

Benne' fariseo ca' dxelesel-le' xra'aga wen zrin chee' chee xelex-le' Jesús

³² Benne' fariseo ca' belenne' ca da dx-elenná bènneache ca naca chee Jesús, na' le', ne benne' xíchajé ca' chee bxruze ca' gulesel-le' xra'aga wen zrin chee xudau' chee xelex-le' Jesús. ³³ Nadxa gunná Jesús:

—Wazúalena' le'e xetú chí'ida'u, na' xezrínqueza' naga zua Bénnea' gusél-le' neda'. ³⁴ Le'e wexílajle neda', na' quebe xezrélele neda', lawe' da quebe gaca sa'le naga sua' neda'.

³⁵ Nadxa benne' judío ca' gulezú lawe' dxuluchébe ljwezre':

—¿Gazra cheaj benne' nigá, naga quebe gaca xezreldxu Le'? ¿Waxíajé' naga zaj zra' benne' judío ca' zaj nase dín-najé' ládujla benne' xezre la xu ca' chee gusédené' benne' quebe zaj naque' judío? ³⁶ ¿Bizra zéajé da nigá guzre' dxi'u: Wexílajle neda', na' quebe xezrélele neda' lawe' da quebe gaca sa'le naga sua' neda'?

Jesús dxuchálajé' chee xegu nisa da dxunna xel-la' nabán li lazre'

³⁷ Zra bzebe chee laní na' naca na zra blaudxa. Lu zra na' guzé Jesús, na' gunné' zizraj:

—Che nu benne' dxebílene', dxal-la' xide' naga zua' neda', na' xí'ajé'. ³⁸ Naca na ca naxúaj na lu xiche chee Dios, dxenné': “Benne' dxéajle'e chia, lu lázrdawé' galaj xegu nisa da gunna na xel-la' nabán.”

³⁹ Da nigá gunná Jesús ca naca chee Be' Lá'azxa, Bénnea' xezezí benne' ca' xeléajle'e chee Jesús, lawe' da quebe ne

la' Be' Lá'azxa lawe' da quebe ne xegá'ana szren Jesús naga zua Xre'.

Bènneache dxelaque' chupa la'a

⁴⁰ Bal-la bènneache, gate belenne' da nigá, gulenné':

—Da li benne' nigá naque' Bénnea' guchalajé' waláz chee Dios, Bénnea' dxal-la' xide'.

⁴¹ Xebal-le' gulenné':

—Benne' nigá naque' Cristo, Benne' guchébe lazre' Dios sel-le'.

Xebal-le' gulenné':

—¿Waca Cristo benne' Galilea? ⁴² Lu da naxúaj na lu xiche chee Dios dxenná na gaca Cristo zri'ine zre sua David, ne gaque' benne' xezre Belén, xezre na' naga gulaj David.

⁴³ Ca'an guca, gulaca benne' ca' chupa la'a ne chee Jesús. ⁴⁴ Bal-le' gulaca lazre' xelex-le' Jesús, na' quebe nu bexazre gune' na.

Benne' xíchajé ca' chee judío ca' quebe dxeléajle'e chee Jesús

⁴⁵ Xra'aga wen zrin ca' chee xudau' belexezrine' naga zaj zra' fariseo ca', ne benne' xíchajé ca' chee bxruze ca', na' benne' caní buluchébe' xra'aga wen zrin ca':

—¿Bizr chee na' quebe guchéle bènnea'?

⁴⁶ Belexechébe xra'aga wen zrin ca':

—Quebe ne guchalaj nu bènneache ca dxuchalaj benne' nigá.

⁴⁷ Nadxa fariseo ca' gulé'e xra'aga wen zrin ca':

—¿Cá'anqueze le'e bele lataj guzí xe'e le'e? ⁴⁸ Quebe nu ne chéajle chee bènnea', benne' xíchajé caní, ne cá'anqueze benne' fariseo ca'. ⁴⁹ Benne' ca' dxeléajle'e chee bènnea' quebe zaj núnbe'e da nadxixruj bea na, ne zaj nabía xi'e.

⁵⁰ Nicodemo, bènnea' guxíajé' xejné'e Jesús chizrela naque' tu benne' fariseo ca', na' guzre' benne' ca':

⁵¹—Cateze dxenná da nadxiruj bea cheedxu quebe gaca guzría xidxu tu benne' che quebe ne xenedxu xechebe' chee nézedxu che bi da nabague'e.

⁵²Nadxa belexechebe benne' ca':

—¿Nácaquezu' lue' benne' Galilea? Gunná' xanne' da naxúaj na lu xiche chee Dios, na' le'enu' netú benne' dxuchalaje' waláz chee Dios quebe ne gálaje' naga nababa Galilea, naga zaj zra' bèneache quebe zaj naca xánnie' judío.

⁵³Nadxa tu tu benne' ca' xejxaque' lizre'.

8 Na' Jesús guzé'e zéaje' lu Xi'a Xaga Olivo.

**Jesús dxuchálajlene' tu nu'ula
dxune' dul-la dxíchaje' xrba
chee xel-la' nuchaga na'**

²Zra xula, gate guxaní, na' bezrín Jesús chale'aj xudau' na'. Xúgute benne' ca' gulebigue' naga zua Jesús, na' Le' gudxé'e, ne guzú lawe' dxusédené' benne' ca'. ³Nadxa benne' ca' dxuluxúzajle'e da nadxiruj bea Dios, ne benne' fariseo ca' guleché'e tu nu'ula naga zua Jesús, belelé'ene' le' dxune' dul-la dxíchaje' xrba chee xel-la' nuchaga na'. Buluzé' nu'ula na' laduj benne' zaj zre'e na', ⁴na' gulé'e Jesús:

—Benne' Wesede, nu'ula nigá blé'entu' le' dxune' dul-la dxíchaje' xrba chee xel-la' nuchaga na'. ⁵Da bdxiruj be'e Moisés dxenná be'e netu' gútentu' nu'ula caní, güentu' le' xiaj. ¿Bizra dxennáu' Lue'?

⁶Caní gulenná benne' ca' chee xuludxixre' Jesús chee xezezéquene' xelagu zria Le'. Nadxa gudxé' luche Jesús, ne guzú lawe' dxuzúaje' lu xu nen zrube ne'e. ⁷Benne' ca' buluchébequeze' Jesús, na' Le' bezé' dxé'e benne' ca':

—Nútetezlale le'e quebe nabágale dul-la, waca su laule güele nu'ula nigá xiaj.

⁸Na' bebé' luche Jesús, ne bzúajqueze' lu xu. ⁹Benne' ca', gate belenne' da nigá, quebe bzua xichaj lázrdawe' le' zrize,

na' belexedxúaje' tu weaje'. Belexedxúaj za'a benne' gúlaxa, na' ca belexedxúaj xúgute benne' ca' dxelagu zrie' nu'ula', na' begá'ana Jesús tuze' nen nu'ula na', ze' laduj benne' ca' dxuluzé' nague' chee'.

¹⁰Nadxa bezé' Jesús, ne gate québedxa nu benne' ca' ble'e Jesús, benne' dxulagu zrie' nu'ula na', nadxa guzre' le':

—Nu'ula, ¿gazra na' benne' ca' gulagu zrie' lue'? ¿Quebe nu chilá' benne' guzría xi'e lue'?

¹¹Nu'ula na' gunné':

—Quebe nu chilá', Xran.

Nadxa Jesús guzre' nu'ula na':

—Cá'anqueze neda', quebe guzría xi'a lue'. Bexíaj, ne québedxa gunu' dul-la.

**Jesús dxusení'e lu xichaj
lázdau bèneache**

¹²Bchálajle Jesús benne' ca' xecha lasa, gunné':

—Neda' naca' xel-la' naxaní' chee lu xichaj lázdau bèneache. Benne' dxedálene' neda' gape' xel-la' naxaní' nigá da gunezruj na le' xel-la' nabán li lazre', na' cabata' tadxé' lu da chul-la chee dul-la da zaj nabague'.

¹³Nadxa benne' fariseo ca' gulé'e Le':

—Lue' dxexechebu' cheézquezu', na' da dxexechebu' quebe bi zaca na.

¹⁴Bechebe Jesús:

—Da dxexecheba' zaca na lácala néda'queza' dxexecheba' cheézqueza'. Neda' nezda' gala za'a, ne gala cha'a. Le'e quebe nézele gala za'a, ne gala cha'a. ¹⁵Le'e dxuchí'ale cáteze dxenná xichaj lázrdau. Bla'a neda', quegá chee guchi'a ca da dxun nu benne'. ¹⁶Che dxuchi'a, dxuchi'a cáteze naca na, lawe' da quebe dxuchi'a néda'za'. Xra' nasel-le' neda' dxuchi'e tu zren nen neda' ca naca da dxelún bèneache. ¹⁷Lu da nadxiruj bea chee le'e naxúaj gate zaj zra' chupa benne' dxelexechebe' tuz ca dxelenné', naca da li xrtizra' benne' ca'. ¹⁸Néda'queza' dxexecheba' da naca

cheézqueza', na' Xra' nasele-ḷe' neda', cá'anqueze dxexechēbe' chia'.

¹⁹ Nadxa benne' ca' buluchēbe' Jesús:

—¿Ga na' Xrau'?

Jesús bechebe':

—Le'e quebe núnbeale da nácaqueza' neda', ne quebe núnbeaquezle Xra'. Chela da li núnbeale neda', cá'anqueze núnbeale Xra'.

²⁰ Da caní bchalaj Jesús dxácatē na' dxusédene' bēneache chale'aj xudau' naga zaj nnita xi'ina dumí chee xudau'. Quebe nu gudēla Le' lawe' da quebe ne zrin zra chee'.

Dxenná Jesús: “Naga cha'a neda' quebe gaca sa'le le'e”

²¹ Nadxa Jesús guzre' benne' ca':

—Wexá'a neda', na' le'e xexílajle neda', na' wátele lu dul-la nabágale, lawe' da naga cha'a neda', le'e quebe gaca sa'le.

²² Nadxa benne' judío ca' gulé ljwezre':

—¿Gute cuine', ne chee le na' dxenné' quebe gaca chéajdxu naga cheaj Le'?

²³ Nadxa Jesús guzre' benne' ca':

—Le'e nácale chee zran xabáa nigá. Neda' naca' chee xabáa na'la. Le'e nácale chee xezr la xu nigá. Neda' quebe naca' chee xezr la xu nigá. ²⁴ Chee le na' gucha' le'e wátele lu dul-la nabágale, lawe' da che quebe dxéajlele zúaqueza' neda', wátele lu dul-la nabágale.

²⁵ Nadxa benne' ca' buluchēbe' Jesús:

—¿Nuzra nactu' Lue'?

Bechebe Jesús:

—Nácaqueza' ca ba gucha' le'e nédxu-daute. ²⁶ Déle'e da dxal-la' nnia' chee, ne da dxal-la' guchi'a ca naca da dxunle. Bēnea' gusél-ḷe' neda' dxenné' da li, na' da dxapa' bēneache naca na da ba benda' gunné Le', lácala quebe dxezaca ba lázrelele na.

²⁷ Benne' ca' quebe guléajni'ine' dxuchálajle Jesús le' ca naca chee Dios, Xre'. ²⁸ Nadxa Jesús guzre' benne' ca':

—Gate le'e chísale sibe neda', Benne' Gulje' Bēneache, nadxa xúnbeale zúaqueza' neda', ne quebe bi dxuna' da naca cheézqueza'. Tuze dxennéa' ca da ba ble'e Xra' neda'. ²⁹ Bēnea' gusél-ḷe' neda' zúalequeze' neda'. Xra' quebe nucá'ane' neda' tuza' lawe' da tu dxúnzqueza' ca da dxezaca ba lazre Le'.

³⁰ Ca gunná Jesús da caní, guléajle benne' zan chee'.

Benne' zaj naque' chee Dios, ne benne' ca' nuxru dul-la le'

³¹ Nadxa Jesús guzre' benne' judío ca', benne' dxeléajle'e chee':

—Che le'e se típale lu da dxapa' le'e, da li nácale neda' tuze. ³² Gúnbeale da li, na' da li na' guselá na le'e.

³³ Belexechēbe benne' zan ca':

—Netu' nácantu' xrtia Abraham, ne quebe ne chú'untu' lu na' nu benne' ca' benne' zaj nada'u. ¿Bizr chee na' dxenná'u' Lue' lantu'?

³⁴ Jesús guzre' benne' ca':

—Da li dxapa' le'e, xúgute benne' dxelúnqueze' dul-la, dúl-laqueze na' nuxru na benne' ca'. ³⁵ Nu benne' xu'e lu na' tu benne' ca' benne' nada'u quebe tu súazqueze' xu'u na'. Zrí'inequeze bēnea' wazúatequezebe'. ³⁶ Chee le na', che neda', Zrí'ine Xra', guselá' le'e, da li láqueze le'e. ³⁷ Nezda' nácale le'e xrtia Abraham. Na'a dxaca lázrele gútele neda' lawe' da quebe dxez' lu na'le da dxapa' le'e. ³⁸ Neda' dxuchálaja' ca naca da ble'e Xra' neda', na' le'e dxunle ca da guzre xráqueze le'e.

³⁹ Belexechēbe benne' ca':

—Xra xrtauntu' naca Abraham.

Na' Jesús guzre' benne' ca':

—Chela nácale da li xrtia Abraham, na' gunle ca da ben Abraham. ⁴⁰ Lácala gucha' le'e da li da ble'e Xra' neda', le'e dxaca lázrele gútele neda'. Abraham cabata' bene' da caní. ⁴¹ Le'e dxúnquezele ca da dxun xráquezele.

Nadxa benne' ca' gulé'e Jesús:

—Netu' quebe nácantu' bi lan. Zua tuze Xrantu', Dios.

⁴² Nadxa Jesús guzre' benne' ca':

—Chela naca Dios da li Xrale, le'e wazrí'ile neda' lawe' da za'a neda' naga zua Dios, ne zúaqueza' nigá. Quebe za'a da naca cheé'queza'. Dios nasel-le' neda'.

⁴³ ¿Bizr chee' na' quebe dxezéquele chéa-jni'ile da dxennéa'? Naca na lawe' da quebe dxaca lázrele xénele dizra' chia'.

⁴⁴ Xráquezle le'e naca da xriwe'. Le'e nácale chee' da na', ne dxaca lázrele gunle ca da dxaca lazre' le' na. Da xriwe' na' naca na wete benne' nédxudauté. Cabata' dxenné na da li lawe' da quebe bi zua da li nen le' na. Gate dxun lazre' na, dxenné na cáteze naca na, lawe' da tu dxun lázrezqueze na, ne naca na da guzú lau na ben lazre' na. ⁴⁵ Lácala dxapa' le'e da li, le'e quebe dxéajlele chia'. ⁴⁶ ¿Núlale le'e séquele gulé'ele nabaga neda' tu dul-la? Che dxennéa' da li, ¿bizr chee' na' quebe dxéajlele chia'? ⁴⁷ Benne' naque' chee' Dios dxenne' dizra' chee' Dios. Le'e quebe nácale chee' Dios. Chee' le' na' quebe dxaca lázrele xénele chee' Dios.

Cristo ba zúaqueze' nédxudxa ca Abraham

⁴⁸ Nadxa benne' judío ca' gulé'e Jesús:

—Da li dxennantu' gate dxennantu' nacu' benne' Samaria, ne xu'u be' xriwe'.

⁴⁹ Jesús bechebe':

—Quebe xu'a be' xriwe'. Neda' dxapa' ba lá'ana Xra' Dios, na' le'e dxuzúale neda' chalá'ala. ⁵⁰ Quebe dxe'a gunne xue chee' gápale neda' ba lá'ana, ne si' lu na'le neda'. Zua Benne' xabáa dxezá lazre' gápale neda' ba lá'ana, ne Le' dxuchi'e ca da dxunle. ⁵¹ Da li dxapa' le'e: Benne' dxuné' ca naca dizra' chia', cabata' gátequeze bénnea'.

⁵² Nadxa benne' judío ca' belexechebe':

—Na'a nézquezentu' xu'u be' xriwe'. Ba gulátequeze Abraham, ne xúgute

benne' ca' buluchálaje' waláz chee' Dios, na' lue' dxennáu' benne' guné' ca naca dizra' chiu' cabata' gátequeze'. ⁵³ ¿Ná-cadxu' szrendxa ca xra xrtáudxu Abraham? Gútequeze Le', ne cá'anqueze gulate benne' ca' buluchálaje' waláz chee' Dios. ¿Bízraqueze dxugune cuinu'?

⁵⁴ Bechebe' Jesús:

—Che neda' dxucá'ana cuina' ba lá'ana, quebe bi zaca na. Benne' dxape' neda' ba lá'ana naque' Xra', Bénnea' dxennale le'e naque' Xrale. ⁵⁵ Le'e quebe núnbeale Le'. Neda' núnbeaqueza' Le'. Chela dxennéa' quebe núnbe'a Le', naca' wen lazre' ca nácale le'e. Neda' da li núnbe'a Le', ne dxuna' ca da dxenné'. ⁵⁶ Xra xrtáule Abraham, bénnea' gutié' nédxudauté, gubéle'ene' lawe' da dxal-la' lé'ene' zra zua neda'. Blé'ene' na, na' gubéle'ene'.

⁵⁷ Nadxa benne' judío ca' gulé'e Jesús:

—Québequeze ne su' chi xun iza, na' ¿dxennáu' blé'enu' Abraham?

⁵⁸ Jesús bechebe':

—Da li dxapa' le'e, nédxudauté gate quebe ne sua Abraham, báchequeze zua neda'.

⁵⁹ Nadxa gulequé'e xiaj chee' xelu'e Jesús, na' Le' bcache cuine'. Bdee' ládujla benne' ca', na' bedxúaje' chale'aj xudau', ne bezé'e.

Jesús dxexuné' tu benne' gúlaje' la chul-la

9 Gate gudé Jesús tu lataj, na' blé'ene' tu benne' gúlaje' la chul-la. ² Benne' ca' dxusede Jesús buluchebe' Le':

—Benne' Wesede, ¿bizr chee' na' gulaj benne' nigá la chul-la? ¿Naca na lawe' da belún xra xrne'e dul-la, che lawe' da ben lé'queze' dul-la?

³ Jesús guzre' benne' ca':

—Quebe naca na lawe' da ben le' dul-la, ne quebe naca na lawe' da belún xra xrne'e dul-la. Naca na chee' gulé'e lau xel-la' szren chee' Dios ne chee' benne'

nigá. ⁴Dxácatē naca te zra dxal-la' guna' zrin chee Bénnea' nasel-le' neda' lawe' da ba za da chul-la gate netú benne' quebe sequé' guné' zrin. ⁵Dxácatē ne zua' neda' xezr la xu nigá, naca' xel-la' naxaní' chee bēneache.

⁶Ca gudé gunná Jesús da nigá, na' bzre'ē zrené' lu xu, ne bene' guna' nen zrené' na', na' btupe' na xiaj lau benne' la chul-la na'. ⁷Nadxa guzre' le':

—Guxíaj xejtibe lau' lu beaj nisa nazí le na Siloé. (Dizra' nigá zéajē na: Da Nasel-la Na.)

Benne' la chul-la na' guxíajē' xejtibe lawé', na' gate bezrine' ba dxel'é'ne'. ⁸Nadxa benne' walíZR chee' ca', ne benne' ca' belelé'ne' le' nédxula, naque' la chul-la, gulenné':

—¿Quegá benne' nigá bēneea' dxebé'ē dxenabē' guna'?

⁹Bal-le' gulenné':

—Le' na'.

Xebal-le' gulenné':

—Quegá le' na', na' ca'an ca dxenné'ē.

Benne' ná'queze gunné':

—Neda' na'.

¹⁰Nadxa buluchēbe' le':

—¿Ájazra na' ba dxel'é'enu'?

¹¹Bechebe bēneea':

—Bēneea' le' Jesús bene' guna', ne btupe' na xiaj lawa', na' gunné': “Guxíaj beaj nisa nazí le na Siloé, xejtibe lau'.” Guxá'a na', na' gate gudiba' lawa', guca ble'eda'.

¹²Nadxa buluchēbe' le':

—¿Ga na' zua bēneea'?

Le' guzre' benne' ca':

—Quebe nezda'.

Benne' fariseo ca' dxuluchēbe' bēneea' guque' la chul-la

¹³Nadxa benne' ca' guleché'ē bēneea' guque' la chul-la lau benne' fariseo ca'.

¹⁴Naca na zra dxulupá'ana judío ca' gate ben Jesús guna', ne btupe' na xiaj lau benne' la chul-la na'. ¹⁵Chee le' na' benne'

fariseo ca' buluchēbe' bēneea' guque' la chul-la ájazra guca dxel'é'ne'. Le' guzre' benne' ca':

—Bzrie' guna' xiaj lawa', na' bexiba' na, ne dxel'é'eda'.

¹⁶Nadxa bal-la benne' judío ca' gulenné':

—Bēneea' bene' da nigá quebe naque' chee Dios lawe' da quebe dxape' ba lá'ana zra dxupá'anadxu.

Na' xebal-le' gulenné':

—¿Ájazra na' dxune' xel-la' waca zrenté caní chee naque' benne' dul-la?

Ca'an guca, gulaca chupa la'a benne' fariseo ca'. ¹⁷Xecha lasa buluchēbe' bēneea' guque' la chul-la:

—¿Bi dxennáu' lue' chee bēneea' bexune' lue'?

Le' gunné':

—Neda' dxennéa' naque' benne' dxuchalajē' waláz chee Dios.

¹⁸Benne' judío ca' quebe guléajle'ē guque' la chul-la, ne na'a dxel'é'ne', na' gulenné' xra xrna bēneea' bexaque'.

¹⁹Na' buluchēbe' xra xrna bēneea':

—¿Nácaqueze benne' nigá zr'ínele, dxennale le'e gúlajē' la chul-la? ¿Ájazra na' dxaca dxel'é'ne'?

²⁰Belexechebe xra xrne'ē:

—Nézentu' benne' nigá naque' zr'ínentu', ne gúlajē' la chul-la. ²¹Quebe nézentu' aja guca dxel'é'ne' na'a, ne quebe nézentu' nu bexún xiaj lawé'. Le guchébe le'. Ba nápaqueze' iza, ne waca xechébequeze'.

²²Caní gulenná xra xrne'ē lu xel-la' dxelezrebe lawe' da ba zaj nun benne' xíchajē chee judío ca' tuze dizra' xelexe-béajē' xu'u na' núteteze benne' xechēbe' Jesús naque' Cristo. ²³Chee le' na' gulenná xra xrne'ē: “Le guchébe le'. Ba nápaqueze' iza.”

²⁴Nadxa benne' judío ca' belenné' bēneea' guque' la chul-la, na' gul'é'ē le':

—¿Gunné da li lau Dios! Nézentu' naca benne' nigá benne' dul-la.

²⁵ Le' bechebe':

—Quebe nezda' che naque' benne' dul-la, che cabí. Tuze da nezda'. Neda' guca' la chul-la, na' na'a dxelé'eda'.

²⁶ Na' buluchébequeze' le':

—¿Bizra bene' chiu'? ¿Ájazra bene' chee bexune' xiaj lau'?

²⁷ Na' bechebe bènea':

—Ba gucha' le'e, ne quebe dxénele chia'. ¿Bizra chee na' dxaca lázrele nnia' xetú? ¿Cá'aqueze le'e dxaca lázrele gá-cale Le' tuze?

²⁸ Nadxa benne' judío ca' gulenné' schanni' chee bènea' guque' la chul-la, dxelenné':

—Lue' da'u bènea', na' netu' da'ntu' Moisés. ²⁹ Netu' nézentu' Dios bchála-jlene' Moisés. Quebe nézentu' ga benne' benne' nigá.

³⁰ Nadxa bènea' bechebe':

—Da nigá naca na da dxebáneda'. Le'e quebe nézele ga bènea', na' bexune' xiaj lawa'. ³¹ Nézquezdxu Dios quebe dxenne' chee benne' dul-la. Tuze dxenne' chee benne' ca' dxulucá'ana szrene' Le', ne dxelune' ca da dxaca lazre' Le'. ³² Quebe ne xendxu che nu benne' xexune' tu benne' gúlajé' la chul-la. ³³ Chela benne' nigá quebe naque' chee Dios, quebe gaca bi gune'.

³⁴ Nadxa gulé'e le':

—Ca gúlajquezu' dxulé'e na nabagu' dul-la. Na'a, ¿dxaca lazru' guzėjajni'inu' netu'?

Nadxa belexebéaje' le' lu xu'u na'.

Benne' zaj naque' la chul-la lu xichaj lázrdawe'

³⁵ Jesús benne' belexebéaje' bènea' guque' la chul-la, na' gate bezrague' le', guzre' le':

—¿Dxéajle'u lue' chee Zri'ine Dios?

³⁶ Benne' na' guzre' Jesús:

—Xran, guzre neda' Nu na', chee chéajle'a chee'.

³⁷ Bechebe Jesús:

—Ba blé'equeznu' Le'. Neda', dxuchála-jlena' lue' naca' Bènea'.

³⁸ Nadxa benne' na' bzu zribe' lau Jesús, na' gunné':

—Dxéajle'a chiu', Xran.

³⁹ Nadxa gunná Jesús:

—Neda' bla'a lu xezr la xu nigá chee guchi'a ca da dxelún bèneache, chee xeledé'e la chul-la ca', ne chee xelexaca ca la chul-la benne' ca' dxelenné' dxeledé'ene'.

⁴⁰ Nadxa bal-la benne' fariseo ca', benne' zaj zre'e nen Jesús, gate belenne' da nigá gunná Jesús, buluchébe' Le':

—¿Cá'aqueze netu' nácantu' la chul-la?

⁴¹ Jesús bechebe':

—Chela nácale le'e la chul-la quebe nabágale ca naca dul-la da benle. Dxen-nale dxelé'ele, na' chee le' na' nabágale dul-la.

Dxuchalaj Jesús da dxulé'e na ca naca chee le'aj chee zrila' ca'

10 Na' gunná Jesús:
—Da li dxapa' le'e, bènea' quebe dxu'e dxu'a dxa xu'u chee le'aj chee zrila' ca', na' dxu'e naga xula, naque' gubán, ne tu dxebánzqueze'. ² Bènea' dxu'e dxu'a dxa xu'u na' naque' benne' dxuxéqueze' zrila' ca'. ³ Bènea' zue' dxu'a dxa xu'u dxesálajé' chee chu'u bènea' dxuxéqueze'-ba', na' zrila' ca' dxelxúnbeaba' chi'e. Benne' nigá dxu'e la tu tu zrila' ca', ne dxebéaje'-ba' lu le'aj cheeba'. ⁴ Ca dxedé dxebéaje' xúgutęba', na' dxebía lawe' lauba', na' zrila' ca' zjácáleba' Le', lawe' da dxelexúnbeaba' chi'e. ⁵ Quebe zjácáleba' tu benne' quebe zaj núnbeaba'. Dxuluzrúnnyjba' lau benne' na' lawe' da quebe dxelexúnbeaba' chi'i benne' quebe zaj núnbeaba'.

⁶ Bchálajle Jesús benne' ca' da dxulé'e nigá, na' benne' ca' quebe gulėjajni'ine' bi zéaje da guzre Jesús le'.

**Jesús naque' benne'
chawe' dxuxúe' zrila' ca'**

⁷Nadxa Jesús guzre' benne' ca' da xula:

—Da li dxapa' le'e, neda' naca' dxa xu'u naga dxelú'u bénneache zaj naque' ca zrila' chia' ca'. ⁸Xúgute' benne' dxuluxúe' zrila', benne' belelé'e nédxudxa ca neda', gulaque' gubán, ne tu gulebáanzque'e. Zrila' ca' quebe beléneba' chee benne' ca'. ⁹Neda' naca' dxa xu'u. Bénnea' chu'e ne chia' neda', láqueze bénnea'. Gaque' ca tu zrila' dxu'uba', ne dxuajba' le'aj cheeba', na' dxezréleba' zríedu dxáguba'.

¹⁰'Benne' gubán ze'e tuze chee cuane'-ba', ne chee gútete'-ba, ne chee guzría xite'-ba'. Neda' bla'a chee gápale xel-la' nabán, ne chee gapa xánnele na. ¹¹Neda' naca' benne' chawe' dxuxúa' zrila' ca'. Benne' chawe' dxuxúe' zrila' ca' dxuzúe' xel-la' nabán chee' chee guselé' zrila' ca'. ¹²Benne' dxuxúe'-ba' lawe' da dx-ezi'e lazruj, gate dxel'éne' za becu' xi'a, na' dxusane' zrila' ca', ne dxuzrúnnuje', lawe' da quebe nácaqueze' benne' dxuxúe' leba', na' zrila' ca' quebe zaj ná-caba' bē cheézqueze'. ¹³Benne' nigá dxuzrúnnuje' lawe' da dxunze' zrin chee si'e lázruje', na' quebe dxe'e gunne xue cheeba'.

¹⁴⁻¹⁵'Neda' naca' benne' chawe' dxuxúa' zrila' ca'. Cáteze núnbea Xra' neda', na' neda' núnbe'a Xra', cá'aqueze neda' núnbe'a zrila' chia' ca', na' leba' zaj núnbeaba' neda'. Neda' dxuzúa' xel-la' nabán chia' chee guselá' zrila' ca'. ¹⁶Cá'aqueze zaj zra' zrila' chia' quebe zaj zraba' lu le'aj nigá. Dxa-la' cheajxexri'a-ba'. Zrila' ca' xelunba' ca dxenná xrtizra', ne xelácaba' tu cueze, na' tuze benne' guxúe' leba'.

¹⁷'Xra' nazríine' neda' lawe' da dxuzúa' xel-la' nabán chia', na' xecá'a na. ¹⁸Quebe nu seque' cua xel-la' nabán chia'. Neda' xuzúa' na cáteze dxaca lázre-queza' neda'. Napa' xel-la' dxenná bea

guzúa' na, ne chee xecá'a na. Da nigá naca na da gunná be'e Xra' neda' guna'.

¹⁹Gate benne' judío ca' belenne' dizra' caní, na' gulaque' chupa la'a xetú. ²⁰Benne' zan benne' ca' gulenné':

—¿Bizr chee na' dxuzé nágale chee benne' nigá? Xu'e be' xriwe', ne nadá xichaj lázrdawe'.

²¹Xebal-le' gulenné':

—Tu benne' xu'e be' xriwe' quebe séquene' guchálaje' caní. ¿Waca tu be' xriwe' xexún na xiaj lau tu benne' la chulla?

**Dxuluzúa benne' judío
ca' Jesús chalá'ala**

²²Naca na beu' zaga, na' lu xezre Jerusalén zaj zu'e laní gate dxulusá lazre' ca guca gate gulegú'e xudau' na' lu na' Dios. ²³Jesús dxedé' chale'aj xudau' na' naga naca lachila chee Salomón. ²⁴Nadxa benne' judío ca' gulé'chaje' Le', ne gulé'e Le':

—¿Bátalaqueze québedxa gunu' lue' chupa lázrentu'? Che lue' nacu' Cristo, Bénnea' sel-la Dios, gunnátégala.

²⁵Bechebe Jesús:

—Ba gucha' le'e, na' quebe guxéajlele chia'. Ca naca da dxuna' neda', ne dxuchíneda' xel-la' dxenná bea chee Xra', dxululé'e na nu naca' neda'. ²⁶Le'e quebe dxéajlele chia' lawe' da quebe nácale zrila' chia', ca ba gucha' le'e nédxula. ²⁷Zrila' chia' dxelexúnbeaba' chi'a, na' neda' núnbe'a-ba', na' leba' dxelauba' neda'. ²⁸Benne' zaj naque' zrila' chia', dxunézruja' chee benne' ca' xel-la' nabán da zeajlí canna, ne cabáta'quezdxa xelébía xi'e, na' quebe nu seque' xecá'a le' lu na'a neda'. ²⁹Xra' benne' neda' benne' caní, na' Le' nácadxé' szren ca xúgute' bénneache, na' quebe nu seque' xecá'a benne' ca' lu na' Xra'. ³⁰Neda', ne Xra' tuze nácantu'.

³¹ Nadxa benne' judío ca' gulequé'e xiaj xetú chee xelúti'e Jesús. ³² Nadxa Jesús guzre' benne' ca':

—Ba bénqueza' da zan da chawe' laule le'e, dxuchínedá' xel-la' waca chee Xra'. ¿Nula chee da chawe' caní güele neda' xiaj?

³³ Belexechébe benne' judío ca':

—Quebe güentu' lue' xiaj lawe' da nunu' da chawe'. Dxuntu' na lawe' da gunnéu' schanni' chee Dios. Lue' nacu' bénneache, na' dxun cuinu' Dios.

³⁴ Nadxa Jesús guzre' benne' ca':

—Lu da nadxixruj bea cheele le'e naxúaj xrtizra' Dios, dxenná na: Le'e ná-cale dios ca'. ³⁵ Quebe gaca tábagadxu ca da naxúaj na lu xiche chee Dios, na' Diósqueze' gunné' chee benne' ca' gulez'í'e xrtizre' zaj naque' dios ca'. ³⁶ Che Dios bzue' neda', ne gusél-le' neda' lu xezr la xu nigá, ¿bizr chee na' dxennale le'e gunnéa' schanni' chee Dios lawe' da gunnéa' naca' Zri'ine Dios? ³⁷ Che quebe dxuna' ca naca da dxun Xra', quebe chéajlele chia'. ³⁸ Che dxuna' na, lácala quebe dxéajlele chia' ne chee da dxennéa', le chéajle chia' ne chee da ca' dxuna', chee nézele Xra' zúalene' neda', na' neda' zúalena' Xra'.

³⁹ Xetú lasa gulaca lazre' xelej-le' Jesús, na' Le' gulé' lu na' benne' ca'.

⁴⁰ Nadxa bezrín Jesús dxu'a xegu Jordán chalá'a naga dxalaj gubizra, na' begá'ane' na', naga guzúa Juan nédxute dxuchúe' bénneache nisa. ⁴¹ Benne' zan xjaque' xeajlenné'e Jesús, na' gulenné':

—Juan, da li quebe bi xel-la' waca zren bene', na' xúgute da gunné' ca naca chee benne' nigá naca na da li.

⁴² Benne' zan guléajle'e chee Jesús lataj na'.

Ca guca gate gute Lázaro

11 Zua tu benne' dxé'ene' le' Lázaro, benne' xezre Betania, da naca na lazre María, ne bi bile' le' Marta. ² María

nigá, bi zan Lázaro, benne' dxé'ene' na', naque' nu'ula na' gulu'e ni'a Jesús da na' dxelále'e zixre, ne bsebize' na nen xicha xíchaje'. ³ Dxúpaté nu'ula caní gulesel-le' benne' xeajezre' Jesús:

—Xran, bénnea' nazrí'inu' quebe chawe' zue'.

⁴ Ca ben Jesús da nigá, na' gunné':

—Da dxé'ene' quebe naca na da gútete na le'. Naca na chee gulé'e lau na xel-la' szren chee Dios, ne cá'aqueze chee gulé'e lau na xel-la' szren chia' neda', Zri'ine Dios, ne chee xel-la' we' na'.

⁵ Lácala nazrí'i Jesús Marta, ne bi bile', ne Lázaro, ⁶ gate benne' quebe chawe' zua Lázaro na', begá'ane' naga zue' xechupa zra. ⁷ Ca gudé na' guzre' benne' ca' dxusédené':

—Le chu'u naga nababa Judea xetú.

⁸ Nadxa benne' ca' gulé'e Le':

—Benne' Wesede, ná'asca benne' judío ca' zaj zre'e na' gulaca lazre' xelúti'e Lue' nen xiaj. ¿Dxaca lazru' chéaju' na' xetú?

⁹ Jesús guzre' benne' ca':

—¿Quebe nun Dios duté te zra gate dxelún bénneache zrin? Che nu benne' dxedé' te zra, quebe cheajchazié' lu da stébe lawe' da dxelé'ene' xel-la' naxaní' da nuzúa Dios lu xezr la xu nigá. ¹⁰ Che nu benne' dxedé' chizrela, dxechégüe' lawe' da quebe zúale xel-la' naxaní' le'.

¹¹ Ca gudé na' guzre Jesús benne' ca':

—Benne' ljwézredxu Lázaro ba dxási'e. Cha'a neda' cheajsebana' le'.

¹² Nadxa benne' ca' gulé'e Jesús:

—Xran, che dxási'e, wexaque'.

¹³ Da nigá da gunná Jesús zéaje na ba gute Lázaro. Benne' ca' dxusédené' guléquene' gunná Jesús dxáseze'. ¹⁴ Nadxa Jesús bzéajni'ine' benne' ca', gunné':

—Ba gútequeze Lázaro. ¹⁵ Dxebeda' lawe' da quebe zua' na'. Caní gácadxa chawe' cheele le'e, chee chéajlele chia'. Le chu'u cheajnnadxu Lázaro.

¹⁶ Nadxa Tomás, bēnnea' léqueze' bilide', guzre' xezícala benne' ca':

—Le chú'unqueze dxi'u chee gátedxu tu zren nen Jesús.

**Jesús naque' benne' dxusebane'
benne' gate ca', ne benne' dxunne'
dxi'u xel-la' nabán li lazre'**

¹⁷ Gate belezrine' xezre Betania, na' bene Jesús gudapa zra bulucache' Lázaro. ¹⁸ Betania dxe' na gáguze naga dxe' Jerusalén, ca cadite sadxu tu chí'ida'u'ze zrindxu na', ¹⁹ na' benne' zan benne' judío ca' xjaque' xeajlenné'e Marta ne María, na' xulunézruje' le' xel-la' zren lazre' lawe' da gute bi zane'. ²⁰ Gate ben Marta ba za' Jesús, na' guz'é' zeajxrigale' Le', na' María begá'ane' xu'u. ²¹ Marta guzre' Jesús:

—Xran, chela zu' nigá, quebe gute bi zana'. ²² Neda' nezda' Dios gunné' Lue' bíteteze da nabu'.

²³ Jesús gunné':

—Webán bi zanu'.

²⁴ Nadxa Marta guzre' Le':

—Nezda' webane' lu zra xelexebán benne' gate ca', zra bzebe na'.

²⁵ Nadxa gunná Jesús:

—Neda' naca' benne' dxusebáne' benne' gate ca', ne benne' dxunne' xel-la' nabán li lazre'. Nu benne' dxéajle'e chia', lácala gatie', webane', ²⁶ na' xúgute benne' zaj naca bane', ne dxeléajle'e chia', québequeze xelatie' tu chí'ize. ¿Dxéajle'u da nigá?

²⁷ Marta guzre' Jesús:

—Awe', Xran. Neda' dxéajle'a nacu' Cristo, Zri'ine Dios, Bēnnea' guchebe lazre' Dios sel-le'.

**Jesús dxebezre' lawe' da zaj zua
baxache' nu'ula ca'**

²⁸ Ca gudé gunná Marta da nigá, na' guxíaje' xeajzenne' bi bile' María, na' guzre' le' zrize:

—Ba bla' Benne' dxusede, ne dxenné' lue'.

²⁹ Ca ben María da nigá, na' guxase' guz'é'e, xeajnné'e Jesús. ³⁰ Jesús quebe ne chu'e xezre na', na' zue' naga bezraga Marta Le'. ³¹ Benne' judío ca' zaj zra xu'u na' dxulunézruje' María xel-la' zren lazre', gate belelé'ene' guxasa María, ne chadí bdxúaje', na' xjácalle benne' caní le', dxeléquene' zéaje' dxu'a ba zeajchezre' na'.

³² Gate bzrin María naga zua Jesús, na' bzu zribe' zran ni'a Jesús, gunné':

—Xran, chela zu' nigá, quebe gute bi zana'.

³³ Gate ble'e Jesús dxebezre María, ne cá'anqueze dxelebezre judío ca', benne' zjácalle'ne' María, na' bexíajele'ene', ne guzúe' stebe lu lázrdawe'. ³⁴ Na' bchebe' benne' ca':

—¿Ga bcáchele bēnnea'?

Na' gulé'e Le':

—Xran, gudá le'enu'.

³⁵ Na' gudxezre Jesús. ³⁶ Nadxa gu-lenná benne' judío ca':

—Le nna'xque cátitē nazrí'ine' le'.

³⁷ Bal-la benne' ca' gulenné':

—Benne' nigá bexune' benne' la chulla. La zue' nigá, ¿quebe guzéquene' ájala guné' chee quebe gute Lázaro?

Jesús dxusebane' Lázaro

³⁸ Jesús guzúe' stebe xetú, na' bzrine' dxu'a ba. Ba na' naca na tu bluaj, na' da tu xiaj ta'a dxu'e na. ³⁹ Gunná Jesús:

—Le xecá'a xiaj nigá.

Marta, bi zan benne' gate na' guzre' Jesús:

—Xran, ba dxelá bēnnea' tula, lawe' da ba guca tapa zra na'a gutie'.

⁴⁰ Na' Jesús gunné':

—¿Quebe gucha' lue' che chéajle'u chia', walé'enu' xel-la' szren chee Dios?

⁴¹ Nadxa belexequé'e xiaj ta'a na'. Jesús guné'e xabáa, gunné':

—Xrae, dxapa' Lue': "Xcalenu" lawe' da ba bennu' chia'. ⁴²Neda' nezda' tu dxénzquezenu' chia'. Dxennéa' da nigá chee gaca tu da ba neza chee benne' caní, chee xeléajle'e chiu' nasel-lu' neda'.

⁴³Ca gudé gunné' da nigá, na' gunné' zizraj:

—¡Lázaro, bedxúaj nigá!

⁴⁴Bedxúaj benne' gate na', nadxéaj ni'a ne'e nen ládxedau' da buluchele' ni'a ne'e, na' lawe' dxela na ladxé'. Jesús guzre' benne' ca':

—Le xesezre', ne le gusane' xexíaje'.

**Benne' dxeledábage' Jesús
dxeluné' tuze dizra' xelél-le' Le'**

(Mt. 26.1-5; Mr. 14.1-2; Lc. 22.1-2)

⁴⁵Nadxa guléajle benne' zan chee Jesús, benne' judío ca' xjácale María, ne belelé'ene' ca da ben Jesús. ⁴⁶Balla benne' ca' xjaque' xejlechálajlene' benne' fariseo ca', na' buluzenne' le' ca da ben Jesús. ⁴⁷Nadxa fariseo ca', ne benne' xíchaje ca' chee bxruze ca' belezrague' nen benne' xu'u lawe' blau chee judío ca', na' gulenné':

—¿Ájazra gundxu? Benne' nigá dxúnle'e xel-la' waca da za xabáa. ⁴⁸Che ca' güedxu Le' lataj, xúgute' bénneache xelajlé'e chee' chee xuluzúe' Le' ca wenna' bea, na' xelélé' benne' Roma ca', benne' zjaque' wedil-la, na' xuluzría xi'e xudau' cheedxu, ne xezr la xu cheedxu.

⁴⁹Nadxa tu benne' le' Caifás, bxruze blau iza na', guzre' benne' ca':

—Le'e québequeze bi nézele, ⁵⁰ne quebe dxeque be'ele gácadxa chawe' cheedxu gate' tuze benne' ne chee xezre nigá, ne quegala ca naca xezr la xu nigá cuía xi na.

⁵¹(Quegá gunná Caifás da nigá cheézqueze'. Lawe' da naque' bxruze blau iza na', bchálaje' waláz chee Dios, gunné' gate' Jesús ne chee xezr la xu judío. ⁵²Quegá gatie' tuze ne chee xezr la xu naze. Cá'anqueze chee xutupe' lu

na' Dios xúgute' benne' zaj naque' chee Dios, benne' zaj nase dínnaje', benne' ca' zaj nababe' xúgute' cue' xezr la xu.) ⁵³Ca'an guca, ca lu zra na'te benne' judío wenna' bea ca' belune' tuze dizra' xelútie' Jesús.

⁵⁴Chee le na' Jesús québedxa gudé' naga zaj zra' benne' wenna' bea ca' chee judío ca', na' guzé'e naga nababa Judea, na' guxíaje' xezre Efraín naga zua gáguze tu le'e xixre' lawe' lataj. Begá'ane' xezre na' nen benne' ca' dxusédene'.

⁵⁵Ba zua gáguze zrin Laní Pascua chee judío ca', na' benne' zan chee xezre ca' xjaque' Jerusalén chee xulucá'ana chawe' cuine' nédxudxa ca zrin Laní Pascua. ⁵⁶Guledé' dxelexilaje' Jesús, na' gate zaj zre'e chale'aj xudau' na', buluchébe ljwezre':

—¿Ajazra dxéquele? ¿Wide' laní, che quebe xide'?

⁵⁷Benne' fariseo ca', ne benne' xíchaje ca' chee bxruze ca' ba gulebéaje' dizra' che nu benne' ca' nézene' ga zua Jesús, na' xelé'e benne' ca' chee gaca xelél-le' Le'.

**María dxugu'e da
dxelá zixre ni'a Jesús**

(Mt. 26.6-13; Mr. 14.3-9)

12 Xrupa zra nédxudxa gate za chu'u Laní Pascua chee judío ca', guxíaj Jesús xezre Betania naga zua Lázaro, bénnea' bsebán Jesús ládujla benne' gate'. ²Lu xezre na' belune' tu xrche', chee gulape' ba lá'ana Jesús. Marta bdee' xel-la' wagu, na' Lázaro dxé'lene' benne' ca' dxelágulene' Jesús. ³Nadxa María guqué'e tu xia da za da dxelále'e zixre, da naca na chee dusén lase, da zácále'e na, na' gulu'e da za na' ni'a Jesús, ne bsebizre' na nen xicha xíchaje'. Ca naca benne' zaj zra' xu'u na' gulelé'ene' ca dxelá da zixre na'. ⁴Nadxa Judas Iscariote, zri'ine Simón, tu benne' ca' dxusede

Jesús, ne naque' bënnea' gudé'e Jesús lu na' benne' guledábage' Le', gunné':

⁵—¿Bizr chee na' quebe gudá'u da zixre na', na' sidxu na dumí lazruj chee chunna gaxúa zra chee gácalēdxu benne' xache' ca'?

⁶Quebe gunná Judas da nigá lawe' da dxe'e gunne xue chee benne' xache' ca'. Naque' gubán, ne nu'e bzude dumí chee benne' ca' dxusede Jesús, ne dxe-bane' late' weaj dumí na' da dxuluzré'e lu bzude na'. ⁷Nadxa Jesús guzre' Judas na':

—Be lataj nu'ula nigá lawe' da bene' da nigá chee dxucá'ana chawe' neda' chee gate xulucache' neda' lu xēdxu ba. ⁸Benne' xache' ca' tu zrázqueze' ládujla le'e. Neda' quebe tu súazqueza' nen le'e.

Dxelunē' tuze dízra' xelútiē' Lázaro

⁹Zane' benne' judío ca' belenne' zua Jesús xēzre Betania, na' xjaque' na', quegá tuze zeajlenné'e Jesús. Cá'anqueze zeajlenné'e Lázaro, bënnea' bsebán Jesús ládujla benne' gate ca'. ¹⁰Nadxa benne' xíchaje' ca' chee bxruze ca' belunē' tuze dízra' cá'anqueze xelútiē' Lázaro, ¹¹lawe' da ne chee Lázaro benne' zan benne' judío ca' dxelebéaj xíchaje' bxruze ca' chee xeleajlé'e chee Jesús.

Dxexú'u Jesús Jerusalén

(Mt. 21.1-11; Mr. 11.1-11; Lc. 19.28-40)

¹²Benne' zan ba zjaca Jerusalén, zjaque' Laní Pascua na', na' zra xula belenne' ba za' Jesús lu xēzre na'. ¹³Nadxa gulechugue' zina', na' xjaque' xeajlexrí-gale' Jesús, ne dxeleñné' zizraj:

—¡Gaca ba lá'azxa Dios! ¡Ba neza zrentē naca na chee Benne' ze'e waláz chee Xránadxu Dios! ¡Ba neza zrentē naca na chee Wenná Bea chee xēzre Israel!

¹⁴Jesús xeajxraque' tu burro, na' guzríe'-ba', ca naxúaj na lu xiche chee Dios, dxenná na:

¹⁵Quebe zrēbele le'e, benne' zre'e xēzre Sión.

Le nna'xque, ba za' Wenná Bea chee. Zrie' tu burro.

¹⁶Nédxute' benne' ca' dxusede Jesús quebe guléajni'ine' da na' dxaca na. Ca gudé na', gate begá'ana szren Jesús lau Dios, na' xeajlesá lazre' xúgute' da caní zaj naxúaj na lu xiche chee Dios ca naca chee Jesús, na' ca'an guca chee'.

¹⁷Benne' ca' zaj zre'e nen Jesús gate gunné' Lázaro lu xēdxu ba, ne bsebane' le' ládujla benne' gate, buluzenne' bēnneache Jerusalén ca da guca na'. ¹⁸Chee le' na' benne' caní xeajlexrí-gale' Jesús lawe' da belenne' ca naca xel-la' waca zrentē da bene'. ¹⁹Nadxa benne' fariseo ca' gulé' ljwezre':

—Ba dxelé'ele quebe séquedxu bi gundxu. Ca naca bēnneache dxelunē' Le' tuze.

Dxelexilaj benne' griego ca' Jesús

²⁰Zaj zra' bal-la benne' griego ca' ládujla benne' ca' belezrine' Jerusalén chee xulucá'ana szrene' Dios lu laní na'. ²¹Benne' caní belezrine' lau Felipe, benne' Betsaida chee ga nababa Galilea, ne naque' Jesús tuze, na' gulata' xuene' le', dxeleñné':

—Benne', dxaca lázrentu' le'entu' Jesús.

²²Felipe guxíaje' xeajezre' Andrés caní, na' xjaca dxupe' xeajleguezre' Jesús ca'. ²³Nadxa Jesús guzre' benne' dxupa ca':

—Ba bzrin zra xegá'ana szrena' neda', Benne' Gulje' Bēnneache. ²⁴Da li dxapa' le'e, tu binne zrúa' xtila wegá'ana na tuze na che quebe xexruj na lu xu, ne gacu na xu. Che gacu na xu, na' gunna na lina. Caní dxal-la' gaca chia' neda'.

²⁵Benne' dxe'e gunne xue gapa chí'e xel-la' nabán chee' gunitiē' na. Bēnnea' dxuzúe' chalá'ala xel-la' nabán chee' lu xēzre la xu nigá, gapa chí'e na, ne zrué'ene'

xel-la' nabán da zeajlí canna. ²⁶Che nu benne' dxaca lazre' gune' zrin chia', dxal-la' gaque' neda' tuze, na' gáteteze sua' neda', na' súaqueze benne' dxune' zrin chia'. Che nu benne' dxune' zrin chia', Xra' gape' le' ba lá'ana.

Jesús dxuchálaje' ca gaca gate gatie'

²⁷ Gunná Jesús:

—Na'a stébele'e zua'. ¿Bizra nnia'? ¿Nnia': Xrae, bselá neda' lu da dxal-la' gaca chia' na'a? Belájueza' chee gaca chia' da caní. ²⁸Xrae, bca'ana szren lau'.

Nadxa ben tu chi'i benne' dxenné' xabáa:

—Ba bca'ana szrena' na, ne gucá'ana szrena' na xetú.

²⁹ Benne' ca' zre'e na' dxellené' gulenné' guziu' gunné. Xebal-le' gulenné':

—Tu gubáz chee xabáa bchálajlene' Le'.

³⁰ Nadxa Jesús guzre' benne' ca':

—Quegá gunné chi'e na' ne chia' neda'. Gunné na ne chee le'e. ³¹ Na'a ba bzrin zra guchi'a Dios chee bèneache zre'e xezr la xu nigá, na' na'a cueaj Dios chalá'ala da xriwe', da na' dxenná bea na lu xezr la xu nigá, chee québedxa nna bea na. ³² Gate xelechise' neda' lu xezr la xu nigá le'e xaga béguaj, na' neda' nnia' xúgute bèneache chee xelaque' neda' tuze.

³³ Gate gunné' caní, ble'e Jesús ca gatie'. ³⁴ Nadxa benne' zan ca' gulé'e Jesús:

—Netu' bémentu' ca da naxúaj na lu xiche chee da nadxixruj bea na da dxenná na waca bánqueze Cristo chadía chacanna. ¿Bizr chee na' dxennáu' Benne' Gulje' Bèneache xelechise' Le'? ¿Nuzra na' Benne' Gulje' Bèneache?

³⁵ Nadxa Jesús guzre' benne' ca':

—Xetú chí'idauze xel-la' naxaní' sua na ládujla le'e. Le ta na'a dxácaté ne zua xel-la' naxaní' nen le'e, chee quebe xrínnele, lawe' da benne' dxedé' lu da chul-

la quebe nézene' ga zéaje'. ³⁶ Le cheajlé chee xel-la' naxaní' da naca' neda' dxácaté zua xel-la' naxaní' nen le'e, chee gácale tuze xel-la' naxaní' na'.

Ca gudé gunná Jesús da nigá, na' bezé'e bcache cuine' lau benne' ca'.

Benne' judío ca' quebe dxeajlé'e chee Jesús

³⁷ Lácala ble'e Jesús zane' xel-la' waca zrente lau benne' judío ca', quegá xúgute' guleajlé'e chee', ³⁸ lawe' da ben na ba xen guca ca da gunná Isaías, benne' bchálaje' waláz chee Dios, gunné':

Xran, ¿nuzra guxeajlé chee dizra' cheedxu?

¿Nuzra na' ble'e Xránadxu xel-la' waca chee'?

³⁹ Ca'an guca, quebe guca xeleajlé'e chee' lawe' da caní gunnáqueze Isaías na':

⁴⁰ Dios bene' benne' ca' la chul-la, ne bene' zide' lázrdawe',

chee quebe xelelé'ene' nen xiaj lawe', ne quebe xeléajni'ine' lu xichaj lázrdawe',

ne quebe xelelé'e lawa' neda' chee xexuna' le'.

⁴¹ Isaías na' gunné' da nigá lawe' da blé'ene' xel-la' szren chee Jesús, ne bchálaje' ca naca chee'.

⁴² Zane' benne' judío ca' guléajlé'e chee Jesús, ne cá'anqueze bal-la benne' xíchaje' ca'. Quebe belexechebe' lávela bèneache lawe' da belezrebe' da xelún benne' fariseo ca', chee quebe xelexebéaje' le' xu'u naga dxelezrague'. ⁴³ Caní belune' lawe' da beledánedxene' xel-la' ba lá'ana da dxelúe bèneache le' ca xel-la' ba lá'ana da dxue Dios le'.

Dizra' chee Jesús guchi'a na chee da dxelún bèneache

⁴⁴ Jesús gunné' zizraj:

—Benne' dxéajlé'e chia', quegá cheeza' dxéajlé'e, cá'anqueze dxéajlé'e chee Xra' nasel-le' neda'. ⁴⁵ Bènea' dxelé'ene'

neda', dxel'équezne' Xra' nasele' neda'.
⁴⁶Neda', xel-la' naxani', bla'a lu xezr la xu nigá chee québedxa xelxegá'ana benne' dxeléajle'e chia' lu da chul-la.
⁴⁷Che nu benne' dxenne' dizra' chia', ne quebe dxune' ca naca na, quegá neda' guzría xi'a le', lawe' da quebe bla'a neda' chee guzría xi'a bénneache. Bla'a chee geselá' benne' ca'.
⁴⁸Benne' dxuzúe' neda' chalá'ala, ne quebe dxune' ca naca dizra' chia', ba zua da guzría xi na le'. Dizra' da ba gunnéa' naca na da guzría xi na bénnea' lu zra bzebe na'.
⁴⁹Caní gaca na lawe' da quebe dxuchálaja' cheézqueza', lawe' da Xra' nasele' neda' ba gunná bé'ene' neda' bi dxal-la' nnia', ne bi dxal-la' gusededa'.
⁵⁰Neda' nezda' gunná be'e Xra' neda' caní chee xezeque bénneache xelape' xel-la' nabán da zeajlí canna. Ca'an naca, da dxennéa' neda', dxennéa' na ca gunná be'e Xra' neda'.

Jesús dxibe' ni'a benne' ca' dxusédene'

13 Naca na zra nedxu gate za chu'u Laní Pascua chee judío ca'. Jesús ba nézene' ba bzrin zra xezé'e lu xezr la xu nigá chee xexíaje' naga zua Xre'. Nazrí'iquezne' benne' zaj naca chee', benne' zaj zre'e xezr la xu, na' na'a ba zua gul'éene' benne' ca' tu da zrendxa da gul'é na nazrí'ine' le'.

²⁻⁴Da xriwe' ba nagú'u na xichaj lázxdau Judas Iscariote, zri'ine Simón, ca dxal-la' guné' chee gudée' Jesús lu na' benne' guledábague' le'. Nézqueze Jesús ze'e naga zua Dios, ne dxal-la' xezrine' naga zua Dios, na' Xre' ba bnézruje' le' dute xel-la' dxenná bea. Chee le' na', gate dxelawe' xrche', guxasa Jesús, na' gudúe' ladxe' naxrúa cuzre', ne bnase' tu ladxe' dxu'a le'e.
⁵Nadxa gudé'e nisa tu zriga xia zren, ne guzú lawe' dxibe' ni'a benne' ca' dxusédene', na' bsebizre' ni'e nen ladxe' na' da nunase' dxu'a le'e.

⁶Ca bzrine' chee quibe' ni'a Simón Pedro, le' guzre' Jesús:

—Xran, ¿Lue' quíbequezu' ni'a?

⁷Jesús bechebe':

—Na'a quebe dxéajni'inu' da dxuna'. Te na'a chéajni'inu' na.

⁸Pedro guzre' le':

—Cabata' quibu' ni'a.

Jesús guzre' le':

—Che quebe quiba' ni'u, quebe gaca gacu' neda' tuze.

⁹Na' Simón Pedro guzre' Jesús:

—Xran, quegá tuze ni'a quibu'. Cá'anqueze na'a, ne xíchaja'.

¹⁰Jesús guzre' le':

—Benne' ba bexuzrte' guzje', tuze ni'e dxal-la' chadxe lawe' da ba naxádxexeze'. Le'e ba naxádxele, san quegá xúgutele.

¹¹Gunná Jesús: “Quegá xúgutele”, lawe' da nézene' nu na' gudée' le' lu na' benne' dxeledábague' le'.

¹²Ca gudé gudibe Jesús ni'a benne' ca', na' bexrúe' ladxe' chee' cuzre', ne bebe'e ga dxelawe', na' guzre' benne' ca':

—¿Dxéajni'ile le'e da ba bēna'?
¹³Le'e dxele neda': Benne' Weséde, ne: Xran, na' caní dxal-la' nnale lawe' da caní naca'.

¹⁴Che neda', Benne' Weséde cheele, ne Xránale, ba gudiba' ní'ale, cá'anqueze le'e dxal-la' quíbele ni'a ljwézrele tule xetule.
¹⁵Neda' ba ble'eda' le'e tu da dxulé'e na, chee gunle le'e ca da bēna' neda'.

¹⁶Da li dxapa' le'e, tu benne' wen zrin quebe nácadxe' szren ca xrané', na' tu benne' gubáz quebe nácadxe' szren ca benne' nasele' le'.
¹⁷Che dxéajni'ile da caní, ne dxunle ca zaj naca na, gaca cheele tu da ba neza.

¹⁸'Quebe dxuchálaja' chee xúgutele le'e. Neda' núnbe'a benne' ca' gucá'a, san dxal-la' gaca ca naxúaj na lu xiche chee Dios, dxenná na: Benne' dxágule neda' ba gudábague' neda' chee gudée' neda'.
¹⁹Dxapa' le'e da nigá na'a, nédxula gate quebe ne gaca na, chee gate gaca na,

na' chéajle le'e zúaqueza' neda'.²⁰ Da li dxapa' le'e: Benne' dxezí' lu ne'e Bénnea' dxusel-le' neda', neda' na' dxezí' lu ne'e, na' benne' dxezí' lu ne'e neda', dxezí' lu ne'e Xra' nasel-le' neda'.

Dxenná Jesús gudé Judas Le' lu na' benne' dxeledábague' Le'

(Mt. 26.20-25; Mr. 14.17-21; Lc. 22.21-23)

²¹ Ca gudé gunná Jesús da nigá, na' guzúe' stebe lu xichaj lázrdawe', na' bzéajni'ine' benne' ca', gunné':

—Da li dxapa' le'e, tu benne' ládujla le'e gudé' neda' lu na' benne' ca' dxeledábague' neda'.

²² Nadxa benne' ca' dxusede Jesús gulezú lawe' dxelenná' ljwezre', ne quebe zaj nézene' nu chee na' dxuchalaj Jesús.

²³ Tu benne' ca' dxusede Jesús, bennea' nazrí'ile'e Jesús le', zu'e' cuita Jesús naga dxelawe' xrche',²⁴ na' Simón Pedro bene' tu da dxunna bea lau bennea' chee guchebe' Jesús nu chee na' dxenné' caní.

²⁵ Nadxa bennea' de'e cuita Jesús bchebe' Le':

—Xran, ¿nuzra na'?

²⁶ Bechebe Jesús:

—Gusebisa' late' xeta xtila, na' bennea' gunézruja' na, benne' ná'queze'.

Nadxa Jesús bsebise' late' xeta xtila, na' bnézruje' na chee Judas Iscariote, zri'ine Simón.²⁷ Ca gucá'a Judas xeta xtila na', na' da xriwe' guxú'ute na lu xichaj lázrdawe'. Nadxa Jesús guzre' le':

—Da dxal-la' gunu', béntega na.

²⁸ Benne' ca' zaj zre'e dxelawe' na' quebe guléajni'ine' bizr chee na' guzre' Judas na' caní.²⁹ Lawe' da nua Judas bzude' dumí, bal-le' guléquene' Jesús guzre' le' bi si'e chee laní na', u bi gunézruje' benne' xache' ca'.³⁰ Ca gudé gudagu Judas xeta xtila na', na' bdxúaje'. Ba guxrinne.

Da nadxiruj bea cube

³¹ Ca gudé bdxuaj Judas, gunná Jesús:

—Na'a gulé'e lau xel-la' szren chia' neda', Benne' Gulje' Bénneache, na' xegá'ana szren Dios ne' chia' neda'.

³² Che neda', Benne' Gulje' Bénneache, dxulé'eda' ca naca xel-la' szren chee Dios, na' Dios gulé'ene' ca naca xel-la' szren chia' neda', ne la gúntequeze' na.

³³ Le'e, bidu chia' ca', québedxa sua' scha' nen le'e. Le'e wexílajle neda', san ca gucha' benne' judío ca', dxapa' le'e na'a, quebe gaca sa'le le'e naga cha'a neda'.

³⁴ Tu da cube dxiruj be'eda' le'e. Le zri'i le sa' ljwézrele tule xetule ca neda' nazrí'ida' le'e. Caní dxal-la' zri'i ljwézrele tule xetule.

³⁵ Che nazrí'i ljwézrele tule xetule, na' xúgute bénneache xeleque bé'ene' ná'cale neda' tuze.

Jesús dxenné' nna Pedro quebe núnbe'e Le'

(Mt. 26.31-35; Mr.

14.27-31; Lc. 22.31-34)

³⁶ Simón Pedro bchebe' Jesús:

—Xran, ¿gazra chéaju'?

Bechebe Jesús:

—Naga cha'a neda', quebe gaca sá'lenu' neda' na'a. Te na'a wadéquezu' naga tea' neda'.

³⁷ Nadxa gunná Pedro:

—Xran, ¿bizr chee na' quebe gaca sá'lena' Lue' na'a? Zúaqueza' guzú'a xel-la' nabán chia' chee guna' Lue' tuze.

³⁸ Jesús bechebe':

—¿Zúaquezu' guzú' xel-la' nabán chiu' chee gacu' neda' tuze? Da li dxapa' lue', nédxudxa ca cuezre xjeaj, lue' waná'quezu' chunna lasa quebe núnbe'u neda'.

**Jesús naque' neza da dxezrín
na naga zua Xradxu Dios**

14 Gunná Jesús:
—Quebe cuele le'e gunne xue. Le guxrén lazre' Dios, ne le guxrén lazre' neda'. ²Lizre Xra' déle'e lataj naga súale. Chela quebe naca na caní, neda' ba gucha' le'e. Wexá'a cheajxecueza' lataj chee. ³Ca te xexá'a cheajxecueza' lataj chee, na' wexelájqueza' xetú chee xedajxezri'a le'e súalele neda', chee súale le'e naga súaqueza' neda'. ⁴Le'e nézele naga cha'a, ne núnbeale neza na'.

⁵Tomás guzre' Jesús:

—Xran, quebe nézentu' ga chéaju'. ¿Ájazra guntu' gúnbeantu' neza na'?

⁶Jesús bechebe':

—Neda' naca' neza na', ne naca' da li, ne naca' xel-la' nabán. Tuze ne chia' neda' waca zrinle naga zua Xra'. ⁷Chela núnbeale neda', cá'aqueze núnbeale Xra'. Ná'atēla núnbeale Le' lawe' da ba dxel'éle Le'.

⁸Nadxa Felipe guzre' Jesús:

—Xran, ble'e netu' Xrau', xetú da ná'teze.

⁹Bechebe Jesús:

—Felipe, scha' ba guzúaleña' le'e, na' ¿quebe ne gúnbe'u neda'? Benne' dxel'éne' neda', dxel'équezene' Xra'. Chee le na', ¿bizr chee na' dxenabu' neda' gul'éda' le'e Xra'? ¹⁰¿Quebe dxéajle'u zúaleña' Xra', na' Xra' zúaleñe' neda'? Da dxapa' le'e, quegá dxennéa' na cheézqueza'. Xra', Bénnea' zúaleñe' neda', Léqueze' na' dxuné' zrin chee' lu na'a neda'. ¹¹Le chéajlele zúaleña' Xra', na' Xra' zúaleñe' neda', u che cabí dxéajlele ca da dxennéa', le chéajle chia' ne chee da ca' dxuna'. ¹²Da li dxapa' le'e, benne' dxéajle'e chia', gúnqueze' ca da dxuna' neda', na' guné' da zaj nácadxa zren ca da caní dxuna' lawe' da xexá'a neda' naga zua Xra'. ¹³Xúgute da nábale le'e lu La' neda', neda' guna' na, chee

gul'éda' neda' xel-la' szren chee Xra'. ¹⁴Néda'queza' guna' bíteteze da nábale lu La' neda'.

**Jesús dxechēbe lazre'
sel-le' Be' Lá'azxa**

¹⁵Gunná Jesús:

—Che le'e nazrí'ile neda', le guzúa dizra' ca naca da dxixruj be'eda' le'e. ¹⁶Neda' gata' xueda' Xra' sel-le' chee xetú Benne' gácalequeze' le'e, ne súaletecaze' le'e. ¹⁷Benne' nigá naque' Be' Lá'azxa gul'éne' le'e ca naca da li. Benne' zaj naca chee xezr la xu nigá quebe xelezéquene' xelezí' lu ne'e Le' lawe' da quebe gaca xeledé'ene' Le', ne quebe zaj núnbe'e Le'. Le'e núnbeale Le' lawe' da zúaleñe' le'e, ne súaqueze' lu xichaj lázrdaule. ¹⁸Quebe gucá'ana' le'e ca bi wezebe ca'. Welá'queza' súaleña' le'e. ¹⁹Xetú chí'idau' bénneache ca' québedxa xeledé'ene' neda', san le'e welé'ele neda'. Le'e tu gaca bánzquezle lawe' da tu naca bánzqueza' neda'. ²⁰Lu zra na' guéquebe'ele neda' zúaleña' Xra', na' le'e zúalele neda', na' neda' zúaleña' le'e. ²¹Benne' nézene' ca naca da nadxixruj bea na nuna' neda', ne dxuné' na, dxulé'ene' nazrí'iqueze' neda'. Xra' zrí'ine' benne' nazrí'ine' neda', na' cá'aqueze neda' zri'ida' bénnea', ne gul'é lawa' le'.

²²Judas, quegá bénnea' le' Iscariote, guzre' Jesús:

—Xran, ¿bizr chee na' gul'é lau' netu', ne quegá gul'é lau' lau bénneache zaj zre'e xezr la xu nigá?

²³Jesús bechebe':

—Benne' nazrí'ine' neda' dxuné' ca naca da dxennéa', na' Xra' zrí'ine' bénnea', na' neda' ne Xra' xedajsúalentu' le'. ²⁴Benne' quebe nazrí'ine' neda' quebe dxuné' ca da dxennéa'. Ca naca dizra' da dxénele quebe zaj naca na cheézqueza'. Zaj naca na chee Xra' nasele' neda'.

²⁵'Dxapa' le'e xúgute da caní dxácate ne zúaleña' le'e, ²⁶na' Be' Lá'azxa, Bén-

nea' sel-la Xra' lu La' neda' chee gácalene' le'e, Le' gulé'ene' le'e xúgute, ne gusá'queze' lázrele ca naca xúgute da ba gucha' le'e.

²⁷ 'Xel-la' dxebeza zri lazre' dxuca'ana' chee. Dxunna' le'e xel-la' dxebeza zri lazre' chia'. Quebe dxunna' na ca dxelunna bénneache xel-la' dxebeza zri lazre'. Quebe cuele gunne xue, ne quebe zrébele. ²⁸ Ba bénele gunnéa' wexá'a, ne welá'a súalena' le'e xetú. Chela da li nazrí'ile neda', suale xel-la' dxebé, lawe' da xexá'a naga zua Xra', na' nácadxa Le' szren ca neda'. ²⁹ Da nigá dxapa' le'e na' nédxula gate quebe ne gaca na, chee gate gaca na, na' chéajlele chee da dxennéa'.

³⁰ 'Québedxa guchálajleteca' le'e da zren lawe' da ba za' da xriwe', da na' dxenná bea na lu xezr la xu nigá. Da na' quebe seque na bi gune na neda'. ³¹ Caní dxal-la' gaca chee xeleneze bénneache neda' nazrí'ida' Xra', ne dxuna' ca da gunná bé'ene' neda'. ¡Le chasa! ¡Le xebú'u nigá!

Jesús dxuchálaje' chee lba uva ne chee zruze na ca'

15 Gunná Jesús: —Neda' naca' ca tu lba uva da naca na li lazre', na' Xra' naque' ca tu benne' dxá'ane' na. ² Le' dxechugue' zruze na ca' da quebe dxelebía na da zixre, ne dxun chí'e zruze na ca' da dxelebía na da zixre chee xelebíadxa na. ³ Le'e nácale ca zruze na ca' da ba nun chí'e, ne chee dizra' da ba gucha' le'e. ⁴ Le' súaqueze gácale neda' tuze ca neda' tu zúalezqueza' le'e. Tu zruze xaga quebe gaca cuía na da zixre cheézqueze na che quebe súalequeze na xaga na'. Cá'anqueze le'e quebe bi gaca gunle che quebe tu gácazquezele neda' tuze.

⁵ 'Neda' naca' bzrigu lba uva, na' le'e nácale zruze na ca'. Bénnea' naque' neda' tuze, na' neda' naca' le' tuze, naque' ca tu zruze na da dxeblále'e na da zixre,

lawe' da quebe bi seque' gunle che quebe gácale neda' tuze. ⁶ Benne' quebe súatequeze' nen neda' gaque' ca tu zruze na da dxugu na, na' bizre na. Xuluxutu-pe' zruze na bizre ca', ne xuluzré'e na lu xi'.

⁷ 'Che le'e súatequezele neda' tuze, ne quebe gusanle dizra' chia', waca nácale ca da dxaca lázrele, na' sile na. ⁸ Xra' dxegá'ana szren'e' gate nácale ca zruze na ca' da dxelebíale'e na da zixre, ne caní gaca bea na nácale neda' tuze. ⁹ Neda' nazrí'ida' le'e ca nazrí'i Xra' neda'. Chee le na' le' súaquezele lu xel-la' zri'i lazre' chia'. ¹⁰ Che gunle ca da dxixruj be'eda' le'e, na' súatequezele lu xel-la' zri'i lazre' chia', ca dxuna' neda', dxuna' ca bdxixruj be'e Xra' neda', ne zúatequeza' lu xel-la' zri'i lazre' chee'.

¹¹ 'Neda' dxuchálajlëna' le'e caní chee súale lu xel-la' dxebé chia', ne chee gaca du lazre' xel-la' dxebé chee. ¹² Cani naca da dxixruj be'eda' le'e: Le zri'i le sa' ljawézele tule xetule ca neda' nazrí'ida' le'e. ¹³ Xel-la' zri'i lazre' da naca szrendxa naca bea na che tu benne' guzúe' xel-la' nabán chee' chee gácalene' bi ljawezre' ca'. ¹⁴ Le'e nácale bi ljawezra' che dxunle ca da dxixruj be'eda' le'e. ¹⁵ Québedxa xapa' le'e nácale bi wen zrin chia' lawe' da quebe neze bi wen zrin bi da gun xránabe'. Dxapa' le'e nácale bi ljawezra' lawe' da ba bzenda' le'e xúgute da guzre Xra' neda'. ¹⁶ Le'e quebe gunnéle neda'. Neda' gunnéa' le'e, ne ba nuzúa' le'e chee gácale ca zruze lba na' da dxelebíale'e na da zixre, na' tu súazqueze da zixre na'. Che gunle caní, na' Xra' gunne' le'e xúgute da nácale lu La' neda'. ¹⁷ Da nigá naca na da dxixruj be'eda' le'e: Le zri'i le sa' ljawézele tule xetule.

Bénneache chee xezr la xu nigá dxelecuíden'e' Jesús, ne cá'anqueze benne' chee' ca'

¹⁸ Nadxa gunná Jesús:

—Che bēneache dxelecuídene' le'e, dxal-la' cheajsá lázrele belecuídequeze' neda' nédxute. ¹⁹ Chela nácale le'e chee xezr la xu nigá, na' xelezrí'i bēneache le'e ca zaj nazrí'ine' le sa' ljwezre' ca'. Neda' ba gucá'a le'e ládujla bēneache chee xezr la xu nigá, na' chee le na' dxelecuíde bēneache le'e lawe' da québedxa nácale xezr la xu nigá tuze. ²⁰ Le gusá lázrele da gucha' le'e, gunnéa': Netú benne' wen zrin quebe nácadxe' szren ca xranē'. Che guláu zi' xuzre' neda', cá'anqueze xelau zi' xuzre' le'e, na' che belunē' ca dxenná dizra' chia', cá'anqueze xelunē' ca dxenná dizra' chee le'e. ²¹ Xúgute da caní xelunē' chee le'e lawe' da nácale chia', ne lawe' da quebe zaj núnbe'e Xra' nasele' neda'.

²² Chela quebe bla'a neda', ne bchála-jlena' benne' ca', quebe bi dul-la zaj nabague'. Na'a zaj nabágaqueze' dul-la ²³ lawe' da nu benne' dxecuídene' neda', cá'anqueze dxecuídene' Xra'. ²⁴ Chela quebe bēna' neda' xel-la' waca zren ca' lálwela benne' ca' ca da netú benne' quebe ne gunē', na' quebe bi dul-la xelebágue'. Lácala ba belelé'ene' da ca', dx-elecuídene' neda', ne dxelecuídene' Xra'. ²⁵ Da nigá dxaca na chee gaca li ca naxúaj na lu da nadxixruj bea na da zjácale benne' ca'. Dxenná na: Belecuídene' neda' ne quebe bi da calela bēna' chee benne' ca'.

²⁶ Gate xida Bēne'a' gácalene' le'e, Bēne'a' naque' Be' Lá'azxa, ne dxulé'ene' da li, Bēne'a' sel-la' neda' waláz chee Xra', Léqueze' xechēbe' ca naca chia' neda'. ²⁷ Cá'anqueze le'e wechébequezle ca naca chia' neda' lawe' da zúalele neda' nédxudaute.

16 Gunná Jesús:

—Dxapa' le'e da caní chee quebe gusán lázrele da naca chia'. ² Welexebéaje' le'e lu xu'u naga dx-elezrague', na' zrin zra gate núteteze benne' gutie' le'e guéquene' gunē' zrin

chee Dios. ³ Caní xelunē' lawe' da quebe ne xelúnbe'e Xra', ne neda'. ⁴ Dxapa' le'e da nigá chee gate zrin zra na', na' cheajsá lázrele ba gucha' le'e da nigá.

Da dxun Be' Lá'azxa

Nadxa gunná Jesús:

—Quebe gucha' le'e da nigá nédxute lawe' da zúalequeza' le'e. ⁵ Na'a wexá'a cheajxezúalēna' Xra' nasele' neda', na' netule le'e quebe dxuchébele neda' ga chá'a. ⁶ Dxewí'ine lázrele lawe' da gucha' le'e da caní. ⁷ Na'a dxapa' le'e da li: Cháwe'dxa gaca chee le'e che xexá'a neda' lawe' da che quebe xexá'a, quebe xida Be' Lá'azxa xedajsúalēne' le'e, Bēne'a' gácalene' le'e. Che xexá'a neda', sel-la' Le' chee le'e. ⁸ Gate xida Le', na' gulé'ene' bēneache zaj naque' benne' dul-la, ne quebe dxelunē' da xrlátaje, na' Dios guzrí'a xi'e benne' caní. ⁹ Zaj naque' benne' dul-la lawe' da quebe dxeléajle'e chia' neda'. ¹⁰ Xeleque bé'ene' quebe dx-elunē' da xrlátaje lawe' da xexá'a neda' naga zua Xra', na' le'e québedxa lé'ele neda'. ¹¹ Xeleque bé'ene' Dios guzrí'a xi'e le' lawe' da ba guchugue' chee da xriwe', da na' dxenná bea na lu xezr la xu nigá.

¹² Ne déle'e da dxal-la' xapa' le'e, san le'e quebe gaca chéajni'ile na na'a. ¹³ Gate xida Be' Lá'azxa, Bēne'a' dx-ulé'ene' da li, Le' gulé'ene' le'e ca naca xúgute da li lawe' da quebe guchálaje' cheézeze'. Wanné' xúgute da xénene', na' guzéajni'ine' le'e ca da dxal-la' gaca na. ¹⁴ Le' gucá'ana szrene' neda' lawe' da wazí'e chee da naca chia' neda', na' guzéajni'ine' na le'e. ¹⁵ Xúgute da napa Xra', cheéqueza' naca na, na' chee le' na' gunnéa', wazí' Be' Lá'azxa da naca chia', na' guzéajni'ine' na le'e.

Xel-la' dxelewí'ine lazre' chee benne' ca' xexaca na xel-la' dxelebe'

¹⁶ Gunná Jesús:

—Xetú chí'idau', na' le'e québedxa lé'ele neda', na' xetú chí'i, na' xel'é'ele neda' lawe' da xexá'a neda' naga zua Xra'.

¹⁷ Nadxa bal-la benne' ca' dxusede Jesús buluchebe ljwezre':

—¿Bizra zéaje da nigá? Dxe'e dxi'u, xetú chí'idau' québedxa lé'edxu Le', na' xetú chí'i, na' xel'é'edxu Le' lawe' da xexá'aje' naga zua Xre'. ¹⁸ ¿Bi zéaje da na', xetú chí'idau'? Quebe dxéajni'idxu bi chee dxuchálaje'.

¹⁹ Guque be'e Jesús dxelaca lazre' xu-luchebe' Le', na' guzre' benne' ca':

—Neda' gucha' le'e, xetú chí'idau' québedxa lé'ele neda', na' xetú chí'i, na' xel'é'ele neda'. ¿Da nigá na' dxuchebe ljwézrele? ²⁰ Da li dxapa' le'e, wabézrele le'e, ne xewi'ine lázrele, san bèneache chee xezr la xu nigá xelebene'. Lácala le'e xewi'ine lázrele, xel-la' dxewi'ine lazre' chee xexaca na xel-la' dxebe.

²¹ Gate tu nu'ula zua sané' bidau' zue' stébe lawe' da ba bzin zra sua xel-la' dxudía chee'. Gate te galaj bidu na', na' québedxa dxeajsá lazre' da guzaque' lawe' da dxebé'ene' chee' bidu na' ba gúlajbe'. ²² Cá'anqueze le'e zúale stébe na'a, san neda' welá'queza' xedajxenná'a le'e, na' lu xichaj lázrdaule súdequeze xel-la' dxebe, da naca na tu xel-la' dxebe da quebe nu seque' cua.

²³ 'Lu zra na' québedxa bi guchébele neda'. Da li dxapa' le'e, Xra' gunne' le'e xúgute da ná bale lu La' neda'. ²⁴ Nédx-ula quebe bi gunábale lu La' neda'. Na'a le naba, na' si'le, chee súale'ele xel-la' dxebe.

Jesús guchuchuj guléaje' da dxaca lu xezr la xu nigá

²⁵ Gunná Jesús:

—Ba gucha' le'e da caní nen dizra' ca' da dxululé'e na. Wazrín zra gate québedxa guchálajlena' le'e da naca da dxulé'e na. Guchálajlena' le'e caníqueze da naca chee Xra'. ²⁶ Lu zra na' ná bale

Xra' lu La' neda', na' quebe dxenné'a neda' gata' xueda' Xra' waláz chee, ²⁷ lawe' da Xrá'queze nazrí'ine' le'e. Nazrí'ine' le'e lawe' da nazrí'ile le'e neda', ne dxéajlele chia' za'a naga zua Dios. ²⁸ Guzá'a lau Xra' chee bla'a lu xezr la xu nigá chee xexá'a naga zua Xra'.

²⁹ Nadxa benne' ca' dxusede Jesús gulé'e Le':

—Na'a dxuchálajlenu' netu' caníqueze. Quebe dxuchínenu' dizra' ca' da dxululé'e na. ³⁰ Na'a dxeque bé'entu' nézenu' xúgute da ca', na' quebe dxal-la' nu guchébe Lue'. Chee le na' dxéajlentu' chiu' za'u naga zua Dios.

³¹ Jesús guzre' benne' ca':

—¿Dxeajlele chia' na'a? ³² Za' zra, ne ba naca zra ná'queze gate le'e gase dinnajle ca'ale xrneza cha chee, na' gucá'anale neda' tuza'. Quebe zúaqueza' tuza' lawe' da zúale Xra' neda'. ³³ Dxapa' le'e da nigá chee gápale xel-la' dxebeza zri lazre' lawe' da nácale neda' tuze. Lu xezr la xu nigá dxun na ba xen si sácale. Le gun chuchu lázrdaule, lawe' da ba bchuchuj bléaja' da dxaca lu xezr la xu nigá.

Jesús dxenabe' Dios xucá'ana chawé'e benne' ca' dxeléajlé'e chee'

17 Ca gudé gunné' da nigá, na' Jesús gunné'e xabáa, dxenné':

—Xrae, ba bzin zra. Bca'ana szren neda', Zri'inu', chee cá'anqueze neda', Zri'inu', gucá'ana szrena' Lue'. ² Lue' ba bennu' neda', Zri'inu', xel-la' dxenná' bea chee nna be'eda' xúgute bèneache, chee gunézruja' xel-la' nabán da zeajlí canna chee xúgute benne' ca' bennu' neda'. ³ Xel-la' nabán da zeajlí canna naca na chee xelúnbe'e Lue', nacu' Dios tu licha', ne li lazre', na' chee xelúnbe'e neda', Jesucristo, Bènea' gusel-lu' Lue'.

⁴ 'Neda' ba bca'ana szrena' Lue' lu xezr la xu nigá, ne ba bexuzre bēna' da bdxixruj be'entu' neda'. ⁵ Na'a, Xrae, bēna

neda' xel-la' szren lau Lue', da naca na xel-la' szren na' da guca na chia' naga zu' Lue' nédxudaute gate za gata' xezr la xu nigá.

⁶Benne' ca' guca'u Lue' ládujla bēneache, benne' ca' bennu' neda', neda' ba bzéajni'ida' le' Nu nacu' Lue'. Gulaque' chiu', na' Lue' bennu' neda' benne' ca', na' ba belune' ca' dxenná xrtizru'. ⁷Na'a zaj nézene' xúgute da bennu' neda' za na naga zu' Lue'. ⁸Ba bnézruja' chee benne' caní dizra' chiu' da bennu' neda', na' benne' caní ba gulez'í lu ne'e na. Ba guleque bé'ene' da li neda' za'a naga zu' Lue', ne ba guléajle'e chiu', gusel-lu' neda'.

⁹Neda' dxata' xueda' Lue' gaca chawe' chee benne' caní. Quebe dxata' xueda' Lue' ne chee benne' ca' zaj naque' chee xezr la xu nigá. Dxenaba' Lue' ne chee benne' ca' bennu' neda', lawe' da zaj naque' chiu'. ¹⁰Xúgute da naca chia' naca na chiu', na' da naca chiu' naca na chia' neda', na' xel-la' szren chia' dxulé'e lawe' na ne chee benne' caní.

¹¹Neda' québedxa sua' lu xezr la xu nigá, san benne' caní xelexegá'ane' lu xezr la xu nigá, na' neda' wezá'a nigá, ne xedajxezúalequeza' Lue'. Xrae Lá'azxa, lu xel-la' dxenná bea chiu' bxue benne' caní, benne' ca' bennu' neda', chee xelácaqueze' tuze ca nácadxu dxi'u tuze, Lue' ne neda'. ¹²Gate ne zua' neda' lu xezr la xu nigá, bxua' benne' caní nen xel-la' dxenná bea chiu', benne' caní bennu' neda', ne bcache chawa' le'. Netú benne' caní quebe gunite, san tuze bēneea' ba nanítequeze', na' caní guca na chee guca li ca naxúaj na lu xiche chiu'.

¹³Na'a ba zezá'a naga zu' Lue'. Dxácatē ne zua' lu xezr la xu nigá dxennéa' da caní chee xelápalē'e benne' caní xel-la' dxebe' ca da nápaqueza' neda'. ¹⁴Neda' bnézruja' benne' caní dizra' chiu'. Bēneache chee xezr la xu nigá dxelecuídenē' benne' caní lawe' da québedxa zaj

naque' tuze nen benne' ca' chee xezr la xu nigá, ca na' neda' quebe naca' tuze nen da naca chee xezr la xu nigá.

¹⁵Quebe dxenaba' Lue' xeca'u benne' caní lu xezr la xu nigá. Dxenaba' guzrá chawu' benne' caní chee quebe seque' da xriwe' bi gun na chee' le'. ¹⁶Ca neda' quebe naca' chee xezr la xu nigá, cá'anqueze benne' caní quebe zaj naque' chee xezr la xu nigá. ¹⁷Bzua benne' caní chee xelaque' cheéquezu' Lue' ne chee da li. Dizra' chiu' naca na da li. ¹⁸Ca gusel-lu' Lue' neda' ládujla bēneache zaj naque' chee xezr la xu nigá, cá'anqueze neda' dxusel-le' benne' caní ládujla bēneache zaj naque' chee xezr la xu nigá. ¹⁹Ne chee benne' caní nuzúia cuina' cheéquezu' Lue', chee cá'anqueze benne' caní xelaque' cheéquezu' Lue' ne chee da li.

²⁰'Dxata' xueda' Lue', quegaze chee benne' caní, san cá'anqueze chee benne' ca' xeléajle'e chia' gate xelenne' da xuluchalaj benne' caní. ²¹Dxenaba' Lue' chee xelaca xúgute benne' caní túzqueze, ca Lue', Xrae, nácaquezu' neda' tuze, ne neda' nácaqueza' Lue' tuze, ne chee xelaca benne' caní tuze nen dxi'u, chee xeléajle bēneache zaj naca chee xezr la xu nigá Lue' gusel-lu' neda'. ²²Neda' ba bnézruja' chee benne' caní xel-la' szren na' da bennu' neda' chee xelaque' tuze ca nácaquezdxu tuze dxi'u. ²³Neda' súalēna' benne' caní, na' Lue' súalēnu' neda', chee xelácaqueze benne' caní tuze, na' caní xeleque be'e bēneache Lue' gusel-lu' neda', ne nazrí'inu' benne' caní cáteze nazrí'inu' neda'.

²⁴'Xrae, Lue' bennu' neda' benne' caní, na' dxaca lazra' xelezúalēne' neda' naga sua' neda', chee xeelé'ene' xel-la' szren da ba bennu' neda', lawe' da nazrí'inu' neda' nédxudaute gate quebe ne gunu' xezr la xu nigá. ²⁵Xrae chawe', benne' zaj naque' chee xezr la xu nigá quebe zaj núnbe'e Lue', san neda' núnbe'a Lue',

na' benne' caní ba zaj nézene' Lue' gusel-lu' neda'. ²⁶ Neda' bzéajni'ida' benne' caní Nu nacu' Lue', ne zúaqueza' dxuzéajni'ida' le' chee sua xel-la' zri'i lazre' dxéquentu' Lue' neda' lu xichaj lázrdau benne' caní, ne chee súalé néda'queza' le'.

Dxelej-le' Jesús

(Mt. 26.47-56; Mr. 14.43-50; Lc. 22.47-53)

18 Ca gudé gunná Jesús da caní, na' bdxúajé' nen benne' ca' dxusédené' chee chjaque' xecha la'a xegu Cedrón. Lataj na' zéle'e xaga olivo naga guxú'u Jesús nen benne' ca'. ² Cá'anqueze Judas, bénnea' dxudéé' Jesús lu na' benne' ca' dxeledábague' Le', núnbe'e lataj na' lawe' da zane' lasa guxíaj Jesús na' nen benne' ca' dxusédené'. ³ Ca' guca, bzrin Judas na' nen tu cue' benne' ca' dxjaque' wedil-la, ne nen bal-la benne' xra'aga wen zrin chee xudau', benne' ca' gulesel-la benne' xíchajé' ca' chee bxruze ca', ne benne' fariseo ca'. Zaj nu'e xaga, ne xia ca', ne xi' ca', ne xi' xedxe. ⁴ Jesús ba nézene' ca' da gaca chee', na' chee le na' bdxúajé' lau benne' ca', na' bchebe' le':

—¿Nuzra dxexílajle?

⁵ Belexechebe benne' ca':

—Jesús, benne' Nazaret.

Jesús bechebe':

—Neda' na'.

Judas, bénnea' dxudéé' Jesús lu na' benne' ca' zúaqueze' ládujla benne' ca'. ⁶ Gate gunná Jesús: Neda' na', na' benne' ca' belexebigue' lau Jesús, ne xeaajlechazte' lu xu. ⁷ Nadxa Jesús bchebe' benne' ca' da xula:

—¿Nuzra dxexílajle?

Gulenná benne' ca':

—Jesús, benne' Nazaret.

⁸ Nadxa guzre Jesús benne' ca':

—Ba gucha' le'e neda' na'. Che dxexílajle neda', le güe benne' caní lataj cheajxaque'.

⁹ Ca guca da nigá guca li ca gunná Jesús, gunné': "Benne' ca' benna Xra' neda', netue' quebe bnitia'." ¹⁰ Nadxa Simón Pedro, ne nu'e xia, guléajé' na, na' guchugue' naga da zua xabela chee Malco, wen zrin chee bxruze blau. ¹¹ Jesús guzre' Pedro:

—Begú'u xia chiu' lu zre na. Ca da ba nun Xra' si' saca' neda', ¿quebe dxal-la' saca' na'?

Jesús dxezrine' lau bxruze blau

(Mt. 26.57-58; Mr. 14.53-54; Lc. 22.54)

¹² Nadxa benne' dxjaca wedil-la, ne benne' dxenná be'ene' le', ne benne' xra'aga wen zrin chee judío ca' guléle' Jesús, ne buluchéajé' Le'. ¹³ Nadxa guleché'e Jesús lizre Anás. Anás nigá naque' xrtau zri'ine Caifás, bénnea' naque' bxruze blau iza na'. ¹⁴ Caifás nigá naque' bénnea' guzre' judío blau ca' gá-cadxa chawe' gate tuze benne' waláz chee xezr la xu chee'.

Pedro dxenné' quebe núnbe'e Jesús

(Mt. 26.69-70; Mr. 14.66-68; Lc. 22.55-57)

¹⁵ Simón Pedro, ne xetú benne' ca' dxusede Jesús zjaque' zeajnawe' Jesús. Benne' ljwezre Pedro nigá núnbea bxruze blau le'. Ca'an guca, benne' nigá guxú'ulene' Jesús chale'aj lizre bxruze blau na'. ¹⁶ Pedro begá'ane' dxu'a dxa xu'u da zua chale'aj na'. Chee le' na' bdxuaj bénnea' núnbea bxruze blau le', na' bchálajlene' nu'ula zua dxu'a dxa xu'u na', na' gulu'e Pedro chale'aj na'. ¹⁷ Nadxa nu'ula na' zua dxu'a dxa xu'u bchebe' Pedro:

—¿Quebe nacu' lue' tuze nen benne' Nazaret na'?

Pedro bechebe':

—Quebe naca'.

¹⁸ Lawe' da dxun na zaga, benne' wen zrin ca', ne benne' xra'aga wen zrin chee bxruze ca' ba zaj nabeque' xi', ne zaj ze'

dxu'a xi' na' dxexezré'ene'. Pedro ze' nen benne' ca', dxexezré'ene' dxu'a xi' na'.

Bxruze blau dxuchebe' Jesús

(Mt. 26.59-66; Mr. 14.55-64; Lc. 22.66-71)

¹⁹ Bxruze blau guzú lawe' dxuchebe' Jesús nuca benne' ca' zaj naque' benne' dxusédene', ne bi da dxusédene' le'.
²⁰ Jesús guzre' le':

—Neda' ba bchálajqueza' lálwela xúgute bénneache. Bsédeweza' lu xu'u ca', ne lu xu'u naga dxezzraga xúgute benne' judío ca'. Quebe bi bchálaja' bagácheze. ²¹ ¿Bizr chee na' dxuchebu' neda'? Bchebe benne' ca' ba belenne' chia', na' le' xelenné' bi da bchálajlena' le'. Benne' ca' zaj nézene' da ba gunnéa'.

²² Gate gunná Jesús da nigá, na' tu benne' xra'aga wen zrin chee xudau', benne' ze' na', gudape' xraga Jesús, na' gunné':

—¿Caní dxexechebu' lau bxruze blau nigá?

²³ Jesús bechebe':

—Che gunnéa' tu da calela, gunná ájala naca na. Che da gunnéa' naca na xrlátaje, ¿bizr chee na' dxu'u neda'?

²⁴ Nadxa Anás gusél-le' Jesús, zaj nadxéaj ne'e, lau Caifás, bxruze blau.

Pedro dxenné' xecha lasa quebe núnbe'e Jesús

(Mt. 26.71-75; Mr. 14.69-72; Lc. 22.58-62)

²⁵ Dxácate na' ze' Pedro dxu'a xi' na' dxexezré'ene', na' gulé'e le':

—¿Quebe nacu' lue' tu benne' ca' zaj naque' tuze nen bénnea'?

Na' Pedro gunné':

—Quebe naca'.

²⁶ Nadxa tu benne' wen zrin chee bxruze blau, benne' naque' xrtia bénnea' guchugu Pedro nague', bchebe' le':

—¿Quegá ble'eda' lue' nen bénnea' naga zaj ze' xaga olivo ca'?

²⁷ Pedro gunné' xecha lasa:

—Quebe núnbe'a bénnea'.

La' náqueze gudxezre xjeaj.

Jesús dxezrine' lau Pilato

(Mt. 27.1-2, 11-14; Mr. 15.1-5; Lc. 23.1-5)

²⁸ Nadxa belexebéaje' Jesús lizre Caifás, na' guleché'e Le' xu'u lizre benne' xu'u lu ne'e xezr la xu na' waláz chee Roma. Ba dxezú lau dxan'ísise', na' benne' judío ca' quebe gulu'e xu'u na' chee quebe xelxegá'ane' sban, lawe' da che xelu'e na', quebe gaca xelawe' xrche' chee Laní Pascua. ²⁹ Chee le' na' bdxuaj Pilato bchálajlene' benne' ca', na' guzre' le':

—¿Bizra da zria dxágule benne' nigá?

³⁰ Belexechebe benne' ca':

—Chela ca naque' tu benne' wen da zrinnaaj, quebe gudentu' le' lau'.

³¹ Nadxa Pilato guzre' benne' ca':

—Le xeché'e, ne le guchi'a chee' cáteze naca da nadxixruj bea chee'e.

Belexechebe benne' judío ca':

—Netu', benne' judío, quebe naca cheentu' nu gütentu'.

³² Ca'an guca, guca li ca naca da ba gunná Jesús ca gatie'. ³³ Pilato bexu'e xu'u na', na' gunné' Jesús, ne bchebe' Le':

—¿Nacu' Lue' Wenná Bea chee judío ca'?

³⁴ Jesús gunné':

—¿Dxenabu' da nigá lue'zqueze, u lawe' da nu guzre lue' ca naca chia'?

³⁵ Pilato bechebe':

—¿Naca' neda' judío? Benne' xezr la xu chiu', ne benne' xíchaje' ca' chee bxruze ca' buludé'e lue' lawa' neda'. ¿Bizra benu'?

³⁶ Nadxa bechebe Jesús:

—Naga dxenná be'a quebe naca na chee xezr la xu nigá. Chela naca na chee xezr la xu nigá, na' benne' ca' zaj naque' neda' tuze welásaqueze' chee quebe tea'

neda' lu na' benne' judío caní. Naga dxenná be'a quebe naca na nigá.

³⁷ Nadxa guzre Pilato Jesús:

—¿Nacu' Lue' wenna' bea?

Bechebe Jesús:

—Naca' wenna' bea, cáteze dxennáu' lue'. Neda' gúlaja', ne bla'a lu xezr la xu nigá chee' nnia' da li. Xúgute' benne' ca' dxelune' ca dxenná dizra' chee' da li dxe-lenne' da dxennéa' neda'.

³⁸ Pilato gunné':

—¿Bizra na' da li?

Dxelechugue' chee Jesús gatié'

(Mt. 27.15-31; Mr.
15.6-20; Lc. 23.13-25)

Ca gudé bchebe Pilato Jesús caní, na' bdxúajé' xetú. Bchálajlene' benne' judío ca', na' guzre' le':

—Neda' quebe bi da caléla dxezrelda' nun benne' nigá. ³⁹ Le'e zua tu da zéajlele. Gusana' neda' tu benne' xu'u lizre xia lu Laní Pascua nigá. ¿Dxaca lázrele gusana' wenna' bea chee' judío ca'?

⁴⁰ Nadxa xúgute' gulenné' zizraj:

—¡Quegá benne' nigá! ¡Bsan Barrabás! Barrabás na' naque' gubán.

19 Nadxa Pilato guqué'e Jesús, na' bdxixruj bé'ene' xelu'e Le' xide'.

² Benne' dxjaque' wedil-la buluzríe' xichaj Jesús tu da' belune' zruze xaga xeché', ne bulugácue' Le' tu ladxe' bzawe.

³ Nadxa guléchajé' Le', dxeleenné':

—¡Gaca ba lue', wenna' bea chee' judío ca'!

Nadxa belú'e dxu'a lau Jesús.

⁴ Nadxa bdxuaj Pilato da xula, ne guzre' benne' ca':

—¡Le nna'xque! Dxebéaja' benne' nigá chee' nézele quebe dxezrelda' bi da zrin-naj nabague'.

⁵ Bdxuaj Jesús zria xíchajé' da naca zruze xaga xeché', ne nacue' ladxe' bzawe na'. Nadxa Pilato guzre' benne' ca':

—Nigá zua bénnea'.

⁶ Gate benne' xíchajé ca' chee' bxruze ca', ne xra'aga wen zrin chee' ca' belelé'ene' Jesús, na' gulezú lawe' dxeleenné' zizraj:

—¡Bde'e xaga béguaj! ¡Bde'e xaga béguaj!

Pilato guzre' benne' ca':

—Le che'e, ne le gudé'e xaga béguaj lé'eequeze, lawe' da quebe dxezrelda' bi da zrin-naj nabague'.

⁷ Na' benne' judío ca' belexechébe':

—Netu' nápantu' tu da nadxixruj bea na, ne ca dxenná na dxal-la' gatié' lawe' da dxun cuine' Zri'ine Dios.

⁸ Gate ben Pilato da nigá, na' bezrébedxe'. ⁹ Bexu'e xu'u na', na' bchebe' Jesús:

—¿Gazra benne' Lue'?

Quebe bi bechebe Jesús.

¹⁰ Nadxa guzre Pilato Le':

—¿Quebe dxexechébu' chia'? ¿Quebe nézenu' Lue' napa' neda' xel-la' dxenná bea gudá'a Lue' xaga béguaj, ne napa' xel-la' dxenná bea gusana' Lue'?

¹¹ Bechebe Jesús:

—Quebe bi xel-la' dxenná bea napu' bi gunu' chia' chela ca benna Dios lue' xel-la' dxenná bea nigá. Chee' le na', bénnea' bde'e neda' lu na'u dul-la zrendxa nabague' ca lue'.

¹² Lu zra na'te gudilaj lazre' Pilato ájala gune' gusane' Jesús, san benne' judío ca' gulenné' zizraj:

—Che gusanu' benne' nigá, quebe nacu' César tuze, bénnea' dxenná bea Roma. Nu benne' dxun cuine' wenna' bea dxedábage' César.

¹³ Nadxa Pilato, gate benne' da nigá, bdxixruj bé'ene' xelexebéaje' Jesús, na' gudxé'e lataj blau chee', da zua lataj na' nazí le na Gabata nen dizra' hebreo, da zéaje na chale'aj xiaj ta'a. ¹⁴ Naca na zra za zrin Laní Pascua, ca du wagubizra. Nadxa Pilato guzre' benne' judío ca':

—Nigá zua wenna' bea chee'.

¹⁵ Na' benne' ca' gulenné' zizraj:

—¡Gatié! ¡Gatié! ¡Bde'e xaga béguaj!
Pilato guzre' benne' ca':

—¿Gudá'a wenná bea chee'e xaga béguaj?

Belexechebe benne' xíchaje' ca' chee bxrue ca':

—Netu' zua tuze wenná bea cheentu'.
¡César! ¹⁶Nadxa Pilato bdee' Jesús lu na' benne' ca' chee te'e xaga béguaj, na' guleché'e Jesús.

Jesús dxedé'e xaga béguaj

(Mt. 27.32-44; Mr.
15.21-32; Lc. 23.26-43)

¹⁷Na' bdxuaj Jesús nu'e xaga béguaj chee chéaje' lataj na' nazí le na Zrita Xichaj Benne' Gate, na' nen dizra' hebreo nazí le na Gólgota. ¹⁸Buludé'e Jesús xaga béguaj lataj na', na' tu zren nen Jesús buludé'e xechupa benne' xaga béguaj ca' chalá'a weaj naga da' Jesús.

¹⁹Pilato bdxixruj bé'ene' buluzúe' le'e xaga béguaj xichaj Jesús da dxenná na: Jesús, Benne' Nazaret, Wenná Bea Chee Judío Ca'. ²⁰Zane' benne' judío ca' bululabe' da na' lawe' da zua lataj na' naga buludé'e Jesús xaga béguaj gáguze naga dxe' xezre na', na' da na' naxúaj na nen dizra' hebreo, ne nen dizra' griego, ne nen dizra' latín. ²¹Chee le na' benne' xíchaje' ca' chee bxrue chee judío ca' gulé'e Pilato:

—Quebe guzúaju' na: Wenná Bea Chee Judío Ca'. Bzuaj na: Le' Gunné' Naque' Wenná Bea Chee Judío Ca'.

²²Bechebe Pilato:

—Da bzuaja', ba naxúajqueze na.

²³Ca gudé buludá' benne' dxjaque' wedil-la Jesús xaga béguaj, na' belexequé'e zra lané', ne belebeque' na tapa cue', tu cue' weaj chee tu tu benne' dxjaque' wedil-la. Belecá'aqueze' ladxe' dxexrúa cuzre' da quebe nadía na. Tu ca nácheze na. ²⁴Chee le na' benne' dxjaque' wedil-la gulé' ljwezre':

—Quebe chézadxu na. Cwéajdxu da gunna bea na chee la' nu xala le na.

Ca'an guca, guca li da naxúaj na lu xiche chee Dios, da dxenná na: Belexelé'e zra lana', ne guléaje' da gunna bea na chee le na. Caní belún benne' dxjaque' wedil-la.

²⁵Gáguze naga zua xaga béguaj chee Jesús ze xrna Jesús nen bi bila xrne'e, ne María, zru'ula Cleofas, ne María Magdalena. ²⁶Gate ble'e Jesús xrne'e, ne cuita xrne'e na' ze Juan, benne' bse'de Jesús, bénnea' nazri'idxe', na' guzre' xrne'e:

—Nú'uladau', na' ze zri'inu'.

²⁷Nadxa guzre Jesús bénnea':

—Na' ze xrna'u.

Zra na'te benne' nigá beche'e nu'ula na' lizre'.

Dxate Jesús

(Mt. 27.45-56; Mr.
15.33-41; Lc. 23.44-49)

²⁸Ca gudé gunná Jesús da nigá, lawe' da nézene' xúgute' na ba guca li, ne chee guca li ca naxúaj na lu xiche chee Dios, gunné':

—Dxebíleda'.

²⁹Zua na' tu dxe'e nupe zichaj, na' bulusubise' tu da dxezrupe na nupe zichaj na', ne buluzúe' na lawe' tu xia tunna, na' buluzúe' na dxu'a Jesús. ³⁰Na' Jesús guzrupe' nupe zichaj na', na' gunné':

—Ba guca li ca naca na.

Nadxa bse dxu'a xíchaje', gutie'.

Tu benne' dxeje' wedil-la dxechizie' xia lachú'u Jesús

³¹Naca na zra za zrin Laní Pascua, na' judío ca' quebe gulaca lazre' xelexegá'ana benne' ca' le'e xaga béguaj ca' lu zra dxulupá'ane' lawe' da naca zra na' tu zra blau. Chee le na' gulenabe' lau Pilato dxixruj bé'ene' xelíchaje' ni'a benne' ca' zaj de'e xaga béguaj ca', ne xelexequé'e le' le'e xaga béguaj ca'. ³²Nadxa

tu benne' ca' dxjaque' wedil-la gudíchajje' ni'a benne' nedxu na', ne cá'aqueze chee benne' xetú de'e cuita Jesús. ³³Gate bzrine' naga da' Jesús, blé'ene' ba gutie', na' chee le' na' quebe gudíchajje' ni'e.

³⁴Tu benne' ca' dxjaque' wedil-la guchízie' xia chee' lachú'u Jesús, na' bdxuaj dxen, ne nisa na'. ³⁵Benne' dxuchalaj da nigá naque' benne' blé'ene' na, ne dxuchálaje' da li, ne nézene' dxenne' da li, chee cá'aqueze le'e chéajlele chee Jesús. ³⁶Da caní guca na chee guca li ca da naxúaj na lu xiche chee Dios, da dxenná na: Quebe gulíchajje' netú zrita chee'. ³⁷Xetú da naxúaj na lu xiche chee Dios dxenná na: Welelé'ene' bénnea' belune' we'.

Dxulucache' Jesús

(Mt. 27.57-61; Mr. 15.42-47; Lc. 23.50-56)

³⁸Ca gudé na' José, benne' xezre Ari-matea, xejnabe' Pilato gu'e le' lataj xexu'e Jesús. José naque' tu benne' guque' Jesús tuze, san bagácheze lawe' da bzrebe' judío blau ca'. Pilato be'e le' lataj, na' bexu'e Jesús. ³⁹Cá'aqueze Nicodemo, bénnea' xejchálajlene' Jesús chizrela, bzrine' na', nu'e tu gaxúa xiaj nedxe, ne tu da dxelále'e zixre. ⁴⁰Nadxa José, ne Nicodemo belexequé'e Jesús, na' buluchele' Le' ladxe' nen nedxe na' ca naca da zjácale' benne' judío ca' da dxelune' chee benne' gate', gate na' dxulucache' le'. ⁴¹Lataj na' naga buludé'e Jesús xaga béguaj zua tu lataj naga zaj ze xaga ca', na' lálwela lataj na' zua tu ba cube le'e xiaj na', naga quebe nu ne chú'unqueze benne' gate'. ⁴²Lu ba na' belegu'e Jesús lawe' da zua ba na' gáguze, ne lawe' da ba dxebía gubizra, ne ba zua su lau zra dxulupána judío ca'.

Jesús dxexebane' ládujla benne' gate

(Mt. 28.1-10; Mr. 16.1-8; Lc. 24.1-12)

20 Zra nedxu, guxíaj María Magdalena dxu'a ba na' dxaní'sise', gate ne nachúl-late, na' blé'ene' québedxa naduse xiaj dxu'a ba na'. ²Nadxa bexíaj chégüe' naga zua Simón Pedro nen xetú benne' bsede Jesús, bénnea' bzri'idxe' Jesús, na' guzre' benne' ca':

—Ba belequ'é Xránadxu lu ba na', ne quebe nézentu' ga xejlelú'e Le'.

³Nadxa Pedro, ne bénnea' xetú beledxúaje' zjaque' dxu'a ba na'. ⁴Dxúpaté' zjaca chégüe' tu zren, san bénnea' xetú guzá chégudxe' ca Pedro, ne bzrine' nédxudxa dxu'a ba na'. ⁵Na' xejjsé' su dxú'ala xejjnné'e lu ba na', na' blé'ene' ladxe' da buluchele' Jesús xu'u na na', san quebe guxú'e lu ba na'.

⁶Ca gudé na', bzrin Simón Pedro, na' guxú'e lu ba na'. Cá'aqueze le' blé'ene' ladxe' na' xu'u na na', ⁷ne blé'ene' ladxe' da buluchele' xichaj Jesús, quebe xu'u na tu zren nen ladxe' da bedxela na le'. Nadube na, dxe' na chálá'ala. ⁸Nadxa cá'aqueze guxú'u bénnea' xetú, bénnea' bzrin nedxu dxu'a ba na', na' blé'ene' ladxe' ca', ne guxéajle'e. ⁹Quebe ne xeléajni'ine' da naxúaj na lu xiche chee Dios da dxenná na xebán Jesús ládujla benne' gate'. ¹⁰Nadxa benne' ca' bsede Jesús belexezrine' xu'u naga zaj zre'e.

Jesús dxulé'e lawe' María Magdalena

(Mr. 16.9-11)

¹¹María begá'ane' dxu'a ba na', dxe-bezre'. Ca dxebezre' na', na' gulégüe' dxenné'e lu ba na', ¹²na' blé'ene' chupa gubáz chee xabáa zaj nácu'e zra lane' chiche, zaj dxe'e naga guxú'u Jesús. Tue' dxe'e naga guzrúa xichaj Jesús, na' xetúe' dxe'e zeaj zranle ga guzrúa ni'a Le'. ¹³Na' buluchebe gubáz chee xabáa ca' María na':

—Nu'ula, ¿bizr chee na' dxebezru'?

Le' guzre' gubáz chee xabáa ca':

—Lawe' da belú'e Xrana', ne quebe nezda' ga xeajlelú'e Le'.

¹⁴Caní dxenné', na' bzéchaj xíchajé', ne blé'ene' Jesús zé' ca'ala, san quebe nézene' che Jesús na'. ¹⁵Nadxa Jesús bchebe' María na':

—Nú'uladau', ¿bizr chee na' dxebezru'? ¿Nu dxexilaju'?

María gúquene' naque' benne' dxá'ane' xaga ca' zaj zé' na', na' guzre' Le':

—Benne', che lue' bi'u Le', gunná ga xeajlú'u Le', chee cheajxezri'a Le'.

¹⁶Nadxa Jesús guzre' nu'ula na':

—María.

María na' bexéchajé', ne guzre' Le' nen dizra' hebreo:

—¡Raboni!

Dizra' nigá zéajé na: Benne' Dxusede.

¹⁷Jesús guzre' María na':

—Bsan neda' lawe' da quebe ne xegüéna' naga zua Xra'. Bexíaj, xeajxezre bi bícha'dau' ca', benne' ca' bsédeda', xegüéna' naga zua Xra', ne nácaqueze' Xrale. Naque' Dios chia', ne Dios chee'e.

¹⁸Nadxa bexíaj María Magdalena, xeajzenne' benne' ca' bse'de Jesús ba blé'ene' Jesús, na' Le' guzre' le' da caní.

Jesús dxulé'e lawe' benne' ca' bsédene'

(Mt. 28.16-20; Mr.

16.14-18; Lc. 24.36-49)

¹⁹Lu zra ná'queze, da naca na zra nedxu chee da gazre zra, na' chizrela zaj nazraga benne' ca' bse'de Jesús, ne zaj nusézxujé' dxa xu'u ca' lawe' da dxelezrebe' judío blau ca'. Na' guxú'u Jesús, guzé' laduj benne' ca', na' bgape' benne' ca' diuzre, dxenné':

—Le gapa xel-la' dxebeza zri lazre'.

²⁰Ca gudé gunná Jesús da nigá, na' blé'ene' benne' ca' ne'e, ne le'e naga gudé xia na'. Benne' ca' bse'de Jesús gulebé'ene' gate belelé'ene' Xránadxu.

²¹Nadxa Jesús guzre' benne' ca' xecha lasa:

—Le gapa xel-la' dxebeza zri lazre'. Cáteze gusel-la Xra' neda', cá'anqueze dxusel-la' neda' le'e.

²²Nadxa blube' lau benne' ca' ne guzre' le':

—Le si' Be' Lá'azxa chee Dios. ²³Benne' ca' dxunité laule le'e chee dul-la zaj nabague' ba bnite lau Dios chee', na' benne' ca' quebe dxunité laule le'e chee dul-la zaj nabague', quebe bunité lau Dios chee'.

Tomás dxelé'ene' Xránadxu ba bebane'

²⁴Tomás, tu benne' chazrinnu ca' bse'de Jesús, bénnea' le' Bi Lide', quebe zue' nen benne' ca' xezícadxa gate ble'e lau Jesús. ²⁵Ca gudé na' gulé'e Tomás na':

—Ba blé'entu' Xránadxu.

Gunná Tomás:

—Che quebe le'eda' ne'e naga guledé bdiduj ca', ne gudéa' zrube na'a lu xedxu chee bdiduj ca', ne gudéa' na'a le'e naga gudé xia na', québequeze chéajle'a.

²⁶Ca guca xrunu' zra, benne' ca' bse'de Jesús zaj nazrágaqueze' lu xu'u na' xetú lasa, na' zua Tomás nen benne' ca'. Nadxa, lácala zaj naxezxuj dxa xu'u ca', ble'e lau Jesús lau benne' ca', ne guzre' laduj le', na' bgape' le' diuzre, gunné':

—Le gapa xel-la' dxebeza zri lazre'.

²⁷Nadxa Jesús guzre' Tomás:

—Bde zrube na'u nigá, ne gunná' na'a nigá. Benna na'u, bde na le'a nigá. Québedxa gun chupa lazru', san guxéajle.

²⁸Nadxa bechebe Tomás:

—Xrana', ne Dios chia'.

²⁹Jesús guzre' le':

—Tomás, na'a dxéajle'u lawe' da ba blé'enu' neda'. Ba neza zrenté naca na chee benne' ca' dxeléajle'e chia' lácala quebe ne xeelé'ene' neda'.

Da dxaca lazre' Juan gun xiche nigá

³⁰ Jesús bené' da zandxa xel-la' waca zrenté lau benne' ca' bsédene' da quebe zaj naxúaj na lu xiche nigá. ³¹ Da caní zaj naxúaj na cheé chéajlele le'e cheé Jesús, naque' Cristo nasel-la Dios, ne Zri'ine Dios, ne cheé gápale xel-la' nabán lawe' da dxéajlele cheé'.

Jesús dxulé'e lawe' gazre benne' ca' bsédene'

21 Ca gudé na' Jesús ble'e lawe' lau benne' ca' bsédene' dxu'a nísadau' cheé Tiberias. Caní guca na. ² Zaj nazraga Simón Pedro, ne Tomás, bènea' léqueze' Bi Lide', ne Natanael, benne' xezre Caná da nababa Galilea, ne chupa zri'ine Zebedeo, ne xechupa benne' ca' bséde Jesús. ³ Simón Pedro guzre' benne' ca':

—Cheajsendxa' bela.

Benne' ca' gulenné':

—Cá'anqueze netu' wazá'entu' lue'.

Nadxa xjaque', na' gulu'e tu lu da dxedá lawe' nísadau'. Xela na' quebe nu bela gulezénqueze'. ⁴ Ca guzú lau dx-aní'sise', ble'e lau Jesús dxu'a nísadau' na'. Benne' ca' bsédene' quebe zaj nézene' che Jesús na'. ⁵ Nadxa Jesús guzre' benne' ca':

—Bénne'dau', ¿quebe nu bela ne senle?

Belexechébe benne' ca':

—Quebe bi ne sentu'-ba'.

⁶ Nadxa guzre Jesús benne' ca':

—Le guzala xixruj na' chalá'a xabela cheé da dxedá lawe' nísadau' na', na' senle bela.

Ca' belunge', na' ca dxelexequé'e xixruj na' quebe dxelexegu'éne' na lawe' da nazraté na bela zan. ⁷ Nadxa bènea' nazrí'idxa Jesús guzre' Pedro:

—Xránadxu na'.

Ca ben Simón Pedro naca Xránadxu, na' bexázié' ladxe' dxexrúa cuzre' lawe'

da nagüe' na, na' bexétaje' lu nisa. ⁸ Xezícadxa benne' ca' belexezrine' dxu'a nísadau' na', zaj zre'e lu da dxedá lawe' nísadau', dxelexezrube xue' xixruj na' nazraté na bela ca' lawe' da dxe' da dxedá lawe' nísadau' na' lu nísadau' ca tu le gu'una xiaj. ⁹ Gate belexétaje' lu xu bizre, na' belelé'ene' ba dxe' xi', ne ba zrua tu bela lawe' xi' na', na' de na xu xeta xtila. ¹⁰ Nadxa Jesús guzre' benne' ca':

—Le cheajxrí' tu chupa bela ca', be za guzéntele.

¹¹ Begüén Simón Pedro lu da dxedá lawe' nísadau' na', ne bezrube xue' xixruj na' dxu'a nísadau' na'te, nazraté na bela zri'a, tu gaxúa chi'inu xunba', na' lácala naca tu cá'anteba' quebe gudxeza xixruj na'. ¹² Nadxa guzre Jesús benne' ca':

—Le da gágule xrsila.

Netú benne' ca' quebe dxelexázrene' xuluchebe' Le' nu Le', lawe' da zaj nézene' naque' Xránadxu. ¹³ Nadxa Jesús guqu'é'e xeta xtila na', na' bnézruje' na benne' ca', ne cá'anqueze bené' cheé bela ca'.

¹⁴ Da nigá naca na da guxunne' lasa ble'e lau Jesús lau benne' ca' bsédene' ca gudé bebane' ládujla benne' gate.

Jesús dxuchálajlene' Simón Pedro

¹⁵ Ca gudé gulawe' xrsila, na' Jesús bchebe' Simón Pedro:

—Simón, zri'ine Jonás, ¿nazrí'idxenu' neda' ca benne' caní?

Bechébe Pedro:

—Awe', Xran, nézenu' dxelé'eda' Lue' chawe'.

Na' Jesús guzre' le':

—Bxue zrila'du chia' ca'.

¹⁶ Nadxa Jesús bchebe' le' da xula:

—Simón, zri'ine Jonás, ¿nazrí'inu' neda'?

Pedro bechébe':

—Awe', Xran, Lue' nézenu' dxelé'eda' Lue' chawe'.

Jesús guzre' le':

—Bxue zrila' chia' ca'.

¹⁷ Da guxunne' lasa Jesús bchebe' le':

—Simón, zri'ine Jonás, ¿dxelé'enu' neda' chawe'?

Pedro bewi'ine lazre' lawe' da bchebe Jesús le' da guxunne' lasa che dxelé'ene' Le' chawe', na' guzre' Jesús:

—Xran, Lue' nézquezenu' xúgute. Lue' nézenu' dxelé'eda' Lue' chawe'.

Na' Jesús guzre' le':

—Bxue zrila' chia' ca'. ¹⁸ Da li dxapa' lue', gate ne nacu' benne' cuide' gucu' zra lanu', ne guxíaju' naga dxaca lazru'. Gate bache nacu' benne' gula, chilju' na'u, na' benne' xula gugácuē' lue', ne che'e lue' naga quebe gaca lazru' chéaju'.

¹⁹ Gate gunná Jesús da nigá, dxuzéa-jni'ine' benne' ca' ca dxal-la' gate' Pedro chee' gucá'ana szrene' Dios. Ca gudé na' Jesús guzre' le':

—Ben neda' tuze.

Da gaca chee' bēnnea' nazrí'idxa Jesús

²⁰ Gate bexechaj Pedro, blé'ene' bēnnea' nazrí'idxa Jesús zéaje nawe' le',

naque' bēnnea' dxe'e cuita Jesús gate na' gulawē' xrche' na', ne bchebe' Jesús: “Xran, ¿nuzra na' gudé Lue' lu na' benne' ca' dxeledábague' lue'?” ²¹ Gate Pedro blé'ene' bēnnea', na' bchebe' Jesús:

—Xran, ¿gazra benne' nigá? ¿Aja gaca chee'?

²² Jesús bechebe':

—Che neda' dxaca lazra' xegá'ane' nigá ca zrindxa zra xelá'a neda', ¿naca na chiu' lue' nézenu'? Lue', ben neda' tuze.

²³ Belén benne' ca' zaj dē'e Jesús quebe gate benne' na'. Jesús quebe guzre' le' quebe gatie'. Guzre' le': “Che neda' dxaca lazra' xegá'ane' ca zrindxa zra xelá'a neda', ¿naca na chiu' lue' nézenu'?”

²⁴ Benne' nigá naque' benne' dxex-echebe' chee' da nigá, ne ba nuzúaje' na. Nézentu' dxenné' da li.

²⁵ Cá'anqueze ne zaj dēdxá da zante da ben Jesús, na' chela xuaj tu tu na, dxéqueda' quebe gueque lu xezr la xu nigá cha' xiche ca' dxal-la' guzúajdxu. Ca' naca na.

DA CA' BELÚN BENNE' GUBÁZ CHEE CRISTO

Dios nachebe lazre' sel-le' Be' Lá'azxa

1 Lue', Teófilo, bzuaja' chiu' lu xiche nedxu ca naca xúgute da guzú lau Jesús dxune', ne dxusédene' nédxudaute, ²cadxa begüéne' xabáa. Gate za xezé'e xexíaje' xabáa guqué'e gubáz chee' ca', na' zúale Be' Lá'azxa Le' guzre' benne' ca' ca da dxal-la' xelune'. ³Ca gudé gutie', Jesús ná'queze ble'e lawe' benne' ca', ne lawe' chua zra ble'e lawe' benne' ca', na' blé'ene' da zan da dxelunna bea na naca bané', ne bchálajlene' benne' ca' ca dxal-la' nna bea Dios.

⁴Gate ne zúale Jesús benne' gubáz ca', gunné xuene' le' quebe xesi'aque' xezre Jerusalén. Na' guzre' benne' ca':

—Le cueza ca da guchebe lazre' Xra' gunné' chee, ca gunníqueza' neda'. ⁵Da li Juan bchue' bénneache nisa, san lu zra caní gaca chee ca da zéaje xel-la' dxedxúa nisa, xida Be' Lá'azxa xedajsúe' lu xichaj lázrdaule.

Jesús dxegüéne' xabáa

⁶Gate na' zaj nazrague' nen Jesús, na' buluchébe' Le':

—Xran, ¿güe Dios lataj nna béaqueze xezre Israel lu zra caní?

⁷Na' bechebe Jesús:

—Quebe naca chee nézele bátala, u bi zra gun Dios da ca' tuze Le' nape' xel-la' waca gune'. ⁸Gate xida Be' Lá'azxa súalene' le'e, sile xel-la' waca, na' chéajle cheajchálajle da naca chia' lu xezre Jerusalén, ne ca naca naga nababa Judea, ne naga nababa Samaria, ne ca náaqueze xezr la xu nigá.

⁹Ca gudé gunné' da nigá, ne dxácate dxelenná' benne' ca' Le', begüén Jesús xabáa, na' ca bexu'e tu lu beuj benite Jesús lau benne' ca'. ¹⁰Ne zaj zra' benne'

ca' dxelenné'e dxácate dxegüén Jesús, belelá' chupa benne' zaj nácu'e ladxe' chiche lau benne' ca', ¹¹na' gulé'e benne' gubáz ca':

—Le'e, benne' Galilea, ¿bizr chee na' zeze dxenna'le xabáa? Jesús nigáqueze begüéne' zexíaje' xabáa, bezé'e ládujla le'e, welé'e xetú cáqueze ble'e'le Le' zexíaje'.

Dxelequé'e Matías chee xedé'e waláz chee Judas

¹²Nadxa besíaca benne' gubáz ca' lu Xi'a Xaga Olivo, ne belexezrine' Jerusalén, da quebe naca na zitu', san dxe' cáttiteze da dxunna da nadxixruj bea na lataj xesi'aque' lu zra dxulupá'ane'.

¹³Gate belexezrine' lu xezre na', belexegüéne' xu'u sibe naga zaj zu'e. Benne' caní zaj naque' Pedro, ne Jacobo, ne Juan, ne Andrés, ne Felipe, ne Tomás, ne Bartolomé, ne Mateo, ne Jacobo zri'ine Alfeo, ne Simón, bénnea' dxedábague' benne' Roma ca', ne Judas, zri'ine Jacobo. ¹⁴Xúgute benne' caní tu dx-elezzrágazqueze' nen benne' biche Jesús, ne María xrna Jesús, ne xebal-la nu'ula ca', chee xuluchálajlene' Dios.

¹⁵Lu zra ca' Pedro guzé' laduj bi bíchedxu ca', zaj naque' ca tu gaxúa galaj bénneache, na' guzre' le':

¹⁶—Le'e, bi bícha'dau', ben na ba xen guca li ca da gunná Be' Lá'azxa lu xiche chee Dios, da na' gunná David waláz chee Dios ca naca da dxal-la' gaca chee Judas, bénnea' guché'e benne' ca' gulé'le' Jesús. ¹⁷Judas nigá guzúalene' dxi'u tu zren, ne guque' dxi'u tuze lu zrin nigá. ¹⁸Bxa'u tu cue' xezr la xu ca naca lazruj chee Judas, da guzú' lu ne'e chee da caléla da bené'. Na' benne' nigá xea-jcházie' suxíchajla, ne gutín le'e, na' bdx-uaj ca naca zrájlu'e. ¹⁹Xúgute benne' zaj zre'e Jerusalén belenne' da nigá, na' buluzú'e la xezr la xu na' Acéldama, da zéaje na: Xezr La Xu Chee Dxen. ²⁰Guca li ca

da dxal-la' gaca chee' lawe' da naxúaj lu xiche lá'azxa naga zaj naxúaj salmo ca', da dxenná na:

Xegá'ana cá'aze lizre',

ne quebe nu chilá' sua na'.

Cá'anqueze dxenná na:

Xetú benne' tée' waláz chee'.

²¹ 'Zaj zra' nigá benne' ca' gusá'acalene' dxi'u ca naca dxácatē guzúale Jesús dxi'u. ²² Guzú lau na gate bchua Juan Jesús nisa, cadxa bzin zra begüéne' xabáa. Dxun na ba xen tu benne' caní gaque' dxi'u tuze chee' xechēbe' ca guca gate bebán Jesús lu xel-la' gute.

²³ Nadxa gulebéaje' chupa benne' ca', José ne Matías. José na' léqueze' Barsabás ne léqueze' Justo.

²⁴ Buluchálajlene' Dios, gulenné':

—Xran, Lue' nézqueznu' ca naca da xu'u lu xichaj lázxdau xúgute bēneache. Ble'e netu' nula benne' chupa caní ba nabéaju' Lue', ²⁵ chee' gaque' gubáz chiu', ne xedéé' waláz chee' Judas, bēne' bni-tiē' da naca chee' lawe' da bēne' dul-la, na' bexiáje' lataj naga naca chee'.

²⁶ Nadxa gulebéaje' da gaca bea na, na' bexala Matías, na' gúcatē' tuze benne' chinéaj gubáz ca'.

Ca guca gate bla' Be' Lá'azxa

2 Ca bzin zra Pentecostés, xúgute benne' ca' dxeléajle'e chee' Jesús zaj nazrague' tuze lataj. ² Ca' guca, belenne' tu schaga da za' lu be' zran xabáa, ca dxun tu be' bdunu', na' belén na xúgute benne' zaj zre'e lu xu'u naga zaj dx'e. ³ Nadxa beleléene' lu be' xi' ca', da dxelala, na' xejlezúa na xichaj tu tu benne' ca'. ⁴ Nadxa guzúalētequeze Be' Lá'azxa xúgute benne' ca', na' tu tue' gulezú lawe' dxuluchálaje' dizra' nazrala cáteze dxu-chine Be' Lá'azxa le'.

⁵ Ca lu zra ca' zaj zra' xezre Jerusalén benne' judío ca' dxulucá'ana szrénqueze' Dios. Benne' caní zá'aque' xúgute xezr la xu zaj dx'e lu xezr la xu nigá. ⁶ Ca

belenne' bēneache ca naca schaga na' da dxaca na, na' belexezrage', ne quebe zaj nézene' bi na', lawe' da dxelén tu tu benne' ca' dizra' cha chee' da dxuluchalaj benne' ca' dxeléajle'e chee' Jesús. ⁷ Na' belexebánele'ene', ne belexruse', ne gulé ljwezre' tue' xetúe':

—Zaj naca benne' Galilea xúgute benne' caní dxuluchálaje'. ⁸ ¿Ájazra na' dxendxu dxuluchálaje' dizra' cha cheedxu dxi'u? ⁹ Zradxu dxi'u nigá, nácadxu benne' xezr la xu Partia, ne benne' xezr la xu Media, ne benne' xezr la xu Elam, ne benne' xezr la xu Mesopotamia, ne benne' chee' xezre ca' zaj nababa Judea, ne benne' chee' naga nababa Capadocia, ne benne' chee' naga nababa Ponto, ne benne' chee' naga nababa Asia, ¹⁰ ne benne' chee' naga nababa Frigia, ne benne' chee' naga nababa Panfilia, ne benne' xezr la xu Egipto, ne benne' chee' xezr la xu Africa da zua dédedxa chee' xezre Cirene. Cá'anqueze zaj zra' benne' xezr la xu Roma nigá. Bal-la benne' Roma ca' zaj naque' benne' judío, benne' gulálaje' ca', ne benne' zaj nazi'e ca naca da nadxiruj bea chee' benne' judío ca'. ¹¹ Cá'anqueze nácadxu benne' xezr la xu Creta, ne benne' xezr la xu Arabia. Xúgutedxu dxendxu lu dizra' cha cheedxu dxuluchalaj benne' caní ca naca da zren ca' da dxun Dios.

¹² Xúgute' belexebánene', ne quebe zaj nézene' bi da dxaca na', na' gulenaba ljwezre' tue' xetúe':

—¿Bizra zéaje' da nigá?

¹³ Benne' xula ca' belún le', gulenné':

—Dxelezuzre benne' caní.

Da bchalaj Pedro lau benne' ca'

¹⁴ Nadxa guxasa Pedro nen benne' chinéaj gubáz chee' Cristo, na' zizraj bchálajlene' bēneache zaj zra' na'. Dxe'e le':

—Le'e, benne' Judea, ne xúgutele le'e nazrágale xezre Jerusalén. Dخال-la' nézele le'e da nigá. Le xen xanne' ca naca da xapa' le'e. ¹⁵Netu' quebe dxézúrentu' ca dxéquele le'e. Za gudete xr-sila na'a. Netú benne' quebe dxézúrene' ca ná'queze. ¹⁶Da nigá naca da gun-náqueze Joel, bénnea' bchálaje' waláz chee Dios gate na' gunné':

¹⁷Caní dxenná Dios: “Lu zra bzebe wasél-laqueza'

Be' Lá'azxa chia' chee súalene' xúgute bénneache.

Zrí'inele bi biu ne bi nu'ula welen-néquezebe' waláz chia' neda'.

Bi cuide' ca' welelé'equezebe' ca da gul'éda'-be'.

Na' benne' gula ca' welennéquezene' xela.

¹⁸Ca lu zra na' guzuáqueza' Be' Lá'azxa chia'

nen bi wen zrin chia' ca', benne' biu ne nu'ula ca',

na' guchálajquezebe' waláz chia' neda'.

¹⁹Lu be' zran xabáa gul'équeza' xel-la' waca chia',

na' lu xezr la xu dxe'ela gul'éda' da xelunna bea na,

dxen, ne xi', ne zren da naca ca beuj gasaj.”

²⁰Gubizra xechul-la na,

na' beu' xexaca na xrna ca dxen

nedxu ca za zrin zra xelá' Xránadxu.

Zra na' gaca na tu zra chee da xebánedxu ne zra na' walé'quezdXu xel-la' szren chee Dios.

²¹Nadxa xeelá xúgute benne' ca'

xelenné' Xránadxu lu xel-la' dxelejli lazre' chee'.

²²'Chee le' na', le'e, benne' Israel, le xen ca da xapa' le'e. Jesús, benne' Nazaret, guque' tu benne' bedxúaje' xrlátaje lau xúgutele le'e ne chee da ben Dios laule le'e. Lu na' Jesús Dios bl'éne' da zan da dxebánedxu, ne xel-la' waca ca', ne da dxelunna bea na ca ba nézquezle le'e.

²³Gate Dios be'e lataj tu benne' bdee' Le' lu na'le le'e cáteze bache núnqueze' nedxu, nadxa le'e gudél-lale Le', na' bétele Le' gate na' bdele Le' lu na' benne' ca' dxelune' da caléla, benne' ca' buludé'e

Le' xaga béguaj naga gutie'. ²⁴Nadxa Dios bsebané' Le', bebéaje' Le' lu xel-la' gute. Quebe guxú'u ájala xegá'ane' chalásaze lu xel-la' gute na'. ²⁵Ca naca da nigá bchalaj wenná bea David ca naca chee Jesús na', gate gunné':

Belé'queza' Xrana' lawa' nigá.

Le' zue' cuita' xabela, chee quebe bi guchebe na neda'.

²⁶Chee le' na' gubéle'eda', ne bil-la' lu xel-la' dxebe' chia'.

Chee le' na' guxrén lázrequeza' Le' gate gatia',

²⁷lawe' da quebe xucá'anaquezu' neda' lu lataj chee benne' gate.

Quebe güéquezu' lataj guzru bel-la' dxen chia' neda',

naca' benne' wen zrin chiu', ne benne' nazrí'inu'.

²⁸Blé'quezenu' neda' ca dxal-la' guna' chee zru'éda' xel-la' nabán,

na' gúnnale'u neda' xel-la' dxebe' lawe' da zúalenu' neda'.

²⁹'Le'e, bi bícha'dau'. Naca bea na gute xra xrtáudxu David, na' bulucache' le' lu xedxu ba chee' da zúaqueze na na'a nagá zúadxu. ³⁰David na' guque' tu benne' bchálaje' waláz chee Dios,

ne gunézene' ca da nachébe lázrequeze Dios guné'. Gunné' lie' tu benne' zri'ine zre sua David na' gaque' Cristo, Bénnea' nna béaqueze', xeque'e lawe' chee David.

³¹Ca' guca, David nigá belé'quezne' nedxu ca naca da dxal-la' gaca chee Cristo, na' bchálaje' ca guca gate bebán Cristo, gunné': “Benne' nigá quebe xegá'anaqueze' lataj chee benne' gate, ne quebe gúzruqueze bel-la' dxen chee'.”

³²Caní guca, Dios bsebané' Jesús nigá, na' netu' dxexeché'entu' da li ca guca da nigá. ³³Ca' guca, Dios bzue' Jesús lu

xabáa chee' nen xel-la' waca chee', na' be'e Le' lataj gusel-le' Be' Lá'azxa chee' nigá ca nachebe lázrequeze' nedxu gune', na' xúgute da caní dxelé'ele le'e, ne dx-enle zaj naca na da dxun Be' Lá'azxa na'.

³⁴ David na' quebe begüéne' xabáa, san léqueze' gune':

Xránadxu Dios guzre' Xrana':

"Gudxe'e cuita' xabela nigá

³⁵ ca zrindxa zra guzúa' benne' dxedábague' lue' chee' nna be'enu le'."

³⁶ 'Xúgutele le'e, benne' Israel, dxal-la' nézqueze da nigá: Jesús nigá, bènea' bda'le le'e xaga béguaj, Dios ba nune' Le' Xránale ne Cristo chee, Benne' guselé' le'e.

³⁷ Gate benne' ca' belenne' da nigá, na' belexewí'ine lazre', na' buluchebe' Pedro, ne benne' gubáz ca' chee Jesús, dxelé'e le':

—Benne' bíchentu', ¿ájazra dxal-la' guntu' xca'?

³⁸ Nadxa gunná Pedro:

—Le xebí'i lazre' lau Dios, ne le chua nisa tu tule chee gácale Jesucristo tuze, chee gunité lau Le' chee le'e ca naca dul-la da nabágale. Ca' gaca, nadxa Dios sél-laqueze' Be' Lá'azxa chee' chee súalene' le'e. ³⁹ Da nigá nachebe lazre' Dios naca na chee le'e, ne chee zrí'inele, ne chee xúgute' benne' zaj zre'e zitu', xúgute' benne' ca' dxaca lazre' Dios nne'.

⁴⁰ Ca naca dizra' nigá, ne xezícal-adxa dizra' da bchalaj Pedro, bzéajni'ine' benne' ca', na' gunné':

—Le la ládujla benne' wen da calela caní.

⁴¹ Ca'an guca, benne' ca' guléajle'e chee da bchalaj Pedro belexedxúe' nisa, na' lu zra na' belaca tuze ca chi dxua gaxúa benne' nen benne' ca' ba dxeléajle'e chee Jesús. ⁴² Na' xúgute' benne' ca' gulezúa típaqueze' ca da dxulusede benne' gubáz chee Jesús le', na' gulezúe'

tuze nen le sa' ljwezre' chee bululáwizre' Dios, ne buluzrague' chee xelawe' da dxusá lázredxu ca guca gate gute Cristo.

Ca belún benne' nedxu ca', benne' guleajlí lazre' Cristo

⁴³ Xúgute' benne' ca' gulezrebe' gate belelé'ene' xel-la' waca zante, ne da dx-elunna bea na da dxelún benne' gubáz chee Jesús. ⁴⁴ Xúgute' benne' ca' dxeléajle'e chee Jesús gulaque' tuze, ne bulunézruje' da de chee' tue' xetúe'. ⁴⁵ Belutié' xúgute' da zaj nape', ne bulunézruje' dumí na' chee benne' ca' ca da dx-elexájrjene'. ⁴⁶ Xugu' zra belexezrague' lu xudau', ne cá'anqueze lu lizre cha chee', chee xelawe' da dxusá lázredxu ca guca gate gute Cristo. Gulawe' tu zrente lu xel-la' dxelebe', ne duté xel-la' dx-elexruj lazre' chee'. ⁴⁷ Belúe lá'ane' Dios, na' xúgute' bèneache guléquene' benne' ca' ba lá'ana. Tu zra tu zra Xránadxu bzane' benne' ca' chee Cristo ca dxelezí' lu ne'e tu tue' Cristo.

Dxexaca tu benne' zrinnaj

3 Tu zra xjaque' Pedro ne Juan lu xudau' dxexedá' chunna, da naca na gate dxululáwizraj bèneache Dios lu xudau'. ² Tu zra tu zra zua tu benne' na' naque' zrinnaj ca nálajte'. Dxeleché' benne' ljwezre' le' xudau' na', ne dx-elebeche' le' dxu'a dxa xu'u na' nazí le na: Da Xrtante, chee nabe' guna' chee benne' dxelu'e na'. ³ Gate benne' zrinnaj nigá blé'ene' Pedro ne Juan, dxelu'e xudau', na' gunabe' guna' lau benne' caní. ⁴ Nadxa Pedro ne Juan gulenné'e le', na' Pedro guzre' benne' na':

—Gunná' netu'.

⁵ Benne' na' gunná' xánnie' le' lawe' da dxéquene' bi xulunezruje' le'. ⁶ Pedro guzre' le':

—Quebe bi de chia' dumí plata ne dumí oro. Da napa' gunna' lue'. Lu La Jesucristo, benne' Nazaret, guxasa gudá.

⁷Nadxa Pedro guqu'é na' benne' zrin-naj na' da zua xabela, ne bechise' le', na' ca bene' caní, belexezúa chacha ni'e, ne béchajdu chee' ca'. ⁸Nadxa benne' zrinna' na' guxrítie' tu, na' guzé', ne guzú lawe' dxedé'. Guxú'e nen benne' ca' xudau', dxedé', dxexrítie', ne dxue lá'ane' Dios. ⁹Xúgute' benne' zaj zre'e na' belelé'ene' le' dxedé', ne dxue lá'ane' Dios. ¹⁰Belexebánene', ne belezrebe' ca da belelé'ene' guca na, lawe' da zaj núnbe'e benne' zrinna' na', ne zaj nézene' naque' bénnea' dxebé'e dxenabe' guna' ga dxelexú'u bénneache xudau', da na' nazí le na Da Xrtante'.

Da bchalaj Pedro la chila da nazí le na La Chila Chee Salomón

¹¹Benne' zrinna' na', benne' ba bexaque', quebe bsane' na' Pedro ne Juan, na' xúgute' benne' dxelexebánene', ne xjaque' naga nazí le na La Chila Chee Salomón, naga zaj zra' Pedro ne Juan. ¹²Gate ble'e Pedro da nigá, na' guzre' benne' ca':

—Le'e, benne' Israel, ¿bizr chee na' dxebé'nele le'e? ¿Bizr chee na' dxenná'le netu' caní, ne dxé'quele netu' bexuntu' benne' nigá, na' dxexedé' ne chee xel-la' waca cheentu', u ne chee xel-la' benne' xudau' cheentu'? ¹³¡Cabí! Dios chee xra xrtáudxu Abraham, ne Isaac, ne Jacob bca'ana szrene' Zrí'ine', Jesús, Bénnea' bdele le'e lu na' benne' xu'u lawe'. Gate guca lazre' Pilato gusané' Le', le'e quebe guca lázrele. ¹⁴Bzúale chalá'ala Benne' na' naque' lá'axza ne xrlátaje, na' gunábale la tu benne' wen da zrinna'. ¹⁵Ca'an guca, bétele le'e Bénnea' dxunne' bénneache xel-la' nabán, san Dios bsebané' Le' ládujla benne' gate, na' netu' dxexeché'entu' chee da nigá. ¹⁶Guca lu La Jesús nigá'queze, u nnadxu guca na lawe' da guxéajle chee La Jesús, chee bezí' le

dipa benne' nigá dxel'é'ele, ne núnbeale le'. Lawe' da guxéajle'e chee Jesús, ba bexácatequeze' ca dxel'é'ele le'e xúgutele.

¹⁷'Le'e, Bi bicha', nezda' gate le'e, ne benne' xíchaje ca' chee'le bétele Jesús, quebe guque be'ele ca da dxunle. ¹⁸Dios bene' guca caní chee guca li ca da ba gunné' nédxute' gate buluchalaj waláz chee' benne' ca', na' gulenné' dxal-la' si' saca Cristo chee Dios. ¹⁹Chee le na', le xebí'i lázrele, ne le xexaca Dios tuze, chee xusule' dul-la nabágale. Nadxa Xránadxu Dios gunné' le'e lataj xexaca chawe' xichaj lázrdaule. ²⁰Sel-le' chee'le Jesús, Bénnea' guchebe lazre' sel-le' chee'le nédxudaute. ²¹Lu zra caní Jesucristo dxal-la' xegá'ane' xabáa cadxa gucá'ana chawe' Dios xúgute' da dxaca, ca na' gunné' lu dxu'a benne' ca' buluchálaje' waláz chee' nédxudaute. ²²Ca' naca na, lawe' da gunná Moisés, guzre' xra xrtáudxu ca': "Sel-la Xránadxu Dios chee'le tu benne' guchálaje' waláz chee'. Gaque' tu benne' ládujla bi bíchele ca', na' sel-le' le' chee'le ca gusel-le' neda'. Le xen xanne' xúgute' da xe'e le'e, ²³lawe' da welebía xi' xúgute' benne' quebe xelapa Le' ba lá'ana, na' cuase' benne' ca' ládujla xezre Israel."

²⁴'Xúgute' benne' ca', benne' buluchálaje' waláz chee Dios, guzú lau na gate zua Samuel, ne zeaj na, buluchálaje' chee zra caní. ²⁵Le'e dxezile ca da gulenná benne' ca' buluchálaje' waláz chee Dios, ne nácale tuze lu xel-la' wezrí'a da ben Dios nen xra xrtáule ca', ca guzre' Abraham: "Lu na' benne' zri'ine' zre su' gaca chawe' chee xúgute' bénneache zaj zre'e lu xezre la xu." ²⁶Gate Dios bsebané' Zrí'ine', gusel-le' Le' nedxu laule le'e chee gaca chawe' chee'le, chee gusanle tu tule le'e da caléla da dxunle.

**Pedro ne Juan dxeleznine' lau
benne' xu'u lawe' ca'**

4 Pedro ne Juan ne dxuluchálajlene' benne' ca' gate belezrín na' bxruze ca', ne benne' xu'u lu ne'e bi xra'aga chee xudau', ne benne' saduceo ca'.² Dxeleznine' lawe' da dxulusede Pedro, ne Juan benne' ca', dxelenné' welexebán benne' gate lawe' da bebán Jesús.³ Nadxa gulél-le' Pedro ne Juan, na' guleché'e le' lize xia ca zrindxa zra xula lawe' da ba dxezré' zra na'.⁴ Guléajle' benne' zan ládujla benne' ca' belénne' da bchalaj Pedro, na' cáttite benne' ca' dxeléajle'e chee Jesús zaj naque' ca gazxu' cue' chi gaxúa benne' biu.

⁵Zra xula na' benne' xíchaje ca' chee judío ca', ne benne' gula sina ca', ne benne' ca' dxuluxúzajle'e da nadxixruj bea na, belezrague' lu xezre Jerusalén⁶ nen Anás, bxruze blau, ne Caifás, ne Juan, ne Alejandro, ne xúgute benne' xrtia bxruze blau ca'.⁷ Nadxa gulenná be'e xeajlexrí'e Pedro ne Juan, na' buluzé' le' laduj naga zaj zre'e, na' buluchebe' le':

—¿Bi xel-la' dxenná bea, u nu lu La dx-unle da caní?

⁸Nadxa Pedro, zúalequeze Be' Lá'azxa le', guzre' benne' ca':

—Le'e, benne' xíchaje ca' chee bxruze, ne benne' gula sina ca',⁹ le'e dxuchébele netu' chee tu da chawe' da guca chee tu benne' we', chee nézele ájala guca bexaca bénnea'.¹⁰ Dxuzentu' xúgutele le'e chee xeleneze xúgute benne' Israel, benne' nigá ze' lau xúgutele le'e, ba bexaque' lu La Jesucristo, Benne' Nazaret, Bénnea' bda'le le'e le'e xaga béguaj, na' Dios bsebané' Le' ládujla benne' gate.¹¹ Jesús nigá naque' xiaj na', le'e, benne' wen xu'u bzúale chalá'ala, san na'a Léqueze' naque' xiaj blau chee xu'u.¹² Quebe nu chilá' bénneache seque' guselé' dxi'u lawe' da quebe ne gunna

Dios xetú La bénneache lu xezr la xu nigá, benne' séquene' guselé' dxi'u.

¹³Gate benne' xu'u lawe' belelé'ene' Pedro ne Juan dxuluchálaje' du lazre', ne dxeleque bé'ene' quebe zaj nazédie' lu na' bxruze ca', san zaj naque' benne' zre'e cá'aze, na' belexebáne benne' xíchaje ca', san guleque bé'ene' zaj naque' benne' guledálene' Jesús.¹⁴ Cá'anqueze bénnea' bexaque' ze' na' nen Pedro ne Juan, na' chee le' na' quebe gulezéquene' bi xelenné' chee'.¹⁵ Nadxa gulenná be'e belexedxúaj benne' gubáz ca' ládujla le'. Gate' belexegá'ana leze' buluchebe ljwezre',¹⁶ dxelenné':

—¿Ájazra gundxu chee benne' caní? Xúgute benne' zaj zre'e Jerusalén zaj nézene' belune' xel-la' waca zren nigá, na' quebe gaca tábagadxu na.¹⁷ Na'a, chee québedxa zriluj da nigá lówela bénneache, guxrúsadxu benne' caní chee québedxa nu xuluchálajlene' lu La Jesús.

¹⁸Nadxa gulenná be'e belexezrín Pedro ne Juan, na' gulenná bé'ene' le' québedxa nu xuluchálajlene', ne quebe nu xulusédené' lu La Jesús.¹⁹ Pedro ne Juan belexechebe':

—Le nna' le'e che naca xrlátaje lau Dios guzúazrantu' xrtízrale le'e, quézcala xrtizra' Dios.²⁰ Netu' quebe gaca gusantu' gucháljantu' ca naca da blé'entu', ne da bémentu'.

²¹Nadxa benne' xu'u lawe' ca' buluxuse' Pedro ne Juan, san bulusané' le'. Quebe belezrelne' ájala xelune' xuluzaca zi'e le' lawe' da dxelúe lá'ana xúgute bénneache Dios ca naca da ba guca.²² Bénnea' bexaque' ne chee xel-la' waca zren nigá ba gudee' chua iza.

**Benne' ca' dxeléajle'e chee Jesús
dxelenabe' lau Dios gunézurje'
le' xel-la' dxuluxrén lazre'**

²³Gate bulusané' Pedro ne Juan, benne' caní xjaque' naga zaj zra' benne' ljwezre', na' buluzenne' le' ca naca

xúgute da gulenná benne' xíchajē ca' chee bxruze ca', ne benne' gula sina ca'. ²⁴ Gate belenne' da caní, xúgute' buluchálajlene' Dios, gulenné':

—Xránantu', Lue' nacu' Dios. Benu' xabáa, ne xezr la xu, ne nísadau', ne xúgute da zaj nnita lataj ca'. ²⁵ Lue', lu na' Be' Lá'azxa, ne lu dxu'a David, benne' wen zrin chiu', gunnáu':

¿Bizr chee na' dxelasa bēneache xezr la xu ca',

na' bēneache dxelegú'u lazre' da quebe bi zaj zaca?

²⁶ Benne' wenná bea ca' chee xezr la xu gulune' tuz,

na' benne' blau ca' chee xezr ca' belezrague'

chee xeledábage'e Xránadxu Dios, ne Cristo chee'.

²⁷ Da li, Herodes. ne Poncio Pilato belezrague' lu xezre nigá nen benne' zitu' ca', ne nen benne' Israel ca', na' guledábage' Zri'inu' Lá'azxa, Jesús, Bēne' b'zúaquezu' Lue'. ²⁸ Ca'an guca, benne' ca' belune' xúgute ca da ba núnquezu' Lue' dxal-la' gaca na. ²⁹ Na'a, Xran, gunná' ca dxuluxruse' netu', ne bēna netu', wen zrin chiu' ca', xel-la' dxuxrén lazre' chee guchálajntu' xrtizru', ne quebe zrēbentu', ³⁰ ne bēna netu' xel-la' waca chiu' chee gaca xexuntu' benne' we' ca', ne chee guntu' xel-la' waca chee xabáa lu La Zri'inu' Lá'azxa Jesús. ¿Ca'an gaca!

³¹ Gate bexuzre buluchálajlene' Dios, lu lataj naga zaj nazrague' guzrú', na' xúgute' guzúale Be' Lá'azxa le', na' buluchálajē' xrtizra' Dios dutē xel-la' dxuluxrén lazre' chee'.

Xúgute' dxelune' tuze ca naca da zaj nape'

³² Benne' zan ca', benne' dxeléajle'e chee Jesús gulaque' tuze lu xichaj lázrdawē'. Netúe' quebe gunné' cheeze' naca da nape'. Xúgute da zaj nape' zaj nune'

tuze. ³³ Benne' gubáz ca' chee Jesús, nen dutē xel-la' dxelenná bea buluchálajqueze' ca guca gate bebán Xránadxu Jesús, na' Dios bēne' guca chawe' chee xúgute benne' ca'. ³⁴ Quebe nu guzúa ládujla benne' ca' bi bxázejene' lawe' da caní belún xúgute benne' zaj nape' xezr la xu ca' u xu'u ca'. Belutie' na, na' belú'e dumí na', ³⁵ ne xeajlenézruje' na lu na' benne' gubáz ca', chee xelexelē'e na tu tu benne' ca' ca da dxelechínene'. ³⁶ Zua ládujla benne' ca' tu benne' xrtia Leví le' José, benne' gúlaje' Chipre da naca tu xezr la xudau' naxechaj nísadau' le na. Benne' nigá, buluzúa gubáz ca' le' Bernabé, da zéajē na benne' dxexúe zrene'. ³⁷ Benne' nigá betie' tu xezr la xu da nape', na' bi'e dumí na', ne bnézruje' na lu na' benne' gubáz ca'.

Dul-la da belún Ananías ne Safira

5 Xetú benne' le' Ananías nen zru'ule' Safira, betie' tu xezr la xu chee'. ² Benne' nigá beque'e late' dumí na', na' da begá'anaze bi'e lau benne' gubáz ca', ne gunné' ca naca na'. Zru'ule' ca naca na nézene'. ³ Nadxa guzre Pedro le':

—Ananías, ¿bizr chee na' be'u lataj Satanás guxú'u na lu xichaj lázrda'u chee si xē'u Be' Lá'azxa, na' beca'u late' chiu' ca naca da guzi'u chee xezr la xu na'? ⁴ ¿Quebe guca xezr la xu na' chiu'? Na' gate betiu' na, ¿quebe guca dumí na' chiu'? ¿Ájazra guca benu' da nigá? Dios guzú' xē'u, quegá bēneache.

⁵ Ca ben Ananías da nigá, na' guzré'e gútete'. Xúgute benne' belén da nigá belezrébele'e. ⁶ Nadxa gulebiga bal-la bi cuide' ca', ne buluchélabē' le' tu ladxe', na' belúabē' le' cheajlecáchebe' le' lu ba.

⁷ Ca guca chunna hora gudé na', guxú'u zru'ula Ananías na', ne quebe nézene' bi ba guca. ⁸ Pedro bchebe' le':

—Gunná, ¿bētele le'e xezr la xu na' ca dxennale guzile na?

Gunná Safira na':

—Awe', ca naca na'.

⁹Nadxa Pedro guzre' le':

—¿Bizr chee' na' benle le'e tuze dizra' gúquele si xe'le Be' Lá'azxa? Chale'aj na' ba zesí'aca bi ca' xeajlecáchebe' benne' chiu', na' na'a xelúatequezebe' lue'.

¹⁰La' ná'queze nu'ula na' guzré'e gútete' zran ni'a Pedro. Gate belú'u benne' cuide' ca', na' belelé'ebe' le' ba gutie', na' belexebéajbe' le' xeajlecáchebe' le' cuita ba chee' benne' chee'. ¹¹Xígute' benne' ca' zaj nazrague' na', ne xígute' bénneache, benne' belén da caní belezrébele'e.

Benne' gubáz ca' dxelúnle'e xel-la' waca chee' xabáa

¹²Benne' gubáz ca' belúnle'e xel-la' waca chee' xabáa, ne da dxelunna bea na lau benne' ca', na' xígute' belezrague' La Chila Chee' Salomón, da naca na chee' xudau'. ¹³Netú benne' ca', benne' quebe dxeléajle'e chee' Jesús, quebe belexázrene' gune' benne' ca' tuze, san xígute' bénneache belape' benne' caní ba lá'ana.

¹⁴Benne' zandxa gulezú lawe' dxeléajle'e chee' Xránadxu, benne' biu ne nu'ula ca'. ¹⁵Ca' guca na, belebéaje' benne' we' ca', zaj de' lu da dxeláta'ne', ne da'a chee', na' gulíxrue' le' la neza ca' chee' gate te Pedro na', na' te zrula chee' lawe' benne' ca'. ¹⁶Cá'anqueze benne' xezre walizre ca' belelé'e lu xezre Jerusalén, zaj nu'e benne' we' chee' ca', ne benne' ca' zaj xu'e be' xriwe' ca', na' xígute' belexexaque'.

Benne' gubáz ca' dxelu'e lizre xia

¹⁷Nadxa bxruze blau, ne benne' sa-duceo ca' zaj zúalene' le', gulaque' xa lazre', ¹⁸na' gulél-le' benne' gubáz ca', ne buluzré'e le' lizre xia. ¹⁹Na' tu gubáz chee' xabáa chee' Xránadxu gusálaje' dxa xu'u chee' lizre xia na' chizrela, na' bebéajje' benne' ca', ne dxé'e le':

²⁰—Le chjaca, ne le cheajsé lu xudau', ne le guzén benne' ca' ca naca chee' xel-la' nabán cube nigá.

²¹Ca belenne' da nigá, zra xula belú'e chila xudau' che zílala, na' gulezú lawe' dxulusédene' benne' zaj zré'e na'.

Dxácate na', bxruze blau na', ne benne' zrálene' le', buluchague' benne' ca' chee' xu'u lawe' blau, ne benne' gula sina ca' chee' xezre Israel, na' gulenná be'e xelexebéaje' gubáz ca' zaj xu'e lizre xia. ²²Gate belezrín bi xra'aga chee' xudau' na', quebe nu belelé'ene' lu xu'u lizre xia, na' belexezrine', ne buluzenne' benne' ca', ²³dxelenné':

—Gate bzrintu' lizre xia na', naxezxuj tipa na, na' benne' dxjaque' wedil-la zaj zré'e dxu'a dxa xu'u na', ne dxuluxúe' na, san gate gusálajntu' na, quebe nu bezrelentu' lu xu'u na'.

²⁴Gate bxruze blau, ne benne' xíchaje' ca' chee' bxruze ca', ne xíchaje' chee' bi xra'aga ca', belenne' da nigá, na' buluchebe ljwezre' ga cheajsé da nigá. ²⁵La' ná'queze bzrin tu benne' guzre' le':

—Benne' ca' bzra'le le'e lizre xia zaj zré'e lu chila xudau', dxulusédene' bénneache.

²⁶Nadxa benne' xíchaje' chee' bi xra'aga chee' xudau' guxíajlene' bi xra'aga ca', na' xeajlexrí'e gubáz ca'. Quebe bi belúnene' le' lawe' da belezrebe' bi xelún benne' ca' dxelenne' chee' gubáz ca', lawe' da dxeléquene' xelu'e le' xiaj. ²⁷Gate xeajlexrí'e gubáz ca', na' buluzré'e le' lau benne' xu'u lawe' blau, na' gunná bxruze blau na', dxé'e benne' gubáz ca':

²⁸—Netu' bzrínantu' le'e quebe guchálajledxale bénneache lu la bénnea. ¿Bizra na' benle? Ba bzenle ca naca benne' zaj zré'e xezre Jerusalén ca naca da dxusédele, ne dxaca lázrele gusebágale netu' xel-la' gute chee' benne' na'.

²⁹Nadxa belexechebe Pedro, ne kezí-cadxa benne' gubáz ca':

—Dxala' guzúantu' xrtizra' Dios, quegá xrtizra' bènneache. ³⁰Dios chee xra xrtáudxu ca' bsebane' Jesús, Bénnea' bêtele le'e bda'ale Le' xaga béguaj. ³¹Dios bca'ana szrene' Le' chalá'a xabela chee', ne bene' Le' Benne' Blau, ne Weselá, chee gata' lataj chee benne' Israel xelexebí'i lazre' chee gunité lau Dios dul-la chee'. ³²Chee le na' netu' dx-exechébentu', ne cá'anqueze dxun Be' Lá'azxa. Dios dxunézruje' Be' Lá'azxa benne' dxuluzúe' dizra' chee'.

³³Gate belenne' da nigá, na' belezré'e, ne gulaca lazre' xelúti'e' gubáz ca'. ³⁴Lá-dujla benne' xu'u lawe' ca' zua tu benne' fariseo le' Gamaliel. Naque' benne' dx-uxuzájle'e da nadxixruj bea na, na' dx-elápalé'e bènneache le' ba lá'ana. Benne' nigá guzé', na' gunná bé'ene' xelexebéaje' gubáz ca' chalé'ajla tu chí'idau'. ³⁵Nadxa guzre' benne' xu'u lawe' ca':

—Le'e, benne' Israel, le guxúe xanne' ca gunle chee benne' caní. ³⁶Le gusá lazre', bache guca zane' iza, gudábaga Teudas xu'u lawe', gunné' naque' tu benne' blau, na' xjácale ca tapa gaxúa benne' biu le'. Na' beluti'e' le', na' xúgute benne' ca' gulaca le' tuze belexase din-naje' ca', na' gudé chee da na'. ³⁷Gudé na', lu zra gate belú'u bènneache xiche, na' bla' Judas, benne' Galilea, na' benne' zan xjácálene' le'. Cá'anqueze beluti'e' bènnea', na' xúgute benne' gulede'e le' belexase dínnaje'. ³⁸Chee le na', le gusán benne' caní, ne quebe guchixre cheele nen benne' ca'. Che da nigá naca na da dxun beneácheze, wadé chee na. ³⁹Che naca na da dxun Dios, quebe séquele le'e guzría xile na. Le guxúe xanne' chee quebe tíl-laléle Dios.

⁴⁰Xúgute' belexaque' tuze. Nadxa gu-lenná be'e belú'u gubáz ca' da xula, na' ca belú'u benne' ca', na' buluzruné' le' québedxa nu xuluchálajle benne' ca' lu

La Jesús. Gudé na' bulusane' le'. ⁴¹Na' benne' gubáz ca' belexedxúaje' naga zaj zra' benne' xu'u lawe' ca', dxelébélé'ene' lawe' da be' Dios lataj guledé'e' xel-la' zi' lawe' da zaj naque' Jesús tuze. ⁴²Quebe bulusane' dxuluchálaje', ne dx-ulusédene' bènneache ca naca chee Jesu-cristo xúgute' zra, lu chila xudau', ne lu xu'u ca'.

Dxuluzúe' gazre benne' xelune' zrin chee benne' zaj de'e Cristo

6 Lu zra ca', gate zaj dxan benne' ca' zaj de'e Jesús, na' benne' ca' dxelenné' dizra' griego gulawe' zria benne' ca' dxelenné' dizra' hebreo. Dxelenné' quebe nu dxunézruj xanne' da xeláw nu'ula ba gulate benne' chee' zaj zre'e ládujla le' gate dxelísie' xel-la' wagu tu zra tu zra. ²Nadxa benne' gubáz ca' buluchague' ca naca benne' ca' dxeléajle'e chee Jesús, na' gulé'e le':

—Quebe naca xrlátaje gusantu' guchálajntu' xrtizra' Dios chee gudentu' xel-la' wagu. ³Chee le na', biche ljwézrentu', le quilaj gazre benne' lówela le'e, benne' zaj naque' du lazre', ne dxeléajni'ine', ne zúale Be' Lá'azxa le', na' le gusebague' zrin nigá. ⁴Netu' tu guchálajle'zquezentu' Dios, ne gusédentu' bènneache xrtizra' Dios.

⁵Xúgute' gulaza lazre', na' gulequ'é'e Esteban, tu benne' dxéajle'e duté lázrdawe' chee Jesús, ne zúale Be' Lá'azxa le'. Cá'anqueze gulequ'é'e Felipe, ne Prócoro, ne Nicanor, ne Timón, ne Parmenas, ne Nicolás, tu benne' xezre Antioquía, benne' nédxute bexaque' tuze benne' judío ca'. ⁶Na' guleché'e benne' caní lau benne' gubáz ca', na' le' bululáwizre' Dios, ne buluzé ne'e lawe' benne' gazre caní.

⁷Xrtizra' Dios zeaj dxezriluj na, na' benne' ca' dxeléajle chee Jesús guxánle'e lu xezre Jerusalén, na' bxruze zan chee judío ca' guléajle'e chee'.

Dxelel-le' Esteban

⁸ Esteban, tu benne' nápalé'e xel-la' waca, ne naque' chawe' lau Dios, bene' xel-la' waca ca' chee xabáa, ne da dx-elunna bea na chee da ca' lau bèneache ca'. ⁹ Nadxa bal-la benne' chee xu'u naga dxelezraga bèneache ca', nazí le na Xu'u Chee Benne' Québedxa Zaj Nada'u, benne' xezre Cirene ca', ne benne' xezre Alejandría ca', ne benne' chee ga nababa Cilicia, ne Asia, gulezú lawe' dxulutíl-lalene' Esteban dizra'. ¹⁰ Quebe gulezéquene' bi xelenné' chee xrtizra' Esteban lawe' da bchálaje' nen duté xel-la' sina chee Be' Lá'azxa. ¹¹ Nadxa gulízu-je' bal-la benne' ca' chee xelenné' belenne' gunné Esteban dizra' schanni' chee Moisés, ne chee Dios. ¹² Caní beluné', ne gulu'e xel-le' bèneache ca', ne benne' gula sina ca', ne benne' dxuluxuzájle'e da nadxixruj bea na, na' gulebía di'e Esteban. Gulel-le' le', ne guleché'e le' lau benne' xu'u lawe' blau. ¹³ Cá'anqueze gulílaje' benne' wen lazre' xelenné' chee Esteban, na' gulenné':

—Benne' nigá quebe dxusane' dxenné' schanni' chee xudau' lá'azxa nigá, ne chee da bdxixruj bea Dios. ¹⁴ Ba bentu' gunné' ca gun Jesús, benne' Nazaret, dxenné' guzría xi'e xudau' nigá, ne guché'e ca naca da zéajlédxu da bca'ana Moisés.

¹⁵ Nadxa benne' xu'u lawe' ca', ne xúgute benne' zaj zré'e na', gate gulenné'e Esteban, belelé'ene' lawe', naca na ca lau tu gubáz chee xabáa.

Dxexechébe Esteban lau benne' xu'u lawe' ca'

7 Nadxa bxruze blau bchébe' Esteban: —¿Zaj naca da li da caní?

² Na' Esteban bechébe':

—Le'e, benne' gula, ne le'e biche ljwezra', le xene. Xradxu zue' xabáa ble'e lawe' lau xra xrtáudxu Abraham

gate ne zue' lu xezr la xu Mesopotamia, nédxudxa gate quebe ne xezé'e chea-jxezúe xezre Harán. ³ Dios guzre' le': “Bsan lázrii' ne xúgute xrtia ljwezru', na' guxíaj lu xezr la xu da gulé'eda' lue'.” ⁴ Nadxa Abraham guzré'e lu xezr la xu Caldea, xeajsúe' xezre Harán. Ca gudé gute xra Abraham, Dios guché'e Abraham lu xezr la xu nigá, naga zrale le'e na'a. ⁵ Dios quebe bi bnéruje' chee Abraham naga sue' lu xezr la xu nigá, ne naga gune' lize', san guchébe lazre' gunéruje' le' xezr la xu nigá, na' gate te gate le', na' gaca na chee zrí'ine', lácala lu zra na' quebe ne galaj nu zrí'ine Abraham. ⁶ Cá'anqueze Dios guzre' le' xelezúa zrí'ine zre sue' ca benne' zitu' tu lu xezr la xu chee benne' xula, ne xelaque' benne' zaj nada'u, na' xuluzálaje' le' tapa gaxúa iza. ⁷ Cá'anqueze guzre Dios le': “Neda' chuga' ca gaca chee xezr la xu na' guchine na zrí'ine zre su', na' te na' xelaxedxúaje' ga na', ne xelúe lá'ane' neda' lu xezr la xu nigá.” ⁸ Dios bene' tu xel-la' wezría nen Abraham, na' gunná bé'ene' le' chugu latedu weaj belá' chee benne' biu ca' lu bel-la' dxen chee', tu da guzúa chuchu na xel-la' wezría na'. Chee le' na' gate gulaj Isaac, zrí'ine Abraham, guchugue' latedau' belá' chee bel-la' dxen chee Isaac gate gúquebe' xrunu' zra, na' cá'anqueze ben Isaac chee zrí'ine', Jacob, ne cá'anqueze ben Jacob chee zrí'ine' ca', benne' ca' gulaque' xra chazrinnu cue' benne' Israel.

⁹ Zrí'ine Jacob na', benne' ca' zaj naque' xra xrtáudxu, gulaque' xa lazre' chee bi biche' José, na' belutié-be' chee chu'ube' lu na' benne' guchínene'-be' lu xezr la xu Egipto. Dios guzúalene' José, ¹⁰ na' bselé'-be' lu xúgute da zi' da xa'. Bnéruje'-be' xel-la' dxéajni'i, na' ben Dios bezaca ba lázrele Faraón José na'. Faraón nigá guque' wenná bea lu xezr la xu Egipto, na' bzue' José gácabe' benne'

xu'u lu ne'e xezr la xu Egipto na', ne benne' walizre Faraón na'.

¹¹ 'Nadxa guca gubina' du ca naca xezr la xu Egipto, ne ca naca xezr la xu Canaán, na' xra xrtáudxu ca' quebe bi belezrélene' da xelawe'. ¹² Gate ben Jacob de zrua' xtila lu xezr la xu Egipto, na' gusel-le' na' zr'ine' ca', benne' ca' zaj naque' xra xrtáudxu. Da nigá guca na da nedxu lasa xjaque' Egipto. ¹³ Da gudxupe' lasa xjaque' na', José ble'e lawe' benne' biche' ca', na' ca'an guca guneze wenná bea chee Egipto ga benne' José na'. ¹⁴ Nadxa José gunná bé'ene' xea-jlexr'íe xre', ne ca naca xrtia ljwezre', zaj naque' ga xun chínue'. ¹⁵ Ca'an guca, Jacob xeaajsúe' Egipto naga gutie', ne naga gulátequeze xra xrtáudxu ca'. ¹⁶ Ca gudé na' belú'e bel-la' dxen gate chee benne' ca' lu xezre Siquem, naga bulucache' le' lu ba da zua na lu xezr la xu na' da guz'í Abraham nen dumí da gudízruje' bi ca' zri'ine Hamor lu xezre Siquem na'.

¹⁷ Gate ba zua gagu zra gaca li da guchebe lazre' Dios da na' ben chúchue' lau Abraham, na' benne' Israel zaj zre'e xezr la xu Egipto gulán-le'e. ¹⁸ Nadxa guzú lau dxenná bea tu wenná bea lu xezr la xu Egipto, benne' quebe núnbe'e José. ¹⁹ Wenná bea nigá guz'í xe'e benne' ljwézredxu, ne bzálaje' xra xrtáudxu ca', na' gunná bé'ene' le' cheajleca'ane'-be' bidu dxe'ene chee' ca' chee xelátebe'. ²⁰ Lu zra ca' gulaj Moisés, ne gúcabe' tu bidau' bezaca ba lazre' Dios chee'be', na' xra xnabe' bulusegule'-be' lizre' chunna beu'. ²¹ Gate bzin zra zxa-la' cheajlega'ane'-be', na' bi nu'ula chee wenná bea na' bequ'e-be', ne bsegule'-be' ca' zri'inequeze'. ²² Chee le' na', Moisés guzúdebe' ca' naca xel-la' sina chee Egipto, na' gúcabe' tu benne' nape' xel-la' dxenná bea ca' naca da gunné', ne da bene'.

²³ Gate bzrie' chua iza, Moisés guca lazre' cheajnné'e benne' ljwezre', benne'

Israel ca'. ²⁴ Blé'ene' tu benne' Egipto dxu'e tu benne' Israel. Chee gúcalene' benne' na', ne chee bebéaj lazre' bènea', betie' benne' Egipto na'. ²⁵ Moisés gúquene' benne' lazrie', benne' Israel ca', xeleque bé'ene' Dios guselé' benne' ca' ne chee le'. Benne' ca' quebe guleque bé'ene' na. ²⁶ Zra xula Moisés blé'ene' chupa benne' Israel dxedil-le', na' lawe' da guca lazre' xelezrá zrie' benne' ca', na' guzre' le': "Le'e nácale biche ljwézrele. ¿Bizr chee na' dxue ljwézrele?" ²⁷ Nadxa benne' na' dxu'e benne' ljwezre' bzrigue' Moisés, na' guzre' le': "¿Nu bzua lue' ca benne' xíchaje cheentu' chee guchi'u ca da dxuntu?" ²⁸ ¿Dxaca lazru' gutiu' neda' ca benu' neaje, betiu' benne' Egipto na'?" ²⁹ Ca ben Moisés da nigá, na' bzrúnaje' zexíaje' lu xezr la xu chee benne' Madián ca'. Na' guzúe' ca' tu benne' zitu', na' bchaga ná'lene' nu'ula, na' gulaj chupa zri'ine'.

³⁰ Ca gudé chua iza, gate zue' le'e xixre' lawe' lataj da zua na gagu lu xi'a Sinaí, na' ble'e lau tu gubáz chee xabáa le' tu lu xi' da dxe' lu xeche' bisigá. ³¹ Moisés bzrebe' ca' naca da blé'ene', san gate gubigue' chee le'e xánnene', benne' chi'i Xránadxu, dxenné': ³² "Neda' naca' Dios chee xra xrta'u ca', Dios chee Abraham, ne Dios chee Isaac, ne Dios chee Jacob." Nadxa Moisés guzú lau dxezríze' lu xel-la' dxezrebe, na' quebe bexázzjene' nne'e. ³³ Xránadxu guzre' le': "Guleaj zrelu' xu'u ni'u lawe' da naca lá'azxa lataj naga dxeléaju'. ³⁴ Neda' ba ble'eda' ca' naca da dxelezaca zi' bèneache chia' zaj zre'e lu xezr la xu Egipto. Dxenda' ca' dxelebezre xache', ne ba bla'la chee guselá' benne' ca'. Gudá lue', sel-la' lue' lu xezr la xu Egipto."

³⁵ 'Lácala benne' ca' buluzúe' Moisés chalá'ala, gulé'e le': "¿Nu bzua lue' ca' benne' xíchaje cheentu' chee guchi'u ca da dxuntu?" Dios gusel-le' le' ca' benne' xíchaje, ne benne' guselá' le', ne chee

gubáz chee xabáa na' ble'e lawe' le' lu xeche' bisigá. ³⁶ Moisés na' bebéaje' xra xrtáudxu ca' lu xezr la xu Egipto, ne bene' xel-la' waca ca', ne da gulunna bea na da bene' lu xezr la xu na', ne lu nísadau' Xrna, ne le'e xixre' lawe' lataj da chua iza na'. ³⁷ Moisés nigáqueze guzre' benne' Israel ca': "Dios sel-le' tu benne' guchálaje' waláz chee', benne' gálaje' lá-dujla xrtia ljuwézrele le'e, ca gusel-le' neda'. Chee Le' le xen." ³⁸ Cá'aqueze Moisés nigá, bénnea' guzúale benne' ca' le'e xixre' lawe' lataj, tu zren nen gubáz chee xabáa na' bchálaje' le' lu xi'a Sinaí, guzúalene' xra xrtáudxu ca', ne guzi'e dizra' chee xel-la' nabán chee bdee' na cheentu'.

³⁹ 'Xra xrtáudxu ca' quebe gulaca lazre' xuluzúa dizra' chee Moisés, san buluzúe' le' chalá'ala, ne gulaca lazre' xelexezrine' Egipto. ⁴⁰ Gate cabí zue' Moisés ga na' gulé'e Aarón: "Dxaca lázrentu' gunu' dios ca' chee xelebía lawe' launtu', lawe' da quebe nézentu' bi guca chee Moisés, bénnea' bebéaje' netu' lu xezr la xu Egipto."

⁴¹ Nadxa belune' tu bedáu' guca na ca tu bézredau', ne belutie' be xixre'du ca' lau bedáu' na', ne gulebene' chee da zaj nune'. ⁴² Nadxa Dios becuase' nen benne' ca', na' be'e le' lataj belúe l'áne' belaj zaj zria zran xabáa. Ca'an naxúaj na lu xiche chee benne' ca' buluchálaje' waláz chee Dios. Dxeleñé':

Le'e, benne' Israel ca', ¿guzríale-ba' chia' neda' be xixre'du ca' bétele duté chua iza gate na' guzúale le'e xixre' lawe' lataj?

⁴³ ¡Cabí! Bíale xudau' xide zra be xixre' chee dios cheele, Moloc, ne xudau' chee belaj nazí le na Renfán, dios cheele, bedáu' ca' bénquezle le'e chee be l'áne' na.

Chee le' na' cuéaja' le'e lu xezr la xu cheele,

ne sel-la' le'e dédedxa ca naga dxe' Babilonia.

⁴⁴ 'Le'e xixre' lawe' lataj na' xra xrtáudxu ca' belune' tu xudau' xide naga buluzrá chawe' blaga' xiaj naga naxúaj da nadxixruj bea na. Belune' na ca naca da ble'e Dios Moisés, gate guzre' le' gune' na ca naca da na' ba blé'ene'. ⁴⁵ Zri'ine xra xrtáudxu ca' belexaca lu ne'e xudau' xide na', na' belúe na gate belezrine' lu xezr la xu nigá nen Josué, chee belequ'é xezr la xu nigá lu na' benne' xezr la xu ca' zaj zre'e nigá, benne' ca' Dios bebéaje' le' chee bnézruje' xezr la xu nigá chee xra xrtáudxu ca'. Ca'an guca ca bzrinte' zra ca' zua David. ⁴⁶ Wenná bea David na', Dios bezaca ba lazre' chee', na' guca lazre' David gune' tu xudau' naga sua Dios chee Jacob. ⁴⁷ Salomón, zri'ine David, bene' lizre Dios na'. ⁴⁸ Dios szrente' quebe zue' lu xudau' ca' da zaj nun bénneache. Caní gunná tu benne' bchálaje' waláz chee Dios, gunné':

⁴⁹ Xabáa naca lataj naga dxe'a, na' xezr la xu naca na naga nuléaj ni'a. ¿Ájazra naca xu'u gunle le'e chia'? dxenná Xránadxu.

¿Ájazra naca lataj naga dxal-la' xezí' lazra'?

⁵⁰ ¿Quegá neda' bénqueza' da ca'?

⁵¹ Nadxa gunná Esteban:

—Le'e nácaquezle lázxdau zide', ne zria nágale, ne lázrdau' ca zaj naca chee benne' quebe zaj núnbe'e Dios, quebe dxezile xrtizre'. Dxedábagaquezle Be' Lá'azxa. Nácale ca gulaca xra xrtáule ca'. ⁵² Xra xrtáule ca' buluzría xi'e xúgute benne' ca' buluchálaje' waláz chee Dios. Belutie' benne' ca' buluchálaje' nédxu-dauté ca dxal-la' gaca chee benne' xrlátaje nigá, na' gate ble'e, lé'equezle bdele Le' lu na' benne' ca' guledábague' Le', ne bétele Le'. ⁵³ Le'e guzile da nadxixruj bea na da benna gubáz chee xabáa dxi'u, san quebe dxuzúale dizra' chee na.

Dxelutie' Esteban

⁵⁴ Gate belén benne' ca' da caní, na' gu-lagu lazxe' lu xel-la' dxelezá'a Esteban.

⁵⁵ Nadxa Esteban, zúale Be' Lá'azxa le', gunné'e xabáa, ne blé'ene' xel-la' szren chee Dios, na' Jesús ze' chalá'a xabela chee Dios. ⁵⁶ Nadxa gunné':

—Le nna'xque, dxelé'eda' naxalaj xabáa, na' Benne' Gulje' Bénneache ze' chalá'a xabela chee Dios.

⁵⁷ Benne' ca' bulusé'xuje' nague', na' gulebezre xe'e, ne xeajlechía che'e Esteban na'. ⁵⁸ Na' belebéaje' le' lu xezre na', naga belú'e le' xiaj. Na' benne' ca' gulenné' chee Esteban bulucá'ane' zra lané' lu na' tu benne' cuide' le' Saulo. ⁵⁹ Dxácate dxuluzríe' le' xiaj, Esteban na' bláwizre' Dios, gunné':

—Xrana' Jesús, bezí' lu na'u be'nácaqueza'.

⁶⁰ Gudé na' bzu zribe', na' gunné' zizraj:

—Xran, quebe gusebaga' benne' caní dul-la nigá.

Ca bexuzre gunné' ca', na' gutie'.

Saulo dxenáu zi' xuzre' benne' ca' dxeléajle'e chee Jesús

8 Saulo guque' tuze nen benne' ca' belutie' Esteban.

Lu zra ná'queze gulezú lawe' dxelau zi' xuzre' benne' ca' dxeléajle'e chee Jesús, benne' ca' zaj zre'e xezre Jerusalén. Xúgute' belexase dínnaje' ca' naca xezre ca' zaj nababa Judea, ne xezre ca' zaj nababa Samaria. Benne' gubáz ca' belexegá'ane' xezre Jerusalén na'. ² Bal-la benne' ca' zaj naque' chee Dios bulucache' Esteban na', ne gulebézrele'e chee'. ³ Dxácate na' Saulo dxenáu zi' xuzre' benne' ca' dxeléajle'e chee Jesús, na' guxú'e tu tu xu'u chee cheajxrube xue' benne' ca', ne cheajlu'e le' lizre xia.

Dxuluchálaje' dizra' chawe' chee Jesús naga nababa Samaria

⁴ Benne' ca' chee Cristo, benne' buluzrúnnuje' Jerusalén, buluchálaje' dizra' chawe' chee Jesús gáteteze na' zjaque'.

⁵ Felipe, tue' benne' ca', guxíaje' tu xezre naga nababa Samaria, na' guzú lawe' dxuchálajlene' benne' ca' ca' naca chee Cristo. ⁶ Benne' ca' zaj nazrague' belén xánnene' ca' da dxuchalaj Felipe, ne belelé'equezne' ca' naca xel-la' waca ca' da dxune'. ⁷ Benne' zan, benne' zaj xu'e be' xriwe' belexexaque', na' be' xriwe' ca' belexedxúaj na lu xichaj lázrdau benne' ca', dxelebezre xa'a na, na' benne' zan benne' zaj zua zri ni'a ne'e, ne benne' zrinnaj ca' belexexaque'. ⁸ Ca'an guca, gulebéle'e xúgute' benne' ca' lu xezre na'.

⁹ Zua na' tu benne' le' Simón, nédxute' guque' benne' wazrá', ne guzú xe'e benne' Samaria ca', dxenné' naque' tu benne' szren. ¹⁰ Xúgute' belén xánnene' chee', benne' cazraze ca', ne benne' blau ca', gulenné':

—Benne' nigá nape' xel-la' szren chee Dios.

¹¹ Gulape' le' ba lá'ana lawe' da lu xel-la' wazrá' chee' na' guzú xe'e benne' ca' zane' iza. ¹² Gate guléajle'e chee dizra' chawe' da dxuchalaj Felipe ca' dxenná bea Dios, ne ca' naca chee La Jesucristo, xúgute', benne' biu, ne nu'ula ca', beledxúe' nisa. ¹³ Cá'anqueze Simón na' guxéajle'e chee Jesús, ne gudxúe' nisa, na' guzú lawe' zéajlene' Felipe, na' dxexebánene' ca' naca xel-la' waca da za xabáa da dxun Felipe.

¹⁴ Gate benne' gubáz ca' chee Jesús, benne' zaj zre'e Jerusalén, belenne' gulezú' lu na' benne' Samaria ca' xrtizra' Dios, na' gulesel-le' Pedro ne Juan na'.

¹⁵ Gate belezrine' na', na' belenabe' law Dios chee benne' Samaria ca' dxeléajle'e chee Jesús chee xelezú'e Be' Lá'azxa. ¹⁶ Quebe ne xida Be' Lá'azxa súalene'

netú benne' ca'. Tuze beledxúaze' nisa lu La Xránadxu Jesús. ¹⁷Nadxa Pedro ne Juan buluzé ne'e lawe' benne' ca', na' gulezi'e Be' Lá'azxa.

¹⁸Gate ble'e Simón bla' Be' Lá'azxa gate gubáz ca' buluzé ne'e benne' ca', na' guca lazre' gunézruje' gubáz ca' dumí, ¹⁹gunné':

—Le gunna neda' xel-la' waca nigá chee gate guzéa' na'a lawe' núteteze benne', na' si'e Be' Lá'azxa.

²⁰Nadxa guzre Pedro le':

—Wabía xi' dumí chiu' na' nen lue' lawe' da dxéquenu' wazéquenu' ga'u nen dumí ca da dxúnnaze Dios. ²¹Quebe naca chiu', ne quebe napu' lataj lu da nigá lawe' da quebe naca xrlátaje xichaj lázrda'u lau Dios. ²²Bsan ca naca da calela chiu' nigá, ne guta' xue Dios chee gunite lawe' chiu' ca da gúquenu' lu xichaj lázrda'u. ²³Dxeque be'eda' nazrate xichaj lázrda'u da calela, na' da calela na' nuchéaj na lue'.

²⁴Na' bechebe Simón:

—Le gata' xue Xránadxu chia' neda', chee quebe gaca chia' ca da gunnáu'.

²⁵Ca gudé belexechebe' chee Jesús, ne buluchálaje' dizra' chee Dios, na' benne' gubáz ca' buluzenne' bèneache dizra' chawe' chee Jesús lu xézredu ca' zaj nababa Samaria, na' ca gudé na' belexezrine' Jerusalén.

Felipe dxuchálajlene' tu benne' chee xezr la xu Etiopía

²⁶Gudé na' guzre tu gubáz chee xabáa chee Xránadxu Felipe:

—Guxasa, guxíaj chalá'a naga dxedé gubizra beu' zaga ca', naga zrua neza chee Jerusalén da zeaj xezre Gaza, da dxedé na le'e xixre' lawe' lataj.

²⁷Felipe guxase', na' guzé'e zéaje', na' la neza na' bezrague' tu benne' Etiopía. Benne' nigá naque' wizre, ne naque' benne' szren xu'u lu ne'e xel-la' gunní'a chee Candace, nu'ula na' dxenná

bé'ene' xezr la xu Etiopía. Ba guxíaj benne' nigá Jerusalén chee be lá'ane' Dios. ²⁸Na'a zexíaje' Etiopía na', dxe'e lu carreta chee' da dxelecá'a bzrina', ne dxulabe' xiche naga zaj naxúaj xrtizra' Isaías, benne' bchálaje' waláz chee Dios. ²⁹Nadxa gunná Be' Lá'azxa, guzre' Felipe:

—Gubiga gagu cuita carreta na'.

³⁰Gate gubiga Felipe na' benne' dxulaba bènea' xiche chee Isaías, na' bchebe' le':

—¿Dxéajni'inu' ca naca da dxulabu'?

³¹Benne' biu na' guzre' le':

—¿Ájazra gaca chéajni'ida' che quebe nu chilá' guzéajni'i neda'?

Na' guzre' Felipe cuene' cué'lene' le'.

³²Naga dxulabe' lu xiche chee Dios dxenná na caní:

Belech'é Le' naga gatie' ca tu zrila'dau', na' ca zrila' na' dxátaba' zrize lau benne' ca' dxuluchibe' zraba', ca' bénqueze Le', quebe bi gunné'.

³³Bulucá'ana ditje' Le', ne quebe belú'e lataj nu guchi'a chee',

ne quebe nu gaca guchálaje' ca naca chee zri'ine zre sue', lawe' da belutie' Le'.

³⁴Na' benne' Etiopía na' bchebe' Felipe:

—Gunná, ¿nuzra chee dxenná benne' nigá, cheéqueze' na', che chee xetú benne' xula?

³⁵Nadxa guzú lau Felipe bzéajni'ine' le' ca naca naga dxulabe', ne bchálajlene' le' dizra' chawe' ca naca chee Jesús.

³⁶Gate guledée' tu naga de nisa, na' gunná benne' Etiopía na':

—Nigá de nisa. ¿Quebe gaca chua' nisa, zra?

³⁷Felipe guzre' le':

—Che dxéajle'u duté lázrda'u, waca.

Benne' na' bechebe':

—Dxéajle'a naca Jesucristo Zri'ine Dios.

³⁸Nadxa gunná bé'ene' guleza carreta na', na' dxúpatē' gulu'e lu nisa, na' Felipe bchue' le' nisa. ³⁹Gate belexedxúaje' lu nisa na', na' Be' chee Xránadxu beche'e Felipe naga xula. Benne' Etiopía na' québedxa blé'ene' le', na' bexu'e neza chee' dutē xel-la' dxebe'. ⁴⁰Felipe na' guque bé'ene' ba zue' xezre Azoto, na' gudēe' tu tu xezre dxuchálaje' dizra' chawe' ca naca chee Jesús cadxa bezrine' Cesarea.

Saulo dxexaque' benne' chee Jesús

(Hch. 22.6-16; 26.12-18)

9 Dxácate na' Saulo quebe dxusane' dxune' ba xuzre gutie' benne' ca' dxeléajle'e chee Xránadxu. Chee gunē caní guxíaje' xeajchálajlene' bxruze blau. ²Gunabe' xiche da dxulé'e na nape' xel-la' dxenná bea da gu'e chéaje' xudau' ca' zaj nnita xezre Damasco, chee séquene' cheajxedílaje' benne' ca' dxeléajle'e chee dizra' chawe' chee Jesús, ne che'e le', benne' biu, ne nu'ula ca', chee guzré'e le' lizre xia lu xezre Jerusalén. ³Na' gate ne xu'e neza zéaje', ne ca ba zua zrine' xezre Damasco, na' bsaní' tu xi' naga zéaje' da za' xabáa. ⁴Saulo xeajcházie' lu xu, na' benne' chi'i tu benne' dxé'e le':

—Saulo, Saulo, ¿bizr chee na' nau zi' xuzru' neda'?

⁵Nadxa Saulo bchebe':

—¿Nuzra Lue', Xran?

Na' bénnea' bechebe':

—Neda' naca' Jesús, benne' na' nau zi' xuzru'. Lue'ze dxun zi' cuinu', ca dxun bezre gate dxulíbeba' lawe' xágala da dxáduē'-ba'.

⁶Nadxa Saulo dxezrizque' dxezrebe', gunné':

—Xran, ¿bi dxaca lazru' guna'?

Na' Xránadxu guzre' le':

—Guxasa, guxú'u lu xezre, na' xeléqueze' lue' da dxal-la' gunu'.

⁷Benne' ca' zjácate Saulo belezrébele'e lawe' da belenne' chi'i benne' na', san

quebe nu beledé'ene'. ⁸Nadxa Saulo bexase' lu xu na', na' gate guxá' lawe', quebe guca lé'ene'. Ca' guca, belequé'e ne'e, ne gulech'é'e le' lu xezre Damasco. ⁹Guzú'e na' chunna zra quebe dxelé'ene', ne quebe bi güe'e gudawe'.

¹⁰Lu xezre Damasco na' zua tu benne' dxéajle'e chee Jesús le' Ananías, na' Xránadxu ble'e lawe' le' tu lu da ble'e le', na' guzre' le':

—Ananías.

Na' le' bechebe':

—Nigá zua', Xran.

¹¹Nadxa gunná Xránadxu, dxé'e le':

—Guxasa, guxíaj neza da nazí le na: Neza Li, na' lizre Judas guchebu' chee tu benne' Tarso, le' Saulo. Benne' nigá dxuláwizre' Dios. ¹²Tu lu da blé'ene', ba blé'ene' tu benne' le' Ananías chu'e guzré ne'e le' chee xel'é'ene'.

¹³Gate benne' da nigá, na' gunná Ananías:

—Xran, benne' zan ba buluzenne' neda' chee benne' nigá, ne chee xúgute da calēla da dxune' chee benne' ca' dxeléajle'e chiu' Lue' lu xezre Jerusalén.

¹⁴Na'a ble'e nigá nape' xel-la' dxenná bea chee benne' xíchaje' ca' chee bxruze ca', chee che'e lizre xia xúgute benne' dxelenné' Dios lu Lau' Lue'.

¹⁵Na' Xránadxu guzre' le':

—Guxíaj. Neda' ba gucá'a benne' na' chee cheajzenne' benne' xezr la xu ca', ne benne' wenná bea ca', ne benne' Israel ca', ca naca chia' neda'. ¹⁶Neda' gulé'eda' le' ca naca da zante da saque'e ne chia' neda'.

¹⁷Nadxa Ananías guzré'e zéaje' xu'u naga zua Saulo. Gate guxú'e na', guxrúa ne'e lawe' le', na' guzre' le':

—Saulo, bicha'. Xránadxu Jesús, Bénnea' ble'e lawe' lue' la neza naga za'u, nasele' neda' chee xel'é'enu', ne chee súale Be' Lá'azxa lue'.

¹⁸Ca' guca beléxrujte lu xiaj lawe' da zaj naca ca xrlacu bela, na' belé'ene'. Na'

bexasa Saulo, ne gudxúate' nisa. ¹⁹ Gudé na' gudawé', ne bedipe'. Begá'ane' tu chupa zra nen benne' Damasco ca' dxeléajle'e chee Jesús.

Saulo dxuchálaje' chee Jesús lu xezre Damasco

²⁰ Nadxa guzú lau Saulo dxuchálaje' chee Jesús lu xu'u ga dxelezraga judío ca' zaj nnite' Damasco, dxenné' Jesús naque' Zri'ine Dios. ²¹ Xúgute' benne' belénene' chee' belexebánene', dxelenné':

—¿Quegá benne' nigá bénnea' gudáu zi' xuzre' benne' ca' zaj zre'e Jerusalén, benne' ca' dxelenné' Dios lu La Jesús? ¿Quegá léqueze' na' ble'e nigá chee che'e benne' ca' xezre Jerusalén chee gudé' le' lu na' benne' xíchaje' ca' chee bxruze ca'?

²² Saulo bchálajdxé' du lazre' chee Jesús, ne dxulé'engé' Jesús naque' Cristo chee Dios, na' bzua zri'e' benne' judío ca' zaj zre'e Damasco.

Saulo dxelé' lu na' benne' judío ca'

²³ Ca gudé zane' zra, benne' judío ca' beluné' tuze dizra' xelútié' Saulo. ²⁴ Gunezne' le' da nigá. Te zra ne chizrela gulebeza benne' judío ca' dxu'a dxa xu'u ca' naga dxelexedxúaj bénneache xezre na', chee xelútié' le'. ²⁵ Nadxa benne' ca' dxeléajle'e chee Jesús gulegú'e Saulo tu lu xcuite lba zren, na' buluxulétaje' le' chizrela le'e ze'e da naxechaj na xezre. Ca' guca, gulá Saulo.

Saulo dxezrine' Jerusalén

²⁶ Gate bezrín Saulo Jerusalén, guca lazre' guné' tuze benne' ca' dxeléajle'e chee Jesús, san benne' ca' dxelezrebe' le' lawe' da quebe dxeléajle'e ba dxéajle'e Saulo chee Jesús. ²⁷ Bernabé guché'e Saulo, ne bze' le' lau benne' gubáz ca' chee Jesús. Na' bchálajle Bernabé gubáz ca' ca ble'e Saulo Xránadxu la neza, ne ca ben Xránadxu bchálajlene' Saulo, ne ca bchalaj Saulo du lazre' lu

xezre Damasco nen xel-la' dxenná bea chee La Jesús. ²⁸ Nadxa Saulo begá'ane' Jerusalén, dxedálene' benne' ca'. ²⁹ Bchalaj Saulo du lazre' lu La Xránadxu, dxuchálajlene' benne' ca' dxelenné' dizra' griego, san benne' caní gulaca lazre' xelútié' le'. ³⁰ Gate guleque be'e biche ljwézredxu da caní, na' guleché'e Saulo lu xezre Cesarea, na' lu xezre na' guleselle' le' xezre Tarso.

³¹ Nadxa benne' ca' dxelezrague' lu La Jesús tu tu xezre zaj nababa Judea, ne Galilea, ne Samaria, gulebeza zri lazre', ne beledipa lazre'. Xel-la' dxelezrebe gu-laque' Xránadxu tuze, na' lawe' da gúcale Be' Lá'azxa le', gulane'.

Pedro dxexune' Eneas

³² Gate dxedá Pedro dxeajnné'e biche ljwézredxu ca', na' guxíajqueze' xejnné'e benne' ca' dxeléajle'e chee Jesús lu xezre Lida. ³³ Na' bezrague' tu benne' le' Eneas, bache guca xrunu' iza de' lu da'a lawe' da naque' benne' zrinnaj. ³⁴ Na' gunná Pedro, dxé'e le':

—Eneas, Jesucristo ba bexune' lue'. Bexasa, ne butube da'a chiu'.

Na' bexásate Eneas na'. ³⁵ Belelé'e xúgute' benne' le', benne' zaj zre'e xezre Lida, ne xezre Sarón, na' belexaque' chee Xránadxu.

Dorcas dxexebane' ládujla benne' gate

³⁶ Lu zra na' zua tu nu'ula le' Tabita lu xezre Jope. Dxéajle'e chee Jesús. Lu dizra' griego le' Dorcas. Nu'ula nigá dxúnqueze' da xrlátaje, ne dxácalene' benne' xache' ca'. ³⁷ Lu zra ca' guxú'u Dorcas xel-la' we', na' gutie'. Na' bulugazje' le', ne belexrué' le' tu lu xu'u naga zua gudxupe' cuía dxala. ³⁸ Xezre Jope na' zua na' gagu naga zua xezre Lida naga zua Pedro, na' lawe' da zaj neze benne' Jope ca' zue' na', na' gulesel-le' chupa benne' biu cheajleguezre' le':

—Gudázega xezre Jope.

³⁹Nadxa Pedro guxíajlɛnɛ' benne' ca'. Gate bzrine' na', na' beleché'ɛ lɛ' naga zrua Dorcas na', na' xúgute nu'ula ca' ba zaj nate benne' chie' zaj naxéchajɛ' Pedro dxelebezre', ne dxululé'ene' lɛ' zra nu'ula, ne zra benne' biu, da ca' ben Dorcas na' gate ne zuɛ' nen benne' ca'.
⁴⁰Nadxa guleaj Pedro xúgute benne' ca', na' bzu zribe' bchálajlɛnɛ' Dios. Na' gunné'ɛ nu'ula gate na', gunné':

—Tabita, bexasa.

Nadxa nu'ula na' bexá' lawɛ', na' gate blé'ene' Pedro, bexasɛ' gudxé'ɛ.
⁴¹Na' Pedro bequé'ɛ ne'ɛ, bechise' lɛ'. Nadxa gunné' biche lɔwézredxu ca', ne nu'ula ca' ba gute benne' biu cheɛ', na' blé'ene' benne' ca' lɛ' naca banɛ'.
⁴²Ca guca da nigá belén ca naca benne' zaj zre'ɛ xezre Jope, na' benne' zan guléajlɛ'ɛ cheɛ Xránadxu.
⁴³Pedro begá'ane' zane' zra lu xezre na' lizre Simón, tu benne' dxucá'ana chawe' xide zra bɛ xixre'.

Pedro ne Cornelio

10 Zua lu xezre Cesarea tu benne' lɛ' Cornelio, benne' dxenná be'ɛ lu wedil-la tu cue' benne' nazí le na Benne' Italia Zjaque' Wedil-la.
²Benne' nigá, ne benne' zaj zre'ɛ lizre dxulucá'ana szrene' Dios, ne dxelezrebe' Lɛ'. Cá'anqueze dxunézrujlɛ'ɛ dumí dxácalɛnɛ' benne' judío ca', ne tu dxuchálajlɛzqueze' Dios.
³Tu zra gate dxexedá chunna ble'e Cornelio tu da ble'e Dios lɛ', na' blé'ene' cátequeze guxú'u tu gubáz cheɛ xabáa naga zuɛ', na' guzre' lɛ':

—Cornelio.

⁴Cornelio guzú'ɛ dxenné'ɛ gubáz cheɛ xabáa na' dutɛ xel-la' dxezrebe, na' bchebɛ' lɛ':

—¿Bizra na', Xran?

Nadxa gunná gubáz cheɛ xabáa, guzre' lɛ':

—Dios ba benne' da dxuláwizru' Lɛ', ne nézene' ca da dxunu' dxácalɛnu' benne' xache' ca'.
⁵Gusel-la benne' chjaque'

xezre Jope, cheajlenné' Simón, bénnea' léqueze' Pedro.
⁶Zuɛ' lizre xetú benne' lɛ' Simón, benne' dxucá'ana chawe' xide zra bɛ xixre', na' zua lizre dxu'a nísadau'. Pedro na' xɛ'ɛ lue' ca da dxal-la' gunu'.

⁷Gate bezá' gubáz cheɛ xabáa na' bchálajlɛnɛ' lɛ', na' gunné' Cornelio chupa bi wen zrin cheɛ', ne tu benne' dx-eje' wedil-la, ne dxape' Dios ba lá'ana, ne zúaqueze' lizre Cornelio na'.
⁸Na' bchálajlɛnɛ' benne' ca' ca naca da ba guca, na' ca gudé na' gusel-lɛ' lɛ' chjaque' xezre Jope.

⁹Zra xula, dxácatɛ zaj xu'e benne' ca' neza, ne ba dxezrine' gagu naga dxe' Jope, na' guluén Pedro chju'u sibe du wagubizra cheɛ guchálajlɛnɛ' Dios.
¹⁰Ba dxedúnle'ɛ, ne guca lazre' gawe', na' dxácatɛ ne dxulucueze' da gawe', blé'ene' tu da ble'e Dios lɛ'.
¹¹Blé'ene' naxalaj xabáa, ne dxetaj lu xezr la xu da naca na ca tu ladxe' zren nadxéaj na dápatɛ la'a cheɛ na.
¹²Lawe' ladxe' na' zaj zria xúgute cue' bɛ xixre', bɛ zria tapa ni'a na'ba', ne bɛ snia ca', ne bɛ zua xrila ca'.
¹³Nadxa benne' tu chí'i benne' dxɛ'ɛ lɛ':

—Guxasa, Pedro. Bɛtɛ tu bea ca' cheɛ gagu'-ba'.

¹⁴Pedro bechebɛ':

—Cabí, Xran. Neda' cabata' ne gawa' da quebe nun Dios gagu bénneache, ne quegá da naca na sban.

¹⁵Benne' na' bchálajɛ' da xula, dxɛ'ɛ lɛ':

—Da ba nucá'ana chawe' Dios, quebe nnau' lue' naca na sban.

¹⁶Da nigá guca na chunna lasa, na' ladxe' na' begúén na xabáala.
¹⁷Dxácatɛ dxe' Pedro dxulaba lazre' bi zéajɛ ca naca da blé'ene', na' belezrín benne' ca' nasel-la Cornelio dxu'a dxa xu'u, dxuluchebe' ga zua lizre Simón.
¹⁸Gate belezrine' lizre Simón na', na' gulenné' zizraj, dxelenabe' che zua xu'u na' tu benne' lɛ' Simón, bénnea' léqueze' Pedro.

¹⁹ Gate Pedro ne dxulaba lazre' ca naca da blé'ene', na' Be' Lá'azxa guzre' le':

—Gunná'xque, chunna benne' dxelexíajle' lue'. ²⁰ Guxasa, bexetaj. Guxíajle' benne' ca', ne quebe gun chupa lazru' lawe' da nasel-la' neda' benne' ca'.

²¹ Nadxa Pedro bexétajle' naga zaj zra' benne' ca' nasel-la' Cornelio, na' guzre' le':

—Neda' na' dxexíajle le'e. ¿Bizra chee zale'?

²² Benne' ca' belexechebe':

—Za'ntu' waláz chee Cornelio, benne' dxenná be'e lu wedil-la. Naque' benne' xrlátaje, ne dxezrebe' Dios, na' xúgute benne' judío ca' dxelape' le' ba lá'ana, ne zaj nazrí'ine' le'. Tu gubáz chee xabáa chee Dios guzre' le' dxal-la' sel-le' benne' xedajlenné' lue' xidu' lizre' chee xenne' ca' da dxal-la' xu'u le'.

²³ Nadxa Pedro bzre'e benne' ca' xu'u na', na' belexegá'ane' nen le' xela na'. Zra xula guxíajle' Pedro benne' ca', na' xjá-cale bal-la biche ljwézredxu le', benne' zaj zre'e Jope.

²⁴ Zra gudxupe' zra belezrine' xezre Cesarea naga zua Cornelio dxebeze' le', ne zrale bal-la benne' xrtie' le', ne kezí-cadxa benne' ljwezre', benne' ca' gunné'.

²⁵ Gate bzin Pedro chale'aj, bdxuaj Cornelio guz' lu ne'e le'. Bzu zribe' lau Pedro chee gucá'ana szrene' le'. ²⁶ Pedro bechise' le', dxenné':

—Guzé. La gázqueze neda' naca' bèneache ca lue'.

²⁷ Dxácaté dxuchálajle' Pedro Cornelio, gulu'e lu xu'ula, na' blé'ene' benne' zan zaj nazrague' na'. ²⁸ Nadxa gunná Pedro, dxe'e le':

—Nézquezle le'e quebe dxunna da nadxixruj bea chee judío ca' neda' lataj gaca' tuze nen benne' quebe zaj naque' judío u chu'a lizre'. Na'a Dios ba blé'ene' neda' quebe dxal-la' nnia' chee netú benne', quebe nnia' naque' sban, u naque' benne' quebe gapa' ba lá'ana. ²⁹ Chee le' na', gate gulenné' neda', la guzá'tea',

ne quebe ben chupa lazra'. Dxaca lazra' nezda' bi chee na' gunnele neda'.

³⁰ Nadxa bechebe Cornelio:

—Ba zeaj tapa zra ca zúadxu na'a, zua lizra' nigá dxuna' gubasa, ne dxuchálajle'na' Dios, gate ble'e lau tu benne' neda', nacie' zra lane' da dxácatite na. ³¹ Benne' na' guzre' neda': “Cornelio, Dios ba benne' da dxuchálajle'na' Le', na' nézene' ca da dxuntu' dxácalenu' benne' xache' ca'. ³² Gusel-la benne' chjaque' xezre Jope, cheajlexri'e Simón, bènea' léqueze' Pedro. Zue' lizre xetú benne' le' Simón, benne' dxucá'ana chawe' xide zra be xixre' ca', na' zua lizre' dxu'a nísadau'. Gate xide' nigá, na' guchálajle'na' lue'.”

³³ Ca'an guca, gusél-latea' benne' ca' bedajlexedíajle' lue', na' benu' da chawe' bla'u nigá. Na'a xúgudentu' zrantu' nigá lau Dios, ne dxaca lázrentu' xénentu' xúgute ca da gunná be'e Xránadxu lue' guchálajle'na' netu'.

Da bchalaj Pedro lizre Cornelio

³⁴ Nadxa guzú lau Pedro dxuchálajle', dxenné':

—Na'a dxéajni'ida' Dios quebe dxebéaje' bál-laze bèneache, ³⁵ Na' xúgute xezr la xu Dios dxez' lu ne'e benne' ca' dxelezrebe Le', ne dxelune' da xrlátaje.

³⁶ Dios bchálajle'na' zri'ine' zre sua Israel ca', ne bchálajle' dizra' chawe' chee xella' dxebeza zri lazre', da dxezidxu ne chee Jesucristo, Bènea' naque' Xrana xúgute bèneache. ³⁷ Le'e ba nézquezle ca naca da guca du ca naca lu xezr la xu chee benne' judío ca', da guzú lau na naga nababa Galilea ca gudé bchalaj Juan xrtizra' Dios, ne bchue' bèneache nisa. ³⁸ Nézele ca ben Dios, bnézruje' Jesús, benne' Nazaret, xel-la' waca chee Be' Lá'azxa, ne ca gudá Le' dxune' da chawe', ne dxexune' xúgute benne' dxelezaca zi'e lu na' da xriwe'. Da nigá bene' lawe' da guzúale Dios Le'. ³⁹ Netu' dxexeché'bentu' chee da

caní, xúgute da ben Jesús naga nababa Galilea, ne da bene' lu xezre Jerusalén. Gudé na' belutie' Le', gate buludé'e Le' xaga béguaj, ⁴⁰na' Dios bsebane' Le' gate guca chunna zra, na' be'e lataj ble'e lau Jesús netu'. ⁴¹Quebe ble'e lawe' xúgute bèneache, san launtu' nétu'ze, nácantu' benne' ca' guleaj Dios nédxudaute chee xechébentu' chee da caní. Netu' güe'e gudáguntu' nen Le' gate gudé bebane' ládujla benne' gate. ⁴²Guselle' netu' guchálajentu' bèneache, ne xechébentu' ca da nun Dios, nuzúe' Jesús nigá chee guchi'e chee benne' ban ca', ne chee benne' gate ca'. ⁴³La gázqueze nédxudaute gulenná xúgute benne' ca' buluchálaje' waláz chee Dios, buluchálaje' ca dxal-la' gaca chee Jesús, gulenné' xúgute benne' xeléajle'e chee Jesús, na' ne chee Le' Dios gunite lawe' xtul-la benne' ca'.

Benne' quebe zaj naque' judío dxelezi'e Be' Lá'azxa

⁴⁴Ne dxuchalaj Pedro gate bzin Be' Lá'azxa bedajsúalene' xúgute benne' ca' dxelenne' da dxuchalaj Pedro. ⁴⁵Benne' judío ca' dxeléajle'e chee Jesús, benne' ca' zá'acalene' Pedro, belexebánene' gate guleque bé'ene' ba zúale Be' Lá'azxa benne' ca' quebe zaj naque' judío. ⁴⁶Dxeleque bé'ene' na lawe' da belenne' dxuluchalaj benne' ca' dizra' chee benne' xula, ne dxelúe lá'ane' Dios. ⁴⁷Nadxa gunná Pedro:

—¿Waca nnadxu quebe dxal-la' xeledxúa benne' caní nisa, benne' ca' bache gulezi'e Be' Lá'azxa ca bentu' netu'?

⁴⁸Nadxa gunná bea Pedro xeledxúa benne' ca' nisa lu La Jesucristo. Gudé na', benne' ca' gulata' xuene' Pedro xegá'ane' nen le' tu chupa zra.

Pedro dxuzenne' benne' gubáz ca' zaj zre'e Jerusalén ca naca da bene'

11 Benne' gubáz ca', ne biche ljwézredxu ca' zaj zre'e Jerusalén belenne' ba gulezi' lu na' benne' quebe zaj naque' judío dizra' chee Dios. ²Gate bezrín Pedro xezre Jerusalén, gulezi' tizra' benne' ca' le', benne' ca' dxelenne' dxal-la' chugu late' bela' chee benne' ca' zaj naque' chee Dios. ³Benne' caní buluchebe' Pedro:

—¿Bizr chee na' guxíaju' xeajsúalenu' benne' ca' quebe zaj naque' judío, ne gudágulenu' le'?

⁴Nadxa Pedro bzenne' benne' ca' xúgute da guca cha chee na, gunné':

⁵—Neda' zua' lu xezre Jope, na' gate dxuchálajlena' Dios, ble'eda' tu da ble'e Dios neda'. Ble'eda' tu ladxe' zren nadxéaj dápaté la'a chee na, da dxetaj na xabáa, ne bedajsé na lawa'. ⁶Gate gunná xánnia' chee ble'eda' bi na' zaj zria na lawe', ble'eda' be xixre', be zria tapa ni'a na'ba', ne be snia ca', ne bea ca' zaj zua xrílabá'. ⁷Na' benda' tu chi'i benne' guzre' neda': “Guxasa Pedro, bete tu bea ca', na' gagu'-ba.” ⁸Neda' gunnéa': Cabí, Xran, lawe' da cabata' ne gawa' neda' tu da quebe nun Dios gagu' bèneache, ne quegá da naca sban. ⁹Nadxa bènea' dxenné' xabáa gunné' neda' da xula, na' guzre' neda': “Da ba nucá'ana chawe' Dios, quebe nnau' lue' naca na sban.” ¹⁰Da nigá guca na chunna lasa, na' ca' gudé na' xúgute da ca' belexegüén na xabáa. ¹¹Lu zra ná'queze belelá' chunna benne' lu xu'u naga zua', benne' ca' gusel-la tu benne' zua Cesarea chee zedajlexedilaj neda'. ¹²Be' Lá'azxa gunná bé'ene' neda' chéajlena' benne' ca', ne quebe gun chupa lazra'. La gázqueze gusiá'cale' xrupa benne' biche ljwézredxu caní neda'. Xúgutentu' guxú'untu' lizre tu benne'. ¹³Le' bchálajlene' netu' ca' blé'ene' lizre' tu gubáz chee xabáa, ze

ni'e, ne guzre' le': "Gusel-la benne' ch-jaca xezre Jope chee cheajlenné' Simón, benne' léqueze' Pedro. ¹⁴ Benne' nigá xe'e lue' aja gunu' chee lau' lue', ne xeledá xúgute benne' zaj zre'e lizru'." ¹⁵ Gate guzú lawa' dxuchálajlena' benne' ca', na' bzin Be' Lá'azxa guzúalene' benne' ca', ca ble'e guzúalene' dxi'u nédxudaute. ¹⁶ Nadxa xeajsá lazra' ca gunná Xránadxu, gunné': "Da li Juan bchue' bēneache nisa, na' gaca chee da zéaje xel-la' dxedxúa nisa, súale Be' Lá'azxa le'e." ¹⁷ Che Dios bnézruje' chee benne' ca' ca benne' dxi'u, guxéajlédxu chee Xránadxu Jesucristo, ¿nuzra naca' neda' chee tábaga' Dios?

¹⁸ Nadxa gate biche ljwézredxu ca' zaj zre'e Jerusalén belenne' da caní, na' gulezúa zrie', ne gulezú lawe' dxelúe lánane' Dios, dxelenné':

—Ca' naca, la gázqueze dxunna Dios lataj benne' quebe zaj naque' judío xelexebí' lazre' chee xezezi'e xel-la' nabán zeajlí canna.

Benne' dxeléajle'e chee Jesús zaj zre'e xezre Antioquía

¹⁹ Gate belutié' Esteban, na' belau zi' xuzre' xezícala benne' dxeléajle'e chee Jesús, na' bal-le' buluzrúnnaje', xjaque' xezre Fenicia, ne lu xu Chipre, ne xezre Antioquía. Gate belezrine' lataj ca', na' buluchálaje' dizra' chee Jesús lau benne' judío cá'aze, ne quegá lau benne' quebe zaj naque' judío. ²⁰ Nadxa bal-la benne' dxeléajle'e chee Jesús, benne' Chipre, ne benne' Cirene, belelé'e xezre Antioquía, na' buluchálajlene' benne' ca' quebe zaj naque' judío, ne buluzenne' le' dizra' chawe' ca naca chee Xránadxu Jesús. ²¹ Xel-la' waca chee Xránadxu guzúale na benne' ca', na' ca'an guca, benne' zan belexexaque' chee Xránadxu.

²² Gate belén benne' ca' da nigá, benne' dxeléajle'e chee Jesús zaj zre'e Jerusalén, na' gulesel-le' Bernabé xezre Antioquía.

²³ Gate bzin Bernabé na', blé'ene' ca da chawe' da dxun Dios chee benne' ca', na' gubéle'ene'. Na' bsízrene' xúgute benne' ca' chee xelezúa chúchue' lu da naca chee Xránadxu. ²⁴ Bernabé naque' benne' xrlátaje, na' zúale Be' Lá'azxa le', ne duté lázrdawe' dxéajle'e chee Jesús. Ca'an guca, ne chee le' guléajle' benne' zan chee Xránadxu.

²⁵ Gudé na' guxiáj Bernabé xezre Tarso, zeajxedflaje' Saulo, na' gate bezrelne' le', beche'e le' Antioquía. ²⁶ Gulezúe' na' tu iza naxá nen benne' ca' dxeléajle'e chee Jesús, na' bulusédene' benne' zan. Lu xezre Antioquía na' guca na da nedxu gulé'e benne' ca' dxeléajle'e chee Xránadxu, Benne' Cristiano.

²⁷ Ca lu zra ca', bal-la benne' dxelenné' waláz chee Dios besia'que' Jerusalén, xjaque' Antioquía. ²⁸ Tu benne' ca' le' Agabo guzé' lówela biche ljwézredxu ca', na' ca da bnezruj Be' Lá'azxa le', gunné' waca tu gubina' zren du ca naca xezr la xu, na' gubina' nigá guca na gate naca Claudio benne' dxenná bé'ene' ca naca xezr la xu Roma. ²⁹ Nadxa benne' ca' dxeléajle'e chee Jesús, benne' zaj zre'e Antioquía belún zi' lazre' xelesel-le' da gácale na biche ljwézredxu zaj zre'e xezre ca' zaj nababa Judea, ca da xezezeque' tu tue' xulunézruje'. ³⁰ Ca'an belune', na' belesel-le' tu guna' lau benne' gula ca' chee Cristo zaj zre'e Judea, na' Bernabé ne Saulo belú'e na na'.

Dxelutié' Jacobo ne dxelegú'e Pedro lizre xia

12 Lu zra ca' guzú lau wenná bea Herodes nau zi' xuzre' bal-la benne' ca' dxeléajle'e chee Jesús. ² Gunná bé'ene' belutié' Jacobo, biche Juan nen xia nalá. ³ Gate ble'e Herodes dxelexezaca ba lazre' benne' judío ca' ca naca da bene', na' gudel-le' Pedro. Da nigá guca na lu zra laní ca' gate dxelawe' xeta xtila da quebe nachixre na cua zichaj

chee xeta xtila. ⁴Ca gude gudel-le' Pedro, na' gulu'e le' lizre xia naga buluxúe tapa cue' benne' dxjaca wedil-la le', zaj naca tapa benne' zeje' wedil-la tu cue' tu cue'. Herodes guca lazre' guzúe' Pedro lau benne' xezre ca' te laní. ⁵Ca'an guca xu'u Pedro lizre xia naga dxuluxúe xánne' le', na' benne' biche ljwézredxu ca' buluchálajlequeze' Dios du lazre'.

Dios dxuselé' Pedro lizre xia

⁶Dxela xanne' ca za chaní' zra xula gate dxal-la' guzúa Herodes le' lau benne' xezre ca', Pedro de' dxásie' laduj chupa benne' dxjaque' wedil-la, nadxéajje' chupa du xia, na' xebal-la benne' dxjaca wedil-la zaj zre'e dxu'a dxa xu'u dxuluxúe' lizre xia na'. ⁷Nadxa ble'e lau tu gubáz chee xabáa chee Xránadxu, na' ca naca lizre xia na' guxaní'. Na' gubáz chee xabáa na' bte' le'e Pedro, ne bsebané' le', na' guzre' le':

—Guxásache.

Ca'an guca, du xia ca' belexezeze na' Pedro. ⁸Na' gunná gubáz chee xabáa na', guzre' le':

—Besí le'u, ne buléaj zrelu'.

Gate bexuzre ben Pedro da na', na' guzre gubáz chee xabáa na' le':

—Guxrúa xicha chiu' cuxru', ne gudále neda'.

⁹Pedro bedxúaje' cuzru gubáz chee xabáa na', ne quebe nézene' che naca da li che cabí ca da dxun gubáz chee xabáa na'. Dxéquene' dxelé'ene' tu da dxulé'e Dios le'. ¹⁰Belexede' naga zaj zra' benne' dxjaque' wedil-la nedxu ca', ne naga zaj zra' benne' gudxupe' benne' dxjaque' wedil-la, na' gate belexezrine' dxu'a dxa xu'u xia da dxedxuaj zeaj la nézala, dxa xu'u na' leze na' bxalaj na. Belexedxúaje', na' ca gude besía'que' belezrine' xetú neza xula chee xezr na', na' bca'ana gubáz chee xabáa na' leze'.

¹¹Nadxa guque be'e Pedro ba bedxúaje', na' guzá lazre', gunné': Na'a dxelé'eda'

naca na da li. Xrana' gusel-le' gubáz chee xabáa chee' chee bselé' neda' lu na' Herodes, ne lu xúgute da gulaca lazre' judío ca' xelune' chia'.

¹²Da nigá dxulaba lazre' Pedro gate bzrine' lizre María, xrna Juan, bi na' léquezebe' Marcos, na' lu xu'u na' zaj nazraga benne' zan dxelenabe' Dios gácalene' Pedro. ¹³Gate gunné' Pedro dxu'a dxa xu'u na', bzrin na' tu bi nu'ula lebe' Rode zeajnabe' nu na'. ¹⁴Gate bexúnbeabe' chi'i Pedro, quebe gusalajbe' dxa xu'u. Xel-la' dxebé cheebe' zexíaj chégube' naga zaj nazraga benne' ca' chee zeajézebe' benne' ca' ze Pedro dxu'a dxa xu'u. ¹⁵Nadxa benne' ca' gulé'e bi nu'ula na':

—Nadá xichaj lázrda'u.

Bi nu'ula na' ben chúchube' xrtízrabe'. Benne' ca' gulenné':

—Quebe le' na'. Be' guxu'e na'.

¹⁶Dxácate na' ze Pedro tu dxenézqueze' dxu'a dxa xu'u. Na' gate gulesálaje', ne belelé'ene' Pedro, na' belexebánene'. ¹⁷Pedro guchisa ne'e chee xelezúa benne' ca' zrize, na' bchálajlene' benne' ca' ca ben Xránadxu bebéajje' le' lizre xia. Na' guzre' benne' ca':

—Le guzén Jacobo, ne biche ljwézredxu ca' ca naca da nigá.

Nadxa bezé'e zexíaje' naga xula.

¹⁸Gate guxaní', gulezúale'e stebe benne' dxjaque' wedil-la ca' lawe' da quebe zaj nézene' aja guca chee Pedro. ¹⁹Herodes gunná bé'ene' xelexilaj benne' dxjaca wedil-la Pedro, na' lawe' da quebe belexezrene' le', na' gunáb xánne' benne' dxjaque' wedil-la bi guca, na' gude na' gunná bé'ene' xelate benne' ca' dxjaque' wedil-la. Ca gude na' guzá Herodes xezre ca' zaj nababa Judea, guxíaje' xeajsúe' xezre Cesarea.

Dxate Herodes

²⁰Herodes dxezré'e benne' ca' zaj zre'e xezre Tiro, ne xezre Sidón. Benne' chee

xezre ca' belunē' tuze dizra' chee chea-
jlelé'e cuine' lau Herodes na'. Belunē'
Blasto benne' Ijwezre'. Naque' tu benne'
blau chee wenná bea Herodes, na'
gulesel-le' le' lau Herodes na' chee nabe'
le' sua zri ca naca da dxaca chee Herodes
nen benne' ca'. Caní belunē' lawe' da
nédxutē dxelagu benne' xezre Tiro, ne
Sidón da guzá' xezre Cesarea naga zua
Herodes. ²¹Nadxa Herodes bzue' tu zra
xelezrín benne' ca' lawe'. Lu zra na'
Herodes gucuē' zra lane' da zácale'e, na'
gudxé'e lataj blau chee', ne bchálajlene'
benne' zan ca'. ²²Nadxa benne' zan ca'
gulezú lawe' dxelenné' zizraj:

—¡Benne' nigá dxuchálaje' quebe
naque' beniácheze! ¡Dios na'!

²³Zra na'te tu gubáz chee xabáa chee
Xránadxu gulu'e Herodes tu xízrawe'
lawe' da guzi'e xel-la' ba lánana da dxal-
la' si' Dios, na' guzré'e bzuga', ne gútete'.

²⁴Bzriluj dizra' chawe' chee Xránadxu,
na' benne' ca' buluchálaje' ca naca na
gáteteze na'.

²⁵Gate belezúe Bernabé, ne Saulo
zrin dxelunē' lu xezre Jerusalén, be-
siá'que' xezre na', zaj naché'e Juan, bi na'
léquezebe' Marcos.

Bernabé ne Saulo dxelezú lawe' dxeledé' dxuluchálaje' dizra' chee Dios

13 Ládujla benne' ca' zaj nazraga
chee Cristo lu xezre Antioquía zaj
zra' benne' ca' dxelenné' waláz chee Dios,
ne benne' ca' dxulusēdene' bēneache
xrtizra' Dios. Ládujla benne' caní zaj
zua Bernabé, ne Simón, bēneae' léqueze'
benne' gasaj, ne Lucio, benne' xezre
Cirene, ne Manaén, benne' gúlalēbe'
Herodes, benne' xu'u lu ne'e xezr la xu
Galilea na', ne Saulo. ²Tu zra gate benne'
caní zaj zré'e dxelúe lánanē' Dios, ne dx-
elunē' gubasa, Be' Lá'azxa gunné':

—Le cueaj Bernabé, ne Saulo chee
xelunē' zrin na' da gunnéa' le' xelunē'.

³Chee le' na', ca gudé buluchálajlene'
Dios, ne belunē' gubasa, na' buluzé' ne'e
lawe' benne' ca', ne buluzé' le' dizra'.

Dxupa benne' gubáz ca' dxuluchálaje' dizra' chee Dios lu xezr la xu Chipre

⁴Gudé na', ca gusel-la Be' Lá'azxa le',
na' Bernabé, ne Saulo xjaque' xezre Se-
leucia naga gulu'e tu lu da dxedá lawe'
nísadau' chee chjaque' lu xezr la xu da
naxechaj nísadau' da nazí le na Chipre.

⁵Gate belezrine' na', na' belexedxúaje' lu
da dxedá lawe' nísadau' naga zua xezre
Salamina, na' gulezú lawe' dxuluchálaje'
dizra' chee Dios lu xudau' ca' chee benne'
judío ca'. Juan zéajlequezebe' gubáz ca'
chee gácalebe' le'. ⁶Na' guledé'e xúgute
xézredu ca' da zaj nnita lu xezr la
xu na', na' belezrine' xezre Pafos. Na'
belexezrague' tu benne' judío le' Bar-
jesús, naque' benne' wazrá'. Naque' tu
benne' wen lazre' dxenné' dxuchálaje'
waláz chee Dios. ⁷Benne' wazrá' nigá
zue' nen Sergio Paulo, benne' xu'u lu ne'e
xezr la xu na', ne naque' benne' sina.
Benne' xu'u lu ne'e xezr la xu na' gusel-le'
benne' xeajnné' Bernabé, ne Saulo lawe'
da dxaca lazre' xenne' dizra' chee Dios.

⁸Na' benne' wazrá' na', léqueze' Elimas
gudábague' gubáz ca' lawe' da guca lazre'
quebe chéajle chee Jesús benne' xu'u lu
ne'e xezr la xu na'. ⁹Nadxa Saulo, bēn-
nea' léqueze' Pablo, zúale Be' Lá'azxa le',
gunná' dxugüe' le', ¹⁰na' guzre' le':

—Guzrí xe, benne' wen da calela.
Zri'ine da xriwe', ne benne' dxusezxiuj
xrneza xúgute bēneache. ¿Bizr chee na'
quebe dxusanu' dxusézxuju' neza chee
benne' ca' dxelaca lazre' chjácálene' Xrán-
nantu'? ¹¹Na'a, Xránantu' gudé'e lue'
ba xa'. Xegá'anu' la chul-la, na' tu
chí'iqueze quebe le'enu' xel-la' naxaní'
chee gubizra.

Benne' na' guzúe' lu da chul-la, na'
guzú lawe' dxílaje' nu xecá'a ne'e lawe' da
québedxa dxelé'ene'. ¹²Gate ble'e benne'

xu'u lu ne'e xezr la xu na' da nigá, na' guxéajle'e chee Jesús lawe' da bebánene' ca naca da dxusede Pablo ca naca chee Xránadxu.

**Pablo ne Bernabé dxezrine'
xezre Antioquía da
nababa xezr la xu Pisidia**

¹³ Pablo ne benne' ljwezre' ca' belú'e tu lu da dxedá lawe' nísadau' lu xezre Pafos na', na' belezrine' xezre Perge da nababa na xezr la xu Panfilia. Lu xezre na' Juan bsanbe' gubáz ca', na' bexíajbe' xezre Jerusalén. ¹⁴ Gudé na' gubáz ca' besí'aque' Perge, na' belezrine' xezre Antioquía da nababa na xezr la xu Pisidia. Lu xezre na', gate naca zra dxulupá'ana judío ca', gulu'e xudau' chee judío ca', na' gulebé'e. ¹⁵ Nadxa, ca gudé bululabe' lu xiche naga naxúaj da bdxixruj bea Moisés, ne da gulenná benne' ca' buluchálaje' waláz chee Dios, na' benne' xíchaje ca' chee xudau' na' gulesel-le' benne' xeajezre' Pablo, ne Bernabé:

—Le'e, biche ljwézrentu', che nápale dizra' da guzėjni'ile netu', waca nnele na na'a.

¹⁶ Nadxa Pablo guxase', na' guchisa ne'e chee xelezúa zri benne' ca', na' gunné':

—Le xene le'e, benne' Israel, ne le'e dxezrébele Dios. ¹⁷ Dios chee xezre Israel guqu'é'e xra xrtáudxu ca', na' bene' benne' ca' tu cue' benne' zante gate ne zaj zre'e ca benne' zitu' ca' lu xezr la xu Egipto, na' ca gudé na' bebéaje' le' lu xezr la xu na' dute xel-la' waca chee'. ¹⁸ Dios bchaga lawe' benne' ca' chua iza le'e xixre' lawe' lataj, ¹⁹ na' bzria xi'e gazre cue' bénneache gulezúa lu xezr la xu Canaán, chee bnézruje' xra xrtáudxu ca' xezr la xu chee benne' ca'. ²⁰ Gudé na', lawe' tapa gaxúa xu gachaj iza gunná be'e Dios benne' ca' lu na' benne' ca' buluchi'e chee', cadxa bzrin zra zua Samuel, benne' bchálaje' waláz

chee Dios. ²¹ Nadxa benne' ca' gulenabe' Dios sua tu benne' gaque' wenna' bea chee', na' Dios bzue' wenna' bea tu benne' le' Saúl, zri'ine Cis, tu benne' chee tu cue' benne' judío zaj naque' zri'ine zre sua Benjamín. Saúl nigá guque' wenna' bea lawe' chua iza. ²² Gudé na' Dios begüe' Saúl lataj chee', na' bzue' David gaque' wenna' bea chee', na' chee benne' nigá gunné': “Nezda' David, zri'ine Isaí, naque' tu benne' dxune' da dxezaca ba lazra', ne guné' xúgute da dxaca lazra'.” ²³ Tu benne' zri'ine zre sua David nigá naca Jesús, bénnea' bzua Dios chee guselé' benne' Israel ca', ca ba guchebe lazre' chee David. ²⁴ Nédxudxa gate za xida Jesús, Juan bchálajlene' ca naca benne' Israel ca', guzre' benne' ca' dxalla' xelexebi' lazre', ne xelexedxúe' nisa. ²⁵ Na' gate ba za cheajsé chee Juan, na' gunné': “Neda' quebe naca' bénnea' dxéquele naca', san ca te chia' neda' za xetú benne' quebe naca chia' neda' cuéaja' zrele' da xu'u ni'e.”

²⁶ Le'e, biche ljwezra', zri'ine zre sua Abraham, ne le'e dxezrébele Dios. Dios nasel-le' chee dizra' nigá chee lale. ²⁷ Benne' ca' gulezrá' Jerusalén, ne benne' blau chee' ca', quebe belexúnbe'e nu na' Jesús, ne quebe guléajni'ine' dizra' da buluchalaj benne' ca' buluchálaje' waláz chee Dios da dxelenne' xúgute zra dxulupá'ane'. Ca' guca, benne' ca' belún líqueze' ca naca da naxúaj na chee Jesús gate gulechugue' chee' gatie'. ²⁸ Lácala quebe belezrelne' tu da nabaga Jesús chee xelúti'e Le', gulenabe' lau Pilato nna bé'ene' gatie'. ²⁹ Nadxa, gate gudé belune' xúgute da naxúaj na lu xiche chee Dios ca naca da dxal-la' gaca chee Jesús, na' buluxulétaje' Le' xaga béguaj, ne bulucache' Le'. ³⁰ Nadxa Dios bsebané' Le' ládujla benne' gate. ³¹ Lu zane' zra Jesús ble'e lawe' benne' ca' guledálene' Le' gate bezé'e Galilea dxeaje' Jerusalén,

na' na'a, benne' caní dxelexechebe' ca naca chee' lau bénneache.

³² Cá'anqueze netu' dxuzénetu' le'e dizra' chawe' ca naca da guchebe lazre' Dios lau xra xrtáudxu ca'. ³³ Ben lie' ca naca da guchebe lazre' cheedxu dxi'u, nácadxu zri'ine zre sua benne' ca', gate bsebanē Jesús, ca naxúaj gudxupe' salmo, dxenné': "Lue' nacu' zri'ina'. Neda' bzua' Lue' na'a." ³⁴ Dios blé'ene' gusebanē Lē' ládújla benne' gate, chee quebe guzru bel-la' dxen chee' gate gunné' lu xiche chee': "Gunná' le'e da chawe' da guchebe lazra' lau David." ³⁵ Cá'anqueze dxenné' xetú lu salmo: "Quebe gu'u lataj guzru bel-la' dxen chee wen zrin chiu', bi nazri'ite lazru'." ³⁶ Da li David bene' zrin chee benne' ca' zaj zre'e gate zua le', ca gunná be'e Dios le', san ca gudé na' gutie', na' bulucache' le' naga bele-gache xra xrtawe' ca', na' guzru bel-la' dxen chee'. ³⁷ Quebe guzru bel-la' dxen chee Bénnea' bsebán Dios Lē'. ³⁸ Biche ljwezra', dxuzenda' le'e, dxal-la' nézele Dios gunité lawe' chee dul-la chee ne chee Jesús. ³⁹ Ne chee Lē', xúgute benne' dxelejil' lazre' Lē', Dios dxunité lawe' chee benne' ca' ca naca xúgute da quebe guca gunité lawe' chee lácala belune' ca naca da bdxixruj be'e Moisés. ⁴⁰ Le guxúe xanne' cuínale chee quebe gaca chee ca naca da buluzúaj benne' ca' buluchálaje' waláz chee Dios, gate gulenné':

⁴¹ Le nna', le'e, benne' wen la, ne le xebane, ne le xenite, lawe' da guna' neda', Dios chee, lu zra chee, tu da naca da zrente, da quebe chéajlele lácala nu guzén le'e.

⁴² Gate Pablo ne benne' ljwezre' ca' belexedxúaje' lu xudau' chee judío ca', na' benne' ca' quebe zaj nálaje' judío gulenabe' le' guchálajlene' le' chee da caní gate zrin xetú zra dxulupá'ane'. ⁴³ Gate belexedxúaje' lu xudau' na', benne' zan benne' judío ca', ne benne' ca' belexaque'

judío, ne dxelune' da naca chee Dios, xjálalene' Pablo ne Bernabé. Gubáz caní buluzéajni'ine' benne' ca' dxal-la' xelezúa chache' lu xel-la' zri'i lazre' chee Dios.

⁴⁴ Guledé xrunu' zra gate naca zra dxulupá'ane', belezraga ca nácaqueze benne' zaj zre'e xezre na' chee xelenne' dizra' chee Dios. ⁴⁵ Gate benne' judío ca' belelé'ene' benne' zante zaj nazrague' na', na' belaque' xa lazre' ne gulezú lawe' dxelenné' chee da dxenná Pablo, ne gulenné' schanni' chee'. ⁴⁶ Nadxa Pablo ne Bernabé gulenné' du lazre', gulé'e benne' judío ca':

—Ben na ba xen bzénetu' le'e nedxu dizra' chee Dios, le'e nácale judío, san lawe' da quebe dxaca lázrele xénele, ne da dxunle dxulé'e na quebe naca chee le gápale xel-la' nabán zeajil' canna, chee le na' chéajntu' na'a chálajlentu' benne' quebe zaj naque' judío. ⁴⁷ Caní guntu' lawe' da caní gunná bea Xránadxu gate gunné':

Bzua' Lue' ca tu xi' da gusení na benne' xezr la xu ca', ne chee gacu' weselá chee bénneache zaj zre'e ca naca xezr la xu.

⁴⁸ Gate belenne' da nigá, benne' quebe zaj naque' judío gulebé'ene', na' gulezú lawe' dxelenné' xrlátaje naca dizra' chee Xránadxu, na' guléajle xúgute benne' ca' ba nabéaj Dios chee xelape' xel-la' nabán zeajil' canna. ⁴⁹ Ca' guca, bzriluj dizra' chee Dios du ca naca lu xezre ca' zaj nababa na'. ⁵⁰ Benne' judío ca' buluchálajlene' bal-la nu'ula blau ca' zjálalene' da dxulusédene' chee Dios, ne benne' biu blau ca' chee xezre, na' gulegú'u xel-le' benne' ca' chee xeláu zi' xuzre' Pablo, ne Bernabé, ne chee xuluxulague' le' naga nababa na'. ⁵¹ Nadxa gubáz ca' belexebibe' bxrte xu da zeajzria na zrele' da dxulé'e na zaj nabaga benne' ca' zria, na' xjaque' lu xezre Iconio. ⁵² Gulebé'ene' benne' zaj zre'e Antioquía na', benne' dxeléajle'e chee Jesús, zúale Be' Lá'azza le'.

**Da belún Pablo ne
Bernabé lu xezre Iconio**

14 Gate belezrin Pablo ne Bernabé xezre Iconio, na' belú'e tu zrente lu xudau' chee judío ca', na' ca buluchálaje' dizra' chee Dios, benne' zante guléajle'e chee Jesús, benne' judío ca', ne benne' quebe zaj naque' judío. ²Nadxa benne' judío ca', benne' quebe dxeléalje'e chee Jesús belegú'u xel-le' benne' quebe zaj naque' judío chee xelexúdene' biche l'jwézredxu ca'. ³Lácala belune' caní, benne' gubáz ca' gulezúaqueze' na' zane' zra, ne du lazre' buluchálaje' dizra' chee Dios, dxuluxrén lazre' Xránadxu, na' Xránadxu bzua chúchue' ca da dxelenná benne' gubáz ca' ca naca xel-la' zri'i lazre' chee Dios, na' Le' bnézruje' gubáz ca' xel-la' dxenná bea xelune' xel-la' waca ca' chee xabáa ne da dxelunna bea na naca da li da dxelenné'. ⁴Benne' ca' zaj zre'e xezre na' gulaque' chupa la'a. Bal-le' beledé'e judío ca', na' xebal-le' beledé'e gubáz ca' chee Jesús. ⁵Nadxa benne' judío ca', ne benne' quebe zaj naque' judío belune' tuze dizra' nen benne' xu'u lawe' ca' chee gulenné' schanni' chee benne' gubáz ca', na' gulaca lazre' xuluzríe' le' xiaj. ⁶Pablo ne Bernabé, gate belenne' ca', buluzrúnna-je' zjaque' naga zaj dxe' xezre Listra, ne xezre Derbe, da zaj nababa Licaonia, na' guledé'e ca naca xézredu ca' chee xezre ca' zaj nababa na', ⁷na' buluchálaje' na' ca naca dizra' chawe' chee Jesús.

Dxuluzríe' Pablo xiaj lu xezre Listra

⁸Lu xezre Listra zua tu benne' nazrin-naj ni'e. Dxe'e na' lawe' da gúlaje' nazrinnaj ni'e, ne quebe dxácaqueze se'e. ⁹Benne' nigá dxenne' da dxuchalaj Pablo, na' Pablo gunné'e benne' zrinna-ja na', na' guque bé'ene' nape' xel-la' dxea-ji' lazre' chee xexaque'. ¹⁰Nadxa Pablo gunné' zizraj:

—Guzé ni'u.

Benne' na' guxase' guzete', na' guzú lawe' dxedé'. ¹¹Gate belelé'e benne' ca' da ben Pablo, na' gulezú lawe' dxelenné' zizraj nen dizra' walazre' chee benne' Licaonia, dxelenné':

—Dios ca' zaj naca ca bénneache ba belelé'e naga zúadxu.

¹²Dxelenné' naca Bernabé dios Júpiter, ne naca Pablo dios Mercurio lawe' da dxuchálajqueze Pablo. ¹³Na' bxruze chee dios Júpiter, zua xudau' chee na ca dxú'udxu xezre na', guché'e bezre ca' ne xiaj zaj nuzé'e na du, na' bxruze na', ne benne' zan ca' gulaca lazre' xuluxucá'ana szrene' benne' gubáz ca', ne xelútie' bezr ca' lau benne' gubáz ca' ca dxelúnqueze benne' xezre Listra na' chee dios chee'. ¹⁴Gate guleque be'e Bernabé ne Pablo, benne' gubáz ca', na' gulecheze' zra lané' da dxulé'e na dxelezrebe' bi gun Dios, na' gulu'e lówela benne' ca', dxelenné' zizraj:

¹⁵—Le'e, benne', ¿bizr chee na' dxunle da nigá? Netu' nácantu' bénneache ca lé'equeze, ne za'ntu' nigá chee xentu' le'e dxal-la' gusanle québedxa gunle da caní da quebe bi zaca na, ne chéajlele chee Dios ban, Bénnea' bené' xabáa ne xezr la xu, ne nísadau', ne xúgute da de lu'ule na. ¹⁶Lu iza da ba guledé Dios be'e lataj xúgute bénneache guledé' lu xrneza cha chee', na' belune' ca da gulaca lazre', ¹⁷lácala blé'equezne' benne' ca' nu naca Le' ne chee da chawe' da dxune' chee benne' ca'. Le' dxusel-la' xiuj cheedxu ne ca naca lina xrtante, ne dxunne' da dxechínedxu da gágudxu, ne chee bedxu.

¹⁸Lácala gulenná gubáz ca' da nigá, gúcalé'e na stebe buluzague' benne' ca' chee quebe xelútie' bezr ca' lau le' chee xuluxucá'ana szrene' le'.

¹⁹Gudé na' belezrín bal-la benne' judío, benne' Antioquía, ne benne' Iconio, na' belegú'u xel-le' bénneache ca', na' buluzríe' Pablo xiaj. Guléquene' ba

belutië' Pablo, na' gulezrube xue' le' belebéajë' le' xezre na'. ²⁰ Gate benne' ca' dxeléajle'e cheë Jesús belezrague' zaj naxéchajë' naga de' Pablo, na' bexasa le', ne bexu'e xezre na', na' zra xula bezá'lene' Bernabé, zjaque' xezre Derbe.

²¹ Ca gudé bchálajë' dizra' chawe' cheë Jesús lu xezre Derbe, naga benne' zante gulez' lu ne'e dizra' cheë Dios, na' gubáz ca' belexedéë' xezre Listra, ne xezre Iconio, ne xezre Antioquía. ²² Lu xezre caní belún chache' lázrdau benne' ca' dxeléajle'e cheë Jesús, ne bulusízrene' le' chjácalene' da naca cheë Dios, dxel'é'e le':

—Benne' xelu'e naga dxenná bea Dios, xel-la' zi' zrente xeledéë'.

²³ La gázqueze buluzúe' benne' gula ca' cheë xuluxúe' tu tu cue' benne' ca' dxeléajle'e cheë Jesús, na' ca gudé na' buluzré'e benne' ca' lu na' Xránadxu, Bénnea' ba guléajle'e cheë'.

Pablo ne Bernabé dxelexezrine' lu xezre Antioquía da nababa Siria

²⁴ Ca gudé na' belexedéë' naga nababa Pisidia, na' belezrine' naga nababa Panfilia. ²⁵ Buluchálajë' dizra' cheë Dios lu xezre Perge, na' ca gudé na' xjaque' xezre Atalia. ²⁶ Na' belexú'e da dxedá lawe' nísadau', na' belexezrine' xezre Antioquía, naga zaj zra' benne' belegu'e gubáz ca' lu na' Dios cheë xelune' zrin na', da ba belezuene' na'a. ²⁷ Gate belezrine' Antioquía na', na' bulutupe' benne' ca' dxeléajle'e cheë Jesús, ne buluzenne' benne' ca' xúgute da ba ben Dios, bchínene' gubáz ca', ne ca ben Xránadxu, be'e benne' quebe zaj naque' judío lataj xeléajle'e cheë Jesús. ²⁸ Na' Pablo, ne Bernabé belexegá'ane' na' zane' beu' nen benne' ca' dxeléajle'e cheë Jesús.

Gubáz ca' cheë Jesús dxelexezrague' Jerusalén

15 Ca lu zra ca', bal-la benne' gusiá'que' xezre ca' zaj nababa

Judea, ne belezrine' xezre Antioquía na', na' gulezú lawe' dxel'é'e biche ljwézredxu ca' dxal-la' chugu late' weaj bela' cheë bel-la' dxen cheë benne' biu ca' cheë xelélé', ca gunná bea Moisés. ² Pablo ne Bernabé bulutíl-lale'e le' dizra', na' naga xejche'te na, biche ljwézredxu ca' buluzúe' Pablo, ne Bernabé, ne xezícala benne' ca' cheë chjaque' Jerusalén cheë cheajlechálajë' cheë da nigá nen benne' gubáz ca', ne benne' gula ca' cheë cue' benne' dxeléajle'e cheë Jesús zaj zre'e Jerusalén.

³ Benne' dxeléajle'e cheë Jesús, benne' zaj zre'e Antioquía, belexegu'e benne' caní neza, na' belexedéë' xezre ca' zaj nababa Fenicia, ne xezre ca' zaj nababa Samaria, na' dxuluzenne' benne' xézredu ca' ca belún benne' quebe zaj naque' judío, ba belexexaque' cheë Dios, na' xúgute biche ljwézredxu belebéle'ene' gate belenne' da nigá.

⁴ Gate Pablo ne Bernabé belexezrine' Jerusalén, na' benne' ca' dxeléajle'e cheë Jesús ne benne' gubáz ca', ne benne' gula ca' gulez' lu ne'e le', na' Pablo ne Bernabé buluzenne' le' ca naca da ben Dios lu na' le'. ⁵ Bal-la benne' fariseo ca', benne' ba guléajle'e cheë Jesús, gulezé' gulenne':

—Dxun na ba xen chugu late' weaj bela' cheë bel-la' dxen cheë benne' biu ca', benne' ba guléajle'e cheë Jesús, benne' quebe zaj naque' judío, ne nna be'edxu le' xuluzúe' dizra' da bdxixruj be'e Moisés.

⁶ Nadxa belezraga benne' gubáz ca' ne benne' gula ca', benne' dxeléajle'e cheë Cristo, cheë xulucá'ana chawe' da na' dxaca. ⁷ Ca gudé buluchálajle' ljwezre' cheë da nigá, na' Pedro guxase', ne guzre' benne' ca':

—Biche ljwezra', nézquezle le'e Dios guqu'é'e neda' nédxute ládujla le'e cheë guzenda' benne' quebe zaj naque' judío dizra' chawe' ca naca cheë Jesús, cheë

xeléajle benne' ca' chee Le'. ⁸Dios nézene' ca naca da xu'u lu xichaj lázxdau bénneache, na' blé'ene' dxezi' lu ne'e benne' ca', lawe' da bnézruje' benne' ca' Be' Lá'azxa ca bene' cheedxu dxi'u. ⁹Dios quebe dxuché'e ca zrí'ine' tudxu xetudxu lawe' da bca'ana cháwequeze' lázxdau benne' ca' guleajlí lazre' Jesús. ¹⁰Na'a, ¿bizr chee na' dxaca lázrele le'e guchale ca da ba ben Dios, dxuzúale tu xua' lawe' benne' ca' dxeléajle'e chee Jesús, da quebe gaca gúadxu dxi'u, ne quebe guca xelúa xra xrtáudxu na? ¹¹Na'a, dxéajledxu dxi'u bache naladxu ne chee xel-la' zri'i lazre' chee Xránadxu Jesús, ne cá'anqueze zaj nalá benne' ca'.

¹²Nadxa xúgute' gulezúa zrie', ne buluzé nague' dxácate dxuchalaj Pablo ne Bernabé ca naca da ben Dios, bene' da zan da dxelunna bea na naca li xrtizre' nen xel-la' waca ca' da za xabáa, da ca' bene' lu na' Pablo ne Bernabé lávela benne' ca' quebe zaj naque' judío. ¹³Gate beuzre buluchálaje', na' gunná Jacobo: —Biche ljwezra', le xene chia'.

¹⁴Simón Pedro bzenne' dxi'u ca ben Dios, be'e lataj benne' ca' quebe zaj naca judío xelexexaque' chee' da nedxu lasa, beque'e ládujla benne' ca' bénneache xelexexaque' chee'. ¹⁵Da na' guca naca na tuze nen da buluzúaj benne' ca' buluchálaje' waláz chee Dios, da na' naxúaj na lu xiche chee Dios, dxenné':

¹⁶Te nigá xelá'a na' xechisa' ca naca lizre David da nazre'e.

Gucá'ana chawa' da nagá'ana chee na, na' xechísaqueza' na,

¹⁷chee xelexilaj xúgute' benne' xezica ca' Xrané' Dios,

ne cá'anqueze xelún xúgute' benne' zaj zra' xezr la xu ca',

benne' ca' xelenne' chee La' neda'.

¹⁸Ca' dxenná Xránadxu, blé'ene' da nigá nédxudaute'.

¹⁹'Chee le na' dxapa' le'e quebe dxal-la' gunle zede benne' quebe zaj naque' judío, benne' ca' dxelexexaque' chee Dios. ²⁰Dxal-la' guzúajntu' chee benne' ca' dxal-la' xulusane' da naca chee bedáu' xaga ca' u bedáu' xiaj, ne quebe dxal-la' xelune' dul-la chee da dxucá'ana sban bénneache, ne quebe dxal-la' xelawe' belá' chee be xixre', be quebe bdxuaj dxen, ne quebe dxal-la' xelawe' dxen cheeba'. ²¹Caní dxal-la' xelune' lawe' da ca ni'i zaj zra' benne' tu tu xezre, benne' dxuluzenne' bénneache ca naca da bdxixruj bea Moisés, da na' dxululabe' lu xudau' ca' chee benne' judío ca' tu tu zra ca' dxulupá'ane'.

²²Nadxa benne' gubáz ca', ne benne' gula ca', ne xúgute' benne' dxeléajle'e chee Jesús belune' tuze dizra' xelexe'e bal-la benne' ca' ládujla le' ne xelesel-le' le' xezre Antioquía nen Pablo, ne Bernabé. Belexe'e Judas, bénnea' léqueze' Barsabás, ne Silas. Chupa benne' caní zaj naque' benne' blau ládujla biche ljwézredxu ca'. ²³Bulugüé'e benne' ca' tu xiche da dxenná na: "Netu', benne' gubáz zrantu' nigá, ne benne' gula zrantu' nigá, ne biche ljwézrele zrantu' nigá, dxugápantu' le'e diuzre, biche ljwézrentu' quebe nácale judío, zrale xezre Antioquía, ne le'e zrale xezre ca' zaj nababa Siria, ne xezre ca' zaj nababa Cilicia.

²⁴Ba bénetu' bal-la benne' ba besía'que' nigá, ne quebe nasél-lantu' netu' le', na' belune' le'e zede nen dizra' da buluchálaje', ne belún zréajene' le'e, dxelenne' dxal-la' chugu late' weaj belá' chee bel-la' dxen cheele, benne' biu ca', ne chéajlele ca naca da bdxixruj be'e Moisés.

²⁵Chee le na' dxéquentu' naca xrlátaje cá'antu' bal-la benne' ládujla netu' chee xelexe'e xedajlenné'e le'e nen biche ljwézredxu Bernabé ne Pablo, benne' ca' nazrí'i lázrele'entu'. ²⁶Benne' caní belune' zrin chee Xránadxu Jesucristo, xjaque' lu da stebe naga gulaca lazre'

bénneache xelútię' lę'. ²⁷Ca' naca na, dxesél-lantu' naga zúale Judas ne Silas, na' benne' caní xuluchálajlene' le'e ca naca cheę da nigá. ²⁸Guque Be' Lá'azxa xrlátaje, ne cá'anqueze netu' gúquentu' xrlátaje quebe bi xua' guzúantu' lawe' le'e, san da canize dxun na ba xen gunle. ²⁹Dxal-la' gusanle da naca cheę bedáu' xaga, ne bedáu' xiaj ca', ne quebe dxal-la' gunle dul-la cheę da dxucá'ana sban bénneache, ne quebe dxal-la' gágule bęla' cheę bę xixre', bę quebe bđxuaj dxen, ne quebe dxal-la' gágule dxen cheęba'. Che gunle ca naca da nadxixruj bea caní, gunle xrlátaje. Dxenábantu' lau Dios gaca chawe' cheęle."

³⁰Nadxa benne' ca' gulesel-lę' xjaque' xezre Antioquía. Na' buluchague' benne' ca' zaj naque' cheę Dios, ne bulunézruję' lę' xiche na'. ³¹Gate biche lјwézredxu ca' bululabe' na, na' gulebéle'ene' lawe' da dxue zren na lę'. ³²Judas ne Silas zaj naque' benne' dxeleńné' waláz cheę Dios. Cheę lę' na' buluchálajlene' biche lјwézredxu ca', belúe zrene' lę', ne bulutipe' lazre' lę'. ³³Gate gudé guca tu chí'i zaj zre'e na', na' benne' bíchedxu ca' buluzé' benne' ca' dizra', ne gulenabe' Dios sua xel-la' dxebeza zri lazre' nen benne' ca', cheę xes'aque' xelexezrine' naga zaj zra' benne' ca' gulesel-lę' lę'. ³⁴Silas gúquene' xrlátaje xegá'ane' na'. ³⁵Cá'anqueze Pablo, ne Bernabé belexegá'ane' lu xezre Antioquía, na' tu zren nen benne' zandxa gulezúe' dxulusédene' bénneache, ne dxuluchálaje' ca naca dizra' cheę Xránadxu.

Dxezú lau Pablo zéaje' zitu' da gudxupe' lasa guchálaje' cheę Jesús

³⁶Ca gudé na', Pablo guzre' Bernabé: —Xu'u xecha lasa cheajnnadxu biche lјwézredxu ca' zaj zre'e xúgute xezre ca' naga xeajchálajdxu dizra' cheę Xrá-

nadxu, cheę cheajnnadxu aja dxaca zaj zre'e.

³⁷Bernabé guca lazre' che'e Juan nen lę', bi na' léquezebe' Marcos, ³⁸san Pablo quebe guxáza lazre' che'e-be' lawe' da bsanbe' benne' ca' gate zaj zre'e xezre ca' zaj nababa Panfilia, ne québedxa guxía-jlebe' lę' lu zrin cheę Xránadxu. ³⁹Na' Pablo, ne Bernabé bulutil-la lјwezre' dizra'. Ca'an guca, belexela'a cha cheę'. Bernabé guché'e Marcos, na' gulu'e tu lu da dxedá lawe' nísadau', na' xjaque' Chipre. ⁴⁰Na' Pablo guquę'e Silas, na' ca gudé biche lјwézredxu ca' belegüe'e Pablo ne Silas lu na' Xránadxu cheę gunę' da chawe' cheę benne' ca', ⁴¹na' gusiá'que', ne guledé'e xezre ca' zaj nababa Siria, ne xezre ca' zaj nababa Cilicia, na' bulutipe' lazre' bi bíchedxu ca'.

Timoteo dxéajlebe' Pablo ne Bernabé

16 Pablo ne Silas belezrine' xezre Derbe, ne xezre Listra naga belexezrague' tu benne' cuide' dxéajlebe' cheę Jesús, lebe' Timoteo, zri'ine tu nu'ula judío dxéajle'e cheę Jesús, san xrabe' naque' benne' griego. ²Bi bíchedxu zaj zre'e xezre Listra, ne xezre Iconio dxelenne' xrlátaje dxgua dxunbe'. ³Pablo guca lazre' chéajle Timoteo lę', na' guchugue' late' bęla' cheę bęl-la' dxen cheębe' ca dxenná bea da bđxixruj be'e Moisés, cheę quebe xelexrá'a benne' judío ca' zaj zre'e naga nababa na lawe' da zaj neze xúgute benne' ca' naca xra Timoteo benne' griego. ⁴Lu xúgute xezre naga dxeledé'e buluzenne' benne' bíchedxu ca' ca naca da zaj nadxixruj bea na belún benne' gubáz ca', ne benne' gula ca' zaj zre'e Jerusalén. ⁵Ca'an guca bi bíchedxu ca' gulezúa chúchue' ca dxelejli' lazre' Jesús, na' benne' ca' dxeléajle'e cheę, tu zra tu zra zeajte dxelane'.

**Dxele'e Pablo tu da ble'e Dios le',
dxel'éne' tu benne' Macedonia**

⁶Be' Lá'azxa quebe be'e benne' gubáz ca' lataj xuluchálaje' dizra' chee Dios naga nababa Asia. Chee le na' guledé'e' naga nababa Frigia, ne xezre ca' zaj nababa Galacia. ⁷Belezrine' naga nazraga xezre ca' zaj nababa Misia. Gulaca lazre' chjaque' naga nababa Bitinia, san Be' Lá'azxa chee Jesús quebe be'e le' lataj. ⁸Nadxa guledé'e' naga nababa Misia, na' belezrine' xezre Troas. ⁹Lu xezre na' Pablo blé'ene' tu da ba ble'e Dios le' chizrela, blé'ene' tu benne' biu chee ga nababa Macedonia, ze' dxata' xuene' Pablo, dxenné': "Gudá Macedonia nigá, gácalenu' netu'." ¹⁰Gate ble'e Pablo da nigá, na' benne' ca', ne neda', Lucas, la gudíljajntu' ájala guntu' chee chéajntu' ga nababa Macedonia lawe' da gúquequezentu' Dios dxenné' netu' chee cheajchálajntu' benne' ca' dizra' chawe' ca naca chee Jesús.

Pablo ne Silas dxelezrine' ciudad Filipos

¹¹Lu xezre Troas na' guxú'untu' tu lu da dxedá lawe' nísadau', na' guxéajntu' tu xezr la xu da naxechaj nísadau', nazí le na Samotracia, na' zra xula bzrintu' xezre Neápolis. ¹²Beza'ntu' Neápolis, na' bzrintu' xezre Filipos, da naca tu xezre naga zaj zra' benne' Roma, ne naca xezre blau ga nababa Macedonia. Lu xezre na' guzúantu' tu chupa zra. ¹³Gate naca zra dxulupá'ana judío ca', na' bdxúajntu' dxu'a xezre na', ne bzrintu' dxu'a xegu naga zaj nabéaje' dxeajlechálajlene' Dios. Gudxentu' na' ne bchálajntu' nu'ula ca' zaj nazrague' na' ca naca dizra' chawe' ca naca chee Jesús. ¹⁴Tu nu'ula ca' le' Lidia, naque' nu'ula chee xezre Tiatira, nu'ula dxute' ladxe' zaca da naca bzawe. Nu'ula nigá zéajlene' da

naca chee Dios, na' benne' cheentu', na' Xránadxu bzani'e lázrdawe' chee guzú' lu ne'e da dxuchalaj Pablo. ¹⁵Na' bdxue nisa nu'ula nigá nen benne' zaj zre'e lizre'. Gudé na' guta' xuene' netu', gunné':

—Che le'e dxéquele da li dxeajlí lazra' Xránadxu, le da súale lizra'.

Na' bene' ba xuzre begá'anantu' na'.

¹⁶Tu zra gate zéajntu' naga zeajchálajntu' Dios, bezrágantu' tu bi nu'ula cuide' xu'ube' be' xriwe', ne dxenné xa'abe' ne chee be' xriwe' na'. Bi nu'ula nigá xú'ube' lu na' benne' ca' dxuluchínene' lebe' xadía, na' xránabe' ca' dxelezile'e' dumí da dxezibe', dxenné xa'abe'. ¹⁷Bi nu'ula nigá guzú laube' za'be' cuzru Pablo ne netu', dxennabe' zizraj:

—Benne' caní dxelune' zrin chee Dios szrente, ne dxuluzenne' le'e ájala gunle lale.

¹⁸Zane' zra benbe' caní cadxa guque Pablo zede, na' bexéchaje', ne guzre' be' xriwe' da xu'ube':

—Lu La Jesucristo dxenná be'eda' lue' xedxúaju' lu bel-la' dxen chee bi nu'ula nigá.

Na' be' xriwe' na' bedxúajte na.

¹⁹Gate benne' ca' dxuluchínene'-be' xadía guleque bé'ene' québedxa bi xelexez'e ne cheebe', na' gulél-le' Pablo ne Silas, na' guleché'e' benne' caní lau benne' xu'u lawe' naga zua chale'aj xu'u lawe' blau. ²⁰Na' buluzié' benne' caní lau benne' xu'u lawe' ca', na' gulenné':

—Benne' caní zaj naque' judío ne dxelún zrējene' benne' zaj zre'e xezre cheedxu, ²¹ne dxulusédene' ca naca da zjácálene', da quebe gaca sidxu, ne quebe gaca gundxu na lawe' da nábabadxu Roma.

²²Nadxa benne' zaj zre'e xezre na' guledábage' Pablo ne Silas, na' benne' xu'u lawe' na' gulenná be'e xelexéchaje' zra lana Pablo ne Silas, ne xelu'e le' zrise. ²³Ca gudé belúele'e le', na' buluzré'e le'

lizre xia, ne gulenná bé'ene' benne' xu'u lu ne'e lizre xia na' guxúe xánnie' benne' ca'. ²⁴Gate benne' ca' gulenná be'e, na' bzre'e le' zane' lézxudxa ne bzre'e ní'a benne' ca' lu xedxu chee cuaga da dxuxru na ni'e.

²⁵Gate gula dxela Pablo ne Silas dx-uluchálajlene' Dios, ne dxelul-le' da dx-elúe lá'ane' Dios, na' xezícadxa benne' zaj zre'e lizre xia dxuluzé' nague' chee'.

²⁶La' na'te' guzrú'le'e da bxrize na ca naca lizre xia, na' belexalaj xúgute dxa xu'u ca', ne belexezezre du xia da zaj nadxéaj ní'a xúgute benne' ca' zaj zre'e lizre xia.

²⁷Na' benne' xu'u lu ne'e lizre xia na' be-bane', ne gate blé'ene' zaj naxalaj dxa xu'u ca' chee lizre xia, gúlajé' xia chee xute cuine' lawe' da dxéquene' ba buluxuzrúnnaj benne' ca' zaj zre'e lizre xia.

²⁸Pablo gudxezre xe'e, guzre' le':

—Quebe bi gune cuinu'. Xúgutentu' zúantu' nigá.

²⁹Nadxa benne' na' xu'u lu ne'e lizre xia gunabe' tu xi', na' guxú'u chégüe', dxezrízequeze' xel-la' dxezrebe, na' bzu zribé' lau Pablo ne Silas. ³⁰Nadxa guléa-je' benne' ca' ne bchebe' le':

—Le'e, benne', ¿bizra dxal-la' guna' chee la'?

³¹Benne' ca' belexechebe':

—Guxéajle chee Xránadxu Jesucristo, na' lau', ne cá'aqueze benne' zaj zre'e lizru'.

³²Na' buluchálajlene' le', ne xúgute benne' zaj zre'e lizre' ca' naca dizra' chee Xránadxu. ³³Lu xela ná'queze benne' na' xu'u lu ne'e lizre xia gudibe' we' chee Pablo ne Silas, na' ca' gudé na', le' ne xúgute benne' zaj zre'e lizre' guledxúe' nisa. ³⁴Ca' gudé na' beche'e Pablo ne Silas lizre', na' bnézruje' da gulawe', na' le' ne benne' zaj zre'e lizre' gulebé'ene' lawe' da ba guléajle'e chee Dios.

³⁵Che zílala benne' xu'u lawe' ca' gulesel-le' bi xra'aga lau benne' na' xu'u lu ne'e lizre xia, ne gulenná bé'ene' le' gu-

sané' Pablo ne Silas. ³⁶Nadxa benne' na' xu'u lu ne'e lizre xia guzre' Pablo:

—Benne' xu'u lawe' ca' gulenná bé'ene' neda' gusana' le'e. Na'a waca xedxúajle du lázrele.

³⁷Pablo guzre' bi xra'aga ca':

—Netu' nabáabantu' Roma, na' belú'e netu' lówela benne' xezre ca', ne quebe ne xuluchí'e cheentu', na' buluzré'e netu' lizre xia. Na'a ¿dxeléquene' xulusane' netu' bagácheze? Quebe gaca. Xelída léqueze' xelexebéaje' netu'.

³⁸Bi xra'aga ca' xejlexezénnebe' benne' xu'u lawe' ca', na' benne' caní belezrebe' gate guleque bé'ene' Pablo ne Silas zaj nababe' Roma. ³⁹Na' xjaque' lizre xia na', ne gulenabe' Pablo ne Silas xelezí zrene' chee'. Nadxa belexebéaje' le', ne gulata' xuene' le' xelexedxúaje' xezre na'. ⁴⁰Gate Pablo ne Silas belexedxúaje' lizre xia na', na' xjaque' lizre Lidia, na' ca' gudé buluchálajlene' biche ljwézredxu ca', ne bulutipe' lazre', na' besiá'que'.

Benne' zaj zre'e xezre Tesalónica dxeledábague' Pablo

17 Nadxa Pablo ne Silas guledé'e xezre Anfípolis, ne xezre Apolonia, na' belezrine' xezre Tesalónica, naga zua tu xudau' chee judío ca'. ²Pablo guxíaje' xudau' na', na' ca' dxúnqueze' bchálajlene' benne' ca' tu tu zra dx-ulupá'ane' du chunna da gazre zra. ³Ca da naxúaj na lu xiche chee Dios, bzéajni'ine' le' ben na ba xen Cristo guz' guzaque', ne gutie', na' ca' gudé na' ben na ba xen bebane' ládujla benne' gate. Na' guzre' benne' ca':

—Jesús nigáqueze, bénnea' dxuzenda' le'e chee', naque' Cristo, Bénnea' guchebe lazre' Dios sel-le'.

⁴Nadxa bal-la benne' judío ca' guléajle'e chee Jesús, ne gulaque' tuze Pablo ne Silas. La gázqueze guléajle benne' zan benne' griego, ne nu'ula zan zaj

naque' nu'ula blau. ⁵Benne' judío ca', benne' quebe dxeléajle'e chee Jesús gu-laque' xa lazre' chee Pablo, na' buluchague' bal-la benne' ca' dxelune' da calela dxeledaze', ne bulutupa ljwezre', na' buluzúe' stebe ca naca benne' xezre. Gulu'e xadía lizre Jasón, dxelexíajle' Pablo ne Silas, chee xelebéajle' le', ne xuludée' le' lu na' benne' xezre ca'. ⁶Gate quebe belexezrelné' Pablo ne Silas lu xu'u na', nadxa beleché'e xadía Jasón ne xeballa biche ljwézredxu ca' lau benne' xu'u lawe' ca' chee xezre, na' dxelebezre xe'e, dxelenné':

—Benne' ca', benne' ba belún zréajene' ca naca benne' zaj zre'e xezre la xu, cá'anqueze ba belelé'e nigá. ⁷Jasón nigá ba gulu'e benne' ca' lizre'. Ca naca benne' ca' dxeledábage' da bdxixruj bea César lawe' da dxelenné' zua xetú wenná bea, tu benne' le' Jesús.

⁸Gate belenne' da caní, na' benne' xezre ca', ne benne' xu'u lawe' ca' gulezúe' stebe. ⁹Jasón, ne biche ljwézredxu ca' bulucá'ane' dumí chee gulezi'e lataj, na' benne' xu'u lawe' ca' bulusane' le'.

Pablo ne Silas dxelezrine' xezre Berea

¹⁰Nadxa biche ljwézredxu gulé'e Pablo ne Silas chee xesi'aque' chizrela, chee chjaque' xezre Berea. Gate belezrine' na', na' belú'e lu xudau' chee judío ca'. ¹¹Benne' judío caní zaj nácadxé' zren lazre' ca benne' Tesalónica ca' lawe' da du lazre' gulezi'e dizra' chee Dios, na' tu zra tu zra dxululabe' lu xiche chee Dios chee xuluxúe' che naca da li da dxelé'e le'. ¹²Ca'an guca, benne' zan benne' judío ca' guléajle'e chee Jesús, ne cá'anqueze benne' griego. Benne' zan guléajle'e, nu'ula blau ca', ne benne' biu ca'. ¹³Gate benne' judío ca' zaj zre'e xezre Tesalónica guleque bé'ene' dxuchalaj Pablo dizra' chee Dios lu xezre Berea, na' belezrine' na',

ne gulegú'u xel-le' bèneache chee xeledábage' Pablo ne Silas. ¹⁴Biche ljwézredxu ca' la gulesél-la'te' Pablo chéajle' dxu'a nísadau', na' Silas ne Timoteo belexegá'ane' lu xezre Berea. ¹⁵Benne' ca' zjácálene' Pablo beleché'e le' lu xezre Atenas. Nadxa benne' ca' belexezrine' lazrie', ne gulé'e Silas, ne Timoteo chjácazegue' naga zua Pablo.

Da dxun Pablo lu xezre Atenas

¹⁶Dxácate' na' Pablo dxebeze' Silas ne Timoteo naga zue' lu xezre Atenas, na' guzúale'e stebe gate blé'ene' ca naca xezre na', ni' naze nítale'e bedáu' xiaj. ¹⁷Chee le' na' bchálajle' lu xudau' chee judío ca' nen benne' judío ca', ne xezícala benne' ca' zjácálene' da naca chee Dios, na' tu zra tu zra bchálajlene' benne' ca' zaj zre'e lawe' xi'a. ¹⁸Bal-la benne' zjácálene' ca naca da dxulusede benne' ca' zaj le' benne' epicureo, ne benne' estoico gulezú lawe' dxuluchálajlene' Pablo. Bal-le' gulenné':

—¿Bizra xega benne' wechalaj nigá dxi'u?

Na' xebal-le' gulenné':

—Dxéquentu' naque' benne' dxuse dizra' chee dios zitu' ca'.

Ca'an gulenné' lawe' da dxuchalaj Pablo dizra' chawe' ca naca chee Jesús, ne ca naca chee xel-la' dxexebán. ¹⁹Nadxa guleché'e Pablo lu lataj nazí le na Areópago, naga dxelezrágaqueze' bi xuluzén ljwezre'. Na' buluchebe' Pablo:

—¿Waca guzénenu' netu' ca naca da cube nigá da dxusédenu' bèneache? ²⁰Lue' dxuchálaju' dizra' da quebe ne xé'entenu', na' dxaca lázrentu' nézentu' bi zéajle' ca naca da caní.

²¹Caní gulenné' lawe' da dxuluzé nágaze, ne dxuluchálajze ca naca tu dizra' cube xúgute' benne' Atenas, ne benne' zitu' ca' zaj zre'e xezre na'.

²²Nadxa Pablo guzé' laduj benne' ca' zaj zre'e Areópago na', na' guzre' le':

—Le'e, benne' Atenas, ca naca xúgute da dxel'éda', dxul'é na dxápalé'ele ba lá'ana dios chee'le ca', ²³lawe' da gate gudá' neda' gunná'a ca zaj naca xudau' ca' naga dxue lá'anale dios chee'le ca', na' ble'eda' tu xudáudau' naga naxúaj dizra' caní: Chee Dios Quebe Nu Núnbea. Na'a, Dios na' dxue lá'anale le'e, ne quebe nún-beale Le', chee Dios na' dxuchálajlena' le'e.

²⁴'Naque' Dios na' bene' xezr la xu nigá, ne xúgute da de lawe na. Naque' Xrane xabáa, ne Xrane xezr la xu nigá. Quebe zue' xudau' da nun ni'a na' bèneache. ²⁵Quebe nachínene' bi da gaca xelún bèneache chee Le' lawe' da dxunna Dios ná'queze xúgutedxu xel-la' nabán, ne be' da dxeca'adxu, ne xúgute da de.

²⁶'Tuze benne' bene' naque' xra xúgute cue' xezr la xu ca' chee che'e du gabí'i xezr la xu, na' blé'ene' zra, ne lataj naga dxal-la' xelexré'e, ²⁷chee xelexexilaje' Dios chee ájala xelexezrelne' Le' lácala quebe xelúnbea xánnie' Le', san da li Dios quebe zue' zitu' naga zua tu tudxu dxi'u. ²⁸Ne chee Dios nigá naca bandxu, ne dxedadxu, ne zradxu. Naca ca gulenná bal-la benne' wila chee'le, gulenné': "Nácadxu xrtia Dios." ²⁹Che nácadxu xrtia Dios, quebe dxal-la' guéquedxu naca Dios ca tu bedáu' oro, u tu bedáu' plata, u tu bedáu' xiaj, da zaj nun bèneache cáteze dxululaba lázrequeze'. ³⁰Dios bzué' chalá'ala da belún bèneache ca ni'te lu xel-la' quebe zaj neze chee', san na'a dxenná bé'ene' xúgute benne' gáteteze zaj zre'e xelexebí'i lazre'.

³¹Dios ba nuzúe' tu zra gate guchi'e chee xúgute bèneache lu da xrlátaje chee' lu na' tu benne' ba gucá'a Le', na' chee da nigá bzué' tu da dxunna bea na gate bsebané' bènea' ládujla benne' gate.

³²Gate benne' ca' belenne' dizra' nigá ca naca chee tu benne' bebane' ládujla

benne' gate, na' bal-le' belún le' chee', ne xebal-le' gulenné':

—Waca guchálajlenu' netu' ca naca da nigá xetú zra.

³³Nadxa Pablo bezé'e naga zaj zra' benne' ca'. ³⁴Bal-la benne' ca' guléajle'e chee Jesús, na' gulaque' Pablo tuze. Ládujla benne' caní zua Dionisio, benne' naque' tuze nen benne' dxelezrague' Areópago na', ne tu nu'ula le' Dámaris, ne xebal-la benne' ca'.

Pablo dxezrine' xezre Corinto

18 Gudé na' bezá' Pablo xezre Atenas, bexíaje' xezre Corinto. ²Lu xezre na' xeaxjraque' tu benne' judío le' Aquilo, naque' benne' nababe' tu xezre nababa Ponto. Láteze ba guca belexezrín Aquilo, ne zru'ule' Priscila ga na'. Benne' caní besía'que' xezr la xu Italia lawe' da gunná bea César Claudio xelexedxúaj xúgute benne' judío ca' xezre Roma. Pablo guxíaje' xejanné'e Aquilo ne Priscila, ³na' lawe' da tuze ca naca zrin da dxelún Pablo ne Aquilo, dxelune' xu'u xide zra be xixre' da dxelútie' chee benne' dxjaca wedil-la, na' begá'ana Pablo nen benne' caní chee xelune' tu zren zrin. ⁴Tu zra tu zra gate naca zra dxulupá'ana judío ca', Pablo zéaje' lu xudáudau' chee judío ca' naga bchálaje', ne blé'ene' benne' ca', benne' judío, ne benne' quebe zaj naque' judío, Jesús naque' Cristo, Bènea' guchebe lazre' Dios sel-le'.

⁵Gate belezrín Silas, ne Timoteo ga na', gudé belexesí'aque' xezre ca' zaj nababa Macedonia, na' Pablo tu dxuchálajzqueze' dizra' chee Dios, ne dxulé'ene' benne' judío ca' da li Jesús naque' Cristo, bènea' nase-la Dios, bènea' dxelebeza judío ca'. ⁶Benne' judío ca' gulezú lawe' dxeledábague' Pablo, ne dxelenné' schanni' chee'. Nadxa Pablo guzribe' gabán chee' da dxulé'e na dxebéaj xíchaje' benne' ca', dxenné':

—Le'e nabágale chee xel-la' gute chee benne'du xu'ule. Québedxa nabaga' neda' chee na lawe' da ba bzenda' le'e dizra' chawe' chee Cristo. Ná'atela guchá-lajlena' benne' quebe zaj naque' judío.

⁷Bezé'e lu xudáudau' na', na' bezrine' lize tu benne' le' Justo, benne' dxucá'ana szrene' Dios ne zua lize' cuita xudáudau' chee judío ca'. ⁸Na' Crispo, benne' xícha-je chee xudáudau' chee judío ca', ne ca naca benne' zaj zre'e lize' guléajle'e chee Xránadxu. Cá'anqueze benne' zan benne' Corinto, gate be lenne' dizra' chee Dios, guléajle'e ne guledxúe' nisa. ⁹Nadxa Xránadxu ble'e lawe' Pablo tu zre' tu lu da ble'e Dios le', ne guzre' le':

—Quebe zrebu'. Bchálajteze, ne quebe sua zriu'. ¹⁰Neda' zúalena' lue', na' quebe nu seque' bi gune lue' lawe' da zaj zrále'e benne' zaj naque' chia' lu xezre nigá.

¹¹Ca'an guca, begá'ana Pablo tu iza xugachaj lu xezre Corinto, dxusédene' benne' ca' dizra' chee Dios.

¹²Lu zra ca' gate naca Galión benne' xu'u lu ne'e xezr la xu na' naga nababa Acaya, waláz chee Roma, na' benne' judío ca' guledábague' Pablo. Belech'e le' xu'u lawe', ¹³ne gulé'e benne' xu'u lu ne'e xezr la xu na':

—Benne' nigá dxedé' dxegú'u xel-le' benneache chee xelúe lá'ane' Dios, ne xelune' tu da dxedábaga da nadxixruj bea cheentu'.

¹⁴Pablo ba zue' guchálaje' gate Galión guzre' benne' judío ca':

—Chela naca na chee tu da dxuzúa chalá'ala da bdxixruj bea César u chee tu da zrinnaj zren, na' gun na ba xen xenda' ca da dxennale le'e, benne' judío.

¹⁵Lawe' da naca na chee dízra'ze, ne chee la tu benne', ne chee da nadxixruj bea na cheézele, le gucá'ana chawe' na lé'eqeze, lawe' da quebe dxaca lazra' neda' guchi'e da dxaca chee da ca'.

¹⁶Nadxa bebéaje' benne' ca' lu xu'u lawe' na'. ¹⁷Nadxa xúgute' benne' griego

gulel-le' Sóstenes, benne' xíchaje chee xudáudau' chee judío ca', ne belú'e le' lau benne' xu'u lu ne'e xezr la xu na', le' Galión. Galión na' quebe be' lazre'e chee da na'.

Pablo dxezrine' xezre Antioquía, na' dxezú lawe' zéaje' da guxunne' lasa zéaje' wen zrin chee Cristo

¹⁸Pablo begá'ane' xezre na' xezane' zra. Gudé na' bze' biche ljwézredxu ca' dizra', na' guxú'e tu lu da dxedá lawe' nísadau' zéaje' naga nababa Siria tu zren nen Priscila ne Aquilo. Lu xezre Cencrea nédxudxa gate za chu'e lu da dxedá lawe' nísadau', Pablo bzuate' xídeze xíchaje', da dxunna bea na zua tu da nachebe lazre' guné' lau Dios. ¹⁹Gate belezrine' lu xezre Efeso, Pablo bsane' Priscila ne Aquilo, na' guxíaje' lu xudáudau' chee judío ca', ne bchálajlene' judío ca' zaj nazrague' na'. ²⁰Benne' ca' gulata' xuene' le' xegá'anadxé' xetú chi'i, na' le' quebe guca lazre'. ²¹Nadxa Pablo bze' benne' ca' dizra', dxenné':

—Dxun na ba xen xezrina' sua' Jerusalén chee súaqueza' lu laní da ba za'. Welá'aqueza' xedajnná'a le'e che gunna Dios lataj.

Na' guxú'e lu da dxedá lawe' nísadau', ne bezé'e Efeso na'. ²²Gate bezrine' xezre Cesarea, Pablo guxíaje' Jerusalén xea-jape' diuzre benne' ca' dxeléajle'e chee Jesús, na' gudé na' guxíaje' xezre Antioquía. ²³Ca gudé guzúe' na' tu chi'i, na' bezé'e na', gudé'e tu tu xézredu ca' zaj nababa Galacia, ne xezre ca' zaj nababa Frigia, dxutipe' lazre' benne' ca' dxeléajle'e chee Jesús.

Apolos dxuchálaje' dizra' chee Dios lu xezre Efeso

²⁴Ca lu zra ca' tu benne' judío le' Apolos bzrine' lu xezre Efeso, naque' benne' xezre Alejandría, lu xu Egipto. Naque' tu benne' nupá'ale'e xrtizre', ne

núnbeale'e da naxúaj na lu xiche chee Dios. ²⁵Naxéajni'ile'ene' ca naca chee Xránadxu, ne dute lázrdawe' dxuchálaje', dxusédene' cáteze naca chee Jesús, lácala dxusédezené' xel-la' dxuchúa nisa ca ben Juan. ²⁶Apolos guzú lawe' dxusédene' benne' ca' zaj zre'e xudáudau' chee judío ca' du lazre'. Gate belén Priscila, ne Aquilo chee', na' guleché'e le' chala'ala, ne buluzéajni'idxene' le' cáteze naca dizra' chee Dios. ²⁷Ca gudé na', gate guca lazre' Apolos chéaje' naga nababa Acaya, bi bíchedxu ca' bulutipe' lazre', ne buluzuaje' tu xiche chee benne' ca' dxelájl'e chee Jesús zaj zre'e xezre ca' zaj nababa Acaya na' chee xezezi' lu ne'e Apolos na'. Gate bzin le' naga nababa Acaya, gúcalele'ene' benne' ca', na' Dios be'e le' lataj gulájl'e chee Jesús. ²⁸Apolos blé'ene' lau xúgute benne' ca' ca dx-eleque zréaje benne' judío ca', ne blé'ene' ne chee da naxúaj na lu xiche chee Dios Jesús naque' Cristo, Bénnea' nase-la Dios, Bénnea' dxelebeza judío ca'.

Pablo dxezrine' xezre Efeso

19 Dxácate zua Apolos lu xezre Corinto, na' gudé Pablo xézredu ca' zaj dx'e laduj xi'a ca', na' bzrine' lu xezre Efeso naga xeajxraque' bal-la benne' dx-elájl'e chee Jesús. ²Na' bchebe' benne' ca':

—¿Guzi'le le'e Be' Lá'azxa gate guxéajlele'?

Belexechebe':

—Ne quebe xénentu' che zua Be' Lá'azxa.

³Nadxa Pablo bchebe' benne' ca':

—¿Bi xel-la' dxedxúa nisa guzi'le le'e?

Benne' ca' belexechebe':

—Xela dxuchúa nisa ca ben Juan.

⁴Na' gunná Pablo, guzre' benne' ca':

—Awe', Juan bchue' nisa benne' ca' belexebi' lazre', san guzre' benne' ca' dxal-la' xelájl'e chee Bénnea' xide' ca'

te chee le', da zéaje na, chee Jesús, Bénnea' naque' Cristo, nase-la Dios.

⁵Gate belenne' da nigá, na' beledxúe' nisa lu La Xránadxu Jesús. ⁶Gate bze na' Pablo benne' ca', na' guzúale' Be' Lá'azxa le', na' gulenné' dizra' chee benne' zitu' da quebe bulusede', ne buluchálaje' waláz chee Dios. ⁷Benne' caní zaj naca chazrínne'.

⁸Lawe' chunna beu' dxeaj Pablo lu xu'u ca' naga buluzraga judío ca' naga bchálajlene' benne' ca' dizra' chee Dios, ne blé'ene' benne' ca' naca da li da dxuchálaje' ca naca xel-la' dxenná bea chee Dios. ⁹Bal-le' belún zide' lázrdawe', ne quebe gulaca lazre' xelájl'e chee Jesús, na' gulenné' schanni' chee dizra' chawe' ca naca chee Jesús lówela benne' ca'. Nadxa Pablo bezé'e naga zaj zra' benne' ca', ne guché'e benne' ca' dx-elájl'e chee Jesús lu xu'u ga dxusede tu benne' le' Tiranno, na' lu xu'u na' bchálajlene' benne' ca' tu zra tu zra. ¹⁰Ca' bene' lawe' chupa iza, na' ca'an guca xúgute benne' zaj zre'e xezre ca' zaj nababa Asia belenne' dizra' chee Xránadxu Jesús, benne' judío ca', ne benne' quebe zaj naque' judío. ¹¹Dios bene' xel-la' waca zri'a ca' lu na' Pablo lu zra ca'. ¹²Ca'an guca, gulequ'e' ladxe' ca' da dxuchéaj xichaj Pablo, ne ladxe' ca' da bde'e lachu'e, na' belú'e na naga zaj de benne' we' ca', na' benne' caní belexequa' ca naca xízrawe' da zaj nape', na' be' xriwe' ca' belexedxúaj na lu bel-la' dxen chee benne' ca'.

¹³Bal-la benne' judío ca', benne' dx-eledé' dxelaxebéaje' be' xriwe' ca' lu xichaj lázxdau benne' ca', gulaca lazre' xuluchínene' La Xránadxu Jesús chee xelaxebéaje' na, na' gulé'e be' xriwe' ca':

—Dxenná bé'entu' le'e xedxúajle lu xichaj lázxdau benne' nigá lu La Jesucristo, Bénnea' dxuchalaj Pablo chee'.

¹⁴Caní belún gazre benne' zaj naque' zri'ine tu benne' judío le' Esceva, naque'

tu benne' xíchaje chee bxruze ca'. ¹⁵ Gate beluné' caní, be' xriwe' na' bechebe na chee':

—Núnbe'a Jesús, ne nezda' nua' Pablo, san le'e, ¿nuzra le'e?

¹⁶ Gate gunná na da nigá, na' benne' biu na' xu'e be' xriwe' na', guxritie' guzría che'e benne' ca', na' duté xel-la' wal-la chee' buclé' xúgute benne' ca', na' bé'le'e benne' ca' cadxa buluzrúnnuje' lu xu'u na' gala' xídeze, ne dxelaque' dxen. ¹⁷ Xúgute benne' zaj zre'e xezre Efeso, benne' judío ca', ne benne' quebe zaj naque' judío, belenne' ca' guca da nigá, na' chee le' na' belezrébele'e, ne bulucá'ana szrené' La Xránadxu Jesús.

¹⁸ Cá'anqueze benne' zan láwela benne' ca' dxeléajle'e chee Jesús belelé'e dxelexrúalepe' da calela da beluné', ¹⁹ na' benne' zan, benne' belúne' xel-la' wazrá', zaj nu'e xiche chee wazrá', na' buluzezxe' na lau xúgute benne' ca'. Gate bululabe' ca' gulezaca xiche ca', na' gulénézene' gulezaca na ca gazxu gaxúa cue' tu gaxúa dumí plata. ²⁰ Ca'an guca, guxíaj bzriluj dizra' chee Xránadxu, ne ble'e na xel-la' waca chee na.

²¹ Gudé na' Pablo guca lazre' téé' xézredu ca' zaj nababa Macedonia, ne Acaya, na' te na' chéaje' xezre Jerusalén. Gunné' ca' te chéaje' Jerusalén, na' dxal-la' cheajte' xezre Roma. ²² Nadxa guselle' chupa benne' dxelácale le', Timoteo ne Erasto, naga nababa Macedonia, dxá-cate begá'ana le' xetú chi'i naga nababa Asia.

Benne' xezre Efeso dxeledábage' Pablo

²³ Ca lu zra na' benne' zan guledábage' dizra' chawe' ca' naca chee Jesús, ²⁴ da na' guca na ne chee tu benne' le' Demetrio, benne' gubizre plata. Benne' nigá dxuné' níchudu ca' da zaj naca plata ca' xudau' chee dios nu'ula le' Diana, na' benne' ca' dxelúnle'e le'

zrin nigá dxelezí'le'e dumí. ²⁵ Demetrio na' bchague' benne' caní tu zren nen xezica benne' dxeluné' zrin caní, na' guzre' benne' ca':

—Le'e, benne', nézquezle lu zrin nigá dxaca cheedxu da cháwele'e, ²⁶ na' ca' dxelé'equezle le'e ne dxenle, Pablo nigá dxedé' dxenné' dios ca' da zaj nun bèneache quebe zaj naca na dios, na' caní ba bsédené' benne' zan, quegá Efeso nigáze, san du ca nababa Asia. ²⁷ Da nigá nácale'e na stebe cheedxu, lawe' da ca naca zrin cheedxu nigá nazruzre cuía xi na, ne la gaze xudau' chee dios nu'ula Diana nazruzre nite xel-la' nuzé chee na, na' caní xegá'ana ditaj ca naca xel-la' szren chee dios nu'ula, bèneache' dxelúe lá'ana ca naca benne' zaj zre'e ga nababa Asia, ne du ca naca bèneache zaj zre'e xezr la xu.

²⁸ Gate belenne' da nigá, na' belezrá'ale'e benne' ca', ne gulebezre xe'e, dxelenné':

—¡Ga'ana szren Diana, dios cheedxu, benne' Efeso!

²⁹ Na' ca naca benne' zaj zre'e xezre na' guleque zréajene'. Gulele' Gayo, ne Aristarco, benne' Macedonia dxeledálene' Pablo, na' gulezrube xue' benne' caní chale'aj xu'u lawe'. ³⁰ Pablo guca lazre' chu'e na' chee guchálajlene' benne' ca', san bi bíchedxu ca' quebe gulegú'e le' lataj. ³¹ Cá'anqueze bal-la benne' xu'u lawe' chee xezre ca' zaj nababa Asia gulesel-le' benne' xeajezre' Pablo quebe dxal-la' chu'e na'. ³² Dxá-cate na', naga zaj nazraga benne' ca', bal-le' gulebezre xe'e, tu da dxelenné', na' xebal-le' dxelebezre xe'e, dxelenné' da xula, lawe' da beledxé'ena zraga benne' zan, na' benne' zante quebe zaj nézene' bizr chee na' zaj nazrague' na'. ³³ Nadxa benne' judío ca' buluzúe' Alejandro lau benne' ca' chee guzéajni'ine' le' ca naca da nigá, na' le' guchisa ne'e chee xelezúa zri benne' ca' lawe' da guca

lazre' guchálajlene' benne' zan ca' da gácale na judío ca'. ³⁴Gate benne' zan ca' guleque bé'ene' naque' benne' judío, na' gulebezre xa'a xúgute' ca' chupa hora, dxelenné':

—¡Ga'ana szren Diana, dios cheedxu, benne' Efeso!

³⁵Nadxa benne' dxuzúaje' ne chee xezre na', gate ba bzua zrie' benne' zan ca', gunné':

—Le'e, benne' Efeso. Ca' naca bèneache zaj zra' xezr la xu nigá zaj nézene' benne' zaj zre'ē xezre Efeso nigá zaj nabague' xuluxúe' xudau' chee dios nu'ula Diana, ne bedáu' chee' da bexrui na zran xabáa. ³⁶Quebe nu seque' tábaga' da nigá. Chee le na' le sua zrize, ne quebe bi gunle da quebe ne guxúe xánnele. ³⁷Benne' caní nache'le nigá quebe bi da calela ne xelune', ne quebe bi schanni' ne xelenné' chee dios nu'ula chee. ³⁸Che Demetrio, ne benne' ca' dxelune' zrin nen le' dxelaca lazre' xelagu zria chee tu benne', zaj zra' benne' dxuluchi'e da dxaca, ne zaj zua xu'u lawe' ca' naga gaca xelawe' zría chee benne' ca'. ³⁹Na' che le'e bi xetú da nábale, dxalla' nábale na naga zaj nazraga benne' xu'u lawe' ca' dxenná bea da bdxixrui bea César. ⁴⁰Na'a zúadxu stebe ga gaze nu gagu zria cheedxu ca' naca da bendxu, xelenné' dxedábagadxu xu'u lawe' lawe' da quebe seque' bi xechébedxu che nu gagu zria dxi'u ne chee da guca na'a.

⁴¹Ca' gudé gunné' da nigá, na' bze' benne' zan ca' dizra'.

Pablo dxedé' ga nababa Macedonia ne Grecia

20 Gate gudé guca da stebe na' lu xezre Efeso, na' Pablo btupe' benne' ca' dxelájle' chee Jesús chee guzėjni'ine' le'. Nadxa bze' benne' ca' dizra', ne bnide' le', na' guzé'e zéaje' xezre ca' zaj nababa Macedonia. ²Xeajné'e bíchedxu ca' zaj zre'ē xúgute' xezredu

ca', ne btípale'ē lazre' benne' ca' ne chee dizra' da bchálajlene' le'. Ca' gudé na' bezrine' naga nababa Grecia. ³Begá'ane' na' chunna beu', na' gudé na' gate ba zuate' chu'e tu lu da dxedá lawe' nísadau' chéaje' xezre ca' zaj nababa Siria, guque bé'ene' ba zaj nun judío ca' ca da xelune' chee'. Chee le na' gulú'u bí'e xezé'e ní'e té'e naga nababa Macedonia. ⁴Belún le' tuze Sópater, benne' xezre Berea, ne Aristarco, ne Segundo, benne' xezre Tesalónica na', ne Gayo, benne' xezre Derbe, ne Timoteo, ne Tíquico, ne Trófimo, benne' ca' chee xezre ca' zaj nababa Asia. ⁵Bi bíchedxu caní gulebía lawe' launtu', neda', Lucas, ne xezícadxa ljwezre Pablo, na' gulebeze' netu' lu xezre Troas. ⁶Netu', gate gudé laní gate dxelagu benne' judío xeta xtila da quebe nachixre cua zichaj chee na, guxú'untu' tu lu da dxedá lawe' nísadau', na' beza'ntu' xezre Filipos. Zra gazxu' zra na' xeajzrentu' bi bíchedxu ca' lu xezre Troas, naga guzúantu' gazre zra.

Da ben Pablo lu xezre Troas

⁷Zra nedxu chee da gazre zra bezragantu' chee gáguntu' da dxusá lázredxu ca' guca gate gute Xránadxu, na' Pablo bsédene' bi bíchedxu ca'. Ben na ba xen xeza'ntu' zra xula, na' chee le na' bchálajqueze Pablo cadxa bzrinte' dxela. ⁸Nazragantu' tu xu'u da zua chunna cuía sibe, na' zaj zéle'ē xi' da dxulusení na. ⁹Tu bi cuide' zriabe' ga dxu'u lení', na' gate Pablo bsetúnadxe' xrtizre', na' guca wásele'ē bi cuide' na', na' naga xeajchete' na, na' dxásetebe' gubíxrebe' chunna cuía sibe, na' xeajlechise'-be' ba nátebe'. ¹⁰Nadxa betaj Pablo, na' gulégü'e bequ'e-be', ne bnide'-be'. Nadxa guzre' bi bíchedxu ca':

—Quebe zrébele. Nabanbe'.

¹¹Nadxa Pablo begüéne' bezrine' chunna cuía sibe na'. Na' bzúzruje' xeta xtila gudawe', na' bezú lawe' dxuchálaje'

cadxa guxaní'te. Zra na' bezé'e na'.¹² Nadxa bíchedxu ca' belexeché'e bi na' gubíxrebe' ba bexaca banbe', na' xúgute' gulezú'e lu xel-la' dxelezné' lazre'.

**Pablo dxexeze'e xezre Troas
xezrine' xezre Mileto**

¹³Netu' guzría launtu' lau Pablo, na' guxu'untu' lu da dxedá lawe' nísadau', na' bzrintu' xezre Asón naga xezrá-gantu' Pablo ca ba nun le' lawe' da guca lazre' zéajé' ní'aze'.¹⁴ Gate bezrá-gantu' le' lu xezre Asón, na' guxú'e lu da dxedá lawe' nísadau' naga xu'untu', na' guxíajntu' xezre Mitilene.¹⁵ Beza'ntu' na', na' zra xula bedentu' le nna' xezre Quío, na' xetú zra, zra xula bezrintu' lu xezre Samos. Na' guzúantu' xezre Trogilio naga bezí lázrentu', na' zra xula bzrintu' xezre Mileto.¹⁶ Ca' bentu' chee quebe guzré'tecantu' naga nababa Asia. Chee le na' Pablo quebe guca lazre' chéajé' Efeso lawe' da guca lazre' xezrinze' lu xezre Jerusalén chee sue' na' lu zra Pentecostés che ba guca.

**Pablo dxuchálajlene' benne'
gula dxeléajle'e chee Jesús,
benne' zaj zre'e Efeso**

¹⁷Ca zrantu' lu xezre Mileto, Pablo gusel-le' tu benne' cheajnné' benne' gula ca' dxeléajle'e chee Jesús zaj zre'e xezre Efeso.¹⁸ Gate belelá' benne' ca', Pablo guzre' le':

—Le'e nézquezle ca bēna' neda' xúgute zra ca gudé bla'a ga nababa Asia.¹⁹ Xúgute zra guzúa' lávela le'e dx-una' zrin chee Xránadxu dute xel-la' dx-exruj lazre', ne zane' lasa gudxezra', na' gudéa' lu zane' da guxzaca' ca naca da gulaca lazre' benne' judío ca' xelune' chia'.²⁰ Bchálajlene' le'e xúgute da naca na xrlátaje, ne bsédeda' le'e lávela benne' zan, ne lízrquezle.²¹ Benne' zaj naque' judío, ne benne' quebe zaj naca judío, gúchequeza' benne' ca' dxal-la'

xelxebí'i lazre' lau Dios, ne xeléajle'e chee Xránadxu Jesucristo.²² Na'a zexá'a Jerusalén, ca dxenná be'e Be' Lá'azxa neda', ne quebe nezda' bi gaca chia' na'.²³ Tuze da nezda', lu xúgute' xezre ca' naga dxedéa', Be' Lá'azxa dxé'e neda' dxal-la' chu'a lizre xia, ne tea' zane' xel-la' zi'.²⁴ Quebe dxebe'a gunne xue chee da nigá, ne quebe bi gaca xel-la' nabán chia', san tuze che gaca chéajlene' ca naca da dxuna', ne chee gusexúzrqueza' guna' ca naca da nusebaga Xránadxu Jesús neda', guchálaja' dizra' chawe' ca nazrí'i Dios dxi'u.

²⁵Nézquezda' netule le'e, ba bchálajlene' le'e ca dxenná bea Dios, québedxa lé'ele neda'.²⁶ Chee le na', dxaca lazra' xapa' le'e na'a, quebe nabaga' zria ne chee tule le'e,²⁷ lawe' da ba bzenda' le'e ca naca da dxaca lazre' Dios guné', ne quebe bi bcá'ana' da quebe bzéajni'ida' le'e.²⁸ Chee le na', le guxúe cuínale, ne le guxúe ca naca benne' ca' nácale tuze, benne' ca' Be' Lá'azxa ba nuzúe' le'e ládujla le' chee chu'u lu na'le guxuele benne' ca' zaj nazrague' chee Xránadxu, benne' ca' naxá'awene' nen dxen cheéqueze'.²⁹ Nezda' gate zexá'a neda' xelélé' bal-la benne' xelaca lazre' guzría xi'e benne' zaj nazraga chee Xránadxu ca dxelún becu' xi'a, be snia ca' dxuluzría xiba' zrila' ca'.³⁰ Ládujla le'e welelá' bal-la benne' xulusédene' da wen lazre', ne quegá da li, chee chjácalle benne' ca' dxeléajle'e chee Jesús le'.³¹ Chee le na', le guxúe cuínale. Le gusá' lázrele ca bēna' chun iza, te zra ne chizrela quebe bsana' bzéajni'ida' le'e tu tule le'e, ne gudxézretea'.

³²Na'a, biche ljwezra', dxuzúa' le'e lu na' Dios, ne lu dizra' chee xel-la' zri'i lazre' chee', da napa na xel-la' waca chee gun na le'e benne' chuchu lazre', ne chee guzúa' na le'e lávela xúgute benne' ca' ba guleaj Dios cheéqueze'.³³ Quebe guca lazra' neda' si'a chia' dumí ne zra lana nu benne'.³⁴ Nézquezle le'e

ca bena', bena' zrin nen ni'a ná'queza' chee guta' da guchíneda' neda', ne da gulechinne benne' ca' gulaque' neda' tuze. ³⁵Blé'equezda' le'e, ca'an dxalla' gunle zrin chee séquele gácalele benne' dxelexazrje. Bsa lázrele xrtizra' Xránadxu Jesús, gate gunné': "Ba neza zrendxa naca na chee benne' dxunezruj, quézcala chee benne' si' lu ne'e."

³⁶Ca gudé gunná Pablo da nigá, na' bzu zribe', ne bchájlajene' Dios nen xúgute benne' ca'. ³⁷Xúgute' gulebezre', na' bulunide', ne bulunupe' Pablo. ³⁸Belexewí'inele'ene' lawe' da guzre' le' québedxa xeledé'ene' le'. Na' xjácálene' le' naga bexu'e lu da dxedá lawe' nísadau'.

Pablo dxezrine' xezre Jerusalén

21 Gate beza'ntu' naga zaj zra' bi bíchedxu ca', na' bexú'untu' lu da dxedá lawe' nísadau', na' bexíajteczentu' naga dxe' xezre Cos, na' zra xula gudentu' naga dxe' xezre Rodas, na' gudé na' bzrintu' xezre Pátara. ²Lu xezre Pátara xeajxrácantu' tu da dxedá lawe' nísadau' da zeaj na naga nababa Fenicia. Na' guxu'untu' lu da dxedá lawe' nísadau' nigá, na' beza'ntu' na'. ³Gate gudentu' naga dxe' xezr la xu Chipre, blé'entu' na chala'a xéglala, na' bexíajteczentu', bzrintu' lu xezre ca' zaj nababa Siria. Lu xezre Tiro ben na' ba xen xuluxulétaje' xua' da nua da dxedá lawe' nísadau' na', na' chee le' na' bzrintu' na'. ⁴Na' bezrágantu' benne' ca' dxeléajle'e chee Jesús, benne' zaj zre'e xezre Tiro na', na' begá'anantu' nen benne' ca' gazre zra. Benne' caní, lawe' da bzéajni'i Be' Lá'azxa le' da gaca, gulé'e Pablo quebe dxal-la' chéaje' Jerusalén. ⁵Gate gudé guca gazre zra ca', na' zua xeza'ntu' na'. Xúgute benne' ca' dxeléajle'e chee Xránadxu, ne zru'ule' ca', ne bidu chee' ca' gusá'acalene' netu' bedxúajtentu' xezre na', na' dxu'a nísadau' na' bzu zríbentu' bchájlajentu' Dios.

⁶Nadxa bze ljwézrentu' dizra', ne bnídate ljwézrentu'. Nadxa bexú'untu' lu da dxedá lawe' nísadau', na' bi bíchedxu ca' belexezrine' lizre'.

⁷Beza'ntu' Tiro, gudentu' lu nísadau', ne bzrintentu' xezre Tolemaida, naga bgápantu' bi bíchedxu ca' diuzre, ne begá'anantu' nen benne' ca' tu zra. ⁸Zra xula Pablo, ne netu' zrálentu' le' bezá'ntu' na', na' bzrintu' xezre Cesarea. Na' bzrintu' lizre Felipe, benne' dxedá dxuchálaje' dizra' chee Dios. Naque' tu benne' gazre, benne' ca' buluzúa gubáz ca' xelune' zrin chee Jesús. Begá'anantu' nen benne' nigá. ⁹Felipe na' zaj zra' tapa zrí'ine' nu'ula quebe ne xuluchaga na'abe', ne dxuluchálajbe' waláz chee Dios. ¹⁰Guzúiantu' na' zane' zra gate bla' tu benne' le' Agabo chee xezre ca' zaj nababa Judea. Naque' benne' dxuchálaje' waláz chee Dios. ¹¹Agabo na' bidé' bedajnné'e netu'. Guqué'e bazxu dxu'a le'e chee Pablo, na' bchéaje' na' ni'a na' cuine', dxenné':

—Be' Lá'azxa dxenné' judío ca' lu xezre Jerusalén xuluchéaj caní benne' xrane bazxu dxu'a le'e nigá, na' xuludé'e le' lu na' benne' zitu' ca'.

¹²Gate bentu' netu', ne benne' Cesarea da nigá, na' guta' xuentu' Pablo quebe chéaje' Jerusalén. ¹³Pablo bechebe':

—¿Bizr chee na' dxebézrele, ne dxuzúale neda' xel-la' dxewí'ine lazre'? Ba zúaqueza', quegá tuze xuluchéaje' neda', san la gázqueze zua' chee gatia' lu xezre Jerusalén ne chee Xránadxu Jesús.

¹⁴Gate guque bé'entu' quebe séquentu' guzágantu' Pablo, na' québedxa bi gúzrentu' le', dxennantu':

—Gaca ca dxaca lazre' Xránadxu.

¹⁵Gudé na' bsení'antu' cheentu', na' guxíajntu' Jerusalén. ¹⁶Na' gusiá'acale bal-la benne' netu', benne' Cesarea dxeléajle'e chee Jesús, na' ládujla benne' ca' zua tu benne' Chipre le' Mnasón, zane'

iza ba zeaj dxéajle'e chee Jesús, na' lizre benne' nigá dxal-la' zrintu' súantu'.

Pablo zeajnné'e Jacobo

¹⁷ Gate bzrintu' Jerusalén, bi bíchedxu ca' belezí' lu ne'e netu' duté xel-la' dx-
elebé. ¹⁸ Zra xula Pablo guxíajlene' netu'
xeajnná'ntu' Jacobo, na' zaj zrá'queze
na' xúgute benne' gula ca' dxeléajle'e
chee Jesús. ¹⁹ Pablo bgape' le' diuzre, na'
bzenne' benne' ca' tu da ben Dios lu na'
le' ládujla benne' quebe zaj naque' judío.
²⁰ Gate belenne' ca', na' belúe lá'ane'
Dios. Nadxa gulé'e Pablo:

—Chawe' naca na, bi bícha'dau'. Dx-
el'équezenu' zane gaxúa benne' judío
dxeléajle'e chee Jesús, na' xúgute' dx-
elenné' dxun na ba xen chéajledxu da
bdxixruj bea Moisés. ²¹ Zaj zra' benne'
ba gulé'e benne' judío caní lue' dxusé-
denu' xúgute benne' judío zaj zre'e
zitu' québedxa xelune' ca da gunná
be'e Moisés, ne quebe xelechugue' late'
béla'dau' chee bel-la' dxen chee bidu
biu chee' ca', ne quebe chjácalene'
ca naca da zéajledxu dxi'u dxundxu.
²² ¿Ajala dxal-la' gundxu? Benne' judío
caní welezrague' gate xelenne' ba bla'u.
²³ Cháwedxa gunu' da caní: Zaj zra' tapa
benne' lówela dxi'u dxal-la' xelune' tu
da zaj nachebe lazre' lau Dios. ²⁴ Guché
benne' caní chjá'acalene' lue', ne bca'ana
chawe' cuinu' lau Dios nen benne' caní,
na' gudizruj ca naca da dxal-la' xelízru-
je' benne' guchibe' xicha xichaj benne'
caní. Ca'an gaca, xúgute benne' xeleque
bé'ene' quebe naca da lí ca da gulenné'
chiu', san la gázqueze lue' dxunu' xúgute
ca da dxenná da nadxixruj bea na. ²⁵ Ca
naca chee benne' ca' quebe zaj naque'
judío, ba bzúajntu' chee' quebe dxun na
ba xen xelune' da caní, san tuze dxal-
la' xulusane' da naca chee bedáu' xiaj
xaga ca', ne quebe xelawe' dxen chee be
xixre' ca', ne quebe xelawe' bela' chee be
xixre', be quebe bdxuaj dxen, ne quebe

xelune' dul-la chee da dxucá'ana sban
bénneache.

Dxeléle' Pablo lu xudau'

²⁶ Nadxa Pablo guché'e tapa benne' ca',
na' zra xula bca'ana chawe' cuine' lau
Dios nen benne' ca', na' belexú'e lu xu-
dau' chee buluzenne' bxruze ca' gate xex-
uzre zra ca' chee da dxulucá'ana chawe'
cuine' lau Dios, gate na' tu tue' dxal-la'
xelegú'e guna'.

²⁷ Gate ba zua xuzre da gazre zra, na'
bal-la judío ca', benne' zá'aca xezre ca'
zaj nababa Asia, belelé'ene' Pablo lu xu-
dau' na', na' buluchague' ca naca benne'
ca' zaj zre'e na', na' gulebía che'e Pablo.
²⁸ Dxelenné' zizraj:

—Benne' Israel, le gácale netu'. Benne'
nigá dxedé' gáteteze dxusédene' xúgute
bénneache xuluzúe' chalá'ala xezr la xu
cheedxu, ne da bdxixruj be'e Moisés, ne
xudau' nigá, ne ba guzre'e lu xudau' nigá
bal-la benne' griego. Dxucá'ana dítajé'
lataj lá'azxa nigá.

²⁹ Caní gulenné' lawe' da ba belelé'ene'
Pablo lu xezre na' nen Trófimo, tu benne'
xezre Efeso, na' dxeléquene' gulú'u Pablo
le' lu xudau'.

³⁰ Ca naca benne' zaj zre'e xezre na'
beledxé'ena zrague', ne zá'aca chégüe'.
Nadxa gulel-le' Pablo, ne gulezrube xue'
le' chale'aj xudau' na', na' bulusézxuje'
dxa xu'u chee na. ³¹ Ba zuate xelútije'
Pablo gate benne' Roma dxenná be'e lu
wedil-la benne' ba dxeledxé'ena zraga ca
naca benne' zaj zre'e xezre Jerusalén.
³² Nadxa benne' nigá bhague' benne' dx-
jaque' wedil-la nen benne' dxenná bé'ene'
le', na' xjaca chégüe' naga zaj nazraga
benne' zan ca'. Gate benne' ca' belelé'ene'
benne' na' dxenná be'e lu wedil-la, na'
bulusane' québedxa buluzálaje' Pablo.
³³ Nadxa gubiga' benne' na' dxenná be'e
lu wedil-la, na' gudél-le' Pablo, ne gunná
bé'ene' xuluchéaje' le' chupa du xia.
Gudé na' bchebe' benne' ca' nua' benne'

nigá, ne bi ba bene'. ³⁴Benne' ca' gulebezre xe'e da zan da gulenné'. Ca'an guca benne' dxenná be'e lu wedil-la quebe bi guxéajni'ine' lawe' da dxelúnle'e schaga'. Nadxa gunná bé'ene' xeleché'e Pablo xu'u naga zaj zra' benne' dxjaque' wedil-la, benne' zan ca'. ³⁵Gate belezrine' dxa xu'u naga zaj zra' benne' dxjaque' wedil-la, na' benne' dxjaque' wedil-la belexú'e Pablo lu na'ze' lawe' da dxelúle'e benne' zan ca' Pablo, ³⁶na' xúgute' zá'aque' cuzre na' dxelenné' zizraj:

—Gate bènnea'.

Pablo dxexechebe' lau benne' zan ca'

³⁷Gate dxelegú'e Pablo lu xu'u naga zaj zra' benne' dxjaque' wedil-la, le' guzre' benne' na' dxenná bé'ene' le':

—¿Waca bi nnia'?

Na' bchebe bènnea' le':

—¿Waca nneu' dizra' griego?

³⁸¿Quebe nacu' lue' benne' Egipto na' ba zeaj tu chupa iza btupe' benne' ca' guledábague' xu'u lawe', na' guché'e tapa gaxúa benne' dxeluti'e benne', xeajzré'e le' le'e xixre' lawe' lataj?

³⁹Nadxa Pablo guzre' benne' na':

—Neda' naca' benne' judío, ne nababa' tu xezre blau chee ga nababa Cilicia. Ben culuén gunu' neda' lataj guchá-lajlana' benne' zan caní.

⁴⁰Benne' na' be'e le' lataj, na' Pablo guzré' lachila chee xu'u na', na' guchisa ne'e chee xelexúa zri benne' zan ca'. Gate gudxé' zri, na' bchálajlene' le' dizra' hebreo, dxenné':

22—Le'e, benne' gula, ne le'e, bi bicha', le xen ca da xapa' le'e da dxexecheba' chee.

²Gate belenne' dxuchálajle Pablo le' dizra' hebreo, na' gulezúadxé' zrize, na' Pablo guzre' le':

³—Neda' naca' judío. Gúlaja' xezre Tarso naga nababa Cilicia, na' bgula' Jerusalén nigá, na' Gamaliel bsédene' neda' cáteze naca da nadxixruj bea

na chee xra xrtáudxu ca'. Tu dxue lázrezqueza' dxuna' da naca chee Dios cáteze dxunle le'e na'a. ⁴Nédxute' gudáu zi' xuzra' benne' ca' dxeléajle'e chee Jesús, ne bétequeza' bal-le', ne guche'a benne' biu, ne nu'ula chee, na' bzra'a le' lizre xia. ⁵Bxruze blau, ne xúgute' benne' gula sina waca xelexechébequeze' belunne' neda' xiche chee bi'a na lau bi bíchexu judío ca' zaj zré'e xezre Damasco. Guxá'a na' xeajxedilja' naga zaj zra' benne' ca' dxeléajle'e chee Jesús chee che'a benne' ca' Jerusalén nigá, chee xeledé'e ba xa'.

⁶Gate zexá'a xu'a neza, ne ba zua zrina' Damasco, ca du wagubizra gúcatite' tu xi' naga zexá'a da za' xabáa.

⁷Na' xeajchazia' lu xu, ne benda' chi'i tu benne' guzre' neda': “Saulo, Saulo, ¿bizr chee na' nau zi' xuzru' neda'?” ⁸Nadxa bcheba' le': ¿Núzraqueze lue', Xran? Na' guzre' neda': “Neda' naca' Jesús, benne' Nazaret, bènnea' nau zi' xuzru' lue'.”

⁹Benne' ca' zrálene' neda' belelé'ene' xi' na', ne belezrebe', san quebe belenne' chi'i bènnea' gunné' neda'. ¹⁰Nadxa gunné'a: ¿Bi dxal-la' guna', Xran? Na' Xránadxu gunné': “Guxasa, ne guxíajteze Damasco, ga na' zua benne' xel'é'e lue' ca da dxal-la' gunu'.” ¹¹Benne' ca' zjácálene' neda' belequ'e na'a zeajntu' Damasco lawe' da bca'ana xi' na' neda' la chul-la.

¹²Zua na' tu benne' le' Ananías, benne' dxuné' du lazre' ca naca da bdxixruj be'e Moisés, na' xúgute' benne' judío zaj zré'e Damasco dxelenné' cháwewe'e ca dxuné'.

¹³Ananías na' ble'e naga zua' neda', na' guzre' neda': “Bicha' Saulo, na'a xele'enu'.” Lu zra ná'queze belé'eteda', ne ble'eda' benne' na'. ¹⁴Nadxa guzre' neda': “Dios chee xra xrtáudxu guqu'é'e lue' nédxute' chee gúnbe'u ca naca da dxaca lazre' Le', ne chee le'enu' Benne' xrlátaje chee Dios, ne xennu' chi'i Bènnea'.

¹⁵Lue' guchálaju' da naca chee Le' lau ca naca bènneache zaj zré'e lu xezr la xu, ne

guzennu' benne' ca' ca naca da blé'enu', ne da bennu'. ¹⁶Na'a, ¿bizr chee na' dx-ezrenu'? Guxasa, gudxúa nisa, ne bxren lazre' chee Xránu' Dios chee cuee' dul-la chiu'."

¹⁷Gate bezrina' Jerusalén, guxá'a lu xudau' xeajchálajlëna' Dios, na' ble'eda' tu da ble'e Dios neda'. ¹⁸Ble'eda' Xránadxu, na' guzre' neda': "Bdxuajche Jerusalén nigá lawe' da quebe xelezf'e ca naca da guchálaju' chia'." ¹⁹Nadxa gucha' Lë': Xran, zaj nézquezne' guxá'a neda' xúgute' xu'u naga dxelezraga judío ca', ne xeajxri'a benne' ca' dxeléajlë' chiu', na' bzra'a lë' lizre xia, ne bzálajqueza' benne' ca', ²⁰na' gate belútië' Esteban, benne' wen zrin chiu', na' zéqueza' neda' naca' tuze nen benne' ca' belútië' lë'. ²¹Xránadxu guzre' neda': "Guxíaj, lawe' da sel-la' lue' zitu' naga zaj zra' benne' quebe zaj naque' judío."

Da ben benne' dxenná be'e lu wedil-la

²²Dizra' caní belenne', san lu dizra' nigá gulezú lawe' dxelebezre xë'e, dxelenné':

—¡Gate benne' nigá! ¡Québedxa dxal-la' gaca bane'!

²³Na' gulebezre xá'aqueze', ne buluzale' sibe zra lane', ne belequë'e bxrte xu da buluzale' sibe. ²⁴Chee lë' na' benne' na' dxenná be'e lu wedil-la gunná bé'ene' xelegú'e Pablo lu xu'ula, ne xelu'e lë' chee nne' da li, bizr chee na' gulebezre xa'a benne' zan ca' chee lë'. ²⁵Gate bexuzre buluchéajë' na' Pablo, chee xelu'e lë', Pablo guzre' tu benne' dxeajë' wedil-la zue' na':

—¿Naca cheele le'e güele tu benne' nababë' Roma, ne quebe ne guchí'ale aja naca chee'?

²⁶Gate ben benne' dxeajë' wedil-la da nigá, na' guxíajë' xeajezre' benne' dxenná be'e lu wedil-la:

—Guxúe xánniu' bi na' gunu', lawe' da nababa Roma benne' nigá.

²⁷Nadxa benne' nigá gubigue' naga zë Pablo, na' bchebë' lë':

—¿Da li na' nababu' Roma?

Pablo bechebë':

—Awe'.

²⁸Na' benne' dxenná be'e lu wedil-la gunné':

—Neda' da zrente gudízuja' chee gubaba' Roma.

Na' Pablo gunné':

—Neda' nabáaqueza' Roma gate gúlajtea'.

²⁹Gate belenne' da nigá, na' benne' ca' ba zaj zë' xelu'e Pablo belexeuase' cuita lë', na' la gaze benne' na' dxenná be'e lu wedil-la, gate guque bé'ene' nababa Pablo Roma, bzrebë' lawe' da nuchéajë' lë' du xia.

Pablo dxezrine' lau benne' xu'u lawe' blau ca' chee judío ca'

³⁰Zra xula, benne' na' dxenná be'e lu wedil-la guca lazre' nézene' bi chee na' dxelagu zria judío ca' Pablo, na' bequë'e du xia na' nadxéaj na na' Pablo, na' gunná bé'ene' xelezraga benne' xíchajë ca' chee bxruze, ne xúgute' benne' xu'u lawe' blau. Nadxa guléajë' Pablo, na' bze' lë' lau benne' ca'.

23 Pablo gunné'e benne' xu'u lawe' blau ca', na' guzre' lë':

—Le'e, bi bicha', ca naca xúgute' da ba bena' neda', zua zri xichaj lázrdawa' lau Dios.

²Nadxa Ananías, bxruze blau, gunná bé'ene' benne' zaj zë' na' xelegapë' dxu'a Pablo. ³Na' Pablo bechebë':

—Dios güe'e lue', benne' dxun láweze da xrlátaje. Dxe'u na' chee guchi'u chia' neda' ca dxenná bea da nadxixruj bea Dios. ¿Bizr chee na' dxunu' da dxedábaga da bdxixrujë', dxenná be'enu' xelu'e neda'?

⁴Benne' ca' zaj zre'e na' gulé'e Pablo:

—¿Caní schanni' dxennáu' chee bxruze blau chee Dios?

⁵ Pablo gunné':

—Le'e, bi bicha', quebe gunezda' che benne' nigá naque' bxruze blau lawe' da dxenná lu xiche chee Dios: Quebe nneu' schanni' chee benne' dxenná be'e lázriu'.

⁶ Nadxa guque bé'ene' Pablo bal-le' benne' xu'u lawe' zaj naque' benne' saduceo ca', na' xebal-le' zaj naque' benne' fariseo ca', na' gunné' zizraj:

—Le'e, bi bicha', neda' naca' fariseo, ne xrtia' zaj nauē' fariseo ca', na' dx-uchí'ale ca naca chia' lawe' da dxebeza lazra' xelexebán benne' gate.

⁷ Gate gunná Pablo da nigá, na' benne' fariseo ca', ne benne' saduceo ca' gulezú lawe' dxulutil-la ljwezre' dizra', na' gulaca chupa la'a ca naca benne' ca'.

⁸ Ca'an guca lawe' da dxelenná saduceo ca' quebe xelexebán benne' gate, ne quebe nu chilá' gubáz chee xabáa ca', ne quebe nu chilá' bēnne'du xu'u bēnneache, san benne' fariseo ca' dxeléajle'e dxata' xúgute' da ca'. ⁹ Xúgute' gulebezre xe'e, na' gulezé bal-la benne' dxuluxuzájle'e da nadxiruj bea na, benne' zaj naque' fariseo, na' gulenné':

—Benne' nigá quebe bi da calela ne gune'. Che nu bēnne'du xu'u bēnneache, u tu gubáz chee xabáa ba gunné' le', quebe dxal-la' nne'dxu chee Dios.

¹⁰ Na' bulutl-lalē'e ljwezre' dizra', na' benne' na' dxenná be'e lu wedil-la bzrebe' xelēl-le' Pablo xuluzúzruje' le'. Chee le' na' gunná bé'ene' benne' dxjaca wedil-la xelexebáje' le' lāwela benne' ca', ne xelexeché'e le' lu xu'u na' naga zaj zra' benne' dxjaque' wedil-la.

¹¹ Xela xula, Xránadxu ble'e lawe' Pablo, na' guzre' le':

—Ben dipa lazru', Pablo, lawe' da ca bchálajquezu' chia' Jerusalén nigá, ca'an dxál-la'queze guchálaju' chia' lu xezre Roma.

Zaj nun benne' judío ca xelunē' xelútie' Pablo

¹² Zra xula bal-la benne' judío ca' belune' tuze dizra' xelútie' Pablo. Gulenné':

—Dios cu'e dxi'u de' che bi xi'aj gágudxu, ne quebe ne gútedxu Pablo.

¹³ Nadé chua benne' biu ca' zaj nachebe lazre' xelunē' da nigá. ¹⁴ Benne' caní xjaque' lau benne' xíchaje' ca' chee bxruze ca', ne benne' gula sina ca', na' gulenné':

—Netu' ba guchebe lázrentu' lau Dios cu'e netu' de' che bi gáguntu', ne quebe ne gútentu' Pablo. ¹⁵ Na'a, le'e, ne xezí-cadxa benne' xu'u lawe' blau ca' dxal-la' nábale benne' dxenná be'e lu wedil-la xedajlegü'e Pablo wxre zila laule le'e, xele bēnnea' dxaca lázrele guchébe xánnele Pablo, na' netu' se cuásantu' gútentu' le' québela ne xide' nigá.

¹⁶ Zri'ine bi zan Pablo benbe' ca naca da nigá, na' guxíajbe' naga zua Pablo cheajézrebe' le'. ¹⁷ Nadxa Pablo gunné' tu benne' xu'u lu ne'e benne' ca' dxjaque' wedil-la, na' guzre' le':

—Guché' bi cuide' nigá lau benne' xíchaje' chiu' lawe' da de' da dxal-la' xebe' le'.

¹⁸ Na' benne' na' xu'u lu ne'e benne' ca' dxjaque' wedil-la guché'e-be' lau xranē', na' guzre' le':

—Pablo, bēnnea' nadxéaje' gunné' neda', na' gunabe' xedajgu'a bi cuide' nigá naga zu' lawe' da de' da dxal-la' xebe' lue'.

¹⁹ Benne' xíchaje' na' guqu'e' na' bi cuide' na', na' guché'e-be' chalá'ala, ne bchebe'-be':

—¿Bi dxaca lazru' xu'u neda'?

²⁰ Na' gunná bi cuide' na', gúzrebe' le':

—Benne' judío ca' ba zaj nunē' tuze dizra' xelenabe' lue' che'u Pablo wxre zila lau benne' xu'u lawe' blau ca', xelenné' dxelaca lazre' xuluchebe xánnie'

le'. ²¹ Quebe cháajle'u chee benne' ca' lawe' da nadé chua benne' ca' xebeze' le' bagácheze, ne ba gulechebe lazre' lau Dios Le' cu'e benne' ca' de' che bi xe'le'aj xelawe', ne quebe ne xelúti'e Pablo. Na'a ba zaj zue' dxebeze' xrtizru'.

²² Nadxa benne' xíchaje na' bze' bi cuide' na' dizra', na' guzre'-be' quebe nu xebe' ba xeajézrebe' le' caní.

Dxelesel-le' Pablo lau Félix, benne' xu'u lu ne'e xezr la xu na'

²³ Benne' xíchaje na' gunné' chupa benne' chee', benne' xu'u lu ne'e benne' ca' dxjaque' wedil-la, na' gunná bé'ene' le' xulucueze' chupa gaxúa benne' dxjaque' wedil-la, benne' sa'aca ni'e, ne ga xun chi benne' dxjaque' wedil-la, benne' xele-bía bzrina', ne chupa gaxúa benne' dxjaque' wedil-la, benne' xelu'e xia tunna, chee' chjaque' lu xezre Cesarea dxedá' ga chizrela. ²⁴ La gázqueze gunná bé'ene' xulucueze' bzrina' cuía Pablo, ne gunná bé'ene' xelech'e le' cháwedau' lau Félix, benne' xu'u lu ne'e xezr la xu na' waláz chee' Roma. ²⁵ Gusel-le' tu xiche da belúa benne' dxjaque' wedil-la. Caní naxúaj na:

²⁶ Neda' Claudio, dxugapa' lue' diuzre Félix, benne' xu'u lu na'u xezr la xu nigá. ²⁷ Benne' judío ca' gulél-le' benne' nigá ná'tega na'a chee' xelúti'e le'. Gate gunezda' neda' nababe' Roma, na' guxíajlęna' benne' chia' ca', benne' dxjaque' wedil-la, xeajselá' le'. ²⁸ Guca lazra' nezda' bi dxelagu zria le', na' guche'a le' lau benne' xu'u lawe' ca' chee' judío ca'. ²⁹ Na' gunezda' dxelagu zria le' da naca chee' da nadxixruj bea chee' judío ca', san quebe naca na chee' xelúti'e le', ne chee' chu'e lize xia. ³⁰ Gate benda' ca ba zaj nun judío ca' chee' xelúti'e le', na' dxusel-la' le' naga zu', ne ba gucha' benne' ca' dxelagu zria le' waca xelawe' le' zria lau lue'. Gaca xrlátaje chiu'.

³¹ Nadxa benne' dxjaque' wedil-la beluęe' ca' gunná be'e benne' xíchaje

chee', na' beleché'e Pablo chizrela, na' belezrine' xezre Antípatris. ³² Zra xula benne' dxjaca wedil-la, benne' ca' dxeledá' ní'aze, belexezrine' Jerusalén, na' benne' dxjaque' wedil-la zaj zrie' bzrina' beleché'e Pablo naga dxal-la' zrine'. ³³ Gate belezrine' xezre Cesarea, na' bulunézruje' benne' xu'u lu ne'e xezr la xu na' xiche na', ne buludé'e Pablo lu ne'e. ³⁴ Ca bexuzre blabe' xiche na', na' benne' xu'u lu ne'e xezr la xu na' bchebe' ga benne' Pablo. Gate benne' naque' benne' chee' xezre nababa Cilicia, ³⁵ na' guzre' le':

—Guchi'a chee' da dxaca chiu' gate xeledá' benne' ca' dxelagu zria lue'.

Nadxa gunná bé'ene' cha benne' dxjaca wedil-la xuluxúe' Pablo naga zua xu'u lawe' chee' Herodes.

Pablo dxuzri'e dizra' da dxácale na le' lau Félix

24 Ca gudé gazxu' zra, Ananías, bxruze blau, bzrine' xezre Cesarea nen bal-la benne' gula sina ca', ne tu benne' dxenné' waláz chee' benne' ca', le' Tértulo. Benne' caní belezrine' lau benne' xu'u lu ne'e xezr la xu na' chee' xelagu zria Pablo. ² Gate xeajlexrí'e Pablo, na' guzú lau Tértulo dxawe' xria Pablo, dxé'e Félix:

—Xcalenu' lue', benne' xu'u lu na'u xezr la xu nigá, lawe' da zúantu' xel-la' dxebeza zri lazre', na' da chawe' dxgua dxaca na cheentu', na' ca dxenná be'enu' netu' lu xel-la' sina chiu' dxexedxúaj na chawe'. ³ Xúgute da nigá dxezí'queze lu na'ntu' gáteteze na', ne dxentu' lue' xcalén cuinu', Félix. ⁴ Chee' québedxa guntu' lue' zédete, dxata' xueda' lue' gun zren lazru' xennu' cheentu' tu chí'idau'. ⁵ Dxenná'antu' benne' nigá dxúnle'e da calela, ne gáteteze na' lu xezr la xu nigá dxune' benne' judío chupa la'a, ne naque' benne' xíchaje chee' benne' ca' zaj da' tu benne' Nazaret. ⁶ Benne'

nigá guca lazre' guzúe' chalá'ala xudau' cheentu', na' netu' gudél-lantu' le', ne guca lázrentu' guchí'antu' da naca chee' ca nadxixruj bea na cheentu'. ⁷ Na' Lisias, benne' dxenná be'e lu wedil-la, bequé'e le' lu na'ntu' xadía. ⁸ Na' gunné' che zaj zra benne' xelagu zrie' Le', dxal-la' xelélé'e lau lue'. Lue' gaca guchébu' benne' nigá, na' nézenu' naca da li zria dxáguntu' le'.

⁹ Benne' judío ca' zaj zre'e na' gulenné' naca da li xúgute da ca'. ¹⁰ Nadxa benne' xu'u lu ne'e xezr la xu na' guchisa ne'e chee' guchalaj Pablo, na' gunná Pablo:

—Dxebéle'eda' dxunu' neda' lataj xechéba' lau lue', lawe' da nezda' naca xrlátaje ca dxuchi'u da dxaca chee' xezr la xu cheentu' ba zeaj zane' iza.

¹¹ Lué'queze waca chéajni'inu' ba zeaj chazrinnu zraze bla'a Jerusalén chee' güe lá'ana' Dios. ¹² Quebe belelé'ene' neda' nu gutil-la' dizra', ne quebe nu benne' guché'ena' zraga lu xudau' blau, ne lu xezícala xu'u ca', ne lu neza ca' chee' xezre na'. ¹³ Benne' caní quebe xezezéquene' xululé'ene' naca da li ca zaj naca da dxelawe' neda' zria. ¹⁴ Tu da dxexecheba', dxucá'ana szrena' Dios chee' xra xrtáudxu ca', dxuna' ca da dxelenná benne' caní naca na da wen lazre', lawe' da dxéajle'a xúgute da naxúaj na lu xiche chee' da nadxixruj bea na, ne chee' benne' ca' buluchálaje' waláz chee' Dios. ¹⁵ Neda' dxebeza lázrqueza' ca da gun Dios, ca dxebeza lazre' benne' caní, dxebeza lázrentu' Dios gusebane' benne' gate ca', benne' xrlátaje, ne benne' ca' dxelune' da calela. ¹⁶ Chee' le' na' dxue lazra' sua zri xichaj lázrdawa' lau Dios, ne lau bèneache ca'.

¹⁷ 'Ca gudé gudá' xezre xula ca' zane' iza, na' bezrina' lazria' chee' gunézruja' da gácale na benne' xache' ca', ne cu'a guna' lau Dios. ¹⁸ Da nigá dxuna' neda' gate bal-la benne' judío chee' xezre ca'

zaj nababa Asia belexezrague' neda' lu xudau' ca gudé bca'ana chawe' cuina' cáteze naca da zéajlentu', san quebe nu benne' bchaga', ne quebe nu benne' guché'ena' zraga. ¹⁹ Benne' caní dxal-la' xelélé'e nigá chee' xelawe' neda' zria che bi zua dxelaca chee' nen neda', ²⁰ san che quebe bi de, na' benne' caní zaj zre'e nigá dxal-la' xelenné' che bi belezrélene' da dxebaga' gate zua' lau benne' xu'u lawe' blau ca' chee' judío ca'. ²¹ Tuze da bēna' gate zua' lau benne' ca', gunnéa' zizraj: Na'a dxuchi'ale chia' lawe' da dx-eajlí lazra' xelexebán benne' gate.

²² Gate Félix benne' da nigá, na' bca'ane' na cá'aze lawe' da neze xanne' le' ca naca chee' benne' ca' dxeléajle'e chee' Jesús, na' guzre' benne' ca':

—Gate xida Lisias, benne' dxenná be'e lu wedil-la, na' chéajni'idxeda' chee' da nigá dxaca chee'e.

²³ Nadxa Félix gunná bé'ene' benne' dxenná be'e lu wedil-la, ne benne' ca' dxenná be'ene' xelexegu'e Pablo lu xu'u lawe' na', na' xelu'e le' lataj bi guné', ne xelu'e lataj benne' ljwezre Pablo cheajlenné'e le', ne bi xelune' chee'.

²⁴ Gudé tu chupa zra Félix belé'e xetú nen zru'ule' Drusila, nu'ula judío, na' gunná bé'ene' bzrin Pablo chee' guchálajlene' le' ca naca xel-la' dxéajlí lazre' chee' chee' Jesucristo. ²⁵ Gate Pablo bchálajlene' le' ca dxal-la' gundxu da xrlátaje, ne nna be'e cuínadxu, na' zrin zra guchi'a Dios cheedxu gate cheajsé chee' xezr la xu, na' bzrebe Félix, ne guzre' Pablo:

—Bexíaj na'a. Gate nalátaja', na' nnéqueza' lue'.

²⁶ La gaze dxaca lazre' Félix gunezruj Pablo le' dumí chee' gusané' le'. Chee' le' na' gunnéle'e Pablo chee' guchálajlene' le'. ²⁷ Ca' guca, gudé chupa iza, na' Félix bedxúaje' xrlátaje' ga xu'u lu ne'e xezr la xu na', na' bedé tu benne' le' Porcio Festo waláz chee' Félix. Félix bca'ane' Pablo

lizre xia lawe' da guca lazre' xegá'ane' chawe' lau judío ca'.

Pablo dxexechebe' lau Festo

25 Nadxa Festo bzrine' xezre Cesarea chee' si' lu ne'e gaque' benne' xu'u lu ne'e xezr la xu na', na' gate guca chunna zra, guxíaje' Jerusalén. ²Lu xezre na' belezrín benne' xíchaje ca' chee bxruze ca', ne benne' judío blau ca' lau le', ne gulawe' zria Pablo. ³Gulata' xuene' benne' xu'u lu ne'e xezr la xu na' sel-le' benne' cheajlexezri'e Pablo chee xezrine' Jerusalén. Benne' judío ca' ba zaj nune' xelútie' Pablo la neza gate zezé'e na'. ⁴Bechebe Festo ba xu'u Pablo lizre xia lu xezre Cesarea, na' léqueze' ba nune' chéaje' na' xetú chupa zra. ⁵Na' guzre' benne' ca':

—Benne' ca' zaj zre'e lówela le'e, benne' zaj nape' xel-la' dxenná bea, dxal-la' chjácálene' neda' Cesarea, na' che benne' na' zua bi da calēla da bene', waca gágule le' zria.

⁶Festo begá'ane' Jerusalén ca du xrunu' ga chi zraze, na' bezrine' Cesarea. Zra xula gudxé'e lataj blau chee', ne gunná bé'ene' xeaixlexr'e Pablo. ⁷Gate bzrin Pablo lau benne' xu'u lu ne'e xezr la xu na', na' gulebiga judío ca' zá'aca Jerusalén, ne gulágule'e zria Pablo, san quebe guca xululé'ene' naca na da li. ⁸Nadxa Pablo bechebe' waláz chee', gunné':

—Neda' quebe bi da calela ne guna, quegá chee da nadxixruj bea chee judío ca', ne quegá chee xudau' chee', ne quegá chee César.

⁹Festo guca lazre' xegá'ane' xrlátaje lau benne' judío ca', na' bchebe' Pablo:

—¿Dxaca lazru' chéaju' Jerusalén chee guchi'a neda' ca naca chiu' na'?

¹⁰Pablo bechebe':

—Zua' lau xu'u lawe' da nuzúa César naga dxal-la' zri'a ca naca chia'. Lue' nézqueznu' quebe bi da zrinnaj ne guna'

chee benne' judío ca'. ¹¹Che ba beña' tu da zrinnaj da dxun na gútele neda', waca gútele neda'. Che quebe bi de naca na da li ca naca zria da dxelawe' neda', quebe nu napa xel-la' dxenná bea gudée' neda' lu na' benne' ca'. Dxenaba' zri'a chia' lau César.

¹²Ca gudé bchálajlene' benne' dxuluzéajni'i le', na' Festo guzre' Pablo:

—Ba gunabu' zri'a chiu' lau César. Chéaju' lau César.

Pablo dxezrine' lau Agripa, benne' wenná bea

¹³Ca gudé zane' zra Agripa, benne' wenná bea, ne bi zane' belezrine' Cesarea chee xulugape' Festo diuzre. ¹⁴Gulezúe' na' tu chupa zra, na' Festo bzenne' Agripa, benne' wenná bea na' ca naca chee Pablo. Guzre' le':

—Zua tu benne' nigá, benne' bca'ana Félix lizre xia. ¹⁵Gate guzúa' xezre Jerusalén, na' benne' xíchaje ca' chee bxruze ca', ne benne' gula sina ca' chee judío ca' gulenné' chee benne' nigá, ne gulenabe' neda' chuga' chee' gatié'.

¹⁶Neda' becheba' benne' ca', gunnía' benne' xu'u lawe' chee Roma quebe nu benne' dxelechugue' chee' gatié' che quebe zrine' lau benne' ca' dxelawe' le' zria chee xechebe' waláz chee'. ¹⁷Chee le' na', gate belelá' benne' ca' nigá, quebe guzreda', na' zra xula gudxe'a lataj blau chia', ne gunná be'eda' bla' benne' na'.

¹⁸Benne' ca' gulawe' le' zria quebe bi gulenné' chee' ca da gúqueda' neda'. ¹⁹Laze láweze da gulenné' chee' naca na ca naca da dxelájle'e chee Dios, ne chee tu benne' le' Jesús, benne' gute, san dxenná Pablo naca bang'.

²⁰Quebe bezréleda' ájala guna' chee da na', na' bcheba' Pablo che dxaca lazre' chéaje' Jerusalén chee zri'a ca naca chee' na'. ²¹Nadxa le' gunabe' zri'a chee' lau César Augusto, na' gunná be'eda' xegá'ane' lizre xia cadxa séqueda' sel-la' le' lau César.

²²Nadxa gunná Agripa, dxé'e Festo:

—La gaze neda' dxaca lazra' xenda' chee benne' nigá.

Na' bechebe Festo:

—Wxre xennu' chee'.

²³Zra xula, gate belezrín Agripa, ne Berenice ga na', belú'e lu duté xel-la' szren nen benne' dxenná be'e lu wedilla, ne benne' blau ca' chee xezre. Na' Festo gunná bé'ene' xeajlexr'e Pablo, ²⁴na' gunné':

—Agripa, benne' wenná bea, ne le'e, nazrágale nigá nen netu'. Nigá zua benne' na'. Benne' zan, benne' judío zaj zre'e Jerusalén, ne benne' zaj zre'e Cesarea nigá, gulenné' chee benne' nigá, na' tu gulézqueze' neda' dxal-la' gatié'. ²⁵Neda' dxéqueda' quebe bi bene' da gudé na le' gatié', san léqueze' gunabe' zri'a chee' lau César. Chee le' na' ba nuna' chee' sel-la' le' lau César. ²⁶Quebe bi de da guzúaja' chee Xrana' César ca naca chee benne' nigá. Chee le' na' dxuzúa' benne' nigá laule le'e, ne da naca bláuqueze, dxuzúa' le' lau lue', wenná bea Agripa, chee guchebu' le' chee gata' late' da guzúaja' ca naca chee'. ²⁷Dxéqueda' quebe naca chawe' sel-la' tu benne' nadxéaje' du xia, ne quebe nnia' bi da zria nape'.

Pablo dxexechebe' lau Agripa, benne' wenná bea

26 Nadxa gunná wenná bea Agripa, guzre' Pablo:

—Waca xechebu'.

Na' Pablo guchisa ne'e, ne guzú lawe' dxuchálaje', dxenné':

²—Dxebéle'eda' dxunu' neda' lataj dxuchálaja' lau lue', wenná bea Agripa, chee xecheba' ca da gulenná benne' judío chia' neda', ³ne da naca blaudxa, lawe' da nézqueznu' lue' ca naca da zéajlentu' netu', benne' judío ca', ne ca naca dizra' dxutil-la ljwézrentu'. Chee le' na' dxen-

aba' lue' xennu' chia' duté xel-la' zren lazre' chiu'.

⁴Xúgute benne' judío ca' zaj nézene' ca bēna' lazria', ne lu xezre Jerusalén gate nácatea' bidautē. ⁵Zaj nézqueze benne' ca', ne waca xelexechebe' che dxelaca lazre', ca nácatea' benne' cuide'te, naca' fariseo. Benne' fariseo ca' zjácaldxe' ca naca chee da dxeléajle judío ca' chee Dios. ⁶Na'a lawe' da dxebeza lazra' gusebán Dios benne' gate ca', ca guchebe lazre' chee xra xrtáuntu' ca', benne' ca' buluzúe' neda' lau xu'u lawe'. ⁷Dxebeza lazre' chazrinnu cue' zri'ine zre sua Israel xeelé'ene' gaca ca naca da nigá guchebe lazre' Dios, na' chee le' na' dxulucá'ana szrene' Dios, ne dxelune' zrin chee' te zra ne chizrela. Na'a, wenná bea Agripa, benne' judío ca' dxelawe' neda' zria lawe' da dxebeza lazra' ca naca da caníqueze da nachēbe lazre' Dios. ⁸¿Quebe dxéajle'u gusebán Dios benne' gate ca'?

⁹Néda'queza' nédxute gúqueda' da zan da dxal-la' guna' chee benne' ca' dxeléajle'e chee Jesús, benne' Nazaret. ¹⁰Caní bēna' lu xezre Jerusalén. Lu xel-la' dxenná bea chee benne' xíchaje ca' chee bxruze ca', benne' zan bzra'a lizre xia, benne' dxeléajle'e chee Jesús, na' gate belútie' benne' ca' neda' bēnqueza' tuze benne' ca' belútie' le'. ¹¹Zane' lásate bdea' benne' ca' ba xa' chee xulusane' xel-la' dxeleajl' lazre' chee'. Caní bēna' xúgute lu xu'u ca' naga dxelezraga judío ca', na' lu xel-la' dxezrá'a chia' benne' ca', gudáu zi' xuzra' benne' ca' zaj zre'e lu xezre zitu' ca'.

¹²Chee' guna' da nigá zexá'a xezre Damasco, zaj nase-la benne' xíchaje ca' chee bxruze ca' neda' nen xel-la' dxenná bea chee'. ¹³Ca zexá'a xu'a neza na', du wagubizra ble'eda' tu xi' da za' xabáa da nácadxa ca xel-la' dxenná' chee' gubizra, na' gusení na naga zexá'a neda' nen benne' zjácalenē' neda'.

¹⁴Nadxa xúgutentu' xeajcházentu' lu xu, na' benda' chí'i tu benne' gunné' dizra' hebreo, guzre' neda': "Saulo, Saulo, ¿bizr chee' na' nau zi' xuzru' neda'? Lue'ze dxun zi' cuinu' ca dxun bezre gate dxulíbeba' lawe' xágala da dxádue'-ba'." ¹⁵Nadxa gunnéa': ¿Nuzra Lue', Xran? na' Xránadxu guzre' neda': "Neda' naca' Jesús, bènnea' nau zi' xuzru'." ¹⁶Bexasa, guzé, lawe' da blé'e lawa' lue' chee' gunu' zrin chia', ne chee' xechebu' ca naca da ba blé'enu', ne ca naca da za le'enu' gate te na'a. ¹⁷Guselá' lue' lu na' benne' judío ca', ne lu na' benne' zitu' ca' naga dxusella' lue' na'a. ¹⁸Dxusel-la' lue' lau benne' ca' chee' sálaju' xiaj lau benne' ca' chee' xulusane' da naca chee' da chul-la, na' xelune' da naca chee' xel-la' naxaní', ne chee' xelexedxúajé' lu na' da xriwe', ne xelexúé' lu na' Dios, ne chee' xeléajlé'e chia' neda', na' xunite lau Dios ca naca dul-la chee', ne gaca chee' tu da xelape' lówela benne' ca' ba gucá'a Dios."

¹⁹'Ca' guca, wenná bea Agripa. Bzua' dizra' ca naca da ble'e Dios neda' da naca chee' xabáa. ²⁰Nedxu bchálaja' dizra' chee' Dios lau benne' zaj zré'e xezre Damasco, na' gudé na' lau benne' zaj zré'e Jerusalén, ne ca naca naga nababa Judea, ne lau benne' ca' quebe zaj naque' judío. Gucha' benne' ca' dxalla' xelexebí'i lazre', ne xelexexaque' chee' Dios, na' xelune' da xelunna bea na ca da ba zaj naque'. ²¹Chee' le' na' benne' judío ca' gulél-le' neda' lu xudau', ne gulaca lazre' xelútié' neda'. ²²Dios dxácalene' neda', na' zé chúchuqueza' lu zra na'a zra, dxuchálajlena' xúgute benne' ca naca chee' Dios, benne' cá'aze ca', ne benne' blau ca'. Dxapa' benne' ca' tuze ca naca da gulenná benne' ca' buluchálaje' waláz chee' Dios, ne da gunná Moisés dxal-la' gaca. ²³Gulenné' Cristo dxal-la' si' saque', na' ca te gatié' dxalla' xebane' ládujla benne' gate nédxudxa ca xúgute benne' ca', na' gulenné' xelén

benne' judío ca', ne benne' quebe zaj naque' judío ca naca chee' xel-la' naxaní' chee' Dios, da dxulé'e na le' ca gaca xelélé'.

Pablo dxaca lazre' guzéajni'ine' Agripa gaque' benne' chee' Cristo

²⁴Gate gunná Pablo da caní, na' gunná zizraj Festo:

—Nadá xichaj lázrda'u, Pablo. Lawe' da dxusédele'u, na' nadá xichaj lázrda'u.

²⁵Pablo bechebe':

—Quebe nadá xichaj lázrdawa', dxapa' cuinu' Festo. Da dxennéa' naca na da gaca chéajledxu, ne da li. ²⁶Nigá zua wenná bea Agripa. Nézele'ene' ca naca chee' da caní, na' chee' le' na' dxuchálaja' duté xel-la' dxuxrén lazre' chia' lawe'. Nézquezda' le' nézene' ca naca da nigá lawe' da dxuchálaja' ca naca chee' da quebe guca na bagácheze. ²⁷¿Dxéajlé'u lue', wenná bea Agripa, ca naca da gulenná benne' ca' buluchálaje' waláz chee' Dios? Nezda' dxéajlé'u.

²⁸Nadxa gunná Agripa:

—Xeláteze guzéajni'inu' neda' gaca' chee' Cristo.

²⁹Nadxa gunná Pablo:

—Che xeláteze u che da zrendxa dxenaba' gun Dios, quegá lue'ze, san cá'anqueze xúgute benne' dxelenne' chia' na'a, xelaque' ca néda'queza', san quebe xeledxéajé' du xia.

³⁰Ca gudé gunná Pablo da nigá, na' gulexasa wenná bea, ne benne' xu'u lu ne'e xezr la xu na' tu zren nen Berenice, ne xúgute benne' ca' zaj dxe'e na'. ³¹Belexedxúajé' cheeze' chee' xuluchálajlé' ljwezre' ca naca chee' da nigá. Na' gulenné', dxelé' ljwezre':

—Benne' nigá quebe bi da calela ne gune' da gudé na le' gatié', ne quebe dxalla' chu'e lizre xia.

³²Na' gunná Agripa, guzre' Festo:

—Waca gusandxu benne' nigá chela quebe gunabe' zri'a chee' lau César.

Dxelesel-le' Pablo lu xezre Roma

27 Gate ba zaj nune' xelesel-le' netu' lu xezr la xu Italia, na' Pablo, ne xezícala benne' ca' zaj zre'e lizre xia, buludée' le' lu na' tu benne' dxenná bé'ene' lu wedil-la le' Julio, benne' yu'u lu ne'e tu cue' benne' dxjaque' wedil-la nazí le na Benne' Chee Augusto Dxjaque' Wedil-la. ²Na' guxú'untu' tu lu da dxedá lawe' nísadau' chee xezre Adramitio, da ba zua te na xézredu ca' chee ga nababa Asia. Zúalequeze Aristarco netu', tu benne' xezre Tesalónica chee ga nababa Macedonia. ³Zra xula bzrintu' xezre Sidón, naga Julio bénle'e da chawe' chee Pablo, na' be'e le' lataj xejnné'e bi bíchedxu ca' chee bi belune' chee'. ⁴Gate beza'ntu' xezre Sidón, na' gudentu' naga dxe' xezr la xu Chipre da naxechaj nísadau'. Blé'entu' na chalá'a xéglala lawe' da dxaca be' da quebe dxue na da dxedá lawe' nísadau' lataj cheaj na lizra lidau'. ⁵Gudentu' lu nísadau' le nna' xezre ca' zaj nababa Cilicia, ne Panfilia, na' bzrintu' xezre Mira da nababa Licia.

⁶Lu xezre na' benne' dxenná be'e lu wedil-la bezrague' tu da dxedá lawe' nísadau' chee xezre Alejandría da zeaj na xezr la xu Italia, na' bzre'e netu' lawle chee zeajntu' Italia na'. ⁷Zane' zra zéajntu' chawe' lazre', na' stébele'e bzrintu' le nna' xezre Gnido. Lawe' da ne za be' na' dxedábaga na da dxedá lawe' nísadau', na' gudentu' le nna' Salmón, ne guxécha-jntu' naga dxe' xezr la xu Creta da naxechaj nísadau'. ⁸Stébele'e gudentu' chalá'ala naga dxe' Creta na', na' bzrintu' tu xézredau' nazí le na Buenos Puertos, da zua gagu naga zua xezre Lasea.

⁹Záne'te zra bnítentu' xu'untu' da dxedá lawe' nísadau' na', na' ba naca stébe zéajntu' lu nísadau' na' lawe' da dxexú'udxu beu' zaga. Chee le na' bzéajni'i Pablo benne' ca'. ¹⁰Dxenné':

—Le'e, benne', dxelé'eda' wácale'e stébe naga zéajdxu na'a, na' wabía xi' da dxedá lawe' nísadau' nigá ne xua da nua na, na' zrúzrete' cuía xidxu dxi'u.

¹¹Benne' dxenná be'e lu wedil-la guxéajlédxe' chee xrane da dxedá lawe' nísadau' na', ne chee benne' xu'u na lu ne'e, ca chee Pablo. ¹²Na' lawe' da quebe naca lataj na' chawe' súadxu na' beu' zaga ca', na' xúgute' guléquene' nácadxa chawe' xezá' da dxedá lawe' nísadau' na' chee xexéaj na Fenice, tu xezre chee Creta na', da dxe' chalá'a chee xezr la xu Creta naga dxebía gubizra, na' xegá'anadxu na' beu' zaga ca'.

Dxaca be' bdunu' lu nísadau'

¹³Nadxa guzú lau dxaca lase be' da za' chalá'a naga dxedé gubizra beu' zaga, na' guléquene' waca chéajtezentu' lu nísadau', na' gudentu' gáguze lu xezr la xu Creta na'. ¹⁴Nadxa chíteze guca guzú lau dxácale'e be' bdunu' da za' chalá'a ga za' be' zaga. ¹⁵Be' na' guzú lau dxuzriga na chalá'ala da dxedá lawe' nísadau' na', na' lawe' da québedxa guca chéajdx-antu' naga za' be' na' ben na ba xen bentu' lataj bzriga na da dxedá lawe' nísadau' na'. ¹⁶Na' gudentu' cúzrela tu xezr la xudau' naxechaj nísadau' da nazí le na Clauda, naga québedxa dxácate na be' na' wal-la, na' stébele'e gúquentu' bcuentu' da dau' da dxedá lawe' nísadau' da nazrube xu da zren na' xu'untu', na' bzuantu' na lu da zren da dxedá lawe' nísadau' na'. ¹⁷Ca gudé bulucuené' da dau' na', na' buludée' du zri'a ca' zran da dxedá lawe' nísadau' na' da xeluxru chacha na. Nadxa, lawe' da belezrebe' chaze da dxedá lawe' nísadau' na' lu xuzre' naga nazí le Sirte, na' bululétajé' ladxe' ca' da dxelecá'a be' lu da dxedá lawe' nísadau' na', na' belúe lataj be' na' bzriga na len. ¹⁸Zra xula, lawe' da ne dxácale'e be' bdunu', gulezú lawe' dxeledxú'ungé' xua ca' lu nísadau', da nua da

dxedá lawe' nísadau' na'.¹⁹ Zra guxunne' zra nen ná'quezentu' gudxú'unantu' lu nísadau' da dxuluchínene' chee da dxedá lawe' nísadau' na'.²⁰ Zane' zra quebe blé'entu' gubizra ne belaj ca', ne ca naca be' bđunu' zren na' ne dxuzriga na da dxedá lawe' nísadau' na', na' québedxa guleza lázrentu' láquezentu'.

²¹ Zane' zra gudentu' quebe náguntu', na' guzé Pablo lávela benne' ca', ne gunné':

—Le'e, benne', cháwedxa la guca cheedxu la benle da gucha' le'e, na' quebe bedxúajdxu lu xezr la xu Creta, ne quebe bi guque da dxedá lawe' nísadau' nigá, na' xua' da nua na quebe guzrí xi'.

²² Na'a, quebe guchebe lázrele. Netudxu dxi'u quebe cuía xidxu, lácala cuía xi' da dxedá lawe' nísadau' nigá.²³ Ba dx-ele ble'e lau tu gubáz chee xabáa chee Dios neda'. Naca' chee Dios nigá ne dx-una' zrin chee'.²⁴ Gubáz na' guzre' neda': “Quebe zrebu', Pablo, lawe' da dxun na ba xen zrinu' lau César, na' ne chiu' lue' Dios guselé' lu xel-la' gute xúgute benne' zaj zra' nen lue' lu da dxedá lawe' nísadau' nigá.”²⁵ Chee le na', benne', le gun dipa lázrele, lawe' da dxuxrén lazra' Dios, ne nezda' waca ca gunná gubáz chee xabáa na' bchálajlene' neda'.²⁶ Na'a dxun na ba xen cheajchaze da dxedá lawe' nísadau' nigá tu lu xezr la xu da naxechaj nísadau'.

²⁷ Ca gudé chinu' zra gate naca chizrela, ne zrantu' lu nísadau' nazí le na Adria, na' be' na' dxaca dxuzriga na da dxedá lawe' nísadau' quela ca'ala, na' dxela guleque be'e benne' ca' dxulusá da dxedá lawe' nísadau' na' ba dxezrín na dxu'a xu bizre.²⁸ Na' buludxixre' cáтите situj dxe' nisa na', na' dxe' na galaj esa. Na' xetú chí'idau' gudé buludxixre' da xula, na' dxe' na chinu' ésaze.²⁹ Belezre-be' cheajtá da dxedá lawe' nísadau' na' xiaj, na' buluzale' tapa xia da nácale'e zi'i zran nisa zeaj zranla da dxedá lawe'

nísadau' na', na' gulebeze' chaní dudxuze dxelezrebe'.³⁰ Nadxa benne' ca' dxulusá da dxedá lawe' nísadau' na' guléquene' xelexedxúaje' lu da dxedá lawe' nísadau' na', na' gulezú lawe' dxululétaje' da dau' na' zria lawe' da zren na' dxedá lawe' nísadau', dxelune' ca benne' xuluzáladxa xia da guxru na da dxedá lawe' nísadau' zren na' da zeaj laula na.³¹ Pablo bzenne' benne' dxenná be'e lu wedil-la, ne benne' dxjaque' wedil-la, dxenné':

—Che quebe xelegá'ana benne' caní lu da dxedá lawe' nísadau', quebe lale le'e.

³² Nadxa benne' dxjaque' wedil-la gulechugue' du zri'a da nadxéaj da dau' na', na' belú'e na lataj bexruj na lu nísadau'.

³³ Ca guxaní'sise' bzéajni'i Pablo xúgute benne' ca' dxal-la' xelawe' xeta, gunné':

—Ba zeaj chinu' zra quebe dxásele ne quebe dxágule.³⁴ Dxata' xueda' le'e gágule. Da nigá dxun na ba xen chee lale. Netudxu dxi'u quebe cuía xi' netú xicha xíchajdxu.

³⁵ Ca gunné' caní, Pablo guqué'e tu xeta xtila, na' guzre' Dios: “Xcalenu'”, lau xúgute benne' ca'. Nadxa bzúzruje' na, na' guzú lawe' dxawe'.³⁶ Nadxa xúgute' belún dipa lazre', na' gulezú lau dx-elawe'.³⁷ Cáтите netu' zrantu' lu da dxedá lawe' nísadau' na' nácantu' chupa gaxúa ga xun chinu' tuntu'.³⁸ Ca gudé gulawe' cáтите guléljene', na' buluzale' zrua' xtila lu nísadau' chee bezrá' da dxedá lawe' nísadau' na'.

Dxebía xi' da zren da dxedá lawe' nísadau'

³⁹ Gate guxaní', benne' ca' dxulusá da dxedá lawe' nísadau' na' quebe belexúnbe'e xezr la xu na' da zua na le nna' naga zaj zre'e. Belelé'ene' naga dx-exú'u nísadau' gachaj lávela xezr la xu na', na' dxu'e na' naca lache'. Na' gu-laca lazre' xuluxudé'e da dxedá lawe'

nísadau' laduj na'. ⁴⁰ Gulechugue' du zri'a ca' zaj nacá'a xia ca', ne bulucá'ane' xia ca' lu nísadau'. Gulesezre' du zri'a da nadxéaj ne'e xaga da dxuzechaj na da dxedá lawe' nísadau'. Nadxa gulechise' ladxe' da dxecá'a be' da zeaj lówela da dxedá lawe' nísadau', na' da dxedá lawe' nísadau' na' guzú lau dxebiga na naga naca lache'. ⁴¹ Bzrin na naga dxezraga nisa na' dxupa la'a, na' da dxedá lawe' nísadau' na' guxaze na lu xuzre' da dxe' zran nisa na'. Zeaj lówela da dxedá lawe' nísadau', na' begá'ana na chalásaze lu xuzre' na', ne québedxa gulezéquene' xuluté' na. Da zeaj zranla guzú lau dxuzruj na lawe' da dxeajéle'e xejxruza chee nísadau' na' zran da dxedá lawe' nísadau' na'. ⁴² Benne' dxjaque' wedil-la gulaca lazre' xelúti'e benne' zaj nadxéajé' chee quebe xuluxuzrúnnuje' xelexrúe' lawe' nisa na'. ⁴³ Benne' dxenná be'e lu wedil-la guca lazre' guselé' Pablo, na' quebe be'e lataj benne' dxjaque' wedil-la xelúti'e benne' ca'. Na' gunná bé'ene' benne' ca' dxelaque' dxelexrúe' nisa cheajlexxritie' lu nisa na' chee xelexezrine' lu xu bizre. ⁴⁴ Benne' ca' xezícala, bal-le' gulequé'e blaga', ne xebal-le' gulequé'e blaga' bizruj chee da dxedá lawe' nísadau' na', na' caní guca, xúgute' belexezrine' lu xu bizre.

Da ben Pablo lu xezr la xu na' nazí le na Malta

28 Ca gulá xúgutentú', na' gunézentu' xezr la xu na' da naxechaj nísadau' nazí le na Malta. ² Benne' zaj zre'e na' belúnle'e netu' cháwedau'. Gulebéchele'e xi' lawe' da dxúnle'e zaga, ne dxaca xiuj, na' gulenné' netu' cheajsentu' dxu'a xi' chee xezré'entu'. ³ Nadxa Pablo guqué'e tu xrunu zruze xaga, na' ca dxuzré'e na lu xi', bedxúaj tu belá' da na' dxuzrúnnujba' lu da la na', na' gudagu xa'aba' na' Pablo. ⁴ Gate belelé'e benne'

ca' zaj zre'e lu xezr la xu na', nal-la' belá' na' na' Pablo, na' gulé' ljwezre':

—Benne' nigá naque' wete benne' lawe' da lácala gulé' lu nísadau', quebe dxue lataj dios na' nazí'i le' Xrlátaje gaca ban le'.

⁵ Pablo guzribe' belá' na' lu xi', ne quebe bi gúquene'. ⁶ Xúgute' gulebeze' chee gata' xi' na' Pablo u che'e gatie'. Ca gudé gulebeze' tu chí'i wal-la, ne belelé'ene' quebe bi gúquene', na' buluché'e ca da dxeléquene', ne gulezú lawe' dxelenné' naca Pablo tu dios.

⁷ Gágute naga zrantu' de xezr la xu chee benne' blau chee xezr la xu na', le' Publio. Benne' nigá guzú' lu ne'e netu', ne bxúlele'e netu' cháwedau' lawe' chunna zra. ⁸ Xra Publio deze', quebe chawe' zue', na' xu'e da la, ne dxaque' xízrawe' dxen. Pablo guxíajé' xejjnné'e le', na' ca gudé bchálajlene' Dios, bze ne'e lawe' le', na' bexaque'. ⁹ Gate belenne' da nigá, na' benne' ca' xezícadxa, benne' we' ca' zaj zre'e xezr la xu na', belezrine' lau Pablo, na' belexaque'.

¹⁰ Gulápale'e netu' ba lá'ana, na' ca gudé na', gate ba zua chú'untu' da xula tu lu da dxedá lawe' nísadau', belunne' xúgute da nachínnentu'.

Pablo dxezrine' xezre Roma

¹¹ Ca gudé guca chunna beu' zúantu' lu xezr la xu na', na' bexú'untu' tu lu da dxedá lawe' nísadau' da gudxé' na na' dxácaté naca beu' zaga ca'. Naca na tu da dxedá lawe' nísadau' chee xezre Alejandría, na' luzrgue da dxedá lawe' nísadau' na' zaj da bedáu' chee dios bi lide' ca' zaj le' Cástor ne Pólux. ¹² Bzrintu' dxu'a xezre Siracusa naga begá'anantu' chunna zra. ¹³ Gate beza'ntu' na', na' gudentu' dxu'a xezr la xu na', ne bzrintu' xezre Regio. Zra xula dxaca be' da za' chalá'a naga dxedé gubizra beu' zaga ca', na' zra gudxupe' zra bzrintu' xezre Puteolí. ¹⁴ Lu xezre na' bezrágantu' bal-

la bi bíchedxu, benne' gulenné' netu' lizre' xegá'analentu' le' xrunu' zra, na' ca gudé na' guza'ntu' ní'antu' zéajntu' Roma. ¹⁵ Bi bíchedxu zaj zra' Roma ba belenne' cheentu', na' beledxúaje' xezre na', be-dajlechague' netu' tu xézredau' nazí le na Xi'a Chee Apio, na' xebal-le' belexezrague' netu' tu lataj nazí le na Chunna Xú'udau'. Gate ble'e Pablo bi bíchedxu ca', na' guzre' Dios: "Xcalenu'", ne ben dipa lazre'. ¹⁶ Gate bzrintu' Roma, benne' dxenná be'e lu wedil-la bde'e' benne' zaj nadxéaje' lu na' benne' xíchaje' chee bi xra'aga ca', san be'e lataj Pablo sue' cheeze' nen tu benne' dxéaje' wedil-la, benne' guxúe' le' chee quebe xuzrínnuje'.

Pablo dxuchálaje' chee Jesús lu xezre Roma

¹⁷ Ca gudé chunna zra Pablo gusel-le' benne' xeajnné' benne' judío blau ca' zaj zre'e Roma, na' gate belezrague', guzre' benne' ca':

—Le'e, bi bicha'. Neda' quebe gudábaga' judío ca', ne quebe gudábaga' da xjácale xra xrtáudxu ca', san benne' judío ca' zaj zre'e Jerusalén buludé' neda' lu na' benne' Roma ca'. ¹⁸ Gate benne' Roma zaj zre'e na' buluchebe' neda', gulaca lazre' xulusane' neda' lawe' da quebe belezrelne' bi da be'na' da gun na xelechugue' chia' gatia'. ¹⁹ Judío ca' guledábague', na' ben na ba xen gunaba' neda' zri'a chia' lau César. Quebe nacan chee gawa' zria benne' lázredxu. ²⁰ Chee le na' gunnéa' le'e chee le'eda' le'e, ne guchálajlena' le'e lawe' da naca ne chee da dxebeza lázredxu dxi'u, benne' Israel, zua' nigá nadxéaja' xia.

²¹ Nadxa gulé'e le':

—Netu' quebe bi xiche ne si' lu na'ntu' da za na Judea ca naca chiu' lue', na' netú bi bíchedxu, benne' judío, benne' ba bele'e nigá bezé'e Judea, quebe bi da

calela dxenné' benu'. ²² Dxaca lázrentu' xénetu' ca da dxéquenu' lue' lawe' da nézentu' gáteteze na' dxeleenné' chee benne' ca' dxeléajle'e dizra' cube nigá.

²³ Buluzúe' tu zra gate xelexezrague', na' lu zra na' benne' zan belezrague' naga zua Pablo. Bchálajlene' benne' ca' ca naca xel-la' dxenná bea chee Dios che zílatela guxrínnelete. Be'e' ba xuzre guzéajni'ine' benne' ca' ca naca chee Jesús ne chee da bdxixruj be'e Moisés, ne ne chee da buluzúaj benne' ca' buluchálaje' waláz chee Dios. ²⁴ Bal-le' gulez'e xrtizra' Pablo, san xebal-le' quebe guléajle'e. ²⁵ Quebe beluné' tuze dizra', na' gulezú lawe' dxelexedxúaje'. Nadxa gunná Pablo:

—Da li naca da gunná Be' Lá'azxa, guzre' xra xrtáudxu ca' lu dxu'a Isafas, bénnea' bchalaje' waláz chee Dios, gunné':

²⁶ Guxíaj, xeajezre benne' ca':

Da li wenle le'e san quebe chéajni'ile. Da li walé'ele, ne quebe gueque be'ele.

²⁷ Zaj naca zide' lázxdau benne' caní, ne quebe dxeleenne' chawe'.

Zaj naxeexuj xiaj lawe'

chee quebe xelexé'ene' nen xiaj lawe',

ne quebe xelénene' nen nague',

ne quebe xeléajni'ine' nen lázrdawe',

ne quebe xelexelé'e lawa' neda' chee xex-una' neda' le'.

²⁸ 'Dxal-la' nézele le'e, na'a ne da za za xel-la' weselá chee Dios guchálajlentu' benne' quebe zaj naque' judío, na' benne' ca' xelexé'e na.

²⁹ Gate gunná Pablo da nigá, na' be-siá'aca judío ca', dxuluchébele'e ljwezre'.

³⁰ Pablo guzúe' chupa iza lu xu'u da dxízruje', ne dxez' lu ne'e xúgute benne' dxedajlenné'e le'. ³¹ Du lazre' bchálaje' ca naca xel-la' dxenná bea chee Dios, ne bsédené' ca naca chee Xránadxu Jesucristo, na' netú quebe nu blale' le'.

DA BZUAJ SAN PABLO CHEE BI CHEE CRISTO ZAJ ZRABE' XEZRE ROMA

Pablo dxugape' diuzre bi chee Cristo zaj zrab'e Roma

1 Neda', Pablo, naca' wen zrin chee Jesucristo. Dios bláwizre' neda' chee gaca' gubáz chee', ne guqué'e neda' chee guzenda' bēnneache dizra' chawe' chee'.

²Dios guchebe lazre' sel-le' dizra' chawe' nigá gate nate lu dizra' lá'azxa chee' lu na' benne' ca' buluchálaje' waláz chee'. ³Dizra' chawe' nigá dxulé'e na ca naca chee Xránadxu Jesucristo, Zri'ine Dios. Lu bela' dxen chee' naque' zri'ine zre sua wenná bea David. ⁴Lu be' nácaqueze' da naca na lá'azxa, naque' Zri'ine Dios. Dios blé'ene' naca caní gate bsebané' Le' ládujla benne' gate ne chee xel-la waca chee'. ⁵Ne chee Zri'ine' Dios nunne' netu' lataj nácantu' gubáz chee' chee xelezrá' benne' ládujla xúgute cue' xezr la xu, benne' xeleajlí lazre' Cristo, ne xuluzúe' dizra' chee' chee gaca ba La Le'. ⁶Ládujla benne' caní zrale le'e chee gácale bi chee Jesucristo.

⁷Dxuzúaja' chee xúgutele le'e dxéajlele chee Cristo, zrale xezre Roma. Dios nazrí'ine' le'e, ne bláwizre' le'e chee gácale bi cheéqueze'. Dxenaba' Xradxu Dios, ne Xránadxu Jesucristo guné' chawe' chee, ne gunne' le'e xel-la dxebeza zri lazre'.

Pablo dxaca lazre' chéaje' xezre Roma

⁸Da naca blaudxa, ne chee Jesucristo dxapa' Dios chia' xcalene' ca naca chee xúgutele lawe' da dxezralaj ca dxeajlí lázrele Cristo du gabí'i xezr la xu. ⁹Duté lázrdawa' dxuna' zrin chee Dios, dxuzenda' bēnneache dizra' chawe' chee Zri'ine'. Le' nézquezne' dxeajsá lázrqueza' le'e gate dxuchálajlena' Le'. ¹⁰Dxata'

xúeda' Dios, che naca da dxaca lazre' Le', chee ájala gunne' neda' lataj xedajnná'a le'e ¹¹lawe' da dxaca lazra' le'eda' le'e ne gunna' le'e lataj sí'le da naca chee Be' Lá'azxa, chee se cháchadxale. ¹²Caní gutipa lázredxu tudxu xetudxu lu xel-la dxeajlí lazre' cheedxu.

¹³Bi bícha'dau', dxaca lazra' nézele zane' lasa guca lazra' xida' xedajnná'a le'e, san dxácate ca' dxecuasa na. Dxaca lázrele'a xida' chee guna' zrin gusédeda' da naca chee Cristo ládujla le'e, cáteze ba bena' ládujla xezícadxa bēnneache zaj zre'e lu xezr la xu nigá. ¹⁴Nabaga' guna' zrin caní ládujla xúgute bēnneache, che zaj naque' benne' blau u ca zaj naque', u che zaj naque' benne' zaj naxéajni' i u ca zaj naque'. ¹⁵Chee le na', neda' ba zúaqueza' guzenda' le'e zrale xezre Roma dizra' chawe' chee Cristo.

Xel-la waca chee dizra' chawe' chee Cristo

¹⁶Quebe dxedué'eda' chee dizra' chawe' chee Cristo lawe' da napa na xel-la waca chee Dios chee guselá na xúgute benne' dxeajlí lazre' le na, nédxula benne' judío ca', san cá'aqueze benne' quebe zaj naque' judío. ¹⁷Dizra' chawe' nigá dxulé'e na dxí'u nagá'anadxu chawe' lau Dios che dxeajlí lázredxu le na, chee cheajlí lázredxu Le' ca naxúaj na lu dizra' lá'azxa, da dxenná na: Benne' nagá'ane' chawe' lau Dios gata' chee' xel-la nabán li lazre' che dxeajlí lazre' Le'.

Dul-la da zaj nabaga bēnneache

¹⁸Ba ble'e Dios lu xabáa chee' ca guné', gudée' xel-la zi' xúgute benne' dxuluzúe' chalá'ala Dios, ne benne' wen da calela, benne' dxuluzague' da li ne chee da calela da dxelune'. ¹⁹Zaj nézquezne' ca gaca xelúnbea bēnneache da naca chee Dios lawe' da Léqueze Dios na' bache blé'ene' na zaca ba lau. ²⁰Da quebe gaca

lé'edxu chee Dios gaca gúnbeadxu na ne chee da ca' da ben Dios. Gate bente' xezr la xu dxunna bea na nácaqueze Dios, ne nápaqueze' xel-la waca. Chee le na' quebe bi de xuludé'ene'. ²¹Lácala zaj núnbe'e ca naca Dios, quebe ne xelape' Le' ba lá'ana ca Dios, ne quebe ne xel'é'e Le'; Xcalenu', san dxuludé' lazre' da níteze, na' gulechul-la xichaj lázrdawe' lawe' da zaj naque' benne' zide'. ²²Lácala dxeléquene' zaj naxéajni'ine', da li zaj naque' benne' xala, ²³lawe' da buluzúe' chalá'ala Dios xabáa, Bénnea' quebe dxedé' chee', ne dxelúe lá'ane' bedáu' xiaj xaga zaj naca na lu'a bèneache dxelate, ne lu'a bea ca' zaj zua xrila, ne lu'a be snia, ne lu'a be xixre' be zria tapa ni'a na'ba'.

²⁴Chee le na' Dios ba guleaj xíchaj'e benne' ca' chee xeluné' xúguté da sban da dxelezá lazre', na' bulucá'ana ditaj cuine' tue' xetue', ²⁵lawe' da buluzúe' chalá'ala xel-la li chee Dios, na' gulez' lu ne'e da wen lazre', ne belúe lá'ane', ne belecá'ana szrene' da ca' nun Dios, ne quegá Diosqueze, Bénnea' dxal-la' güe lá'anaquezdxu. ¡Ca'an gaca na!

²⁶Chee le na' Dios ba guleaj xíchaj'e benne' ca' chee xeluné' da dxelezá lazre' da ca' xedué'edxu. Cá'anqueze nu'ula buluzúe' chalá'ala xel-la zúale benne' chee', ne dxeluné' da quebe zaj naca chee' xeluné'. ²⁷Cá'anqueze belún benne' biu, buluzúe' chalá'ala xel-la zúale zru'ule', ne dxeluné' da sban da dxelezá lazre' tue' xetue', ne dxeluné' da ca' xedué'edxu tue' xetue', na' dxeledé'e' xel-la zi' lu bel-la' dxen chee' ne chee' da sban da dxeluné'.

²⁸Lawe' da québedxa gulaca lazre' xelexúnbe'e Dios, Le' guleaj xíchaj'e benne' ca' chee xuludé' lazre' da caléla, ne chee' xeluné' da quebe dxal-la' xeluné'.

²⁹Dxeluné' xúguté da caléla. Dxulucá'ana ditjé' bèneache. Dxeluné' da quebe naca xrlátaje. Zaj naque' benne' wecude'.

Dxeluné' da zrinnaj.

Zaj naque' benne' xa lazre'.

Dxelutie' benne'.

Dxelílaje' da ba xa'.

Dxelezí xe'e.

Dxeledanne' da xálaze.

Dxuluchálaje' dizra' bizruj.

³⁰Dxelenné' schanni' chee ljwezre'.

Dxelecuídene' Dios.

Zaj naque' benne' wenne' wal-la.

Dxulucá'ana szren cuine'.

Zaj naque' benne' wezé cua.

Dxelalaj lazre' bícala da sban.

Quebe dxuluzúe' dizra' chee xra xrne'e.

³¹Zaj naque' benne' lázrdau zide'.

Dxulunitie' xrtizre'.

Quebe zaj naque' zri'i lazre'.

Quebe dxulunite lawe' chee ljwezre'.

Quebe dxelexache lazre' chee ljwezre'.

³²Zaj nézene' Dios guzría xi'e bèneache,

na' benne' dxeluné' da caní dxal-la' xelátie'.

Benne' caní tu dxelúnzqueze' na, ne dxelexezaca ba lazre' nen benne' dxeluné' da caníqueze.

Dios dxuchi'e chee bèneache cáteze da zaj nune'

2 Chee le na' québedxa bi de da gudé'enu', lue' dxuchi'u da dxun benne' xula, níteteze nacu'. Gate dxuchi'u da dxun benne' xula, na' dxule'enu' nabagu' zria, lawe' da dxuchi'u da dxun benne' xula, ne cá'anqueze dxunu' lue'. ²Nézquezdxu dxuchi'a Dios cáteze da naca na gate dxenné' zaj nabaga zria benne' ca' dxelún da caní. ³¿Dxéquenu' lue' wadé gun ca'aze chiu' gate Dios nne' zaj nabaga zria bèneache, lue' na' dxennáu' zaj nabaga zria benne' dxelún da caní, ne cá'anqueze dxunu' lue'? ⁴¿Dxuzú' chalá'ala xel-la zri'i lazre', ne xel-la zren lazre' zren chee Dios, ne quebe nézenu' lu xel-la zri'i lazre' chee' dxunne' lue' lataj xebi'i

lazru'? ⁵Nacu' lázrdau zide', ne quebe dxexebí'i lazru'. Chee le na' dxuzanu' da si sacu' lu zra na' gate Dios nne' zaj nabaga zria benne' ca' dxeluné' da calela. Naca xrlátaje guné' da caní. ⁶Lu zra na' gunné' ca da dxal-la' si' tu tudxu cáteze naca da bendxu. ⁷Xel-la nabán zeajlí canna gunna Le' xúgute benne' dxelaca lazre' xelez'e lu na' Dios da xabáa, ne xel-la ba l'ána, ne da zaj naca na da chadía chacanna ne chee da chawe' da tu dxelúnzqueze'. ⁸Lu xel-la dxezrá'a chee' nne' zaj nabaga zria xúgute benne' zre'e lazre' ca', benne' quebe dxuluzúe' dizra' da li, san dxuluzúe' dizra' da wen lazre'. ⁹Gusaca zi'e, ne gudée' lu da ba xa' xúgute benne' dxeluné' da calela. Ga su lau guné' caní chee benne' judío ca', ne cá'anqueze guné' chee benne' quebe zaj naque' judío. ¹⁰Da xabáa, ne da ba l'ána, ne xel-la dxebeza zri lazre' gunné' xúgute benne' dxeluné' da chawe'. Ga su lau guné' caní chee benne' judío ca', ne cá'anqueze guné' chee benne' quebe zaj naque' judío.

¹¹Dios tuze ca dxuchi'e da dxelún xúgute bénneache, ¹²na' benne' dxeluné' dul-la, ne quebe zaj núnbe'e da bdxixruj be'e Moisés welebía xi'e lácala quebe belúnbe'e da nadxixruj bea na, na' benne' dxeluné' dul-la lácala zaj núnbe'e da bdxixruj be'e Moisés welebía xi'e ne chee da nadxixruj bea na na'. ¹³Quebe zaj nagá'ana chawe' lau Dios benne' dxelénzene' da nadxixruj bea na, san zaj nagá'ana chawe' lau Dios benne' dxuluzúe' dizra' da nadxixruj bea na. ¹⁴Benne' zitu' ca', benne' quebe zaj núnbe'e da bdxixruj be'e Moisés, gate dxeluné' ca dxenná da nadxixruj bea na na', lácala quebe zaj núnbe'e da nadxixruj bea na, naca chee' cáteze zua da nadxixruj bea na lu xichaj lázrdawe'. ¹⁵Caní naquen lawe' da ca dxeluné' dxulé'e na zua xichaj lázrdawe' ca naca da nadxixruj bea na, na' naca

na ca naca da bdxixruj be'e Moisés. Xichaj lázrdawe' dxunna bea na chee da nigá, na' da dxelegú'u lazre' guzría xi na le', u xecá'a na le' ¹⁶lu zra na' gate Dios guchi'e xúgute da nagache' chee xúgute bénneache lu na' Jesucristo cáteze dxenná dizra' chawe' na' da dxuzenda' bénneache.

Ca naca chee benne' judío ca' ne da bdxixruj be'e Moisés

¹⁷Dxennáu' nacu' judío, ne dxen-né'entu' da bdxixruj be'e Moisés, ne dxucá'ana szren cuinu' lawe' da núnbe'u Dios chiu'. ¹⁸Nézentu' da dxaca lazre' Dios, na' da gunná bé'ene' dxulé'e na lue' gunu' da nácadxa chawe'. ¹⁹Dxuxrén lazru' cuinu' waca gulé'enu' ca da xelún benne' zaj naque' ca lo chulla, ne guseni'u benne' zaj zra' lu da chul-la. ²⁰Dxéquenu' waca guzéajni'inu' benne' quebe zaj naxéajni'e, ne gusé-denu' benne' quebe ne cheajni'e lawe' da naca da nadxixruj bea na da napu' tu da dxulé'e na dxi'u chee gúnbeadxu da li. ²¹Lue' dxusé'denu' benne' xula. ¿Bizr chee na' quebe dxusé'de cuinu'? Lue' dxuzennu' benne' quebe dxal-la' cuandxu. ¿Bizr chee na' dxebanu' lue'? ²²Lue' dxennáu' quebe dxal-la' súaledxu zru'ula benne' xula. ¿Bizr chee na' dxunu' lue' ca'? Lue' dxecuídenu' bedáu' xiaj xaga. ¿Bizr chee na' dxebanu' lue' da gunná da de lu xudau' ca' chee bedáu' xiaj xaga ca'? ²³Dxucá'ana szren cuinu' lawe' da núnbe'u da nadxixruj bea na, san dxucá'ana ditju' Dios lawe' da quebe dxunu' lue' ca da dxenná bea da nadxixruj bea na. ²⁴Naxúaj lu dizra' l'ázaxa da dxenná na: Benne' quebe zaj naque' judío dxelen-né' schanni' chee Dios ne chee da calela da dxunle le'e.

²⁵Da li da nadxugu lu bēla' chiu' da dxulé'e na nacu' bi chee Dios, naca na tu da chawe' che dxunu' ca da dxenná bea da bdxixruj be'e Moisés, san che quebe

dxunu' ca dxenná na, nacu' ca tu benne' quebe nadxugu lu belá' chee' da na' dxul'é na. ²⁶Che benne' quebe nadxugu lu belá' chee' dxuné' ca nadxiruj bea na, naque' ca tu benne' nadxúguqueze lu belá' chee' da na', lácala quebe naca caní chee'. ²⁷Benne' quebe nadxugu lu belá' chee' da na' dxulé'e na, san dxuné' da nadxiruj bea na, da na' dxuné' dxulé'e na nabagu' zria lue', lawe' da quebe dxunu' da dxenná bea da nadxiruj bea na, lácala zua lu na'u da nadxiruj bea na, ne nadxugu lu belá' chiu' da na'. ²⁸Quebe naca xanne' judío bénnea' naque' caní cúzreze, ne quebe naca xanne' da nadxugu na lu belá' chee' benne' da naca na cúzreze, lu belá'ze. ²⁹Benne' naca xánne' judío naque' bénnea' naque' judío lu xichaj lázrdawé', ne da naca xanne' da nadxugu lu belá' chee' benne' naca na da zua na lázrdawé'. Quebe nácaqueze na nen dízra'ze san naca na chee' be' chee'. Benne' caní dxelezi'e xel-la ba lá'ana, quegá chee' bénneache, san chee' Dios.

3 ¿Bizra da ba neza naca na chee' benne' lawe' da nadxugu lu belá' chee' da na' dxulé'e na? ²Nácale'e na, ne zánete ca naca na. Da nédxute, Dios bdee' dizra' chee' lu na' benne' judío ca'. ³¿Bizra xca'? Che bal-la benne' judío ca' quebe zaj naque' li lazre', ¿nnadxu chee' da na' quebe naca Dios li lazre'? ⁴¡Cabata! Dios dxúnqueze' ca naca da li lácala xúgute' bénneache zaj naque' wen lazre', lawe' da naxúaj lu dizra' lá'azxa da dxenná Dios. Dxenné': Nacu' xrlátaje ca da dxennáu', na' wegá'anaquezu' xrlátaje gate xuluchí'e ca da dxunu'.

⁵Che da calela da dxundxu dxulé'e na naca Dios xrlátaje, ¿Bízraqueze nnadxu? (Dxuchálaja' ca da dxuluchalaj bénneache.) ¿Naca Dios benne' quebe naca xrlátaje lawe' da dxudé' dxi'u xel-la zi'? ⁶¡Cabata! Chela naca Dios Benne' quebe

dxun da xrlátaje, ¿ájazra guné' guchi'e ca da dxelún bénneache?

⁷Che da wen lazre' da dxuna' gun na chee' xegá'ana zrendxa da li da dxun Dios, ¿bizr chee' na' dxuchi'e chia' neda', dxenné' naca' benne' dul-la? ⁸Che naca na caní, ¿bizr chee' na' quebe gundxu da calela chee' gulé'e laudxa da xrlátaje? Da nigá naca na da dxelenná bal-la benne' dxundxu, benne' ca' dxelún da calela, ne dxelenné' schanni' cheedxu. Xrlátaje naca Dios nne' zaj nabaga zria benne' caní.

Xúgutedxu nabágadxu dul-la

⁹¿Bizra xca'? Dxi'u, benne' judío, ¿nácadxadxu xrlátaje ca xezícadxa benne' ca'? ¡Cabata! Bache blé'entu' zaj nabaga dul-la benne' judío, ne cá'anqueze xezícadxa benne' ca'. ¹⁰Naxúaj lu xiche lá'azxa da dxenná na:

Quebe nu chilá' benne' xrlátaje, netú gue'.

¹¹Quebe nu chilá' benne' dxéajni'ine'.

Quebe nu chilá' benne' dxexílaje' Dios.

¹²Xúgute' dxeledé' calela. Xúgute' zaj nanítie'.

Quebe nu chilá' benne' dxuné' da xrlátaje, netú gue'.

¹³Da dxelenné'queze' naca na ca tu da sgute, ca tu ba da naxálajze.

Nen luzre' ca' dxelezí x'e'e.

Xrtizre' zaj naca na ca nisa snia chee' belá' da dxe na zran lázxabá'.

¹⁴Tu dxelenné'zqueze' dizra' schanni', ne dizra' zi'.

¹⁵Chadite' dxelútié' bénneache.

¹⁶Gáteteze dxeledé' dxuluzría xi'e, ne dxulusaca zi'e.

¹⁷Quebe zaj nézene' ájala xelebeza zri lazre'.

¹⁸Quebe dxelezrebe' Dios.

¹⁹NezdXu xúgute' ca da dxenná da nadxiruj bea gula na' da bzuj Moisés, dxé na benne' ca' zaj xu'e lu na' da nadxiruj bea na na', chee' xelezúa zri xúgute',

ne chee xelxúnbea xúgute bénneache zaj nabague' zria lau Dios. ²⁰ Netú benne' quebe xegá'ane' xrlátaje lau Dios lawe' da nune' da dxenná bea da nadxixruj bea na, lawe' da dxulé'eze da nadxixruj bea na dxi'u nácadxu benne' dul-la.

Xelélé bénneache che xeléajle'e chee Cristo

²¹ Na'a, dxunna bea na ca gaca xegá'anadxu xrlátaje lau Dios, da quebe naca na ne chee da nadxixruj bea na, lácala lu da nadxixruj bea na, ne lu da buluzúaj benne' ca' gulenné' waláz chee Dios dxuluchalaj na ca naca chee da nigá. ²² Nagá'anadxu xrlátaje lau Dios caní che dxeajlí lázredxu Jesucristo, ne cá'anqueze gaca chee xúgute bénneache xeleajlí lazre' Le'. Tuz ca naca chee bénneache ²³ lawe' da zaj nun xúgute bénneache dul-la, ne quebe zaj naca chee' xelxú'e lu xabáa chee Dios. ²⁴ Lu da chawe' chee Dios, cá'aze nune' chee xegá'anadxu xrlátaje lau Le' lawe' da bexa'u Jesucristo dxi'u lu dul-la da nabágadxu. ²⁵ Dios bzue' Jesucristo gutie' ne chee xtúl-ladxu chee xegá'anadxu xrlátaje lau Le' che dxeajlí lázredxu da ben Le'. Da nigá guca na chee ble'e Dios naque' xrlátaje lácala lu xel-la zren lazre' chee' bdee' cá'aze ca naca dul-la da bendxu nédxute. ²⁶ Gúcaqueze da nigá chee gulé'e lawe' naca Dios xrlátaje na'a, ne gácaqueze' xrlátaje gate gucá'ane' xrlátaje benne' ca' dxeajlí lazre' Jesús.

²⁷ Na'a, ¿waca gucá'ana szren cuí-nadxu? ¡Cabata! ¿Bizr chee na? Naca na lawe' da nagá'anadxu xrlátaje, quegá lawe' da bendxu ca nadxixruj bea na, san lawe' da guxeajlí lázredxu Cristo. ²⁸ Ca'an naca, dxunna bea na nagá'ana xrlátaje tu benne' lau Dios lawe' da dxeajlí lazre' Cristo, ne quegá lawe' da nune' ca da nadxixruj bea na.

²⁹ ¿Naca Dios cheeze benne' judío ca'? ¿Quegá nácaqueze' Dios chee benne' ca' quebe zaj naque' judío? Da li nácaqueze' Dios chee benne' ca' ³⁰ lawe' da zua tuze Dios, na' Le' gucá'ane' xrlátaje benne' ca' zaj nadxugu lu belá' chee' da na' dxunna bea na che dxeajlí lazre' Cristo, ne cá'anqueze gucá'ane' xrlátaje benne' ca' quebe zaj nadxugu lu belá' chee' da na', che dxeajlí lazre' Cristo. ³¹ Na'a che dxucá'ana Dios xrlátaje benne' dx-eajlí lázreze', ¿naca da nadxixruj bea na tu da québedxa zaca? ¡Cabata! Che dxéajledxu chee Cristo dxúnquezdxu ca dxenná da nadxixruj bea na.

Da dxulé'e da guca chee Abraham

4 ¿Bízraqueze nnadxu chee da ba neza da guca na chee xra xrtáudxu Abraham? ² Che Abraham bega'ane' xrlátaje lau Dios ne chee tu da bene', waca gucá'ana szren cuine' san quegá lau Dios. ³ ¿Bízraqueze naxúaj na lu dizra' lá'azxa? Dxenná na: Abraham guxeajlí lazre' Dios, na' Dios guzú' lu ne'e le' ca tu benne' xrlátaje. ⁴ Che nu benne' dx-une' zrin, lazruj da si'e quebe naca na tu da dxunézrujzedxu, san naca na tu da nabágaquezdxu chee'. ⁵ Che nu benne' quebe bi nune', san dxeajlí lázreze' Dios, Bénnea' dxucá'ane' xrlátaje benne' dul-la, nacan lawe' da dxezí' lu na' Dios xel-la dxeajlí lazre' chee' chee xuca'ane' le' xrlátaje. ⁶ Cá'anqueze bchalaj David ca naca chee benne' naca da ba neza chee' lawe' da dxucá'ana Dios le' xrlátaje lácala quebe bi nune' chee xegá'ane' xrlátaje. ⁷ Gunná David:

Ba neza zrente naca na chee benne' ca' ba bunite lau Dios chee' da zrinnaj da zaj nune',
ne gudé'e' cá'aze dul-la da belún benne' ca'.

⁸ Ba neza zrente naca na chee benne' ca' quebe dxusebaga Xránadxu le' dul-la da belune'.

⁹ ¿Naca ba neza nigá cheeze benne' ca' zaj nadxugu lu belá' chee' da na' dxul'é na, u che nácaqueze na chee' benne' ca' quebe zaj nadxugu lu belá' chee' da na'? Bache bl'éntu' bca'ana Dios Abraham xrlátaje lawe' da guxeajlí lazre' Le'. ¹⁰ ¿Bátazra bca'ane' le' xrlátaje? ¿Guca na ca gudé gudxugu lu belá' chee' Abraham da na' dxul'é na, u che nédxula? Quebe guca na ca gudé na', san nédxula guca na. ¹¹ Gudxugu da na' lu belá' chee' Abraham ca tu da dxunna bea na chee' gul'é na nagá'ane' xrlátaje lau Dios lawe' da guxeajlí lazre' Dios gate na' quebe ne chugu da na' lu belá' chee'. Ca'an guca, naca Abraham xra xúgute benne' dxeleajlí lazre' Dios, ne quebe zaj nadxugu da na' lu belá' chee'. Cá'anqueze dxucá'ana Dios le' xrlátaje lawe' da dxeleajlí lazre' Le'. ¹² Da li naca Abraham xra benne' ca' zaj nadxugu da na' lu belá' chee', na' cá'anqueze dxeleajlí lazre' Dios ca ben xradxu Abraham gate na' quebe ne chugu lu belá' chee' da na'.

Dxezidxu da guchebe lazre' Dios che dxeajlí lázredxu Cristo

¹³ Dios guchebe lazre' chee' Abraham, ne chee' zri'ine zre su'e' gaca chee' benne' ca' xezr la xu nigá. Quebe guchebe lazre' na chee' lawe' da nun'e' ca dxenná bea da nadxixruj bea na, san lawe' da bega'ane' xrlátaje lau Dios gate guxeajlí lazre' Le'. ¹⁴ Che xezr la xu nigá gaca na tuze chee' benne' ca' dxelune' ca da dxenná bea da nadxixruj bea na, dácheze nagá'ana xel-la dxeajlí lazre', ne québedxa zaca da guchebe lazre' Dios. ¹⁵ Lu da nadxixruj bea na xelebía xi' bënneache, san naga quebe ne zrin da nadxixruj bea na, quebe bi zaj nabaga bënneache chee' da nadxixruj bea na na'.

¹⁶ Ca' naca na, dxezí' lu nnadxu da guchebe lazre' Dios ne chee' xel-la dxeajlí lazre' chee'dxu Le', chee' gaca na tu da

sidxu cá'aze, ne chee' gaca na tu da súde-queze chee' xúgute zri'ine zre sua Abraham. Ca' naca na, quegá naca na cheeze benne' ca' dxelune' ca da nadxixruj bea na, san cá'anqueze naca na chee' benne' ca' dxeleajlí lazre' Dios ca ben Abraham. Ca' naca na, le' naque' xra xúgute dxu ¹⁷ lau Dios, Bënnea' guxeajlí lazre' Abraham Le'. Naca na ca da naxúaj na lu dizra' lá'azxa, dxenná na:

Nuna' lue' xra bënneache zánete cue' xezr la xu.

Dios na' dxu'e' xel-la nabán chee' benne' ca' zaj nate, ne dxuchálaje' chee' da quebe ne sua ca dxuchálaje' chee' da ba zua.

¹⁸ Abraham guxeajlí lazre' Dios, ne guleza lazre' si'e' da guchebe lazre' Dios, lácala ba gudé chee' si'e' da dxebeza lazre'. Ca'an guca, guque' xra bënneache zánete cue' xezr la xu cáteze ba guzre Dios le', gunné': "Canite chan zri'ine zre su'." ¹⁹ Abraham ba zue' ca tu gaxúa iza, san quebe gute ni'a ne'e' lu xel-la dxeajlí lazre' chee' gate xeajsá lazre' zaj naque' ca benne' ba zaj nate, le' ne zru'ule' Sara, ne naca Sara nu'ula wizre. ²⁰ Quebe ben chupa lazre', san bxren lazre' da guchebe lazre' Dios chee', na' gudápadxe' xel-la dxeajlí lazre', ne bxren lázredxe'. Bca'ana szrene' Dios, ²¹ ne bëntequeze' neza napa Dios xel-la waca gune' xúgute ca da guchebe lazre'. ²² Chee' le' na' Dios guz' lu ne'e' xel-la dxeajlí lazre' chee' chee' bca'ane' le' xrlátaje.

²³ Gate dxenná na: "Dios guz' lu ne'e' xel-la dxeajlí lazre' chee'", quebe guxuaj na chee' tuze Abraham ²⁴ san cá'anqueze chee'dxu dxi'u lawe' da si' lu na' Dios xel-la dxeajlí lazre' chee'dxu che dxeajlí lázredxu Bënnea' bseban'e' Xránadxu Jesus Bënnea' bde Dios Le' chee' gutie' ne chee' dul-la da nabágadxu dxi'u, ne bseban'e' Le' chee' xegá'anadxu xrlátaje lau Dios.

Da naca cheedxu lawe' da nagá'anadxu xrlátaje lau Dios

5 Che nagá'anadxu xrlátaje lau Dios lawe' da dxeajlí lázredxu Cristo zúadxu xrlátaje nen Dios ne chee Xránadxu Jesucristo. ²Cá'anqueze lawe' da dxeajlí lázredxu Cristo, ne chee Le' dx-ezidxu da xrlátaje chee Dios da tu dx-eajlézquezdxu, ne dxebéle'edxu lawe' da dxebeza lázredxu sidxu da xabáa chee Dios. ³Quegaze da nigá, san cá'anqueze dxebéle'edxu gate dxededxu xel-la zi', lawe' da nézedxu xel-la zi' da dxededxu dxun na dxi'u zren lazre', ⁴na' xel-la zren lazre' dxucá'ana na dxi'u xrlátaje lau Dios, na' gate nagá'anadxu xrlátaje dxebeza lázredxu. ⁵Quebe naca tu da dácheze da na' dxebeza lázredxu lawe' da ba nuzúa Dios lu lázrdaudxu xel-la zri'i lazre' chee' ne chee Be' Lá'azxa, Bénnea' ba nunna Dios dxi'u.

⁶Gate na' quebe guzéquedxu guselá cuínadxu, lu zra blé'eezeze Dios, gute Cristo waláz chee benne' wen da zrin-naj ca'. ⁷Stébele'e naca che nu benne' gatie' waláz chee tu benne' xrlátaje, lálcala wexázrelja tu benne' gatie' waláz chee tu benne' naque' dute li lazre'. ⁸Dios dxulé'ene' dxi'u ca nazrí'ile'ene' dxi'u lawe' da gute Cristo waláz cheedxu gate ne nácadxu benne' dul-la. ⁹Na'a nagá'anadxu xrlátaje lau Dios lawe' da gute Cristo waláz cheedxu, ne ba nácaqueze cheedxu ladxu ne chee Le' lu da zi' da xa', da za za' lu zra ni'. ¹⁰Gate na' ne dxecuídedxu Dios, Le' bexune' dxi'u tuze nen Le' lawe' da gute Cristo waláz cheedxu, na' na'a lawe' da nácadxu tuze nen Dios ba nácaqueze cheedxu ladxu ne chee xel-la nabán chee Cristo da zúale na dxi'u. ¹¹Quegá tuze da nigá, san cá'anqueze dxebéle'edxu lu da naca chee Dios ne chee Xránadxu Jesucristo, ne ne chee Le' nácadxu tuze nen Dios.

Da nun Adán, na' da nun Cristo

¹²Ca guca, guxú'u dul-la lu xezr la xu nigá ne chee da ben tuze benne', na' bla' xel-la gute ne chee dul-la, ca'an guca gulú'u bèneache lu na' xel-la gute lawe' da zaj nun xúgute' dul-la. ¹³Nédxula ca bla' da nadxixruj bea na, ba zaj nun bèneache dul-la lu xezr la xu nigá, lálcala quebe dxusebaga Dios bèneache dul-la gate quebe ne zrin da nadxixruj bea na. ¹⁴Ca guzú lau lu zra zua Adán ca bzrin zra zua Moisés, gulú'u bèneache lu na' xel-la gute, benne' ca' zaj nune' dul-la, lálcala quebe belune' dul-la ca da ben Adán, bènea' gudichje' da gunná be'e Dios, na' Adán na' naque' tu da dxulé'eze na ca naca Bénnea' dxal-la' xide', Le' Cristo.

¹⁵Da zrinna' da ben Adán quebe gaca dí'l-lalébe na ca da dxunna Dios dxi'u. Ne chee da zrinna' da ben tuze benne', gu-late benne' zante, san xel-la weselá da nunna Dios dxi'u cá'aze ne chee xetuze benne', Jesucristo, naca na da zréndx-aqueze, ne naca na da ba neza chee benne' zante. ¹⁶Da zrinna' na' da ben tuze benne' quebe gaca dí'l-lalébe na ca da dxunna Dios dxi'u lawe' da ne chee tuze da zrinna', zaj nabaga zria bèneache, san da dxunna Dios dxi'u naca na chee xelexegá'ana xrlátaje benne' zante benne' zaj nune' da zrinna'. ¹⁷Ne chee da zrinna' da ben tuze benne' gulú'u bèneache lu na' xel-la gute, na' benne' ca' zaj nazí' lu ne'e da dxunna Dios cá'aze, ne zaj nagá'ane' xrlátaje lau Le' ba zaj nalé' lu na' dul-la, ne dxelezéquene' xelenná be'e cuine' lu xel-la nabán chee ne chee da nun xetuze benne', Jesucristo.

¹⁸Ca guca zaj nabaga zria xúgute bèneache ne chee da zrinna' da ben tuze benne', Adán, cá'anqueze ne chee da xrlátaje da ben xetuze benne', Jesucristo, belexexaca bèneache xrlátaje chee xelaca bané'. ¹⁹Ca guca belex-

exaca bénneache zantę benne' dul-la lawe' da quebe bzua dizra' tuze benne', cá'anqueze lawe' da bzua dizra' xetuze benne', xelexegá'ana benne' zantę xrlátaje lau Dios.

²⁰ Bzua Dios da nadxiruj bea na chee gunná béadxna da na naca dul-la, na' gate dul-la guxánle'e na, ca' guzrendxa xel-la zri'i lazre' chee Dios. ²¹ Ca naca zua lu na' dul-la gute na bénneache, cá'anqueze zua lu na' xel-la zri'i lazre' chee Dios gucá'ana na dxi'u xrlátaje lau Dios chee gaca bandxu chadía chacanna ne chee Xránadxu Jesucristo.

**Nácadxu ca benne' gate ca' chee
québedxa gundxu dul-la,
na' naca bandxu nen Cristo**

6 ¿Bízraqueze nnadxu? ¿Gúndxadxu dul-la chee gulé'e lówedxa xel-la zri'i lazre' chee Dios? ² ¡Cabata! Ba nácadxu ca benne' gate chee québedxa gundxu dul-la. ¿Ájazra gúndxadxu dul-la? ³ ¿Quebe nézele le'e, xúgutedxu dxi'u ba nadxúadxu nisa chee gácadxu tuze nen Jesucristo, naca na ca ba nátedxu tu zren nen Le' lu da nadxúadxu nisa? ⁴ Ca' naca na, ne chee da nadxúadxu nisa naca ca bgáchedxu tu zren nen Le', ne nátedxu chee xebandxu, ne súadxu tu lu xel-la nabán cube cáteze guca chee Cristo, bebane' ládujla benne' gate ne chee xel-la waca xabáa chee Xre'.

⁵ Che gúcadxu tuze nen Cristo lu xel-la gute, cá'anqueze gácadxu tuze nen Le' lu xel-la dxexebán chee'. ⁶ NezdXu da gúcadxu gate nate ba gudá na le'e xaga béguaj tu zren nen Le' chee cuía xi' benne' dul-la da gúcadxu chee québedxa gundxu zrin chee dul-la ca benne' zaj nada'u chee. ⁷ Tu benne' ba nate, ba bedxúaję' lu na' dul-la. ⁸ Che ba gútedxu tu zren nen Cristo, dxuxrén lázredxu gaca bánquezdxu tu zren nen Le' ⁹ lawe' da nezdXu quebe gate Cristo da xula lawe' da ba bebane' lá-

dujla benne' gate, na' québedxa xu'e lu na' xel-la gute. ¹⁰ Gate gute Cristo, tu lásaze gutię' ne chee dul-la waláz chee xúgutedxú bénneache, san na'a naca banę', na' lu na' Dios naca banę'. ¹¹ Cá'anqueze le'e, le gueque nácale benne' gate chee québedxa gunle dul-la, san naca banle lu na' Dios tu zren nen Xránadxu Jesucristo.

¹² Chee le na' québedxa güele lataj nna be'e dul-la beła' dxen chee le da dxal-la' gate, chee québedxa gun na gunle da dxezá lazre' beła' dxen chee le. ¹³ Quebe guzúa cuínale lu na' dul-la chee guchine na le'e lu da caleła, san le guzúa cuínale lu na' Dios, gácale ca benne' belexebán ládujla benne' gate, chee guchínene' le'e lu da xrlátaje. ¹⁴ Québedxa gaca dul-la nna be'e na le'e lawe' da québedxa xu'ule lu na' da nadxiruj bea na, san xu'ule lu na' xel-la zri'i lazre' chee Dios.

**Tu da dxulé'e na ca naca
chee benne' zaj nada'u**

¹⁵ ¿Bizra xca'? ¿Gundxu dul-la lawe' da québedxa xú'udxu lu na' da nadxiruj bea na, san xú'udxu lu na' xel-la zri'i lazre' chee Dios? ¡Cabata! ¹⁶ Ba nézqueze che guzúa cuínale lu na' tu xránale ca benne' zaj nada'u chee guzúale dizra' chee', nadxa nácale benne' zaj nada'u chee xránale, ne dxun na ba xen guzúale dizra' chee'. Cá'anqueze naca chee le'e che guzúale dizra' chee dul-la, da gunna na le'e xel-la gute, u che guzúale dizra' chee Dios, chee gácale xrlátaje. ¹⁷ Xcalén Dios, lácala gúcale ca benne' zaj nada'u lu na' dul-la, na'a du lázrele dxuzúale dizra' chee dizra' li na', lu da na' bzua cuínale. ¹⁸ Gate bedxúajle le'e lu na' dul-la, bexácale wen zrin chee da xrlátaje. ¹⁹ (Dxuchálajlęna' le'e ca dxuluchalaj bénneache lawe' da lu beła' dxen chee le quebe gaca chéajni'ile ca naca da nigá.) Cáteze benle gate na' bzua cuínale lu na' da sban, ne lu na' da zrinnaj chee gunle da zrinnaj, cá'anqueze le gun na'a,

le guzúa cuínale lu na' da xrlátaje chee gácaquezle bi chee Dios.

²⁰Gate ne nácale ca benne' zaj nada'u lu na' dul-la, quebe ben na ba xen gunle da xrlátaje. ²¹Na'a ¿bizra da ba neza guca chee da ca' dxexedué'ele cheen na'a? Da ca' benle nédxute guché na le'e lu xel-la gute. ²²Na'a nadxúajle lu na' dul-la, ne ba nácale wen zrin chee Dios chee gácaquezle bi chee Dios da naché na le'e lu xel-la nabán da zeajlí canna. ²³Benne' dxune' dul-la dzezi'e lazruj chee' da naca na xel-la gute, san da dxúnnaze Dios dxi'u naca na xel-la nabán da zeajlí canna tu zren nen Xrá-nadxu Jesucristo.

Tu da dxulé'e na ca naca chee xel-la wechaga na'

7 Bi bícha'dau', le'e núnbeale da nadxixruj bea na, zaj xu'u lu na' da nadxixruj bea na bénneache tuze dxácatē ne zaj naca banē'. ²Ca naca da nigá, tu nu'ula nuchaga na' xu'e lu na' benne' chee' ne chee da nadxixruj bea na dxácatē zue' nabane', san che gate benne' chee', na' xedxúaj zru'ule' lu na' da nadxixruj bea na na'. ³Ca' naca na, che nu'ula na' súałeñe' benne' xula dxácatē ne nabán benne' chee', gune' dul-la gáchajne' xrba chee xel-la nuchaga na', san che benne' chee' na' gatie', xedxúaj zru'ule' lu na' da nadxixruj bea na na', na' waca xuchaga ná'leñe' benne' xula, ne quebe gune' dul-la da gáchajne' xrba chee xel-la nuchaga na'.

⁴Cá'aqueze naca chee le'e, bi bícha'dau', le'e zrágale bel-la' dxen chee Cristo, ba nácale ca benne' gate, ne québedxa xu'ule lu na' da bdxixruj be'e Moisés, chee gácale ca zru'ula benne' xula. Na'a nácale ca zru'ula Cristo, Bénnea' bebanē ládújla benne' gate, chee gácadxu bi guchine Dios. ⁵Dxácatē na' bēndxu da naca chee bela' dxen cheedxu, da nadxixruj bea na ble'e

na dxi'u naca dul-la da bēndxu ca da dxezá lazre' bela' dxen cheedxu, na' da na' guché na dxi'u lu xel-la gute. ⁶Na'a ba nácadxu ca benne' zaj nate, na' ba bedxúajdxu lu na' da nadxixruj bea na da gunná be'e na dxi'u, chee gaca gundxu zrin chee Dios lu xel-la nabán cube da dxunna Be' Lá'azxa dxi'u, ne quegá gundxu zrin na' lu da nadxixruj bea gula da naxúaj na.

Dul-la da zúale neda'

⁷¿Bizra nnadxu xca'? ¿Dxu na nadxixruj bea na nácadxu benne' dul-la? ¿Cabata! Quebe gunezda' da naca na dul-la chela ca ble'e da nadxixruj bea na neda'. Quebe gunezda' naca dul-la sa lazra' da naca chee nu benne' chela ca gunná da nadxixruj bea na: Quebe sa lazru' da naca chee nu benne'. ⁸Ble'e da nadxixruj bea na neda' da naca dul-la, na' guque be'eda' zúale'e zánete da calēla lu xichaj lázrdawa' da guzá lazra', lawe' da gate quebe ne gúnbe'a da nadxixruj bea na, guca dul-la chia' tu da nagache lawa' neda'. ⁹Guzúa tu zra gate quebe ne la' da nadxixruj bea, na' gúqueda' naca bana' neda', san gate benda' da na' gunná be'e na neda', bēnbe'a da naca dul-la, na' guque be'eda' nabaga' zria, ne dxal-la' gatia'. ¹⁰Ca'an guca, da nadxixruj bea na' naca na chee gunna na neda' xel-la nabán, san guca na chia' ca tu da bēte neda' ¹¹lawe' da ble'e da nadxixruj bea na' neda' da naca na dul-la, da na' guzí xe na neda', na' ne chee da nadxixruj bea na' guque be'eda' nabaga' zria, ne dxal-la' gatia'.

¹²Ca' naca na, da li naca lá'azxa da nadxixruj bea na. Da nadxixruj bea na' naca na lá'azxa, ne xrlátaje, ne chawe'. ¹³¿Ájazra naca da nigá? ¿Bēte da nadxixruj bea xrlátaje na' neda'? ¿Cabata! Dul-la na' bēte na neda', na' caní guque be'eda' naca na dul-la. Da nigá guque be'eda' ne chee da nadxixruj bea xrlátaje

na', na' caní ble'e da nadxixruj bea na' da sbánle'e naca dul-la.

¹⁴ Nezdixu da nadxixruj bea na naca na da benna Be' Lá'azxa chee Dios dxi'u, san lu belá' dxen chia' naca' ca tu benne' nada'u, na' da naca' dxun na guna' dul-la. ¹⁵ Neda' quebe dxéajni'ida' da dxaca chia' lawe' da quebe dxuna' da dxaca lazra' guna', san da dxecuídeda' naca na da dxuna'. ¹⁶ Che dxuna' da calela da quebe dxaca lazra' guna', da na' dxenná da nadxixruj bea na naca na dul-la, na' nezda' xrlátaje naca da nadxixruj bea na.

¹⁷ Ca' naca na, quegá neda' dxuna' da na', san dul-la da zúale neda', le na' dxun na ca'. ¹⁸ Nezda' quebe bi zúale belá' dxen chia' da naca xrlátaje, lawe' da dxezá lazra' guna' da xrlátaje, san quebe dx-ezéqueda' guna' na. ¹⁹ Quebe dxuna' da xrlátaje da dxaca lazra' guna', san dxuna' da calela da quebe dxaca lazra' guna'. ²⁰ Chee le na', che dxuna' da quebe dxaca lazra' guna', quebe naca neda' dxuna' na, san dul-la da zúale neda' dxun na ca'.

²¹ Caní naca da dxaca chia': Gate dxaca lazra' guna' da xrlátaje, dxulé'e lawe zúale da calela neda'. ²² Lu xichaj lázrdawa' dxedáneda' da nadxixruj bea Dios, ²³ san dxeque be'eda' lu belá' dxen chia' zua tu da dxedábaga na ca da dxaca lazra', da naca da nadxixruj bea dul-la da zúale belá' dxen chia', na' dxenná be'e na neda'.

²⁴ ¡Edxugúa neda'! ¿Nu guselá neda' lu belá' dxen chia' da naché na neda' lu xel-la gute? ²⁵ Xcalén Dios, Le' guné na ne chee Xránadxu Jesucristo. Ca' naca, lu xichaj lázrdawa' dxuzúa cuina' lu na' Dios, san lu belá' dxen chia' naca' ca tu benne' nada'u lu na' da nadxixruj bea dul-la.

Xel-la nabán da dxunna Be' Lá'azxa chee Dios dxi'u

8 Na'a, quebe zaj nabía xi' benne' ca' zaj naque' tuze nen Jesucristo,

benne' ca' québedxa dxeluné' da calela cáteze dxenná bea belá' dxen chee', san dxeluné' da xrlátaje cáteze dxenná bea Be' Lá'azxa. ² Da nadxixruj bea na da dxunna Be' Lá'azxa, Bénnea' dxunne' dxi'u xel-la nabán lawe' da nácadxu tuze nen Jesucristo, ba bselá na neda' lu na' da bdxixruj be'e Moisés da dxulé'e na neda' naca' benne' dul-la, ne nabaga' zria, ne dxal-la' gatia'. ³ Ba ben Dios da quebe guca gun da bdxixruj be'e Moisés, ba gudúe' dul-la da zaj nabaga bénneache. Da nadxixruj bea na quebe guca gun na gundxu da xrlátaje lawe' da nate ni'a na' belá' dxen cheedxu. Chee le na' Dios gusel-le' Zrí'inequeze', na' guque' bénneache ca naca belá' dxen cheedxu da xu'u na lu na' dul-la, chee gutie' ne chee dul-la cheedxu, lawe' da nabágadxu zria gátedxu ne chee dul-la da zúale belá' dxen cheedxu. ⁴ Caní bene' chee gaca gundxu da nadxixruj bea na, dxi'u québedxa dxundxu ca dxenná bea belá' dxen cheedxu, san dxundxu ca dxenná bea Be' Lá'azxa.

⁵ Benne' dxeluné' ca dxenná bea belá' dxen chee' zaj dxe'e gunne xue da naca chee belá' dxen chee', san benne' dxeluné' ca dxenná bea Be' Lá'azxa zaj dxe'e gunne xue da naca chee Be' Lá'azxa. ⁶ Benne' zaj dxe'e gunne xue da naca chee belá' dxen chee' welátequeze', san benne' ca' zaj dxe'e gunne xue da naca chee Be' Lá'azxa xelaca bané', ne xebeza zri lazre'. ⁷ Benne' zaj dxe'e gunne xue chee belá' dxen chee' dxelecuídené' Dios, lawe' da quebe dxelaca lazre', ne quebe gaca xuluzúa cuine' lu na' da nadxixruj bea Le'. ⁸ Chee le na' benne' dxeluné' ca da dxezá lazre' belá' dxen chee' quebe gaca xeluné' da dxezaca ba lazre' Dios.

⁹ Le'e quebe dxunle ca dxenná bea belá' dxen chee', san dxunle ca dxenná bea Be' Lá'azxa, lawe' da ba zúale Be' Lá'azxa chee Dios le'e. Benne' quebe

zúale Be' Lá'azxa le', Be' da nase-la Cristo, quebe naque' bi chee Cristo. ¹⁰Lácala zua Cristo lu xichaj lázrdaule, lu bela' dxen chee dxal-la' gátele, san lu xichaj lázrdaule ba xu'ule tu xel-la nabán cube lawe' da bca'ana Dios le'e xrlátaje. ¹¹Che zúale Be' Lá'azxa le'e, Be' chee Dios, Bénnea' bsebane' Jesucristo ládujla benne' gate, Léqueze Dios na', Bénnea' bsebane' Le', gunne' xel-la nabán cube chee bela' dxen chee da gátequeze na. Da nigá gunē' ne chee Be' Lá'azxa chee Dios, Bénnea' zue' xichaj lázrdaule.

¹²Ca' naca na, bi bícha'dau', nabá-gadxu tu da gundxu, san quegá chee gundxu ca dxenná bea bela' dxen cheedxu. ¹³Che gundxu ca dxenná bea bela' dxen cheedxu, gátequezdXu, san che ne chee Be' Lá'azxa guzúadxu chaláala da dxun bela' dxen cheedxu, na' gaca bandxu.

¹⁴Xúgute benne' ca' dxelún ca dxulé'e Be' Lá'azxa le', benne' caní zaj naque' bi chee Dios. ¹⁵Be' Lá'azxa da guzú' lu na'le quebe dxugu'e le'e lu xel-la dxezrebe ca benne' zaj nada'u, san dxunē' nácale bi chee Dios. Ne chee Be' Lá'azxa nigá dxennēdxu: "Xrae", gate dxuláwizredxu Dios. ¹⁶Léqueze Be' Lá'azxa nigá dxexechébelene' be' nácadxu, dxennē' nácadxu bi chee Dios. ¹⁷Che nácadxu bi chee' ca', gácaqueze cheedxu da naca chee Dios. Gaca cheedxu da dxal-la' gaca chee Cristo chee gudēdxu xel-la zi' tu zren nen Le', chee xegá'ana szrendxu tu zren nen Le'.

¹⁸Dxéqueda' ca xel-la zi' da dxedēdxu na'a quebe gutíl-lelebe na ca da xabáa da sidxu lu zra da za za'. ¹⁹Da dxelezá lazre', ne da dxelebeza xúgute da nun Dios naca na chee gul'é Dios bi zaj naca be' bi chee' ca'. ²⁰Ca naca da nun Dios belexaca na dácheze, quegá ca gulaca lazre' le' na, san lawe' da núnqueze Dios gaca na ca'. Benē' zua da dxelebeza lazre na ²¹lawe' da xeledxúaj ca da nun Dios

lu na' da dxuzrí'a xi' le' na, chee gaca ba neza chee na tu zren nen bi ca' zaj naca bi ca' chee Dios lu xel-la weselá chee' da naca xabáa. ²²Néquezdxu, ca zrin na'a zra, xúgute da nun Dios dxelebezre we' na, ne dxeledé na xel-la zi' ca tu nu'ula zue' xel-la dxudía chee sane' bidau'. ²³Quegá tuze da na' nun Dios dxedé na xel-la zi', san cá'anqueze dxi'u dxedēdxu xel-la zi', dxi'u na' ba zúale Be' Lá'azxa dxi'u, da naca cheedxu tu da dxunna bea na da dxal-la' sidxu. Cá'anqueze dxi'u dxebezre lázredxu dxácatē na' dxebézadxu zra gul'é Dios nácadxu bi chee' ca', gate na' gunne' cheedxu tu bela' dxen cube. ²⁴Lu da dxebeza lázredxu guládxu, san che gaca lé'edxu da dxebeza lázredxu, québedxa naca na tu da dxebeza lázredxu. Tu da ba dxel'é'edxu, québedxa dxun na ba xen cueza lázredxu na. ²⁵Che da dxebeza lázredxu naca na tu da quebe gaca lé'edxu, dxun na ba xen cuézadxu na lu dute xel-la zren lazre' cheedxu.

²⁶Cá'anqueze Be' Lá'azxa dxácalene' dxi'u lu xel-la nate ni'a na' cheedxu. Quebe nezdxu guchálajlēdxu Dios ca dxal-la' gundxu, san Léqueze Be' Lá'azxa dxue lazre' lau Dios waláz cheedxu, ne dxebezre lazre' ca da quebe dxezeque' nu nne. ²⁷Dios, Bénnea' dxennē'e da zua xichaj lázrdaudxu nézene' da dxaca lazre' nne Be' Lá'azxa lawe' da dxue lazre' Be' Lá'azxa lau Dios cáteze naca da dxaca lazre' Dios waláz chee bi zaj naca be' chee'.

Nácadxu wal-la ca tu benne' dxezrué'ene'

²⁸Nezdxu dxuchine Dios xúgute da dxaca cheedxu chee gucá'ana na dxi'u chawe', dxi'u na' nazrí'idxu Le', na' Le' bláwizre' dxi'u ca naca da nune' gunē'. ²⁹Benne' ca' benbea Dios nédxudaute, ben Le' nédxudaute xelaque' ca naca Zrí'inequeze', chee gaca Zrí'ine' na'

Benne' blau ládujla zánete bi biche'.
³⁰ Benne' ca' ben Dios nédxudaute ca xelaque', cá'aqueze bláwizre' le', na' benne' ca' bláwizre', cá'aqueze bca'ane' le' xrlátaje, na' benne' ca' bca'ane' xrlátaje, cá'aqueze bca'ana szrénqueze' le'.

³¹ ¿Bizra nnadxu chee da caní? Che caní dxácale Dios dxi'u, ¿nuzra benne' seque' tábague' dxi'u? ³² Dios quebe bezúene' zi' gunne' dxi'u Zrí'inequeze', san bdee' Le' chee gútié' waláz cheedxu. ¿Quebe gunne' cheedxu xúgute da ca' tu zren nen Zrí'ine'? ³³ ¿Nuzra seque' bi nne chee benne' ca' ba gucá'a Dios le'? Léqueze Dios na' bca'ane' benne' ca' xrlátaje. ³⁴ ¿Nuzra benne' seque' nne' zaj nabaga zria benne' ca'? Léqueze Cristo gutié' waláz cheedxu, ne da naca na blaudxa, naque' Bénnea' bebán ládujla benne' gate, na' zue' chalá'a xabela chee Dios, ga dxue lazre' lau Le' waláz cheedxu. ³⁵ ¿Nuzra seque' xecá'a dxi'u lu na' Cristo, Bénnea' nazrí'ine' dxi'u? ¿Wazeque' xel-la zi', u xel-la xache', u da nau zi' xuzre na dxi'u, u xel-la dxedún, u da dxugúa zra lánadxu, u da štebe, u xel-la gute? ³⁶ Naca na ca da naxúaj na lu dizra' lá'azxa, dxenná na:

Lawe' da nácantu' bi chiu' zúaquezentu' gátentu' xúgute zra.

Dxelune' netu' ca zrlá'dau' ba zaj zúaba' chee xelútié'-ba'.

³⁷ Lu xúgute da caní nácadxadxu szren ca benne' dxelezrué'ene', ne chee Bénnea' bzri'ine' dxi'u. ³⁸ Chee le' na' dxuxrén lazra' quebe bi de da seque' gucuasa na dxi'u lu na' Dios, Bénnea' nazrí'ine' dxi'u. Ne xel-la gute, ne xel-la nabán, ne gubáz chee xabáa ca', ne be' xriwe' dxelenná bea,

ne xel-la waca chee be' xriwe' ca', ne da dxaca na'a, ne da za za',

³⁹ ne da zua xabáa, ne da zua lu xezr la xu,

ne xetú da nun Dios,

quebe seque' xecá'a na dxi'u lu xel-la zri'i lazre' chee Dios, da blé'ene' dxi'u gate bdee' Xránadxu Jesucristo waláz cheedxu.

Dios guqu'é'e benne' Israel ca'

9 Dxennía' da li ca bi chee Cristo, ne quebe dxun lazra', na' xichaj lázrdawa' ne chee Be' Lá'azxa dxé na neda' naca na da li. ² Dxexíaje lázrele'eda', ne tu zúazqueze xel-la dxudía lu lázrdawa', ³ na' dxezá lázrtea' cuía xi'a neda', ne xecuasa' nen Cristo, la naca da nigá da gácale na bi bícha'dau' ca', benne' waláxr chia', benne' judío. ⁴ Benne' caní zaj naque' zri'ine zre sua Israel, na' Dios guzú' lu ne'e benne' caní ca bi chee' ca'. Dios guzúe' ládujla benne' ca' lu da xabáa chee', ne bene' tu xel-la wezría nen benne' ca', ne bnézruje' le' da nadxixruj bea na da bzuaj Moisés, ne xel-la wil-la chee xudau', ne da nachebe lazre'. ⁵ Zaj naque' zri'ine zre zua xra xrtáudxu ca', na' ládujla benne' waláxr chee' ca', lu bela' dxen chee' bla' Cristo, Bénnea' naque' Dios lawe' xúgute da de, ne gaca báqueze' chadía chacanna. ¡Ca' gaca na!

⁶ Quebe nnadxu quebe dxun Dios da dxenná xrtizre', san da naca na, quegá xúgute zri'ine zre sua Israel zaj nababa benne' Israel ca' chee Dios. ⁷ Quegá xúgute zri'ine zre sua Abraham zaj naca xánnie' zrí'inequeze', san naca na ca guzre Dios le', gunné': "Lu zri'ine zre sua Isaac xelaca zri'ine zre su." ⁸ Da nigá dxulé'e na dxi'u quebe nu naca bi chee Dios cáteze nálajbe', san zaj naca bi chee' benne' ca' zaj nálaje' ca naca da guchebe lazre' Dios. ⁹ Ca naca da guchebe lazre' Dios da gunné' chee Abraham naca na da nigá: Lu zra da ba gunnía' xida', na' Sara chiu' sané' tu zrí'inu'.

¹⁰ Quegá tuze da nigá, san cá'aqueze gate Rebeca guzrá' chupa zrí'ine' naca tuze xrabe', Isáac, xra xrtáudxu, ¹¹⁻¹³ ne gate bi ca' quebe ne xelálajbe', ne quebe

ne xelunbe' da xrlátaje u da caleła, Dios guzre' Rebeca: “Bi waca chiu' gácabe' wen zrin chee bi cuide'.” Da nigá naca na tuze nen da naxúaj lu dizra' lá'azxa, da dxenná na: Bzri'ida' Jacob, ne quegá Esaú. Ca' guca na, begá'ana chawe' da xu'u lu na' Dios chee gudxé'e ca naca da núnqueze', benne' ca' dxaca lazre' guláwizre', ne quebe dxuché'e ca da zaj nune'.

¹⁴ ¿Bízraqueze nnadxu? ¿Naca Dios Benne' quebe dxun da xrlátaje? ¿Cabata'!

¹⁵ Guzre' Moisés: “Wezrí lazra' benne' dxaca lazra', ne wexache lazra' benne' dxaca lazra'.” ¹⁶ Ca' naca na, quebe naca lawe' da dxaca lázredxu, ne quegá lawe' da dxun zi' lázredxu, san naca na lawe' da dxexache lazre' Dios dxi'u. ¹⁷ Lu dizra' lá'azxa Dios dxé'e wenná bea chee xezr la xu Egipto: “Bena' lue' wenná bea chee gulé'eda' ne chiu' lue' xel-la waca chia', ne chee xelúnbea bénneache La neda' du gabí'i xezr la xu.” ¹⁸ Ca' naca na, Dios dxexache lazre' benne' dxaca lazre', ne cá'anqueze dxu'e lataj gaque' zizraj lazre' benne' dxaca lazre' gu'e lataj gaque' zizraj lazre'.

¹⁹ Na'a xi'u neda': Che caní naca na, ¿bizr chee na' dxugapa Dios bénneache dul-la? ¿Núzraqueze sequé' tábaga ca da dxaca lazre' Le'? ²⁰ Lue', benne', ¿nuzra nacu' lue' chee gutil-lu' Dios dizra'? ¿Waca tu xesu' xe na benne' bene' le na: ¿Bizr ché'e na' benu' neda' caní? ²¹ Benne' wen xesu' zruaga na' wazéquene' guné' chee guna' na' ca dxaca lazre'. Wazéquene' guné' chee guna' ná'queze tu xesu' da zácadxa, ne tu xesu' da xálaze. ²² ¿Bizra nnáquezdxu che Dios guca lazre' gulé'ene' dxi'u ca dxuzría xi'e bénneache, ne ca naca xel-la waca chee', na' lu xel-la zren lazre' chee' bchaga lawe' chee' benne' ca' lácala dxal-la' xeledé'e le' xel-la zi', na' xelebía xítequeze'?

²³ Bene' na chee blé'ene' ca naca xel-la szren chee da xabáa chee' lu da naca

cheedxu dxi'u, nácadxu benne' dxexache lazre' Le', ne bequé'e dxi'u nédxute chee gaca cheedxu xabáa na' da nucueza Le'. ²⁴ Dios bláwizre' dxi'u ládujla benne' judío, ne ládujla benne' quebe zaj naque' judío. ²⁵ Naca na ca naxúaj na lu dizra' lá'azxa ca gunná Oseas, gunné':

Benne' ca' quebe zaj naque' bi chia', xapa' le' bi chia',
na' benne' quebe bzri'ida', xapa' le' bi nazri'ite lazra'.

²⁶ Lu lataj naga gucha'-be': Quebe nácale bi chia',

ná'queze xapa' le' bi chee Dios ban.

²⁷ Ca naca chee benne' Israel ca', Isaías dxenné': “Lácala zaj naxán zri'ine zre sua Israel ca naxán xuzre' dxé' dxu'a tu xegu zren, bábaze benne' ca' xelexegá'ane' chee xelelé'”, ²⁸ lawe' da gun Xránadxu ca dxenná xrtizre', guzría xi'e zezr la xu nigá lu da naca xrlátaje, ne chadite. ²⁹ Naca na ca gunná lé'queze Isaías na' gate nate, gunné':

Chela Xránadxu, Xrana zánete gubáz chee xabáa, quebe bca'ane' zri'ine zre súadxu ca',

na' xenítedxu ca guca chee xezre Sodoma, ne chee xezre Gomorra.

Benne' judío ca', ne dizra' chawe'

³⁰ ¿Bízraqueze nnadxu? Benne' quebe zaj naque' judío, ne quebe belexexílaj lazre' xelexegá'ane' xrlátaje lau Dios, zaj naque' benne' belexegá'ane' xrlátaje lau Dios, da zéaje na, belexegá'ane' xrlátaje lawe' da guleajlí lazre' Cristo. ³¹ Benne' Israel ca', benne' belune' ca dxenná da nadxixruij bea na da dxal-la' xucá'ana na le' xrlátaje lau Dios, quebe gulezéquene' xelexegá'ane' xrlátaje lawe' Le'. ³² ¿Bizr chee na'? Naca na lawe' da quebe belune' ba xuzre xelexegá'ane' xrlátaje ne chee xel-la dxejlí lazre' chee', san gulaca lazre' xelexegá'ane' xrlátaje ne chee da belúnqueze' le'. Chee le na' xeajlecházie' lawe' xiaj da dxelechegu bénneache, da

na' naca Cristo ³³ca da dxenná Dios lu dizra' lá'azxa chee', dxenné':

Neda' dxuzúa' lu xezre Sión tu benne' naque' xiaj da dxelechegu bèneache.

Nu benne' cheajlí lazre' Le' quebe xedué'equezne'.

10 Le'e, bi bícha'dau', da dxezá lazra', ne da dxenaba' Dios guné' chee' benne' Israel ca' naca na chee' xeelé'. ²Ca naca chee' benne' ca', da li dxelebile lazre' da naca chee' Dios, san quebe naca na chee' xel-la sina li. ³Quebe zaj nézene' ca xrlátaje dxucá'ana Dios bèneache, san dxelaca lazre' xulucá'ana xrlátaje cuine', ne quebe dxelezi' lu ne'e ca xrlátaje dxucá'ana Dios bèneache. ⁴Cristo dxune' da dxaca lazre' Dios gun da nadxiruj bea na, lawe' da dxucá'ana Cristo xrlátaje xúgute bèneache dxelea-
jlí lazre' Le'.

⁵Ca naca chee' da dxucá'ana xrlátaje bèneache lau Dios da naca na ne chee' da nadxiruj bea na, bzuaj Moisés caní: Benne' dxune' ca naca da dxenná da nadxiruj bea na gaca bane' ne chee' le na. ⁶Ca naca chee' da dxucá'ana xrlátaje bèneache lau Dios da naca na ne chee' xel-la dxeajlí lazre' dxenná na caní: Quebe nnau' lu lazrda'u: "¿Núzraqueze benne' cuéne' xabáa?" (da naca na chee' gulétaje' Cristo), ⁷ne quebe nnau': "¿Núzraqueze benne' xétaje' lataj chul-la chee' benne' gate ca'?" (da naca na chee' xebéaje' Cristo ládujla benne' gate.) ⁸¿Bizra da na' dxenná na: Dizra' na' zua na gágute naga zu', lu dxu'u ne lu lazrda'u? Dizra' nigá naca na dizra' chawe' da dxuzéntenú' bèneache chee' xeléajle'e chee' Cristo. ⁹Che nen dxu'u dxennáu' naca Cristo Xranu', ne che lu lazrda'u dxeajlí lazru' Dios bsebane' Le' ládujla benne' gate, nadxa lau'. ¹⁰Lu lázrdaudxu dxeajlí lázredxu chee' xegá'anadxu xrlátaje lau Dios, ne nen

dxú'adxu dxexechébedxu nácadxu chee' Cristo chee' ladxu.

¹¹Lu dizra' lá'azxa dxenná na: Nu benne' dxeajlí lazre' Le' quebe xedué'ene'. ¹²Dios quebe dxebé'e' benne' judío ca', u benne' quebe zaj naque' judío lawe' da Léqueze Xránadxu na' naque' Xrana xúgute bèneache, na' dxunézrujle'e xúgute benne' ca' dxululáwizre' Le'. ¹³Naca na ca da dxenná na: Xúgute benne' dxululáwizre' La Xránadxu xeelé'. ¹⁴Na'a ¿ájazra xululáwizre' Le' che quebe ne xeléajle'e chee'? ¿Ájazra xeléajle'e chee' che quebe ne xelenne' nu dxuchalaj chee'? ¿Ájazra xelenne' che quebe nu chilá' benne' guzenne' le'? ¹⁵¿Ájazra xuluzenne' bèneache che quebe nu nasel-la le'? Naca na ca dxenná dizra' lá'azxa, dxenná na: Xrtante naca lau Dios da dxelún benne' dxeledé' dxuluzenne' bèneache dizra' chee' xel-la dxebeza zri lazre', ne dizra' chawe'.

¹⁶Quegá xúgute bèneache dxelezi' lu ne'e dizra' chawe' nigá. Naca na ca gunná Isaías, gunné': "Xran, ¿zua nu benne' ba guxéajle'e ca da dxuchálanjtu'?" ¹⁷Ca' naca na, dxéajle'dxu chee' gate dxénedxu, na' da dxal-la' xénedxu naca na da gunná Cristo.

¹⁸Na'a dxenaba': ¿Quebe ne xelenne'? Da li ba belenne'. Lu dizra' lá'azxa dxenná na:

Da dxuluzén benne' caní bache belén bèneache du ca naca xezr la xu nigá.

Dizra' chee' benne' caní bache belén bèneache du gabí'i xezr la xu.

¹⁹Xecha lasa dxenaba': ¿Quebe ne xeleque be'e benne' Israel ca da gunná Dios? Za'a Moisés bzuaje' ca gunná Dios, gunné':

Neda' guna' gácale benne' se lazre' chee' tu xezre benne'

quebe ne xelaque' tu xezre.

Guna' zrá'ale tu xezre benne' quebe ne xeléajni'ine'.

²⁰ Gudé na' bzuaj Isafas ca gunná Dios, gunné':

Benne' quebe belexílajé' neda' belex-ezreléne' neda'.

Be'e lawa' benne' ca' quebe bululáwizre' neda'.

²¹ Ca naca chee benne' Israel, gunná Dios: "Tu dxuláwizrazqueza' benne' quebe dxuluzúe' dizra', ne dxeledábage' xrtizra'."

Nu benne' Israel ca' zaj nalé'

11 Na'a dxenaba: ¿Ba bzua Dios chalá'ala xezre chee', benne' Israel ca', tu chí'izqueze? ¡Cabata! Neda'queza' naca' benne' Israel. Neda' nabábalena' zri'ine zre sua Abraham, ne nabábalena' zri'ine zre sua Benjamín. ²Gate nate Dios guz' lu ne'e benne' Israel ca', na' na'a quebe nuzúe' benne' ca' chalá'ala. ¿Quebe nézele le'e da dxenná dizra' lá'azxa ca naca chee Elías, bènea' bchálajé' waláz chee Dios, gate na' gudawe' zria benne' Israel ca' lau Dios? Gunné': ³"Xran, ba belútie' benne' buluchálajé' waláz chiu', ne buluzría xi'e lataj lá'azxa chiu' ca', na' tuza' neda' nagá'ana', na' cá'anqueze neda' dxelaca lazre' xelútie'." ⁴Dios bechebe', guzre' Elías: "Ba gucá'a chia' ga xun chi gaxúa benne' quebe ne xuluzúa zribe' lau bedáu' xiaj xaga le' na Baal." ⁵Cá'anqueze na'a ba begá'ana tu cue' benne' ca', benne' ba gucá'a Dios chee' lu xel-la zri'i lazre' chee'. ⁶Na'a, che naca na ne chee xel-la zri'i lazre' chee Dios, quebe naca na ne chee da gaca gun nu benne', lawe' da la guca na ca', na' xel-la zri'i lazre' chee Dios quebe naca na xel-la zri'i lazre'.

⁷¿Bizra xca'? Benne' Israel ca' quebe belezrué'ne' da dxexiláje', san benne' ca' gucá'a Dios le' belezrué'ne' na, san xezícadxa benne' ca' gulaque' benne' zide'. ⁸Naca ca dxenná dizra' lá'azxa, dxenná na: Dios be'e lataj gulaca benne'

ca' lázrdau zide'. Be'e le' lataj gulaque' ca benne' la chul-la, ne ca benne' cwezru' ca', na' caní zaj naque' na'a. ⁹Cá'anqueze gunná David, gunné':

Ca naca laní chee benne' ca' ben xelaca na ca tu xralaj,

u ca tu da que'la na le'

chee cheajlecházie', na' gudé Dios le' lu da ba xa'.

¹⁰Xiaj lawe' xelexchul-la na chee québedxa xeelé'ene', na' xelégüe' chadía chacanna zran xua da naca na dul-la chee'.

Ca zaj nalá benne' quebe zaj naque' judío

¹¹Na'a dxenaba: ¿Tu chí'ize belenite benne' judío ca' gate xeajlecházie'? ¡Cabata! Gate benne' judío ca' guledábage' xrtizra Dios, guta' lataj xeelé' benne' quebe zaj naque' judío, chee xelexúa benne' judío ca' lu xel-la dxezá lazre'. ¹²Na'a, che da zrinna' da belún benne' judío ca' ben na guca tu da ba neza chee xúgute' bèneache, ne che gate belenitie' guca na tu da ba neza chee benne' quebe zaj naque' judío, gaca na tu da ba neza zrendxa gate xelexú'u xúgute' benne' judío ca' lu na' Dios.

¹³De tu da dxal-la' xapa' le'e, núlale quebe nácale benne' judío. Lawe' da gusel-la Dios neda' chee guzenda' benne' quebe zaj naque' judío xrtizre', dxé'le'a gunne xue chee zrin nabaga' guna'. ¹⁴Dxaca lazra' guna' xelexúa lu xel-la dxezá lazre' bal-la benne' walá'zr chia' chee xeelé'. ¹⁵Che gate bzua Dios chalá'ala benne' judío ca', belexaca tuze nen Dios benne' quebe zaj naque' judío, ¿ájazra gaca gate xelexaca benne' judío ca' tuze nen Dios? Gaca na ca xelexaca bané' lá-dujla benne' gate. ¹⁶Che guzúadxu lau Dios xeta nedxu chee cua, na' nácaqueze chee' duté' cua na'. Na' che naca chee Dios lue xaga, zaj nácaqueze chee' ca naca zruze xaga na'.

¹⁷ Benne' judío ca' zaj naque' ca zrúze-
queze tu xaga olivo, san bal-la zruze
guledxugu na, na' lue' beda'u waláz
chee zruze ca', ne nacu' ca tu zruze
xaga olivo xixre'. Ca'an guca, gucu' tuze
nen lue xaga olivo chawe' na', ne dx-
ezi'u ba neza xel-la nabán chee xaga
olivo na'. ¹⁸ Quebe gucá'ana szren cuinu'
lawe' zrúzequeze xaga olivo na'. Che dx-
ucá'ana szren cuinu', naca be'e quebe dx-
ugagu' lue' lue xaga na', san luéqueze na'
dxugagu na lue'.

¹⁹ Wannáu': Awe', guledxugu zruze ca'
chee cheajxedá'a neda' le'e xaga olivo
na'. ²⁰ Ca'an naca, san guledxugu na
lawe' da quebe guléajle'e chee Dios, na'
lue' bedá'azu' le'e xaga na' lawe' da dxéa-
jle'u. Ca'an naca, quebe gucá'ana szren
cuiu', san bxue xanne' cuinu'. ²¹ Che
Dios quebe bnite lawe' chee benne' ca'
zaj naque' ca zrúzequeze xaga na', na' be-
béaje' le', cá'aqueze quebe gunité lawe'
chiu' lue', na' xebéaje' lue'. ²² Le nna'xque
ca xrlátaje naca Dios, na' cá'aqueze ca
snia naque'. Guque' snia nen benne' ca'
xeajlecházie', na' naque' chawe' nen lue'.
Dxun na ba xen tu gúnzquezu' ca dxal-
la' gunu' chee tu sí'zquezu' da chawe'
chee', lawe' da che quebe gunu' caní,
cá'aqueze wegüe' lue'. ²³ Che benne'
judío ca' xelexeaj lazre', na' xelexaque'
tuze nen xaga olivo na', lawe' da napa
Dios xel-la waca xuné' le' tuze. ²⁴ Lue'
quebe nactu' judío, san guchugue' lue' le'e
tu xaga olivo xixre', na' bexuné' lue' tuze
nen xaga olivo chawe' na', da quebe nu
dxun. Benne' judío ca', benne' zaj naque'
ca zrúzequeze xaga olivo chawe' na', gá-
cadxa chawe' xexuné' le' tuze nen xaga
olivo cheéqueze' na'.

Ca xelexú'u benne' judío lu na' Dios

²⁵ Le'e, bi bícha'dau', dxaca lazra' chéa-
jni'ile chee da nagache nigá, chee quebe
guéquele nácale benne' sina. Benne' Is-
rael ca' zaj naque' benne' lázrdau zide'

tu chí'dauze, ca zrin zra xelexú'u lu
na' Dios xúgute' benne' quebe zaj naque'
judío. ²⁶ Gate gaca na, nadxa xelélé
xúgute' benne' Israel ca' lawe' da naxúaj
lu dizra' lá'azxa da dxenná na:

Benne' weselá ze'e Sión,
na' cue' da calela da zaj nabaga zri'ine
zre sua Jacob.

²⁷ Da nigá gaca xel-la wezría guna' nen
benne' ca',
gate neda' cua' dul-la chee'.

²⁸ Ca naca chee dizra' chawe' chee
Cristo, zaj naca benne' judío ca' ca benne'
dxelecuídené' Dios chee gaca da ba neza
cheele le'e, san Dios ne nazrí'ine' benne'
ca' lawe' da guqu'é'e xra xrtawe' ca'. ²⁹ Ca
da dxunna Dios, quebe xequé'e na, ne
quebe dxuzúe' chalá'ala nu ba bláwizre'.
³⁰ Le'e nédxute' gudábagale xrtizra Dios,
san na'a, lawe' da guledábaga benne'
judío ca' xrtizre', Dios dxexache lazre'
le'e. ³¹ Cá'aqueze na'a, benne' judío ca'
dxeledábague' xrtizra Dios, san naca na
chee xexache lazre' Dios le' ca dxex-
ache lazre' le'e. ³² Dios be' lataj xúgute'
guledábague' xrtizre' chee gaca xexache
lazre' xúgute'.

³³ Szrenté naca xel-la gunní'a chee xel-
la sina, ne xel-la dxéajni'i chee Dios.
Quebe séquedxu chéajni'idxu ca da dx-
uchi'e, ne quebe gaca gúnbea xánnedxu
da dxuné'. ³⁴ ¿Núzraqueze gaca chéa-
jni'i ca da xu'u xichaj lázrdau Xrá-
nadxu? ¿Núzraqueze gaca guzéajni'i Le'?
³⁵ ¿Núzraqueze benne' bi bnézruje' chee
Xránadxu, chee gun na ba xen bi xuzri'e
chee bénnea'? ³⁶ Xúgute' da dxelé'edxu
zá'aca na lu na' Dios, na' Le' bené' da ca',
ne zaj naca na chee Léqueze'. ¡Gaca ba
Dios chadía chacanna! ¡Ca'an gaca na!

Da dxal-la' gun benne' naque' bi chee Dios

12 Ca'an naca, bi bícha'dau', lu xel-
la dxexache lazre' chee Dios, dx-
ata' xúeda' le'e guzúa cuínale lu na' Dios

ca tu guna' ban, da naca na lá'azxa, ne da xezaca ba lazre' Dios. Da nigá naca na tu da gucá'ana szrene Dios da dxal-la' gunle. ²Québedxa gunle ca dxelún bèneache chee xezr la xu nigá, san le guchá cuínale chee caní zra dutē ca naca lu xi-chaj lázrdaule. Ca'an gaca, gúnbeale da dxaca lazre' Dios gunle, da na' naca xrlátaje, ne da dxezaca ba lazre' Dios, ne da naca na li lazre'.

³Ne chee da nusebaga Dios neda' lu da chawe' chee' dxapa' xúgutele le'e quebe nu benne' dxal-la' gucá'ana cuine' szrendxa ca dxal-la' gunē, san dxal-la' guxúē' ca da naque' lu xel-la dxexruj lazre', cáteze naca xel-la dxeajlí lazre' da nunezruj Dios le'. ⁴Ca naca chee bel-la' dxen cheedxu, zánete da napa na, na' xúgute da ca' quebe dxelún na tuze zrin, ⁵cá'anqueze dxi'u, láqueze naxandxu, nácadxu ca tuze bel-la' dxen chee Cristo, ne nácadxu tuze tudxu xetudxu ca zaj naca da ca' napa tu bel-la' dxen chee nu benne'.

⁶Dios nunne' dxi'u cha cheedxu ca da gaca gundxu ca da dxaca lazre' gunne' tu tudxu. Dخال-la' guchine xánnedxu ca da nunne' dxi'u.

Che nunne' dxi'u chee guchálajdxu waláz chee',

dxal-la' gundxu na dutē xel-la dxeajlí lazre' da nápdxu.

⁷Che nunne' dxi'u chee gundxu zrin chee ljuwézredxu,

dxal-la' gundxu na cháwe'dau'.

Che nunne' dxi'u chee gusededxu bèneache,

dxal-la' gusede xánnedxu le'.

⁸Che nunne' dxi'u chee gutípadxu lazre' bèneache,

dxal-la' gutipa xánnedxu lazre' le'.

Che nunne' dxi'u chee bi gunézrujdxu,

dxal-la' gundxu na du lázredxu.

Che nunne' dxi'u chee nne xuedxu,

dxal-la' guxúe xánnedxu ca dxundxu na.

Che nunne' dxi'u gácalēdxu benne' xache' ca',

dxal-la' gundxu na dutē xel-la dxebé cheedxu.

⁹Le zri'i ljuwézrele du lázrele tule xetule.

Le guzúa chalá'ala da calela, ne le gun da xrlátaje.

¹⁰Dخال-la' zri'i ljuwézrele tule xetule ca nazri'ile bi bíchequezele.

Le gapa ba lá'ana ljuwézrele, ne le güe lataj tule xetule.

¹¹Le gun zi' lázrele, ne quebe gácale zrawēde,

na' le gun zrin chee Xránadxu dutē lázrdaule.

¹²Le sua xel-la dxebé lu da dxebeza lázrele.

Le gaca dxexruj lazre' gate dxedele xel-la zi'.

Le guchálajleze Xránadxu.

¹³Le gunezruj da dxelexazrje benne' ca' zaj naque' bi chee Dios.

Le si' lu na'le du lázrele benne' ca' zá'aque' dxelenabe' le'e.

¹⁴Le naba da chawe' chee benne' ca' zaj nau zi' xuzre' le'e.

Le naba da xrlátaje chee', ne quebe nábale da calela chee benne' ca'.

¹⁵Le be nen benne' dxelebé, ne le xexache lazre' benne' ca' dxelebezre xache'.

¹⁶Le gaca tuze nen ljuwézrele tule xetule.

Quebe gucá'ana szren cuínale,

san le gaca tuze nen benne' dxexruj lazre' ca'.

Quebe guéquele ba nápale dutē xel-la sina.

¹⁷Quebe xebi'ile da calela chee benne' nung' cheele da calela.

Le gun ba xuzre gunle da xrlátaje lau xúgute bèneache.

¹⁸Che naca chee, le gun naga ze lau séquele cueza zri lázrele nen xúgute bèneache. ¹⁹Bi bícha'dau' nazri'ite lazra', quebe xebéaj lázrele, san le güe lataj Dios xebéaj lazre', lawe' da naxúaj

lu dizra' lá'azxa da dxenná na: Chia' neda' naca xebéaj lazra'. "Neda' xebi'a chee bèneache," dxenná Xránadxu. ²⁰Cá'anqueze dxenná na: Che dxedún benne' dxecuídene' lue', bnezruj da gawe', na' che dxebilene', bnezruj da xí'aje', lawe' da gate dxunle caní, xedué'e bènea'. ²¹Quebe gu'u lataj da calela nna be'e na lue', san gunná be'e da calela ne chee da xrlátaje da dxunu'.

13 Xúgutedxu dxal-la' guzúadxu dizra' chee benne' xu'u lawe', lawe' da quebe nu chilá' benne' xu'u lawe' che quebe nunna Dios le' xel-la dxenná bea chee'. Benne' xu'u lawe' ca' zaj naque' benne' nuzúa Dios. ²Chee le' na' nu benne' dxedábague' benne' xu'u lawe' dxedábague' ca da nun Dios. Benne' dxeledábague' caní zaj nabague' zria, na' Dios xuzri'e chee' da xexal-le'. ³Benne' ca' dxelenná be'e quebe nuzúa Dios le' chee xuluchebe' benne' dxelune' da xrlátaje, san chee xuluchebe' benne' dxelune' da calela. ¿Dxaca lazru' quebe zrebu' benne' xu'u lawe'? Ben da xrlátaje, na' benne' xu'u lawe' ca' xelape' ba lá'ana lue' ⁴lawe' da zaj naque' wen zrin chee Dios chee xelune' chiu' da xrlátaje. Che dxunu' da calela, dxal-la' zrebu' lawe' da quegá dácheze zaj nape' xel-la dxenná bea xelxebi'e chee bèneache lawe' da zaj naque' wen zrin chee Dios chee xuluzúe' lu da ba xa' benne' ca' dxelune' da calela. ⁵Chee le' na', dxun na ba xen guzúadxu dizra' chee benne' xu'u lawe', quegá tuze chee quebe xuluzúe' dxi'u lu da ba xa', san lawe' da nezdxu naca na da nadxixruj bea Dios. ⁶Chee le' na' dxízrujle da dxebágale chee xu'u lawe', lawe' da zaj naca benne' xu'u lawe' wen zrin chee Dios, ne dxelún xánnie' zrin chee' na'.

⁷Le quizruj xúgute bèneache ca da nabágale chee'.

Da nabágale chee benne' wechizruj, le quizruj da nabágale.

Da nabágale chee xu'u lawe', le quizruj na.

Benne' dxal-la' gápale ba lá'ana, le gape' ba lá'ana.

Benne' dxal-la' gucá'ana szrenle, le gucá'ane' szren.

⁸Quebe dxal-la' cue zria chee nen nu benne' san tuze chee zri'ile le' ca dxal-la' gunle chee le sa' ljwézrele tule xetule. Che gunle da nigá, na' gunle da nadxixruj bea na. ⁹Naga zaj naxúaj da nadxixruj be'e Dios dxenná na:

Quebe súale'nu' zru'ula benne' xula.

Quebe gutiu' benne'.

Quebe cuanu'.

Quebe gun lazru' chee benne'.

Quebe sa lazru' da naca chee benne'.

Xúgute da nadxixruj bea caní, ne xúgute da nadxixruj bea xezícadxa dxun bènea' dxuzúe' dizra' da nadxixruj bea na' dxenná na: Bzri'i le sa' ljwezru' ca nazrí'i cuinu'. ¹⁰Bènea' nazrí'ine' le sa' ljwezre' quebe dxune' da calela chee le sa' ljwezre' na'. Ca'an naca, bènea' nazrí'ine' le sa' ljwezre' dxuzúe' dizra' chee da nadxixruj bea na.

¹¹Ca naca da caní, le guxúe xanne' ca naca zra zúadxu na'a lawe' da ba bzin zra xebandxu lu bchigala lawe' da ba zua gágudxa zra ladxu lu da nácadxu ca guzúa na gate na' guzú lau dxéajledxu.

¹²Ba dxedé chee da chul-la, ne ba za te zra. Chee le' na' dxal-la' gusandxu da dxelún bèneache lu da chul-la, na' gácadxu ca tu benne' zeje' wedil-la dxacu zra lane' xia, chee tadxu lu xel-la naxaní' chee Dios.

¹³Dxal-la' tadxu li lazre' ca dxal-la' tadxu te zra.

Quebe dxal-la' xí'ajdxu da dxuzuzre na bèneache,

ne quebe gagu xrátadxu.

Quebe gundxu da sban, ne da calela.

Quebe tíl-lalédxu le sa' ljwézredxu,

ne quebe gácadxu xa lazre'.

¹⁴Xránadxu Jesucristo gácaqueze' ca zra lánadxu xia, na' quebe gundxu da dx-
ezá lazre' beła' dxen cheedxu.

Quebe si tizru' biche ljwezru'

14 Che tu bi bíchedxu quebe ne se
cháchabe' lu xel-la dxeajlí lazre',
le si' lu na'le lebe', san quegá chee gutíl-
lalele lebe' dizra' ca naca da quebe dxun
na ba xen. ²Ca naca na, zaj zra' benne'
dxeajlí lazre' naca chee' xelawe' bal-
la bi de, san zaj zra' benne' xezícadxa
quebe ne xelexé chache' lu xel-la dxeaj-
lí lazre', na' dxeléquene' waca xelawe'
tuzé xixre' cuan. ³Benne' dxawe' xúgute
da ca' quebe dxal-la' guzúe' chalá'ala
bénnea' nadxúaj nadxeze da dxawe', na'
benne' nadxúaj nadxeze da dxawe' quebe
dxal-la' si tizre' bénnea' dxawe' bal-la bi
de, lawe' da nazi' lu na' Dios bénnea'.
⁴¿Nuzra nacu' lue' dxezí tizru' wen zrin
chee Xránadxu? Che xegá'ane' xrlátaje,
u che quegá, naca na da nabaga Xrá-
nadxu. Xegá'ane' xrlátaje lawe' da napa
Xránadxu xel-la waca chee' gucá'ane' le'
xrlátaje.

⁵Caní naca xetú. Zaj zra' benne' dx-
ulupá'anadxé' tu zra ca xetú zra, na'
zaj zra' benne' dxeléquene' tuz ca zaj
naca xúgute zra. Tu tudxu dxal-la' se
cháchadxu lu xichaj lázrdaudxu ca naca
da caní. ⁶Benne' dxupá'ane' tu zra dx-
uné' na chee' gape' ba lá'ana Xránadxu,
na' bénnea' quebe dxupá'ane' zra na' dx-
uné' ca' chee' gape' ba lá'ana Xránadxu.
Benne' dxawe' bal-la bi de dxuné' na
chee' gape' ba lá'ana Xránadxu lawe' da
dxé'e Dios: Xcalenu', na' bénnea' nadxúaj
nadxeze da dxawe' dxuné' na chee' gape'
ba lá'ana Xránadxu, na' cá'anqueze dxé'e
Dios: Xcalenu'.

⁷Netudxu dxi'u naca bandxu chee
gundxu da naca cheézedxu, ne quegá
gátédxu lu da naca cheézedxu. ⁸Che
naca bandxu, naca na chee' gaca ba Xrá-
nadxu. Ca' naca na, che gaca bandxu, u

che gátédxu nácadxu bi chee Xránadxu.
⁹Cristo gutié', ne bebane' chee gaque'
Xrana benne' gate ca', ne Xrana benne'
ban ca'.

¹⁰Na'a lue', ¿bizr chee na' quebe dx-
elé'enu' chawe' ca da dxun le sa' ljwezru',
bi bíchedxu? ¿Bizr chee na' dxuzú' le'
chalá'ala? Xúgutedxu dxal-la' zrindxu
lau Cristo chee' guchi'e ca da nundxu
tu tudxu. ¹¹Naxúaj lu xiche lá'azxa da
dxenná na:

Dxenná Xránadxu: “Dxuzetaj cuina'
dxenná':

Xúgute bénneache xuluzú zribé' lawa'.
Xúgute' xelexechebe' lawe' lau naca'
Dios.”

¹²Ca'an naca, tu tudxu dxi'u dxun na ba
xen gulé'edxu ca da nundxu lau Dios.

¹³Chee le' na' québedxa dxal-la' si
tízradxu tudxu xetudxu. Le gun ba xuzre
quebe bi gunle da gun na ga chegu bi
bíchele, u da gun na cheajcházie' lu dul-
la. ¹⁴Dxuxrén lazra' Xránadxu Jesús, ne
nezda' quebe bi da dxágudxu nácaqueze
sban, san che tu bi bíchedxu dxéquebe'
de tu da dxágudxu da naca na sban,
chee lebe' naca na da sban. ¹⁵Che ne
chee da dxagu' lue', dxunu' dxeajchaze bi
bichu', quebe dxunu' da naca chee' xel-
la zri'i lazre'. Quebe gunu' cuía xi' tu
benne', bénnea' gute Cristo waláz chee',
lawe' da dxaca lazru' lue' gagu' bi xel-la
wagu. ¹⁶Quebe bi gunle da güe lataj nu
nne' schanní' chee' da dxéquele naca na
da xrlátaje. ¹⁷Chee súadxu naga dxenná
be'e Dios dxi'u quebe naca na chee' da
dxágudxu, u chee' da dxí'ajdxu, san naca
na chee' xegá'anadxu xrlátaje lau Dios, ne
chee' gápadxu xel-la dxebeza zri lazre',
ne chee' súadxu xel-la dxebé, da ca' ná-
padxu ne chee' Be' Lá'azxa. ¹⁸Nu benne'
dxuné' zrin chee' Cristo caní dxuné' da
dxezaca ba lazre' Dios, na' dxelapa bén-
neache le' ba lá'ana.

¹⁹Ca' naca na, dxal-la' gundxu da dx-
ulusá na xel-la dxebeza zri lazre', ne

da dxuluzúa chacha na dxi'u. ²⁰ Quebe guzría xi'u da nun Dios lu xichaj lászradau le sa' ljwezru' ne chee da dxagu'. Da li xúgute da dxágudxu zaj naca na xrlátaje, san quebe naca xrlátaje bi gágudxu da gun na cheajchaze benne' xula lu dul-la. ²¹ Xrlátaje naca quebe gágudxu belá', ne quebe xi'ajdxu xrise uva wal-la, ne quebe bi gundxu da gun na cheajchaze bi bíchedxu lu dul-la, u da guzría xi na xel-la dxeajlí lazre' chee'. ²² Che napu' xel-la dxeajlí lazre' bi gaca gunu', dxal-la' gunu' na lué'queze lau Dios. Ba neza naca na chee benne' quebe guzría xi' cuine' ne chee da dxéquene' naca na da xrlátaje guné'. ²³ Bénnea' dxawé' da dxéquene' quebe dxal-la' gawé', nabague' zria gate dxawé' na lawe' da dxawé' da quebe dxeajlí lazre' naca chee' gawé'. Xúgute da dxundxu zaj naca dul-la che quebe dxuxrén lászredxu zaj naca na xrlátaje.

Ben da dxezaca ba lazre' bi bichu', ne quegá da dxezaca ba lászrezu' lue'

15 Dxi'u ba ze cháchadxu lu xel-la dxeajlí lazre' dxal-la' gácalédxu benne' quebe ne se chache' lu xel-la dxeajlí lazre', ne quebe gundxu da dxezaca ba lászredxu dxí'uze. ² Tu tudxu dxal-la' gundxu da dxezaca ba lazre' bi bíchedxu lu da gun na chawe' cheebe', ne lu da gusegula na lebe' lu xel-la dxeajlí lazre' cheebe'. ³ Crístoqueze quebe bene' da dxezaca ba lazre' leze', san guca chee' ca naxúaj na lu dizra' lá'azxa, dxenná na: Benne' ca' gulenné' schanni' chiu' Lue', Dios, guca na ca gulenné' schanni' chia' neda'. ⁴ Xúgute da naxúaj nédxudauté lu dizra' lá'azxa zaj naxúaj na chee guzéajni'i na dxi'u, chee gápádxu xel-la dxebeza lazre' ne chee xel-la zren lazre', ne xel-la dxexúe zren, da ca' nápadxu ne chee da ca' zaj naxúaj na. ⁵ Dxenaba' lau Dios, Bénnea' dxunne' dxi'u xel-la zren lazre', ne dxexúe zrene' dxi'u, chee gácalene' le'e chee gácale tuze tule xetule

ne chee Jesucristo, ⁶ chee gunle xúgutele tu zren güe lá'anale Dios, Xra Xránadxu Jesucristo.

Dxelén benne' quebe zaj naque' judío dizra' chawe'

⁷ Ca'an naca, chee gaca ba Dios, le si' lu na'le ljwézrele tule xetule ca ben Cristo, guz' lu ne'e dxi'u. ⁸ Ca da dxennéa' neda', dxennéa' bla' Cristo, ne bene' zrin chee benne' judío ca', chee bene' ca da guchébe lazre' Dios lau xra xrtáudxu ca', ne caní blé'ene' naca Dios li lazre'. ⁹ Cá'anqueze blé'e chee xelúe lá'ana Dios benne' ca' quebe zaj naque' judío lawe' da dxexache lazre' bénneache, ca da naxúaj na caní chee Cristo lu dizra' lá'azxa, dxenné':

Güe lá'ana' lue', Dios, lau benne' xezr la xu ca',
ne tu gul-lazqueza' da xelapa ba lá'ana Lue'.

¹⁰ Cá'anqueze dxenná na:

Le be, le'e, bénneache duté xezr la xu nen benne' zaj naque' bi chee Dios.

¹¹ Cá'anqueze dxenná na:

Le güe lá'ana Xránadxu,
le'e, bénneache chee xúgute xezr la xu,
ne le guchalaj chee xel-la szren chee',
le'e, xúgute bénneache.

¹² Cá'anqueze bchalaj Isaías ca naca chee Cristo, gunné':

Welá'queze tu zri'ine zre sua Isaí,
Bénnea' nna bé'ene' xúgute cue' xezr la xu,
na' benne' ca' xelebeza lazre' Le'.

¹³ Dxenaba' Dios, Bénnea' dxunne' dxi'u xel-la dxebeza lazre', chee gún-nalé'e le'e xel-la dxebé, ne xel-la dxebeza zri lazre' lawe' da dxeajlí lászrele Le', chee gápale'quezele xel-la dxebeza lazre' ne chee xel-la waca chee Be' Lá'azxa.

¹⁴ Le'e, bi bícha'dau', dxuxrén lazra' nápalé'ele da chawe', ne núnbeale xúgute chee gaca guzéajni'ile ljwézrele tule xetule. ¹⁵ Lu xiche nigá bechugu

lazra' guzúaja' chee da caní chee quebe gal-la lázrele na. Dxuna' na ne chee da bsebaga Dios neda' lu da chawe' chee'. ¹⁶ Caní guna' zrin chee Jesucristo ládujla benne' quebe zaj naque' judío. Zrin dxuna' naca na chee guzenda' bèneache dizra' chawe' chee Dios chee guzra'a benne' quebe zaj naque' judío lau Dios ca tu guna' da dzezaca ba lazre' Le'. Xelaque' benne' lá'azxa ne chee Be' Lá'azxa.

¹⁷ Lu da naca' chee Jesucristo waca xezaca ba lazra' lu zrin dxuna' chee Dios ¹⁸ lawe' da quebe dxdxugu lazra' guchálaja', san tuze ca naca da nun Cristo ne chia' neda', chee guna' xuluzúa benne' quebe zaj naque' judío xrtizra Dios. Da nigá bena' ne chee da bchálaja', ne da bena', ¹⁹ ne ne chee xella waca chee da ble'e Dios, nen xella waca chee xabáa, ne ne chee xella waca chee Be' Lá'azxa. Caní bchálaja' dizra' chawe' chee Cristo du ca naca xezr la xu. Guzú lawa' dxuna' na xezre Jerusalén, bzrintea' naga nababa Ilírico. ²⁰ Caní naca, bena' ba xuzre bchálaja' dizra' chawe' naga quebe ne xelenne' La Cristo, chee quebe guna' zrin naga ba zaj nun zrin xezícadxa benne', ²¹ na', ca dxenná dizra' lá'azxa:

Xelelé'e benne' ca' quebe ne zrin nu benne' guzenne' le' chee Cristo, na' benne' ca' quebe ne xelén chee Le' xeléajni'ine da naca chee'.

**Pablo dxugú'u be'e
chéaje' xezre Roma**

²² Chee guzenda' le'e da caní, da zan lasa guca lazra' xedajnná'a le'e zrale xezre Roma, san quebe guca chia'. ²³ Na'a, ba bexuzre bena' zrin nigá, ne lawe' da zánete iza ba guca lazra' xida' súalena' le'e, ²⁴ dxebeza lazra' tea' xedajnná'a le'e gate cha'a lu xezr la xu España. Gate te sua' xel-la dxebé nen le'e dxebeza lazra' xusi'ile neda' neza, na' cha'a

ná'ala. ²⁵ Na'a cha'a Jerusalén, gu'a late' da gácale na bi bíchedxu zaj zre'e na', ²⁶ lawe' da bi bíchedxu zaj zre'e xezre ca' zaj nababa Macedonia, ne xezre ca' zaj nababa Acaya guléquene' naca xrlátaje bulutube' dumí da xelesel-le' chee bi bíchedxu zaj naque' baxache', zaj zrabe' Jerusalén. ²⁷ Guléquene' naca xrlátaje xelune' da nigá, na' caní naca na lawe' da dxelebague' chee benne' ca', lawe' da benne' judío ca', benne' dxeléajle'e chee Cristo, bulunézruje' chee benne' quebe zaj naque' judío chee da zaj nape' chee Dios, na' benne' caní dxal-la' xulunézruje' chee benne' judío ca' chee da zaj nape' chee xezr la xu nigá. ²⁸ Caní naca, gate xexuzre guna' da nigá, ne ba bnézruja' le' dumí nigá, na' cha'a lu xezr la xu España, na' ca teza' xedajnná'a le'e. ²⁹ Dxuxrén lazra' gate xida' naga zrale le'e, gúale'a da chawe' chee dizra' chawe' chee Cristo.

³⁰ Le'e, bi bícha'dau', dxata' xúeda' le'e ne chee Xránadxu Jesucristo, ne ne chee xel-la zri'i lazre' da dxunna Be' Lá'azxa dxi'u, chee gácale tuze nen neda' guchálajle'dxu Dios chee gácalene' neda'.

³¹ Le naba Dios chee guselé' neda' lu na' benne' quebe dxeléajle'e chee Cristo naga nababa Judea, ne chee xelezi' du lazre' bi bíchedxu zaj zre'e Jerusalén dumí nigá da nu'a, ³² na' che naca da dxaca lazre' Dios, la'a lu dute xel-la dxebé xedajnná'a le'e, ne chee xezí' lazra' naga zrale le'e. ³³ Dxenaba' Dios, Bénnea' dxunne' dxi'u xel-la dxebeza zri lazre', súalene' xúgutele le'e. ¡Ca'an gaca na!

Pablo dxugape' diuzre bi bíchedxu ca'

16 Dxe'gu'a lu na'le nu'ula zandxu Febe, nu'ula na' ba bene' zrin chee Cristo ládujla bi bíchedxu zaj zre'e xezre Cencrea. ² Le si' lu na'le le' cháwedau' lu La Xránadxu, ca dxal-la' gaca ládujla bi bíchedxu dxeléajle'e chee Cristo, na' le gácalene' bíteteze da dxexá'zrenje',

lawe' da ba gúcale le' benne' zan, ne neda'queza'.

³Le gugapa diuzre Priscila ne Aquilo, benne' belún zrin chee Jesucristo tu zren nen neda'. ⁴Benne' caní buluzúe' xel-la nabán chee' lu da štebe chee' gúcalene' neda'. Ca' naca na, dxapa' benne' ca' xcalenle, ne quegaze neda', san cá'anqueze dxelún xúgute bi bíchedxu quebe zaj naque' judío. ⁵Le gugapa diuzre bi bíchedxu ca' dxelezhágabe' lizre Priscila, ne Aquilo. Le gugapa diuzre Epeneto, benne' ljwezra' nazri'ite lazra'. Le' guque' benne' nedxu naga nababa Acaya guxéajle'e chee Cristo. ⁶Le gugapa diuzre María, nu'ula na' ba benle'e zrin ládujla le'e. ⁷Le gugapa diuzre benne' walázh chia', Andrónico, ne Junias, benne' ca' gulaque' ljwezra' lizre xia. Zaj naque' benne' blau ládujla benne' gubáz ca' chee Cristo, na' guléajle'e chee Cristo nédxudxa ca neda'.

⁸Le gugapa diuzre Amplias, benne' ljwezra' nazri'ite lazra' lu La Xránadxu. ⁹Le gugapa diuzre Urbano, benne' ljwezra' lu zrin chee Jesucristo, ne le gugapa diuzre Estaquis, benne' nazri'ite lazra'. ¹⁰Le gugapa diuzre Apeles, benne' blé'ene' da zan lasa ca dxeajlí lazre' Cristo. Cá'anqueze le gugapa diuzre Aristóbulo, benne' xrtia'.

¹¹Le gugapa diuzre Herodión, benne' walázh chia', ne Narciso, benne' xrtia', benne' dxeléajle'e chee Xránadxu. ¹²Le gugapa diuzre Trifena ne Trifosa, nu'ula ca' dxelune' zrin chee Xránadxu, ne le gugapa diuzre Pérsida, bi zandxu nazri'ite lazrdxu, nu'ula na' ba benle'e zrin chee Xránadxu. ¹³Le gugapa diuzre Rufo, benne' blau dxéajle'e chee Xránadxu, ne xrne'e, nu'ula na' naque' ca xrnáqueza'. ¹⁴Le gugapa diuzre Asíncrito, ne Flegonte, ne Hermas, ne Patrobas, ne Hermes, ne bi bíchedxu ca' zralene' le'. ¹⁵Cá'anqueze le gugapa diuzre Filólogo, ne Julia, ne Nereo, ne

nu'ula zane', ne Olimpas, ne xúgute bi bíchedxu dxeleajlí lazre' Cristo, benne' zralene' benne' caní.

¹⁶Le gugapa diuzre ljwézrele tule xetule, gunídate ljwézrele. Xúgute cue' bi bíchedxu dxulugape' le'e diuzre.

¹⁷Le'e, bi bícha'dau', dxata' xúeda' le'e, nna' xánnele benne' ca' dxelune' chupa la'a bi bíchedxu ca', ne dxelune' dxeajlecházie' benne' ca', na' dxulusédene' da dxedábaga na ca da nusédele. Le cuasa naga zaj zra' benne' ca' ¹⁸lawe' da quebe dxelún benne' ca' zrin chee Xránadxu Jesucristo. Dxelune' ca da dzezaca ba lazre' bela' dxen cheequeze', ne dxelezí xe'e benneáchedu ca' quebe ne xeleneze xánnie' ca naca dizra' chawe'. Benne' wen lazre' ca' cadite zaj nupé'e, ne zaj nézene' da dxuluchálaje'. ¹⁹Xúgute bèneache zaj nézene' ca ba bzúale xtizra' Dios. Chee le' na' dxebeda', ne dxaca lazra' gácale ban lazre' gunle da xrlátaje, na' quegá gunle da calela. ²⁰Dios, Bénnea' dxunne' dxi'u xel-la dxebeza zri lazre' ba zúaqueze' gácalene' le'e, chee guchúchujle Satanás da xriwe'. Dxenaba' lau Xránadxu Jesucristo guné' gaca chawe' chee.

²¹Bi bíchedxu Timoteo dxugápabe' le'e diuzre. Nácabe' ljwezra' lu zrin chee Cristo. Cá'anqueze dxulugape' le'e diuzre benne' walázh chia' Lucio, ne Jasón, ne Sosípater.

²²Neda', Tercio, dxuzúaja' xtizra' Pablo caní, dxugapa' le'e diuzre lu La Xránadxu.

²³Gayo dxugape' le'e diuzre, bénnea' zua' lizre', na' dxunne' lizre' naga dxelezhaga xúgute benne' bíchedxu caní. Cá'anqueze dxulugape' le'e diuzre Erasto, benne' xu'u lu ne'e dumí chee xezre, ne bi bíchedxu Cuarto.

²⁴Dxenaba' Xránadxu Jesucristo guné' gaca chawe' chee xúgutele le'e. ¡Ca'na gaca na!

Pablo dxue lá'ane' Dios

²⁵ Na'a, dxue lá'anantu' Dios, Bénnea' séquene' guzé cháchadxe' le'e lu dizra' chawe' da dxuzenda' bèneache, ne lu da dxusédeda' ca naca chee Jesucristo. Da nígá naca na tuze nen da ble'e Dios chee da nagache da gulú'u chawe' bagácheze nédxudaute, ²⁶ san na'a ba ble'e lawe' na ne chee dizra' lá'azxa da buluzúaj

benne' ca' buluchálaje' waláz chee Dios, ca da bdxixruj be'e Dios chadía chacanna. Ba ble'e lau dizra' chawe' nígá na'a lau benne' xúgute xezr la xu chee xeléajle'e chee na, ne xuluzúe' dizra' chee na.

²⁷ Dios, Benne' tu licha', ne Benne' sina, gaca ba Le' chadía chacanna ne chee Jesucristo. ¡Ca'an gaca na!

DIZRA' NEDXU DA BZUAJ SAN PABLO CHEE BI CHEE CRISTO ZAJ ZRE'E XEZRE CORINTO

Pablo dxuzúaje' chee bíchedxu zaj zre'e xezre Corinto

1 Neda', Pablo, naca' benne' bláwizra Dios chee gaca' gubáz chee Jesucristo. Naca na da guca lazre' Dios gaca'. Tu zren nen bíchedxu Sóstenes ² dxuzúaja' da nigá chee le'e, bi bicha', zragale chee Dios lu xezre Corinto. Nácale bi chee Dios lawe' da nácale tuze nen Jesucristo. Dios ba bláwizre' le'e chee gácale bi cheequeze' tu zren nen xúgute benne' ca' zaj zre'e du ca naca xezr la xu, ne dxululáwizre' La Xránadxu Jesucristo, Bénnea' naque' Xrane benne' ca', ne Xránadxu dxi'u. ³ Dxenaba' Xradxu Dios, ne Xránadxu Jesucristo gunne' le'e xel-la dxebeza zri lazre', ne gun chawe'e le'e.

Da chawe' da nápadxu ne chee Cristo

⁴ Dxápequeza' Dios: Xcalenu', ca naca chee le'e ne chee da chawe' da benna Dios le'e ne chee Jesucristo. ⁵ Lawe' da nácale tuze nen Cristo, Dios ba benne' le'e xel-la gunn'a zantę da naca chee Be' Lá'azxa chee', lu da dxuchálajle, ne lu da nézele. ⁶ Ca' naca na, da dxuchálajdxu ca naca chee Cristo ba guca na li chee le'e. ⁷ Ca' naca na, quebe bi dxexázrjele ca da dxunna Dios dxi'u dxácatę dxebézadxu zra xelá' Xránadxu Jesucristo. ⁸ Le' guxru chache' le'e ca zrin zra bzebe, chee quebe nu benne' gaca gusebáguę' le'e zría gate xelá' Xránadxu Jesucristo. ⁹ Dios tu dxúnzqueze' ca da nachebe lazre', naque' Bénnea' bláwizre' le'e chee gácale tuze nen Zrí'ine', Xránadxu Jesucristo.

Dxaca chupa la'a bi chee Cristo

¹⁰ Bi bicha', dxata' xúeda' le'e lu La Xránadxu Jesucristo, chee gácale tuze, ne quebe gácale chupa la'a. Le gaca xanne' tuze, ne tuze da cu'u xichaj lázrdaule, ne da gunle. ¹¹ Da nigá dxapa' le'e, bi bicha', lawe' da buluzén benne' xrtia Cloé neda' dxutfl-lale dizra'. ¹² Da nigá zéaje na nácale chupa la'a, na' bál-lale dxennale: Netu' da'ntu' Pablo. Xezícale' dxennale: Netu' da'ntu' Apolos. Xezícale' dxennale: Netu' da'ntu' Pedro. Xezícale' dxennale: Netu' da'ntu' Cristo. ¹³ ¿Dxéquele naca Cristo chupa la'a? ¿Dxéquele gudá'a neda', Pablo, le'e xaga béguaj waláz chee le'e? ¿Bedxúale le'e nisa lu la Pablo? ¹⁴ Xcalén Dios quebe núlale le'e bchua' nisa san tuze Crispo, ne Gayo ¹⁵ lawe' da quebe nu gaca nna: Lu la Pablo gudxúa' nisa. ¹⁶ Cá'anqueze bchua' nisa benne' xrtia Estéfanos, san quebe dxeajsá lazra' che nu xetú bchua' nisa. ¹⁷ Cristo quebe gusel-le' neda' nu guchúa' nisa, san chee guzenda' benneache dizra' chawe' chee', quegá nen dizra' sina, chee quebe gaca dácheze da ben Cristo gate gutie' le'e xaga béguaj.

Cristo naque' xel-la waca, ne xel-la sina chee Dios

¹⁸ Dizra' ca gute Cristo le'e xaga béguaj naca na ca tu da xálaze lau benne' xelebía xi'e, san cheedxu dxi'u, nápadxu xel-la weselá, dizra' nigá napa na xel-la waca chee Dios. ¹⁹ Naca na ca naxúaj na lu dizra' lá'azxa. Dxenná Dios: Guzría xi'a xel-la sina chee benne' sina ca', ne guzúa' chalá'ala xel-la naxéajni'i chee benne' dxeléajni'ine'.

²⁰ ¿Gazra nagá'ana benne' sina na'a? ¿Waca guselá cuine'? ¿Gazra nagá'ana benne' dxusédenę' benneache? ¿Gazra nagá'ana benne' dxuchálaje' ca naca da dxaca lu xezr la xu nigá? Ca naca

xel-la sina chee xezr la xu nigá, Dios ba nune' na tu da xálaze lawe' da tuze Le' gaca guselé' bénneache. ²¹Dios nézene' xúgute. Quebe be'e lataj bénneache xelúnbe'e Le' ne chee xel-la sina chee bénneache. Bezaca ba lazre' Dios ne chee dizra' nigá bselé' benne' ca' dxuluxrén lazre' Le', lácala zaj zra' benne' dxeléquene' naca dizra' nigá tu da xálaze.

²²Benne' judío ca' dxelaca lazre' xeledé'ene' xel-la waca da za xabáa, na' benne' griego ca' dxelexílaje' xel-la sina, ²³san dxi'u dxuzendxu bénneache ca naca chee Cristo, ca gutie' le'e xaga béguaj. Benne' judío dxelexedué'ene' chee dizra' nigá, na' benne' quebe zaj naque' judío dxeléquene' naca na tu da ca zeaje na. ²⁴Na'a, benne' ca' ba bláwizra Dios, benne' judío ca', ne benne' quebe zaj naque' judío, Cristo nácaqueze' xel-la waca, ne xel-la sina chee Dios. ²⁵Da dxeleque bénneache naca tu da xálaze chee Dios nácadxa na sina ca xel-la sina chee bénneache, na' da dxeleque bénneache naca na tu da naca bea nate ni'a na' Dios nápadxa na xel-la waca ca xel-la waca chee bénneache. ²⁶Le'e, bi bicha', dxal-la' gueque be'ele ba bláwizra Dios le'e lácala bábaze le'e nácale sina lau bénneache chee xezr la xu nigá, ne bábaze le'e nácale xel-la dxenná bea, u nácale xrtia benne' zaj naque' blau. ²⁷Dios ba guqué'e benne' ca' dxeleque bénneache zaj naque' benne' xálaze, chee xelexedué'e benne' sina ca', ne ba guqué'e benne' ca' dxeleque bénneache zaj nate ni'a ne'e, chee xelexedué'e benne' wal-la ca'. ²⁸Dios ba guqué'e benne' ca' quebe zaj naque' blau, ne benne' ca' zaj nuzúa bénneache chalá'ala, benne' ca' quebe nu zaj naque', chee guzague' naze benne' zaj naque' blau, ²⁹chee quebe nu seque' gucá'ana szren cuina lau Dios. ³⁰Diósqueze ba nune' le'e tuze nen Jesucristo, ne nune'

naca Cristo Benne' dxunna dxi'u xel-la sina, ne Benne' gucá'ana dxi'u xrlátaje, ne Benne' dxuzúe' dxi'u lu na' Dios, ne benne' dxexá'awe' dxi'u. ³¹Ca' naca na ca da naxúaj na lu dizra' lá'azxa, da dxenná na: Che nu benne' dxaca lazre' nu gucá'ana szrene', dxal-la' gucá'ana szrene' Xránadxu.

Dizra' ca naca chee Cristo, gudé'e xaga béguaj

2 Na'a, bi bícha'dau', gate bedajchála-jlena' le'e da li chee Dios, quebe bchíneda' dizra' sina, ne dizra' zaca. ²Gate ne zúalena' le'e quebe guca lazra' guchálaja' chee bila da xetú san tuze chee Jesucristo, Bénnea' gudé'e xaga béguaj. ³Gate guzúalena' le'e ne nátete ni'a na'a, ne guzrízetea' lawe' da bzreba' quebe guca guna' da nusebaga' Cristo neda'. ⁴Gate bchálajlena' le'e, ne bzenda' le'e dizra' chawe', quebe guca lazra' guna' chéajjle chee' nen dizra' sina chee bénneache da guchálaja', san bena' guxéajjle chee' ne chee Be' Lá'azxa, ne ne chee xel-la waca chee Dios ⁵chee gápale xel-la dxeajlí lazre' da naca na ne chee xel-la waca chee Dios, ne quegá ne chee xel-la sina chee bénneache.

Dios dxul'é cuine' ne chee Be' Lá'azxa

⁶Dxuchálajntu' dizra' sina lau benne' ca' ba zaj ze chache' lu xel-la dxelejli lazre' chee'. Xel-la sina nigá quebe naca na xel-la sina chee xezr la xu nigá, ne chee benne' dxelenná be'e lu xezr la xu nigá, benne' ca' xeledé' chie'. ⁷Dxuchálajntu' xel-la sina nagache chee Dios, da na' bzua Dios nédxudaute' ca bene' xezr la xu nigá, chee ladxu chadía chacanna. ⁸Netú benne' ca', benne' dxelenná be'e lu xezr la xu nigá, quebe guléajni'ine' da nigá, lawe' da la guléajni'ine' na quebe buludé'e Xránadxu, Benne' xabáa, le'e xaga béguaj. ⁹Naca na ca da naxúaj na lu dizra' lá'azxa, dxenná na:

Dios ba nucueze' chee benne' ca' zaj nazrí'ine' Le'
da ca' quebe nu ne le'e, ne quebe nu ne xen,
ne da quebe nu ne cu'u lazre'.

¹⁰ Da caní zaj naca na da ble'e Dios dxi'u ne chee Be' Lá'azxa nase-la Le', lawe' da dxel'é Be' Lá'azxa xúgute da de, ne dute da xu'u na lu xichaj lázrdau Diósqueze.

¹¹ Ládujla bèneache, ¿nu seque' neze da xu'u lu xichaj lázrdau xetú benne', san tuze be' da nacaqueze'? Cá'anqueze, tuze Be' Lá'azxa chee Dios nézene' da xu'u lu xichaj lázrdau Dios. ¹² Be' Lá'azxa da xú'udxu quebe naca na chee xezr la xu nigá. Nazidxu Be' Lá'azxa da dxunna Dios dxi'u chee chéajni'idxu da ca' ba nunna Dios dxi'u. ¹³ Dxucháaljntu' ca naca da caní nen dizra' da bsede Be' Lá'azxa chee Dios netu', ne quegá nen dizra' da bsédentu' lu xel-la sina cheentu'. Ca' naca na, dxuzéajni'intu' benne' zaj nazi'e Be' Lá'azxa chee Dios da nusede Be' Lá'azxa nigá dxi'u.

¹⁴ Nu benne' quebe nazi'e Be' Lá'azxa chee Dios quebe dxezí' lu ne'e da zaj naca na chee Be' Lá'azxa chee Dios, lawe' da dxéquene' zaj naca na tu da xálaze. Quebe dxezeque' chéajni'ine' na lawe' da zaj naca na da dxéajni'idxu tuze ne chee Be' Lá'azxa. ¹⁵ Bènea' nazi'e Be' Lá'azxa chee Dios dxezéquene' chéajni'ine' xúgute da dxulé'e Be' Lá'azxa le'. Benne' quebe zúale Be' Lá'azxa le', quebe séquene' chéajni'ine' da dxuséde Be' Lá'azxa dxi'u. ¹⁶ Naxúaj lu dizra' lá'azxa da dxenná na: ¿Nuzra ba guxéajni'i da xu'u xichaj lázrdau Xránadxu? ¿Nuzra benne' séquene' guxéajni'ine' Dios? Dxi'u nazidxu ca da xu'u xichaj lázrdau Cristo.

Benne' dxelune'

tu zren Dios lu zrin chee'

3 Na'a, le'e, bi bícha'dau', quebe guca guchálajlena' le'e ca dxuchálajlena' benne' ca' zúale Be' Lá'azxa chee Dios

le', san bchálajlena' le'e ca dxuchálajlena' benne' ca' quebe zúale Be' Lá'azxa le', lawe' da ne nácale ca bidu ca' lu da naca chee Cristo. ² Bsédeda' le'e da quebe zaj naca na stebe da naca na ca da dxugágudxu bidu dxéene, bidu ne dxázrebe', ne quebe gaca gágube' xel-la wagu da naca na zibaj, lawe' da quebe ne séquele chéajni'ile da zaj naca na stebe. Cá'anqueze na'a quebe ne séquele chéajni'ile da ne nácale ca zaj naca benne' cun ca nalaje'. Dxácaté ne xu'ule xel-la zre lazre', ne dxutil-la ljwézrele dizra' ne nácale chupa la'a, ne nácale ca zaj naca benne' cun ca nalaje', ne dxunle cáteze dxelún xúgute bèneache. ⁴ Dxácaté ne dxennale: Netu' da'ntu' Pablo, na' xezícale dxennale: Netu' da'ntu' Apolos, ne dxunle ca dxelún benne' cun ca nalajze'.

⁵ Na'a, ¿nuzra na' Pablo? ¿Nuzra na' Apolos? Nácantu' wen zrin chee Dios, na' ne chee netu' guxéajlele chee Xránadxu. Tu tuntu' bentu' zrin chee Xránadxu da bléene' netu'. ⁶ Neda' guza' binnedu ca' lu xichaj lázrdau, bchálajlena' le'e xrtizra Dios, na' Apolos gudile' na, san Dios bsegule' na. ⁷ Ca' naca na, ne benne' dxaze', ne benne' dxile' na, quebe bi zaque', san Dios na' dxune' xúgute, lawe' da dxusegule' da du ca'. ⁸ Benne' dxelaze', ne benne' dxelile' zaj naque' lébete, san Dios quízruje' tu tu benne' caní ca naca zrin da belune'. ⁹ Nácantu' wen zrin tu zren nen Dios, na' le'e nácale ca tu xezr la xu naga dxun Dios zrin.

Cá'anqueze nácale ca tu xu'u da dxun Dios. ¹⁰ Neda' naca' ca tu wen xu'u blau, na' Dios benne' neda' lataj gulecha' lane na, na' benne' xula dxusegule' ze'e na'. Tu tu benne' dxal-la' guxúe xánnie' ca dxusegule' na. ¹¹ Québedxa nu seque' cueche' xetú lane ca da ba dxé', da na' naca na Jesucristoqueze, ¹² san waca nu benne' gusegule' lawe' na da zaca na ca oro, ne plata, ne xiaj da zaj zaca, u waca

gusegule' lawe' na da quebe zaca na ca blaga', ne xizre, ne luaj laga'. ¹³Zrin da nun tu tu benne' gulé'eqeze lawe na lu zra guchi'a Dios, lawe' da lu zra na' la' tu xi', na' lu xi' na' gulé'e lawe na ca naca zrin nun tu tudxu. ¹⁴Che nu benne' nune' tu zrin da quebe chezxe na lu xi', na' wazi'e lazruj chee'. ¹⁵Che chezxe zrin na', ca naca na nite na, san lé'queze' walé', ca tu benne' dxexedxúaje' lu xi'.

¹⁶¿Quebe nézele le'e nácale xudau' chee' Dios, na' Be' Lá'azxa chee' Dios zue' lu xichaj lázrdaule? ¹⁷Che nu benne' gucá'ana dítaje' xudau' nigá chee' Dios, Dios guzría xi'e bénnea' lawe' da naca lá'azxa xudau' chee' Dios, na' lé'eqezle nácale xudau' na'.

¹⁸Quebe si xē cuínale. Che núlale dxéquele nácale benne' sina lu da naca chee' xezr la xu nigá, dxal-la' xun cuínale ca tu benne' quebe bi dxaque', chee' gunna Dios le'e xel-la' sina li. ¹⁹Xel-la' sina chee' xezr la xu nigá naca na tu da xálaze lau Dios. Naxúaj lu dizra' lá'azxa da dxenná na: Dios dxun zréajane' benne' sina ca' lu xel-la' sina da zaj nápaqueze'. ²⁰Cá'anqueze dxenná na: Xránadxu nézene' quebe bi zaca da dxululaba lazre' benne' sina ca'. ²¹Chee' le' na' quebe nu benne' dxal-la' gun szren cuine' lawe' da de'e tu benne', lawe' da Dios dxunne' le'e xúgute' da ca' dxechínnele. ²²Pablo, ne Apolos, ne Pedro, ne xezr la xu nigá, ne xel-la' nabán, ne xel-la' gute, ne na'a zra, ne da za za', ne xúgute' da ca' zaj naca na chee' gaca da chawe' chee, ²³na' lé'eqezle xu'ule lu na' Cristo, na' Cristo xu'e lu na' Xradxu Dios.

Zrin dxelún benne' gubáz chee' Cristo

4 Ca' naca na, dxal-la' guéquele nácazentu' wen zrin chee' Cristo, ne nabágantu' gusédentu' bénneache da zaj nagache chee' Dios. ²Na'a, benne' nabague' tu zrin, dxun na ba xen gaque'

li lazre'. ³Neda' quebe dxe'a gunne xue bi dxéquele naca' neda', u bi dxeleque bénneache naca'. Quebe gaca nnia' xrlátaje u quegá chee' da nuna' ⁴lawe' da lácala quebe dxagu na zria neda' lázrdawa', da nigá quebe dxulé'e na quebe nabaga' zria. Xránadxu naque' Benne' dxuchi'e ca da dxuna'. ⁵Ca' naca na, quebe guchí'ale chee' da ca' che quebe ne zrin zra. Le cueza zra xelá' Xránadxu, na' xebéaje' lu xel-la' naxaní' ca naca da nagache lu da chul-la. Xránadxu gulé'ene' ca naca da dxulaba lázredxu, na' Dios gulé'ene' chawe' tu tudxu ca da dxal-la' sidxu.

⁶Le'e, bi bicha', dxuchálajlena' le'e da caní chee' gaca chawe' cheele, dxuzúa' ca tu da gulé'e na le'e Apolos, ne néda'queza'. Dxennía' da nigá chee' gusédele ne chee' netu' chee' quebe gundxale ca da dxue lataj dizra' lá'azxa le'e, ne chee' quebe gucá'ana szren cuínale, ne chee' quebe guzúale chalá'ala le sa' ljwézrele. ⁷¿Nuzra nun lue' blaudxa ca xezícadxa benne'? ¿Bizra napu' da quebe nunna Dios lue'? Che Le' benne' chiu' da na', ¿bizr chee' na' dxucá'ana szren cuinu', dxéquenu' lu'é'queze gudilju' da na'?

⁸¿Nácale le'e benne' gunní'a? ¿Nápale xúgute' da dxechínele? ¿Dxequele nácale wenná bea lácala quebe nácantu' netu' wenná bea? Xrlátaje dxgua la nácaquezele wenná bea chee' guntu' netu' le'e tu zren lu xel-la' dxenná bea chee. ⁹Dxéqueda' Dios nuzúe' netu', benne' gubáz chee', lu lataj bzebe. Nácantu' ca benne' ba zaj nabía xi' chee' gátentu'. Nácantu' ca tu da dxuzé na lau bénneache, na' dxelenná' gubáz chee' xabáa ca', ne bénneache netu'. ¹⁰Dxeleque bénneache nácantu' netu' tu da xálaze lawe' da dxuntu' zrin chee' Cristo, san le'e dxéquele dxéajni'i xánnele da zaj naca chee' Cristo. Dxeleque bénneache nate ni'a na'ntu' netu' san le'e dxéquele nácale

le'e benne' wal-la. Dxuluzúa bénneache netu' chalá'ala, san dxelape' le'e ba lá'ana. ¹¹ Ga bzrinte lu zra na'a zra dxeduntu', ne dxebíentu', ne nácantu' gala xídeze, na' bénneache dxulucháchalene' netu', ne quebe zua lízrentu'. ¹² Dxexedú lázrentu' dxuntu' zrin. Dxelenné bénneache schanni' cheentu', san netu' dxexechébentu' dizra' chawe'. Zaj nau zi' xuzre' netu' san dxuchaga launtu' na. ¹³ Dxelenné' schanni' cheentu', san netu' dxuchálajentu' le' da li dute xel-la zren lazre' cheentu'. Dxelune' netu' ca tu xizre bebe, ne ca tu da ba guca ditaj chee bénneache ca lu zra na'a zra.

¹⁴ Quegá dxuzúaja' chee le da nigá chee xedu'éle, san chee guzéajni'ida' le'e, nácale ca bi chia' nazri'ite lazra'. ¹⁵ Lácala zaj zúale le'e gaxúa gaxúane benne' dxulusédené' le'e ca naca chee Cristo, quebe nu zua xetú xrale. Néda'queza' naca' xrale lu xel-la dxeajlí lazre' chee le Cristo lawe' da bzenda' le'e dizra' chawe' chee Jesucristo. ¹⁶ Ca' naca na, dxata' xúeda' le'e gunle ca dxuna' neda'.

¹⁷ Chee le na' dxusel-la' Timoteo xedajná'abe' le'e, nácabé' ca bi li lazre' chia' nazri'ite lazra', lu da naca chee Xránadxu. Lebe' gusá'abe' lázrele ca dxuna' lu da naca chee Cristo, ne ca naca da dxusédeda' bénneache gáteteze na', ne lau xúgute cue' bi chee Cristo. ¹⁸ Bál-lale le'e ba nucá'ana szren cuínale lawe' da dxéquele quebe xida' xedajnnaba' le'e, ¹⁹ san dxebeza lazra' xídazequeza' xedajnná'a le'e che gunna Xránadxu lataj. Nadxa le'eda' da dxelezeque' xelún benne' ca' dxulucá'ana szren cuine', ne quegá tuze da dxeleenné'. ²⁰ Che dxenná be'e Dios dxi'u quebe naca na chee tu da dxuchálajzedxu. Lécaze' ba nunne' dxi'u xel-la waca chee'. ²¹ ¿Bizra dxaca lázrele le'e? ¿Dxaca lázrele gun na ba xen gudéa' le'e xel-la zi', u che xida' xedajnná'a le'e lu xel-la zri'i lazre', ne xel-la dxexruj lazre'?

Pablo dxuchi'e chee tu da sban

5 Ba benda' zua tu benne' ládujla le'e nuné' ca zru'ule' xrna zie'. Da nigá naca na tu da sbánle'e da quebe ne xelún benne' quebe zaj núnbe'ene' Dios. ² Ca naca da na' le'e ne dxucá'ana szren cuínale. Dxal-la' cuezre xáchele. Bénnea' nuné' da nigá dxal-la' xebéajle le' ládujla le'e. ³ Quebe zua' neda' naga zúale lu bela' dxen chia', san naca cáteze zúalena' le'e lu be' nácaqueza', na' ba bchi'a chee bénnea' nuné' dul-la nigá ca tu benne' zúaletequeze le'e. ⁴ Le zraga le'e lu La Xránadxu Jesucristo, na' gaca na cáteze neda' súalena' le'e lu be' nácaqueza', na' xel-la waca chee Xránadxu Jesús suale na le'e. ⁵ Nadxa dxal-la' xudele bénnea' lu na' Satanás da xriwe', na' lácala cuía xi' bela' dxen chee' na' be' nácaqueze' la na lu zra xelá' Xránadxu Jesús.

⁶ Quebe dxal-la' gucá'ana szren cuínale ca naca da dxunle. ¿Quebe núnbeale dizra' na' dxenná na: Láteze cua zichaj dxuchazra na ca naca cua na'? ⁷ Le xebéaj chalá'ala cua zichaj gula na' da dxuxrinnaj na le'e, chee gácale ca tu xeta xtila da dxágudxu Laní Pascua, da dxundxu nen cua cube da quebe nachixre na cua zichaj, ca da li nácale le'e. Crístoqueze gutie' waláz cheedxu. Naque' cheedxu zrila', be dxelutie' laní pascua. ⁸ Ca' naca na, dxal-la' gupá'adxu Laní Pascua cheedxu lu da naca du lazre', ne lu da li, da ca' zaj naca na ca xeta xtila da quebe nachixre na cua zichaj. Quebe gupá'adxu na lu da calela, ne lu da zrinaj, da ca' zaj naca na ca cua zichaj gula na'.

⁹ Lu da bzujaja' chee le nédxudxa gucha' le'e quebe guchixre chee le nen benne' ca' dxelune' da sban. ¹⁰ Quebe gucha' le'e xecuásatequezele chee benne' zaj zre'e xezr la xu nigá, benne' dxelune' da sban, ne benne' wecude' ca', ne benne' gubán ca', ne benne' dxelúe lá'ane'

bedáu' xiaj xaga ca', lawe' da chee quebe guchixre chee nen benne' caní, dxun na ba xen xedxúajle xezr la xu nigá. ¹¹ Da guca lazra' xapa' le'e naca na chee quebe guchixre chee nen netú benne' dxenné' naque' bíchedxu, san dxuné' da sban, u naque' benne' wecude', u dxue lá'ane' bedáu' xiaj xaga, u dxutupe' dizra' bizruj, u dxí'aje', u naque' gubán. Quebe dxal-la' gágulele benne' caní. ¹²⁻¹³ Quegá naca chia' guchi'a chee benne' dxeledá cúzrela. Dios guchi'e chee benne' ca'. Le'e dxal-la' guchí'ale chee benne' zaj naque' bi bíchedxu. Chee le na' le xebéaj benne' dul-la na' ládujla le'e.

Zria da dxelagu ljwezre bi ca' chee Cristo

6 Gate tule le'e zua da dxaca chee nen xetule le'e, ¿bizr chee na' dx-eajle lau benne' dxuchi'e da dxaca, na' quebe dxéajle'e chee Cristo, ne quebe dx-eajle lau bi bíchele? ² ¿Quebe nézele le'e, benne' zaj naca bi chee Dios xuluchí'e ca da dxelún bènneache chee xezr la xu nigá? Che le'e guchí'ale chee bènneache lu xezr la xu nigá, ¿quebe naca chee guchí'ale chee tu da dauze? ³ ¿Quebe nézele le'e guchí'adxu chee gubáz chee xabáa ca'? Cá'anqueze dxal-la' guchí'adxu da naca chee xezr la xu nigá. ⁴ Che le'e zua da dxaca chee lu xezr la xu nigá, ¿bizr chee na' dx-eajle lau benne' ca' quebe nu zaj naque' ládujla bi bíchedxu ca' chee xuluchí'e chee da na'? ⁵ Da nigá dxapa' le'e chee gapa stu'le. ¿Quebe nu chilá' ládujla le'e nu bíchedxu, benne' naxéajni'ine' chee guchi'e tu da dxaca chee bi bíchedxu ca'? ⁶ ¿Dxun na ba xen tu bi bíchedxu chea-jtágube' zria da dxaca chee benne' nen benne' ljwézrebe' lau tu benne' dxuchi'e da dxaca, na' quebe naque' bi chee Dios? ⁷ Che zua da dxedíl-lalele biche ljwézrele, naca na tu zria da ba nabágate. ¿Bizr chee na' quebe

dxucá'anale na cá'aze? ¿Bizr chee na' quebe dxuele lataj nu benne' cuane' chee? ⁸ Le'e dxunle da quebe naca na xrlátaje, ne dxebanle, na' dxunle caní chee bi bíchele.

⁹⁻¹⁰ ¿Quebe nézele le'e, quebe xelexú'u benne' wen da calela naga dxenná bea Dios? Quebe güele lataj nu si xe le'e. Quebe xelexú'u naga dxenná bea Dios benne' ca' dxelune' da sban, ne benne' ca' dxelúe lá'ane' bedáu' xiaj xaga, ne benne' ca' dxelezúalene' zru'ula benne' xula, ne benne' ca' dxeledálene' ljwezre biue', ne benne' gubán ca', ne benne' wecude' ca', ne benne' ca' dxelé'aje', ne benne' ca' dx-ulutupe' dizra' bizruj, ne benne' ca' dxu-lucache lane'. ¹¹ Caní gúcale bál-lale le'e, san na'a bache bexádxele lu xichaj lázr-daule, ne nuzúa cuínale lu na' Dios, na' nazi' lu ne'e le'e lu La Xránadxu Jesús ne chee Be' Lá'azxa chee Dios cheedxu.

Naca lá'azxa bela' dxen cheedxu

¹² Da li naca da dxelenné': Nápadxu lataj gundxu da dxaca lazre' tu tudxu. Quegá xúgute na naca na da ba neza. Awe', napa tu benne' lataj guné' da dxaca lazre', san quebe dxal-la' gu'e lataj bi da nna be'e na le'. ¹³ Naca da li da dxelenné': Xela wagu naca na chee le'edxu, na' le'edxu naca na chee xel-la wagu, san Dios gusexuzre' dxúpaté na. Quebe naca bela' dxen cheedxu chee gun na da sban. Bela' dxen cheedxu naca na da gunézrujdxu chee Xránadxu, na' Xránadxu naque' Bènnea' guchínene' bela' dxen cheedxu lu da xrlátaje. ¹⁴ Ca ben Dios bsebané' Xránadxu ládujla benne' gate ca', cá'anqueze gusebané' dxi'u nen xel-la waca chee'.

¹⁵ ¿Quebe nézele le'e bela' dxen chee naca na chee Cristo? ¿Wacá'a tu da naca na bela' dxen chee Cristo, ne guchaga' na nen bela' dxen chee tu nu'ula wen da sban? ¿Cabata! ¹⁶ ¿Quebe nézele le'e gate tu benne' biu dxuchague' tu nu'ula

wen da sban dxúpatē' zaj naque' ca tuze bēla' dxen? Naxúaj lu dizra' lá'azxa da dxenná na: Dxúpatē' xelexaque' tuze bēla' dxen. ¹⁷ Gate tu benne' dxuchague' Xránadxu, dxexaque' tuze be'.

¹⁸ Le guzrunnaj chee da sban. Zaj nita dul-la xula da dxun benne' da quebe dxulucá'ana ditaj na bēla' dxen chee', san benne' dxuchague' nu'ula quebe naca zru'ule' dxune' dul-la lu bēla' dxen chee'queze'. ¹⁹ ¿Quebe nézele le'e naca bēla' dxen chee'le xudau' chee' Be' Lá'azxa, Béneea' nunna Dios le'e, na' Be' Lá'azxa zue' xichaj lárdaule? Quebe nácale xrana bēla' dxen chee'le, ²⁰ lawe' da guz'í Dios le na nen tu lazruj zrente. Chee le na', dxal-la' gápale ba lá'ana Dios nen bēla' dxen chee'le, ne nen be' nácaquezle, lawe' da dxúpatē na' zaj naca na chee Dios.

Ca naca chee xel-la dxuchaga na'

7 Na'a xechēba' ca zaj naca da bché-bele neda'. Da li naca xrlátaje quebe guchaga na' tu benne'. ² Lawe' da dxácale'e da sban naga zúale, tu tu benne' biu dxal-la' súalene' nu'ula chee'queze', na' tu tu nu'ula dxal-la' súalene' benne' biu chee'queze'. ³ Benne' biu dxal-la' gune' nen zru'ule' da nabague' chee zru'ule', na' cá'anqueze nu'ula dxal-la' gune' nen benne' biu chee' da nabague' chee benne' chee'. ⁴ Nu'ula na' quebe naque' xrana bēla' dxen chee', san naca na chee benne' biu chee'. Cá'anqueze benne' biu quebe naque' xrana bēla' dxen chee', san naca na chee zru'ule'. ⁵ Quebe dxal-la' xeledábaga ljwezre', san tuze gate xelezúe' xel-la wezría tu chí'idauze chee xuluzúa cuine' lau Dios chee xuluchájlene' Le'. Te na' dxal-la' xuluchaga ljwezre' chee quebe sequē Satanás nna be'e na le' che quebe xelezéquene' xelenná be'e cuine'.

⁶ Da nigá dxapa' le'e naca na tu da dxue le'e lataj. Quebe naca na tu da nadx-

ixruj bea na. ⁷ Neda' dxezá lazra' súale xúgutele ca zua' neda', san Dios ba nunne' tu tudxu da gaca gundxu. Tu da nunne' tudxu, na' da xula xetudxu.

⁸ Dxapa' benne' wegū, ne nu'ula wezebe, naca xrlátaje xelexegá'ane' cá'aze ca zua' neda'. ⁹ Che quebe xelezéquene' xelenná be'e cuine', waca xuluchaga ne'e, lawe' da nácadxa xrlátaje xuluchaga ne'e quézcala xeledé'e ba xa' lu bēla' dxen chee'.

¹⁰ Benne' zaj nuchaga ne'e dxapa' nu'ula quebe gusanē' benne' biu chee'. Quebe naca cheeza' da nadxixruj bea nigá, san naca na da dxun Xránadxu. ¹¹ Che nu nu'ula gusanē' benne' biu chee', dxal-la' xegá'ane' cá'aze, u xexaque' tuze nen benne' biu chee' na'. Cá'anqueze benne' biu quebe dxal-la' gusanē' zru'ule'.

¹² Dxapa' xezícadxa benne' néda'queza', quegá Xránadxu, che zru'ula tu bi bíchedxu quebe dxéajle'e chee Xránadxu, dxéquene' xrlátaje zúalene' benne' chee', bi bíchedxu na' quebe dxal-la' gusanē' le'. ¹³ Che benne' biu chee tu nu'ula zandxu quebe dxéajle'e chee Xránadxu, san dxéquene' xrlátaje zúalene' zru'ule', nu'ula zandxu na' quebe dxal-la' gusanē' benne' biu chee' na'. ¹⁴ Benne' biu na' quebe dxéajle'e chee Xránadxu naque' ca tu bi chee Dios lawe' da nuchague' zru'ule' dxéajle'e chee Xránadxu, na' nu'ula na' quebe dxéajle'e chee Xránadxu naque' ca tu bi chee Dios lawe' da nuchague' benne' biu chee' dxéajle'e chee Xránadxu. La quebe naca na caní, zrí'inele le'e xelácabe' ca zri'ine benne' quebe zaj naque' chee Dios, san da li zaj nácabe' ca bi chee Dios. ¹⁵ Che benne' biu na' u zru'ule', benne' quebe dxéajle'e chee Xránadxu, dxaca lártequeze' gusanē' ljwezre', waca na. Che caní dxaca chee tu bi bíchedxu u chee tu bi zandxu, nape' lataj lawe' da gunné Dios dxi'u chee cueza zri lárzedxu. ¹⁶ Che

quebe gaca caní, quebe nézenu' lue', nu'ula, che wazéquenu' cu'u benne' biu chiu' lu na' Cristo, na' lue', benne' biu, quebe nézenu' che wazéquenu' cu'u zru'ulu' lu na' Cristo.

¹⁷ Ájateze naca, tu tudxu dxal-la' gundxu ca naca da nunna Xránadxu dxi'u, ne xegá'anadxu cáteze nácadxu gate gunné Dios dxi'u. Caní dxapa' xúgute cue' bi chee Cristo. ¹⁸ Che Dios dxenné' tu benne' biu nadxugu lu belá' chee' da dxul'é na naque' bi chee Dios, benne' nigá dxal-la' xegá'ane' ca', na' che dxenné Dios tu benne' quebe nadxugu lu belá' chee' da na', quebe dxal-la' chugu lu belá' chee' da na'. ¹⁹ Quebe bi naca che nadxugu da na' lu belá' cheedxu, u quebe. Da dxun na ba xen naca gundxu da dxaca lazre' Dios. ²⁰ Tu tudxu dxal-la' xegá'anadxu cáteze nácadxu gate Dios dxenné' dxi'u chee gácadxu bi chee'. ²¹ Che gucu' benne' nada'u gate Dios gunné' lue', quebe cue'u gunne xue, san che gapu' lataj gacu' benne' quebe nada'u, dxal-la' guchínenu' na. ²² Bénnea' guque' benne' nada'u gate gunné Xránadxu le' naque' ca benne' quebe nada'u chee guné' zrin chee Xránadxu, na' cá'anqueze bénnea' quebe naque' benne' nada'u gate gunné Xránadxu le', naque' ca benne' nada'u chee Xránadxu. ²³ Dios ba ná'awe' le'e nen tu lazruj zrente. Quebe güele lataj nu benne' guné' le'e benne' zaj nada'u. ²⁴ Ca' naca na, bi bicha', tu tudxu dxal-la' xegá'anadxu lau Dios cáteze nácadxu gate gunné' dxi'u.

²⁵ Ca naca chee benne' ca' quebe zaj nuchaga ne'e quebe bi gunná be'e Xránadxu neda', san dxapa' le'e ca da dxéqueda', na' waca guxrén lázrele neda' lawe' da bexache lazre' Xránadxu neda'. ²⁶ Dxéqueda' neda' dxal-la' xegá'ana tu benne' biu cáteze naque' lawe' da zúadxu zra stébele'e. ²⁷ Che nuchagu' nu'ula quebe cuasu' le', na' che quebe nuchagu' nu'ula, quebe guchaga na'u. ²⁸ Che

guchaga na'u, quebe gunu' dul-la, na' che tu nú'uladau' guchaga na'abe', quebe gunbe' dul-la. Benne' ca' dxuluchaga ne'e welezúe' stébe lu zra caní, na' dxaca lazra' quebe súale stébe caní.

²⁹ Bi bícha'dau', da nigá dxaca lazra' xapa' le'e. Xelátega ne de súadxu lu xezr la xu nigá. Ná'atela benne' zaj nuchaga ne'e dxal-la' guné' da naca chee Cristo ca dxelún benne' quebe zaj nuchaga ne'e. ³⁰ Benne' dxelebezre xache' dxal-la' xelune' da naca chee Cristo ca dxelún benne' quebe zaj naque' baxache'. Benne' zaj zra' laní dxal-la' xelune' da naca chee Cristo ca dxelún benne' quebe zaj zué' xel-la dxebe', na' benne' dxelá'awe' dxal-la' xelune' da naca chee Cristo ca dxelún benne' quebe zaj nape' da na' dxelá'awe'. ³¹ Benne' dxelezi'e ba neza lu xezr la xu nigá dxal-la' xelune' da naca chee Cristo ca dxelún benne' quebe dxelezi'e ba neza na, lawe' da ba dxexuzre lazre' xezr la xu nigá.

³² Dxaca lazra' quebe bi cue'le gunne xue. Gate tu benne' biu nácabe' wegú' dx'e'ebe' gunne xue da naca chee Xránadxu chee gunbe' da dxezaca ba lazre' Xránadxu. ³³ Gate ba nuchaga ne'e, dxe'e gunne xue da naca chee xezr la xu nigá chee guné' da dxezaca ba lazre' zru'ule'. ³⁴ Cá'anqueze dxaca chee nu'ula zua benne' biu chee', ne nu'ula wegú'. Nu'ula wegú' dx'e'ebe' gunne xue da naca chee Xránadxu chee chu'ube' lu na' Dios duté belá' dxen cheebe', ne duté be' cheebe', san nu'ula zua benne' biu chee' dx'e'e gunne xue da naca chee xezr la xu nigá chee guné' da xezaca ba lazre' benne' chee'.

³⁵ Dxapa' le'e da nigá chee gaca chawe' cheele, ne quebe chee nna be'eda' le'e, san chee gunle da xrlátaje, ne da li, chee chu'ule du lázrele lu na' Xránadxu.

³⁶ Che nu benne' dxéquene' nácadxa xrlátaje guchaga na' zr'íne' nu'ula lawe' da ba dxedé xel-la cuide' cheebe', ne

naca da dxal-la' gunbe', dxal-la' gunē' da dxéquene' naca xrlátaje. Waca guchaga na'abe'. Quebe naca na dul-la. ³⁷Che nu benne' quebe dxéquene' dxun na ba xen, ne che nape' lataj gunē' da dxaca lazre', ne che ba nune' lu xichaj lázrdawe' xegá'ana zrí'ine' nu'ula wegu', dxune' da xrlátaje. ³⁸Ca' naca na, benne' dxu'e' lataj guchaga na'abe' zrí'ine' nu'ula, dxune' da xrlátaje, na' bēnea' quebe dxu'e' lataj dxune' da nácadxa xrlátaje.

³⁹Nu'ula zua benne' biu chee' nuchague' bēnea' ne chee' da nadxixruj bea na dxácate ne zue' nabane', san che gate benne' chee', de' lataj nu'ula na' guchaga ne'e' nen núteteze benne' biu, san dxun na ba xen dxéajle'e' chee' Xránadxu. ⁴⁰Gácadxa chee' da ba neza che xegá'ane' cá'aze. Caní dxéqueda' neda', ne dxéqueda' dxun Be' Lá'azxa chee' Dios neda' tuze.

Xel-la wagu da zaj nuzúa bēneache lau bedáu' xiaj xaga

8 Na'a guchálaja' ca naca chee' xel-la wagu da zaj nuzúa bēneache lau bedáu' xiaj xaga. Da li xúgutēdxu nápadxu xel-la dxéajni'i ca naca da nigá. Xel-la dxéajni'i dxun na dxi'u benne' dxulucá'ana szren cuína, san xel-la zri'i lazre' dxusegula na dxi'u lu xel-la dx-eajlí lazre' cheēdxu. ²Che nu benne' dxéquene' nape' dute' xel-la dxéajni'i, quebe ne chéajni'ine' ca dxal-la' chéajni'ine'. ³Che nu benne' nazrí'ine' Dios, Dios ba nazí' lu ne'e' bēnea'.

⁴Na'a, ca naca chee' xel-la wagu da zaj nuzúa bēneache lau bedáu' xiaj xaga, nezdxu quebe bi naca tu bedáu' xiaj xaga lu xēzr la xu nigá, ne tuze Bēnea' naque' Dios. ⁵Lácala zaj zra' xabáa, ne xēzr la xu nigá da zantē da dxeleque bēneache zaj naca na dios, ne chee' benne' caní zantē dios zaj zra na, ne zantē xranē' zaj zra na, ⁶cheēdxu dxi'u che nácadxu chee' Cristo, tuze Bēnea' naque' Dios, Bēnea'

naque' Xradxu. Xradxu Dios bene' xúgute da de, na' dxi'u zúadxu chee' guchínene' dxi'u. Cá'anqueze tuze Bēnea' naque' Xránadxu, Jesucristo. Ne chee' Le' guzrá' xúgute da de, na' zúadxu dxi'u ne chee' Le'.

⁷Quegá xúgute bi chee' Cristo zaj nézene' da nigá. Bal-la benne' caní gulú'u lawe' belúe lá'ane' bedáu' xiaj xaga, na' gate dxelawe' xel-la wagu na', dxeléquene' naca na tu da naca na chee' bedáu', na' lawe' da quebe zaj zē chache' lu xichaj lázrdawe', dxeléquene' zaj nabague' zria ne chee' da dxelawe'. ⁸Da na' dxágudxu quebe dxucá'anadxa na dxi'u xrlátaje lau Dios, lawe' da quebe nácadxadxu xrlátaje che dxágudxu, ne quebe nácadxadxu calela che quebe dxágudxu. ⁹Le guxúe xanne' cuínale ca naca lataj da nápale bi gágule chee' quebe guzría xile tu benne' quebe zē chache' lu xel-la dxeajlí lazre' chee'. ¹⁰Ca' naca na, che lue' nézenu' da nigá, na' che cue'u gagu' tu naga zra' bedáu' xiaj xaga, na' che tu bi bíchedxu, benne' quebe zē chache' lu xel-la dxeajlí lazre' chee', lé'ene' lue' dxe'u dxagu' na', na' bi bíchedxu na' wexázrquezne' cue'e' gawe' da na' zaj nuzúa bēneache lau tu dios quebe bi naca. ¹¹Ca' naca na, lue', lawe' da naptu' xel-la dxéajni'i, guzría xi'u tu bi bichu' quebe zē chache' lu xel-la dxeajlí lazre' chee', na' naque' benne' gute Cristo waláz chee'. ¹²Ca' naca na, gate dxuzría xile bi bíchedxu quebe zaj zē chache' lu xel-la dxeajlí lazre' chee', dxunle dul-la da dxuzúa Crístoqueze chalá'ala. ¹³Chee' le' na', che guzría xi'a tu bi bicha' ne chee' da dxawa', nácadxa chawe' cabátadxa gawa' bēla' chee' quebe guzría xi'a le'.

Da naca chee' tu benne' gubáz chee' Cristo

9 Naca chia' naca' gubáz chee' Cristo, ne napa' lataj bi guna' lawe' da

ble'eda' Xránadxu Jesús, na' nácale le'e bi chee Cristo ne chee zrin bēna' chee'.² Che dxeleque xezícadxa benne' quebe naca' gubáz chee Cristo, san dxun na ba xen guéquele le'e naca' gubáz chee' lawe' da dxunna bea da nácale chee Xránadxu da li naca' gubáz chee'.

³ Da nigá naca na da dxapa' benne' ca' dxelezí tizre' neda': ⁴ Naca chia' si' lu na'a da xi'aj gawa' ne chee zrin da dxuna'.⁵ Cá'anqueze naca chia' guchaga na'a tu nu'ula zandxu chee chéajlene' neda' ca dxelún xezícadxa benne' gubáz chee Cristo, ne benne' bíchequeze Xránadxu, ne Pedro. ⁶ ¿Dxéquele tuze Bernabé, ne neda' dxal-la' guntu' zrin chee gata' da xi'aj gáguntu' gate dxuzéentu' bēneache dizra' chawe'? ⁷ ¿Nuzra benne' gaque' benne' zeje' wedil-la che quebe nu quizruj le'? ¿Nuzra benne' dxaze' lba uva che quebe gawe' na? ¿Nuzra benne' gusegule' zrila' che quebe xequé'e xicha zraba'? ⁸ Quebe dxal-la' guéquele dxapa' le'e da nigá néda'queza', lawe' da caníqueze dxenná na lu da bdxixruj be'e Moisés. ⁹ Naxúaj lu da nadxixruj bea na da dxenná Dios: Quebe cu'ule xixruj dxu'a bezre, bē dxíchuba' zrua' xtila. Quebe gunná Dios da nigá lawe' da dxue lazre' chee bezre cá'aze. ¹⁰ Gunné' na ne cheedxu dxi'u. Naxúaj da nadxixruj bea nigá chee gaca da ba neza cheedxu, lawe' da benne' dxugá'ane' bezre, ne benne' dxine' dxal-la' xelebeza lazre' xelexezi'e ca naca da gunna lina da xelaze'. ¹¹ Na'a, che netu' ba gúzantu' lu xichaj lárdaule da naca na chee Be' Lá'azxa, ¿quebe dxal-la' si' lu na'ntu' látedauze da naca chee lu xezr la xu nigá? ¹² Che xezícadxa benne' naca chee' xelezí' lu ne'e da naca chee, ¿gázaradxa netu'?

Quebe ne guchíntu' da nigá naca na cheentu'. Bchaga launtu' xúgute chee quebe guzágantu' ca naca dizra' chawe' chee Cristo. ¹³ Ba nézele benne' dxelune' zrin chee xudau' dxelawe' chee

da xu'u lu xudau' na', na' benne' dxelune' zrin chee lu cugu naga dxeluti'e bē xixre'du ca' lau Dios dxelawe' bēla' chee béadu ca'. ¹⁴ Cá'anqueze ba nun Xránadxu chee benne' dxuluchalaje' dizra' chawe', xelezí'e ba neza zrin da dxelune'. ¹⁵ Cabata' guchínedá' netú da caní zaj naca na chia', ne quebe dxuzúaja' da nigá chee gúnnale neda' late'. Gaca lázredxa gatia' quézcala nu gucuasa da ba neza da napa'.

¹⁶ Quebe dxal-la' gucá'ana szren cuina' lawe' da dxuzenda' bēneache dizra' chawe' chee Cristo, lawe' da dxun na ba xen guna' na. Baxache' naca' che quebe guzenda' bēneache dizra' chawe' nigá. ¹⁷ Chee le' na', che dxuna' na lawe' da naca na da dxaca lazra' guna', ba de lazruj chia'. Na'a, che dxuna' na xadíaze, naca na tu da nusebaga Dios neda'. ¹⁸ Ca' naca na, lazruj da dxezi'a naca na da ba neza napa' gate dxuzenda' bēneache dizra' chawe' chee Cristo, ne quebe bi dxuchízruja' benne' ca'. Ca' naca na, quebe dxuchínedá' da naca na chia' lawe' da dxuna' zrin nigá.

¹⁹ Lácala quebe naca' benne' nada'u chee nu benne', ba nun cuina' ca tu benne' nada'u chee xúgute bēneache, chee séqueda' cu'a benne' zandxa lu na' Cristo. ²⁰ Gate zua' ládújla benne' judío ca', dxun cuina' benne' judío chee cu'a le' lu na' Cristo. Ca' naca na, ládújla benne' zaj xu'e lu na' da nadxixruj bea na dxun cuina' ca tu benne' xu'e lu na' da nadxixruj bea na, chee cu'a le' lu na' Cristo lácala da li quebe xu'a lu na' da nadxixruj bea na na'. ²¹ Xetú na'a, chee séqueda' cu'a lu na' Cristo benne' ca' quebe zaj xu'e lu na' da bdxixruj be'e Moisés, dxun cuina' ca tu benne' quebe xu'e lu na' da nadxixruj bea na na', lácala da li xu'a lu na' da nadxixruj bea na chee Dios lawe' da xu'a lu na' da nadxixruj bea na chee Cristo. ²² Gate zua' ládújla benne' ca' quebe zaj ze chache' lu xel-la dxea-

jlí lazre' chee' dxun cuina' ca zaj naca benne' ca' chee séqueda' cu'a le' lu na' Cristo. Ca' naca na, dxun cuina' ca naca tu tu benne' ca' chee ájatezla séqueda' cu'a bal-la benne' ca' lu na' Cristo. ²³Dx-una' xúgute da nigá ne chee dizra' chawe' chee Cristo chee gapa' tu da ba neza chee na.

²⁴Ba nézquezle le'e tu lu da huitaj benne' zan dxes'aca chégüe' na' tuze' dxezrué'ene' lataj blau. Le sa'aca chegu le'e chee zrué'ele da dxunna Cristo. ²⁵Xúgute benne' ca' dxulupá'a cuine' chee xelu'e da huitaj, dxuluzié' chalá'ala xúgute da dxun na calela chee'. Benne' caní dxeluné' da caní chee xezezi' lu ne'e tu da guzúe' xíchaje' da naca na laga' da québequeze si bea, san dxi'u dxundxu zrin chee zrué'edxu da zeajlí canna. ²⁶Neda' quebe dxezá chégua' ájatezla, ne quebe dxedil-la' ca tu benne' dxu'e lu be'ze gate dxedil-le'. ²⁷Neda' dxudéa' xel-la zi' bela' dxen chia', ne dxenná be'eda' na, chee quebe gunitia' neda' da naca chia' lu zrin nigá, ca te na' ba bsédeda' benne' xula ca'.

Da dxuzéajni'i na dxi'u ca naca chee bedáu' xiaj xaga ca'

10 Dxaca lazra' nézele, bi bícha'dau', ca guca chee xra xrtáudxu ca' xjácalene' Moisés. Dios guché'e xúgute benne' ca' ne chee beuj bza na', na' xúgute' guledé'e ládujla nísadau' da nazí le na Xrna. ²Ca' naca na, waca nnadxu xúgute' beledxúe' nisa lu nísadau' na', ne gulaque' tuze nen Moisés gate guledálene' beuj bza na'. ³Cá'anqueze xúgute' gulawé' tuze xel-la wagu da bnezruj Dios le', ⁴ne gule'aj xúgute' tuze nisa da bnezruj Dios le', lawe' da gulé'aje' nisa na' bedxúaj na xiaj xre na'. Xiaj xre nigá dxulé'e na ca naca Crístoqueze, Bénnea' guxéajlene' benne' ca' le'e xixre' lawe' lataj na'. ⁵Benne' zan benne' ca' quebe beluné' da bezaca ba lazre' Dios,

na' chee le na' gulate'e le'e xixre' lawe' lataj.

⁶Xúgute da caní guca na chee guzéajni'i na dxi'u chee quebe sa lázredxu da calela ca', ca belún benne' ca'. ⁷Chee le na' quebe gucá'ana szrenle bedáu' xiaj xaga ca' ca belún bal-la benne' ca', ca naxúaj na lu dizra' lá'azxa, dxenná na: Bénneache gulebé'e, ne gule'aj gulawé' lau bedáu' xiaj xaga, na' belexasé' chee buluxé'e. ⁸Quebe dxal-la' gundxu da sban ca belún bal-la benne' ca', na' tu zraze gulate chupa gaxúa chi dxua gaxue'. ⁹Quebe dxal-la' guchínedxu xel-la zren lazre' chee Xránadxu chee gundxu da calela ca belún bal-la benne' ca', na' gulate'e, gate gulí'ina bela' le'. ¹⁰Quebe nnele chee Dios ca gulenné bal-la benne' ca', na' gubáz chee xabáa chee xel-la gute beté' benne' ca'.

¹¹Xúgute da caní gulezaca xra xrtáudxu, na' zaj naxúaj na lu dizra' lá'azxa chee guzéajni'i na dxi'u, zúadxu lu zra bzebe caní. ¹²Ca' naca na, nu benne' dxéquene' ze chache' lu da naca chee Dios dxal-la' guxúe xanne' cuine' chee quebe cheajcházie'. ¹³Da dxelún zréaje le'e naca na tuze ca da dxelún zréaje xúgute bénneache, na' waca guxrén lázrele Dios lawe' da quebe gu'e lataj bi gun zréaje le'e da quebe séquele guchaga laule, na' gate gaca tu da gun zréaje na le'e, Dios gunne' le'e ájala gunle chee lale lu da na', chee séquele guchaga laule na.

¹⁴Chee le na', bi bicha' nazri'ite lazra', québedxa gucá'ana szrenle bedáu' xiaj xaga ca'. ¹⁵Dxuchálajlena' le'e ca dxuchálajlena' benne' dxeléajni'ine', na' lé'equenze waca guchí'ale chee da dxapa' le'e. ¹⁶Gate dxágadxu da dxucube na ca guca gate gute Xránadxu, dxápadxu ba lá'ana Dios. Gate dxí'ajdxu xrisa uva lá'azxa, da nigá dxulé'e na dxezidxu ba neza dxen chee Cristo da gulalaj na le'e xaga béguaj. Xeta xtila na' da dxuzúzru-

jd̄xu dxul'é na xezid̄xu ba neza belá' dxen cheē Cristo da bdeē' waláz cheēdxu le'e xaga béguaj. ¹⁷Lácala naxand̄xu, xúgutēdxu dxágud̄xu tu xeta xtílaqueze da naca na tuze, da na' dxul'é na nácad̄xu ca tuze belá' dxen cheē Cristo.

¹⁸Le nna'xque ca zaj naca benne' Israel ca'. Benne' caní, benne' dxelawe' da dxuluzr'e lu cugu cheē Dios dxelezi'e ba neza lu cugu na'. ¹⁹Quebe dxennía' naca tu bedáu' xiaj xaga tu da zaca, na' belá' da dxuluzr'ía bēneache lau bedáu' xiaj xaga quebe zácad̄xa ca bíteteze xetú belá'. ²⁰Dxennía' da dxuluzr'ía lau bedáu' xiaj xaga benne' ca' quebe zaj núnbe'e Dios, dxuluzr'e na lau be' xriwe' ca' ne quegá lau Dios, na' quebe dxaca lazra' gunle tuze be' xriwe' ca'. ²¹Quebe gaca xí'ajle da na' dxul'é na nácale Xránad̄xu tuze, ne xí'ajtele da gul'é na nácale tuze be' xriwe' ca', ne quebe gaca gágule da naca na cheē Xránad̄xu, ne gágutele da naca na cheē be' xriwe' ca'. ²²¿Dxaca lázrele xewine lazre' Xránad̄xu lawe' da dxusand̄xu Le'? ¿Dxéquele le'e nácad̄xu benne' wálad̄xa ca Le'?

Da naca cheēdxu gund̄xu, ne ca naca xel-la zri'i lazre'

²³Da li naca da na' dxelenná bēneache, dxelenné': Naca chia' guna' da dxaca lazra'. Quegá xúgutē naca na da sídxu ba neza. Naca cheē nu benne' gune' ca dxaca lazre' san quegá xúgutē gusegula na le' lu xel-la dxeajlí lazre' cheē'. ²⁴Dxal-la' gund̄xu da gaca chawe' cheē benne' xula, ne quegá da gaca na chawe' cheēzed̄xu.

²⁵Le gagu le'e ca naca da dxeda'u lawe' xi'a, ne quebe naba xúzrele cheē na cheē quebe sua stēbe xichaj lázrdaule, ²⁶lawe' da zaj naca cheē Xránad̄xu xezr la xu nigá, ne xúgutē da ca' zaj zra' lu xezr la xu.

²⁷Che nu benne', benne' quebe dxéajle cheē Xránad̄xu, dxenné' le'e gágule

xeta, na' che dxaca lázrele chéajle, le gagu xúgutē da guzr'e laule, ne quebe naba xúzrele cheē na cheē quebe sua stēbe xichaj lázrdaule. ²⁸Che nna nu benne' zúale le'e, na' xe'e le'e: “Belá' nigá bache guzr'ía na lau bedáu' xiaj xaga”, quebe gágule na, cheē quebe guzúale stēbe bēneache' gunné' ca', ne cheē quebe sua stēbe xichaj lázrdaule. ²⁹Dxennía' da nigá cheē xichaj lázrdau benne' zúalene' lue', ne quegá cheē xichaj lázrdau' lu'équeze.

Waca naba xuzre tu benne': “¿Bizr cheē na' dxuchi'u da naca chia' lawe' da sua stēbe xichaj lázrdau benne' xula? ³⁰Che dxapa' Dios: Xcalenu' cheē da dxawa', ¿bizr cheē na' xelez'í tizre' neda' cheē da dxawa'?” ³¹Cheē le na', che dxágule u dxí'ajle, u bíteteze da dxunle, le gun xúgutē cheē gaca ba Dios. ³²Quebe bi gunle da guzúa na stēbe benne' xula, quegá benne' judío ca', ne quegá benne' quebe zaj naque' judío, ne quegá nu benne' naque' bi cheē Dios. ³³Neda' dxuna' ba xuzre guna' da xelezaca ba lazre' xúgutē bēneache ca naca xúgutē da dxuna'. Quebe dxuna' da gaca chawe' cheēza' san da gaca chawe' cheē xezícad̄xa bēneache cheē xelelé'.

11 Le gun ca dxuna' neda', ca neda' dxúnqueza' ca ben Cristo.

Da dxelún nu'ula naga zaj nazraga bi cheē Cristo

²Bi bicha', dxapa' le'e ba lá'ana lawe' da dxeajs lázrequezele neda', ne dxunle ca naca da bzéajni'ida' le'e. ³Na'a dxaca lazra' chéajni'ile naca Cristo xíchaj cheē tu tu benne' biu, na' benne' biu naque' xíchaj cheē zru'ule', ca naca Dios, naque' xíchaj cheē Cristo. ⁴Che tu benne' biu gugácu'e xíchaj gate dxuchálajle' Dios naga zaj nadupa bi cheē Cristo, u gate dxuchálajle' waláz cheē Dios, naca na tu xel-la stu' cheē Bēneache' naque' xíchaj. ⁵Che tu nu'ula

quebe gugácue' xíchaje' gate dxuchá-lajle' Dios, u gate dxuchálaje' waláz chee Dios, naca na tu xel-la stu' chee', lawe' da dxun cuine' ca tu benne' biu. Lébezqueze naca na chugue' xíchaje'. ⁶ Che tu nu'ula quebe gugacu xíchaje', nácadxa xrlátaje chugue' tu chí'ize ca naca xicha xíchaje'. Na' che naca na tu xel-la stu' chee nu'ula che chugue' xíchaje', u che guzúe' zrígaze xíchaje' ca dxun tu benne' biu, dxal-la' gugacu xíchaje' naga zaj nazraga bi chee Cristo. ⁷ Benne' biu quebe dxal-la' gugacu xíchaje' lawe' da naque' lu'a le saca Dios, na' da naque' dxulé'e na ca naca xel-la szren chee Dios. Da naca nu'ula dxulé'e na ca naca xel-la szren chee benne' biu. ⁸ Gate ben Dios benne' biu, quebe bi guléaje' le' lu bela' dxen chee nu'ula, san guléaje' lu bela' dxen chee benne' biu da na' bexune' nu'ula na'. ⁹ Dios bene' nu'ula na' chee nna be'e benne' biu le', ne quegá bene' benne' biu chee nna be'e nu'ula le'. ¹⁰ Chee le' na' nu'ula dxal-la' guzúe' xíchaje' tu da dxulé'e na zua nu dxenná be'e le' chee quebe gun zréajene' gubáz chee xabáa ca' chee Dios. ¹¹ Lu da nácadxu chee Cristo, benne' biu dxechinne' nu'ula, ne cá'anqueze dxechín nu'ula benne' biu. ¹² Da li Dios guléaje' nu'ula na' lu bela' dxen chee benne' biu, na' cá'anqueze benne' biu dxálaje' chee nu'ula, na' xúgutedxu zadxu lu na' Dios.

¹³ Le nna'xque le'e che naca xrlátaje che tu nu'ula guchálajle' Dios, ne quebe gugacu xíchaje'. ¹⁴ Da nácaquezdxu dxulé'e na dxi'u naca tu xel-la stu' chee benne' biu se tunna xicha xíchaje', ¹⁵ na' naca tu da ba lánana chee nu'ula se na tunna, lawe' da nunna Dios le' xicha xíchaje' tunna chee gugacu na xíchaje'. ¹⁶ Na'a che nu benne' dxaca lazre' gutille' dizra' ca naca da nigá, dxal-la' nézene' quegá dxi'u ne quegá benne' zaj nazraga chee Cristo quebe núnbeadxu xetú da xula.

Da dxelún benne', gate dxelawe' da naca chee Xránadxu

¹⁷ Ca naca chee da nigá quebe dxapa' le'e ba lánana lawe' da dxaca da calela cheele gate nazrágale, ne quegá da chawe'. ¹⁸ Da nédxuteca, dxulé'e neda' gate dxezrágale chee güe lánale Dios nácale chupa la'a. Dxéqueda' naca da li da dxelenné'. ¹⁹ Dxál-la'queze gácale chupa la'a chee gulé'e lawe' nu benne' ládujla le'e da li naque' bi chee Cristo. ²⁰ Chee le' na' gate dxezrágale le'e chee gágule da naca chee Xránadxu, da li québedxa naca na chee Xránadxu. ²¹ Gate dxezrín zra dxágule, tu tule le'e dxebía lau cheele dxecá'ale xel-la wagu cha cheele, na' bál-lale le'e dxegá'anale dxedunle, na' xezícadxale dxezúzrele. ²² ¿Quebe bi de cheele naga xi'aj gágule? Ca'an dxunle, dxuzúale chalá'ala bi ca' chee Dios, ne dxugu'ule xel-la stu' benne' ca' quebe bi de chee'. ¿Bízraqueze xapa' le'e? ¿Dxal-la' gapa' le'e ba lánana? ¡Cabata!

Da dxágudxu da naca chee Xránadxu

(Mt. 26.26-29; Mr.

14.22-25; Lc. 22.14-20)

²³ Xránaquezdxu bzéajni'ine' neda' da nigá bsédeda' le'e: Lu zre' ná'queze gate Judas bdee' Xránadxu Jesús lu na' benne' guledábague' Le', na' Jesús guqu'é'e xeta xtila, ²⁴ na' gudé guzre' Dios: Xcalenu', bzúzruje' na, na' gunné': "Le gagu. Xeta xtila nigá dxulé'e na ca gaca chee bel-la' dxen chia' lu da na' saca zi'a waláz cheele. Le gun da nigá chee cheajsa lázrele neda'." ²⁵ Cá'anqueze, gudé gulawe', guqu'é'e xrisa uva, na' gunné': "Xrisa uva nigá dxulé'e na ca naca da dxuzé chacha na xel-la wezría cube da naca na dxen chia'. Tu tu lasa xí'ajle na, le gun na chee cheajsa lázrele neda'." ²⁶ Ca' naca na, ca zrin zra xelá' Xránadxu, gulé'ele ca guca gate gute Xránadxu tu tu

lasa gate gágule xeta xtila nigá, ne xí'ajle xrisa uva nigá.

Ca dxal-la' gágudxu da naca chee Xránadxu

²⁷ Ca' naca na, núteteze benne' gawe' xeta xtila nigá, u xí'aje' xrisa uva chee Xránadxu, ne quebe dxape' ba lá'ana na, na' dxune' dul-la da dxuzúa bela' dxen chee Xránadxu chalá'ala. ²⁸ Chee le na' tu tudxu dxal-la' guxúe xánnedxu xichaj lázrdaudxu gate za gágudxu xeta xtila nigá, ne za xí'ajdxu xrisa uva nigá, ²⁹ lawe' da che xi'aj gágudxu, ne quebe dxéquedxu dxul'é na ca naca bela' dxen chee Xránadxu, na' da xi'aj gágudxu gun na bágadxu zria. ³⁰ Chee le na' benne' zan ládujla le'e quebe chawe' zaj zue', ne zaj nate ni'a ne'e, na' bal-la benne' ládujla le'e ba gultatie'. ³¹ Che guxúe xanne' cuínadxu, quebe gun na ba xen guchi'a Xránadxu cheedxu caní. ³² Gate Xránadxu dxuchi'e cheedxu, dxudée' dxi'u xel-la zi' chee quebe cuía xidxu nen benne' zaj zre'e xezr la xu nigá.

³³ Ca' naca na, bi bicha'. Gate dxezrá-gale chee gágule da naca chee Xránadxu, le cueza ljwézrele tule xetule chee bi gágule. ³⁴ Che núlale dxedunle, le gagu lu xu'u lízrquezle, chee quebe gun na ba xen guzría xi' Dios le'e gate na' nazrá-gale. Xezícadxa da ca' dxelaca cheele gucá'ana' chawe' gate xida' xedajnná'a le'e.

Xel-la waca ca' da dxunna Be' Lá'azxa tu tudxu dxi'u

12 Bi bicha', zaj de da dxaca lazra' chéajni'ile ca naca chee xel-la waca ca' da dxunna Be' Lá'azxa tu tudxu dxi'u.

² Ba nézquezle gate na' quebe ne chéajlele chee Xránadxu, be'ele lataj gulezrube xue' le'e chee xeajé lá'anale

bedáu' xiaj xaga ca', da quebe dxe-lenné na. ³ Chee le na' dxaca lazra' nézele che zua nu benne' nne': Nabía xi' Jesús, quebe dxuchálaje' ne chee Be' Lá'azxa chee Dios. Na' netú benne' gaca nne': Jesús naque' Xrana', che quebe dxuchálaje' ne chee Be' Lá'azxa.

⁴ Zaj nazrá' xel-la waca ca' da gaca si' lu nnadxu, q san tuze naca Be' Lá'azxa, Bénnea' dxunne' dxi'u na.

⁵ Zaj nazrá' ca gaca gundxu zrin, san tuze naca Xránadxu, Bénnea' dxundxu zrin chee'.

⁶ Zaj nazrá' ca da gaca gundxu, san tuze naca Dios, Bénnea' dxunne' dxi'u xel-la waca gundxu na.

⁷ Dios dxunne' cha cheedxu tu xel-la waca chee Be' Lá'azxa chee gaca da ba neza chee xúgutədxu.

⁸ Ne chee Be' Lá'azxa dxunne' bal-la benne' xel-la waca xuluchálaje' dute xel-la sina,

na' xebal-le' ne chee Be' ná'queze dxunne' le' xel-la waca xuluchálaje' dute xel-la naxéajni'i.

⁹ Xebal-le' dxelezi'e xel-la dxeajlí lazre' ne chee Be' ná'queze, na' xebal-le' dxelezi'e xel-la waca chee xelexuné' benne' we' ca'.

¹⁰ Xebal-le' dxelezi'e xel-la waca xelune' xel-la waca ca' chee xabáa, na' xebal-le' dxelezi'e xel-la waca chee xuluchálaje' waláz chee Dios.

Xebal-le', Dios dxunne' le' xel-la waca xelenézene' nu be' dxuchalaj na lu dxu'a bénneache.

Xebal-le' dxelezi'e xel-la waca xuluchálaje' dizra' nazrá', da quebe naca xrtízrqueze',

na' xebal-le' dxelezi'e xel-la waca xuluxuzájle'e dizra' nazrá' na'.

¹¹ Xúgutə da caní dxun tuze Be' ná'queze, Bénnea' dxunne' cha cheedxu xel-la waca caní cáteze da dxaca lázrqueze'.

**Xúguteḁdxu nuchágadxu
tuze bela' dxen**

¹² Zua cheḁdxu tu bela' dxen da napa na zánete cue'. Dxi'u, dxéajlḁdxu cheḁ Cristo, nácadxu ca tuze bela' dxen cheḁ Cristo. ¹³ Xúguteḁdxu dxi'u, che nácadxu benne' judío, u benne' quebe nácadxu judío, ne che nácadxu benne' zaj nada'u, u benne' quebe zaj nada'u, gate gudxúadxu nisa da dxulé'e na nácadxu Cristo tuze, cá'anqueze bexácadxu ca tuze bela' dxen, da na' ben tuze Be' Lá'azxa, na' Diosqueze benne' dxi'u lataj sidxu tuze Be' ná'queze.

¹⁴ Tu bela' dxen quebe naca na tu cue'ze, san naca na zane' cue'. ¹⁵ Che ní'adxu nna na: Quebe naca' na'u, ne cheḁ le na' quebe naca' cheḁ bela' dxen chiu', quegá da ni gun na québedxa naca na cheḁ bela' dxen na'. ¹⁶ Na' che nágadxu nna na: Quebe naca' lau', ne cheḁ le na' quebe naca' cheḁ bela' dxen chiu', quegá da ni gun na québedxa naca na cheḁ bela' dxen na'. ¹⁷ Che dutḁ bela' dxen cheḁdxu naca na laudxu, ¿ájazra gundxu xendxu? Che dutḁ bela' dxen cheḁdxu naca na nágadxu, ¿ájazra gundxu lé'edxu? ¹⁸ Dios nuzúe' cha cheḁ cue' bela' dxen na' naga dxaca lazre' Le'. ¹⁹ Che dutḁ na' naca na tuze cue', ¿gazra zúaqueze bela' dxen na'? ²⁰ Ca naca na, lácala naca na zane' cue', tuze bela' dxen naca na.

²¹ Xia laudxu quebe dxal-la' xḁ na nadxu: Quebe nachinda' lue', ne quebe dxal-la' nna xíchajdxu, xḁ na ní'adxu: Quebe nachinda' le'e. ²² Da naca na, da zaj naca cheḁ bela' dxen cheḁdxu da dxéquadxu quebe zaj nácateca na blau, zaj naca na da dxechínedxadxu, ²³ Da zaj naca na cheḁ bela' dxen cheḁdxu da quebe dxápdxu ba lá'ana zaj naca na da dxugacu xánnedxadxu. Da ca' dxéquadxadxu quebe dxal-la' gulé'edxu zaj naca na da dxucáchedxu, ²⁴ da quebe

dxun na ba xen gundxu cheḁ da ca' gaca gulé'edxu. Ca' naca na, Dios bene' bela' dxen cheḁdxu cheḁ gápaxadxu ba lá'ana da ca' dxéquadxu quebe nácateca na da gápdxu ba lá'ana, ²⁵ cheḁ quebe gaca chupa la'a bela' dxen cheḁdxu. Tu tu cue' cheḁ bela' dxen cue' na gunne xue cheḁ ljwezre na. ²⁶ Che dxedé xel-la zi' tu da naca na cheḁ bela' dxen cheḁdxu, xúgute da ca' dxeledé na xel-la zi', na' che tu da na' gaca da ba neza cheḁ na, na' xúgute da ca' dxelebé na tu zren.

²⁷ Ca' naca na, le'e nácale bela' dxen cheḁ Cristo, na' tu tule nácale ca tu tu cue' cheḁ bela' dxen cheḁ na'. ²⁸ Ca' naca na, Dios nunézruje' lataj blau cheḁ bal-la benne' ládujla bi cheḁ Cristo. Lu lataj blau nuzré'e benne' gubáz cheḁ ca', na' lu lataj gudxupe' nuzré'e benne' dxuluchálaje' waláz cheḁ, na' lu lataj guxunne' nuzré'e benne' dxulusédene' bi cheḁ ca', na' gudé na' nuzré'e benne' dxelune' xel-la waca da za xabáa. Gudé na' nuzré'e benne' ca' dxelexune' benne' we' ca', ne benne' ca' dxelácalene' bi cheḁ ca', ne benne' ca' dxelenná be'e, ne benne' ca' dxuluchálaje' dizra' nazrá' da quebe zaj nézene'. ²⁹ ¿Zaj naca xúgute' benne' gubáz cheḁ? ¿Dxuluchalaj xúgute' waláz cheḁ? ¿Dxuluséde xúgute' bi cheḁ ca'? ¿Dxelún xúgute' xel-la waca cheḁ xabáa? ³⁰ ¿Dxelexún xúgute' benne' we' ca'? ¿Dxuluchalaj xúgute' dizra' nazrá' da quebe naca xrtizre'? ¿Dxuluxuzájla'a xúgute' dizra' nazrá' na'? ¡Cabí! ³¹ Le gun ba xuzre si' lu na'le cheḁ Dios xel-la waca ca' da nácadxa chawe'. Na'a gulé'eda' le'e tu da cháwedxa.

Xel-la zri'i lazre' li

13 Che dxuchálaja' dizra' cheḁ benne', ne cheḁ gubáz cheḁ xabáa ca', san quebe napa' xel-la zri'i lazre' li, quebe nácadxa' ca tu xide da dxenné na, u ca tu xia da dxenné na. ² Che dxuchálaja' waláz cheḁ Dios, ne

che nezda' xúgute da zaj nagache, ne dxéajni'ida' xúgute da dxelaca, ne napa' xel-la dxeajlí lazre' chee séqueda' gucusasa' xi'a ca', san che quebe napa' xel-la zri'i lazre' li, quebe nu nácaqueza'.³ Che quísia' xúgute da de chia', ne che guzúa' belá' dxen chia' chee cheze na, san che quebe napa' xel-la zri'i lazre' li, quebe bi da ba neza naca na chia'.

⁴Bénnea' nape' xel-la zri'i lazre' li: Naque' zren lazre'. Naque' zri'i lazre', ne quebe naque' xa lazre'.

Quebe dxucá'ana szren cuine', ne quebe dxuzé'cu'e.

⁵Quebe dxune' da calela, ne quebe naque' zre'e lazre'. Quebe dxezre'e, ne quebe dxu'u lazre'.

⁶Quebe dxebene' gate nu benne' dxeaj-jházie' lu dul-la, san dxebene' lu da li.

⁷Dxuchaga lawe' xúgute da dxaca nen duté xel-la dxeajlí lazre' chee', ne duté xel-la dxebeza lazre' chee', ne duté xel-la zren lazre' chee'.

⁸Xel-la zri'i lazre' li quebe te chee na. Wazrín zra gate québedxa chínedxu nu benne' guchálajlene' dxi'u waláz chee Dios, ne benne' dxéajni'ine' xúgute. ⁹Na'a dxéajni'idxu látédauze, ne látédauze dxuchálajdxu waláz chee Dios. ¹⁰Zrin zra gate na' chéajni'idxu duté ca naca, na' te chee da na' naca na látédauze.

¹¹Gate ne naca' bidau' bchálaja' ca bidau', ne gulaba lazra' ca bidau', ne bchi'a ca bidau', san gate guca' benne' waca, bzua' chalá'ala da zaj naca chee bidau'. ¹²Cá'anqueze na'a quebe dxel'é'dxu cátequeze, ne da dxel'é'dxu ze zrul-la, san lu zra na' lé'dxu cátequeze. Na'a látédauze núnbe'a, san lu zra na' gúnbe'a cátequeze ca dxun Dios, núnbe'tequeze' neda'. ¹³Ca' naca na, xel-la dxeajlí lazre', ne xel-la dxebeza lazre', ne xel-la zri'i lazre' li xelezúaqueze na

chadía chacanna, san da blaudxa chee da caní naca na xel-la zri'i lazre' li.

Ca naca chee nu benne' dxuchálaje' dizra' nazrá' da quebe naca na xrtizre'

14 Le gun ba xuzre gápale xel-la zri'i lazre' li, ne cá'anqueze le naba Dios gunne' le'e xel-la waca ca' chee Be' Lá'azxa, ne da naca blaudxa, chee gaca guchálajle waláz chee Dios. ²Bénnea' dxuchálaje' dizra' nazrá' da quebe naca na xrtizre' dxuchálajlene' Dios, quegá nen bénneache, lawe' da quegá nu dxéajni'i da dxenné'. Dxuchálaje' ne chee Be' Lá'azxa da zaj nagache. ³Bénnea' dxuchálaje' waláz chee Dios dxuchálajlene' bénneache chee gusegule' benne' ca' lu da naca chee Dios, ne chee ne xúene'-be', ne chee xue zrene'-be'. ⁴Bénnea' dxuchálaje' dizra' nazrá' na' dxusegula cuine', san bénnea' dxuchálaje' waláz chee Dios dxusegule' bi ca' chee Cristo lu da naca chee Dios.

⁵Dxaca lazra' gapa xúgutele xel-la waca guchálajle dizra' nazrá', san dxaca lázredxa' gaca guchálajle waláz chee Dios, lawe' da nácadxa chawe' guchálajle waláz chee Dios quézcala guchálajle dizra' nazrá', che quebe zua nu benne' xuzájle'e dizra' nazrá' na' chee xelegula bi chee Cristo lu da naca chee Dios. ⁶Chee le na', bi bícha'dau', che xida' xedajnná'a le'e, ne guchálajlene' le'e dizra' nazrá', ¿bizra da ba neza gaca na chee che quebe guchálajlene' le'e tu da ba ble'e Dios neda', u tu da bzéajni'ine' neda', u tu da guchálaja' waláz chee Dios, u tu da guzéajni'ida' le'e?

⁷Nná'xquedxu ca da ca' dxelenné na da quebe zaj naca bane na ca bchiuj, ne bihuel-la. Che quebe gaca chéajni'idxu da dxelenné na, quebe gaca nezdxu ca da dxelul-la na. ⁸Gate dxaca wedilla, che quebe dxebezre luzu da dxulucuezre' cátequeze, quebe nu se lu wedil-la. ⁹Cá'anqueze dxaca chee le'e.

Che quebe guchálaja' dizra' da dxéajni'ile, ¿ájazra gaca nézele da dxenní'a? Guchálaja' lu be'. ¹⁰ Da zante dizra' nazrá' zaj de lu xezr la xu nigá, ne da li xúgute na zaj zéaje na. ¹¹ Na'a che quebe dxéajni'ida' dizra' dxuchálajle tu benne' neda', gaca' ca tu benne' zitu' lau bénnea', na le' gaque' ca tu benne' zitu' lawa' neda'. ¹² Chee le na', lawe' da dxaca lázrele si' lu na'le xel-la waca ca' da dxunna Be' Lá'azxa dxi'u, le gun ba xuzre si' lu na'le da ca' xulusegula na bi ca' chee Cristo lu da naca chee Dios.

¹³ Ca' naca na, bénnea' dxuchálaje' dizra' nazrá' dxal-la' naba lau Dios gunne' le' xel-la waca xuzájle'e dizra' nazrá' na'. ¹⁴ Che guchálajlena' Dios tu dizra' nazrá'la, da li dxuchálajlena' Le' lu be' nácaqueza', san quebe bi da ba neza naca na chee xel-la dxéajni'i chia'. ¹⁵ ¿Bizra da dxal-la' guna' xca'? Dخال-la' guchálajlena' Dios lu be' nácaqueza', ne cá'anqueze nen xel-la dxéajni'i chia'. Dخال-la' gul-la' chee Dios lu be' nácaqueza', ne cá'anqueze nen xel-la dxéajni'i chia'. ¹⁶ Che dxue la'an'u Dios tuze lu be' nácaquezu', na' benne' ljwezru' dxenne' chiu' quebe gaca gun'e tu zren lue' gate dxu'u Dios: Xcalenu', lawe' da quebe dxéajni'ine' da dxennáu'. ¹⁷ Da dxuchálajlenu' Dios nácale'e na chawe', san bénnea' dxenne' quebe dxegule' lu da naca chee Dios. ¹⁸ Dxapa' Dios: Xcalene' lawe' da dxuchálajdxa' dizra' nazrá' ca xúgutele le'e, ¹⁹ san naga zaj nazraga bi chee Cristo dxaca lázredxa' guchálaja' gázzuze dizra' da xeléajni'ibe' chee gusédeda'-be', quézcala guchálaja' chi mila dizra' nazrá' da quebe gaca xeléajni'ibe'.

²⁰ Bi bícha'dau'. Quebe gulaba lázrele ca bidau'. Le gaca ca bidau' chee quebe gunle da calëla, san le gaca benne' wal-la chee gulaba lázrele cháwe'dau'. ²¹ Naxúaj lu xiche lá'azxa chee da dxenná bea Dios, da dxenná na:

Guchálajlena' benne' xezr la xu nigá nen dizra' nazrá', ne lu dxu'a benne' zitu' ca', san ne caní quebe xelenne' chia'. Caní dxenná Xránadxu. ²² Ca' naca na, xel-la waca chee guchálajdxu dizra' nazrá' naca na tu da dxulé'e na lau benne' quebe dxeléajle'e chee Dios, ne quegá lau benne' dxeléajle'e chee'. ²³ Na'a, gate nazrágale, che xúgutele dxuchálajle dizra' nazrá', na' che xelexú'u benne' quebe zaj nazédené', u benne' quebe dxeléajle'e chee Dios, ¿quebe xelenné' zaj nadá xichaj lázrdau'e? ²⁴ Na'a che dxuchalaj xúgutele waláz chee Dios, na' che chu'u tu benne' quebe dxéajle'e chee Dios, u tu benne' quebe nazédené', na' guéquene' nabague' dul-la, na' léqueze' guchi'a cuine' gate xenne' da dxennale xúgutele. ²⁵ Ca' gaca na, da zaj nagache xichaj lázrdawe' xululé'e lau na, na' guzúa zribé', ne güe lá'ane' Dios, na' nne' da li zúale Dios le'e.

²⁶ Ca' naca na, bi bícha'dau', gate dxezrágale, bál-lale le'e nápa'e salmo ca', ne xebál-lale nápa'e da gusédele ljwézrele, ne xebál-lale nápa'e tu da ble'e Dios le'e, ne xebál-lale nápa'e tu dizra' nazrá' da guchálajle, ne xebál-lale nápa'e xel-la waca xuzájla'ale dizra' nazrá' na'. Cháwe'dau' naca na, san xúgute da ca' dxal-la' xulusegula na bi ca' chee Cristo lu da naca chee Dios. ²⁷ Gate guchálajle dizra' nazrá', waca xuluchalaj chupa benne', u chunna benne', ne tuwéaj tuwéajle, na' tu benne' dxal-la' xuzájle'e da dxennale. ²⁸ Na'a che quebe nu chilá' benne' xuzájle'e dizra' nazrá' na', gácadxa chawe' quebe bi da nne' naga nazrágale. Tu tule dxal-la' nnale lé'equenze, ne nen Dios. ²⁹ Cá'anqueze benne' dxuluchálaje' waláz chee Dios waca xelenné' chupa chúnnaze', na' xezí-cadxale dxal-la' guchí'ale da na' dxenné'. ³⁰ Che dxulé'e Dios xetú benne' dxé'e na' tu dizra', na' bénnea' dxuchálaje' dxal-la' gusane' ca da dxuchálaje'. ³¹ Xúgutele

le'e waca guchálajle waláz chee Dios tuwéaj tuwéajle chee chéajni'i xúgutele, ne sile da gun chacha na le'e. ³²Benne' ca' dxuluchálajle' waláz chee Dios dxun na ba xen nna bé'ene' be' nácaqueze', ³³lawe' da naca Dios Bénnea' dxunne' dxi'u xel-la dxebeza zri lazre', ne quebe dxun zréajene' bèneache.

Ca zaj xu'u lau xúgute cue' bi bíchedxu, bi chee Dios, ³⁴dxal-la' xelezúa zrize nu'ula ca' naga nazrágale, lawe' da quebe naca chee' xuluchálajle'. Dخال-la' xuluzúe' dizra' ca naxúaj na lu da nadxixruj bea Dios. ³⁵Che dxelaca lazre' bi xeléajni'ine', dxal-la' xuluchebe' benne' cha chee' lizre tu tue' lawe' da quebe dxulé'e na chawe' tu nu'ula guchálajle' naga nazrágale.

³⁶Dخال-la' gueque be'ele quebe guzú lau xrtizra Dios sua na ládujla le'e, ne quegá le'eze nazi' lu na'le na. ³⁷Che nu benne' dxéquene' naque' benne' dxuchálajle' waláz chee Dios, u zúale Be' Lá'azxa le', dxal-la' gueque bé'ene' da nigá dxuzúaja' cheele naca na tu da gunná be'e Xránadxu. ³⁸Che quebe dxaca lazre' gueque bé'ene' da nigá, quebe dxal-la' si' lu na'le bènea'.

³⁹Ca' naca na, bi bícha'dau', le gun ba xuzre guchálajle waláz chee Dios, ne quebe guzágale bènea' dxuchálajle' dizra' nazrá'la. ⁴⁰Xúgute da caní dxal-la' gunle duté ba lá'ana, ne ca dxal-la' gaca na.

Ca bebán Cristo ládujla benne' gate

15 Na'a, bi bícha'dau', dxuzenda' le'e dizra' chawe' da ba bzenda' le'e, da na' guzi' lu na'le, ne da da'le le'e. ²Ne chee dizra' chawe' nigá nalale che dxéajlele chee da bzenda' le'e, ne che quebe guca dácheze xel-la dxeajlí lazre' cheele.

³Da naca blaudxa, bzéajni'ida' le'e da guzi' lu na'a, gute Cristo ne chee dul-la da nabágadxu ca naxúaj na lu dizra' lá'azxa, ⁴na' bulucache' Le', na' bebane'

zra guxunne' zra ca naxúajqueze na lu dizra' lá'azxa, ⁵na' ble'e lawe' lau Pedro, na' gudé na' ble'e lawe' lau benne' gubáz chee' ca'. ⁶Gudé na' ble'e lawe' lau bi bíchedxu zaj nácadxe' ca gazxu' gaxúa benne' zaj nazrague' tu zren, na' benne' zan, benne' ca' ne zaj naca bane', láqueze benne' zan, benne' ca' ba gultatie'. ⁷Gudé na' ble'e lawe' lau Jacobo, na' gudé na' ble'e lawe' lau xúgute benne' gubáz chee' ca'.

⁸Bzébedxa, ca gudé chee xúgute da na', ble'e lawe' lawa' neda', lácala neda' naca' ca tu bidau', bi gúlajbe' ba gudé beu' cheebe'. ⁹Neda' naca' benne' bzébedxa chee xúgute benne' gubáz chee Cristo, ne quebe naca chia' si' la' gubáz chee Cristo lawe' da gudáu zi' xuzra' bi ca' chee Dios. ¹⁰Naca' da naca' lawe' da guca Dios zri' lazre' nen neda', na' quebe guca dácheze xel-la zri' lazre' chee' nen neda', lawe' da ba nundxa' zrin ca xúgute benne' gubáz ca', láqueze quegá neda' nuna' na, san Dios bchínene' neda'. ¹¹Quebe zácadxa na che naca neda', u che naca benne' ca', da nigá naca na dizra' bzénetu' bèneache, ne naca na da guxéajlele.

Ca xelexebán benne' gate

¹²Che da dxuzénetu' bèneache dxenná na bebán Cristo ládujla benne' gate, ¿ájazra naca na bál-lale le'e dxennale quebe xelexebán benne' gate? ¹³Che quebe xelexebán benne' gate, Crístoqueze quebe bebane' ládujla benne' gate, ¹⁴na' che quebe bebán Cristo ládujla benne' gate, dácheze naca da dxuzénetu' bèneache, ne dácheze naca da dxeajlí lázrele chee Cristo. ¹⁵Che caní naca na dxexechébetu' chee Dios da wen lazre' lawe' da dxennantu' bsebán Dios Cristo, na' che quebe xelexebán benne' gate, quebe bsebán Dios Cristo. ¹⁶Che quebe xelexebán benne' gate, Crístoqueze quebe bebane',

¹⁷ na' che quebe bebán Cristo, dácheze naca da dxeajlí lázrele chee', na' ne nabágale dul-la. ¹⁸ Che caní naca na, cá'anqueze benne' zaj nate, benne' ca' guleajlí lazre' Cristo zaj nanítequeze'. ¹⁹ Che da dxebeza lázrentu' da naca chee' Cristo naca na cheeze xezr la xu nigá, nácadxu baxáchedxa ca xúgute bènneache.

²⁰ Na'a da li bebán Cristo ládujla benne' gate. Le' naque' benne' nedxu bebane' ládujla benne' gate quézcala xúgute benne' ca' dxal-la' xelexebane'. ²¹ Ca guca, bla' xel-la gute lu xezr la xu nigá ne chee' tuze benne', cá'anqueze ne chee' tuze benne' bla' xel-la dxexebán chee' benne' gate. ²² Ca naca dxelate xúgute bènneache lawe' da zaj naque' tuze nen Adán, cá'anqueze xúgute benne' zaj naca tuze nen Cristo xelape' xel-la nabán li lazre'. ²³ Xelexebán tu tu'e' gate xelexexale', nédxula bebán Cristo ca tu lina nedxu, na' gudé na', gate xelá' Cristo xelexebán benne' zaj naque' bi chee' ca'. ²⁴ Nadxa cheajsé chee' xezr la xu nigá gate guzría xi' Cristo xúgute da dxelenná bea, ne xúgute da dxelixruj bea na, ne xúgute da zaj napa xel-la waca, na' gudé' xel-la dxenná bea chee' lu na' Xradxu Dios. ²⁵ Dxun na ba xen nna bea Cristo ca zrin zra ba nuzúa Dios zran ni'e' xúgute benne' guledábage' Le', ²⁶ na' da bzébedxa da cuía xi' naca na xel-la gute. ²⁷ Ba nuzúa Dios xúgute zran ni'a Cristo, san gate dxenná na nuzúe' xúgute zran ni'e', dxaca bea na quebe zua Dios ládujla da ca', lawe' da Léqueze' naque' Bénnea' bzue' xúgute zran ni'a Cristo. ²⁸ Gate ba zua xúgute lu na' Cristo, nadxa Crístoqueze, Bénnea' naque' Zrí'nequeze Dios guzúa cuine' lu na' Dios, Bénnea' bde'e' xúgute lu na' Le'. Ca' naca na, Dios gaque' blau lawe' xúgute da de.

²⁹ Xetú da dxaca, zaj zua benne' dxeledxúe' nisa waláz chee' benne' zaj nate. ¿Bizr chee' na' dxelune' caní che quebe

xelexebán benne' gate? ¿Bizr chee' na' dxeledxúe' nisa waláz chee' benne' gate?

³⁰ Cá'anqueze, ¿bizr chee' na' zúate-quezdXu dxi'u lu da stêbe? ³¹ Xúgute zra zua' lu da stêbe chee' xel-la gute. Dxapa' le'e, bi bicha', da li naca da nigá ne chee' da ba neza da napa' ne cheele lu da nácadxu nen Xránadxu Jesucristo. ³² Che ca tu bènneacheze gudíl-lalena' benne' zaj naca ca be snia ca' lu xezre Efeso ¿bizra da ba neza naca na chia? Che quebe xelexebán benne' gate dxal-la' gundxu ca dxelenná bènneache, dxelenné: "Xi'aj gágudxu lawe' da wxre gátedxu."

³³ Quebe güele lataj nu si xe le'e. Naca cáteze dxenná na: Che gácadxu tuze benne' ca' dxelune' da calela,

tu zrénqueze gundxu da calela.

³⁴ Le guxúe xanne' cuínale, ne quebe gunle dul-la, lawe' da bál-lale le'e quebe núnbea xánnele Dios. Da nigá dxapa' le'e chee' gápale xel-la stu'.

³⁵ Guchebe nu benne' neda': Ájazra xelexebán benne' gate? ¿Ájazra gaca belá' dxen chee'? ³⁶ Da nigá naca na tu da xálaze, lawe' da gate dxázadxu tu binne, dxun na ba xen cuía xi' binnedu na' chee' gaca na tu xágadau'. ³⁷ Da na' dxázadxu quebe naca na da xelá', san tu binnedauze naca na, che naca na zrua' xtila u xetú binnedau'. ³⁸ Te na' gun Dios chee' binnedu na' tu xágadau' cáteze dxaca lázrequeze', na' chee' tu tu binnedau' dxune' tu tu xágadau' cáteze zaj naca binnedu ca'. ³⁹ Quegá xúgute belá' dxen tuz ca zaj naca na. Tuze ca naca belá' dxen chee' bènneache, ne xetuze ca naca belá' dxen chee' be xixre' ca', na' xetuze ca naca belá' dxen chee' bxinnedu ca', ne xetuze belá' dxen chee' bela ca'. ⁴⁰ Cá'anqueze zaj naca belá' dxen chee' xabáa, ne belá' dxen da zaj naca na chee' xezr la xu nigá. Xel-la xrtan chee' da zaj naca chee' xabáa nazrá' ca xel-la xr-

tan chee da zaj naca chee xezr la xu. ⁴¹Xel-la naxaní' chee gubizra nazrá' ca xel-la naxaní' chee beu', ne cá'anqueze nazrá' ca xel-la naxaní' chee belaj ca', na' ládujla belaj ca', xel-la naxaní' chee tu belaj nazrá' ca xel-la naxaní' chee xetú' belaj. ⁴²Cá'anqueze dxaca chee benne' ca' xelxebane' ládujla benne' gate. Dxucáchedxu lu ba tu da guzru', na' xebán tu da québedxa gate. ⁴³Dxucáchedxu tu da xálaze, na' xebán tu da xabáa. Dxucáchedxu tu da nate ni'a na', na' xebán tu da wál-lal'e. ⁴⁴Dxucáchedxu tu belá' dxen chee beniácheze, na' xebán tu belá' dxen da naca na chee be' nácaquezdxu. Che zua tu belá' dxen da naca na bènneacheze, cá'anqueze zua tu belá' dxen da naca na chee be' nácaquezdxu.

⁴⁵Cá'anqueze caní naxúaj lu dizra' lá'azxa da dxenná na: Benne' nedxu Adán guque' bènneache ban, na' Adán, benne' bzebe, naque' Be' da dxunna xel-la nabán. ⁴⁶Bénnea' naque' Be' quebe ble'e nedxu, san bénnea' naque' bènneacheze. Gudé na' bla' Bénnea' naque' Be'. ⁴⁷Benne' nedxu guque' xu bxrte, ne guque' chee xezr la xu nigá, na' Benne' gudxupe' naque' Xránadxu, Benne' chee xabáa. ⁴⁸Belá' dxen ca' chee xezr la xu nigá zaj naca na ca guca bènnea' guque' xu bxrte, na' belá' dxen ca' da zaj naca na chee xabáa zaj naca na ca Bénnea' naque' chee xabáa. ⁴⁹Ca naca, nácadxu ca bènnea' guque' xu bxrte, cá'anqueze gácadxu ca Bénnea' naque' chee xabáa.

⁵⁰Dxaca lazra' xapa' le'e, bi bícha'dau', belá' dxen cheedxu da naca na xu bxrte quebe gaca chu'u na naga dxenná bea Dios lawe' da na' guzru quebe gaca zraga na da na' si bea chadía chacanna. ⁵¹Dxapa' le'e tu da nagache nédxute: Quegá xúgutedxu gátedxu, san xúgutedxu sidxu tu belá' dxen cube. ⁵²Chadite gaca na, ca dxun benne' guchudie' xexrate lawe', gate xendxu chí'i luzu da dxulucuezre' da bzebe.

Cuézrequeze luzu da dxulucuezre', na' xelxebán benne' gate naga cabátadxu xelatie', na' dxi'u sidxu tu belá' dxen cube. ⁵³Belá' dxen cheedxu da guzru dxal-la' xexaca na tu da québedxa guzru, na' belá' dxen cheedxu da gate dxal-la' xexaca na tu belá' dxen da québedxa gate. ⁵⁴Gate belá' dxen cheedxu da guzru ba bexaca na da québedxa guzru, ne belá' dxen cheedxu da gate ba bexaca na tu da québedxa gate, nadxa gaca li da naxúaj na lu dizra' lá'azxa, da dxenná na: Ba beladxu lu na' xel-la gute.

⁵⁵Lue', xel-la gute, ¿ga na' xel-la waca chiu' chee gunu' netu' we'?

Lue', xel-la gute, ¿ga na' da zrué'enu'?

⁵⁶Da dxunna xel-la gute xel-la waca chee gun na dxi'u we' naca na dul-la, na' da nadxixruj bea da gula na' naca na da dxunna na dul-la xel-la waca chee gudé na dxi'u lu xel-la gute. ⁵⁷Na'a, xcalén Dios, Bénnea' dxunne' dxi'u xel-la waca chee zrué'dxu lu dul-la, ne lu xel-la gute ne chee Xránadxu Jesucristo.

⁵⁸Chee le na', bi bícha' nazri'ite lazra', le se chacha, ne le súateze lu zrin dxúndxale chee Xránadxu lawe' da nézele quebe naca dácheze zrin dxunle tu zren nen Xránadxu.

Dumí da gutúpale chee gácalele bíchedxu ca'

16 Ca naca chee dumí gutúpale chee gácalele bi bíchedxu ca', le gun na cáteze bzéajni'ida' xúgute cue' bi chee Cristo zaj zra' xezre ca' zaj nababa Galacia. ²Tu tu zra nedxu chee da gazre zra tu tule le'e dxal-la' gúnnale late' weaj ca da dxezile, na' cu'u cháwele na chee quebe gun na ba xen gúnnale dumí gate xida'. ³Gate na' xelá'a, sel-la' xezre Jerusalén benne' ca' cuele, na' gunézruja' le' tu xiche chee xelu'e dumí na' chee bi bíchedxu zaj zre'e na'. ⁴Che gata' lataj cha'a, na' sá'acalequeze' neda'.

Da dxugú'u bea Pablo guné'

⁵Lu neza chia' dxun na ba xen tea' naga nababa xęzr la xu Macedonia, na' xelá'a xęzre Corinto ca te na'. ⁶Wegá'analja' nen le'e tu chi'i, u che ba guca, na' sua' nen le'e dutę beu' zaga ca', na' le'e waca gácalele neda' lu neza chia' naga dxal-la' cha'a. ⁷Quebe dxaca lazra' xedajnná'a le'e ca teza', san dxebeza lazra' súaqueza' tu chi'i nen le'e, che gunna Xránadxu lataj. ⁸Na'a xegá'ana' lu xęzre Efeso nigá ca zrin zra Pentecostés, ⁹lawe' da napa' lataj guna' tu zrin zren cheę Xránadxu da gulé'ete' lawe na, lácala naxán benne' ca' dxeledábage'.

¹⁰Che ba bla' Timoteo, le gun ba xuzre suabe' xel-la dxebé nen le'e, ne quebe bi cué'ebe' gunne xue, lawe' da dxunbe' zrin cheę Xránadxu cáteze dxun neda'. ¹¹Cheę le' na' netule le'e quebe guzúale-be' chalá'ala, san le gácale-be' cheę xexu'ube' neza lu xel-la dxebeza zri lazre' cheę xedajnná'abe' neda', lawe' da dxebeza'-be' tu zren nen bi bíchedxu caní.

¹²Ca naca cheę bíchedxu Apolos, guta' xúele'ęda' le' cheę chéajlene' bi bíchedxu ca' xedajlenné'ę le'e, san quebe guca lazre' se'ę na'a. Wide' gate gape' lataj.

Dxulugapa ljwezre' diuzre

¹³Le sua ban lazre'. Le se'ę chacha lu xel-la dxeajli lazre' cheęle. Le se'ę ca ze

benne' biu. Le gaca benne' wal-la. ¹⁴Dutę xel-la zri'i lazre' le gun xúgute' da dxunle.

¹⁵Na'a, bi bícha'dau', ba nézquezele gulaca xrtía Estéfnas benne' nedxu naga nababa Acaya gulezí' lu ne'ę dizra' chawe' cheę Cristo, na' buluzúa cuine' cheę xelácalene' bi bíchedxu ca', bi cheę Cristo. ¹⁶Dxaca lazra' guzúa cuñale lu na' benne' caní, ne lu na' xúgute' benne' dxelácale ljwézredxu, ne dxelún zrin cheę Cristo. ¹⁷Zua' xel-la dxebé lawe' da belelá' Estéfnas, ne Fortunato, ne Acaico, lawe' da belune' chia' da quebe guzéquele gunle le'e lawe' da zrale zitu'. ¹⁸Belún chúchue' be' nácaqueza', ne be' nácaquezele le'e. Dxun na ba xen si' lu na'le benne' caní.

¹⁹Xúgute' cue' bi cheę Cristo naga nababa xęzr la xu Asia dxulugapa le'e diuzre. Aquilo ne Priscila, ne bi bíchedxu ca' dxelezraga lu xu'u lizre' dxulugápale'ę le'e diuzre lu La Xránadxu. ²⁰Xúgute' bíchedxu nigá dxulugape' le'e diuzre. Le gugapa diuzre ljwézrele tule xetule, ne le gunida ljwézrele.

²¹Neda', Pablo, dxuzúaja' da dxugapa' le'e diuzre nen ná'aqueza'.

²²Che nu benne' quebe nazrí'ine' Xránadxu Jesucristo, cuía xi' bēnnea'. ¡Gudá Xránantu'!

²³Dxenaba' Xránadxu Jesucristo gun cháwe'ę le'e. ²⁴Dxusel-la' cheę xúgute'le xel-la nazrí'i chia' lu La Jesucristo. ¡Ca'an gaca na'!

**DIZRA' GUDXUPE' DA BZUAJ
SAN PABLO CHEE BI CHEE
CRISTO ZAJ ZRE'E CORINTO**

**Pablo dxuzúaje' chee bi bíchedxu zaj
zre'e xezre Corinto**

1 Neda', Pablo, naca' gubáz chee Jesucristo lawe' da naca na da dxaca lazre' Dios. Tu zren nen bíchedxu Timoteo dxuzúaja' da nigá chee le'e, bi bícha'dau', zragale chee Dios lu xezre Corinto. Cá'aqueze dxuzúaja' da nigá chee xúgute bi chee Dios zaj zre'e xezre ca' zaj nababa xezr la xu Acaya. ²Dxenaba' Xradxu Dios, ne Xránadxu Jesucristo gun chawe'e le'e, ne gunne' le'e xel-la dxebeza zri lazre'.

Da ca' guzú guzaca' Pablo

³Dxue lánantu' Dios, Xra Xránadxu Jesucristo, lawe' da naque' Xradxu dxexache lazre' dxi'u, ne Dios dxexúe zrene' dxi'u. ⁴Dios dxexúe zrenqueze' dxi'u ca naca xúgute xel-la zi' da dxed-edxu, chee cá'aqueze dxi'u gaca xexúe zrendxu benne' ca' dxeledé' xel-la zi', na' xue zrendxu le' cáteze da ba nun Dios cheedxu dxi'u. ⁵Lawe' da dxededxu xel-la zi' zren ca da gudé Cristo, cá'aqueze ne chee Cristo zua Nu dxexúe zrenqueze dxi'u, Léqueze Dios. ⁶Chee le na', che dxedentu' netu' xel-la zi', naca na chee sua Nu xexúe zren le'e, ne chee lale, na' caní gaca guchaga laule lu duté xel-la zren lazre' chee le xel-la zi' ca' da dxed-edxu dxi'u. ⁷Dxuxrén lázrele'entu' le'e, lawe' da nézentu' ca dxedele xel-la zi' tu zren nen netu', cá'aqueze sua Nu xexúe zren le'e tu zren nen netu', Léqueze Dios.

⁸Bi bicha', dxaca lázrentu' nézele ca naca xel-la zi' zren da gudentu' naga nababa Asia. Guca na tu xel-la zi' zrendxa ca da gaca guchaga launtu', na' québedxa guleza lázrentu' lantu'.

⁹Gúquentu' ba zua gagu xelute benne' ca' netu'. Guca cheentu' da nigá chee bzéajni'i na netu' guxrén lázrentu' Dios, ne quegá guxrén lazre' cuínantu'. ¹⁰Dios bselé' netu', na' ne dxuselé' netu' lu da stébe zren nigá chee xel-la gute, na' dxebeza lázrentu' Le' guseláqueze netu' ¹¹che le'e gácalele netu', nábadxu Dios gácalene' netu'. Che benne' zan xelenabe' Dios gácalene' netu', na' benne' zan xel'é Dios: Xcalenu', chee da chawe' ca' da gun Dios cheentu'.

**Bizr chee na' Pablo
guzrene' chéaje' Corinto**

¹²Naca tu da ba neza da nápantu' da zua na lawe' da dxe xichaj lázrdauntu' netu' ba gudantu' lu da lázrentu', lu xezr la xu nigá, ne ládujla le'e. Dios lu xel-la zri'i lazre' chee' gúcalene' netu' chee bentu' caní, ne quebe bentu' na lu xel-la sina cheézquezentu'. ¹³Lu da dxuzúajntu' chee quebe bi de da quebe gaca gulábale, ne chéajni'ile, na' dxaca lazra' chéajni'i xánnele ¹⁴ca ba guxéajni'ile late', chee lu zra xelá' Xránadxu Jesús, gácantu' netu' tu da ba neza chee le'e, ca le'e gácale tu da ba neza cheentu'.

¹⁵Lawe' da dxuxrén lazra' gaca caní, bechugu lazra' xida' nédxula xedajnná'a le'e chee gaca tu da ba neza chee le, na' xedajnná'a le'e chupa lasa, ¹⁶lawe' da bechugu lazra' xedajnná'a le'e gate tea' cha'a xezre ca' zaj nababa Macedonia, na' te na', gate zezá'a lu xezre ca' zaj nababa Macedonia, xedajnná'a le'e xetú. Ca' gaca na, le'e gaca gácalele neda' cha'a xezre ca' zaj nababa Judea. ¹⁷¿Quebe naca' du lazra' gate dxechugu lazra' caní? ¿Dxéquele le'e naca' ca tu benne' chee xezr la xu nigá, na' dxen-nía': Awe', cabí, gate dxechugu lazra' da guna'? ¹⁸Dios nézquezne' neda', ne Silvano, ne Timoteo, quebe dxentu' le'e: Awe', cabí. ¹⁹Naca na caní lawe' da Je-

sucristo, Zri'ine Dios, Bénnea' bzéntenú' le'e ca naca chee', cabata' gunné': Awe', cabí. Nen Cristo nácaqueze da li xrtizra Dios, ²⁰lawe' da ne chee Le' dxelaca li xúgute da guchebe lazre' Dios. Chee le na', gate dxue lá'anantu' Dios, dxen-nantu': ¡Ca'an naca na! ne chee Jesu-cristo. ²¹Dios naque' Bénnea' ba nuzé chíchue' netu', ne le'e lu da naca chee Cristo, ne ba guqué'e dxi'u, ²²ne ba nuzúe' cheedxu tu da dxulé'e na nácadxu bi chee Le', lawe' da ba nuzúe' Be' Lá'azxa lu xichaj lázrdaudxu, da dxunna bea na sidxu da naca chee'.

²³Che quebe ne xida' Corinto ca bechugu lazra', neze Dios naca na chee gaca' zren lazre' nen le'e, ne che quebe naca caní, dxenaba' Dios xequé'e xel-la nabán chia'. ²⁴Quebe naca na lawe' da dxaca lázrentu' nna bé'entu' le'e da dxal-la' chéajlele, lawe' da ba ze cháchale lu da dxéajlele. Dxaca lázrentu' bédxale lu da naca chee Cristo.

2 Chee le na' bechugu lazra' quebe xida' xedajnná'a le'e lu da baxache'. ²Che neda' guzúa' le'e lu da baxache', ¿núzraqueze guzúa neda' lu xel-la dxebe? Tuze le'e, benne' ca' ba bzua' lu da baxache'. ³Chee le na' bzuaja' cheele ca da bēna' lawe' da quebe guca lazra' xida' chee guzúale neda' lu da baxache', le'e na' dxal-la' guzúale neda' lu xel-la dxebe. Bxren lazra' che neda' zua' lu xel-la dxebe, cá'anqueze le'e síale lu xel-la dxebe. ⁴Gate bzuaja' cheele da na' guzúe'eda' gunne xue, ne guzúa' lu da zi' da xa', ne cá'anqueze gudxézrele'equeza', san quebe bzuaja' da na' chee guzúa' le'e lu da baxache', san chee nézele nazrí'ile'eda' le'e.

Ca dxal-la' xulunite lawe' chee bénnea' bene' da calea

⁵Che nu benne' ba bzue' neda' lu da baxache', quegá chia' néda'ze bene' na, san cá'anqueze waca nnadxu, bzue'

xúgutele lu da baxache'. Dxennía': Waca nnadxu, chee quebe gácateca' snia. ⁶Ca xel-la zi' da bdele bénnea' gate na' bzrá-gale, ba nácale'equeze da na'. ⁷Ca' naca na, na'a dxal-la' gunite laule chee bénnea', ne xue zrenle le', chee quebe gunitie' xel-la dxebeza lazre' chee' ne chee da baxache' zren da dxedé'. ⁸Chee le na' dxata' xueda' le'e gulé'ele le' xecha lasa ca nazrí'ile'ele le'. ⁹Bzuaja' nédxula cheele ca naca da nigá chee gulé'e lawe' che nácale wezúe dizra' lu xúgute da dxaca. ¹⁰Na'a, nu benne' dxunite laule chee', cá'anqueze neda' dxunite lawa' chee'. Ca da bnite lawa' neda', che naca na tu da dxal-la' gunite lawa', ba bnite lawa' na ne cheele le'e lau Cristo ¹¹chee quebe seque' Satanás nna be'e na dxi'u, na' ba nézquezdxu ca da dxun na.

Pablo dxezé' gunne xue lu xezre Troas

¹²Gate bzrina' xezre Troas chee guzenda' bēneache dizra' chawe' chee Cristo, gutá'le'e lataj chia' guna' zrin chee Xránadxu. ¹³Guzúale'a gunne xue lawe' da quebe bezrelda' bi bíchedxu Tito ga na'. Chee le na' bzea' dizra' benne' ca' zaj zre'e na', na' guxá'a xezr la xu Macedonia.

Dxezru'edxu ne chee Cristo

¹⁴Xcalén Dios, Bénnea' dx-eché'tequeze' dxi'u lu neza guxú'u Jesucristo lu da bzru'éne', ne dxulé'e lawe' ne cheedxu dxi'u dizra' chee' ca tu da dxelá zixre da dxezriluj gáteteze na. ¹⁵Dxi'u nácadxu ca da dxelá zixre da dxuzúa Cristo lau Dios, ne dxezriluj na ládujla benne' ca' xeledé', ne ládujla benne' ca' xelebía xi'e. ¹⁶Lau benne' ca' xelebía xi'e da dxelá nigá naca na ca tu da dxute bēneache, san lau benne' ca' xeledé' naca na tu da dxunezruj na bēneache xel-la nabán. ¿Nu benne' naca chee' gaque' caní? ¹⁷Netu' quebe dxedantu' dxútentu' dizra' chee Dios, ne

quebe dxuchantu' na ca dxelún benne' zante. Lawe' da dxen Dios, dxuchálajntu' du lázrentu', ca benne' nasel-la Dios, ne ca wen zrin chee Cristo.

Dizra' chee xel-la wezría cube

3 Gate dxennantu' da nigá, ¿dxéquele dxezú launtu' xecha lasa dxennentu' chawe' da naca cheézquezentu'? ¿Dxun na ba xen gulé'entu' le'e tu xiche da dxulé'e na nácantu' xrlátaje, u nábantú chee le tu xiche caní, ca dxelún bal-la benne'? ² ¡Cabí! Lawe' da nácaquezle le'e ca tu xiche da dxulé'e na nácantu' xrlátaje, da naxúaj na lu xichaj lázrdauntu', na' xúgute bènneache gaca xelexúnbe'e na, ne xululabe' na. ³ Le'e nácale ca tu xiche da nuzúaj Cristo, ne da dxulé'e launtu' netu'. Nácale ca tu da naxúaj na da quebe naca na tu lu xiche, san ne chee Be' Lá'azxa chee Dios ban, tu da quebe naxúaj na lu blaga xiaj, san lu lázrdaudxu.

⁴ Ne chee Cristo dxuxrén lázrentu' Dios, ⁵ quegá chee bi gaca guntu' da naca cheézquezentu', san, ca naca da gaca guntu' naca na chee Dios. ⁶ Le' ba nunne' netu' guntu' zrin chee' ne chee tu xel-la wezría cube da quebe naca na ne chee tu da naxúaj na, san da naca na ne chee Be' Lá'azxa chee'. Da nadxixruj bea na da naxúaj na dxuzría xi na dxi'u, san Be' Lá'azxa na' dxunna dxi'u xel-la nabán.

⁷ Da bdxixruj be'e Moisés na' bxuaj na le'e xiaj blaga', ne bla' nen tu da bsení'le'e, na' québedxa belezúe benne' Israel ca' xelené'e lau Moisés, lawe' da gúcatite legala le'e dxu'a lawe', na' xel-la naxaní' na' bexul-la na chawe lazre'. Che lu xel-la naxaní' zren bla' da nadxixruj bea na, da dxuzría xi na dxi'u, ⁸ da zréne'le'edxa naca xel-la naxaní' chee dizra' chawe' na' da nusá Be' Lá'azxa cheedxu. ⁹ Che da nadxixruj bea na da dxuzría xi na dxi'u guca na tu da xabáa zrente, na' tu da xabáa zréne'edxa naca dizra'

chawe' na' da dxucá'ana na dxi'u xrlátaje lau Dios. ¹⁰ Lácala che da nadxixruj bea na nédxula guca na tu da xabáa, na'a quebe bi naca xabáa chee na lau dizra' chawe' nigá da naca na tu da xabáa zréne'le'edxa. ¹¹ Che guca tu da xabáa chee da na' guzí bea na tu chí'idauze, napa na tu da xabáa zréne'le'edxa da na' si bea na chadía chacanna.

¹² Lawe' da dxuxrén lázrentu' naca caní, du lázrentu' dxuchálajntu' dizra' chawe' na'. ¹³ Quebe dxuntu' ca ben Moisés, bgacu lawe' tu ladxe' chee quebe xelexé'e benne' Israel ca' xexul-la xel-la naxaní' na' da quebe guzí bea na. ¹⁴ Benne' Israel ca' quebe guléajni'ine'. Ne na'a zra, gate dxululabe' xel-la wezría gula na', ladxe' ná'queze quebe dxue na le' lataj xeléajni'ine', lawe' da quebe ne xedúa na, na' gaca xedúa na tuze ne chee Cristo. ¹⁵ Na'a zra, gate dxululabe' dizra' chee Moisés, zua ca tu ladxe' da dxucache na xichaj lázrdawe'. ¹⁶ Gate tu benne' xexaque' chee Xránadxu, xedúa ladxe' na' lu xichaj lázrdawe', ¹⁷ lawe' da naca Xránadxu Be' na', na' naga zua Be' chee Xránadxu, na' de xel-la weselá lu na' da nadxixruj bea na chee Moisés na'. ¹⁸ Chee le' na' xúgutedxu dxi'u, lawe' da quebe da' laudxu tu ladxe', nácadxu ca tu wana' da dxulé'e na da xabáa chee Xránadxu, na' dxí'unqueze, tu tu lasa gate dxel'éedxu da xabáa chee dxexácadxadxu ca naca Cristo, lawe' da tu tu lasa na' nápadxadxu da xabáa chee'. Da nigá dxun Be' chee Xránadxu, na dxuché'e dxi'u lu xichaj lázrdaudxu.

4 Ca' naca na, cabata' dxate ni'a nantu' lawe' da lu xel-la dxexache lazre' chee', Dios ba nusebague' netu' zrin nigá chee Cristo da dxuntu'. ² Ba nuzúantu' chalá'ala da dxelún bènneache bagácheze, ne da dxedué'entu' ca zaj naca na. Quebe bi dxuntu' da wen lazre', ne quebe dxuchantu' dizra' chee Dios, san dxennentu' tuze da li, na'

caní dxuzúa cuínantu' lu na' xichaj lázrdau xúgute Bénneache lau Dios. ³Che dizra' chawe' da dxuzéntenú' Bénneache ne nagache na, naca na caní tuze lau benne' ca' xelebía xi'e. ⁴Lawe' da quebe dxeléajle'e chee Cristo, na' da xriwe', da na' naca na dios chee xezr la xu nigá ba nun chul-la na xichaj lázrdawe' chee quebe xelelé'ene' xel-la naxaní' chee dizra' chawe' chee xabáa chee Cristo, Bénnea' naque' lu'a lesaca Dios. ⁵Quebe dxuzéntenú' Bénneache ca naca cheézquezentu', san ca naca chee Jesucristo. Dxennantu' naque' Xránadxu, na' ca naca cheentu' dxennantu' nácantu' wen zrin cheele lawe' da nazrí'intu' Jesús. ⁶Dios ná'queze, Bénnea' gunná be'e guxaní' xi' na' lu da chul-la, naque' Benne' ba bene' guxaní' xi' chee' lu xichaj lázrdaudxu, chee gaca gúnbeadxu da xabáa chee Dios da dxácátite legala na dxu'a lau Jesucristo.

Dxundxu xúgute ne chee xel-la dxeajlí lazre' cheedxu

⁷Da xabáa nigá nápantu' lu belá' dxen cheentu', da naca na ca tu xesu' xu, chee gaca bea za xel-la waca zren nigá lu na' Dios, ne quegá cheézquezentu'. ⁸Chee le na':

Láqueze zúantu' lu da stébele'e, quebe dxezentu' gunne xue.

Láqueze dxezentu' gunne xue, tu dxebeza lázrequezentu' gácale Dios netu'.

⁹Láqueze zaj nau zi' xuzre' netu', quebe dxusán Dios netu'.

Láqueze dxeline' netu' xu, quebe dxebía xintu'.

¹⁰Gáteteze dxéajntu' naca tuze belá' dxen cheentu' nen xel-la gute chee Jesús chee gulé'e lau lu belá' dxen cheentu' xel-la nabán chee Jesús. ¹¹Dxácate naca bantu' zúantu' chee gátentu' xúgute zra ne chee Jesús, chee gulé'e lau xel-la nabán chee Jesús lu belá' dxen

cheentu' da gate. ¹²Ca' naca na, lácala tu zúazquezentu' lu da stebe chee xel-la gute da nigá, dxun na sua tu xel-la nabán cube chee.

¹³Naxúaj lu dizra' lá'azxa da dxenná na: Guxéajle'a, na' chee le na' bchálaja', na' cá'anqueze netu', lu xel-la dxeajlí lazre' caníqueze, dxéajle'entu', ne dxuchálajntu', ¹⁴lawe' da nézentu' Dios, Bénnea' bsebane' Xránadxu Jesús ládujla benne' gate, cá'anqueze gusebane' dxi'u tu zren nen Jesús, na' tu zren nen le'e, xeché'e dxi'u lau Le'. ¹⁵Xúgute da nigá guzaca zintu' chee gaca tu da ba neza cheele, chee gaca na, gate xelezí' benne' zante xel-la xrlátaje chee Dios, cá'anqueze benne' zante xelé'e Le': Xcalenu', chee gaca ba chee Dios.

¹⁶Chee le na', cabata' dxate ni'a nadxu. Láqueze dxexru belá' dxen cheedxu, Dios dxuxucubé' be' nácaquezdxu tu zra tu zra. ¹⁷Da dxezácadxu lu xezr la xu nigá naca na tu da dauze, da teze chee na, na' nusá na cheedxu tu xabáa chadía chacanna da szrente, ne da cháwedxa. ¹⁸Quebe nná'adxu ca da dxelé'edxu, san nná'adxu da quebe nalá', lawe' da quebe dxelezí' bea da ca' dxelé'edxu, san da ca' quebe dxelé'edxu dxelezí' bea na chadía chacanna.

5 Belá' dxen cheedxu naca na ca tu xu'u lizre be' nácaquezdxu. Belá' dxen cheedxu naca na ca tu xu'u da quebe si bea na, na' gate gátedxu Dios ba nucueze' cheedxu xabáa tu xu'u da zea jlí canna, da nun Diósqueze, ne quegá Bénneache. ²Da li dxácate naca bandxu lu belá' dxen nigá dxebezre we'dxu lawe' da dxaca lázredxu cheajchú'udxu belá' dxen cube na' da gunna Dios dxi'u xabáa. ³Quebe xegá'ana cá'aze be' nácaquezdxu xabáa. Cheajchú'u na belá' dxen cube na'. ⁴Dxácate ne naca bandxu lu xu'u nigá da naca na belá' dxen cheedxu, dxebezre we'dxu, ne dxededxu xel-la zi'. Quebe nácaze na lawe' da dxaca lázredxu gu-

sandxu belá' dxen gula cheedxu nigá. Dxacá lázredxu cheajchú'udxu belá' dxen cube, na' ca'an gaca xenite belá' dxen cheedxu da dxal-la' gate, na' la' belá' dxen cube cheedxu da gaca ban na chadía chacanna. ⁵Bénnea' ba nune' dxi'u chee gaca cheedxu caní naque' Dios, Bénnea' ba nunne' dxi'u Be' Lá'azxa ca tu da dxunna bea na dxal-la' sidxu tu belá' dxen cube xabáa.

⁶Ca' naca na, dxuxrén lázretequezdxu Dios. Ba nezdXu dxácatę naca bandxu lu belá' dxen nigá zúadxu zítu'la naga zua lízredxu, da naca na, quebe zúalędxu Xránadxu, ⁷na' dxedadxu ne chee xel-la dxeajlí lazre' cheedxu, quegá ne chee da dxelę'dxu. ⁸Dxuxrén lázredxu Dios, ne dxaca lázredxadxu gusandxu xel-la nabán cheedxu lu belá' dxen nigá chee chéajdxu cheajsúalędxu Xránadxu. ⁹Chee le na' dxundxu ba xuzre gún-tequezdxu da xezaca ba lazre' Xránadxu, che nagá'anadxu lu belá' dxen cheedxu nigá, u che cheajchú'udxu belá' dxen cube, da zua na xabáa, ¹⁰lawe' da xúgute'dxu dxun na ba xen xezrindxu lau Cristo chee guchi'ę ca da nundxu tu tudxu, chee si' lu nadxu ca da xáladxu, cáteze naca da xrlátaje, u da calęla da ba bendxu gate ne zúadxu lu belá' dxen cheedxu nigá.

Dizra' da dxexún dxi'u tuze nen Dios

¹¹Chee le na', lawe' da núnbeantu' ca dxal-la' zrębedxu Xránadxu, dxuntu' ba xuzre guntu' xeledá bęnneache. Dios ba nézene' da nácantu', na' dxebeza lazra' cá'anqueze le'e nézele na. ¹²Quegá dxennentu' xrlátaje cheęzquezentu', san dxúnnantu' le'e lataj gápale netu' ba lá'ana, chee gaca xechębele chee benne' ca' dxulucá'ana szren cuinę' ca naca da zaj naque' cúzreze, ne quegá ca naca da zaj naque' lu xichaj lázrdawe'. ¹³Che dxeleque bęnneache nadá xichaj lázrdauntu' naca na chee guntu' zrin chee

Dios, na' che quebe nadá xichaj lázrdauntu' naca na chee gaca tu da ba neza cheęle le'e. ¹⁴Xel-la zri'i lazre' chee Cristo dxusebaga na netu' lawe' da nézentu' che tu benne' gutię' waláz chee xúgute bęnneache, na' ba gulate xúgute'. ¹⁵Cristo gutię' waláz chee xúgute bęnneache, chee benne' ca' zaj naca bane' quębedxa xelaca bane' cheęzqueze', san chee le', Bénnea' gutię', ne bebane' waláz chee benne' ca'. ¹⁶Chee le na', quębedxa nna'ntu' ca naca da nácaqueze tu benne' lu xęzr la xu nigá, na' láqueze nédxula gunna'ntu' Cristo cáteze gúcaqueze' lu xęzr la xu nigá, na'a quębedxa nna'ntu' le' caní. ¹⁷Ca' naca, che tu benne' naque' tuze nen Cristo, naque' tu benne' cube. Da gula ca' chee benne' nigá ba guledę chee na, na' xúgute na zaj naca na cube.

¹⁸Xúgute da caní dxun Dios, Bénnea' bexunę' dxi'u tuze nen Léqueze' ne chee Cristo, na' bsebage' dxi'u guzendxu bęnneache ca gaca xelexaque' tuze nen Dios. ¹⁹Gate gute Cristo, Dios guzúalęqueze' le', ne bexunę' bęnneache chee xęzr la xu nigá tuze nen le', ne quebe gunnę'ę ca zaj naca dul-la zaj nabaga bęnneache ca', na' bsebage' dxi'u guzendxu bęnneache dizra' da dxexún dxi'u tuze nen Dios. ²⁰Ca' naca na, nácantu' gubáz chee Dios ne chee Cristo, na' naca na cáteze Diósqueze dxata' xuene' le'e lu dxúa'antu', na' dxata' xuentu' le'e lu La Cristo, le xexaca tuze nen Dios. ²¹Cristo netú dul-la ca bene', san ne cheedxu dxi'u, Dios bdeę' le' chee gutię' le'e xaga bęguaj ca tu benne' dul-la, chee xexácadxu benne' xrlátaje lau Dios ne chee da ben Cristo.

6 Ca' naca na, ca wen zrin tu zren nen Dios dxata' xuentu' le'e chee quebe guzúale chalá'ala xel-la zri'i lazre' chee Dios, ²lawe' da lu dizra' lá'azxa dxennę': Tu zra dxezaca ba lazra' benda' chiu', na' lu zra chee xel-la weselá gúcalęna' lue'.

Na'a naca na zra dxezaca ba lazre' xenne' chee, ne guselé' le'e.

³ Quebe bi dxuntu' da gun na quebe xeléajle' bèneache chee Cristo, chee quebe nu nne caléla chee zrin dxuntu'.

⁴ Ca naca xúgute' da dxuntu', dxaca lázrentu' gulé'entu' bèneache nácantu' wen zrin chee Dios,

ne chee xel-la dxebeza zren lazre' cheentu' gate dxuchaga launtu' da dxezácantu',

ne da dxexázejentu', ne da zaj naca stébe cheentu',

⁵ ca buluzálaje' netu', ne gulegu'e netu' lizre xia.

Guledábague' netu' san bñle'entu' zrin. Zane' lasa quebe gísentu', ne quebe bi gudáguntu'.

⁶ Cá'unqueze blé'entu' da nácantu' ne chee tu xel-la nabán li lazre' cheentu', ne ne chee da li da núnbeantu',

ne ne chee xel-la zren lazre' cheentu', ne xel-la zri'i lazre' cheentu',

ne ne chee Be' Lá'azxa, Bénnea' zúalene' netu',

ne ne chee xel-la nazrí'i cheentu' da naca na du lazre',

⁷ ne ne chee dizra' li da dxuzé'entu' bèneache,

ne ne chee xel-la waca chee Dios da zúale na netu'.

Bchínentu' da zaj naca ca xia chee wedil-la chee da xrlátaje chee gudíl-lantu', ne chee gudentu' chalá'ala da zaj naca ca xia chee wedil-la chee benne' ca' dxeledábague' netu'.

⁸ Zua gate dxelape' netu' ba lá'ana', ne zua gate dxuluzúe' netu' chalá'ala.

Zua gate dxelenné' cheentu' da xrlátaje, ne zua gate dxelenné' cheentu' da caléla.

Zua gate dxelenné' nácantu' wen lazre', ne zua gate dxelenné' dxennentu' da li.

⁹ Zua gate quebe nu dxuzé naga netu', ne zua gate dxuluzé naga xánnie' netu'.

Zua gate zúantu' lu da stébe chee xel-la gute, san ne naca bantu'.

Zua gate dxuludé' netu' xel-la zi', san quebe ne xelutie' netu'.

¹⁰ Láqueze zúantu' lu da baxache', zúatequezentu' lu xel-la dxebé.

Lácala nácantu' benne' xache', ba nuntu' benne' zan benne' gunní'a.

Láqueze quebe bi núantu', xúgute nápantu'.

¹¹ Bi bíchentu', benne' Corinto, ba bchálajntu' du lázrentu'. Ba blé'entu' le'e ca nazrí'i lázrentu' le'e. ¹² Tu zúazqueze xel-la zri'i lazre' cheentu', na' le'e na' quebe nazrí'ile netu' du lázrele. ¹³ Dx-ata' xueda' le'e ca dxun tu benne' dxata' xuene' bi cheéqueze' chee gulé'ele neda' du lázrele xel-la nazrí'i da zua na lu xi-chaj lázrdaule cáteze bena' neda'.

Nácadxu xudau' chee Dios ban

¹⁴ Quebe gunle tuze nen benne' quebe dxeléajle'e chee Cristo, da gaca na ca chacué' bezre gu'una, be quebe zaj nadíleba'.

¿Ájazra gun da xrlátaje gaca na tuze nen da caléla?

¿Ájazra gun xel-la naxaní' gaca na tuze nen da chul-la?

¹⁵ ¿Ájazra gun Cristo gaque' tuze nen Satanás?

¿Ájazra gun benne' dxéajle'e chee Cristo quebe dxéajle'e chee'?

¹⁶ ¿Ájazra gun xudau' chee Dios gaca na tuze nen bedáu' xiaj xaga?

Lé'equenze nácale xudau' chee Dios ban cáteze gunná Diósqueze:

Súalena' le', ne tálena' benne' ca'.

Gaca' Dios chee benne' ca', na' le' xe-laque' benne' xezre chia'.

¹⁷ Chee le na', cá'unqueze gunné':

Le xedxúaj ládujla benne' ca', ne le cuasa na', dxenná Xránadxu.

Quebe gutale da sban.

Nadxa si' lu na'a le'e ¹⁸ ne gaca' Xrale le'e, na' le'e gácale zri'ina' bi biu, ne zri'ina' bi nu'ula.

Caní dxenná Xránadxu, Bénnea' nape' dutę xel-la waca.

7 Ca' naca na, bi bícha'dau' nazri'ite lazra', da caní zaj naca na da guchebe lazre' Dios cheędxu. Cheę le na' dxal-la' guxúe xanne' cuínadxu cheę quebe güedxu lataj netú da sban gudxén na dxi'u lu belá' dxen cheędxu, ne lu be' nácaquezdxu, na' lawe' da dxezrébedxu Dios dxal-la' guzúa cuínadxu lu na' Dios dutę ca nácadxu.

Ca belexebí'i lazre' benne' Corinto

²Le si' lu na'le netu'. Quebe bi da calela ne guntu' cheę nu benne' ládujla le'e, ne quebe nu ne guchántu', ne quebe nu ne si xentu'. ³Quebe dxennía' da nigá cheę gusebaga' le'e zria, san naca na ca ba gucha' le'e nédxula, le'e zúale lu lázrdawa' che gaca bana', u che gatia' tu zrentę nen le'e. ⁴Du lazra' dxuchálajlęna' le'e, ne zua' lu da ba neza ne cheęle le'e. Lu xúgute da dxezácantu' zua da dxexúe zrenle'e neda', na' dxebéle'ęda'.

⁵Da li, gate bzrintu' naga nababa Macedonia, quebe bezí' lázrentu'. Guzúantu' lu da stebe gáteteze, lawe' da gáteteze gudentu' guledábaga bėnneache netu', na' lu lázrdauntu' bezrébentu'. ⁶Nadxa Dios, Bénnea' dxexúe zrenę' benne' zaj nate ni'a ne'e, bexúe zrenę' netu' ne cheę Tito lawe' da bezrinbe' naga zúantu', ⁷ne quegá tuze lawe' da bla'be', san cá'anqueze lawe' da bexúe zrenle lebe'. Gúzrebe' netu' ca dxezá lázrele lé'ele netu', ne bzenbe' netu' ca lu da baxache' zúale, ne ca gunne xue dxezele neda', na' cheę le na' gubéle'ędxeda'.

⁸Láqueze da bzuaja' cheęle bzua na le'e lu da baxache', quebe dxebezre lazra' cheę da na'. Láqueze gudxezre lazra' nédxula gate guque be'eda' bzua na le'e lu da baxache' tu chí'idau', ⁹na'a dxebeda', quegá lawe' da guzúale lu da

baxache', san lawe' da ben da baxache' na' bexíaje lázrele. Le'e bchaga laule da baxache' na' ca da bezaca ba lazre' Dios, na' da bzuaja' cheęle quebe bi da calela ben na cheęle. ¹⁰Da baxache' da dxuchaga laudxu ca da dxezaca ba lazre' Dios dxun na dxexebí'i lázredxu cheę ladxu, na' quebe dxal-la' cuezre lázredxu cheę na. Che xegá'anadxu lu da baxache' ca dxelún bėnneache cheę xęzr la xu nigá, na' tu chí'ize gátędxu. ¹¹Le'e bchaga laule da baxache' da guca na cheęle ne cheę da bzuaja', ne benle ca da dxezaca ba lazre' Dios, na' le nna'xque na'a:

Bzua na le'e gunne xue ca naca da guca, ne ben na ble'ele ca da benle.

Bcha'a na le'e, ne bchebe na le'e.

Nadxa guzé lázrele lé'ele neda', ne guzúale gudele xel-la zi' bėnnea' ben da calela na'.

Ca naca xúgute da nigá ble'ele quebe nabágale zria cheę dul-la nigá. ¹²Ca' naca na, gate bzuaja' cheęle da na', quebe guca na lawe' da gudxe'a gunne xue cheę bėnnea' bęne' da calela na', ne quegá lawe' da gudxe'a gunne xue cheę bėnnea' guca na cheę', san bėna' na cheę gueque be'ele lau Dios ca dxele gunne xue cheęntu'. ¹³Cheę le na' guca da bexúe zren na netu'.

Da naca tu da zrendxa, gubéle'ęntu' gate blé'entu' zúale Tito xel-la dxebe', lawe' da xúgutele le'e bexúe zrenlebe'. ¹⁴Láqueze bca'ana szrena' le'e lau Tito, quebe dxedu'ęda', lawe' da cáteze naca da li ca naca xúgute da bchálajlęna' le'e, cá'anqueze guca da li da bėna' gate bca'ana szrena' le'e lau Tito. ¹⁵Nazrí'idxabe' le'e gate dxajsá lázrebe' ca benle xúgutele le'e, benle cáteze gunábabe' le'e, ne ca guzú' lu na'le lebe' lu dutę xel-la dxexruj lazre', ne lu xel-la dxezrebe. ¹⁶Dxebeda' lawe' da dxuxrén lazre' xánnia' le'e.

Da dxunézrujdxu du lázredxu

8 Na'a, bi bicha', dxaca lazra' guzenda' le'e ca ble'e lau xel-la zri'i lazre' chee Dios ne chee xúgute cue' bi chee Cristo zaj nmita' lu xezr la xu Macedonia. ²Láqueze guledée' tu xel-la zi' zren gulebéle'eqezne', na' láqueze zaj nácale'e benne' xache', du lazre' bulunézruje' da zaj de chee', na' belune' ca benne' gunní'a ca'. ³Dxexecheba' du lazre' bulunézruje' xúgute da gulezéquene', ne da zrendxa ca da gulezéquene'. ⁴Gulata' xuene' netu' güentü' le' lataj xeluné' tu zren bèneache dxelácalene' bi bíchedxu ca' dxelaxájrjene'. ⁵Belundxe' ca da guleza lázrentu', lawe' da belunna cuínaqueze', nédxula chee Xránadxu, na' gudé na' cheentu' netu', cáteze dxaca lazre' Dios. ⁶Ca' naca na, guta' xúentu' Tito gusexuzre' gutupe' da gunézruje le'e, da na' guzú lawe' dxutupe' gate nate. ⁷Le'e dxúnle'e ca naca da dxunle, ca dxearjli lázrele Dios, ne ca dxusédele bi chee Cristo, ne ca naca da naxéajni'ile, ne ca du lázrele dxunle xúgute, ne ca nazri'ile netu'. Ca' naca na, cá'aqueze dxal-la' gúnle'e ca gunle zrin chawe' nigá.

⁸Quebe dxapa' le'e da nigá ca tu da dxenná be'eda' le'e. Dxaca lazra' nézele ca du lazre' dxelún xezícadxa bèneache zrin nigá, dxulunézruje' dumí, chee gueque be'ele che naca li lazre' xel-la zri'i lazre' chee. ⁹Ba nézquezle ca naca xel-la zri'i lazre' chee Xránadxu Jesucristo. Naque' benne' gunní'a, san ben cuine' benne' xache' lawe' da bzri'ine' le'e, chee gácale le'e benne' gunní'a lu da naca chee Cristo lawe' da gudé Le' lu xel-la xache'.

¹⁰Chee gaca da ba neza chee dxapa' le'e da dxéqueda' ca naca da nigá. Gudú iza guzú laule, quegá dxúnzele, san du lázrele dxunle da nigá, dxunézrujele dumí. ¹¹Na'a, le gúnteze na chee xexuzrte gunle na, gunle na du

lázrele cáteze guzú laule dxunle nédxute, gunézrujele ca da du de chee. ¹²Che da li dxaca lazre' tu benne' gunézruje', Dios xezaca ba lazre' na che gunézruje' ca da nape', ne quegá dxenabe' da quebe napa bénea'.

¹³Quebe dxenní'a da nigá chee xexácale le'e xache' chee gácale benne' xula. ¹⁴Naca na chee gápale lébete. Na'a nácale chee gunézrujele ca da dxelaxájrje benne' xula ca', na' xetú lasa xelapa benne' ca' da xelunne' chee gate bi xáxrjele le'e. Caní gápale lébete ¹⁵cáteze naxúaj na lu dizra' lá'azxa, dxenná na: Bénnea' nácale' quebe bi begá'ana chee', na' bénea' nape' láteze quebe bi bexájrjene'.

Tito ne bi ljwezre' ca'

¹⁶Xcalén Dios, Bénnea' bzue' lu lázdau Tito sue' gunne xue chee le'e ca zua' neda'. ¹⁷Guzí' lu ne'e da bsebagá' le', na' lawe' da zúaqueze' gunne xue chee le'e, ba bezé'e chee xide' xedajnné'e le'e lawe' da dxaca lázrequeze le'.

¹⁸Tu zren nen Tito nasél-lantu' tu bi bíchedxu, tu benne' dxelenné chawe' chee' xúgute cue' bi chee Cristo, ca naca zrin xrlátaje da nuné' chee dizra' chawe' chee Cristo. ¹⁹Quegá tuze da nigá, san xúgute cue' bi chee Cristo gulequ'é' bi bíchedxu níqueze chee sálene' netu' chee gácalene' netu' lu zrin nigá da dxuntu' dxutúbentu' dumí da gácale na benne' xache' ca' chee gaca ba Xránadxu, ne chee gul'é' lau du lázrele dxunle zrin chawe' nigá. ²⁰Caní dxuntu' chee quebe nu benne' si tizre' netu' ca dxuchínentu' dumí zrente nigá da dxulunezruj bi bíchedxu ca'. ²¹Dxuntu' ba xuzre guntu' zrin nigá lu dute xel-la li lazre' cheentu', quegá tuze lau Xránadxu, san cá'aqueze lau xúgute bèneache.

²²Tu zren nen benne' caní nasél-lantu' xetú bi bíchedxu, tu benne' da zánete lasa ba blé'ene' netu' du lazre' dxune' zrin

chee Cristo, na' na'a du lázredxe' dxune' zrin nigá lawe' da dxuxrén lazre' le'e. ²³Che nu benne' guchebe le'e ca naca chee Tito, le xe'e nacabe' bi ljwezra', ne dxunbe' zrin tu zren nen neda' chee gunbe' zrin chee. Che nu guchebe le'e ca naca chee zezícadxa bi bíchedxu ca' zeajrague' Tito, le xe'e zaj naque' benne' gulesel-la xúgute cue' bi chee Cristo, ne dxelape' ba lá'ana Cristo. ²⁴Chee le na', chee xeleneze xúgute cue' bi chee Cristo, le gul'é le' nazrí'ile le', na' naca cheentu' xucá'ana szrentu' le'e.

Da dxulunéruje' chee bi bíchedxu ca'

9 Ca naca chee dumí da gunéruje' chee bi ca' chee Cristo, quebe dxun na ba xen guzúaja' chee, ²lawe' da ba nezda' ca dxaca lázrele gunle na. Dxezaca ba lazra' dxapa' bi bíchedxu zaj zre'e xezre ca' zaj nababa xezr la xu Macedonia, le'e zrale xezre ca' zaj nababa Acaya, gudú iza ba zúatequezle bi gunéruje', na' benne' zante benne' Macedonia du lazre' dxulunéruje' lawe' da dxunéruje' le'e du lázrele. ³Dxusella' bi bíchedxu caní chee quebe gaca tu da wen lazre' ca da chawe' da ba gunnía' ca dxunle le'e da nigá, ne chee súatezle bi gunéruje', ca ba gucha' benne' caní, ⁴ne che sa'aca bal-la benne' Macedonia tu zren nen neda' chee quebe xelélé'ene' quebe zúatequezle le'e bi gunéruje'. Chela gaca na caní xedu'entu' lawe' da bxren lázrentu' le'e caní, na' da zrendxa ca dxal-la' xedu'éle le'e. ⁵Chee le na' gúqueda' dxun na ba xen naba' bi bíchedxu ca' xelide' xedajlennabe' le'e nédxula, ne chee xelácalene' le'e gutúpale da guchebe lázrele nédxula gunéruje'. Ca' gaca na, dumí da gutúpale watá'queze na chee gul'é na naca tu da dxaca lázrele gunle, ne quegá tu da gunne xúentu' le'e.

⁶Le nna'xque da nigá: Bénnea' dxaze' láteze, cá'anqueze láteze xezi'e, na' bén-

nea' dxázale'e, cá'anqueze xezí'ile'e. ⁷Tu tu benne' dxal-la' gunéruje' cáteze da ba nunge' lu lázrdawe', quegá ca tu benne' quebe dxezaca ba lazre', u xadíaze, lawe' da nazrí'i Dios benne' dxunéruje' dute xel-la dxebe. ⁸Wazeque' Dios gúnnale'e le'e ca naca xúgute da chawe', chee gata' chee xúgute da nachínele, ne gápale bi gunéruje' chee gunle xúgute zrin xrlátaje. ⁹Naxúaj lu dizra' lá'azxa da dxenná na:

Du lazre' bnéruje' chee benne' xache' ca'.

Ca zaj naca zrin xrlátaje nune' xelegá'anatequeze na.

¹⁰Dios, Bénnea' dxunéruje' bínnedu ca' da dxázadxu, ne dxunne' da dxi'aj dxágudxu, gunne' le'e xúgute da nachínele chee gázale, na' gusegule' na chee gúnnale'e'queze na lina chee zrin chawe' da gunle. ¹¹Ca' gaca na, gáta'le'e chee xel-la gunní'a ca' chee séquele gunéruje' du lázrele, na' dumí na' sél-lale lu na'ntu' netu' gun na xelé bi bíchedxu ca' Dios: Xcalenu'. ¹²Ca' naca na, gate gunérujdxu bi bíchedxu ca' dumí nigá da gácale na le', quegá tuze dxunérujdxu tu da dxelechínnene' san cá'anqueze dxundxu xelé'e Dios: Xcalenu'. ¹³Xelúe lá'ané' Dios lawe' da da nigá dxunéruje' gul'é na dxuzúale dizra' chee dizra' chawe' chee Cristo. Cá'anqueze xelúe lá'ané' Dios ne chee da gunéruje' du lázrele da gácale na le', ne xúgute cue' bi chee Cristo. ¹⁴Chee le na' benne' ca' xelenabe' chee lau Dios, ne xelezrí'ile'ene' le'e ne chee xel-la zri'i lazre' zren da gul'é lau Dios ne chee le'e. ¹⁵Xcalén Dios lawe' da nunne' dxi'u tu da zrente da quebe séquedxu xuzájla'adxu.

Xel-la dxenná bea napa Pablo lawe' da naque' gubáz chee Cristo

10 Neda', Pablo, dxuzenda' le'e da nigá ne chee xel-la dxexruj lazre',

ne xel-la zri'i lazre' chee Cristo. Dxelen-né' naca' benne' zren lazre' gate zúalena' le'e, na' gate zua' zitu' nácale'a benne' snia. ²Dxata' xueda' le'e quebe gunle, gate xida' xedajnná'a le'e, gaca' benne' snia nen bal-la benne' ládujla le'e, benne' ca' dxelenné' dxuntu' zrin chee Cristo lu bēla' dxenze cheentu', na' zúaqueza' tillaqueza' benne' ca'. ³Láqueze nácantu' bēla' dxen quebe dxedíl-lantu' lu bēla' dxenze cheentu', ⁴lawe' da quebe zaj naca chee bēla' dxenze da dxuchíntentu' lu wedil-la cheentu', san zaj napa na xel-la waca chee Dios chee séquentu' guzría xintu' da wal-la ca' chee nu na' dxedábaga' netu'. ⁵Ca'an naca, dxuzría xintu' da dxusebaga bēneea' dx'u, ne da dxuzúe' lu xel-la dxucá'ana szren cuina chee quebe xelúnbea bēneache Dios. Xúgute' da zaj xu'u lu xichaj bēneache dxuzúantu' lu na' Cristo chee xuluzúe' dizra' chee'. ⁶Zuátequezentu' gudentu' xel-la zi' xúgute' benne' ca' quebe dxuluzúe' dizra' chee' gate na' ba dxuzúale dizra' chee' du lázrele.

⁷Le'e dxenna'le benne' ca' cáteze da zaj naque' cúzreze. Che nu benne' dxéquene' da li naque' bi chee Cristo, dxal-la' gueque bé'ene' cáteze na' naca le' bi chee Cristo, cá'anqueze nácantu' netu' bi chee Cristo. ⁸Láqueze dxuchínedxeda' ca dxal-la' guna' xel-la dxenná' bea cheentu', quebe dxedu'éda' lawe' da nunna Cristo netu' xel-la dxenná' bea na' chee séquentu' gusegúlantu' le'e lu da naca chee Dios, ne quegá chee guzría xintu' le'e. ⁹Quebe dxaca lazra' guéquele le'e dxaca lazra' gucheba' le'e ne chee da dxuzúaja' cheele. ¹⁰Dxelenné' xiche ca' da dxusél-la' zaj naca na snia, ne wal-la, san néda'queza' naca' benne' nate ni'a na', ne ca dxuchálaja' quebe zácateca. ¹¹Bēneea' dxenné' da nigá dxal-la' gueque bé'ene' cáteze naca' lu dizra' dxuzúaja' gate ne zua' zitu', cá'anqueze gaca' lu da guna' gate na' súalena' le'e.

¹²Quebe dxexázrentu' gutil-le lébentu', u gulé'e cuínantu' ca zaj naca bal-la benne' ca' dxulucá'ana szren cuine'. Dxelune' tu da xálaze gate dxelenné'e ca da zaj náaqueze', ne dxulutil-le lebe ljwezre'. ¹³Quebe gucá'ana szren cuínantu' lu da quebe naca cheentu'. Dios naque' Bēneea' gulé'ene' netu' naga ze lau guntu' zrin, na' Le' benne' netu' lataj blantu' naga zrale le'e lu xezre Corinto. ¹⁴Chee le na' quebe dxedxúajntu' naga ze lau cheentu', cáteze gaca na che quebe ne zrintu' naga zrale le'e nédxute. Netu' nácantu' benne' nedxu blantu' naga zrale le'e núantu' dizra' chawe' chee Cristo. ¹⁵Quebe dxucá'ana szren cuínantu' lu zrin da zaj nun benne' xula, san dxebeza lázrentu' cáteze gula xel-la dxeajlí lazre' cheele, waca gúndxantu' zrin ládujla le'e gusegúlantu' xel-la dxeajlí lazre' cheele, san guntu' na lu'ule da naca cheentu'. ¹⁶Te na' dxebeza lázrentu' tédxantu' ca naga zrale chee guzénentu' bēneache zaj zre'e ga na' dizra' chawe' chee Cristo, ne quebe chú'untu' naga ba zaj nun zrin xezícadxa benne' ca', chee quebe gucá'ana szren cuínantu' lu da ba zaj nune'.

¹⁷Che nu benne' dxaca lazre' nu gucá'ana szrene', dxal-la' gucá'ana szrene' Xránadxu. ¹⁸Bēneea' dxexedxúaj xrlátaje, quebe naque' benne' dxucá'ana szren cuine', san naque' bēneea' dxucá'ana szren Xránadxu le'.

Ca naca chee Pablo, ne benne' gubáz ca' quebe nase-la Cristo le'

11 Le guchaga lau neda' chee nnia' late' da ca zeaje na. Ájateze naca na, le guchaga lau neda', ²lawe' da dxé'le'a gunne xue cheele le'e lu da nusebaga Dios neda', ne lawe' da ba nachebe lazra' cheele gácale zru'ula Cristo, dxaca lazra' gudéa' le'e lau Le' ca tu nu'ula cúde'dau' du lazre' súalebe' benne'

cheebe'. ³Ca ben bela' gula na' guzi xeba' Eva nen xel-la neze cheeba', dxezreba' güele lataj nu si xe le'e, na' cuásale lu xichaj lázrdaule chee québedxa gácale du lázrele chee Cristo. ⁴Le'e dxuchaga laule benne' ca' zá'aque' dxuluchálaje' chee tu Jesús, benne' nazrá' ca Bénnea' bzénentu' le'e chee Le', ne du lázrele dxezí' lu na'le tu be' da nazrá' ca Be' na' da ba guzi' lu na'le, ne dxezí' lu na'le tu dizra' da nazrá' ca naca dizra' chawe' da ba guzi' lu na'le. ⁵Dxéqueda' quebe zaca' neda' látezdxca ca benne' gubáz zren ca', benne' ca' zéajlele le'e. ⁶Láqueze quebe gaca guchálaja' xrtándau', dxéajni'ida' da na' dxuchálaja' chee na, na' blé'entu' caní naca na lu xúgute da ba bentu'.

⁷¿Bena' tu da calela gate bzenda' le'e dizra' chawe' chee Cristo, ne quebe bi bchízruja' le'e, na' ben cuina' dxexruj lazre' chee xegá'ana szrenle le'e? ⁸Guca na ca gudawa' dumí chee xezícadxa cue' bi chee Cristo gate guzi'a da belunne' neda' chee bena' zrin ga zúale le'e. ⁹Gate na' guzúalena' le'e, ne bxázrjeda', quebe bi guzi' lu na'a da naca chee, san bi bíchedxu zá'aque' xezr la xu Macedonia belunne' neda' ca da guchínneda'. Bena' ba xuzre quebe bi gunábeda' le'e, na' cá'anqueze guna'. ¹⁰Lawe' da núnbe'a da li chee Cristo, quebe zua nu benne' naga nababa xezr la xu Acaya gaca guzague' neda' chee québedxa gucá'ana szren cuina' chee da nigá dxuna'. ¹¹¿Bizr chee na' dxennía' caní? ¿Naca na lawe' da quebe nazrí'ida' le'e? Nézqueze Dios nazrí'ida' le'e.

¹²Gúnqueza' ca dxuna' chee quebe gata' lataj chee benne' ca' dxelaca lazre' xulucá'ana szren cuine' lawe' da dxeléquene' dxelune' zrin cáteze dxuntu' netu'. ¹³Benne' caní zaj naque' gubáz quebe nase-la Cristo. Dxelezí xé'e bèneache, ne dxululé'e cuine' ca gubáz chee Cristo. ¹⁴Quebe naca da nigá da xebánedxu lawe' da Satanásqueze dxulé'e

cuina na ca tu gubáz chee xabáa zue' lu xel-la naxaní' chee Dios, ¹⁵na' chee le na' dxululé'e cuine' ca benne' dxelún da xrlátaje. Benne' caní xelebía xi'e ca ba naca chee benne' dxelún da caní.

Da guzaca Pablo lawe' da naque' gubáz chee Cristo

¹⁶Xecha lasa dxapa' le'e, quebe nu benne' dxal-la' guéquene' nadá xichaj lázrdawa'. Che ca'an dxéquele le'e, le gunna neda' lataj guchálajlena' le'e ca tu benne' nadá xichaj lázrdawe', chee gaca gucá'ana szren cuina'. ¹⁷Quebe dxapa' le'e da nigá lu xel-la dxenná bea chee Xránadxu. Guchálaja' ca tu benne' nadá xichaj lázrdawe', nnia' tu da gucá'ana szren cuina'. ¹⁸Lawe' da zaj zra' benne' zante dxulucá'ana szren cuine' lu da zaj naque' chee xezr la xu nigá, cá'anqueze neda' gucá'ana szren cuina'. ¹⁹Lawe' da nácalé'ele benne' sina dxuchaga laule du lázrele benne' zaj nadá xichaj lázrdawe'.

²⁰Dxuchaga laule benne' ca' dxelexune' le'e ca benne' zaj nada'u, ne benne' ca' dxuluchínene' le'e, ne benne' ca' dxelenná bé'ene' le'e, ne benne' ca' dxuluzúe' le'e chalá'ala, ne benne' ca' dxelegape' xraga laule. ²¹Láqueze dxedué'eda' dxennía' da nigá, quebe guca' benne' dxechugu lazre' chee guna' ca dxelún xezícadxa benne'. Na'a gaca' lazre' dxugu guna' caní.

Ba dxelechugu lazre' benne' xezícadxa dxulucá'ana szren cuine'. Cá'anqueze neda' xechugu lazra' guna' na, láqueze naca

tu da ca zeaje da dxennía'. ²²¿Zaj naque' benne' hebreo? Cá'anqueze neda' naca' benne' hebreo.

¿Zaj naque' benne' Israel? Cá'anqueze neda'.

¿Zaj naque' zri'ine zre sua Abraham? Cá'anqueze naca' neda'.

²³¿Zaj naque' wen zrin chee Cristo? Nácadxa' neda' wen zrin chee' ca benne' ca',

lácala dxuchálaja' ca tu benne' nadá xi-
chaj lázrdawé' gate
dxennía' da nigá.

Ba bendxa' zrin ca benne' ca'.

Ba buluzálajdxa bénneache neda' ca nu
bzálaj benne' ca'.

Ba gulegu'udxa bénneache neda' lizre xia
ca beluné' cheé benne' ca',
na' zane' lásate' ba guzúa' lu da stēbe cheé
xel-la gute.

²⁴ Gazxu' lasa ba belúe benne' judío ca'
neda' xide chennu dxua weaj.

²⁵ Chunna lasa beline' neda' xaga. Tu lasa
belúe' neda' xiaj.

Chunna lasa guxaze da dxedá lawe'
nísadau' da xu'a lu nisa.

Tu lasa, tu zra tu xela guxu'a lu nísadau'.

²⁶ Zane' lásate' guxu'a neza, ne guzúa' lu
da stēbe:

Cheé xegu ca', ne cheé gubán ca'.

Cheé benne' waláZR chia' ca', ne cheé
benne' zitu' ca'.

Guzúa' lu da stēbe lu xezre, ne le'e xixre',
ne lu nísadau',

ne ládujla benne' wen lazre' dxelenné' zaj
naque' bi bíchedxu.

²⁷ Benle'a zrin, ne guzúa' lu da zi' da xa'.
Zane' lásate' quebe gusia' dxela.

Gudúnle'a, ne gubílele'eda', na' zane'
lásate' bena' gubasa.

Catite' bexaga', ne bexáZrjeda' zra lana'
gacua'.

²⁸ Da zrendxa ca da caní, ne xezícadxa
da guzraca'.

Xúgute' zra dxéqueda' zi' lawe' da zua'
gunne xue cheé

xúgute' cue' bi cheé Cristo.

²⁹ Che nu benne' nate ni'a ne'e lu xel-la
dxeajlí lazre' cheé',

cá'anqueze neda' dxéqueda' nate ni'a
ná'aqueza'.

Che nu benne' dxeluné' dxeajchaze',
néda'queze dxaca' tul-la.

³⁰ Che dxun na ba xen gucá'ana szren
cuina',

gucá'ana szren cuina' cheé da ca' dxul-
ul'é na nate ni'a na'a.

³¹ Dios, Xra Xránadxu Jesucristo, Bén-
nea' naca cheé' güe lá'anatequezdxu Le',
nézene' dxennía' da li. ³² Gate guzúa'
xezre Damasco, benne' wnná bea na' dx-
une' zrin cheé wenná bea Aretas bzre'e
benne' dxuluxúe' dxa xu'u cheé xezre na',
cheé xelēl-le' neda'. ³³ Na' bi bíchedxu ca'
bululetje' neda' tu lu xcuite xia ga dxu'u
lení' cheé xu'u lu ze'e da naxechaj na
xezre na'. Ca' guca na, gulá' lu na' benne'
ca'.

Da ca' Dios blé'ene' Pablo

12 Da li quebe dxal-la' gucá'ana
szren cuina', san guchálaja' cheé
da ca' ble'e Xránadxu neda', ne da ca'
ble'eda' ca naca cheé'. ² Neda', ca tu
benne' dxéajle' cheé Cristo, ba zeaj chidá'
iza guché Dios neda' xabáa guxunne'.
Quebe nezda' che guxá'a na' dutē bela'
dxen chia', u che cabí. Dios nézene'.
³ Nezda' néda'queza', che zua' lu bela'
dxen chia', u che cabí, quebe nezda',
tuze Dios nézene'. ⁴ Guché Dios neda' tu
xabáa cheé', naga benda' dizra' bagache
da quebe naca cheé bénneache xelenné'
ca zaj naca na. ⁵ Waca gucá'ana szrena'
tu benne' caní, san quebe gucá'ana szren
cuínaqueza', che quebe naca na cheé xel-
la nate ni'a na' chia'. ⁶ Láqueze che gaca
lazra' gucá'ana szren cuina' quebe gaca
na tu da xálaze, lawe' da gaca na tu da li.
Quebe guna' na cheé quebe nu guéquene'
nácadxa' ca da gaca lé'ene' naca', u ca da
gaca xenne' da dxennía'.

⁷ Da caní ble'e Xránadxu neda' gulaca
na da xebánele'edxu, na' cheé quebe
gucá'ana szren cuina', guca chia' ca tu
xeche' naxaze lu bela' dxen chia' da dx-
uchine Satanás cheé guzalaj na neda'.
⁸ Chunna lasa guta' xueda' Xránadxu gu-
cuase' da dxezaca'. ⁹ Xránadxu guzre'
neda': "Xela zri'i lazre' chia' naca na dutē
da dxechínenu' lawe' da dxulé'edxa lau

xel-la waca chia' nen benne' nate ni'a ne'e." Ca' naca, dxebeda' lawe' da nate ni'a na'a chee gulé'e lau lu be'la' dxen chia' xel-la waca chee Cristo. ¹⁰Chee le' na' dxebeda' ca naca xel-la nate ni'a na' chia', ne ca naca dizra' schanni' ca' dxelenná bènneache chia', ne ca naca da ca' dxexázrjeda', ne gate zaj nau zi' xuzre' bènneache neda', ne ca naca da ba xa' ca' da dxedéa' ne chee Cristo, lawe' da gate nátedxa ni'a na'a, dxéqueda' ná-cadxa' benne' wal-la.

Pablo dxe'e gunne xue chee bi chee Cristo zaj zre'e Corinto

¹¹Guca' ca tu benne' nadá xichaj lázr-dawe' gate bca'ana szren cuina' caní, san le'e benle bēna' na. Le'e na' dxal-la' gucá'anale neda' szren lawe' da quebe zaca' látezdxa ca benne' gubáz zren ca', benne' ca' dxéajlele, láqueze quebe bi zaca' neda'. ¹²Zrin bēna' ládujla le'e lu dutē xel-la zren lazre' chia' ble'e na da li naca' gubáz chee Cristo ne chee da dxelunna bea na, ne xel-la waca ca' chee xabáa, ne da ca' dxexebánedxu. ¹³¿Dxéquele le'e nácale látezdxa blau ca xezícadxa cue' bi chee Cristo lawe' da guzí' lu na'a da belunne' chia', na' quebe guzí' lu na'a da zaj naca chee? Le gu-nite lau neda' che naca tu da cale'la quebe benna' le'e lataj bi gúnnale chia'.

¹⁴Na'a ba zua' xida' xedajnná'a le'e da guxunne' lasa, ne quebe si' lu na'a da zaj naca na chee. Quebe dxexílaja' da ná-pale, san lé'equeze, lawe' da dxal-la' xulucude xruze xrna' dumí da xulunézru-je' zr'ine', ne quegá xulucude zr'ine' da xulunézruijbe' xra xrnabe'. ¹⁵Du lazra' guchínedá' dumí chia' chee gaca chawe' chee bēnne'du xu'ule, láqueze dxéqueda' gate nazrí'idxeda' le'e, látezdxa nazrí'ile le'e neda'.

¹⁶Bal-la benne', láqueze zaj nézene' quebe bi guzí' lu na'a da zaj naca na chee, dxelenné' gudēl-la' le'e lu da wen

lazre'. ¹⁷¿Guzí xē'a le'e lu na' tu benne' gusel-la' chee? ¹⁸Guta' xueda' Tito xíd-abe' xedajnná'abe' le'e, ne gusel-la' nen lebe' xetú bi bíchedxu. ¿Guzí xē Tito le'e? ¿Quebe bēntu' tuze ca bēntu' ládujla le'e neda', ne Tito, na' nen tuze Be' Lá'azxa?

¹⁹Bi bicha' nazrí'ite lazra', ¿dxéquele dxucá'ana cuínantu' xrlátaje laule le'e? Dxuchálajlentu' le'e lau Dios, ne lu La Xránadxu Jesucristo. Xúgute da caní dxennantu' chee gúlale lu da naca chee Dios. ²⁰Dxezreba' gate xida' xedajnná'a le'e, walé'eda' le'e quebe nácale cáteze dxaca lazra' gácale, na' le'e walé'ele neda' quebe naca' da dxaca lázrele gaca'. Dxezreba' dxedíl-lalele ljwézrele, ne nácale xa lazre', ne dxezrá'ale ljwézrele, ne nácale zide lazre', ne nácale wetupa dizra' bizruj, ne dxez'í tízrale ljwézrele, ne dxucá'ana szren cuínale, ne dxunle da cale'la. ²¹Dxezreba' gate xida' xedajnná'a le'e, Dios gunē' xedué'eda' ne chee le'e, da gucuezre na neda' ne chee zánele le'e, benne' ca' dxelúntequeze' dul-la, ne quebe dxulusanē' dxelunē' da sban, ne da dxulucá'ana sban ljwezre', ne da cale'la da tu dxelúnzqueze'.

Dizra' bzēbe

13 Da nigá naca na da guxunne' lasa xida' xedajnná'a le'e. Xúgute dx-ulé'e lawe na naca na da li ne chee dizra' chee chupa u chunna benne' xelex-echebe'. ²Benne' ca' belunē' dul-la nédx-ula, ne xúgutele le'e, dxácatē ne zua' zitu' naga zr'ale, dxuzenda' le'e da xula ca da gucha' le'e gate bedajnná'a le'e da gudx-upe' lasa, che xida' xedajnná'a le'e da xula quebe gudéa' cá'aze ca da ba nunle. ³Nadxa lé'ele da gulé'e na dxenné Cristo lu dxu'a neda', na' Le' quebe nate ni'a ne'e lu da gunē' chee, san naque' benne' wal-la ládujla le'e. ⁴Da li gudé'e xaga béguaj ca tu benne' nate ni'a ne'e, san naca banē' ne chee xel-la waca chee Dios. Cá'anqueze netu' nate ni'a nantu' ca da

guca chee', san lawe' da nácantu' tuze nen Le' gaca bantu' ne chee xel-la waca chee Dios chee guntu' zrin chee le'e.

⁵Le guxúe xanne' cuínale chee gueque be'ele che da li dxeajlí lázrele Cristo. Le guxúequeze cuínale. ¿Quebe dxeque be'ele zua Jesucristo xichaj lázraule, che da li dxeajlí lázrele Le'? ⁶Dxebeza lazra' gueque be'ele quebe naca' neda' benne' wen lazre' lu da naca' chee Cristo. ⁷Dxenábantu' lau Dios chee quebe bi da calela gunle, quegá chee gulé'entu' dxen-nantu' da li, san chee gunle le'e da xrlá-taje, láqueze dxéquele le'e quebe dxen-nantu' da li. ⁸Quebe bi gaca guntu' da dxedábaga na da li, san tuze da dxá-cale na da li. ⁹Chee le na' dxebentu' gate nate ni'a nantu', che le'e nácale benne' wal-la, na' nábaquezentu' Dios chee gá-cale duté da dxal-la' xelaca bi chee Dios.

¹⁰Dxuzúaja' chee le da nigá nédxula ca

xida' xedajnná'a le'e, chee quebe gun na ba xen gate xida', gácale'a benne' snia ca guchíneda' xel-la dxenná bea chia', da benne' Xránadxu neda' chee séqueda' gusegula' le'e lu da naca chee Dios, ne quegá chee guzría xi'a le'e.

¹¹Na'a, bi bicha', le sua xel-la dxebé. Le gaca duté da dxal-la' xelaca bi chee Dios. Le xue zren ljuwézrele. Le gaca tuze tule xetule, ne le sua xel-la dxe-beza zri lazre', na' Dios, Bénnea' dxun-ne' dxi'u xel-la dxebeza zri lazre', ne nazrí'ine' dxi'u súalene' le'e. ¹²Le gugapa diuzre ljuwézrele tule xetule, ne le gunida ljuwézrele. ¹³Xúgute bi bíchedxu, bi chee Cristo dxulugape' le'e diuzre.

¹⁴Dxaca lazra' gucá'ana Xránadxu Jesucristo le'e chawe', ne zri'i Dios le'e, ne sua tuze Be' Lá'azxa nen le'e. ¡Ca'an gaca na!

DIZRA' BZUAJ SAN PABLO CHEE BI CHEE CRISTO ZAJ ZRE'E XEZR LA XU GALACIA

Dizra' da bzuaj Pablo chee bi chee Cristo zaj zre'e xezr la xu Galacia

1 Neda', Pablo, naca' gubáz chee Cristo. Quebe gulesel-la bēneache neda', ne quegá buluzía bēneache neda' gaca' gubáz. Caní bēnqueze Jesucristo chia', ne Xradxu Dios, Bēneache' bsebanē' Jesús ládujla benne' gate. ²Xúgute benne' bíchedxu zrálenē' neda' zaj naque' neda' tuze. Neda' dxuzúaja' dizra' nigá chee xúgute cue' benne' bíchedxu zaj zre'e xezre ca' zaj nnita' xezr la xu Galacia. ³Dxenaba' lau Xradxu Dios, ne lau Xránadxu Jesucristo gun chawe'e le'e, ne gunne' le'e xel-la dxebeza zri lazre'. ⁴Jesucristo bzane cuine' chee gutie' ne chee dul-la da nabágadxu, chee bselé' dxi'u lu da naca chee xezr la xu nigá da naca na da calela. Bēne' da guca lazre' Xradxu Dios. ⁵¡Gaca báqueze Dios chadía chacanna! ¡Ca'an gaca na!

Quebe de xetú dizra' chawe' chee Dios

⁶Dxexebánele'eda' cheele le'e lawe' da dxebeaj xíchajtele Dios, Bēneache' gunné' le'e chee si' lu na'le da dxunna Cristo, na' dxezi' lu na'le tu dizra' nazrala ca naca dizra' chawe' chee Cristo. ⁷Da li quebe bi de xetú dizra' chawe', san zaj zra' bal-la benne' dxelún zréajene' le'e, ne dxelaca lazre' xuluchuque' dizra' chawe' chee Cristo. ⁸Che nu benne' dxuzenne' le'e xetú dizra' da nazrala ca naca dizra' chawe' da ba bzénentu' le'e, dxenaba' lau Dios cue'e bēneache' de', lácala naca neda', u naca tu gubáz chee xabáa. ⁹Báchequeze bzenda' le'e, ne dxuzenda' le'e da xula, che nu benne' guzenne' le'e tu dizra' da nazrala ca naca dizra' chawe'

da ba guzi' lu na'le, dxenaba' lau Dios cue'e bēneache' de'.

¹⁰Gate dxennia' da nigá, ¿Dxaca lazra' xegá'ana' xrlátaje lau bēneache, u che lau Dios? ¿Dxaca lazra' guna' da xelezaca ba lazre' bēneache? Che ca'an dxaca lazra' guna' da dxelezaca ba lazre' bēneache, quebe naca' wen zrin chee Cristo.

Ca bexaca Pablo gubáz chee Cristo

¹¹Dxuzéajni'ida' le'e, bi bicha', dizra' chawe' da dxuzenda' bēneache, na' quebe naca na tu da gulaj na lu xichaj lázrdau bēneache. ¹²Quebe nu benne' bēne' na neda', ne quegá nu benne' bsēdene' neda' le' na, san Léqueze Jesucristo bzenne' na neda'.

¹³Ba bēnquezele ca bēna' neda' nédxula gate na' nazi' lu na'a xel-la benne' xudau' chee judío ca', ca gudáu zi' xuzra' bi chee Dios zaj nácabe' bi chee Cristo, ne ben zi' lazra' guzría xi'a-be'. ¹⁴Lu xel-la benne' xudau' chee judío ca', neda' ba bzrué'edxeda' ca xúgute bi walázi' chia', bi ljwezra' ca', lawe' da be lázredxa' gapa' ca da xjácále xra xrtawa' ca'. ¹⁵Dios guqu'e' neda' nédxula gate za gálaja', na' lu xel-la zri'i lazre' chee' gunné' neda'. Nadxa gate guca lazre' Le', ¹⁶blé'ene' neda' Zrí'ine', chee guzenda' benne' ca' quebe zaj naque' judío ca naca chee Zrí'ine'. Gate guca da nigá, quebe nu benne' gunábeda', ¹⁷ne quebe guxá'a Jerusalén cheajnábeda' benne' zaj naque' gubáz chee Cristo nédxudxa ca neda'. Guxá'a naga nababa xezr la xu Arabia, na' gudé na' bezrina' xezre Damasco.

¹⁸Gudé chun iza guxá'a Jerusalén, chee xeajchálajlena' Pedro, na' begá'anajlena' le' xta' gubizra. ¹⁹Quebe nu ble'eda' xetú benne' gubáz chee Cristo, san tuze Jacobo, bi biche Xránadxu. ²⁰Ne chee La Dios dxapa' le'e, da li naca da nigá dxuzúaja' cheele le'e.

²¹Ca gudé na' guxá'a xezre ca' zaj nababa xezr la xu Siria, ne xezre ca' zaj nababa xezr la xu Cilicia. ²²Benne' bíchedxu ca', bi chee Cristo zaj zre'e xezr la xu Judea quebe zaj nunbe'e neda'. ²³Belénzene' nu dxenná: "Béne'a' nédx-ula gudáu zi' xuzre' dxi'u, na'a dxuchá-laje' dizra' chawe' chee xel-la dxeajlí lazre' Cristo, da na' guca lazre' guzría xi'e nédx-ute." ²⁴Na'a dxelúe lá'ane' Dios ca da benne' ca naca chia'.

Benne' gubáz ca' dxelezí' lu ne'e Pablo

2Ca gudé chidá' iza guxá'a xecha lasa Jerusalén nen Bernabé, na' ben bi Tito neda' tu zren. ²Guxá'a na' lawe' da ble'e Dios neda' dxal-la' cha'a na'. Na' cheézela bchálajlena' benne' ca' zaj naque' blau ládujla bi chee Cristo, ne bzenda' le' dizra' chawe' da dxuchálaja' ládujla benne' ca' quebe zaj naque' judío. Bena' caní chee nezda' quebe guca dácheze zrin da ba bena', ne da dxuna'. ³Gulezí' lu ne'e zrin nuna', na' quebe nu gunná be'e Tito, bi zálebe' neda', chugu lu be'la' cheebe' da gul'é'e na ná-cabe' bi chee Dios, lácala quebe nácabe' judío. ⁴Bal-la benne' quebe zaj naque' du lazre' benne' bíchedxu, benne' gulu'e ládujla dxi'u lu da wen lazre', gulaca lazre' chugu da gul'é'e na lu be'la' chee Tito. Benne' caní gulu'e ládujla dxi'u chee xelenézene' ájala xelegúe' lataj da nazidxu lu na' Jesucristo, chee xulux-uzúe' dxi'u ca benne' zaj nada'u lu da bdxixruj bea Moisés. ⁵Ne chiteze quebe bentu' le' lataj xelegú'u xel-le' netu' lawe' da guca lázrentu' xegá'ana' le'e da li dizra' chawe' chee Cristo.

⁶Benne' ca' zaj naque' blau quebe bi da cube bulusebague' netu'. Da zaj naque' quebe bi naca na chia' lawe' da quebe xuchí'a Dios ca da nalá' láweze chee bèn-neache. ⁷Quebe bi bulusebague' neda',

lawe' da belexúnbe'e Díosqueze bse-bague' neda' guzenda' benne' ca' quebe zaj naque' judío dizra' chawe', cáteze bsebage' Pedro guzenne' benne' judío ca' dizra' chawe'. ⁸Léqueze Dios na', Béne'a' bzue' Pedro gubáz chee' ládujla benne' judío ca', cá'anqueze bzue' neda' gaca' gubáz chee' ládujla benne' quebe zaj naque' judío.

⁹Chee le' na', Jacobo, ne Pedro, ne Juan, benne' zaj naque' blaudxa, belexúnbe'e ben Dios neda' culuén nigá, na' gulezí' lu ne'e neda', ne Bernabé, na' beluné' tuze dizra' cheajzentu' netu' benne' ca' quebe zaj naque' judío dizra' chawe', dxácate' na' le' xuluzenne' na benne' judío ca'. ¹⁰Túteze da gulenábene' netu' xexache lázrentu' benne' xache' ca', da na' dxue lazra' dxuna'.

Pablo dxedil-le' Pedro lu xezre Antioquía

¹¹Gate bla' Pedro xezre Antioquía gudil-la' le' caníqueze lawe' da gunegue lazre'. ¹²Nédxute' gudágulene' benne' ca' quebe zaj naque' judío cadxa belelá' balla benne' gusel-la Jacobo. Nadxa bebigue'e chalá'ala, ne bsane' québedxa gudágulene' benne' ca' lawe' da bzrebe' judío ca', benne' ca' zaj nadxugu lu be'la' chee' da dxulé'e na. ¹³Nadxa xezícadxa judío ca' zaj naque' bi chee Cristo beluné' tu zren Pedro lu da dxune' láweze. Caní beluné', na' ca' bente' Bernabé tu zren benne' ca' lu da na' dxeluné' láweze. ¹⁴Gate ble'eda' neda' quebe dxeluné' cáteze naca chee da li chee dizra' chawe' chee Cristo, na' gucha' Pedro lau xúgute' benne' ca': Lue' nacu' judío, na' benu' ca tu benne' quebe naque' judío, ne quebe benu' ca tu benne' judío. ¿Bizr chee na' dxenná be'enu' benne' quebe zaj naque' judío xeluné' ca dxelún benne' judío?

Benne' judío xeelé' che dxeajlí lazre' Cristo ca dxaca chee xezícadxa benne'

¹⁵ Cá'anqueze gucha'-ne': Dxi'u ná-cadxu benne' judío lawe' da nálajdxu ca', ne quebe nácdaxu benne' dul-la ca benne' zaj nababa xezícadxa xezr la xu ca'. ¹⁶ Nézedxu netú benne' quebe xegá'ane' xrlátaje lau Dios lawe' da nune' da bdxixruj be'e Moisés, san tuze che dxeajlí lazre' Jesucristo. Chee le na' cá'anqueze dxi'u dxeajlí lázredxu Cristo chee xegá'anadxu xrlátaje lau Dios ne chee xel-la dxeajlí lazre' cheedxu Cristo, ne quegá lawe' da bendxu ca nadxixruj bea na. Netú benne' quebe xegá'ane' xrlátaje lau Dios lawe' da nune' da nadxixruj bea na.

¹⁷ Na'a, che dxi'u dxuxrén lázredxu nagá'anadxu xrlátaje lau Dios ne chee Cristo, ne che zua da dxul'é na ne ná-cadxu benne' dul-la, ¿nnadxu Cristo dx-unne' dxi'u lataj gundxu dul-la lawe' da québedxa dxenná be'e da bdxixruj be'e Moisés dxi'u? ¡Cabata! ¹⁸ Che dxuchín-naja' tu, na' che te na' xexuna' na, na' nabaga' zria. ¹⁹ Ba naca' ca tu benne' gate lu da naca chee da nadxixruj bea na. Da nadxixruj béaqueze ble'e na neda' naca' ca tu benne' gate, chee gaca bana' ne chee da nun Dios. ²⁰ Ba naca' ca tu benne' gate lawe' da naca chia' ca naca chee tu benne' gudá' xaga béguaj tu zren nen Cristo. Chee le na', québedxa naca bana' neda'. Cristo naca bane' lu xichaj lázrdawa'. Xel-la nabán da napa' lu bela' dxen chia', napa' na ne chee xel-la dxeajlí lazre' chia' Zri'ine Dios, Bénnea' bzri'ine' neda', ne bzane cuine', gutie' waláz chia' neda'. ²¹ Quebe dxaca lazra' guzú'a' chalá'ala xel-la zri'i lazre' chee Dios. Che nu benne' gaca xegá'ane' xrlátaje lau Dios lawe' da nune' da nadxixruj bea na, na' dácheze guca da ben Cristo gate gutie'.

Dxezidxu Be' Lá'azxa ne chee xel-la dxeajlí lazre'

3 Bi bicha', zrale Galacia, nácale le'e benne' xala ca'. ¿Zua nu benne' dxezi xe'e le'e chee québedxa guzúale dizra' chee da li? Ba blé'entu' le'e caníqueze Jesucristo, ca gud'é le'e xaga béguaj. ² Le xexque neda': ¿Guzile Be' Lá'azxa lawe' da benle da bdxixruj be'e Moisés, u lawe' da guxéajle chee da bennele? ³ ¿Ájala chee na' nácale benne' xala? ¿Dxéquele gunle gácale duté da na' guzú laule gácale ne chee Be' Lá'azxa? ⁴ ¿Dácheze gudele zánete xel-la zi' ca'? Dxaca lazra' quebe guca na níteze. ⁵ Gate Dios dxunne' le'e Be' Lá'azxa chee', ne dxune' xel-la waca ca' chee xabáa ládujla le'e, ¿dxune' na lawe' da dxunle ca nadxixruj bea na, u lawe' da guxéajle chee dizra' chawe' da bennele?

⁶ Abraham guxeajlí lazre' Dios, na' Dios guzú' lu ne'e da nigá ca tu da bca'ana le' xlátaje. ⁷ Chee le na' dxal-la' nézele, benne' ca' da li zaj naque' zri'ine zre sua Abraham zaj naque' benne' dxeajlí lazre' Dios. ⁸ Naxúaj na lu dizra' lá'azxa ca naca da nigá. Lawe' da neze Dios nédxute gucá'ane' xlátaje benne' quebe zaj naque' judío, benne' xeajlí lazre' Le', na' guzre' Abraham nédxute dizra' chawe' nigá, gunné': "Gaca chawe' chee benne' duté xezr la xu ne chiu' lue'." ⁹ Ca'an naca, dxaca chawe' chee benne' dxeajlí lazre' Dios tu zren nen Abraham, bennea' guxeajlí lazre' Dios.

¹⁰ Benne' ca' dxuluxrén lazre' zaj nagá'ane' xrlátaje lau Dios lawe' da zaj nune' ca da nadxixruj be'e Moisés zaj xu'e de' lawe' da naxúaj lu dizra' lá'azxa da dxenná na: Zaj xu'u de' xúgute benne' quebe dxelúnqueze' xúgute da nadxixruj bea na, da na' naxúaj na lu xiche lá'azxa. ¹¹ Dxunna bea na netú benne' quebe xegá'ane' xrlátaje lau Dios lawe' da nune' da nadxixruj bea na lawe' da naxúaj

lu xiche lá'azxa da dxenná na: Bénnea' nagá'ane' xrlátaje lau Dios gata' chee' xel-la nabán li lazre' che dxeajlí lazre' Dios. ¹² Bénnea' dxuné' ca bdxixruj be'e Moisés quebe dxuné' na ne chee xel-la dxeajlí lazre' chee' lawe' da naxúaj da dxenná na: Benne' dxuné' xúgute da caní gaca bané' ne chee le na.

¹³ Cristo bselé' dxi'u lu de' da xu'u nu quebe dxun da nadxixruj bea na lawe' da guxú'uqueze' de' waláz cheedxu cáteze naxúaj lu dizra' lá'azxa da dxenná na: Xu'u de' bénnea' de'e le'e xaga. ¹⁴ Da nigá guca na chee gaca gun Dios xrlátaje benne' ca' quebe zaj naque' benne' judío, da na' guchebe lazre' guné' lau Abraham ne chee Jesucristo, na' chee si' lu nnadxu xúgutedxu Be' Lá'azxa ne chee xel-la dxeajlí lazre' cheedxu ca da guchebe lazre' Dios.

Da naca chee da nadxixruj bea na, ne da naca chee da guchebe lazre' Dios

¹⁵ Bi bicha', dxul'éda' le'e ca da dxaca chee bénneache. Gate tu benne' dxuné' tu xel-la wezría, ne ba bzuajte' láqueze' lawe na, netú benne' quebe gaca guchín-naje' na, ne quebe bi gaca gudé'e chee na. ¹⁶ Dios guchebe lazre' da guné' chee Abraham, ne chee zri'ine zre sué'. Quebe dxenná na: Chee zri'ine zre sué' ca', da naca na chee benne' zan, san dxenná na: Chee zri'ine zre su', da naca na chee tuze benne', bénnea' naque' Cristo. ¹⁷ Da dxennia' naca na da nigá: Dios bené' tu xel-la wezría nen Abraham, ne bca'ana chawe' na. Chee le na', da bdxixruj be'e Moisés da bla' na ca gudé tapa gaxúa chi dxua iza quebe gaca guchin-naj na xel-la wezría na', u xucá'ana na dácheze da guchebe lazre' Dios. ¹⁸ Che dxezidxu da dxunna Dios che dxundxu ca da bdxixruj be'e Moisés, quebe naca na tu da nachebe lazre' Dios, san da li Dios guchebe lazre' gunézruje' na cá'aze chee Abraham.

¹⁹ Na'a xca', ¿bizra dxun da bdxixruj be'e Moisés? Dios bnézruje' da na' gudé na' chee gulé'e na ca naca xtul-la bénneache cadxa xelá' zri'ine zre sua Abraham na', Bénnea' guchebe lazre' Dios guné' da xrlátaje chee'. Dios gusel-le' da gunná bé'ene' lu na' gubáz chee xabáa chee', na' Moisés guque' benne' dxudé dizra' cheen. ²⁰ Quebe dxun na ba xen nu benne' gudé dizra' gate naca na chee tuze benne', na' Dios naque' tuze, Bénnea' guchebe lazre' chee Abraham ca da guné'.

Da dxun da bdxixruj be'e Moisés

²¹ ¿Nnadxu dxedábaga da bdxixruj be'e Moisés da na' guchebe lazre' Dios? ¡Cabata! Che da nadxixruj bea na da bnezruj Dios gaca gunna na xel-la nabán chee bénneache, na' gaca xegá'ana xrlátaje lau Dios tu benne' che guné' ca da nadxixruj bea na na'. ²² Dxenná na lu dizra' lá'azxa, xúgute bénneache zaj nabague' dul-la chee gaca xezezí' lu ne'e da guchebe lazre' Dios gunné' benne' ca' xezeajlí lazre' Jesucristo.

²³ Nédxudxa ca bzin zra gaca nu cheajlí lazre' Cristo, ne chee da nadxixruj bea na, xúgutedxu, benne' judío, gúcadxu ca benne' zaj xu'e lizre xia, lawe' da xadíaze bendxu ca dxenná da nadxixruj bea na, na' gulé'adxu ca bzin zra guca cheajlí lázredxu Cristo. ²⁴ Da nadxixruj bea na gunná be'e na dxi'u, ca dxun tu benne' dxusegule' bidau' chee benne' xula cadxa bzin zra bla' Cristo, chee xegá'anadxu xrlátaje lau Dios gate guxeajlí lázredxu Cristo. ²⁵ Na'a lawe' da ba bzin zra gaca cheajlí lázredxu Cristo, québedxa xú'udxu lu na' da nadxixruj bea na da naca na cheedxu ca tu benne' dxusegule' bidau'.

²⁶ Xúgutele na' dxeajlí lázrele Jesucristo nácale tuze nen Le'. Chee le na' nácale bi chee Dios. ²⁷ Xúgutele le'e na' gudxúale nisa chee gácale tuze nen

Cristo, Le' naque' chee' ca tu ladxe' nácule. ²⁸ Québedxa dxel'é Dios le'e ca benne' judío, u benne' quebe naque' judío, u ca benne' nada'u, u benne' quebe nada'u, u ca benne' biu, u nu'ula. Dxel'éne' le'e, naca xúgutele ca tuze bel-la' dxen lawe' da nácale tuze nen Jesucristo. ²⁹ Che nácale bi chee' Cristo, da li nácale zre sua Abraham, na' gaca chee' da guchebe lazre' Dios guné'.

4 Da dxaca lazra' nnia' naca na da nigá: Dxácatē ne naca bidau' bi na' gaca chee' da naca chee' xrabe', nácabe' ca bi nada'u xu'ube' lu na' xránabe', lácala da li gácabe' xrane xúgute da de' lizre xrabe'. ² Xu'ube' lu na' benne' dxulusédenē-be', ne lu na' benne' ca' xu'u lu ne'e da naca chee'be', cadxa zrin zra gul'é xrabe' da li nácabe' zrí'ine'. ³ Cá'anqueze dxaca cheedxu. Gate ne nácadxu ca bidau', xú'udxu lu na' xúgute da dxelenná bea na lu xezr la xu nigá. ⁴ Gate bzrin zra ba ble'e lau Dios, na' gusel-le' Zrí'ine', gúlajbe' ne chee' tu nu'ula, na' guxú'ē lu na' da bdxixruj be'e Moisés. ⁵ Ble'ē bsel'ē benne' zaj xu'ē lu na' da nadxixruj bea na, chee' gaca si' lu na' Dios dxi'u ca zrí'inequeze'.

⁶ Lawe' da ba nácale bi chee' Dios, Le' gusel-le' Be' Lá'azxa chee' Zrí'ine' lu xichaj lázrdaule, na' dxenná Be' na': "Abba", da zéaje na: Xrae. ⁷ Ca'an naca, ba nácadxu bi chee' Dios, ne québedxa nácadxu ca benne' zaj nada'u lu na' da bdxixruj be'e Moisés. Na' lawe' da nácadxu bi chee', Dios gunne' dxi'u da de' cheen'. Caní naca lawe' da nácadxu Cristo tuze.

**Pablo dxe'e gunne xue
chee bi ca' chee Cristo**

⁸ Da líqueze, gate quebe ne gúnbeale Dios, gúcale benne' zaj nada'u chee' dios ca', da' quebe zaj náaqueze dios. ⁹ Na'a gate ba núnbeale Dios, u nnadxu, Dios

na' núnbe'e le'e, ¿ájazra gunle xexú'ule xecha lasa lu na' da dxelenná bea na lu xezr la xu nigá, da ca' quebe zaj zaca? ¹⁰ Le'e ne dxapa ba lánale bal-la zra ca', ne bal-la beu' ca', ne tu tu iza ca'. ¹¹ Dxezrébele'a bena' zrin níteze ládujla le'e gate bzenda' le'e dizra' chawe' chee' Cristo.

¹² Bi bícha'dau', dxata' xúeda' le'e gácale ca naca' neda', québedxa xu'a lu na' da nadxixruj bea na, lawe' da gúcaqueza' neda' ca nácale le'e. Quegá bi da calela benle chia' neda'. ¹³ Ba nézqueze gate nédxudau' bzenda' le'e dizra' chawe' chee' Cristo. Guca na gate na' guxu'a tu xízrawe'. ¹⁴ Xízrawe' na' guca na da gusegute na le'e, san le'e quebe begútele neda', ne quebe bzúale neda' chalá'ala, san guz' lu na'le neda' ca tu gubáz chee' xabáa chee' Dios, u ca nácqueza' Jesucristo. ¹⁵ ¿Bizra guca chee' xel-la dxebe' da guzúale? Waca nnia' tu da xecá'ana le'e chawe', la naca da guzéquele gunle, bebéajtele xiaj láuquezele, chee' gúnnale na neda'. ¹⁶ Na'a, ¿bexaca' ca tu benne' dxecuídene' le'e lawe' da gucha' le'e da li?

¹⁷ Benne' ca' dxelaca lazre' chugu lu bela' chee' da na' dxul'é na, dxe'e gunne xue chee' le'e, san quegá chee' xegá'anale chawe'. Da dxelaca lazre' naca na xulucuse' le'e nen netu' chee' cuele gunne xue chee' le'. ¹⁸ Naca chawe' cuedxu gunne xue chee' benne' xula chee' xegá'ane' chawe', ne quegaze gate zúalena' le'e. ¹⁹ Zrí'ina'dau', naca chia' ca zua' lu xel-la dxudía ne chee' ca dxaca chee' tu nu'ula ba zua sanē' bidau', ne wabédxequeza' gunne xue chee' cadxa gul'é lau da li dxenná bea Cristo lu xichaj lázrdaule. ²⁰ Dxezé' lazra' súalena' le'e náaqueze chee' gaca guchálajlena' le'e xezícadxa dizra' lawe' da dxezí'alē'a gunne xue.

**Da dxusede dxi'u ca guca chee
Sara, ne chee Agar**

²¹ Le'e na', dxaca lázrele chu'ule lu na' da bdxixruj be'e Moisés, le xeché**be**xque da nigá: ¿Quebe ne xé**ne**le ca dxenná da nadxixruj bea na? ²² Dxenná na gulezrá' chupa zri'ine Abraham. Tube' gúcabe' zri'ine zrí'ulaqueze', nu'ula quebe nada'u. ²³ Zri'ine nu'ula nada'u gúlajbe' cáteze dxelalaj xúgute' bidau', na' zri'ine nu'ula quebe nada'u gúlajbe' chee guca li ca da guchebe lazre' Dios.

²⁴ Da nigá naca na ca tu da dxul'é na. Dxúpaté nu'ula caní dxulul'é**ene'** ca zaj naca chupa xel-la wezría. Tu xel-la wezría nigá naca na da bnezruj Dios Moisés lu xi'a Sinaí, da na' dxul'é Agar. Benne' ca' zaj xu'e lu na' xel-la wezría nigá dxelálaje' ca benne' zaj nada'u.

²⁵ Cá'anqueze dxul'é Agar da naca chee xi'a Sinaí da zua na ga nababa Arabia, Cá'anqueze xi'a nigá dxul'é na ca naca Jerusalén lu zra na'a zra lawe' da zaj naca benne' chee xezre nigá ca benne' zaj nada'u tu zren nen zrí'ine' ca'. ²⁶ Benne' zaj nababe' Jerusalén chee xabáa quebe zaj naque' benne' zaj nada'u, na' dxi'u nácadxu ca zri'ine benne' ca'. ²⁷ Lu dizra' lá'azxa, naxúaj na ca naca chee benne' zaj nababa Jerusalén chee xabáa na', da dxenná na: Gubé lue', nu'ula wizre, lue' quebe nu chilá' zri'inu'.

Gudxezre xa'a lu xel-la dxe**bé**, lue' quebe núnbe'u xel-la dxudía

chee xel-la dxezán bidau'.

Nu'ula quebe guzán bidau' gate guque' cuide' waxandxa zrí'ine'

quézcala zri'ine nu'ula zúalene' benne' chee'.

²⁸ Le'e, bi bícha'dau', nácadxu ca Isaac. Nácadxu zri'ine Abraham, bi ca' guchebe lazre' Dios gunézruje' le'. ²⁹ Na'a ca guca lu zra na', Ismael, zri'ine Abraham na', bi gúlajbe' ca dxelalaj xúgute' bidau',

gudáu zi' xúzrebe' Isaac, zri'ine Abraham na', bi gúlajbe' ne chee Be' chee Dios, cá'anqueze dxaca na na'a. ³⁰ Na'a ¿bizra dxenná dizra' lá'azxa? Dxenná na: Be-béaj chala'ala nu'ula nada'u tu zren nen zrí'ine' lawe' da quebe gaca chee zri'ine nu'ula nada'u sibe' da dxal-la' si' zri'ine nu'ula quebe nada'u. ³¹ Ca' naca na, bi bicha', quebe nácadxu ca Ismael, zri'ine nu'ula nada'u, san nácadxu ca Isaac, zri'ine zru'ula Abraham, nu'ula quebe nada'u.

Le sua chuchu lu xel-la weselá

5 Cristo bselé' dxi'u lu na' da nadxixruj bea na chee gácadxu ca benne' quebe zaj nada'u. Le sua chuchu lu xel-la weselá da ba guzile, ne québedxa xexú'ule lu na' da na' dxun na le'e benne' zaj nada'u.

² Le xene da dxapa' le'e. Neda', Pablo, dxapa' le'e, che güele lataj chugu lu bela' chee da na' dxul'é na, quebe bi da ba neza gaca chee da naca chee Cristo.

³ Dxaca lazra' xapa' le'e xecha lasa, che nu benne' chugu lu bela' chee' da na' dxul'é na, dxun na ba xen gun bénnea' xúgute' da bdxixruj be'e Moisés. ⁴ Le'e na' dxéquele nagá'anale xrlátaje lau Dios lawe' da nunle ca nadxixruj bea na, ba bcá'anale da naca chee Cristo, ne dxexebéaj cuínale lu xel-la zri'i lazre' chee Dios. ⁵ Dxi'u, ne chee Be' Lá'azxa, ne lawe' da dxeajlí lázredxu Cristo, dxuxrén lázredxu nagá'anadxu xrlátaje lau Dios.

⁶ Che nácadxu tuze nen Cristo, quebe bi da ba neza gaca na cheedxu che chugu lu bela' cheedxu da na' dxul'é na, u che quebe chugu na. Da ba neza naca na cheedxu che dxeajlí lázredxu Cristo, na' xel-la dxeajlí lazre' cheedxu dxuzúa na dxi'u lu xel-la zri'i lazre'.

⁷ Da xrlátaje bénquezle. ¿Nuzra gulú'u xel-la le'e chee québedxa guzúale dizra' da li? ⁸ Quegá Dios bene' da na'. Nácaqueze Le' Bénnea' bláwizre' le'e.

⁹Quebe gal-la lázrele da dxenná na: Láteze cua zichaj dxuchazra na ca naca cua. ¹⁰Dxuxrén lazra' Xránadxu ca naca chee le'e, quebe guzúale chalá'ala da nigá dxuchálaja'. Dios gudé' lu da ba xa' bènea' dxun zréajene' le'e, núteteze naque'.

¹¹Da naca chia', bi bicha', la xapa' neda' bèneache dxal-la' chugu lu belá' chee' da na' dxulé'e na, quegá weláu zi' xuzre benne' judío neda' lawe' da che dxuna' da caní quebe xelaque' tula che cu'a lban chee xaga béguaj chee Cristo.

¹²Na'a ca naca chee benne' ca', benne' dxelún zréajene' le'e, ne dxelenné' dxal-la' chugu lu belá' chee le da na' dxulé'e na, dxaca lazra' chugu ca da zaj naca benne' ca' chee québedxa xelún zréajene' le'e.

¹³Bi bícha'dau', Dios bláwizre' le'e chee gácale benne' quebe zaj nada'u, ne québedxa xu'ule lu na' da bdxixruj be'e Moisés. Quebe guchínele da nácale chee gunle ca da dxezá lázrele. Le gun cuínale ca benne' zaj nada'u, chee gunle zrin chee le sa' ljwézrele tule xetule lu xel-la zri'i lazre' chee. ¹⁴Xúgute da nadxixruj bea na dxun bènea' dxuzúe' dizra' da na' dxenná na: Bzri'i le sa' ljwezru' cáteze nazri' cuinu'. ¹⁵Che dxunle ca dxelún be xixre' ca', ne dxun zi' ljwézrele, ne dxasa ljwézrele tule xetule, le guxúe ga guzríá xi' cuínale.

Da dxundxu cáteze dxezá lazre' belá' dxen cheedxu, ne da dxundxu cáteze dxezá lazre' Be' Lá'azxa

¹⁶Da nigá dxapa' le'e: Le gun cáteze dxulé'e Be' Lá'azxa le'e, na' quebe gunle cáteze dxezá lazre' belá' dxen chee. ¹⁷Da dxezá lazre' belá' dxen cheedxu dxedíl-lale na da dxezá lazre' Be' Lá'azxa, na' da dxezá lazre' Be' Lá'azxa dxedíl-lale na da dxezá lazre' belá' dxen cheedxu. Dxúpaté da caní dxeledíl-lale ljwezre na, na' chee le na' quebe gaca gunle da dxaca lázrele gunle. ¹⁸Che dxunle ca da dxulé'e

Be' Lá'azxa le'e, québedxa xu'ule lu na' da nadxixruj bea na.

¹⁹Zaj nul'é láuqueze da dxelún benne' ca' dxelune' cáteze da dxezá lazre' belá' dxen chee':

Deledálene' nu'ula xula.

Dulucá'ana dítaje' le sa' ljwezre'

Dxelune' da sban, ne da schanni'.

²⁰Dxelúe szrene' bedau' xiaj xaga, ne dxelune' xel-la wazrá'.

Dxelecuídené' le sa' ljwezre', ne dxelezzé'e.

Dxelaque' wide', ne dxelezzá'a xíchaje'.

Dxelenné' chee ljwezre'.

Dxelebéaj xichaj ljwezre' tue' xetue', ne dxelaque' chupa la'a.

²¹Dxelaque' xa lazre', ne dxelutie' benne'.

Dxelezúzrene', ne dxeledanne' da caléla da dxelune' lu laní ca'.

Zánete da dxelundxe' bi chee da caní. Che le na' dxapa' le'e ca bénqueza' nédxute, benne' dxelune' da caní quebe xelexú'e naga dxenná bea Dios.

²²Da dxelún benne' ca' dxelune' cáteze da dxulé'e Be' Lá'azxa le' zaj naca na caní: Zaj nazri'ine' le sa' ljwezre', ne zaj nape' xel-la dxebé.

Dxelebeza zri lazre', ne zaj naque' zren lazre'.

Zaj naque' zri'i lazre', ne dxelune' da zri'a chawe'.

Zaj naque' li lazre'.

²³Zaj naque' dxexruj lazre', ne dxelenná be'e cuine'.

Quebe de da nadxixruj bea na da dxé na dxi'u quebe gundxu da caní. ²⁴Benne' ca' zaj naque' bi chee Cristo ba buludé'e le'e xaga béguaj belá' dxen chee' nen xúgute da dxezá lazre na. ²⁵Che naca bandxu ne chee Be' Lá'azxa, dxal-la' gundxu ca da dxulé'e Be' Lá'azxa dxi'u.

²⁶Quebe dxal-la' gucá'ana szren cuínadxu, ne quebe gácadxu wide' tudxu xetudxu, ne quebe sua da xa lazre' ládujla dxi'u.

Le gácale le sa' l'jwézrele tule xetule

6 Bi bícha'dau', che nu benne' ládujla le'e nune' dul-la, le'e na' dxedálele Be' Lá'azxa dxal-la' gácalele bénnea' chee xezé chúchue'. Dxal-la' gácale dxexruj lazre' gunle da nigá chee quebe güele lataj da xriwe' cu'u xel-la na le'e. ² Le gácale le sa' l'jwézrele tule xetule lu da naca xua cheele, na' caní gunle ca nadxixruj be'e Cristo.

³ Che nu benne' dxéquene' naque' benne' blau, ne quebe nu naque', dx-ezí xézqueze cuine'. ⁴ Tu tu benne' dxal-la' na' xánnie' da dxúnqueze', na' che nagá'ana xrlátaje da dxune', waca xape' ba lá'ana da dxúnqueze', ne quegá da ben xetú benne'. ⁵ De tu xua da nabágadxu chee Cristo, da dxal-la' gua tu tu benne'.

⁶ Benne' zua nu dxusede le' ca naca xrtizra Dios dxal-la' gunézruje' late' da naca chee' chee' bénnea'.

⁷ Quebe si xé cuínale: Netú benne' gaca quítajlene' Dios. Da dxaza bénneache, léqueze na xelape'. ⁸ Che dxune' da dx-ezá lazre' belá' dxen chee', da xezi'e naca na xel-la gute, na' che dxune' da dx-ezá lazre' Be' Lá'azxa, da xezi'e naca na xel-la nabán zeajlí canna. ⁹ Ca' nacan xca', quebe gusandxu gundxu da xrlátaje lawe' da che quebe gate lazrdxu, lu zra na' quizruj Dios dxi'u, na' xezidxu lazruj cheedxu. ¹⁰ Chee le na', gate nazidxu lataj, dxal-la' gundxu da xrlátaje chee le sa' l'jwézredxu, ne da dxundxa na ba xen, gundxu da xrlátaje chee le sa' l'jwézredxu dxeleajlí lazre' Cristo.

Da bzuaj Pablo nen ná'queze'

¹¹ Le nna'xque cadite da zri'a naca da nigá dxuzúaja' cheele nen ná'queza'.

¹² Benne' ca' dxelaca lazre' chugu lu belá' cheele da na' dxulé'e na, dxelune' na chee xelexegá'ane' chawe' lau bénneache, ne chee quebe xeláu zi' xuzre' le' lawe' da dxuluchálaje' dizra' chee da ben Cristo le'e xaga béguaj. ¹³ Benne' caní, benne' zaj nadxugu lu belá' chee' da na' dxulé'e na quebe dxelune' xúgute' ca da nadxixruj bea na. Dxelaca lazre' chugu lu belá' cheele da na' dxulé'e na chee gaca xulucá'ana szren cuine' ca naca da belune' cheele. ¹⁴ Quebe dxaca lazra' xucá'ana szren cuina' chee tu da bena', san tuze chee da ben Xránadxu Jesu-cristo le'e xaga béguaj. Ne chee Le' naca xezr la xu nigá ca tu da gate chia' neda', na' neda' naca' ca tu benne' gate. Québedxa dxezá lazra' da naca chee xezr la xu. ¹⁵ Che nácadxu tuze nen Cristo, quebe bi da ba neza gaca na cheedxu che nadxugu lu belá' cheedxu da na' dxulé'e na, u che quebe nadxugu na. Da ba neza naca na cheedxu che nácadxu benne' cube lu xichaj lázrdaudxu. ¹⁶ Dxenaba' lau Dios gunézruje' xel-la dxe-beza zri lazre' chee xúgute' benne' ca' zaj naque' benne' cube caní, ne xexache lazre' benne' ca' da li zaj naque' bi chee'.

¹⁷ Lawe' da zaj zria lu bel-la' dxen chia' xizra' da dxululé'e na naca' wen zrin chee Cristo quebe nu benne' dxal-la' gulálene' neda' na'a, ne lu da za za'.

¹⁸ Le'e, bi bícha'dau', dxenaba' lau Xránadxu Jesucristo guné' chawe' chee xúgutele. Ca'an gaca na.

DIZRA' BZUAJ SAN PABLO CHEE BI CHEE CRISTO ZAJ ZRE'E XEZRE ÉFESO

Pablo dxugape' diuzre bi chee Cristo zaj zre'e xezre Efeso

1 Neda', Pablo, naca' gubáz chee Jesu-cristo lawe' da guca lazre' Dios gaca' caní. Dxuzúajaj' da nigá chee le'e, ná-cale bi chee Dios, ne dxeajlí lázrele Je-sucristo, na' zrале xezre Éfeso. ²Dxenaba' lau Xradxu Dios, ne lau Xránadxu Jesu-cristo gun chawe'e le'e, ne gunne' le'e xel-la dxebeza zri lazre'.

Ca naca da chawe' da dxezí' lu nnadxu ne chee Cristo

³Dxue lánadxu Dios, Xra Xránadxu Jesucristo lawe' da ba bene' cheedxu ca naca xúgute da chawe' chee Be' Lá'azxa da zá'aca xabáa lawe' da nácadxu bi chee Cristo. ⁴Dios guqu'é dxi'u chee gácadxu bi chee Cristo gate quebe ne gunte' xezr la xu, chee gácadxu benne' lá'azxa, ne du lazre' lau Le'. ⁵Lawe' da bzri'ine' dxi'u, bene' cheedxu gate nate si' lu ne'e dxi'u ca bi cheéqueze' ne chee Jesucristo, cáteze da guca lazre' guné'. ⁶Chee le na', tu dxue lánazquezdxu Dios ne chee xel-la xrlátaje chee' da naca na szrente. Lu xel-la xrlátaje chee' na' gúcalene' dxi'u lawe' da nácadxu tuze nen Zrí'ine', bi nazri'ite lazre'. ⁷Ne chee Zrí'ine' na' naxá'awene' dxi'u nen dxen cheéqueze', na' lu xel-la zri'i lazre' zren chee' bnite lawe' cheedxu dxi'u ca naca dul-la da nabágadxu. ⁸Dios nazrí'ile'ene' dxi'u, ne dxunne' dxi'u xel-la sina, ne xel-la dxéajni'i, ⁹na' bzéajni'ine' dxi'u ca naca da dxaca lazre' da bgache na, da na' lu xel-la zri'i lazre' chee' ba nún-queze' guné' ne chee Cristo. ¹⁰Nuchague' xúgute da zaj zua na xabáa, ne xezr la xu,

chee xelú'u na lu na' Cristo, da gusexúzre' guné' gate zrin zra chee na.

¹¹Ne chee Cristo Dios guqu'é dxi'u chee' gate nate, chee si' lu nnadxu da xáladxu da gunna Le', ca da ba nún-queze Dios, Bénnea' dxune' xúgute da dxeque Le' xrlátaje. ¹²Caní bene' chee gácadxu tu da gucá'ana szren na xel-la szren chee', nácadxu dxi'u benne' nedxu dxebeza lázredxu Cristo. ¹³Cá'anqueze le'e, gate benle dizra' li, da naca na dizra' chawe' chee da ben Cristo, bselé' le'e. Guxeajlí lázrele Le', na' Dios bzue' Be' Lá'azxa lu xichaj lázrdaule ca tu da dx-unna bea na nácale bi chee', ca guchebe lazre' guné'. ¹⁴Be' Lá'azxa na' naque' da dxunna bea na sidxu da xáladxu da gunna Dios dxi'u, gate zrin zra da ba nune' guselé' bi chee' ca', chee güe lánaquezdxu Le' ca naca xel-la szren chee'.

Dxenaba Pablo gunezruj Dios xel-la sina chee bi ca' chee Cristo

¹⁵Chee le na' gate benda' ca dxeajlí lázrele Cristo, ne ca nazri'ile xúgute bi ca' chee Dios, ¹⁶dxápaqueza' Dios; Xcalenu', ca naca chee le'e gate dxuchálajlena' Dios, ne dxeajsá lázrqueza' le'e. ¹⁷Dx-enaba' Dios chee Xránadxu Jesucristo, naque' Xradxu zue' xabáa, gunne' le'e xel-la sina lu be' nácaquezle da gulé'e na le'e gúnbea xánnele Le'. ¹⁸Dxenaba' lau Dios guzéajni'ine' xichaj lázrdaule le'e chee nézele ca naca da dxebeza lázredxu da bláwizre' dxi'u sidxu, ne ca naca xel-la gunn'a chee xel-la szren da gunezruj Dios bi chee ca', ¹⁹ne ca naca xel-la waca zrente chee' da dxun na zrin lu xichaj lázrdaudxu dxi'u dxeajlí lázredxu Le'. Xel-la waca nigá bchine Dios lu duté xel-la dxenná bea zren chee' ²⁰gate bse-bane' Cristo ládujla benne' gate ca', ne guleche' Le' chalá'a xabela chee' xabáa, ²¹ne bzue' Le' chee nna bé'ene' xúgute benne' blau xabáa, ne xúgute benne' dx-

elenná bea xabáa, ne xúgute benne' zaj napa xel-la waca, ne xúgute benne' zaj naca xrane, ne xúgute da dxelenná bea na lu zra na'a zra, ne lu da za za'. ²² Bzue' xúgute da zaj zua lu na' Cristo, ne bzue' Le' gaque' benne' xíchaje chee bi chee ca' ca naca xúgute da dxelune'. ²³ Benne' caní zaj naque' ca belá' dxen chee Cristo, da dxulé'e na dute ca nácaqueze Le', Bénnea' dxusexuzre' dxucá'ana chawe' ca naca xúgute da zaj zua.

Naca bandxu lawe' da nazrí'i Dios dxi'u

2 Gate nate gúcale ca benne' gate lu xichaj lázrdaule ne chee da calela ca', ne dul-la ca' ² da benle gate ne dxunle ca dxelún bénneache zaj zre'e xezr la xu nigá, benne' dxelune' ca dxenná da xriwe', be' na' da dxenná bea na lu be', ne dxun na zrin lu xichaj lázrdau benne' ca' quebe dxuluzúe' dizra' chee Dios. ³ Cá'anqueze dxi'u, xúgutedxu bendxu caní gate nate, gate bendxu cáteze da guzá lázredxu, ne bendxu ca da gunná belá' dxen cheedxu, ne ca da gunná xichaj lázrdaudxu. Chee le' na' guca na cheedxu sidxu da zi' da xa' chee Dios ca guné' chee xezicadxa benne' ca', ⁴ san Dios bexache lázrele'e dxi'u, ne bzrí'ile'ene' dxi'u, ⁵ na' benne' dxi'u xel-la nabán tu zren nen Cristo gate ne nát-edxu lu xichaj lázrdaudxu ne chee dul-la da nabágadxu. Naladxu ne chee xel-la xrlátaje chee Dios. ⁶ Cá'anqueze bsebán Dios dxi'u tu zren nen Jesucristo, ne guleche' dxi'u tu zren nen Le' xabáa. ⁷ Bené' caní chee gulé'ene' lu zra da za za' ca nazrí'ile'ene' dxi'u, ne ca naca da cháwewe'e bené' cheedxu ne chee Jesucristo. ⁸ Lu xel-la xrlátaje chee Dios bselé' le'e lawe' da guxeajlí lázrele Cristo. Quebe naca na ne chee bi da benle le'e, san naca na tu da ben Dios cá'aze ne chee. ⁹ Quebe nalá nu benne' ne chee bi da dxúnqueze', chee quebe nu benne'

gucá'ana szren cuine'. ¹⁰ Dios bené' dxi'u, na' bexune' dxi'u tuze nen Jesucristo chee gundxu da xrlátaje ca' da ba nun Le' gundxu gate nate.

Nácadxu tuze ne chee Cristo

¹¹ Le gusá lázrele ca gúcale le'e gate nate. Quebe nácale benne' judío, benne' ca' dxelechugue' lu bel-la' dxen chee' da na' dxulé'e na zaj nababe' chee Dios, ne zaj nazí le' benne' zaj nadxugu, na' dxelenné' chee nácale benne' quebe zaj nadxugu. ¹² Lu zra ca' quebe guzúale Cristo le'e. Quebe benle tuze benne' Israel ca', ne quebe bénbeale ca naca xel-la wezrí'a da ben Dios, ne ca naca da guchebe lazre' Dios. Guzúale lu xezr la xu nigá, ne quebe bi guleza lázrele, ne quebe bénbeale Dios. Gate nate guzrale zítu'la naga zua Dios. ¹³ Na'a ne chee Cristo Dios ba bzue' le'e gágute lawe' da gute Cristo waláz chee. ¹⁴ Lé'queze Cristo benne' dxi'u xel-la dxebeza zri lazre', ne bexune' dxi'u tuze, netu', benne' judío ca', ne le'e, benne' quebe zaj naque' judío, ne bzria xi'e xel-la dxezrá'a da ben na dxi'u chupa la'a, da guca na ca tu ze'e. ¹⁵ Gate gute Jesús waláz cheedxu guchugue' da nadxixruj bea na da naca na da gunná Dios gundxu, ne da ca' dxelenná bea na, na' bexune' dxúpaté xezre ca' tuze xezre cube da nababa na chee'. Caní gudíxruje' xel-la dxebeza zri lazre' cheedxu. ¹⁶ Caní guca ne chee xel-la gute chee Cristo le'e xaga béguaj, guchugue' naze xel-la dxezrá'a ljwezre chee dxúpaté xezr ca', na' bexune' dxúpaté tuze bel-la' dxen, ne bexune' le' tuze nen Dios. ¹⁷ Bla' Cristo, ne bzenne' le'e dizra' chawe' chee', le'e quebe nácale judío, na' guzrale zitu' naga zua Dios, ne le'e nácale judío, na' guzrale gagu naga zua Dios, ¹⁸ na' ne chee Cristo, xúgutedxu, benne' judío ca', ne benne' quebe zaj naque' judío, dxebigadxu lau Xradxu Dios ne chee Be' Lá'azxa. ¹⁹ Chee le' na' le'e,

benne' quebe nácale judío, québedxa nácale ca benne' zitu' tu lu xęzr la xu da quebe naca na cheęle, san nácale benne' walazre' ca xúgute benne' ca' zaj nababa cheę Dios. Nabábale Zri'ine Dios. ²⁰Nácale ca tu xu'u zren da zria na lawe' lane da gulixruij benne' gubáz ca' cheę Cristo, ne benne' ca' buluchálaje' waláz cheę Dios, na' Jesucristo nácaqueze' xiaj blau cheę lane xu'u na'. ²¹Lawe' lane nigá da naca Cristo, dutę xu'u na' dxeęula na tu li cheę gaca na tu xudau' l'ázxa cheę Xránadxu. ²²Cá'anqueze le'e, lawe' da nácale Cristo tuze, xu'ule lu xu'u na' naga zua Dios ne cheę Be' Lá'azxa cheę'.

Pablo dxuzenne' benne' quebe zaj naque' judío dizra' chawe'

3 Cheę le na' neda', Pablo, dxuzú zriba' lau Dios. Xu'a lizre xia lawe' da dxuna' zrin cheę Jesucristo cheę gaca chawe' cheęle le'e, quebe nácale judío. ²Ba nézele ca ben Dios lu xel-la xr-látaje cheę', bsebage' neda' guchálaja' dizra' chawe' cheę Cristo ládujla le'e. ³Lu da ble'e Dios neda' bzéajni'ine' neda' tu da nagache cheę' ca da bzuaja' cheęle nedxu. ⁴Gate gulábale na weque bé'eqezle núnbe'a da nagache ca naca cheę Cristo. ⁵Guca na tu da nagache gate nate. Dios quebe bzéajni'ine' na bėneache, san na'a ne cheę Be' Lá'azxa cheę' ba blé'ene' na benne' gubáz lá'azxa ca', na' benne' ca' dxuluchálaje' waláz cheę'. ⁶Caní naca da nagache na: Ne cheę dizra' chawe' cheę Cristo benne' quebe zaj naque' judío welezí'queze' da gunezruj Dios le' ca da xelezí' benne' judío ca', ne zaj naque' tuze bel-la' dxen, ne xelezí'queze' tu zren da nachębe lazre' Dios ne cheę Jesucristo.

⁷Dios bęne' neda' wen zrin cheę dizra' chawe' na' ne cheę tu da bėnaze' neda', bchínene' xel-la waca zren cheę'. ⁸Neda' nácadxa' benne' baxáche ca xúgute benne' zaj naca bi cheę Dios.

Bęne' neda' tu culuén zren cheę guzenda' benne' quebe zaj naque' judío dizra' chawe' ca naca xel-la gunnía zrente cheę Cristo. ⁹Bsebage' neda' guzėajni'ida' xúgute bėneache ca da nun Dios gunę' da bgache gate nate, na' naca Dios Bėne'a' bęne' xúgute da zaj zua, ¹⁰cheę xelúnbea na'a benne' dxelenná be'e, ne zaj nape' xel-la szren xabáa ca naca xel-la sina zrente cheę Dios. Xelúnbe'e na ne cheę benne' ca' zaj naca bi cheę Cristo. ¹¹Da nigá ben Dios ca da nune' gate nate gusexuzre' ne cheę Xránadxu Jesucristo. ¹²Ne cheę Cristo waca bígadxu lau Dios du lázredxu, ne dutę xel-la dxuxrén lazre' cheędxu lawe' da dxeajlí lázredxu Le'. ¹³Cheę le na' dxata' xúeda' le'e quebe gate ni'a na'le lawe' da dxedėa' xel-la zi' ne cheęle le'e. Xel-la zi' da dxedėa' neda' gaca na cheęle tu da ba neza.

Xel-la zri'i lazre' cheę Cristo

¹⁴Cheę le na' dxuzú zriba' lau Xra Xránadxu Jesucristo, ¹⁵Bėne'a' dxuzúe' la cha cheę benne' zaj zre'e xabáa, ne xęzr la xu. ¹⁶Dxenaba' lau Xradxu, ca naca xel-la gunnía zrente cheę' guzė tipe' le'e nen xel-la waca cheę' lu xichaj lázrdaule ne cheę Be' Lá'azxa cheę', ¹⁷cheę sua Cristo lázrdaule ne cheę xel-la dxeajlí lazre' cheęle, ne se cháchale lu xel-la zri'i lazre', ca tu xaga da nudé lue na sítujla, ¹⁸cheę seque' chėajni'ile tu zren nen xúgute bi cheę' ca nazriluj, ne ca natunna, ne ca nasituj, ne ca nasibe xel-la zri'i lazre' cheę Cristo. ¹⁹Dxenaba' lau Dios gúnbeale xel-la zri'i lazre' na', lácala cabata' séquedxu gúnbeadxu dutę ca naca na. Caní dxenaba' Le' cheę suale le'e dutę da nácaqueze Dios.

²⁰Na'a, gaca báqueze Dios, Bėne'a' nape' xel-la waca gúnle'eqeze' da zrendxa ca da dxenábadxu, u ca da dxėquedxu, ne cheę xel-la waca cheę' da dxun na zrin lu xichaj lázrdaudxu.

²¹ Gaca ba Dios ládujla benne' zaj naque' bi chee Cristo ne chee Jesucristo xúgute zia chadía chacanna. ¡Ca'an gaca na!

Nácadxu tuze ne chee Be' Lá'azxa

4 Chee le na' dxata' xúeda' le'e, neda', xu'a lizre xia lawe' da dxuna' zrin chee Xránadxu, chee gunle da xrlátaje ca dxal-la' xelún bénneache ba gucá'a Dios le', ca gucá'aqueze' le'e. ² Le gaca dxexruj lazre', ne zri'i lazre'. Le cueza lazre', ne le cue' gunne xue chee tule xetule lu xel-la zri'i lazre' cheele. ³ Le gun ba xuzre gácaquezle tuze, guchínele xel-la waca chee Be' Lá'azxa lu xel-la dxebeza zri lazre' da na' dxun na le'e tuze.

⁴ Tuze naca bela' dxen chee Cristo da nácadxu.

Tuze naca Be' Lá'azxa, Nu na' zúalene' tu tudxu.

Tuze da dxuxrén lázredxu, da na' sidxu lu na' Dios.

⁵ Tuze Bénnea' naque' Xránadxu.

Tuze da dxeajlí lázredxu.

Tuze ca dxedxúadxu nisa.

⁶ Tuze Bénnea' naque' Dios, ne Xra xúgutedxu.

Le' naque' Benne' xíchaje xúgutedxu.

Dxul'é cuine' lu da dxundxu xúgutedxu.

Zúaqueze' lu xichaj lázrdau xúgutedxu.

⁷ Tu tudxu nasidxu tu xel-la waca cha cheedxu

ca da nunna Cristo dxi'u.

⁸ Naca na ca naxúaj na lu dizra' lá'azxa, dxenná na:

Begüéne' xabáa, gate gudé bzétaje' benne' guledábage' Le'.

Na' bnézruje' bénneache xel-la waca ca'.

⁹ ¿Bi zéaje na, dxenná na: Begüene'?' Zéaje na nédxula bétaje' lu xezr la xu nigá. ¹⁰ Bénnea' bétaje' nácaqueze' Bénnea' begüéne' lu da blaudxa lu xabáa chee gaca bea na xu'u lu ne'e xúgute da de, ¹¹ na' benne' cha cheedxu xel-la waca chee:

Gaca bál-ladxu benne' gubáz chee'.

Gaca guzendxu xezícadxu bénneache dizra' chawe' chee'.

Gácadxu xezícadxu benne' dxuxúedxu bi chee' ca'.

Na' gusededxu-be' xezícadxu.

¹² Ca'an benne' chee bpa'adxé' bi chee' ca' chee xelunbe' zrin xulucá'anabe' xrlátaje bénneache ca' zaj naque' zruza ni'a na' Cristo:

¹³ Chee gácadxu tuze ca dxéajledxu,

ne ca núnbeadxu Zri'ine Dios,

chee gácadxu benne' du lazre',

chee gácadxu cáteze nácaqueze Cristo.

¹⁴ Caní nacan chee québedxa gácadxu ca bidu ca', bi ca' dxelezibe' bíteteze dizra' da zaj naca na ca tu be' da zeaj na nila na'la, ne québedxa güedxu lataj xelún zréaje benne' wen da zrinna'j ca' dxi'u, chee quebe xelezi xé'e dxi'u chee gundxu da caléla. ¹⁵ Lu xel-la zri'i lazre' dxal-la' guchálajdxu da li chee gácadxu cáteze nácaqueze Cristo, Bénnea' naque' xichaj bel-la' dxen da nácadxu dxi'u. ¹⁶ Le' dxune' tuze xúgute ni'a na' zaj zria bel-la' dxen chee' chee gaca na tu bel-la' dxen nazáate chee na, ne chee xelún zrin xúgute ni'a na' ca' chee gula bel-la' dxen na', ne gaca na chawe' lu xel-la zri'i lazre'.

Xel-la nabán cube da dxunna Cristo dxi'u

¹⁷ Da nigá dxapa' le'e, ne dxusebaga' le'e waláz chee Xránadxu chee québedxa gunle ca dxelún bénneache quebe zaj núnbe'e Dios, benne' ca' dxelune' cáteze dxeléquene' xrlátaje, ¹⁸ benne' ca' zaj nachul-la xichaj lázrdawe'. Benne' caní quebe zaj nape' xel-la nabán li lazre' da dxunna Dios bénneache:

Zaj nachul-la nanítene', ne zaj naca zide' lázrdawe'.

¹⁹ Québedxa dxelexedué'ene'.

Belezanne cuine' dxelune' da schanni'.

Du lazre' dxelune' xúgute da sban.

²⁰ Quegá caní nazédele le'e chee Cristo,
²¹ che da li xca' bénnele da dxuchalaj
 Le', ne nusédene' le'e ca naca da li da
 zúale Jesús. ²² Ca naca da benle nédx-
 ula, le guzúa chalá'ala da gúcale lawe' da
 guzrinnajle lu da sban da guzá lázrele.

²³ Dxal-la' gácale benne' cube lu xichaj
 lázrdaule.

²⁴ Dxal-la' gunle da naca chee benne'
 cube na' da ben Dios le'e
 chee gunle da naca na xlátaje, ne da li
 da naca na lá'azxa.

²⁵ Chee le na' québedxa gun lázrele.

Le nne da li tule xetule lawe' da nácadxu
 ni'a na' tuze

bel-la' dxen chee Cristo.

²⁶ Che dxezrá'ale, quebe dxal-la' gunle
 dul-la, ne quebe zrá'ale scha'.

²⁷ Quebe güele da xriwe' lataj guchixre
 chee na le'e.

²⁸ Bénnea' guque' gubán québedxa
 dxal-la' cuane'. Dxal-la' guné' tu zrin
 chawe' nen ni'a ná'queze' chee gape' da
 gunézruje' benne' dxelexá'zrjene'.

²⁹ Quebe nnele dizra' caléla. Le gucha-
 laj da naca na xrlátaje chee xelezé tipa
 benne' xelenne', ne xelezi'e na ba neza.

³⁰ Quebe guzúa xáchele Be' Lá'azxa chee
 Dios, lawe' da zúale Be' le'e chee gaca
 bea na nácale bi chee Dios ca zrindxa zra
 xezí' lu ne'e dxi'u.

³¹ Le guzúa chalá'ala:

Xel-la dxecuide', ne xel-la dxezrá'a, ne
 xel-la xichaj zra'a,

ne xel-la wetil-la dizra', ne xel-la
 wechacha, ne xúgute da zrinnaj.

³² Dxal-la' gácale du lazre', ne xache
 lázrele tule xetule,

ne gunite laule chee tule xetule ca ben
 Dios,

bnite lawe' chee le'e lawe' da nácale bi
 chee Cristo.

Ca dxal-la' xelaca bi ca' chee Dios

5 Lawe' da nácale bi cheéqueze Dios,
 bi nazri'ine', le gun ba xuzre gá-

cale cáteze nácaqueze Le'. ² Le zri'i le sa'
 ljuwézrele tule xetule cáteze ben Cristo,
 bzri'ine' dxi'u, ne bzanne cuine' waláz
 cheedxu ca tu zríla'dau', béadu dxelute
 benne' lau Dios chee xedúa xtul-le'. Gate
 gute Cristo le'e xaga béguaj, guca ca tu
 da dxelá zixre lau Dios da dxelegú'u bén-
 neache lau Le'.

³ Lawe' da nácale bi chee Dios,
 québedxa dxal-la' guchálajle chee da
 dxucá'ana ditaj na bénneache, ne chee
 da sban ca', ne chee xel-la wecude' da
 de. ⁴ Quebe guchálajle dizra' schanni',
 ne dizra' bize, ne dizra' calela, da quebe
 dxulucá'ana na chawe' bénneache, san
 dxal-la' xéquezele Dios: "Xcalenu'."

⁵ Ba nézquezele quebe chu'u naga dxenná bea
 Cristo nen Dios netú benne' dxucá'ana
 dítajé' bénneache, u tu benne' dxuné' da
 sban, u tu benne' dxucúdie' da de, da
 naca na ca dxucá'ana szrene' bedau' xiaj
 xaga. ⁶ Quebe güele lataj nu si xe le'e
 nen dizra' xala, lawe' da ne chee da nigá
 dxelela Dios da dxusaca zi na benne'
 ca' quebe dxuluzúe' dizra' chee'. ⁷ Quebe
 gunle tu zren benne' dxeluné' da caní.

⁸ Nédxute guzúale lu da chul-la, na'
 na'a zrágale xel-la naxaní' lawe' da ná-
 cale bi chee Xránadxu. Chee le na', le
 gun da naca na chee xel-la naxaní',

⁹ da na' naca xel-la dxucá'ana chawe'
 ljuwézredxu, ne da xlátaje, ne da li. ¹⁰ Le
 gun zi' lázrele nézele gunle da dxezaca
 ba lazre' Xránadxu. ¹¹ Quebe gunle tu
 zren benne' dxeluné' da calela, da ca'

naca chee da chul-la, san le til-la da
 ca' ¹² lawe' da naca na tu da xedu'edxu
 guchálajzedxu chee da dxelún benne' ca'
 bagácheze. ¹³ Gate dxeledxúaj da caní lu
 da chul-la, ne zaj xu'u na lu xel-la nax-
 aní', gulé'e lawe' ca zaj naca xúgute da
 caní, lawe' da dxulé'e lawe' xel-la naxaní'
 xúgute. ¹⁴ Ca naca da caní dxenná na:

Bebán, lue' dxásiu'.

Bexasa ládujla benne' gate,

na' gusení' Cristo lu xichaj lazrda'u.

¹⁵ Chee le na', le guxúe xanne' ca da dx-unle. Quebe gunle ca dxelún benne' zaj nachul-la nanítene', san le gun ca dxelún benne' zaj naxéajni'ine'. ¹⁶ Le guchine chawe' zra caní lawe' da dxácale'e da zrinna' lu zra na'a zra. ¹⁷ Quebe gácale benne' xala, san le gun zi' lázrele chéajni'ile da dxaca lazre' Xránadxu gundxu. ¹⁸ Quebe súzrele, da na' dxuxrinna' na bèneache, san du lázrele le si' Be' Lá'azxa. ¹⁹ Le guchálajle le sa' ljwézrele tule xetule nen Salmo ca', ne nen da dxúl-lale, ne nen da du dxúl-lale da dx-unna Be' Lá'azxa le'e. Du lázrele le gul-la, ne le güe lá'ana Xránadxu. ²⁰ Le xéqueze Xradxu Dios: "Xcalenu'", chee xúgute lu La Xránadxu Jesucristo.

Ca dxal-la' xelún bi chee Cristo nen lwézrebe'

²¹ Le gaca dxexruj lazre' tule xetule, ne le gapa ba lá'ana Dios.

²² Nu'ula dxal-la' gaque' dxexruj lazre' lau benne' chee', cáteze dxal-la' gaque' lau Xránadxu, ²³ lawe' da naca benne' biu xíchaję chee zru'ule', cáteze naca Cristo xíchaję chee bi chee' ca'. Cristo naque' Benne' weselá chee bi chee' ca', bi zaj naca be' ca be'l-la' dxen cheéqueze'. ²⁴ Cáteze zaj naca dxexruj lazre' bi chee' ca' lau Cristo, cá'anqueze nu'ula dxal-la' gaque' dxexruj lazre' lau benne' chee' lu xúgute.

²⁵ Benne' biu dxal-la' zrí'ine' zru'ule' cáteze ben Cristo, bzrí'ine' bi chee' ca', ne bzánenę' xel-la nabán chee' ne chee'be'. ²⁶ Caní bene' chee' bebéaję-be' cheéqueze', ne ben chi'e-be' ne chee' dizra' chee', da guca na ca dxun benne' dxexibę' bi chee' nen nisa, ²⁷ chee' guzúe'-be' lau Le', xelácabe' bi xabáa, ne quebe bi da sban zaj nápabe', ne netú da zrinna', ne netú da naca na ca da ca', san xelácabe' lá'azxa, ne du lazre'. ²⁸ Cá'anqueze benne' biu dxal-la' zrí'ine' zru'ule' cáteze nazrí'ine' be'l-la' dxen

cheéqueze'. Benne' nazrí'ine' zru'ule' nazrí'i cuine'. ²⁹ Netú benne' quebe dxecuídene' be'l-la' dxen cheéqueze', san dxugawe' na, ne dxuxúe' na, ca dxúnqueze Cristo chee bi chee' ca' ³⁰ lawe' da zaj nácabe' ca be'l-la' dxen cheéqueze', na' dxi'u nácadxu ca ni'a na' be'l-la' dxen chee', ne nácadxu ca be'l-la' dxen chee', ne zrita chee'. ³¹ Chee le na' tu benne' biu dxal-la' gusane' xra xrne'e chee gaque' tuze nen zru'ule', na' dxúpatę' xelaque' ca tuze benne'. ³² Da nigá naca na tu da zren da nagache, na' dxennía' da caní ca naca chee Cristo nen bi chee' ca'. ³³ Cá'anqueze tu tule le'e dxal-la' zrí'ile zru'ulale cáteze nazrí'i cuínale, na' nu'ula dxal-la' gape' ba lá'ana benne' chee'.

6 Le'e, bi cuide', lawe' da nácale bi chee Xránadxu, dxal-la' guzúale dizra' xruze xrna chee'e, da naca na xlátaje. ² Da nadxixruj bea nedxu da zraga na tu da guchebe lazre' Dios naca na da dxenná na: Gudapa ba lá'ana xra xrna'u, ³ chee gaca chawe' chiu', ne chee su' scha' lu xęzr la xu.

⁴ Le'e, xruze xrna', quebe gucháale zrí'inele. Le gusegula-be' lu xel-la dxenná bea chee Xránadxu, ne le gusina-be' da naca chee Le'.

⁵ Le'e, benne' nada'u, le guzúa dizra' chee benne' zaj naque' xránale lu xęzr la xu nigá, ne le gapa le' ba lá'ana, ne le zrebe le', ne du lázrele le gaca chee', cáteze dxuzúale dizra' chee Cristo. ⁶ Le gun zrin chee xránale ca', quegaze gate dxelennátę' le'e, ca dxelún benne' ca' dx-elaca lazre' xelexaca ba lazre' bèneache chee'. Le gun zrin na' cáteze dxunle zrin chee Cristo, gunle du lázrele da dxaca lazre' Dios. ⁷ Le gun zrin chee xránale du lázrele, cáteze dxunle zrin chee Xránadxu, ne quegaze chee bèneache. ⁸ Ba nézquezle tu tu benne', benne' nada'u, ne benne' quebe nada'u, wazi'e lu na' Xránadxu ca naca da xrlátaje da nune'.

⁹Le'e, xrana benne' ca', cá'aqueze le gun le'e nen benne' wen zrin chee le ca', ne quebe guzálaile le' lawe' da nézele zua Bénnea' xabáa naque' Xrana benne' ca', ne Xránale le'e, na' Le' quebe dxebéaje' cha chee bèneache.

Zra lana bi chee Cristo da dxácale lebe' lu wedil-la

¹⁰Na'a, bi bícha'dau', le gaca chuchu ne chee Xránadxu nen xel-la wala zren chee'. ¹¹Le gaca ca benne' zjaque' wedil-la zaj nácuē' zra lanē' xia da na' dxunna Dios le'e, chee gaca se chúchule lau xúgute da dxuzé da xriwe' laule chee si xe na le'e. ¹²Quegá dxedíl-lalēdxu bēneache zaj naque' bela' dxen. Dxedíl-lalēdxu xel-la dxenná bea chee da xriwe' da dxeledá na lu be', ne dxedíl-lalēdxu be' xriwe' ca', da dxelenná bea na, ne be' xriwe' ca' dxē na ljwezre ca' da xelún na, ne be' xriwe' ca' xu'u lu na' na xēzr la xu chul-la nigá. ¹³Chee le na', le gaca ca benne' zjaque' wedil-la zaj nacue' zra lanē' xia da dxunna Dios le'e, chee séquele súale wedil-la lu zra che da xriwe', na' ca te na' xegá'ana chúchule. ¹⁴Le se chuchu xca', suale le'e da li ca tu bazxu da nacá'a na le'ele, ne suale le'e da xlátaje ca tu xia da da' lachu'le. ¹⁵Le gaca sina chee guchálajle dizra' chawe' chee xel-la dxebeza zri lazre', da gaca na chee le ca tu cue' zrélae. ¹⁶Da dxun na ba xen, le gapa xel-la dxeajlí lazre', da gaca na chee le ca tu da xe-

gapa na, da xusula na xúgute da zaj nalá na zaj zua na xi' da dxuzala da xriwe'. ¹⁷Xel-la weselá gaca na chee le ca tu lapa xia da gucache xíchajle, na' xrtizra Dios gaca na chee le ca tu xia da gunna Be' Lá'azxa le'e. ¹⁸Gate ne dxunle da caní dxal-la' guchálajlele Dios, gata' xúele, ne nábale lau Le' ne chee Be' Lá'azxa. Chee gaca gunle da caní dxal-la' súale ban lazre', ne quebe gate ni'a na'le, na' nábale Dios chee gácalenē' xúgute bi chee' ca'. ¹⁹Cá'aqueze le naba Le' waláz chia' neda' chee gunne' neda' dizra' da guchálaja', chee xazrda' guzenda' bēneache dizra' chawe' chee'. ²⁰Dios bēne' neda' gubáz chee dizra' chawe' chee', na' chee le na' xu'a lizre xia na'a. Le naba Le' gácalenē' neda' chee xazrda' guchálaja' dizra' chawe' chee' ca dxal-la' guna'.

Pablo dxugape' diuzre le sa' ljwezre'

²¹Tíquico, bi bíchedxu nazri'tē lazrdxu, bi li lazre' lu zrin chee Xránadxu, guzenbe' le'e da dxaca chia' nigá, ne da dxuna'. ²²Chee le na' dxusel-la'-be' lau le'e chee guzenbe' le'e ca zúantu', ne chee gutípabe' lázrele.

²³Dxenaba' lau Xradxu Dios, ne lau Xránadxu Jesucristo gunézruje' bi bíchedxu ca' zaj zre'e na' xel-la dxebeza zri lazre', ne xel-la zri'i lazre', ne xel-la dxeajlí lazre', ²⁴na' gunē' chawe' xúgute benne' ca' du lazre' zaj nazri'ine' Xránadxu Jesucristo. Ca'an gaca na.

DIZRA' BZUJAJ SAN PABLO CHEE BI CHEE CRISTO ZAJ ZRE'E XEZRE FILIPOS

Pablo dxugapë' diuzre bi bíchedxu ca' zaj zre'e xezre Filipos

1 Neda' Pablo, ne Timoteo nácantu' wën zrin chee Jesucristo. Dxuzúajaj' da nigá chee le'e, bi bíchentu', ne chee le'e, dxuxúele bi chee Cristo, ne le'e, zaj xu'u lu na'le bi chee Cristo, ne zrale xezre Filipos. Nabábale chee Dios, ne nácale tuze nen Jesucristo. ²Dxenábantu' lau Xradxu Dios, ne lau Xránadxu Jesucristo gunë' chee da xrlátaje, ne gunne' le'e xel-la dxebeza zri lazre'.

Da dxenaba Pablo gun Dios chee bi ca' chee Cristo

³Tu tu lasa dxajsá lazra' le'e dxapa' Dios chia': Xcalenu'. ⁴Gate dxuchálajlëna' Dios, dutë xel-la dxebé dxenábaqueza' bi gun Lë' chee xúgutele le'e. ⁵Caní dxuna' lawe' da dxundxu zrin tu zren chee dizra' chawe' chee Cristo gate guzú lau núnbe'tu' na bzrintë lu zra na'a zra. ⁶Dxuxrën lazra' Dios, Bénnea' guzú lawe' dxune' tu zrin chawe' lu xichaj lázrdaule le'e, gúnqueze' na ca zrintë zra xelá' Jesucristo. ⁷Naca xrlátaje dxéqueda' neda' caní chee xúgutele le'e, lawe' da nazrí'ile'ëda' le'e, ne dxezidxu tu zren da chawe' ca' dxunna Dios dxi'u. Dxácate ne xu'a lizre xia nigá, ne gate na' gudíl-lalena' bénneache ca' dizra', benne' ca' guledábaguë' dizra' chawe' chee Cristo, ba ble'eda' benne' ca' naca na da li. ⁸Dios nézquezenë' nazrí'ile'ëda' le'e, lu dutë xel-la zri'i lazre' da dxunna Jesucristo neda'. ⁹Dxenaba' lau Dios gunë' zrí'idxa ljwézrele, ne gápale'ëquezle xel-la sina, ne xel-la

dxéajni'i lu xúgute da dxunle, ¹⁰chee nézele cuele da cháwedxa, chee gácale du lazre', ne quebe bi gata' da gagu na zria chee lu zra na' xelá' Cristo. ¹¹Caní gaca, da ca' dxunle xululé'e na da xrlátaje da dxun Jesucristo lu xichaj lázrdaule, chee gaca ba lá'ana Dios, ne xegá'ana szrénqueze'.

Dxenná Pablo: Che naca bana', Cristo dxuchínene' neda'

¹²Le'e, bi bícha'dau', dxaca lazra' nézele ca da ca' guzraca' gulácale na neda' chee bchálajaj' dizra' chawe' chee Cristo. ¹³Caní guca, xúgute benne' xra'aga xu'u lawe', ne xezícadxa benne' ca' zaj zre'e xu'u lawe' na' zaj nézene' xu'a lizre xia lawe' da dxuna' zrin chee Cristo. ¹⁴Lawe' da xu'a neda' lizre xia nigá, chaze xúgute bi bíchedxu ca' dxuluxrën lázredxe' Xránadxu, na' dxuluchálajë' du lazre' dizra' chee Dios, ne quebe dxelezrebe'.

¹⁵Da li bal-la benne' ca' dxuluchálajë' ca naca chee Cristo lawe' da zaj naque' zre'e lazre', ne zaj naque' wil-la dizra'. Xezícadxa benne' caní dxuluchálajë' na dutë xel-la li lazre' chee'. ¹⁶Benne' nedxu ca' dxuluchálajë' da naca chee Cristo chee xulucá'ana szren cuinë', ne quegá du lazre', lawe' da dxelaca lazre' súadxa da guzúa na neda' stebe dxácate xu'a lizre xia nigá. ¹⁷Xezícadxa benne' ca' dxelune' na dutë xel-la zri'i lazre' chee', lawe' da zaj nézene' nuzúa cuina' guzéajni'ida' benne' ca' dxeledábaguë' dizra' chawe' chee Cristo. ¹⁸¿Bizra xca'? Ájatezla dxelune', che dxuluchálajë' du lazre', u quebe dxuluchálajë' du lazre', dxuluchálajë' chee Cristo, na' dxebeda', ne wabéquezda' ¹⁹lawe' da nezda' lu xúgute da caní wedxúaj na chawe' chia' neda', lawe' da dxenábale le'e lau Dios chia' neda', na' gácale Be' Lá'azxa neda', Bénnea' gusel-le' Jesucristo cheedxu. ²⁰Dxaca lazra', ne dxuxrën lazra' quebe xe-

dué'eda' neda', séqueda' guchálaja' du lazra' chee xelélé'e bēneache zúaledxa xel-la szren chee Cristo neda' na'a, ca zúalequeze na neda', che gaca bana', u che gatia'. ²¹ Chia' neda', che naca bana', Cristo dxuchínene' neda', ne che gatia' wazrue'eda' da cháwedxa. ²² Che xedxúaj na chawe' chee zrin chee Xránadxu che naca bana', quebe nezda' bila na ca'a. ²³ Naca na stēbe chia' neda' bila da caní ca'a. Dxaca lazra' gatia' chee cheajsúalēna' Cristo, da gácadxa chawe' chia' neda', ²⁴ san che naca bana' nácadxa chawe' cheele le'e. ²⁵ Lawe' da nuxrén lazra' naca caní, nezda' wazúaledxa' le'e chee se cháchadxale lu da naca chee Cristo, ne chee béquezdxale. ²⁶ Chee le na' bédxale lu da naca chee Cristo ne chia' neda' gate súalēna' le'e.

²⁷ Dxun na ba xen gunle da dxuzéajni'i dizra' chawe' chee Cristo le'e, na' che xedajnná'a le'e, u che sua' zitu', wenda' zē cháchale, ne nácale tuze, dxunle tu zren zrin chee Cristo chee xeleajlí lazre' bēneache dizra' chawe' chee'. ²⁸ Quebe zrēbele benne' ca' dxeledábage' le'e. Ca dxunle gulé'e na le' xelebía xi'e, na' nalale le'e lawe' da bselá Dios le'e. ²⁹ Tu da zrente naca da dxunna Dios le'e gate gunle zrin chee Cristo, quegaze chéajlele chee', na' cá'aqueze che tele xel-la zi' ne chee Le'. ³⁰ Le'e dxunle neda' tu zren dxedíl-lalēdxu da zaj naca da calēla. Blé'equezle gate nate ca gudíl-lalēna' na, na' na'a dxenle ca dxedíl-lalēna' na.

**Xel-la dxexruj lazre',
ne xel-la szren chee Cristo**

2 Cristo dxutipe' lázrele, na' xel-la zri'i lazre' chee' dxuzúa na le'e lu da ba neza, na' Be' Lá'azxa chee' zúalēne' le'e, na' nápaie xel-la zri'i lazre', ne xel-la dxexache lazre' chee'. ² Chee le na' le gun ga béle'eda', gaca tuze ca da dxéquele, ne gácale tuze lu xel-la zri'i lazre' chee', ne

gunle tuze lu xichaj lázrdaule. ³ Quebe bi gunle chee xulucá'ana szren bēneache le'e, ne chee gaca gucá'ana szren cuínale, san dutē xel-la dxexruj lazre' chee'le dxal-la' guéquele nácadxa blau le sa' l'jwézrele ca le'e. ⁴ Netule le'e quebe dxal-la' gunle ca da gácalēn le'eze. Le gun da gácalēn na xezícadxa bēneache.

⁵ Dخال-la' si' lu na'le da gaca na chee'le ca ben Jesucristo. ⁶ Lácala naque' ca nácaqueze Dios, quebe gúquene' dxal-la' gunē' ba xuzre xegá'anaqueze' ca Dios. ⁷ Bzue' chalá'ala da nápaqueze', ne ben cuine' ca tu benne' nada'u, guque' bēneache. ⁸ Gate ba naque' bēneache, guque' dxexruj lazre', na' bzue' dizra' chee Dios ca bzrintē gutie', lácala gutie' ca tu benne' wen da calela le'e xaga béguaj. ⁹ Chee le na' Dios bca'ana szrēn-le'e Le', ne bzue' tu Le' da naca szrendxa ca xúgute' la xezícadxa, ¹⁰ chee gate xelenne' La Jesús, na' xuluzú zribe lau Le' xúgute' benne' zaj zre'e xabáa, ne xezr la xu nigá, ne zran xezr la xu nigá, ¹¹ ne chee xelexechebe xúgute' naca Jesucristo Xránadxu, chee gaca ba lá'ana Xradxu Dios.

**Bi chee Cristo zaj nácabe' ca
xi' da dxulusení na**

¹² Chee le na', le'e, bi bicha' nazri'ite lazra', ca na' benle le'e, bzúaquezle dizra' chee Dios gate na' zúalēna' le'e, le guziádxa dizra' chee Dios na'a gate zua' zitu'. Dute xel-la dxexruj lazre', ne dutē xel-la dxezrebe le gun zrin chee zrué'ele dutē ca naca xel-la weselá cheele, ¹³ lawe' da dxun Dios zrin lu xichaj lázrdaule chee sa lázrele gunle da xrlátaje da dxaca lazre' Le', ne chee séquele gunle na.

¹⁴ Le gun xúgute' da dxunle, ne quebe gáchajele, ne quebe gutil-la dizra' l'jwézrele ¹⁵ chee gácale li lazre', ne quebe nu nne chee'. Gácale bi chee Dios du lazre' ládujla bēneache zaj

naque' benne' dxelún da calēla, ne gácale ca belaj ca' dxulusení na lu xēzr la xu naga nachul-la na, ¹⁶ne guchálajlele benne' ca' dizra' da nua na xel-la nabán. Che gunle caní, neda' wezaca ba lazra' chee gate xelá' Cristo, lawe' da wanezda' quebe ben zi' lazra' dácheze, ne quebe beña' zrin níteze. ¹⁷Béle'ēda' lácala gun na ba xen gatiá' chee gaca li lazre' xel-la dxeajlí lazre' chee lau Dios. Bzua cuñale lu na' Dios ca tu guna' da gúnnale chee', na' chee le na' béle'ēquezda' tu zren nen xúgutele le'e. ¹⁸Le béquezle le'e, ne le gun tuze neda' lu xel-la dxebé chia'.

Ca naca chee Timoteo, ne Epafrodito

¹⁹Che naca da dxaca lazre' Xránadxu Jesús, dxebeza lazra' sél-lazequeza' Timoteo xedajnná'abe' le'e, chee beda' gate xelabe', ne guzenbe' neda' chee le'e. ²⁰Quebe nu chilá' xetú benne' guéquene' chee ca da dxéqueda' neda'. Tuze Timoteo dxe'ebe' gunne xue chee gaca chawe' chee le'e. ²¹Xúgute benne' ca' xezícala zaj dxe'e gunne xue da zaj naca chee', ne quebe zaj dxe'e gunne xue da naca chee Jesucristo. ²²Le'e nézquezle ca da xrlátaje dxun Timoteo, ne ca benbe' zrin tu zren nen neda'. Dxuchálajntu' dizra' chawe' chee Cristo, na' dxunbe' ca dxun tu bi dxácalebe' xrabe'. ²³Caní naca, dxebeza lazra' sel-la'-be' gate nezda' ca gaca chia'. ²⁴Dxuxrén lazra' Xránadxu, néda'queza' xida' xedajnná'a le'e.

²⁵Cá'anqueze dxéqueda' dxun na ba xen sel-la' Epafrodito, bi bíchedxu. Dxunbe' zrin tu zren nen neda', dxedílalēntu' da calēla. Lé'eequezele gusél-lale bi nigá chee gácalēnbe' neda', ne xu'a lizre xia nigá. ²⁶Dxezá lázrele'ēbe' xedajnná'abe' le'e, ne zúale'ēbe' stēbe lawe' da nézebe' bénele quebe chawe' guzúabe'. ²⁷Da li quebe chawe' guzúabe', ne bache gátebe', san Dios bexache lazre' lebe', ne

quegá tuze lebe', cá'anqueze neda' chee quebe xewine lázredxa' ca da dxaca chia' na'a. ²⁸Chee le na' dxezá lázredxa' sel-la' lebe' chee bele le'e gate xelé'ele lebe', ne chee québedxa xewine lazra' neda'. ²⁹Le xezí' lu na'le lebe' dute xel-la dxebé, ca bi bíchele lu da naca chee Xránadxu, ne le gápaqueze ba lá'ana benne' ca' zaj naque' ca lebe', ³⁰lawe' da guzúa gátebe' dxunbe' zrin chee Cristo. Bzuabe' lu da stēbe xel-la nabán chee' chee gunbe' zrin chia' da quebe guzéquele le'e gunle.

Da naca chawe' da naca na du lazre'

3 Na'a, bi bicha', le be lu da naca chee Xránadxu. Quebe naca na zēde chia' neda' guzúaja' chee xecha lasa ca da ba bzúajqueza', lawe' da dxun na ba xen guna' da nigá chee. ²Le guxúe cuñale chee benne' ca' dxelune' da calēla, ne zaj naque' ca becu', benne' ca' dxelechugue' lu bel-la' dxen da na' naca bea na benne' zaj naque' chee Dios. ³Dxi'u nácadxu benne' nápaquezdxu da dxunna bea na nácadxu chee Dios, ne dxue lá'anadxu Dios ne chee Be' Lá'azxa, ne dxebedxu lawe' da nácadxu bi chee Jesucristo. Quebe dxuxrén lázredxu da dxundxu, ⁴lácala neda' wazéqueda' guxrén lazra' da ca' nuna'. Che nu benne' dxéquene' waca guxrén lazre' ca da ba nune', wazéquedxa' neda'. ⁵Gate gúqueda' xrunu' zra gulechugue' lu bel-la' dxen chia' da na' dxulé'e na naca' chee Dios lawe' da naca' benne' Israel, ne xrtia Benjamín. Naca' da li benne' hebreo. Guca' benne' fariseo ca buzájla'a da bdxixruj be'e Moisés. ⁶Gudxéle'a gunne xue da naca chee Dios ca bzrintē gudáu zi' xuzra' benne' ca' zaj nácabē' bi chee Jesús. Ca naca da xlátaje da napa tu benne' dxune' ca dxenná da nadxixruj bea na, quebe nu benne' guzéquene' bi nnie' chia'. ⁷Xúgute da ca' gúqueda' gate nate zaj zácale'e na, na'a dxéqueda' da ca' quebe bi zaj zaca

na, lawe' da nazrí'idxeda' Cristo. ⁸Da li dxéqueda' xúgute da ca' ca tu da nite lawe' da zácadxa Xrana' Jesucristo. Lawe' da nazrí'ida' Le' ba bzua' chalá'ala xúgute da gudapa', ne dxéqueda' da ca' ca tu da níteze chee si'a da ba neza da dxunna Cristo, ⁹chee gaca' tuze nen Le', quegá lawe' da guca' xlátaje ne chee da nadxixruj bea na na', san lawe' da ble'e Dios neda' xlátaje lawe' da dxeajlí lazra' Cristo, na' Dios dxel'é'ene' xlátaje xúgute benne' dxelejli lazre' Cristo. ¹⁰Da dxaca lazra' naca na gúnbeadxá' Cristo, ne súale xel-la waca neda' da bsebán na Le', ne tea' xel-la zi' ca da gudé'e Le', ne gudé cuina' lu na' Dios lácala dxal-la' gatia' ca gute Cristo, ¹¹na' dxebeza lazra' xebana' ládujla benne' gate ca'.

Pablo dxun zi' lazre' gusexuzre' gune' zrin chee Cristo

¹²Quebe dxennía' ba bzrué'eda' xúgute da caní, u ba naca' duté xlátaje, san dxun zi' lazra' chee zrué'eda' da na' bláwizra Jesucristo neda' chee zrué'eda'. ¹³Le'e, bi bicha', quebe dxennía' ba bzrué'eda' da nigá, san tuze da dxuna', dxuzúa' chalá'ala da ba gudé, ne dxun zi' lazra' chee zrué'eda' da za za', ¹⁴chee gusexuzra' guna' zrin da dxuna', chee zrué'eda' da na' bláwizra Dios dxi'u sidxu lu xabáa chee lawe' da nácadxu bi chee Jesucristo.

¹⁵Caní dxal-la' guéquedxu dxi'u, ze cháchadxu ca naca da dxeajli lázredxu. Che quebe dxéquele caní chee bíteteze da caní, Dios guzéajni'ine' le'e ca naca chee na. ¹⁶Tuze ca dxal-la' guéquedxu, ne tuze ca dxal-la' gundxu lu da ca' ba bzrué'edxu.

¹⁷Le'e, bi bícha'dau', le gun ca dxuna' neda', ne le nna' ca dxelún benne' ca', dxelune' ca da blé'entu' le'e. ¹⁸Zane' lasa ba gucha' le'e, ne na'a dxebézrtea' dxapa' le'e, zrále'e bi bíchedxu dxelune' ca dxelún benne' dxuluzúe' chalá'ala da

ben Cristo le'e xaga béguaj. ¹⁹Ca gaca chee benne' ca' lu zra bzébe, xelebía xi'e. Zaj nune' dios chee da dxel'é'aj dxelawe', ne dxulucá'ana szren cuine' chee da na' dxal-la' xelapa stu'e. Zaj dxé'e gunne xue da naca chee xezr la xu nigaze. ²⁰Dxi'u nácadxu benne' zaj nababe' xabáa, ne dxebézadxu zra xelá' benne' weselá cheedxu, Xránadxu Jesucristo, ze'e xabáa. ²¹Le' xegüe' bel-la' dxen cheedxu da dxeledé chee na, ne guné na ca naca bel-la' dxen xabáa chee', guchínene' xel-la waca chee' da nape' chee nna bé'ene' xúgute da zaj zua.

Dxal-la' béquezdXu lu da naca chee XránadXu

4 Chee le na' le'e, bi nazri'ite lazra', le se chacha lu da naca chee XránadXu. Le'e, bi bícha'dau' nazri'ite lazra', dxezá lázrele'a le'eda' le'e, lawe' da dxebeda' ca nácale le'e, na' lawe' da bēna' neda' nácale bi chee Cristo dxal-la' si'a tu da gunna Dios neda'.

²Dxata' xueda' Evodia, ne Síntique xelaque' tuze, lawe' da zaj naque' bila ne chee XránadXu. ³Na'a lue', bi ljwezra' li lazre', dxata' xueda' lue' gácalenu' nu'ula zandxu caní, nu'ula belúnlene' neda' zrin chee dizra' chawe' chee Cristo. Belune' zrin na' tu zren nen Clemente, ne kezícadxa benne' ca' belúnlene' neda' zrin. La benne' caní zaj naxúaj na lu xiche chee xel-la nabán zeajli canna.

⁴Le béqueze lu da naca chee XránadXu. Xecha lasa dxennía': Le be. ⁵Dxaca lazra' xeleque be'e xúgute bēneache nácale zren lazre'. Ba zua bagu zra xelá' XránadXu.

⁶Quebe bi cuele gunne xue, san le guchálajlequeze Dios ca naca chee da ca'. Le naba na lau Dios, na' le xe'e: Xcalenu'. ⁷Nadxa gunna Dios le'e xel-la dxebeza zri lazre', da naca na szrendxa ca da seque' gúnbea bēneache, na'

guzúa chuchu na xichaj lázrdaule ne chee Jesucristo.

Le gulaba lazre' ca naca da xrlátaje

⁸Na'a, bi bicha', le gulaba lazre' ca naca xúgute da zaj naca li, ne xúgute da zaj napa na ba lá'ana, ne xúgute da zaj naca na li lazre', ne xúgute da zaj naca na du lazre', ne xúgute da dzezaca ba lazre' Dios, ne xúgute da dxulucá'ana na bèneache xrlátaje.

Che zua tu da naca xrlátaje, u da dxalla' gucá'ana szrendxu, le gulaba lazre' da caní.

⁹Le gun ca naca da bsédeda' le'e, ne da bzéajni'ida' le'e, ne da bzenda' le'e, ne da ble'eda' le'e, na' súale Dios le'e, Bénnea' dxunne' dxi'u xel-la dxebeza zri lazre'.

Da gulesel-la benne' Filipo ca' chee Pablo

¹⁰Dxebéle'eda' ne chee Xránadxu, lawe' da dxajsá lázrele neda'. Quebe dxennía' ba gul-la lázrele neda', san quebe guta' lataj gácalele neda'. ¹¹Quebe dxennía' da nigá lawe' da bi dxexázejda', lawe' da ba bséde Xránadxu neda' sua' xel-la dxebé ájateze dxaca chia'. ¹²Ba gudéa' xel-la xache', ne cá'anqueze xel-la gunní'a. Nazédia' dxuchaga lawa' xúgute da dxaca chia', che néljada', u che dxeduna', che nápalé'a, u che quebe bi napa'. ¹³Xúgute wazéqueda' guchaga lawa' lawe' da dxuzé tipa Cristo neda'. ¹⁴Benle da xrlátaje, gúcalele neda' ne chee da gusél-lale chia'.

¹⁵Ba nézquezle le'e, benne' Filipo, ca guca gate guzú lawa' dxuchálaja' dizra' chawe' chee Cristo nigá. Gate bezá'a xezre ca' zaj nababa xezr la xu Macedonia, le'eze gusél-lale chia' dumí chee da guzú lu na'le. ¹⁶Gate guzúa' xezre Tesalónica, chupa chunna lasa gusél-lale dumí chia' chee quebe bi xázejda'. ¹⁷Quebe dxennía' da nigá lawe' da dxaca lazra' bi gúnnale chia', san dxaca lazra' gácadxa da ba neza chee le'e lau Dios. ¹⁸Ba guzi'a xúgute da gusél-lale, na' dele'e chia'. Ca naca da gusél-lale chia' lu na' Epafrodito, da zrendxa guca na ca da bexázejda'. Da na' gusél-lale naca na ca tu guna' da dxelá zixre na lau Dios, u tu da bzúale lau Dios da dzezaca ba lazre'. ¹⁹Dios chia' gunné' le'e xúgute da dxexázejle, chee xel-la gunní'a chee xabáa chee ne chee Jesucristo. ²⁰Gaca ba Xradxu Dios chadía chacanna. ¡Ca'an gaca na!

Pablo dxuzé dizra' benne' Filipo ca'

²¹Waláz chia' neda' le gugapa diuzre lu La Jesucristo xúgute benne' zaj nababe' chee Dios. Bi bíchedxu ca' zaj zúale neda' dxulugape' le'e diuzre. ²²Xúgute bi bíchedxu zaj zre'e nigá, benne' zaj nababe' chee Dios, ne bi bíchedxu zaj zre'e lizre bènea' dxenná bé'ene' xezr la xu Roma, dxulugape' le'e diuzre.

²³Dxenaba' lau Xránadxu Jesucristo guné' da chawe' chee xúgutele le'e. Ca'an gaca na.

DIZRA' BZUAJ SAN PABLO CHEE BI CHEE CRISTO ZAJ ZRĒ'E XEZRE COLOSAS

Pablo dxugape' diuzre bi bíchedxu zaj zre'e xezre Colosas

1 Neda', Pablo, naca' gubáz chee Jesu-cristo lawe' da naca da dxaca lazre Dios, na' zúale bi bíchedxu Timoteo neda'. ²Dxuzúaja' da nigá cheele le'e zrale xezre Colosas, ne nabábale chee Dios, ne dxeajlí lázrele Cristo. Dxenaba' Xradxu Dios gunę' da chawe' cheele le'e, ne gunę' le'e xel-la dxebeza zri lazre'.

Da dxenaba Pablo lau Dios chee bi bíchedxu ca'

³Dxéquezentu' Dios, Xra Xránadxu Jesucristo: Xcalenu' ca naca cheele gate dxuchálajlentu' Le'. ⁴Ba bémentu' ca dxeajlí lázrele Cristo, ne ca nazri'ile xúgute bi ca' chee Dios. ⁵Caní dxunle lawe' da dxebeza lázrele da nucueza Dios cheele xabáa, na' guzú laule dxunle ca naca da nigá gate guzile dizra' chawe' da naca na da li. ⁶Dizra' chawe' nigá bla na ládujla le'e ca bla na dutę xęzr la xu nigá, na' dxezriluj na, ne dxun na zrin dutę xęzr la xu ca dxun na ládujla le'e, gate bęntele ca nazr'i Dios bęnneache, ne gunęzele naca na da li. ⁷Da nigá ble'e Epafras le'e. Naque' bi bíchedxu nazr'i lázredxu, ne ba bęnqueze' zrin nen netu', ne naque' cheele le'e tu benne' węn zrin li lazre' chee Cristo. ⁸Epafras nigá bzenne' netu' ca dxaca cheele le'e, ne ca nazr'i ljwęzrele ne chee Be' Lá'azxa.

⁹Chee le na', zra gunęzentu' da nigá, dxuchálajlequezentu' Dios cheele le'e, ne dxenábantu' Le' guzėjajni'ine' le'e ca naca da dxaca lazre', ne gunę' le'e dutę xel-la sina, ne dutę xel-la dxėjajni' da dxunna Be' Lá'azxa dxi'u. ¹⁰Caní dxenábantu' Le' chee gaca gunle ca dxal-la' xelún bi ca'

chee Xránadxu, ne gunle ca da dxezaca ba lazre' Le', gunle xúgute da naca da xr-látaje, ne gúnbeadxaquezle Dios. ¹¹Dxenábantu' Le' guzúa chache' le'e lu xel-la waca da naca chee xel-la szren chee' chee séquele guchaga laule xúgute da dxaca cheele lu dutę xel-la zren lazre' cheele, ne dutę xel-la dxebé. ¹²Dxal-la' xele Dios: Xcalenu', lawe' da bzua Dios dxi'u chee sidxu da nucueze' cheedxu, chee súadxu lu xel-la naxaní' chee', lawe' da nácadxu bi chee Le'. ¹³Dios bselé' dxi'u lu xel-la dxenná bea chee da chul-la, na' bzue' dxi'u naga dxenná bea Zr'i'ine' nazr'i'te lazre'. ¹⁴Zr'i'ine' nácaqueze' Bęnnea' bselé' dxi'u gate gutię waláz cheedxu, chee bnite lau Dios dul-la gubágadxu.

Bexácadxu tuze nen Dios lawe' da gute Cristo

¹⁵Ca naca Jesús, dxulé'e na dxi'u ca nácaqueze Dios, Bęnnea' quebe gaca lé'edxu, ne naque' chee Dios ca tu bi nedxu chee bęnneache, bi nácadxabe' blau ca xúgute da bęn Dios. ¹⁶Ne chee Le' bęn Dios xúgute da zaj zua xabáa, ne da zaj zua xęzr la xu nigá, da ca' dx-elé'edxu, ne da ca' quebe gaca lé'edxu, che zaj naca na be' ca' zaj naca na blau, u be' ca' dxelenná bea na, u be' ca' zaj napa na xel-la szren, u be' ca' zaj napa na xel-la waca, xúgute na bęn Dios ne chee Le', na' chee Le' zaj naca na. ¹⁷Cristo ba zúaqueze' nédxute ca xúgute da zaj zua, na' ne chee Le' xúgute da ca' dxelún na ca zaj naca chee na. ¹⁸Xúgute benne' zaj naque' bi chee Cristo zaj naque' ca tuze beł-la' dxen, na' Crístoqueze naque' xi-chaj beł-la' dxen na' da nácadxu. Le' bzue' beł-la' dxen na', ne Le' naque' Benne' bebán nédxute ládujla benne' gate ca' chee gaque' Benne' blau lu xúgute da zaj zua. ¹⁹Caní naca na lawe' da guca lazre' Dios súale Cristo dutę da nácaqueze Dios. ²⁰Cá'anqueze guca lazre' Dios ne chee

Cristo xexunę' tuze nen Le' xúgute da zaj zua, ca da zaj zua na lu xęzr la xu, ne da zaj zua na xabáa. Bexunę' dxi'u tuze nen Le' ne cheę xel-la gute cheę Cristo le'e xaga bęguaj.

²¹ Nédxute le'e gúcale ca benne' zitu' lau Dios, ne bzrá'ale Dios lu xichaj lázrdaule, ne benle xúgute da calela, san na'a Dios ba bexunę' le'e tuze nen Le', ²² ne cheę da ben Cristo gate gutię' le'e xaga bęguaj lu bela dxen cheę'. Da nigá ben Le' cheę gaca guzúe' le'e lau Le', gácale benne' lá'azxa, ne du lazre', ne quebe bi nabágale da calela. ²³ Cheę gaca caní dxal-la' sę cháchale, ne sua típale ca dx-eajlí lázrele Cristo, ne quebe gusanle ca da dxebeza lázrele, da na' nápale lawe' da dxéajlele dizra' chawe' cheę Cristo. Dizra' chawe' nigá nene na dutę xęzr la xu, na' nuzúa Dios neda', Pablo, benne' wen zrin cheę', cheę guchálaja' dizra' chawe' nigá.

Zrin dxun Pablo cheę bi ca' cheę Cristo

²⁴ Na'a dxebeda' lu xel-la zi' da dxedéa' ne cheęle le'e, lawe' da dxuzá lawa' lu bęl-la' dxen chia' ca da dzezaca Cristo ne cheę bi cheę' ca', benne' ca' zaj naque' ca bęl-la' dxen cheęqueze'. ²⁵ Bzua Cristo neda' ca benne' wen zrin cheę bi cheę' ca', ne cheę da bláwizra Dios neda' guna', gácalena' le'e, na' guchálaja' dutequeze da naca dizra' cheę Dios, ²⁶ ne cheę guzėjni'ida' bęnneache ca da nagache, da na' nagache nédxute, san na'a Dios ba blé'ene' bi cheę' ca' ca naca na. ²⁷ Guca lazre' Dios gulé'ene' benne' ca' ca naca xel-la gunní'a zren cheę da na' nagache nédxute, da gunézruje' benne' ca' quebe zaj naque' judío. Da na' nagache nédxute naca na caní: Cristo zuę' xichaj lázrdaule, na' cheę le na' dxebeza lázredxu súadxu xabáa cheę'.

²⁸ Netu' dxuchálajntu' ca naca cheę Cristo. Dxuzėjni'intu' xúgute

bęnneache, ne dxusédentu' xúgute', cheę xeleajni'i xánne' cheę xelaca xúgute bęnneache du lazre' lau Dios ne cheę Jesucristo. ²⁹ Cheę gaca caní dxuna' neda' zrin, dxuchíneda' dutę xel-la waca cheę Cristo, da dxun na zrin lu xichaj lázrdawa'.

2 Dxaca lazra' nézele le'e dxúnle'a zrin, dxe'a gunne xue len Dios da naca cheęle le'e, ne da naca cheę bi bíchedxu ca' ca' zaj zre'e Laodicea, ne da naca cheę xúgute bi bíchedxu ca' quebe ne xelelé'ene' neda' caníqueze. ² Dxaca lazra' xeledipa lazre', ne xelaque' tuze lu xel-la zri'i lazre', ne xelaque' benne' gunní'a lu xichaj lázrdawe', cheę xelúnbe'e da nagache cheę Xradxu Dios da nácaqueze Cristo. ³ Lu na' Le' zaj de ca naca xel-la gunní'a cheę xel-la sina, ne xel-la dxéajni'i. ⁴ Dxapa' le'e da nigá cheę quebe xelezi xę le'e benne' ca' zaj neze xrgúe' ca dxuluchálaje'. ⁵ Lácala quebe zúaletea' le'e caníqueze, naca na cáteze zúalena' le'e lu be' nácaqueza', na' dxe-béle'eda' dxenda' dxunle da xlátaje, ne zę cháchale ca dxeajlí lázrele Cristo.

⁶ Cheę le na', ca benle, guzi' lu na'le Xránadxu Jesucristo, cá'anqueze dxal-la' gunle súa'lele Le'. ⁷ Dخال-la' gácale ca tu xaga da dxudé lue na sítujla lu da naca cheę Cristo. Cá'anqueze dxal-la' gácale ca tu xu'u da dxe' lane lu da naca cheę' Le', cheę sę cháchale ca dxeajlí lázrele Le', ca blé'entu' le'e, na' dxál-la'queze xe'le Dios: Xcalenu'.

Xel-la nabán cube da dxunna Cristo dxi'u

⁸ Le guxúe cuínale. Quebe güele lataj xelezi xę benne' ca' le'e, xuluchínene' xel-la sina cheę bęnneache, ne dizra' calela, ca naca da dxulusédequeze bęnneache, ne ca zaj naca da ca' dxácaqueze lu xęzr la xu nigá, ne quegá ca naca cheę Cristo. ⁹ Dutę ca naca Dios nácaqueze Cristo.

¹⁰ Nápale le'e xúgute da naca cheę'

lawe' da nácaquezle bel-la' dxen chee Le'.
Le' dxenná be'ene' xúgute be' da dxe-
lenná bea na,

ne xúgute be' da zaj napa na xel-la waca.

¹¹ Cá'anqueze, lawe' da nácale tuze nen
Cristo nácale bi chee Dios. Quebe guca
chee ca da na' belúnqueze benne' judío
ca', gulechugue' late' bel-la' dxen chee
bi biu chee' ca', da na' dxulé'e na zaj
nácabe' chee Dios. Bedúa dute da naca
chee bela' dxen chee da naca sban,
da guca na ne chee da ben Cristo lu
xichaj lázraule. Bene' nácale bi chee
Dios. ¹² Gate gudxúale nisa guca chee
ca guca chee Cristo gate bgache' lu
xexu ba, na' cá'anqueze guca chee ca
guca chee Le' gate bebane' ládujla benne'
gate. Caní guca chee lawe' da guxea-
jlí lázrele xel-la waca chee Dios, Bénnea'
bsebané' Cristo ládujla benne' gate ca'.

¹³ Gate nate gúcale le'e ca benne' gate lu
dul-la da gubágale, ne lu bela' dxen sban
chee da quebe ne xedúa na. Na'a Dios
ba nunne' le'e xel-la nabán tu zren nen
Cristo, ne ba bnite lawe' xúgute dul-la
da gubágale. ¹⁴ Dios bzria xi'e ca naca da
nabágadxu chee xúgute da nadxixruj bea
na da gula da buluzría xi na dxi'u. Be-
béaje' na chalá'ala, ne bde'e na le'e xaga
béguaj ca tu da gubaga' Cristo. ¹⁵ Gate
gute Cristo le'e xaga béguaj begüe' ca
naca xel-la dxenná bea, ne xel-la waca
chee be' xriwe' ca', na' blé'ene' da ca'
láwela gubáz chee xabáa ca' lawe' da
gunná bé'ene' na.

Le sa lazre' da ca' zaj de na xabáa

¹⁶ Chee le na', quebe nu dxal-la' si
tizra' le'e ca naca da dxe'aj da dxágule,
ne ca zaj naca zra laní, ne ca naca
laní chee beu' dxe'ene, ne ca zaj naca
zra dxupá'anale. ¹⁷ Xúgute da caní zaj
naca na ca tu zrúl-laze chee da zaj
zéaje da ca'. ¹⁸ Quebe güele lataj nu
cua da nucueza Dios chee le'e, ne

chee da dxululé'e benne' ca', benne' dx-
eléquene' zaj naque' dxexruj lazre' lawe'
da dxulucá'ana szrene' gubáz chee xabáa
ca', ne dxuluchálaje' chee da quebe ne
xelelé'ene', ne dxulucá'ana szren cuine'
ca naca xel-la sina chee bénneacheze da
zaj nape'. ¹⁹ Quebe zaj de'e Cristo, Bén-
nea' naque' xichaj bel-la' dxen da ná-
cadxu dxi'u, na' Le' dxusegule' dute bel-
la' dxen na', ne dxugawe' na, ne dxune'
na tuze du ca naca na, chee gaca na ca
dxaca lazre' Dios.

²⁰ Naca chee ca naca chee tu benne'
ba nate lawe' da nácale bel-la' dxen chee
Cristo, chee québedxa gunle ca zaj naca
da ca' dxácaqueze lu xexr la xu nigá.
Na'a, ¿bizr chee na' dxedale ca benne' ne
zaj nácaqueze' chee xexr la xu nigá, ne
dxunle ca da dxelenná bea bénneache.
²¹ Dxeleñné': Quebe guchínenu' da nigá.
Quebe gagu' da ca'. Quebe chajtáu' da
na'. ²² Xúgute da nadxixruj bea caní dx-
uluchalaj na chee da ca' dxeledé chee
na gate dxuchínedxu na, ne zaj nácaze
na da dxelenná bea bénneache, ne da
dxulusede bénneache. ²³ Da li dxeleque
bénneache zaj naca na sina da nadx-
ixruj bea caní, lawe' da dxulusede na
bénneache xelúe lá'ane' Dios, ne xelaque'
dxexruj lazre', ne xeleñná be'ene' bel-la'
dxen chee'. Quebe bi culuén zaj napa na
chee xeleñná be'e na xel-la dxezá lazre'
sban ca' chee bénneache.

3 Le'e nácale ca benne' ba belexebán
tu zren nen Cristo. Chee le na' le
sa lazre' da zaj zua xabáa, naga dxe'
Cristo chalá'a xabéla chee Dios. ² Le gu-
laba lazre' chee da zaj de xabáa, quegá
chee da zaj de lu xexr la xu. ³ Nácale
ca benne' ba zaj nate, na' xel-la nabán
chee nuzúa chawe' Dios naga zua
Cristo. ⁴ Cristo nácaqueze xel-la nabán
cheedxu, na' gate xelá' Le', cá'anqueze
le'e gunle tu zren Le' lu xel-la szren chee'.

**Xel-la nabán gula ne
xel-la nabán cube**

⁵ Chee le na', le xebéaj ca tu da nate xúgute da zaj zua lu xichaj lázrdaule da zaj naca na chee xezr la xu nigá, ca naca xel-la dxichaj na xrba chee xel-la nuchaga na', ne da sban, ne xel-la dxezá lazre' da sban ne da caléla ca', ne xel-la dxucude', lawe' da naca da dxucude bèneache ca dios cheequeze'. ⁶ Xúgute da caní dxelún benne' quebe dxuluzúe' dizra' chee Dios, na' chee le na' gudé Dios benne' ca' lu da ba xa'. ⁷ Cá'anqueze le'e benle xúgute da caní gate nate. ⁸ Na'a, québedxa gunle xúgute da caní:

Xel-la dxezrá'a, ne xel-la xichaj zra'a, ne xel-la dxecuide ljwezre.

Québedxa nnele dizra' schanni'.

Québedxa gucháchale ljwézrele.

⁹ Quebe si xe ljwézrele tule xetule, lawe' da ba bzúale chalá'ala da gúcale nédxute, ne ca naca da benle. ¹⁰ Nácale ca benne' cube, lawe' da dxuxucube Dios le'e chee gácale ca nácaqueze Dios, Bénnea' bené' le'e, ca zrindxa gúnbea xánnele Le'. ¹¹ Lau Dios québedxa bi zaca che nácadxu benne' griego, che benne' judío, u che nácadxu benne' zaj nadxugu lu bel-la' dxen chee' da dxulé'e na zaj nababe' chee Dios, che benne' quebe zaj nape' da na' dxulé'e na, u che nácadxu benne' zitu', che benne' ca' zaj zre'e xi'a xegu ca', u che nácadxu benne' zaj nada'u, che benne' quebe zaj nada'u. Da zaca na naca na che naca Cristo benne' xíchajdxu, ne che zue' lu xichaj lázrdaudxu.

¹² Dios nazri'ine' le'e, ne guqu'é le'e chee gácale bi chee' ca'. Chee le na' le gaca:

Benne' dxexache lazre', ne benne' zri'i lazre',

ne benne' dxexruj lazre', ne benne' chawe' lazre',

ne benne' zren lazre'.

¹³ Le gácale ljwézrele tule xetule, ne le gunité lau chee le tule xetule, che núlale dxezrá'a ljwézrele.

Ca ben Cristo, bnite lawe' chee le, cá'anqueze le gun le'e chee ljwézrele.

¹⁴ Da dxundxa na ba xen, le zri'i ljwézrele lawe' da naca xel-la zri'i lazre' da dxun na dxi'u tuze, ne li lazre'. ¹⁵ Xel-la dxebeza zri lazre' da dxunna Dios dxi'u dxal-la' nna bea na lu xichaj lázrdaudxu, lawe' da bláwizra Dios le'e chee súale lu xel-la dxebeza zri lazre' chee', ne gácale ca tuze bel-la' dxen. Cá'anqueze dxal-la' xe le Dios: Xcalenu'.

¹⁶ Dizra' chee Cristo dxal-la' guzúa xánnele lu xichaj lázrdaule chee séquele guzéajni'ile, ne gusízre ljwézrele nen duté xel-la sina chee Dios. Lu duté xel-la dxezaca ba lazre' le gul-la lau Dios salmo ca', ne da dxue lá'anale Dios, ne da ca' dxuzúa Be' Lá'azxa xichaj lázrdaule.

¹⁷ Bíteteze da gunle, u da nnale, le gun xúgute na lu La Xránadxu Jesús, ne xe le Xradxu Dios: Xcalenu', ne chee Le'.

**Ca dxal-la' xelún benne' ca'
zaj naque' bi chee Cristo**

¹⁸ Le'e, nu'ula, le guzúa dizra' chee benne' chee chee le, lawe' da naca na da dxal-la' xelún benne' dxeajlí lazre' Xránadxu.

¹⁹ Le'e, benne' biu, le zri'i zrú'ulale, ne quebe xexitaj lázrele le'.

²⁰ Le'e, bi cuide', le guzúa dizra' chee xra xrnale lu xúgute da dxelenné', chee gunle da dxezaca ba lazre' Xránadxu.

²¹ Le'e, xruze xrna', quebe tételale xel-la snia nen zrí'inele, chee quebe xelate ni'a na'be'.

²² Le'e, benne' zaj nada'u, le guzúa dizra' xúgute da xeenná xránale lu xezr la xu nigá, quegaze gate dxelenná'tee', chee xeléquene' le'e xrlátaje, san le gun da ca' du lázrele, ne le zrebe Dios.

²³ Bíteteze da gunle, le gun na du lázrele, ca nu benne' dxunge' zrin chee Xránadxu,

ne quegá zrin chee beniácheze. ²⁴Lácala dxunle zrin nigá chee bèneache, nézele gunna Xránadxu lazruj chee da dxal-la' sile lu zra na', lawe' da dxunle zrin chee Cristo, Bénnea' nácaqueze' Xránale. ²⁵Nu benne' dxune' da calëla, wazi'e lazruj chee da calëla nune' lawe' da quebe dxuchá Dios ca da dxune' chee tu xetú benne'.

4 Le'e, benne' nácale xrane bèneache, dxal-la' gácale xlátaje, ne li lazre' ca dxuchínele benne' ca' ná'ule. Le gusá lázrele, cá'anqueze le'e, zua Xránale xabáa.

²Le'e, bi bícha'dau', le guchálajlequeze Dios, súale ban lazre', ne xele Dios: Xcalenu'. ³Cá'anqueze, le naba lau Dios waláz cheentu', chee gácale Xránadxu netu' chee séquentu' guchálajntu' xrtizre', ne guzėjajni'intu' bèneache ca naca da nagache ca naca chee Cristo. Lawe' da dxuna' da caní ne xu'a lizre xia nigá. ⁴Le naba lau Dios chee séqueda' guzėjajni'i xánnea' bèneache ca dxal-la' guna'.

⁵Le gaca sina ca dxunle chee benne' ca' quebe dxelejli lazre' Cristo, guchine xánnele zra ca' dxunna Dios le'e. ⁶Dizra' dxuchálajle dxal-la' gaca na xrlátaje, ne da xelexezaca ba lazre' bèneache, na' dxal-la' nézele ca xechébele chee tu tu benne' ca' gate bi dxelenábene' le'e.

Dxulugapa diuzre bi bíchedxu ca' ljwezre'

⁷Tíquico, bi bíchedxu nazrí'i lázredxu guzenbe' le'e ca naca da dxaca chia'. Ná-cabe' tu bi li lazre' dxácalenbe' neda', ne dxunbe' zrin chee Xránadxu tu zren nen neda'. ⁸Chee le na', dxusella'-be' naga zúale, chee guzenbe' le'e ca dxaca cheentu', ne chee gutípabe' lázrele. ⁹Cá'anqueze zėjajle Onésimo lebe', naque' bíchedxu li lazre', benne'

nazrí'i lázredxu, ne naque' benne' walázr chee. Benne' caní xuluzenne' le'e ca naca da dxaca nigá.

¹⁰Aristarco, benne' xú'ulene' neda' lizre xia, dxugape' le'e diuzre, ne cá'anqueze dxun Marcos, bi xrtia Bernabé. Ba bzėjajni'ida' le'e ca dxun Marcos. Che waza'be' xedajnná'abe' le'e, le si' lu na'le lebe' cháwe'dau'.

¹¹Cá'anqueze bènea' le' Jesús dxugape' le'e diuzre, bènea' léqueze' Justo. Benne' zan benne' judío dxelejli lazre' Cristo, san benne' canize ládujla benne' judío ca' dxelune' zrin tu zren nen neda', na' dxuzéentu' bèneache ca xelexéquene' xelu'e naga dxenná bea Dios, na' dxuluzúe' neda' tu lu da ba neza zrente. ¹²Dxugapa Epafras le'e diuzre. Naque' wen zrin chee Cristo, ne benne' walázr cheequeze. Dxenábaqueze' lau Dios chee le'e chee se cháchale, ne guzúa cuínale du lázrele chee gunle da dxaca lazre' Dios. ¹³Neda' dxexecheba' chee Epafras, dx'e' gunne xue chee le'e, ne chee bi bíchedxu zaj zre'e xezre Laodicea, ne xezre Hierápolis. ¹⁴Dxugapa le'e diuzre Lucas, bènea' dxexune' benne' we' ca', ne naque' benne' nazrí'i lazra'. Cá'anqueze dxugapa Demas le'e diuzre.

¹⁵Le gugapa diuzre bi bíchedxu zaj zre'e xezre Laodicea. Cá'anqueze le gugapa diuzre Ninfas, ne bi bíchedxu ca' dxelezrague' lizre'. ¹⁶Ca te gulábale le'e xiche nigá, le sel-la na chee xululaba bi bíchedxu ca' zaj zre'e Laodicea na. Cá'anqueze le gulaba le'e xiche da ze za na Laodicea. ¹⁷Le xe Arquipo da nigá: Bxue xanne' gunu' cháwe'dau' ca naca zrin chee Xránadxu da bzue' lu na'u.

¹⁸Neda' Pablo dxuzúaja' da nigá nen ná'aqueza'. Dxugapa' le'e diuzre. Le gusá lázrele xu'a lizre xia. Dxenaba' lau Dios gun'e chee da chawe'. ¡Ca'an gaca na!

DIZRA' NEDXU BZUAJ SAN PABLO CHEE BI CHEE CRISTO ZAJ ZRE'E XEZRE TESALÓNICA

Pablo dxugape' diuzre bi bíchedxu ca'

1 Neda', Pablo, ne Silvano, ne Timoteo dxugápantu' le'e diuzre. Dxuzúaja' da nigá chee le'e, bi bicha', nazrá-gale chee Cristo lu xezre Tesalónica, ne nabábale chee Xradxu Dios, ne chee Xránadxu Jesucristo. Dxenaba' lau Xradxu Dios ne lau Xránadxu Jesucristo guné' chee da xrlátaje, ne gunne' le'e xel-la dxebeza zri lazre'.

Ca dxelejli lazre' benne' Tesalónica Cristo

²Dxequezentu' Dios xcalenu' ca naca chee xúgutele le'e, ne dxenábantu' gaca da chawe' chee le'e gate dxuchálajentu' Le'. ³Lau Xradxu Dios dxeajsá lázrentu' ca benle zrin duté lu xel-la dxeajli lazre' chee, ne ca benle zrin chee Cristo lu duté xel-la zri'i lazre' chee, ne ca zé cháchale ca dxebeza lázrele súalele Xránadxu Jesucristo. ⁴Le'e, bi bicha', Dios nazri'ine' le'e, na' nézentu' gucá'a Le' le'e. ⁵Gate bchálajntu' dizra' chawe' chee Cristo naga zúale, quebe bentu' na nen dízra'ze, san nen duté xel-la waca chee Be' Lá'azxa bchálajntu', ne lu duté xel-la dxuxrén lazre' cheentu'. Nézquezle ca bentu' zrin nigá ládujla le'e lawe' da nazrí'ile'entu' le'e.

⁶Le'e bénquezle ca bentu' netu', ne ca ben Xránadxu, na' guzile dizra' na' lu duté xel-la dxebe chee da benna Be' Lá'azxa le'e, lácala gudéle'ele xel-la zi'. ⁷Caní guca, nácale tu da dxulé'e na dxal-la' xelaca xúgute benne' dxelejli lazre' Cristo naga nababa Macedonia, ne naga nababa Acaya. ⁸Caní guca, bzenle le'e benne' ca' dizra' chee Xránadxu. Na'a quegá tuze benne' zaj zre'e Mace-

donia, ne Acaya, san cá'anqueze benne' ca' zaj zre'e xúgute xezre zaj nézene' ca dxeajli lázrele Dios, na' québedxa dxun na ba xen guzénentu' le'. ⁹Benne' caníqueze dxuluchálaje' ca guca gate bedajnná'antu' le'e ne ca guz' lu na'le netu', ne ca bsanle bedau' xiaj xaga ca' chee bábale chee Dios, na' guzú laule dxunle zrin chee Dios ban, Benne' li. ¹⁰Cá'anqueze dxuluchálaje' ca dxebézale zra xelá' Jesús, zé'e xabáa. Le' naque' Zri'ine Dios, na' Dios bsebane' Le' ládujla benne' gate ca'. Léqueze' guselé' dxi'lu lu da ba xa' zrente da za' da sel-la Dios lu duté xel-la dxezrá'a chee'.

Zrin ben Pablo lu xezre Tesalónica

2 Le'e, bi bicha', ba nézquezle le'e da bentu' gate na' bedajnná'antu' le'e quebe guca na zrin nite. ²Nézquezle ca belún benne' zaj zre'e xezre Filipos, bulucháchale' netu', ne buluzalje' netu' gate na' za xedajnná'antu' le'e, na' Dios bexru chache' netu' chee bchálajntu' dizra' chawe' chee Cristo naga zúale, lácala buluzaga benne' zan netu'. ³Quebe guque zréajntu' ca bchálajntu', ne quegá bi da calela guca lázrentu' guntu', ne quegá guca lázrentu' si xentu' le'e. ⁴Dxuchálajquezentu' ca dxaca lazre' Dios lawe' da bxren lazre' netu', ne bsebage' netu' guchálajntu' dizra' chawe' chee Cristo. Caní dxuchálajntu', quegá chee xelexezaca ba lazre' bénneache san chee xezaca ba lazre' Dios, Bénnea' dxenná'te' da zua xichaj lázrdaudxu. ⁵Nézquezle le'e cabata' ne xentu' le'e dizra' gúladau' da gucá'ana szren na le'e, ne quegá bi gunnantu' chee bi gúnnale netu'. Dios nézquezene' naca na da li. ⁶Cabata' ne gaca lázrentu' xelapa bénneache netu' ba lácala, le'e u benne' xula, lácala wazéquentu' nna bé'entu' le'e bi gúnnale netu' lawe' da nácantu' gubáz chee Cristo. ⁷Bentu' le'e xrtandau' ca dxun tu nu'ula dxusegule' zri'ine'.

⁸Nazríile'entu' le'e, la guzréntu' gún-natentu' le'e, quegaze dizra' chee Dios, san cá'aqueze xel-la nabán cheentu'. Caní nazríile'entu' le'e. ⁹Le'e, bi bicha', nézquezle ca bentu' zrin du lázrentu' chee gata' da xe'aj gáguntu'. Bentu' zrin te zra ne chizrela chee quebe bi gusaca zi'ntu' le'e dxácatę bchálajlentu' le'e dizra' chee Dios.

¹⁰Le'e dxexechébequezle, ne cá'aqueze Dios nézene' ca bentu' gate na' zúalentu' le'e, gúcantu' li lazre', ne xlátaję, na' quebe nu guzeque' nu nņę cheentu'. ¹¹Cá'aqueze nézquezle ca bentu', bsízrentu' tu tule le'e, ne btípantu' lázrele ca dxun tu xra bidau' chee zrí'ine'. ¹²Gunná bé'entu' le'e gunle ca dxal-la' xelún benne' zaj naque' bi chee Dios, Bénnea' dxuláwizre' le'e chee chu'ule naga dxenná be'e lu dutę xel-la szren chee'.

¹³Chee le na' dxéquezentu' Dios xcalenu' lawe' da benle ca naca dizra' chee Dios da bchálajntu', ne guzile na ca dizra' chee Dios, ne quegá ca dizra' chee benneácheze. Da li naca na dizra' chee Dios, ne dxun na zrin lu xichaj lázrdaule le'e, na' dxeajlí lázrele Le' chee gácale chee Dios dutę ca nácale. ¹⁴Le'e, bi bicha', gate gudele xel-la zi' chee da belún benne' waláwr chee, guca chee ca guca chee benne' zaj nababa chee Dios naga nababa Judea, benne' ca' zaj naque' bi chee Cristo, lawe' da cá'aqueze guledé' xel-la zi' chee da belún benne' waláwr chee' ca', benne' judío. ¹⁵Benne' judío caní belutie' Xránadxu Jesús, ca belún benne' judío ca' gate nate, belutie' benne' ca' gulenné' waláwr chee Dios, na' benne' caní gulebeaje' netu' lázrentu'. Quebe dxelunę' da dzezaca ba lazre' Dios, ne dxeledábaguę' xúguęę bėnneache, ¹⁶na' gate dxaca lázrentu' guchálajlentu' benne' quebe zaj naque' judío chee xelélé', quebe dxelunne' netu' lataj. Caní

dxelunę', dxuluzandxę' dul-la da zaj nabaguę'. Na'a, ba be' Dios lataj dxaca da ba xa' zrente chee benne' ca'.

Pablo dzezá lazre' cheajnné'e bíchedxu zaj zře'e xezre Tesalónica

¹⁷Le'e, bi bicha', gate becuásentu' naga zúale tu chi'i, lálaca québedxa blé'entu' le'e, nuzúaquezentu' le'e lu lázrdauntu', ne guzá lázrele'entu' xedajnná'antu' le'e. ¹⁸Guca lázrentu' xídantu', na' neda', Pablo, guca lazra' xida' tu chupa lasa, na' bzaga Satanás neda'. ¹⁹¿Bizra da na' dx-unna na netu' xel-la dxebeza lazre', ne xel-la dxebe', ne da dxuzúa na netu' lu da ba neza, ne da dxunna bea na zua da si'ntu' lu na' Dios? Lé'equeze gácale da caní lu zra xelá' Xránadxu Jesucristo. ²⁰Awe'. Da nácale le'e gun na si'ntu' da xabáa lau Dios, ne súantu' lu da ba neza.

3 Nadxa gate québedxa guca guchaga launtu' lawe' da quebe bi bėnentu' ca dxaca chee, na' gúquentu' xegá'ana chúpantu' lu xezre Atenas, ²na' sėl-lantu' bi bíchedxu Timoteo xedajnná'abe' le'e, lawe' da naca lebe' tu bi wen zrin chee Dios, ne ba benbe' zrin tu zren nen netu', bchálajntu' dizra' chawe' chee Cristo, na' wazéquebe' guzę chách-abe' le'e, ne gutípabe' lázrele ca dxeajlí lázrele Cristo, ³chee quebe gate ni'a na'le lawe' da dxedentu' lu da stebe caní. ⁴Gate ne zúalentu' le'e bzėajni'ntu' le'e wadéquezdxu lu da zi' da xa', na' ca'an guca, ca ba nézquezle. ⁵Chee le na', gate québedxa bzúeda' guchaga lawa' lawe' da quebe bi benda' chee, na' gusel-la' nu bedajnaba le'e ájala dxaca chee lu xel-la dxeajlí lazre' chee Cristo, lawe' da bzreba' ga gaze xucuasa da xriwe' le'e lu neza chee Dios, na' gaca níteze zrin bentu' ga na'.

⁶Na'a ba belá' Timoteo ga ni zúantu', ze zabe' Tesalónica, ne ze núabe' dizra' chawe' ca naca xel-la dxeajlí lazre', ne

xel-la zri'i lazre' cheęle. Dxebe' netu' dx-eajsá lázrquezle le'e netu' nen dutę xel-la zri'i lazre', ne dxezá lázrele'ęle lé'ele netu', ca netu' dxaca lázrentu' le'entu' le'e. ⁷ Cheę le na', bi bicha', dxácate dxe-dentu' lu da stebe caní, ne lu da zi' da xa', zúantu' xel-la dxebé lawe' da nézentu' ze cháchale ca dxeajlí lázrele Cristo. ⁸ Na'a naca cheentu' ca naca cheę tu benne' bezúateę' chawe' lawe' da nézentu' ze cháchale lu da naca cheę Xránadxu. ⁹ ¿Ajazra guntu' xéle'entu' Dios: Xcalenu' ca dxal-la' guntu' waláz cheęle le'e, ne ca naca xel-la dxebé nápantu' lau Dios ne cheęle le'e? ¹⁰ Te zra, ne chizrela dxata' xúentu' Dios gunne' netu' lataj xedajnná'quezentu' le'e, cheę gácadxale li lazre' ca dxeajlí lázrele Cristo.

¹¹ Dxenábantu' lau Xradxu Dios, ne lau Xránadxu Jesucristo gácalęne' netu' cheę séquentu' xedajnná'antu' le'e. ¹² Dxenábantu' Le' cheę zrí'idxa ljuwézrele tule xetule, ne cheę zrí'idxale xúgute bėneache ca nazrí'intu' netu' le'e. ¹³ Dxenábantu' Le' guzúa chúchue' lázrdaule, cheę gácale benne' li lazre', ne benne' lá'azxa lau Xradxu Dios lu zra na' gate xelá' Xránadxu Jesús nen xúgute bi cheę Le'.

Dxal-la' gundxu da dxezaca ba lazre' Dios

4 Le'e, bi bicha', dxata' xúentu' le'e, ne dxusebágantu' le'e da nigá lu La Xránadxu Jesús. Le gúndxaqueze da blé'entu' le'e gunle, da na' dxezaca ba lazre' Dios.

² Nézquezle le'e da bzéajni'intu' le'e ne cheę Xránadxu Jesús. ³ Da dxaca lazre' Dios naca na guzúa cuínale lu na' Le', ne québedxa gunle da sban, ⁴ na' súalele zrú'ulaquezle tu tule le'e lu xel-la lá'azxa cheę Xránadxu, ne gápale le' ba lá'ana, ⁵ ne quebe súale lu xel-la dxezá lazre' cheę da sban ca dxelún benne' quebe zaj nunbe'ę Dios. ⁶ Ca naca cheę da nigá, ne-

tule le'e quebe dxal-la' si xęle bi bíchele, quebe gunle da sban cheę, lawe' da xebéaj lazre' Xránadxu cheę xúgute benne' dxelunę' da caní, ca ba bzéajni'intu' le'e. ⁷ Dios bláwizre' dxi'u cheę gundxu da xrlátaje, ne quegá gundxu da sban. ⁸ Caní naca, che nu benne' dxuzúe' chalá'ala ca naca da nigá, quegá tuze bėneache dxuzúe' chalá'ala, san Diósqueze dxuzúe' chalá'ala, Bėneea' nunne' dxi'u Be Lá'azxa.

⁹ Ca dxal-la' zri'i ljuwézrele quebe dxun na ba xen guzúaja' cheęle, lawe' da ba blé'eqeze Dios le'e cheę zri'i ljuwézrele tule xetule. ¹⁰ Caníqueze dxal-la' zri'ile xúgute bi bíchedxu zaj zre'ę xezre ca' zaj nababa xezr la xu Macedonia. Dxata' xuentu' le'e, bi bicha', cheę zrí'idxa ljuwézrele. ¹¹ Le gun ba xuzre súale lu xel-la dxebeza zri lazre', ne gunle da naca cheęzquezle, ne gunle zrin nen ni'a na'le ca ba guzrentu' le'e, ¹² cheę xelapa benne' xula le'e ba lá'ana, ne cheę quebe bi xáxrjele le'e.

Ca gaca zra xelá' Xránadxu

¹³ Le'e, bi bicha', dxaca lázrentu' nézele ca naca cheę bi bíchele zaj nate, cheę quebe xewine lázrele ca dxelún xezícadxa benne' ca' quebe bi dxelebeza lazre'. ¹⁴ Dxéajlędxu gute Jesús, ne bebane' ládujla benne' gate, ne cá'anqueze dxéajlędxu Dios gusebane' benne' gate ca' guleajlí lazre' Jesús, cheę xelexúalęne' Le'.

¹⁵ Cheę le na' dxęntu' le'e da na' ble'e Xránadxu, gunne': Dxi'u naca bandxu gate xelá' Xránadxu, quebe cheajsúalędxu Le' nédxula ca benne' ca' zaj nate. ¹⁶ Xránaquezdxu ze'ę xabáa, na' cuezre xę'ę nen dutę xel-la dxenná' bea cheę, na' xendxu chi'i gubáz blau cheę xabáa, ne chi'i luzu da dxulucuezre' waláz cheę Dios. Nadxa benne' gate ca', benne' guléajle'ę cheę Cristo xelexebánqueze' za'a le'. ¹⁷ Te na',

dxí'u na' naca bandxu xeché'e dxí'u tu zren nen benne' ca' ládujla beuj chee xezrágadxu Xránadxu lu be'. Ca'an gaca súalédxu Xránadxu chadía chacanna. ¹⁸Chee le na' le gutipa lázrele tule xetule nen dizra' caní.

5 Na'a, ca naca chee bi zra, u bi iza xelá' Xránadxu, quebe dxun na ba xen guzúaja' cheele, bi bicha'. ²Ba nézqueze le'e zrin zra xelá' Xránadxu gate quebela nu dxebeza Le', ca za tu benne' gubán chizrela. ³Gate dxelenná bèneache: Cháwele'e dxaca cheedxu, ne quebe bi dxuchixre chee, nadxa za da guzría xi na benne' ca', ca za xel-la dxudía chee tu nu'ula gate zu'e' zi'i, ne quebe xeelé' lu da na'. ⁴Le'e, bi bicha', quebe zúale lu da chul-la, chee quebe gaca cheele lu zra na' xelá' Xránadxu ca dxaca chee tu benne' dxu'u gubán lizre'. ⁵Xúgutele le'e dxunle xrlátaje, da naca chee xel-la naxaní', ne chee te zra. Quebe dxundxu da calela, da naca chee chizrela, ne chee da chul-la. ⁶Chee le na' quebe dxal-la' gácadxu ca benne' la wase' ca dxelún benne' xula, san dxal-la' gácadxu ban lazre', ne guzéajni'i cuínadxu. ⁷Benne' dxelase, chizrela dxelásie', ne benne' dxelezuzre, chizrela dxelezúzre-queze'. ⁸Nácadxu dxí'u chee te zra, na' dxal-la' guzéajni'i cuínaquezdxu. Che dx-eajlí lázredxu Xránadxu, ne zri'idxu Le', da nigá gaca na cheedxu ca tu zra lana benne' zeje' wedil-la da naca na xia. Cá'anqueze che dxebeza lázredxu ladxu, da nigá gaca na cheedxu ca tu lapa xia ca da dxuzúa tu benne' zeje' wedil-la xíchajé'. ⁹Dios quebe bene' cheedxu tedxu lu da ba xa' da sel-le' lu xel-la dxezrá'a chee. Bene' cheedxu zrué'edxu xel-la weselá ne chee Xránadxu Jesucristo. ¹⁰Jesucristo gutié' waláz cheedxu chee gaca bandxu tu zren nen Le', che naca bandxu, u che ba nátedxu gate zrin zra na'. ¹¹Chee le na' le gutipa lázrele, ne le guzé chacha ljwézrele tule xetule, ca ba dxúnquezele.

Pablo dxuzéajni'ine' bi bíchedxu ca'

¹²Le'e, bi bicha', dxata' xúentu' le'e gápale ba lá'ana benne' dxelune' zrin ládujla le'e, benne' ca' gucá'a Xránadxu chee xelenná be'ene' le'e, ne xulusédene' le'e.

¹³Dxal-la' gápale benne' ca' ba lá'ana, ne zri'ile le' lawe' da dxelune' zrin chee Dios. Le sua lu xel-la dxebeza zri lazre' tule xetule.

¹⁴Cá'anqueze dxusebágantu' le'e, bi bicha', gusízrele benne' ca' quebe dx-elaca lazre' xelune' zrin, ne gutipa lázrele benne' ca' dxelate ni'a ne'e, ne gácalele benne' quebe zaj ze' chacha, ne gácale zren lazre' nen xúgute bèneache.

¹⁵Le guxúe xanne' cuínale chee quebe gunle da calela chee nu benne' dxune' cheele da calela, san le gun ba xuzre gún-quezele da xrlátaje, tule xetule, ne chee xúgute bèneache.

¹⁶Le béquezele.

¹⁷Le guchálajlequezele Dios.

¹⁸Le xe Dios: Xcalenu' ca naca xúgute da dxaca cheele.

Dxal-la' gunle da nigá lawe' da naca na da dxaca lázrqueze Dios gunle le'e, lawe' da nácale bi chee Jesucristo.

¹⁹Quebe guzágale da dxun Be' Lá'azxa.

²⁰Quebe guzúale chalá'ala dizra' da nunezruj Be' Lá'azxa nu bi bíchedxu ca'.

²¹Le guchi'a xanne' xúgute da ca', na' le si' da naca na xrlátaje.

²²Le cuasa lu xúgute da quebe naca na xrlátaje.

²³Dios dxunne' dxí'u xel-la dxebeza zri lazre'. Dxenaba' lau Le' gune' le'e benne' lá'azxaqueze, ne guxúe' be' nácaquezele, ne bène'du xu'ule, ne bel-la' dxen cheele chee gácale du lazre' lu zra na' xelá' Xránadxu Jesucristo. ²⁴Bénnea' bláwizre' le'e naque' li lazre', na' Le' gune' xúgute da caní.

Pablo dxuzé dizra' bi bíchedxu ca'

²⁵Le'e, bi bicha', le naba lau Dios gácal-lene' netu'.

²⁶Le gugapa diuzre xúgute bi bíchedxu ca', ne gunídale le'.

²⁷Lau Xránadxu dxusebaga' le'e gulábale xiche nigá lávela xúgute bi bíchedxu ca'.

²⁸Dxenaba' lau Xránadxu Jesucristo guné' chee da chawe'. ¡Ca'an gaca na!

DIZRA' GUDXUPE' BZUAJ SAN PABLO CHEE BI CHEE CRISTO ZAJ ZRE'E XEZRE TESALÓNICA

Pablo dxugape' diuzre bi bíchedxu ca'

1 Neda', Pablo, nen Silvano, ne Timoteo, dxugápantu' le'e diuzre. Dxuzúaja' da nigá chee le'e, bi bícha'dau', nazrágale chee Cristo lu xezre Tesalónica, ne nácale bi chee Xradxu Dios, ne chee Xránadxu Jesucristo. ²Dxenaba' lau Xradxu Dios, ne lau Xránadxu Jesucristo guné' chee le da chawe', ne gunné' le'e xel-la dxebeza zri lazre'.

Dios guchi'e da belún benne' dul-la ca' gate xelá' Cristo

³Le'e, bi bícha'dau', dxal-la' xéquezentu' Dios: Xcalenu' ca naca chee le, da dxal-la' guntu' lawe' da ba dxegula xel-la dxeajlí lazre' chee le, ne ba zúadxa xel-la nazrí'i lazre' len ljuwézrele tule xetule. ⁴Chee le na' dxuchálajntu' ca naca chee le'e lówela bi ca' chee Cristo. Dxuchálajntu' ca dxuchaga laule da dxelún benne' ca' zaj nau zi' xuzre' le'e, ne ca naca xel-la zi' da dxedele, san nácale zren lazre', ne dxeajlí lázrele Dios. ⁵Da nigá dxulé'e na xlátaje naca Dios ca dxuchi'e da dxelún bèneache, dxenné' naca chee le chu'ule naga dxenná bea Le' lawe' da dxedele xel-la zi' chee la' xel-la dxenná bea chee'.

⁶Xlátaje naca gudé Dios benne' ca' xel-la zi', benne' ca' dxuludé' le'e xel-la zi' na'a, ⁷na' guzúe' le'e naga xezí lázrele chee xel-la zi' da dxedele na'a. Xezí lázrele tu zren nen netu' gate xelá' Xránadxu Jesús, ze'e xabáa nen gubáz blau ca' chee xabáa chee'. ⁸Ze'e nu'e xi' chee gudé' lu da ba xa' benne' ca' quebe dxelexúnbe'e Dios, ne quebe dxu-

luzúe' dizra' ca dxenná dizra' chawe' chee Xránadxu Jesucristo. ⁹Benne' caní xelecuase' naga zua Xránadxu lu xel-la szren chee', ne xel-la dxenná bea chee', na' xeledé' xel-la zi' chee da ba xa' chadía chacanna. ¹⁰Caní gaca gate xelá' Xránadxu lu zra na' chee xulucá'ana szren benne' chee' ca' Le', na' benne' ca' dxeajlí lazre' Le' xelape' Le' ba lá'ana. Le'e gunle benne' ca' tu zren lawe' da guxéajle chee da bechébentu'.

¹¹Chee le na' tu dxuchálajlequezentu' Dios ca naca chee le, ne dxenábantu' Le' gaca chee le sile da na' bláwizre' le'e sile. Cá'anqueze dxenábantu' lau Dios guchínene' xel-la waca chee' chee gaca gunle ca naca xúgute da xrlátaje da dxezá lázrele, ne xúgute zrin dxunle ne chee xel-la dxeajlí lazre' chee le. ¹²Caní gunle, gucá'ana szrenle La Xránadxu Jesucristo, na' Le' gape' le'e ba lá'ana ne chee xel-la xrlátaje chee Dios cheedxu, ne chee Xránadxu Jesucristo.

Benne' xriwe'

2 Le'e, bi bicha', ca naca chee zra xelá' Xránadxu Jesucristo chee xutupe' dxi'u chee Le', dxata' xúentu' le'e ²chee quebe guchale ca dxéquele, ne quebe súale stebe chee bi dizra' xuluchalaj bèneache lácala xelenné' naca na da dxunezruj Be' Lá'azxa le', u chee xetú bila dizra' xénele, u chee bi xiche xelenné' naca na da gusél-lantu' netu', che dxenná na ba belá' Xránadxu. ³Quebe güele lataj nu si xe le'e, lawe' da xelalá' bèneache xelebéaj xíchajje' Dios, ne la' bèneache dxedábague' Dios nédxula gate zrin zra xelá' Xránadxu. Bèneache dxedábague' Dios, na' ba naca chee' cuía xíqueze', ⁴na' tábague' xúgute da naca chee Dios, ne xúgute da dxulucá'ana szren bèneache. Gucá'ana szren cuine' ca zrinte cheajché'e lu xudau' chee Dios, ne gun cuine' ca Diósqueze.

⁵ ¿Quebe dxeajsá lázrele gúchequeza' le'e da nigá gate na' zúalena' le'e? ⁶ Le'e ba nézele Nu Benne' nuzague' bénnea' dxedábague' Dios chee quebe le'e gate quebe ne zrin zra le'e. ⁷ Ba dxun zrin xel-la waca da nagache chee da calela, san zua Nu Benne' nuzague' le na na'a, ca zrin zra xecuasa Bénnea' nuzague' le na. ⁸ Nadxa la' bénnea' dxedábague' Dios, na' Xránadxu Jesús gutie' le', guchínene' be' da dxuaj na dxu'e, ne guzríá xi'e le', guchínene' xel-la naxaní' chee zra ze'e. ⁹ Benne' xriwe' na' ze'e ne chee xel-la dxenná bea chee Satanás, na' lu duté xel-la waca chee na gune' da ca' xelunna bea na, ne xel-la waca ca' da zaj naca na wen lazre', ¹⁰ ne guchínene' xúgute da calela ca' chee si xe'e benne' ca' xelebía xi'e, benne' ca' quebe gulaca lazre' xelez'e da li chee xelelé'. ¹¹ Chee le na' Dios dxu'e lataj si xe da calela benne' ca' chee xeléajle'e chee da wen lazre', ¹² chee xelebía xi' xúgute benne' ca' quebe gulaca lazre' xeléajle'e chee da li, san dxeledánedxene' da naca da calela.

Dios guqu'é dxu' chee ladxu

¹³ Netu' tu dxál-la'queze xentu' Dios: Xcalenu' ca naca chee le'e, bi bícha'dau', nazrí'i Xránadxu le'e, lawe' da gucá'a Dios le'e nédxute chee lale. Be' Lá'azxa ba nune' le'e chee Dios lawe' da dxéajlele chee da li. ¹⁴ Chee gaca chee da nigá Dios ba bláwizre' le'e ne chee dizra' chawe' da dxuchálajntu', chee zru'é'ele xel-la szren chee Xránadxu Jesucristo.

¹⁵ Chee le na', bi bícha'dau', le se chacha, ne quebe gal-la lázrele da ca' bzéajni'intu' le'e caniqueze, ne cá'anqueze lu xiche. ¹⁶ Dxenaba' lau Xránadxu Jesucristo, ne lau Xradxu Dios, Bénnea' lu duté xel-la xrlátaje chee' bzri'ine' dxu', ne ba benne' dxu' xel-la dxexúe zren chee' tu chí'i gaze, ne tu xel-la dxebeza lazre' li. ¹⁷ Dxenaba'

Le' gutipe' lázrele, ne guzé chúchue' le'e chee nnale, ne gunle xúgute da xrlátaje.

Pablo dxenné xúene' bíchedxu ca' xelenabe' Dios gácalene' le'

3 Na'a, bi bícha'dau', le naba Dios gácalene' netu', chee zrinzega dizra' chee Xránadxu xúgute xezre ca', ne chee xelez'e na duté lu xel-la ba lá'ana, ca guca ládujla le'e. ² Le nábaquezle chee ladxu lu na' benne' ca' dxelune' da calela, ne lu na' benne' sban ca', lawe' da quegá xúgute benne' dxelejli' lazre' Cristo. ³ Xránadxu naque' li lazre', na' Le' guzé chache' le'e, ne guxúe' le'e chee quebe bi da calela gaca na chee. ⁴ Dxuxrén lázrentu' Xránadxu gácalene' le'e chee gunle ca da dxé'entu' le'e, ca ba dxúnqueze. ⁵ Dxenábantu' lau Xránadxu gácalene' le'e chee gápale xel-la zri'i lazre' da gunna Dios le'e, ne gápale xel-la zren lazre' da gunna Cristo le'e.

Dxal-la' gundxu zrin

⁶ Le'e, bi bícha'dau', lu La Xránadxu Jesucristo dxé'entu' le'e quebe gunle tuze núteteze bi bíchedxu quebe dxaca lazre' guné' zrin, ne quebe dxune' ca da bsé'entu' le'e. ⁷ Ba nézele dxal-la' gunle zrin ca bentu' netu' gate na' zúalentu' le'e. ⁸ Quebe nu chee gudá-guntu' cá'aze che nadxu quebe gudízru-jntu' na. Bénle'equezentu' zrin te zra, ne chizrela chee quebe bsaca zi'ntu' le'e da gáguntu'. ⁹ Nácaqueze cheentu' nábantu' le'e da gáguntu', san bentu' zrin chee blé'entu' le'e dxal-la' gunle ca bénquezentu' netu'. ¹⁰ Gate na' zúalentu' le'e, bdentu' lu na'le da nadxixruj bea nigá: Benne' quebe dxaca lazre' guné' zrin ca'an guné' quebe gawe'. ¹¹ Ba bémentu' bál-lale le'e quebe dxunle zrin, na' dxedázele dxuchixre chee da dxaca chee benne' xula. ¹² Benne' caní dxixruj be'entu', ne dxusebágantu' le' lau

Xránadxu Jesucristo chee xelunę' zrin du lazre' chee gata' da xele'aj xelawę'.

¹³ Le'e, bi bicha', le gun da xrlátaje, ne quebe cheajtá lázrele. ¹⁴ Che nu benne' quebe dxuzúę' dizra' ca da dxennantu' lu xiche nigá, le nna' nu bénnea', ne quebe gunle le' tuze, chee gapa stuę'. ¹⁵ Quebe zrá'ale le', san le guzéajni'i le' ca bi bíchele.

Pablo dxuzé' dizra' bi bíchędxu ca'

¹⁶ Xránadxu naque' Bénnea' dxunne' dxi'u xel-la dxebeza zri lazre'. Dxenaba'

lau Le' gúnnaqueze' le'e xel-la dxebeza zri lazre' lu xúgute da dxunle, ne súalęę' xúgutele le'e.

¹⁷ Neda', Pablo nen ná'aqueza' dxuzúaja' chee da nigá. Da nigá dxunna bea na xúgute xiche da dxuzúajjeza' neda'. Caní dxuzúaja'. ¹⁸ Dxenaba' lau Xránadxu Jesucristo gunę' da chawe' chee xúgutele le'e. Ca'an gaca na.

DIZRA' NEDXU BZUAJ SAN PABLO CHEE TIMOTEO

Pablo dxugape' diuzre Timoteo

1 Neda', Pablo, naca' gubáz chee Jesucristo lawe' da caní bdxixruj bea Dios, Xra Xránadxu Jesucristo, weselá cheedxu, Bénnea' dxebeza lázredxu xelá'tee'. ²Dxuzúaja' da nigá chiu' lue', Timoteo, nacu' ca zrí'nequeza' lawe' da dxeajlí lazru' Cristo. Dxenaba' Xradxu Dios, ne Xránadxu Jesucristo guné' chiu' da chawe', ne xexache lazre' lue', ne guné' lue' xel-la dxebeza zri lazre'.

Pablo dxusízrene' Timoteo ca naca chee benne' ca' dxulusédene' da wen lazre'

³Ca ba guta' xúeda' lue' gate na' bezá'a naga zu', ne bexá'a naga nababa xezr la xu Macedonia, begá'ana lu xezre Efeso chee nne xúenu' benne' ca' zaj zre'e na' québedxa xulusédene' da wen lazre', ⁴ne québedxa xululapa ne'e dizra' dxuluzaze benne' ca' ca zaj naca zánete xra xrtawe' ca'. Dizra' caní dxulutil-la na bénneache. Quebe naca na da xelácale na bénneache chee xelezé chache' ca dxelejli lazre' Dios. Caní dxenné xúeda' lue' xecha lasa.

⁵Dxenné xúeda' lue' gunu' caní chee xelezrí' ljwezre' duté lázrdawe', chee quebe bi sua da gagu na zria lázrdawe' ca', ne gaca du lazre' ca dxelejli lazre' Cristo. ⁶Bal-la benne' ca' belexeuase' lu da caní, na' ba zaj nazi'e dizra' xálaze. ⁷Dxelaca lazre' xuluxuzájle'e da nadxixruj bea Dios, ne quebe dxeléajni'ine' da dxuluchálajqueze', ne ca naca da ca' dxuluxrén lazre'.

⁸Nezdxu da nadxixruj bea na naca na xrlátaje che nu benne' dxuchíne' na ca naca chee na. ⁹Dxal-la' gusá lázredxu quebe bzua Dios da nadxixruj bea na chee nna be'e na benne' xrlátaje ca', san

chee nna be'e na benne' ca' dxelune' da calela, ne benne' ca' quebe dxuluzúe' xrtizre'e, ne benne' ca' dxelune' da zrinnaj, ne benne' wen dul-la ca', ne benne' ca' quebe dxelape' Dios ba lá'ana, ne quebe dxelapa ba lá'ana da naca chee Dios, ne benne' ca' dxelute xra xrna', ne benne' ca' dxelutie' benne', ¹⁰ne benne' ca' dxelune' da sban, ne benne' biu ca', benne' dxulugune' ljwezre biue' ca nu'ula, ne benne' dxelebane' benne' ca' chee xelutie' le' lu na' benne' xula, ne benne' ca' dxelún lazre', ne benne' ca' dxelexechebe' da wen lazre', ne benne' ca' dxuluchuque' da li. ¹¹Caní naca da dxulé'e dizra' chawe' da bsebagá Dios neda'. Naque' Dios xabáa, Benne' szrente.

Pablo dxé'e Dios: Xcalenu'

¹²Dxapa' Xránadxu Jesucristo: Xcalenu'. Naque' Bénnea' benne' neda' xel-la waca chee guna' da nigá, lawe' da dxelé'ene' neda' xlátaje, na' nuzúe' neda' lu zrin chee'. ¹³Xúgute da caní ba bene' chia' lálala gunniá' schanni' chee Cristo gate nate, ne gudáu zi' xuzra' bi chee' ca', ne ben la' chee benne' ca'. Dios bexache lazre' neda' lawe' da quebe ne cheajlí lazra' Cristo, ne quebe guxéajni'ida' da na' bena'. ¹⁴Chee le' na' Xránadxu, duté lu xel-la zri'i lazre' zren chee' bnite lawe' chia', ne benne' neda' xel-la dxeajli lazre', ne xel-la zri'i lazre' da nápadxu lawe' da nácaxu bi chee Jesucristo.

¹⁵Da nigá naca na da li, na' xúgute bénneache dxal-la' xeléajle'e chee na. Caní dxenná na: Jesucristo ble'e lu xezr la xu nigá chee guselé' benne' dul-la ca', na' neda' nácaxa' benne' dul-la ca xúgute benne' ca'. ¹⁶Chee le' na' Dios bexache lazre' neda' chee gulé'e Cristo ca szren naca xel-la zren lazre' chee' nen neda', nácale'a benne' dul-la, chee gaca' neda' tu da gulé'e na lau xúgute benne' ca' xeléajli lazre' Cristo, na' xelape' xel-

la nabán chadía chacanna. ¹⁷Cheë le na' dxal-la' gápadxu ba lá'ana, ne güe lá'anadxu Bénnea' nna béaqueze' chadía chacanna. ¡Cabata' gatië', ne quebe gaca lé'edxu Le', ne naque' Dios tu licha', ne sina! ¡Gaca ba Le' chadía chacanna! ¡Ca'an gaca na!

¹⁸Lue', bi chia', Timoteo, dxusebaga' lue' su' wedil-la cheë tíl-lalenu' da naca cheë da calëla, ca da buluchalaj nédxute benne' ca', benne' gulenné' waláz cheë Dios ca dxal-la' gunu' lue'. ¹⁹Bexru tipa xel-la dxeajlí lazre' chiu', cheë quebe bi sua da gulale na lu xichaj lazrda'u. Bal-la benne' ca' quebe belune' caní, na' buluzú' chalá'ala xel-la dxeajlí lazre' cheë'. ²⁰Caní guca cheë Himeneo, ne cheë Alejandro, benne' ca' bdea' neda' lu na' Satanás cheë xulusédie' quebe xelenné' schanni' cheë Dios.

Ca dxal-la' guchálajlëdxu Dios

2 Da dxundxa na ba xen dxenné xúeda' lue', dxal-la' nábale lau Dios gácalenë' bénneache, ne guchálajlele Dios, ne gucá'ana szrenle Le', ne nábale Dios gunne' le'e da dxexázrjele, ne xele Dios: Xcalenu'. Dxal-la' gunle caní, guchálajlele Dios da naca na cheë xúgute bénneache. ²Cá'anqueze dxal-la' nábale Le' gácalenë' benne' xichje ca', benne' dxe-lenná be'ene' bénneache, ne benne' xu'u lawe' ca' cheë chadxu chawe', ne súadxu lu xel-la dxebeza zri lazre', ne guzúa cuínadxu lu na' Dios du lázredxu, ne gápadxu ba lá'ana bénneache. ³Da nigá naca na xrlátaje, ne da dzezaca ba lazre' Dios, weselá cheëdxu, ⁴lawe' da dxaca lazre' Le' xeelá xúgute bénneache, ne xelúnbe'e da li. ⁵Zua tuze Dios, ne zua tuze wenaba cheë bénneache lau Dios, Bénnea' naque' Jesucristo, ne cá'anqueze ben cuinë' bénneache. ⁶Jesucristo bzua cuinë' lu xel-la gute cheë bexá'awe' xúgute bénneache, na' blé'ene' da na' ca bzin zra cheë na. ⁷Cheë le na'

bzue' neda' gubáz cheë' cheë cu'a lban, ne gulé'eda' benne' ca' quebe zaj naque' judío dxal-la' xeleajlí lazre' Cristo, ne xelunë' ca naca da li. Lau Cristo dxex-echeba', ne quebe dxun lazra'.

⁸Cheë le na' dxaca lazra' xuluchálajle xúgute bénneache Dios gáteteze na', ne xelechisa ne'e dute xel-la li lazre' cheë' lau Dios, ne quebe xelezré'e ljwezre', ne quebe xeledíl-lalene' ljwezre' ca'. ⁹Nu'ula ca' dxal-la' xelácue' da naca xlátaje, ne ca naca cheë da dxelúe lechítaje cuinë' dxal-la' gaca na xel-la dxexruij lazre', ne xel-la du lazre', ne quegá ca dxulupá'a xíchaje', ne quegá lechítaje da naca na oro, ne quegá bga ca', ne quegá zra lanë' da zácälë'e na. ¹⁰Dxal-la' xelunë' da gácalë na bénneache, ca dxal-la' xelún nu'ula ca' ba zaj nuzúa cuinë' lu na' Dios. ¹¹Nu'ula ca' dute lu xel-la dxexruij lazre' cheë' dxal-la' xulusé nague' gate nu dxusëde xrtizra Dios, ne quebe xelenné' cheë na. ¹²Quebe dxunna' lataj nu'ula gusédenë' benne' biu ca', ne quebe nna be'ene' le', san dxal-la' sue' zrize. ¹³Caní naca na lawe' da ben Dios teca Adán, na' gudé na' bene' Eva, nu'ula cheë Adán na'. ¹⁴Adán, quebe guzú xë da xriwe' le', san guzú xë na Eva, nu'ula na', na' gudé guzú xë na le', na' bene' dul-la. ¹⁵Tu nu'ula gape' xel-la weselá che dxezanë' bidu ca', ne cheajlí lazre' Dios, ne nazri'ine' Le', ne nuzúa cuinë' lu na' Dios, ne gaque' dxexruij lazre'.

Ca dxal-la' xelaca benne' ca' dxulusédenë' bi ca' cheë Cristo

3 Da líqueze naca da nigá: Che nu benne' dzezá lazre' gaque' benne' gusédenë' bi ca' cheë Cristo, tu zrin xrlátaje dxaca lazre' gunë'. ²Tu benne' dxusédenë' bi ca' cheë Cristo: Dxal-la' gaque' benne' quebe bi zua da dxumite na le'. Dxal-la' súalënë' tuze nu'ula. Dxal-la' gaque' benne' dxuzéajni'i cuinë',

ne benne' dxenná be'e cuine',
 ne benne' nape' ba l'ána.
 Dخال-la' si' lu ne'e benne' xezezrine' lize'.
 Dخال-la' gaque' benne' dxaca dxusédene'
 bèneache.

³ Quebe dxal-la' xé'aje' da guzuzre na le',
 ne quebe gutil-le' nu benne',
 ne quebe sa lazre' dumí.

Dخال-la' gaque' benne' dxexruj lazre', ne
 zren lazre'.

⁴ Dخال-la' nézene' nna be'ene' benne' zaj
 zre'e lize',

ne gulé'ene' zrí'ine' ca' xelácabe' wezúa
 dizra',

ne xelápabe' ba l'ána xra xrnabe'.

⁵ Che nu benne' quebe nézene' ájala nna
 be'ene' benne' zaj zre'e lize', çájazra
 guné' gusédene' bi ca' chee Dios? ⁶ Benne'
 dxusédene' bi ca' chee Cristo quebe dxal-
 la' gaque' benne' za dxúnbeate dizra'
 chee Cristo, chee quebe gucá'ana szren
 cuine', chee quebe cuía xi'e ca guzrí'a
 xi' da xriwe'. ⁷ Cá'anqueze dxal-la' gaque'
 benne' nape' ba l'ána lówela benne'
 quebe zaj naque' chee Cristo, chee quebe
 gata' lataj nu guzúa le' chalá'ala, na' chee
 quebe chu'e lu na' da xriwe'.

Ca dxal-la' xelaca benne' dxelácalene' bi ca' chee Cristo

⁸ Cá'anqueze benne' ca' dxelácalene' bi
 ca' chee Cristo:

Dخال-la' xelaque' benne' zaj nape' ba
 l'ána, ne benne' li lazre'.

Quebe dxal-la' xelé'aje' da guzuzre na le',
 ne quebe xelaque' benne' dxulucudee'.

⁹ Dخال-la' xelapa xánnie' da zácale'e chee
 da dxeajlí lázredxu,

ne quebe bi sua da gagu na zría chee' lu
 xichaj lázrdawe'.

¹⁰ Dخال-la' guxúe xánnele ca dxeledé'.

Te na', che quebe bi zua da dxagu na zria
 chee', waca xelácalene' bi ca' chee Cristo.

¹¹ Zru'ula benne' caní:

Dخال-la' xelaque' benne' zaj nape' ba
 l'ána,

ne quebe xelaque' wetupa dizra' bizruj.
 Dخال-la' xelaque' du lazre', ne li lazre' ca
 naca xúgute da dxelune'.

¹² Tu benne' dxácalene' bi ca' chee Cristo
 dxal-la' súałene' tuze nu'ula, ne dxal-
 la' nézene' nna be'ene' zrí'ine' ca', ne
 benne' zaj zre'e lize'. ¹³ Benne' ca' dx-
 elácalene' bi ca' chee Cristo, che dxelune'
 cháwedau' zrin chee', welezrué'ene' xel-
 la' ba l'ána, na' xelezéquedxene' xu-
 luchálaje' du lazre' ca dxeajlí lázredxu
 Jesucristo.

Tu da ble'e Dios dxi'u ca naca da zéajłedxu

¹⁴ Dxebeza lazra' xídazequeza' xeda-
 jnná'a lue', na' dxuzúaja' chiu' da nigá
¹⁵ chee chéajni'inu' che dxezreda', ca
 dxal-la' gunu' ládujla benne' ca' zaj
 nababe' chee Dios, benne' ca' ba bláwizra
 Dios ban, ne zaj nuxru chache' da li, ne
 dxuluxúe xánnie' na. ¹⁶ Da li tu da zrente'
 naca da nigá ble'e Dios dxi'u ca naca da
 zéajłedxu:

Dios ble'e nigá, ne guque' bèneache.

Be' Lá'azxa blé'ene' naque' xlátaje.

Belelé'e gubáz chee xabáa ca' Le'.

Benne' duté xezr la xu belenne' ca naca
 chee'.

Guleajlí lazre' benne' zaj zre'e duté xezr
 la xu nigá Le'.

Dios bezi'e Le' xabáa.

Ca naca chee benne' ca' dxuluzúe' chalá'ala xel-la dxeajlí lazre' chee'

4 Be' Lá'azxa ba bdxixruj li'e wazrín
 zra xulusán bal-la benne' xel-la dx-
 eajlí lazre' chee', na' chjácalene' be' ca'
 xezezí xé na le', ne xezezí'e ca da xul-
 ul'é be' xriwe' ca'. ² Xuluzé nague' ca
 da xulusede benne' wen lazre' ca', benne'
 dxelún lóweze da xrlátaje, ne québedxa
 zaj zua xel-la dxeléquebe'e xichaj lázr-
 dawe', ne zaj naque' lázrdau zizraj, na'
 quebe zaj nape' xel-la stu' gate dxelún
 lazre'. ³ Benne' caní quebe dxelu'e latja

nu guchaga na', ne cá'aqueze nu xe'aj gagu bal-la da dxágudxu, lácala ben Dios da ca' chee xelagu benne' ca' dxelejli lazre' Le', ne benne' ca' zaj núnbe'e da li, ne xelé'e Le'; Xcalenu'. ⁴Xúgute da ben Dios naca na chawe', ne quebe dxal-la' bi guzúadxu chalá'ala, san dxal-la' sidxu na, ne xedxu Dios; Xcalenu', ⁵lawe' da naca chawe' lau Dios bíteteze da dxágudxu che dxundxu da dxenná xrtizre', ne che nábadxu Le' guné' gaca na da chawe'.

Benne' wen zrin xrlátaje chee Jesucristo

⁶Che dxusédenu' bi bíchedxu ca' da caní, nacu' bi wen zrin chawe' chee Jesucristo, na' nazí lu na'u dizra' chee Dios, ne ca naca da dxusédedxu, da na' zéajlenu'. ⁷Quebe gulapa na'u da dxuluzaze bénneache, ne dizra' xálaze. Bzazraj cuinu' lu da naca chee Dios. ⁸Che dxuzazraj cuinu' ca naca lu bel-la' dxen chiu' wácalequeze na lue' late', san che dxuzazraj cuinu' lu da naca chee Dios, wácale na lue' lu xúgute da dxunu', na' naca na da sidxu ba neza lu xezr la xu nigá, ne cá'aqueze lu xezr la xu da za za'. ⁹Da li naca da nigá, na' xúgute bénneache dxal-la' xeléajle'e chee na. ¹⁰Chee le' na' dxudé xel-la' zi' cuínadxu dxundxu zrin lawe' da dxebeza lázredxu Dios ban, Bénnea' naque' weselá chee xúgute bénneache, na' dxuselé' benne' ca' dxeajli lazre' Le'.

¹¹Da caní dxal-la' gusédenu' bénneache, ne nne xuenu' le' xeluné' na. ¹²Quebe gu'u lataj nu guzúa lue' chalá'ala lawe' da nacu' benne' cuide', san dxal-la' gacu' tu da gulé'e na benne' ca' dxelejli lazre' Cristo ca dxal-la' xeluné'. Gulé'e na le':
Ne chee da dxuchálaju',
ne ne chee da dxunu',
ne ca nazri'inu' le sa' ljwezru',
ne ca naca Be' Lá'azxa zúalene' lue',
ne ca dxeajli lazru' Cristo,

ne ca nacu' du lazre'.

¹³Dxácaté xida' neda', ben zi' lazru' gulabu' xiche lá'azxa lówela bénneache, ne gutipu' lazre' bi bíchedxu ca', ne guzéajni'inu' le'. ¹⁴Quebe gusanu' xel-la waca da benna Dios lue' gate buluzé na' benne' gula ca' xichju', ne gulenné' ca da ble'e Be' Lá'azxa le' ca naca zrin chee Xránadxu da dxal-la' gunu'.

¹⁵Ben da caní du lazru' chee xelelé'e xúgute bénneache nápaquezu' da naca chee Dios. ¹⁶Bxue xanne' cuinu', ne ca da dxusédenu', ne guzé chacha lu zrin chiu'. Che gunu' da caní, na' guseláqueze cuinu', ne guseláquezu' benne' ca' xelenne' da guchálaju'.

Ca dxal-la' xelaca benne' ca' dxelejli lazre' Cristo

5 Quebe cun til-lu' tu benne' gula, san bzéajni'i le' ca xráquezu'. Gúcale benne' cuide' ca' ca bi bíchequezu'. ²Gúcale nu'ula gula ca' ca xrnáquezu'. Gúcale nu'ula cuide' ca' ca bi zánquezu', dute lu xel-la dxapa ba lá'ana chiu'.

³Gúcale nu'ula ba nate benne' chee', nu'ula' quebe nu xrtie' zradxa. ⁴Che tu nu'ula ba gute benne' chee' ne zaj zra' zrínene', u zre sue', lebe' dxal-la' xelunbe' ca da zaj nabágabe' chee xelácalebe' benne' zaj naca xrtíaquezebe', ne xelunbe' ca da zaj nabágabe' chee xra xrnabe', lawe' da naca na xrlátaje, ne da dxezaca ba lazre' Dios. ⁵Nu'ula da li québedxa nu chilá' chee' dxebeza lazre' Dios, ne dxuchálajlene' Dios te zra, ne chizrela. ⁶Nu'ula caní, che dxuné' ca da dxezaca ba lazre' léqueze', naque' ca benne' ba nate. ⁷Bdxixruj be'e benne' ca' xeluné' caní, chee quebe gun na ba xen nu til-la le'. ⁸Che nu benne' quebe dxebé'e gunne xue chee benne' ca' zaj naque' tuze, ne da dxun na ba xen che quebe dxácalene' xrtíaqueze', ba bsane' xel-la dxeajli lazre' chee', ne nácadxe' benne' wen da zrin-

naj ca tu benne' quebe ne chéajlë'e chee Dios.

⁹Lu xiche naga zria la nu'ula ca' quebe nu chilá' chee', benne' dxácalele, dxal-la' guzúajle la nu'ula caní, nu'ula na' ba gudée' ga xun iza, ne guzúa tuze benne' chee'. ¹⁰Dxal-la' gaque' nu'ula ba bënle'e da xrlátaje ca da caní:

Che ba bsegule' zrí'ine' ca'.

Che ba guzú' lu ne'e benne' bíchedxu belezrín lizre'.

Che ba gúcalene' benne' caní dutë lu xel-la dxexruj lazre' chee'.

Che ba gúcalene' benne' dxedée' xel-la zi'.

Che bi xetú da xrlátaje ba bene'.

¹¹Quebe guzríale lu xiche na' nu'ula caní che quebe ne xelezríe' ga xun iza lawe' da gagaze xucuasa xel-la dxelezá lazre' chee' le' lu da naca chee' Cristo, na' xelaca lazre' xuluchaga ne'e xecha lasa, ¹²na' xelebague' zria lawe' da bulusanë' ca da gulechebe lazre' chee' Cristo. ¹³Cá'anqueze che dxeledé' tu tu xu'u, xelaque' zrawede, ne quegaze zrawede, san cá'anqueze xelaque' wetupa dizra' bizruj, na' xuluchixre chee' lu xúgute da xelenne', ne xelenné' da quebe dxal-la' xelenné'. ¹⁴Chee' le' na' dxaca lazra' xuluxuchaga ne'e che ne zaj naque' nu'ula cuide', ne xelezrá zrí'ine', ne xuluxúe' lizre', chee' quebe xelezí lataj xelezí tizra benne' ca' dxelezre'e dxi'u. ¹⁵Bal-la nu'ula caní ba belexeuase' chee' Cristo, ne zjácálene' da xriwe'.

¹⁶Che nu benne' dxeajlí lazre' Cristo, benne' biu, u nu'ula, che zua xrtie' naque' nu'ula ba gute benne' chee', dxal-la' gácalene' le' chee' quebe xelebaga bi ca' chee' Cristo da nigá, na' benne' caní welezeque' xelácalene' nu'ula caní québedxa nu chilá' chee'.

¹⁷Che zaj zra' benne' gula ca' dxulusédene' cháwedau' bi ca' chee' Cristo, dxal-la' gápale'e'le benne' ca' ba lá'ana, na' dx-undxa na ba xen gápale ba lá'ana benne'

gula ca' dxuluchálajlequeze' le'e dizra' chee' Dios, ne dxulusédene' le'e. ¹⁸Lu xiche lá'azxa dxenná na: Quebe cu'ule xixruj dxu'a bezre, be dxíchujba' zrua' xtila. Cá'anqueze dxenná na: Benne' wen zrin dxal-la' si'e xrlázruje'.

¹⁹Quebe guzé nagu' che nu gagu zria chee' tu benne' gula chee' xudau' che quebe xelexé' chupa u chunna benne' xelexechebe'. ²⁰Benne' ca' dxelúnqueze' dul-la, dxal-la' til-lu' benne' ca' lálwela xúgute bi ca' chee' Cristo, chee' xelezrebe xezícadxa benne' ca'. ²¹Lau Dios, ne lau Xránadxu Jesucristo, ne lau gubáz blau ca' chee' xabáa chee', dxusebaga' lue' chee' gunu' da caní. Dxenné' xueda' lue' quebe cueu' ca zaj naca benne', ne quebe gucha'u ca gunu' chee' tu tu benne'. ²²Quebe xexúbenu' nu la guzúateu' lu zrin chee' Cristo chee' quebe bagu' dul-la chee' benne' xula. Quebe gulapa na'u ne tu da calela.

²³Lawe' da quebe chawe' zua le'u, ne tu lize dxaca na, québedxa xé'aju' nísaze, san güe'e late' xrise uva wal-la.

²⁴Zaj nalá' dul-la chee' bal-la benne' gate quebe nu ne guchi'a ca da zaj nunë', san dul-la da zaj nun xezícadxa benne' ca' xululé'e lawe na te na'. ²⁵Cá'anqueze zaj nalá' da xrlátaje da zaj nun bal-la benne', ne che zra da xrlátaje da quebe zaj nalá', quebe gaca tu xelegáchequeze na.

6 Benne' zaj nada'u dxal-la' xelápale'e ba lá'ana xranë' ca' chee' quebe nu nne' schanni' chee' Dios, ne chee' da dxusédedxu. ²Che benne' zaj nada'u, zaj zra' xranë' ca' dxeleajlí lazre' Cristo, quebe dxal-la' xuluzúe' le' chalá'ala lawe' da zaj naque' benne' biche', san dxal-la' xelune' zrin da nácadxa xrlátaje chee' xranë' ca' dxelezi'e ba neza zrin na', lawe' da dxeleajlí lazre' Cristo, ne zaj naque' benne' biche' zaj nazri'ine'. Bzëajni'i benne' ca' da nigá ne bsizre le'.

**Da calela da dxulusede benne',
ne xel-la gunní'a li**

³ Che nu benne' dxusédenē' da zaj naca calela da quebe zaj naca na tuze ca da bsede Xránadxu Jesucristo, ne ca da dxusede da dxéajlédxu chee Dios, ⁴ benne' nigá dxucá'ana szren cuine', ne quebe bi nézene'. Dxezá lázrele'e gutil-le' benne' dizra' ca naca chee tu tu dizra' ca'. Benne' dxelún caní:

Dxelaque' benne' xre lazre', ne dxeledil-le',

ne dxulucháchale ljwezre',
ne dxeléquene' dxun le sa' ljwezre' da calela,

⁵ ne tu lize dxulutil-la dizra' ljwezre',
ne zaj naque' benne' zaj nazrinnaj lu xichaj lázrdawe',
ne quebe zaj nunbe'e da li.

Dxeléquene' zrin dxundxu chee Cristo naca na tu da waca xuluchínene' chee xelaque' benne' gunní'a. Quebe gunu' tuze benne' caní. ⁶ Da li da zéajlédxu chee Cristo naca na tu da gunní'a zren, na' caní nácaqueze chee tuze bènea' dxezaca ba lazre' ca da nape'. ⁷ Quebe bi núadxu gate gúlajdxu lu xezr la xu nigá, ne quebe bi xexúadxu gate xezá'adxu nigá, ⁸ san che de da gágudxu, ne zra lánadxu, dxal-la' xezaca ba lázredxu nen da ca'. ⁹ Benne' ca' dxelaca lazre' xelaque' gunní'a, cheajlecházie' lu na' da xriwe', na' cheajlechu'e lu xralaj chee le na, chee xelezá lazre' da xálaze, da dxulucá'ana ditaj na bèneache, ne dxelegú'u na bèneache lu da ba xa' naga xelebía xi'e.

¹⁰ Benne' nazri'ine' dumí dxune' xúgute da calela, na' zaj zra' bal-la benne' gulezá lazre' na, na' bulusanē' xel-la dxeajlí lazre' chee', na' ba gulezí' lataj xel-la dxudía lu lázrdawe'.

Da dxusizre Pablo Timoteo

¹¹ Lue', wen zrin chee Dios, gucuasa lu da caní. Ben da naca xlátaje, ne bzua

cuinu' lu na' Dios, ne guxeajlí lazre' Cristo, ne bzri'i Le', ne guca zren lazre', ne dxexruj lazre'. ¹² Gudíl-lale da xriwe', guchínenu' xel-la dxeajlí lazre' chiu'. Bexru tipa xel-la nabán da chadía chacanna lawe' da bláwizra Dios lue' chee gapu' da nigá, na' ba blé'enu' ca dxeajlí lazru' Cristo láwela zane' benne' dxelexechebe' chee na. ¹³ Na'a, lau Dios, Bènea' nuzúe' xel-la nabán chee xúgute da naca ban, ne lau Jesucristo, Bènea' cá'anqueze blé'ene' da naque', ne bechebe' chee na lau Poncio Pilato, dxenné xueda' lue'. ¹⁴ Guzú' dizra' ca da dxapa' lue', ne quebe gucha'u na. Dxalla' gunu' na chee quebe nu seque' bi nne chiu' ca zrin zra xelá' Xránadxu Jesucristo. ¹⁵ Ca zrin zra chee na Dios sel-le' Le'. Naque' Dios tu licha', na' Benne' Lá'azxa dxenná be'e. Naque' Wenná bea, Benne' dxenná be'ene' wenná bea ca', ne naque' Xrana xúgute benne' zaj naque' xrana bèneache. ¹⁶ Tuze Dios quebe gatie', ne zuē' lu xel-la naxaní naga quebe nu seque' cheaj. Netú bèneache quebe ne lé'ene' Le', ne quebe nu gaca le'e Le'. Chee Le' naca xel-la ba lánana, ne xel-la dxenná bea chadía chacanna. ¡Ca'an gaca na!

¹⁷ Gunné xue benne' zaj naque' gunní'a lu xezr la xu nigá chee quebe xulucá'ana szren cuine', ne quebe xuluxrén lazre' xel-la gunní'a chee', lawe' da quebe naca na da chadía chacanna. Dxal-la' xuluxrén lazre' Dios ban, Bènea' dxúnnale'e dxi'u xúgute da dxechínedxu chee sidxu da ba neza. ¹⁸ Gunné xue benne' caní xelune' da xrlátaje, ne xelaque' benne' gunní'a lu da xrlátaje da xelune', ne bi xulunézruje' benne' xache' ca', ne xulunézrujle'e na. ¹⁹ Caní gaca, xelezrué'ene' xel-la gunní'a da gaca na tu da guzúa chacha na le' lu zra da za za', ne xelape' xel-la nabán da zeajlí canna.

²⁰ Lue', Timoteo, bxue xanne da nuzúa Dios lu na'u. Quebe guzē' nagu' dizra'

xálaze chee xēzr la xu nigá, da na' dxe-
lenná bal-la benne' naca na xel-la sina.
Da nigá naca na da wen lazre'. ²¹Bal-

la benne' gulezí'e na, na' bulusanē' xel-
la dxeleajlí lazre' chee'. Dxenábeda' Dios
gunē' da chawe' chiu'. ¡Ca'an gaca na!

DIZRA' GUDXUPE' DA BZUAJ SAN PABLO CHEE TIMOTEO

Pablo dxugape' diuzre Timoteo

1 Neda', Pablo, naca' gubáz chee Jesucristo lawe' da guca lazre' Dios gaca' caní, chee cu'a lban ca naca xel-la nabán da guchebe lazre' Dios gunne' chee benne' ca' zaj naque' bi chee Jesucristo. ²Dxuzúaja' da nigá chiu' lue' Timoteo, bi chia' nazrí' lazra', na' dx-enaba' Xradxu Dios, ne Xránadxu Jesucristo guné' da chawe' chiu', ne xexache lazre' lue', ne gunne' chiu' xel-la dxebeza zri lazre'.

Pablo dxusízrene' Timoteo chee gunbe' zrin chee Cristo

³Te zra ne chizrela gate dxuchá-lajena' Dios, ne dxeajsá lazra' lue', dxápe-queza' Dios: Xcalenu', Bénnea' dxuna' zrin chee', ne quebe bi zua da dxagu na zria lu xichaj lázrdawa'. Dxuna' zrin na' ca belúnqueze xra xrtawa' ca'. ⁴Dxeajsá lázrqueza' ca gudxezru' gate na' bezá'a naga zu', ne dxaca lázrele'a xelé'eda' lue' chee gápale'a xel-la dxebé. ⁵Cá'anqueze dxeajsá lazra' xel-la dxeajlí lazre' li da napu'. Xrna'u gula, Loida, ne xrna'u, Eunice gulape' xel-la dxeajlí lazre' caní, na' nuxrén lazra' lue' nápaquezu' na.

⁶Chee le' na' dxuzéajni'ida' lue' guchí-nenu' ca da benna Dios lue' gate na' bzea' na'a xichju', ne gunaba' gun Dios da chawe' chiu'. ⁷Be' Lá'azxa benna Dios dxi'u quebe dxuné' dxi'u bi zra chebe, san dxunne' dxi'u xel-la wal-la, ne xel-la zri'i lazre', ne dxuné' dxi'u benne' dxenná be'e cuina. ⁸Chee le' na' quebe gapa stu' ca naca chee Xránadxu, ne cá'anqueze ca naca chia' neda', xu'a lizre xia nigá lawe' da dxuna' zrin chee Cristo, san bhaga lau lue' xel-la zi' da dxeledé benne' ca'

dxuluchálaje' dizra' chawe' chee Jesús, na' Dios gutípaqueze' lazru'. ⁹Dios bselé' dxi'u, ne bláwizre' dxi'u chee guzúa cuí-nadxu lu na' Le', quegá lawe' da bendxu tu da xrlátaje, san lawe' da guca lázre-queze Le' gaca na caní, ne lawe' da bzri'ine' dxi'u, nazrágadxu chee Cristo. Dios bzri'ine' dxi'u gate quebe ne gun-te' xezr la xu nigá, ¹⁰na' blé'ene' xel-la zri'i lazre' nigá na'a, lawe' da gusel-le' Jesucristo, weselá cheedxu, na' bzria xi'e xel-la dxenná bea chee xel-la gute, ne blé'ene' bénneache ca gaca xelexí' lu ne'e xel-la nabán chadía chacanna, ca dxennáqueze dizra' chawe' da dxuchálajdxu.

¹¹Dios bzué' neda' chee guchálaja' ca naca dizra' chawe' nigá, ne bene' neda' benne' gubáz chee' chee gusédeda' benne' quebe zaj naque' judío. ¹²Chee le' na' dxedéa' xel-la zi' caní. Quebe dxapa stu'a ne chee da nigá, lawe' da núnbe'a Bénnea' nuxrén lazra', ne nezda' nape' xel-la waca cu'u chawe' da nuzúa' lu ne'e ca zrindxa zra na'.

¹³Bexru tipa ca naca dizra' da bsédeda' lue', ne quebe gusanu' xel-la dxeajlí lazre', ne xel-la zri'i lazre' da nápadxu lawe' da nácadxu bi chee Jesucristo.

¹⁴Ne chee xel-la waca chee Be' Lá'azxa, Bénnea' zue' xichaj lázrdaudxu, bexru tipa da na' nuzúa Dios lu na'u.

¹⁵Ba nézenu' ca belún xúgute bi bíchedxu zaj zre'e naga nababa Asia. Gulebéaj xíchaje' neda'. Cá'anqueze Figelo, ne Hermógenes belune' tu zren benne' ca'. ¹⁶Dxenaba' Xránadxu xexache lazre' benne' zaj zre'e lizre Onesíforo. Gúcale le' neda' zane' lásaqueze, ne quebe gudapa stué' chia' neda', xu'a lizre xia. ¹⁷Gate ble'e xezre Roma, bexílaje' neda', na' bezrélene' neda'. ¹⁸Dxenaba' Xránadxu xexache lazre' le' lu zra ná' gate xelá' Le'. Ba nézenu' ca gúcalele'ene' dxi'u lu xezre Efeso.

**Benne' wen zrin du
lazre' chee Jesucristo**

2 Lue', zri'ina', guzé tipa ne chee da xrlátaje da nápadxu lawe' da nácadxu bi chee Jesucristo. ²Ca da bennu' bchálaja' lówela benne' zan, benne' belexechebe' naca na da li, bzua na lu na' benne' zaj naque' li lazre', benne' xezezéquene' xulusédene' na benne' xula.

³Lue' dxal-la' gacu' benne' wen zrin du lazre' chee Jesucristo, guchaga lau' xel-la zi' ca tu benne' zeje' wedil-la. ⁴Netú benne' zeje' wedil-la, benne' xu'e lu zrin chee xrane', quebe dxune' zrin xula, lawe' da dxaca lazre' xezaca ba lazre' xrane' chie'. ⁵Cá'anqueze, benne' xu'e lu witaj quebe zrue'ene' da xexale' che quebe quitaje' ca naca chee na. ⁶Cá'anqueze benne' dxaza dxa'ana, benne' dxúnle'e zrin, dxal-la' xezi' lu ne'e lina chee'. ⁷Blaba lazre' ca da dxapa' lue', na' Xránadxu guzėjni'ine' lue' xúgute na.

⁸Bsa lazre' ca naca chee Jesucristo, guque' xrtia David, ne bebane' ládujla benne' gate, ca dxenná dizra' chawe' da dxuchálaja' neda'. ⁹Ne chee dizra' chawe' nigá dxedéa' xel-la zi', ne xu'a lizre xia nigá ca tu benne' wen da zrin-naj, san dizra' chee Dios quebe nu seque' cu'u le na lizre xia. ¹⁰Chee le na' xúgute da ca' dxuchaga lawa' ne chee benne' ca' ba guc'a Dios le', chee cá'anqueze benne' ca' xelexé' ne chee Jesucristo, ne xelexé' lu xabáa chadía chacanna.

¹¹Da nigá naca na da li:
Che nuzúa cuínadxu gátedxu ca bzua cuina Le',
cá'anqueze waca bandxu nen Le'.

¹²Che dxededxu xel-la zi',
na' nna béaquezdxu tu zren nen Le'.
Che quebe xechébedxu nácadxu bi chee Le',
cá'anqueze Le' quebe xechébe' nácadxu bi chee'.

¹³Che dxi'u quebe nácadxu li lazre',
Le' nácaqueze' li lazre'.
Dios québequeze guché'e ca naque'.

Tu benne' wen zrin du lazre'

¹⁴Bsa lazre' bi bíchedxu ca', ne bsizre le' lu La Xránadxu québedxa xulutil-la dizra' ljwezre'. Xel-la dxutil-la dizra ljwezre quebe bi culuén napa na, san dxuxrinnaj na xichaj lárzdau benne' ca' dxelénne' na. ¹⁵Ben ba xuzre gacu' wen zrin du lazre' lau Dios, na' quebe gaca xel-la stu' chiu', lawe' da dxuchínenu' xrlátaje dizra' li. ¹⁶Quebe gulapa na'u dizra' xálaze, ne dizra' sban da dxuluchálajze bénneache, da ca' dxulucuasa na bénneache lu da naca chee Dios. ¹⁷Dizra' sban caní dxuluxrinnaj na xichaj lárzdau bénneache ca dxun tu we' da dxuzru na lu bel-la' dxen cheedxu. Caní guca chee Himeneo, ne Fileto, ¹⁸benne' ca' gulecuase' lu xel-la li, na' dxelenné' ba belexebán benne' gate, na' dxuluxrinnaje' xel-la dxeajlí lazre' chee bal-la benne'. ¹⁹Dios ba gudixruj bi'e xrtizre' da naca na ca tu lane xu'u chee xel-la dxeajlí lazre' cheedxu, da dxenná caní: Xránadxu núnbe'e bi chie' ca' Cá'anqueze dxenná na: Xúgute bi ca' chee Cristo québedxa dxal-la' xelune' da calela.

²⁰Tu lu xu'u zaca, quegá zra' tuze zriga xé'ena da zaj naca na oro ne plata, san cá'anqueze zaj zra' da zaj naca na xiaj ne xu. Dxuluchínene' da ca' zaj zácadxa lu da zaca, na' xezícadxa da ca' dxuluchínene' ájateze. ²¹Nácadxu ca zriga xé'ena ca'. Che nu benne' dxaca lazre' gaque' ca tu da zaca, chee gaque' benne' guchine Xránadxu lu zrin xrlátaje chee', dxal-la' xexadxe' ca naca da calela ca'.

²²Bxue xanne' cuinu' ca zaj naca da ca' dxelezá lazre' benne' cuide' ca', ne quebe gusanu' da xrlátaje da dxunu', ne ca dxeajlí lazru' Cristo, ne ca nazri'inu' Le', ne ca dxebeza zri lazru', da ca' dxunu' tu zren nen xúgute benne' ca' du

lazre' dxululáwizre' Xránadxu. ²³Quebe gulapa na'u dizra' xálaze, ne dizra' quebe zeaj xrlátaje, lawe' da nézenu' dxuluzúa na bèneache lu da ba xa'.

²⁴Benne' wen zrin chee Xránadxu:

Quebe dxal-la' tíl-lalene' benne'.

Dxal-la' gaque' zri'i lazre' nen xúgute bèneache.

Dxal-la' gaque' benne' dxezeque' gusé-dene' bèneache.

Dxal-la' gaque' zren lazre',

²⁵ne dutę xel-la dxexruj lazre' gusízrene' benne' dxelune' da calela.

Caní dxal-la' gunę' che ba benla Dios xelexeáje lazre' benne' ca chee xelúnbe'e da li, ²⁶na' xelelé' lu xralaj chee da xriwe', naga nuzrá na le', na' dxelune' ca da dxenná le' na.

Ca xelaca bèneache lu zra bzębe

3 Cá'anqueze dxal-la' nézele lu zra bzębe ni' gaca na sębe chee bèneache. ²Bèneache ca' xelaque': Benne' xelezrí'ize cuina, ne xelezrí'ine' dumí.

Xulucá'ana szren cuine', ne xulucá'ana cuine' ca benne' blau ca'. Xelenné' schanni' chee Dios, ne quebe xuluzúe' dizra' chee xra xrne'e.

Xelaque' benne' quebe dxelezí le, ne benne' quebe dxelapa ba lá'ana Dios.

³Quebe xelaque' zri'i lazre', ne quebe xelexexache lazre' ljwezre'.

Xelenné' chee ljwezre', ne quebe xelenná be'e cuine'.

Xelaque' benne' snia ca', ne xuluzúe' chalá'ala da naca xrlátaje.

⁴Quebe xelaque' li lazre' nen ljwezre'.

Xelaque' benne' dxelexube.

Xeléquene' zaj naque' benne' szrente.

Xelexezaca ba lázredxene' da ca' dxeledánene' quézcala da naca chee Dios.

⁵Lácala xululé'e cuine' ca benne' zaj naque' chee Dios, quebe súale le' xel-la waca chee Dios.

Quebe gunu' tu zren benne' ca'. ⁶Ca zaj naca benne' caní zaj naca benne' ca' zjaque' tu tu xu'u, ne dxelezí xe'e nu'ula quebe zaj zie' du lazre', ne zaj zua da dxagu na zria lázrdawe' da naca chee xtul-le'. Xel-la dxelezá lazre' chee nu'ula caní nazrube xu na le'. ⁷Lácala tu dxulusédezqueze' chee xel-la li, cabata' dxelėjni'iquezne' na. ⁸Ca belún Janes ne Jambres, benne' wazrá' ca', benne' ca' guledábague' Moisés, cá'anqueze dxelún benne' caní, dxeledábague' xel-la li. Zaj nazrinnaj xichaj lázrdawe', ne belexeuase' lu xel-la dxeajlí lazre' chee Dios. ⁹Quebe bi xelezrué'e benne' caní, lawe' da xelexe bé'equeze xúgute bèneache zaj naque' benne' xálaze, ca gulaca benne' chupa ca' guledábague' Moisés.

Da bzębe da dxusebaga Pablo Timoteo

¹⁰Ba benu':

Ca da bzęajni'ida' bèneache, ne blé'eqeznu' ca bęneze'a'.

Nézenu' da dxaca lazra' guna', ne ca dx-eajlí lazra' Cristo.

Bchaga lawa' da guzaca', ne nazrí'ida' xúgute bèneache.

Nézenu' ca naca xel-la zren lazre' chia'.

¹¹Blé'enu' ca guláu zi' xuzre' neda', ne ca gudéa' xel-la zi'.

Nézenu' xúgute da guzraca' lu xęzre Antioquía, ne xęzre Iconio, ne xęzre Litra.

Guláu zi' xuzre benne' ca' neda', na' Xránadxu bselé' neda' lu xúgute da ca'.

¹²Xúgute benne' ca', benne' dxelaca lazre' xelúnqueze' ca da dxenná Jesucristo, weláu zi' xúzrequeze bèneache le'. ¹³Benne' ca' dxelune' da calela, ne benne' dxelezí xe'e welúndxaqueze' da calela. Xelez' xe'e bèneache, na' benne' xula xelez' xe'e benne' caní.

¹⁴Lue', guzé chacha ca da ba naxéajni'inu', da na' nuxrén lazru'. Nézqueznu'

nu bseḁe lue', ¹⁵ na' ne nácateu' bíḁau'te ba núnbe'u da dxenná lu xiche lá'azxa, da dxezeque na guzéajni'i na lue', chee lau' lawe' da dxeajlí lazru' Jesucristo. ¹⁶ Xúgute da naxúaj na lu xiche lá'azxa naca na da bzéajni'i Dios benne' ca' zaj naque' bi chee Le', ne naca na da dxuzéajni'i na dxi'u, ne da dxedil-la na benne' dxelune' da calela, ne da dxusizre na dxi'u, ne da dxulé'e na dxi'u ca dxal-la' gundxu da xrlátaje, ¹⁷ chee gaca du lazre' bi chee Dios, na' gácabe' bi nazéde xanne chee gunbe' xúgute da xrlátaje.

4 Lau Dios, ne lau Xránadxu Jesucristo, Bénnea' guchi'e chee benne' ban ca', ne chee benne' gate ca' gate ze'e xedajnná be'e, dxusebaga' lue' ² guchálaju' dizra' chee Dios, ne gunu' ba xuzre guchálaju' che xuluzé naga bèneache, ca xuluzé nague'. Bzéajni'i benne' ca' duté xel-la zren lazre' chiu', ne ble'e le' ca da zaj nabague'. Gudil-la, ne bsizre benne' ca'. ³ Caní dxal-la' gunu' lawe' da wazrín zra québedxa xuluzé naga bèneache chee xel-la li da dxusédedxu. Ca dxelezá lázrqueze le', xulunné' zane' benne' xulusédene' le' ca da dxelaca lázreze le' xelenne'. ⁴ Québedxa xuluzé nague' da li. Wuluzé nague' dizra' da dxuluzaze bèneache. ⁵ Na' lue', bzéajni'i cuinu' lu xúgute da caní. Bchaga lau xel-la zi' da teu'. Bzua cuinu' chee guchálaju' dizra' chawe' chee Cristo, ne ben zrin da nabagu' chee Cristo.

⁶ Ba bzrin zra guzúa' xel-la nabán chia' lu na' Dios, lawe' da ba zua bagu xelutie' neda'. ⁷ Du lazra' gudábaga' benne' ca' guledábague' da naca chee Cristo. Tu bénezqueza' ca naca da li chee', ne ba bexuzre bena' da bsebaga Cristo neda' guna'. ⁸ Lawe' da bena' da xrlátaje, na'a ba dxebeza da dxexala' neda', da na' gunna Xránadxu neda' lu zra na', ne quegá tuza' neda' gunne' na. Cá'anqueze gunézruje'

na chee benne' ca' duté xel-la zri'i lazre' chee' dxelebeze' zra xelélé'e.

Pablo dxulé'ene' Timoteo ca dxal-la' gunbe'

⁹ Ben ba xuzre xídazeu' xedajnná'u neda'. ¹⁰ Ba guleaj xichaj Demas neda' lawe' da dxedánedxabe' da naca chee xezr la xu nigá, ne ba zexíajbe' Tesalónica. Crescente ba gusel-la'-be' zexíajbe' naga nababa Galacia, na' Tito gusel-la'-be' naga nababa Dalmacia. ¹¹ Tuze Lucas zúalebe' neda'. Bexilaj Marcos, na' guché'-be' tu zrén len lue', lawe' da wazéquebe' gácalebe' neda' lu zrin chee Cristo. ¹² Tíquico gusel-la'-be' lu xezre Efeso. ¹³ Gate xidu', gúagu' gabán chia' da nucá'ana' xezre Troas lizre Carpo. Cá'anqueze gu'u xiche ca' bcá'ana' ga na', ne da dxunte na ba xen gu'u xiche ca' zaj naca na xide.

¹⁴ Alejandro, benne' gubizre xia bsaca' zí'le'e neda'. Xránadxu gunézruje' lazruj chee' ca da bene'. ¹⁵ Bxue xanne cuinu' chee benne' nigá lawe' da ba gudába-gale'e dizra' da dxuchálajdxu.

¹⁶ Da nedxu lasa gate becheba' ca naca chia' lau benne' xu'u lawe' ca', netú benne' quebe gúcalene' neda'. Xúgute' buluzá' xíchaje' neda'. ¹⁷ Gúcale Xránadxu neda', ne btipe' lazra' chee guzéqueda' bchálaja' dizra' chawe' lau xúgute' benne' ca' quebe zaj naque' judío. Ca'an guca bselá Xránadxu neda' lu na' benne' ca', ca dxun benne' dxuselé' béadu ca' lu dxu'a bezre xixre', ¹⁸ na' guseláqueze' neda' lu xúgute' da calela, ne guxúequeze' neda' ca zrin zra xezrina' xabáa naga dxenná bea Le'. ¡Gaca báqueze Le'! ¡Ca'an gaca na!

Benne' chee Cristo dxulugapa diuzre ljwezre'

¹⁹ Dxugapa' diuzre Priscila, ne Aquilo, ne benne' zaj zra' lizre Onesíforo. ²⁰ Erasto begá'anabe' xezre Corinto, na'

bcá'ana' Trófimo lu xezre Mileto lawe' da quebe chawe' zúabe'. ²¹ Ben ba xuzre xidu' nigá dxácatę quebe ne chú'udxu beu' zaga. Eubulo, ne Pudente, ne Lino, ne Claudia, ne xúgutę bi bíchedxu zaj zre'ę nigá dxulugape' lue' diuzre.

²² Dxenaba' Xránadxu Jesucristo súalęne' lue', ne dxenaba' Dios gunę' da chawe' cheę xúgutęle le'e. ¡Ca'an gacana!

DIZRA' DA BZUAJ SAN PABLO CHEE TITO

Pablo dxugape' Tito diuzre

1 Neda', Pablo, naca' wen zrin chee Dios, ne gubáz chee Jesucristo chee guzéajni'ida' benne' ca' ba gucá'a Dios chee xelejálí lazre' Cristo, ne xelúnbe'e da naca li lazre' chee da naca chee Dios, ²ne chee xelebeza lazre' xel-la nabán chadía chacanna, da guchebe lazre' Dios gunne' cheedxu gate za gunte' xezr la xu nigá. Dios quebe dxun lazre', ³na' na'a, ca ba bzrin zra chee na, ba bzéajni'ine' dxi'u ca naca xrtizre' ne chee da bxrize' Dios neda' cu'a lban chee na. Dios nácaqueze' weselá cheedxu. ⁴Dxuzúaja' da nigá chiu', Tito. Nacu' ca zrí'inequeza' lawe' da dxeajlí lázredxu Cristo. Dxenaba' lau Xradxu Dios, ne lau Xránadxu Jesucristo, Benne' weselá cheedxu, guné' chiu' da cháwedau', ne xexache lazre' lue', ne gunne' lue' xel-la dxebeza zri lazre'.

Zrin da dxun Tito lu xezr la xu Creta

⁵Bcá'ana' lue' lu xezr la xu Creta da naxechaj nisa chee gucá'ana chawu' da quebe begá'ana chawe' ládujla bíchedu ca', ne chee gunnitu' benne' gula chee xudau' tu tu xézredu ca', cáteze bxríseda' lue' gunu'. ⁶Tu benne' gula chee xudau': Dخال-la' gaque' benne' quebe bi zua da gagu na chie'.

Dخال-la' súalene' tuze nu'ula.

Zrí'ine' dxal-la' xelácabe' bi ba dxéajlí lázrebe' Cristo.

Quebe bi da zrinnaj dxelún zrí'ine' ca', ne quebe gaca nu gagu zria chee da dxelunbe'.

⁷Lawe' da xu'u lu ne'e zrin chee Dios, tu benne' dxuxúe' benne' zaj nababe' chee Cristo:

Dخال-la' gaque' benne' quebe bi zua da gagu na zria chee'.

Quebe dxal-la' gaque' benne' dxucá'ana szren cuine'.

Quebe dxal-la' gaque' benne' xichaj zra'a.

Quebe dxal-la' gaque' benne' dxé'aje' da dxuzuzre na le'.

Quebe dxal-la' gaque' benne' dxedíl-lalene' bénneache.

Quebe dxal-la' gaque' benne' dxucúdee'.

⁸Dخال-la' súateze' si' lu ne'e benne' zjaque' lizre'.

Dخال-la' guné' da naca cháwedau'.

Dخال-la' gaque' benne' nna be'e cuine'.

Dخال-la' gaque' benne' xrlátaje.

Dخال-la' gaque' benne' nuzúa cuine' chee Dios.

Dخال-la' gaque' benne' dxuzéajni'i cuine'.

⁹Dخال-la' gaque' benne' nuzúa cuine' chee dizra' li.

Dizra' li naca na da bsede nu benne' le' chee séquene' gusízrene' benne' xubla ne chee da li da dxusédene', ne chee séquene' guzexruje' lazre' benne' ca' dxelenné' chee da li na'.

¹⁰Caní dxal-la' guné' lawe' da zrále'e benne' dxelenné' chee dizra' li, benne' dxelezí xe'e benne' xubla lu da xala da dxlenné'. Zane' benne' Israel dxelune' caní. ¹¹Dخال-la' guzúa zriu' benne' dxelune' da caní lawe' da dxuluxrínnaje' xichaj lázxdau xúgute' benne' zaj zra' tu tu xu'u naga dxelú'e chee xulusédene' da quebe naca xrlátaje. Dxelune' caní chee xelez' lu ne'e dumí. Da nigá da dxelune' naca na da calēla.

¹²Tu benne' Creta naga zu', benne' gunné' waláz chee xudau' chee benne' ca', gunné': "Benne' Creta zaj nácaqueze' wen lazre', ne zaj naque' ca be snia ca', ne zaj naque' benne' wagu xrata', ne zrawede." ¹³Da li gunné'. Chee le' na' gudíl-laqueze benne' ca' chee xelaque' li lazre' ca dxelejálí lazre' Cristo, ¹⁴ne chee quebe xuluzé nague' dizra' da dxuluzaze benne' Israel ca', ne ca naca da nadxiruj

bea ca' da dxelún benne' ca' dxuluzúe' chalá'ala dizra' li.

¹⁵Xúgute naca na xrlátaje chee benne' ca' zaj naca xrlátaje xichaj lázrdawe', san chee benne' ca' dxelune' da sban, ne québedxa dxeléajle'e chee Cristo, quebe bi de da naca xrlátaje. Zaj nazrinnaj xichaj lázrdawe'. ¹⁶Benne' caní dxelenné' zaj núnbe'ene' Dios, san da dxelune' dxulé'e na quebe naca da li da dxelenné'. Zaj naque' benne' wen da sban, ne benne' wen da calela, ne quebe xelezéquene' xelune' tu da xrlátaje.

2 Dxal-la' guchálaju' da ca' dxusede na dxi'u da naca li.

²Benne' gula chee xudau':

Dxal-la' xelaque' benne' dxelenná bé'e cuine'.

Dxal-la' xelaque' benne' du lazre'.

Dxal-la' xelaque' benne' dxuluzéajni'i cuine'.

Dxal-la' xelaque' li lazre' ca dxleajlí lazre' Cristo,

ne ca zaj nazrí'ine' Le',

ne ca naca xel-la zren lazre' chee'.

³Cá'aqueze nu'ula gula ca' chee xudau':

Dxal-la' dxelapa ba lánana Dios ca naca xúgute da dxelune'.

Quebe dxal-la' xelaque' benne' dxulutupe' dizra' bizruj.

Quebe dxal-la' xelaque' benne' dxelé'aje' da xuzuzre na le'.

Dxal-la' xulusédené' da naca xrlataje

⁴chee gaca xulusédené' nu'ula cuide' ca' chee xelezrí'ine' benne' chee' ca', ne zrí'ine' ca',

⁵ne chee xelenná be'e cuine',

ne xelaque' du lazre',

ne xulupe'e lizre',

ne xuluzúe' dizra' chee benne' chee'.

Caní dxal-la' xelune' chee quebe nu nne' schanní' chee xrtizra' Dios.

⁶Cá'aqueze bsizre bi cuide' ca' chee xelenná be'e cuínabe'. ⁷Ca naca da xrlátaje dxunu' lue' dxal-la' gulé'e na benne'

ca' ca dxal-la' xelune'. Gate dxusédenu' benne' ca' dxal-la' gacu' li lazre', ne du lazre'. ⁸Dxal-la' guchálaju' da naca li lazre' chee quebe nu seque' si tizra le' na. Che gunu' caní, na' che nu benne' nnie' chee, wedué'equezne', lawe' da quebe sua tu da calela da dxunle.

⁹Bzéajni'i benne' ca' zaj nada'u chee xuluzúe' dizra' chee xrane' ca naca xúgute da xelé xrane' le'. Dxal-la' xelune' da xelexezaca ba lazre' xrane', ne quebe xelexenné' lau xrane'. ¹⁰Quebe dxal-la' xelexane' da naca chee xrane', san dxal-la' xelaque' li lazre', chee xelexé'e benne' ca da dxelún benne' caní, na' xelenné' chawe' chee xrtizra' Dios, Benne' weselá cheedxu.

¹¹Dios ba blé'ene' ca naca da chawe' chee' chee xelexá xúgute bénneache.

¹²Da xrlátaje chee Dios dxusede na dxi'u chee québedxa gundxu da calela, ne ca naca xel-la dxezá lazre' da calela, san chee nna be'e cuínadxu, ne gácadxu du lazre', ne gápadxu ba lánana Dios lu xezr la xu nigá ¹³dxácaté ne dxebézadxu zra xelá' Dios szren, ne weselá cheedxu Jesuscristo nen xel-la szren chee', da na' dxebeza lázredxu. ¹⁴Le' bzua cuine' lu na' benne' ca' belútie' Le' waláz cheedxu dxi'u chee bselé' dxi'u lu xúgute da zrinaj, na' bca'ana chawe' dxi'u chee gácadxu bi cheéqueze', ne chee gundxu da xrlátaje du lázredxu.

¹⁵Da caní dxal-la' gusédenu' benne' ca'. Gudil-la benne' ca', ne bsizre-ne' duté xel-la dxenná bea chiu'. Quebe bi da calela gunu' chee quebe nu si tizra lue'.

Da dxal-la' xelún benne' zaj nababé' chee Cristo

3 Bsa lazre' benne' bíchedxu ca' chee xelune' ca dxuluchixruj benne' ca' dxelenná bé'ene', ne benne' xu'u lawe', ne chee xuluzúe' dizra' chee benne' ca', ne chee xelezúe' xelune' xúgute da xrlátaje. ²Quebe dxal-la' xelenné' chee nu benne',

san dxal-la' xelaque' zren lazre', ne zri'i lazre', ne dxexruj lazre' lau xúgute bèneache. ³ Cá'anqueze dxi'u gate nate gúcadxu benne' xala, ne quebe bzúadxu dizra' chee Dios. Gudadxu calēla, na' gunná be'e be'la' dxen cheedxu dxi'u, chee bendxu ca naca xúgute da guzá lázredxu, ne da bezaca ba lázredxu. Bendxu da zrinnaj, ne gúcadxu xa lazre'. Belecuide bèneache dxi'u, na' b'zrá'adxu l'wézredxu tudxu xetudxu. ⁴ Gate Dios, weselá cheedxu, blé'ene' da naca chawe' chee', ne xel-la zri'i lazre' chee', ⁵ na' bselé' dxi'u, quegá lawe' da bendxu dxi'u tu da xrlátaje, san lawe' da bexache lazre' dxi'u. Bselé' dxi'u ne chee da gudibe na dxi'u gate na' bexálajdxu, na' bucube Be' Lá'azxa chee' dxi'u. ⁶ Ne chee Jesucristo, weselá cheedxu, Dios ba nún-nalē'e dxi'u Be' Lá'azxa chee', ⁷ chee ne chee da naca chawe' chee' gácadxu xrlátaje lau Le', ne zrué'edxu xel-la nabán chadía chacanna da dxebeza lázredxu. ⁸ Da caní zaj naca na da li. Dxaca lazra' gusízrequeznu' benne' ca' ca naca da caní chee xelebé' gunne xue xelún benne' ca' da chawe', benne' ca' dxeléajle'e chee Dios. Da caní zaj naca na da xrlátaje, ne da gaca xuluchine xúgute bèneache. ⁹ Quebe gulapa na'u dizra' xala ca', ne dizra' dxuluzaze bèneache ca naca chee zra xrtawe', ne dizra' da dxun na bèn-

neache chupa la'a, ne da dxulutil-la bèneache da naca chee da bchixruj be'e Moisés. Da caní quebe culuén zaj napa na. Dácheze naca na.

¹⁰ Che nu benne' dxune' le'e chupa la'a, bsizre-ne' tu chupa lasa, ne che quebe dxenne' ca dxu'u le', bebéaje' ládujla le'e ¹¹ lawe' da nézenu' nazrinnaj xichaj lázxdau benne' caní, na' dul-la dxelúnqueze' ba nuzría xi na le'.

Da dxal-la' gun Tito

¹² Gate sel-la' Artemas u Tíquico naga zu', ben baxuzre xidu' xedajna'u neda' lu xezre Nicopolis lawe' da bache nuna' sua' nigá beu' zaga ca'. ¹³ Gúcale Zenas, benne' wedé dizra', ne Apolos, ca da séquenu'. Bnezruj benne' ca' ca da zaj nachínene' chee chjaque' lu neza chee', na' quebe bi xelexázejne'. ¹⁴ Cá'anqueze benne' zaj nabábalene' dxi'u dxal-la' xulusédie' xelune' da chawe', chee xelácalene' benne' dxelexázejne', chee xelaque' benne' guchine Cristo.

Pablo dxuzé' Tito dizra'

¹⁵ Xúgute benne' zralene' neda' dxulugape' lue' diuzre. Bgape diuzre benne' ca' zaj nazr'ine' dxi'u lu da naca chee Cristo. Dxenaba' Dios gun chawe'e xúgutele le'e. ¡Ca'an gaca na!

DIZRA' BZUAJ SAN PABLO CHEE' FILEMÓN

Pablo dxugape' diuzre Filemón

1 Neda', Pablo, xu'a lizre xia lawe' da dxuna' zrin chee Jesucristo, nen bi bíchedxu Timoteo. Dxugápantu' lue' diuzre, Filemón, benne' nazrí'ite lázrentu'. Nacu' bi ljwézrentu' lu zrin chee Cristo. ²Dxugapa' diuzre benne' bíchedxu ca' dxelezague' lizru', ne nu'ula zandxu Apia, ne Arquipo, bi ljwézredxu nácabe' benne' zeje' wedil-la chee Cristo. ³Dxenaba' Xradxu Dios ne Xránadxu Jesucristo gunē' da chawe' cheele, ne gunne' le'e xel-la' dxebeza zri lazre'.

Ca naca chee' Filemón

⁴Dxápequeza' Dios xcalenu' gate dxuchálajlęna' Le' ne dxeajsá lázrqueza' lue', ⁵lawe' da ba benda' ca nazrí'inu' Xránadxu Jesucristo ne ca dxeajlí lazru' Le', ne ca nazrí'inu' xúgute' bi ca' chee Dios. ⁶Dxenaba' lau Dios guzéajni'ine' benne' ca' dxeleajlí lazre' Le' ne chee xel-la' dxeajlí lazre' chiu', ca naca xúgute' da chawe' ca' da nápadxu ne chee Jesucristo. ⁷Xel-la' zri'i lazre' chiu', bi bicha', dxúnnałe'e na neda' xel-la' dxebé, ne dxutipa na lazra', ca dxutipa na lazre' xúgute' bi chee Dios.

Pablo dxenabe' Filemón tu da gunē' chee Onésimo, bi na'u Filemón

⁸Chee' le' na', lácala xu'u lu na'a nna be'eda' lue' ca dxal-la' gunu' lawe' da naca' gubáz chee Cristo, ⁹dxata' xúeda' lue' lu xel-la' zri'i lazre' cheedxu, neda', Pablo, benne' gula, ne xu'a lizre xia lawe' da dxuna' zrin chee Cristo. ¹⁰Dxata' xúeda' lue' tu da gunu' chee Onésimo, bi nácabe' ca zrí'inequeza' lu da naca chee Cristo, neda', xu'a lizre xia nigá.

¹¹Gate nate Onésimo, bi na'u lue' gúcabe' tu bi wen da calęla, san na'a nácabe' wen zrin li lazre' chiu' lue', ne chia' neda'. ¹²Dxesel-la'-be' naga zu'. Bezí' lu na'u-be', nácabe' bi nazrí'ite lazra'. ¹³Guzá lazra' neda' xegá'analebe' neda' nigá chee gunbe' zrin chia' neda' waláz chiu' lue' dxácatę ne xu'a lizre xia lawe' da dxuna' zrin chee dizra' chawe'. ¹⁴Quebe dxaca lazra' bi guna' che quebe naca na da mnau' lue', chee gácalęnu' neda' lawe' da naca na ca dxaca lazru' lue', ne quegá lawe' da dxenná be'eda' lue'. ¹⁵Becuasa Onésimo nen lue' tu chí'idau', san na'a súałętequezebe' lue', ¹⁶quegá ca tu bi na'u lue', san gácabe' tu bi cháwedxa ca tu bi na'u lue', da zéaje na, gácabe' tu bi bichu' nazrí'ite lazru'. Neda' nazrí'ile'ęda'-be', san lue' dxal-la' zrí'idxenu'-be', quegaze ca bėnneacheze, san cá'anqueze ca bi bíchedxu, bi chee Cristo.

¹⁷Chee' le' na', che dxėquenu' neda' ca bi ljwezru', bezí' lu na'u-be' ca dxezí' lu na'u neda'. ¹⁸Che bi da calęla ba benbe' chiu', u che bi dxál-labe' chiu', neda' quízruja' na. ¹⁹Neda', Pablo, dxuzúaja' da nigá nen ná'aqueza': Neda' quízruja' na, lácala neda' la gusá'a lazru' lue' dxál-laquezu' chia' cuínquezu'. ²⁰Lue', bi bicha', dxata' xúeda' lue' lu La Xránadxu, ben da guzúia na neda' lu da ba neza.

²¹Dxuzúaja' chiu' lawe' da nuxrėn lazra' gunu' ca da dxapa' lue', ne nezda' gundxu' ca da dxenaba' lue'. ²²Cá'anqueze bceuzę latja naga sua' neda' lawe' da dxebeza lazra' gun Dios da dxenábale Le', gunne' neda' lataj xida' xedajnná'a le'e.

Bi chee Cristo dxulugápabe' diuzre Filemón

²³Epafras, bi ljwezra', xú'ulębe' neda' lizre xia lawe' da dxunbe' zrin chee Jesucristo, ²⁴ne Marcos, ne Aristarco, ne Demas, ne Lucas, bi ca' dxelácalębe' neda'

lu zrin chee Cristo dxulugápabe' lue'
diuzre.

²⁵Dxenaba' lau Xránadxu Jesucristo
gunē' da chawe' cheele le'e. Ca'an gaca
na.

DIZRA' DA NAZÚAJ CHEE BENNE' HEBREO CA'

Dios ba bchálajlęne' dxi'u lu dxu'a Zrí'inequeze'

1 Dios bchálajlęne' xra xrtáudxu ca' gate nate zane' lasa, ne zane' ca bchálaję' lu dxu'a benne' ca' buluchálaję' waláz chee'. ²Na'a, lu zra caní, Dios ba bchálajlęne' dxi'u lu dxu'a Zrí'inequeze'. Dios bene' xęzr la xu nigá lu na' Zrí'ine' nigá, ne ba bene' naca chee' xúgute da ca' bene'. ³Zrí'ine Dios nigá naque' Benne' dxulęne' ca naca xel-la' szren chee Dios, ne naque' ca da nácaqueze Dios, na' nuxre' xúgute da ca' nune', dxuchínene' dizra' chee' da nápalę'e na xel-la' waca. Gate ba gudúę' dul-la da nabágadxu xea-jxedxę'e chalá'a xabęla chee lataj blau chee Dios xabáa.

Zrí'ine Dios nácadxę' blau ca gubáz chee xabáa ca'

⁴Zrí'ine Dios nácadxę' blau ca gubáz chee xabáa ca' chee Dios, ca naca La Cristo da bzua Dios, nácadxa na blau ca la gubáz chee xabáa ca'. ⁵Dios cabata' guzre' tu gubáz chee xabáa ca guzre' Cristo, gunné':

Lue' nacu' Zrí'ina'.

Neda' nácaqueza' Xrau' na'a zra.

Cá'anqueze cabata' guzre' tu gubáz chee xabáa ca gunné' chee Cristo:

Neda' gaca' Xre',

na' Le' gaque' Zrí'ina'.

⁶Gate bzue' Zrí'ine' lu xęzr la xu nigá, gunné':

Xúgute gubáz chee xabáa ca' xelue lá'ane' Le'.

⁷Ca naca chee gubáz chee xabáa ca', Dios gunné':

Dsel-le' gubáz chee' ca' ca tu be' da dxaca,

ne dxuchínene' gubáz wen zrin chee' ca' ca tu xi'.

⁸Ca naca chee Zrí'ine', gunná Dios:

Lataj blau chiu' lue', Dios, zúatequeze.

Xel-la' dxenná bea chiu' naca na xlátaję.

⁹Nazrí'inu' da xlátaję, ne dxezra'u da calela.

Chee le na' Dios chiu' ba bęnnadxe' Lue' xel-la dxebe' ca da bnęzruje' bi ljwezru' ca'.

¹⁰Cá'anqueze guzre' Le':

Lue', Xran, nédxudautę benu' xęzr la xu. Nen xel-la' waca chiu' benu' xabáa.

¹¹Da caní weledé chee na, san Lue' súatequezu'.

Xúgute da caní welaca gula ca zra lana bęnneache.

¹²Na' xutubu' na ca tu ladxe',

ne gucha'u na ca dxun tu benne' dxuchę'e zra lanę'.

Lue' zúaquezu' chadía chacanna, na' xel-la' nabán chiu' quebe téqueze chee na.

¹³Dios cabata' guzre' tu gubáz chee xabáa ca guzre' Zrí'ine', gunné':

Gudxe'e chalá'a xabęla chia',

cadxa guzúa' benne' ca' dxeledábague' Lue' zran ni'u.

¹⁴Xúgute gubáz chee xabáa ca' zaj naque' be' ca' dxelún zrin chee Dios, na' dxelele' gubáz chee xabáa ca' chee xelá-calęne' benne' ca' dxelezi'e xel-la' weselá.

Quebe dxal-la' guzúadxu chalá'ala xel-la' weselá

2 Chee le na' dxal-la' nna' xánnedxu dizra' da ba bendxu chee quebe cuásadxu lu neza chee xel-la' li. ²Dizra' da gusel-la Dios gate nate lu na' gubáz chee xabáa ca' guca na li lazre', na' xúgute benne' ca' buluzúę' na chalá'ala, ne quebe buluzúę' dizra' ca da gunná Dios, Dios bdeę' le' xel-la' zi' ca da dxal-la' xelezi'e. ³¿Ajzra gaca ladxu che guzúadxu chalá'ala tu xel-la' weselá zren caní? Xránaquezdxu bchálaję' chee xel-

la' weselá nigá nédxute, na' gudé na' buluchálaj benne' ca' belenne' na, na' gulenné' naca na da li laudxu dxi'u. ⁴Cá'anqueze ba bzua chacha Dios na ne chee da dxelunna bea na, ne ne chee da zren ca' ben Dios, ne ne chee xel-la' waca zan ca', ne ne chee Be' Lá'azxa, Bénnea' benne' dxi'u xel-la' waca ca', ca da guca lázrequeze Le'.

Jesucristo ben cuine' ca nácadxu dxi'u

⁵Dios quebe bzue' lu na' gubáz chee xabáa ca' xezr la xu da za za', chee da na' dxuchálajdxu na'a. ⁶Naca na ca naxúaj na lu xiche lá'azxa, ca da gunná tu benne':

¿Ájazra naca bénneache che Lue', Dios, dxeajsá lazru' chee'?

¿Ájazra naca bénneache, che Lue' dxe'u gunne xue chee le'?

⁷Tu chí'idau'ze bzu' bénneache látezdxu ca gubáz chee xabáa ca'.

Nunu' chee' si'e xel-la' szren, ne xel-la' ba lá'ana,

ne bzu' lu ne'e xúgute da benu'.

⁸Xúgute ba bzu' na zran ni'a le'.

Caní naca, gate Dios bzue' xúgute zran ni'a bénneache, quebe bi de da quebe guzúa na dizra' chee bénneache, na' quebe ne xuluzúa ca naca da ca' dizra' chee'. ⁹Na'a dxelé'edxu Jesús, Bénnea' bzua Dios guque' tu chí'idau' látezdxu ca gubáz chee xabáa ca'. Dios gúnene' gate Jesús waláz chee xúgute bénneache lawe' da nazri'ine' bénneache, na' na'a nunézruje' Le' xel-la' szren, ne xel-la' ba lá'ana lawe' da gudée' lu xel-la' gute zi xa'.

¹⁰Dios bene' xúgute da zaj zua, na' zaj zua na chee gaca ba Le'. Le' dxaca lazre' xelezi' xúgute bi chee' ca naca xel-la' szren chee'. Chee le' na' ben na ba xen ben Dios naca Jesucristo duté weselá cheedxu, ne chee da zi' da xa' da gudée' chee séquene' guselé' bénneache chadía chacanna. ¹¹Benne' caní dxegúa Jesús

dul-la da zaj nabague', na' benne' caní, ne Léqueze' zaj naque' bi ca' chee tuze Xradxu. Chee le' na' quebe dxedué'e Jesús nne' chee benne' ca', zaj naque' bi biche'.

¹²Naca na ca dxenná lu xiche lá'azxa:

Guchálajqueza' da naca chiu' Lue' lávela bicha' ca',

na' gúl-laqueza' da güe lá'ana' Lue' ládujla benne' ca' zaj nazrague' lau Lue'.

¹³Cá'anqueze dxenná xiche lá'azxa:

Neda' guxrén lazra' Dios.

Cá'anqueze dxenná na:

Nigá zua' nen bi chia' ca', bi ca' benna Dios neda'.

¹⁴Lawe' da zaj naca bela' dxen benne' ca' zaj naque' bi chee', Le' ben cuine' bela' dxen chee guzéquene' gutie', ne caní bene' chee séquene' guzría xi'e da xriwe', da na' napa na xel-la' dxenná bea gute na bénneache. ¹⁵Caní guca bselé' xúgute benne' gulaque' ca benne' zaj nada'u xúgute iza zaj naca bané' lawe' da belezrebe' xel-la' gute. ¹⁶Da li quebe ble'e nigá chee gácalene' gubáz chee xabáa ca', san naca na ca dxenná xiche lá'azxa: Ble'e chee gácalene' benne' zaj naque' zri'ine zre sua Abraham. ¹⁷Chee le' na' ben na ba xen guque' duté ca zaj naca bi biche' ca', chee séquene' gaque' lau Dios tu bxruze blau naque' li lazre', ne dxexache lazre' bénneache, ne chee séquene' gun cuine' tu da dxegúa na dul-la zaj nabaga bénneache. ¹⁸Lawe' da gudéqueze Le' xel-la' zi' gate guca lazre Satanás gun zréaje Le', dxezéquene' na'a gácalene' benne' ca' dxun zréaje da xriwe' le'.

Jesús nácadxé' blau ca Moisés

3 Le'e, benne' bícha'dau', nácale bi chee Dios, lawe' da nácale benne' ca' ba gunné Dios, le nna' xanne' Jesucristo, Bénnea' gusel-la Dios chee gaque' bxruze blau chee da dxéajledxu. ²Jesús nigá guque' li lazre' lau Dios, Bénnea' bzue' Le' lu zrin na' da ba bene', ca guca Moisés,

guque' li lazre' lu zrin na' bene' lau benne' ca' gulaque' bi chee Dios. ³ Jesús dxal-la' sidxe' xel-la' ba lá'ana ca da si' Moisés, ca dxaca chee benne' dxune' tu xu'u, dx-ezidxe' xel-la' ba lá'ana ca da dxezí' xu'u ná'queze. ⁴ Tu tu xu'u naca na da ben benne', san Dios nune' xúgute da zaj zua. ⁵ Ca wen zrin chee Dios guca Moisés li lazre' lu zrin na' bene' lau benne' ca' gulaque' bi chee Dios, na' bchála'e' ca naca da nne' Dios ca te na'. ⁶ Cristo naque' li lazre' ca Zrí'nequeze Dios laudxu dxi'u. Nácadxu ca lizre Dios che se cháchadxu lu da dxuxrén lázredxu ca zrindxa zra cheajsé cheedxu, ne dxebéle'edxu lu da dxebeza lázredxu.

Bi ca' chee Dios xelexezí' lazre' naga zua Dios

⁷ Caní naca, naca na ca da dxenná Be' Lá'azxa lu xiche lá'azxa, dxenné': Na'a, che le'e dxenle ca da dxenná Dios, ⁸ quebe gácale lázrdau zide' ca gulaca benne' ca' guledábague' Dios, na' belune' Dios zede le'e xixre' lawe' lataj. ⁹ Belún xra xrtaule ca' neda' zede chee guna' ca gunnía', lácala belelé'ene' da bēna' lāwela chua iza. ¹⁰ Chee le na' bzra'a xichja' benne' ca', na' gunnía': Tu dxelebéaj xichajzqueze benne' caní neda', ne dxeledábague' ca naca da bdxíruja'. ¹¹ Chee le na' bzra'a xichja' benne' ca', ne bzua chúchua' da gucha' benne' ca', gunnía' quebe xelexú'e naga xelexezí' lazre' naga zúaqueza' neda'. ¹² Le'e, benne' bícha'dau', le guxúe cuínale chee quebe gaca lázrdau zide' netule le'e, quebe cuásale lau Dios ban lawe' da quebe dxéajle chee Le'. ¹³ Le gutipa lázrele tule xetule tu zra tu zra, dxácate ne zúadxu lu zra da nunna Dios dxi'u, chee quebe si xe dul-la netule le'e, na' gácale lázrdau zide'. ¹⁴ Che se

cháchadxu ca zrin zra cheajsé cheedxu ca naca da dxuxrén lázrequezdxu nédxute, na'a nácadxu bi chee Cristo.

¹⁵ Naca na ca dxenná na lu xiche lá'azxa:

Na'a, che le'e dxenle ca da dxenná Dios, quebe gácale lázrdau zide' ca gulaca benne' ca' guledábague' Dios.

¹⁶ ¿Nuzra benne' ca' belenne' dizra' chee Dios, na' ca gudé na' guledábague' Dios? Zaj naca xúgute benne' ca' bebéaj Moisés lu xezr la xu Egipto. ¹⁷ ¿Nuzra benne' ca' bzra'a Dios le' lāwela chua iza? Zaj naca benne' ca' belún dul-la, na' gulátie' le'e xixre' lawe' lataj. ¹⁸ ¿Nuzra benne' ca' bzua chuchu Dios xrtizre' gate guzre' le' quebe xelexú'e naga xelexezí' lazre' naga zua Le'? Zaj naca benne' ca' guledábague' xrtizra Dios. ¹⁹ Na'a dxelé'edxu quebe guca xelexú'e lawe' da quebe guléajle'e chee Le'.

4 Caní naca, dxácate ne zua cheedxu da nachebe lazre' Dios chee xexú'udxu naga xezí' lázredxu naga zua Dios, dxal-la' guxúe cuínadxu gagáze nule le'e quebe xexú'ule. ² Cá'anqueze dxi'u ba bendxu dizra' chawe' chee Dios ca da belén benne' ca', san benne' ca' quebe bi da ba neza gulezí'e chee dizra' da belenne' lawe' da quebe guléajle'e chee na. ³ Dxi'u ba guxéajledxu, na' chú'udxu naga xezí' lázredxu, ca da gunná Dios gate gunné':

Chee le na' bzra'a xichja' benne' ca', na' bzua chúchua' da gucha' benne' ca', gunnía':

Quebe xelexú'e naga xelexezí' lazre' naga zua neda'.

Caní gunná Dios lácala ba bsexuzre' zrin chee' gate na' bente' xezr la xu, ⁴ lawe' da naxúaj na lu xiche lá'azxa ca naca chee zra gazre', dxenná na:

Lu zra gazre bezí' lazre' Dios lu zrin da bene'.

⁵ Xetú dizra' da naxúaj na lu xiche lá'azxa dxenná na:

Quebe xelexú'ē naga xelexezí' lazre' naga zua neda'.

⁶Benne' ca' belenne' dizra' chawe' nigá chee Dios nédxute quebe belexú'ē lawe' da quebe buluzú'ē dizra' ca naca da gunná Dios. Na'a ne zaj zra' benne' dxal-la' xelexú'queze' naga xelexezí' lazre'.

⁷Chee lē na' Dios ba guléaje' xetú zra, gunné': Na'a zra. Caní naca lawe' da dxuchálajle Dios dxi'u dxuchínene' dizra' da gunná David gudé na', da naxúaj na lu xiche lá'azxa naga dxenná na:

Na'a, che le'e dxenle ca da dxenná Dios, quebe gácale lázrdau zide'.

⁸Chela belexezí' lazre' benne' ca' bē Josué lataj gulu'ē xēzr la xu na', quegá guchálajdxa Dios chee xetú zra. ⁹Caní naca na, dē lataj xelú'u bi ca' chee Dios naga xelexezí' lazre' naga zua Dios, ¹⁰lawe' da xezí' lazre' lu zrin dxun nu benne' chu'ē naga xezí' lazre' naga zua Dios, ca ben Dios, bezí' lazre' lu zrin ben Lē'. ¹¹Dxal-la' gun zi lázredxu séquedxu chú'udxu naga xezí' lázredxu gagáze nu benne' gunē' ca belún benne' ca' quebe guléajlē'.

¹²Dizra' chee Dios naca na da bane, ne napa na xel-la' waca. Naládxa na ca tu xia da nalá na dxupa la'ate, ne dxaze na naga dxelezraga bēnne' du xú'udxu, ne be' nácaquezdxu, ne dxaze na lu xichaj lázrdau bēnneache, na' dxuchi'a na ca naca da dxugú'u bea bēnneache ne ca da dxéquene' gunē'. ¹³Quebe bi dē da ben Dios da seque' gucache cuina na lau Dios. Xúgute zaj nalá' na, ne zaj naxalaj na lau Bēnnea' dxal-la' xul'éedxu Lē' ca da bēdxu.

Jesús naque' bxruze blau zrente

¹⁴Jesús, Zri'ine Dios naque' bxruze blau zrente cheedxu, Bēnnea' ba bexu'ē lau Dios. Chee lē na' dxal-la' sē típadxu lu da dxéajlēdxu chee Dios. ¹⁵Bxruze blau cheedxu wazéquene' xexache lazre' dxi'u che dxi'u dxate ni'a nadxu lu xel-la' dxe-

jlí lazre' cheedxu, lawe' da gudéqueze Lē' lu xel-la' zi' ca' gate guca lazre da xriwe' gun zrēaje na Lē', ca da dxededxu dxi'u na'a, na' Lē' quebe bēne' dul-la. ¹⁶Chee lē na' dxal-la' bígadxu du lázredxu lu lataj blau chee Dios cheedxu, Bēnnea' nazri'ine' dxi'u, chee xexache lazre' dxi'u, ne dute xel-la' xrlátaje chee' gácale' dxi'u gate nachínedxu nu gácale dxi'u.

5 Tu tu bxruze blau dxe'ca Dios lá-dujla bēnneache, ne dxuzú'ē lē' chee gunē' zrin lau Dios waláz chee bēnneache ca', ne cu'ē guna' lau Dios, ne gutiē' béadu ca' nē chee dul-la zaj nabaga' bēnneache. ²Cá'anqueze bxruze blau nigá dxate ni'a nē'ē lu da ca' dxune' ca da dxaca cheedxu dxi'u. Chee lē na' wape' xel-la' zren lazre' chee benne' ca' quebe dxelájni'ine', ne dxelune' da calela, ³na' lawe' da dxate ni'a nē'ē, dxal-la' gutiē' béadu ca' nē chee dul-la da nabágaqueze', cáteze dxunē' nē chee dul-la da zaj nabaga xezícadxa bēnneache.

⁴Quebe nu gaca gun cuina bxruze blau, san Diósqueze dxenné' bēnnea', ne dxunézruje' lē' xel-la' szren na', ca bēne' chee Aarón. ⁵Cá'anqueze naca na chee Cristo, quebe bzua cuine' bxruze blau, san Dios bē'ē Lē' xel-la' szren na' ca da guzre' Lē':

Lue' nactu' Zri'ina'.

Neda' nácaqueza' Xrau' na'a.

⁶Cá'anqueze naxúaj na lu xiche lá'azxa ca guzre' Lē':

Lue' nactu' bxruze blau chadía chacanna ca gúcaqueze Melquisedec.

⁷Gate zua Cristo lu xēzr la xu nigá, bchálajlene' Dios, ne guta' xuene' Dios nen chi'ē zizraj, ne gudxézrele'ē, lawe' da napa Dios xel-la' waca guselé' Lē' lu xel-la' gute, na' Dios benne' chee lawe' da gudape' Xre' ba lá'ana. ⁸Ca'an guca, lácala naca Cristo Zri'ine Dios, bsédie' guque' wezúa dizra' nē chee xel-la' zi' da gudé', ⁹na' gate guque' dute We-selá cheedxu nē chee da caní, nadxa

guzéquene' bselé' bénneache chadía chacanna, benne' ca' dxuluzúé' dizra' chee',¹⁰ na' Dios bzue' Le' bxruze blau ca gúcaqueze Melquisedec.

Quebe dxal-la' gusandxu xel-la' dxeajlí lazre' cheedxu

¹¹ Déle'e da dxal-la' guchálaja' ca naca chee da nigá, san naca na stebe guzéajni'ida' le'e na'a, lawe' da quebe ne gaca chéajni'ile na.¹² Zane' iza ba guca dxéajlele chee Cristo, na' ba gul-la' gusédele benne' xula ca naca chee Le', san dxun na ba xen nu guzéajni'i le'e da xula da quebe nácateca stebe ca naca dizra' chee Dios. Ne nácale ca bidau' ne dxázrebe' nizre'. Quebe ne gaca gágule xel-la' wagu chee benne' waca.¹³ Benne' ca' zaj naca ca bidau' ne dxázrebe' nizre' zaj naque' benne' ca' quebe ne xuluchínene' dizra' chee xel-la' li.¹⁴ Xel-la' wagu chee benne' waca naca na chee benne' ca' ba zaj nézene' xelexúnbe'e da naca da xrlátaje, ne da naca da calela.

6 Chee le na' québedxa dxal-la' guséd-edxu ca da bsédedxu nédxute ca naca chee Cristo, san chéajtezdxu gusédedxu da naca chee' chee gácadxu benne' waca. Québedxa bi dxal-la' guchálajdxu chee da du ca' da bsédedxu nédxute, ca dxal-la' xexéaje lázredxu chee da ca' bendxu da zaj nua na xel-la' gute, ne ca dxal-la' chéajledxu chee Dios,² ne ca dxal-la' xedxúadxu nisa, ne ca dxal-la' xuluzé ne'e xíchajdxu, ne ca xelexebán benne' gate, ne ca gun Dios, guchi'e da nun tu tu bénneache chee gudéé' benne' ca' dxelune' da calela lu lataj ba xa' chadía chacanna.³ Chee le na' chéajtedxu lu da naca chee Cristo, che Dios gunne' dxi'u lataj.

⁴ Benne' ca' ba gulez'é ca naca xel-la' naxaní' chee Dios, ne ba gulezú lawe' xelúnbe'e da dxunna Dios, ne ba gulez'é Be' Lá'azxa,⁵ ne ba gulezú lawe' xelúnbe'e da xrlátaje ca' chee Dios ca

naca da xelez'é lu xezr la xu da za za',⁶ na' te na' che xuluzúé' Dios chalá'ala, québedxa gaca xelexéaje lazre' lawe' da gaca na ca xulud'éé' Cristo le'e xaga begúaj da xula, ne dxelún le' chee' lálwela xígute bénneache.⁷ Zaj naque' ca xezr la xu da dxezí na nisa xiuj. Che xezr la xu na' dxunna lina chawe' chee benne' dxelune' na zrin, naca na da dxun chawe' Dios,⁸ san che dxachuj na xeché', ne xixre' da quebe bi culuén napa na, quebe bi zaca xezr la xu na', san naca na tu da xu'u de', na' naga chéajsete chezxe na.

Xel-la' dxebeza lazre' da nápadxu

⁹ Le'e, benne' bícha'dau', lálcala dxuchálajntu' caní, dxuxrén lázrentu' ca naca cheele le'e wazile le'e da chawe' chee xel-la' weselá.¹⁰ Dios dxune' da xlátaje, ne quebe gal-la lazre' ca naca zrin da ba benle, ne ca bzri'ile Le' gate gúcalele benne' bíchedxu ca', ne ca da tu dxúnzquezle.¹¹ Dxaca lázrentu' chéajteze tu tule gunle da caní duté lázrdaule ca zrin zra cheajsé cheele, chee zrué'ele da dxebeza lázrele.¹² Quebe dxaca lázrentu' xewédele. Dxaca lázrentu' gunle le'e ca belún benne' ca' guleajlí lazre' Dios, ne gulaque' zren lazre', na' gulez'é ca da guchebe lazre' Dios gunézruje' chee'.

¹³ Gate guchebe lazre' Dios bi gunézruje' chee Abraham, na' bzétajqueze cuine' lawe' da québedxa nu zua nácadxa szren ca Le', nu guzétaje',¹⁴ gunné': "Da li gúnqueza' da chawe' chiu' lue', ne guzánqueza' zri'ine zre su'."¹⁵ Abraham guleze' duté xel-la' zren lazre', na' chee le na' guzi'e da guchebe lazre' Dios gunézruje' chee'.¹⁶ Gate nu dxuluzetaj bénneache, dxuluzétaje' benne' nácadxe' szren ca léqueze', ne gate bi dxuluzúa chúchue', ne dxuluzétaje' Dios, québedxa bi de da bi xelenné'.¹⁷ Chee le na' Dios bzua chúchue' da guchebe lazre', ne bzétaj cuine', lawe' da guca lazre' gul'éne'

benne' ca' xelezí'ē da guchebe lazre', Lē' gunē' ca' naca da guchebe lazre', ne quebe guché'ē ca' gunē'. ¹⁸ Caní naca, da chupa caní quebe gaca cha na, na' lu da caní Dios quebe gaca gun lazre', ne ne chee da ca' Dios ba nunne' dxi'u tu da gun na dxi'u dipa lazre', dxi'u na' ba nézedxu dxuxúe Lē' dxi'u, ne nuxrén lázredxu si' lu nnadxu da dxebeza lázredxu ca naca da gunne' dxi'u. ¹⁹ Da nigá dxebeza lázredxu nuxru chacha na bēne'du xú'udxu ca dxun tu xia da dxuxru chacha na tu da dxedá lawe' nísadau' gate zria na lawe' nísadau'. Da na' dxebeza lázredxu zúalē na Cristo cuzru ladxe' da zē lu xudau' da zua xabáa, ²⁰ naga guxú'u Jesús waláz cheedxu chee gúsálajē' neza naga tedxu, na' Lē' naque' tu bxruze blau chadía chacanna ca guca Melquisedec.

Jesús naque' bxruze blau ca guca Melquisedec

7 Melquisedec nigá guque' wenná bea chee xezre Salem, ne bxruze chee Dios szrentē. Gate ze za' Abraham lu wedil-la gate bzétajē' benne' wenná bea ca', na' Melquisedec nigá xeajchague' lē', ne gunabē' lau Dios gunē' da chawe' chee Abraham, ² na' Abraham bnézrujē' chee lē' tu cue' chee da chi cue' ca' ca' naca da bzrué'ene' lu wedil-la na'. La Melquisedec zéajē na wenná bea xlátajē, ne lawe' da guque' benne' wenná bea chee xezre Salem, da zéajē na xella' dxebeza zri lazre', lē' zéajēqueze na wenná bea chee xel-la' dxebeza zri lazre'. ³ Quebe naxúaj na zua xre', ne xrne'ē, ne xra xrtawe', ne quebe naxúaj na che gúlajē', ne che gutiē'. Caní naca na, da guca Melquisedec dxul'éē na ca' naca chee Zri'ine Dios, naque' bxruze blau chadía chacanna.

⁴ Le na' xque na'a ca szren guca Melquisedec, che bnezruj xra xrtáudxu Abraham chee lē' tu cue' chee da chi cue' chee da guqu'éē lu na' wenná bea

ca' lu wedil-la na'. ⁵ Ca naca da bdxixruj bea Moisés, bxruze ca', benne' ca' zaj naque' xrtia Leví dxal-la' xelezí'ē tu cue' chee da chi cue' ca' da xelizruj benne' Israel ca', benne' zaj naque' xrtia ljwezre', lálaca zaj naque' zri'ine zre sua Abraham ca' zaj nácaqueze benne' ca'. ⁶ Melquisedec, benne' quebe naque' xrtia Leví guzi'ē tu cue' chee da chi cue' ca' da gudizruj Abraham, bēneea' dxal-la' si'ē da guchebe lazre' Dios. Cá'anqueze Melquisedec gunabē' lau Dios gunē' da chawe' chee Abraham, ⁷ na' dxeleenná xúgute bēneache nácadxa blau bēneea' dxenabē' lau Dios gunē' chawe' chee benne' xula ca' quézcala bēneea' si'ē da chawe' na' dxenabē'. ⁸ Na'a benne' ca' dxelezi'ē tu cue' chee da chi cue' ca' zaj naque' benne' dxelate, san ca' naca chee Melquisedec, naque' ca' tu benne' naca bánqueze' lawe' da quebe naxúaj na lu xiche lálaxza che gutiē'. ⁹ Ca naca chee Leví, ne ca' naca chee xúgute bxruze ca' zaj naque' zri'ine zre sua Leví na', benne' ca' dxelezí'ē na'a tu cue' chee da chi cue' ca', wácaqueze nnadxu cá'anqueze benne' caní gulzrujē' chee Melquisedec tu cue' chee da chi cue' gate na' bezrague' Abraham, ¹⁰ lawe' da wazeque' nnadxu ne zaj zua zri'ine zre sua Abraham lu bēlla' dxen chee', benne' quebe ne xelalaj gate na' bdxuaj Melquisedec xeajchague' Abraham na'.

¹¹ Benne' Israel ca' gulezí' lu ne'ē da bdxixruj bea Dios lu na' bxruze ca' zaj naque' xrtia Leví. Chela guzeque' da belún bxruze ca' gun na li lazre' benne' ca' buluzúē' dizra' chee da bdxixruj bea Dios na', na' quebe ben na ba xen la' xetú bxruze ca' guca Melquisedec, ne quegá ca' guca Aarón. ¹² Che xezrá' ca' dxal-la' gaca bxruze na', na' dxál-la' queze xezrá' da nadxixruj bea na'. ¹³ Xránadxu, Bēneea' naxúaj na chee' gaque' bxruze ca' guca Melquisedec, nababē' xetú cue' xrtia Israel ca', benne' ca' netue' quebe ne

gaque' bxruze. ¹⁴Naca bea na nababa Xránadxu xrtia Judá, na' Moisés quebe gunné' xelaca benne' caní bxruze.

¹⁵Da nigá naca béadxu na che bxruze cube na' dxal-la' gaque' ca guca Melquisedec, ¹⁶ne bxruze cube nigá quebe gaque' bxruze ne chee tu da nadxiruj bea da dxenná na nu xrtia dxal-la' gaque'. Gaque' bxruze lawe' da nape' xel-la' waca chee tu xel-la' nabán da quebe te chee na. ¹⁷Naca chee' ca da dxenná Dios:

Lue' nacu' bxruze chadía chacanna ca da guca Melquisedec.

¹⁸Caní guca, bedxúaj chalá'ala da bdxiruj bea Dios gate nate lawe' da quebe guzeque' bi gun na, ne quebe bi culuén gudapa na, ¹⁹lawe' da quebe guca da gunná bea Moisés gun na bènneache li lazre'. Na'a nápadxu tu xel-la' dxebeza lazre' da cháwedxa, na' ne chee na dxebigadxu lau Dios.

²⁰Gate Dios bene' Jesús bxruze, bzetaj cuine'. ²¹Quebe bzetaj cuine' gate bzue' xezícadxa bxruze ca'. Gate bene' Jesús bxruze bzetaj cuine' ca da naxúaj na lu xiche lá'azxa, dxenná na:

Xránadxu Dios bzetaj cuine', ne quebe guché'e xrtizre'.

Gunné': "Lue' nacu' bxruze chadía chacanna

ca da guca Melquisedec."

²²Chee le na' Jesús dxun chúchu'e tu xel-la' wezría da nácadxa chawe' ca da nedxu. ²³Xezícadxa bxruze ca', benne' gulezrá' nédxula ben na ba xen gulaque' benne' zan lawe' da gulate tu tue', na' quebe guca xeledíe'. ²⁴Jesús naque' tu bxruze chadía chacanna lawe' da quebe gatie'. ²⁵Chee le na' dxezéquene' guselé' chadía chacanna benne' ca' xelebigue' lau Dios ne chee Le', lawe' da naca ban Le' chadía chacanna chee gudé'e dizra' chee benne' ca' lau Dios.

²⁶Jesús naque' bxruze blau, bxruze na' dxechínedxu. Naque' lá'azxa, ne quebe bi

da caléla bene', ne quebe nabague' dul-la. Quebe naque' tuze ca zaj naca benne' dul-la, na' Dios nucá'ana szrendxe' Le' ca xúgute' da zaj zua xabáa. ²⁷Quebe naque' ca xezícadxa bxruze ca', benne' ca' ben na ba xen beluti'e béadu ca' tu zra tu zra, béadu ca' buluzúe' nedxu ne chee xtúl-laqueze', na' ca gudé' na' buluzúe' béadu xula ca' ne chee xtul-la bènneache. Jesús tu lásaze bzua cuine' ne chee dul-la zaj nabaga xúgute' bènneache. ²⁸Da bdxiruj bea Moisés dxuzúa na bxruze blau ca' zaj naque' benne' quebe zaj naque' li lazre'. Gate Dios bzetaj cuine' ca gudé' bla' da nadxiruj bea na', bzue' tu bxruze blau naque' Zrí'inequeze', Bènnea' ben Dios naque' tu bxruze blau li lazre' chadía chacanna.

Jesús naque' bxruze blau cheedxu

8 Da naca blaudxa chee da caní dxennantu' naca na da nigá: Zua tu bxruze blau cheedxu caní, Bènnea' dxe'e chalá'a xabéla chee lataj blau chee Dios xabáa, ²ne naque' bxruze blau dxune' zrin lu lataj lá'azxa li, da ben Xránadxu, quegá bènneache. ³Xúgute' bxruze blau nuzúa Dios le' chee xelegú'e guna' lau Dios, ne xelútie' béadu ca' lau Dios. Chee le na' dxun na ba xen bi guzúa Cristo lau Dios. ⁴La zua Cristo xezr la xu nigá, quebe gaque' bxruze lawe' da ne zaj zra' bxruze ca' dxelegú'e guna' ca nadxiruj bea da bde Moisés. ⁵Zrin dxelún bxruze caní naca na ca tu da dxulé'eze na, ne ca tu zrúlaze chee da na' zua xabáa. NezdXu naca na tu da dxulé'eze lawe' da gunná Dios, guzre' Moisés gate ba zue' gune' lataj lá'azxa: "Bxue xanne' gunu' xúgute' na cáteze naca da ble'eda' lue' lu xi'a na'." ⁶Na'a bxruze blau cheedxu nigá dxune' tu zrin zácadxa lawe' da naque' wedé dizra' chee tu xel-la' wezría cháwedxa, da nun Dios ne chee da ca' guchebe lazre' da zaj naca na cháwedxa.

⁷La guca li lazre' xel-la' wezría da bene' nedxu, quebe ben na ba xen guné' xel-la' wezría gudxupe' na'. ⁸Gate Dios gudil-le' benne' ca' zaj naque' bi che, gunné':

Dxenná Xránale: Wazrín zra gate guna' tu xel-la' wezría cube nen benne' Israel ca', ne benne' Judá ca'.

⁹Quebe gaca na ca guca xel-la' wezría da beña' nen xra xrtaule ca' gate beca'a ne'e,

ne bebéaja' benne' ca' lu xezr la xu Egipto.

Caní guna' lawe' da quebe buluzúe' dizra' xel-la' wezría da nuna',

na' chee le' na' guleaj xichja' benne' ca'.

Da ni dxenná Xránale.

¹⁰Xel-la' wezría guna' nen benne' Israel ca'

ca te chee lu zra caní gaca na caní, dxenná Xránale:

Guzúa' da gudxixruj be'a lu xichaj lázrdau benne' ca',

ne guzúaja' na lu lázrdawe'.

Nadxa gaca' neda' Dios chee benne' ca', na' le' xelaque' bi chia' ca'.

¹¹Quebe gun na ba xen xulusede ljwezre',

ne quegá nu benne' xe'e bi biche': Benbea Xránadxu.

Xúgute' xelúnbe'e neda',

benne' cá'aze, ne benne' blau.

¹²Gunite lawa' chee benne' ca'

ca naca da calela da zaj nune',

ne québedxa cheajsá lazra' chee dul-la da zaj nune'.

¹³Gate dxuchalaj Dios chee tu xel-la' wezría cube, naca na lawe' da ba gunné' chee da nedxu naca na da gula, na' da ba dxaca na da gula, ne da gulasa la xenítete na.

Lataj lá'azxa da zua lu xezr la xu, ne da zua xabáa

9 Gate ne zua xel-la' wezría nedxu, zaj de da nadxixruj bea ca dxal-la' xelún

bxruze ca' tu lu xudau' da zua xezr la xu nigá. ²Xudau' nedxu caní guca na tu xu'u xide zren. Lu lataj nedxu chee xudau' na' da nazí le na Lataj Lá'azxa zaj zua da dxusa'ní', ne tu ta'a naga zria xeta xtíla lá'azxa. ³Cuzre naga ze ladxe' gudxupe' zua xetú lataj da nazí le na Lataj Lá'azxa Blau. ⁴Lu lataj nigá zaj zua tu tá'adau' naga xezxe xala, ne tu xi'ina chee xel-la' wezría da nun Dios, da nacu na oro du ca nácaqueze na. Lu'ule xi'ina na' xu'u tu zruágadau' xu'u na xeta maná. Cá'anqueze lu'ule na xu'u xágadau' da bexru Aarón da na' bezría na, ne zaj xu'u na xiaj ca' naga zaj naxúaj dizra' chee xel-la' wezría. ⁵Lawe' xi'ina nigá zaj zua gubáz chee xabáa ca' zaj naca na oro, da dxululé'e na zua Dios na', na' zaj nugacu xrile na naga dxuluzríe' dxen ne chee dul-la zaj nabaga bénneache. Québedxa séquentu' guchálajntu' ca naca chee da caní na'a.

⁶Gate ba nagá'ana chawe' da caní, na' bxruze ca' dxelú'unqueze' lu lataj nedxu chee lataj lá'azxa chee xelune' zrin chee xel-la' bxruze chee'. ⁷Lu lataj gudxupe' dxu'u tuze bxruze blau tu lásaze tu tu iza, na' gate dxu'e na' dxun na ba xen gu'e dxen chee béadu ca' da guzríe' ne chee dul-la nabáaqueze', ne ne chee dul-la zaj nabaga bénneache ca'. ⁸Be' Lá'azxa dxuzéajni'ine' dxi'u quebe naxalaj neza chee chú'udxu Lataj Lá'azxa Blau na' dxácate dxelune' zrin chee xel-la' bxruze chee' lu lataj nedxu chee lataj lá'azxa na'. ⁹Xúgute' da caní zaj naca na da dxululé'eze, da dxaca lu zra na'a zra, lawe' da guna' ca', ne dxen chee béadu ca' da dxuluzúa bxruze ca' lau Dios quebe gaca xelún na bénneache duté li lazre'. ¹⁰Da caní zaj naca na chee da dxelé'aj dxelawe', ne chee da dxulucá'ana chawe' cuine', ne chee da nadxixruj bea ca naca chee bela' dxen chee bénneache, da ca' bzua Dios ca zrindxa zra guché'e da ca'.

¹¹ Na'a ba bla' Cristo, ne naca Le' bxruze blau chee da xrlátaje ca' da ba belelá'. Lataj Lá'azxa naga dxun Le' zrin ca bxruze blau naca na blaudxa, ne da li lászredxa. Quebe naca na tu da zaj nun bènneache, da zéaje na, quebe naca na chee xezr la xu nigá. ¹² Cristo ba guxú'e Lataj Lá'azxa Blau, quegá chee guzú'e dxen chee béadu ca', ne chee među ca', san chee guzú'e dxen cheéqueze', na' guxú'e ga na' tu lászaze lawe' da ba bene' xel-la' weselá chadía chacanna cheedxu dxi'u. ¹³ Da li dxen chee bezre, ne chee béadu ca', ne de chee bézredu ca', bea ca' dxuluzex'e lu ta'a chee Dios, da ca' dxuluzré'e xichaj benne' ca' zaj naque' sban, zaj napa na xel-la' waca xelibe na benne' ca' cúzreze, ne chee xulucá'ana chawe na le' lau Dios. ¹⁴ Che caní naca na, wazéquedxa dxen chee Cristo, Bénnea' bzua cuine' lau Dios ne chee Be' Lá'azxa duté xel-la' li lazre' chee', na' dxen chee' na' dxibe na xichaj lászraudxu chee da bendxu da nua na xel-la' gute, chee séquedxu gundxu zrin chee Dios ban.

¹⁵ Chee le' na' naca Jesucristo wedé dizra' chee tu xel-la' wezría cube. Xel-la' gute chee Cristo dxun na zrin chee gaca gunité lau Dios cheedxu ca naca dul-la da bendxu gate ne zúadxu lu xel-la' wezría nedxu, na' na'a benne' ca' ba gunné Dios waca xelez'íe ca naca da ca' guchebe lazre' Dios, da zaj naca na chadía chacanna. ¹⁶ Gate tu benne' dxuné' tu xiche da dxelá'a na da de chee', dxun na ba xen gulé'dxu ba nate bènnea' chee gundxu ca dxenná xiche na'. ¹⁷ Xiche na' quebe bi seque na dxácate ne naca ban benne' bene' na, san gate ba gute bènnea', na' seque na. ¹⁸ Chee le' na', xel-la' wezría nedxu na' guzú'a chuchu na ne chee dxen da buluzrí'e na. ¹⁹ Moisés blabe' xúgute da nadxixruj bea da zaj naxúaj na lu dizra' chee Dios lau xúgute bènneache, na' ca gudé na' guqué'e zrila' da nadxé na da xrna, ne tu

zruze xaga hisopo, na' gusebise' na dxen chee među ca', ne dxen chee béadu ca', ne nisa, na' bzre'e na lawe' xiche naga naxúaj xtizra Dios, ne bzre'e na bènneache ca'. ²⁰ Nadxa guzre' benne' ca': "Dxen nigá naca na da dxuzúa chuchu na xel-la' wezría da nun Dios nen le'e." ²¹ Cá'anqueze bzra Moisés dxen lu lataj lá'azxa, ne lu xúgute da dxuluchínene' lu zrin da dxelún bxruze ca'. ²² Ca naca da bdxixruj bea Dios, dxal-la' xulucá'ana chawe' xúgute da ca' nen dxen, na' che quebe nu gualaj dxen, Dios quebe gunité lawe' chee bènneache ca naca dul-la da zaj nabague'.

Dxen chee Jesucristo dxegúa na dul-la

²³ Caní ben na ba xen xulucá'ana chawe' da ca' zaj naca na da dxululé'eze na ca zaj naca da zaj zua xabáa, na' da ca' zaj zua xabáa dxun na ba xen xulucá'ana chawe' na nen tu da zácadxa. ²⁴ Cristo quebe guxú'e lu lataj lá'azxa da zaj nun bènneache, da na' naca na tu da dxulé'eze ca naca lataj lá'azxa li da zua xabáa, san guxú'e xabáqueze, naga zue' na'a lau Dios, dxudé'e dizra' cheedxu dxi'u. ²⁵ Bxruze blau chee benne' judío ca' dxu'e lu lataj lá'azxa blau tu iza tu iza chee guzú'e ga na' dxen da quebe naca cheéqueze'. Na'a Cristo quebe dxuzúa cuine' zane' lasa. ²⁶ La ben na ba xen guzúa cuine' zane' lasa, cá'anqueze zane' lasa gatie' ca gudé bene' xezr la xu nigá. Na'a, gate ba bzrin zra dxaca li ca da guchebe lazre' Dios, Cristo ba ble'e tu lászaze, na' bzua cuine' chee cue' dul-la zaj nabaga bènneache. ²⁷ Ca dxun na ba xen xelate xúgute bènneache tu lászaze, na' te na' Dios guchi'e da zaj nun tu tue', ²⁸ cá'anqueze Cristo bzua cuine' chee gutie' tu lászaze chee gudú'e dul-la zaj nabaga' benne' zante. Te nigá xelé'e da gudxupe', quegádxu chee cue' dul-la,

san chee xedajselé' xúgute benne' dxelebeze' Le'.

10 Da nadxixruj bea da bde Moisés guca na ca tu zrúl-laze chee da chawe' ca' da dxal-la' xeledá', ne quegá naca na léqueze na. Chee le na' da ca' buluzúa bxruze ca' lau Dios ca nadxixruj bea na', da ca' buluzúe' tu iza tu iza, quebe gulezeque na xelún na benne' ca' li lazre', benne' ca' gulebigue' lau Dios. ²La guzeque' da nadxixruj bea na' gun na benne' ca' li lazre', québedxa nu guzúa da ca' lau Dios lawe' da la guladx benne' ca' lu dul-la zaj nabague', québedxa zaj nabague' dul-la. ³Na'a da ca' buluzúe' lau Dios tu iza tu iza bulusá na lazre' chee dul-la da zaj nabague', ⁴lawe' da quebe guzeque' dxen chee bezre ca', ne dxen chee béadu ca' cua na dul-la zaj nabaga bèneache.

⁵Chee le na', gate bla' Cristo lu xezr lu xu nigá, guzre' Dios:

Quebe dxaca lazru' guna', ne béadu ca' nu gute leba' lau'.

Na'a ba benu' bel-la' dxen chia' nigá.

⁶Quebe dxezaca ba lazru' béadu ca' dxuluzeze' lau',

ne béadu ca' dxelutie' lau' chee cua na dul-la zaj nabague'.

⁷Nadxa gunnía': "Nigá za'a neda' chee guna' ca da nnau' Lue', Dios,

ca naxúaj na chia' neda' lu xiche lá'azxa."

⁸Nédxula gunné': "Quebe dxaca lazru', ne quebe dxezaca ba lazru' guna', ne béadu ca' nu gute leba' lau', ne béadu ca' dxuluzeze' lau', ne béadu ca' dxelutie' lau' chee cua na dul-la zaj nabaga bèneache." Caní gunné' lácala zaj naca na da nadxixruj bea na xuluzúe' na lau Dios. ⁹Ca gudé na' gunné': "Nigá za'a neda' chee guna' ca da nnau' Lue', Dios." Da nigá zéaje na gudé' lu waláz chee da ca' buluzúa bxruze ca' lau Dios, gate bzua cuine' lau Dios ne chee dul-la zaj nabaga bèneache. ¹⁰Dios ba bca'ana chawe' dxi'u lu dul-la nabágadxu lawe'

da ben Cristo ca da gunná Dios gate bde cuine' lau Dios tu lásaze gate gutie' le'e xaga begúaj.

¹¹Xúgute bxruze judío dxelune' zrin lau Dios tu zra tu zra, ne zane' lasa dxuluzríe' lau Dios da cá'anqueze lácala da ca' cabata' xezezeque na eleugía na dul-la chee bèneache. ¹²Jesucristo bzrie' lau Dios tuze da dxugúa na dul-la, na' gudé na' gudxé'e chalá'a xabela chee Dios. ¹³Zue' na'a dxebeze' zra gate guzúa Dios benne' ca' dxeledábage' chee' zran ni'e. ¹⁴Caní dxune' lawe' da bca'ana chawe' chadía chacanna benne' ca' zaj naque' bi chee Dios. Caní bene' gate bzua cuine' lau Dios tu lásaze. ¹⁵Caníqueze dxenná Be' Lá'azxa lawe' da gunné' nédxula:

¹⁶Caní naca xel-la' wezría guna' nen benne' Israel ca'

ca te chee lu zra caní, dxenná Xránale:

Guzúa' da nadxixruj bea na' lu xichaj lázrdau benne' ca',

ne guzúaja' na lu lázrdawe'.

¹⁷Ca gudé na' dxenné':

Cabátadxa cheajsá lazra' chee dul-la da zaj nabague',

ne chee da calela ca' da zaj nune'.

¹⁸Ca'an naca, gate Dios ba bnite lawe' chee bèneache ca naca dul-la da zaj nabague', québedxa dxun na ba xen bi xuluzúe' lau Dios chee cua na dul-la ca'.

Dxal-la' bígadxu lau Dios

¹⁹Chee le na', benne' bícha'dau', waca chú'udxu lu lataj lá'azxa blau duté lázrdaudxu ne chee dxen chee Jesucristo da blalje'. ²⁰Dxezrindxu lau Dios, dxededxu tu neza cube, da quebe naca na ca da xjácale bxruze ca' lu lataj lá'azxa. Dxededxu neza da naca Crístoqueze, Bénnea' zúale Dios xabáa. ²¹Jesús naque' bxruze blau cheedxu, ne zaj xu'u lu ne'e bèneache chee Dios. ²²Chee le na' dxal-la' bígadxu lau Dios duté lázrdaudxu ne duté xel-la' dxeajlí lazre' li, lawe'

da bca'ana chawe' Lē' lázrdaudxu chee québedxa sua da stēbe lu xichaj lázrdaudxu ca naca chee dul-la, ne naca cheedxu cáteze ba gudibē' bēl-la' dxen cheedxu nen da naca ca tu nisa chawe'.²³ Dxal-la' sua cháchadxu ca naca da dxebeza lázredxu chee da dxéajlédxu, ne quebe guchadxu ca dxundxu, lawe' da gun Dios ca da guchēbe lazre' gunē' cheedxu.²⁴ Dxal-la' quilaj lázredxu ca gundxu gácale ljwézredxu tudxu xetudxu chee zri'i ljwézredxu, ne gundxu da xrlátaje.²⁵ Quebe dxal-la' gusandxu xezrágadxu lau Dios ca dxelún bal-la benne'. Dxal-la' gutipa lazre' ljwézredxu tudxu xetudxu, na' gúndxadxu caní na'a lawe' da dxelé'edxu ba za bagu zra xelá' Xránadxu.

²⁶ Che núnbeadxu ca naca xel-la' li chee Dios, ne chéajdxadxu gundxu dul-la, québedxa bi dē da cua na dul-la bágadxu.²⁷ Lu xel-la' dxezrebe súadxu da naca chee zra guchi'a Dios, ne chee xi' da guzrí'a xi na benne' ca' dxeledábague' chee Dios.²⁸ Gate nu benne' bzue' chalá'ala da gunná bea Mnoisés, ne gulezrá' chupa u chunna benne' belexechebe' chee da ben bēnnea', na' belutiē' bēnnea', ne quebe belexache lazre' le'.²⁹ Tu da stēbe zrendxa dxal-la' xelezí' benne' ca' dxuluzúe' chalá'ala Zri'ine Dios, ne dxulucá'ana dítajē' dxen chee', da blaljē', dxen na' dxuzúa chuchu na xel-la' wezrí'a chee Dios, ne dxucá'ana chawe na benne' ca', na' dxelennē' schanni' chee Be' Lá'azxa chee Dios, Bēnnea' nazri'inē' lē'.³⁰ Ba núnbeadxu Xránadxu, Bēnnea' gunnáqueze': "Neda' xebéaj lazra' bēnneache. Neda' gunézruja' lazruj chee benne' ca'." Cá'anqueze gunné': "Xránale guchi'e chee bēnneache chee'." ³¹ Da dxal-la' xelezrebe bēnneache naca da stēbe da gun Dios benne' ca'.³² Le gusá lázrele le'e iza da ba guledé, gate za guzítēle xel-la' naxaní' chee Dios, na' dutē xel-la'

zren lazre' bchaga laule xel-la' zi' da gudele.³³ Bál-lale le'e bulucháchalēnē', ne belú'e le'e láwela bēnneache, na' xebál-lale le'e guzáca'le gate guná'ale benne' ca' guledé' xel-la' zi' caní.³⁴ Bexache lázrele benne' gulezrá' lizre xia, ne dutē xel-la' dxebé bchaga laule da belunē' gate gulequ'é' ca da nápale, lawe' da nézele nápale xabáa da zácadxa na, ne da naca na da chadí'a chacanna.³⁵ Quebe gusanle ca da dxuxrén lázrele, lawe' da nusá xel-la' dxuxrén lazre' chee tu da zren da si'le.³⁶ Le'e dxal-la' gácale zren lazre' chee gunle ca da nna Dios, na' sile ca da guchēbe lazre' Dios gunne' chee.³⁷ Naca na ca dxenná xiche lá'azxa:

Xátēdauze de,

na' xelá' Bēnnea' dxal-la' xelá', ne quebe chēnē'.

³⁸ Benne' naque' xlátaje lawa' neda', gata' chee' xel-la' nabán li lazre' lawe' da dxéajlē'e chia',

na' che cueaj xíchaje' neda' quebe xezaca ba lazra' nen bēnnea'.

³⁹ Na'a dxi'u quebe nácadxu tuze nen benne' ca' dxelebéaj xíchaje' Dios, ne xelebí'a xi'e. Nácadxu tuze nen benne' dxeléajlē'e chee Dios, na' xeelá' bēnne'du zaj xu'e.

Xel-la' dxeajlí lazre'

11 Che nápadxu xel-la' dxeajlí lazre' dxuxrén lazrdxu sidxu da dxebézadxu, ne nézquezdxu naca da li da quebe dxelé'edxu.² Xra xrtáudxu ca' belexegá'anē' xrlátaje lau Dios lawe' da guléajlē'e chee'.

³ Lu xel-la' dxeajlí lazre' cheedxu nezdxu ben Dios xezr la xu nigá, bchínēnē' dizra' chee', na' ca naca da dxelé'edxu na'a ben Dios lē na nen da quebe nalá' gate nate.

⁴ Abel, lu xel-la' dxeajlí lazre' chee', bzue' lau Dios tu guna' da zácadxa na ca da bzua Caín, na' chee lē na' Dios

gunné' naca xlátaje Abel, ne guzi'e guna' chee'. Ca'an naca, lácala ba gute Abel, ne dxusédené' dxi'u ne chee da bene' lawe' da gudape' xel-la' dxeajlí lazre'.

⁵Enoc, lu xel-la' dxeajlí lazre' chee', Dios beché'e le'. Quebe gutié', na' québedxa nu ble'e le' lawe' da beché Dios le'. Naxúaj na lu xiche lá'azxa da dxenná na, gate quebe ne xeché Dios le', ben Enoc ca da bezaca ba lazre' Dios. ⁶Quebe gaca nu gun da xezaca ba lazre' Dios che quebe dxeajlí lazre' Le'. Bénnea' dxebigue' lau Dios, dxun na ba xen chéajle'e zua Dios, ne xunézruje' chee benne' ca' dxelexíljaje' Le'.

⁷Noé, lu xel-la' dxeajlí lazre' chee', gate Dios guzre' le' nédxula ca da dxalla' gaca, bzue' dizra' chee Dios, ne bene' tu da zren da dxedá lawe' nísadau' chee xeledá xrtie' ca'. Guxeajlí lazre' Noé Dios, san gulebía xi' bénneache zaj zre'e xezr la xu na', lawe' da quebe guleajlí lazre' Dios. Dios bca'ané' Noé xrlátaje lawe' da guxeajlí lazre' Le'.

⁸Abraham, lu xel-la' dxeajlí lazre' chee', gate Dios gunné' le', bzue' dizra', ne guzé'e zéaje' tu lu xezr la xu da guchebe lazre' Dios gunézruje' chee'. Bdxuajé' lázrie', ne quebe nézene' naga zéaje'. ⁹Lawe' da guxeajlí lazre' Dios, guzúa Abraham lu xezr la xu na' da guchebe lazre' Dios gunézruje' chee', naga naca xezr la xu chee benne' zitu' ca'. Guzúe' tu lu xu'u ladxe', ne cá'anqueze ben Isaac, ne Jacob, benne' ca', cá'anqueze Dios guchebe lazre' xelezí'e da na' gunezruj Dios le'. ¹⁰Caní ben Abraham lawe' da guleza lazre' chu'e lu xezre na' da quebe te chee na, da na' guleche Dios, ne da ben Léqueze'.

¹¹Cá'anqueze Sara, lácala ba nácale'e benne' gula, ne quebe nu bi chee' dxalaj, san xel-la' dxeajlí lazre' chee' guque' xrna bidau'. Guzúa tu bi biu chee' lawe' da guxeajlí lazre' Dios gune' ca da guchebe lazre'. ¹²Caní guca, Abraham, lácala ba

gúxrulé'e, guxánle'e zri'ine zre sue' ca naxán xuzre' da zaj dxe' dxu'a tu yegu zren, da quebe nazeque' gulábadxu.

¹³Xúgute benne' caní gulatinge', ne quebe ne xelezí'e da ca' nachébe lazre' Dios, san lawe' da guleajlí lazre' Dios, beledé'ene' na zítu'la, na' belexezaca ba lázrele' na. Caní bululé'ene' gulaque' ca benne' zitu', benne' guledeze lu xezr la xu nigá. ¹⁴Benne' dxuluchálaje' caní dxululé'ene' dxeledé' dxelexíljaje' tu lazrie'. ¹⁵La buluwía lazre' ca naca xezr la xu naga gús'aque', na' waca xelexezrine' na'. ¹⁶Gulaca lazre' tu lazrie' da naca na cháwe'dxa, da na' naca na lazrie' da zua xabáa. Chee le' na' Dios quebe dxexedué'ene' gate dxelenná benne' ca' naque' Dios chee', na' nucueze' tu xezre naga xelezúa benne' ca'.

¹⁷Gate guca lazre' Dios nézene' ca naca xel-la' dxeajlí lazre' chee' Abraham, na' lu xel-la' dxeajlí lazre' chee' guché'e Isaac chee gutié'-be' lau Dios. Ba zue' gutié' bi tu licha' chee' lácala ba nachébe lazre' Dios, gunné': ¹⁸“Ne chee Isaac wazrále'e zri'ine zre su'.” ¹⁹Abraham bxren lazre' Dios wazéquene' gusebané' benne' gate, na' waca nnadxu bezí' lu ne'e zrí'ine' Isaac ládujla benne' gate.

²⁰Isaac, lu xel-la' dxeajlí lazre' chee', guchebe lazre' xelezí' zrí'ine' Jacob, ne Esaú da xrlátaje ca'. ²¹Jacob, lu xel-la' dxeajlí lazre' chee', gate zua gatie', guchebe lazre' xelezí' tu tu zri'ine José da xrlátaje ca', ne be lá'ané' Dios, nuchiche tipe' xágadu nuxre'. ²²José, lu xel-la' dxeajlí lazre' chee', gate ba zua gatie' gunné' welexedxúaj benne' Israel ca' lu xezr la xu Egipto, ne bdxixruj be'e ca dxalla' xelune' chee zrita xu'e.

²³Gate gulaj Moisés, xra xrne'e, lu xel-la' dxeajlí lazre' chee' bulucache' lebe' lawe' chunna beu', lawe' da beledé'ene' naca bidu na' xrtanle'e, ne quebe belezrebe' benne' wenná bea, bénnea' bdxixruj be'e xelate bidu ca'. ²⁴Moisés, lu xel-la'

dxeajlí lazre' chee', gate guque' benne' waca, quebe guca lazre' gaque' zri'ine nu'ula zri'ine benne' wenná bea chee xezr la xu Egipto, ²⁵ san guca lázredxe' té'e' xel-la' zi' nen bi ca' chee Dios quézcala sue' tu chí'dau' lu da ba neza chee da naca dul-la. ²⁶ Gúquene' nácadxa chawe' gate belún lala bènneache chee' ca da guca chee Cristo, quézcala gape' ca naca da gunn'a chee xezr la xu Egipto, lawe' da dxenné'e da gunezruj Dios le'. ²⁷ Moisés, lu xel-la' dxeajlí lazre' chee', bedxúaje' lu xezr la xu Egipto, ne quebe bezrebe' xel-la' dxezrá'a chee benne' wenná bea, na' guzúa chúchue' ca tu benne' dxelé'ene' Dios, Bènnea' quebe gaca nu le'e.

²⁸ Moisés, lu xel-la' dxeajlí lazre' chee', bene' Laní Pascua gate na' bdxixruj be'e' xuluzrá benne' Israel ca' dxen le'e xaga dxa xu'u chee quebe gute gubáz chee xabáa chee xel-la' gute netú zri'ine benne' Israel ca', bi biu nedxu. ²⁹ Benne' Israel ca', lu xel-la' dxeajlí lazre' chee', beledé'e lu Nísadau' Xrna ca benne' dxeledé lu xu bizre, san gate gulú'u benne' Egipto ca' naga ba guledé benne' ca', na' bezraga nisa na', na' gulebé' chí'i benne' Egipto ca', na' gultatí'e.

³⁰ Benne' Israel ca', lu xel-la' dxeajlí lazre' chee', guzré'e ze'e da naxechaj na xezre Jericó ca gudé guledé benne' Israel ca' bezúate xezre na' tu tu lasa du gazre zra. ³¹ Rahab, nu'ula dxez' lu ne'e benne' zaj xu'e neza, lu xel-la' dxeajlí lazre' chee', quebe gutí'e tu zren nen benne' Jericó ca', benne' quebe buluzúa dizra' chee Dios, lawe' da gudapa le' ba lá'ana benne' Israel ca', benne' xeajlenná' lane' xezre na'.

³² ¿Bízradxa nnia'? Québedxa bi lataj napa' guchálaja' ca ben Gedeón, ne ca ben Barac, ne ca ben Sansón, ne ca ben Jefté, ne ca ben David, ne ca ben Samuel, ne ca belún benne' ca' gulenné'

waláz chee Dios. ³³ Benne' ca' lu xel-la' dxeajlí lazre' chee' gulez'í'e xezr la xu ca' chee benne' xula, ne gulenná be'ene' cháwe'dau' benne' waláZR chee' ca', na' gulez'í'e da guchebe lazre' Dios, lawe' da gúcalene' le'.

Belelé' lu dxu'a bezre xixre' ca'.

³⁴ Buluxusulé' xi' da dxéneaca.

Belelé' lu xia nalá.

Benne' ca' zaj nate ni'a na' belexaque' dipa lazre'.

Gulaque' benne' wala lu wedil-la, ne gulara lu ne'e

da guta' chee benne' ca' guledábague' le'.

³⁵ Nu'ula ca' belez'í' lu ne'e benne' gate chee' ca', benne' belexebáne'.

Xebal-le' gulátí'e gate buludé'e le' ba xa', lawe' da quebe belú'e lataj nu gusán le', chee xelezru'é'ene' xel-la' dxexebán chee xezezi'e xetú xel-la' nabán da naca na da li.

³⁶ Xebal-le' belún le' chee',

na' xebal-le' belú'e le',

na' xebal-le' buluchéaje' le' du xia ne gulegu'e le' lizre xia.

³⁷ Beluti'e xebal-le' nen xiaj,

na' xebal-le' gulecheze' le' nen xia.

Xebal-le' buludé'e le' lu da stebe ca',

na' xebal-le' beluti'e nen xia nalá.

Xebal-le' guledé'e nila na'la,

zaj nacue' zra zrila' ne zra béadu ca'.

Baxache' gulaque', na' guledé'e lu da zi' da xa',

na' buluzalje' le'.

³⁸ Bènneache zaj zra' lu xezr la xu nigá quebe zaj naca chee' xezez'í'e ba neza chee benne' caní. Tu guledázqueze' le'e xixre', ne lu xi'a ca', ne lu bluaj ca', ne lu bluaj xu ca'. ³⁹ Xúgute benne' ca' bca'ana chawe' Dios le' lawe' da guleajlí lazre' Le', san quebe ne xezez'í'e ca naca da guchebe lazre' Dios, ⁴⁰ lawe' da nucueza Dios tu da nácadxa chawe' cheedxu dxi'u, chee xelexaca benne' ca' li lazre' tu zren nen dxi'u.

Dxal-la' nna'dxu Jesús

12 Lawe' da zaj naxéčaj benne' zante dxi'u, benne' ca' ba bulul'éne' ca guléajle'e chee Dios, dxal-la' guzúadxu chalá'ala xúgute da dxululale na dxi'u, ne dul-la da naxel-la na dxi'u, na' lu duté xel-la' zren lazre' cheedxu gundxu zrin chee Dios, da naca na ca dxezá' chégudxu chee zrué'eledxu da dxel'éedxu tu chi na'. ²Dxal-la' nna'dxu Jesús, Bénnea' dxune' nápadxu xel-la' dx-eajlí lazre', ne dxune' li lazre' xel-la' dx-eajlí lazre' na'. Jesús gudé' xel-la' zi' le'e xaga begúaj, ne quebe bedué'ene' lawe' da gune'e xel-la' dxebe' na' da dxebeza na Le', na' gudxé'e chalá'a xabela chee lataj blau chee Dios.

³Le nna' xanne' ca da ben Jesús, gudéle'e xel-la' zi' da bulusaca benne' dul-la ca' Le'. Chee le na' quebe chajxréquele gunle zrin chee', ne quebe gute lázrele. ⁴Ba gudíl-laléle dul-la, na' quebe ne gátele lu wedil-la na'. ⁵Quebe gal-la lázrele le'e ca dxun Dios, dxuzéajni'ine' le'e ca zrí'inequeze', gate dxenné':

Zrí'ina', quebe guzú' chalá'ala da dxun Xranu' gate dxusízrene' lue', ne quebe gate lazru' gate dxedil-le' lue'.

⁶Xránadxu dxusízrene' bi ca' nazri'ine', na' xúgute bi dxezí' lu ne'e ca zrí'inequeze' dxudé'-be' xel-la' zi'.

⁷Le guchaga lau le'e xel-la' zi' da dxedele, lawe' da dxuxúe Dios le'e ca zrí'inequeze'. ¿Zra bi quebe dxusízre xrabe' lebe'? ⁸Che Dios quebe dxusízrene' le'e ca dxusízrene' xúgute bi chee' ca', quebe nácale zrí'inequeze Le'. Nácale ca bi lan ca'. ⁹Gate ne nácadxu bidau', bulusízre xra xrnadxu dxi'u, na' gudápadxu le' ba lá'ana. Dxal-la' guzúadxu dizra' Xradxu zue' xabáa, na' gaca bandxu. ¹⁰Xra xrnadxu bulusízrene' dxi'u tu chí'idauze ca da guléquene' chawe', san Dios dxusízrene' dxi'u chee gaca tu da ba neza cheedxu

da naca na li lazre', chee gácadxu lá'azxa ca naca lá'azxa Léqueze'. ¹¹Da li quebe dxedánnedxu da dxusízre xradxu dxi'u, san dxéquedxu zi', na' dxedé na', che dxéajni'idxu ca da dxusízrene' dxi'u, na' gundxu da xrlátaje ca', ne cueza zri lázredxu lau Dios.

Quebe dxal-la' guzúadxu chalá'ala da dxenná Dios

¹²Chee le na' le guzazraj na'le, ne zrí-bele da ba dxelate ni'a na', ¹³ne le sa' lu neza da zaj naca na li, chee quebe chegu n'ale da quebe zaj zua chacha, ne chee xelexaca chacha na.

¹⁴Le gun ba xuzre suale lu xel-la' dxebeza zri lazre' nen xúgute bénneache, ne le gaca li lazre' lau Dios. Che quebe gunle caní, quebe gaca lé'elele Xránadxu. ¹⁵Le guxúe xanne' chee quebe gusanle da chawe' ca' dxunna Dios le'e, ne chee quebe gaca netule le'e ca tu xixre' sla' da dxulala na, ne dxuxrinnaj na da xezícala.

¹⁶Le guxúe xanne' chee quebe gunle da sban, ne quebe guzúale chalá'ala ca da dxunna Dios, ca ben Esaú, bénnea' bsane' xúgute da gunezruj xre' le' chee guzi'e tu cueze xel-la' wagu. ¹⁷Ba nézele ca da guca gudé na', gate guca lazre' Esaú na' si'e da chawe' da naba xre' lau Dios, na' xre' bzue' le' chalá'ala, ne lácala gudxézrele'e, quebe guca xuché'e ca da ba bene'.

¹⁸Quebe dxaca chee ca da guca chee benne' Israel ca', gulebigue' naga zua tu xi'a, da na' wazeque' nu guchiche, ne naga dxala na xi', naga zua da chul-la, ne dxé' zren, ne dxaca be' bdunu'. ¹⁹Bellenne' gudxezre luzu da dxulucueze', ne chi'i Dios bchálajlene' le'. Benne' ca' belenne' chi'i Dios na' gulata' xúene' québedxa guchálajlene' le'. ²⁰Ca'an guca lawe' da quebe gulezéquene' xuluchaga lawe' ca naca da bdxixruj be'e Dios, gunné': "Che tu béadauze guléajba' lu xi'a na', dxal-la' xelútie'-ba' nen xiaj u nen tu

xia nalá xéche'ze.” ²¹ Da na' belelé'ene' bchébele'e na le', na' Moisés gunné': “Dxezrízetea' xel-la' dxezrebe.”

²² Na'a le'e ba nabícale naga zua xi'a lá'azxa da nazí le na Sión, ne lu xezre chee Dios ban, da naca na Jerusalén da zua xabáa, ne naga zaj zra' gáxxue gáxxue gubáz chee xabáa, ²³ ne naga zaj nazraga benne' ca' gulaca bi chee Dios nédxute, benne' ca' ba zaj naxúaj le' xabáa, ne lau Dios, Bénnea' guchi'e chee xúgute bénneache, ne naga zaj zra' be' gulácaqueze benne' ca' ba nun Dios le' li lazre', ²⁴ ne lau Jesús, Benne' wedé dizra' chee xel-la' wezría cube, ne naga bzre'e dxen da dxuchalaj na da cháwedxa ca da bchalaj dxen chee Abel.

²⁵ Chee le na', le guxúe xanne' cuínale chee quebe guzúale chalá'ala Bénnea' dxuchálajlene' dxi'u. Quebe bele-gache benne' ca' buluzúe' chalá'ala Dios gate na' bchálajlene' le' lu xezr la xu nigá, ne quebe gáchedxu dxi'u che guzúadxu chalá'ala Bénnea' dxuchálajlene' dxi'u, zue' xabáa. ²⁶ Lu zra na' gate gunná Dios, na' guzrú' xezr la xu nigá. Na'a dxenné': “Xetú lásaze guniba' quegaze xezr la xu nigá, san cá'aqueze xabáa.” ²⁷ Gate gunné': “Xetú lásaze”, zéaj na xecá'a Dios ca naca da dxeledá, da ca' bene', na' xegá'ana da quebe seque' nu gutá. ²⁸ Dxal-la' xedxu Dios: Xcalenu' lawe' da gunne' dxi'u tu lataj naga dxenná bea Le' da quebe seque' nu gutá. Dxal-la' güe lá'anadxu Dios du lázredxu ne dute xel-la' ba lá'ana, ca da dxezaca ba lazre', ²⁹ lawe' da naca Dios cheedxu ca tu xi' da guzría xi na da sban.

Da dxezaca ba lazre' Dios

13 Quebe gusanle ca nazrí'i ljuwézrele tule xetule ca bíchequezle. ² Le gusá lázrele dxal-la' si' lu na'le benne' zá'aque' lízrele, lawe' da gate belún caní bal-la benne', gulezí'

lu ne'e gubáz chee xabáa ca', ne quebe guleque be'ene'.

³ Le gusá lázrele gácalele benne' zaj xu'e lizre xia, gun cuínale ca benne' xú'unqueze lizre xia nen benne' ca'. Le gusá lázrele gácalele benne' ca' dxeledé'e xel-la' zi', gun cuínale ca benne' dxeledéqueze' xel-la' zi'.

⁴ Xúgutele dxal-la' gápale ba lá'ana xel-la' wechaga na', ne gunle da xlátaje lu xel-la' wechaga na' chee, lawe' da guchi'a Dios chee benne' ca' dxuluzúe' chalá'ala xel-la' wechaga na' chee', ne chee benne' ca' dxelune' da sban.

⁵ Quebe sa lázrele xel-la' gunn'a. Le xezaca ba lázrele ca da nápane lawe' da ba gunná Dios: “Cabata' gusana' lue', ne quebe cueaj xíchajqueza' lue'.” ⁶ Caní naca, du lázredxu waca nnadxu: Xrana' Dios dxácalene' neda'.

Quebe zreba' bi da gusaca bénneache neda'.

⁷ Le gusá lázrele gácalele benne' ca' dxuluxúe' le'e, ne dxuluchálajlene' le'e dizra' chee Dios. Le na' xque ca da dxelúne', ne le chéajle chee Dios ca dxelún benne' ca'.

⁸ Túzqueze ca naca Jesucristo neaje, ne na'a zra, ne chadía chacanna. ⁹ Quebe sile ca da dxuluchalaj benne' dxulusé-dene' da quebe naca na ca da naxúaj na lu xiche lá'azxa chee Dios. Cháwedxa naca guzúa chuchu lázrdaudxu lu xel-la' zri'i lazre' chee Dios, ne quebe chéajledxu da dxeledxixruj bea benne' ca naca da dxal-la' xi'aj gágudxu, lawe' da benne' ca' zjácálene' da ca' cabata' ne xezezi' ba neza ne chee da ca'.

¹⁰ Bxruze judío ca' gulawe' béadu ca' beluti'e lataj lá'azxa. Quebe zaj naca chee' xelawe' guna' da dxugú'udxu dxi'u chee Dios. ¹¹ Bxruze blau judío bzrie' dxen chee béadu ca' lu lataj lá'azxa blau ca tu guna' da dxegúa na dul-la. Buluzex'e da nagá'ana chee béadu ca' cúzrela xezre. ¹² Cá'aqueze gute Jesús

cúzrela xezre na' chee bca'ana chawe' bènneache ne chee dxen cheéqueze'.
¹³Le dxuaj, gundxu tu zren Cristo, lácala xuluzúa bènneache dxi'u chalá'ala ca belune' chee Le'.
¹⁴Lu xezr la xu nigá quebe de cheedxu tu xezre da súatequeze. Dxebézadxu tu da za'.
¹⁵Chee le na' tu dxál-lazqueze güe lá'anadxu Dios nen dxú'aquezdxu ne chee Jesucristo, da naca na ca tu guna' da dxugú'udxu chee Dios.
¹⁶Dxal-la' gusá lázredxu gundxu da xrlátaje, ne bi gunézrujdxu chee benne' ca' quebe bi zaj nape', lawe' da dxezaca ba lazre' Dios le na.

¹⁷Le guzúa dizra' chee benne' ca' dxuluxúe' le'e, ne le gun ca da dxelenné'. Benne' caní dxuluxúe' bènne'du xu'ule, ne xuluxudée' lau Dios ca da zaj nune'. Che gunle caní, na' benne' caní welune' zrin chee' du lazre', ne quebe xelezúa xache', lawe' da che quebe gunle caní, quebe bi da ba neza gaca na chee.

¹⁸Le naba lau Dios gaca chawe' cheentu'. Quebe bi zua lu lázrdauntu' da dxagu na zria netu' lawe' da dxun zi' lázrentu' guntu' da xrlátaje ca naca xúgute da dxuntu'.
¹⁹Dxenaba' le'e nábale lau Dios gunne' neda' lataj xídazega' súalena' le'e naga zúale.

²⁰Dxenaba' lau Dios, Bénnea' dxunne' dxi'u xel-la' dxebeza zri lazre', ne bsebané' Xránadxu Jesucristo ládujla benne' gate. Léqueze' naque' Benne' Blau Dxuxúe' Dxi'u, nácadxu zrila' chee', na' caní naque' lawe' da blalje' dxen chee' da bzua chuchu na xel-la' wezría chadía chacanna da bene'.
²¹Dxenaba' Dios guné' le'e li lazre' chee séquele gunle da xrlátaje ca da dxaca lazre' Le', ne guné' cheentu' ca da dxaca lazre' ne chee Jesucristo. ¡Gaca ba Cristo chadía chacanna! ¡Ca'an gaca na!

²²Le'e, benne' bícha'dau', dxata' xueda' le'e gácale zren lazre' ca naca dizra' caní, da dxulusizre na le'e, na' látega da du nigá dxuzúaja' chee. ²³Dxuzenda' le'e ba bedxúaj bi bíchedxu Timoteo lizre xia, ne che xelá' zé'ebe', na' che'a-be' gate xedajnná'a le'e.

²⁴Le gugapa diuzre xúgute benne' ca' dxuluchálajlene' le'e dizra' chee Dios, ne le gugapa diuzre xúgute benne' bíchedxu ca'. Benne' zaj zre'e xezr la xu Italia nigá dxulugape' le'e diuzre.

²⁵Dxenaba' lau Dios guné' da chawe' chee xúgutele le'e. ¡Ca'an gaca na!

DIZRA' CHEE DIOS DA BZUAJ SANTIAGO

Santiago dxuzuaje' chee benne' ca' zaj nadxúaje' lazre'

1 Neda', Jacobo, naca' wen zrin chee Dios, ne chee Xránadxu Jesucristo. Dxugapa' le'e diuzre. Nácale chazrinnu cue' zri'ine zre sua Israel, ne nase dínnajle du gab'i xezr la xu nigá.

Xel-la' sina da za lu na' Dios

²Benne' bícha'dau', dxal-la' béle'ele gate dxedele zane cue' da stebe ca', ³lawe' da nézele gate dxedé xel-la' dx-eajlí lazre' chee lu da stebe, da nigá dxundxa na le'e zren lazre'. ⁴Le gun ba xuzre gaca li lazre' xel-la' zren lazre' chee chee gácale benne' xrlátaje ne li lazre', ne quebe bi xázrjele.

⁵Che núlale le'e dxexázrjele xel-la' sina, le naba na lau Dios, na' Le' gunne' na le'e, lawe' da dxunézrujle' Dios chee xúgute' bénneache, ne quebe dx-exezúene' zi'. ⁶Dxal-la' nábale nen duté xel-la' dx-eajlí lazre' chee, ne quebe gun chupa lázrele. Benne' dxun chupa lazre' naque' ca xeajxruza chee nísadau' da dxua be' nila na'la. ⁷⁻⁸Benne' dxune' caní, ne quebe zrize dxezúa lázrdawe', ne quebe tuz ca dxun xichaj lázrdawe' quebe dxal-la' guéquene' bi da xunexruj Xránadxu chee'.

⁹Tu benne' bíchedxu naque' baxache' dxal-la' bene' lawe' da guzúa Dios le' ca tu benne' zaca. ¹⁰Benne' nape' xel-la' gunn'a dxal-la' bene' gate gun Dios le' dxexruj lazre' lawe' da naca benne' gunn'a ca tu xiaj xixre' da quebe dx-ezí béateca na. ¹¹Gate dxalaj gubizra, ne dxennále' na, na' dxebizre xixre' na', na' dxexruj xiaj chee na, na' dxedé xel-la' xrtan chee na. Cá'anqueze gaca chee

benne' gunn'a, xenitie' dxácate na' dxezí lu ne'e xel-la' gunn'a.

Ca naca chee da stebe ca' da dxededxu

¹²Ba neza naca na chee benne' dx-uchaga lawe' da stebe ca' duté xel-la' zren lazre' chee', lawe' da che ba bedxúaje' chawe' lu da stebe da dxedé', na' si' lu ne'e da nachebe lazre' Dios gunézruje' chee benne' ca' zaj nazri'ine' Le'. ¹³Gate nu benne' zua da dxegú'u xel-la' na le' chee guné' da calela, quebe dxal-la' guéquene' dxuzúa Dios da na' dxegú'u xel-la' na le', lawe' da quebe bi de da seque' xegú'u xel-la' na Dios chee guné' da calela, ne quebe bi guzúa Dios da xegú'u xel-la' na dxi'u chee gundxu da calela. ¹⁴Tu benne' zua da dxegú'u xel-la' na le' chee guné' da calela gate xel-la' dxezá lazre' da calela chee' dxecá'a na le', ne dxenná be'e na le'. ¹⁵Nadxa ca naca xel-la' dxezá lazre' da calela caní dxuluzán na dul-la, na' gate ba guzeque' zua dul-la na', na' dxute na bénnea'.

¹⁶Benne' bícha'dau' nazri'ite' lazra', quebe güele lataj nu si xe le'e. ¹⁷Xúgute' da zaj naca xrlátaje ne da zaj naca li lazre' da dxexidxu zá'aca na xabáa lu na' Dios, Bénnea' bene' da ca' dxulusení na zran xabáa. Dios quegá dxuchá cuine', ne quebe dxuché' ca dxune'. ¹⁸Ca naca da guca lazre' Dios, ba benne' dxi'u xel-la' nabán. Bchínene' dizra' li chee', chee gá-cadxu ca tu lina nedxu chee', chee da ba ben Le'.

Xel-la' dxucá'ana szren Dios da naca na li lazre'

¹⁹Chee le' na', benne' bícha'dau' nazri'ite' lazra', tu tule le'e dxal-la' gácale ban lazre' chee xénele, san dxal-la' cueza lázrele ca da nnele ne quebe la' zrá'atele. ²⁰Tu benne' xichaj zra'la quebe dxune' da dxezaca ba lazre' Dios. ²¹Chee le' na', le gusán xúgute' da sban ne ca naca da calela da dxanle' na, na'

duṭe xel-la' dxexruj lazre' chee le si' ca naca dizra' chee Dios da ba naxaza na lu xichaj lázrdaule, lawe' da wazeque' dizra' na' guselá na bénne'du xu'ule.

²²Le gun ca da dxulé'e dizra' na' le'e, ne quegá xénezele na. Benne' dxénzene' na dxezí xeze cuine'. ²³Bénnea' dxénzene' dizra' na', ne quebe dxune' ca dxenná na, naque' ca tu benne' dxenné'e lawe' tu lu wana'. ²⁴Dxenné'e ca naque', na' gate ze xeajze' na', na' dxal-la lazre' ca naque'. ²⁵Benne' dxenná xán-nie' ca da bdxixruj be'e Dios da naca na li lazre', ne da dxuselá na dxi'u, ne dxusédie' ca naca na, ne quegá dxénzene' na, quebe dxal-la lazrte' na. Che dxune' ca naca na, benne' nigá gaca tu da ba neza chee' lu xúgute da dxune'.

²⁶Che nu benne' dxéquene' naque' benne' dxucá'ana szren Dios, ne quebe dxezéquene' nna be'ene' luzre', benne' nigá dxezí xeze cuine', na' ca naca xel-la' dxucá'ana szren Dios chee' dácheze naca na. ²⁷Xel-la' dxucá'ana szren Dios da naca na du lazre', ne da naca na da dxezaca ba lazre' Xradxu Dios naca na caní: Gácalēdxu bidu ca' zaj nazebe, ne nu'ula ca' ba zaj nate benne' biu chee' gate zaj zue' lu da zi' da xa', ne quebe gundxu ca naca da sban chee' xezr la xu nigá.

Quebe guchale ca gunle chee tu tu benne'

2 Benne' bícha'dau', le'e dxéajlele chee Xránadxu, Benne' xabáa Jesucristo, quebe dxal-la' guchale ca gunle chee tu tu benne'. ²Che chu'u tu benne' naga nazrágale, ne nácuē' zra lanē' da zaca, ne xu'u da naca na oro lu xrube ne'e, na' cá'anqueze che chu'u tu benne' xache', ne nácuē' zra lanē' tuzruj, ³na' che dxelé'ele cháwedau' bénnea' nácuē' zra lanē' da zaca, ne dxele le': "Gudxe'e nigala naga nácadxa na chawe'", na' dxele benne' xache' na': "Xeajsé na'la, u gudxe'e lu xu ná'teze." ⁴Che dxunle caní, dxuchale ca

dxunle chee tu tu benne', ne dxuchí'ale ca zaj naca bénneache, quebe naca xrlátaje xichaj lázrdaule.

⁵Benne' bícha'dau' nazri'te lazra', le xen da nigá: Dios ba guqué'e benne' ca' zaj naque' benne' xache' lu xezr la xu nigá chee xelaque' benne' gunní'a lu xel-la' dxeajlí lazre', ne chee xelezí lu ne'e da nucueza Dios naga dxenná bea Le', da na' guchēbe lazre' Le' gunézruje' chee benne' ca' zaj nazri'ine' Le'. ⁶Le'e dxuzúale chalá'ala benne' xache' ca'. ¿Quegá benne' gunní'a ca' benne' dxuluchínene' le'e, ne dxelechē'e le'e lau benne' xulawe' ca'? ⁷¿Quegá benne' gunní'a ca' benne' dxelenné' schanni' chee da xrlátaje ca nazi' lale, dxennale nácale bi chee Cristo?

⁸Che da li dxunle ca dxenná da nadxixruj be'e Dios, da nácadxa blau ca da naxúaj na lu xiche lá'azxa, dxenná na: Bzri'i biche ljwezru' ca nazri'i cuinu', xrlátaje dxunle. ⁹Na'a che dxuchale ca dxunle chee tu tu benne', dul-la dxunle, ne nabágale zria lawe' da quebe dxunle du ca bdxixruj be'e Dios. ¹⁰Che tu benne' dxune' ca zaj naca da nadxixruj be'e Dios, san che dxenéguene' ca naca tuze da nadxixruj be'ene', naca na cáteze nabague' zria ca zaj naca xúgute da nadxixruj be'e Dios. ¹¹Léqueze Dios gunné': "Quebe gunle dul-la da dxichaj na xrba chee xel-la' wechaga na", cá'anqueze gunné': "Quebe gútele benne'." Caní naca, che tu benne' quebe dxune' dul-la da dxichaj na xrba chee xel-la' wechaga na', san che dxutiē' benne', ba gunéguene' ca da nadxixruj be'e Dios. ¹²Le'e dxal-la' guchálajle, ne gunle ca dxal-la' xelún benne' ca' guchi'a Dios ca da dxelune', benne' ca' zaj nalá lu na' da gunná bea Le'. ¹³Benne' ca' quebe dxelexexache lazre' chee benne' xula, Dios guchi'e ca da dxelún benne' ca', ne quebe xexache lazre' chee benne' ca', san benne' ca' dxelexexache lazre'

chee benne' xula quebe bi zria xelebague' gate Dios guchi'e ca da zaj nun benne' caní.

Ca naca chee xel-la' dxeajlí lazre', ne chee zrin dxundxu

¹⁴ Le'e, benne' bícha'dau', ¿bizra culuén gapa na che tu benne' dxenné' dxeajlí lazre' Cristo, na' quebe bi dxuné' da dxácalen nu benne' dxexá-zrjene'? ¿Wazeque' xel-la' dxeajlí lazre' na' gusel na le'? ¹⁵ Che zra' benne' bíchedxu u nu'ula zandxu, benne' quebe bi zaj de zra lané' u da xelawe', ¹⁶ na' che nílale le'e xele benne' ca': "Bexiajzé cháwedau'. Nazré'enu', ne gágugu' szri'", san che quebe bi gunézrujle ca da dxexá-zrjene', ¿bizra culuén gapa da na' gunnále? ¹⁷ Caní naca na chee xel-la' dxeajlí lazre'. Che quebe bi zaj de da chawe' da xululé'e na che dxeajlí lazre' bénnea' Cristo, xel-la' dxeajlí lazre' chee' naca na ca tu da gate.

¹⁸ Wannalja nu benne': Lue' dxennáu' dxéajle'u chee Cristo, na' neda' dxuna' da chawe' ca'. Ble'e neda' dxéajle'u chee Cristo ne quebe dxunu' da chawe' ca', na' neda' gulé'eda' lue' dxeajlí lazra' Cristo ne chee da chawe' ca' da dxuna'. ¹⁹ Dxéajle'u lue' zua tuze Dios. Nácaqueze na ca'. Cá'anqueze da xriwe' ca' dxeléajle na, ne dxelezrize na lu xel-la' dx-elezrebe. ²⁰ Lue', benne' xala, ¿dxaca lazru' gulé'eda' lue' naca xel-la' dxeajlí lazre' ca tu da gate che nu benne' dxeajlí lazre' Cristo na' quebe bi zaj de da chawe' da xelunna bea na? ²¹ ¿Ájazra guca chee xra xrtáudxu Abraham guque' benne' xrlátaje lau Dios? Guca na ne chee da bene' gate guxúe' zr'ine' Isaac lu bdupa xiaj chee guzezxe'-be'. ²² ¿Quebe dxele'enu'? Ca da ben Abraham dxulé'e na guxea-jlí lazre' Dios, na' xel-la' dxeajlí lazre' chee' guca na du lazre' ne chee da bene'. ²³ Caní guca li ca da dxenná na lu xiche lá'azxa: Abraham guxéajle'e chee Dios,

na' Dios blé'ene' le' benne' xrlátaje. Na' bchálaje' ca naca chee Abraham, gunné': "Bi zrágaqueza', Abraham."

²⁴ Na'a dxelé'ele Dios dxezi' lu ne'e tu benne' ne chee da chawe' da dxuné', ne quegá tuze lawe' da dxeajlí lazre' Le'. ²⁵ Cá'anqueze guca chee Rahab, nu'ula wen da sban. Nu'ula nigá gulu'e lizre' benne' ca' gusel-la Josué, na' bsi'e benne' ca' neza xula chee belelé' lu na' benne' ca' dxjaque' wedil-la, na' ne chee da bene', Dios guzi' lu ne'e nu'ula na'. ²⁶ Ca naca chee bela' dxen cheedxu, che ba bedxúaj be' chee na, ba nate na, cá'anqueze naca chee xel-la' dxeajlí lazre' cheedxu. Che quebe bi zaj de da chawe' da xululé'e na dxeajlí lazrdxu Cristo, naca na ca tu da gate.

Ca naca chee lúzredxu

3 Benne' bícha'dau', quebe dxal-la' gun cuínale benne' dxulusede dizra' chee Dios, lawe' da nézele ca gun Dios, guchi'a xánnedxe' chee da dxundxu dxi'u, dxuchálajdxu xrtizre'. ² Xúgutedxu dxúnle'edxu da calela. Che nu benne' quebe bi da calela dxuné' ca naca da dxuchá-laje', naque' benne' li lazre', na' wazéquene' nna be'ene' ca nácaqueze bela' dxen chee'. ³ Gate dxugú'udxu xia dxu'a bzrina' chee gunba' da dxaca lazrdxu, wazéquedxu nna be'edxu dutéba'. ⁴ Le na' xque ca naca chee da ca' dxeledán lawe' nísadau'. Lácala zaj naca na da zri'a, na' be' da dxuzriga na le' na dxácale'e na, benne' dxusé'e na dxuchínene' tu xágadauze, na' dxenná be'ene' na chee cheaj na naga dxaca lazre' le'. ⁵ Cá'anqueze naca chee lúzredxu. Naca na tu da dauze da naca chee bela' dxen cheedxu, na' da zrente da dxenná na. Tu xí'dauze waca guzezxe na tu xi'a zren. ⁶ Lúzredxu naca na ca tu xi'. Lúzredxu naca na ca tu xezr la xu sban da zua lu bela' dxen cheedxu, ne dxuxrinaj na du ca nácadxu. Zúale ca tu xi'

lúzredxu da za' lataj ba xa', ne naca na ca tu da dxegú'u na xi' ca naca xúgute da dxundxu. ⁷Wazeque' nu benne' nna bé'ene' xúgute be xixre' ca', ne be zaj zua xrila, ne be snia ca', ne be zaj zra' lu nísadau', ne ba gunná bé'ene'-ba'. ⁸Quebe nu benne' dxezéquene' nna bé'ene' duté da dxenná luzre'. Naca na tu da calela da quebe dxue na lataj nu nna be'e le na, ne naca na ca tu be snia, be dxúteba' bèneache ca'. ⁹Nen lúzredxu níqueze dxue lá'adaxu Xradxu Dios, ne nen le na dxenné'quezdxu da calela chee bèneache, benne' ca' nun Dios na' lu'a le saca Lé'queze'. ¹⁰Lu dxú'adaxu ná'queze dxeledxúaj da xrlátaje ne da calela. Benne' bícha'dau', da nigá quebe dxal-la' gaca na ca'. ¹¹¿Waca galaj nisa chawe' ne nisa sla' lu tuze beaj? ¹²Benne' bícha'dau', ¿waca tu xaga higo cuía na da zixre chee xaga olivo? ¿Waca tu lba uva cuía na da zixre chee xaga higo? Cá'anqueze, tu beaj quebe gaca gunna na nisa xene', ne nisa zri lazre'.

Xel-la' sina da naca li lazre'

¹³Che zua tu benne' ládujla le'e naque' benne' sina, ne dxéajni'ine', dxal-la' gul'éne' na ne chee da chawe' da dxune' duté xel-la' dxexruj lazre' chee' da dxunexruj xel-la' sina le'. ¹⁴Che zua lu lázrdaule xel-la' zre'e lazre' ne xel-la' xa lazre', quebe dxal-la' gucá'ana szren cuínale ca naca xel-la' sina chee'le lawe' da caní nnele da wen lazre' chee da naca da li. ¹⁵Xel-la' sina caní quebe naca na chee Dios. Naca na chee xezr la xu nigá, ne chee bèneache, ne za na lu na' da xriwe'. ¹⁶Naga zua xel-la' zre'e lazre' ne xel-la' xa lazre', na' zaj zra' benne' wechacha ca', ne dxelune' xúgute da calela. ¹⁷Benne' zaj nape' xel-la' sina da dxunna Dios zaj naque' du lazre', ne zren lazre', ne dxene lazre', ne dxexruj lazre'. Dxelexache lazre' ljwezre', ne dxelune' da chawe'. Zaj naque' li lazre' ne quebe

dxelune' cúzreze da chawe'. ¹⁸Benne' dx-elebeche zrié' da ba xa' dxelune' tu zrin da naca ca tu binne da dxunna na da chawe'.

Ca naca chee benne' zaj nazri'ine' da zaj naca chee xezr la xu nigá

4 ¿Bizr chee na' dxdíl-lale ne dxe' da ba xa' ládujla le'e? Dxaca caní lawe' da dxezá lázrele da zaj naca chee da calela, da dxuluzúa na le'e lu da ba xa'. ²Le'e dxaca lázrele bi gápale, na' lawe' da quebe dxezrué'ele na, na' dxútele benne'. Dxezá lázrele tu da sile, na' lawe' da quebe dxezéquele sile na, na' dxdíl-lale ljwézrele, ne dxebéquele da ba xa'. Quebe dxezile ca da dxezá lázrele lawe' da quebe dxenábale na lau Dios. ³Che dxenábale na, quebe dxezile na lawe' da dxenábale na calela, lawe' da dxdánele na chee guchínele na ca da dxaca lázrele. ⁴Le'e, benne' quebe nácale li lazre', ¿quebe nézele che nu benne' dxedánnene' da calela da de lu xezr la xu nigá, benne' nigá dxeçuídene' Dios? Núteteze benne' dxaca lazre' si'e ba neza ca da dxaca lu xezr la xu nigá naque' benne' dxeçuídene' Dios. ⁵Chee le na' dxenná xiche lá'azxa: Be' da nuzúa Dios lázrdaudxu cadite dxe'e gunne xue cheedxu. ⁶Dios dxácale dxene' dxi'u lu xel-la' xrlátaje chee', ca dxenná xiche lá'azxa: Dios dxezré'e benne' ca' dxulucá'ana szren cuína, na' duté xel-la' xrlátaje chee' dxácale' benne' dxexruj lazre' ca'.

⁷Le guzúa dizra' chee Dios.

Le til-la da xriwe', na' le na xuzrunnuj na naga zrle.

⁸Le biga lau Dios, na' Le' bigue' naga zúale le'e.

Le'e, benne' dul-la, le gupá'a cuínale chee dul-la da nabágale.

Le'e, benne' quebe nazri'ile Dios du lázrele, le gaca benne' du lazre'.

⁹Le guzua ba xa' lázre'le.

Le cuezre, ne le gaca xache' lazre'.

Québedxa guzrízrele, na' le cuezre.

Québedxa bele, ne le xewine lazre'.

¹⁰Le gaca dxexruij lazre' lau Xránadxu, na' Le' gucá'ana szrenę' le'e.

Quebe dxal-la' guchí'adxu ca da dxun tu benne' bíchedxu

¹¹Le'e, benne' bícha'dau', quebe nnele cheę ljwézrele tule xetule. Benne' dxennę' cheę tu benne' bíchedxu, u dxuchi'ę ca da dxun bénnea', naque' benne' dxennę' caleła cheę da bdxixruij be'e Dios, ne dxebé' ca zaj naca da bdxixruij be'e Dios. Che dxebéu' ca zaj naca da bdxixruij be'e Dios, dxun cuinu' ca benne' dxuchi'ę da dxaca, ne quebe dxuzí' dizra' da bdxixruij be'ę. ¹²Zua tuze Dios, Bénnea' bdxixruij be'ę da ca', ne dxuchi'ę da dxaca, na' Léqueze' wazéquene' guselé' dxi'u, ne guzría xi'ę dxi'u. Lue', ¿núzraqueze nacu', dxuchi'u da dxun benne' xula?

Quebe nezdxu bi gaca wxre

¹³Na'a, le xene da nigá, le'e dxennale: Na'a u wxre chéajdxu tu xezre ne cheajsuádxu na' tu iza. Gá'udxu, ne gútedxu cheę gucúdedxu dumí. ¹⁴Quebe nézele ca da gaca wxre. ¿Ájazra naca cheę xel-la' nabán cheędxu? Naca na ca tu beuj da dxebé' tu chi'i, na' chadí dxenite na. ¹⁵Da dxal-la' guchálajle naca caní: Che Xránadxu dxaca lazre', gaca bandxu ne gundxu da nigá u da na'. ¹⁶Le'e dxucá'ana szren cuínale ca da dxuchálajle. Xel-la' dxucá'ana szren cuina caní naca na da caleła. ¹⁷Che nu benne' ba nézene' ca da chawe' da dxal-la' gunę', na' quebe dxunę' na, na' bágale'ę dul-la.

Santiago dxusízrenę' benne' gunnía' ca'

5 Le xene da nigá, le'e, benne' gunnía'. Le cuezre ne le xewine lazre' ca naca da zi' da xa' da lé'ele. ²Ca naca xel-la' gunnía' cheęle ba zaj nuzru na, na'

zra lánale zaca ba zaj nagu béadu ca' le na. ³Ca naca oro cheęle ne plata cheęle, ba gulezén xrche'ę na, na' lawe' da quebe bchínele da gunnía' cheęle lu da xrlátaje, da caní dxulul'e na nabá-gale zria lau Dios, na' Le' gudé' le'e lu da ba xa'. Caní gaca cheęle lawe' da btúbele xel-la' gunnía' cheę gápale na gate ba dxéxrule. ⁴Quebe gudfzruje ca naca cheę na benne' ca' belexelape' lina cheęle, na' dxelawe' zria cheę da quebe gudfzruje, na' Xránadxu, Bénnea' nape' dute xel-la' dxenná bea, ba benne' ca naca zria da dxelagu benne' ca' cheęle le'e. ⁵Lu xezr la xu nigá ba guzile ba neza xel-la' gunnía' cheęle ne xúgute da zaca ca', ne guzrenle ca tu bezre dxánnele'e, na' ba dxezrín zra xelútie'-ba'. ⁶Le'e ba bzria xile, ne ba bétéle benne' quebe bi da caleła zaj nune', na' benne' ca' quebe guledábage' le'e.

Dxal-la' gácadxu benne' zren lazre' ne guchálajlędxu Dios

⁷Cheę le na', benne' bícha'dau', le gaca zren lazre' ca zrindxa zra xelá' Xránadxu. Benne' dxaza dxa'ana dxal-la' cueze' dute xel-la' zren lazre' cheę' ca zrindxa zra xelá' xiuj ba ne xiuj lina, cheę xezí' lu ne'ę lina chawe' cheę'. ⁸Cá'anqueze le gaca zren lazre', ne quebe gute lázrele, lawe' da ba zua gagu zra xelá' Xránadxu. ⁹Le'e, benne' bícha'dau', quebe gágule zria cheę ljwézrele, cheę quebe guchi'a Dios cheę da dxunle, lawe' da zua gágute zra xelá' Dios, Bénnea' dxuchi'ę da dxaca. ¹⁰Le'e, benne' bícha'dau', le gusá lázrele ca guca cheę benne' ca' gulennę' waláz cheę Dios, gulaque' zren lazre' lácala guledé'ę xel-la' zi'. ¹¹Dxennadxu guca da ba neza zren cheę benne' ca' buluchaga lawę' xel-la' zi' ca'. Le'e ba benle ca benne' zren lazre' guca Job, ne ba nézele ca da chawe' ben Dios cheę' ca gudé na'. Xránadxu naque' zri'i lazre', ne dxexache lazre' dxi'u.

¹²Da dxundxa na ba xen, benne' bícha'dau', quebe guzétajle xabáa, ne quebe guzétajle da zua xezr la xu nigá, ne quebe bi da xula guzétajle. Gate nnale: Awe', le nnaze: Awe', ne gate nnale: Cabí, le nnaze: Cabí, chee quebe guzría xi' Dios le'e.

¹³Che núlale dxedele lu da zi' da xa', dxal-la' guchálajle Dios. Che nu benne' zue' xel-la' dxebé, dxal-la' gul-le' da güe láné' Dios. ¹⁴Che nu benne' quebe chawe' zue', dxal-la' nne' benne' gula ca' dxuluxúe' bi chee Cristo, chee xelenabe' lau Dios xexune' benne' we' na', ne xelegúe' le' da za lu La Xránadxu. ¹⁵Gate dxuluchálajlene' Dios dute xel-la' dxelejli' lazre' chee', na' xexaca benne' we' na', na' Xránadxu xechise' le', ne che bi dul-la nune', na' gunitite lau Dios chee bènea'. ¹⁶Chee le na', le xrúalepe lau

ljwézrele tule xetule dul-la da nunle, ne le guchálajle Dios chee tule xetule, chee xexune' le'e. Da dxenaba benne' xrlá-taje du lazre' lau Dios wazrué'ene' na. ¹⁷Elías, bènea' gunné' waláz chee Dios, guque' tu bèneache ca dxi'u, na' gate gunabe' lau Dios chee quebe gaca xiuuj, na' quebe guca xiuuj lu xezr la xu dute chun iza xugachaj. ¹⁸Gudé na', gate gunabe' lau Dios da xula, na' belá' xiuuj, na' xezr la xu na' benna na lina.

¹⁹Le'e, benne' bícha'dau', che nu benne' ládujla le'e dxecuase' lu da li, na' che núlale le'e xegu'ule le' lu xel-la' li, ²⁰dxal-la' nézele, núteteze benne' xucuase' tu benne' dul-la lu neza calela da zeajlene', guselé' bène'du xu'u benne' dul-la na' lu xel-la' gute, na' xunite lau Dios dul-la zan da nabaga bènea'.

DÍZRA'DAU' NEDXU DA BZUAJ SAN PEDRO

Dizra' gusel-la Pedro chee benne' ca' gucá'a Jesús, ne zaj nase dínnaje'

1 Neda', Pedro, naca' benne' gubáz chee Jesucristo. Dxuzúaja' da nigá chee le'e nadxúajle lázrele, ne zrale xezre ca' zaj nababa Ponto, ne xezre ca' zaj nababa Galacia, ne xezre ca' zaj nababa Capadocia, ne xezre ca' zaj nababa Asia, ne xezre ca' zaj nababa Bitinia. ²Xradxu Dios ba guqu'é le'e ca da gunné' gate nate. Ne chee Be' Lá'azxa ba gucá'a Dios le'e chee guzúale dizra' chee', ne chee chádxele lu dxen chee Jesucristo. Dxenaba' lau Dios gúnnale' le'e da chawe', ne xel-la' dxebeza zri lazre'.

Ca da dxebeza lázredxu

³Dxue lánadxu Dios, Xra Xránadxu Jesucristo. Lawe' da dxexache lázrele' dxi'u ba bene' cheedxu bexálajdxu lawe' da bebán Jesucristo ládujla benne' gate. Da nigá nuzaga na dxi'u chee cueza lázredxu, ⁴ne gun na sile ca da nucueza Dios chee xabáa, da na' quebe cuia xi na, ne quebe xexúe na, ne quebe te chee na. ⁵Lawe' da dxéajlele chee Dios, Le' guxre' le'e nen xel-la' waca chee' ca zrindxa zra na' sile du ca naca xel-la' weselá da nucueze' cheedxu, na' gulé'ene' na lu zra bzebe ni'.

⁶Chee le' na' dxebéle'ele lácala dxun na ba xen tele xel-la' zi' tu chí'dau'. ⁷Xel-la' dxeajlí lazre' chee gaca chee na ca dxaca chee oro da dxedé na lu xi' chee xegá'ana chawe' na. Caní naca chee xel-la' dxeajlí lazre' chee, gate ba gudé na lu xel-la' zi', na' xegá'ana na da zácadxa chee sile xel-la' szren, ne xel-la' ba lánana lu zra na' gate xelá' Jesucristo.

⁸Le'e nazri'ile Jesucristo lácala quebe ne lé'ele Le', na' lawe' da nuxrén lázrele

Le' lácala quebe ne xelé'ele Le', dxebéle'ele. Ca naca xel-la' dxebé chee naca na da zrente da quebe séquentu' xuzájla'antu' ⁹lawe' da nalá benne'du xu'ule lawe' da dxéajlele chee Dios. ¹⁰Lu iza da ba guledé gate nate, benne' ca' gu-lenné' waláz chee Dios buluxúe xánnie', ne belexebéajni'e ca naca chee xel-la' weselá nigá, na' buluchálaje' ca naca xel-la' chawe' chee Dios da gunné' le'e. ¹¹Be' Lá'azxa, Bénnea' gusel-la Cristo, bzéajni'ine' benne' ca' buluchálaje' waláz chee Dios gate nate ca da saca Cristo, ne ca naca xel-la' szren da si'e te na', na' benne' ca' belexexílaje' nuzra benne' nigá, ne bátala gaca da dxenná Be' Lá'azxa, Bénnea' zúale le'. ¹²Dios bzéajni'ine' benne' ca' ca naca chee da na' dxuluchálaje', gunné' quebe naca na chee lé'queze', san naca na cheedxu dxi'u. Na'a, da nigá naca dizra' chawe' da ba bénquezele, da buluchalaj benne' ca' ne chee Be' Lá'azxa, Bénnea' ze'e xabáa. Da caní gulaca lazre' gubáz chee xabáa xeléajni'ine'.

Dios dxenné' dxi'u chee gacadxu bi lá'azxa chee'

¹³Chee le' na', le guxúe xanne' ca da gunle. Tu dxál-lazqueze gunle da xrlátaje. Dute lázrdaule le guxrén lazre' xel-la' chawe' chee Dios, ne le cueza da gunné' le'e lu zra na' gate xelá' Jesucristo. ¹⁴Lawe' da nácale bi chee Dios, le guzúa dizra' chee', ne québedxa gunle ca da guzá lázrele gate quebe ne gúnbeale Dios. ¹⁵Na'a, le ta lu xel-la' lá'azxa chee' lawe' da naca Dios lá'azxa, Bénnea' gunné' le'e. ¹⁶Cá'anqueze naxúajqueze na lu xiche lá'azxa chee', dxenné': "Le gaca lá'azxa, lawe' da naca' neda' lá'azxa."

¹⁷Che dxennale le'e naca Dios Xrale, na' Le' dxuchi'e ca da dxelún bénneache, dxal-la' zrébele Le' dxácaté ne zúale lu xezr la xu nigá. ¹⁸Dios ba bselé' le'e lu da benle gate na' guxíajlele ca da belún xra xrtaule, da calela, na' ba nézque-

zle quebe guca na ne chee tu da dxuzru na ca oro, ne plata. ¹⁹Bselé' le'e ne chee dxen zácale'e chee Cristo, Bénnea' bzua cuine' lau Dios ca tu zrila'dau' du lazre', ne quebe nadxenba', be dxelutie' chee xunite lau Dios dul-la zaj nabague'. ²⁰Cristo ba nácaqueze chee' gate nate saque' da nigá, na' ble'e lu zra caní chee gaca chawe' chee. ²¹Ne chee Cristo dxéajle chee Dios, Bénnea' bsebané' Le' ládujla benne' gate, ne bca'ané' Le' szren. Chee le na' dxéajle chee Dios, ne dxuxrén lázrele Le'.

²²Na'a, ba bzúale dizra' chee xel-la' li ne chee Be' Lá'azxa, chee zri'ile duté lázrdaule benne' zaj nababe' dxi'u. Chee le na' dxal-la' zri'ile ljwézrele tule xetule duté lázrdaule, ne duté xel-la' wala chee. ²³Caní naca na lawe' da ba bexálajle, quegá chee bénneache, benne' dxelate. Nálajle ne chee dizra' chee Dios, da naca ban na, ne da zua na chadía chacanna. ²⁴Caní naca na lawe' da naxúaj na lu xiche lá'azxa, da dxenná na: Xúgute bénneache zaj naque' ca xixre', na' xel-la' szren chee' naca na ca xiaj chee xixre'du ca'.

Xixre' na' dxebizre na, na' xiaj chee na dxexruj na.

²⁵Dizra' chee Xránadxu zúatequeze na chadía chacanna.

Dizra' nigá ba benle le'e ne chee dizra' chawe' da dxuchálajntu'.

2 Chee le na', québedxa gunle da calēla. Québedxa nu si xeje, ne quebe gunle láweze da xrlátaje. Québedxa gácale xa lazre', ne quebe bi nnele chee ljwézrele. ²Cáteze dxeledane bidu dxe'ene ca' nize', ca' le gane xrtizra Dios, da naca na du lazre', chee gun na se cháchale, ne lale lu na' dul-la. ³Che da li ba guzú laule nézele naca Xránadxu chawe', na' gaca lázrele sídxale xrtizre'.

Cristo naque' ca xiaj xre ban

⁴Le biga lau Xránadxu, Bénnea' naque' ca xiaj xre ban. Bénneache buluzúe' Le' chalá'ala, san lau Dios naque' tu xiaj chawe' da zácale'e na. ⁵Cá'anqueze le'e nácale ca xiaj ban ca'. Le güe Dios lataj guchínene' le'e chee guné' tu xudau' chee Be' Lá'azxa chee', gácale bxruze chee Dios chee guzúale lau Dios ca da dxunna Be' Lá'azxa le'e. Da nigá waca gunle ne chee Jesucristo, da xezaca ba lazre' Dios. ⁶Chee le na' lu xiche lá'azxa dxenná Dios:

Neda' nuzúa' lu xezre lá'azxa tu benne' naque' ca tu xiaj blau chee xu'u, da naca na tu xiaj du lazre', ne da zácale'e na, na' nu benne' chéajle'e chee Le' quebe gaca xel-la' stu chee'.

⁷Cheje le'e dxéajle chee', xiaj nigá zácale'e na, san chee benne' ca' quebe dxéajle'e naca na ca da dxenná xiche lá'azxa: Xiaj na' buluzúa benne' wen xu'u ca' chalá'ala,

le na' naca na xiaj blau.

⁸Cá'anqueze naca na ca dxenná xiche lá'azxa:

Naque' tu xiaj da dxechegu bénneache, na' lawe' le na' dxeajlecházie'.

Caní naca na, dxeajlecházie' lawe' da quebe dxelezi'e dizra' chee Dios. Dios ba núnqueze' gaca caní chee benne' ca'.

Benne' zaj naque' bi chee Dios

⁹Le'e nácale benne' ba gucá'a Dios. Nácale bxuze lu zrin chee Benne' Wenná Bea, Jesús. Nácale tu xezre lá'azxa chee Dios, na' Le' naxá'awene' le'e chee guzenle bénneache ca naca xel-la' szren chee Dios. Le' gunné' le'e chee xedxúajle lu da chul-la, na' súale lu xel-la' naxaní' li lazre' chee'. ¹⁰Gate nate quebe nu bexache lazre' le'e, san na'a Diósqueze' dxexache lazre' le'e.

Zúale chee gunle zrin chee Dios

¹¹ Bi bicha' nazri'ite lazra', dxata' xueda' le'e, nácale ca benne' zaj zre'e zitu' naga zua lazre', chee quebe gunle ca da dxenná bela' dxen chee, da dxedí-lalē na bēnne'du xu'ule. ¹² Ca da dxunle, dxal-la' gaca na xrlátaje lau bēnneache quebe zaj núnbe'e Dios. Caní gaca na, lácala na'a dxelenné' chee, dxelenné' nácale benne' ca' dxelunē' da zrinnaj, na' welelé'eqezne' da xrlátaje da dxunle, na' xelúe lá'anaqueze' Dios gate zrin zra xenaba Dios da ben tu tu bēnneache.

¹³ Lawe' da nácale bi chee Xránadxu, le guzúa dizra' ca da dxenná benne' xu'u lawe', bēnne' buluzúa benne' xezre ca'. Le guzúa dizra' chee benne' napē' xel-la' dxenná bea zren, ¹⁴ ne chee benne' dxelenná bea, benne' ca' nasel-la le' chee xuludé' xel-la' zi' benne' ca' dxelunē' da zrinnaj, ne xelu'e ba lá'ana benne' ca' dxelunē' da xrlátaje. ¹⁵ Dios dxaca lazre' gunle le'e da xrlátaje chee guzúa zrile benne' ca' quebe zaj naxéajni'ine', gate dxelenné' calela chee dizra' chawe' da nazile.

¹⁶ Le gaca ca benne' quebe zaj nada'u, san quebe guchínele da na' nazile, quebe gunle da calela. Le gaca ca benne' ca' dxenná be'e Dios. ¹⁷ Le gapa ba lá'ana xúgute bēnneache. Le zri'i bi bíchedxu ca'. Le zrebe Dios, ne le gapa ba lá'ana benne' dxenná be'e.

Ca da guzaca zi' Cristo dxuzéajni'i na dxi'u

¹⁸ Le'e, bi wen zrin, le guzúa dizra' chee xránale dutē xel-la' ba lá'ana, quegaze chee benne' zaj naque' zri'i lazre', ne dxelebé'e gunne xue chee, san cá'aqueze gunle chee benne' snia ca' zaj naque' xránale. ¹⁹ Naca na tu da xrlátaje che guchaga laudxu xel-la' zi' da dxulusaca bēnneache dxi'u gate dxundxu da nezdxu naca na da dxezaca ba lazre'

Dios. ²⁰ Che dxunle tu da calela, na' dxulusaca zi'e le'e, ¿bizra da ba neza gaca na chee? Na'a, che dxedele xel-la' zi' lawe' da dxunle da xrlátaje, ne dxuchaga laule na dutē xel-la' zren lazre' chee, da nigá naca na xrlátaje lau Dios. ²¹ Dios gunné' le'e chee tele xel-la' zi' caní, lawe' da gudé Cristo xel-la' zi' waláz chee le'e, da dxuzéajni'i na le'e gunle ca da ben Le'.

²² Le' quebe bene' dul-la, ne quebe nu guzú xē'e.

²³ Gate bulucháchalēne' Le', quebe bi dizra' schanni' bechebe'.

Gate buludé' Le' xel-la' zi', Le' quebe bexéchaje'.

Bzua cuine' lu na' Dios, Bēnne' dxuchi'e ca da naca na. ²⁴ Biá'queze Cristo na' lu bela' dxen chee' ca naca dul-la cheedxu gate gudē'e le'e xaga begúaj, chee gácadxu ca benne' gate, québedxa gundxu dul-la, na' gaca bandxu chee gundxu da xrlátaje.

Le' guzrí'e wē' chee xexácale le'e chawe'.

²⁵ Le'e gudale gate nate ca zri'la' zaj naníteba'.

Na'a ba bela'le lau Cristo, Bēnne' dxuxúe' le'e ca dxun tu benne' dxuxúe' zrí'la'du ca', ne dxe'e gunne xue chee bēnne'du xú'ule.

Ca dxal-la' xelún benne' zaj nuchaga na'

3 Cá'aqueze le'e, nu'ula nuchaga na'le, le guzúa dizra' chee benne' chee, na' che núlale zua benne' biu chee quebe dxéajle'e xrtizra Dios, xexúnbe'e naca na da li gate lé'ene' da xrlátaje da dxun zru'ulē', ne quebe gun na ba xen bi guchalaj zru'ulē', ² lawe' da lé'ezene' da xrlátaje dxunē' lawe' da naque' xrlátaje, ne dxape' le' ba lá'ana. ³ Ca lechítaje chee tu nu'ula quebe dxal-la' gaca na cúzreze ca xel-la' dxupá'a xicha xíchaje', ne lechítaje da naca na oro, ne zra lane' da zácale'e.

⁴Lechítaję cheę' dxal-la' gaca na lu xichaj lázrdawe', da naca na tu da xrtan da quebe te cheę na. Da xrtan nigá naca na tu be' dxexruj lazre', ne zren lazre', da na' zácáleę na lau Dios. ⁵Cá'anqueze guca lechítaję cheę nu'ula ca' gulaque' bi cheę Dios gate nate. Nu'ula ca' buluxrén lazre' Dios, ne buluzię' dizra' cheę benne' cheę'. ⁶Cá'anqueze guca Sara, bzue' dizra' cheę Abraham, na' guzre' le': "Xran." Le'e wácaquezle ca guca Sara na' che gunle da xrlátaję, ne quebe bi guchebe lázrele.

⁷Cá'anqueze le'e, benne' biu, zúalele nu'ula, le gaca dxexruj lazre' nen zrú'ulale. Le gapa ba lá'ana zrú'ulale lawe' da quebe zaj naque' benne' wal-la ca le'e, ne cá'anqueze zaj nape' xel-la' nabán ca da nunna Dios le'e dutę xel-la' chawe' cheę'. Dخال-la' gunle caní cheę quebe bi guzaga na le'e gate guchálajlele Dios.

Benne' dxeledęę' xel-la' zi' lawe' da dxelunę' da chawe'

⁸Na'a:

Le gaca tuze

Le xexache lazre' ljwézrele, ne le zri'i ljwézrele.

Le gaca benne' zri'i lazre', ne zren lazre'.

⁹Quebe gunle da calela cheę benne' dxunę' cheęle da calela, ne quebe gucháchalele benne' dxulucháchalęne' le'e. Le gun da chawe' cheę benne' ca' lawe' da gunnę' Dios le'e cheę sile da chawe'. ¹⁰Caní naca na lawe' da dxenná xiche lá'azxa:

Benne' dxaca lazre' gaca tu da ba neza cheę',

ne suę' xel-la' dxebé

dxal-la' guxúę' luzre' cheę quebe nne' dizra' schanni',

ne guxúę' dxu'ę cheę quebe nne' na da wen lazre'.

¹¹Dخال-la' gusanę' ca da calela bene',

ne québedxa gunę' na, cheę gunę' da chawe'.

Dخال-la' cueche zrię' da ba xa',

ne gaque' benne' zren lazre'.

¹²Xránadxu dxuxúę' benne' chawe' ca',

ne dxenne' ca da dxelenaba benne' ca'.

Dxuzúę' chalá'ala benne' wen da zrinnaj ca'.

¹³¿Núzraqueze benne' gunę' cheęle da zrinnaj che le'e cuele gunne xue gunle da chawe'? ¹⁴Lácala tele xel-la' zi' lawe' da dxunle da chawe', gaca na da ba neza cheęle. Quebe nu zrébele, ne quebe xrúsale. ¹⁵Le gapa ba lá'ana Cristo ca Xránale lu xichaj lázrdawle. Le súateze ban lazre' xechébele lau benne' ca' dxelenabe' le'e bizr cheę na' dxuxrén lázrele Le'. Le gun na lu xel-la' dxexruj lazre', ne le gapa ba lá'ana benne' ca'. ¹⁶Le gun da chawe' cheę quebe bi sua da gagu na zria lu xichaj lázrdawle, na' benne' ca' dxelenné' schanni' cheę da chawe' da dxunle lawe' da dxéajlele cheę Cristo, xelapa stu'ę ca dizra' da dxelenné'. ¹⁷Zácadxa tele xel-la' zi' lawe' da dxunle da chawe' cáteze dxaca lazre Dios, ne quegá tele xel-la' zi' lawe' da dxunle da calela.

¹⁸Caní naca na lawe' da gudé Cristo tu lásaze lu xel-la' gute zi xa' ne cheę dul-la da nabágadxu. Le' guque' benne' xrlátaję, na' gudęę' xel-la' zi' waláz cheędxu dxi'u, benne' wen da zrinnaj, cheę gaca xechéę dxi'u lau Dios. Gute Cristo lu bel-la' dxen cheę', san bebánqueze' lu be' nácaqueze'. ¹⁹Cá'anqueze lu be' nácaqueze' guxájaję' lataj chul-la naga xeajchálajlęne' be' zaj nácaqueze benne' ca' nuzaga xel-la' gute lu lataj na'. ²⁰Benne' caní quebe buluzię' dizra' ca da bchalaj Noé gate nate, gate na' guleza Dios dutę xel-la' zren lazre' cheę' dxácate na' ben Noé da zren na' da dxedá lawe' nísadau'. Lu da dxedá lawe' nísadau' gulelá xrínuze benne' ne cheę nisa xiuj da na' bzria xi na ca naca bėnneache. ²¹Nisa xiuj na' dxulé'e na ca naca nisa naga dxelexedxúa

benne' nisa, na' lu le na' naladxu na'a. Nisa nigá quegá le na' quibe na dxi'u, san dxulé'e na dxaca lázredxu chádxedxu lau Dios, na' ladxu lawe' da bebán Jesu-cristo ládujla benne' gate, ²² ne begüene' xabáa, ne zué' chalá'a xabêla chee Dios, na' dizra' chee Le' dxuluzúa gubáz chee xabáa, gubáz ca' zaj nape' xel-la' dxenná bea, ne gubáz blau ca'.

Dxal-la' gundxu zrin chee Dios guchínedxu ca da ba nunna Dios dxi'u

4 Chee le na', ca ben Cristo, gudé' xel-la' zi' lu belá' dxen chee', cá'anqueze le'e dxal-la' si lu nale tele xel-la' zi' lawe' da che tu benne' ba gudé' xel-la' zi' lu belá' dxen chee', ba bzua bënnea' chalá'ala da naca dul-la, ² chee guné' ca da dxaca lazre' Dios dxácatê naca bané', ne quebe guné' ca da dxenná belá' dxen chee'. ³ Naze cá'tite da ba benle gate nate da dxeledanne benne' quebe zaj núnbe'e Dios. Ca lu iza da ba guledé benle da sban ca', ne da zrinnaj ca' da guzá lázrele, ne guzúzrele, ne benle laní sban ca'. Güé'elê'elê, ne bca'ana szrenle bedau' xiaj xaga ca' da na' dxecuide Dios. ⁴ Benne' ca' quebe zaj núnbe'e Dios dxelexebánene' lawe' da québedxa dx-unle le' tuze ca naca da sban da dx-elune', na' chee le na' dxelenné' schanni' chee. ⁵ Benne' ca', dxun na ba xen xul-ulé'ene' ca da zaj nune' lau Bénnea' naca chee' guchi'e chee benne' ban ca', ne chee benne' gate ca'. ⁶ Benne' ca' zaj nate belenne' ca naca dizra' chee Dios chee xelexaca bané' lu be' zaj nácaqueze' ca naca ban Dios, lácala lu xezr la xu nigá Dios bchi'e ca da belune' ca guchi'e chee xúgute bënneache.

⁷ Ba za cheajsé chee xúgute da dx-elé'edxu. Chee le na', le sua ban lazre', ne le guchálajlequeze Dios. ⁸ Da nácadxa blau, le zrí'ile'e ljwézrele. Che nazrí'dxu benne' bíchedxu ca', na' gunité' laudxu da calela da beluné' cheedxu. ⁹ Le guzúa

lízrele ljwézrele tule xetule, ne quebe nnele chee ljwézrele. ¹⁰ Tu tule le'e dxal-la' gunle zrin chee ljwézrele ca da nunna Dios chee, ca benne' dxuluchínene' chawe' ca da chawe' da dxunezruj Dios chee'. ¹¹ Che nu benne' dxuchálajé', dxal-la' guchálajé' da gunezruj Dios le'. Che nu benne' guné' zrin chee, dxal-la' guné' na guchínene' xel-la' waca chee' da nunezruj Dios le'. Ca naca xúgute da dx-unle, dxal-la' gaca ba Dios lawe' da nácale bi chee Jesucristo, na' chee Le' gaca xel-la' szren, ne xel-la' dxenná bea chadía chacanna. ¡Ca'an gaca na!

Wadedxu xel-la' zi' lawe' da nácadxu bi chee Cristo

¹² Benne' bícha'dau' nazrí'te lazra', quebe xebánele ca naca xel-la' zi' zren da tele, quebe guéquele naca na tu da quebe dxal-la' gaca. ¹³ Le be lawe' da tele xel-la' zi' ca xel-la' zi' da gudé Cristo chee cá'anqueze béle'ele gate lé'ele xel-la' szren chee Cristo gate zezé'e. ¹⁴ Che dxulugazja' benne' le'e dizra' lawe' da nácale bi chee Cristo, ba neza zren naca na chee, lawe' da zúale Be' Lá'azxa chee Dios le'e, Bénnea' ze'e xabáa. Dxelenné bënneache schanni' chee Le', san le'e dxápale Le' ba lá'ana. ¹⁵ Che núlale le'e dxedele xel-la' zi', quebe dxal-la' gaca na lawe' da bétele benne', u bi gulanle chee benne', u bi da zrinnaj benle, u lawe' da guchixre chee da naca chee benne' xula. ¹⁶ Che nu benne' dxedé' xel-la' zi' lawe' da naque' bi chee Cristo, quebe dxal-la' xedu'é'ene', san dxal-la' güe lá'ane' Dios lawe' da nazí le' bi chee Cristo. ¹⁷ Ba bzrin zra su lau Dios guchi'e ca da zaj nun tu tu bi nácabé' chee Le'. Che Dios su lawe' guchi'e ca da nundxu dxi'u, ¿ájala gaca chee benne' ca' quebe dxeluné' ca dxenná dizra' chawe' chee Dios? ¹⁸ Che benne' xrlátaje ca' cánnaze xeledé' ¿ájazraqueze gaca chee benne' wen da zrinnaj ca', ne chee benne' wen

dul-la ca'? ¹⁹Caní naca, benne' dxeledé' xel-la' zi' lawe' da dxeluné' da xrlátaje da dxaca lazre' Dios, dxal-la' xelúnqueze' da xrlátaje, ne xuluzúé' bénne'du zaj xu'e lu na' Dios, Bénnea' bene' le', lawe' da naca Le' li lazre'.

Pedro dxuzéajni'ine' bi ca' chee Cristo

5 Dxuzéajni'ida' le'e, benne' gula dxuxúele tu tu cue' bi ca' chee Cristo lawe' da naca' neda' benne' gula ca le'e, ne dxexechéba' ca xel-la' zi' da gudé Cristo, ne cá'aqueze lawe' da gúnnaqueze' neda', ne le'e, chee sidxu da xabáa chee' da gulé'ene' te chee zra caní. ²Ca dxelún benne' dxuluxúé' zrila' ca', le guxúe bidu ca' chee Dios, bénne'du ca' nabágale. Le gun na duté lázrdaule ca dxaca lazre' Dios, quebe gun na ba xen nu benne' nna bé'ene' le'e, ne quebe gunle ba chee dumí. Le gun zrin du lázrele, ³ne quebe gun cuínale ca xrane bénne'du ca' nabágale. Le gun ba xuzre gácale tu da gulé'e na ca dxal-la' xelún bénne'du ca'. ⁴Caní gaca, gate xelá' Xránadxu, Benne' Blau dxuxúé' zrila' ca', sile tu lazruj da naca na chee xabáa, da quebe te chee na. ⁵Cá'aqueze le'e, benne' cuide', le gun ca da dxelenná benne' gula ca'. Xúgutele dxal-la' guzúale dizra' chee ljuwézrele tule xetule lu xel-la' dxexruj lazre' chee lawe' da dxenná xiche lá'axxa:

Dios dxezré'e benne' ca' dxulucá'ana szren cuine'.

Duté xel-la' chawe' chee' dxácalene' benne' dxexruj lazre' ca'.

⁶Le guzexruj lázrele lu xel-la' dxenná bea zren chee Dios, na' xechisa Le' le'e ca zrin zra chee na. ⁷Le guzúa lu na' Dios

xúgute da dxele gunne xue, lawe' da dxe' Le' gunne xue da naca chee.

⁸Le gaca benne' li lazre', ne le sua ban lazre' lawe' da dxedá da xriwe', da na' dxezrá'a na le'e, ne naca na ca tu beze xixre', dxebezre xa'aba', dxíl-jaba' nu guébeba'. ⁹Le tíl-lale da xriwe', ne le se chacha lu xel-la' dxeajlí lazre' chee, lawe' da nézquezele dxeledéqueze xúgute bíchele zaj zre'e lu xezr la xu nigá xel-la' zi' ca da dxedele le'e. ¹⁰Gate bache gudele xel-la' zi' tu chi'i, Dios guné' le'e li lazre', ne guzúa chawe'e le'e. Dios ná'queze dxunne' dxi'u xúgute da chawe' chee', ne ba gunné' dxi'u chee gápadxu da naca chee xabáa chee' lawe' da nácadxu bi chee Jesucristo. ¹¹Gaca ba Le', ne chee' Le' gaca xel-la' dxenná bea chadía chacanna. ¡Ca'an gaca na!

Pedro dxugape' diuzre bi bíchedxu ca'

¹²Silvano, benne' nigá dxéqueda' naque' tu bi bíchedxu li lazre', ba bzuaje' dizra' caní chee le'e cáteze neda', Pedro, ba gucha' le' guzúaje'. Dxuzéajni'ida' le'e, ne dxapa' le'e ca naca da xrlátaje da ba guzile da dxululé'e na Dios nazri'ine' le'e. Le se chacha ca zaj naca da caní.

¹³Bi chee Cristo zaj zre'e Babilonia nigá, benne' ca' gucá'a Dios ca guqu'é le'e, dxulugape' le'e diuzre. Cá'aqueze Marcos, bi na' nácabe' ca bi cheéqueza' dxugápabe' le'e diuzre. ¹⁴Le gugapa diuzre ljuwézrele tule xetule, ne le gunida' ljuwézrele lu xel-la' zri'i lazre'.

Dxenaba' lau Dios gunné' le'e xel-la' dxebeza zri lazre', le'e nácale bi ca' chee Jesucristo. ¡Ca'an gaca na!

DIZRA' GUDXUPE' DA BZUAJ SAN PEDRO

Dizra' da gusel-la San Pedro chee bi ca' chee Jesús

1 Neda', Simón Pedro, naca' wen zrin chee Jesucristo, ne benne' gubáz chee'. Dxuzúaja' da nigá chee le'e, ba nápa le-xel-la' dxeajlí lazre' da zácalle'e, ne naca tuze ca da nápanu' netu'. Caní naca lawe' da naca li lazre' Dios cheedxu, ne Benne' Weselá cheedxu Jesucristo. ²Dxenaba' lau Dios gúnnale'e le'e da chawe' chee', ne xel-la' dxebeza zri lazre', lawe' da núnbeale Dios, ne Xránadxu Jesús.

Ca dxal-la' gaca bi chee Cristo

³Dios lu xel-la' waca chee' ba nunne' dxi'u xúgute da nachinedxu chee gápadxu xel-la' nabán chee Le', ne chee gaca gundxu zrin chee', lawe' da núnbeadxu Bénnea' gunné' dxi'u chee gápadxu da xabáa chee Le', ne xel-la' szren chee'. ⁴Caní naca na, ba nunne' dxi'u ca da nachebe lazre', da zaj naca na szrenle'e, ne da zaj zácalle'e na, chee ne chee da guchebe lazre' wazrué'ele le'e gácale ca nácaqueze Dios, ne chee lale lu da sban da dxaca lu xezr la xu nigá ne chee da dxezá lazre' bēla' dxen chee bēneache. ⁵Chee le na' dxal-la' cue'le gunne xue gun xel-la' dxeajlí lazre' chee'le gunle da xrlátaje, ne chee gun da xrlátaje da dxunle gácale benne' sina. ⁶Xel-la' sina chee dxal-la' gun na nna be'e cuínale, na' xel-la' dxenná be'e cuina chee dxal-la' gun na gácale benne' zren lazre', na' xel-la' zren lazre' chee dxal-la' gun na zri'ile Dios. ⁷Xel-la' zri'i lazre' chee'le nen Dios dxal-la' gun na zri'ile benne' bíchedxu ca', na' xel-la' zri'i lazre' chee'le nen bíchele ca' dxal-la' gun na gácale zri'i lazre'.

⁸Che le'e dxunle da caní, ne dxelepe ban na, quebe xegá'ana cá'aze xel-la' nabán chee'le, ne quebe naca na níteze núnbeale Xránadxu Jesucristo. ⁹Benne' quebe dxuné' da caní naque' ca benne' la chul-la, u ca benne' quebe dxenné'e ca da za za'. Ba gul-la lazre' guxádxie' ca naca chee dul-la ca' da bene' gate nate. ¹⁰Chee le na', benne' bícha'dau', le gun ba xuzre nézele Dios gunné' le'e, ne ba guqué'e le'e, na' che gunle da nigá, cabata' cheajházele. ¹¹Caní gun Dios, gúnnale'e le'e lataj chu'ule naga nna bea Xránadxu, ne weselá cheedxu Jesucristo chadía chacanna.

¹²Chee le na' tu dxusá'azqueza' lázrele da caní, lácala ba nézele na, ne ba ze cháchale lu xel-la' li da ba nápa. ¹³Dxácatē naca bana' dxéqueda' dxun na ba xen gusá'a lázrele chee da caní ¹⁴lawe' da ba nezda' wátezea' ca ba gunná Xránadxu Jesucristo, guzre' neda'. ¹⁵Na'a guna' ca da séqueda' chee gate te gatia' neda', cheajsá lázrquezele chee da caní.

Benne' belelé'eng' xel-la' szren chee Cristo

¹⁶Da bsédentu' le'e ca naca chee xel-la' szren chee Xránadxu Jesucristo, ne ca xel'é'e xecha lasa quebe naca na ca da dxenná xichaj lázrdau bēneache. Netu' blé'equzentu' ca naca xel-la' szren chee Xránadxu. ¹⁷Blé'entu' Le' gate Xradxu Dios be'e Le' xel-la' ba lánana, ne xel-la' szren, na' Dios gúzrequeze' Le' lu da xabáa chee: "Benne' nigá naque' Zri'ina' nazri'ite lazra', ne dxezaca ba lazra' nen Le'." ¹⁸Nétu'queze bēnentu' chi'i na' da za na xabáa gate zúantu' nen Xránadxu lu xi'a lánaxa na'. ¹⁹Chee le na' dxuxrén lázredxantu' dizra' da buluzúaj benne' ca' gulenné' waláz chee Dios. Da xrlátaje dxunle le'e lawe' da dxenle ca naca dizra' nigá. Naca na ca tu xi' da dxusení na tu lataj naga naca chul-la ca zrin zra chaní, na' Cristo, Bénnea' naque' ca

belaj zila súalene' le'e chee gusení'e lu xichaj lázrdaule. ²⁰ Le guxúe xanne' ca naca da nigá. Netú da naxúaj na lu xiche lá'azxa quebe nu benne' seque' xuzájle'e na lu xel-la' dxéajni'i cheeze'. ²¹ Benne' ca' buluchálaje' waláz chee Dios quebe buluchálaje' ca da gulaca lázrequeze le'. Gulaque' benne' chee Dios, na' gulenne' waláz chee' ca da bnezruj Be' Lá'azxa le'.

**Ca naca chee benne' ca'
dxulusédenē' da wen lazre'**

(Judas 4-13)

2 Cá'anqueze gulezrá' ládujla benne' Israel benne' wen lazre' ca', benne' belún cuine' ca benne' dxelenné' waláz chee Dios. Cá'anqueze welezrá' ládujla le'e benne' wen lazre', benne' xelún cuine' ca benne' dxulusédenē' bēneache dizra' chee Dios. Benne' caní wuluzéajni'ine' bēneache bagácheze ca naca dizra' wen lazre' da guxrinnaj na, na' caní xeledábague' Xránadxu, Bēnea' bselé' dxi'u, na' lawe' da dxulusédenē' da caní xelebía xi' zéqueze'. ² Benne' zan chjálalene' ca da sban dxuluséde benne' ca', na' ne chee benne' caní xelenné' bēneache schanni' chee dizra' li chee xel-la' weselá. ³ Lawe' da dxelezá lazre' xelez'e dumí, xelebéaje' le'e dumí ne chee da wen lazre' da dxuluzéajni'ine' le'e. Dios ba nucueze' da guzrí xi na benne' caní, lawe' da ba guchugue' gate nate ca da gaca chee benne' ca'.

⁴ Dios quebe bnite lawe' chee gubáz chee xabáa ca' belún dul-la. Bdeē' gubáz chee xabáa ca' lu lataj ba xa', ne bzre'e le' lu da chul-la, ne bcheaje' le' du xia naga zaj nadxéaje' ca zrin zra chugu Dios ca da gaca chee gubáz chee xabáa ca'. ⁵ Cá'anqueze Dios quebe bnite lawe' chee benne' ca' gulezrá' gate nate. Guselle' nisa xiuj da bzria xi na benne' ca' belune' da calela. Bselé' Noé, bēnea' bchálaje' ca naca da xrlátaje da dxal-la' xelún bēneache. Bselé' gázreze benne'.

⁶ Cá'anqueze guchugu Dios chee xezre Sodoma, ne xezre Gomorra chee xelebía xi na. Bzéxziē' dxúpatē xezre ca', na' belexegá'anatē na de. Caní dxuluzéajni'i na benne' ca' xelune' da calela, benne' xelezre'e te na'. ⁷ Dios bselé' Lot lu xezre Sodoma na' lawe' da guque' tu benne' xrlátaje, ne bexiájele'ene' gate blé'ene' ca naca da sban da dxelún benne' ca' dxelune' da calela. ⁸ Benne' xrlátaje nigá guzúe' ládujla benne' ca', na' tu zra tu zra guzúa ba xa' lázrdawe' ca dxenné'e, ne dxenne' ca da calela da dxelún benne' ca'. ⁹ Nézqueze Xránadxu guselé' benne' zaj naca bi chee' che bi da dxusaca zi na le', na' guzráqueze' benne' ca' dxelune' da calela, ca tu lizre xia, ca zrin zra chugue' chee' chjaque' lataj ba xa'.

¹⁰ Dios xudé' xel-la' zi' zrendxa benne' ca' dxelune' cáteze da sban da dxelezá lazre', ne dxuluzúe' chalá'ala xel-la' dxenná bea chee Xránadxu. Benne' caní zaj naque' lazre' dxugu dxelune' da sban, ne dxulucá'ana szren cuine'. Quebe dxelezrebe' dxelenné' schanni' chee gubáz chee xabáa ca'. ¹¹ Gubáz ca' zaj nápadxe' xel-la' dxenná bea, ne xel-la' szren ca benne' caní, quebe dxelenné' da calela chee benne' ca' gate dxelawe' zria chee' lau Xránadxu.

¹² Benne' caní zaj naque' ca bea ca' quebe zaj naxéajni'iba', be dxelunba' ca da zaj nézezeba', ne zraba' chee xelél-le'ba', ne xelutiē'-ba'. Benne' caní dxelenné' schanni' chee da quebe dxeléajni'ine', na' xelátequeze' ca dxelate bea ca', ¹³ ne xeledé' xel-la' zi' ca xel-la' zi' buludé' benne' xula. Dxeléquene' zaj zre'e lu da ba neza gate dxelebenē' ca da dxaca tu zra tu zra. Zaj naque' ca tu da sban da dxusí'i na le'e xel-la' stu' gate zaj zre'e nen le'e lu laní cheele, dxácate ne dxelezúe' lu xel-la' dxebe' lu da calela da dxelune'.

¹⁴ Dxelezá lazre' xúgute nu'ula dxelelé'ene', ne quebe dxelálene'

dxelunę' dul-la. Dxulusi'e neza xula benne' bíchedxu quebe zaj zę chache'. Dxulucúdequeze', ne zaj naque' benne' zaj xu'e de'. ¹⁵Zaj nanítie' lawe' da gulecuase' lu neza li cheę Dios. Dxelunę' ca da ben Balaam, zri'ine Beor. Balaam nigá bene' ba cheę dumí, ne gudé' dxunę' da caleła, ¹⁶na' bea na', bę dxua xua', gunneba' ca benne', ne gudíl-laba' Balaam ca naca dul-la da dxunę', na' guchúguba' da xala da dxun Balaam.

¹⁷Benne' caní zaj naque' ca tu beaj bizre, ne ca tu beuj da dxua be' bđunu'. Ba zaj naca cheę benne' ca' xelexegá'ane' chadía chacanna lu da chul-la. ¹⁸Dxelen-ńé' dizra' da dxulucá'ana szren na le', ne da zaj naca na dácheze. Dxuluchínene' da sban ca', ne da dxezá lazre' bela' dxen cheę bėnneache cheę dxulusi'e chalá'ala benne' ca' za dxelexedxúajteque' ládujla benne' ca' dxelunę' da caleła. ¹⁹Dxelechębe lazre' xulunęzruje' benne' ca' tu xel-la' weselá, san léqueze benne' ca' zaj naque' wen zrin cheę da sban. Tu tu bėnneache naque' benne' nada'u cheę da dxenná be'e na le'. ²⁰Benne' ba zaj núnbe'e Xránadxu, ne Weselá cheędxu Jesucristo, ne ba gulelé' lu da sban cheę xęzr la xu nigá, na' te na' che xelexexu'e xecha lasa lu da sban na', ne xelu'e lataj xenná be'e na le', na' gácadxa da ba xa' cheę benne' ca' ca da guca cheę gate nate. ²¹Cháwe'dxela gaca na cheę benne' caní la quebe zaj núnbe'e Cristo, quegala gate ba belúnbe'e Le', na' xelexecuase' ca naca xel-la' dxixruj bea lá'azxa da guzre Dios le' xelunę'. ²²Ca da guca cheę benne' caní dxulé'e na naca da li dizra' nigá da dxenná na:
Becu' dxexáguba' ca da ba bexébeba',
na' cuche za bexíbeba' bexú'uba' xecha
lasa lu guzra' cheęba'.

Ca naca cheę zra xelá' Xránadxu

3 Benne' bícha'dau' nazri'ite lazra', da nigá naca na dizra' gudxupe' da dx-

uzúaja' cheęle. Lu dxúpatę xiche caní guca lazra' guzėjajni'ida' le'e cheę gulaba lázrele cheę da caní. ²Le gusá lazre' ca da gulenná benne' lá'azxa ca', benne' buluchálaje' waláz cheę Dios, ne ca naca da gudixruj be'e Xránadxu, Benne' Weselá cheędxu, da na' bulusęde benne' gubáz cheę ca' le'e.

³Dxunna ba xen gúnbeale, lu zra da za zá'aca welelá' benne' xelún le' cheę da zaj naca na da lá'azxa, ne xelunę' cáteze da dxelezá lazre', ⁴ne xuluchębe' bėnneache: ¿Bizra guca cheę da guchębe lazre' Cristo, gunnę': Welá'a? Xra xrtáudxu ca' ba gulatie', na' túzqueze ca guca, gaca na gate guzrete xęzr la xu. ⁵Benne' caní quebe dxeleque be'ene' gulezúa xabáa, ne xęzr la xu gate nate, Dios gunnę' bedxúaj na lu nisa, na' guzúa chacha na lu nisa, ⁶na' xęzr la xu da zua gate nate guzría xi na ne cheę nisa xiuj, ⁷na' xabáa, ne xęzr la xu da zaj zua na na'a, ba naca cheę na xelexze na ca ba núnqueze Dios cheę na. Xi' na' guzezxe na da caní lu zra guchi'a Dios, gate xelebía xi' benne' ca' dxelunę' da caleła.

⁸Benne' bícha'dau' nazri'ite lazra', quebe gal-la lázrele da nigá: Lau Xránadxu tu zraze naca na ca chi gaxúa iza, na' chi gaxúa iza zaj naca na ca tu zraze. ⁹Quebe dxezré Xránadxu gunę' da nachębe lazre' ca dxeleque bėnneache. Naque' zren lazre' nen dxi'u lawe' da quebe dxaca lazre' nu cuía xi'. Dxaca lazre' xelexexíaje lazre' xúgute bėnneache.

¹⁰Zra xelá' Xránadxu zrin na gate quebe nu dxeque ca', ca za' tu gubán chizrela. Lu zra na' cuía xi' xabáa da dxelé'dxdu, na' gunle'e na schaga, ne ca naca da dxelé'dxdu zran xabáa xelebía xi na lu xi', na' xęzr la xu nigá chezxe na tu zren nen da dę lawe na.

¹¹Che ba nézele xelebía xi' xúgute da caní, ¿ájala dxal-la' gunle? Dخال-la' gácale li lazre' ne guzúa cuínale lu na' Dios

¹² dxácate ne dxebézale zra na', ne dxal-la' gunle ca da séquele zrinte zra na'. Lu zra na' cuia xi' xabáa lu xi', na' da zaj zria zran xabáa xelexuna na lu xi' na'. ¹³ Dxi'u dxebézadxu tu xabáa cube, ne tu xezr la xu cube da ba guchebe lazre' Dios naga gaca xlátaje xúgute.

¹⁴ Chee le na', benne' bícha'dau' nazri'ite lazra', dxácate dxebézale da caní, le gun ca da séquele chee quebe bi bágale, ne quebe bi nadxenle chee dul-la lau Dios, ne suale lu xel-la' dxebeza zri lazre'. ¹⁵ Le gusá lázrele naca Xránadxu zren lazre' nen dxi'u chee ladxu. Cá'anqueze Pablo, benne' bíchedxu nazri'ite lázredxu, bzuaje' chee,le, bchínene' ca naca xel-la' sina da bnezruj Dios le'. ¹⁶ Lu xúgute xiche da ba bzuaje', ba bchálajlene' le'e ca naca

chee da caní, lácala bal-la na nácale'e na stebe chéajni'idxu na, na' benne' ca' quebe dxeléajni'ine' na, ne benne' ca' quebe zaj zua chache' dxuluchuque' na, ca dxuluchuque' xezícala xrtizra Dios, na' chee le na' Dios guzría xi'e benne' ca'.

¹⁷ Chee le na', benne' bícha'dau' nazri'ite lazra', che le'e ba nézele da nigá nédxula, le guxúe cuínale chee da wen lazre' chee benne' ca' dxelune' da calela chee quebe xeleché le'e chalá'ala, ne quebe nite xel-la' li lazre' chee lau Dios. ¹⁸ Le gúnbea xanne' Xránadxu, Benne' Weselá cheedxu, Jesucristo, ne le gula lu xel-la' zri'i lazre' chee'. ¡Gaca ba Le' na'a, ne chadía chacanna! ¡Ca'an gaca na!

DIZRA' NÉDXUDAU' DA BZUAJ SAN JUAN

Xtizra Dios da dxunna na xel-la' nabán li lazre'

1 Dxuzúaja' cheeḷe da nigá ca naca chee Bénnea' zúaqueze' gate guzú lau zua xúgute da dxel'édxu. Dxuzúaja' ca naca chee Bénnea' ba bémentu' chee', ne ca naca da ba bl'équezentu' bene', neda' ne xezícaxa benne' ca bseḷe Jesús. Ca naca chee Benne' nigá guzúantu' dxennantu', ne btantu' Le' nen na'ntu'. Dxuchálajntu' ca naca chee Bénnea' naque' Dizra' da dxunna na xel-la' nabán li lazre'. ²Bénnea' dxunne' xel-la' nabán zeajlí canna ba bl'e'e, na' netu' bl'éntu' Le'. Dxixruj béantu' da naca chee', ne dxuzentu' le'e ca naca chee'. Léqueze' zúalene' Xradxu Dios, na' bl'e'e naga zúadxu. ³Da bl'éntu', ne da bémentu' dxuzentu' le'e chee gácale tuze nen netu'. Da lítegaze, nácadxu tuze nen Xradxu Dios, ne nen Jesucristo, Zri'ine Dios. ⁴Ca naca da caní dxuzúaja' cheeḷe chee gaca du lazre' xel-la' dxebe cheeḷe.

Dios naque' lení' chee xichaj lázdau bénneache

⁵Da nigá naca dizra' da bchálajle Jesús netu', ne da dxuzentu' le'e. Gunné': Dios naque' lení', ne quebe bi zúale Le' da naca chee da chul-la. ⁶Che dxennadxu nácadxu tuze nen Le', na' che dxundxu da naca na chee da chul-la, dxun lázredxu ca naca da dxennadxu, na' ca naca da dxundxu quebe dxundxu da li. ⁷Che dxundxu da li da naca chee xel-la' naxaní', ca naca Dios, Bénnea' naque' li lazre', ne zu'e lu xel-la' naxaní', nadxa zúadxu tuze tudxu xetudxu, na' dxen chee Jesús, Zri'ine Dios, dxibe na dxi'u ca naca xúgute dul-la nabágadxu.

⁸Che dxennadxu quebe nabágadxu dul-la, dxezí xéqueze cuínadxu, na' da li quebe zúale na dxi'u. ⁹Che xrúalepedxu ca naca dul-la da nabágadxu, Dios naque' li lazre', ne xlátaje, na' chee le na' Le' gunite lawe' cheedxu ca naca dul-la da nabágadxu, ne quibe' dxi'u ca naca xúgute da sban da ba bendxu. ¹⁰Che dxennadxu quebe nundxu dul-la, dxucá'andxu Dios ca wen lazre', ne quebe ne sidxu du lázredxu ca naca dizra' chee'.

2 Le'e, bi nazrí'ite lazra', dxuzúaja' da nigá cheeḷe chee quebe gunle dul-la. Che nu benne' guné' dul-la, zua wen-aba cheedxu lau Dios, Jesucristo, Benne' xlátaje. ²Le' gutie' waláz cheedxu chee gudúe' da nabágadxu lau Dios ca naca dul-la cheedxu, ne quegaze da nabágadxu dxi'u, san gudúe' da zaj nabaga xúgute bénneache.

³Che dxuzúadxu dizra' ca naca da bdxixruj be'e Dios, nezdxu ba núnbeadxu Le'. ⁴Che nu dxenná: Neda' núnbe'a Le', ne che quebe dxuzúe' dizra' ca naca da bdxixruj be'e Dios, benne' nigá naque' wen lazre', ne quebe dxenné' da li. ⁵Che nu benne' dxuzúe' dizra' ca naca da bdxixruj be'e Dios, benne' nigá nazrí'ine' Dios du lazre'. Che dxundxu caní nezdxu ba zúadxu tuze nen Le'. ⁶Bénnea' dxenné' naque' tuze nen Dios dxal-la' gaque' ca guca Jesús.

Tu da cube da bdxixruj be'e Jesús

⁷Le'e, bi nazrí'ite lazra', dxuzúaja' cheeḷe ca naca da dxenná na dxal-la' zri'idxu le sa' ljwézredxu. Quebe naca na tu da cube da bdxixruj bea Dios. Naca na da gula na' da ba guzile nédxudaute. Da gula da bdxixruj bea Dios naca na dizra' da ba bénequezle. ⁸Naca na ca dxuzúaja' cheeḷe tu da cube da dxixruj bea Dios, da naca béaqueze na naca da li lawe' da ben Jesús ca naca na, ne lawe' da dxunle le'e ca naca na. Caní naca na lawe' da ba dxusení' xel-la' naxaní' li chee xel-la' zri'i

lazre' lu xichaj lászrdaudxu, da dxegúa na da naca na chee da chul-la.

⁹Che nu benne' dxenné' dxuné' da naca na chee xel-la' naxaní', ne che dxecuídene' le sa' ljwezre', benne' nigá ne dxedé' lu da naca na chee da chul-la.

¹⁰Benne' nazri'ine' le sa' ljwezre' dxuné' da naca chee xel-la' naxaní', ne quebe dxuné' da guzría xi na le sa' ljwezre'.

¹¹Bénnea' quebe chawe' dxelé'ene' le sa' ljwezre', lu da naca na chee da chul-la zua bénnea', ne lu da na' dxedé', ne quebe nézene' ga zéajé' lawe' da dxucá'ana da chul-la le' ca tu benne' la chul-la.

¹²Le'e, bi nazri'ite' lazra', dxuzúaja' chee le lawe' da ba bnite lau Dios chee le ca naca dul-la chee le, lawe' da gute Jesucristo waláz cheedxu. ¹³Le'e, benne' nazri'ite' lazra', dxuzúaja' chee le lawe' da ba núnbeale Bénnea' zúaqueze' nédxudaute.

Le'e, benne' cuide', dxuzúaja' chee le lawe' da ba bsanle da dxenná da xriwe'.

Le'e, bi nazri'ite' lazra', dxuzúaja' chee le lawe' da ba núnbeale Xradxu Dios.

¹⁴Le'e, xruze xrna', dxuzúaja' chee le lawe' da ba núnbeale Bénnea' zúaqueze' nédxudaute.

Le'e, benne' cuide', dxuzúaja' chee le lawe' da nácale benne' wal-la, ne dizra' chee Dios nácale, ne bsanle da dxenná da xriwe'.

¹⁵Quebe sa lászrele da cale la ca' da zaj naca na chee xezr la xu nigá, ne quegá da zaj de lu xezr la xu nigá. Che nu benne' dxezá lazre' da zaj de lu xezr la xu nigá, quebe nazri'ine' Xradxu Dios. ¹⁶Da caní zaj naca na chee xezr la xu nigá, da dxezá lászredxu da dxezaca ba lazre' bela' dxen cheedxu, ne da dxezaca ba lazre' xiaj laudxu, ne ca naca xel-la' dxucá'ana szren cuina chee da nápadxu. Xúgute da caní quebe zaj naca na da dxunna Dios, san zaj naca na chee xezr la xu nigá. ¹⁷Ba

za zra xuzre lazre' xezr la xu nigá, ne ca naca da dxezá lászredxu da naca na chee xezr la xu nigá. Bénnea' dxuné' da dxaca lazre' Dios wazúatecaze'.

Ca naca da li, ne da wen lazre'

¹⁸Le'e, bi nazri'ite' lazra', zra caní zaj naca na zra bzebe. Ba bénele gulé'e lawe' benne' tábague' Cristo. Neda' dxapa' le'e na'a, bache belelá' benne' zante benne' dxeledábague' Cristo. Chee le na' nezdxu ba zúadxu zra bzebe. ¹⁹Benne' caní belexedxúajqueze' ládujla dxi'u. Da líqueze quebe gulaque' tuze nen dxi'u. La gulaque' tuze nen dxi'u, na' belexegá'ana lequeze' dxi'u. Caní guca chee nezdxu quebe zaj naca xúgute' tuze nen dxi'u.

²⁰Ca naca chee le'e, ba zúale Be' Lá'azxa le'e, Bénnea' gusel-la Xradxu Lá'azxa. Chee le na' ba nézele xúgute da caní. ²¹Dxuzúaja' chee le da nigá lawe' da ba nézele da li, ne quegá dxennia' quebe nézele da li. Ba nézquezle le'e quebe dxun lazre' Bénnea' naque' da li.

²²¿Nuzra' naca benne' wen lazre'? Naca bénnea' dxenné' Jesús quebe naque' Cristo, Benne' nasel-la Dios. Benne' wen lazre' nigá dxenné' Dios quebe naque' Xra Jesús, ne Jesús quebe naque' Zri'ine Dios. ²³Xúgute benne' dxelenné' Jesús quebe naque' Zri'ine Dios, Dios quebe zúale' benne' ca'. Bénnea' dxexechébe' Jesús naque' Zri'ine Dios, Dios zúalequeze' bénnea'.

²⁴Chee le na', le cu'u lu xichaj lászdaule dizra' da ba bénele nédxudaute. Che da ba bénele nédxudaute zua na lu xichaj lászdaule, le'e síatequezle tuze nen Zri'ine Dios, ne nen Xradxu Dios. ²⁵Da nigá naca na da nachébe lazre' Dios, gunné' dxi'u xel-la' nabán zeajlí canna.

²⁶Ba bzuaja' chee le da nigá ca naca chee benne' ca' dxelezí xe'e le'e. ²⁷Na'a zúale Be' Lá'azxa le'e, Bénnea' gusel-

la Jesucristo chee, na' Be' Lá'azxa nigá zué' xichaj lárdaule. Chee le na' quebe nachínele nu gusede le'e lawe' da dxusede Be' Lá'azxa le'e ca naca xúgute da caní, na' da dxusedene' le'e naca na da li, ne quebe naca na da wen lazre'. Chee le na', le súatequeze tuze nen Cristo ca naca da ba bsede Be' Lá'azxa le'e.

Ca naca chee benne' zaj naque' zri'ine Dios

²⁸Na'a, bi nazri'ite lazra', le súatequeze tuze nen Cristo, chee súadxu li lazre' gate xelá' Le', ne quebe xeduédxu lau Le' gate xel'é. ²⁹Ba nézele naca xlátaje Dios. Chee le na' dxal-la' nézele xúgute benne' ca' dxelúnqueze' da naca na xlátaje zaj naque' zri'ine Dios.

3 Le nna' xque ca nazrí'ile'e Dios dxi'u lawe' da nazí ladxu bi chee Dios, ne caní nácadxu. Chee le na' quebe zaj neze bènneache lu xezr la xu nigá da nácadxu lawe' da quebe belúnbe'e Jesús. ²Le'e, bi nazrí'ite lazra', na'a nácadxu bi chee Dios. Quebe ne gul'é lawe' da gácadxu. Nezdxcu gate xelá' Le', gácadxcu ca naca Le' lawe' da lé'edxcu Le' ca nácaqueze Le'. ³Nu benne' dxebeza lazre' gaque' ca naca Jesús dxue lazre' gaque' du lazre' ca naca Jesús, naque' du lazre'.

⁴Nu benne' dxune' dul-la quebe dxuzúe' dizra' ca naca da bdxixruj be'e Dios lawe' da naca dul-la da dxedábaga da bdxixruj be'e Dios. ⁵Ba nézele bla' Jesucristo chee gudúe' dul-la nabágadxcu, ne Le' quebe bi dul-la bene'. ⁶Xúgute benne' zaj zúatequeze' tuze nen Jesús quebe dxelune' dul-la, na' xúgute benne' dxelune' dul-la quebe ne xelélé'ene' Cristo, ne quebe ne xelúnbe'e Le'. ⁷Le'e, zrí'ina'dau', quebe güele lataj nu si xe le'e. Bénnea' dxune' da xlátaje, xlátaje naque', ca naca Dios, naque' xlátaje. ⁸Benne' dxune' dul-la naque' chee da xriwe' lawe' da dxun da xriwe' dul-la nédxudaute. Chee le na' bla' Zri'ine Dios, chee

bzria xi'e xúgute da nun da xriwe' lu xezr la xu nigá.

⁹Xúgute benne' zaj naca bi chee Dios quebe dxelune' dul-la lawe' da zúatequeze Be' chee Dios benne' ca'. Chee le na' québedxa gaca xelexúe' xelune' dul-la lawe' da zaj naque' bi chee Dios. ¹⁰Naca bea nu naca bi chee Dios ne nu naca bi chee da xriwe'. Bénnea' quebe dxune' da xrlátaje ne quebe nazri'ine' le sa' ljwezre' quebe naque' bi chee Dios.

Dxal-la' zri'idxcu tu xetudxcu

¹¹Da nigá naca na dizra' da ba bénequezle nédxudaute, da dxenná na: Dxal-la' zri'idxcu tudxcu xetudxcu. ¹²Quebe gundxcu ca ben Caín, bi na' gúcabe' chee da xriwe', na' bétebe' bi bíchebe'. ¿Bizr chee na' bétebe' lebe'? Bétebe' lebe' lawe' da naca da zrinnaj da ben Caín, na' da ben bi bíchebe' naca na da xrlátaje.

¹³Le'e, benne' bícha'dau', quebe xebánele che bènneache lu xezr la xu nigá dxuluzúe' le'e chalá'ala. ¹⁴Nezdxcu ba bdxúajdxcu lu na' xel-la' gute, ne ba guxú'udxcu lu xel-la' nabán lawe' da nazri'idxcu bíchedxcu ca'. Bénnea' quebe nazri'ine' bíchedxcu ca' zúaqueze' lu xel-la' gute. ¹⁵Bénnea' dxuzúe' chalá'ala bíchedxcu ca' naque' ca tu benne' dxute benne', na' ba nézquezle le'e nu benne' dxute benne' quebe nape' xel-la' nabán zeajlí canna. ¹⁶Ba nezdxcu da naca xel-la' zri'i lazre' lawe' da bzanne Jesucristo xel-la' nabán chee', na' gutie' waláz cheedxcu. Cá'anqueze dxi'u dxal-la' guzúadxcu xel-la' nabán cheedxcu chee gácaledxcu bíchedxcu ca'. ¹⁷Che tu benne' nape' xel-la' gunn'í'a da naca na chee xezr la xu nigá, ne che dxelé'ene' le sa' ljwezre' dxexázejene', na' che quebe xexache lazre' le', benne' nigá quebe nazri'ine' Dios. ¹⁸Le'e, zrí'ina'dau', dxal-la' zri'idxcu tudxcu xetudxcu, quegá nen dízra'ze, ne quegá nen da nnézedxcu.

Dxal-la' gúntequezdxu na, na' gaca bea na da li nazrí'idxu bíchedxu ca'.

Zua zri lázrdaudxu lau Dios

¹⁹ Che gundxu caní ba nezdXu nácadXu chee da li, na' sua zri lázrdaudxu lau Dios, ²⁰ gate zua tu da dxagu na zria lu lázrdaudxu, lawe' da nezdXu naca Dios zrendxa ca lázrdaudxu. Le' nézquezne' ca naca da dxundxu. ²¹ Ca'an naca, bi nazrí'ite lazra', che quebe zua tu da dxagu na zria lu lázrdaudxu, waca sua zrize lázrdaudxu lau Dios, ²² na' Le' gunne' dxi'u xúgute da nábaddxu lawe'. Ca'an gaca lawe' da dxuzúadXu dizra' da bdxixruj be'e Dios, ne dxundxu da dxezaca ba lazre' Le'. ²³ Da bdxixruj be'ene' dxi'u naca na chéajlédxu chee Jesucristo, Zri'ine Dios, ne zri'idxu tudxu xetudxu ca bdxixruj be'e Le'. ²⁴ Bénnea' dxuzúe' dizra' da bdxixruj be'e Le' zúalequeze' Dios, na' Dios zúalequeze' bénnea'. Ba nezdXu Le' zúalequeze' dxi'u lawe' da bache benne' dxi'u Be' chee'.

Naca bea Be' chee Dios

4 Le'e, bi nazrí'ite lazra', quebe chéajle chee xúgute benne' dxeleonné' zúale Be' chee Dios le'. Le nna' xque ca naca da dxulusédene' chee nézele che zúale' Be' chee Dios le'. Caní dxal-la' gunle lawe' da ba belelá' benne' zante, benne' wen lazre', dxeleonné' dxuluchálaje' waláz chee Dios. ² Caní gaca nézele che zúale Be' chee Dios tu benne'. Xúgute benne' dxelexechebe' ba bla' Jesucristo, ne guque' bèneache, benne' caní zaj naque' chee Dios. ³ Xúgute benne' quebe dxelexechebe' ca guca Jesucristo quebe zaj naque' chee Dios. Zaj naque' chee bénnea' dxedábague' Jesucristo. Ba bénele gul'é lawe' bénnea', na' na'a ba zue' lu xezr la xu nigá.

⁴ Le'e, bi nazrí'ite lazra', nácale chee Dios, ne bache bzúale chalá'ala benne' ca' dxelezí xé'e lawe' da szrendxa naca

Be' zúale na le'e ca be' zua na lu xezr la xu nigá. ⁵ Benne' ca' zaj naque' chee xezr la xu nigá. Chee le' na' dxuluchálaje' chee da naca na chee xezr la xu nigá, na' benne' zaj zre'e xezr la xu nigá dxeleenne' da dxuluchalaj benne' ca'. ⁶ Dxi'u nácadXu chee Dios. Benne' zaj núnbe'e Dios dxuluzé nague' cheedXu. Benne' quebe zaj naque' chee Dios quebe dxuluzé nague' cheedXu. Chee le' na' nezdXu nu benne' zúale Be' chee xel-la' li le', ne nu benne' zúale be' chee da dxezíz xé na le'.

Tu dxúnzqueze Dios da naca chee xel-la nazrí'i lazre'

⁷ Le'e, bi nazrí'ite lazra', dxal-la' zri'idxu tudxu xetudxu lawe' da dxunna Dios dxi'u xel-la' nazrí'i lazre' na'. Xúgute benne' zaj naque' zri'i lazre' caní zaj naque' zri'ine Dios ne zaj núnbe'e Dios. ⁸ Bénnea' quebe naque' zri'i lazre' caní quebe núnbe'e Dios lawe' da tu dxúnzqueze Dios da naca chee xel-la nazrí'i lazre'. ⁹ Naca béaqueze Dios nazrí'ile'ene' dxi'u lawe' da gusel-le' Zrí'ine' tu licha' lu xezr la xu nigá chee zrué'edXu xel-la' nabán da naca na chee Zrí'ine' na'. ¹⁰ Xel-la' zri'i lazre' li naca na caní: Quegá dxi'u na' bzri'idxu Dios. Le' bzri'ine' dxi'u, ne gusel-le' Zrí'ine' chee guque' da gudúa na da nabágadXu lau Dios lawe' da nabágadXu dul-la.

¹¹ Le'e, bi nazrí'ite lazra', che Dios bzri'ine' dxi'u caní, dxi'u dxal-la' zri'idxu tudxu xetudxu. ¹² Quebe nu ne le'e Dios, san che zri'idxu tudxu xetudxu, Dios zúaqueze' lu xichaj lázrdaudxu, na' xel-la' zri'i lazre' chee' dxun na li lazre' xel-la' zri'i lazre' cheedXu. ¹³ NezdXu nácadXu tuze nen Dios, na' Dios naque' tuze nen dxi'u lawe' da bzu'e' Be' chee' lu lázrdaudxu. ¹⁴ Ba blé'entu', ne dxuzentu' le'e ca naca da ben XradXu Dios, gusel-le' Zrí'ine' chee bedajselé' bèneache chee xezr la xu nigá. ¹⁵ Bénnea' dxexechebe'

naca Jesús Zri'ine Dios, Dios zúalequeze' bénnea', na' le' zúalequeze' Dios.

¹⁶Ba núnbeadxu ca nazrí'i Dios dxi'u, ne ba guxéajlëdxu nazri'ine' dxi'u. Tu dxúnzqueze Dios da naca chee xel-la nazrí'i lazre', na' bénnea' naque' zri'i lazre' caní zúalequeze' Dios, na' Dios zúalequeze' le'. ¹⁷Caní dxaca li xel-la' zri'i lazre' cheëdxu, chee sua zrize lázrdaudxu lu zra guzría xi' Dios bénneache, benne' ca' dxelunë' da calela, lawe' da nácadxu lu xezr la xu nigá ca nácaqueze Jesucristo. ¹⁸Bénnea' naque' zri'i lazre' caní quebe dxezrebe' da gaca na lu zra na'. Xel-la' zri'i lazre' li dxebéaj na chalá'ala xel-la' dxezrebe na'. Nu benne' dxezrebe' dxebeze' bi da saque', na' bénnea' dxezrebe' quebe dxaca li xel-la' zri'i lazre' chee'.

¹⁹Dxi'u nazri'idxu Dios lawe' da bzri'i Dios dxi'u nédxudaute. ²⁰Che nu benne' dxenné': Nazri'ida' Dios, ne che benne' nigá dxuzúe' chalá'ala le sa' ljwezre', dxun lazre'. Che quebe nazri'ine' le sa' ljwezre', bi dxelé'etene', ¿ájazra gunë', zri'ine' Dios, ne quebe dxelé'ene' Le'? ²¹Dios ba bdxixruj be'ene' dxi'u caní, gunné': Bénnea' nazri'ine' Dios, zrí'iquezne' le sa' ljwezre'.

Ca bdxúajdxu chawe' lu xezr la xu nigá

5 Xúgute benne' dxeléajle'e Jesús naque' Cristo, Benne' nasel-la Dios, benne' caní zaj naque' bi chee Dios, na' che zaj nazri'ine' Xradxu Dios, dxal-la' xelezrí'iquezne' xúgute benne' zaj naque' bi chee Dios. ²Nezdxu nazri'idxu benne' zaj naque' bi chee Dios chete nazri'idxu Dios, ne dxundxu ca naca da dxi'e dxi'u. ³Che da li nazri'idxu Dios, dxundxu da dxi'e dxi'u. Da dxi'e dxi'u quebe naca na stebe. ⁴Xúgute benne' zaj naque' bi chee Dios dxedxúaje' chawe' lau da calela da dxaca na lu xezr la xu nigá. Dxedxúajdxu chawe' lau da calela da dxaca na lu xezr la xu nigá lawe' da

dxéajlëdxu da naca na chee Jesucristo. ⁵Benne' dxedxúaje' chawe' lau da calela da dxaca na lu xezr la xu nigá naque' bénnea' dxéajle'e naca Jesús Zri'ine Dios.

Da dxenná Dios ca naca chee Zrí'ine'

⁶Guca bea Jesús naque' Cristo gate gudxúe' nisa, ne gate gulalaj dxen chee'. Quegá gudxúaze' nisa san cá'aqueze gulalaj dxen chee'. Be' chee Dios gudxixruj lie' da nigá, na' Le' dxuchálaje' da li. ⁷Chunne' dxelixruj lie' chee da nigá xabáa, Xradxu Dios, ne Zrí'ine', ne Be' Lá'azxa, na' chunne' caní zaj naque' tuze. ⁸Cá'aqueze chunna da dxelixruj li na chee da nigá lu xezr la xu nigá, Be' Lá'azxa, ne da guca gate gudxúa Jesús nisa, ne da guca gate gulalaj dxen chee', na' da chunna caní, túzqueze da dxelixruj li na. ⁹Dxéajlëdxu da dxelixruj li bénneache, san da nadxixruj li Dios zácadxa na, na' Le' nadxixruj lie' naca Jesús Zrí'inequeze'. ¹⁰Bénnea' dxéajle'e naca Jesús Zri'ine Dios ba guzi'e xichaj lázrdawe' da ba gudxixruj li Dios, san bénnea' quebe dxéajle'e chee Dios dxucá'ane' Dios ca tu benne' wen lazre', lawe' da quebe guxéajle'e chee da ba gudxixruj li Dios ca naca chee Zrí'ine'. ¹¹Da nigá naca na da nadxixruj li Dios, dxenné' ba benne' dxi'u xel-la' nabán zeajlí canna, na' xel-la' nabán nigá za na lu na' Zrí'ine', Jesucristo. ¹²Bénnea' zua Zri'ine Dios na' lu xichaj lázrdawe' zúale xel-la nabán nigá le', san bénnea' quebe zua Zrí'ine' lu xichaj lázrdawe' quebe zúale xel-la' nabán nigá le'.

Ca gaca nezdxu nápadxu xel-la' nabán zeajlí canna

¹³Da nigá dxuzúaja' chee dxéajle'e chee Zri'ine Dios chee nézele zúale xel-la' nabán zeajlí canna le'e.

¹⁴Dxuxrén lázredxu Dios lawe' da nezdxu che bi nábadxu lau Le' ca

naca da dxaca lazre' Lẹ', Léqueze' wenne' cheedxu. ¹⁵Lawe' da nezdXu Dios dxenne' cheedxu, cá'aqueze ba nezdXu gunna Lẹ' da ba gunábadxu lau Lẹ'.

¹⁶Che tu benne' dxel'éne' dxun bíchedxu dul-la da quebe nua na xel-la' gute, dxal-la' nabe' lau Dios ne chee bíchedxu na', na' Dios gunézruje' xel-la' nabán chee', che naca na tu dul-la da quebe nua na xel-la' gute. De dul-la da nua na xel-la' gute, na' quebe dxennía' ná bale lau Dios ne chee bènea' dxune' dul-la nigá. ¹⁷Xúgute da calela naca na dul-la, na' de dul-la da quebe nua na xel-la' gute.

¹⁸NezdXu nu benne' naca bi chee Dios québedxa dxúnqueze' dul-la lawe' da dx-

uwía dxuxúe Zri'ine Dios lẹ', na' da xriwe' quebe bi dxezeque guné na lẹ'.

¹⁹NezdXu nácadXu bi chee Dios, na' xúgute benne' zaj naca chee xezr la xu nigá zaj xu'e lu na' da xriwe'.

²⁰NezdXu ba bla' Zri'ine Dios, ne ba bzéajni'ine' dxi'u chee gúnbeadxu Dios li. NácadXu tuze nen Bènea' naque' li lazre', Jesucristo, Zri'ine Dios. Benne' nigá naque' Dios li, ne Léqueze' naque' xel-la' nabán zeajlí canna da zúale na dxi'u. ²¹Le'e, zrí'ina'dau', le guxúe xanne' cuínale chee quebe gucá'ana szrenle beadau' xiaj xaga ca'.

DIZRA'DAU' GUDXUPE' DA BZUAJ SAN JUAN

Da naca li, ne xel-la' zri'i lazre'

1 Neda', benne' gula wen zrin chee Cristo, dxuzúaja' da nigá chiu' lue', nu'ula zana', ba gucá'a Dios lue'. Dxuzúaja' chee zri'inu' ca'. Da li nazrí'ida' le'e, ne quegá tuze neda', san cá'anqueze benne' ca' zaj núnbe'e da li zaj nazrí'iquezne' le'e. ²Nazrí'ida' le'e lawe' da ba núnbeadxu da li, da súatequeze na xichaj lázrdaudxu. ³Dxenaba' lau Xradxu Dios, ne lau Xránadxu Jesucristo, Zri'ine Dios, kezá' lazre' chee da xrlátaje, ne xache lazre' le'e, ne gunne' le'e xel-la' dxebeza zri lazre', chee gúnbeale da li, ne chee gácale zri'i lazre'.

⁴Dxebéle'eda' lawe' da ba benda' zri'inu' ca' dxelunbe' ca naca da li, ca naca da bdxixruj be'e Xradxu Dios. ⁵Na'a, nu'ula zána'dau', dxata' xúeda' lue' zri'idxu tudxu xetudxu. Da nigá dxuzúaja' chiu' quebe naca na tu da cube da nadxixruj bea Dios, san naca na da ba bendxu nédxudaute. ⁶Xel-la' zri'i lazre' li naca bea na che dxundxu ca da nadxixruj bea Dios, na' da nadxixruj be'e naca na da ba bénele nédxudaute, chee zri'idxu tudxu xetudxu.

Benne' dxelezí xe'e

⁷Ba beelá' benne' zante, benne' dxelezí xe'e. Benne' caní quebe dxelechēbe' guca Jesús be'la' dxen. Benne' caní zaj naque' benne' dxelezí xe'e, ne dxeledábague' Cristo. ⁸Le guxúe xanne' cuínale chee quebe gunítele da dxal-la sile du naxá'.

⁹Nu benne' dxedé' nagá xula chee da nigá quebe dxezífene' ca naca da bsede Cristo, ne quebe zúale Dios le'. Bénnea' dxezífene' ca naca da bsede Cristo, da li Dios zúalene' Le', na' cá'anquez zúale Cristo Le'. ¹⁰Che nu benne' xide' naga zúale le'e, ne quebe dxusédene' le'e ca naca da bsede Cristo, quebe nnele bénnea' lízrele, ne quebe gápale le' ba lá'ana. ¹¹Nu benne' gape' bénnea' ba lá'ana, dxun benne' nigá tuze ca da calela da dxun bénnea'.

Dizra' bzebe

¹²Da zante dxal-la' xapa' le'e, san quebe dxaca lazra' guzúaja' na lu xícheze. Dxebeza lazra' xida' xedajná'a le'e, na' guchálajlequeza' le'e, chee gaca béle'edxu.

¹³Bidu ca' chee bi bilu', nu'ula ba gucá'a Dios le', dxulugápabe' lue' diuzre. Ca'an gaca na.

DIZRA'DAU' GUXUNNE' DA BZUAJ SAN JUAN

San Juan dxenné' da chawe' chee benne' le' Gayo

1 Neda', benne' gula wen zrin chee Cristo, dxuzúaja' da nigá chiu' lue', Gayo, bi nazrí'ite lazra'. Da líqueze nazrí'ida' lue'.

²Lue', bi nazrí'ite lazra', dxenaba' lau Dios gaca da chawe' chiu', ne su' chawe', ca dxaca chee bénne'du xu'u.

³Gubéle'eda' gate belelá' tu chupa benne' bíchedxu, ne gulé'e neda' ca dxéajle'u chee Xránadxu, ne ca dxunu' ca naca da li. ⁴Québequeze bi de da gundxa na neda' súale'a xel-la' dxebé, ca xel-la' dxebé da zua' gate dxenda' dxelún benne' zaj naque' ca zrí'inequeza' ca naca da li.

⁵Lue', bi nazrí'ite lazra', nacu' benne' li lazre' ca naca da dxunu' dxácalenu' bi bíchedxu ca', ne da naca blaudxa dxácalenu' bi bíchedxu za'aque' xezre xula.

⁶Lau benne' zaj nazrague' chee Dios nigá dxuluchalaj bi bíchedxu caní ca nazrí'inu' bi bíchedxu ca'. Da cháwedau' dxunu' gate dxugú'u benne' caní neza, dxácalenu' le' ca naca da dxezaca ba lazre' Dios. ⁷Benne' caní zjaque' dxelune' zrin nigá lawe' da zaj nazrí'ine' Cristo, ne quebe bi dxelezi'e da xelunna benne' quebe zaj núnbe'e Dios. ⁸Chee le na' dxal-la' gápadxu ba lá'ana benne' caní chee gúnledxu le' zrin chee da li.

Da calela da dxun benne' le' Diótreres

⁹Ba bzuaja' chee benne' zaj nazrague' chee Dios naga zu', na' bénnea' le' Diótre-

fes quebe dxape' netu' ba lá'ana lawe' da dxaca lazre' gaque' blau lávela benne' ca'. ¹⁰Chee le na', che xida' naga zu', guzéajni'ida' benne' ca' ca naca da dxun bénnea', dxezí tizre' netu', ne dxennéle'e cheentu'. Quegá da nigáze dxune', san cá'anqueze quebe dxezí' lu ne'e benne' bíchedxu zá'aque' ga na', ne quebe dxu'e lataj benne' ca' dxelaca lazre' xelezí' lu ne'e benne' caní, ne dxexebéaje le' ládujla benne' ca' zaj nazrague' chee Dios.

¹¹Lue', bi nazrí'ite lazra', quebe gunu' lue' ca naca da calela da dxelún benne' caní. Ben ca naca da xrlátaje. Bénnea' dxune' da xrlátaje naque' chee Dios, san nu benne' dxune' da calela, quebe ne gúnbeaqueze' Dios.

Da xrlátaje da dxun benne' le' Demetrio

¹²Xúgute benne' dxelenné' da chawe' ca naca da dxun Demetrio, na' da líqueze naca bea na ca dxune'. Cá'anqueze netu' dxixruj beantu' ca naca da dxune', na' lue' nézqueznu' dxuchálajntu' da li.

Dizra' bzebe

¹³Déle'e da dxal-la' guchálajlena' lue', san quebe dxaca lazra' guzúaja' na lu xícheze, ¹⁴lawe' da dxebeza lazra' lé'etequezda' lue'. Nadxa guchálajdxu caníqueze.

¹⁵Dxenaba' lau Dios sua zrize lazrda'u. Bi bíchedxu zaj zra' nigá dxulugape' lue' diuzre. Bgapa lue' diuzre tu tu benne' bíchedxu zaj zre'e naga zu'. Ca'an gaca na.

XTIZRA DIOS DA BZUAJ SAN JUDAS

Dizra' da gusel-la San Judas chee bi ca' chee Dios

1 Neda', Judas, wen zrin chee Jesu-cristo, naca' benne' biche Jacobo, na' dxesel-la' dizra' nigá cheele le'e, nácale benne' ca' ba gunné Xradxu Dios, ne ba guqu'é le'e chee gácale bi chee', ne dxuxúe' le'e lawe' da nácale tuze nen Jesucristo. ²Dxenaba' lau Dios xache lázrele'e le'e, ne gúnnale'e cheele xel-la' dxebeza zri lazre', ne xel-la' zri'i lazre'.

Ca naca chee benne' ca' dxulusédenē' da wen lazre'

(2 Pedro 2.1-17)

³Benne' bícha'dau' nazri'ite lazra', ba guca lázreli'a guchálajlēna' le'e ca naca chee xel-la' weselá da ba nazile le'e, ne cá'anqueze neda', san na'a dxun na ba xen guchálajlēna' le'e, ne gata' xueda' le'e gapa típale da naca chee xel-la' dx-eajlí lazre' da ba benna Dios chalásaze chee bi chee' ca'. ⁴Caní naca lawe' da ba gulú'u benne' wen lazre' ca' ládujla dxi'u, benne' ca' ba gunná Dios gate nate dxal-la' xelebía xi'e. Zaj naque' benne' dx-elune' da sban, na' lawe' da dxunite lau Dios chee benne' dul-la, dxeléquene' zaj nápaqueze' lataj xelune' cáteze da dx-elaca lazre', ne dxuluzúe' chalá'ala Dios tu licha', Bénnea' dxenná bea, ne Xránadxu Jesucristo.

⁵Lácala ba nézquezle le'e da nigá, dx-aca lazra' gusá'a lázrele ca ben Xradxu Dios gate bebéaje' benne' Israel ca' ládujla benne' Egipto, na' gudé na' bzria xi'e benne' Israel ca', benne' quebe guléajle'e chee'. ⁶Cá'anqueze gubáz chee xabáa, gubáz ca' chee Dios, quebe belune' ca da guzre Dios le', san bulucá'ane' lataj chee'. Dios nuzague' le' lu da chul-

la, ne nuchéaje' gubáz ca' chalásaze nen du xia, chee guzrí'a xi'e le' lu zra bzebe ni'. ⁷Cá'anqueze guca chee xezre Sodoma, ne xezre Gomorra ne chee xezre walífredu ca'. Ca belún gubáz chee xabáa ca', cá'anqueze belún bēneache chee xezre caní. Buluzú'a cuine' lu da sban, ne belune' cáteze da gulaca lazre', ne buluzúe' chalá'ala ca da bdxixruj bea Dios chee xel-la' zúale nu'ula. Na'a, lawe' da bzria xi' Dios benne' ca', bdeē' le' tu lu xi' da québedxa xexula na, na' da na' guca chee benne' caní dxuzéajni'i na dxi'u chee quebe gúnquezdxu ca'.

⁸Láqueze gulaca caní chee benne' ca', cá'anqueze dxelún benne' caní, zjácálene' xel-la' bchigala, ne dxuluca'ane' sban belá' dxen chee', ne dxuluzúe' chalá'ala xel-la' dxenná bea chee Xránadxu, ne dxelenné' schanni' chee gubáz chee xabáa, gubáz ca' chee Dios. ⁹Léqueze Miguel, gubáz blau chee xabáa chee Dios gate gudíl-lalēne' da xriwe', ne btil-le' dizra' nen le na chee guca bexu'e bel-la' dxen chee Moisés, quebe bexázrjene' nnabe' da ba xa', san guzre' na: "Xránadxu Dios tíl-laqueze' lue'." ¹⁰Na'a benne' caní dxelenné' schanni' chee da quebe zaj núnbe'e, na' da ba zaj núnbeaqueze', ca da zaj neze be xixre', be quebe zaj naxéajni'iba', da caní dxuluchínene' chee xuluzrí'a xi' cuine'.

¹¹Edxugua benne' caní lawe' da dx-elune' ca da ben Caín, chee gulezí' lu ne'e dumí, buluzúe' chalá'ala da dxenná Dios ca ben Balaam, na' welexenite' ca guca chee Coré, bēneea' bzria xi' Dios lawe' da gudábague' xrtizra Dios. ¹²Benne' caní, gate dxelágulēne' le'e lu laní cheele dx-elune' cheajlechaze bēneache. Dxelé'aj dxelawe' nen le'e, ne quebe dxelape' ba lá'ana Dios. Dxelún cuine' ca benne' dx-uluxúe' zrila', san dxuluxúeze cuine'. Zaj naque' ca beuj ca' quebe zaj xuzru nisa, beuj ca' da dxua be'. Zaj naque' ca xaga

ca' quebe dxelebía na da zixre chee na, ne zaj nabizre na du lue na, ne ba zaj zua na chee lepe na. ¹³ Zaj naque' ca xea-jxruza chee nísadau' da dxedxú'u na bz-rina' sgute, da dxulé'e na ca da sban da dxelune'. Zaj naque' ca belaj ca' dxele-cuasa na lu xrneze na, ne zaj nabía xi na chee cheajsúa na chadía chacanna lu da chul-la.

¹⁴ Cá'anqueze Enoc, benne' chee gazre cue' zre sua Adán gunné' waláz chee Dios ca naca chee benne' caní, gunné': "Ble'eda' Xránadxu ze'e nen gaxúane gaxúane bi chee ca' ¹⁵ chee guchi'e ca da zaj nun xúgute bénneache. Gulezría xi' xúgute benne' wen da sban ne chee da calela da belune' lu xel-la' calela chee', nen benne' dul-la ca' ne chee xúgute dizra' schanni' da gulenné chee Dios." ¹⁶ Zaj naque' benne' wagu zria, ne benne' wezí tizra', benne' dxelunze' cáteze dx-elezaca ba lazre'. Dxuluchálaje' dizra' da dxucá'ana szren na le', ne dxelennáze' da chawe' chee bénneache chee xezezí'e da zaj de chee benne' ca'.

San Judas dxenné xuene' bi ca' chee Xránadxu

¹⁷ Le'e, benne' bícha'dau' nazri'ite lazra', le gusá lázrele ca zánete iza gulenná benne' gubáz chee Xránadxu Jesucristo, ¹⁸ gulé'e le'e: Lu zra bzebe welezzá' benne' xelún le' chee da ca'

zaj naca lá'azxa, ne xelune' cáteze zaj naca da sban da dxelezá lazre'. ¹⁹ Benne' caní dxelune' chupa la'a bénneache. Zaj naque' benne' chee xezr la xu nigá, ne quebe zúale Be' Lá'azxa chee Dios le'.

²⁰ Le'e, benne' nazri'ite lazra', le se chacha ca naca lu xel-la' dxeajlí lazre' lá'azxa da nápaie. Le guchálajle Dios, zúale xel-la' waca chee Be' Lá'azxa le'e. ²¹ Le cha' lu xel-la' zri'i lazre' chee Dios, ne le cueza zra gate gunna Xránadxu Jesucristo dxi'u xel-la' nabán da zeajlí canna lu xel-la' zri'i lazre' chee'.

²² Le gácale benne' ca' dxelaca chupa lazre' ca naca chee Cristo. ²³ Le gun xeledá benne' xula chee quebe chjaque' lu xi' chee lataj ba xa', ne le xexache lazre' xezícala bénneache. Le guxúe xanne' ca naca da sban da dxelún benne' ca' chee quebe ca'a le na le'e.

San Judas dxue lá'ané' Dios

²⁴⁻²⁵ Dios tu licha', Benne' naque' sina, ne naque' Weselá cheedxu, wazéquene' guxúe' le'e chee quebe cuásale Le', ne chee guzúe' le'e lau Le' lu xel-la' szren chee', ne chee quebe dxenle da naca chee dul-la, ne chee súalequeze xel-la' dxebe le'e.

¡Gaca ba Le', ne gaca chee' xel-la' szren, ne xel-la' waca, ne xel-la' dxenná bea, ne chee Xránadxu Jesucristo, na'a zra, ne chadía chacanna! ¡Ca'an gaca na!

DIZRA' DA BLE'E JESUCRISTO JUAN

Da ble'e Jesucristo Juan

1 Da nigá naca tu da bnezruj Dios Jesucristo da gul'éene' wen zrin chee' ca' ca naca da dxal-la' gácate. Jesucristo gusel-le' gubáz chee xabáa chee', na' le' bzéajni'ine' neda', Juan, naca' wen zrin chee' Jesús. ²Neda' dxulé'eda' le'e da li ca naca xúgute da ble'eda', ne dxexechéba' ca naca dizra' chee' Dios, ne ca naca da gunná Jesucristo.

³Ba neza zrente naca na chee' benne' gulabe', ne cá'anqueze ba neza zrente naca na chee' benne' ca' dxuluzé nague' chee' bénnea' gulabe' dizra' nigá da benna Dios, ne xelune' ca naca da naxúaj nigá, lawe' da ba za gáguze zra gaca na.

Juan dxuzuajé' chee' gazre cue' benne' dxeléajle'e chee' Jesús

⁴Neda', Juan, dxuzúaja' chee' gazre cue' benne' dxeléajle'e chee' Jesús, zaj zré'e naga nababa Asia. Dxenaba' lau Dios gaca chawe' chee, ne gunne' le'e xel-la' dxebeza zri lazre'. Le' guzúaqueze' nédxudaute, ne zúaqueze' na'a, ne tu súazqueze' chadía chacanna. Gazre Be' ca' zaj zra' ca li naga dxe' Dios zaj naca Le' tuze, ⁵ne cá'anqueze Jesucristo naque' Le' tuze ca naca da chawe' da dxun Dios chee. Jesucristo naque' benne' li lazre' dxexechébe' ca da zaj naca chee' Dios, ne naque' benne' nedxu bebane' chalásaze ládujla benne' gate ca', ne nape' xel-la' dxenná bea lávela xúgute wenná bea zaj zré'e xezr la xu nigá. Cristo nazri'ine' dxi'u, ne ba gudibe' xichaj lázrdaudxu. Begüe' dul-la cheedxu gate blálaje' dxen cheéqueze' le'e xaga begúaj. ⁶Bene' dxi'u ca benne' wenná bea ca', ne bxruze ca' chee' gundxu zrin chee' Dios chee', Bénnea'

naque' Xre'. ¡Gaca ba Le', ne gape' xel-la' dxenná bea chadía chacanna! ¡Ca'an gaca na!

⁷Le na' xque. Cristo ze'e lu beuj bza. Xúgute bénneache xelélé'ene' Le', ne cá'anqueze benne' ca' belune' Le' we', na' ca naca bénneache zaj zra' lu xezr la xu xelebezre xache'e ca xelélé'ene' Le'. ¡Awe', ca'an gaca na!

⁸Le' dxenné': "Neda' zúaqueza' nédxudaute, ne zúaqueza' bzébedxa. Dxuna' su lau sua xúgute ne guna' xexuzre na." Caní dxenná Xránadxu, nape' dute xel-la' dxenná bea, naque' Bénnea' guzúaqueze', ne zúaqueze', ne tu súazqueze'.

Juan dxel'éene' tu da ble'e Dios le' da naca na da xabáa chee' Cristo

⁹Neda', Juan, naca' benne' bíchele le'e, ne naca' tuze nen le'e lu xel-la' zi', ne lu xel-la' dxenná bea, ne lu xel-la' dxuchaga lau da dxunna Jesucristo dxi'u. Ca tu benne' xu'e lizre xia guzúa' lu xezr la xu Patmos da naxechaj nísadau', lawe' da bchálaja' dizra' chee' Dios ne dxuna' ba nalí ca naca chee' Jesucristo. ¹⁰Guzúale Be' Lá'azxa neda' lu zra chee' Xránadxu, na' benda' cúzrula' chi'i tu benne' dxenné' zizraj ca chi'i luzu da dxulucuezre'. ¹¹Gunné':

—Neda' naca' nedxu, ne bzebe ca naca da dxezú lau, ne da dxexuzre na. Bzuaj tu lu xiche da dxel'éenu', na' gusella na chee' gazre cue' bénneache dxeléajle'e chia', zaj zré'e naga nababa Asia, benne' ca' zaj zré'e xezre Efeso, ne xezre Esmirna, ne xezre Pérgamo, ne xezre Tiatira, ne xezre Sardis, ne xezre Filadelfia, ne xezre Laodicea.

¹²Bexéchaja' chee' le'eda' nu chi'i na' gunné' neda', na' ca bexéchaja' na', ble'eda' gazre da zua na xi' da' zaj naca na oro. ¹³Laduj da zaj zua na xi' ca' ble'eda' tu benne' naque' ca Bénnea' gulje' bénneache, nácue' zra lane' da dxezrinte lu ni'e dxe'ela, na' xu'u tu bazxu oro lachu'e.

¹⁴Xicha xíchajē' zaj naca na chiche ca zrila' chiche, u ca bezxe', na' xiaj lawē' dxelácatite legala na ca xi'. ¹⁵Ni'ē dxelácatite na ca xia da gudete bea guxú'u na lu xi', na' chi'ē naca na zizraj ca naca chi'i zane' xegu zri'a ca'. ¹⁶Lu ne'ē da zua xabēla nuxre' da ca' zaj naca ca gazre belaj xabáa, na' dxu'ē dxedxuaj da naca na ca tu xia da nalá dxupa la'atē. Dxu'a lawē' dxácatite na ca gubizra gate dxen-ná'le'ē na.

¹⁷Ca ble'eda' Le', xeajchazia' zran ni'ē ca tu benne' gate. Na' Le' guxrúa ne'ē xabēla neda', na' gunnē':

—Quebe zrebu'. Neda' zúaqueza' nédxudaute, ne zúaqueza' bzébedxa. ¹⁸Naca bánqueza'. Gutia', na' na'a nabánqueza' chadía chacanna. Neda' nuxra' zren xia cheē xel-la' gute, ne cheē lataj ba xa'.

¹⁹Bzuaj da ba blé'enu' ne da dxaca na'a, ne da gaca te nigá. ²⁰Caní naca da zéajē ca gazre belaj ca' blé'enu' nuxra' na'a xabēla, ne ca naca cheē gazre da zua na xi' da' zaj naca na oro. Gazre da zaj naca ca belaj ca' zéajē na gubáz ca' nasel-la' cheē gazre cue' bēnneache chia' ca', na' gazre da zua na xi' zéajē na gazre cue' bēnneache chia' ca'.

Dizra' gusel-la Cristo chee gazre cue' bēnneache chee'

Dizra' gusel-le' chee bi chee' zaj zre'ē xezre Efeso

2 Guzre Jesús neda':
—Bzuaj cheē gubáz chia' zúalēne' bi chia' zaj zre'ē xezre Efeso. Bzuaj da nigá: Caní dxenná Jesús, Bēnnea' nuxre' gazre belaj ne'ē xabēla, ne dxed' laduj gazre da zua na xi' da zaj naca na oro. ²Neda' nezda' xúgute da dxunle. Nezda' dxúnle'ele zrin ne nácale zren lazre', ne quebe dxuele lataj benne' wēn da zrinnaj ca'. Neda' nezda' ba bxue xánnele benne' ca' dxelenné' zaj naque' gubáz chia' ne quebe zaj naque', na' ba ble'ele zaj naque'

benne' wēn lazre'. ³Gúcale zren lazre', ne gudele xel-la' zi', na' bēnle'ele zrin chia', ne quebe gute ni'a na'le. ⁴Na'a zua tu da dxagu na zria cheēle, québedxa nazri'ile neda' ca bzri'ile neda' nédxute. ⁵Cheē le' na', le gusá lazre' ca bzri'ile neda' nédxute, ne le xexiaje lazre', na' le gun ca da bēnle nédxute. Che quebe gunle caní xídaqueza' naga zúale, na' xecá'a xrlátajle lu da naca chia' cheē québedxa gácale ca da zua na xi' chia'. Caní guna' che quebe xexiaje lázrele. ⁶Zua tu da dxexecá'a na le'e, dxecuídele da dxelún benne' ca' zaj nazí le' nicolaíta ca', benne' ca' dxulucá'ana szrenē' bedau' xiaj xaga ca', da na' dxecuídequeza' neda'. ⁷Benne' zua nague' dxal-la' xenne' da nigá dxē Be' Lá'azxa bi chia' ca'. Benne' ca' xeledxúaje' xrlátaje lawe' da zrinnaj, neda' gunézruja' da xelawē' da dxebía xaga da dxunna na xel-la' nabán, ne zua na lu lataj xrlátaje cheē Dios.

Dizra' gusel-le' chee bi chee' zaj zre'ē xezre Esmirna

⁸Guzre Jesús neda':

—Bzuaj cheē gubáz chia' zúalēne' bi chia' zaj zre'ē xezre Esmirna. Bzuaj da nigá: Caní dxenná Jesús, Bēnnea' zúaqueze' nédxudaute, ne zúaqueze' bzébedxa, Bēnnea' gutiē, ne bebánqueze'. ⁹Neda' nezda' xúgute da dxunu'. Nezda' gudele xel-la' zi', ne nácale benne' xache'. Da li nácale benne' gunn'a. Nezda' ca dxelenné' schanni' cheele benne' ca' dxelenné' zaj naque' judío, san zaj naque' tu cue' benne' dxulucá'ana szrene' da xriwe'. ¹⁰Quebe zrēbele ca naca xel-l a' zi' da tele, lawe' da guzrá' da xriwe' bál-lale le'e lizre xia cheē gulé'e lau da nácale, na' tele xel-la' zi' lawe' chi zra. Le gaca li lazre' lácala xelutiē' le'e, na' neda' gunna' le'e xel-la' nabán ca tu da dxunna bea na bēdxuajle chawe'. ¹¹Benne' zua nague' dxal-la' xenne' da nigá dxē Be' Lá'azxa bi chia'

ca'. Benne' ca' xeledxúaję' chawe' lawe' da zrinnaj, quebe bi gune da zi' da xa' da zējálí canna cheę benne' ca'.

**Dizra' gusel-le' cheę bi cheę' zaj
zre'ę xęzre Pérgamo**

¹² Guzre Jesús neda':

—Bzuaj cheę gubáz chia' zúalęę' bi chia' zaj zre'ę xęzre Pérgamo. Bzuaj da nigá: Caní dxenná Jesús, Bénnea' nuxre' xia da nalá dxupa la'a. ¹³ Neda' nezda' xúgute da dxunle. Nezda' zúale naga dxenná bea da xriwe'. Quebe nusanle da naca chia'. Quebe bsanle dxexeché-bele chia', ne lu zra ca' gate belutie' Antipas, benne' bechebe' du lazre' da naca chia' ládujla le'e, naga zua da xriwe'. ¹⁴ Na'a, zua tu da dxagu na zria cheęle, dxuele lataj zaj zra' ládujla le'e benne' ca' ne zjácälęę' da bsede Balaam, bénnea' gulú'u xel-le' Balac, bennen' bene' belún benne' Israel ca' dul-la, na' gulawe' da buluzrįę' lau bedau' xiaj xaga ca', ne beluęę' da sban. ¹⁵ Cá'anqueze zaj zra' ládujla le'e bal-la benne' ne zjácälęę' da dxulusede benne' zaj nazí le' nicolaíta, da na' dxecuıdequeza' neda'. ¹⁶ Cheę le na' le xexíaje lázrele lawe' da che quebe xexíaje lázrele xida' naga zúale, na' tıl-lalęna' benne' ca' nen xia nalá da dxedx-uaj na dxu'a. ¹⁷ Benne' zua nague' dxal-la' xenne' da nigá dxę Be' Lá'azxa bi chia' ca'. Benne' xedxuaję' chawe' lawe' da zrinnaj, neda' gunézruja' da gawe' da naca na xeta maná da nagache na xabáa, ne gunézruja' le' tu xiaj chiche, na' le'ę xiaj na' naxúaj tu la cube cheę bénnea', da quebe nu neze, san tuze bénnea' si'ę na.

**Dizra' gusel-le' cheę bi cheę'
zaj zre'ę xęzre Tiatira**

¹⁸ Guzre Jesús neda':

—Bzuaj cheę gubáz chia' zúalęę' bi chia' zaj zre'ę xęzre Tiatira. Bzuaj da nigá: Caní dxenná Jesús, Bénnea' zaj

zra xiaj lawe' da dxelácatite na ca xi', na' ni'ę zaj naca na ca xia gache da nabá'ale'ę na. ¹⁹ Neda' nezda' xúgute da dxunle. Nezda' ca nazri'ile neda', ne ca dxéajlele chia', ne ca dxunle zrin chia', ne ca nácale zren lazre', na' dxúndxale na'a da zrendxa ca da benle nédxute. ²⁰ Na'a, zua tu da dxagu na zria cheęle, dxuele lataj nu'ula na' le' Jezabel, nu'ula na' dxenné' dxuchálaje' waláz cheę Dios, na' dxezí xę'ę benne' wen zrin chia' ca' ca naca da dxusédene' cheę xelunę' da sban, ne xelawe' da dxuluzrįę' lau bedau' xiaj xaga ca'. ²¹ Neda' ba be'a nu'ula na' lataj xexíaje lazre', na' quebe guca lazre'. Quebe dxusanę' ca naca da sban da dxunę'. ²² Na'a, che benne' ca' quebe xulusanę' ca da dxelunę' ca dxun nu'ula na', neda' cu'a le' xel-la' wę' da quixruj na le', na' weledéle'ę xel-la' zi' benne' ca' dxelunę' dul-la nen nu'ula na', ²³ na' gúte-queza' benne' ca' zaj de'ę nu'ula na'. Caní gaca, xúgute cue' bi chia' ca' xeleque be'ęę' neda' nezda' ca naca dute da zua lu xichaj lázrdau bénneache, na' tu tule le'e gunna' le'e cáteze naca da benle. ²⁴ Xezícadxale le'e zrale xęzre Tiatira, quebe zéajlele da na' dxusede nu'ula na', ne quebe ne sile da dxenné' naca na da nagache cheę da xriwe', neda' dxapa' le'e, quebe bi xetú da gucha' le'e gunle. ²⁵ Le gapa chí'i xel-la' dxixruj be'e da ba gucha' le'e gunle ca zrindxa zra xelá'a neda'. ²⁶ Benne' ca' xeledxúaję' chawe' lawe' da zrinnaj, ne xelunę' ca dxaca lazra' neda' ca zrindxa zra bzebe ni', neda' gunézruja' cheę benne' ca' xel-la' dxenná bea lawe' xęzre ca', ²⁷ ca ben Xra', benne' neda' xel-la' dxenná bea, na' xelenná be'ęę' benne' xęzre ca' nen tu var xia, na' xuluzría xi'ę xęzre ca' ca dxun tu benne' dxelé'ę tu xesu' xu. ²⁸ Cá'anqueze gu'a benne' ca' lataj xelezúalęę' neda', naca' ca belaj zila. ²⁹ Benne' zua nague' dxal-la' xenne' da nigá dxę Be' Lá'azxa bi chia' ca'.

**Dizra' gusel-le' chee bi chee' ca'
zaj zre'e xezre Sardis**

3 Guzre Jesús neda':
—Bzuaj chee gubáz chia' zúalene' bi chia' zaj zre'e xezre Sardis. Bzuaj da nigá: Caní dxenná Jesús, Bénnea' zaj zúale gazre Be' chee Dios Le', ne nuxre' da gazre ca' zaj naca ca' belaj ca'. Neda' nezda' xúgute da dxunle. Nezda' ba nácale ca' benne' gate ca' lau Dios lácala dxeleque bénneache naca banle. ²Le guxúe, ne le sua chacha chee québedxa gácale ca' benne' ca' ba zúate xelátie'. Dxele'eda' da dxunle, quebe naca na li lazre' lau Dios chia'. ³Le gusá lazre' ca' naca da ba nazédele. Le chéajle na, ne le xexíaje lazre'. Che quebe guxúe cuínale wida' naga zúale ca' za tu gubán, ne quebe nézele bi zra xida'. ⁴Zaj zra' ládujla le'e bábase benne' quebe ne xelune' da sban, na' benne' caní xeledálene' neda', ne xelácue' zra lané' chiche lawe' da caní dxal-la' gaca chee'. ⁵Benne' ca' xeledxúaje' chawe' lawe' da zrinna' xelácue' zra lané' chiche ne quebe xusula' la benne' ca' lu xiche naga zaj naxúaj la benne' ca' zúale xel-la' nabán le', na' xechéba' chee benne' ca' lau Xra' ne lau gubáz chee xabáa chee' ca'. ⁶Benne' zua nague' dxal-la' xenne' da nigá dxé Be' Lá'azxa bi chia' ca'.

**Dizra' gusel-le' chee bi chee' zaj
zre'e xezre Filadelfia**

⁷ Guzre Jesús neda':

—Bzuaj chee gubáz chia' zúalene' bi chia' zaj zre'e xezre Filadelfia. Bzuaj da nigá: Caní dxenná Jesús, Bénnea' naque' lá'azxa ne li lazre', Bénnea' nuxre' zren xia da dxunna bea na nape' xel-la' dxenná bea ca da gudapa wenná bea David, na' gate salje', netú quebe nu gaca xusezxuj, na' gate xuséxuje' netú quebe nu gaca salaj. ⁸Neda' nezda' xúgute da dxunle. Nuzú'a laule le'e tu dxa xu'u da

naxalaj, da quebe nu gaca xusezxuj. Lácala quebe nadípatecale, zéajlele dizra' chia', ne quebe ne gusán lázrele da naca chia'. ⁹Benne' ca' dxulucá'ana szrene' da xriwe', benne' wen lazre' ca', benne' dxelenné' zaj naque' judío ne quebe zaj naque', neda' guna' xuluzú zribe' zran ní'ale chee xelenézene' neda' nazrí'ida' le'e. ¹⁰Ba benle ca da gucha' le'e gunle chee gácale zren lazre', na' chee le na' guxúequeza' le'e lawe' xel-la' zi' da xeledé xúgute bénneache zaj zre'e lu xezr la xu, chee gulé'e lau da zaj naque'. ¹¹Wídazequeza'. Le gapa chi'i da nápalet chee quebe nu ca'a ca da dxal-la' si'le. ¹²Benne' ca' xeledxúaje' chawe' lawe' da zrinna', neda' gun chacha' benne' ca', na' xelaque' ca ze'e xiaj ca' zaj zua na lizre Xra', ne cabátaquezdxaxeledxúaje' na', na' lu lázrdawe' guzúaja' La Xra', ne la xezre chee Dios chia' da naca na Jerusalén cube da za' xabáa, ne La' cube. ¹³Benne' zua nague' dxal-la' xenne' da nigá dxé Be' Lá'azxa bi chia' ca'.

**Dizra' gusel-le' chee bi chee' zaj
zre'e xezre Laodicea**

¹⁴ Guzre Jesús neda':

—Bzuaj chee gubáz chia' zúalene' bi chia' zaj zre'e xezre Laodicea. Bzuaj da nigá: Caní dxenná Jesús, Bénnea' naque' li lazre', Bénnea' dxexechébe' da li, Bénnea' naque' naga guzú lau xúgute da ben Dios. ¹⁵Neda' nezda' xúgute da dxunle. Nezda' quebe nácale zaga ca dxunle da naca chia', ne quebe nácale látela. Dxaca lazra' la gácale zaga u la. ¹⁶Nácale ca nisa bate, ne quebe nácale zaga, ne quebe nácale la, na' chu'una' le'e ca tu benne' dxexébe' nisa bate. ¹⁷Le'e dxennale nácale gunní'a, ne dxaca chawe' chee ne quebe bi dxexázrjele, na' quebe dxéquebe'ele' dxaca ba xa' chee ne dxexaca zi'le, ne nácale xache', ne nácale la chul-la, ne nácale gala xide. ¹⁸Chee le na' dxuzéajni'ida'

le'e si'le lu na' neda' da naca ca oro da nabá'a na lu xi', chee gápale xel-la' gunní'a li lazre', ne si'le zra lánale chiche chee gácule, da gunna' le'e, na' xenite xel-la' stu' chee da gúcale gala xide, ne si'le da cu'ule xiaj laule chee xel'éle. ¹⁹Neda' dxusízreda', ne dxudéa' xel-la' zi' xúgute benne' ca' nazrí'ida'. Chee le na' dxal-la' xexíaje lázrele ne gunle zrin chia' du lázrele. ²⁰Le na' xque. Neda' zea' dxa xu'u dxennia'. Che nu benne' xenne' chi'a, ne salje' xu'u, na' chu'a gágulena' le', na' le' gágulene' neda'. ²¹Benne' ca' xeledxúaje' chawe' lawe' da zrinna', neda' gunéruja' le' lataj xebe'le' neda' naga dxenná be'a, ca neda' bedxúaja' chawe', ne dxé'lena' Xra' naga dxenná bea Le'. ²²Benne' zua nague' dxal-la' xenne' da nigá dxé Be' Lá'azxa bi chia' ca'.

Dxulucá'ana szrene' Dios lu xabáa

4 Ca gudé na' gunná'a, na' ble'eda' tu dxa xu'u da naxalaj na xabáa, na' benda' chi'i Bénnea' benda' chee' nédxute da naca na ca chi'i luzu da dxulucuezre', na' guzre' neda':

—Guluén nigá, na' gul'éda' lue' da ca' dxal-la' gaca ca te chee da nigá.

²Ca gunné' ca' guzúale Be' Lá'azxa neda', na' ble'eda' tu lataj blau xabáa, ne ble'eda' tu Benne' zaca dxé'e lataj blau na'. ³Bénnea' dxé'e lu lataj blau na' nalé' ca tu xiaj jaspe da dxácatite na, u ca tu xiaj cornalina, na' dxu'a lataj blau na' naxechaj ca tu bchita' da dxácatite na ca tu xiaj esmeralda. ⁴Dxu'a lataj blau na' zaj zua tape dxua lataj naga zaj dxé' tape dxua benne' gula ca', zaj nacue' zra lane' chiche, ne zaj zria xíchaje' da zaj naca na oro. ⁵Lu lataj blau na' dxeledxúaj xesa, ne dxaca nine, ne dxelenné' guziu', na' lau lataj blau na' zaj zua gazre xi' dxelala na, da zaj naca na gazre Be' chee Dios. ⁶Le na' lau lataj blau na' de' ca tu nísadau' da naca na ca xiaj esa' xaní'le'e.

Laduj na' dxu'a lataj blau na' zaj zra' xetapa da zaj naca ban, zaj zua xiaj lau cuzre', ne laule'. ⁷Benne' nedxu nalé'e ca tu bezre xixre', na' benne' gudxupe' nalé'e ca tu bezre, na' benne' guxunne' naca lawe' ca lau bénneache, na' benne' gudape' nalé'e ca tu bsia nachiluj xílaba'. ⁸Dápaté benne' caní zaj zua xrupa xri'le' tu tue', na' dxupa la'a le'e xri'la benne' caní zaj zria zane' xiaj lawe'. Te zra ne chizrela quebe dxulusane' dxelenné':

Lá'azxa, lá'azxa, lá'azxa naca Xránadxu Dios nape' dute' xel-la' dxenná bea,

Bénnea' guzúaqueze', ne zúaqueze', ne tu súazqueze'.

⁹Tu tu lasa gate dápaté benne' ban caní dxelegú'e ba Dios, ne dxulucá'ana szrene' Le', ne dxel'é'e Le': Xcalenu', Bénnea' zúaqueze' chadía chacanna, ¹⁰na' dape dxu'ate benne' gula ca' dxuluzú zribe' lau Le', ne dxulucá'ana szrene' Bénnea' zúaqueze' chadía chacanna, ne dxuluzúe' da ca' zaj zria xíchaje' ca' lau lataj blau na', dxelenné':

¹¹Xránantu' Dios, Lue' naca chiu' si' lu na'u xel-la' szren,

ne xel-la' ba lánana, ne xel-la' dxenná bea, lawe' da benu' Lue' xúgute da de, na' ca dxaca lazru' Lue' zaj zua na, ne gulá gulebinna na.

Tu xiche nadube, ne Bénnea' naque' Zríla'dau'

5 Lu na' xabela chee Dios, Bénnea' dxé'e lataj blau na', ble'eda' tu xiche nadube, da naxúaj dxupa la'ate na, na' nazriche na gazre da dxelunna bea na. ²Ble'eda' tu gubáz chee xabáa nápalé'e xel-la' waca, na' gunné' zizraj:

—¿Nuzra naca chee' chíluje' xiche na', ne cheze' da ca' dxelunna bea na?

³Queba nu chilá' xabáa, ne lu xezr la xu, ne zranla xezr la xu naca chee' chíluje' xiche na', ne quebe nu gaca nne'e na chee lé'ene' ca naca na. ⁴Neda'

gudxézreli'a lawe' da quebe nu chilá' benne' naca chee' chíluje' xiche na', ne gulabe' na, ne quebe gaca nne'e na.
⁵Nadxa tu benne' ládujla benne' gula ca' guzre' neda':

—Québedxa cuezru' lawe' da ba bzru'e'e Jesús, Bénnea' nazi'i le' Bezre Xixre' chee' xrtia Judá lawe' da nape' xel-la' dxenná' bea zrente, ne naque' zri'ine zre sua David, na' Le' naca chee' chíluje' xiche na', ne cheze' da gazre ca' dxelunna bea na.

⁶Nadxa ládujla naga zua lataj blau na', ládujla tapa benne' ban ca', ne ládujla tape dxua benne' gula ca', ble'eda' Jesús, Bénnea' naque' Zríla'dau' chee' Dios. Ze'e na', lácala zrie' we' lawe' da belutie' Le'. Zria gazre lúzuba' ne gazre xiaj lauba', na' xiaj lauba' ca' zaj naca na gazre Be' chee' Dios da ca' nase-la Dios du ca naca xezr la xu. ⁷Bénnea' naque' Zríla'dau' guxíaje' guqu'é'e xiche na' lu na' xabela Bénnea' dxe'e' lataj blau na'. ⁸Ca guqu'é'e xiche na', na' tapa benne' ban ca', ne tape dxua benne' gula ca' buluzú zribe' lau Bénnea' naque' Zríla'dau'. Tu tu benne' gula ca' zaj nuxre' tu da dxelúl-lalene' da can zríadi'i na du, nazí le na árpa, ne zaj nu'e x'éena bzri da naca na oro zaj xu'u na xala zixre, da zéaje na xel-la' dxuláwizra Dios da dxelún bi ca' chee' Dios.
⁹Dxelul-le' tu da cube caní:

Lue' naca chiu' ca'u xiche na', ne chezu' da ca' dxelunna bea na, lawe' da belutie' Lue', na' nen dxen chiu' bexa'u bénneache chee' xelaque' chee' Dios,

Zaj naque' benne' xúgute cue' bénneache, ne dxelenné' xúgute dizra' walazre', ne zaj naque' benne' xúgute xezre ne xúgute cue' xezr la xu.

¹⁰Benu' le' benne' wenná' bea ca', ne bxruze ca' lau Dios cheedxu, na' xelenná' be'e lu xezr la xu.

¹¹Nadxa gunná'a, na' benda' chí'i zane' gubáz ca' chee' xabáa zaj naxéchaje' lataj blau na', ne tapa benne' ban ca', ne tape dxua benne' gula ca'. Zaj zra' benne' zantau' gubáz ca', ¹²na' dxelenné' zizraj: Bénnea' naque' Zríla'dau' belutie', naca chee' si'e xel-la' dxenná' bea, ne xel-la' gunná'a, ne xel-la' sina, ne xel-la' waca, ne xel-la' ba lá'ana, ne xel-la' szren, ne xel-la' dxue lá'ana.

¹³Cá'anqueze benda' dxelenná' xúgute da ca' ben Dios, da ca' zaj zra' xabáa, ne da ca' zaj zra' xezr la xu, ne da ca' zaj zra' lu nísadau', ne xúgute da ca' zaj nita xúgute lataj ca', dxelenná' na: Xel-la' dxue lá'ana, ne xel-la' ba lá'ana, ne xel-la' szren, ne xel-la' dxenná' bea zaj naca na chee' Bénnea' dxe'e' lataj blau na', ne chee' bénnea' naque' Zríla'dau', gaxúane gaxúane iza.

¹⁴Dápaté benne' ban ca' gulenné':
 —¡Ca'an gaca na!

Na' dape dxuaté benne' gula ca' buluzú zribe', ne bulucá'ana szrene' Bénnea' naca bane' gaxúane gaxúane iza.

Dxecheze' xrupa da gazre ca' da dxelunna bea na

6 Nadxa ble'eda' gate Bénnea' naque' Zríla'dau' gucheze' da nedxu da gazre ca' dxelunna bea na. Na' benda' dxenná' tu benne' tapa ca' zaj naca bane', na' chí'e ben na ca' guziu', dxenné':

—Gudá, le'enu'.

²Gunná'a, na' ble'eda' tu bzrina' chiche, na' benne' zrie'-ba' nuxre' tu da dxedxú'una na xágadau' nalá xéche'ze. Bulunézruje' le' tu da naquen oro da guzúe' xíchaje', na' nen dute xel-la' dxenná' bea bdxuaje' chee' zrué'ene' lu wedil-la.

³Gate Bénnea' naque' Zríla'dau' gucheze' da gudxupe' da dxunna bea na,

na' benda' benne' gudxupe' chee benne' tapa ca' zaj naca bane', dxenné':

—Gudá, le'enu'.

⁴Na' bdxuaj xetú bzrina', nácaba' be xrna, na' bénnea' zrié'-ba' guzi'e xel-la' dxenná bea chee cue' xel-la' dxebeza zri lazre' lu xezr la xu, ne chee guné' xelute bénneache ljwezre' ca', na' bulunézruje' le' tu xia tunna da nalá.

⁵Gate Bénnea' naque' Zríla'dau' gucheze' da guxunne' da dxunna bea na, na' benda' benne' guxunne' chee benne' tapa ca' zaj naca bane', gunné':

—Gudá, le'enu'.

Gunná'a, ne ble'eda' tu bzrina' gasaj, na' benne' zrié'-ba' nuxre' zrgú'unsá.

⁶Benda' tu chi'i dxenné na ládujla tapa benne' ban ca', gunná na:

—Chupa xia zrúa' xtila saca na lazruj chee tu zra, ne xrupa xia zrúa' cebada saca na lazruj chee tu zra, san quebe cu' za xel-la' wagu, ne quebe cu' xrise uva wal-la.

⁷Gate Bénnea' naque' Zríla'dau' gucheze' da gudape' da dxunna bea na, na' benda' benne' gudape' chee benne' ban ca', gunné':

—Gudá, le'enu'.

⁸Gunná'a, ne ble'eda' tu bzrina' gache, na' benne' zrié'-ba' le' Xel-la' Gute, na' cuzru bénnea' za tu benne' ze'e waláz chee lataj chul-la ga nnita benne' gate ca'. Bénnea' le' Xel-la' Gute guzi'e xel-la' dxenná bea chee gutie' tu cue' chee tapa cue' ca' naca bénneache zaj zre'e xezr la xu. Gutie' benne' ca' lu wedil-la, ne lu xel-la' dxedún, ne lu xízrawe' ca', ne lu na' be snia zaj zra' lu xezr la xu.

⁹Gate Bénnea' naque' Zríla'dau' gucheze' da gáxzue da dxunna bea na, na' ble'eda' zran cugu bénne'du ca' gulú'u benne' ca' belute bénneache le' lawe' da buluchálaje' dizra' chee Dios, ne belexechebe' ca' naca chee'.

¹⁰Bénne'du ca' gulú'u benne' ca' gulenné' zizraj:

—Xran lá'azxa, ne li lazre', ¿xeajáte chenu' chee guchi'u cheentu', ne xebéaj lazru' benne' ca' belutie' netu', benne' ca' zaj zre'e lu xezr la xu?

¹¹Nadxa bénne'du ca' gulú'u benne' ca' gulez'e zra lane' chiche, na' guzre' le' xebeze' xetú chí'dau', cadxa cha benne' biche' ca' dxelune' zrin chee Cristo, xelute bénneache le' ca' belutie' benne' ca'.

¹²Gate Bénnea' naque' Zríla'dau' gucheze' da xrupe da dxunna bea na, na' guná'a, na' guzrú'le'e lu xezr la xu. Gubizra bexaca na da chul-la ca' ladxe' gasaj, na' beu' bexaca na xrna ca' dxen,

¹³na' belaj zaj zria xabáa belexruj na lu xezr la xu, ca' dxelexruj higo dxe'ene ca' gate dxácale'e be' dxunibe na xaga higo na'. ¹⁴Xabáa benite na ca' tu xiche da dxexedube, na' xúgute' xi'a ca', ne xezr la xu ca' da zaj naxechaj nísadau' gulecuasa na naga zaj zua na. ¹⁵Benne' wenná bea ca' zaj zre'e lu xezr la xu bulucache cuine' lu bluaj ca' ne ládujla xiaj ca' zaj nita lu xi'a ca', na' tuze gulaca benne' blau ca' ne benne' gunn'a ca', ne benne' xíchaje' ca' chee benne' dxjaca wedil-la, ne benne' ca' dxeleenná bea, ne benne' zaj nada'u, ne benne' zaj nadxúaje' lu na' xrane' ca', ¹⁶na' benne' caní gul'é'e xi'a ca', ne xiaj xre ca':

—Le quia cha netu', ne le gucache netu' lau Dios, Bénnea' dxe'e lataj blau, ne lu xel-la' zi' zren da gunna Bénnea' naque' Zríla'dau'.

¹⁷Ba bzrin zra chee xel-la' zi' zren. ¿Núzraqueze sue le' na?

Benne' Israel ca' gucá'a Dios

7 Ca' gudé chee da nigá, ble'eda' tapa gubáz chee xabáa zaj ze' dapa saca chee xezr la xu, na' zaj nuzague' be' da zá'aca na dapa saca, chee quebe bi be' gaca lu xezr la xu, ne lawe' nísadau', ne lawe' xaga ca'. ²Cá'anqueze ble'eda' xetú gubáz chee xabáa ze'e naga dxalaj gubizra, na' nuxre' da gunna bea na nu

benne' naque' che Dios ban. Gubáz nigá gunné' zizraj, dxé'e dápaté gubáz chee xabáa ca' bache zaj nazi'e xel-la' dxenná bea xuluzría xi'e xezr la xu, ne nísadau', gunné':

³—Quebe guzría xile xezr la xu, ne nísadau', ne xaga ca', dxácaté quebe ne guchícentu' luzrgá benne' ca' tu da guna bea na zaj naque' chee Dios cheedxu.

⁴Benda' cáтите zaj naca benne' ca' gulezriche luzrgue' da na' dxunna bea na. Zaj naque' tu gaxúe tape xun cue' da zaj naca na chi gaxúa weaj lówela xúgute cue' benne' Israel. ⁵Gulezriche luzrgue' da na':

Chazrinnu cue' benne' xrtia Judá, ne chazrinnu cue' benne' xrtia Rubén, ne chazrinnu cue' benne' xrtia Gad, ne ⁶chazrinnu cue' benne' xrtia Aser, ne chazrinnu cue' benne' xrtia Neftalí, ne chazrinnu cue' benne' xrtia Manasés, ne ⁷chazrinnu cue' benne' xrtia Simeón, ne chazrinnu cue' benne' xrtia Leví, ne chazrinnu cue' benne' xrtia Isacar, ne ⁸chazrinnu cue' benne' xrtia Zabulón, ne chazrinnu cue' benne' xrtia José, ne chazrinnu cue' benne' xrtia Benjamín.

Benne' zan zaj nacu zra lané' chiche

⁹Gudé na' gunná'a ne ble'eda' benne' zan chee xúgute cue' bénneache:

Benne' xúgute cue' xezr la xu, ne benne' dxelenné' xúgute dizra' walazre' cha chee', ne benne' xúgute xezre ca'.

Zaj ze' le na' naga zua lataj blau na', ne naga ze Bénnea' naque' Zríla'dau'. Benne' caní zaj nacue' zra lané' chiche, ne zaj nuxre' zina'. ¹⁰Xúgute' dxelenné' zizraj: Xel-la' weselá za na lu na' Dios cheedxu, Bénnea' dxé'e lataj blau, ne lu na' Bénnea' naque' Zríla'dau'.

¹¹Xúgute gubáz chee xabáa ca' zaj ze' zaj naxéchaje' lataj blau na', ne naga zaj zra' benne' gula ca', ne tapa benne'

ban ca', na' buluzú zribe' belíxrujte lawe' zran ni'e, na' bulucá'ana szrené' Dios. ¹²Dxelenné':

¡Ca'an gaca na!

¡Xel-la' dxue lá'ana, ne da xabáa, ne xel-la' sina, ne xel-la' dzezaca ba lazre',

ne xel-la' ba lá'ana, ne xel-la' dxenná bea, ne xel-la' szren,

zaj naca na chee Dios cheedxu chadía chacanna!

¡Ca'an gaca na!

¹³Nadxa tu benne' gula ca' bchebe' neda':

—¿Nuzra benne' caní zaj nacue' zra lané' chiche, ne gazra zes'aque'?

¹⁴Neda' gucha' le':

—Xran, lue' nézqueznu'.

Le' guzre' neda':

—Benne' caní ba guledé' lu xel-la' zi' zren na', na' benne' caní ba zaj nacue' zra lané' chiche lawe' da Bénnea' naque' Zríla'dau' ba gudibe' xichaj lázrdawe' nen dxen chee'. ¹⁵Chee le' na' zaj zre'e dxu'a lataj blau naga dxé' Dios, ne dxelúe lá'ane' Le' te zra ne chizrela lu xudau' chee', na' Bénnea' dxé'e lataj blau na' guxúequeze' benne' ca', ne súaletecaze' le'. ¹⁶Québedxa xeledune' ne québedxa xelebílene', ne québedxa guzezxe gubizra benne' ca', ne québedxa xeléquene' da la, ¹⁷lawe' da zua Bénnea' naque' Zríla'dau' cuita lataj blau na', na' guxúe' benne' ca' ca dxun benne' dxuxúe' zríla' ca', ne che'e benne' ca' naga dxelalaj nisa da dxunna na xel-la' nabán, na' Diósqueze tu súalezqueze' benne' ca' chee québedxa xebezre'.

Dxecheze' da gazre da ca' dxelunna bea na

8 Gate Bénnea' naque' Zríla'dau' gucheze' da gazre da ca' dxelunna bea na, da ca' zaj nuchiche na xiche na', na' gudxé' zri xabáa tu chi'i zrénqueze.

²Nadxa ble'eda' gazre gubáz chee xabáa

ca' zaj zē' lau Dios, na' bulunézruje' gubáz chee xabáa ca' gazre luzu da xulucuezre'. ³Gudé na' bla' xetú gubáz chee xabáa nuxre' tu xé'ena bzri da naca na oro ne guzē' dxu'a cugu, na' bulunézruje' le' xala zixre chee guzúe' na lau Dios tu zren nen xel-la' dxuláwizra Dios ca' da belún benne' ca' zaj naque' chee Dios. Bzue' na lu cugu naca na oro, da zua na lau lataj blau na'. ⁴Zren chee xala na' guluén na lau Dios tu zren nen xel-la' dxuláwizra Dios ca' belún benne' ca' zaj naque' chee Dios. ⁵Nadxa tu gubáz chee xabáa guquē'e xé'ena bzri na', na' bzre'e na xi' da guquē'e lu cugu na', na' gudxú'une' xi' na' lu xezr la xu, na' gulenné guziu', ne gulénnele'e, ne gulépele'e xesa, ne guzrú' xezr la xu.

Dxuluchine gubáz ca' da dxulucuezre'

⁶Nadxa gázrete gubáz chee xabáa ca' zaj nuxre' gazre luzu da dxulucuezre' gulezé chawe' xuluchinene' na.

⁷Gubáz nedxu na' bchínene' da dxucuezre', na' gulinnaj xiaj bezxe', ne xi' da zaj nachixre na dxen da belexruj na lu xezr la xu. Xáteze quebe bedú gachaj xezr la xu guzezxe na late weaj du ca naca lu xezr la xu. Xáteze quebe gudache gáchajte xaga ca' zaj zē' lu xezr la xu gulezxe na, ne cá'aqueze guca chee xixre' xa'a ca'.

⁸Gubáz chee xabáa gudxupe' bchínene' da dxucuezre', na' bexruj da naca na ca tu xi'a zren da dxala na xi' lu nísadau', na' xáteze quebe guca gáchajte nísadau' na' bexaca na dxen. ⁹Xáteze quebe guca gáchajte bea zaj zraba' lu nísadau' guláteba', na' xáteze quebe guca gáchajte da ca' dxeledán lawe' nísadau' gulebía xi na.

¹⁰Gubáz chee xabáa guxunne' bchínene' da dxucuezre', na' bexruj tu belaj zrente zran xabáa, da dxala na ca tu xi' xedxe. Naga bexruj na, xáteze

quebe gudache gáchajte xegu ca', ne beaj ca' gulebía xi na. ¹¹Belaj na' le' na Ajenjo, da zéaje na da naca na sla', na' xáteze quebe guca gáchajte nisa da de lu xezr la xu bexaca na ajenjo, na' benne' zante gulate' ne chee nisa na' lawe' da bexaca na sla'.

¹²Gubáz chee xabáa gudape' bchínene' da dxucuezre', na' xáteze quebe bedú gachaj xel-la' naxaní' chee gubizra, ne xel-la' naxaní' chee beu', ne xel-la' naxaní' chee belaj ca' belexaca na chul-la, na' quebe bulusení na du lazre' xáteze quebe guca gachaj zra, ne cá'aqueze che zrela.

¹³Nadxa gunná'a, ne benda' chi'i tu gubáz chee xabáa dxede' lu be', dxenné' zizraj:

—Edxugua bénneache zaj zra' xezr la xu gate xelebezre luzu da xuluchine xechunna gubáz chee xabáa ca'.

9 Gubáz chee xabáa gázxue bchínene' da dxucuezre', na' ble'eda' tu benne' naque' ca tu belaj bexruj na lu xezr la xu, na' bulunézruje' le' zren xia chee lataj chul-la chee benne' gate ca'. ²Gusálaje' lataj chul-la na', na' lu'ule na' bdxuaj zren ca naca da dxedxuaj na naga dxeluzre' bla'dau', na' zren na' bchul-la na lau gubizra, ne lu be'. ³Lu zren na' beledxúaj biche zu. Guledaba' du ca naca xezr la xu, na' biche zu ca' guleziba' lataj xeláduba' bénneache ca da dxelún bexrujni.

⁴Dios guzre' biche zu ca' quebe xuluzría xiba' xixre' xa'a ca', ne netú xaga, san xeláduzeba' bénneache quebe nazriche luzrgue' da dxunna bea na benne' ca' zaj naque' chee Dios. ⁵Quebe zaj naziba' lataj xelúteba' bénneache, san xuludézeba' bénneache ba xa' lawe' gazxu' beu', na' xel-la' dxelá chee naga dxeláduba' naca na ca naca da dxun bexrujni, be dxelúteba' bénneache. ⁶Lu zra ca' xelaca lazre' bénneache xelexute cuine', ne quebe xelexéquene'. Xelaca lazre' xelatie' ne quebe xelatie'.

⁷Biche zu ca' zaj nácaba' ca bzrina' ca' ba zaj nabézaba' chjácaba' lu wedil-la. Xíchajba' zaj zria na ca tu da naca na oro, na' dxu'a lau biche zu ca' naca na ca lau bénneache. ⁸Xicha xíchajba' zaj naca na ca xicha xichaj nu'ula ca', na' lázxabá' zaj naca na ca lazxa bezre xixre'. ⁹Lachu'uba' xu'u na ca zraba' xia, na' xrílabá' dxeleninne na ca dxeleninne da dxelecá'a bzrina' ca' zjaca chéguba' lu wedil-la. ¹⁰Zaj zua xrbánba' ca xrbán békrujni, zaj zua na liba'. Zaj nazi'ba' lataj xeláduba' bénneache lawe' gazxu' beu'. ¹¹Zua tu xrane biche zu ca' naca gubáz chee lataj chul-la, ne le na Abadón nen dizra' hebreo, ne nen dizra' griego le na Apolión, da zéaje na da dxuzría xi na.

¹²Caní guca da nedxu da ba xa' da xeledé bénneache, na' da' zí'aca xechupan ca'.

¹³Nadxa gubáz chee xabáa xrupe bchínene' da dxucuezre', na' benda' tu chi'i da gunná ládujla tapa luzu cugu lá'azxa na' naca na oro da zua na lau Dios. ¹⁴Chi'i na' guzre na gubáz chee xabáa xrupe na' nuxre' luzu da dxucuezre':

—Bsan dápaté gubáz ca' zaj nadxéaje' dxu'a xegu zren le na Eufrates.

¹⁵Ca' guca na, na' gulelá gubáz ca' chee xelutie' xáteze ca gaca gáchajte bénneache lawe' da ba zaj nabeza gubáz ca' chee zra na', ne beu' na', ne iza na'. ¹⁶Benda' cáтите zaj naca benne' dxjaca wedil-la ca' zaj zrie' bzrina' zrálene' gubáz ca'. Zaj naque' chupa cue' gaxua da zaj naca gaxúane gaxúane.

¹⁷Lu da ble'e Dios neda' ble'eda' ca zaj naca bzrina' ca', ne ca zaj naca benne' dxjaca wedil-la ca' zaj zrie'-ba'. Zaj xu'u lachu'e zre' xrna da naca na xia, ne da nalá' ca zran xabáa, ne da gache. Xichaj bzrina' ca' zaj naca na ca xichaj bezre xixre', na' dxú'aba' ca' beledxúaj xi', ne zren, ne tu da gache da dxuzéxle'e na. ¹⁸Xáteze quebe gudache gáchajte bén-

neache gulate' lu da ca' beledxúaj na dxu'a bzrina' ca', xi', ne zren, ne da gache na'. ¹⁹Xel-la' snia chee bzrina' ca' zua na dxú'aba', ne xrbánba' lawe' da zaj naca xrbánba' ca belá' ca' zaj zua xíchajba', na' nen da ca' dxuluzría xiba' bénneache.

²⁰Benne' ca' xezica, benne' quebe belúteba', belúnqueze' da zrinna' ca da dxelúnqueze', ne bulucá'ana szrénqueze' be' xriwe' ca', ne bedau' oro ca', ne bedau' plata ca', ne bedau' xia gache ca', ne bedau' xiaj ca', ne bedau' xaga ca', da ca' quebe dxaca xelélé'e na, ne quebe dxaca xelén na, ne quebe dxaca sí'aca na. ²¹Cá'anqueze belútequeze' benne' ca', ne belúnqueze' xel-la' wazrá', ne belúnqueze' da sban, ne gulebánqueze'.

Tu gubáz chee xabáa nuxre' tu xíchedau' nazriluj na

10 Nadxa ble'eda' xetú gubáz chee xabáa nápalé'e xel-la' dxenná bea. Bétaje' xabáa, xu'e tu lu beuj, ne zua tu bchita' xíchaje'. Dxu'a lawe' dxácatite na ca gubizra, na' ni'e zaj naca na ca xi'. ²Nuxre' tu xíchedau' da nazriluj na, na' bzue' ni'e zua xabéla lawe' nísadau', ne ni'e zua xéglala lawe' xezr la xu bizre. ³Nadxa gudxezre xé'e ca dxun bezre xixre' dxebezre xa'aba', na' ca gudxezre xé'e gulenné gazre guziu'. ⁴Ca gudé gulenné gazre guziu' ca', ba zúate guzúaja', na' benda' tu chi'e za xabáa, guzre neda':

—Bcache naze da gulenná gazre guziu' ca'. Quebe guzúaju' na.

⁵Nadxa gubáz chee xabáa na' ble'eda' ze' lawe' nísadau', ne lawe' xezr la xu bizre guchisa ne'e da zua xabéla zran xabáa, ⁶na' bzétaje' La Bénnea' zue' chadía chacanna, ne bene' xabáa, ne xezr la xu, ne nísadau', ne xúgute' da zaj de lawe' da ca' bene', na' gunné':

—Québedxa che na, ⁷lawe' da gate su lau gubáz chee xabáa gazre guchínene' luzu da xulucuezre', ba guca li ca naca da nun Dios dxal-la' gaca ca bzenne' benne'

wen zrin chee' ca', benne' gulenné' waláz chee'.

⁸Ca naca chi'e da benda', da za xabáa, bchálajlene' neda' xetú, gunné':

—Guxíaj xeajcá'a xíchedu na' nuxru gubáz chee xabáa na' ze' lawe' nísadau', ne lawe' xezr la xu bizre.

⁹Nadxa guxá'a lau gubáz chee xabáa na', na' gunaba' gunne' neda' xíchedu na', na' guzre' neda':

—Gucá'a na. Gudagu na. Lu dxu'u gaca na zixre ca bzrína'dau', na' lu le'u xexaca na da sla'.

¹⁰Nadxa gucá'a xíchedu na' lu na' gubáz chee xabáa na', na' gudawa' na, na' lu dxu'a guca na zixre ca bzrína'dau'. Ca gudé gudawa' na, bexaca na sla' lu le'a.

¹¹Nadxa gulé'e neda':

—Dxun na ba xen guchálaju' waláz chee Dios lau benne' zaj zre'e zane cue' xezr la xu, ne lau benne' zaj zre'e xezre zan ca', ne lau benne' dxelenné' dizra' walazre' cha chee' ca', ne lau benne' wenná bea ca'.

Chupa benne' dxelexechebe'

11 Nadxa belunne' neda' tu xia xtíladau' da naca na ca tu xaga da dxudxíredxu, na' gulé'e neda':

—Guxasa, bdxixre' xudau' chee Dios ne lu cugu, na' blaba bal-la benne' zaj zre'e na' dxulucá'ana szrene' Dios.

²Quebe gudxixru' chale'aj chee xudau' na' lawe' da ba gudé na lu na' benne' zitu' ca', na' benne' ca' xululé'aje' xezre lá'azxa lawe' chupe xun beu'. ³Neda' sel-la' chupa benne' zaj nacue' ladxe' tuzruj, na' xelenné' waláz chia' lawe' chazrinnu gaxúa ga xun zra.

⁴Benne' chupa caní zaj naque' ca chupa xaga olivo ca', ne ca zaj naca chupa da zaj zuan xi', da ca' zaj zua na lau Dios, Xrane xezr la xu.

⁵Che nu benne' dxaca lazre' guzrí xi'e benne' caní, na' le' xululube' xi' da

dxuaj lu dxu'e ca', na' guzéxete na benne' ca' dxeledábague' le'. Caní gate núteteze benne' tábague' benne' chupa caní. ⁶Benne' chupa caní zaj nape' xel-la' dxenná bea xeluné' ga quebe gaca xiuj dxácaté na' dxelenné' waláz chee Dios. Cá'anqueze zaj nape' xel-la' dxenná bea xeluné' xaca nisa dxen, ne chee xulusaca zi'e bénneache nen xúgute' xízrawe' ca', bátatezla dxelaca lazre'. ⁷Gate bache belexuzre beluné' zrin chee', na' be' xixre' snia, be' dxedxúajba' lataj chul-la, tíl-laleba' benne' chupa ca', na' quél-laba' le', ne gúteba' le'. ⁸Bela' dxen gate chee benne' caní xelexegá'ana na la neza chee xezre zrentau' naga gudá' Xránadxu xaga begúaj, ne ca dxutil-la Dios lebe, le na Sodoma, ne Egipto. ⁹Lawe' chunna zra xugachaj, bénneache chee xúgute' cue' benne', ne benne' xezre ca', ne benne' zra du gabí'i xezr la xu, ne benne' dxelenné' dizra' walazre' cha chee' xelexé'ene' bela' dxen gate chee benne' caní, ne quebe xelu'e lataj nu benne' gucache' le'. ¹⁰Benne' zaj zre'e lu xezr la xu xelexe' lawe' da zaj nate benne' caní, na' xelexezaca ba lázre'e, ne xelexe' le' da xulunezruj ljwezre' tue' xetue' lawe' da bulusaca zi' benne' caní gulenné' waláz chee Dios bénneache ca'. ¹¹Gate guca chunna zra xugachaj, na' Dios bsebane' benne' caní, na' belexase', na' xúgute' benne' ca' belelé'ene' le' belezrébele'e. ¹²Nadxa dxúpaté benne' ca' dxelexechebe belenne' chi'i tu benne' dxenné' zizraj xabáa, dxé'e benne' ca':

—Le xegüén nigá.

Na' belexegüene', na' belelé'e benne' ca' dxeledábague' le' ca guca. ¹³Ca'an gúcaté guzrú'le'e xezr la xu, na' xu'u zaj nita na lu xezre na' gulebía xi na, na' gulate gazre cue' da nacan chi gaxúa bénneache weaj ne chee' da guzrú'. Benne' ca', benne' quebe gulate lu xezre na', nen duté xel-la' dxelezrebe belúe lá'ane' Dios zue' xabáa.

¹⁴Ba gudé da gudxupe' da ba xa' da xeledé bénneache, na' la za'te da guxunne'.

**Gubáz gazre dxuchínene'
da dxucuezre'**

¹⁵Gubáz gazre bchínene' da dxucuezre', na' ben chi'i benne' zan xabáa dxelenné' zizraj:

Naga dxelenná bea bénneache lu xezr la xu ba guledé na

lu na' Xránadxu Dios, ne lu na' Cristo chee',
na' Le' nna be'ene' lataj ca' chadía chacanna.

¹⁶Nadxa tape dxua benne' gula ca' zaj dxe'e dxu'a lataj blau naga dxe' Dios buluzú zribe' zaj nuzuate lawe' zran ni'e, dxulucá'ana szrene' Dios, ¹⁷dxelenné': Xcalenu', Xran.

Dios, napu' duté xel-la' dxenná bea. Guzúaquezu', ne zúaquezu', ne tu súaquezu', lawe' da ba guzi'u xel-la' dxenná bea zrente' chiu',

ne ba guzú lau' dxenná be'u.

¹⁸Bénneache xúgute xezre ca' dxelezzré'e san ba bzin zra gudé'u benne' ca' ba xa', zra na' guchi'u chee benne' gate ca'.

Xunézruju' da naca chee benne' ca' gulenné' waláz chiu',

ne da naca chee benne' ca' zaj naque' chiu',

ne da naca chee benne' ca' beluné' Lue' ba lá'ana,

benne' blau ca', ne benne' quebe nu zaj naca.

Ba bzin zra guzría xi'u benne' ca' buluzría xi'e xezr la xu.

¹⁹Nadxa bxfalaj xudau' chee Dios da zua xabáa, na' ble'e lau xi'ina naga xu'u xel-la' wezría xrlátaje chee', da zua na lu xudau' na'. Gulepe xesa, ne guleninne na, ne gulenné guzi'u, ne guzrú' xezr la xu, na' bxínnajle'e xiaj bezxe'.

Tu nu'ula ne be snia schanni' zrente

12 Nadxa ble'e lau tu da zrente xabáa. Zua tu nu'ula naca zra lane' ca gubizra, na' zran ni'e zua da naca ca beu', na' xíchaje' zria tu da zaca zaj zria na chazrinnu belaj. ²Nu'ula nigá zué' zi'i, ne dxebezre xe'e xel-la' dxudi'a sane' tu bidau', dxedéle'e xel-la' zi' chee galaj bidu na'. ³Nadxa ble'e lau xabáa xetú da zrente, zua tu be snia schanni', be xrna, zua gazre xíchajba' ne chi lúzuba', na' zria tu da zaca tu tu xíchajba' ca'. ⁴Nen xrbamba' gucá'a dxéguba' xáteze quebe guca gáchajte belaj zaj zria zran xabáa, na' bzálaba' na lu xezr la xu. Be snia schanni' na' guzeba' lau nu'ula na' sane' bidau' chee gáguba' bidu na' gate ze gálajbe'. ⁵Nu'ula na' guzane' tu bi biudau', bi na' nna be'ebe' duté xezr la xu nen tu var xia. Nadxa bi biu chee nu'ula na' gucá'a Dios lebe', na' bexu'e-be' lataj blau chee' naga dxe'e. ⁶Na' nu'ula na' bzrúnnuje' zéaje' le'e xixre' lawe' lataj naga nucueza Dios tu lataj naga sua nu'ula na', naga xulugawe' le' lawe' chazrinnu gaxúa ga xun zra.

⁷Gudé na' guxú'u wedil-la xabáa gate gubáz chee xabáa blau le' Miguel nen gubáz chee xabáa zaj da' le' guledíl-lalene' be snia schanni' zrente. Be snia schanni' na', ne gubáz zaj de'e-ba' beluné' wedil-la. ⁸Quebe bi gulezéquene' lu wedil-la na', na' québedxa guta' lataj chee gubáz ca' lu xabáa. ⁹Ca'an guca gulebéaje' be snia schanni' na' xabáa, be snia na' zúaba' nédxute, na' nazí laba' da xriwe', ne Satanás, da na' dxezí xe na xúgute bénneache. Da xriwe' na', ne gubáz ca' zaj de'e na guledxú'une' na lu xezr la xu.

¹⁰Nadxa benda' tu chi'i benne' gunné' zizraj xabáa:

—Ba bla' xel-la' weselá, ne xel-la' szren, ne xel-la' dxenná bea chee Dios cheedxu, ne xel-la' dxenná bea chee

Cristo chee', lawe' da ba guledxú'üne' da na' gudagu zria na chee' benne' bíchedxu, da na' dxagu zria na chee' benne' ca' te zra, ne chizrela lau Dios cheedxu. ¹¹ Benne' bíchedxu ca' beledxúaje' chawe' ne chee' dxen chee' Bénnea' naque' Zríla'dau', ne ne chee' da belexechebe' ca naca chee' dizra' chee' Cristo, ne quebe belezrebe' nu benne' gutié' le'. ¹² Chee' le' na' gata' xel-la' dxebé xabáa.

¡Le be le'e zrale xabáa!

¡Edxugua benne' ca' zaj zre'e xezr la xu, ne lawe' nísadau'

lawe' da ba bla' da xriwe' naga zúale, dute' xel-la' dxezra'a chee' na,

lawe' da neze na xáte'ga ne de chee' na!

¹³ Gate guque be'e da xriwe' ba buluzale' na lu xezr la xu, na' gudxé' nau na nu'ula na' guzane' bi biudu na'. ¹⁴ Nu'ula na' bulunézruje' le' chupa xri'le' zren ca xri'la bsia chee' gaca xexiaje' xezue' le'e xixre' lawe' lataj, zitu' naga zua be snia schanni' na', na' bulugawe' le' lawe' chun iza xugachaj. ¹⁵ Be snia schanni' na' bexébeba' nisa chee' benba' tu xegu chee' gua na nu'ula na'. ¹⁶ Gúcale' xezr la xu nu'ula na'. Bzra xezr la xu, na' gudebe na xegu na' bexebe be snia schanni' na'. ¹⁷ Chee' le' na' bzra'le'e da xriwe' nu'ula na', na' guxíaj na xejtíl-lale' na xrtia nu'ula na' zaj zre'e xezr la xu, benne' ca' dxuluzié' dizra' da bdxixruj be'e Dios, ne dxelexechebe' ca naca chee' Jesucristo.

Chupa be xixre' snia ca'

13 Nadxa guzéa' dxu'a nísadau', ne ble'eda' bdxuaj tu be xixre' snia lu nísadau' na', zua gazre xíchajba', ne chi lúzuba'. Zria tu tu lúzuba' na' tu da zaca, na' da' tu laba' xíchajba' ca' da dxecuide Dios. ² Be xixre' snia nigá nácaba' ca tu bezrtau', na' ní'aba' zaj naca na wal-la ca ni'a oso, na' dxú'aba' naca na ca dxu'a bezre xixre'. Be snia schanni' bnézrujba' xel-la' dxenná bea cheeba',

ne lataj blau cheeba', ne xel-la' waca cheeba' lu na' be snia na' nácaba' ca bezrtau'. ³ Zua tu we' tu xichaj be xixre' snia na' nácaba' ca bezrtau' da gute na leba', na' we' na' bexaca na, na' ca naca bèneache ca' zaj zre'e lu xezr la xu belexe-bánele'ene', ne zjácálene' be xixre' snia na'. ⁴ Bulucá'ana szrene' be snia schanni' na' lawe' da bnézrujba' xel-la' dxenná bea chee' be xixre' na' nácaba' ca bezrtau', ne cá'aqueze bulucá'ana szrene' be xixre' snia na', dxeleenne':

—¿Núzraqueze naca ca be xixre' nigá, ne nu seque' tíl-lale' leba'?

⁵ Nadxa da xriwe' be na leba' lataj gunneba' dizra' zri'a, na' gunneba' da calela chee' Dios, ne gudápaba' xel-la' dxenná bea lawe' chupe xun beu'. ⁶ Gunneba' da calela chee' Dios, ne chee' La Dios, ne chee' lataj lá'azxa chee', ne chee' benne' ca' zaj zre'e xabáa. ⁷ Cá'aqueze guziba' xel-la' dxenná bea tíl-laleba' benne' ca' zaj naque' chee' Dios, ne gúteteba' benne' ca', na' guziba' xel-la' dxenná bea lu xúgute' cue' bèneache, ne benne' zaj zre'e xúgute' xezre ca', ne xúgute' cue' xezr la xu ca', ne benne' dxelenne' dizra' walazre' cha chee'. ⁸ Xúgute' benne' zaj zre'e xezr la xu bulucá'ana szrene' be xixre' snia na', benne' ca' quebe zaj naxúaj le' lu xiche naga zaj naxúaj la benne' ca' zaj nape' xel-la' nabán, xiche na' bzuaj Bénnea' naque' Zríla'dau' belutie'-ba'.

⁹ Che nu benne' zua nague', dxal-la' xenne' dizra' nigá. ¹⁰ Benne' ca' dxelegú'e bèneache lizre xia, cá'aqueze xelú'u benne' ca' lizre xia, na' benne' ca' dxelutie' benne' nen xia nalá, cá'aqueze xelatie' lu xia nalá. Chee' le' na' benne' zaj naque' chee' Dios dxal-la' xelaque' zren lazre', ne xeléajle'e chee' Dios.

¹¹ Gudé na' ble'eda' xetú be xixre' snia bdxúajba' lu xezr la xu. Bea nigá zua chupa lúzuba' zaj naca na ca luzu zríla'. Bea nigá gunneba' ca be snia schanni' na'.

¹²Bea nigá nápaba' dutę xel-la' dxenná bea da napa bę nedxu na', gate zúaba' lau bę nedxu na', na' gunná be'eba' ca naca bęnneache zaj zřęę dutę xęzr la xu xulucá'ana szrenę' bę nedxu na', bea na' bexaca wę' cheęba' da na' naca gute lęba'. ¹³Bę gudxupe' na' bęnba' xel-la' waca zří'a ca', ne bęnba' bęxrui xi' zran xabáa lu xęzr la xu lau bęnneache ca'. ¹⁴Nę cheę xel-la' waca ca' da bęnba' lau bę nedxu na', guzí xęba' benne' zaj zřęę xęzr la xu, na' gunná be'eba' benne' ca' xelunę' tu bedau' ca naca bę nedxu na', bea na' guzúa wę' cheę xia nalá, na' naca bánquezeba'. ¹⁵Bę gudxupe' na' guziba' xel-la' dxenná bea gunézrujba' xel-la' nabán bedau' na' naca na ca bę nedxu na', cheę nņę bedau' na', ne gute na xúgutę benne' quebe xulucá'ana szrenę' na'. ¹⁶Cá'anqueze bedau' na' gunná be'e na zriche tu da gunna bea na luzrgá u lu na' zua xabela cheę xúgutę bęnneache, benne' blau, ne benne' quebe nu naca, ne benne' gunń'a, ne benne' xache', ne benne' zaj nada'u, ne benne' zaj zřęę cá'aze. ¹⁷Netú benne' quebe gaca ga'uwe' ne gutię' che quebe zriche da na' dx-unna bea na lę', u la bę xixre' snia na', u xrbaba ca naca laba'. ¹⁸Nu benne' gulabe' da nigá dxal-la' gaque' sina. Benne' dxéajni'ine' waca gulabe' ca naca xrbaba cheę laba'. Naca na tuze ca naca xrbaba cheę bęnneache, na' xrbaba nigá naca na xrupa gaxúa ga xun xrupa.

Da dxelul-la tu gaxúa tape xun cue' chi gaxúa weaj benne'

14 Gudé na' gunná'a, na' ble'eda' Bęnnea' naque' Zříla'dau' ze' lu xi'a Sión. Tu zren nen Lę' zaj zra' tu gaxúa tape xun cue' chi gaxúa weaj benne', zaj zriche luzrguę' La Bęnnea' naque' Zříla'dau', ne La Xřę'. ²Nadxa benda' tu da dxeninne na da za' xabáa, da dxeninne na ca schaga' da dxelún zánęte xegu ca', ne ca schaga' da dxun

guziu' gate dxennęlęę na, ne ca dxeninne naga zaj zra' zánęte benne' dx-elínnię' da ca' cun zříadi'i na du. ³Belul-łę' tu da cube dxu'a lataj blau naga dxe' Dios, ne lau tapa benne' ca' zaj zua n-bancze', ne lau tape dxua benne' gula ca'. Netú benne' xezica quebe guca gul-łę' ca naca da na' belul-łę'. Dxaca dxelul-le na benne' tu gaxúa tape xun cue' chi gaxúa weaj, benne' ca' gulełę' lálwela benne' zaj zřęę xęzr la xu. ⁴Benne' caní quebe gulezúalęnę' nu'ula cheę benne' xula, san belexegá'ana chawę', na' zjácälęnę' Bęnnea' naque' Zříla'dau' gátęteze zéaję'. Benne' caní gulełę' lálwela bęnneache, ne zaj naque' lau Dios ca tu da blaudxa cheę da dxezidxu, da dxuzúadxu lau Dios, ne lau Bęnnea' naque' Zříla'dau'. ⁵Cabata' dxelún lazřę', na' zaj naque' du lazřę' dxu'a lataj blau naga dxe' Dios.

Dizra' da dxuluzén chunna gubáz cheę xabáa bęnneache

⁶Nadxa ble'eda' xetú gubáz cheę xabáa dxedę' lu be' zran xabáa, napę' dizra' chawę' da chadía chacanna, cheę guzenne' na benne' ca' zaj zřęę xęzr la xu, benne' xúgutę cue' bęnneache, ne benne' xúgutę cue' xęzr la xu, ne xúgutę xęzre, ne benne' dxelennę' dizra' walazřę' cha cheę'. ⁷Gubáz na' gunnę' zizraj:

—Le zřebe Dios, ne le güe lánana Lę' lawe' da ba bzrin zra guchi'a Lę' cheę bęnneache. Le gucá'ana szren Bęnnea' bęnę' xabáa, ne xęzr la xu, ne nísadau', ne beaj ca'.

⁸Xetú gubáz cheę xabáa zéaję' cuzru gubáz cheę xabáa nedxu na', dxennę':

—¡Ba guzřía xi'! ¡Ba guzřía xi' xęzre Babilonia, xęzre zren na', lawe' da bulusuzre' benne' xęzre ca', ne benne' dutę xęzr la xu nen da naca ca xrise uva wal-la cheę da sban da dxelunę'!

⁹Xetú gubáz cheę xabáa zéaję' cuzru gubáz chupa ca', dxennę' zizraj:

—¡Che nu benne' dxucá'ana szrené' be snia na', ne bedau' cheęba', ne gu'e lataj zriche luzrgue' u ne'e laba', ¹⁰ benne' nigá téé' lu da ba xa' da nucueza Dios lu xel-la' dxezrá'a chee', na' saca zi'e lu xi' chee da dxuzéxle'e na lau gubáz chee xabáa ca' chee Dios, ne lau Bénnea' naque' Zríla'dau'! ¹¹ ¡Zren chee xi', naga saca zi'e, cuen na chadía chacanna, na' xelezaca zi' te zra ne chizrela benne' ca' dxulucá'ana szrené' be snia na', ne bedau' cheęba', ne dxelu'e lataj zriche laba' luzrgue'! ¹² ¡Chee le na', benne' ca' zaj naque' chee Dios, ne dxuluzúe' dizra' ca nadx-ixruj be'ene', ne zjácálene' da naca chee Jesús, dxal-la' xelaque' zren lazre'!

¹³ Nadxa benda' chi'i tu benne' da za xabáa. Dxe'e neda':

—Bzuaj da nigá: Na'a, ne lu da za za' ba neza zrente naca na chee benne' gate ca' xelute bénneache le' lawe' da dxeléa-jlé'e chee Xránadxu. Be' Lá'azxa dxenné': “¡Ca' naca na, lawe' da xelexezí lazre' ca naca lu zrin da belune', na' da xrlátaje da belune' zeajle na benne' ca'!”

Lina chee xezr la xu

¹⁴ Nadxa guná'a, na' ble'eda' tu beuj chiche, na' lawe' beuj na' dxe' tu benne' naque' ca Bénnea' gulje' bénneache. Zria tu da naca na oro xíchaje', ne nuxre' tu xia nalá. ¹⁵ Bdxuaj tu gubáz chee xabáa lu xudau' da zua xabáa, na' gunné' zizraj. Dxe'e bénnea' dxe'e lawe' beuj:

—¡Bchine xia nalá chiu', ne becá'a lina, lawe' da ba bzrin zra, na' lina chee xezr la xu ba guca na!

¹⁶ Nadxa bénnea' dxe'e lawe' beuj na' gudine' xia nalá chee' na', na' beque'e lina chee xezr la xu.

¹⁷ Nadxa xetú gubáz chee xabáa bdx-uaje' xudau' da zua xabáa, nuxre' tu xia nalá. ¹⁸ Xetú gubáz chee xabáa bdxuaje' lu cugu, gubáz chee xabáa na' nape' xel-la' dxenná bea lu xi', na' gunné' zizraj.

Dxe'e gubáz chee xabáa na' nuxre' xia nalá:

—¡Bchine xia nalá chiu' na', ne becá'a uva ca' da zaj den lu xezr la xu lawe' da ba güe na!

¹⁹ Na' gubáz chee xabáa na' gudine' xia nalá chee' lawe' xezr la xu, ne beque'e uva ca' da zaj de lu xezr la xu da zéaje na benne' ca' dxelune' da zrinnaj, na' bzre'e na naga xelesíe' na, da na' zéaje na da ba xa' da nucueza Dios chee benne' ca' dxelune' da zrinnaj. ²⁰ Uva ca' gulesíe' na naga dxedxuaj xezre, na' naga dxelesíe' na bdxuaj dxen chee benne' ca' dxelune' da zrinnaj da gulén na cáтите sibe zua dxu'a bzrina', na' guzá' dxen na' cáтите sadxu du gazre zra.

Gubáz chee xabáa ca' zaj nuxre' gazre da ba xa' da xuluzále' xezr la xu

15 Ble'eda' xabáa xetú da zrente da xebánedxu, belelá' gazre gubáz chee xabáa zaj nuxre' gazre da ba xa' bzebe, da zaj naca na naga cheajsęte xel-la' dxezrá'a chee Dios.

² Cá'anqueze ble'eda' tu da naca na ca nísadau' da naca na ca xiaj esa', ne nachixre na xi', na' benne' ca' quebe gulezí lu ne'e da naca na chee be snia na', ne da nacan chee bedau' cheęba', ne xrbaba chee laba', zaj ze' lu nísadau' na' da naca na ca xiaj esa', zaj nuxre' da ca' con zríadi'i na du da ba bnezruj Dios le'. ³ Dxelul-le' da bil-la Moisés, benne' wen zrin chee Dios, ne da dxul-la Bénnea' naque' Zríla'dau', da dxenná na: Da zrente, ne da dxebánedxu zaj naca xúgute da ba benu' Lue'.

Xran, nacu' Dios napu' dute xel-la' dxenná bea.

Xrlátaje, ne li lazre' zaj naca xrba chiu' Lue'.

Nacu' Wenná Bea chee dute xezr la xu.

⁴ ¿Núzraqueze quebe zrebe Lue', Xran?

¿Núzraqueze quebe güe lá'ana Lue'?

Tuze Lue' nacu' lá'azxa.

Xelélé' benne' duté xęzr la xu, na' xulucá'ana szrené' Lue', lawe' da ba belelé'ene' da xrlátaje da nunu'.

⁵Gudé na' gunná'a ne ble'eda' bxlaj xudau' da zua na xabáa, naga zua lataj naga zaj naxúaj da ca' bdxixruj be'e Dios. ⁶Lu xudau' na' beledxúaj gazre gubáz chee xabáa ca' zaj nuxre' gazre da ba xa'. Zra lane' zaj nacue' naca na ladxe' zaca, da naca na ba'a, ne dxelácitate na, na' zaj nasíe' lachu'e' bazzu da naca na oro. ⁷Nadxa tu benne' laduj tapa benne' zaj naca bánqueze' bnézuje' tu tu gubáz gazre ca' tu xé'ena bzri da naca na oro, ne zaj nazrate na da ba xa' da nucueza Dios, Bénnea' zue' chadía chacanna. ⁸Guzrate xudau' na' nen zren chee xi' da dxulé'e na ca zaj naca xel-la' szren, ne xel-la' dxenná bea chee Dios, na' netú benne' quebe guca chu'e ga na' cadxa gudé chee da gazre da ba xa' ca' da zaj nuxru gazre gubáz chee xabáa ca'.

Da gazre da ba xa' ca'

16 Nadxa benda' chi'i tu benne' gunné' zizraj lu xudau'. Dxe'e gazre gubáz chee xabáa ca':

—Le chjaca, le cheajzala da ba xa' ca' lu xęzr la xu, da ca' nucueza Dios.

²Na' guxéaj gubáz chee xabáa nedxu, xeajlatje' xé'ena bzri chee' lawe' xęzr la xu, na' xúgute bénneache, benne' zaj nazriche luzrgue' la be snia na', ne dxulucá'ana szrené' bedau' cheeba', gulebía we' lu bela' dxen chee benne' ca' da gulále'e na.

³Gubáz gudxupe' xeajlatje' xé'ena bzri chee' lu nísadau', na' nísadau' na' bexaca na dxen ca dxen chee benne' gate, na' gulate xúgute bea zaj naca banba' lu nísadau' na'.

⁴Gubáz guxunne' xeajlatje' xé'ena bzri chee' lu xęgu nisa ca', ne lu beaj ca', na' belexaca na dxen. ⁵Na' benda' chi'i

tu gubáz chee xabáa dxenná be'ene' nisa caní, gunné':

—Xran, Dios Lá'azxa, zúaquezu', ne guzúaquezu'. Xrlátaje nacu' lawe' da guchugu' chee benne' ca' guca caní, ⁶lawe' da bululalje' dxen chee benne' chiu' ca', ne chee benne' ca' gulenné' waláz chiu', na' na'a dxuxí'aju' benne' caní dxen lawe' da caní zaj naca chee xelé'aje'.

⁷Cá'anqueze benda' chi'i tu benne' zue' lu cugu, dxenné':

—Ca' naca na, Xran. Nacu' Dios napu' duté xel-la' dxenná bea. Ba bchi'u chee bénneache ca' ca naca da li, ne da xrlátaje.

⁸Gubáz gudape' xeajlatje' xé'ena bzri chee' lau gubizra, na' gubizra guzí na lataj guzezx na bénneache ca' nen xi' chee na. ⁹Xúgute bénneache gulézx-ele'e, ne quebe belexebí'i lazre', ne quebe belúe lánę' Dios, san gulenné' da calela chee Bénnea' nucueze' da ba xa' na'.

¹⁰Gubáz gázxue xeajlatje' xé'ena bzri chee' lawe' lataj naga dxe' be xixre' snia, na' naga dxenná beaba' guchul-la na. Bénneache ca' gulagu xa'a luzre' lu xel-la' dxudía chee', ¹¹ne quebe bulusané' da zrinnaj da dxelune'. Gulenné' da calela chee Dios zue' xabáa, lawe' da dxelezaque' caní ne chee we' da zaj zria bela' dxen chee' ca'.

¹²Gubáz xrupe xeajlatje' xé'ena bzri chee' lawe' xęgu zren le na Eufrates, na' nisa xęgu na' bebizre na, chee xalaj tu neza naga xeledé benne' dxjaca wedil-la chee benne' wenná bea ca' zá'aque' naga dxalaj gubizra.

¹³Nadxa ble'eda' beledxúaj chunna be' xriwe' dxu'a be snia schanni', ne dxu'a be xixre' snia na', ne dxu'a benne' dxenné' waláz cheeba'. Be' xriwe' ca' zaj naca na ca bluzru ca'. ¹⁴Be' xriwe' caní belún na xel-la' waca zri'a ca', na' beledxúaj na chee xulutupa na xúgute benne' wenná bea chee xęzr la xu, chee chjaque' lu

wedil-la chee zra zren chee Dios, Bénnea' nape' duté xel-la' dxenná bea.

¹⁵ Dxenná Xránadxu:

—Le na' xque, neda' xida' gate quebe dxebézale neda', ca za' tu benne' gubán. Ba neza zrenté naca na chee bénnea' zue' ban lazre' ne nupé'e lázrdawe' ca tu benne' dxuxúe' zra lane' chee quebe te' gala xídeze, ne quebe xedué'ene' lau bénneache.

¹⁶ Nadxa beledube' benne' wenná bea ca' lu lataj naga le na Armagedón nen dizra' hebreo.

¹⁷ Gubáz gazre na' xeajlatje' xé'ena bzri chee' lu be', na' lu xudau' da zua xabáa ben tu chi'i benne' dxenné' zizraj, da za na lataj blau naga dxe' Dios, dxenné':

—Bache naca na.

¹⁸ Nadxa gulepe xesa, ne guleninne na, ne gulenné guziu', na' lu xezr la xu guzrú'le'e ca netú lasa quebe ne xru', na' gulálate zaj zra' bénneache lu xezr la xu. ¹⁹ Xezre zrentau' na' guzrá na chunna cue', na' xezre ca' zaj nita lu xezr la xu gulebía xi na, na' xeajsá lazre' Dios benne' ca' chee xezre zrentau' na' le na Babilonia chee xeledé' lu da ba xa' zren da nucueza Dios lu xel-la' dxezrá'a chee'.

²⁰ Xúgute xezr la xu ca' da naxechaj nísadau', ne xúgute xi'a ca' belexenite na.

²¹ Cá'anqueze belexruj zran xabáa xiaj bezxe' zri'a lawe' bénneache ca', da dxelá'a na ca tu gaxúa xia weaj, na' bénneache ca' gulenné' da calela chee Dios ne chee da ba xa' da gulezaque', lawe' da guca na tu da ba xa' zrente.

Dios dxuzría xi'e nu'ula dxúnle'e da sban

17 Nadxa bla' tu gubáz chee gazre gubáz chee xabáa ca', gubáz ca' bululátaje' xé'ena bzri ca', na' guzre' neda':

—Gudá, na' gulé'eda' lue' ca naca da ba xa' da saca' nu'ula na' dxúnle'e da sban, nu'ula na' dxe'e lawe' nísadau' ca'.

² Benne' wenná bea ca' zaj zre'e xezr la xu dxeluné' da sban nen nu'ula na', na' benne' zaj zre'e xezr la xu zaj naque' ca benne' dxelezuzre' lawe' da dxeluné' da sban nen nu'ula na'.

³ Nadxa, lu da ble'e Be' Lá'azxa neda', gubáz chee xabáa na' guché'e neda' le'e xixre' lawe' lataj, na' lataj na' ble'eda' tu nu'ula zrie' cuzru tu be xixre' schanni' xrna, na' zaj naxúaj lu bela' dxen cheeba' laba' schanni' ca', da ca' dxeuide Dios, na' zaj naca gazre xíchajba', ne chi lúzuba'. ⁴ Nu'ula nigá nacue' zra lane' bzawe, ne da xrna, na' lechítaje chee' zaj naca na oro, ne xiaj xrtante, ne bga ca'. Nuxre' tu xé'ena bzri da naca na oro da nazrate na da sgute ca', ne da sban da dxuné'. ⁵ Naxúaj luzrgue' ca le', da dxenná na: Babilonia, Xezre Szrentau', Xrna' Xúgute Nu'ula Ca' Dxeluné' Da Sban, ne Xúgute Da Sgute Da De Xezr La Xu. ⁶ Nadxa ble'eda' nu'ula na' dxezúzrene' nen dxen chee benne' ca' zaj naque' chee Dios, ne chee benne' ca' belute bénneache le' lawe' da belexechebe' chee Jesús. Gate ble'eda' da na', bebánele'eda'. ⁷ Nadxa gubáz chee xabáa na' guzre' neda':

—¿Bizr chee na' dxebánenu'? Gulé'eda' lue' ca naca da nagache chee nu'ula nigá, ne chee be xixre' schanni' na' núaba' le', bea na' zaj napa gazre xíchajba', ne chi lúzuba'. ⁸ Be xixre' schanni' na' blé'enu', nácaba' tu be zúaba' nédxute, na na'a québedxa zúaba'. Wagüenba' lu lataj chul-la nédxudxa ca za gáteba' tu chí'izqueze. Benne' zaj zra' xezr la xu, ne quebe zaj naxúaj le' lu niche chee xel-la' nabán ca bente Dios xezr la xu, xelexebánele'ene' gate xeledé'ene' bea nigá, be zúaqueze nédxute, na' na'a québedxa zúaba', na' wela'ba'.

⁹ Nigá de late' da gulé'eda' benne' xeléajni'ine' na. Gazre xíchajba' caní zaj zéaje na gazre xi'a naga dxenná bea nu'ula na'. ¹⁰ Cá'anqueze xíchajba' ca'

zaj zéaję na gazre benne' wenná bea. Gazxu' benne' wenná bea caní ba gualatię'. Tu benne' ca' dxenná be'e na'a, na' xetue' quebe ne xide'. Gate la' benne' bzebe nigá, québedxa súateque' scha'.
¹¹ Be xixre' schanni' na', be zúaba' nédxute, na' na'a québedxa zúaba', zéaję na benne' xrunu' naque' benne' wenná bea. Naque' tu benne' ládujla benne' gazre ca', na' te na' gatię' tu chí'izqueze.

¹² Chi lúzu be xixre' snia na' da blé'enu' zaj naca na chi benne' wenná bea ca', benne' quebe ne xelezú lawę' xelenná be'e, na' xelezífę' xel-la' dxenná bea xelaque' wenná bea tu chí'ida'u'ze tu zrennen be xixre' schanni' na'.
¹³ Benne' chi wenná bea caní zaj nune' tuze dizra', na' xulunézruje' xel-la' szren chee', ne xel-la' dxenná bea chee' lu na' bėnnea' naque' be xixre' schanni' na'.
¹⁴ Benne' caní xeledíl-lalene' Bėnnea' naque' Zríla'dau', na' Benne' nigá guzría xi'e benne' wenná bea ca', lawe' da naca Le' Benne' Wenná Bea chee' benne' wenná bea ca', ne Xrane benne' zaj naque' xrane bėnneache, na' benne' ca' zráłene' Le', gunné Dios le', ne guquę'e le', na' zaj naque' li lazre'.

¹⁵ Cá'anqueze gubáz chee' xabáa na' guzre' neda':

—Nísadau' ca' blé'enu', naga dxe' nu'ula na' dxúnle'e da sban, zaj naca na xezre bėnneache ca', ne benne' dxelenné' dizra' walazre' cha chee', ne benne' zane cue' xezr la xu.
¹⁶ Chi lúzuba' na' blé'enu' xichaj be xixre' schanni' na', da zaj naca na chi benne' wenná bea ca', xelecuídenę' nu'ula na' dxúnle'e da sban, na' xelebéaj xíchaję' le', ne xulucá'ane' le' gala xídeze. Xelawe' belá' dxen chee', ne xuluzezxę' le' lu xi'.
¹⁷ Dios bzuę' lu lázrdau benne' wenná bea ca' xelunę' ca da dxaca lazre' Le', gate belunę' tuze dizra', ne bulunézruje' xel-la' dxenná bea chee' lu na' bėnnea' naque' be xixre' schanni' na', cadxa gaca ca da ba gunná Dios.
¹⁸ Nu'ula na' blé'enu' naque' Babilonia,

xezre zrentau' na' dxenná be'e na benne' wenná bea ca' zaj zre'e xezr la xu.

Dxebía xi' xezre Babilonia

18 Gudé na' ble'eda' betaj xetú gubáz chee' xabáa, nápale'e xel-la' dxenná bea, na' bsení' xel-la' szren chee' lu xezr la xu.
² Na' gunné' zizraj:

—Ba guzría xi'. Ba guzría xi' Babilonia, xezre zrentau' na', ne ba hexaca na lataj naga zaj zra' da xriwe' ca', ne lataj naga zaj zra' xúgute' cue' be' xriwe' ca', ne lataj naga zaj zra' be zua xrila, be schanni' ca', ne be sgute ca'.
³ Xúgute' bėnneache zaj zre'e tu tu cue' xezr la xu zaj naque' ca benne' dxelezuzre', lawe' da dxelunę' da sban da dxaca xezre na', na' benne' wenná bea ca' zaj zre'e xezr la xu belunę' da sban da dxaca xezre na', na' benne' ca' dxelúti'e gulaque' benne' gunní'a ne chee' da zante da gulezá lazre' benne' ca' zaj zre'e xezre na'.

⁴ Nadxa benda' chí'i xetú benne' da za xabáa, dxenné':

—Le dxuaj xezre na', le'e, nácale chia', chee' quebe gácale benne' ca' tuze lu dul-la da dxelunę', ne chee' quebe tele lu da ba xa' da xelezaca benne' ca'.
⁵ Dul-la chee' benne' ca' ba guxán na, na' zaj naca na ca tu da ba bgula, da ba bzrintę' na zran xabáa, na' Dios ba xeajsá lazre' ca naca da zrinnaj da dxelún benne' ca'.
⁶ Dios gunézruje' chee' benne' ca' cáteze da bulunézruje' chee' benne' xula, ne xunézruje' le' chupa cuenla ca da zrin-naj da belunę'. Ba nucueze' da xeleza-que' da nácale'ędxza zi' ca da bulusaque' benne' xula.
⁷ Gudée' benne' ca' lu da ba xa', ne gudée' le' xel-la' zi' cáteze na' belunę'. Buluzúa cuine' lu xel-la' szren, ne gulezúę' lu xel-la' dxelexezaca ba lazre' chee', lawe' da dxelenné' lu lázrdawę': Dxé'entu' nigá dxenná bėantu'. Quebe nácantu' wezebe, ne quebe bi sá-cantu'.
⁸ Chee' le' na', tuze zra xelezrín da ba xa' ca' da xelezaque', xel-la' gute, ne

xel-la' zi', ne xel-la' dxedún, na' xelexze' lu xi', lawe' da napa Xránadxu Dios dutę xel-la' dxenná bea, na' naque' Bénnea' guchugue' cheę benne' ca' xelexaque' caní.

⁹Benne' wenná bea ca' zaj zře'ę xęzr la xu, ne belúnleńe' benne' ca' da sban ne da belexezaca ba lazře', xelexezre xache' gate xelexé'ene' ca naca zren cheę xęzre na', da dxezxe na. ¹⁰Welezé' zítu'la lawe' da xelexrebe' xelexaque' ca da dxelezaca benne' ca', na' xelenné':

—Baxache' nácale le'e, benne' zaj zře'ę xęzre zrentau', Babilonia, lawe' da chaditę bla' da ba xa' da dxezácale.

¹¹Cá'aqueze benne' ca' dxelúti'e, benne' zaj zře'ę xęzr la xu, welebezře', ne welebezre xáchequeze' ca naca da dxaca cheę xęzre na', lawe' da québedxa nu chilá' benne' si'ę da dxeluti'e,

¹²da zaj naca oro, ne plata, ne xiaj xrtante' ca', ne bga ca', ne ladxe' zaca ca', ne ladxe' bzawe ne da xrna, ne xúgute' cue' xaga ca' dxelexále'ę na zixre,

ne zrita xrtante, ne xaga xrtante, ne xia gache, ne xia, ne xiaj esa',

¹³ne lacu zixre, ne xíxre'dau' dxelále'ę na zixre,

ne xala, ne da ca' dxelexále'ę na zixre, ne xrise uva wala, ne za xel-la' wagu,

ne xrte xezaj, ne zrua' xtila, ne bę xixre', bę dxelúa' xua',

ne zřila' ca', ne bzřina' ca', ne da ca' dxudé' xua,

ne benne' ca' dxelúti'e le' lu na' benne' gunń'a ca'.

¹⁴Benne' caní xelé'ę benne' zaj zře'ę xęzre na':

—Na'a québedxa gápale da zixre ca' da zácale'ę na da bdánnelę'ęle, ne ba bnítele tu chí'izqueze xúgute' xel-la' gunń'a cheęle, ne da xrtante' cheęle.

¹⁵Benne' ca' belúti'e da ca' xelexé' zítu'la lawe' da dxelexrebe' xelexaque' ca

da dxelezaca benne' zaj zře'ę xęzre na', na' xelexezře', ne xelexezre xáchequeze', ¹⁶na' xelenné':

—Baxache' zaj naca benne' ca' zaj zře'ę xęzre zrentau' na'. Gulaque' ca tu nu'ula nacue' ladxe' zácale'ę da bzawe, ne da xrna, ne nazí'ę lechítaje da naca na oro, ne xiaj xrtante, ne bga ca'. ¹⁷Chaditę benite xel-la' gunń'a na', ne guxezxe na.

Xúgute' benne' xrane da ca' dxeledán lawe' nísadau', ne benne' zaj zře'ę lu'ule na, ne benne' dxulusé'ę da ca' dxeledán lawe' nísadau', ne benne' dxelune' zřin lu nísadau' belezé' zítu'la, ¹⁸na' gate belelé'ene' zren cheę xęzre na' dxezxe na, na' gulenné' zizraj:

—¿Bízraqueze xetú xęzre naca na da zren ca xęzre zrentau' nigá?

¹⁹Dutę xel-la' dxelexewí'ine lazře' xuluzře'ę xu xíchaje' ca', ne xelexezře', ne xelexezre xáchequeze', xelenné':

—Baxache' zaj naca benne' ca' zaj zře'ę xęzre zrentau' na'. Nen xel-la' gunń'a cheę benne' ca' gulenni'a xúgute' benne' ca' zaj nape' da ca' dxeledán lawe' nísadau'. Chaditę guzřia xi' xęzre zrentau' na'.

²⁰Ca guca cheę xęzre na', le be, le'e zrale xabáa, ne le'e, gubáz cheę Cristo, ne le'e bchálajle waláz cheę Dios, ne xúgutele le'e nácale bi cheę Dios, lawe' da gate bzřia xi' Dios xęzre na', bebéaj lazře' da naca cheęle le'e.

²¹Nadxa tu gubáz cheę xabáa, gubáz nápale'ę xel-la' dxenná bea guchise' tu xiaj zren da naca na ca xiaj xiche, na' bzale' na lu nísadau', gunńé':

—Cá'ante cuía xi' Babilonia, xęzre zrentau' na', na' québedxa nu lé'ęquezdxa le na, ²²ne québedxa nu xen la neza cheę xęzre na' da ca' dxulugul-la bėnneache, da can zřiadí'i na du, ne bchiuj, ne luzu da dxulucuezře', ne québedxa nu chilá' gun zřin lu xęzre na', ne québedxa xen schaga da dxun da dxutu na. ²³Québedxa gusení' netú xi' lu

xęzre na', ne québedxa xen laní cheę wechaga na' ga na', lácala benne' ca' belúti'e lu xęzre na' gulenná be'e lawe' xúgute benne' zaj zře'e xęzr la xu, ne gulezí xę'e xúgute cue' xęzr la xu nen xel-la' wazrá' cheę'.

²⁴ Caní guca lawe' da lu xęzre na' gualalaj dxen cheę benne' ca' gulenné' waláz cheę Dios, ne dxen cheę benne' ca' zaj naque' bi cheę Dios, ne dxen cheę benne' ca' belute bėnneache le' du ca naca xęzr la xu.

19 Gudé na' benda' chi'i benne' zan zaj zře'e xabáa, dxelenné' zizraj: ¡Gaca ba Dios! ¡Xel-la' weselá, ne xel-la' szren, ne xel-la' dxenná bea zaj naca na cheę Dios cheędxu.

² Ca dxuchi'a Le', xrlátaje, ne li lazre' naca na!

¡Ba bzria xi'e xęzre na' dxul'e na nu'ula na' núnle'e da sban,

nu'ula na' bxrínnaje' bėnneache zaj zře'e dutę xęzr la xu lu da sban da bęęe'!

¡Dios ba bebėaj lazre' nu'ula na' lawe' da bętie' węn zrin ca' cheę Dios!

³ Nadxa gulenné' da xula:

—¡Gaca ba Dios lawe' da tu cuénzqueze zren cheę xęzre na' dxezxe na!

⁴ Nadxa tape dxua benne' gula ca' ne tapa benne' ban ca' buluzú zribe', na' bulucá'ana szrenę Dios, Bėnnea' dxe'e lataj blau na', dxelenné':

—¡Ca' naca na! ¡Gaca ba Dios!

⁵ Nadxa ben tu chi'i benne' lu lataj blau na', dxenné':

¡Le güe lá'ana Dios cheędxu, xúgutele le'e dxunle zrin cheę',

ne dxezrébele Le', le'e benne' blau, ne benne' quebe nu nácale!

Laní cheę wechaga na' cheę Bėnnea' naque' Zrřla'dau'

⁶ Cá'anqueze benda' tu da naca ca chi'i benne' zan, ca dxeleninne zánete xęgu, ne ca dxelennéle'e guziu' ca', dxelenné':

¡Gaca ba Dios lawe' da ba guzú lau dxenná bea Xránadxu Dios, Benne' nape' dutę xel-la' dxenná bea!

⁷ ¡Du be! ¡Béle'equezdXu, ne güe lá'anadXu Le'!

¡Ba bzrin zra cheę laní wechaga na' cheę Bėnnea' naque' Zrřla'dau'!

Nu'ula na' si'e ba nupá'a cuínabe',

⁸ nu'ula na' nazi'ibe' lataj nácube' ladxe' zaca, da quebe nadxén na, ne dxácatite na.

Ladxe' zaca na' zéaje na da xrlátaje da zaj nun benne' ca' zaj naque' bi cheę Dios.

⁹ Nadxa guzre gubáz cheę xabáa neda':

—Bzuaj caní: Ba neza zren naca na cheę benne' ca' gunné Dios xelexe'e laní wechaga na' cheę Bėnnea' naque' Zrřla'dau'.

Nadxa guzre' neda':

—Da caní zaj naca na dizra' li cheę Dios.

¹⁰ Nadxa bzu zriba' lau gubáz cheę xabáa na' cheę gucá'ana szrena' le', na' le' guzre' neda':

—Quebe gunu' caní lawe' da nácaqueza' neda' węn zrin cheę Dios ca lue', ne ca benne' bichu' ca' zéajlele da li na' da ble'e Jesús le'e. Bca'ana szren Dios. Da li na' da ble'e Jesús le'e naca na da dxelenná benne' ca' dxuluchálaje' waláz cheę Dios.

Benne' zrię bzrina' chiche

¹¹ Nadxa ble'eda' ba naxalaj xabáa, na' ble'e lau tu bzrina' chiche, na' Benne' zrię'-ba' le' Du Lazre', ne Li Lazre', lawe' da dxenná be'e, ne dxune' wedil-la lu da xrlátaje. ¹² Xiaj lawe' dxelácatite na ca xi' ca, na' xíchaje' zaj zria zánete da zaca ca', na' naxúaj tu le' lawe', da nézene' tuze Le'. ¹³ Nacue' tu zře' da nazaj na dxen, na' La Le' naca na Xrtizra Dios. ¹⁴ Xúgute benne' ca' zaj zře'e xabáa zjácalęę Le', zaj nacue' ladxe' zaca ca', ladxe' chiche zřladau', ne zaj zrię' bz-

rina' chiche ca'. ¹⁵Dxu'a Bénnea' zua tu da naca na ca tu xia nalále'e da quine' benne' xezre ca', na' nna be'ene' benne' ca' nen tu bar xia. Le' guzría xi'e benne' ca' ca tu benne' dxesie' uva ca', ne dx-uléaje' na, da zéaje na da ba xa' da nu-cueza Dios lu xel-la' dxezra'a chee', ca da xelezaca bénneache ca'. ¹⁶Naxúaj le'e zre', ne zríchuje' da nazí Le' caní: Benne' Dxenná Be'ene' Benne' Wenná Bea Ca', ne Xrane Benne' Ca' Zaj Naque' Xrane Bénneache.

¹⁷Nadxa ble'eda' tu gubáz chee xabáa ze' lu gubizra, na' gunné' zizraj xúgute be zua xrila, be dxeledá zran xabáa, dxenné':

—Le da. Le zraga gágule da dxúnnale'e Dios le'e, ¹⁸chee gágule bela dxen chee benne' wenná bea ca', ne chee benne' dx-elenná be'e lu wedil-la, ne chee benne' wal-la ca', ne chee bzrina' ca', ne chee benne' zaj zrie'-ba', ne chee xúgute bén-neache, benne' ca' zaj nadá'ue', ne benne' ca' quebe zaj nadá'ue', benne' blau ca' ne benne' quebe nu zaj naque'.

¹⁹Nadxa ble'eda' be xixre' schanni', ne ca naca benne' wenná bea zaj zre'e xezr la xu nen benne' dxjaca wedil-la chee ' ca', ba nazrague' chee xeledíl-lalene' Bénnea' zrie' bzrina' chiche na', ne nen benne' ca' zaj de'e Le'. ²⁰Gulel-le' be xixre' schanni' na' tu zren nen bénnea' gunné' waláz cheeba', bénnea' ben-le'e xel-la' waca zren lauba'. Ne chee xel-la' waca caní da bene', benne' nigá guz' xe'e benne' ca' belú'e lataj guzriche luzrgue' laba', ne bulucá'ana szrene' bedau' cheeba'. Nadxa beleché'e be xixre' schanni' na', ne bénnea' gunné' waláz cheeba', na' belegu'e le' zaj nabante' lu xi' chee da dxuzéxle'e na da dxe' ca tu nísadau'. ²¹Nadxa Bénnea' zrie' bzrina' chiche betie' benne' ca' xezícala nen xia nalá na' zua dxu'e, na' xúgute bea ca' zaj zua xrila gulélajba' bela dxen chee benne' ca'.

Chi gaxúa iza

20 Gudé na' ble'eda' betaj tu gubáz chee xabáa, nuxre' zren xia chee lataj chul-la, ne nuxre' tu du xia zren. ²Gubáz nigá gudel-le' be snia schanni', nácaba' bela' zua nédxute, ne nácaba' da xriwe', ne Satanás, na' bcheaje'-ba' du xia lawe' chi gaxúa iza. ³Na' gudxú'üne'-ba' lataj chul-la na' naga bsézxuje'-ba', na' bde'e le'e dxa xu'u na' tu da gunna bea na, chee québedxa si xe na bénneache chee xezr la xu ca' cadxa te chi gaxúa iza. Te chee chi gaxúa iza, dxal-la' xelá' na tu chí'idau'.

⁴Nadxa ble'eda' lataj blau ca', naga zaj dxe' benne' ca' ba zaj nazi'e xel-la' dxenná bea chee xuluchi'e ca da zaj nun bén-neache. Cá'anqueze ble'eda' bénne'du ca' gulexú'u bénneache ca' gulechugu bén-neache xíchaje' lawe' da belexechébe' chee Jesús, ne buluchálaje' xrtizra Dios. Benne' caní quebe bulucá'ana szrene' be xixre' schanni' na', ne bedau' cheeba', ne quebe belú'e lataj zriche laba' luzrgue', u ne'e. ⁵Benne' gate ca' xezícala quebe xelexebane' ca tedxa chee chi gaxúa iza ca'. Da nigá guca naca na xel-la' dxexe-bán nedxu. ⁶Ba neza zrente naca na chee benne' ca' zaj naque' bi chee Dios, benne' ca' xelexebane' nedxu. Da zi' da xa' da zeajlí canna quebe seque' bi gune na benne' ca'. Xelaque' bxruze chee Dios, ne chee Cristo, na' xelenná be'e tu zren nen Le' chi gaxúa iza.

⁷Ca te chee chi gaxúa iza ca', na' la' Satanás naga nadxéaj na, ⁸na' xedxúaj na chee cheajxri xe na bénneache zaj zre'e xúgute cue' xezr la xu ca'. Si xe na bénneache xezre Gog, ne xezre Magog, na' guchaga na benne' dxjaque' wedil-la chee xúgute cue' xezr la xu lu wedil-la, na' benne' dxjaque' wedil-la zaj naque' benne' zan ca naxán xuzre' da dxe' dxu'a tu xegu zren. ⁹Ca' guca, beledxúaje' du ca naca lu xezr la xu, na' guléchaje' naga

zaj zra' benne' zaj naque' chee Dios, ne xezre na' da nazrí'i Dios. Nadxa Dios gusel-le' xi' da za' xabáa, na' bzezxe xi' na' ca naca benne' ca'. ¹⁰Nadxa gulel-le' da xriwe', da guzi xē na bēneache ca', na' guledxú'üne' na lu xi' chee da dxuzézrele'e na da dxe' ca tu nísadau', naga zaj zra' bē xixre' schanni', ne bēneea' gunné' waláz cheeba'. Lu xi' na' xeledé'e lu da ba xa' te zra, ne chizrela chadía chacanna.

Dios dxe'e lataj blau chiche, dxuchi'e chee benne' ca' dxelune' da zrinnaj

¹¹Nadxa ble'eda' tu lataj blau chiche, ne Bēneea' dxe'e lataj na'. Lau Le' belexenite xezr la xu, ne xabáa, na' québedxa nu benne' lé'ene' da ca'. ¹²Nadxa ble'eda' benne' gate ca', benne' blau, ne benne' quebe nu zaj naque', zaj ze' lau Dios, na' belexalaj xiche ca', ne cá'aqueze xetú xiche naga zaj naxúaj la benne' ca' zaj nape' xel-la' nabán. Dios bchi'e chee benne' ca' cáteze da belún tu tue', da ca' zaj naxúaj na lu xiche ca'. ¹³Belexedxúaj benne' gate ca' zaj nagache' lu nísadau', ne belexedxúaj benne' gate ca' zaj nagache' lataj chul-la chee benne' gate, na' Dios bchi'e chee xúgute' cáteze da belún tu tue'. ¹⁴Nadxa guledxú'üne' benne' gate ca' gulezúe' lataj chul-la naga zra' benne' gate lu xi' chee da dxuzézrele'e na da dxe' ca tu nísadau'. Xi' nigá naca na da zi' da xa' da zeajlí canna, ¹⁵na' lu xi' nigá guledxú'üne' xúgute' benne' ca' quebe zaj naxúaj le' lu xiche chee xel-la' nabán.

Tu xabáa cube ne tu xezr la xu cube

21 Ca gudé na' ble'eda' tu xabáa cube, ne tu xezr la xu cube, lawe' da belexenite xabáa nedxu, ne xezr la xu nedxu, na' québedxa de nísadau'. ²Neda', Juan, ble'eda' xezre lá'azxa, da naca na Jerusalén cube, dxetaj na xabáa, za na naga zua Dios. Xezre na' nabeza na ca tu nu'ula wechaga na' nupá'a cuínabe' chee

gácabe' tuze nen benne' cheebe'. ³Benda' chi'i tu benne' da za' xabáa, dxenné':

—Gunná'xque, Dios zue' ládujla bēneache, na' xelaque' xezre chee', na' Dios súaqueze' nen benne' ca', ne gaque' Dios chee'. ⁴Dios tu súaalezqueze' benne' ca' chee québedxa xebezeze', na' québedxa gata' xel-la' gute, ne xel-la' gubezre, ne xel-la' dxebezre xache', ne xel-la' dxudía, lawe' da ba gudé chee xúgute' da gulaca nédxute.

⁵Nadxa Dios, Bēneea' dxe'e lataj blau na' gunné':

—Gunná'xque, neda' dxuna' cube xúgute' da ca'.

Cá'aqueze gunné':

—Bzua' dizra' caní lawe' da naca lí lazre', na' waca guxrén lázrele le' na.

⁶Gudé na' guzre' neda':

—Ba bēna' xúgute' da ba gunnía' guna'. Neda' naca' Benne' zúaqueze' nédxudaute, ne Benne' zúaqueze' bzébedxa. Naca' Bēneea' dxuna' su lau sua xúgute, ne dxuna' xexuzre na. Nu benne' dxe-bílene', neda' gunézruja' nisa beaj xí'aje' da gunezruj na le' xel-la' nabán, ne quebe bi quízruje'. ⁷Nu benne' zrue'ene' si'e xúgute' da caní, neda' gaca' Dios chee', na' le' gaque' zri'ina'. ⁸Benne' ca' zaj naque' zra' chebe, ne benne' ca' quebe dxeléajle'e chia', ne benne' ca' dxelune' da zrinnaj, ne benne' ca' dxelutie' benne', ne benne' dxelune' da sban, ne benne' wazrá' ca', ne benne' dxulucá'ana szrene' bedau' xiaj xaga ca', ne xúgute' benne' dxelún lazre', gudéa' le' lu xi' chee da dxuzézrele'e na da dxe' ca nísadau', da naca na da zi' da xa' da zeajlí canna.

Jerusalén cube

⁹Nadxa bla' tu gubáz chee gazre gubáz chee xabáa ca' belúxrue' gazre xé'ena bzri ca' naga zaj xu'u da gazre da ba xa' bzebe ca', na' guzre' neda':

—Gudá. Gulé'eda' lue' nu'ula wechaga na', zru'ula Bēneea' naque' Zríla'dau'.

¹⁰ Lu da ble'e Be' Lá'azxa neda', gubáz chee xabáa na' guché'e neda' tu xi'a zren, ne sibe, na' blé'ene' neda' ca naca xezre lá'azxa zren na', Jerusalén cube. Dxetaj na xabáa naga zua Dios. ¹¹ Xezre nigá dxácatite na nen da xabáa chee Dios, na' xel-la' dxácatite chee na naca na ca dxácatite tu xiaj xrtante, ca tu xiaj jasje, da naca na ca xiaj esa' xrtante. ¹² Dxu'a xezre na' naxechaj na tu ze'e sibe, na' napa na chazrinnu dxa xu'u, na' tu tu dxa xu'u ca' zaj ze tu weaj gubáz chee xabáa, na' le'e dxa xu'u ca' zaj naxúaj la chazrinnu cue' benne' Israel. ¹³ Zaj zua chunna dxa xu'u weaj dapa sácate. ¹⁴ Lu lane ze'e da naxechaj na xezre na' zaj zra' chazrinnu xiaj, na' zaj naxúaj lu xiaj ca' la chazrinnu benne' gubáz chee Bénnea' naque' Zríla'dau'.

¹⁵ Gubáz chee xabáa na' dxuchálajlene' neda' nuxre' tu da naca na ca tu xia xtila da naca na oro chee gudxixre' xezre na', ne dxa xu'u chee na ca', ne ze'e da naxechaj na. ¹⁶ Xezre na' naca na lébete dapa saca. Lébete naca na xel-la' tunna, ne xel-la' laga chee na. Gubáz na' bdxixre' xezre na' nen da nuxre', na' naca na laga catite sadxu tapa gaxúa zra, na' xel-la' laga, ne xel-la' tunna, ne xel-la' sibe chee na zaj naca na lébete. ¹⁷ Gudé na' bdxixre' xel-la' sibe chee ze'e na' naxechaj na. Naca na tu gaxúa tape xun zrita, na' chazrita chee gubáz chee xabáa na' naca na lébete ca chee bénneache.

¹⁸ Ze'e na' da naxechaj na xezre na' naca na xiaj jasje, na' xezre na' naca na oro du lazre', da naca na ca xiaj esa' du lazre'. ¹⁹ Xiaj lane ze'e na' zaj naca na xiaj xrtante ca':

Xiaj nedxu naca na xiaj jasje,
na' xiaj gudxupe' naca na xiaj zafiro,
na' xiaj guxunne' naca na xiaj ágata,
na' xiaj gudape' naca na xiaj esmeralda,
²⁰ na' xiaj gáxxue naca na xiaj ónice,
na' xiaj xrupe naca na xiaj cornalina,
na' xiaj gazre naca na xiaj crisólito,

na' xiaj xrunu' naca na xiaj berilo,
na' xiaj ga naca na xiaj topacio,
na' xiaj chi naca na xiaj crisoprasa,
na' xiaj chinéaj naca na xiaj jacinto,
na' xiaj chazrinnu naca na xiaj amatista.

²¹ Chazrinnu da dxusezxuj na dxa xu'u ca' zaj naca na chazrinnu bga ca'. Tu tu na naca na tuze bga. Neza blau chee xezre na' naca na oro du lazre', ca xiaj esa' du lazre'.

²² Quebe ble'eda' netú xudau' xezre na', lawe' da Xránadxu Dios, Bénnea' nape' duté xel-la' dxenná bea, nácaqueze' xudau' chee xezre na', ne cá'aqueze naca Bénnea' naque' Zríla'dau'. ²³ Xezre na' quebe nachine na gusení' gubizra na', ne beu', lawe' da dxusení' queze da xabáa chee Dios ga na', na' Bénnea' naque' Zríla'dau' naque' xel-la' naxaní' chee na. ²⁴ Bénneache chee xúgute cue' xezr la xu, bénneache gulelé', xeledé' lu xel-la' naxaní' chee xezre na', na' benne' wenná bea ca' chee xezr la xu xelu'e da gunni'a chee lu xezre na'. ²⁵ Dxa xu'u chee xezre na' quebe xezxuj na te zra, na' québedxa gata' chizrela. ²⁶ Xelu'e xel-la' szren, ne xel-la' ba lá'ana chee xúgute cue' xezr la xu lu xezre na'. ²⁷ Cabata' chu'u da sban ga na', ne netú benne' dxuné' da zrinnaj, ne netú benne' dxun lazre'. Xelú'uze benne' ca' zaj naxúaj le' lu xiche chee xel-la' nabán da napa Bénnea' naque' Zríla'dau'.

22 Nadxa gubáz chee xabáa na' blé'ene' neda' tu xegu nisa da dxunna na xel-la' nabán. Naca na xaní' ca xiaj esa', na' dxedxuaj na lataj blau naga zaj dxe' Dios, ne Bénnea' naque' Zríla'dau'. ² Laduj neza blau chee xezre na' zaj naxaza xaga dxupa la'a dxu'a xegu na', na' da zixre chee xaga caní' zaj naca na da dxunna na xel-la' nabán, ne dxe-bía na da zixre chazrinnu lasa tu tu iza. Dxebía na da zixre chee na tu tu beu', na' xrlegue xaga na' naca na da dxexún na benne' zaj zre'e du gabí'i xezr

la xu. ³Québedxa bi gata' da xu'u de'. Lataj blau naga zaj dxe' Dios, ne Bénnea' naque' Zríla'dau' sua na lu xezre na', na' benne' wen zrin chee' ca' xulucá'ana szrene' Le'. ⁴Xelelé'ene' Le' caníqueze, na' La Dios zriche na luzrgá benne' ca'. ⁵Québedxa gata' chizrela ga na', na' benne' zaj zre'e na' quebe xelechinne' xi', ne xel-la' naxaní' chee gubizra, lawe' da Xránadxu Dios guseni'e benne' ca', na' benne' ca' xelenná be'e chadía chacanna.

Ba zua gagu zra xelá' Cristo

⁶Nadxa gubáz chee xabáa na' guzre' neda':

—Dizra' caní zaj naca na li lazre', ne waca guxrén lázrele le na. Xránadxu Dios, Bénnea' dxuzúe' Be' chee' xichaj lázrdau benne' ca' dxelenné' waláz chee' ba gusel-le' gubáz chee xabáa chee' chee gulé'ene' benne' wen zrin chee' da ba zua gaca, ⁷dxenné': "La zátequeza'. Ba neza zrente naca na chee benne' zéajlene' dizra' chee Dios da naxúaj na lu xiche nigá."

⁸Neda', Juan, benda', ne ble'eda' da caní. Ca gudé benda' na, na' bzu zriba' zran ni'a gubáz chee xabáa na', gubáz blé'ene' neda' da caní chee gucá'ana szrena' le'. ⁹Na' le' guzre' neda':

—Quebe gunu' ca' lawe' da naca' wen zrin chee Dios ca nactu' lue', ne ca zaj naca benne' bichu' ca' dxelenné' waláz chee Dios, ne ca zaj naca xúgute' benne' ca' zjácálene' ca da naxúaj na lu xiche nigá. Bca'ana szren Dios.

¹⁰Cá'anqueze guzre' neda':

—Quebe gucachu' ca naca dizra' chee Dios da naxúaj na lu xiche nigá lawe' da ba zua gaca da naxúaj na. ¹¹Dxá-cate na', be' lataj benne' dxelune' da zrin-naj xelúnqueze' da zrin-naj dxelune', ne benne' ca' dxelune' da sban xelúnqueze' da sban na', san benne' xrlátaje ca' xelún-queze' da xrlátaje, na' benne' zaj naque'

bi chee Dios chjácálequeze' da naca na chee'.

¹²Dxenné':

—Ca' naca. La zátequeza', ne nu'a ca naca da gunézruja' tu tu benne' ca', cáteze da zaj nun tu tue'. ¹³Neda' naca' benne' zúaqueza' nédxudaute, ne benne' zúaqueza' bzébedxa, bénnea' dxuna' su lau sua xúgute, ne dxuna' xexuzre na. ¹⁴Ba neza zrente naca na chee benne' ca' dxulupé'e xichaj lázrdawe' ca tu benne' dxibe' zra lane', chee xelape' lataj xelawe' da zixre chee xaga da dxunna na xel-la' nabán, na' caní xeze'equene' xelu'e lu dxa xu'u chee xezre na'. ¹⁵Benne' ca' dxelune' da zrin-naj quebe xelu'e ga na', ne québequeze xelú'u benne' wazrá' ca', ne benne' dxelune' da sban ca', ne benne' wete benne', ne benne' dxulucá'ana szrene' bedau' xiaj xaga ca', ne benne' zaj nazri'ine' da wen lazre', ne benne' dxelún lazre'. ¹⁶Neda', Jesús, ba gusel-la' gubáz chee xabáa chia' chee xuluzenne' tu tu cue' bènneache chia' ca naca da nigá. Neda' naca' ca xra xrtau David, benne' wenná bea, ne naca' zri'ine zre sua David na'. Neda' naca' ca belaj zila da dxácátitele'e na.

¹⁷Be' Lá'axza, ne benne' ca' zaj naca ca zru'ula Bénnea' naque' Zríla'dau', dxelenné':

—Gudá, Xran.

Nu benne' xenne' da nigá dxal-la' nne':

—Gudá, Xran.

Benne' dxebílene', ne dxaca lazre' dxal-la' xide', na' xí'aje' nisa da dxunna na xel-la' nabán, na' quebe bi quízruje'.

¹⁸Xúgutele le'e dxulábale dizra' chee Dios da naxúaj na lu xiche nigá, neda' dxuzéajni'ida' le'e da nigá: Che nu benne' bi gudé'e chee da caní, Dios gudé'e chee bénnea' da ba xa' ca' da zaj naxúaj na lu xiche nigá. ¹⁹Cá'anqueze che nu benne' bi xequé'e chee da zaj naxúaj na lu xiche nigá, Dios wecá'aqueze' da naca chee bénnea' lu xiche chee xel-la' nabán, ne lu

xēzre lá'azxa cheē', cáteze naxúaj na lu
xiche nigá.

²⁰ Xránadxu, Bénnea' dxulé'ene' da
nigá, dxenné':

—Ca' naca na. La zátequeza'.

¡Ca' gaca na! ¡Gudá, Xrana' Jesús!

²¹ Dxenaba' Xránadxu Jesucristo gunē'
da chawe' cheele le'e, xúgutele. ¡Ca'an
gaca na!